



Nhandejáry Nhe'ẽ

Kaiwá New Testament

Contents

| | |
|-----------------------------|-----|
| MATEUS | 1 |
| MARCOS | 70 |
| LUCAS | 108 |
| JOÃO | 184 |
| ATOS | 233 |
| ROMANOS | 297 |
| 1 CORÍNTIOS | 326 |
| 2 CORÍNTIOS | 357 |
| GÁLATAS | 377 |
| EFÉSIOS | 389 |
| FILIPENSES | 398 |
| COLOSSENSES | 404 |
| 1 TESSALONICENSES | 411 |
| 2 TESSALONICENSES | 417 |
| 1 TIMÓTEO | 421 |
| 2 TIMÓTEO | 429 |
| TITO | 435 |
| FILEMOM | 439 |
| HEBREUS | 441 |
| TIAGO | 464 |
| 1 PEDRO | 473 |
| 2 PEDRO | 482 |
| 1 JOÃO | 488 |
| 2 JOÃO | 494 |
| 3 JOÃO | 495 |
| JUDAS | 496 |
| APOCALIPSE | 499 |

Nhandejáry Nhe'ẽ

New Testament in Kaiwá (BR:kgk:Kaiwá)

copyright © 2006 Wycliffe Bible Translators, Inc.

© 2006, Wycliffe Bible Translators, Inc. All rights reserved.

Language: Kaiwá

Translation by: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaiwá

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

ISBN 978-1-5313-0327-3

PDF generated on 21 Sep 2016 from source files dated 21 Sep 2016

7ba4d793-0e4f-5efd-8f91-509f2a6d9f6a

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

Hesu Cristo rehegwa nhe'ë porã Mateus remimombe'ukwe o evangelho de Mateus

Hesu Cristo rembypykwe héry kwéry
(Lc 3.23-38)

¹ Hesu Cristo Davi amyri remiarirõ joapyri pyri voi. Ha Davi amyri katu Abraão amyri remiarirõ joapyri pyri voi. Hembypykwe héry kwéry a-rami. ² Yma ete va'ekwe oiko va'ekwe Abraão amyri. Ta'yry jevy jevyha ko va'e. Ta'yry Isaque. Upéi Isaque ra'y jevy Jacó. Upéi ta'yry jevy Judá tyvry kwéry ave. ³ Upéi Judá ra'y jevy, Perez tyvry Zerá ndive oiko va'ekwe. Isy héry Tamar. Upéi Perez ra'y jevy Esrom. Upéi ta'yry jevy Arão. ⁴ Upéi ta'yry jevy Aminadabe. Upéi ta'yry jevy Naassom. Upéi ta'yry jevy Salmom. ⁵ Upéi ta'yry jevy Boaz. Isy katu héry Raabe. Upéi Boaz ra'y jevy Obede. Isy katu héry Rute. Upéi Obede ra'y jevy Jessé. ⁶ Upéi ta'yry jevy mburuvixagwasu Davi.

Upéixa Abraão amyri-gwi mburuvixagwasu Davi amyri peve oĩ va'ekwe quatorze he'yi joapyri pyri va'ekwe.

Upéi Davi ra'y jevy Salomão. Isy katu Urias rembirekokwe. ⁷ Upéi Salomão ra'y jevy Roboão. Upéi ta'yry jevy Abias. Upéi ta'yry jevy Asa. ⁸ Upéi ta'yry jevy Josafá. Upéi ta'yry jevy Jorão. Upéi ta'yry jevy Uzias. ⁹ Upéi ta'yry jevy Jotão. Upéi ta'yry jevy Acáz. Upéi ta'yry jevy Ezequias. ¹⁰ Upéi ta'yry jevy Manassés. Upéi ta'yry jevy Amom. Upéi ta'yry jevy Josias. ¹¹ Upéi ta'yry jevy Jeconias tyvy kwéry ndive.

Oiko jave Jeconias, he'yi kwéry ndive oipyhy-ma íxupe heraha-vy Babilônia vvy akéno-py.

Upéixa Davi amyri-gwi vvy akéno-py ojereraha hagwe peve oĩ va'ekwe quatorze he'yi joapyri pyri va'ekwe. ¹² Vvy akéno-py ojereraha rire, oiko va'ekwe Jeconias ra'y Salatiel amyri. Upéi ta'yry jevy Zorobabel. ¹³ Upéi ta'yry jevy Abiúde. Upéi ta'yry jevy Eliaquim. Upéi ta'yry jevy Azor. ¹⁴ Upéi ta'yry jevy Sadoque. Upéi ta'yry jevy Aquim. Upéi ta'yry jevy Eliúde. ¹⁵ Upéi ta'yry jevy Eleázar. Upéi ta'yry jevy Matã. Upéi ta'yry jevy Jacó. ¹⁶ Upéi ta'yry jevy José. Ha'e Maria ména. Upe Maria Hesu sy voi. Hesu héry ave Cristo, Nhandejáry rembiporavokwe voi, judeu kwéry remiha'arõ va'e voi.

¹⁷ Upéixa vvy akéno-py ojereraha hagwe-gwi Cristo peve oĩ va'ekwe quatorze he'yi joapyri pyri va'ekwe.

Hesu Cristo oikomaha
(Lc 2.1-7)

¹⁸ Hesu Cristo oikomaha a-rami. Oiko va'ekwe Maria isyrã José rembirekorã. Omenda e'ỹ mboyye, oikwaa-ma va'ekwe omembyrã. Ome'ë-ma va'ekwe íxupe imembyrã Nhe'ë Marangatu tee va'e. Ndaha'éi kwimba'e-gwi. ¹⁹ Ha imenarã José katu tekoha-rupi voi oiko va'e. Oikwaa gwembirekorã imemby-tagwi, oposite mo'ã íxugwi: "Imemby reita xe rembirekorã" he'i mo'ã. "Xe nda'e mo'ãi joty mba'eve atyra-py" he'i ojúepe jepy'amongeta-vy. Upéa-gwi, "Apoi nhemi-ta íxugwi" he'i mo'ã ojúepe.

²⁰ Pyhare onhemongeta ha'e ae opy'a ndive: "Mba'éixa po apoi-ta íxugwi?" he'i he'i ojúepe. Upéi ikéra-py ojehexa uka íxupe Nhandejáry rembigwái yváy pygwa:

—Nde, José, Davi remiarirõre, he'i ohenói-vy íxupe. —Eraha katu Maria-pe nde róga-py ne rembirekorã. Ani katu ereti teĩ ereiko-vy indive. Ani erenoti teĩ ne rembirekorã ogwereco-ta va'e mitã, he'i íxupe. —Nhe'ë Marangatu tee va'e-rupi ae ogwereco-ta upe va'e mitã, he'i íxupe. ²¹ —Oiko-ta imemby kwimba'e va'e. Gwe'yi kwéry-gwi omboyke va'erã hembiaipo vaikwe, he'i íxupe ikéra pygwa. —Upéa-gwi erehenói va'erã íxupe Hesu-py. Pene resendeharã-gwi embohéry íxupe Hesu, he'i íxupe Nhandejáry rembigwái ikéra-py imombe'u-vy.

²²⁻²³ —Yma Nhandejáry nhe'ë-py omombe'u va'ety remimoigwe kwatia-rehe a-rami:

“Oĩ oikwaa va'erã omembyrã omenda e'ỹ reheve. Ha upe rire katu oiko-ma va'erã imemby. Emanuel-py ohenói va'erã imemby-pe”

he'i upe Nhandejáry rembiporavokwe Cristo syrã-rehe. Emanuel he'i Nhandejáry-rehe nhane moirũharã-rehe. Ipokatu voi upe va'e Nhandejáry kwatia nhe'ẽ. Upéa-gwi yma gware he'i hagwe-rami ãy oiko-ma.*

²⁴ Ko'ẽmba rire opáy-ma José. Ohendupa-ma Nhandejáry nhe'ẽ. Ogweraha-ma Maria gwóga-py gwembirekorã mo'ã. ²⁵ Hembireko jepe, gwembireko e'ỹ-rami joty ogwereco. Omboete-gwi íxupe, ogwereco mombyry joty íxupe. Ndokéiry vyteri hendive. Ha upe rire ae katu imemby kwimba'e oiko-ma rire, ogwereco ete-ma katu gwembireko-pe, ojehe'a tee-ma hese. Áy katu oiko tee gwembireko ndive. Maria memby rypykwe-pe, “Hesu” he'i ombohéry-vy íxupe.

2

Kwarahy resẽ-gwi ogwahẽ ou-vy hi'arandu eterei va'e

¹ Ha upéi katu Herodes mburuvixagwasu ramo oiko jave, oiko-ma Hesu. Belém tetã-my, Judéia vvy-py oiko-ma. Upe jave ogwahẽ-ma ou-vy Jerusalém tetã-my mombyrygwa hi'arandu eterei va'e. Mombyry-gwi kwarahy resẽ-gwi ou ra'e:

² —Kipy tipo oime mitã'i judeu kwéry ruvixagwasurã oiko va'ekwe? he'i oporandu-vy. —Pe mitã'i oikomaha kwaa ukaha va'e jasytata ojeupi oho-vy ramo kwarahy resẽ-my, orohexa-ma va'ekwe. Upéa-gwi mitã'i-pe orojú oromboete-vy, he'i Jerusalém tetã mygwape.

³ Judeu ruvixarã rerakwã ohendu-ma ramo judeu ruvixagwasu Herodes, onhemondýi voi. Ndaipy'agwapyvéi-ma voi upéa oikwaa ramo. Entéro Jerusalém tetã mygwa gwive onhemondyipa hikwái. Ndaipy'agwapyvéiry oikwaa ramo upéa hikwái. ⁴ Upéa-gwi Herodes ohenói ou hagwã pa'i ruvixa kwéry gwive judeu rekombo'ehaty kwéry ndive:

—Mamo-py po oiko va'erã upe Nhandejáry rembiporavo Cristo? Kipy tipo hekwagwã? Mbava'e tipo he'i va'ekwe yma gware kwatia nhe'ẽ? he'i oporandu-vy íxupe kwéry.

⁵ —Belém tetã-my, Judéia vvy-py oiko-ta, he'i. —Nhandejáry nhe'ẽ-py omombe'u va'ety remimoĩgwe kwatia-rehe he'i a-rami:

⁶ “Ha'e-ta Belém tetã, Judéia vvy pygwa-rehe. Tetã'i jepe tuvixave va'e-rami joty. Upe-gwi oiko va'erã mburuvixagwasu. Gwymba-rehe onhangarekoha-rami, onhangareko va'erã Israel kwéry xe re'ýi kwéry-rehe”

he'i Nhandejáry kwatia nhe'ẽ. Upéa-gwi upe Nhandejáry rembiporavo oiko-ta Belém-py, he'i Herodes-pe hikwái.*

⁷ Upe ramo Herodes ohenói ou hagwã upe hi'arandu va'e kwéry. Omoha'e anho ohenói-vy oporandu hagwã upe jasytata-rehe:

—Araka'e pyhare po ojehexa uka ra'e peẽ-my jasytata? he'i oporandu-vy íxupe kwéry.

⁸ Oikwaa-ma ramo omondo Belém-py:

—Tapeho pejohu peve peheka íxupe, he'i. —Mamo pa oime pehexa porã. Petopa-ma ramo íxupe, peju jevy kuri pemombe'u xe-vy aikwaa hagwã xe ave aha hagwã ahexa íxupe, aha hagwã xe ave amboete íxupe, he'i mo'ã upe hi'arandu va'e-pe.

⁹ Ohendu-ma ramo mburuvixa nhe'ẽ, oje'ói hikwái oheka-vy. Upéi upe jasytata ojeupi ypy jave kwarahy resẽ-my ohexa va'ekwe oho henonde-rupi. Upéi mitã'i oimeha ári opyta yvate-py. ¹⁰ Ohexa ramo, ovy'a eterei.

—Iporã ete katu. Jahexa jevy-ma jasytata, he'i herovy'a-vy.

¹¹ Upéi ogwahẽ oho-vy óga-py. Upe-py ohexa mitã'i-pe isy Maria ndive oiko ramo. Gwetyppy'ã-rehe onhesũ imboete-vy íxupe. Omomba'egwasu íxupe hikwái. Upéi oipe'a imba'e rryru-gwi. Omboete eterei-vy, ome'ẽ rei mitã-pe ouro hepy va'e. Ome'ẽ íxupe hyakwã porã va'e, incenso héry va'e. Ome'ẽ ave íxupe hyakwã porã va'e mirra héry va'e ave. ¹² Pyhare ogwahẽ ou-vy Nhandejáry rembigwái yváy gwigwa. He'i:

* 1:22-23 Is 7.14 * 2:6 Mq 5.2

—Aníke peho jevy mburuvixa róga-rupi, he'i hi'arandu va'e-pe.
Ike-py omombe'u íxupe. Upéa-gwi oikupe'o pe'o oje'ói-vy hikwái gwe'ýi ha-py.

Ogwerokanhy heraha-vy mitã'i Egito-py

¹³ Oho rire oje'ói-vy upe hi'arandu va'e, pyhare ojehexa uka ou-vy Nhandejáry rembigwái yváy gwigwa. José oke jave, ojehexa uka íxupe:

—Epu'ã katu, he'i, —eraha isy ndive mitã'i. Erokanhy heraha-vy mitã'i Egito yvy-py. Epyta ranhe upe-py eiko-vy. Xe ha'e ramo ae, ereju jevy va'erã, he'i íxupe. —Mburuvixa Herodes katu oheka uka-ta íxupe ojuka uka hagwã. Upéa-gwi epyta upe-py, he'i íxupe Nhandejáry rembigwái.

¹⁴ Upe-ma ramo opu'ã pyhare ogwerokanhy heroje'ói-vy. Ogweraha isy ndive mitã'i. Oho Egito yvy-py. ¹⁵ Upe-py opyta mitã'i ndive. Herodes omano ra'arõ-vy opyta Egito-py. Yma ete Nhandejáry nhe'ê-py omombe'u va'ety remimoigwe kwatia-rehe he'i a-rami:

“Ahenói-ma xe ra'y-pe Egito yvy-gwi ou hagwã”

he'i upe Nhandejáry rembiporavo Cristo-rehe. Ipokatu voi Nhandejáry nhe'ê. Upéa-gwi yma gware he'i hagwe-rami, ãy oiko-ma.*

Ojeka mitã kwimba'e

¹⁶ Ha upéi katu ndouvéi-ma Herodes renda-py pe hi'arandu va'e. Oikupe'o-ma ra'e oho-vy íxupe.

“Xe mbotavy rei ra'e” he'i ojéupe Herodes. Upéa ombopoxy eterei-ma íxupe, ojéupe nomombe'úiry-gwi. Upéa-gwi omondo Hesu oiko hagwe-py. Mitã'i gwive he'i ojuka ukapa hagwã. Belém tetã mygwa ijerekwe rehegwa ave he'i ojuka ukapa hagwã mitã kwimba'e-pe gwive. Mokõi ro'y ogwereco va'e, ne'írã omboty vyteri mokõi ro'y va'e-pe gwive he'i ojuka ukapa hagwã. Pe hi'arandu va'e omombe'u ha-rupi rei íxupe, he'i ojuka ukapa hagwã. ¹⁷⁻¹⁸ Yma Nhandejáry nhe'ê-py omombe'u va'ety Jeremias remimoigwe kwatia-rehe a-rami he'i:

“Omemby ohapirõ va'e nhahendu-ma tetã héry va'e Ramá-py. Raquel remiarirõre voi upe va'e ohapirõ omemby kwéry. Ojahe'o ramo omemby kwéry-rehe nhahendu-ma voi. Ndoikovéi-magwi omemby nohenduséiry voi ombopy'agwapyharã mo'ã nhe'ê”

he'i va'ekwe imemby ojekua va'ekwe-rehe. Upéixa yma he'i hagwe-rami, ãy oiko-ma Belém tetã-my.*

Ogweru jevy-ma mitã'i Egito yvy-gwi

¹⁹ Ha upéi katu omano Herodes. Omano rire, ojehexa uka jevy José-pe Nhandejáry rembigwái yváy gwigwa. Egito-py vyteri oime ramo, ikéra-py ojehexa uka jevy íxupe:

²⁰ —Omano-ma mitã-rehe ija'e'y va'ekwe. ãy ereraha jevy jepe arã upe-py. Ijukaseharãgwe omano-ma. Epu'ã katu, he'i —eraha jevy mitã isy ndive. Ereiko hagwe-py tereho jevy. Israel kwéry yvy-py tereho, he'i José-pe.

²¹ Upe-ma ramo opu'ã oje'ói-vy. Mitã ogweraha isy ndive jevy gwetã-my. Israel kwéry yvy-py oho. ²² Ha upéi katu:

—Áy Herodes ra'yre Arquelau oiko jevy mburuvixagwasu ramo Judéia yvy-py, he'i José-pe omombe'u-vy.

Upéixa-gwi ikyhje oho hagwã ta'yre manda ha-py. Pyhare ojehexa uka jevy íxupe ou-vy Nhandejáry rembigwái yváy pygwa. José oke jave, ojehexa uka íxupe:

—Ani ereho te'i upe-py, he'i íxupe.

Upéixa-gwi ndohóiry oyvy-py. Galiléia yvy-py ae ha'e oho.

²³ Upe-py oho opyta Nazaré tetã-my. Yma Nhandejáry nhe'ê-py omombe'u va'ety remimoigwe kwatia-rehe he'i a-rami:

“He'i va'erã íxupe Nazaré pygwa”

he'i upe Nhandejáry rembiporavo Cristo-rehe. Ipokatu voi Nhandejáry nhe'ê. Upéa-gwi yma he'i hagwe-rami, ãy oiko-ma.

* 2:15 Os 11.1 * 2:17-18 Jr 31.15

Ojekwaa João Batista Nhandejáry nhe'ë mombe'u-vy

(Mc 1.1-8; Lc 3.1-18; Jo 1.19-28)

¹Upe ramo ojekwaa-ma ou-vy João Batista. Tekwaty e'ÿ-my Judéia vvy-py ojekwaa-ma Nhandejáry nhe'ë mombe'u-vy:

²—Onhemo'agwĩ-ma katu ou-vy Nhandejáry nhande ruvixarã. Pemboasy katu pene rembiapo vaikwe. Perova pende rekoha pemoirũ hagwã íxupe, he'i omombe'u-vy.

³Upearã-rehe yma gware Nhandejáry nhe'ë-py omombe'u va'ety Isaías remimoĩgwe kwatia-rehe a-rami:

“Oĩ tekwaty e'ÿ-my onhe'ë hatã va'e. Pemopotĩ katu Nhandejáry raperã. Pembohape karẽ e'ÿ katu íxupe. Penhemoatyřõ katu henonde, he'i onhe'ë hatã-vy”*

he'i João Batista rekorã mombe'u-vy. ⁴Ha'e camelo mymba ragwekwe-gwi onhemonde oiko-vy. Ha ixumbe katu vaka pire gwigwa. Ho'u tukúry-pe oiko-vy. Ei ka'agwy ho'u ave. ⁵Upe jave ohopa oje'ói-vy henda-py Jerusalém tetã mygwa, Judéia vvy pygwa ave. Jordão ysry jere rupigwa ave ohopa iha-py. ⁶Ogwahẽ ramo henda-py, peteĩ teĩ onhemombe'u João-pe gwembiapo vaikwe-rehe: “Amboasy-ma xe rembiapo vaikwe” peteĩ teĩ onhemombe'u ramo, omongarai-ma íxupe. Jordão ysry-py oporomongarai oiko-vy.

⁷Ha upéi katu ogwahẽ ave ou-vy heta fariseu saduceu ndive. Onhemongarai ukase-vy ou íxupe hikwái. Ohexa ramo íxupe kwéry João he'i:

—Mbói-rami peẽ pende reko mbói reko-rami, he'i íxupe João. —Kiva'e po nde-vy he'i erekanhny hagwã? Ndikatúĩ erekanhny nde rereko asyharã-gwi, he'i íxupe kwéry.

⁸—Ererova ramo nde rekoha, ehexa uka nde reko porãha. ⁹“Abraão amyřĩ nhande ru voi. Nhande kwéry hemiarirõre tee voi” ere rei erenhemboete ukase-vy. Ani joty ere upéa. Pehexa katu ko va'e ita. Ha'e-ta peẽ-my. Ko itakwe Nhandejáry omondo kwaa va'erã kente ramo. Hetave omondo kwaa va'erã Abraão remiarirõre ramo. Ndaheko rasýiry arã hemimondo ramo ita. ¹⁰Yva máta hi'a e'ÿ va'e oity va'erã. Hapy hagwã-pyma ogweraha va'erã. Oĩ-ma háxa ijypy-py ombogwái hagwã hapo-rupi. Upéixa ete ogwereco asy va'erã hekoha vai va'e-pe.

¹¹—Xe, he'i —y-py mante apomongarai va'e penhemboasy-gwi pende rekoha vaikwe-rehe ojekwaa hagwã peẽ penhemboasyha pende rekoha vaikwe-rehe. Ha oĩ xe rapyk-werigwa katu napene mongarai mo'ái xe oromongarailha-rami. Ha'e ombogwey va'erã omoingo-vy pende py'apy-py Nhe'ë Marangatu tee va'e, he'i. —Tata-py ae pene mongarai va'erã omokanhny ngatu-vy pende reko tujakwe pendéhegwi. Tata-py imombopyrã jahapyha-rami ave, pende reko tujakwe oipe'a va'erã pendéhegwi. Pende aigwe ohapypa-ma va'erã. Ha'e ipu'akave va'e xéhegwi. Upéa-gwi, xe reko'ive íxugwi-gwi, xe ave atĩ íxugwi. Ni hembigwái ramo jepe ndikatúiry aiko. ¹²Yrupẽ-my nhamombo yvate-koty imboveve-vy. Upéi inhongatu haty-py nhamoĩ ha'ÿigwe. Ha ha'ÿi e'ÿ va'e pirekwe katu jahapy. Upéixa ete ha'e ogwahẽ-ma ou-vy oipe'a hagwã hekoha vai va'e-gwi hekoha porã va'e. Upe va'e ogweraha va'erã oha-py. Ha hekoha vai va'e katu ogwereco asy va'erã íxupe. Okái voi Nhandejáry rata. Ndoikói voi imbogweharã, he'i judeu ruvixa kwéry-pe João Batista imombe'u-vy.

Onhemongarai Hesu

(Mc 1.9-11; Lc 3.21-22; Jo 1.32-34)

¹³Upe ramo ogwahẽ ou-vy Hesu Galiléia vvy-gwi. Jordão ysry-py ou. Ojéupe ave oipota omongarai. ¹⁴Ha João katu nomongaraiséi íxupe:

—Iporãve katu xe mongarai nde voi. Nde, nde reko porãve xéhegwi, he'i íxupe João. —Nde reko porãve jepe, ma'erã ereju joty xe renda-py? Ma'erã erenhemongarai ukase joty xe-vy, he'i oporandu-vy.

* 3:3 Is 40.3

¹⁵—Áy eheja katu tanhemongarai, he'i Hesu. —Upéixa iporã jajapo entéro Nhandejáry oipota va'e gwive, he'i João-pe.

Ha João he'i:

—Néi. Aipo ramo toromongarai, he'i Hesu-pe.

Ha omongarai íxupe.

¹⁶Onhemongarai rire-ma, osê y-gwi ou-vy. Upe-ma ramo ojekwaa pya'e yváy-py. Upe-gwi ha'e ohexa ogwejy va'e. Pykasu-rami ogwejy ou-vy Nhe'ê Marangatu tee va'e. Ójehe ogwejy ramo ohexa. ¹⁷Upéi ohendu yváy-gwi onhe'ê va'e. He'i:

—Kóá xe ra'y xe rembiayhu voi. Xe rembierohory porã ete va'e voi ko va'e, he'i yváy-gwi onhe'ê va'e Hesu-rehe.

4

Anháy ruvixa ombojevavse mo'ã Hesu-pe

(Mc 1.12-13; Lc 4.1-13; Hb 4.15)

¹Ha upéi katu ogweraha Hesu-pe Nhe'ê Marangatu tee va'e. Tekwaty e'ÿ-my ogweraha íxupe. Anháy renda-py ogweraha íxupe anháy ruvixa otantea hagwã íxupe ombojevavse hagwã mo'ã. ²Quarenta áry, quarenta pyhare ave ohasa okaru e'ÿ reheve. Ha upe rire ae katu ivare'a-ma. ³Upe ramo ohekoteta-vy ou anháy ruvixa. Ombojevavse mo'ã íxupe. Anháy he'i íxupe:

—Nde ere ndéjehe, “Xe Nhandejáry ra'y voi”. Aipo ramo ere ko ita-pe eremondo hagwã íxupe mbojape ramo, he'i Hesu-pe anháy itantea-vy, ombojevavse mo'ã-vy.

⁴Hesu ae ndojapóiry joty inhe'ê. Nhandejáry nhe'ê ae joty omombe'u íxupe:

—Ko'a-rami ae voi Nhandejáry nhe'ê oĩ va'e kwatia-rehe, he'i íxupe:

—“Nhande rembi'ukwe-rehe anho rei ndaha'úi nhande rekoverã tee. Nhandejáry he'i va'e gwive ae nhande rekoverã tee”

he'i Hesu, Nhandejáry kwatia nhe'ê omombe'u-vy íxupe.*

⁵Upe rire anháy ruvixa ogweraha íxupe Jerusalém tetã marangatu-py. Nhandejáry róga kakwaa-py ogweraha íxupe. Upe-py iyvateve va'e ári omonhembo'y íxupe. Anháy he'i íxupe:

⁶—“Xe Nhandejáry ra'y voi” ere nde ndéjehe, he'i íxupe. —Aipo ramo, he'a katu a-gwi. Ko'a-rami ae oĩ Nhandejáry kwatia nhe'ê he'i anháy Hesu-pe ombojevavse ukase mo'ã-vy: —“Nhandejáry omonhangareko uka va'erã nde-rehe gwembigwái yváy pygwa-pe. Ipo-py nde joko va'erã pono ere'a-vy erokwa hatã nde py ita-rehe”

he'i Nhandejáry kwatia nhe'ê oiporu rei-vy. —Upéa-gwi he'a katu, he'i mo'ã Hesu-pe.*

⁷Ha Hesu ae katu ndojapóiry joty inhe'ê. Nhandejáry nhe'ê ae joty omombe'u íxupe:

—Ko'a-rami ave oĩ Nhandejáry kwatia nhe'ê, he'i ave íxupe Hesu omombe'u-vy.

—“Ani katu eretantea teĩ Tupã nde Járy-pe imbojevavse ukase-vy mo'ã”

he'i anháy ruvixa-pe Nhandejáry kwatia nhe'ê omombe'u-vy.

⁸Upéi ogweraha jevy Hesu-pe yvyatygwasu ári. Upe-py ohexa uka íxupe entéro tetã tetã ko yvy-py oĩ va'e gwive. Mburuvixa vixa róga kakwaa ohexa uka íxupe. Ijapo porã porãpyre, heta iporãve ráve va'e ohexa uka íxupe. ⁹Ohexa ukapa rire he'i íxupe:

—Entéro ne rembiexakwe gwive ame'ê arã nde-vy, he'i íxupe anháy. —Ne retypy'ã-rehe erenhesũ ranhe ramo xe mboete-vy, ame'ê arã nde-vy, he'i otantea-vy imbojevavse ukase-vy mo'ã Hesu-pe.

¹⁰Ha Hesu ae katu ndojapóiry inhe'ê. He'i joty íxupe:

—Tereho katu, nde Satanás, he'i joty íxupe. —Ko'a-rami ae oĩ Nhandejáry kwatia nhe'ê, he'i ave íxupe Hesu:

—“Pemomba'egwasu katu Tupã pende Járy-pe. Íxupe anho mante pehendú pemboete-vy” he'i anháy ruvixa-pe onhe'ê mbojevavse-vy.

¹¹Upéa he'i rire anháy ruvixa oheja íxupe oho-vy. Ha Nhandejáry rembigwái yváy pygwa ogwahê ou-vy iha-py. Hemikotevê ogweru.

* 4:4 Dt 8.3 * 4:6 Sl 91.11-12

Onhepyrũ Hesu Nhandejáry nhe'ẽ mombe'u-vy
(Mc 1.14-15; Lc 4.14-15)

¹²Ha upéi katu João Batista onhemoĩ preso. Oherakwã rendu ramo, Hesu osẽ jevy oho-vy Galiléia yvy-py. ¹³Gwetã Nazaré-py ndopytái. Ova oho-vy Cafarnaum tetã-my. Pe Cafarnaum Galiléia yugwarusu rembe'y-py. Zebulon yvy pygwa, Naftali yvy pygwa ave he'i yma gware. ¹⁴Upe-py ova Hesu yma gware he'i hagwe-rami oiko hagwã äy. Yma Nhandejáry nhe'ẽ-py omombe'u va'ety Isaías remimoĩgwe kwatia-rehe a-rami:

¹⁵“Oĩ Zebulon yvy pygwa, Naftali yvy pygwa ave. Oĩ yugwarusu rape-koty oĩ va'e, oĩ Jordão ysyry rovái pygwa, oĩ Galiléia yvy pygwa, judeu e'ỹ kwéry va'e. ¹⁶Upe va'e kwéry pytũ-my rei oiko va'e-rami oiko va'ekwe. Äy katu hendy va'e-py ohexa porã va'e-rami oiko-ma va'erã hikwái. Gwĩ omano va'erã-rami, ohexa jokupe rei-ma va'e-rami oiko va'ekwe hikwái, äy katu ohesape íxupe va'e-rami oiko va'erã hikwái”*

he'i Nhandejáry kwatia nhe'ẽ. Yma he'i hagwe-rami, äy oiko-ma.

¹⁷Cafarnaum tetã-my ova rire, onhepyrũ Hesu Nhandejáry nhe'ẽ omombe'u-vy:

—Pene mo'agwĩ-ma ou-vy Nhandejáry pende ruvixarã. Upéa-gwĩ pemboasy peteĩ teĩ pene rembiapo vaikwe. Perova katu pende rekoha vaikwe, he'i omombe'u-vy íxupe kwéry.

“Peju katu xe moirũ” he'i Hesu

(Mc 1.16-20; Lc 5.1-11)

¹⁸Ha upéi katu Hesu ogwata oho-vy Galiléia yugwarusu yke-rehe. Ohexa oho-vy Simão-pe, héry va'e Pedro ave, tyvýry André ndive. Ohexa omombo ramo oity hagwã y-py kyha oipyhy hagwã pira. Pira jopoihaty voi ha'e kwéry:

¹⁹—Peju katu xe moirũ, he'i íxupe kwéry. —Nde katu pira jopói kwaahaty. Äy ae orohekomb'o-ta xe moirũ uka hagwã gwĩ kente kwéry-pe, he'i ohenói-vy íxupe kwéry Hesu.

²⁰Upe-ma ramo pya'e oheja okyha. Omoirũ-ma oho-vy Hesu-pe.

²¹Ha upéi ohasave Hesu oho-vy gwenonde-koty. Ohexa oho-vy mokõi Zebedu ra'y, Tiago tyvýry João ave. Gwu ndive omoatýrõ oiko-vy kanoagwasu-py kyha. Ohenói íxupe ojéupe omoirũ hagwã:

—Peju katu xe moirũ, he'i íxupe kwéry.

²²Upe-ma ramo pya'e oheja okanóa gwu reheve. Oho hupive omoirũ-vy Hesu-pe.

Hesu oporombo'e oporombogwera ave

(Lc 6.17-19)

²³Ha upéi katu Hesu oho Galiléia tetã tetã-rupi. Ojeporahéi haty haty-rupi oporombo'e. Nhandejáry nhande ruvixarã rehegwa nhe'ẽ porã omombe'u mbe'u. Entéro mba'asy-gwĩ oporombogwera gwera oiko-vy. ²⁴Upe-ma ramo isarambi oho-vy herakwã. Síria tetã tetã-rupi oho herakwã. Upéixa-gwĩ ogweru íxupe opamba'e mba'asy rerekoha va'e gwive. Gwĩ hasy ete va'e, gwĩ anháy rerekoha, gwĩ he'o'ã'o'ã va'e, gwĩ hajy jeapa va'e ogweru ave íxupe. Entéro hasy va'e íxupe ojereru va'ekwe gwive, ombogwera joty ha'e. ²⁵Upe ramo heta ojogweroaty Hesu-rehe hikwái. Oĩ heta Galiléia yvy pygwa, oĩ heta Dez Cidades oje'eha tetã mygwa. Oĩ heta Jerusalém tetã mygwa, Judéia yvy pygwa ave. Oĩ heta Jordão ysyry rovái pygwa. Heta eta kente oho ijave oje'ói-vy.

5

Heko vy'a tee va'e

(Lc 6.20-23)

¹Ha upéi katu heta eterei ijaty va'e omoirũse Hesu-pe. Ha ha'e katu ohexa ramo íxupe kwéry, ipa'ũ-gwĩ ojeupi oho-vy. Ijavyte kwéry-gwĩ ojeupi oho-vy. Yvyaty ári-ma ojeupi oho-vy. Upe-py ogwahẽ ramo, ogwapy-ma vyaturu-rehe. Ogwapy rire, omoirũ íxupe hemimbo'e kwéry. ²Upe ramo onhepyrũ-ma ohekombo'e porã-vy gwemimbo'e kwéry-pe. He'i omombe'u-vy íxupe kwéry:

* 4:16 Is 9.1-2

³—Gwĩ, “Iporiahu va'e-rami ko yvy-py xe aiko” he'i ójehe va'e, gwĩ, “Xejéhegwi rei ndikatuĩry xe aiko” he'i ójehe va'e, heko vy'a tee va'e. Nhandejáry nhande ruvixa ndive gwarã voi. Upéa-gwi ovy'a.

⁴—Gwĩ gwembiapokwe omboasy-vy hasẽ va'e, heko vy'a tee joty. Nhandejáry remimbopy'agwapyrã voi upéa. Upéa-gwi ovy'a.

⁵—Gwĩ ipoxy pya'e e'ỹ va'e, heko kirirĩ va'e, heko vy'a tee va'e. Ko yvy pygwa íxupe gwarã. Ko yvy imba'e teerã. Upéa-gwi ovy'a joty.

⁶—Gwĩ Nhandejáry remimbota gwive ojaposeve seve va'e, heko vy'a tee va'e. Ivare'a va'e-rami, ijuhéi va'e-rami ave oiko hemimbota ojapose eterei-gwi. Ojapo rire ovy'a va'erã. Onhembopy'ajeko tee va'e-rami ovy'a-ma va'erã oiko-vy.

⁷—Gwĩ gwapixa-pe oiporiahuvereko va'e, heko vy'a tee va'e. Oiporiahuvereko va'erã ave íxupe Nhandejáry. Upéa-gwi ovy'a.

⁸—Gwĩ hesakatu reheve ipy'a poti va'e, heko vy'a tee va'e. Ohexa va'erã Nhandejáry-pe. Upéa-gwi ovy'a.

⁹—Gwĩ gwapixa peteĩxa omoingo porã va'e, ombojoja va'e, heko vy'a tee va'e. “Xe ra'y voi, xe raji voi” he'i va'erã hese Nhandejáry. Upéa-gwi ovy'a.

¹⁰—Gwĩ Nhandejáry remimbota ojapo-gwi ogwereco asy ramo jepe íxupe, heko vy'a tee joty. Nhandejáry nhande ruvixa ndive gwarã voi. Upéa-gwi ovy'a.

¹¹—Ha peẽ ave xe moirũ-gwi onhe'ẽ rei rei va'erã pende-rehe. Pende rereko asy va'erã. Xe-rehe ndaija'éi-gwi opaixagwa ivai va'e omombe'u vai va'erã pende-rehe, ijapu va'erã pende-rehe. Upéixa pende rereko jave, pende reko vy'a tee voi. ¹²Pevy'a katu. Perovy'a joty katu pende-rehe hembiaipo vai va'e. Yváy-py heta eterei ombohekovia va'erã peẽ-my ome'ẽ-vy Nhandejáry. Upéa-gwi pevy'a joty. Pende rerekoha-rami ave ogwereco asy va'ekwe myamyri Nhandejáry nhe'ẽ-py omombe'u va'ety-pe. Yma gware-pe pene renonderã-rehe ogwereco asy hagwe-rami ave, ãy pende rereko asy ave va'erã.

Juky rehegwa nhe'ẽ, yvypóry kwéry-pe ohesape va'e-rami oiko va'e rehegwa nhe'ẽ ave (Mc 9.50; Lc 14.34-35)

¹³—Pejeapysaka katu juky rehegwa nhe'ẽ-rehe. Juky-rami peẽ peiko ko yvy-py. Pono ine so'o-rehe juky nhamoĩ va'e-rami, peẽ peiko ko yvy-py ani hagwã teko rei ivaive ive oho-vy. He porã juky ha ndahe porãvéi ramo, ndikatuvéi-ma nhamoatyřó íxupe. Naiporãvéi-ma nhamoatyřó hagwã. Nde eremombo-ma va'erã. Erepyrũ va'erã hese.

¹⁴—Yvypóry kwéry-pe pehesape va'e-rami ave peẽ peiko. Ojekwaa porã tetã yvyaty ári onhemoĩ va'ekwe. Ndikatuĩry onhomi nhomi íxupe. ¹⁵Ojekwaa porã ave tataendy. Nhamoendy ramo, ndajajaho'íry nha'ẽ gwy-py. Tataendy'y ári ae nhamoĩ. Upe ramo entéro óga pygwa-pe pe tataendy ohesapepa oĩ-vy. ¹⁶Upéixa ete ohesape va'e-rami, tojekwaa porã ne rembiapo porãkwe. Upéixa ramo nde rapixa kwéry ohexa va'erã ne rembiapo porã. Ohexa ramo, omomba'egwasu va'erã nde Ru yváy pygwa-pe, he'i Hesu.

Moisés amyri remimombe'ukwe rehegwa nhe'ẽ

¹⁷Upéi he'i jevy Hesu:

—Ani ere teĩ: “Ogwahẽ-ma ou-vy Hesu ohekoviãrõ hagwã Moisés amyri remimombe'ukwe tekoha” ani ere teĩ. “Ou-ma ohekoviãrõ hagwã Nhandejáry nhe'ẽ-py omombe'u va'ety amyri remimombe'ukwe tekoha” ani ere teĩ. Agwahẽ-ma ae aju-vy ipokatu hagwã upe Nhandejáry remimo'arandukwe nhe'ẽ oiko hagwã he'i hagwe-rupi, he'i.

¹⁸Upéi he'i ave:

—Pejeapysaka katu xe nhe'ẽ-rehe. Anhetegwa va'e amombe'u-ta peẽ-my. Ko yvy áry ndive oiko jave, nonhemohekoviãrõ mo'ãi va'erã Moisés amyri remimombe'ukwe nhe'ẽ. Nomokanhy mo'ãi ni peteĩ ojehai va'ekwe. Ni peteĩ ndyky jaiporu va'e kwatia nhamonhe'ẽ porã hagwã nomokanhyi va'erã. He'i hagwe-rami oikopa peve nonhemohekoviãrõ mo'ãi va'erã Nhandejáry kwatia nhe'ẽ. ¹⁹Upéa-gwi oĩ ramo Nhandejáry kwatia nhe'ẽ ohendu rire mixi eterei va'e nohendusevéi va'e. Upéi ohendu e'ỹ uka hagwã ombo'e gwapixape. Upe va'e apohare-pe nomomba'egwasuí arã voi Nhandejáry oiko ha-rupi nhande

ruvixarã. Omohekomixĩve va'erã ae voi íxupe. Ha Nhandejáry kwatia nhe'ẽ apoha, “Pehendu katu Nhandejáry kwatia nhe'ẽ Moisés amyri remimombe'ukwe” he'i ae va'erã gwapixa-pe, omomba'egwasu va'erã íxupe Nhandejáry oiko ha-rupi. ²⁰ Ha gwĩ judeu rekomb'o'ehaty kwéry, fariseu kwéry ndive ojapose mo'ã Nhandejáry remimbota gwive ogwahẽ haggwã mo'ã oho-vy nhande ruvixa ramo Nhandejáry oiko haty-py. “Heta nhane rembiapo porã porã” he'i ójehe kwéry. “Upéa-gwi nhagwahẽ va'erã jaha-vy Nhandejáry oiko haty-py” he'i mo'ã ójehe kwéry. Ha nogwahẽ mo'ã voi. Ha'e kwéry heko-rupi peiko ramo, napemoirũ mo'ã Nhandejáry pene ruvixarã-pe. Nhandejáry remimbota gwive pehenduseve seve ramo ae, pemoirũ va'erã íxupe, he'i gwemimbo'e kwéry-pe Hesu.

Ipoxy rei va'e rehegwa nhe'ẽ

²¹ Upe rire katu he'i jevy Hesu:

—“Ani ereporojuka teĩ” he'i araka'e yma gware-pe. “Oporojuka va'ekwe-pe ogweraha va'erã mburuvixa rovagwy-py oporandu haggwã íxupe hembiapokwe-rehe” he'i araka'e yma gware-pe. Upéa pehenduma. ²² Áy xe ae katu nde rekoha porãve haggwã amombe'u-ta peẽ-my. Gwe'ýi-rehe ipoxy rei va'e-pe gwive ogweraha va'erã mburuvixa renda-py ogwereco haggwã íxupe hembiapokwe-rami. Gwe'ýi-rehe onhe'ẽ rei va'e-pe ogweraha va'erã mburuvixa kwéry ojogweroaty haty-py omoporandu uka haggwã hembiapokwe-rehe íxupe. Ha, “Nde tavy. Ne arandu e'ý va'e” he'i va'e gwive gwapixa-pe katu, ojereraha va'erã tata opa rei rei e'ý va'e-py.

²³ —Upéixa ramo ereho ramo Nhandejáry róga-py ne remime'ẽrã ereme'ẽ-ma haggwã íxupe Nhandejáry apyka nhamboete haty-py, upe-py nde re'ýi nde-rehe ija'e'ýha-rehe ne mandu'a ramo, ani ereme'ẽ ranhe teĩ Nhandejáry-pe ne remime'ẽrã. ²⁴ Eheja rei katu Nhandejáry apyka renonde-py. Tereho ranhe katu nde rapixa ha-py erehekombojoja ranhe haggwã íxupe peteixa ereiko haggwã. Ha upe rire katu eju jevy Nhandejáry hapy ne remime'ẽrã ereme'ẽ haggwã íxupe. ²⁵ Embojoja mani katu nde-rehe ija'e'ýha-pe peho jave mburuvixa ha-py. Ne'íra vyteri eregwahẽ jave, embojoja ranhe katu ne nhe'ẽ nde rapixa ndive erembovy'a jevy haggwã íxupe. Nerembojojái ramo íxupe, ne me'ẽ arã mburuvixa po-py. Upéi mburuvixa ne me'ẽ va'erã polícia po-py. Upéi nde reja va'erã preso. ²⁶ Anhetegwa amombe'u-ta peẽ-my. Preso erepyta rire, ndopoi rei mo'ã ndéhegwi. Nane mosẽ mo'ã. Ndereve reveha gwive ne mbopaga uka va'erã. Erepagapa rire mante, ne mosẽ va'erã, he'i Hesu.

Mba'éixa nhanhemongy'a

(Mt 19.3-9; Mc 9.43-47; 10.11-12; Lc 16.18)

²⁷ Upéi he'i jevy Hesu:

—“Ani erenhomongy'a teĩ nde rapixa rembireko ndive, nde rapixa ména ndive ereikovy” he'i araka'e yma gware-pe. Upéa pehenduma. Ha áy katu xe ae nde rekoha porãve haggwã amombe'u-ta peẽ-my.

²⁸ —Gwĩ opy'apy-py imandu'a gwapixa rembireko-rehe oikose-gwi indive va'e, hendive ndoikói vyteri ramo jepe, ojevavy joty. Gwesa-rupi joty ogwereco gwapixa rembireko. Omongy'a-ma va'e-rami, ojapo vai-ma hese.

²⁹ —Upéixa ramo nde resa nde akatúa-koty oĩ va'e-gwi erejevavy-ta ramo, ejejoko joty ne rembiapo vairãgwe-gwi. Enohẽ katu peteĩ nde resakwe emombo ndejéhegwi nde resakwe, peteĩ hesa pehẽ va'e-rami ereiko haggwã. Nde resa mokõi reheve nde reraha ramo tata ijapy e'ý va'e renda-py, ivai eterei va'erã nde-vy. Iporãve erenohẽ eremombo peteĩ nde resakwe ndejéhegwi.

³⁰ —Ha nde po nde akatúa-koty oĩ va'e-gwi erejevavy-ta ramo, ejejoko ae katu ne rembiapo vairãgwe-gwi. Ejahya ae katu upe nde po emombo ndejéhegwi. Peteĩ ipo va'e rekoha-rami ae katu eiko. Mokõi nde po reheve nde reraha ramo tata ijapy e'ý va'e renda-py, ivai eterei arã. Iporãve erejahya peteĩ nde po ndéhegwi.

³¹ —“Gwembireko-gwi opoise va'e gwive, tojapo kwatia ome'ẽ haggwã gwembireko-pe, Apoi-ta ndéhegwi, he'i-vy va'e tome'ẽ íxupe” upéa he'i ave araka'e yma gware. ³² Ha áy

katu xe ae nde rekoha porãve hagwã amombe'u-ta peẽ-my. Gwembireko-gwi opoi va'e ojapo vai hese. Upéi hambirekokwe omenda jevy ramo, onhemongy'a-ma va'erã. Ha Nhandejáry katu omoingo asy va'erã imenakwe-pe, omenda amboasee jevy-gwi oheja rei gwembireko hagwe-rehe. Ha kunha hejapyre-rehe omenda jevy va'e katu, onhemongy'a va'erã ha'e-rami ave. Ha kwimba'e ambue ndive ojohu va'e gwembireko katu, opoi ramo gwembireko-gwi, ndojapo vaíry hese, he'i Hesu.

*Ani ereiporu teĩ imba'e réry rei ne nhe'ẽ pokatuve hagwã mo'ã
(Tg 5.12)*

³³Upéi he'i jevy Hesu:

—“Ani erejapo e'ỹ teĩ ne nhe'ẽ. Xe apu ramo xe rendu va'erã Nhandejáry, ere ramo, ejapo katu ne nhe'ẽ” he'i araka'e yma gware-pe. Upéa ave pehenduma.

³⁴—Áy ae katu nde rekoha porãve hagwã amombe'u-ta peẽ-my. “Nanhe'ẽ rei mo'ãi, ajapo-ta voi” ere ramo, ani ereiporu teĩ imba'e réry rei ererovia uka hagwã ne renduharã-pe ne nhe'ẽ. Ani ereiporu yváy réry. Upe-py Nhandejáry ogwapy haty. Nde ae ne nhe'ẽ eiporu. ³⁵Ani ereiporu teĩ yvy réry. Upe-py Nhandejáry opyrũ haty. Ani ereiporu teĩ Jerusalém tetã réry. Upe-py oiko Nhandejáry nhande ruvixagwasu. Nde ae ne nhe'ẽ eiporu. ³⁶Ani ereiporu teĩ ne akã réry ererovia uka hagwã ne renduharã-pe ne nhe'ẽ. Nhandejáry mba'e ne akã. Nde ávy peteĩ va'e neremomorotĩ kwaái, neremohũ kwaái ave. Nde ae ne nhe'ẽ eiporu. ³⁷Erenhomongeta ramo, erejapose va'erã-rehe. “Ajapo-ta” ere. Ha nderejaposéi va'erã-rehe, “Ndejapo mo'ãi” ere ave. Imba'e réry rei ani ereiporu teĩ. Imba'e réry rei ereiporu ramo, nde rekombo'e ra'e anhaygwasu. Anhaygwasu rape-rupi ereiko ra'e, he'i Hesu gwemimbo'e kwéry-pe.

*Ani erejehepy teĩ nde rapixa-rehe
(Lc 6.29-30)*

³⁸Upéi he'i jevy Hesu gwemimbo'e kwéry-pe:

—“Iporã erejepy” he'i araka'e yma gware-pe. “Nde resa ombyai ramo nde rapixa, embyai katu hesa hekovia. Ne rãĩ omopẽ ramo nde rapixa, emopẽ katu hãĩ hekovia. Nde-rehe ojapo hagwe-ramima nde rapixa ejapo ave hese” he'i araka'e nhande rekorã omombe'u-vy araka'e. Upéa pehenduma.

³⁹—Áy ae katu iporãve amombe'u-ta peẽ-my. Aníke upéixa erejapo teĩ. Nde rapixa nde-rehe ojapose va'e ojapo ramo, ani joty kuri erejepy teĩ hese. Nde rovapete ramo jepe nde akatúa-gwi, ani joty kuri erejepy teĩ hese. Nde rovapete ramo jepe, ejerova rova joty íxupe. Eme'ẽ joty íxupe nde rova asu nde rovapete jevy hagwã. ⁴⁰Nde reraha ramo mburuvixa renonde-py oipe'a hagwã ndéhegwi ne kamisa, eme'ẽ íxupe togweraha ne kamisa nde ao jo'a ndive. ⁴¹“Eraha katu areko va'e peteĩ quilômetro” he'i ramo nde-vy peteĩ soldado omanda-vy, ejapo katu inhe'ẽ. Ejjapove joty inhe'ẽ. Eraha joty katu ogwereco va'e mokõi quilômetro. ⁴²Gwĩ oikotevẽ va'e ojerure ramo nde-vy, eme'ẽ katu íxupe. Ne mba'e oiporuse va'e-pe eiporuruka joty ave íxupe, he'i Hesu.

*Nde-rehe ija'e'ỹ ramo jepe, ehayhu joty kuri íxupe
(Lc 6.27-28,32-36; Rm 12.14)*

⁴³Upéi he'i jevy Hesu:

—“Ehayhu katu nde re'ýi-pe ha nde-rehe ija'e'ỹ va'e-pe ani ave erehayhu teĩ” he'i araka'e yma gware-pe. Upéa pehenduma.

⁴⁴—Áy ae katu nde rekoha porãve hagwã amombe'u-ta peẽ-my. Nde-rehe ija'e'ỹ va'e jepe, ehayhu joty íxupe. Nde rereko asy va'e-rehe, ejapo joty oraçãõ. Embojeupi joty katu ne nhe'ẽ Nhandejáry-pe hese kwéry. ⁴⁵Upéixa Nhandejáry rekoha. Upéixa ereiko va'erã nde Ru yváy pygwa ra'y tee ramo. Nhande resape uka va'e peteixa nhande rereko. Hekoha vai va'e-pe hekoha porã va'e-pe ave omosẽ kwarahy omoendy-vy peteixa Nhandejáry. Hembiaapo porã va'e-pe hembiaapo vai va'e-pe ave omongy peteixa. Enterove va'e-pe ohayhu-gwi ojapo upéixa. Pende Ru yváy-py oĩ va'e ojapoha-rami ave, peẽ pejapo katu.

⁴⁶—Nde rayhu va'e-pe anho erehayhu ramo, “Hekoha porā eterei” nde'i mo'airy nde-rehe Nhandejáry. Nde reko-ramima ave oiko gwí plata-py nhane mbopaga va'ety, hese imandu'a vai va'e. ⁴⁷Nde re'yi anho ererovy'a ramo, “Hembiapo porā eterei” nde'iry va'erā nde-rehe Nhandejáry. “Xe rekoha porā” ere rei arā ndéjehe. Nde reko-ramima ave oiko va'erā judeu e'ý va'e Nhandejáry kwaa e'ýha, gwe'yi anho ogwerovy'a-vy.

⁴⁸—Peiko ae katu Pende Ru yváy pygwa reko-rupi. Ha'e hekoha porā tee rei voi heko jjavý e'ý reheve. Ha'e-ramima peiko meme katu, he'i Hesu gwemimbo'e kwéry-pe.

6

Ne rembiapo porā ramo, ani erejapo teĩ enterove resa-py erejehexa ukase-vy

¹Hesu he'i jevy gwemimbo'e kwéry-pe:

—Xáke, enhangareko porā katu ndéjehe, he'i. —Ne rembiapo porā ramo, ani erejapo teĩ enterove va'e resa-py erejehexa uka porāse-vy imandu'a porā hagwā mo'ā nde-rehe. Upéixa ereiko ramo, “Hekoha porā upe va'e. Íxupe gwarā ame'ē-ta” nde'i mo'ái arā voi nde-rehe Nhandejáry pende Ru yváy pygwa. Nde rekoha oikwaa voi. Ani erejapo teĩ upéixa. Ndaipotái upéixa erenhemoete ukase ereiko-vy.

²—Iporiahu va'e-pe eme'ēse ramo, ani ereiko gwí gweko-gwi rei enterove resa-py ojehexa uka porāse va'e reko-rupi, opy'a ky'aha omo'ā kwaa va'e reko-rupi. Atýra-py ojeporahéi haty-py omonhe'ē gwemimbygwasu, enterove imandu'a porā hagwā mo'ā hese. Tape-rupí ombopu onhemboete ukase-vy mo'ā. Anhetegwa va'e amombe'u-ta peē-my. Hexaháry-pe onhemboete uka rire, mba'eve nome'ē mo'ávéi-ma íxupe Nhandejáry.

^{3,4}Iporiahu va'e-pe eme'ēse ramo ae, eme'ē nhemi íxupe. Tojekwaa e'ý ne remime'ē. Toikwaa e'ý jepe nde po asu va'e nde po akatúa va'e rembiapo. Toikwaa e'ý nde reko irū kwéry ne remime'ē. Upéixa nde Ru yváy pygwa ombohokovia va'erā nde-vy ome'ē-vy. Ndaipóri íxugwi okanhy va'e. Okanhy va'erāgwe jepe ae ojohu joty Nhandejáry, he'i Hesu.

Oração erejapo ramo, a-rami ejapo

⁵Upéi he'i jevy Hesu:

—Gwí nombojekwaaí joty va'e opy'a ky'aha, ojehexa uka porāse-vy rei ojapo va'e mo'ā oração, onhembo'yse oração apo-vy. Ojeporahéi haty-py ojapo oração imandu'a porā hagwā mo'ā hese. Ojéhegwi rei ojapo mo'ā oração enterove resa-py. Onhemboete ukase-vy rei ae onhembo'yse tape kurusu-py. Anhetegwa va'e amombe'u-ta peē-my. Ojekwaa porā rire, mba'eve íxupe nombohokovia mo'ávéi-ma Nhandejáry. Ani peiko teĩ ha'e kwéry heko-rami, he'i.

⁶—Oração erejapo jave ae, eike katu koty-py. Ne rokē emboty ndejeheve. Upéi ne anho ha-py embojeupi ne nhe'ē nde Ru jahexa e'ý va'e-pe. Ha upe rire katu nde Ru yváy pygwa ne anho ha-py erejapo va'e rexa-vy, nde rovasa porā va'erā ombohokovia-vy nde-vy.

⁷—Gwí judeu e'ý va'e Nhandejáry kwaa e'ýha onhembo'e mbo'e rei. Heta nhe'ē oiporu rei va'e omondo rei onhe'ē Nhandejáry-pe. “Xe nhe'ē puku ramo, anhe'ē porā-ma” he'i mo'ā ójehe. “Heta-gwí xe nhe'ē, ohendu-ta xe nhe'ē Nhandejáry” he'i mo'ā ójehe.

⁸Ani peiko teĩ ha'e kwéry heko-rami. Erejerure e'ý reheve ne remikotevê oikwaa-ma Nhandejáry nhande Ru.

⁹—Oração erejapo ramo, a-rami ae kuri ere:

Ore Ru yváy-py ereime va'e. Opa-rupí tomboete nde réry marangatu va'e. ¹⁰Ejehexa uka uka katu yvy pygwa-pe huvixarā. Ne remimbota yváy pygwa ojapoha-rami, tojapo yvy pygwa ave. ¹¹Áy eme'ē ore-vy ore remi'urā áy gwarā. ¹²Ore poriahuvereko katu orojejavy rire. Ore rapixa-pe ore-rehe ojejavy rire oroiporiahuverekoha-rami, ore poriahuvereko katu ore-vy ave. ¹³Ani teĩ ereheja ore rekomb'o'e vai anháy. Ore resende ae katu íxugwi. Nde ae ko mburuvixa teeve voi. Nde pu'aka porāve va'e voi nde. Tane momba'egwasu enterove va'e opa e'ý reheve. Amém.*

* 6:13 Lc 11.1-4

¹⁴—Ha'e-ta peẽ-my. Nde-rehe ojevavy rire nde rapixa-pe ereiporiahuverekó ramó, nde-vy ave nde poriahuverekó va'erã nde Ru yváy pygwa. ¹⁵Ha nde rapixa-pe ndereiporiahuverekóí ramó katu, nde-vy ave nande poriahuverekó mo'ãi va'erã nde Ru yváy pygwa, he'i Hesu.

Jakaru e'ÿ reheve rehegwa nhe'ẽ

¹⁶Upéi he'i jevy Hesu:

—Gwí opy'a ky'aha omó'ã kwaa va'e gweko-rehe rei onhemoete ukase va'e, okaru e'ÿ reheve ohasa mo'ã Nhandejáry mboete-vy. Upéixa ojapo ramó, hova asy oiko-vy ovy'are'ÿ va'e-rami. Ndojehovahéiry. Ndojekyllu porã ave ojehexa uka porã hagwã okaru e'ÿha onhemoete ukase-vy rei. Oipota enterove omanha hese. Anhetegwa va'e amombe'uta peẽ-my. Onhemoete rire, nombohekovia mo'ãi va'erã íxupe ome'ẽ-vy Nhandejáry. Ani peiko teĩ ha'e kwéry heko-rami. ¹⁷⁻¹⁸Ha peẽ katu Nhandejáry mboete-vy pekaru e'ÿ reheve pehasa ramó, pejekyllu porã katu. Pejehovahéi katu. Upéixa pende rapixa-pe ndojekwaái va'erã pekaru e'ÿha. Ha Nhandejáry ha'e anho mante oikwaa va'erã pekaru e'ÿha. Ndaipóri íxugwi okanhy va'e. Ne rembiapo nhemi oikwaa ramó, ombohekovia va'erã nde-vy ome'ẽ-vy ne rembiapo porãgwe-rehe, he'i Hesu.

Yváy pygwarã-rehe katu pepena

(Lc 12.33-34; 2 Tm 4.8; 1 Pe 1.4)

¹⁹Upéi he'i jevy Hesu:

—Ani erenhongatu rei teĩ ko yvy-rehe ne mba'e kwéry. Onhembotapurupa arã nde ao. Onhembyaipa arã ne mba'e. Ombokwa arã nde róga-rehe imonda va'e oike hagwã nde koty-py. Ndahe'ei yváy pygwarã ko yvy pygwa va'e. Nhane rembiejarã meme voi. ²⁰Nhandejáry reminhongatu yváy-py peẽ-my gwarã-rehe ae katu pepena peiko-vy ko yvy-py. Yváy-py onhongatu va'e-rami peiko katu ko yvy-py. Upe-py ndaipóri nhande ao ombotapuru rei va'erã. Ndaipóri nhane mba'e ombyai rei va'erã. Upe-py ndaipóri nhande róga-rehe ombokwa mbokwaharã nhande koty-py oike-vy omonda va'erã nhandéhegwi nhane reminhongatu va'e. ²¹Nhane rakate'ÿha-ma nhane renonde-py nhamoĩ meme jaiko-vy. Upéa-gwi ani erenhongatu rei teĩ ko yvy-rehe ne mba'e kwéry. Hese anho ereity arã nde resa ereiko-vy. Epena ae katu nde reko porãrã yváy pygwarã-rehe, he'i Hesu.

Nhande resa nhande rete resapeha

(Lc 11.34-36)

²²Upéi he'i jevy Hesu:

—Ha nhande resa reheve katu ohexa va'e-rami oiko nhande rete. Jahexa porã ramó, ohexa vérami ave nhande rete. Hembipepa íxupe va'e-rami oiko. Upéixa nde rekoha porã tee ramó, arakatu pygwa vérami ereiko va'e, erejehesa rerova uka-vy Nhandejáry-rehe. ²³Ha naiporã ramó nhande resa katu hesa e'ÿ va'e-rami oiko nhande rete. Ndohexa uka porã ramó nhande-vy, pytũ-my oiko ave nhande rete. Upéixa voi nde rekoha vai ramó, pytũ-my vérami ereiko va'e, erejehesa rerova uka e'ÿ-vy Nhandejáry-rehe. Ipytũmba rei voi nde-vy. Ndahapéi voi nde-vy, he'i Hesu.

Ne remikotevẽ-rehe gwive ani erepena pena ereiko-vy

(Lc 12.22-31; Fp 4.6; 1 Pe 5.7)

²⁴Upéi he'i jevy Hesu:

—Avave ndikatúí ojáry mokóí va'e nhe'ẽ-py omba'apo. Oĩ ramó nhande-rehe mokóí omonda va'e, peteĩ va'e-rehe nanhande a'ei va'erã. Outro-pe jahayhu va'erã. Peteĩ va'e-rehe nhane rakate'ÿ va'erã. Ha outro-pe ndajahexaséi va'erã. Upéa-gwi naiporã nhane rakate'ÿ eterei plata-rehe. Erebotuvixave ramo plata, ipu'aka va'erã nde-rehe. Nerepenái va'erã Nhandejáry-rehe. Nde kupe-py oĩ va'e-rami erereko va'erã íxupe.*

²⁵—Upéa-gwi ha'e-ta peẽ-my. Aníke erepena pena anho rei ere'u va'erã-rehe ereikove hagwã. Nde aorã-rehe eremonde va'erã-rehe, gwíã-rehe ani erepena eterei teĩ. Nhane remi'urã anho rei-rehe naiporãí jaiko. Nhande rete pegwarã anho voi nhande ao, nhane

* 6:24 Lc 16.13

remi'urā ave. Naiporāi nhapena upe va'e anho-rehe jaiko-vy. Upe va'e anho-rehe ndikatúi nhapena jaiko-vy. ²⁶ Pehexa katu gwyrā reko. Onhemitý e'y'ý ramo jepe, koty-py onhongatu hagwā heraha-vy oikyti e'y'ý ramo jepe, omongaru joty íxupe nde Ru yváy pygwa. Ha gwyrā kwéry natuvixamba'e etéiry Nhandejáry-pe. Ha peē katu pende tuvixave íxupe gwyrā kwéry-gwi. ²⁷ Ani erepena eterei teĩ ndéjehe. Ereiko pukuseve mo'ā-gwi rei, ndereiko pukuve mo'áiry.

²⁸ —Nde aorā orā-rehe ani erepena eterei teĩ ereiko-vy. Pehexa katu yvoty reko. Nomba'apói opotyā-rehe. Oipogwā va'e-rami ndoikóiry. Nomba'apói ramo jepe, opyta porā ete voi joty. ²⁹ Yma oiko va'ekwe myamyri mburuvixa Salomão. Imba'e reta va'ekwe. Ijao porā ave va'ekwe. Upe va'e-rehe onhemomba'egwasu ete va'ekwe. Ha ha'e-ta peēm. Xe ae katu amboeteve upéa yvoty-pe. Ha'e ijehexaha-rami e'y'ý jepe, iporāve joty katu íxugwi. ³⁰ Ha Nhandejáry katu ombopoty porā kapi'i. Etería henhói porā. Ko'ē ramo oikyti-ma arā, omombo va'erā tata-py ohapy-vy. Pe kapi'i Nhandejáry remimbopoty voi. Onhangareko porā hese-gwi, ipoty porā voi. Ha pende-rehe katu onhangareko porāve. Ne monde uka va'erā. Ma'erā ndapejeroviái hese? Hese anho ae pejerovia katu. Ome'ē va'erā nde-vy nde aorā. ³¹ Upéa-gwi ani erepena ndéjehe. “Mbava'e tipo ja'u va'erā? Mbava'e tipo jay'u va'erā? Mbava'e-py tipo nhanhemonde va'erā?” ani ere teĩ upéixa. ³² Upeixagwa-rehe opena pena oiko-vy judeu e'y'ý va'e Nhandejáry kwaa e'y'ya. Ha nde Ru yváy pygwa katu ne remikotevê gwive oikwaa va'e. Upéa rehegwa ereikotevê va'e-rehe ha'e oikwaa voi. Upéa-gwi ani erepena pena teĩ hese ereiko-vy. ³³ Pepena ranhe ae katu Nhandejáry pende ruvixarā-rehe. Pemoi meme pene renonde-py ha'e ae hemimbota erejapo hagwā. Hese anho mante epena eiko-vy. Upéi upéa rehegwa gwive ne remikotevê va'e ome'ē rei va'erā nde-vy. ³⁴ Ani pepena teĩ ko'ē ramogwarā-rehe. Pono pene mytu'e'y'ý pendéjehe ani pepena teĩ ko'ē ramo ojehu-ta va'e-rehe, gwí ivai-ta va'e-rehe. Ko'ē ramo ae pepena kuri hese, he'i Hesu gwemimbo'e kwéry-pe omombe'u-vy.

7

Ani nde rapixa rembiapo-rehe, “Ivai” ere teĩ erepondera-vy

(Lc 6.37-38,41-42; Rm 2.1-3; 1 Co 2.14-15; Tg 4.11-12)

¹ Hesu he'i jevy gwemimbo'e kwéry-pe:

—Ani nde rapixa rembiapo-rehe, “Ivai” ere teĩ erepondera-vy. Ne rembiapo ojohu vai ave arā nde-rehe Nhandejáry.

² —Upe erejavaeterekoha-rami ave, “Ivai” he'i arā nde-rehe Nhandejáry. Nde rapixa ererekoha-rami nde ave nde rereko va'erā Nhandejáry.

³ —Áy amombe'u-ta pene rekorā-rehe. Yvyra ra'ykwe rehegwa nhe'ē-rami aiporu-ta peē-my imombe'u-vy. “Oĩ ra'e nde resa-py vyvra ra'ykwe” ere teĩ nde rapixa-pe. Ha nde ave tuvixave nde resa-py oĩ va'e. Heko porā va'e-rami ereikose mo'ā nde rapixa-pe. ⁴ Upéixa ramo ma'erā ere teĩ nde rapixa-pe: “Taipe'a nde resa-gwi pe vyvra ra'ykwe mixí oĩ va'e”. Nde ave tuvixave nde resa-py oĩ va'e. ⁵ Nde, “Ndaxe py'a ky'ái”, ere mo'ā ndéjehe. Nde nde rekoha vai-ma. Erova ranhe katu nde rekoha. Eipe'a ranhe katu ndejéhegwi pe vyvra tuvixave va'e nde resa-py oĩ va'e. Upéi erehexa porā arā ereipe'a hagwā nde rapixa resa-gwi upe vyvra ra'ykwe mixí oĩ va'e. ⁶ “Ani ereme'ē teĩ jagwa-pe imarangatu porā va'e” ja'e. “Ojere arā nde su'u-vy.” “Ani eremombo kure rovagwy-py ne mba'e porā hepy va'e. Opyrú rei arā hese omongy'apa-vy” ja'e. Nde rapixa ne nhe'ē porā ombojevý va'e, ndaha'ei ne nhe'ē porā íxupe gwarā.

Hekoha porā tee va'e Nhande Ru yváy pygwa

(Lc 11.9-13; Jo 14.13-14)

⁷ —Ejerure rure katu Nhandejáry-pe. Ha ne rembijerure katu ome'ē va'erā nde-vy. Eheka heka katu ndejéupe gwarā. Ha ne rembieka katu erejohu va'erā. Okē onhemboty va'e oipe'a uka hagwā ombota mbota va'e-rami, pene kyre'y'ý katu pejapo hagwā oração. Nde-vy oipe'a-ma va'e-rami okē, ohendu va'erā Nhandejáry pene nhe'ē. ⁸ Gwí ojerure rure va'e-pe gwive ome'ē va'erā. Gwí oheka heka va'e gwive ojohu va'erā. Gwí ombota

mbota va'e-rami oha'arō oī-vy va'e-pe gwive ojepe'a va'erā. ⁹Ta'ýry gwemi'urā-rehe ojerure ramo, ndaipóri pene pa'ũ-my ita ome'ê va'erā íxupe. ¹⁰Ta'ýry pira-rehe ojerure ramo, ndaipóri pene pa'ũ-my mbói ome'ê va'erā íxupe. ¹¹Peê kwéry pende rekoha vai ramo jepe, peme'ê kwaa joty iporā porā va'e pende ra'y kwéry-pe. Ha pende Ru yváy pygwa katu hekoha porā tee va'e. Upéa-gwi ome'ê kwaa porāve voi pejerure va'e-pe gwive iporā porā tee va'e. ¹²Ha nhande kwéry katu jaipota nhande rapixa ojapo porā nhande-rehe. Aipo ramo, nde hese ave ejapo porā. Peteíxa pejapo porā ojóehe, he'i. — Tuvixa mba'eve ko va'e nhe'ê. Ko va'e nhe'ê-py anohê kuri peê-my judeu rekoharā Moisés amyri remimombe'ukwe gwive, Nhandejáry nhe'ê-py omombe'u va'ekwe gwive ave. Peteí nhe'ê-py amombe'upa kuri peê-my, he'i gwemimbo'e kwéry-pe Hesu.

Oĩ mokõi tape

(Lc 13.24)

¹³Upéi Hesu he'i jevy:

—Tapeho katu tape porā-rupi. Upe tape ypyrũha tape po'i voi. Upe-rupi tapeho katu. Ani peho teĩ tape vai-rupi. Upe tapegwasu mombyry nhande rerahaha voi Nhandejáry-gwi. Tapegwasu nhepyrũha tuvixa oĩ va'e. Ndahekorasyi jaha hagwā upe tapegwasu-rupi. Heta oho tapegwasu-rupi va'e. ¹⁴Ha ndaupéixairy tape Nhandejáry ha-py oho va'e. Upe tape ypyrũha tape po'i voi. Hasy-py nhagwahê va'erā upe tape-rupi Nhandejáry ha-py. Ha upe tape-rupi ogwata va'e ndahetáiry, he'i Hesu.

Oĩ, “Nhandejáry nhe'ê-py amombe'u” he'i va'e mo'ã ójehe

(Lc 6.43-44; Tg 3.11-12; 1 Jo 3.10)

¹⁵Upéi Hesu he'i jevy:

—Oĩ, “Nhandejáry nhe'ê-py amombe'u” he'i va'e mo'ã ójehe. Xáke. Ani penhembotavy uka íxupe. Ojehexa uka porā va'erā ogwahê ou-vy pende ha-py. Ou va'erā ovexa-rami. Ipoxy e'ỹ va'e-rami ou va'erā ojehexa uka-vy. Ha opy'apy-py kwéry katu ipoxy. Heko poxy va'e-rami, jagwarete ivare'a va'e-rami voi ipoxy opy'a-py. ¹⁶Pehexa kwaa va'erā hembia-po-rehe. Nhuatĩ-gwi ndikatúí jaipo'o hi'a uva. Karapíxu-gwi ndikatúí jaipo'o figo aju. Ndaha'éi figo aju-rami karapíxu'a. ¹⁷Hi'a porā yvyra porā. Ha ndahi'a porāi yvyra vai. ¹⁸Ndoikói yvyra porā hi'a porā e'ỹ va'e. Ha yvyra vai hi'a porā va'e ndoikói ave. ¹⁹Entéro yvyra ndahi'a porāi va'e gwive oity va'erā. Tata ári imombopyrā. ²⁰Upéixa yvyra'a-rami pehexa kwaa va'erā hekoha-rehe. “Nhandejáry nhe'ê-py oromombe'u” he'i ramo mo'ã, hembia-po-rehe pehexa kwaa va'erā, he'i gwemimbo'e kwéry-pe Hesu.

Enterove nomoirũbái va'erā Nhandejáry nhande ruvixa-pe

(Lc 13.25-27; 1 Jo 2.3-6)

²¹Upéi Hesu he'i jevy:

—Heta oĩ, “Nde xe Járy, nde xe Járy” he'i rei va'erā xe-vy. Upéa nomoirũi va'erā oho-vy Nhandejáry nhande ruvixa-pe. Nogwahêi va'erā oho-vy oiko haty-py. Ha xe Ru yváy pygwa remimbota ojapo va'e ae katu omoirũ va'erā íxupe oho-vy, he'i.

²²—Upe áry-py, enterove va'e-pe hembia-po apokwe-rami areko hagwā áry-py, heta, “Nde xe Járy, nde xe Járy” he'i rei va'erā xe-vy. “Nde réry-py Nhandejáry nhe'ê oromombe'u va'ekwe. Nde réry-py oromosê mosê oromondo-vy anháy-pe. Nde réry-py heta hexapyrā-rupi ore rembia-po porā va'ekwe. Heta ipu'aka va'e orojapo va'ekwe” he'i va'erā mo'ã xe-vy. ²³Ha upe rire katu “Hesu réry-py xe rembia-po. Áy ae Hesu re'ýi tee-ma voi xe” he'i ójehe mo'ã va'e-pe xe Hesu ha'e va'erā íxupe kwéry: Yma gwive ko'ánga ete peve peê ndaha'éi xe re'ýi. Ndroiokwaái voi. Xe re'ýi e'ỹ voi peê, xe ha'e va'erā íxupe kwéry. Pende rekoha vai. Tapeho jevy katu xéhegwi, ha'e va'erā íxupe kwéry, he'i Hesu.

Gwogarā ojapose ramo, oĩ ita ári omoĩ va'e, oĩ ave yvy ku'ĩ ári omoĩ va'e

(Lc 6.47-49)

²⁴Upéi Hesu he'i jevy:

—Ko'ã va'e xe nhe'ê renduha, xe nhe'ê apoha hi'arandu porā voi. Ha hi'arandu va'e katu gwogarā ojapose ramo, ita ári omoĩ. ²⁵Ojapopa rire, oky-ma. Oky-gwi y hygwasu ojaho'ipa

hagwā óga. Ou ave yvytugwasu heity hagwā mo'ã ha ndo'áiry. Ita ári ojapo ra'e. Upéa-gwi ndo'áiry. Upéixa ete xe nhe'ẽ ojapo va'e oho porã voi ojeity ukase e'ỹ-vy. ²⁶ Ha ko'ã va'e xe nhe'ẽ renduse e'ỹ va'e xe nhe'ẽ ojapo e'ỹ va'e katu nahi'arandu porãi. Ha hi'arandu e'ỹ va'e katu gwogará ojapose ramo, nomoĩry ita ári. Yvy ku'i ári rei omoĩ gwóga. ²⁷ Upéi oky-ma. Oky-gwi ovu y óga ojaho'ipa hagwā. Ou yvytugwasu oity hagwā ave óga-pe. Ha upe rire katu ho'a. Ho'apa ete voi hóga. Ho'a e'ỹ va'ekwe ndopytáiry. Omboasy eterei ho'a va'ekwe hóga. Upéixa ete ojeity uka-vy oho vai hi'arandu e'ỹ va'e, xe nhe'ẽ renduse e'ỹha, he'i Hesu Nhandejáry nhe'ẽ omombe'u-vy.

“Imbaraete voi inhe'ẽ” he'i

²⁸ Omombe'upa rire, heta ojogweroaty aty va'e ogwerovy'a inhe'ẽ omboete-vy íxupe hikwái:

—Iporã ete Hesu nhe'ẽ, he'i hikwái. ²⁹ —Inhe'ẽ ndaha'úi gwí nhande rekombo'ehaty kwéry nhe'ẽ-rami, he'i Hesu nhe'ẽ-rehe hikwái. —Ha'e kwéry ndoikwaapáiry. Ha'e ae onhe'ẽ nomombe'úiry. Ha Hesu ae katu ha'e ae onhe'ẽ omombe'u. Oporomonhe'ẽgendu kwaa va'e-rami onhemonhe'ẽ. Imbaraete voi inhe'ẽ, he'i Hesu-rehe opondera-vy hikwái.

8

Hesu ombogwera ijai aipa va'e-pe

(Mc 1.40-45; Lc 5.12-16)

¹ Ha upéi katu Hesu ogwey jevy ou-vy upe yvytyrusu ári-gwi. Ogwey rire heta ijaty jaty va'e kente kwéry omoirũ íxupe oje'ói-vy hikwái. ² Upe jave ogwahẽ ou-vy iha-py mba'asy vai ogwereco va'e ijai aipa va'e. Gwety'p'ã-rehe onhesũ omboete-vy hovagwypy:

—Nhande mbogwerahaty voi nde, xe Járy. Xe-vy pa xe mbogwera ave arã nde? he'i Hesu-pe.

³ Ha'e oipyso opo omoĩ hese:

—Orombogwera-ta voi katu nde-vy, he'i íxupe. —Xe nhe'ẽ-py tane potĩ katu, he'i hasy va'e-pe.

Upe-ma ramo opa-ma ojei íxugwi ijai aikwe. Okwera porã-ma.

⁴ Upéi he'i Hesu:

—Ejeapysaka katu xe nhe'ẽ-rehe. Ani eremombe'u avave-pe orombogwera-ma hagwe, he'i hasy va'ekwe-pe Hesu. —Tereho katu pa'i oĩ ha-py ejehexa uka-vy. Ehexa uka íxupe erekweramaha. Eme'ẽ íxupe upe myamyri “Nhande'ẽ katu” he'i va'ekwe. Upéixa ramo, “Okwera-ma. Onhemopotĩ jevy-ma” he'i va'erã nde-rehe, atýra-py ne mombe'u-vy, he'i íxupe Hesu.

Hesu ombogwera capitão, soldado kwéry ruvixa rembigwái-pe

(Lc 7.1-10)

⁵ Ha upéi katu ogwahẽ oho-vy Hesu Cafarnaum tetã-my. Upe-py oike rire ogwahẽ ou-vy iha-py capitão, soldado kwéry ruvixa va'e:

⁶ —Xe pytygwõ katu, Xe Járy Hesu, he'i. —Xe rembigwái oime koty-py. Nopu'ávái-ma, hajaj jeapa-gwi ndoryríry. Hasy ete voi oĩ-vy, he'i íxupe soldado ruvixa.

⁷ —Aipo ramo, aha-ta nde róga-py ambogwera hagwā íxupe, he'i soldado ruvixa-pe.

⁸ —Nde, nde tuvixa mba'e-gwi, mba'éixa ereike-ta ereho-vy xe róga gwy-py? he'i omboete-vy íxupe. —Erenhembohekomirĩve-ta para'e ereike ereho-vy. Tuvixave e'ỹ va'e-rami joty ereike-ta upe-py. Aipo ramo ne nhe'ẽ-py rei embogwera katu xe rembigwái-pe, he'i. —“Tokwera” ere ramo, okwera va'erã. A-gwi rei ne nhe'ẽ-py mante okwera va'erã xe rembigwái hasy va'e, he'i Hesu-pe.

⁹ —Oĩ xe-rehe amanda va'e. Inhe'ẽ ajapo va'e. Xe pogwy-py ave oĩ soldado xe amanda hese va'e. Kóa-pe, “Tereho katu” ha'e ramo, oho ave arã voi. Ha upéa-pe, “Eju katu” ha'e ramo, ou ave arã voi. Xe rembigwái-pe, “Ejapo katu xe nhe'ẽ” ha'e ramo, ojapo ave arã voi. Upéixa ave ne nhe'ẽ-py rei nde pu'aka nipo ra'e mba'asy-rehe erembogwera hagwā xe rembigwái-pe, he'i íxupe upe soldado ruvixa.

¹⁰Upéa nhe'ê rendu-vy “Mba'éixa ojerovia tee xe-rehe” he'i Hesu opondera-vy hese.

—Ojerovia tee voi xe-rehe upe va'e, he'i kente kwéry-pe hapykwéri ogwa'ê va'e-pe. —Amombe'u-ta peê-my anhetegwa, he'i. —Oĩ Israel remiarirõre judeu kwéry xe-rehe ojerovia va'e. Ha ko va'e soldado ruvixa judeu e'ÿ ramo jepe, ojerovia teeve joty xe-rehe, he'i. ¹¹—Ha'e-ta peê-my. Heta mombryrgwa ogwahê va'erã oho-vy Nhandejáry nhande ruvixa ramo oiko haty-py. Heta kwarahy resê gwigwa oho va'erã jekarugwasu haty-py. Heta ka'aru gwigwa oho va'erã ave. Ogwapy va'erã okaru-vy Abraão ndive, Isaque ndive, Jacó ndive ave. ¹²Ha judeu kwéry va'e Nhandejáry re'ÿi va'e oho va'erãgwe katu nogwahê mo'ái va'erã upe-py. Omosê va'erã íxupe imondo-vy pytũ kwa-py. Upe-py ojahe'o va'erã. Hasê va'erã onhemboasy-gwi. Nhandejáry-rehe onhemoyrõ-gwi, onhemohãngyry ngyryu va'erã oiko-vy, he'i judeu kwéry-rehe.

¹³Upéi he'i upe soldado ruvixa-pe:

—Tereho jevy katu nde róga-py. Xe reroviaha-rami, toiko katu nde-vy, he'i.

Upe-ma ramo okwera-ma hembigwái.

Entéro hasy va'e-pe gwive ombogwera Hesu

(Mc 1.29-34; Lc 4.38-41)

¹⁴Ha upéi katu Hesu oho Pedro róga-py. Ogwahê ramo upe-py ohexa Pedro raixo. Onheno ra'e oĩ-vy. Hasy ete voi heteraku-gwi. ¹⁵Omboja opo ipo-rehe. Opa-ma íxugwi heterakukwe. Opu'ã-ma Hesu remi'urã-rehe onhangareko-vy.

¹⁶Ka'aru ete-ma ojereru iha-py heta anháy ojepota hese va'e. Onhe'ê-py rei omosê mosê anháy imondo-vy. Entéro hasy va'e-pe gwive ombogwera-ma. ¹⁷Upéa rehegwa ojapo Hesu, upéixa hembiaipo yma gware he'i hagwe-rami oiko hagwã äy. Yma Nhandejáry nhe'ê-py omombe'u va'ety Isaías remimoĩgwe kwatia-rehe a-rami:

“Nhande kwéry nhande rasy ramo, omboyke-ma opaixagwa mba'asy heraha-vy nhandéhegwi”.*

Yma he'i hagwe-rami, äy oiko-ma.

“Xe oromoirũ-ta, xe Járy” he'i

(Lc 9.57-62)

¹⁸Ha upéi katu heta kente onhemboaty Hesu-rehe. Ohexa ramo heta onhemboaty hese, he'i gwemimbo'e kwéry-pe:

—Jahasa katu y rovái, he'i.

¹⁹Ne'írã vyteri onhemboyru jave kanóa-py, ou ohogwaitĩ-vy íxupe peteĩ judeu rekombo'ehaty:

—Xe oromoirũ-ta, porombo'eháry, he'i Hesu-pe. —Mamo ereho ha-rupi oromoirũ-ta, he'i íxupe.

²⁰Hesu he'i jevy íxupe:

—Mykurê, vykwa oĩ íxupe hógarã. Gwya, oĩ ave íxupe haityrã. Ha xe ae katu Nhande Ryke'y tee va'e, ndaipóri xe-vy xe renagwã atongea-vy xe apyta hagwã, he'i. —Xe moirũse joty pa nde? he'i pe tekombo'ehaty-pe.

²¹Upéi outro peteĩ hemimbo'e va'e he'i Hesu-pe:

—Xe oromoirũ va'erã, xe Járy, he'i. —Aha'arõ ranhe-ta xe ru omano ramo ajaty hagwã, he'i íxupe.

²²—Nahániry. Äy voi aipota xe moirũ, he'i íxupe. —Xe moirũse e'ÿ va'e ae taimandu'a ranhe katu omano va'ekwe ojaty hagwã-rehe, he'i upe gwemimbo'e-pe.

“Ekirĩ katu” he'i y-pe

(Mc 4.35-41; Lc 8.22-25)

²³Upéi onhemboyru-ma kanóa-py Hesu. Hemimbo'e kwéry onhemboyru ave indive.

²⁴Upe jave ou vytyugwasu marány. Ho'a yugwarusu-rehe omomýi hagwã yugwarusu. Upe-ma ramo omopu'ã pu'ã y-pe, ojahe'i ho'i kanóa-pe y. Ha Hesu ae katu oke joty oĩ-vy. ²⁵Ha hemimbo'e kwéry oho omombáy íxupe:

* 8:17 Is 53.4

—Ore resende katu, ore Járy, he'i. —Nhanheapymi-tama nhande, he'i Hesu-pe hikwái.

²⁶—Mbava'e-gwi tipo pende py'amirí, he'i íxupe kwéry. —Ndapejerovia teéiry ra'e xe-rehe, he'i íxupe kwéry.

Upéi opu'á onhe'ê-py omokirirí hagwá. He'i yvytugwasu-pe, y opu'á va'e-pe ave

—Ekirirí katu, he'i ipoxy va'e-pe.

Upe-ma ramo ohopa-ma yvytu. Opytu'u jevy y. Okirirí porãmba jevy-ma y. ²⁷Ha'e kwéry opondera voi hese:

—Mba'eixagwa heko va'e po, he'i opondera-vy hese. —Yvytugwasu jepe, y opu'á pu'á va'ekwe jepe ohendu inhe'ê, he'i Hesu-rehe hikwái.

Mokõi anháy rerekoha

(Mc 5.1-20; Lc 8.26-39)

²⁸Upéi ogwahê-ma oho-vy y rovái. Gadara yvy-py ogwahê. Upe-py ogwahê-ma ramo, ou ohogwaití-vy íxupe mokõi anháy rerekoha va'e. Ijyta-gwi osê ou-vy. Heko poxy eterei va'e. Upéa-gwi ohasase va'e oikupe'o íxupe ohasa hagwá. Ndikatuí ohasa ijypy-rupi.

²⁹Onhe'ê hatã hatã Hesu-pe ombojevuse-vy mo'ã:

—Nde ko Nhandejáry ra'y. Ma'erã ereju ko'a-py, he'i Hesu-pe ombojevuse-vy mo'ã. —Ne'írã vyteri ore moingo asyha áry. Ma'erã ereju? he'i. —Ore moingo asyha áry-py ae ereju va'erã mo'ã, he'i Hesu-pe. —Áy katu ani ereju ore moingo asy-vy, he'i íxupe.

³⁰Mombyry-gwi ohexa heta kure okaru jave. ³¹Upéa-gwi ojerure rure íxupe:

—Ore mosê-ta ramo, ore mondo katu kure kwéry-pe. Ore mondo katu ipy'a kwéry-py, he'i anháy kwéry Hesu-pe.

³²—Tapeho, he'i íxupe kwéry.

Inhe'ê-rupi osê oho-vy oike kure kwéry py'a-py. Ha kure kwéry katu oriparapa oje'ói-vy. Yugwarusu-py ogwejy oje'ói-vy. Hi'apỹ ogwejy oje'ói-vy. Ho'a onheapymi oje'ói-vy y-py. ³³Ha kure nhangarekoha oripara oje'ói-vy. Atygwasu-py oho omombe'u-vy. Anháy rerekohare-pe ojehu va'ekwe gwive omombe'u. ³⁴Upe ramo atygwasu pygwa Hesu rogwaití-vy osê ogwa'ê-vy. Ohexa-ma ramo Hesu-pe, ombojevuse íxupe:

—Ekwa jevy katu ore yvy-gwi, he'i Hesu-pe ojpapura-gwi hikwái.

9

Hesu ombogwera hajy jeapa va'e-pe

(Mc 2.1-12; Lc 5.17-26)

¹Ha upéi katu Hesu onhemboyru jevy-ma oho-vy kanóa-py. Upéi ohasa y rovái ogwahê oho-vy ha'e ae oiko ha-py. ²Upe-py ojereru íxupe hajy jeapa apa va'e. Gwupa reheve ou onheno oi-vy. Ójehe ojerovia tee ramo, ohexakwaa hese. Upéa-gwi he'i upe hajy jeapa apa va'e-pe:

—Ani erekyhyje teí, xe ra'y, he'i íxupe ombopy'agwapy-vy.

Gwa'yry-pe he'iha-rami he'i íxupe:

—Amboyke-ma ndéhegwi ne rembiapo vaikwe, he'i upe hajy jeapa apa va'e-pe.

³Upe-py oí judeu rekombo'ehaty. Ohendu-ma ramo Hesu nhe'ê, ndojohu porái:

—Onhemonhandejáry rei ou-vy, he'i mo'ã Nhandejáry Hesu-rehe. —Onhe'ê vai rei, he'i ojóupe hese.

⁴Ha ipy'apóry oikwaa Hesu:

—Ma'erã-gwi erenhe'ê vai rei nde py'apy-py? he'i. ⁵—Pejeapysaka porã katu xe nhe'ê-rehe. Oí ramo, “Amboyke-ma ndéhegwi ne rembiapo vaikwe” he'i va'e katu, ndajahexái hemimboyke. Omboyke para'e. Tapa nomboykéiry ra'e. Ndajahexáiry. Ha oí ramo, “Epu'á katu egwata eho-vy” he'i rei va'e katu, jahexa ave. Nomopu'áiry upe va'e. ⁶Áy aikwaa uka-ta peê-my xe nhe'ê rei e'yha ko yvy-py. Xe Nhande Ryke'y tee va'e xe nhe'ê-py rei amboyke-ma voi yvypóry rembiapo vaikwe, he'i Hesu onhe'ê-vy gwí imbo'eháry-pe.

Upe ramo he'i hajy jeapa va'e-pe:

—Epu'á katu ehupi nde rupagwe. Tereho nde róga-py, he'i.

⁷Upe-ma ramo opu'ã oho-ma gwóga-py. ⁸Upéa ohexa ramo ijaty va'e kente, opondera eterei hese. Inhe'ê-py rei omopu'ã-gwi:

—Omopu'ã-ma ngatu, he'i Hesu-rehe. —Iporã porã ete va'e voi hembiaapo, he'i hese. —Nhandejáry omombaraete voi upe kwimba'e. Herovia hexapyrã-rupi ha'e hembiaapo, he'i Hesu-rehe Nhandejáry-pe omomba'egwasu-vy.

“Xe moirũ katu” he'i Mateus-pe

(Mc 2.13-17; Lc 5.27-32)

⁹Upe-gwi ohasave Hesu oho-vy. Oho jave, ohexa Mateus héry va'e-pe ogwapy oĩ-vy ramo. Nhane mbopaga haty-py ogwapy oĩ-vy:

—Xe moirũ katu, he'i íxupe.

Upe-ma ramo opu'ã omoirũ-ma íxupe.

¹⁰Upéi oho okaru Mateus róga-py. Ha'e okaru jave gwemimbo'e kwéry ndive ogwahê ave ou-vy heta nhane mbopaga uka va'ety, heta ojevavy va'e ou ave okaru ojoha-py. ¹¹Upéa ohexa ramo fariseu kwéry, oporandu Hesu remimbo'e kwéry-pe:

—Ma'erã-gwi ne mbo'eháry okaru nhane mbopaga uka va'ety ndive, ojevavy va'e ndive ave? he'i Hesu-rehe.

¹²Upéa fariseu nhe'ê ohendu ramo Hesu:

—Nhane resãi ramo, nanhaikotevêi nhane mbogweraharã-rehe. Ha nhande rasy ramo ae katu, nhaikotevê-ma nhane mbogweraharã-rehe, he'i hemimopotise-rehe onhemoirũ uka hagwã.

¹³—Ko'a-rami ae oĩ Nhandejáry kwatia nhe'ê:

“Ijukapyrã xe mboete-vy pejuka rei ramo, pende py'a porã e'ỹ reheve ojóupe, xe ndajohu porãi arã. Ha pejoporiahuvereo rei ramo katu xe ajohu porã arã pende reko. Upe va'e xe aipota voi, he'i Nhandejáry”.*

Upéixa he'i Nhandejáry kwatia nhe'ê. Upéa nhe'ê, tapeho katu peikwaa hagwã he'ise va'e. Ndajúú va'ekwe ahenói-vy “Xe potĩ” he'i ójehe va'e-pe ou xe moirũ. Gwĩ ojevavy va'e-pe ae aju arova uka-vy hekoha íxupe xe moirũ hagwã, he'i fariseu kwéry-pe.

Hesu remimbo'e kwéry ndohasái okaru e'ỹ reheve

(Mc 2.18-22; Lc 5.33-39)

¹⁴Upéi ogwahê ou-vy Hesu renda-py João remimbo'e:

—Ore orohasa orokaru e'ỹ reheve Nhandejáry oipotaha-rami, he'i. —Ohasa ave okaru e'ỹ reheve fariseu kwéry. Ha ne remimbo'e kwéry katu ndohasái voi okaru e'ỹ reheve. Ma'erã po ndoikói ore reko-rami, he'i Hesu-pe oporandu-vy.

¹⁵Upéi Hesu he'i:

—Amombe'u-ta peẽ-my arandu rehegwa nhe'ê omenda va'e rehegwa-rami. Oime vyteri ramo omenda va'e, ndovy'are'ỹiry he'ýi kwéry. Okaru e'ỹ reheve ndohasáiry. Ha ojererahaha óra ogwahê-ta. Upe óra-py ohasa va'erã okaru e'ỹ reheve he'ýi kwéry, he'i ojehegwa omombe'u-vy.

¹⁶Upéi he'i jevy upe pygwa-pe:

—Outro arandu rehegwa nhe'ê háma amombe'u-ta peẽ-my ao rehegwa-rami, uva rykwere rehegwa-rami ave. Nanharemendái ipyahu va'e-py ao tuja. Nharemanda ramo ae katu onhynhy arã ra'e ipyahu va'e. Ojepoapy-vy omondoro arã ao tuja. Osorogwasuve va'erã ao tuja. ¹⁷Nanhanhunháiry ave uva rykwere pyahu va'e hyrurã tuja-py vakapi ipererĩ va'e-py. Ha nhanhunha ramo ae katu, ovu va'erã ra'e ipyahu va'e. Gwyrú tuja va'e omondoro va'erã. Osyrupa arã ra'e pe uva rykwere onhehê-vy. Osoropa arã hyrukwe. Ha uva rykwere pyahu va'e ae katu nhanhunha hyru pyahu-py. Upéixa ramo opyta porã gwyrú ndive, he'i Hesu oipotagwi fariseu kwéry onhemboheko pyahu.

Hesu omoingove jevy kunhataĩ-pe

(Mc 5.21-43; Lc 8.40-56)

* 9:13 Os 6.6

¹⁸ Upéa he'i jave, ogwahẽ ou-vy peteĩ mburuvixa. Gwetypy'ã-rehe onhesũ Hesu rovagwy-py imboete-vy:

—Omano-ma xe raji, he'i. —Omano ramo jepe, iporã ereho joty katu eremoĩ nde po hese oikove jevy hagwã, he'i Hesu-pe.

¹⁹ Inhe'ẽ-py opu'ã oho-vy mburuvixa ndive. Hemimbo'e kwéry hendive ave oho. ²⁰ Upe-ma ramo ogwahẽ ou-vy peteĩ kunha. Are-ma hasy. Hasy doze ro'y ijysapy ogwey eterei íxupe-gwi. Upéa-gwi ou hapykwéri, Hesu rapykwéri. Opoko-ma ijao poty-rehe. ²¹ “Amboja ramo jepe xe po ijao-rehe, akwera-ma va'erã” he'i ra'e ojéupe.

²² Upe-ma ramo ha'e ojere. Oma'ẽ ramo, ohexa-ma upe kunha-pe:

—Ani erekyhyje teĩ xéhegwi, xe raji, he'i imbopy'agwapy-vy íxupe. Gwajýry-pe he'iharami, he'i kunha-pe: —Nde erejerovia-magwi xe-rehe, erekwera-ma, he'i kunha-pe.

Upéa nhe'ẽ he'i-ma ramo, pya'e okwera upe kunha.

²³ Ha upéi katu ojere jevy oho hagwã mburuvixa róga-py. Upe-py ohexa heta oĩ óga-py ijavy va'e. Gwemimby ombopu ohapirõ-vy. Hasẽmba-ma ave. Ohexa ramo:

²⁴ —Tapehopa katu, he'i. —Nomano etéiry voi mitã kunha. Oke ae-ma oĩ-vy, he'i omosẽ-vy.

Ha óga-py oĩ va'e gwive katu onhembohory hese.

²⁵ Omosẽmba rire, oike koty-py mitã kunha oĩ ha-py. Oipopyhy íxupe imopu'ã-vy. ²⁶ Upe ramo upe mitã kunha omopu'ã jevy va'ekwe rerakwã opa-rupi osarambi upe yvy-rupi ohovy.

Hesu ombohesapyso jevy mokõi hesapyso e'ỹ va'e-pe

²⁷ Upe-gwi ohasave oho-vy Hesu. Ha mokõi hesapyso e'ỹ va'e katu ou hapykwéri:

—Davi remiarirõre nhane remiha'arõ va'e, he'i ohenói hatã-vy íxupe. —Ore poriahuvereko katu, ore poriahuvereko katu, he'i ohenói hatã-vy íxupe.

²⁸ Upéi ha'e oike koty-py. Oike rire, ogwahẽ ave ou-vy upe mokõi hesapyso e'ỹ va'e:

—Pejerovia tipo xe-rehe apombohesapyso porã hagwã, he'i íxupe kwéry Hesu.

—Ha'e voi, he'i. —Orojerovia-ma nde-rehe, ore Járy, he'i íxupe.

²⁹ Upéi omoĩ hesa ári opo:

—Xe reroviaha-rami pehexa porã katu, he'i hesapyso e'ỹ va'e-pe.

³⁰ Upe ramo hesapyso porã-ma. Ha Hesu ndohejái omombe'u ojehegwa:

—Erekwera hagwe aníke eremombe'u mbe'u teĩ avave-pe, he'i íxupe omanda pohýi-vy.

³¹ Ha okwera va'e katu ojoko ramo jepe íxupe, osẽ joty oho-vy. Omosarambi ra'e opa-rupi. Herakwã oho joty opa-rupi. Upe yvy-rupi osarambi joty ra'e.

Hesu ombogwera inhe'ẽnge'ỹ va'e-pe

(Lc 11.14-15)

³² Koty-gwi osẽ jave, ojereru Hesu renda-py anháy rerekoha inhe'ẽnge'ỹ va'e. ³³ Omosẽ imondo-vy anháy-pe. Inhe'ẽnge'ỹ va'ekwe onhe'ẽ-ma. Ojogweroaty va'e kente ohexa ramo, opondera eterei hese:

—Yma gwive ko'ángá ete peve ndajahexái voi a ramigwa, he'i. —Nhande kwéry yvy-rupi, Israel yvy-rupi ndajahexái voi a ramigwa, he'i opondera-vy hese.

³⁴ Ha fariseu kwéry katu ndojohu porãi hembiaapo:

—Anháy ruvixa nhe'ẽ-py ae nipo ra'e omosẽ imondo-vy anháy-pe Hesu. Anháy ae nipo ombopu'aka ra'e Hesu-pe, he'i mo'ã hese hikwái.

Hesu oiporiahuvereko ijaty jaty va'e kente kwéry-pe

³⁵ Ha upéi katu Hesu ohasa oho-vy tetã tetã-rupi gwive. Tetã'i tã'i-rupi gwive ave ohasa oho-vy. Ojeporahéi haty haty-rupi Nhandejáry nhande ruvixarã rehegwa nhe'ẽ porã omombe'u mbe'u. Opaixagwa mba'asy-gwi ombogwera gwera hasy va'e-pe.

³⁶ Ohexa ramo ijaty jaty va'e kente, oiporiahuvereko íxupe kwéry:

—Ovexa-rami rei oiko ra'e hikwái, he'i. —Ndoikóiry ramo ovexa-rehe onhangareko va'e, ndoiko porãi. Ipyrasypa, heterasypa ave. Ho'a ramo, ndaipóri henohéharã. Upéixa ete

ovexa hasy va'e-rami, herekwa e'ÿ va'e-rami oiko ko ijaty va'e kente xe moirüse va'e. Upéa-gwi aiporiahuvereko-ma íxupe kwéry, he'i ojogweroaty va'e kente kwéry-rehe.

³⁷ Upe ramo omombe'u gwemimbo'e kwéry-pe nhe'ë mombe'uharã rehegwa nhe'ë temitÿgwe kytiharã rehegwa nhe'ë oiporu-vy.

—Heta hi'a porã ramo jepe, ndahetáiry joty oikytí va'e heraha-vy. ³⁸ Upéixa ete heta eterei oí ramo jepe nhe'ë porã ohenduse va'e, ndahetáiry joty imombe'uharã íxupe kwéry. Upéa-gwi pejapo oração temitÿgwe járy-pe omondo hagwã oikytiharã, he'i Nhandejáry-rehe, nhe'ë porã mombe'uharã-rehe oração ojapo uka-vy.

10

Doze voi Hesu irũ tee
(Mc 3.13-19; Lc 6.12-16)

¹ Ha upéi katu Hesu ohenói gwemimbo'e kwéry omoirũ teeha doze va'e-pe. Upe va'e doze va'e ohenói ou hagwã. Ou ramo ombopu'aka íxupe kwéry omosë hagwã anháy imondo-vy. Opaixagwa mba'asy-rehe ave ombopu'aka íxupe kwéry ombogwera hagwã hasy va'e-pe. ² Gwĩ doze hemimondo va'e héry a-rami. Oĩ Simão ha'e tenonde va'e, tuvixave va'e. Pedro ombohéry jo'a íxupe. Tyvúry héry André. Oĩ ave mokõi Zebedu ra'y Tiago, tyvúry héry João ave. ³ Oĩ ave Filipe Bartolomeu ndive. Oĩ Tomé Mateus ndive. Mateus nhane mbopaga uka va'ety plata-py governo pegwarã. Oĩ Alfeu ra'y Tiago. Oĩ Tadeu ave. ⁴ Oĩ ave Simão. Ha'e gwĩ ojehegwa e'ÿ va'e huvixa ramo oiko va'e-pe omosëse va'e kwéry irũ va'ekwe. Indive oĩ Judas Iscariotes, upe va'e Hesu pyhy ukaharã voi.

Hesu omondo upéa doze gwemimbo'e nhe'ë porã omombe'u hagwã
(Mc 6.7-13; Lc 9.1-6)

⁵ Upéa doze gwemimbo'e omondo nhe'ë porã omombe'u hagwã:

—Tapeho a-rami, he'i. —Ani ereho teĩ judeu e'ÿ va'e oiko ha-rupi. Tetã Samaritano oiko ha-rupi ani ereike teĩ upe-py. ⁶ Tapeho ae katu Israel remiarirõre judeu kwéry oiko ha-rupi. Ovexa okanhy va'ekwe-rami oiko hikwái. Tapeho ae katu peheka-vy íxupe kwéry. ⁷ Pemombe'u mbe'u pehokwe-vy Nhandejáry rehegwa nhe'ë íxupe kwéry: “Ogwahê-ma ngatu hi'óra. Pene mo'agwĩ-ma ou-vy Nhandejáry pende ruvixarã” peje kuri judeu kwéry-pe, he'i. ⁸ —Pembogwera gwerã katu hasy va'e-pe peho-vy. Pemoingove jevy katu omano va'ekwe-pe. Pembogwera katu mba'asy vai-gwi ijai aipa va'e-pe. Pemosë mosë katu anháy-pe. Pende rexakwaa rei hagwe-rami ave, pehexakwaa rei pende rapixa pembopaga e'ÿ reheve. ⁹ Ani ereraha teĩ plata nde ku'akwaha gwy-py. Hepy va'e ouro ani ereraha teĩ. Ani ereraha plata. Moeda jepe ani ereraha teĩ. ¹⁰ Nde vosa ani ereraha teĩ ave ne ndive ereho jave. Ne kamisa ani erembojo'a ave kuri. Nde pyryru, nde pykoka ave ani ereraha teĩ. “Omba'apo va'e-pe nhame'ë hemikotevë” ja'e. ¹¹ Atygwasu-py ereike ramo, tetã'i-my ereike ramo ave, eporandu ranhe hembiaapo porã porã va'e-rehe. “Kipy kipy tipo oĩ hembiaapo porã va'e” peje. Epyta indive eresë peve pe tetã-gwi ereiko-vy upe-py. ¹² Ereike ramo óga-py, “Tapene mbopy'agwapy katu Nhandejáry” ere óga pygwa-pe. ¹³ Óga pygwa pene mogwahë porã ramo, peheja katu pene nhe'ë íxupe. Ha napene mogwahëi ramo, ani peheja teĩ íxupe pene nhe'ë. Upe pene nhe'ë perupa jevy katu íxugwi. ¹⁴ Ha oĩ ramo óga pygwa pende rerohory e'ÿ va'e, oĩ ramo tetã mygwa ave pene nhe'ë renduse e'ÿha va'e katu, pe tetã-gwi eresë jave, embovava nde py ho'apa hagwã vyv timbore nde py-gwi. Upéixa erejapo ramo, eremomandu'a uka arã hembiaapo vaikwe-rehe. “Nhandejáry re'ÿi e'ÿ-rami nipo ra'e nhande” he'i va'erã ójehe. ¹⁵ Amombe'u-ta peë-my anhetegwa va'e. Upe áry-py, yvypóry rembiapo apokwe-rami ojererekoha áry-py, omoingo asy va'erã gwĩ hekoha vai va'ekwe-pe Sodoma tetã mygwa amyri kwéry-pe. Gomorra tetã mygwa amyri kwéry-pe ave. Ogwereko asy va'erã íxupe kwéry. Ha pe tetã mygwa-pe ne nhe'ë renduse e'ÿ va'e-pe katu ogwerekó asyve syve va'erã Nhandejáry, he'i gwemimbo'e kwéry-pe.

“Pende rereko asy va'erã” he'i
(Lc 12.11-12)

¹⁶ Upéi Hesu he'i jevy gwemimbo'e kwéry-pe:

—Pejeapysaka katu xe nhe'ê-rehe. Xáke pende-rehe. Oromondo-ta hekoha vai va'e pa'ũ-rupi ereiko hagwã. Ovexa jagwarete pa'ũ-my oiko va'e-rami peê peiko arã ipa'ũ-my. Aipo ramo penhangareko porã katu pendéjehe peê. Ju'igwasu onhangareko ójehe ha-rami, peiko arandu katu peê ave. Pykasu inharõ e'ỹ va'e reko-rami, peiko katu peê ave.

¹⁷ —Xáke pende reraha va'erã pende ruvixa renda-py. Ojeporahéi haty haty-rupi pene nupã va'erã. ¹⁸ Xe-rehe ha-py pende reraha va'erã mburuvixa renda-py. Mburuvixagwasu renonde-py ave pende reraha va'erã. Judeu kwéry-pe, judeu e'ỹ kwéry-pe ave, pemombe'u va'erã Nhandejáry tuvixa mba'e voiha. ¹⁹ Pende reraha ramo, ani pemoĩ teĩ pende py'a-rehe pene nhe'êrã. Upe óra-py ou rei va'erã nde juru-py ne nhe'êrã. ²⁰ Erenhe'ê ramo, ndaha'úi va'erã ne arandu-rupi. Nde juru-py ae Nhandejáry ombou va'erã nde-vy ne nhe'êrã. Pende Ru yváy pygwa va'e nhe'ê marangatu ou va'erã nde juru-py ne nhe'êrã ne monhe'ê hagwã. ²¹ Ha tyke'ýry oipphy va'erã heraha-vy gwyvýry ojuka uka hagwã. Tyvýry ojuka uka va'erã gwyke'ýry-pe. Túvy ojuka uka va'erã gwa'ýry-pe gwajýry-pe ave. Ha ta'ýry kwéry tajýry kwéry ave ogwereco asy va'erã gwu-pe ojuka ukavy. Imemby kwéry ojuka ukase va'erã osy-pe. ²² Xe-rehe ha-py enterovéa ipy'a vai va'erã oiko-vy pende-rehe. Ha xéhegwi ova e'ỹ va'e, ogwereco asy ukaharã-pe onheme'ê e'ỹ va'e, ojereroko asy ramo jepe onhembopyatã joty va'e katu, orende va'erã íxupe Nhandejáry. ²³ Pende rereko asy hagwe-gwi, tapakanhy katu peho-vy outro henda-py. Amombe'u-ta peê-my anhetegwa va'e. Xe Nhande Ryke'y tee va'e ajekwaa aju hagwã áry-py, oĩ vyteri va'erã Israel yvy pygwa tetã ne'írá vyteri pegwahê upe-py. ²⁴ Hemimbo'e nonhembotuvixa mba'úi voi ombo'eháry-pe. Nonhembotuvixa mba'úi ave ojáry-pe hembigwái. ²⁵ Iporã katu ombo'eháry-pe ohekoarupityse ramo hemimbo'e. Ojáry-pe ohekoarupityse ramo hembigwái, iporã ave. Onhe'ê vai rei kuri xe-rehe, “Anháy ruvixa Belzebu” he'i kuri xe-rehe. Upéixa he'i ramo xe-rehe, onhe'ê vaive va'erã voi pende-rehe. Xe óga járy-rami. Peê óga pygwa. Xe-rehe onhe'ê vaiha-rami ave, pende-rehe onhe'ê vaive va'erã, he'i gwemimbo'e kwéry-pe Hesu.

*“Nhandejáry-gwi ae katu pekyhyje” he'i
(Lc 12.2-7)*

²⁶ Upéi he'i jevy gwemimbo'e kwéry-pe:

—Upéixa ramo, ani erekyhyje teĩ pende rereko asy ukaharã-gwi. Entéro nghanomi va'ekwe gwive, ojehexa jevy joty va'erã voi. Entéro nhamokanhy va'e gwive, ojekwaa jevy joty va'erã.

²⁷ —Nhemí ha-py peê-my xe remimombe'ukwe, atýra-py pemombe'u mbe'u jevy. Pende apysa-py peê-my xe rembierovovo xe remimombe'ukwe, pende róga apotaha ári, penhomboaty haty haty-rupi, perosapukái va'e-rami pemombe'u jevy. ²⁸ Oĩ nhande rete jukaharã. Ha nhane nhe'êgwe-rehe ae katu ndaipu'akáiry. Aníke erekyhyje teĩ íxugwi. Ha Nhandejáry katu ipu'aka nhane nhe'êgwe-rehe. Omondose ramo, omondo arã omondose ha-py. Tata opa opa rei e'ỹ va'e haty-py nhane mondose ramo, nhande rete reheve nhane mondo va'erã. Íxugwi ae katu pekyhyje. Íxugwi ae katu enhemokirirí. ²⁹ Mokõi gwyrá'i ovende ramo, ndahepýi. Nanhapenáí joty hese. Ha Nhandejáry katu onhangareko hese. Hymba voi. Yvy-py peteĩ ho'a ramo, ojéhegwi rei ndo'áiry. Nhandejáry nhe'ê-py ae ho'a omano-vy. ³⁰⁻³¹ Heta eterei gwyrá'i ovende ramo jepe ndahepy eteí joty. Ha nde ae katu tuvixa mba'eve Nhandejáry-pe gwyrá kwéry-gwi. Ne akã ragwe jepe, mbovy po oĩ oikwaa-ma. Peteĩ teĩ oipapa-ma nde-rehe opena eterei-gwi. “Tuvixa mba'e” he'i nde-rehe Nhandejáry. Upéa-gwi aníke pekyhyje teĩ pendéjehe, he'i gwemimbo'e kwéry-pe.

Atýra-py, “Hesu re'ýi voi xe”

*he'i va'e
(Lc 12.8-9)*

³² Upéi he'i jevy Hesu:

—Atýra-py, “Hesu re'ýi voi xe” ere ramo katu, xe Ru yváy pygwa va'e renonde-py, “Xe re'ýi voi upe va'e” ha'e arã nde-rehe, he'i. ³³—Ha atýra-py, “Hesu remimbo'e e'ý voi xe” ere ramo katu, xe Ru yváy pygwa renonde-py, “Xe re'ýi e'ý voi upe va'e” ha'e arã nde-rehe, he'i gwemimbo'e kwéry-pe.

“Entéro yvypóry ijoja porã hagwã ndajúí va'ekwe” he'i

(Mc 8.34-35; Lc 9.24; 12.51-53; 14.26-27; Ap 12.11)

³⁴Upéi he'i jevy Hesu:

—“Ojekwaa-ma ou-vy Hesu entéro yvypóry ijoja porã hagwã” ani ere mo'ã ndejéupe. Upe va'erã-rehe ndajúí va'ekwe. Ha ijoja e'ý hagwã onhondive xe renduse e'ýha xe renduseharã ave ae katu aju va'ekwe. ³⁵Xe aju va'ekwe-gwi, ndoiko jójái va'erã ta'ýry gwu ndive. Ndojoeko rayhu reíry va'erã imemby kunha osy ndive. Imemby rembireko ndoiko porãí va'erã ome sy ndive ave. ³⁶Nhande róga pygwa jepe nhande a'e'ýha voi, he'i Nhandejáry kwatia nhe'ẽ oiporu-vy.*

Upéi he'i jevy:

³⁷—Oí ramo xe rayhu va'e, gwu-pe xéhegwi ohayhuve va'e, osy-pe ohayhuve va'e xéhegwi, ndaha'éi arã xe re'ýi tee. Oí ramo xe rayhu va'e, gwa'ýry-pe, gwaj'ýry-pe ohayhuve va'e xéhegwi, omemby-pe ohayhuve va'e xéhegwi, ndaha'éiry xe re'ýi tee upe va'e, he'i. ³⁸—Gwí xe moirũ tee hagwã okurusugwasu ohupi heraha-vy va'e-rami ijukapyrã-rami oiko va'e ae, xe re'ýi tee va'erã, he'i. —Upéa reko-rupi ndereikói ramo, ndaha'éi arã xe re'ýi tee. ³⁹Gwekove-rehe hakate'ý va'e ndoikove mo'ái va'erã Nhandejáry ndive. Ha xe-rehe ha-py gwekove-rehe nopenái va'e katu, oikove meme va'erã Nhandejáry ndive, he'i gwemimbo'e kwéry-pe.

Ne rembiapo porãkwe repy ohekoviarõ va'erã voi nde-vy Nhandejáry

(Mt 25.34-40; Mc 9.41; Jo 13.20)

⁴⁰Upéi he'i jevy Hesu:

—Ne mogwahẽ porã va'e, xe háma ave xe mogwahẽ porã va'erã. Xe mogwahẽ porã va'e, ha'e háma ave Nhandejáry xe mbou va'ekwe-pe omogwahẽ porã va'erã. ⁴¹Ogwahẽ ou-vy ramo nde róga-py Nhandejáry nhe'ẽ-py omombe'u va'ety, emogwahẽ porã katu íxupe Nhandejáry rembigwái-gwi. Nhandejáry ombohekovia va'erã upe inhe'ẽ-py omombe'u va'ety-pe. Ha'e-rami ave ne rembiapo porãkwe repy ohekoviarõ va'erã voi nde-vy yváy-py. Ogwahẽ ou-vy ramo nde róga-py hekoha porã va'e, emogwahẽ porã katu íxupe hekoha porã-gwi. Nhandejáry ombohekovia va'erã upe hekoha porã va'e-pe. Ha'e-rami ave ne rembiapo porãkwe repy ohekoviarõ va'erã nde-vy yváy-py. ⁴²Xe remimbo'e va'e heko'ive va'e jepe iyy'uhéi-ma ramo, eme'ẽ y íxupe toy'u. Xe remimbo'e-gwi, emboy'u joty íxupe. Amombe'u-ta peẽ-my anhetegwa va'e. Ne rembiapo porãkwe repy ohekoviarõ va'erã voi nde-vy yváy-py, he'i gwemimbo'e kwéry-pe Hesu.

11

Ogwahẽ ou-vy Hesu renda-py João Batista remimbo'e

(Lc 7.18-35)

¹Upéixa Hesu ombo'e mbo'e upe doze gwemimbo'e kwéry-pe. Ombo'epa rire, osẽ oho-vy Hesu rupive hikwái. Upe-gwi ohasave oho-vy tetã tetã-rupi. Oporombo'e mbo'e Hesu oho-vy. Omombe'u mbe'u oho-vy ave Nhandejáry nhe'ẽ. ²Ha João Batista katu onhemoi preso oiko-vy. Ohendu ramo Cristo Nhandejáry rembiporavo va'e rerakwã, mokõi gwemimbo'e omondo Hesu ha-py oikwaa hagwã: “Mba'eixagwa po nde” omoporandu uka hagwã omondo íxupe.

³Ogwahẽ oho-vy ramo he'i:

—Nde tipo upe temiha'arõ va'e voi, he'i oporandu-vy íxupe. —Ndaha'éi tipo nde? Tapa outro ae nhaha'arõ va'erã? he'i oporandu-vy Hesu-pe.

* 10:36 Mq 7.6

⁴—Tapeho jevy katu, he'i João remimbo'e kwéry-pe. —Emombe'u João-pe ne remiendu endukwe, ne rembiexagwe xagwe ave emombe'u íxupe, he'i. ⁵—Hesapyso e'ý va'ekwe hesapyso porã-ma. Ogwata e'ý va'ekwe ogwata porã-ma. Mba'asy vai-gwi ijai aipa va'ekwe okwera-ma. Ijapysa e'ý va'ekwe ijapysa porã-ma. Omano ete va'ekwe oikove jevy-ma. Ha iporiahu va'e kwéry-pe katu omombe'u-ma Nhandejáry rehegwa nhe'ê porã. ⁶Xe rembiapo rerakwã rendu ramo, ohexa kwaa-ma va'erã xe rekoha-rehe. Oikwaa-ma va'erã xe-rehe. Xe-rehe ojerovia ku'a ku'a va'e, “Nhandejáry rembiporavo tee para'e. Nhandejáry rembiporavo e'ý para'e” he'i rei va'e xe-rehe, ndovy'a mo'ái va'erã. Ha xe-rehe ojerovia tee va'e, xe rerovia ku'a ku'a e'ý va'e katu xe rerovy'a tee va'erã, he'i João-rehe.

⁷Osê-ma ramo oho jevy-vy João remimbo'e, omombe'u Hesu ojogweroaty aty va'e kente-pe João rehegwa nhe'ê omombe'u:

—Peho kuri tekваты e'ý-my. Ma'erã tipo peho araka'e? Upe-py heta oĩ kapiyvanhe'ê yvytu ogweroa rova va'e. Upéa-rehe ndapehói ra'e. ⁸Mbava'e rexa-vy rei tipo peho araka'e? Ijao porã va'e rexa-vy ndapehói araka'e. Mburuvixagwasu róga kakwaa-py oiko ijao porã va'e. ⁹Mbava'e rexa-vy rei tipo peho araka'e. Nhandejáry nhe'ê-py omombe'u va'ety rexa-vy rei po peho araka'e? Upéa-rehe voi katu peho araka'e. Ha'e-ta peê-my: Gwĩ Nhandejáry nhe'ê-py omombe'u va'ety kwéry-gwi tuvixave va'e, João Batista héry va'e pehexa voi araka'e. ¹⁰Pe Nhandejáry kwatia nhe'ê omotenonde íxupe va'ekwe-pe pehexa araka'e. Ko'a-rami ae oĩ Nhandejáry kwatia nhe'ê:

“Xe nhe'ê mombe'uharã amondo va'erã íxupe ne renonde-rupi. Ne'írá ereho jave, omopotĩ va'erã nde raperã”*

he'i va'ekwe João Batista rekoharã-rehe, upe xe nhe'ê ohendu uka va'erã-rehe.

¹¹—Amombe'u-ta peê-my anhetegwa va'e. Yma gwive ãy peve ndaipóri va'ekwe João Batista-gwi tuvixave va'e. Ha ãy katu, Nhandejáry nhande ruvixa-pe omoirũ tee va'e gwive, tuvixave va'e João Batista-gwi. Onhombote e'ý ete va'e jepe, Nhandejáry nhande ruvixa-pe omoirũ tee joty ramo, tuvixave va'e João Batista-gwi. ¹²Are-ma va'ekwe João omombe'u va'ekwe ko'ángã ete peve. Heta kente onhemokyre'ý eterei omoirũ hagwã Nhandejáry-pe gwuvixarã. Ojapura-ma va'e-rami ikyre'ý. Oikese ha-py pya'e a'e oike ha-rami itarova-ma va'e-rami, omoirũse nga'u Nhandejáry-pe gwuvixarã. ¹³Entéro yma gware Nhandejáry nhe'ê-py omombe'u va'ety gwive omotenonde va'ekwe ãy oiko va'erã. Nhandejáry nhande ruvixarã oiko va'erã omotenonde va'ekwe Nhandejáry kwatia nhe'ê-py omombe'u-vy. João Batista peve omotenonde va'ekwe omombe'u-vy: “Onhemoingove jevy va'erã Elias amyri” he'i va'ekwe yma gware, Nhandejáry kwatia nhe'ê omombe'u-vy. ¹⁴Pehenduse ramo peê-my ha'e va'e, pejeapysaka katu. Upe Elias amyri upe ou va'erã he'i va'ekwe yma gware, he'i João Batista-rehe, ojekwaa ramo va'e-rehe. Elias rekovia ojekwaa-ma João. ãy nomotenondevéi imombe'u-vy. Yma he'i hagwe-rami, ãy oiko-ma. ¹⁵Ne aranduse ramo ejeapysaka porã katu xe nhe'ê-rehe.

¹⁶—Xe amombe'u-ta peê-my mba'eixa po oiko ko'ãygwa. Mitã-rami voi ko'ãygwa. Mba'e jogwa haty-py onhembosarái mitã. Osapukái oirürãgwe-pe: ¹⁷“Ore remimby orombopu kuri ha peê ndapejerokyséi ra'e. Orohapirõ ra'ángã kuri ha peê ndapejahe'oséiry ra'e” he'i oirürãgwe-pe nonhembosaraiséi-gwi indive kwéry. Upe mitã oirũ remimbota ndojaposéiry. Upe mitãgwe reko-rami ãygwa ndogwerovy'ái gwapixa reko. ¹⁸Ojekwaa va'ekwe ou-vy João Batista. Nhandejáry oipotaha-rami ohasa okaru e'ý reheve. Uva rykwere ndo'úi va'ekwe. Ha hexaháry ae katu, “Anháy rerekoha” he'i mo'ã João Batista-rehe va'ekwe. ¹⁹Áy xe Nhande Ryke'y tee va'e ajekwaa-ma aju-vy. Akaru-vy aju. Uva rykwere'u-vy aju. Ha xe rexaháry ae katu: “Okaru eterei upe va'e” he'i xe-rehe. “Ho'u eterei uva rykwere upe va'e. Oporombopaga uka va'ety ndive oiko va'e upéa. Gwĩ ojevay va'e ndive ave oiko va'e upéa” he'i voi xe-rehe hikwái. Ha João rembiapo porã rexa kwaa-vy hese, xe rembiapo porã rexa kwaa-vy xe-rehe ave katu, “Hi'arandu tee nipo ra'e” peje va'erã ore-rehe, he'i João-rehe ijaty jaty va'e kente kwéry-pe.

* 11:10 Ml 3.1

*Hesu ndojohu porāi upe tetā mygwa inhe'ē rendu e'y va'e-pe
(Lc 10.13-15)*

²⁰ Ha upéi katu Hesu ndojohu porāi upe tetā mygwa inhe'ē rendu e'y va'e-pe. Upe-py heta heroviapyrā-rupi hembiaapo porā porā ramo jepe, ndogwerováí joty gwekoha. Nomboasýi gwembiaapo vaikwe. ²¹ Upe ramo he'i:

—Apomboasy eterei peē-my Corazim tetā mygwa kwéry. Apomboasy eterei peē-my Betsaida tetā mygwa kwéry. Heroviapyrā-rupi xe rembiapo porā porā kuri pene retā pa'ū-rupi apombojerovia ukase-vy mo'ā xéjehe. Ko'ā ramigwa voi ajapo ramo ra'e Tiro tetā-my Sidom tetā-my ave, pya'e voi omboasy arā araka'e gwembiaapo vaikwe ra'e. Pya'e voi ogwerova arā araka'e gwekoha. Gwékoha-rupi ivy'are'y va'e ao nhane mopirehatí va'e ao omonde arā araka'e. Tanimbu oipixy arā ójehe araka'e ojekwaa hagwā hese gwembiaopkwe omboasyha.

²² —Upe áry-py yvypóry gwive hembiaapo apokwe-rami ojerereko hagwā áry-py, ogw-ereko asy va'erā Tiro tetā mygwa-pe, Sidom tetā mygwa ndive. Ha peē ae pende rereko asy asyve va'erā katu. ²³ Ha peē Cafarnaum tetā mygwa katu, “Jajeupi va'erā yvate yváy-py jaiko hagwā” peje mo'ā pendéjehe penhembotuvixa ukase-vy. Ahániry, napene mbojeupi mo'ai va'erā Nhandejáry. Pegwejy ae va'erā vvy gwy-py peho-vy, tata opa opa rei e'y haty-py. Heroviapyrā-rupi xe rembiapo porā porā kuri pene retā pa'ū-rupi apombojerovia ukase-vy mo'ā xéjehe. Upéixa ndajapói araka'e Sodoma tetā-my, upe hekoha vai eterei oiko va'e haty-py. Ha upéixa xe ajapo ramo ae katu araka'e upe-py, omboasy arā voi araka'e gwembiaapo vaikwe, ogwerova arā araka'e gwekoha. Nonhehundíry arā araka'e. Ko'ánga ete peve opyta arā ra'e pe tetā. ²⁴ Upe áry-py yvypóry gwive hembiaapo apokwe-rami ojerereko hagwā áry-py, omoingo asy va'erā Nhandejáry Sodoma tetā mygwa-pe. Ha peē Cafarnaum tetā mygwa ae katu, pene moingo asyve syve va'erā voi, he'i Hesu upe tatā mygwa-pe omboasy-vy.

*“Peju katu xe ha-py apomotongea va'erā” he'i
(Lc 10.21-22)*

²⁵⁻²⁶ Upe ramo he'i Nhandejáry-pe Hesu:

—Xe Ru, he'i —Nde yváy pygwa Járy, vvy pygwa Járy ave. Oí oakā-gwi rei hi'arandu va'e. Nahi'arandu porāi. “Ore ae oroikwaa va'e” he'i va'e mo'ā ójehe, upe va'e-pe nderekwaa ukái inharandu porārā. Ha gwi mitá vérami ne'írā inharandu va'e, “Ore oroikwaa va'e” he'i e'y va'e ójehe katu, upéa va'e-pe ereikwaa uka inharandu porārā. Upéa ne remimbota porā voi, xe Ru. Ereipota voi upe va'e. Upéa-rehe atima porā nde-vy, he'i Nhandejáry-pe Hesu.

²⁷ Upéi he'i:

—Opamba'e-rehe xe mbopu'aka va'ekwe xe Ru. Xe pogwy-py opamba'e omoí, he'i. —Xe kwaa porāha voi ndoikói. Xe Ru, ha'e anho mante xe kwaapa. Xe Ru kwaa porāha ndoikói. Xe ae Ta'yry xe anho mante aikwaapa va'e íxupe. Ha outro kwéry-pe xe aikwaa ukase ramo katu, oikwaapa ave arā xe Ru-pe, he'i.

²⁸ —Peju katu xe ha-py. Peē pene kane'ō va'e, ipohýi va'e ogwerahaha-rami oiko va'e-rami peiko va'e, peju katu xe ha-py. Apomotongea va'erā, apomombytu'u va'erā. ²⁹ Xe ko xe reko kirirí va'e. Xe reko amomirí va'e voi xe. Upéa-gwi xe nhe'ē pehendu katu, xe nhe'ē-rupi peiko katu. Xe remimbo'e ramo peiko ramo, pende py'agwapy va'erā, he'i. ³⁰ —Ndahasýiry niko xe remimombe'u pejapo hagwā. Pejapo ramo xe nhe'ē, omanda pohýi va'e pogwy-py ndapeikovéi-ma va'erā. Upéa-gwi pende py'agwapy porā va'erā peiko-vy, he'i Hesu upe pygwa-pe onhemombe'u-vy.

12

*“Xe nhande pytu'uha áry járy” he'i ójehe Hesu
(Mc 2.23-28; Lc 6.1-5)*

¹ Ha upéi katu nhande pytu'uha áry-py oho ogwata Hesu. Trigoty mbyte-rupi oho ogwata. Ha hemimbo'e kwéry katu ivare'a-ma oho-vy. Upéa-gwi oipo'o-ma oho-vy trigo rope ho'u hagdã. ²Upéa ohexa ramo fariseu kwéry, he'i:

—Ema'ê hese, he'i íxupe. —Ma'erã po ne remimbo'e oipo'o trigo rope pytu'uha áry-py? Yma gware reko-rupi ndoikóiry. Pytu'uha áry-py oipo'o ramo, ndatekoháiry ogwereco, he'i íxupe fariseu kwéry.

³Upe-ma ramo Hesu he'i:

—Pemonhe'ê nhe'ê rei peiko-vy ndapeikwaáiry Davi amyri rehegwa nhe'ê kwatia-rehe omói va'ekwe, he'i. —Nahembi'úi-gwi, ivare'apa va'ekwe Davi oirü kwéry ndive. ⁴Upéa-gwi oike koty-py va'ekwe, Nhandejáry-pe nhamboete haty-py oike va'ekwe. Oí upe-py upe mbojape Nhandejáry rovagwy-py pa'i remimoígwe. Nhandejáry nhe'ê-py ndaja'úi voi upe mbojape. Ha pa'i kwéry anho mante ho'u arã. Ha Davi katu pa'i e'ý ramo jepe, ho'u joty upe mbojape. Omongaru joty ave oirü kwéry-pe. Ivare'a-gwi, Nhandejáry, “Pejejavy ko” nde'íry íxupe. Ojohu porã hembiapokwe, ogwero'v'a ave. ⁵Pemonhe'ê nhe'ê rei peiko-vy ndapeikwaái Moisés amyri remimombe'ukwe nhane rekorã. Ndatekohá-ramiry jaiko nhamba'apo ramo pytu'uha áry-py. Ha pa'i kwéry katu omba'apo joty pytu'uha áry-py. Nhandejáry róga kakwaa-py omba'apo. Upe áry-py omba'apo ramo jepe, Nhandejáry, “Pejejavy ko” nde'íry joty íxupe. Pytu'uha áry-py omba'apo ramo Nhandejáry róga-py, ojohu porã joty huvixa kwéry hembiaipo.

⁶—Ha xe katu xe mbaraeteve Nhandejáry róga ruvixa kwéry-gwi. ⁷⁻⁸Xe Nhande Ryke'y tee va'e. Upéa-gwi xe ko pytu'uha áry jary ave. Upéixa-gwi iporã joty xe amba'apo pytu'uha áry-py. He'i Nhandejáry kwatia nhe'ê:

“Ha peê katu ndapejoporíahuvereko kwaáiry peiko-vy. Aipo ramo, pene kyre'ý ramo jepe pejapo hagdã Moisés amyri remimombe'ukwe gwive, pejapo rei joty. Xe aipota ae katu pende py'a porã onhondive”

he'i Nhandejáry nhe'ê. Upéa kwatia nhe'ê pemonhe'ê rei peiko-vy, ndapeikwaáiry. Ne arandu ramo ra'e, ipy'a potí va'e-rehe, “Ipy'a ky'a” nde'íry arã ra'e, he'i fariseu kwéry-pe Hesu.

Hesu ombogwera ipo ypi va'e-pe

(Mc 3.1-6; Lc 6.6-11)

⁹Upe-gwi Hesu ohasave oho-vy ojeprahéi haty-py oike oho-vy. ¹⁰Upe-py oí ipo ypi va'e. Ha fariseu kwéry, “Hembiaipo vai va'e upe va'e” he'ise Hesu-rehe. Upéa-gwi oporandu íxupe hikwái:

—Tekoha-rami pa jaiko ra'e nhambogwera ramo pytu'uha áry-py? he'i ombojase rei hese-vy.

¹¹Ha Hesu he'i:

—Pytu'uha áry-py pene rymba ovexa ho'a ramo vvy kwa-py, ndapeheja reíry va'erã, he'i íxupe kwéry. —Pehupi jevy va'erã ae heraha-vy, he'i.

¹²—Ovale voi nhane rymba ovexa. Ha tekove hasy va'e katu ovaleve voi ovexa-gwi. Ovaleve voi. Upéa-gwi pytu'uha áry-py nhaipytygwõ ramo nhande rapixa, tekoha-rupi joty jaiko, he'i fariseu kwéry-pe.

¹³Upéa he'i rire:

—Eipyso katu nde po, he'i ipo ypi va'e-pe.

Oipyso-ma, okwera porã-ma. Ijoja-ma ipo mokõive.

¹⁴Ha fariseu kwéry ndojohu porã hembiaipo porã va'e. Osê oho-vy ha'e kwéry nhemi ha-py:

—Mba'éixa tamo ra'e jajuka Hesu-pe? he'i. —Nhaha'arõ jajuka hagdã íxupe, he'i onhonhe'ëndu-vy hikwái.

Nhandejáry rembiporavo tee va'e

¹⁵Upéa oikwaa ramo Hesu, otekwarai-ma oho-vy outro henda-py. Otekwarai oho jave, heta va'e ave oho hapykwéri. Heta va'e-pe ombogwera gwera oho-vy. ¹⁶Ombogwera-ma ramo, “Aníke xe mombe'u teí” he'i okwera va'e-pe. ¹⁷Upéixa ojapo áy oiko hagdã

Nhandejáry nhe'ê-py omombe'u va'ety Isaías amyri he'i hagwe-rami. ¹⁸ A-rami voi omoí va'ekwe kwatia-rehe:

“Upe va'e xe rembigwái, xe rembiporavo va'e. Ha'e xe rembihayhu. Xe rembierovy'a va'e upéa. Xe Nhe'ê Marangatu amoí-ta hese. Omombe'u va'erã entéro yvypóry-pe gwive. Nhandejáry pende py'a omopotiharã, he'i va'erã xe-rehe. ¹⁹ Ipoxy va'e onhonhe'ê mbojeyvy jevyha va'e-rami ndoikói va'erã. Osapukái va'e-rami ndoikói va'erã. Okiriri va'e-rami ae oiko va'erã. Atýra-py nohendúi va'erã íxupe onhe'ê hatã-vy. ²⁰ Heko kiriri va'erã. Takwáry, Xýky, he'i heseve va'e nomopêi va'erã. Upéixa opena va'erã iporiahu va'e-rehe. Tataendy ogwe-tama ramo, imbogwe e'y'harã. Upéixa ete onhemboete e'y va'e-pe ogwereco porã va'erã. Upéixa hembiaipo porã porã va'erã. Ndová va'erã Nhandejáry rape-gwi. Oparupi ojekwaa va'erã anhetegwa. ²¹ Hese ojerovia-ma va'erã yvypóry kente kwéry: Naha'arõ katu íxupe jaiko-vy. Ou va'erã, he'i va'erã hese”*

he'i va'ekwe Nhandejáry kwatia nhe'ê gwa'yry rehegwa omombe'u-vy.

Hesu omombe'u Belzebu rehegwa nhe'ê

(Mc 3.20-30; Lc 11.14-23)

²² Upe ramo ojereru íxupe, Hesu-pe peteí anháy rerekoha. Hesapyso e'y va'e, inhe'enge'y va'e ave. Ombogwera-ma ramo íxupe, inhe'enge'y va'ekwe onhe'ê porã-ma, ha hesapyso e'y va'ekwe hesapyso porã-ma.

²³ Hembiaipo porã rexa-vy,

—Mba'éixa po oporombogwera, he'i ojóupe opondera-vy hese. —Upéa ko ndaha'éi para'e Davi amyri remiarirõre, nhane remiha'arõ? he'i hese ijaty jaty va'e kwéry.

²⁴ Ha fariseu kwéry katu upéa ohendu ramo: “Ojéhegwi rei ndaipu'akái omosê hagwã anháy” he'i. “Anháy ruvixa Belzebu nhe'ê-rupi ae omosê imondo-vy” he'i mo'ã ojéupe hikwái.

²⁵ Ha ha'e ipy'apóry oikwaa ramo, he'i fariseu kwéry-pe:

—Tape vai-rupi oho mburuvixagwasu re'yí onhondive onhorairõ-vy. Naimbaraetevéi-ma. Tetã mygwa ndaija'éi ramo ojóhe, hóga pygwa ave ndaija'éi ramo ojóhe, tape vai-rupi oho. Hasy va'e-rami ndaipu'akavéi-ma ójehe. Ikangyve ngyve oho-vy, he'i arandu rehegwa nhe'ê omombe'u-vy.

²⁶ —Aipo ramo, gwí Satanás re'yí kwéry ave ndaijojái ramo, ndoikovéi arã ra'e. Ndaijojái arã onhondive ra'e. Aipo ramo, ndaipu'akái arã joty ójehe ra'e.

²⁷ —“Belzebu nhe'ê-rupi omosê anháy” peje kuri xe-rehe. Aipo ramo, kiva'e nhe'ê-rupi pende re'yí kwéry omosê anháy? Anháy ruvixa nhe'ê-rupi para'e, Nhandejáry nhe'ê-rupi para'e. Ha Nhandejáry nhe'ê-rupi omosê ramo katu, ma'erã po, “Anháy ruvixa nhe'ê-rupi hembiaipo Hesu” peje kuri joty xe-rehe. “Ijapu” he'i va'erã pende-rehe pende re'yí kwéry.

²⁸ —Ha Nhandejáry Nhe'ê Marangatu tee va'e-rupi katu xe amosê anháy. Aipo ramo, xe rekoha-rehe pehexa kwaa ramo ra'e, “Oiko-ma nipo ra'e Nhandejáry nhande ruvixa ramo” peje arã ra'e xe-rehe.

²⁹ —Amombe'u jevy-ta peẽ-my xe pu'akaveha Satanás-rehe. Ndikatúí avave oike imbaraete va'e róga-py omonda hagwã imba'e kwéry-rehe. Onhapytí ranhe ramo ae íxupe, ogwerahapa arã hóga-py oí va'e, he'i Hesu anháy rerekoha ombogwera-vy pono ipu'akave hese Satanás.

³⁰ Upéi he'i jevy:

—Xe ndive omba'apo e'y va'e, ojoko xe rembiaipo. Xe renda-py ogwenogwa'ê e'y va'e, xe renda-gwi omondo mombyry omosarambi-vy, he'i ójehe ndaija'éi-gwi Satanás.

³¹⁻³² Upéi he'i jevy:

—Aipo ramo, anhete ko xe ha'e-ta peẽ-my: Ne rembiaipo vai ramo, erenhe'ê vai ramo Nhandejáry-rehe, omboyke-ta ndéhegwi Nhandejáry entéro ne rembiaipo vaikwe gwive. Erenhe'ê vai ramo ave xe Nhande Ryke'y tee va'e-rehe, omboyke-ta ndéhegwi ne rembiaipo vaikwe. Ha erenhe'ê vai ramo katu Nhe'ê Marangatu tee va'e-rehe, nande

* 12:21 Is 42.1-4

poriahuvereko mo'airy Nhandejáry. Nde py'a ky'a eterei-ma. Áy nande py'a potí mo'ávéi-ma va'erã. Ha upe áry-py xe aju jevyha áry-py nande py'a potívéi-ma va'erã opa e'y-rehe, he'i fariseu kwéry-pe, “Anháy nhe'ẽ-rupi hembiaipo ra'e Hesu” he'i-gwi Hesu-rehe.

“Hi'a-rehe jaikwaa vvyra”

*he'i Hesu
(Lc 6.43-45)*

³³Upéi omombe'u íxupe kwéry arandu rehegwa nhe'ẽ yva máta rehegwa-rami:

—Yva máta jaikwaa hi'a-rehe. Yvyra porã hi'a porã meme. Ha vvyra vai ndahi'a porã. Hi'a vai meme voi. Hi'a-rehe jaikwaa vvyra, he'i fariseu rekoha-rehe.

³⁴Upéi he'i jevy Hesu:

—Peẽ mbói ipoxy va'e rekoha-rami peiko. Pende reko vai-gwi, ndikatúí penhe'ẽ porã. Nhande py'apóry-rehe nhande nhanhe'ẽ. Entéro nhande py'a-py jareko va'e-rehe, nhanhe'ẽ ave nhande. ³⁵Ipy'a-py hekoha porã va'e reminhongatu iporã. Upe-gwi ogwenohẽ nohẽ ipy'apóry iporã va'e. Ha hekoha vai va'e reminhongatu ipy'a-py katu, ivai vai. Upe-gwi ogwenohẽ nohẽ ojéhegwi ivai va'e. Ipy'apóry ivai va'e ogwenohẽ. ³⁶Amombe'u-ta peẽ-my anhetegwa va'e. Upe áry-py yvypóry gwive hembiaipo apokwe-rami ojerereko hagwã áry-py, ogwereko asy va'erã onhe'ẽ rei rei va'e-pe. Peteĩ teĩ pene remimombe'ukwe rei-rehe pene monhe'ẽ uka va'erã Nhandejáry pende rereko asy-vy. ³⁷Erenhe'ẽ porã ramo, “Ipy'a potí-ma” he'i va'erã nde-rehe. Ha erenhe'ẽ rei ramo katu, “Ipy'a ky'a-ma” he'i va'erã nde-rehe, he'i gwí fariseu kwéry-pe hekoha mombe'u-vy.

*Judeu kwéry ohexase Hesu rembiaipo porã
(Mc 8.11-12; Lc 11.29-32)*

³⁸Upe ramo oporandu Hesu-pe gwí fariseu kwéry, judeu rekombo'ehaty kwéry ndive:

—Oroi-pota ne rembiaipo porã, porombo'eháry, he'i íxupe. —Ore rembiexarã-rupi ejapo jahexa e'y va'e, he'i íxupe.

³⁹Upéi Hesu he'i íxupe kwéry:

—Peẽ katu áy peiko va'e pende reko vai-ma. Ome tee-pe oheja va'e-rami peẽ peiko. Gwembireko tee-gwi opoi va'e-rami ave peẽ peiko. Pejehesa rerova rova va'e Nhandejáry-gwi. Upéa-gwi pejerure jahexa e'y va'erã-rehe, he'i. —Ha ndahexa uka mo'ái peẽ-my upeixagwa, he'i. —Ha Jonas amyri rehegwa nhe'ẽ ojehu íxupe va'ekwe katu amombe'u-ta peẽ-my. Hexapyrã-rupi íxupe ojehu va'ekwe-rami ave, ojehu va'erã xe-vy. Upe va'erã anho mante ahexa uka-ta peẽ-my, he'i.

⁴⁰—Amombe'uve-ta peẽ-my Jonas amyri rehegwa nhe'ẽ. Yma va'ekwe piragwasu omokõ-ma íxupe, Jonas-pe. Ha upe rire katu piragwasu rye py-py ohasa mbohapy áry mbohapy pyhare ave. Upéi osẽ jevy. Upéixa ete xe Nhande Ryke'y tee va'e anhemoi va'erã itagwasu kwa-py mbohapy áry mbohapy pyhare ave ko itagwasu rye py-py. ⁴¹Ha yma gware Jonas amyri oho va'ekwe Nhandejáry nhe'ẽ omombe'u-vy. Nínive tetã mygware-pe omombe'u mbe'u va'ekwe. Upe nhe'ẽ ohendu ramo va'ekwe omboasy-ma gwembiapokwe, ogwerova-ma gwekoha va'ekwe. Ha ko'a-rupi oime tuvixa mba'eve va'e Jonas amyri-gwi, he'i ójehe Hesu íxupe kwéry. —Ha xe nhe'ẽ rendu-vy jepe, ndaperováí joty pende rekoha ra'e. Upéa-gwi upe áry-py, yvypóry hembiapokwe pokwe-rami ojerereko hagwã áry-py, Nínive tetã mygware opu'ã jevy va'erã Nhandejáry rovagwy-py pene mombe'u-vy, he'i. —Ojohu vai va'erã pene rembiapokwe. ⁴²Yma va'ekwe peteĩ mburuvixagwasu kunha va'e arapopy-koty oiko va'ekwe, oho mombyry va'ekwe mburuvixagwasu Salomão renda-py. Onhemo'arandu uka-vy oho. Yvy apy gwive mombyry ete oho va'ekwe ohendu hagwã Salomão nhe'ẽ. Ha ko'a-rupi oime hi'aranduve va'e Salomão-gwi, he'i ójehe Hesu. —Upéa-gwi upe áry-py opu'ã jevy va'erã upe mburuvixa kunha Nhandejáry rovagwy-py pene mombe'u-vy. Pene rembiapokwe ndojohu porã va'erã, he'i judeu ruvixa kwéry-pe Hesu.

*Hesu omombe'u anháy rehegwa nhe'ẽ
(Lc 11.24-26)*

⁴³Upéi he'i jevy upe pygwa-pe:

—Mba'eixagwa pa pende rekoha amombe'u-ta peẽ-my. Anháy rerekoha-rami pende rekoha. Oĩ anháy heko ky'a va'e nhande-rehe ojepotase va'e. Ha ojepota rire osẽ-ma ramo katu oiko rei anháy tekwaty e'ỹ e'ỹha-rupi, y e'ỹha-rupi ohasa oho-vy. Otongease mo'ã ha ndojohúiry opytu'u hagwã. ⁴⁴Upe ramo he'i ojúepe anháy: “Aha jevy-ta xe taperekwe-py, aiko hagwe-py jevy” he'i. Ojevyy oho-vy otaperekwe-py. Otaperekwe-py ogwahẽ ramo upe-py otopa nandí oĩ. Ikoty oitypei ra'e. Omoĩ porãmba ra'e. ⁴⁵Upe-ma ramo oho ogweru outro anháy hekoha vaive va'e íxugwi. Seteve ogweru. Hi'oitoha ojogweru, oike koty-py oiko hagwã. Upéixa oiko vaive anháy rerekoha. Osẽ rire íxugwi peteĩ anháy, hejahare oike jevy ipy'a-py. Sete hekoha vaive va'erã reraha-vy oike. Xe nhe'ẽ rendu e'ỹ-gwi, upéixa ete peiko va'erã. Peẽ, ãy peiko va'e, upe anháy rerekoha-rami peiko va'erã, he'i fariseu kwéry-pe.

Hesu re'ýi rehegwa nhe'ẽ
(Mc 3.31-35; Lc 8.19-21)

⁴⁶Upéa he'i joty ramo Hesu atýra-rupi, ogwahẽ ou-vy isy tyvýry kwéry ndive. Opyta oĩ-vy oka-py. Onhomongetase hendive.

⁴⁷—Nde sy ko nde ryvy kwéry ndive opyta oĩ-vy oka-py. Ne ndive onhomongetase, he'i íxupe omombe'u-vy.

⁴⁸Ha Hesu he'i:

—Amombe'u-ta peẽ-my kiva'e pa xe sy, kiva'e pa xe ryvy, he'i. ⁴⁹—Pehexa katu, he'i oikwave'ẽ ve'ẽ-vy ojyva-py gwemimbo'e rexa uka-vy. —Ko va'e kwéry xe sy voi, ko va'e kwéry xe ryvy voi, he'i gwemimbo'e kwéry mombe'u-vy.

⁵⁰—Upe xe Ru yváy pygwa nhe'ẽ ojapo va'e gwive, xe ryvy-py ahenói íxupe kwéry, he'i. —Upéa xe reindy, ha'e voi hese. Upéa xe sy, ha'e voi ave hese, he'i gwemimbo'e kwéry-rehe mombe'u-vy.

13

Hesu oiporu temitygwe rehegwa nhe'ẽ
(Mc 4.1-9; Lc 8.4-8)

¹Ha upe áry-py Hesu osẽ óga-gwi oho-vy. Oho yugwarusu rembe-py ogwapy ombo'e hagwã. ²Ha heta eterei ijatypa typa henda-py. Upéa-gwi onhemboyruru kanoagwasu-py íxugwi kwéry. Kanóa py-py ogwapy-ma. Ha ha'e kwéry ijaty va'e kente opyta rei yvy-py. Onhembo'y oĩ-vy y rembe-py hikwái. ³Upéixa ramo, heta omombe'u mbe'u íxupe kwéry arandu rehegwa nhe'ẽ. Temitygwe rehegwa nhe'ẽ-rami oiporu omombe'u hagwã arandu rehegwa nhe'ẽ íxupe kwéry:

—Oho onhemity onhemity va'e. Omombo onhoty-vy. ⁴Onhemity jave oĩ temity ra'ýi tape-rupi ho'a va'e. Ha upéi ou gwyra ho'upa. ⁵Oĩ temity ra'ýi ave yvy pererĩ-rupi ho'a va'e. Upe-py oĩ miximi yvy. Pya'e rei henhói-ma yvy ndahetáiry-gwi. ⁶Kwarahy ojeupi rire, onhandu kwarahy aku hemitygwe. “Xĩ” he'i hogwe. Ha kwarahy ohapypa voi. Hovirupa ave ndahapói-gwi. ⁷Oĩ nuatĩndy-rupi ho'a va'e ave. Ha nuatĩ katu okakwaave íxugwi. Ojaho'ipa temitygwe-pe. ⁸Oĩ yvy porã-my ho'a va'e ave. Henhói hemity hope-ma. Peteĩ hope katu cem voi ha'ýi va'e, outro mixive va'e katu sessenta ha'ýi va'e voi, outro mixive va'e katu trinta ha'ýi va'e voi. ⁹Ne aranduse va'e, ejeapysaka katu ko xe nhe'ẽ-rehe, he'i oporombo'e-vy Hesu temitygwe rehegwa nhe'ẽ oiporu-vy.

Hemimbo'e kwéry oporandu Hesu-pe hemimombe'ukwe-rehe
(Mc 4.10-12; Lc 8.9-10)

¹⁰Upéi hemimbo'e kwéry ogwahẽve ou-vy Hesu ypy-py:

—Ma'erã po eremombe'u kuri íxupe arandu rehegwa nhe'ẽ temitygwe rehegwa nhe'ẽ-rami? he'i oporandu-vy íxupe.

¹¹—Peẽ-myte oikwaa uka-ma kuri Nhandejáry mba'éixa pa oiko-ta pende ruvixarã. Mba'éixa po pemoirũ-ta íxupe pende ruvixarã oikwaa uka-ma ave. Ha ambue kwéry-pe katu ndoikwaa ukái. ¹²Oĩ hi'arandu va'e. Omo'aranduve va'erã íxupe hi'arandu porã porã

hagwā. Ha inharandu e'ŷy va'e katu, hi'arandurāgwe oipe'apa va'erā íxugwi. Opa va'erā íxupe. ¹³Upéa-rehe amombe'u íxupe arandu rehegwa nhe'ē temitŷy rehegwa nhe'ē-rami, he'i. —Oma'ē ma'ē hikwái, ndohexáiry voi mba'eve. Ohendu hendu hikwái, nohendu poráiry. Ijapysa e'ŷy va'e-rami mba'eve ndoikwaái. Okanhymba ete jevy íxugwi. ¹⁴Yma gware Nhandejáry nhe'ē-py omombe'u va'ety Isafas omombe'u va'ekwe aŷgwa rekorā. He'i hagwe-rami āy oiko-ma:

“Pehendu hendu va'erā ha ijapysa e'ŷy va'e-rami pepyta va'erā. Pema'ē ma'ē rei va'erā xe-rehe ha ndapehexa kwaái va'erā xe-rehe.

¹⁵Napehenduséi-gwi, aipe'a-ma pendéhegwi pene arandurāgwe. Ijapysa e'ŷy va'e-ramima peiko peē kwéry. Hesapysa e'ŷy va'e-rami ave peiko. Ha xe renduse ramo katu, hesapysa va'ekwe peiko va'erā. Ijapysa va'e-rami pehendu va'erā ave. Pene akā-my pereko-ma va'erā pene arandu porāha. Perova arā pende rekoha. Pende rekoha perova-ma ramo, apombogwera-ma va'erā, he'i Nhandejáry.”*

Upéixa he'i Nhandejáry kwatia nhe'ē. ¹⁶Ha peē katu pevy'a ete va'erā. Āy katu peē hesapysa va'e-rami peiko-ma. Ijapysa va'e-rami āy peē peiko-ma ave. ¹⁷Amombe'u-ta peē-my anhetegwa va'e, he'i. —Heta yma gware Nhandejáry nhe'ē-py omombe'u va'ety amyri ohexase eterei mo'ā va'ekwe pene rembiexa ramo va'e ha ndohexái. Heta va'ekwe heko marangatu va'ekwe amyri ohexase mo'ā va'ekwe ave ha ndohexa jepéiry. Āy pene remiendu ramo va'e ohenduse mo'ā va'ekwe ha nohendúiry. Peē pehendu-gwi pevy'a ete voi peiko-vy, he'i gwemimbo'e kwéry-pe Hesu.

Hesu oikwaa uka gwemimbo'e kwéry-pe gwemimombe'u
(Mc 4.13-20; Lc 8.11-15)

¹⁸Upéi he'i jevy gwemimbo'e kwéry-pe:

—Āy pejeapysaka katu xe nhe'ē-rehe. Mbava'e-rehe po he'ise temitŷy rehegwa nhe'ē aikwaa uka-ta peē-my, he'i.

¹⁹—Upe tape-rupi onhenhotŷy va'ekwe he'ise: Oĩ Nhandejáry nhande ruvixarā rehegwa nhe'ē ohendu va'e ha he'ise va'e ndoikwaáiry. Ohendu-ma ramo, ou anháy ruvixa hekoha vai ete va'e. Oipe'apa-ma íxugwi ipy'a-gwi inharandu porārāgwe. Oike-tama va'e oipe'a jevy íxugwi. ²⁰Ha yvy pererĩ-rupi onhenhotŷy va'ekwe katu he'ise: Oĩ ohendu va'e nhe'ē porā. Ohendu-ma ramo, ovy'a ogwerovia-vy. ²¹Ha ndahapóiry vyteri. Upéa he'ise: Sapy'a ete ogwerovia. Ndogwerovia teéiry voi. Ha upe rire katu nhe'ē porā rendu-gwi, omoingo asy íxupe. Ojerereko asy-gwi, ndogweroviaséviry. Pya'e a'e oheja nhe'ē porā. ²²Ha nhuatĩndy-rupi onhenhotŷy va'ekwe katu he'ise: Oĩ nhe'ē porā rendu va'e. Ha hemikotevērā-rehe opena pena eterei oiko-vy. Oipotave tave rei ojeupe gwarā. Upéa-gwi ohendu rei joty nhe'ē porā. Hemiapo porāse ramo jepe, gwemiapo porārā-rehe nopenái joty oiko-vy. ²³Ha yvy porā-my onhenhotŷy va'ekwe katu he'ise: Oĩ ohendu va'e nhe'ē porā. Ohendu ramo mbava'e-rehe po he'ise oikwaa porā. Ogwerovia tee voi. Ogwerovia-gwi, oĩ trinta ha'ŷy va'e-rami hembiaapo porā va'e. Oĩ sessenta ha'ŷy va'e-rami, hetave ogwereco va'e gwemiapo porāha. Oĩ cem ha'ŷy va'e-rami, hetave rei voi ogwereco va'e gwemiapo porāha, he'i omombe'u-vy gwemimbo'e kwéry-pe Hesu.

Hesu oiporu jevy temitŷy rehegwa nhe'ē

²⁴Upéi omombe'u jevy upe pygwa-pe arandu rehegwa nhe'ē. Temitŷy rehegwa nhe'ē-rami oiporu omombe'u-vy:

—Oiko onhemitŷy va'e, he'i. —Nhandejáry nhande ruvixa-rehe he'ise onhemitŷy va'e. Ha'e oho kokwe-py onhemitŷy porā hagwā.

²⁵—Upéi nhande kwéry jake ramo pyhare, ogwahē ou-vy hese ija'e'ŷy va'e. Trigo pa'ũ-rupi onhotŷy trigo rehegwa e'ŷy va'e. Kapi'i onhotŷy. Ha upe rire katu oho jevy-ma.

²⁶Henhói-ma upe trigo onhenhotŷy va'ekwe. Upéi hope-ma. Upe ramo enhói-ma ave upe kapi'i trigo rehegwa e'ŷy va'e. ²⁷Henhói-ma ramo, oho oje'ói-vy omombe'u ojáry renda-py hembigwái: “Upe nde kokwe-py erenhotŷy uka va'ekwe ne remitŷy rehegwa trigo ra'ŷy

* 13:15 Is 6.9-10

voi ra'e" he'i. "Mba'eixagwa kapi'i po trigo pa'ũ-rupi henhói-ma erejaty e'ỹ va'ekwe" he'i ojáry-pe omombe'u-vy. ²⁸ "Xe rehe ija'e'ỹ va'e rembiapokwe voi nipo ra'e aipo va'e" he'i gwembigwái-pe. "Ereipota tipo ore oroho oromondoro trigo pa'ũ-gwi gwí kapi'i?" he'i oporandu-vy ojáry-pe. ²⁹ "Ndikatúiry" he'i. "Aníke pejapo teĩ upéa. Pemondoro ramo kapi'i, ndaipotáĩ pemondoro ave upe trigo onhenhotỹ va'ekwe" he'i. ³⁰ "Tokakwaa kapi'i trigo jave nhaikyĩ hagwā áry peve. Upe áry-py ha'e va'erā trigo kytiharā-pe: Pemondoro ndoro ranhe katu kapi'i. Pemboaty aty pejokwa pehapy hagwā. Ha upe rire katu pemondoro trigo pemboaty jaraha hagwā nhanhongatu hagwā-py" he'i Hesu omombe'u-vy Nhandejáry irũ rehegwa oikwaa uka-vy.

Hesu oiporu temitỹ héry va'e mostarda rehegwa nhe'ẽ

(Mc 4.30-32; Lc 13.18-19)

³¹ Ha upéi omombe'u jevy upe pygwa-pe arandu rehegwa nhe'ẽ. Temitỹgwe rehegwa nhe'ẽ-rami oiporu:

—Oĩ temitỹ héry va'e mostarda. Kwimba'e onhotỹ peteĩ temityrā okokwe-py. Nhandejáry nhande ruvixa irũ-rehe he'ise upe temitỹ mostarda. ³² Nhanhotỹ ramo mixĩ eterei. Mixĩve opamba'e ra'ỹi-gwi, ko yvy arigwa ra'ỹi-gwi. Ha nhanhotỹ-ma rire, okakwaa porāve. Entéro temitỹ-gwi tuvixave xave oho-vy. Upéi imáta-ma, hakāmbe kāmbe ave. Upéa-rehe oveve ou-vy gwyrá ogwapy hakāmby-rehe, he'i Hesu, Nhandejáry irũ hetave tave oĩ va'erā rehegwa oikwaa uka-vy.

Hesu oiporu fermento mbojape mbovuha rehegwa nhe'ẽ

(Lc 13.20-21; Mc 4.33-34)

³³ Ha upéi katu omombe'u jevy joty upe pygwa-pe arandu rehegwa nhe'ẽ. Fermento mbojape mbovuha rehegwa nhe'ẽ-rami oiporu:

—Oĩ kunha. Oipyhy mbojape mbovuha. Heta trigo ku'i reheve ombojehe'a ombovu hagwā. Ojavyky rire, omboopitajy ovupa ete hagwā. Upéixa ete Nhandejáry nhande Ruvixa irũ, he'i Hesu, Nhandejáry irũ hetave tave oĩ va'erā rehegwa oikwaa uka-vy.

³⁴ Upéixa omombe'u mbe'u aty atýra va'e kente kwéry-pe. Temitỹgwe rehegwa nhe'ẽ oiporu e'ỹ reheve, fermento mbojape mbovuha rehegwa nhe'ẽ oiporu e'ỹ reheve, outro rehegwa nhe'ẽ oiporu e'ỹ reheve nomombe'úi. ³⁵ Upéixa oiko-ma Nhandejáry nhe'ẽ-py omombe'u mbe'u va'ety he'i hagwe-rami:

"Anhe'ẽ ramo, arandu rehegwa nhe'ẽ amombe'u va'erā, ambue kwéry va'e rehegwa nhe'ẽ aiporu-vy. Yma ko yvy onhemoingo hagwe gwive äy peve ndojekwaáiry va'ekwe,

äy amombe'u-ta aikwaa uka-vy, he'i."*

Upéixa he'i Nhandejáry kwatia nhe'ẽ.

Hesu oikwaa uka kapi'i rehegwa nhe'ẽ

³⁶ Ha upéi katu oheja oho-vy ijaty va'e kente. Ha'e ae katu oike koty-py. Oike rire, ogwahẽ ou-vy iha-py hemimbo'e kwéry:

—Eikwaa uka katu ore-vy mbava'e-rehe tipo he'ise upe kapi'i rehegwa nhe'ẽ, kokwe-py oĩ va'e, he'i Hesu-pe hikwái.

³⁷ —Upe temitỹ porā onhotỹ uka va'ekwe he'i xe-rehe Nhande Ryke'y tee va'e-rehe, he'i.

³⁸ —Upe kokwe he'i ko yvy-rehe. Upéi upe temitỹ porā he'i Nhandejáry re'ỹi-rehe. Upéi upe kapi'i he'i hekoha vai va'e-rehe. ³⁹ Upéi upe hese ija'e'ỹ va'e kapi'i onhotỹ va'ekwe he'i anháy ruvixa-rehe. Upéi upe nhaikytiha áry he'i ombopapa va'erāha áry-rehe. Upéi upe trigo kytiharā he'i Nhandejáry rembigwái yváy pygwa-rehe. ⁴⁰ Upe kapi'i omondoro omboaty onhapytĩ omondo hagwā tata-py. Upéixa ete oiko va'erā ombopapa va'erāha áry-py, he'i.

⁴¹ —Xe Nhande Ryke'y tee va'e amondo mondo va'erā xe rembigwái yváy pygwa va'e. Xe re'ỹi pa'ũ-gwi oipe'a va'erā gwí oporombojajavy va'e-pe gwive. Entéro hembiaipo vai va'e-pe gwive oipe'a va'erā heraha-vy ojohapy haty-py omombo hagwā. ⁴² Upe-py hasẽ va'erā, onhemohāngyry ngyrýu ave va'erā oiko-vy onhemoyrō-gwi Nhandejáry-rehe. ⁴³ Upe-ma

* 13:35 Sl 78.2

ramo hekoha porã va'e gwive kwarahy rendy-rami ojekwaa va'erã onhembohete resakã rendy-vy. Nhandejáry nhande ruvixa ramo oiko haty-py, ojekwaa va'erã onhemohesakã va'erã. Ne aranduse va'e, ejeapysaka katu ko xe nhe'ẽ-rehe, he'i Hesu gwemimbo'e kwéry-pe omombe'u-vy.

Hesu oiporu hepy va'e rehegwa nhe'ẽ

⁴⁴Upéi omombe'u jevy íxupe, upe pygwa-pe mokõi arandu rehegwa nhe'ẽ. Hepy va'e rehegwa nhe'ẽ-rami oiporu omombe'u-vy:

—Oĩ kokwe-py heta plata yvy gwy-py ijatypyre araka'e. Upe ramo ojohu rei íxupe ijáry e'ỹ va'e. Upe hepy va'e ojohu va'e he'i Nhandejáry nhande ruvixa-pe omoirüse va'erã-rehe. Otopa-ma ramo, upéi ojaty jevy. Ovy'a eterei ojohu va'ekwe-rehe. Upéa-gwi oho ovende entéro ogwereco va'e gwive ovendepa. Upe hemivende va'e repykwe ogweraha ojogwa haggwã upe kokwe, he'i Hesu omombe'u-vy, Nhandejáry-pe oate'ỹ e'ỹ reheve omoirüse va'e rehegwa oikwaa uka-vy.

⁴⁵Upéi omombe'u jevy íxupe:

—Oĩ onhemba'ejogwa va'ety. Oheka heka oiko-vy ita kyra porã va'e, hepy ete va'e, pérola héry va'e ojogwa haggwã. Upe hepy va'e oheka va'e he'i Nhandejáry nhande ruvixa-pe omoirüse va'erã-rehe. ⁴⁶Iporã ete va'e otopa ramo oho ovende entéro gwembiereko gwive ovendepa. Upéi hemivende va'e repykwe ogweraha. Gwemimbota nga'u upéa oho ojogwa, he'i Hesu omombe'u-vy, Nhandejáry-pe oate'ỹ e'ỹ reheve omoirüse va'e rehegwa oikwaa uka-vy.

Hesu oiporu pira kyha rehegwa nhe'ẽ

⁴⁷Upéi omombe'u jevy upe pygwa-pe arandu rehegwa nhe'ẽ. Pira kyha rehegwa nhe'ẽ-rami oiporu íxupe kwéry:

—Oĩ pira kyha y-py omombo va'e. Upe omombo va'e he'i Nhandejáry nhande ruvixa rembigwái yváy pygwa-rehe. Yupa-py omombo rire, oipyhy opaixagwa pira. ⁴⁸Hynyhẽ jave oipyhy ogwenohẽ y rembe'y-py. Upéi ogwapy oipe'a oiporavo imono'õ-vy. Pira porã omoĩ ajaka-py. Ha hi'upy e'ỹ katu omombo-ma voi. ⁴⁹Upéixa ete oiko va'erã ombopapa va'erãha áry-py. Nhandejáry rembigwái yváy pygwa oiporavo ravo va'erã oje'ói-vy. Hekoha porã va'e pa'ũ-gwi, oipe'a va'erã hekoha vai va'e-pe. ⁵⁰Ojohapy haty-py omombo va'erã íxupe kwéry. Upe-py hasẽ hasẽ va'erã oiko-vy. Nhandejáry-rehe onhemoyrõ-gwi, onhemohãingry ngyryú ave va'erã oiko-vy ave, he'i omombe'u-vy ombopapa va'erãha áry oikwaa uka-vy.

⁵¹Ko'ã va'e he'i rire, oporandu gwemimbo'e kwéry-pe:

—Mbava'e-rehe po he'i ko'ã va'e? Peikwaa-ma tipo? he'i.

—Ha'e voi, he'i. —Oroikwaa-ma, he'i íxupe, Hesu-pe.

⁵²—Aipo ramo, gwĩ judeu rekombo'ehaty va'e iporã oiko Nhandejáry nhande ruvixa remimbo'e ramo. Ambo'epa rire íxupe, oiko va'erã óga járy-rami. Hóga-py oĩ heminhongatu pyahu va'e, oĩ heminhongatu tuja va'e ave. Oipota ramo, gweminhongatu pyahu ogwenohẽ va'erã. Oipota ramo, gweminhongatu tuja ogwenohẽ va'erã ave. Upéixa ete upe judeu rekombo'ehaty Nhandejáry nhande ruvixa remimbo'e oiko ramo, nhe'ẽ pyahu omombe'u va'erã oikwaa uka-vy, yma gware nhe'ẽ omombe'u va'erã ave, he'i Hesu omombe'u-vy.

Hesu oho gwetã-my

(Mc 6.1-6; Lc 4.16-30)

⁵³⁻⁵⁴Arandu rehegwa nhe'ẽ omombe'upa rire, upe-gwi osẽ oho-vy gwetã-my ha'e ae oiko ha-py. Upe-py ojeporahéi haty-py ombo'e mbo'e gwe'ýi kwéry-pe. Hexapyrã-rupi ombo'e porã oiko-vy. “Mba'éixa onhemonhe'ẽ” he'i opondera-vy hese.

—Mamo-gwi po upéa ohendu aipo va'e nhe'ẽ? he'i hese. —Kiva'e omombe'u hi'arandu haggwã íxupe, he'i hese. —Hexapyrã-rupi voi Hesu hembíapo porã. Kiva'e po omombe'u íxupe ojapo haggwã upéa? he'i joa hese híkwái. ⁵⁵—Upéa óga apohaty ra'y voi, he'i. —Maria memby voi. Tiago José ndive, Simão Judas ndive ityvýry kwéry voi. ⁵⁶Heindyry

kwéry oiko voi nhane pa'ũ-rupi. Aipo ramo, mamogwi po upéa ohendu aipo va'e nhe'ê? he'i joa Hesu-rehe hikwái. ⁵⁷—Onhembotuvixa mba'e-ta tipo nhande-vy ra'e? he'i hese he'ýi kwéry.

Upéa-gwi ndaija'úi hese hikwái. Upe ramo,

—Nhandejáry nhe'ê-py omombe'u va'ety-pe omboete voi. Ha he'ýi kwéry katu nomboetí íxupe. Anheigwa nde'íry hese hóga pygwa omboete e'ý-vy, he'i ójehe Hesu omombe'u-vy, ndaija'úi-gwi ójehe.

⁵⁸Upe-py hese ndojeroviái-gwi, ndahetái hembiaipo porá porá oiko-vy, he'i mo'ã oirũ-pe Hesu-rehe.

14

João Batista rehegwa nhe'ê

(Mc 6.14-29; Lc 9.7-9)

¹Upe ramo, ohendu Hesu rerakwã mburuvixagwasu héry va'e Herodes. Galiléia yvy pygwa ruvixa voi upéa. ²Hesu rerakwã ohendu ramo he'i,

—Upéa João Batista nipo ra'e. Omano rire, oikove jevy-ma ra'e, ojekwaa jevy-ma ra'e, he'i mo'ã hese. —Upéa-gwi hexapyrã-rupi hembiaipo porá porá oiko-vy, he'i mo'ã oirũ-pe Hesu-rehe.

³Yma va'ekwe Herodes he'i va'ekwe oipyhy hagwã João-pe, ojepokwa reheve omoí hagwã preso. Upéa ojapo va'ekwe ombovy'a hagwã gwyvýry Filipe rebirekokwe Herodias. Ha'e omenda ra'e gwyvýry rebireko-rehe. Oipe'a ra'e gwyvýry-gwi hembireko.

⁴Ha João katu he'i:

—Tekoha e'ý-rupi ereiko ra'e ne rebireko ereipe'a va'ekwe nde ryvy-gwi, he'iri iri ra'e Herodes-pe.

⁵Upéa-gwi ojokase mo'ã João-pe. Ha kente kwéry katu he'i hese, “Upéa ko Nhandejáry nhe'ê-py omombe'u va'ety voi” he'i João-rehe hikwái. Ha mburuvixa katu opy'apy-py ikyhyje ójehe. Nombopoxyséi íxupe kwéry. Upéa-gwi ndojukái joty íxupe. ⁶⁻⁷Ha upéi katu mburuvixa oiko hagweha áry-py, oiko ojeroky henonde-py Herodias memby kunhataí. Mburuvixa irũ gwéry renonde-py ojeroky kunhataí. Ogwerovy'a eterei-gwi íxupe, kunhataí-pe, he'i mburuvixa: “Ne rebijerure va'e gwive ame'ê-ta nde-vy” he'i íxupe. Pono oapu “Tupã réry-py ame'ê-ta nde-vy” he'i. Nde'i réry-pe kunhataí ojeroky va'e-pe. ⁸Upéi osy nhe'ê-rupi he'i: “Aipota ereme'ê xe-vy João Batista akágwe. A-py ete enterove va'e resa-py eme'ê mani katu xe-vy nha'ê-py” he'i mburuvixa-pe kunhataí.

⁹Upe-ma ramo omboasy eterei he'i va'ekwe. Ha “Tupã réry-py ame'ê-ta nde-vy” he'i-gwi imboviapyre resa-py katu, he'i joty ome'ê hagwã kunhataí-pe hembijerure ojúpe. ¹⁰He'i oho hagwã onhaká'o João-pe onhemói preso haty-py. ¹¹Upéi ogweruruka nha'ê-py inhakágwe ome'ê kunhataí-pe. Ha kunhataí ogweraha osy-pe. ¹²Ha João remimbo'e ohendu ramo, ou hetekwe ogweraha. Ombosuru tetekwe renda-py ijaty-vy. Upe rire oho omombe'u Hesu-pe.

Hesu omongaru ijaty va'e kente-pe

(Mc 6.30-44; Lc 9.10-17; Jo 6.1-14)

¹³João rerakwã ohendu ramo, oho Hesu kanóa-py tekwaty e'ý-my oho. Ha'e anho oiko hagwã-py oho. Oikwaa ramo ihoha ijaty va'e kente, gwetã gwetã-gwi osé oje'ói-vy. Hapykwéri oje'ói ojohu jevy hagwã Hesu-pe. Yvy-rupi oje'ói. ¹⁴Ha Hesu ojehexa uka jevy ramo, ohexa-ma ijaty va'e kente-pe jevy oha-py:

—Ogwahẽ ogwa'ê-vy ra'e, he'i hese kwéry.

Ohexa ramo,

—Aiporiahuverekó íxupe kwéry, he'i. —Aipo ramo, hasy va'e-pe ambogwera-ta, he'i.

Upe rire ha'e ombogwera hasy va'e-pe.

¹⁵Upéi ka'aru-ma. Ogwahẽ ou-vy hemimbo'e kwéry iha-py:

—Ndaipóri a-py mba'eve, he'i. —Ka'aru-ma. Ere íxupe kwéry toho tetã mirĩ-rupi ojogwa

hagwã gwemi'urã, he'i Hesu-pe.

¹⁶Ha ha'e he'i:

—Natekotevëiry oho okaru hagwã, he'i. —Peë ae peme'ë íxupe kwéry hemi'urã, he'i gwemimbo'e kwéry-pe Hesu.

¹⁷—A-py ndahetáiry oĩ mbojape'i. Cinco oĩ mixí va'e. Mokõi pira ka'ë hendive oĩ, he'i íxupe.

¹⁸Ha'e he'i:

—Peru katu a-py, he'i gwemimbo'e kwéry-pe.

¹⁹Upéi he'i ijaty va'e kente-pe ogwapy hagwã kapi'ipe ári. Upéi oipyhy upe cinco mbojape'i mokõi pira ndive. Hovayva otima porã Nhandejáry-pe temi'urã-rehe. Upéi ombopopóy upe mbojape, ome'ë me'ë gwemimbo'e kwéry-pe. Ha hemimbo'e ome'ë ho'u va'erã-pe. ²⁰Enterovete okaru, hygwyatãmba-ma ave hikwái. Upéi hemimbo'e kwéry omono'õ no'õ hembí'u rembyre kwéry. Doze ajaka omohynyhê hembyre kwéry-gwi ho'upa e'ỹ va'ekwe. ²¹Upe mbojape ho'u va'ekwe heta heta voi oĩ. Oĩ cinco mil kwimba'e ho'u va'e. Heta kunha ave okaru va'e, heta ave mitã okaru va'e ave.

Hesu y ári rei ogwata oho-vy

(Mc 6.45-52; Jo 6.15-21)

²²Upe-ma ramo he'i gwemimbo'e kwéry-pe onhemboyru hagwã kanóa-py:

—Tapeho mani katu peë xe renonde y rovái, he'i. —Xe ae, “Tapeho jevy katu pende ro nde róga-rupi” ha'e-ta ijaty va'e-pe, he'i gwemimbo'e kwéry-pe.

²³Omondopa rire, ha'e anho ojeupi oho vvyaty ári. Ojapo oração hagwã ojeupi oho-vy. Ka'aru ete-ma, pytũ-ma. ²⁴Upe ramo mombyry oĩ vvy ete-gwi kanoagwasu. Henonde-gwi ou ramo vvytu, ndogwata porã. Omopu'ã y omoapỹ apỹ kanóa-pe. ²⁵Ko'ëtĩ pytũ vyteri jave, oho kanóa oĩ va'e ha-py Hesu. Y ári-rupi rei ogwata oho-vy. ²⁶Y ári-rupi ogwata oho-vy ramo, onhemondýi eterei hexa-vy hemimbo'e kwéry. “Arygwypóry” he'i mo'ã hese hikwái. Osapukái, onhemondýi eterei-gwi.

²⁷Upe-ma ramo ha'e he'i:

—Ani erejapura teĩ. Xe ae ko, xe ko Hesu, he'i gwemimbo'e kwéry ombopy'agwapy-vy.

²⁸Upe ramo he'i Pedro:

—Nde voi ramo ra'e, ere xe-vy, “Eju katu y ári-rupi rei xe ha-py ave” he'i Hesu-pe.

²⁹Aipo ramo,

—Eju y ári-rupi rei xe ha-py, he'i.

Upéi osê Pedro kanóa-gwi, ogwejy y-py ogwata y ári-rupi. ³⁰Ha vvytugwasu rexa-vy, imyту'e'ỹ ójehe. Opyy oho-vy y gwy-koty. Onheapymi-tama ramo:

—Xe resende katu, xe Járy, he'i Hesu-pe.

³¹Upe-ma ramo oipysu opo oipyhy íxupe:

—Mixí joty xe rerovia ra'e. Upe va'e-gwi ae nde erenheapymi-ta mo'ã. Ma'erã po nderejerovia teéiry ra'e xe-rehe ra'e? he'i Pedro-pe.

³²Onhemopyrũ jevy rire kanóa-py ndavyvtuvéi-ma. ³³Upéi kanóa pygwa onhesũ íxupe gwety'ã-rehe:

—Tupã Nhandejáry ra'y tee katu va'e nipo nde ra'e, he'i íxupe imboete-vy hikwái.

Hesu ombogwera heta hasy va'e-pe

(Mc 6.53-56)

³⁴Ha upéi katu ha'e ohasa oho-vy yugwarusu rovái. Genesaré vvy-py ogwahê oho-vy.

³⁵Upe pygwa oikwaa ramo íxupe, omombe'u ojóupe ogwahêma Hesu. Tetã jerekwe-rupi omombe'u mbe'u ogwahêma Hesu. Ogweru entéro hasy va'e-pe gwive:

³⁶—Eheja hasy va'e tomboja jepe opo nde ao rembe-rehe, eheja tomboja jepe opo nde ao-rehe, he'i Hesu-pe. Ha omboja va'e gwive opo hese, okwera-ma joty hikwái.

15

Nhane rembypy reko rehegwa nhe'ë

(Mc 7.1-13)

¹Upe ramo ogwahê ou-vy Hesu ha-py gwí fariseu kwéry, judeu rekombo'ehaty kwéry ndive. Jerusalém tetã-gwi ou va'ekwe. Ogwahê ramo hikwái, oporandu íxupe:

²—Ma'erā tipo ne remimbo'e ndoikói nhane rembypy reko-rupi? Ma'erā tipo ojepohéi porā e'ỹ reheve okaru? Ma'erā tipo nonhemopotisevéiry nhande kwéry e'ỹ va'e ndive oiko rire? he'i ɪxupe.

Ha ha'e he'i:

³—Ha peẽ katu ma'erā tipo ndapejapói Nhandejáry he'i va'ekwe? Nderejaposéi voi nde ra'e Nhandejáry he'i va'ekwe. Ne rembypy rembiapokwe-rupi ae ereiko va'e, he'i. ⁴—Nhandejáry he'i va'ekwe a-rami:

“Pemboete nde ru nde sy-pe ave. Ha entéro onhe'ẽ vai rei va'e gwive gwu-rehe osy-rehe ave, tojejuka katu”^{*}

he'i Nhandejáry kwatia nhe'ẽ. ⁵Ha peẽ katu pepyrũ Nhandejáry nhe'ẽ-rehe. Ndapehejáiry gwu osy-pe ome'ẽ hagwã. Pembo'e mbo'e rei judeu kwéry-pe a-rami. Peje, “Ava he'i ramo gwu osy-pe ave, Voive ereporandu ramo, ame'ẽ arã nde-vy ra'e. Áy katu ndikatuvéi-ma ame'ẽ nde-vy. Xe mba'e kwéry opa-ma. Ame'ẽmba-ma kuri Tupã Nhandejáry-pe. Aiporu jepe xe, Tupã mba'epa-ma, he'i gwu osy-pe ave.” Upéixa he'i ramo, iporã joty peẽ-my.

⁶Upéixa ndapehejái oipytygwõ gwu osy-pe ave. Ne nhe'ẽ-py gwu osy-pe nomboetevéi. Ne rembypy reko-rupi joty peiko. Upéa-gwi pepyrũ joty Nhandejáry nhe'ẽ-rehe, pemboyke joty Nhandejáry nhe'ẽ peiko-vy. ⁷Peẽ katu pemo'ã kwaa va'e pende py'a ky'aha. Napetĩ kwaáiry peẽ. Ha Isaías amyri anheihá-rupi omombe'u va'ekwe pende rekorã. Omoĩ va'ekwe kwatia-rehe a-rami:

⁸“Ha'e kwéry xe mboete onhe'ẽ-py rei. Opy'a-py katu naxe mboetéiry. Ndojehesa rerováí xe-rehe. ⁹Xe momba'egwasu teĩ. Xe nhe'ẽ-py nombó'éiry. Ha teko rei nhe'ẽ-py ae, oporombo'e mbo'e oiko-vy”^{*}

he'i Nhandejáry kwatia nhe'ẽ pende-rehe, he'i judeu kwéry ruvixa-pe.

Hesu omombe'u mba'éixa nhanhemongy'a

(Mc 7.14-23)

¹⁰Upéi ohenói jevy ou hagwã ijaty va'e kente kwéry oha-py. He'i:

—Pejeapysaka porã katu xe nhe'ẽ-rehe peikwaa porã hagwã, he'i.

¹¹—Jakaru jave ndikatúí nhane mongy'a tembi'u. Nanhande py'a mongy'áiry voi tembi'u. Ha pene nhe'ẽ vai ramo katu onhemongy'a arã pende py'a, he'i ijaty va'e-pe arandu rehegwa nhe'ẽ omombe'u-vy.

¹²Upéi ogwahẽ ou-vy iha-py hemimbo'e kwéry:

—Fariseu kwéry ojohu vai kuri pene nhe'ẽ. Ndereikwaái tipo upéa nde ra'e? Ne nhe'ẽ rendu-vy, “Aipo” he'i nde-rehe opondera eterei-vy. Ndojohu porái voi, he'i Hesu-pe.

¹³Upéi ha'e omombe'u arandu rehegwa nhe'ẽ temitýgwe rehegwa nhe'ẽ-rami, hesapyso e'ỹ va'e rehegwa nhe'ẽ-rami ave he'i:

—Entéro temitýgwe xe Ru yváy pygwa onhotý e'ỹ va'ekwe gwive, hapo gwive omondoro jevy va'erã, he'i fariseu kwéry rekoha vai-rehe.

¹⁴—Ani pepena hese. Hesapyso e'ỹ va'e-rami oiko ramo jepe, gwapixa ogwerahase joty tape-rupi. Ha mokói hesapyso e'ỹ va'e ojogweraha ramo, ho'a arã oho-vy mokóive onhondive yvy kwa-py, he'i fariseu kwéry-rehe.

¹⁵Upe rire he'i Pedro:

—Mbava'e-rehe po he'ise arandu rehegwa nhe'ẽ, eikwaa uka ore-vy, he'i Hesu-pe.

¹⁶Upéa-rehe he'i gwemimbo'e kwéry-pe:

—Peẽ napene arandu porái vyteri peiko-vy. Ha'e kwéry-rami voi ndapeikwaa porái joty. ¹⁷Ma'erā tipo ndapeikwaa porái vyteri? he'i. —Pekaru ramo, oho pende ryekwe-py tembi'u. Upéi osẽmba jevy pendéhegwi. Napene mongy'áiry voi, he'i.

¹⁸—Ha pene nhe'ẽ katu pende py'a-gwi osẽ-vy ombojekwaa-ma pende py'a pygwa, he'i. —Nde py'a ky'aha para'e, nde py'a potiha para'e ombojekwaa-ma pende-rehe. Ivai ramo pene nhe'ẽ, pene mongy'a arã. ¹⁹Pende py'a-py katu penhemongeta peiko-vy pene rembiapo vairã-rehe. Upéa-gwi peporajuka. Pende py'a ky'a-gwi onhoembireko

* 15:4 Êx 21.17 * 15:9 Is 29.13

ndive, onhome ndive peiko. Kunha ndive pejogwerekó rei ave. Pende py'a vai-py penhemongeta-gwi, pemonda rei peiko-vy, pende apu, pende rapixa-rehe penhe'ê vai rei peiko-vy. ²⁰Upeixagwa pejapo pende py'a vai-gwi. Upéixa ramo pende py'a vai-gwi, pene mongy'a-ma. “Ha pejepohéi porã e'ÿ reheve pekaru ramo, pene mongy'a va'erã” he'i mo'ã fariseu kwéry. Upéixa ramo, napene mongy'avéi-ma va'erã, he'i Hesu fariseu kwéry remimombe'ukwe-rehe.

Kunha Canaã yvy pygwa rehegwa nhe'ê
(Mc 7.24-30)

²¹Upe-gwi osê oho-vy Hesu. Okanhy oho-vy outro yvy-koty osê oho. Tiro tetã jerekwe-rupi, Sidom tetã jerekwe-rupi oho ave. ²²Upe-py oiko kunha Canaã yvy gwigwa ogwahê ou-vy Hesu ha-py:

—Xe Járy, Davi remiarirõre, xe poriahuverekó katu. Xe memby kunha ohasa asy eterei oiko-vy anháy ojepota hese va'e, he'i íxupe.

²³Ha Hesu mba'ëve nde'íry íxupe. Onhemokirirĩ íxugwi. Oguhê ou-vy iha-py hemimbo'e kwéry:

—“Tereho katu” ere, “Tereho katu” ere íxupe. Nhane moakã rasy osapukái-vy. Ejapo katu hemimbota-rupi íxupe oho jevy hagwã, he'i íxupe.

²⁴Upéi Hesu he'i kunha-pe:

—Ovexa okanhy va'ekwe-rami oiko Israel remiarirõre judeu kwéry. Íxupe kwéry anho mante xe mbou va'ekwe. Judeu e'ÿ va'e kwéry-pe naxe mboúi va'ekwe, he'i joty íxupe otantea-vy.

²⁵Ha kunha ou gwety'ÿ-rehe onhesũ hovagwy-py:

—Xe pytygwõ katu, xe Járy, he'iri iri íxupe.

²⁶Ha Hesu he'i:

—Nde ko ndaha'úi xe re'ÿi. Xe re'ÿi kwéry aipytygwõ ranhe-ta. Ha upe rire katu xe re'ÿi e'ÿ-pe aipytygwõ-ta ave. Mitãgwe katu nhamongaru ranhe. Nanhamombói jagwa-pe mitã remi'urã, he'i joty Hesu itantea-vy, ojekorerovia uka etese-vy kunha-pe.

²⁷—Akói-ramima ngatu, xe Járy, he'i kunha Hesu-pe. —Ha tembi'u sururukwe ijáry apyka gwy-py ho'u joty jagwa, he'i Hesu-rehe ojerovia joty-vy.

²⁸Upe-ma ramo he'i,

—Nde kunha, erejerovia tee-ma ra'e xe-rehe, he'i íxupe. —Oiko-ta voi nde-vy gwarã ne remimbota, he'i kunha-pe.
Upe-ma ramo okwera porã imemby.

Hesu ombogwera gwera heta hasy va'e-pe

²⁹Upe-gwi oho Hesu ohasa oho-vy Galiléia yugwarusu rembe'y-rupi. Upéi ojeupi vyvaty ári oho-vy ogwapy hagwã oí-vy. ³⁰Oguhê oje'ói-vy ijaty jaty va'e kente iha-py. Heta hasy va'e reraha-vy ogwahê oje'ói-vy hikwái. Oí ijyva mbaraete e'ÿ va'e, oí ogwata e'ÿ va'e, oí hesapyso e'ÿ va'e, oí onhe'êng'e'ÿ va'e, oí heta mba'asy oiporu va'e ave. Peteĩ teĩ hasy va'e pya'e ombogwey imoí-vy ipy renonde-py. Ombogwera-ma íxupe kwéry. ³¹Upe ramo ohendu inhe'êng'e'ÿ va'e onhe'ê porã-ma. Ohexa onhemaxuka va'e onhemoa'ÿro-ma. Ohexa ogwata e'ÿ va'e ogwata porã-ma. Ohexa hesapyso e'ÿ va'e hesapyso porã-ma ave. Upe va'e kwéry rexa-vy,

—Mba'éixa ombogwera? he'i opondera eterei-vy. —Nhandejáry, Israelita kwéry Járy tuvixa mba'e voi, he'i omomba'egwasu-vy Nhandejáry-pe.

Hesu omongaru jevy ijaty va'e kente-pe
(Mc 8.1-10)

³²Ha upéi katu ohenói Hesu gwemimbo'e kwéry-pe ou jevy hagwã oha-py:

—Peju katu xe ha-py, he'i. —Ijaty jaty va'e kente iporiahu va'e xe-vy. Mbohapy áry xe moirũ okwa-vy. Ndogwerekói ave gwemi'urã. Upéa-gwi aiporiahuverekó íxupe kwéry. Amondo ramo íxupe kwéry peteĩ teĩ hõga kwéry-rupi ivare'apa reheve, naipyatávêi arã tape-rupi, ikangy arã tape-rupi oje'ói-vy, he'i gwemimbo'e kwéry-pe.

³³ Upe ramo hemimbo'e kwéry he'i íxupe:

—Mba'éixa-ta mora'ê nhamembi'u me'ê ko'ây ijaty jaty va'e kente kwéry-pe? A-rupi ndaipóri voi kente tembi'u me'êhará, he'i íxupe hikwái.

³⁴ —Mbovy tipo erereko mbojape? he'i oporandu-vy gwemimbo'e-pe.

—Sete voi, he'i. —Oĩ ave ndahetái pira'i ka'ê, he'i íxupe.

³⁵ Upéi ha'e he'i ojogweroaty va'e-pe ogwapy hagwã kapi'ipe ári:

—Pegwapy gwapy katu kapi'ipe ári, he'i íxupe kwéry.

³⁶ Upe rire oipyhy upe sete mbojape pira'i reheve. Otima porã hese Nhandejáry-pe. Omboete rire, ombopo mbopóy ime'ê-vy gwemimbo'e kwéry-pe. Upéi ha'e kwéry ome'ê ho'u va'erã-pe. ³⁷ Upéixa enterove okaru. Hygwyatã porãmba-ma hikwái. Upéi hemimbo'e kwéry omono'õ hembyre opyta va'ekwe omboyru sete ajakagwasu-py. ³⁸ Ha okaru va'e heta eterei voi. Oĩ irundy mil kwimba'e okaru va'e. Heta kunha okaru ave. Heta mitãgwe okaru ave. ³⁹ Upéi he'i:

—Tapeho jevy katu, tapeho jevy katu peteĩ teĩ pende róga-rupi, he'i ijaty va'e kente kwéry-pe.

Ha upe rire katu ha'e onhemboyru kanoagwasu-py y-rupi oho hagwã. Magadã jerekwe-pe oho.

16

Judeu ruvixa ohexase Hesu rembiapo porã hexapyrã-rupi

(Mt 12.39-42; Mc 8.11-13; Lc 12.54-56)

¹ Ha upéi katu ogwahê ou-vy Hesu ha-py fariseu kwéry saduceu kwéry ndive. Ombojejavyse-vy mo'ã íxupe ou hikwái:

—Hexapyrã-rupi ejapo katu ore-vy. Nhandejáry rembiapo porã ramigwa ejapo katu ore mbojerovia uka porã-vy, he'i Hesu-pe otantea-vy íxupe.

² Ha Hesu he'i oporandu va'e-pe:

—Ka'aru ete ramo, aragwaju-ma ramo, “Aragwaju-ma ra'e” peje, “Ndoky mo'airy ra'e” peje arã áry-rehe.

³ Ha ko'ẽmba-ma ramo, “Aragwaju-ma ra'e, aragwe-ma ave ra'e. Upéa-gwi oky-tama ra'e” peje ave arã áry-rehe. Aipo ramo, áry-rehe pema'ê ramo, peikwaa-ma oikotaha. Ha xe rembiapo porã porã rexa-vy, ndapehexa kwaái xe-rehe. Mbava'e-rehe po he'ise xe rembiapo porã ndapeikwaái voi. Nhandejáry rembiaporã ndapeikwaáiry ave. ⁴ Peê ãy peiko va'e pende reko vai-ma. Ome tee-pe oheja va'e-rami, gwembireko tee-gwi opoi va'e-rami ave peê peiko. Peê pejehesa rerova rova Nhandejáry-gwi. Pejere jere íxugwi. Upéa-gwi pejerure jahexa e'y va'erã-rehe. Ha ndahexa uka mo'ãi peê-my upeixagwa. Ha Jonas amyri rehegwa nhe'ê upe ojehu íxupe va'ekwe katu peikwaa voi. Hexapyrã-rupi íxupe ojehu hagwe-rami ave, ojehu va'erã xe-vy. Upe va'erã anho mante ahexa uka va'erã peê-my, he'i hembaporã-rehe oporandu va'e-pe.

Upéi katu Hesu oheja íxupe kwéry oho-vy.

Judeu ruvixa remimombe'u rehegwa nhe'ê

(Mc 8.14-21)

⁵ Ha upéi katu oho yugwarusu rovái gwemimbo'e kwéry ndive. Gwemi'urã-rehe naimandu'avéi-ma hikwái, Hesu ndive oje'ói-vy. ⁶ Upe jave he'i Hesu:

—Xáke! Penhangareko porã katu pendéjehe. Ivai voi upe mbojape mbovuha fariseu saduceu ave rembiporu, he'i fariseu kwéry remimombe'u vaikwe joko-vy.

Upéa he'i gwemimbo'e kwéry-pe pono fariseu kwéry ohekombóe vai íxupe kwéry.

⁷ Ha mbava'e-rehe po he'ise Hesu ndoikwaái voi. Upéa-gwi,

—Nanhane mbojapéi-gwi nipo omombe'u ra'e upéa nhande-vy, he'i mo'ã ojóupe onhonhe'engendu-vy hikwái.

⁸ Ha Hesu oikwaa onhomongeta ramo:

—Ma'erã po, “Nanhane mbojapevéi-ma” peje penhonhe'engendu-vy? Mixi vyteri pejerovia xe-rehe peiko-vy ra'e, he'i íxupe kwéry.

⁹—Ne'írã vyteri pehexa kwaa-ma xe-rehe. Ne'írã vyteri pejerovia tee xe-rehe. Napene akã porãí voi. Upe cinco mil kwimba'e-pe ambopopóy kuri cinco mbojape ame'ê hagwã. Upe rire mbovy ajaka-py pemboyru hembyre? Napene mandu'avéi-ma tipo? he'i upe va'ekwe-rehe. —Ma'erã tipo napene mandu'avéi-ma hese? he'i. ¹⁰—Ha upe rire katu upe irundy mil kwimba'e-pe ambopopóy sete mbojape ame'ê hagwã. Upéi mbovy ajakagwasu-py pemboyru hembyre? Napene mandu'avéi-ma tipo? he'i upe va'ekwe-rehe. —Ma'erã tipo napene mandu'avéi-ma hese? he'i ndojeroviái-gwi hese hikwái. ¹¹—Mbojape rehegwa nhe'ê namombe'úi kuri peê-my. Mbojape mbovuha ae katu fariseu kwéry saduceu kwéry ndive rembiporu amombe'u kuri peê-my. Xáke íxugwi. Mbava'e-rehe po ha'ese, ma'erã po ndapeikwaái? he'i gwemimbo'e kwéry-pe.

¹²Upe ramo ipaha-py, mbava'e-rehe po he'ise, oikwaa porã-ma hemimbo'e:

—“Xáke mbojape mbovuha-gwi” nde'i teéiry Hesu. Ndaha'éiry mbojape mbovuha tee-rehe he'i Hesu, he'i. —“Xáke pono pene mboheko vai fariseu kwéry saduceu kwéry ndive” he'ise ae nhande-vy Hesu, he'i ojúupe Hesu nhe'ê kwaa-vy.

Atýra-py Pedro omombe'u Hesu rehegwa nhe'ê. “Nde ko Cristo” he'i íxupe omombe'u-vy (Mc 8.27-30; Lc 9.18-21)

¹³Ha upéi katu ohasa oho-vy Hesu. Cesaréia de Filipe tetã jerekwe-rupi oho. Upe-py oporandu gwemimbo'e kwéry-pe:

—Mbava'e tipo he'i ra'e xe-rehe, Nhande Ryke'y tee va'e-rehe? he'i oporandu-vy.

¹⁴—Nane mombe'u porãiry. Ne mombe'u joavy avy kuri, he'i. —“João Batista onhemoingove jevy va'ekwe ra'e ko upe va'e” oĩ he'i va'e nde-rehe. “Elias onhemoingove jevy va'ekwe ra'e ko upe va'e” oĩ he'i va'e upéixa nde-rehe. “Jeremias onhemoingove jevy va'ekwe ra'e ko upe va'e” oĩ he'i va'e nde-rehe. “Outro Nhandejáry nhe'ê-py omombe'u va'ety oikove jevy va'ekwe ra'e ko upe va'e” oĩ nde-rehe he'i va'e, he'i íxupe hemimbo'e kwéry omombe'u-vy.

¹⁵—Ha peê ae katu, mbava'e tipo peje xe-rehe? he'i oporandu-vy.

¹⁶—Nde ko Cristo, Nhandejáry rembiporavo va'e, Nhandejáry tee ra'y voi nde, he'i íxupe Simão Pedro.

¹⁷—Nde Simão Jonas ra'y. Nde roeroy'a eterei-ma Nhandejáry, he'i Pedro-pe. —Ndaxe kwaa ukái nde-vy teko rei. Ha xe Ru yváy pygwa va'e ae katu xe kwaa uka-ma nde-vy. ¹⁸Nde Pedro. Nde réry-rehe ita he'i. Nde reko ita-rami. Xe mombe'u porã-gwi ita-rami enhemombaraete. Áy, nde-rami heta nde rapykwerigwa onhemombaraete va'erã xe mombe'u porã ramo. Nde xe mombe'uha-rami ave, ha'e kwéry xe mombe'u porã ramo, xe-rehe ojerovia va'erã, amoingo va'erã xe re'yí ramo. Xe re'yí kwéry omano ramo jepe, ndaipu'akái va'erã hese anhaygwasu. ¹⁹Xe nhe'ê-py eremombe'u va'erã Nhandejáry nhande ruvixarã rehegwa nhe'ê. Eremombe'u ramo, oĩ xe roerovia va'erã. Oĩ xe roerovia e'y va'erã. Okê-rehe onhangareko mbaraete va'e-rami erepyta va'erã. “Ipy'a potĩ-ma” ere ramo nde rapixa-rehe, Nhandejáry ave he'i ave va'erã hese: “Ipy'a potĩ-ma” he'i ave va'erã hese. Ogwahê va'erã Nhandejáry ha-py. Ha “Ipy'a ky'a joty” ere ramo nde rapixa-rehe, Nhandejáry ave he'i ave va'erã, “Ipy'a ky'a” he'i ave va'erã. Nogwahê mo'ái va'erã Nhandejáry ha-py. Ipokatu va'erã voi ne nhe'ê, he'i Pedro-pe Hesu omombe'u-vy.

²⁰Upéi he'i gwemimbo'e kwéry-pe:

—Áy katu aníke xe mombe'u teĩ kuri. “Cristo, nhane remiha'arõ va'e voi upe va'e” ani peje teĩ kuri xe-rehe avave-pe, he'i onhemombe'use e'y-vy.

Hesu omomb'eu ojejukaharã rehegwa nhe'ê, onhemoingove jevyharã rehegwa nhe'ê ave (Mc 8.31-9.1; Lc 9.22-27)

²¹Upéa he'i rire, omombe'u jevy jevy gwemimbo'e kwéry-pe ojúupe ojehu va'erã oikwaa uka-vy:

—Nhandejáry nhe'ê-py aha-ta Jerusalém tetã-my. Upe-py xe mbohasa asy va'erã gwĩ judeu ruvixa kwéry, pa'i ruvixa kwéry ndive. Gwĩ judeu rekombo'ehaty xe mbohasa asy

va'erã. Xe juka uka va'erã. Ha mbhapy áry rire katu, anhemoinogove jevy-ma va'erã, he'i gwemimbo'e kwéry-pe ojéupe ojehu va'erã oikwaa uka porã-vy íxupe kwéry.

²²Ha Pedro katu ogwenohẽ-ma ha'e anho ha-py hakate'ỹ-gwi:

—Tane resende katu Nhandejáry, he'i íxupe. —Koixagwa ndojehu mo'ãi va'erã nde-vy, xe Járy, he'i onhe'ẽ joko-vy íxupe.

²³Ojere-ma Hesu:

—Ejei xe ppy-gwi, he'i Pedro-pe, Satanás-py ohenói-vy íxupe. —Anháy ruvixa Satanás nhe'ẽ-py xe rekombo'e vaise mo'ã ereiko-vy, he'i íxupe. —Ereipota mo'ã xe ajere Nhandejáry rape-gwi, he'i. —Nhandejáry remimbota nde ndereipotái. Teko rei remimbota ae erejohu porã, he'i íxupe.

²⁴Upe ramo he'i gwemimbo'e kwéry-pe:

—Peẽ xe moirũse ramo, anive pejapo rei teĩ pejapose va'e anho mante. Anive pepena teĩ pende rekove-rehe. Xe moirũ ae katu peẽ. Okurusugwasu ohupi heraha-vy va'e-rami ijukapyrã-rami ae katu peiko.

²⁵—Ha gwekove-rehe hakate'ỹ va'e katu, ndoikove mo'ãi Nhandejáry ndive. Ha xe-rehe ha-py gwekove-rehe nahakate'ỹry va'e oikove meme va'erã Nhandejáry ndive.* ²⁶Nde para'e ko yvy apy gwive járy ramo ereiko va'erã. Ha Nhandejáry ndive ereiko e'ỹ ramo katu, mba'evete ndererekói va'erã. Opa ete-ma va'erã. Nhandejáry ndive ereiko e'ỹ ramo, nande reko repyvúi-ma va'erã. Nderetopái va'erã nde rekove repyrã. Eremano joty va'erã, he'i. ²⁷—Xe Nhande Ryke'y tee va'e amano rire aju jevy va'erã. Upe áry-py xe Ru rendy pype-ma aju va'erã. Ipu'akaha reheve aju jevy va'erã. Xe rembigwái marangatu yváy pygwa ndive aju jevy va'erã. Petẽi teĩ yvypóry kente kwéry-pe hembiaapo apokwe-rehe areko va'erã. ²⁸Anhete ko xe ha'e-ta peẽ-my. Xe Nhande Ryke'y tee va'e aju jevy va'erã peẽ-my pende ruvxarã. Ha ofi áy gwĩ pene pa'ũ-my xe rexa joty va'erã, xe aju jevy ramo. Xe rexa e'ỹ reheve nomano mo'ãi. Xe rexa rire ae mante omano va'erã, he'i gwemimbo'e kwéry-pe Hesu.

17

Moisés amyri Elias amyri ndive ojereropyahu va'e rehegwa nhe'ẽ

(Mc 9.2-13; Lc 9.28-36)

¹Seis áry rire, mbhapy ogweraha gwupive Hesu. Pedro, Tiago tyvúry João ndive ogweraha. Ha'e kwéry anho ogwerojeupi heraha-vy vvyatyrysu-rehe. ²Upéi mbhapygwa resa-py ojehete rekoviarõ-ma Hesu. Kwarahy rendy-ramima ave hendy hova. Ijao rembipepa-ma ave. ³Upe-ma ramo ojekwaa ave mokõive Hesu ndive onhomongeta oĩ-vy ramo. Moisés amyri ndive ojekwaa Elias amyri. ⁴Ohexa ramo, he'i Pedro:

—Iporã nhande nhaime a-py, ore Járy, he'i Hesu-pe. —Ereipota ramo xe ajapo, ajapota mbhapy tapýi, peteĩ va'e nde-vy gwarã, peteĩ va'e Moisés pegwarã, peteĩ va'e Elias pegwarã ave, he'i íxupe Pedro.

⁵Onhe'ẽ vyteri jave, tatati hesakã va'e ramigwa voi omo'ã-ma íxupe kwéry. Tatati hesakã va'e pa'ũ-gwi ohendu-ma onhe'ẽ va'e:

—Ko va'e xe ra'y, xe rembihayhu va'e, he'i. —Arovy'a porã voi íxupe. Ejeapysaka katu inhe'ẽ-rehe, he'i Hesu-rehe tatati hesakã ramigwa pa'ũ-gwi onhe'ẽ va'e.

⁶Upe va'e nhe'ẽ ohendu ramo, mbhapy hemimbo'e onhemondýi eterei. Ojeity-ma. Ovapy-py ho'a oho-vy, onhemondýi eterei-gwi. ⁷Ha Hesu opoko joty hese:

—Epu'ã jevy katu, he'i. —Anive erekyhyje teĩ, he'i ovapy-py ho'a va'ekwe-pe.

⁸Onheakãrupi jevy ramo, avave ndohexáiry. Hesu-pe anho mante ohexa.

⁹Upéi ogwejy jevy ou-vy vvyaty-gwi. Ogwejy jave he'i:

—Anive eromombe'u teĩ ne rembiexagwe avave-pe, he'i. —Ha upe rire katu xe Nhande Ryke'y tee va'e amano rire, aikove jevy rire ae katu, emombe'u katu ne rembiexagwe, he'i íxupe kwéry omanda-vy.

¹⁰Upéi oporandu íxupe hikwái:

* 16:25 Mt 10.38-39; Lc 14.27; Gl 5.24

—Jahexa kuri Elias oikove jevy ramo. Aipo ramo, ma'erã po he'i judeu rekombo'ehaty, “Toikove jevy ranhe ou-vy Elias Cristo renonde-rupi” he'i Hesu-pe.

¹¹Upéi he'i Hesu íxupe kwéry:

—Ha'e-ma ngatu. Anhetegwa omombe'u hese judeu rekombo'ehaty. “Ou ranhe va'erã voi Elias” he'i, “omoatyrõmba haggwã” nde'i reíry hikwái. ¹²Ha ha'e-ta peẽ-my. Ou-ma va'ekwe Elias. Ojapose va'e rei, ojapo hese kuri, ndohexakwaáiry hese-gwi. Upéixa ete ave arã xe-rehe xe Nhande Ryke'y tee va'e-rehe ojapose va'e rei ojapo va'erã, he'i Elias rehegwa nhe'ẽ oikwaa uka-vy íxupe kwéry.

¹³Upe ramo:

—João Batista-rehe nipo onhe'ẽ ra'e, he'i Hesu-rehe hikwái.

Hesu ipu'aka anháy-rehe imosẽ-vy

(Mc 9.14-29; Lc 9.37-43a)

¹⁴Ogwahẽ jevy ou-vy ramo ijaty jaty va'e kente ha-py, oho onhesũ gwetypy'ã-rehe Hesu rovagwy-py:

¹⁵—Ndikatúí pa ereiporiahuvereko xe ra'y-pe, xe Járý? he'i. —He'o'ã o'ã va'e oiko asy voi. Oime ha-py rei ho'a. Tata-rupi y-py ave ho'a oho-vy. ¹⁶Aru teĩ kuri íxupe ne remimbo'e ha-py. Ha ndikatúí ombogwera íxupe, he'i íxupe túvy.

¹⁷Upéi he'i Hesu upe pygwa-pe:

—Peẽ xe-rehe pejerovia e'ý va'e, pene akã hatã va'e. Xe ae katu ndaxe are mo'ái pene ndive. Ndoroi pokwaa are mo'ávéei-ma. Eru katu xe ha-py hasy va'e, he'i upe pygwa kwéry-pe.

¹⁸Ogweru rire, oja'o anháy-pe imondo haggwã. Ha anháy katu osẽ íxugwi oho-vy. Upe-ma ramo okwera porã-ma hasy va'ekwe. ¹⁹Ha upéi katu upe hemimbo'e ombogwera mo'ã va'ekwe, oporandu nhemi Hesu-pe ha'e anho oho ha-py:

—Ma'erã-gwi po ndore pu'akái anháy-rehe oromosẽ haggwã íxugwi imondo-vy, he'i íxupe

²⁰Ha Hesu he'i:

—Peẽ katu ndapejerovia teéiry xe-rehe peiko-vy. Anhetegwa amombe'u-ta peẽ-my. Oĩ temitý ra'ýi mixí eterei va'e voi mostarda héry va'e. Upe temitý ra'ýi mixí va'e-rami, mixí jepe xe roveria tee ramo, imbaraete joty va'erã ne nhe'ẽ. Ere va'erã ko vyatygwasu-pe: “Ejei katu outro henda-py tereho” ere ramo, ojepe'a va'erã. Ipokatu voi va'erã ne nhe'ẽ mbaraete-vy, he'i íxupe. ²¹—Nde ae rei ramo, nosẽi va'erã anháy. Nande pu'akái va'erã hese. Ha Nhandejáry-pe ne nhe'ẽ eremondo mondo ramo, erekaru e'ý reheve erehasa ramo ave, upéixa ramo nde pu'aka arã hese. Eremosẽ va'erã imondo-vy, he'i gwemimbo'e-pe Hesu omombe'u-vy.

Hesu omombe'u jevy ojéupe ojehu va'erã rehegwa nhe'ẽ

(Mc 9.30-32; Lc 9.43b-45)

²²Ha hemimbo'e kwéry katu ojogweroatypa jevy peteĩ henda-py. Galiléia vy-py ojehe'a jevy ojóehe. Upe ramo he'i íxupe kwéry Hesu:

—Xe Nhande Ryke'y tee va'e xe me'ẽ va'erã xe reraha-vy. Xe-rehe ija'e'ý va'e po-py xe me'ẽ va'erã.

²³Upe rire xe juka uka va'erã. Xe juka rire, mbohapy áry ohasa jevy rire katu, xe moingove jevy-ma va'erã Nhandejáry, he'i íxupe kwéry Hesu.

Upéa ohendu ramo, ipy'a reraha, ipy'a nhemondýi. Ndovy'avéi hemimbo'e kwéry.

Hesu opaga imposto

²⁴Ha upéi katu Hesu gwemimbo'e kwéry ndive ogwahẽ oho-vy Cafarnaum tetã-my. Upe-py ogwahẽ ramo, oho Pedro ha-py oporombopaga va'ety:

—Ne mbo'eháry ndopagái tipo imposto Nhandejáry róga kakwaa pegwarã? he'i Pedro hikwái oporandu-vy.

²⁵—Ome'ẽ-ta voi, he'i íxupe.

Koty-py oike jevy ramo, Hesu he'i ranhe íxupe:

—Kiva'e va'e-pe he'i ko yvy arigwa mburuvixagwasu va'e, “Peme'ê xe-vy imposto?” Gwe'ýi kwéry-pe pa ojerure ra'e? Gwe'ýi e'ý-pe pa ojerure ra'e? he'i Pedro-pe oporandu-vy.

²⁶—Gwe'ýi e'ý-pe mante ojerure, he'i Pedro.

—Aipo ramo, he'i Hesu. —“Peme'ê katu” nde'íry gwa'ýry-pe. Xe Nhandejáry ra'y. “Eme'ê katu” nde'íry xe-vy xe Ru, he'i.

²⁷—Ha “Hesu ndopagái imposto, nopenái ra'e Nhandejáry róga-rehe” ndaipotáí he'i ra'e xe-rehe. Upéa-gwi ekwa tereho yugwarusu-py. Eity nde pinda erenhê hagdã pira. Erenhê ypy va'e eipyhy pira ejurupe'a. Ijuru-py erejohu-ta peteí itaendy plata. Eraha ereme'ê hagdã oporombopaga va'e-pe. Xe-rehe, nde-rehe ave eme'ê íxupe, he'i Pedro-pe Hesu.

18

Hesu omombe'u onhemboeteve va'erã rehegwa nhe'ê

(Mc 9.33-37; Lc 9.46-48; Fp 2.3-7; 1 Pe 5.5-6)

¹Upe ramo ogwahê ou-vy Hesu ha-py hemimbo'e kwéry:

—Nhandejáry nhande ruvixarã-pe omoirũ tee va'e gwive pa'ũ-my, kiva'e-pe tipo nhambotuvixave va'erã? he'i oporandu-vy íxupe hikwái.

²Upéi ohenói mitã-pe ou hagdã. Omoí gwemimbo'e kwéry rovagwy-py omombe'u hagdã hesegwa nhe'ê:

³—Amombe'u-ta peẽ-my anhetegwa. Ha peẽ penhemboete ukase ramo mo'ã, nape-moirũ mo'ãi va'erã Nhandejáry pende ruvixarã-pe. Ha pende rekoha perova ranhe ramo, mitã-rami pende reko pemomirĩ peiko-vy ramo ae katu, pemoirũ-ma va'erã Nhandejáry-pe. ⁴Upe onhemomirĩve va'e katu, ko mitã-rami oiko va'e katu ave, upéa ko omboeteve va'erã íxupe Nhandejáry oiko ha-rupi nhande ruvixarã. ⁵Xe réry-py pemogwahê ramo koixagwa, ko mitã-rami oiko va'e gwive, xe-vy xe mogwahê va'erã ave, he'i gwi onhemboete ukase mo'ã va'e-pe.

Hesu omombe'u nhane mbojejavy ukase va'e rehegwa nhe'ê

(Mc 9.42-48; Lc 17.1-2)

⁶Upéi he'i jevy Hesu:

—Jejeapsyaka katu xe nhe'ê-rehe, he'i. —Ko mitã-rami oiko va'e, heko mirĩ va'e, xe-rehe ojerovia va'e ave, oĩ ohesa rerova uka va'erã xéhegwi ombojejavy uka-vy. Hekoha vai eterei upe va'e. Iporã arã ra'e jajuka hagdã ombo'e vai e'ý ngatu. Iporãve arã ra'e nhamombo ygwasu-py ombo'e vai e'ý ngatu. Iporãve voi ko ra'e omano ranhe ra'e ombo'e vai e'ý ngatu pono xe-rehe ojeroviase va'e-pe ombo'e vaipa rei.

⁷—Ojekwaa va'erã ou-vy nhane mbojejavy ukase va'e. Ha inhe'ê renduharã-pe katu, amboasy eterei. Ha nhane mbojejavy ukase va'e-pe katu amboasy eterei ave hembiaipo vairã-rehe. ⁸Xáke, penhangareko katu pendéjehe. Nde po-gwi para'e erejejavý ramo, nde py-gwi para'e erejejavý ramo, eja'hy katu nde po, eja'hy katu nde py ave eremombo-vy. Peteí ipo e'ý va'e rekoha-rami eiko. Peteí nde py e'ý va'e rekoha-rami ave eiko. Iporãve nde posogwe, ne karê ave, eregwahê hagdã ereho-vy Nhandejáry oiko haty-py. Ha ne mombo ramo tata opa opa rei e'ý va'e-py mokõi nde po reheve, mokõi nde py reheve ave, ivaive arã nde-vy. Nde poriahu ete va'erã. ⁹Ha nde resa ne mbojejavy ukase ramo, enohê katu nde resa emombo ndéhegwi. Peteí nde resa e'ý va'e rekoha-rami eiko. Iporãve peteí nde resa reheve eregwahê ereho-vy Nhandejáry oiko haty-py. Ne mombo ramo tata opa opa rei e'ý va'e-py mokõi nde resa reheve, ivaive arã nde-vy. ¹⁰Penhangareko porã katu pendéjehe. Oĩ hekoha porã va'e heko'ive va'e. Ha peẽ katu aníke pemboete e'ý teí íxupe. Nhandejáry rembigwái yváy pygwa va'e onhangareko va'e hese. Xe Ru rovagwy-py oĩ upe inhangarekoha. Upéa-gwi ani pemboete e'ý teí heko'ive va'e-pe. ¹¹Xe ave Nhande Ryke'y tee va'e, okanhy va'ekwe aresende hagdã ajekwaa aju-vy va'ekwe. Upéa-gwi aníke pemboete e'ý teí upe mitã-rami hekomirĩve va'e-pe, he'i gwemimbo'e kwéry-pe Hesu.

Ovexa okanhy va'ekwe

rehegwa nhe'ẽ

(Lc 15.3-7)

¹²Upéi Hesu omombe'u arandu rehegwa nhe'ẽ ovexa rehegwa nhe'ẽ-rami oiporu:

—Oĩ va'ekwe heta hymba ovexa va'e. Cem gwymba-rehe onhangareko oiko-vy. Upéi peteĩ okanhy ramo íxugwi, kóixa ojapo va'erã para'e, he'i. —Oheja va'erã upe noventa e nove okanhy e'ỹ va'e. Yvyatyrusu-py oheja va'erã mombyryve ryve oho arã oheka heka hagwã okanhy va'ekwe. ¹³Ojohu-ma ramo, ovy'a eterei gwymba-rehe, “Ajohu-ma peteĩ okanhy va'ekwe ajohu-ma upe okanhy va'ekwe” he'i. Heta okanhy e'ỹ va'e kwéry-rehe ovy'a joty. Ha upe peteĩ okanhy va'ekwe-rehe, ojohu jevy-ma va'ekwe-rehe ovy'a etereive voi oiko-vy. ¹⁴Upéixa ete pende Ru yváy pygwa ndoipotái ni peteĩ mitã-rami ne'írá oikwaa vyteri va'e, heko mirĩ va'e, okanhy íxugwi mombyry oho-vy, he'i gwemimbo'e kwéry-pe Hesu.

Nhanhomboty haty-py nhande rekoha rehegwa nhe'ẽ

(Lc 17.3-4; Gl 6.1)

¹⁵Upéi he'i jevy Hesu:

—Ha nde rapixa, xe-rehe ojerovia va'e, hembiaipo vai ramo nde-rehe, ne anho tereho kuri iha-py. Ekwa ha'e anho oiko ha-py, eikwaa uka katu íxupe katu nde-rehe hembiaipo vaikwe. Ne rendu ramo, erenhombotyo jevy-ma ra'e.

¹⁶—Ha nde-vy anho nane renduséi ramo, eraha kuri ne irũ nde rupive peteĩ, mokõi para'e. Upéixa mokõi va'e, mbohapy va'e resa-py ojekwaa porã-ma va'erã ojehu va'erã gwive. ¹⁷Ha peẽ mbohapygwa napene renduséi ramo ave katu, emombe'u Hesu roviahapa onhomboty aty haty-py. Ha upe va'e kwéry-pe nohenduséi ramo ave katu, anive eremboete teĩ íxupe. Onhombote e'ỹ va'e-rami ereko íxupe, nhande kwéry e'ỹ-rami. Plata-py oporombopaga va'ety-rami rei joty ereko íxupe. ¹⁸Amombe'u-ta peẽ-my anhetegwa va'e. Penhomboty haty-py ipokatu va'erã pene nhe'ẽ. “Ipy'a potĩ-ma” peje ramo pende rapixa-rehe, Nhandejáry ave he'i ave va'erã hese, “Ipy'a potĩ-ma” he'i ave va'erã hese. Ha, “Ipy'a ky'a joty” peje ramo nde rapixa-rehe, Nhandejáry ave he'i ave va'erã, “Ipy'a ky'a” he'i ave va'erã. Ipokatu va'erã voi pene nhe'ẽ. ¹⁹Anhete ko xe ha'e-ta peẽ-my. Ko vvy-py peẽ mokõi va'e penhomboty ramo, perojoja ramo oraçãõ apo-vy, ome'ẽ va'erã peẽ-my pene rembijerure xe Ru yváy pygwa. ²⁰Xe rery-py erenhomboty ramo, peẽ mokõi va'e para'e, peẽ mbohapy va'e para'e, upe-py ete pene pa'ũ-my aime va'erã xe ave, he'i Hesu mba'éixa jaiko nhandhomboty aty haty-py omombe'u-vy.

Tembigwái hekoha vai va'e rehegwa nhe'ẽ

(Mt 6.14; Lc 17.3-4; Ef 4.32; Cl 3.13)

²¹Upe ramo onhemo'agwive ou-vy Hesu ypy-py Pedro. He'i íxupe:

—Xe re'ýi xe-rehe hembiaipo vai vai ramo, iporã pa aiporiahuverekori kori joty íxupe? Sete vése peve pa aiporiahuvereko va'erã íxupe? he'i Hesu-pe Pedro oporandu-vy.

²²Ha Hesu he'i:

—Sete vése anho peve nome'ẽi arã. Sete vése setenta vése peve ae katu eiporiahuverekori kori katu íxupe, he'i. —Nde-rehe hembiaipo vairi iri ramo jepe, eiporiahuvereko meme meme joty katu íxupe, he'i Pedro-pe Hesu.

²³Upéi he'i jevy:

—Upéa-rehe amombe'u-ta peẽ-my arandu rehegwa nhe'ẽ mburuvixagwasu oporoporiahuvereko va'ety rehegwa nhe'ẽ poru-vy. Oĩ mburuvixagwasu, oĩ ave hembigwái kwéry oreve va'e. Ijáry oipota ombohekovia jevy íxupe oreve va'e repy. Upe mburuvixagwasu he'i Nhandejáry nhande ruvixa-rehe. ²⁴Ohenói rire gwembigwái upe mburuvixagwasu, ou ijáry ha-py peteĩ hembigwái heta eterei oreve va'e, heta milhões oreve va'e. ²⁵“Erereve va'e repy eme'ẽ katu xe-vy” he'i gwembigwái-pe. Ha ndogwerekói-gwi ndikatúti ome'ẽ. Upe-ma ramo he'i hese ijáry outro gwembigwái-pe: “Eraha katu erevende hagwã entéro ha'e ae ogwereco va'e gwive. Hembireko, ta'ýry, tajýry, ha'e ave evende katu. Upéi

eru katu xe-vy upe ne remivende va'ekwe repykwe” he'i hese ijáry. ²⁶ Upe-ma ramo upe hembigwái heta eterei oreve va'e onhesú gwetypy'ã-rehe ojáry rovagwy-py. “Aníke nde poxy tei xe-vy. Áy ndikatúiry apaga nde-vy. Emoí katu xe-vy araka'e pa aju-ta apagapa hagwã nde-vy” he'i ojáry-pe.

²⁷—Upéi ijáry oiporiahuvereco-ma íxupe. Ohexakwaa rei-ma íxupe. Ireveha oheja rei. Nombopagái íxupe oiporiahuvereco-gwí íxupe. ²⁸ Osê rire ojáry ha-gwí, upe hembigwái otopa oirú mixími plata-rehe oreve va'e íxupe. Ojyryvirunga íxupe, ombovava vava íxupe ijaju'y-rehe omoingo asy-vy. “Eme'ê mani katu, eme'ê mani katu erereveha repy” he'i oirú-pe.

²⁹—Upe-ma ramo gwetypy'ã-rehe onhesú upe hembigwái rovagwy-py: “Aníke nde poxy tei xe-vy. Ani erejapura eterei tei. Apagapa arã voi ko nde-vy” he'i oirú-pe. ³⁰ Ha ndoiporiahuverekovéi-ma íxupe. Omoí uka preso opagaha óra peve. ³¹ Ha outro hembigwái kwéry katu hexaháry voi. Omboasy eterei hembiapokwe. Oho omombe'u ojáry-pe entéro ojapo va'ekwe.

³²—Ha upe rire katu ijáry ohenói jevy upe gwembigwái-pe. “Tou katu” he'i. “Nde rekoha vaí voi ko nde ra'e” he'i íxupe. “Orohexakwaa-ma kuri erejerure-gwí xe-vy. Norombopaga ukáiry nde reveha repy gwíve. ³³ Ma'erã po ndereiporiahuverekói ne írúpe oroiporiahuvereco hagwe-rami?” he'i upe gwembigwái-pe. ³⁴ Upéa-gwí ipoxy íxupe ogwereco asy-vy. “Emoí íxupe preso. Embopaga uka íxupe eremoingo asy-vy, enterove oreve va'e gwíve opaga hagwã” he'i hese ijáry. ³⁵ Upéixa ave pende rereko asy va'erã xe Ru yváy pygwa va'e. Nde re'yí nde py'a gwíve ereiporiahuvereco e'y ramo, peê-my ave pende rereko asy va'erã, he'i Hesu arandu rehegwa nhe'ê omombe'u-vy.

19

Omenda va'e rehegwa nhe'ê

(Mt 5.31-32; Mc 10.1-12; Lc 16.18; 1 Co 7.10-11)

¹ Heta nhe'ê porã porã omombe'u Hesu ha upe rire katu osê oho-vy Galiléia yvy-gwí, ohasa ysyry Jordão rovái. Judéia yvy-py oho. ² Upe-py heta eterei ijaty va'e oho hapykwéri. Oavyte-py ogweraha Hesu-pe. Ha hasy va'e kwéry-pe katu ombogwera joty oho-vy. ³ Upe-py oí ave fariseu va'e. Ogwahê ou-vy iha-py. Omonhe'êavyse mo'ã Hesu-pe. Upéa-gwí oporandu íxupe:

—Omenda va'ekwe opoi rei ramo gwembireko-gwí, oiko joty tipo tekoha-rupi, he'i omonhe'êavyse mo'ã-vy Hesu-pe.

^{4,5} Ha Hesu he'i:

—Nhandejáry nhe'ê he'i a-rami:

“Yma ete va'ekwe kwimba'e ypy-pe ndive ojapo-ma ave kunha ppy. Upéa-gwí kwimba'e oheja va'erã gwu-pe osy-pe ave gwembireko oirúrã omoirú teeharã ndive omenda hagwã. Mokói va'e-rami ndoikovéi-ma. Peteixa ae onhomoirú-ma oiko-vy va'erã”*

he'i Nhandejáry kwatia nhe'ê. Ma'erã napemonhe'êi upéa rehegwa kwatia nhe'ê peikwaa porã hagwã, oikwaa uka porã hagwã peê-my. ⁶ Nhandejáry kwatia nhe'ê he'i hagwe-rami jaikwaa omenda va'ekwe rekoha. Ndoikovéi ha'e anho rei. Peteixa ae hekoha. Upéa-gwí tomomboi uka e'y katu teko rei Nhandejáry remimbojehe'a, he'i fariseu kwéry-pe.

⁷ Ha'e kwéry katu he'i joty omonhe'êavyse-vy mo'ã íxupe:

—Aipo ramo, ma'erã he'i va'ekwe Moisés amyri: “Erepoise ramo ne rembireko-gwí, ehari ranhe kwatia-rehe ereikwaa ukapa hagwã. Upéi eme'ê íxupe kwatia erepoi hagwã íxugwi” he'i va'ekwe Moisés amyri. Ma'erã he'i va'ekwe yma gware upéa? he'i Hesu-pe oporandu-vy.

⁸ Ha Hesu he'i:

* 19:4-5 Gn 2.24

—Pende py'a ratã-gwi napehenduséiry nhe'ê. Upéa-gwi Moisés amyri he'i va'ekwe peẽ-my pepoi hagwã pene rembireko-gwi. Ha ojejapo hagwe áry-py kunha ppy kwimba'e ppy ndive katu, gwĩ omoirũ va'ekwe Nhandejáry nde'íry voi va'ekwe opoi poi hagwã, he'i.

⁹—Ha'e-ta peẽ-my: Gwembireko-gwi opoi rei va'e omenda jevy ramo, onhemongy'a va'erã, ojapo vai va'erã gwembirekokwe-rehe. Ha kwimba'e ambue ndive ae hembireko oiko va'e, gwembireko ojapo vai hese-gwi ae opoi va'e katu, nonhemongy'ái va'erã, ndojapo váiry gwembirekokwe-rehe, he'i omenda va'ekwe-rehe.

¹⁰Upe ramo he'i íxupe hemimbo'e kwéry:

—Aipo ramo, naiporã-gwi japoi nhane rembireko-gwi, iporãve para'e nhande nhamenta e'ỹ jaiko-vy nhane anho rei jaiko, he'i íxupe.

¹¹Ha Hesu he'i íxupe:

—Nda'éiry upéixa, he'i. —Nda'éiry enterove va'e-pe omenda e'ỹ hagwã. Gwĩ Nhandejáry oipota omenda e'ỹ va'e-pe ae, upéa-pe aipo ha'e. Ndaha'éiry enterove va'e-pe rei ha'e.

¹²—Napeteixairy omenda e'ỹ va'e. Oĩ oiko ppy ramo nahesáiry va'e. Nomendáiry. Ndaha'éiry omendasere'ỹ-gwi. Oĩ omenda e'ỹ va'e ikatu e'ỹ va'e. Oĩ ave omenda e'ỹ va'e nomendaséi-gwi. Hetea'e a'e omba'apo hagwã Nhandejáry nhande ruvixa-pe. Upéa-gwi nomendaséiry. Tomenda e'ỹ oiko-vy omendase e'ỹ va'e, he'i omenda e'ỹ va'e-rehe.

Mitã kwéry rehegwa nhe'ê

(Mc 10.13-16; Lc 18.15-17)

¹³Upe ramo ojereru okwa-vy Hesu renda-py mitã opo omoĩ hagwã hese, ojapo hagwã oração hese. Ha hemimbo'e kwéry katu:

—Togweru e'ỹ katu mitã, he'i ojoko-vy mo'ã íxupe.

¹⁴Ha Hesu he'i:

—Ani pejoko teĩ mitã ou va'erã. Tou katu xe renda-py, he'i joty Hesu. —Ha'e-ta peẽ-my: Kente kwéry onhemboete ukase rei va'e nomoirũ-ma va'erã Nhandejáry gwuvixarã-pe. Ha gwĩ onhembotuvixase e'ỹ va'e, mitã-rami hekomirive va'e ae, omoirũ-ma va'erã Nhandejáry gwuvixarã-pe. Upéa-gwi ani pejoko teĩ mitã ou va'erã, he'i mitã-rehe oikwaa uka-vy kiva'e po omoirũ-ta Nhandejáry-pe.

¹⁵Upéi mitã-rehe opo omoĩ rire, osê oho-vy.

Karia'y imba'e reta va'e

rehégwa nhe'ê

(Mc 10.17-31; Lc 18.18-30)

¹⁶Peteĩ óra-py ogwahẽ ou-vy Hesu ha-py karia'y imba'e reta va'e:

—Mbo'eháry, he'i Hesu-pe, —Mba'eixagwa ajapo-ta iporã va'e aikove hagwã Nhandejáry ndive apave'ỹ reheve, he'i Hesu-pe oporandu-vy.

¹⁷—Ma'erã ereporandu xe-rehe iporã va'e-rehe, he'i. —Nhandejáry ha'e anho mante hekoha porã tee va'e. Nhandejáry ndive ereikove memese ramo, eiko katu Nhandejáry remimombe'ukwe nde rekorã-rupi, he'i upe imba'e reta va'e-pe Hesu.

¹⁸—Heta hemimombe'ukwe. Mbava'e va'e xe ajapo-ta? he'i Hesu-pe oporandu-vy.

Upei he'i Hesu íxupe:

—“Ani ereporojuka teĩ. Ani eremoingo ambue mbue teĩ. Ani eremonda teĩ. Ani nde apu rei teĩ nde rapixa-rehe.”¹⁹Emboete ae katu nde ru nde sy ave. Ehayhu rei katu nde rapixa-pe ave nde rekove erehayhuha-rami”^{*18}

he'i upe imba'e reta va'e-pe Hesu.

²⁰—Upéa nhe'ê namokanhíy ahendupa aiko-vy, he'i Hesu-pe upe karia'y. —Kiva'e nhe'ê ajapove-ta? he'i oporandu-vy Hesu-pe.

²¹—Peteĩ anho nderejapói nde reko agwyje hagwã, he'i íxupe. —Nde reko agwyjese ramo, eraha ranhe evendepa erereko va'e. Upe rire katu eme'ẽmba hepykwe iporiahu

* 19:18 Êx 20.13-16 * 19:19 Êx 20.12; Lv 19.18

va'e kwéry-pe. Nde reko agwyje-ma va'erã, he'i íxupe. —Hetave oĩ va'erã nde-vy gwarã vyá-py. Ha upe rire katu eju xe moirũ, he'i upe karia'y imba'e reta va'e-pe.

²²Upéa nhe'ẽ ohendu ramo, ndovy'avéi oho-vy. Heta mba'e porã porã ogwereco-gwi, ojepy'a reraha oho-vy. Imytu'e'ỹ-gwi omba'e kwéry-rehe ojepy'a reraha oho-vy. ²³Upe ramo he'i Hesu gwemimbo'e kwéry-pe:

—Amombe'u-ta peẽ-my anhetegwa va'e. Imba'e reta va'e hasy peve omoirũ va'erã Nhandejáry gwuvixarã-pe.

²⁴—Amombe'u jevy-ta peẽ-my: Hasy eterei nhambohasa ka'ijugwasu kwa-rupi mym-bagwasu camelo. Ha hasyve voi gwĩ imba'e reta-rehe ojerovia va'e omoirũ haggwã Nhandejáry nhande ruvixa-pe, he'i gwemimbo'e kwéry-pe.

²⁵Ha ha'e kwéry katu onhemondýi eterei-ma upéa ohendu ramo.

—Aipo ramo, kiva'e nipo onheresende va'erã, kiva'e nipo onheresende va'erã. Avave nonheresende mo'ãi arã ra'e, he'i ojúupe.

²⁶Ha ha'e katu osareko reko oĩ-vy hese kwéry:

—Ojéhegwi rei nonheresendéi arã avave. Nhandejáry ha'e anho mante oĩ ne resende-harã. Ha'e opamba'e rereko kwaaha voi, he'i gwemimbo'e kwéry-pe.

²⁷Upe ramo he'i Pedro:

—Upe imba'e reta va'e, mba'eve voi novendéiry ne moirũ haggwã-rehe, he'i. —Ha ore katu opamba'e oroheja oromoirũ haggwã. Mbava'e tipo ombohekovia va'erã ore-vy? he'i íxupe Pedro oporandu-vy.

²⁸—Anhetegwa va'e amombe'u-ta peẽ-my, he'i. —Peẽ xe moirũ va'e ame'ẽ va'erã peẽ-my gwarã. Upe Nhandejáry ombopyahupa omoatyrõmbaha áry-py, xe Nhande Ryke'y tee va'e agwapy va'erã Nhandejáry ogwapy haty-rehe. Pe apyka resaupã hesakã va'e ári agwapy va'erã enterove areko haggwã hembiapokwe pokwe-rehe. Upe áry-py peẽ ave pegwapy va'erã mburuvixa ogwapy haty-rehe doze apyka ári pegwapy ave va'erã pereko haggwã hembiapokwe pokwe-rehe Israel re'ýi kwéry doze tetã tetã-rupi oiko va'e-pe. ²⁹Áy ha'e-ta enterove va'e-pe: Xe-rehe ha-py nde róga pygwa ereheja ramo, ombohekovia va'erã nde-vy ne rembiejare. Xe moirũ haggwã nde ryke'y ereheja ramo, nde ryvy ereheja ramo, ne reindy ereheja ramo, nde ryke ereheja ramo, nde kypy'ýry ereheja ramo, nde kyvy ereheja ramo, nde ru ereheja ramo, nde sy ereheja ramo, nde ra'y, nde raji ereheja ramo, ne memby ereheja ramo, nde yvy ereheja ramo ave xe moirũ haggwã, ombohekoviarõ va'erã nde-vy ne rembiejare-rehe. Nde rexakwaa rei jevy va'erã. Hetave arã ome'ẽ va'erã nde-vy. Peteĩ ereheja va'ekwe rekovia ome'ẽ va'erã nde-vy cem peve, he'i. —Ereikove meme va'erã Nhandejáry ndive erepave'ỹ reheve. ³⁰Heta oĩ áy onhemboeteve va'e. Ha upe rire katu ndatuvixa mba'éiry va'erã Nhandejáry-pe. Heta oĩ áy onhemboete e'ỹ va'e. Ha upe rire katu tuvixa mba'e va'erã Nhandejáry-pe, he'i gwemimbo'e kwéry-pe Hesu.

20

Hesu omombe'u Nhandejáry nhande ruvixa rehegwa nhe'ẽ uvaty járy rehegwa nhe'ẽ-rami

¹“Heta oĩ áy onhemboete e'ỹ va'e. Ha upe rire katu tuvixa mba'e va'erã Nhandejáry-pe” he'i kuri Hesu. Upéa nhe'ẽ kwaa uka-vy gwemimbo'e kwéry-pe omombe'u íxupe arandu rehegwa nhe'ẽ uvaty járy rehegwa nhe'ẽ rami:

—Oĩ va'ekwe uvaty járy, ha'e oporomomba'apo va'ekwe. Upe uvaty járy he'i Nhandejáry nhande ruvixa-rehe. Voi osẽ oho-vy oheka omba'apo va'erã uvaty-py.

²—Otopa ramo: “Peteĩ áry ne rembiapo repy ame'ẽ-ta nde-vy” he'i omba'apo va'erã-pe. Inhe'ẽ omoporã rire, “Tapeho pamba'apo xe uvaty-py” he'i. ³Ha upéi katu asaje ramo osẽ jevy oho-vy ijáry. Praça-py omba'apose va'e omomba'apoharã-pe oha'arõ haty-py oho ramo, ohexa omba'apo e'ỹ va'e. ⁴“Peẽ ave tapeho pamba'apo xe uvaty-py” he'i, “Ne rembiapo repy ame'ẽ va'erã nde-vy” he'i omba'apo va'erã-pe. Inhe'ẽ-py oho omba'apo. ⁵Upéi larose osẽ jevy oho-vy. Otopa jevy ramo nomomba'apói íxupe va'e, omba'apo e'ỹ va'e, “Pamba'apo” he'i. “Ne rembiapo repy ame'ẽ va'erã nde-vy” he'i íxupe. Upéi ka'arugwasu osẽ jevy oho-vy. Otopa jevy ramo nomomba'apói íxupe va'e-pe, “Pamba'apo”

he'i jevy íxupe kwéry. ⁶Upéi ka'aru ete osê jevy oho-vy otopa jevy omba'apo e'ý va'e, onhembo'y oí va'e-pe: "Ma'erã tipo penhembo'y rei peí-vy a-py ka'aru peve? Ma'erã tipo napemba'apói?" he'i íxupe kwéry oporandu-vy. ⁷"Noromba'apói nore momba'aposéi-gwí" he'i uvaty járy-pe. "Aipo ramo, peẽ ave iporã peho pemba'apo xe uvaty-py" he'i omba'apo va'erã-pe. ⁸Ka'aru pytũ-ma jave, ijáry he'i gwembigwái-pe: "Ehenói omba'apo va'e kwéry-pe ou hagwã. Eme'ẽ peteí teí-pe hembiapokwe repy. Gwí ka'aru ae omba'apo va'e-pe, eme'ẽ ranhe íxupe. Ha upe rire katu eme'ẽ gwí voi gwive omba'apo va'e kwéry-pe" he'i gwembigwái-pe. ⁹Ou ramo gwí ka'aru eteve omba'apo va'ekwe ome'ẽ íxupe peteí áry hembiaapo repy. ¹⁰Upéi ou ave gwí voi gwive omba'apo va'ekwe: "Ome'ève-ta nhande-vy" he'i mo'ã ojéupe. Ha ambue kwéry-pe ome'ẽha-rami ave ome'ẽ íxupe. Peteí áry hembiaapo repy ae ome'ẽ íxupe. ¹¹Ome'ẽ ramo, "Ma'erã po ambue kwéry-pe ereme'ẽha-rami ave ore-vy ereme'ẽ?" he'i ojáry-pe. ¹²"Gwí ka'aru ete omba'apo va'ekwe sapy'a ete omba'apo. Mixí mante omba'apo. Ma'erã po ore-vy ereme'ẽha-rami ave ereme'ẽ íxupe?" he'i. "Ore kwéry katu ore kane'õ-ma oromba'apo-vy. Kwarahy hakugwasu-rupí oromba'apo. Voi gwive ka'aru ete peve oromb'apo" he'i. "Ma'erã po hetave nereme'ẽi ore-vy? Ka'aru ae omba'apo va'e-gwí ore oroganave va'erãgwe" he'i ijáry-pe. ¹³"Xe rapixa" he'i. "Ndajapo vaíry nde-rehe" he'i. "Peteí áry ne rembiapo repy ame'ẽ-ta nde-vy, ha'e ramo, eremoporã-ma kuri xe nhe'ẽ. ¹⁴Eraha ne rembiapokwe repy tereho. Nde-vy ame'ẽha-rami ave ame'ẽse gwí ka'aru ete ae omba'apo va'ekwe-pe" he'i. ¹⁵"Ndaipóri xe jokoharã xe ame'ẽse va'e ame'ẽ va'erã. Aiporiahuvereko kuri gwí ka'aru ete ae omba'apo va'ekwe-pe. Upéa-gwí nande a'éiry nipo ra'e xe-rehe" he'i omba'apo va'e-pe járy. ¹⁶Upéixa ete heta oí ãy onhemboete uka e'ý ete oiko va'e. Ha upe rire katu tuxixa mba'e va'erã Nhandejáry-pe. Heta oí ãy onhemboete ukaseve va'e. Ha upe rire katu natuxixa mba'éiry voi va'erã Nhandejáry-pe, he'i gwemimbo'e kwéry-pe Hesu.

Hesu omombe'u jevy omanotaha
(Mc 10.32-34; Lc 18.31-34)

¹⁷Ha upéi katu Hesu ojeupi upi oho-vy. Jerusalém tetã-my ogwahẽ hagwã oho-vy. Ogwata jave ogwenohẽ gwí doze gwemimbo'e. Te'ýi jusu avyete-gwí íxupe kwéry anho ogwenohẽ omombe'u hagwã ojéupe oiko-ta va'e:

¹⁸—Pejeapysaka katu, he'i. —Jaha jaiko-vy Jerusalém tetã-my. Upe-py xe Nhande Ryke'y tee va'e xe pyhy va'erã xe me'ẽ hagwã pa'i ruvixa kwéry-pe, judeu rekomb'ehaty kwéry-pe ave. Upe-py, "Iporã eremano" he'i va'erã xe-vy. ¹⁹Upéi xe me'ẽ va'erã nhande kwéry e'ý va'e-pe xe-rehe onhembohory hagwã, xe mbopi hagwã, xe juka hagwã kususugwasu-rehe xe rupi-vy, he'i. —Ha upe rire katu mbohapy áry rire anhemoingove jevy-ma va'erã, he'i gwemimbo'e kwéry anho-pe onhemombe'u-vy.

Kunha rembijerure

2 rehegwa nhe'ẽ
(Mc 10.35-45)

²⁰Upe ramo ogwahẽ ou-vy Hesu renda-py Zebedeu ra'y sy. Tiago João ndive ou isy. Onhesũ íxupe gwetypy'ã-rehe omba'e jerure hagwã:

²¹—Mbava'e tipo ereipota? he'i kunha-pe.

—Ne nhe'ẽ-py togwapy nde yke-rehe joja xe memby. Erejehexa uka ramo nhande ruvixa ramo, togwapy nde yke-rehe peteí nde akatúa-koty. Peteí nde asu-koty ave togwapy, he'i Hesu-pe ombotuxixa ukaseve-vy mo'ã omemby.

²²Upéi ha'e he'i:

—Ndapeikwaái pene rembijerure-rehe, he'i. —Xe mbohasa asy hagwã-rami ave, pehasa asy-ta para'e, he'i oporandu-vy Zebedeu ra'y Tiago João ndive-pe.

—Ha'e voi, he'i. —Ne ndive ore orohasa asyse, he'i íxupe.

²³—Néi, he'i. —Xe mbohasa asy hagwã-rami ave, pehasa asy va'erã voi, he'i mokõigwape. —Ha xe Ru nde'íry apombogwapy hagwã xe yke-rehe joja. Ha'e ae ombogwapyse

va'e ae, ombogwapy va'erā xe yke-rehe. Ajehexa uka ramo nhande ruvixa ramo, ha'e ae ombogwapyse va'e ombogwapy arā xe yke-rehe, he'i mokōigwa-pe.

²⁴ Ha hemimbo'e ojerure e'ỹ va'e katu oĩ dez. Ohendu-ma ramo onhembotuvixaseve mo'ā va'e-pe ogweropoxy voi. Tyvúry reheve Tiago-rehe ipoxy hikwái. ²⁵ Ha Hesu katu he'i:

—Peju katu xe ha-py, he'i entéro gwemimbo'e kwéry-pe. —Peikwaa voi judeu e'ỹ kwéry rekoha, Nhandejáry kwaa e'ỹha rekoha. Huvixa kwéry omanda voi hese oiko-vy. Ipu'aka voi hese gwĩ onhemboete va'e.

²⁶ —Upe va'e rekoha-rupi xe ndaipotáí peiko. Pende rekorā a-rami. Erenhembotuvixa mba'e ukase ramo, eiko katu nde rapixa rembigwái ramo. ²⁷ Erenhemboete ukaseve ramo, erejokwái va'e-rami eiko, he'i. —Nde rerekoseha-rupi voi eiko. ²⁸ Xe ave Nhande Ryke'y tee va'e jepe ndajúí va'ekwe xe rembigwái heta heta ajohu hagwā. Aju ae va'ekwe tembígwái-rami aiko hagwā. Ajejuka uka hagwā aju va'ekwe heta aresende va'erā-rehe, he'i gwemimbo'e kwéry-pe Hesu.*

Hesu ombogwera mokōi hesapyso e'ỹ va'e-pe
(Mc 10.46-52; Lc 18.35-43)

²⁹ Osē jave Jericó tetā-gwi, heta te'ýi jusu avyte-py oho Hesu. ³⁰ Upe-py tapegwasu rembe-py ogwapy oĩ-vy mokōi hesapyso e'ỹ va'e:

—Hesu ko ra'e ohasa tape-rehe —oĩ he'i va'e íxupe.

Upéa nhe'ē ohendu ramo he'i:

—Ore poriahuvereko katu, Davi remiarirōre. Ore poriahuvereko katu, he'i onhe'ē hatā-vy Hesu-pe.

³¹ —Pekiririmba katu, he'i íxupe ijaty va'e inhe'ē joko-vy. Ha ha'e ae katu onhe'ē hatāve: —Mbo'eháry, Davi remiarirōre, ore poriahuvereko katu, he'i Hesu-pe.

³² Upe-ma ramo opyta Hesu. Ohenói ou hagwā:

—Mbava'e tipo ereipota xe ajapo hagwā nde-rehe? oporandu hesapyso e'ỹ va'e-pe.

³³ —Eipe'a katu ore resa, mbo'eháry, he'i íxupe.

³⁴ Ha'e katu oiporiahuvereko-ma hesapyso e'ỹ va'e-pe. Opo omoĩ hesa-rehe. Upe-ma ramo hesapyso jevy-ma hesapyso e'ỹ va'ekwe. Upe rire katu omokambara-ma íxupe tape-rupi iho ramo.

21

Hesu ogwahẽ oho-vy

Jerusalém tetā-my

(Mc 11.1-11; Lc 19.28-40; Jo 12.12-19)

¹ Ha upéi katu Hesu gwemimbo'e kwéry ndive ogwata oho-vy Jerusalém tetā-my. Hi'agwĩ oĩ ramo jepe tetā íxugwĩ, nogwahẽi joty upe-py oho-vy. Upe ramo ogwahẽ ranhe oho-vy Betfagé tetā mirĩ-my. Yvyaty Oliveiras-py ogwahẽ ranhe oho-vy. Upe ramo omondo mokōi gwemimbo'e gwenonde-rupi:

² —Tapeho upe tetā mirĩ-my xe renonde-rupi, he'i. —Upe-py ereike-ma ramo, pya'e eretopa va'erā mburika onhenhapytĩ va'e. Hendive mburika'i eretopa-ta ave. Ejora eru xe-vy, he'i. ³ —“Ma'erā erejapo upéa?” he'i ramo nde-vy upe pygwa, ere íxupe, “Oiporu-ta nhande ruvixa. Pya'e ogweruruka jevy-ta nde ha-py.” Upéi ne nhe'ē-py pya'e oheja arā peru mokōi xe renagwā, he'i mokōi gwemimbo'e-pe Hesu.

⁴ Upéa he'i oiko hagwā myamyri Nhandejáry nhe'ē-py omombe'u va'ety he'i hagwe-rami. Yma gware nhe'ē a-rami he'i:

⁵ “Emombe'u Sião tetā mygwa-pe. Pehexa katu. Ogwahẽ-ma ou-vy pende ruvixagwasu. Pende ruvixagwasu ramo jepe, nonhembotuvixa mba'e ukáiry joty ogwahẽ ou-vy.

Gweko kiriri reheve joty ou. Mburika ári ogwahẽ ou-vy. Mburika ra'y ári ou”^{*} he'i yma gware nhe'ē. Yma gware remimombe'ukwe-rupi, āy oiko-ma Hesu.

* 20:28 Lc 22.25-27 * 21:5 Zc 9.9

⁶Ha upe mokōi hemimbo'e oho ojapo Hesu nhe'ē. ⁷Ogweru jevy mburika ta'ýry reheve. Omoī hi'ári oao. Upéi ojeupi-ma hi'ári Hesu oho-vy. ⁸Heta oī te'ýi jusu omomba'egwasu va'e íxupe. Ombōi mboi oao oipysō hagdā Hesu renda oprū hagdā-rupi. Oikytī kytī omoī-vy yvy-rupi yvyra rogwe hakā reheve. Yvy-rupi omohasāi imoī-vy.

⁹Osapukái joa henonde rupigwa. Hapykwerigwa osapukái ave imboete-vy:

—Ereju-ma ra'e Davi remiarirōre ra'e, he'i íxupe. —Oromomba'egwasu voi, he'i íxupe. —Nhandejáry réry-py ra'e eregwahē-ma ereju-vy. Tande rovasa porā katu Nhandejáry. Nhamomba'egwasu katu íxupe, he'i Hesu-pe ijaty va'e kwéry hexa-vy.*

¹⁰Upéi ogwahē oho-vy Jerusalém tetā-my. Upe-py oike rire, ndaipy'agwapyvéi-ma pe tetā mygwa. Ogweronhe'ēmba rei hikwái oikwaase-vy:

—Kiva'e po ou ra'e, kiva'e po ou ra'e? he'i oporandu randu-vy ojóupe hikwái.

¹¹—Upéa Hesu pe Nhandejáry nhe'ē-py omombe'u va'ety Nazará da Galiléia gwigwa, he'i hese hikwái hendive ogwahē ou-vy va'e.

Hesu oike Nhandejáry rōga kakwaa-py
(Mc 11.12-26; Lc 19.45-48)

¹²Upéi oike Hesu Nhandejáry rōga kakwaa-py. Upe-gwi omosēmba omba'evende oī va'e-pe, omba'ejogwa oī va'e-pe omosē ave imondo-vy. Upe-py oī ave plata ombohekovia va'e hepy-rehe. Ombohekoviapa oiporu jevy va'erā-py. Imba'e renda ombovapy íxugwi kwéry. Ombovapy pykasu járy imba'e renda ave:

¹³—“Xe rōga xe mboete haty-py héry va'erā oração apohaty”* he'i Nhandejáry kwatia nhe'ē, he'i. —Ha peē katu pemoiŋgo upe-py gwí oporosakea nhemi va'e, he'i Nhandejáry rōga kakwaa roka-py omba'evende va'e kwéry-pe.

¹⁴Ha hesapysō e'ý va'e, ikarē va'e ave katu ojereru íxupe Nhandejáry rōga kakwaa-py. Ou ramo, ombogwera gwera íxupe kwéry. ¹⁵Ha pa'i ruvixa kwéry judeu rekombo'ehaty kwéry ndive katu ipoxy íxupe. Hemiapo porā jahexa e'ý va'e ohexa. Nhandejáry rōga kakwaa-py mitāgwe nhe'ē ohendu:

—Nde Davi remiarirōre voi ore oromboete oroiko-vy, he'i Hesu-pe mitāgwe.

Upéa nhe'ē ogweropoxy judeu ruvixa kwéry:

¹⁶—Erehendu-ma tipo mitāgwe nhe'ē? he'i hikwái oporandu-vy íxupe.

—Ahendu voi mitā nhe'ē, he'i Hesu íxupe kwéry. —He'i Nhandejáry kwatia nhe'ē a-rami:

“Erenhemomba'egwasu uka mitāgwe-pe. Mitā kambu-pe gwive erenhemomba'egwasu uka ave” he'i íxupe. “Ne mboete tee voi hikwái”* he'i Nhandejáry kwatia nhe'ē. Pemonhe'ē rei upéa nhe'ē ndapeikwaáiry, he'i judeu ruvixa kwéry-pe Hesu.

¹⁷Upéa he'i rire, oheja huvixa kwéry-pe. Osē Jerusalém tetā-gwi oho-vy. Ogwahē oho-vy Betânia tetā mirī-my. Upe-py oke.

Figo máta rehegwa nhe'ē
(Mc 11.12-14,20-24)

¹⁸Iko'ē-my voi ou jevy Jerusalém tetā-my. Ou jave ovare'a ogweru. ¹⁹Ohexa figo máta tape rembe'y-rehe oī ramo. Oho ohexa hi'a pa ho'u hagdā mo'ā. Ha ogwahē ramo imáta-py, ndahi'áiry íxupe. Hogwe rei oī. Ndaipóri figo. Hesu he'i figo máta-pe:

—Anive nde a, he'i íxupe.

Upe-ma ramo ipirupa-ma voi oho-vy figo.

²⁰Ohexa ramo, opondera hese ipiru ramo hemimbo'e kwéry:

—Mba'éixa ipiru pya'e ra'e figo máta? he'i ojóupe hikwái.

²¹Ha Hesu he'i:

—Anhetegwa va'e amombe'u-ta peē-my. Erejerovia tee ramo Nhandejáry-rehe, ererovia ku'a ku'a e'ý reheve ererovia ramo, kóa figo máta-rehe xe ajapo hagwe-rami ave nde erejapo va'erā, he'i gwemimbo'e kwéry-pe. —Iporāve va'e erejapo va'erā. Eremoī

* 21:9 Sl 118.26 * 21:13 Jr 7.11 * 21:16 Sl 8.2

ramo ne nhe'ê upe vyvatyrusu-pe, “Ejeupi enheapymi hagwã ygwasu-py” ere ramo, oikota nde-vy, he'i.* ²²—Oime raẽ va'e-rehe erejerure ramo oraçãõ apo-vy, oiko va'erã ave nde-vy erejerovia tee ramo Nhandejáry-rehe, he'i gwemimbo'e kwéry-pe Hesu.

“Kiva'e nhe'ê-py tipo ereporombo'e?” he'i Hesu-pe oporandu-vy
(Mc 11.27-33; Lc 20.1-8)

²³Ha upéi katu oike jevy Nhandejáry róga kakwaa-py oporombo'e hagwã. Oporombo'e jave ogwahẽ ou-vy iha-py pa'i ruvixa kwéry. Gwĩ judeu ruvixa kwéry ou ave. Hesu rembiapo ndojohu porã hikwái:

—Kiva'e nhe'ê-py tipo ereporombo'e a-rami? he'i íxupe. —“Iporã ereporombo'e a-rami” kiva'e tipo he'i nde-vy ra'e ereporombo'e hagwã a-rami? he'i oporandu-vy Hesu-pe hikwái.

²⁴Hesu he'i:

—Xe-vy peporanduha-rami ave aporandu-ta peẽ-my xe aikwaase pendéhegwi va'e-rehe, he'i íxupe kwéry Hesu. —Pemombe'u ranhe katu xe-vy peẽ-my aporandu-ta va'e-rehe, he'i íxupe Hesu. Upe rire, xe amombe'u-ta ave peẽ-my kiva'e nhe'ê-py pa aporombo'e, he'i íxupe kwéry Hesu. ²⁵—Ãy aporandu ranhe-ta peẽ-my. Kiva'e nhe'ê-py oporomongarai araka'e João Batista amyri? Nhandejáry nhe'ê-py para'e? Teko rei nhe'ê-py para'e? he'i íxupe kwéry. —Pemombe'u ranhe katu xe-vy, he'i huvixa kwéry-pe.

Ha ha'e kwéry katu ndoikwaáiry onhe'êrã Hesu-pe:

—Mbava'e ja'e rei-ta po Hesu-pe? he'i ojóupe oporandu randu-vy hikwái. —Nhandejáry nhe'ê-py oporomongarai va'ekwe João, ja'e ramo, “Ma'erã po ndapejeroviái araka'e hese?” he'i arã nhande-vy, he'i ojóupe hikwái. ²⁶—Ha teko rei nhe'ê-py oporomongarai va'ekwe, ja'e ramo katu, nhane mytu'e'ỹ arã nhandéjehe, he'i ojóupe. —“Pende apu” he'i arã nhande-vy te'yi jusu. “Nhandejáry nhe'ê-py omombe'u va'ety ae katu João” he'i arã. Mbava'e tipo ojapo arã nhande-rehe hikwái? he'i ojóupe huvixa kwéry.

²⁷Upéa-gwi,

—Ndoiroikwaáiry, he'i mo'ã Hesu-pe okyhyje-gwi.

—Aipo ramo, xe-vy napemombe'uiha-rami ave, kiva'e nhe'ê-py aporombo'e a-rami, ndaikwaa uka mo'ãi ave peẽ-my, he'i huvixa kwéry-pe Hesu.

Hesu omombe'u arandu rehegwa nhe'ê mokõi ta'ýry rehegwa nhe'ê-rami

²⁸Upéi he'i jevy íxupe kwéry ombo'ese-vy mo'ã:

—Areko peteĩ arandu rehegwa nhe'ê amombe'u va'erã peẽ-my, he'i íxupe kwéry. —Oĩ va'ekwe mokõi ta'ýry va'e. Oho ranhe gwa'yrsu ha-py: “Tereho, ke'y, emba'apo etería xe uvaty-py” he'i gwa'yrsu-pe. ²⁹“Aha-ta xe. Aha-tama xe amba'apo, xe ru” he'i ha ndohóiry. ³⁰Upéi oho gwa'ymiri ha-py: “Tereho, xiryvy, emba'apo katu etería xe uvaty-py” he'i. Ha xiryvy he'i: “Ndaha mo'ãi” he'i gwu-pe. Ha upe rire katu omboasy onhe'êgwe oho-vy xirivy gwu nhe'ê apo-vy. ³¹Ãy aporandu-ta peẽ-my: Kiva'e ojapo gwu nhe'ê? Tyke'ýry para'e? Tyvýry para'e? he'i oporandu-vy íxupe kwéry Hesu.

—Tyvýry ojapo, he'i íxupe.

—Aipo ramo, amombe'u-ta peẽ-my pende rekokwe. Gwĩ naimandu'a porã hese va'e, nhane mbopaga uka va'ety kwéry, ikwimba'ese va'e kwéry ave omoirũ ranhe-ma Nhandejáry nhande ruvixarã-pe. Ha peẽ katu ne'irã pemoirũ Nhandejáry-pe. Pene renonde voive-ma ha'e kwéry omoirũ-ma íxupe.

³²—Ojekwaa ou-vy va'ekwe João amyri tape porã oikwaa ukase mo'ã-vy peẽ-my. Ha peẽ ndaperoviáiry joty va'ekwe inhe'ê. Ha gwĩ hekoha vai va'e ae ogwerovia inhe'ê. Gwĩ nhane mbopaga uka va'ety, gwĩ ikwimba'ese va'e ave katu ogwerovia-ma ave va'ekwe inhe'ê. Upéa pehexa ramo jepe, ndaperováí joty va'ekwe pende rekoha. “Anhei ete nipo ra'e” ndapejéiry joty va'ekwe João nhe'êgwe-rehe. Ndaperoviáiry joty va'ekwe inhe'ê, he'i huvixa kwéry-pe Hesu.

*

21:21 Mt 17.20

Hesu omombe'u jevy arandu rehegwa nhe'ẽ uvaty rehegwa-rami
(Mc 12.1-12; Lc 20.9-19)

³³ Ha upéi katu omombe'u jevy huvixa kwéry-pe arandu rehegwa nhe'ẽ:

—Pejeapysaka katu xe nhe'ẽ-rehe. Amombe'u-ta peẽ-my arandu rehegwa nhe'ẽ uvaty rehegwa-rami, he'i. —Oĩ va'ekwe heta yvy járy. Ha'e oho onhotỹ uva ojapo hagwã uvaty. Upéi ogweroajere imboty-vy. Ojo'o itakwa hykwere ryrurã. Omboyvate ojeupi hagwã orepara hagwã. Upéi ijáry oiporuruka omba'apo va'erã-pe. Hi'aju ramo, oipota omboja'o yva ojéupe. Ha upe rire katu osẽ mombyry oho-vy. Tetã ambue-py oho.

³⁴ —Hi'aju-ma ramo pe yva uva, ombou ivía ramo gwembigwái omboja'o íxupe hagwã mo'ã ombou. ³⁵ Ha uvaty-py omba'apo va'e katu oipyhy imboupyre-pe heraha-vy. Peteĩ va'e-pe oinupã. Peteĩ va'e-pe ojuka. Peteĩ va'e-pe ojapi japi ita-py. ³⁶ Hetave-ma ombou ivía ramo. Ha hemimbou ypy ogwereco hagwe-rami ave ogwereco íxupe kwéry. ³⁷ Ha upe rire katu ombou gwa'yry. “Xe ra'y-pe katu omboete arã” he'i mo'ã ombou-vy. ³⁸ Ha gwĩ uvaty-py omba'apo va'e ta'yry ohexa ramo katu, “Upéa uvaty jaryrã voi” he'i hese. “Jaha jajuka íxupe” he'i. “Uvaty-rehe nhanhembojáry arã” he'i ojóupe hikwái. ³⁹ Upéa-gwi oipyhy íxupe. Omboyke uvaty-gwi ojuka. ⁴⁰ Ha upéi katu ogwahẽ jevy ou-vy ramo pe uvaty járy, mba'éixa ojapo-ta hese kwéry? he'i Hesu oporandu-vy.

⁴¹ Ha'e kwéry he'i:

—Ogwahẽ ou-vy ramo, ojuka-ma va'erã katu gwĩ hembiaipo vai va'e-pe, he'i. —Upéi ohokoviarõ va'erã outro omba'apo jevy va'erã. Hi'aju ramo pe yva uva, omboja'o va'erã ime'ẽ-vy yva aju heraha uka hagwã, he'i íxupe huvixa kwéry.

Upéixa Hesu omombe'u judeu ruvixa kwéry rekoha vai uvaty rehegwa nhe'ẽ omombe'u-vy.

⁴² Ha upéi katu he'i jevy judeu ruvixa kwéry-pe:

—Pemonhe'ẽ nhe'ẽ teĩ peiko-vy yma gware nhe'ẽ Nhandejáry omoĩ uka va'ekwe kwatia-rehe, ha ndapeikwaáiry, he'i. —Yma gware nhe'ẽ a-rami he'i:

“Ndovaléiry, he'i óga apoha ita-rehe. Ha upe ita katu ojohu vai ramo jepe, ojeporuve joty óga pytahoha ramo. Óga jekoha voi upe ita. Upéa Nhandejáry rembiapo porã, ja'e.

Jahexa-vy, Iporã porã katu, ja'e Nhandejáry rembiapo-rehe”*

he'i xe-rehe yma gware nhe'ẽ. Ma'erã he'i va'e ndapeikwaáiry ra'e? he'i íxupe kwéry hekokwe mombe'u-vy.

⁴³ Upéi he'i jevy:

—Upéa-gwi ha'e-ta peẽ-my: “Xe moirũ katu pende ruvixarã” nde'ivéi-ma va'erã peẽ-my Nhandejáry. Ha peẽ kwéry e'y va'e-pe katu, “Xe moirũ katu” he'i va'erã Nhandejáry. Ha'e kwéry ae katu ojapo va'erã hemimbota. Ogweroagwyje va'erã inhe'ẽ, he'i huvixa kwéry-pe hekorã mombe'u-vy.

⁴⁴ Upéi oiporu jevy yma gware nhe'ẽ, Nhandejáry omoĩ uka va'ekwe kwatia-rehe. He'i íxupe kwéry:

—“Upe ita-rehe ho'a va'e ojekaray'i va'erã ho'a-vy. Ha upe ita ho'a hese va'e omongu'i va'erã íxupe ho'a ramo hi'ári”

he'i ójehe Hesu huvixa kwéry-pe hekokwe mombe'u-vy.

⁴⁵ Ha pa'i ruvixa kwéry fariseu kwéry ave ohendu Hesu nhe'ẽ. Uvaty rehegwa-rami ita rehegwa-rami ave arandu rehegwa nhe'ẽ ohendu hikwái. Ohendu ramo inhe'ẽ, oikwaama ojehegwa nhe'ẽ hikwái:

—Nhande rehegwa nhe'ẽ kuri omombe'u Hesu, he'i he'i ojóupe hikwái.

⁴⁶ Upéa-gwi upe judeu ruvixa oipyhyse mo'ã íxupe. Ha ndoipyhýry: “Hesu ko Nhandejáry nhe'ẽ-py omombe'u va'ety” he'i hese te'yí jusu. Ikyhyje-gwi, Hesu ndive heta oĩ va'e-pe nombopoxyséi-gwi, ndoipyhýry íxupe hikwái.

*

21:42 Sl 118.22-23

22

Hesu omombe'u arandu rehegwa nhe'ë jekarugwasu rehegwa-rami
(Lc 14.15-24)

¹ Ha upéi katu omombe'u jevy judeu ruvixa kwéry-pe. Arandu rehegwa nhe'ë jekarugwasu rehegwa nhe'ë-rami omombe'u:

² —Oĩ va'ekwe mburuvixagwasu ta'ýry omenda-ta va'e. Upe mburuvixagwasu he'i Nhandejáry nhande ruvixa-rehe. Ha omenda hagwã ta'ýry he'i ojapo hagwã omenda va'erã-pe jekarugwasu. ³ Upéi omondo gwembigwái gwemienói enói ohenói ou hagwã: “Peju katu jekarugwasu ajapo ha-py” he'i uka íxupe kwéry. Ha ndouséiry hikwái. ⁴ Upe-ma ramo omondo jevy joty outro gwembigwái ohenói uka-vy. He'i gwembigwái-pe: “Tapeho pemombe'u xe nhe'ëgwé. Xe jekarugwasu amoĩmba-ma. Ojuka-ma kuri xe rymba vaka ra'jy onhemongyra va'ekwe. Ojapo va'erã gwive ojavopa-ma kuri. Peju katu jekarugwasu ojapo ha-py, peje kuri pemombe'u gwĩ ou va'erã-pe” he'i gwembigwái-pe imondo-vy. ⁵ Ha hemienói mo'ã katu nopenái voi inhe'ë-rehe ou hagwã. Gwembiapo apo-rupi joty oho hikwái. Peteĩ oho kokwe-py, outro oho omba'e vende haty-py. ⁶ Ha outro kwéry katu oipyhy hembigwái-pe. Onhembohory hese ojuka-vy. ⁷ Ha mburuvixagwasu ogweropoxy eterei-ma upe hembiaapo vai vai va'ekwe-rehe. Omondo soldado kwéry hese ogweru hagwã hereko asy uka-vy. Ojuka hagwã gwĩ oporojuka va'ekwe-pe, omondo heko heko ha-rupi ohapy hagwã. ⁸ Ha upéi katu he'i jevy outro gwembigwái-pe: “Oimba-ma xe jekarugwasu ha xe remienioikwe xe motĩ voi” he'i. “Hekoha vai okwa-gwi, ndoúĩ okaru” he'i. ⁹ “Upéa-gwi tapeho tapegwasu gwasu-rupi. Petopa va'e gwive peru okaru hagwã,” he'i. “Jaha katu jekarugwasu ha-py” peje íxupe kwéry, he'i.

¹⁰ —Inhe'ë-py osẽ hembigwái kwéry oho-vy tapegwasu-rehe. Omboaty aty heru-vy otopa va'e gwive ogweru. Hekoha porã va'e, hekoha vai va'e ave ogweru. Jekarugwasu oikoha renda-py omohynyhẽ heru-vy. ¹¹ Upéi mburuvixagwasu oike upe-py hemienioikwe rexa-vy. Oĩ peteĩ ou va'e nomondéi ra'e omendaha pygwa ao. Oao ae ra'e omonde ou-vy. ¹² “Xe rapixa” he'i. “Ma'erã po ereike ra'e ko'a-py omendaha pygwa ao e'ỹ reheve?” he'i oporandu-vy íxupe. Mba'eve nde'íry oike rei va'e. Okiriri rei oĩ-vy. ¹³ Upe-ma ramo: “Eipokwa eipykwa ave íxupe. Emosẽ íxupe imondo-vy pytũ kwa-py” he'i. “Upe-py ojahe'o va'erã. Nhandejáry-rehe onhemoyrõ-gwi” he'i, “onhemohãingry ngyryu va'erã oiko-vy. Hasẽ va'erã onhemboasy-vy” he'i gwembigwái-pe mburuvixagwasu, he'i Hesu arandu rehegwa nhe'ë mombe'u-vy.

¹⁴ Upe rire he'i:

—Heta va'e-pe, “Xe moirũ katu pende ruvixarã” he'i ramo jepe Nhandejáry, ndahetáiry joty omoirũ va'erã íxupe. Ndahetáiry joty hembiporavo, he'i Hesu Nhandejáry irũ rehegwa oikwaa uka-vy.

Judeu ruvixa omonhe'ëavyse mo'ã Hesu-pe
(Mc 12.13-17; Lc 20.20-26)

¹⁵ Upe ramo gwĩ fariseu kwéry onhomboaty oje'ói-vy:

—Mba'éixa nhamonhe'ëavy-ta Hesu-pe jaipyhy uka hagwã íxupe, he'i oporandu randu-vy ojõupe.

¹⁶ Upéi ombou iha-py gwemimbo'e mburuvixagwasu Herodes re'ýi ndive:

—Orohexa kwaa-ma voi nde reko apu e'ýha nde-rehe, mbo'eháry. Ne nhe'ë ndojohu porãi ramo jepe, eremombe'u joty anhetegwa voi eremombe'u va'e. Avave-gwi neretĩry eremombe'u hagwã. Nhandejáry remimbota eremombe'u voi. Erehexa kwaa voi hekoha enterove-rehe. Upéa-gwi anheihá-rupi ne remimombe'u Nhandejáry rape kwaa uka-vy, he'i omboheko jejavy hagwã mo'ã Hesu-pe.

¹⁷ —Aipo ramo, iporã para'e nhande, judeu reko-rupi jaiko va'e, japaga nhamẽ'ë-vy mburuvixagwasu César-pe hemimbopaga uka? Iporã para'e japaga e'ý? he'i. —Ne mba'e tipo eremombe'u arã ore-vy upéa-rehe oroikwaa hagwã, he'i íxupe omonhe'ëavyse-vy mo'ã hikwái.

¹⁸ Ha ha'e ohexa kwaa hese hekoha vai:

—Peẽ katu pende py'a ky'aha pemo'ã kwaa va'e, he'i. —Ma'erã xe monhe'ẽavyse? he'i.

¹⁹—Pehexa uka xe-vy plata atã mburuvixagwasu remimbopaga uka, he'i huvixa kwéry-pe.

Peteĩ ogweru.

²⁰—Kiva'e ra'anga pa upe va'e plata atã? Kiva'e ohai uka va'ekwe plata atã-rehe? he'i oporandu-vy íxupe kwéry Hesu.

²¹—César ra'anga hembihai uka ave, he'i íxupe hikwái.

Ha Hesu he'i:

—Aipo ramo, César-pe imba'e eme'ẽ. Ne mbopaga uka ramo, eme'ẽ jevy íxupe, ijáry-pe. Ha Nhandejáry-pe katu hemimbota eme'ẽ íxupe, he'i huvixa kwéry-pe Hesu.

²²Upéa ohendu ramo, opondera Hesu nhe'ẽ-rehe hikwái. Ha ha'e kwéry he'i:

—Hasy va'e-rehe jepe naporandu ramo íxupe, omombe'u porã joty nhande-vy, he'i hese opondera-vy hikwái.

Upéi oheja íxupe oje'ói-vy hikwái.

Saduceu kwéry omonhe'ẽavyse mo'ã Hesu-pe

(Mc 12.18-27; Lc 20.27-40)

²³Upe áry-py ogwahẽ ou-vy henda-py gwĩ saduceu kwéry, “Nonhemoingove jevýi va'erã gwĩ omano va'ekwe” he'i va'e. Ou ramo he'i:

²⁴—Mbo'eháry, he'i Hesu-pe hikwái, —Moisés amyri omombe'u va'ekwe nhande-vy nhande rekorã. “Kwimba'e omano ramo, oheja ramo gwembirekokwe naimembýi reheve, tomenda jevy tyvýry gwovajare-rehe. Upéixa ramo, Ke'y ra'y, he'i va'erã imemby ppy-rehe” he'i nhande-vy va'ekwe Moisés. ²⁵Oĩ va'ekwe peteĩ tyke'ýry, seis tyvýry. Tyke'ýry omenda kunha-rehe. Upéi omano ta'ýry e'y mbovyve. Tyvýry omenda gwovajare-rehe.

²⁶Tyvýry omano ramo, ndaita'ýryi ave. Upéi tyvýry ambue jevy omenda omano jevy ave. Peteĩ teĩ omenda hese gwovajare-rehe. Peteĩ teĩ omano ramo, ndaita'ýry jepéiry.

²⁷Omanomba rire, upe kunha omano ave. ²⁸Nhane moingove jevy ramo, kiva'e rembirekorã upe kunha? Gwĩ sete tyvýry kwéry omenda ra'e hese, he'i Hesu-pe hikwái hasy va'e-rehe oporandu-vy.

²⁹Upéi Hesu he'i íxupe kwéry:

—Pejavý-ma voi pene nhe'ẽ, he'i. —Nhandejáry nhe'ẽ kwatia-rehe ohai uka va'ekwe peẽ ndapeikwaáiry. Peẽ ndapeikwaái voi ave Nhandejáry opamba'e rereko kwaaha voi, he'i íxupe kwéry. ³⁰—Nhane moingove jevyha áry-py, kwimba'e nomendavéi-ma va'erã. Kunha ave nomendavéi-ma va'erã. Oiko va'erã Nhandejáry rembigwái yváy pygwa reko-rupi.

³¹⁻³²Ha Nhandejáry kwatia nhe'ẽ katu omombe'u peẽ-my omano va'ekwe oikove jevymaha: “Xe katu Nhandejáry, xe Abraão járy, xe Isaque járy, xe Jacó járy ave”*

he'i Nhandejáry kwatia nhe'ẽ, omano va'ekwe oikove jevy-ma va'e oikwaa ukaha. Ma'erã ndapeikwaái pemonhe'ẽ nhe'ẽ va'ekwe? Aipo ramo, Nhandejáry ndaha'úi omano va'ekwe járy, tekove járy ae. Ha'e onhemoingove jevy va'e járy, he'i saduceu kwéry-pe nhane moingove jevyha kwaa uka-vy.

³³Upéa ohendu ramo, te'ýi jusu opondera hese:

—Hasy ete va'e-rehe jepe oporandu ramo Hesu-pe, omombe'u porã joty oporombo'e-vy, he'i hese te'ýi jusu pygwa kwéry.

Peteĩ tekoha mombe'uhaty omonhe'ẽavyse mo'ã Hesu-pe

(Mc 12.28-34; Lc 10.25-28; 1 Jo 5.3; Ap 2.4)

³⁴Ha upéi katu oĩ fariseu kwéry-pe omombe'u va'e:

—Hesu ndive onhhe'ẽ mbojevý jevy rire, ndoikwaavéi-ma onhe'ẽrã saduceu kwéry. Okiririmba-ma, he'i.

Upéa ohendu ramo, ojogweroaty fariseu kwéry ou-vy Hesu renda-py.

³⁵Fariseu pa'ũ-gwi peteĩ va'e, tekoha mombe'uhaty oporandu Hesu-pe omonhe'ẽavyse-vy:

* 22:31-32 Êx 3.6

³⁶—Mbo'eháry, he'i, —Heta oĩ nhande rekoha nhe'ẽ. Kiva'e tuvixave va'e? he'i oporandu-vy íxupe.

³⁷Ha Hesu oiporu Nhandejáry kwatia nhe'ẽ. He'i íxupe: —“Ehayhu tee katu Nhandejáry-pe. Nde py'apy gwive ehayhu íxupe. Ehayhu íxupe nde koty gwive. Ne mandu'a meme katu hese hayhu-vy”*

he'i íxupe. ³⁸—Upéa nhande rekoha tuvixave va'e, nhande rekoha ppyve va'e. ³⁹Ha upe rire katu oĩ outro tuvixa va'e:

“Ehayhu rei katu nde rapixa-pe nde ae nde rekove erehayhuha-rami”*

he'i Hesu Nhandejáry kwatia nhe'ẽ poru-vy. ⁴⁰—Upe mokõi nhe'ẽ-py ogwenohẽmba Moisés amyri remimombe'ukwe tekoha rehegwa nhe'ẽ, gwĩ Nhandejáry nhe'ẽ-py omombe'u va'ety nhe'ẽ ave. Mokõi nhe'ẽ-py he'ipa, he'i fariseu kwéry-pe Hesu.

Hesu omokiriri judeu ruvixa kwéry-pe

(Mc 12.35-37; Lc 20.41-44)

⁴¹Fariseu ayte-py oĩ jave Hesu, oporandu. He'i:

⁴²—Mbava'e tipo peje ra'e Cristo Nhandejáry rembiporavo va'e-rehe? Kiva'e remiarirõ pa ha'e? he'i oporandu-vy fariseu kwéry-pe.

—Davi amyri remiarirõre voi, he'i íxupe hikwái.

⁴³—Aipo ramo, ma'erã po Davi ohenói íxupe xe Járy-py? Nohenói reíry íxupe. Ome'ẽ va'ekwe íxupe inhe'ẽrã Nhe'ẽ Marangatu tee va'e, he'i Hesu. —He'i va'ekwe Davi:

⁴⁴“Nhandejáry he'i xe Járy-pe, Egwapy katu xe yke-rehe. Xe orombopu'aka va'erã ne a'e'yha-rehe. Orombopu'akapa peve eregwapy va'erã ereí-vy xe yke-rehe”*

he'i Davi va'ekwe. ⁴⁵Upéixa, xe Járy-py ohenói va'ekwe íxupe. Aipo ramo, hemiarirõ pa? Ha gwemiarirõ-rehe, “Xe Járy” nde'íry, he'i fariseu kwéry-pe Hesu omokiriri-vy.

⁴⁶Upe ramo, onhe'ẽrã ndoikwaáiry avave. Upe áry rire, ndaipy'agwasuvéi-ma oporandu-vy íxupe avave.

23

Judeu ruvixa kwéry rekoha rehegwa nhe'ẽ

(Mc 12.38-39; Lc 11.43-46; 20.45-46)

¹Ha upéi katu omombe'u jevy Hesu te'yí jusu-pe. Gwemimbo'e kwéry-pe ave omombe'u jevy hekorã:

²—Gwĩ judeu rekombo'ehaty kwéry fariseu kwéry ave omombe'u peẽ-my Moisés amyri remimombe'ukwe. Nhandejáry nhe'ẽ-py omombe'u peẽ-my oiko-vy. ³Upéa-gwi pehendu inhe'ẽ entéro he'i va'e gwive peẽ-my pejapo katu. Ha ha'e kwéry ae ndojapói peẽ-my he'iha-rami. Ombo'e mbo'eha-rupi ndoikói. Upéa-gwi inhe'ẽ pehendu ramo jepe, ha'e kwéry ae heko-rupi ani peiko joty katu, he'i.

⁴—Nhandejáry nhe'ẽ omombe'u rire, hasyve jajapo va'erã nhe'ẽ omombe'u nhande-vy. Jareko asy nhane rymba mba'e ipohýi eterei nhamõi ramo hese. Upéixa ete hasy nhe'ẽ jajapo va'erã omombe'u nhande-vy. Nhane rymba ipohýi va'e ogweraha ramo, nhande ae mba'eve ndajarahái. Nanhaipytygwõiry. Upéixa ete ha'e kwéry nanhane pytygwõiry voi, he'i. ⁵—Ojehexa uka porã hagwã ojapopa. Osyva-rehe, ojyva-rehe ave ojokwa imoĩ-vy Nhandejáry nhe'ẽ. Ombotuvixave ojokwa va'ekwe ojehexa porãve hagwã. Ojehexa hagwã ombopuku oao poty. ⁶Jekarugwasu-py oho ramo, óga járy yke-rehe ogwapyse onhemboete ukase-vy. Ojeporahéi haty-py oho ramo, mburuvixa kwéry pa'ũ-my ogwapyse. ⁷Mba'e jogwa haty-py oho ramo, onhemboete ukase-vy oho. Ojererovy'a ukase-vy gwapixa kwéry-pe oho. “Porombo'ehaty” oipota he'i ójehe.

⁸—Ha peẽ katu ojoe'yí. Pene mbo'eháry xe voi. Upéa-gwi, “Porombo'ehaty” ndaipotái peje ojõupe. ⁹Peteĩ oĩ pende Ru yváy pygwa. Upéa-gwi yvypóry-pe rei, ani peje teĩ, “Nhande Ru”. ¹⁰Xe Cristo xe anho-ma ngatu pene mbo'eharã. Ndaipóri outro. Upéa-gwi, ani peje teĩ ojõupe, “Xe mbo'eháry” peje. ¹¹Pene pa'ũ-my erenhembotuvixa mba'e va'e,

* 22:37 Dt 6.5 * 22:39 Lv 19.18 * 22:44 Sl 110.1

eiko katu nde rapixa rembigwái ramo. ¹²Upe onhembotuvixa mba'e ukaseve va'e-pe katu nombotéi va'erã voi Nhandejáry. Ha onhemboete ukasere'y va'e-pe katu, omboete-ma va'erã voi Nhandejáry, he'i upe pygwa-pe Hesu omombe'u-vy.

Hesu omombe'u judeu ruvixa kwéry-pe omboasyha

(Mc 12.40; Lc 11.39-42,52; 20.47)

¹³Upe ramo, ojerova oma'ẽ-vy judeu rekombo'ehaty-rehe, fariseu kwéry-rehe ave:

—Apomboasy voi peẽ-my. Pehasa asy va'erã peẽ. Peẽ katu pende py'a ky'aha pemo'ã kwaa. Pejoko omoirũse va'e-pe omoirũ e'y hagwã Nhandejáry gwuvixarã-pe. Peẽ ae napemoirũséi íxupe. Ha imoirũseháry katu ndapeipotái omoirũ íxupe. Upéa-gwi pehasa asy va'erã, he'i íxupe kwéry Hesu.

¹⁴—Apomboasy voi peẽ-my. Pende poriahu va'erã. Pehasa asy va'erã peẽ, pende py'a ky'aha pemo'ã kwaa va'e. Tembirekokwe rembiporu pemonda heraha-vy. Upéi pejehexa uka porã hagwã, pene nhe'ẽ mbuku oração apo-vy Nhandejáry-pe. Upéa-rehe pene mbohasa asyve va'erã Nhandejáry. Apomboasy voi peẽ-my.

¹⁵—Pehasa asy va'erã peẽ pende py'a ky'aha pemo'ã kwaa va'e. Opa-rupi pegwata peho-vy. Tetã tetã-rupi peho ygwasu-rupi peho ave. Hatã eterei pemba'apo petei judeu e'y va'e ojehesa rerova uka hagwã pendéjehe. Ha upe rire katu ojehesa rerova uka rire, pembohekoha vai íxupe. Upe pemokambara íxupe va'e, pende rekoha vaiha-rami, pembohekoha vaive pendéhegwi. Upéa-gwi oromboasy voi, he'i fariseu kwéry ndive judeu rekombo'ehaty-pe.

Upéi he'i jevy:

¹⁶—Pehasa asy va'erã peẽ. Ndapehexái pene renonderã. Upéixa reheve peporogwera-hase joty mo'ã. Ndohexái gwenonderã va'e-rami peiko. Upéixa reheve peporombo'ese mo'ã joty peiko-vy. Peporombo'e avy peiko-vy: “Ajapo-ta xe nhe'ẽ Nhandejáry róga kakwaa réry-py ajapo-ta xe nhe'ẽ, ja'e ramo, ja'e rei. Ndajajapói ramo jepe nhane nhe'ẽ, mba'eve joty ndajajevy'í” peje mo'ã peiko-vy. Ha “Ajapo-ta xe nhe'ẽ Nhandejáry róga pygwa ouro gwigwa réry-py, ja'e ramo katu ndaja'e reíry. Ndikatuíry nhande apu ja'e va'ekwe-rehe. Jajapo-ta mo'ã va'ekwe-rehe, ndajajapói ramo, jajevy-ma va'erã” peje peporombo'e avy-vy. Ha ha'e-ta peẽ-my: “Nhandejáry róga réry-py” ja'e ramo, “Nhandejáry róga pygwa ouro gwigwa” ja'e ramo ave peteixa. Pene remimoí mokõi mo'ã, ha xe katu amopeteixa joty. Peporombo'e avy voi. ¹⁷Peẽ pene arandu e'y. Ndohexái gwaperã va'e-rami peiko. Ma'erã, “Gwĩ Nhandejáry pygwa ouro gwigwa tuvixa mba'eve Nhandejáry róga-gwi” peje? Ndaha'úi upéixa. Nhandejáry róga kakwaa ae katu omomarangatu gwĩ ouro gwigwa, he'i inharandu e'yha kwaa uka-vy íxupe.

¹⁸Upéi he'i jevy:

—A-rami peporombo'e avy peiko-vy: “Oĩ upe apykagwasu hi'ári nhamoka'ẽ haty Nhandejáry mboete-vy, altar héry va'e. Ha'e héry-py ajapo-ta xe nhe'ẽ, ja'e ramo, ja'e rei” peje. “Ha, Ajapo-ta apykagwasu ári Nhandejáry-pe nhane remime'ẽrã réry-py, ja'e ramo katu, ndaja'e reíry. Ndikatuí nhande apu ja'e va'ekwe-rehe” peje mo'ã, he'i íxupe kwéry.

¹⁹—Pehexa e'y va'e-rami peiko, he'i. —Ma'erã, “Nhane remime'ẽrã tuvixa mba'eve upe apykagwasu-gwi” peje. Ndaha'úi upéixa. Upe apykagwasu ae katu omomarangatu nhane remime'ẽrã hi'ári nhamoi va'e, he'i. ²⁰—Aipo ramo, “Upe apykagwasu kakwaa réry-py ajapo-ta xe nhe'ẽ” peje ramo, “Entéro apyka ári oiko va'e gwive réry-py ajapo-ta xe nhe'ẽ” he'i hagwe-rami ave peje. Ndikatuíry pejapo e'y pene nhe'ẽ. Pene remimoí mokõi mo'ã, xe amopeteixa joty, he'i. ²¹—“Nhandejáry róga réry-py ajapo-ta xe nhe'ẽ” peje ramo, “Nhandejáry róga-py oĩ va'e réry-py ajapo-ta xe nhe'ẽ” he'i hagwe-rami ave peje. Peteixa ijoja pene nhe'ẽ. Ndikatuíry pejapo e'y pene nhe'ẽ, he'i. ²²—“Yváy pygwa réry-py ajapo-ta xe nhe'ẽ” peje ramo, “Nhandejáry ogwapy haty réry-py ajapo-ta xe nhe'ẽ” he'i hagwe-rami peje. Upe-py ogwapy Nhandejáry nhande ruvixa. “Nhandejáry réry-py ajapo-ta xe nhe'ẽ” he'i hagwe-rami peje. Peteixa ijoja pene nhe'ẽ. Ndikatuíry pejapo e'y pene nhe'ẽ, he'i.

²²Upéi he'i jevy judeu rekombo'ehaty kwéry ndive fariseu kwéry-pe:

—Apomboasy peẽ-my. Pehasa asy va'erã, peẽ pende py'a ky'aha pemo'ã kwaa va'e. Heta oĩ pene remityĩ ikarape va'e. Oĩ hortelã, oĩ erva doce, oĩ cominho. Upéa pene remi'urã ndive pene remimbojehe'arã pembohe porã hagwã tembi'u. Mixĩ eterei ramo jepe, dez-gwi peme'ẽ peteĩ joty Nhandejáry-pe. Ha Moisés amyri remimombe'ukwe pende rekoharã tuvixave va'e-rehe katu napepenái. Imarangatuve va'e-pe napehenduséiry peiko-vy. He'i va'ekwe peẽ-my pejogwereco porã hagwã, pejoporihuhereco hagwã, pende-rehe ojerovia tee hagwe-rami joty peiko hagwã. Upéa nhe'ẽ imarangatuve va'e napehenduséiry. Ha'e-ta peẽ-my: Mixíve va'e-rehe pende resarái e'yha-rami ave, pepena katu tuvixave va'e-rehe, he'i.

²⁴—Ndapehexái pene renonderã. Upéixa reheve peporogwerahase joty mo'ã. Pono mixĩ va'e reheve hoy'u, trapo-py ombogwa va'e-rami peiko. Ho'u va'erã-gwi oipe'ase va'e-rami peiko. Ha heta hi'upy e'y reheve okaru va'e-rami peiko joty. Mixíve va'e-rehe pepena. Tuvixave va'e-rehe ndapehexáiry. Tuvixave va'e-rehe napepenáiry, he'i íxupe kwéry Hesu.

²⁵Upéi he'i jevy gwĩ judeu rekombo'ehaty kwéry ndive fariseu kwéry-pe:

—Apomboasy peẽ-my. Pende poriahu va'erã. Pehasa asy va'erã peẽ pende py'a ky'aha pemo'ã kwaa va'e. Eremopotĩ porã mo'ã kópo nde prato ave. Ijape rei eremopotĩ. Ipy pygwa katu neremopotĩry. Pendejúpe gwarã peipotave tave. Pemonda monda-py pekaru. Upéa-gwi nde kópo nde prato ave ijape rei eremopotĩ. Ipy pygwa katu naipotĩry. Ipy-py eremoĩ eremondapyre.

²⁶—Ne arandu e'y va'e. Hesapyso e'y va'e-rami nde ereiko. Kópo eipyhéi ranhe. Upéixa hi'ári ipotĩ ave va'erã. Nde py'a potĩ ramo, ne rembiapo ave ipotĩ va'erã, he'i íxupe kwéry.

²⁷Upéi he'i jevy gwĩ judeu rekombo'ehaty kwéry-pe, gwĩ fariseu kwéry-pe ave:

—Apomboasy peẽ-my. Pehasa asy va'erã peẽ pende py'a ky'aha pemo'ã kwaa peiko va'e. Oĩ yta onhembojegwa va'ekwe morotĩ va'e-py. Ijehexa rei iporã ete voi. Ha ipy-py katu hynyhẽ oĩ-vy ivai va'e. Omano va'ekwe kágwe heta oĩ ipy-py. ²⁸Upéixa ete pende rekoha porã va'e-rami pende jehexa rei. Pende rova-py mba'eve ndaperekói. Pende koty py-py ivai voi. Pejapose va'e rei pejapo, he'i upe judeu ruvixa kwéry-pe.

*Hesu omombe'u judeu ruvixa kwéry ohasa asy ete va'erã
(Lc 11.47-51)*

²⁹Upéi he'i jevy gwĩ judeu rekombo'ehaty ndive fariseu kwéry-pe:

—Apomboasy eterei peẽ-my. Pehasa asy va'erã peẽ pende py'a ky'aha pemo'ã kwaa va'e. Pene ramói amyri ojuka va'ekwe Nhandejáry nhe'ẽ-py omombe'u va'ety-pe. Heta hekoha porã va'e-pe ojuka ave va'ekwe. Ha ãy katu peẽ pejapo ijyta pemoĩ porã hagwã. ³⁰Peje ave: “Yma jaiko ramo ra'e, nanhamoirũiry arã ra'e nhane ramói amyri-pe jajuka hagwã Nhandejáry nhe'ẽ-py omombe'u va'ety-pe” peje pendéjehe. ³¹Aipo ramo, pene nhe'ẽ-py gwĩ oporojuka va'ekwe remiarirõre voi ra'e peẽ. ³²Ha'e kwéry hekokwe-rami pende reko vai voi ra'e, he'i. —Aipo ramo, peiko katu hekokwe-rupi, he'i íxupe kwéry. ³³—Peẽ mbói ipoxy va'e reko-rami peiko va'e. Pende ru reko vai niko mbói-rami. Mombyry ojéhegwi pene mondo va'erã Nhandejáry pende rereko asy hagwã-py. Ndaiporivéi pene resendeharã. ³⁴Upéa-rehe ambou va'erã peẽ-my gwĩ Nhandejáry nhe'ẽ-py omombe'u va'ety gwĩ hi'arandu va'e ave ambou va'erã, he'i. —Gwĩ porohokombo'e va'ety ambou va'erã ave peẽ-my. Oĩ gwĩ pene rembijuka ukarã. Oĩ gwĩ kurusugwasu-rehe pene remimoĩrã. Oĩ gwĩ peporahéi haty haty-rupi pene remimbopirã. Upéa tetã tetã-rupi pene remimosẽ moserã. ³⁵Heta oĩ hekoha porã va'ekwe ne ramói amyri rembia amyrikwe. Yma gware gwive ãy peve katu ojuka juka joty hekoha porã va'ekwe-pe. Yma ete oiko va'ekwe Abel amyri. Ipy'a potĩ va'ekwe ha'e. Ha ojuka ypy íxupe va'ekwe. Upéi katu heta va'e-pema ojuka juka. Baraquias ra'y Zacarias amyri peve, ojuka juka va'ekwe. Upe Zacarias Nhandejáry kwatia nhe'ẽ-rehe omoĩ paha-ma va'ekwe. Ha'e ipy'a potĩ va'e. Ha pene ramói ojuka joty íxupe Nhandejáry róga kakwaa-py. Imarangatu ete va'e ha-py, onhegwahẽ e'y haty renonde-py, apykagwasu kupe-py, ipa'ũ-my ojuka íxupe. ³⁶Aipo ramo, anhetegwa

va'e amombe'u-ta peẽ-my, he'i. —Abel amyri gwive Zacarias amyri peve ojuka meme hekoha porã va'e-pe. Upe ojejuka hagwe-rehe gwive apogwereco asy uka va'erã voi peẽ-my. Pene rembia amyri-rehe apombohasa asy uka va'erã. Áygwa ohasa asy va'erã entéro yma gwive ojejuka uka va'ekwe-rehe, he'i gwĩ judeu rekombo'ehaty-pe, fariseu kwéry-pe ave.

Hesu omombe'u Jerusalém tetã mygwa-rehe gweko kiririha

(Lc 13.34-35)

³⁷Upéi he'i Jerusalém tetã mygwa-pe:

—Apomboasy eterei peẽ-my. Nhandejáry nhe'ẽ-py omombe'u va'ety pene rembijuka juka voi. Peẽ-my hemimbou ita-py pene rembiapi api voi. Upéixa pende reko jepe, xe apomboatyse tyse mo'ã joty peẽ kwéry-pe pene mitãgwe reheve apokwawã kwavãse-vy, he'i. —Yrugwasu ogwero'aha-rami gwa'yry, apomboatyse mo'ã. Ha napenhekwavã ukaséi joty xe-vy, he'i.

³⁸—Pene retã peheja va'erã. Pende ro nde róga nandi-rupi oĩ va'erã. ³⁹Xe ha'e-tama ãy peẽ-my. Ndaxe rexa mo'ãvéi-ma ãy. Ha upe rire katu xe aju jevy ramo, “Nhandejáry réry-py eregwahẽ-ma ereju-vy. Tande rovasa porã katu Nhandejáry” peje va'erã. Upe áry-py xe rexa jevy va'erã peẽ, he'i Jerusalém tetã mygwa-pe Hesu.

24

Ohasa asy va'erã rehegwa nhe'ẽ

(Mc 13.1-13; Lc 21.5-19)

¹Ha upéi katu osẽ oho-vy Hesu Nhandejáry róga kakwaa-gwi. Oho jave ohogwaitĩ ogwahẽ-vy Hesu-pe hemimbo'e kwéry:

—Ehexa katu óga kakwaa. Heta voi ikoty, he'i íxupe hikwái.

²Ha Hesu he'i:

—Peẽ ae katu pehexa upéa óga kakwaa, he'i. —Áy oime porã. Ha anhetegwa va'e amombe'u-ta peẽ-my, he'i. —Ita heta omohãimba va'erã, omosarambipa va'erã. Ndojepota mo'ãvéi ojóehe, he'i gwemimbo'e kwéry-pe.

³Ha upéi katu oho Hesu Oliveiras yvyaty-py. Hi'ári ogwapy. Ogwapy jave Hesu anho otopa ha-py oho hemimbo'e kwéry, he'i íxupe oporandu-vy:

—Araka'e tipo omohãimba-ta? Araka'e tipo ojehu va'erã ne remimombe'u? he'i oporandu-vy íxupe. —Mba'éixa po oroikwaa va'erã imombe'uháry? Araka'e tipo ereju jevy va'erã? Opa-tama ramo ko yvy, mba'éixa po oroikwaa va'erã imombe'uháry? he'i oporandu-vy íxupe hikwái.

⁴Upe ramo he'i Hesu:

—Xáke pene mbotavysse va'erã. Ani joty pende tavy íxupe. ⁵Heta ojekwaa va'erã ou-vy xe réry-py vérami mo'ã ou va'e. “Xe Cristo pene remiha'arõ va'e voi” he'i va'erã mo'ã ójehe peẽ-my, onhembocristo ra'anga-vy, oporombotavy rei-vy. ⁶Pehendu va'erã pene pa'ũ-rupi onhorairõ ramo. Mombyry onhorairõ va'e rerakwã pehendu ave va'erã. Pejeapysaka katu xe nhe'ẽ-rehe. Ani pekyhyje teĩ upéa-rehe. Upéa oiko va'erã voi. Upéa oiko-ma ramo, ne'írá vyteri ogwahẽ Nhandejáry nhe'ẽ apy-py. ⁷Ha tetã mygwa onhorairõ va'erã outro tetã mygwa ndive. Mburuvixagwasu re'yí onhorairõ va'erã outro mburuvixagwasu re'yí ndive. Ndaiporivéi-ma va'erã ho'v va'erã. Yvy ryrýi oiko va'erã ave heta renda-py. Opa-rupi ndoiko meméi ramo jepe, oiko va'erã joty, he'i. ⁸—Upéa-rupi pehasa asy ramo, ne'írá vyteri pehasa asy ete peiko-vy. Kunha imemby-ta va'e hasy íxupe. Ha upe rire katu hasyve syve oho-vy íxupe imemby hagwã. Upéixa ete yvypóry ohasa asy va'erã. Ha upe rire katu ohasa asyve syve oho-vy.

⁹—Upe ramo pende pyhy va'erã pende rereko asy hagwã pende juka hagwã. Entéro tetã tetã rupigwa ndaija'éi va'erã pende-rehe. Xéhegwi katu pende rereko va'erã akóiramí. ¹⁰Upe-ma ramo heta ova va'erã Nhandejáry rape-gwi, he'i. —Ojopyhy uka va'erã ojóehe ija'e'ỹ-vy. ¹¹Ojekwaa va'erã ojéhegwi rei omombe'use rei va'e. “Nhandejáry nhe'ẽ voi xe remimombe'u” he'i rei va'erã ójehe heko vai ombo'e hagwã. Heta oporombotavy rei

va'erā oiko-vy. ¹²Hetave tave rei hekoha vai va'e. Heta hekoha vai oī va'e-gwi, hekoha porā va'e jepe, ndojohayhu porāve rāvéiry va'erā okwa-vy. Ojohayhu va'e-rami rei ojogwerekō va'erā. ¹³Ha Nhandejáry rape-gwi ova e'y va'e katu ko vvy opa ete peve, oresende va'erā íxupe Nhandejáry. ¹⁴Omombe'u ranhe va'erā opa-rupi nhe'ē porā. Nhandejáry nhande ruvixarā rehegwa nhe'ē omombe'u ranhe va'erā entéro tetā tetā-rupi oiko-vy, enterove ohendu hagwā. Ha upe rire ae katu omomba ete-ma va'erā ko vvy, he'i.

¹⁵Upéi oīporu Hesu Nhandejáry kwatia nhe'ē:

—Kwatia-rehe Daniel amyri remimoigwe a-rami he'i:

“Oī va'erā pe ivai ete va'e, pene momarā va'e. Nhandejáry koty py-gwi pene mosē va'erā”^{*} he'i Hesu. Upéa nhe'ē eikwaa porā āy eremonhe'ē va'e. Upéi he'i Hesu:

—Yma he'i hagwe-rami, pehexa va'erā upe ivai ete va'e, Nhandejáry róga koty-py onhemoi ramo. Imarangatu ete va'e rendagwe-py, teko rei mba'e oī e'y haty-py pehexa va'erā upe ivai ete va'e pene momarāharā. ¹⁶Pehexa-ma ramo upe va'e, pya'e voi tokanhymba kuri Judéia vvy pygwa kwéry oje'ói-vy. Yvyatygwasu ári-rupi tokanhy kuri oje'ói-vy. ¹⁷Ogwejy ramo óga ári oī va'e, ani oike koty-py ogweraha hagwā mba'eve.

¹⁸Ha kokwe-py oī va'e ani oho jevy ranhe gwóga-py oipyhy hagwā oao. Pya'e ae kuri tokanhymba katu oje'ói-vy, he'i. ¹⁹—Upe áry-rupi iporiahu va'erā kunha imemby-ta va'e, omokambu va'e ave. Apomboasy peē-my, he'i. ²⁰—Ro'y eterei-rupi pekanhy ramo, ivaive arā peē-my. Upéa-rehe pemoi katu Nhandejáry-pe pene nhe'ē pono ivai ete peē-my. Pono ro'yha óra-py ojehu, pono japytu'uha áry-py ojehu ave, pejapo oração. ²¹Upéa áry-py ohasa asy eterei va'erā. Ko vvy rembypy oiko jave upéa áry e'y mbovy ndohasa asy etéiry va'ekwe. Upéa áry-py ae ohasa asy eterei va'erā. Ha upe rire katu ndohasa asy etevéi-ma va'erā. ²²Ha Nhandejáry katu nombohasa asy hetave áryiry va'erā. Ombohasa asy hetave áry ramo ra'e, opa-ma arā ra'e enterove ko vvy póry. Ha gwembiporavo-rehe opena porā-gwi ae katu, nombohasa asy hetave áryiry va'erā.

²³—Upe-ma ramo, “Ema'ē katu. Upe va'e Cristo voi” oī he'i va'e para'e peē-my. “Ema'ē katu. Upe va'e Cristo voi” oī ave he'i va'e para'e peē-my. Ani perovia inhe'ē. ²⁴Ojekwaa va'erā ou-vy hekoha vai va'e. “Cristo pene remiha'arō va'e voi xe” he'i rei arā ójehe peē-my. “Nhandejáry nhe'ē amombe'u voi” he'i rei arā ave ójehe. Hexapyrā-rupi voi hembiape va'erā ohekoporu ou-vy ramo. Ohexa uka va'erā gwembiapo tuvixa va'e, ikatu ramo itavy hagwā mo'ā íxupe Nhandejáry rembiporavo. Xáke. Ani joty pende tavy íxupe. ²⁵Pejeapysaka katu. Ko'ā mba'e oiko e'y ngatu amombe'u-ma kuri peē-my, he'i.

²⁶—Aipo ramo, “Amoete tekwy e'y-my oime Nhande Ryke'y tee va'e” he'i va'erā para'e peē-my. Ani joty peho. “A-py koty-py oime Nhande Ryke'y tee va'e” he'i va'erā para'e peē-my. Ani joty pende tavy íxupe. Ani perovia joty inhe'ē. ²⁷Upéixa xe, Nhande Ryke'y tee va'e, ndaju jevy mo'áiry. Kwarahy resē-gwi ka'aru peve overa va'e pehexaha-rami ae katu, xeaju jevy va'erā. ²⁸Ojéhegwi rei yruvu mba'e retekwe-py pya'e ou meme va'e-rami ave aeaju jevy va'erā. Entéro xe remimombe'u oiko-ma ramo, ajujevy-ma va'erā, he'i Hesu omombe'u-vy gwemimbo'e kwéry-pe.^{*}

Hesu omombe'u ogwahē jevytaha áry

(Mc 13.24-27; Lc 21.25-28; Ap 1.7)

²⁹Upéi he'i jevy Hesu:

—Upe-ma ramo ohasa asy ete rire-ma, oje'o va'erā kwarahy rendy. Ha jasy nahendy mo'avéi. Ha okúí va'erā yváy-gwi jasytata. Ova ova va'erā gwendagwe-gwi entéro yváy rehegwa imbarae va'e.^{*} ³⁰Upe-ma ramo ojekwaa va'erā yváy-py oikwaa uka va'e xeaju jevy hagwā-rehe. Ha enterove tetā tetā mygwa ko vvy ári oī va'e gwive onheapirō-vy ojahe'o va'erā. Xe Nhande Ryke'y tee va'e ajujevy ramo arai-rupi xe rexa va'erā. Xe pu'akaha reheve ajujevy va'erā pende resa mbojeyv va'erā xe rendy porā tee-gwi, xe rexa-ma va'erā ajujevy.^{*}

* 24:15 Dn 9.27; 11.31; 12.11

* 24:28 Mc 13.14-23; Lc 21.20-24

* 24:29 Is 13.10; 34.4

* 24:30 Dn 7.13

³¹ Mimbygwasu nhe'ë-py ambou va'erã xe rembigwái yváy pygwa ombojogweroaty hagwã heraha-vy xe rembiporavokwe. Opa-rupigwi ombojogweroaty va'erã. Kwarahy resê-gwi, kwarahy reike-gwi ave ombojogweroaty va'erã heraha-vy. Arapopy-gwi ave, yvyapy-gwi ave, yvyapy arendaja gwive ombojogweroaty va'erã, he'i íxupe kwéry omombe'u-vy.

Figó máta rehegwa nhe'ë
(Mc 13.28-31; Lc 21.29-33)

³² Upéi he'i jevy Hesu:

—Áy amombe'u-ta peë-my ojehu va'erã rehegwa nhe'ë figo máta rehegwa-rami peik-waa porã hagwã xe agwahê jevytaha áry, he'i. —Oĩ figo máta. Hoky kyrýu jevy-ma ramo, hogwe pyahu jevy-ma ramo, pehexa-ma voi. Pehexa-ma ramo, peikwaa-ma voi opa-ma ra'e ro'y. Áry raku jevy-tama, peje.

³³ —Upéixa ete upe ojehu va'erã gwive pehexa ramo, peikwaa va'erã oike-ta va'e-rami xe agwahê jevytamaha áry. ³⁴ Anhetegwa va'e amombe'u-ta peë-my. Entéro peë-my xe remimombe'u oiko va'erã. Judeu kwéry oiko reheve joty ojehu va'erã. ³⁵ Opa va'erã áry yvy ave. Ha xe remimombe'u xe nhe'ë katu nombopapa mo'áiry, he'i gwemimbo'e kwéry-pe omombe'u-vy gwenonderã.

Hesu omombe'u gwemimbo'e kwéry-pe orepara hagwã
(Mc 13.32-37; Lc 12.37-40; 17.26-30,34-36; 1 Ts 5.2-3)

³⁶ Upéi he'i jevy Hesu:

—Mbava'e áry-py po ojehu va'erã ndajaikwaáiry, he'i. —Araka'e óra-ma po ojehu va'erã ndajaikwaáiry. Nhandejáry rembigwái yváy pygwa jepe ndoikwaáiry. Xe ta'yry jepe ndaikwaái ave. Nhandejáry xe Ru ha'e anho mante oikwaa, he'i. —Araka'e óra-ma po aju jevy va'erã ndapeikwaái-gwi, perepara rei voi katu peiko-vy. ³⁷⁻³⁸ Xe Nhande Ryke'y tee va'e aju jevy ramo, yma gware-pe ojehu hagwe-rami ave ojehu jevy va'erã, he'i. —Yma ete Noé amyri oiko jave, y ovu e'y mboyye, okaru porã rei okwa-vy va'ekwe yma gware. Omenda va'ekwe okwa-vy. Upéixa va'ekwe oiko jave, oike-ma va'ekwe kanoagwasu-py Noé amyri va'ekwe. ³⁹ Ojéupe ojehu va'erã ndoikwaái va'ekwe yma gware. Ojéupe ojehu va'erã-rehe naimytu'e'yry va'ekwe oiko-vy hikwái. Upe-ma ramo, pya'e ovu íxupe kwéry imonhapymimbaharã y. Xe Nhande Ryke'y tee va'e aju jevy hagwã áry-py, upéixa ete ojehu jevy va'erã. Mbava'e nipo ojehu va'erã íxupe kwéry ndoikwaáiry yvypóry. ⁴⁰ Kokwe-py mokõi omba'apo jave, petei ogweraha va'erã, petei oheja va'erã. ⁴¹ Oĩ va'erã mokõi kunha oipokyty jave ojóhe itagwasu-py omongu'i hagwã. Petei ogweraha va'erã, petei oheja va'erã. ⁴² Upéa-gwi ha'arõ-vy perepara katu xe agwahê hagwã-rehe. Araka'e áry-py po xe pende Járy aju jevy va'erã ndapeikwaái-gwi, perepara rei katu peiko-vy, he'i.

⁴³ —Pejeapysaka katu xe nhe'ë-rehe peikwaa porã hagwã. Óga járy rehegwa nhe'ë-rami amombe'u-ta peë-my peha'arõ hagwã peiko-vy. Óga járy-pe araka'e óra pyhare ou-ta imonda va'e he'i-vy, ndokéi arã ra'e orepara-vy. Nomoinge ukáiry arã ra'e imondase va'e-pe. ⁴⁴ Upéixa ete perepara katu peiko-vy peë ave xe Nhande Ryke'y tee va'e aju jevy va'erã-rehe. Upéa-gwi xe ra'arõ-vy peiko katu, he'i gwemimbo'e kwéry-pe omombe'u-vy.

Tembigwái rekoha rehegwa nhe'ë
(Lc 12.42-48)

⁴⁵ Upéi oiporu jevy Hesu óga járy rehegwa nhe'ë jarepara porã hagwã nhande-vy oikwaa uka-vy. Tembigwái rekoha rehegwa nhe'ë-rami omombe'u:

—Oĩ va'ekwe óga járy, he'i. —Heta oĩ hembigwái. Kiva'e po hekoha porã-ta, kiva'e po hekoha vai-ta amombe'u-ta peë-my. Óga járy mombyry oho-ta ramo, petei gwembigwái hese ojerovia va'e-pe, hi'arandu va'e-pe ave: “Enhangareko porã katu xe róga pygwa-rehe gwive” he'i. “Jakaru karuha óra-py petei tei va'e-pe emboja'o ja'o íxupe kwéry hemi'urã kwéry eremongaru-vy” he'i gwembiporavo-pe oho-vy.

⁴⁶ —Upéi ogwahê jevy-ma ou-vy ijáry. Onhe'ë ojapo va'e-pe otopa ramo, ojohu porã va'erã hembiapokwe. Iporã va'erã íxupe. ⁴⁷ Anhetegwa va'e amombe'u-ta peë-my: “Áy

ae xe mba'e reta-rehe gwive enhangareko meme ereiko-vy" he'i va'erã inhe'ẽ ojapo va'e-pe. ⁴⁸Ha inhe'ẽ apo e'yha-pe katu ivai va'erã. Ndojohu porã va'erã hembiapokwe. Upe inhe'ẽ apo e'yha: "Hi'are-ma xe járy" he'i rei arã ojúpe. ⁴⁹Upéa-gwi oinupã nupã oirũ hembigwái kwéry-pe hereko asy-vy. Oka'u va'e ndive okaru oiko-vy. ⁵⁰Upe ramo ijáry ogwahẽ jevy va'erã ou-vy. Hese naimandu'avéi jave, oikwaa e'y ete jave, ogwahẽ jevy-ma va'erã ou-vy. ⁵¹Ogwahẽ rire, ombohassa asy va'erã íxupe. Ojéhegwi mombyry omondo va'erã íxupe. Gwĩ opy'a ky'aha omo'ã kwaa va'e renda-py omondo va'erã íxupe. Upe-py ojahe'o va'erã Nhandejáry-rehe onhemoyrõ-gwi. Onhemohãingyry ngyryú va'erã oiko-vy. Omondo hagwe-pe hasẽ va'erã onhemboasy-vy. Upéa-gwi perepara porã katu peiko-vy peẽ ave, he'i Hesu gwemimbo'e kwéry-pe.

25

Hesu omombe'u ogwahẽ jevytaha áry kunhataĩ rehegwa nhe'ẽ-rami

¹Upéi he'i jevy Hesu gwemimbo'e kwéry-pe:

—Amombe'u-ta peẽ-my xe agwahẽ jevytaha áry kunhataĩ rehegwa nhe'ẽ-rami, he'i. —Oĩ va'ekwe dez kunhataĩ. Omenda-ta va'e-pe omoirũ. Upe kunhataĩ he'i Nhandejáry nhande ruvixa-pe omoirũse va'erã-rehe. Oho ohogwaitĩ-vy upe kwimba'e omenda va'e-pe. Tataendy reheve oho.

²—Cinco oĩ hi'arandu porã e'y va'e. Cinco oĩ hi'arandu va'e. ³Upe inharandu porã e'y va'e tataendy reheve oho. Ha tataendyvy ryrũ oheja. ⁴Ha upe hi'arandu va'e katu tataendyvy ryrũ reheve oho. ⁵Hi'are ogwahẽ hagwã ou-vy upe omenda va'e. Oha'arõ jave hapehýi oke-ma. ⁶Ha upe rire katu pyhare mbyte-py oĩ onhe'ẽ hatã va'e: "Ogwahẽ-ta ou-vy omenda va'e. Tapeho katu pehogwaitĩ íxupe" he'i. ⁷Upe-ma ramo opaypa-ma hikwái upe dez kunhataĩ. Upéi opu'ã pu'ã omoatyrõ gwataendy.

⁸—Upéi hi'arandu porã e'y va'e he'i: "Ogwe-tama ore rataendy" he'i. "Ne rataendyvy ryrũ-gwi eme'ẽ mani katu ore-vy" he'i hi'arandu va'e-pe.

⁹—"Name'ẽ mo'ãi" he'i. "Orome'ẽ ramo, ore-vy gwarã ndoikovéi va'erã ore-vy. Tapeho katu ovende va'erã-py, pejogwa pendejúpe gwarã" he'i hi'arandu porã e'y va'e-pe.

¹⁰Oho jave ojogwa hagwã, ogwahẽ-ma ou-vy omenda va'e. Pe kunhataĩ oho e'y va'e oike oje'ói-vy indive jekarugwasu-py. Okẽnda-py omboty-ma. ¹¹Hi'areve ogwahẽ ou-vy hi'arandu porã e'y va'e: "Ore járy" he'i. "Oroike-ta ore ave" he'i omenda va'e-pe. ¹²Ha ha'e he'i: "Anhetegwa amombe'u-ta peẽ-my. Xe ndoroikwaái voi. Peẽ ndaha'úi xe re'yí" he'i oikese mo'ã va'e-pe, he'i Hesu omombe'u-vy kunhataĩ rehegwa nhe'ẽ-rami.

¹³Upéi he'i jevy:

—Araka'e áry-ma po xe agwahẽ jevy va'erã, araka'e óra-ma po xe aju jevy va'erã ndapeikwaái voi. Ndapeikwaái voi xe aju jevy hagwã áry. Upéa-gwi xe ra'arõ-vy tapeiko meme katu, he'i Hesu gwemimbo'e kwéry-pe.

Hesu omombe'u ogwahẽ jevytaha áry plata atã rehegwa nhe'ẽ-rami

(Lc 19.11-27)

¹⁴Upéi he'i jevy gwemimbo'e kwéry-pe:

—Áy amombe'u-ta peẽ-my xe agwahẽ jevytaha áry plata atã rehegwa nhe'ẽ-rami, he'i. —Oĩ va'ekwe imba'e reta va'e. Upe imba'e reta va'e he'i Nhandejáry nhande ruvixa-rehe. Yvy ambue-py oho-tama ramo, ohenói ou hagwã gwembigwái kwéry: "Penhangareko katu xe mba'e kwéry-rehe" he'i íxupe.

¹⁵—Oĩ oito moeda tuvixa va'e hepy va'e ouro gwigwa ogwereco va'e. Peteĩ va'e-pe cinco ome'ẽ. Peteĩ va'e-pe ome'ẽ mokõi. Peteĩ va'e-pe peteĩ ome'ẽ oiporuruka-vy. Peteĩ teĩ oiporu kwaa hagwã-rami ome'ẽ. Upe-ma ramo osẽ oho-vy. ¹⁶Upe cinco ome'ẽ ojúpe va'ekwe, pya'e oiporu porã oho-vy ome'ẽ va'ekwe ojúpe. Cincove ogana oiporu porã-gwi. ¹⁷Ha'e-rami ave upe mokõi ome'ẽ ojúpe va'ekwe ogana ave. Mokõive ogana oiporu porã-gwi. ¹⁸Ha upe peteĩ ome'ẽ ojúpe va'ekwe ndoiporúry ijáry ome'ẽ va'ekwe. Oho ojo'o yvy-py ojaty hagwã ome'ẽ ojúpe va'ekwe.

¹⁹—Are rire upe hembigwái járy ogwahê jevy-ma ou-vy. Ohenói rire: “Mba'éixa peiporu peê-my ame'ê va'ekwe?” he'i oporandu-vy. ²⁰Upe cinco ome'ê íxupe va'ekwe, cincove ogweru jevy íxupe: “Cinco ereme'ê va'ekwe xe-vy, xe járy” he'i, “Ko. Cincove agana va'ekwe” he'i ojáry-pe ome'ê-vy.

²¹—“Iporã eterei” he'i íxupe. “Nde reko porã voi ra'e” he'i íxupe. “Ajerovia tee voi nde-rehe” he'i íxupe. “Mixi va'e-rehe erenhangareko porã ra'e xe mbotavy e'ý reheve” he'i íxupe. “Áy tuvixave va'e-rehe oromonhangareko jevy-ta” he'i íxupe. “Xe moirũ katu onhondive javy'a hagdã” he'i cincove agana va'ekwe-pe.

²²—Upe mokõi ome'ê íxupe va'ekwe ogwahê ou-vy ave, “Xe járy” he'i. “Mokõi ereme'ê va'ekwe xe-vy. Ko. Mokõive agana va'ekwe” he'i ojáry-pe ome'ê jevy-vy.

²³—Ohexa-vy ijáry, “Iporã eterei” he'i ovy'a-vy gwembigwái-pe ijáry. “Nde rekoha porã voi ra'e. Ajerovia tee voi nde-rehe” he'i íxupe. “Xe mbotavy e'ý reheve erenhangareko porã ra'e mixi va'e-rehe” he'i íxupe. “Áy tuvixave va'e-rehe oromonhangareko jevy-ta” he'i íxupe. “Xe moirũ katu onhondive javy'a hagdã” he'i mokõive agana va'ekwe-pe.

²⁴—Upéi ogwahê ave ou-vy upe peteĩ ome'ê íxupe va'ekwe: “Orohexa kwaa-ma, xe járy, nde reko-rehe” he'i. “Ne ma'e rakate'ý va'e voi ra'e nde. Nde rapixa-pe, Penhemity xe kokwe-py, ere erejaty uka-vy. Ha upe rire katu entéro hi'a va'e gwive eremono'õ uka ndejupe gwarã. Nde rapixa-pe, Pemohã-vy penhemity xe kokwe-py, ere erejaty uka-vy. Ha upe rire katu entéro hi'a va'e gwive eremboaty uka ndejupe gwarã” he'i. ²⁵“Upéixagwi xe kyhyje ndéhegwi. Xe kyhyje-gwi, aha ajaty ne remime'êgwe vvy-py anhomi-vy. Ko. Ne mba'e” he'i ojáry-pe ome'ê jevy-vy. ²⁶“Nde rekoha vai voi ra'e. Ne ate'ý voi ra'e” he'i gwembigwái-pe. “Xe járy kokwe-py onhemity e'ý reheve, omohã e'ý reheve hemimono'õ ogwerahapa ojeupe gwarã, ere rei kuri xe-rehe. ²⁷Aipo ramo, ma'erã nerenhongatúiry xe mba'e banco-py? Ma'erã neremoĩry ojeporu hagdã-py, banco pygwa kwéry oiporu hagdã. Aipo ramo, xe aju jevy ramo, ome'ê jevy-vy xe-vy, hetave ome'ê arã mo'ã xe-vy” he'i upe peteĩ ome'ê íxupe va'ekwe-pe.

²⁸—Upéi he'i upe pygwa-pe: “Peteĩ ogwereco va'e-gwi eipe'a jevy íxugwi, eme'ê dez ogwereco va'e-pe” he'i. ²⁹“Ogwereco va'e-pe ome'êve va'erã hetave tave ogwereco hagdã. Ha ogwereco e'ý va'e katu mixi ogwereco va'e jepe oipe'a jevy va'erã íxugwi. ³⁰Ha xe hembigwái inhate'ý va'e-pe katu, pemosê katu íxupe imondo-vy pytũ kwa-rupi. Upe-py ojahe'o va'erã. Hasê va'erã onhemboasy-gwi. Nhandejáry-rehe onhemoyrõ-gwi, onhemohãingry ngyryú va'erã oiko-vy” he'i gwembigwái kwéry-pe, he'i Hesu ogwahê jevytaha óra kwaa uka-vy.

Hesu ogwereco va'erã

kente-pe hembiaapo

apokwe-rehe

(Mt 13.36-43,47-50; Ap 20.11-15)

³¹Upéi he'i jevy íxupe kwéry Hesu:

—Xe Nhande Ryke'y tee va'e aju jevy va'erã. Xe ae xe reko-rupi aju va'erã, he'i. —Enterove va'e remimboeterã-rami ajehexa uka arã aju-vy. Xe ndive ou va'erã entéro Nhandejáry rembigwái yváy pygwa gwive. Oroju ramo, pe apykagwasu hesakã va'e, mburuvixagwasu gwapy haty ramigwa ári agwapy-ma va'erã peteĩ teĩ hembiaapo apokwe-rehe areko hagdã, he'i.

³²—Entéro tetã tetã mygwa ko vvy-py oĩ va'e gwive onhomboatypa va'erã ou-vy xe renonde-py. Ogwahê ramo ou-vy xe renonde-py aipe'a pe'a va'erã ojóhugwi hembiapokwe-rami. Herekwa cabrito kwéry-gwi ovexa oipe'aha-rami ave xe aipe'a va'erã hekoha vai va'e-gwi hekoha porã va'e, he'i. ³³—Hekoha porã va'e xe amoĩ va'erã xe akatúa-koty. Xe asu-koty amoĩ va'erã hekoha vai va'e. ³⁴Upe ramo xe huvixagwasu va'e ha'e-ta xe akatúa koty-gwa-pe: “Peju katu peê xe Ru rembihovasa va'e. Peju katu. Oĩ peê-my gwarã. Ko vvy rembypy gwive omoĩ va'ekwe pene renagdã. Peiko katu Nhandejáry pende ruvixa ndive pemoirũ-vy. ³⁵Xe vare'a ramo, xe mongaru va'ekwe. Xe y'uhéi ramo,

xe mboy'u va'ekwe. Xe ndarekói ramo xe agwahê haggwã xe mogwahê joty va'ekwe nde ha-py. ³⁶Opi-vy aiko jave, ereme'ê va'ekwe xe-vy xe aorã. Xe rasy ramo, erenhangareko va'ekwe xe-rehe. Preso anhemoi jave, xe mbovy'a haggwã ereju va'ekwe. Upéa-gwi peiko katu Nhandejáry pende ruvixa ndive pemoirũ-vy” ha'e va'erã hekoha porã va'e-pe, he'i.

³⁷—Upé ramo he'i rei va'erã xe-vy: “Araka'e tipo erejehexa uka araka'e nde vare'a ramo, ore Járy? Araka'e tipo oromongaru araka'e? Araka'e tipo erejehexa uka nde y'uhéi ramo? Araka'e tipo oromboy'u araka'e? ³⁸Araka'e tipo eregwahêse araka'e ore ha-py? Araka'e tipo erejehexa uka opi-vy ereiko ramo? Araka'e tipo orome'ê araka'e nde-vy nde aorã? ³⁹Araka'e tipo erejehexa uka araka'e nde rasy ramo? Araka'e tipo oronhangareko nde-rehe araka'e? Araka'e tipo preso erenhemoi ramo, orogwahê nde ha-py? Araka'e tipo oromboy'u orogwahê-vy araka'e nde ha-py” he'i va'erã oporandu-vy xe-vy, he'i.

⁴⁰—Upéi xe huvixagwasu va'e ha'e va'erã íxupe kwéry: “Anhetegwa amombe'u-ta peẽmy. Erejapo porã jave xe re'ýi-pe, xe-vyma ave erejapo porã-ma. Xe re'ýi heko'ive va'e-pe jepe ereipytygwõ tygwõ jave, xe-vy ave-ma xe pytygwõ” ha'e va'erã hekoha porã va'e-pe, he'i.

⁴¹—Upéi ha'e va'erã xe asu kotygywa-pe: “Tapeho katu xéhegwi. Xe remimboykerã-ma voi peẽ. Oime tata anháy ruvixa pegwarã, hembigwái kwéry pegwarã ave. Upe tata nhepyru opa e'ý va'e. Tapeho katu upe-py. ⁴²Xe xe vare'a ramo va'ekwe, napepena penáiry joty va'ekwe xe-rehe xe mongaru haggwã-rehe. Xe y'uhéi ramo, napepenái va'ekwe xe-rehe xe mboy'u haggwã-rehe. ⁴³Xe ndarekói ramo xe agwahê haggwã, naxe mogwahê ukái va'ekwe pende ha-py. Xe opi-vy aiko ramo, napeme'êséiry va'ekwe xe-vy xe aorã. Xe rasy ramo, xe preso anhemoi ramo ave, napenhangarekóiry xe-rehe va'ekwe.” Upéixa xe ha'e va'erã xe asu kotygywa-pe, he'i.

⁴⁴—Upé-ma ramo he'i-ma va'erã xe-vy hikwái: “Araka'e tipo eregwahê ore ha-py nde vare'a ramo, ore Járy?” he'i va'erã xe-vy. “Araka'e tipo noromongarúi va'ekwe? Araka'e tipo erejehexa uka nde y'uhéi ramo? Araka'e tipo noromboy'úi va'ekwe? Araka'e tipo noromogwahê ukái ndererekói ramo eregwahê haggwã? Araka'e tipo noroipytygwõi opi-vy ereiko jave?” he'i va'erã xe-vy. “Nde rasy ramo, preso erenhemoi jave, araka'e tipo noroipytygwõi?” he'i va'erã xe-vy xe asu kotygywa, he'i Hesu.

⁴⁵—Upé jave ha'e arã íxupe kwéry: Xe huvixagwasu va'e anhetegwa amombe'u-ta peẽmy. Xe re'ýi-pe nderejapo porã jave, xe-vyma ave nderejapo porãiry ra'e. Xe re'ýi hekomirive va'e-pe jepe nereipytygwõiry jave, xe-vyma ave naxe pytygwõiry ra'e, ha'e va'erã hembiape vai va'e-pe, he'i.

⁴⁶—Upé jave ojerereko asy haty-py opa e'ý reheve oje'ói va'erã hekoha vai va'e. Ha hekoha porã va'e katu oikove meme va'erã Nhandejáry ndive opa e'ý reheve, he'i gwemimbo'e kwéry-pe Hesu ogwahê jevy haggwã óra-py oikwaa uka-vy.

26

Judeu ruvixa kwéry onhombo'e mbo'e Hesu-rehe ijuka haggwã

(Mc 14.1-2; Lc 22.1-2; Jo 11.45-53)

¹Ko'ã va'e nhe'ê omombe'upa rire, he'i jevy gwemimbo'e kwéry-pe Hesu:

²—Peikwaa mokói áry rire oiko-ta aretegywasu héry va'e páscoa. Upe áry-py xe Nhande Ryke'y tee va'e kususugwasu-rehe xe moi va'erã po-py xe me'ê va'erã xe reraha-vy xe juka uka haggwã, he'i ójehe, aretegywasu páscoa-rehe ave.

Upe áry-py nanhambovúiry va'ekwe ja'u va'erã. Nhane mandu'a ave nhane rembypy ojerereko asy hagwe-rehe. Yma ete upe áry-py osê va'ekwe gwí hese ipu'aka va'e po-gwi. Upéa-rehe jareko aretegywasu páscoa ko'áry peve.

³Upe ramo pa'i ruvixa kwéry, judeu ruvixa kwéry ndive ojogweroaty-ma hikwái. Caifás pa'i ruvixagwasu róga kakwaa-py ojogweroaty. ⁴Upe-py koty-py onhombo'e mbo'e Hesu-rehe hikwái:

—Nhambotavy íxupe jaipyhy-vy jajuka hagwã, he'i Hesu-rehe hikwái. ⁵—Arete-py ae ani jaipyhy íxupe, he'i. —Atýra-py jaipyhy ramo, onhembopoxy arã ijaty jaty va'e kente kwéry nhande-vy, he'i ójehe Hesu pyhyharã kwéry.

Upéa-gwi oipyhy nhemise Hesu-pe hikwái.

Kunha onhohê Hesu akã-rehe omohyakwã porã-vy íxupe

(Mc 14.3-9; Jo 12.1-8)

⁶Ha Hesu katu oime Betânia tetã'i-my. Simão róga-py oime. Upe Simão mba'asy vai-gwi ijai aipa va'ekwe nhahenói íxupe va'e. ⁷Upe ramo ogwahê ou-vy peteĩ kunha. Hyakwã porã tee va'e hyru reheve ogweru. Pe hyru ojejapo va'ekwe alabastro-gwi. Ita kyra rendy-gwi ojapo va'ekwe. Ha hyakwã porã va'e hepy eterei voi. Upéa oipyhy onhohê Hesu akã-rehe. Ogwapy jave okaru-vy onhohê hese omohyakwã porã-vy íxupe. ⁸Upe va'e ohexa ramo, ogweroxy-ma hemimbo'e kwéry:

—Ma'erã po onhohê rei pe hyakwã porã va'e Hesu akã-rehe? he'i ojóupe hikwái oporandu-vy. ⁹—Hepy eterei va'e onhohê rei, he'i ojóupe. —Ma'erã po ra'e hepy-rehe nome'ëiry ra'e, he'i. —Ma'erã ndogwerúi ra'e hepykwe ome'ê hagwã iporiahu va'e kwéry-pe. Ome'ê ramo ra'e hyakwã va'e repykwe, iporãve arã ra'e, he'i kunha rembiapo-rehe hikwái.

¹⁰Upéa he'i va'e oikwaa-ma Hesu:

—Ma'erã po ko kunha-pe eremoakã rasy? ha'e he'i. —Hembiapo porã ete voi xe-vy, he'i íxupe kwéry. ¹¹—Pene pa'ũ-my oime meme va'erã iporiahu va'e. Ha xe ae katu naime meméi va'erã aiko-vy pene pa'ũ-my, he'i íxupe kwéry. ¹²—Omano va'ekwe jajaty hagwã nhamohyakwãha-rami, amano e'ý ngatu xe mohyakwã ranhe ko kunha, he'i. ¹³—Ha'e-ta ko kunha-rehe anhetegwa va'e. Opa-rupi entéro ko yvy-rupi, mamó xe rehegwa nhe'ê porã omombe'u mbe'u ha-rupi ave omombe'u va'erã voi ko kunha rembiapo porã-rehe imandu'a hagwã hese, he'i gwemimbo'e kwéry-pe Hesu kunha-rehe.

“Aipyhy uka-ta peê-my Hesu” he'i Judas

(Mc 14.10-11; Lc 22.3-6)

¹⁴Upe ramo peteĩ hemimbo'e kwéry va'e, Judas Iscariotes héry va'e, oho pa'i ruvixa kwéry ha-py:

¹⁵—Aipyhy uka-ta peê-my Hesu, he'i. —Mbovy erepaga-ta xe-vy aipyhy uka ramo peê-my? he'i oporandu-vy Judas.

Ha ipyhyharã he'i:

—Trinta prata gwigwa moeda orome'ê-ta nde-vy, he'i Judas-pe hikwái.

¹⁶Upéa nhe'ê omoporã Judas. Omoporã rire-ma, orepara oiko-vy Hesu-rehe Judas ipyhyharã-pe omombe'u hagwã óra ra'arõ-vy.

Hesu omongaru gwemimbo'e kwéry-pe

(Mc 14.12-21; Lc 22.7-14,21-23; Jo 13.21-30)

¹⁷Ha upéi katu aretegwasy-py ogwahê ou-vy Hesu ha-py hemimbo'e kwéry. Upe va'e semana-py mbojape ova e'ý va'e ja'u. Oiko-ma ramo upéa semana, ogwahê ou-vy Hesu ha-py hemimbo'e kwéry:

—Kipy tipo orombogwey-ta nde-vy ne remi'urã nhane mandu'a hagwã páscoa-rehe jakaru-vy? he'i oporandu-vy Hesu-pe.

¹⁸Ha Hesu he'i íxupe kwéry:

—Tapeho katu tetã-my. Oĩ xe mogwahêharã. Tapeho iha-py peje-vy: “He'i kuri nhane mbo'eháry: Onhemo'agwĩ-ma amano hagwã áry. Nde róga-py xe mandu'a-ta páscoa-rehe. Xe remimbo'e kwéry ndive akaru-ta” peje kuri óga járy-pe, he'i gwemimbo'e kwéry-pe.

¹⁹Upéi oho ojapo Hesu nhe'ê ombogwey hemi'urã íxupe. ²⁰Ka'aru ete ramo ogwapy ha'e doze gwemimbo'e kwéry ndive okaru hagwã. ²¹Okaru jave he'i:

—Anhetegwa va'e amombe'u-ta peê-my, he'i. —Peteĩ pene pa'ũ-my oĩ va'e xe mombe'u va'erã xe pyhyharã-pe, he'i gwemimbo'e kwéry-pe.

²² Ohendu ramo inhe'ë, ojepy'a rerahapa-ma hese hikwái. Nombovy'avéi-ma íxupe kwéry:

—Xe tipo oropyhy uka-ta, xe Járy? he'i. —Xe para'e, ndaxéiry para'e? —onhemopeteĩ teĩ oporandu-vy íxupe.

²³ —Peteĩ pende avyete-py oĩ va'e, hyru-py opo omoĩ va'e, xe mombe'u va'erã xe pyhyharã-pe, he'i. —Xe ndive omoakỹ va'e mbojape nha'ë-py xe mombe'u va'erã, he'i.

²⁴ —Xe Nhande Ryke'y tee va'e aha va'erã xe ajejuka uka hagwã-py, he'i. —Nhandejáry kwatia nhe'ë he'i hagwe-rami aha va'erã. Ha xe mombe'u va'erã katu xe pyhyharã-pe amboasy eterei íxupe. Ohasa asy eterei va'erã. Iporãve arã ra'e ndoikói ramo osyrã-pe ra'e, he'i gwemimbo'e kwéry-pe.

²⁵ Upe ramo:

—Xe para'e, ndaxéiry para'e, xe mbo'eháry? he'i Judas, upe ipyhyharã-pe omombe'u-ta va'e.

—Nde voi, he'i Hesu. —Nde erenhemombe'uha-rami voi nde, he'i Judas-pe.

²⁶ Okaru joa jave, ha'e oipyhy mbojape, otima porã Nhandejáry-pe. Upéi ombopo mbopóy mbojape ome'ë gwemimbo'e kwéry-pe omongaru joty:

—Ko, he'i ome'ë-vy. —He'u katu. Ko mbojape xe rete-rehe he'i, he'i íxupe kwéry ojehewigwa ome'ë-vy.

²⁷ Upéi oipyhy ave copo, otima porã Nhandejáry-pe ome'ë íxupe kwéry:

—Peẽ kwéry pe'u katu ko va'e copo pygwa, he'i. ²⁸ —Ko copo pygwa xe rugwy-rehe he'i, he'i íxupe kwéry. —Osyry va'erã xe rugwy imbaraete hagwã Nhandejáry he'i va'ekwe. Yma Nhandejáry, “Amopotĩ va'erã kente kwéry” he'i va'ekwe. Upéa nhe'ë imbaraete-ma va'erã xe rugwy osyry-ma ramo, he'i. —Heta kente-rehe ha-py osyry va'erã xe rugwy omboyke hagwã íxugwi kwéry hembiaipo vaikwe, he'i Hesu. ²⁹ —Ha'e-ta peẽ-my. Ha'u-ma kuri uva rykwere. Áy ae katu nda'u mo'ávéi-ma. Ha upe rire katu, xe Ru pende ruvíxa oiko haty-py, ha'u jevy va'erã, he'i. —Upe-py agwahẽ ramo uva rykwere pyahu ha'u jevy va'erã. Pene ndive ha'u jevy va'erã, he'i gwemimbo'e kwéry-pe. ³⁰ Upéi oporahéi rire, osẽ oho-vy. Oliveiras yvyaty-py oho oje'ói-vy.*

“Xe ndaikwaái voi, ere va'erã xe-rehe mbhapyha-rehe” he'i Pedro-pe

(Mc 14.27-31; Lc 22.31-34; Jo 13.36-38)

³¹ Upe jave ha'e he'i gwemimbo'e kwéry-pe:

—Peẽ kwéry pejehesa rerova-ta xéhegwi. Ko va'e pyhare-py xe reja-ta peẽ, he'i. —Oĩ Nhandejáry kwatia nhe'ë he'i va'e a-rami:

*“Ajuka va'erã herekwa osarambipa hagwã ovexa hymba kwéry”***

he'i. Yma he'i hagwe-rami, áy xe juka-tama, he'i. ³² —Ha upe rire xe anhemoingove jevy rire katu, aha va'erã Galiléia yvy-py, he'i. —Pene renonde aha ranhe va'erã, he'i íxupe kwéry.

³³ Upéi Pedro he'i:

—Gwĩ ne irũ kwéry ndéhegwi ojehesa rerova ramo jepe, xe ae katu ndorohejái joty va'erã, he'i Hesu-pe.

³⁴ —Anhetegwa va'e amombe'u-ta nde-vy, he'i Hesu Pedro-pe. —Etería ko va'e pyhare-py, ne'írã osapakái ramo gáju, “Xe ndaikwaái voi” ere va'erã xe-rehe mbhapyha-rehe, he'i íxupe.

³⁵ —Ne ndive xe ajejuka uka ramo jepe, ndajehesa rerováí joty va'erã ndéhegwi, he'i íxupe Pedro. —“Xe ndaikwaáiry” nda'éiry joty arã nde-rehe, he'i Hesu-pe.

Pedro he'i hagwe-rami ave he'i inhirũ kwéry Hesu remimbo'e.

Hesu ojapo oração Getsêmani yvaty-py

(Mc 14.32-42; Lc 22.39-46)

³⁶ Ha upéi katu Hesu oho oje'ói-vy gwemimbo'e kwéry ndive. Ogwahẽ oho-vy Getsêmani yvaty-py:

* 26:30 Mc 14.22-26; Lc 22.15-20; 1 Co 11.23-25 * 26:31 Zc 13.7

—A-py pegwapy katu, he'i. —Xe ae ahasave-ta upe-py Nhandejáry ndive anhomongeta hagwã, he'i gwemimbo'e kwéry-pe.

³⁷Upéi mbohapy ondive ogweraha. Ogweraha Pedro. Mokõi Zebedeu ra'y ogweraha ave ondive. Upe ramo Hesu ovy'are'ÿ-ma oiko-vy. Ojepy'ajopy eterei-ma ave oiko-vy. Ogwahê vy'are'ÿgwasu íxupe:

³⁸—Ogwahê-ma vy'are'ÿgwasu xe-vy xe juka-ta va'e-rami, he'i. —Epyta nde a-py. Xe moirũ katu ereke e'ÿ reheve, he'i gwemimbo'e-pe.

³⁹Upéi ha'e ae oho mbykymi hova-py ojeity yvy-rupi:

—Xe Ru, ereipe'ase ramo, eipe'a katu xéhegwi xe py'ajopyha. Xe-vy ojehu va'erã eipe'a katu xéhegwi. Ha ndereipe'aséi ramo ae katu, ani joty ereipe'a, he'i onhomongeta-vy Nhandejáry ndive.

⁴⁰Upéi ou jevy mbohapy gwemimbo'e ha-py. Ogwahê ramo, ikéra otopa:

—Ma'erã po ereke e'ÿ reheve naxe ra'arõiry? Ma'erã peteĩ óra-py jepe naxe ra'arõiry? he'i. ⁴¹—Epáy katu. Ejapo katu oração xe ra'arõ-vy pono penhembojejavu uka avave-pe, he'i. —Nde py'a kyre'ÿ voi. Ereke e'ÿ reheve erejapose mo'ã oração. Ha nde rete katu okese voi, he'i Pedro-pe.

⁴²Upéi oho jevy Nhandejáry ndive onhomongeta-vy:

—Ndereipe'aséi ramo xe py'ajopyha jepe, ereipota ramo ave xe ahasa asy jepe, tojapo joty katu ne remimbota, xe Ru, he'i oração apo-vy.

⁴³Ouri jevy ramo, ikéra otopa jevy-ma. Hapehíi eterei-gwi, okepa-ma hikwái. ⁴⁴Upéixagwi oheja jevy-ma oho-vy. Mbohapy jevy ojapo oração. Gwemimombe'ukwe omombe'u jevyri Nhandejáry-pe. ⁴⁵Upéi ou jevy-ma gwemimbo'e oĩ ha-py:

—Ma'erã po ereke joty eretongea-vy? he'i. —Ogwahê-ma ngatu xe óra. Xe Nhande Ryke'y tee va'e ãy xe me'ẽ-ta xe reraha-vy gwĩ ojevavy va'e Nhandejáry kwaa e'ÿha va'e po-py, he'i. ⁴⁶—Epu'ã katu jaha. Ehexa katu. Onhemo'agwĩ-ma ra'e xéhegwi ou-vy upe xe pyhy ukaharã, he'i gwemimbo'e-pe omotenonde-vy ophyharã-rehe.

Hesu pyhyharã onhemoĩ-ma hese hikwái

(Mc 14.43-50; Lc 22.47-53; Jo 18.3-12)

⁴⁷Onhe'ẽ vyteri jave Hesu, ogwahê-ma ou-vy Judas, peteĩ doze hemimbo'e kwéry va'e. Indive kwéry heta ou ave. Opo-py ogweru kyse puku. Yvyra ave ogweru hikwái. Upéa pa'i ruvixa kwéry remimbou, judeu ruvixa kwéry remimbou voi. ⁴⁸Ha Judas he'i ra'e íxupe kwéry: “Ahexa uka-ta peẽ-my pene rembipyhyse” he'i ra'e Hesu-rehe. “Upe ahovapyte-ta va'e pene rembipyhyrã voi” he'i ra'e íxupe kwéry Judas. “Ahovapyte jave peẽ peikwaa-ma arã. Peipyhy mani kuri íxupe” he'i ra'e ipyhyharã-pe.

⁴⁹Upéa-gwi oho pya'e Hesu renda-py oipyhy hagwã. Judas he'i:

—Mba'éixa pa xe mbo'eháry, he'i ogwahê-vy íxupe.

Upéi ohovapyte Hesu-pe.

⁵⁰Ha Hesu he'i:

—Xe irũ, he'i, —Mba'e apo-vy ereju ra'e, he'i íxupe. —Ejapo mani katu erejapose va'e, he'i Judas-pe.

He'i-ma ramo, ou onhemoĩ-ma hese oipyhy hagwã íxupe hikwái. ⁵¹Upe-ma ramo, peteĩ Hesu irũ va'e omopu'ã okyse oikytĩ-vy. Ombogwái pa'i ruvixagwasu rembigwái-pe. Ohupity inambi, ho'a inambikwe oho-vy.

⁵²Ha Hesu he'i:

—Nde kyse katu emoĩ jevy hyru-py. Kyse omopu'ã va'e gwive kyse-py ave ojejuka va'erã, he'i kyse omopu'ã va'ekwe-pe. ⁵³—“Ndaipóri Hesu pytygwõharã” ere mo'ã. Xe Ru-pe ahenói ramo, pya'e ombou arã xe-vy heta gwembigwái yváy pygwa xe resendeharã. Setenta e dois mil ombou arã xe-vy xe resendeharã, he'i. —Hetave ombou arã xe-vy xe resendeharã, he'i. ⁵⁴—Ha nahenói mo'áiry xe pytygwõharã-rehe. Oĩ Nhandejáry kwatia nhe'ẽ a-rami:

“Ohasa asy va'erã Cristo”

he'i va'ekwe. Aipo ramo, xe Ru-pe ahenói ramo xe resende hagwā, naimbaraetevéi arā Nhandejáry kwatia nhe'ê, he'i. —Yma he'i hagwe-rami, äy ndoikói arā, he'i kyse omopu'ã va'ekwe-pe.

⁵⁵ Upe ramo he'i ijaty jaty va'e kente-pe:

—Ma'erã po pegwahê peju-vy kyse reheve xe pyhy hagwā peju-vy? Ma'erã po vyvra reheve ave pegwahê peju-vy? “Hesu oporosakea va'e” peje tipo peju-vy xe-rehe? he'i íxupe kwéry. —Ha ndaha'éiry upeixagwa xe, he'i Hesu íxupe kwéry. Iko'ê ko'ê agwapy aporombo'e-vy ae Nhandejáry róga kakwaa-py aiko-vy. Ha ndaxe pyhyí voi ra'e.

⁵⁶ Ha Nhandejáry nhe'ê-py omombe'u va'ety remimoigwe kwatia-rehe katu ipokatu voi, imbaraeete voi. Upéa-gwi yma he'i hagwe-ramima, äy oiko-ma, he'i. —Kóixa ndojehúí ramo ra'e xe-vy, ndaipokatúí arā ra'e Nhandejáry kwatia nhe'ê, he'i íxupe kwéry.

Upe-ma ramo, hemimbo'e kwéry gwive ohejapa íxupe. Okanhymba oje'ói-vy íxugwi.

Judeu ruvixa oporandu Hesu-pe hekoha-rehe

(Mc 14.53-65; Lc 22.54-55,63-71; Jo 18.12-14,19-24)

⁵⁷ Ha upéi katu Hesu pyhyhagwe ogweraha íxupe. Caifás pa'i ruvixagwasu róga kakwaa-py ogweraha. Upe-py ojogweroaty ra'e gwí judeu rekombo'ehaty, judeu ruvixa kwéry ndive. ⁵⁸ Ha Pedro katu oho hapykwéri meme. Hesu rapykwéri puku oho. Pa'i ruvixagwasu roka peve ogwahê oho-vy. Upe-py ogwahê ramo, oike ogwapy polícia kwéry ndive oiko-ta va'e ohexa hagwā.

⁵⁹ Ha pa'i ruvixa kwéry judeu ruvixa kwéry ndive, oheka heka mo'ã Hesu-rehe ijapu va'erã. Ojuka ukase íxupe hikwái. ⁶⁰ Hovagwy-py ou onhembo'y ramo jepe heta ijapu va'e, omombe'u joavy avy joty. Oipota peteíxa omombe'u ojuka uka hagwā. Ha omombe'u joavy avy joty. Heta ijapu japu rire, ou onhembo'y mokõi va'e:

⁶¹ —Upéa remimombe'ukwe oromombe'u jevy-ta peê-my, he'i. —“Aitypa uka-ta ko Nhandejáry róga kakwaa, mbohapy áry-rupí amopu'ã jevy hagwā” he'i Hesu nhe'êgwé mombe'u-vy.

⁶² Upe jave opu'ã onhembo'y-ma pa'i ruvixagwasu oí-vy:

—Ne mombe'u kuri. Ma'erã-gwi nerenhemombe'úiry ra'e nde? he'i Hesu-pe.

⁶³ Ha Hesu katu opyta okirirí rei íxugwi. Mba'eve nde'íry íxupe.

Upéi pa'i ruvixagwasu he'i:

—Nhandejáry Tupã oikove va'e réry-py, oromonhe'ê-ta nde apu e'ý reheve, he'i íxupe. —Nde pa Cristo nhane remiha'arõ va'e? he'i oporandu-vy íxupe. —Nde pa Nhandejáry ra'y tee va'e? Emombe'u katu ore-vy nde apu e'ý reheve, he'i íxupe omonhe'êse-vy.

⁶⁴ Upéi Hesu he'i:

—Xe ko ha'e voi, he'i. —Nde xe mombe'uha-rami xe Cristo voi, he'i pa'i ruvixagwasu-pe.

Upéi he'i jevy Hesu:

—Ha'e-ta peê-my kwéry. Xe Nhande Ryke'y tee va'e-pe xe rexa-ta kuri. Nhandejáry yke-rehe ijakatúa-koty agwapy ramo xe rexa va'erã. Imbaraeteve va'e Nhandejáry. Arai-rupí xe agwey ramo xe rexa va'erã, he'i judeu ruvixa-pe.

⁶⁵ Upéa nhe'ê ogwenohê-ma ramo ojéupe, ogweropoxy pa'i ruvixagwasu. Ogwerováí-gwi, omondoro oao:

—Onhe'ê vai rei-ma onhemonhandejáry-vy mo'ã, he'i. —Pehendu-ma inhe'ê vaiha, he'i. —Outro imombe'uharã-rehe nanhaikotevíry. Ojéhegwi rei onhe'ê vai-ma, he'i hese.

⁶⁶ —Mbava'e tipo pejapo-ta hese? he'i oporandu-vy.

—Tomano katu, tojejuka katu, he'i joa voi hese.

⁶⁷ Upe ramo onygwõ nygwõ hese. Osokea íxupe opo-py. Oí íxupe oipete va'e ave:

⁶⁸ —Nde Cristo, Nhandejáry nhe'ê mombe'uhaty ra'e nde. Aipo ramo, emombe'u ore-vy kiva'e va'e ne nupã, he'i oinupã nupã-vy íxupe hikwái.

“Ndaikwaáiry íxupe” he'i mo'ã Pedro Hesu-rehe

(Mc 14.66-72; Lc 22.56-62; Jo 18.15-18,25-27)

⁶⁹ Ha Pedro katu ogwapy oí-vy oka-py. Upe-ma ramo ogwahê ou-vy iha-py kunhataí pa'i ruvixagwasu rembigwái va'e:

—Nde ave eremoirũ ra'e Hesu Galiléia pygwa, he'i Pedro-pe.

⁷⁰ Ha Pedro he'i:

—Ndaxéiry, he'i. —Namoirũiry va'e voi íxupe, he'i upe-py oĩ va'e apyte-py Hesu-rehe. —Ne nhe'ẽ katu ndaikwaáiry, he'i mo'ã kunhataĩ-pe.

⁷¹ Upéi osẽ mbykymi oho-vy. Okẽ-my oho. Upe-py ohexa íxupe outro kunhataĩ:

—Upéa omoirũ va'e oiko-vy ra'e. Hesu Nazaré pygwa ndivegwa, he'i upe pygwa-pe.

⁷² —Ndaxéiry, he'i jevy Pedro kunhataĩ-pe. —Xe apu ramo, taxe moingo asy katu Nhandejáry, he'i. —Ndaikwaáiry xe íxupe, he'i mo'ã Pedro kunhataĩ-pe Hesu-rehe.

⁷³ Upe riremĩ onhemo'agwĩ-ma ou-vy Pedro renda-py upe-py opu'ã oĩ-vy va'e:

—Galiléia pygwa nhe'ẽ-rami ave erenhe'ẽ. Hendivegwa voi nipo ra'e nde, he'i íxupe. —Nde rekoha-rehe oroikwaa, he'i íxupe.

⁷⁴ Upe ramo he'i:

—Xe apu ramo, taxe moingo asy katu Nhandejáry, he'i. —Upe va'e xe ndaikwaáiry voi, he'i mo'ã upe pygwa-pe.

Upe-ma ramo pya'e osapukái gáju. ⁷⁵ Ha Pedro imandu'a-ma Hesu nhe'ẽgwe-rehe: “Ne'írã osapukái ramo gáju, Xe ndaikwaáiry voi, ere va'erã xe-rehe mbohapyha-rehe”. Upéa nhe'ẽ-rehe imandu'a-ma ramo Pedro, osẽ-vy ojahe'o. Hasẽ-ma osẽ oho-vy.

27

Hesu ojereraha mburuvixa Pilatos renda-py

(Mc 15.1; Lc 23.1-2; Jo 18.28-32)

¹ Ko'ẽmba-ma ramo, ojogweroaty jevy pa'i ruvixa kwéry, judeu ruvixa kwéry ndive:

—Mba'éixa jajuka uka-ta Hesu-pe? he'i onhombo'e mbo'e-vy hikwái hese.

² Upe-ma ramo, onhapytĩ-ma íxupe. Ipokwaha reheve ogweraha mburuvixa Pilatos po-py ome'ẽ-vy.

Ojejuvy Judas

(At 1.16-19)

³ Ha upéi katu. “Ojuka-ta voi nipo Hesu-pe ra'e” he'i ojúepe Judas pe Hesu mombe'uhare ipyhyharã-pe. Upéa-gwi omboasy eterei gwembiapokwe. Omboasy-gwi ome'ẽse jevy ojéupe ome'ẽ va'ekwe ime'ẽhare-pe. Upe trinta prata gwigwa moeda ome'ẽse jevy mo'ã íxupe kwéry:

⁴ —Ajevavy-ma, he'i. —Heko jevy e'ỹ va'e amombe'u kuri ijuka ukaharã-pe, he'i judeu ruvixa kwéry-pe Judas onhemombe'u-vy.

Ha ha'e kwéry katu nopenái joty inhe'ẽ-rehe:

—Noropenái ne nhe'ẽ-rehe, he'i. —Nde ae katu epena ne rembiaporã-rehe, he'i Judas-pe hikwái.

Nopenái hese.

⁵ Upe ramo oity yvy-py upe trinta moeda. Nhandejáry róga kakwaa koty-py oity. Oity rire, osẽ ojejuvy hagwã-pyma oho.

⁶ Ha pa'i ruvixa kwéry katu omono'õ no'õ jevy hembieitykwe:

—Ko va'e moeda ojuka uka-ta mo'ã va'e repy, he'i. —Upéa-gwi ndatekoháiry nhamoĩ hagwã pirapire ryruty-py Nhandejáry róga oĩ va'e-py, he'i ojóupe.

⁷ Upéixa ramo onhombo'e mbo'e onhondive oikwaa hagwã gwembiaporã. Oikwaa rire, oho ojogwa yvy. Upe yvy tuju-gwi mba'e ryrú apohaty mba'ekwe. Gwĩ yvy akéno-gwi ou va'ekwe ojaty hagwã ojogwa upe va'e yvy. ⁸ Upéa-gwi, ojevuka va'ekwe repykwe-py ojogwa-gwi, ombohéry, “Ojevuka va'ekwe yvy”. Ko'ánga ete peve héry upéixa. ⁹⁻¹⁰ Ko'a-rami ae yma gware Nhandejáry nhe'ẽ-py omombe'u va'ety Jeremias remimoĩgwe kwatia-rehe:

“Oipyhy upe trinta prata gwigwa moeda oho ojogwa tuju-gwi mba'e ryrú apohaty mba'ekwe. Nhandejáry xe-vy he'i hagwe-rami oho ojogwa. Kwimba'e repykwe voi trinta moeda, he'i Israel re'yi kwéry.”*

* 27:9-10 Zc 11.12-13

Yma he'i hagwe-rami äy oiko-ma.

“Nahembiapo vaíry ra'e” he'i ramo jepe Hesu-rehe, ome'ë joty ijukaharã-pe (Mc 15.2-15; Lc 23.3-5,13-25; Jo 18.33-19.16)

¹¹ Ha upéi katu omonhembo'y imoĩ-vy Hesu-pe mburuvixa Pilatos rovagwy-py:

—Nde tipo ereiko ra'e judeu kwéry ruvixagwasu ramo? he'i oporandu-vy íxupe Pilatos. Ha'e he'i:

—Xe voi aiko, he'i. —Ereha-rami aiko, he'i joty mburuvixa-pe.

¹² Ha pa'i ruvixa kwéry judeu ruvixa kwéry ndive,

—Hembiapo vai-ma, hembiapo vai-ma, he'i joa ramo hese, mba'eve joty nomombe'úiry. Onhemokirirĩ rei joty Hesu.

¹³ Upéixa-gwi:

—“Hembiapo vai vai-ma upe va'e” he'i ramo nde-rehe, ma'erã po ra'e nerenhemombe'úiry? he'i íxupe oporandu-vy Pilatos.

¹⁴ Ha ha'e katu mba'eve joty nde'íry. Heta nhe'ë ombojase mo'ã ramo jepe hese, mba'eve joty nomombe'úiry gwĩ ójehe onhe'ë vai vai va'e-pe.

Upéa rexa-vy, “Ma'erã po Hesu nonhemombe'úi joty gwĩ ójehe onhe'ë vai vai va'e-pe?” he'i ojúpe mburuvixa opondera-vy Hesu-rehe. ¹⁵ Ha oiko jave areteguasú, oĩ opoi uka va'erã íxugwi. Peteĩ onhemoĩ preso va'ekwe-gwi oĩ opoi uka jevy va'erã imondo-vy mburuvixa. Upéixa tekoha. Upe ijaty va'e kwéry ojerure va'ekwe-gwi opoi uka-ma imondo-vy. ¹⁶ Upéa ojehu jave Hesu-pe, oĩ peteĩ onhemoĩ va'e preso héry va'e Barrabás. Upéa-pe enterove va'e oikwaa íxupe. ¹⁷⁻¹⁸ Ha upéi katu heta kente ojogweroatypa. Upe ramo he'i: “Ndaija'ái-gwi rei Hesu-rehe oipyhy ra'e íxupe heru-vy xe-vy hikwái” he'i ojúpe mburuvixa. Upéa-gwi he'i:

—Kiva'e-gwi po peipota peë-my apoi, he'i, —arrabás-gwi para'e, Hesu Cristo héry va'e-gwi para'e? he'i oporandu-vy ijaty jaty va'e kwéry-pe.

¹⁹ Upe ramo ogwapy jave Pilatos oĩ-vy mburuvixa ogwapy haty-py, ombou onhe'ë hambireko íxupe:

—Upe va'e heko jejavy e'ỹ va'e. Eheja rei katu íxupe, he'i. —Pyhare ahexa kuri íxupe xe kéra-py. Íxugwi anhemondýi. Xe kéra-py ahasa asy ahexa ramo. Esyry katu ijypy-gwi, he'i omondo-vy onhe'ë ome-pe.

²⁰ Ha pa'i ruvixa kwéry judeu ruvixa ndive katu, ombo'e mbo'e ijaty jaty va'e-pe:

—“Epoi katu Barrabás-gwi. Hesu ae katu tojejuka” peje katu, he'i ijaty va'e kwéry-pe ojogweroatypa opo'ë-vy hikwái.

²¹ —Oĩ mokõi. Kiva'e-gwi tipo peipota apoi? he'i oporandu-vy íxupe kwéry.

Ha ha'e kwéry he'i:

—Barrabás-gwi epoi toho, he'i mburuvixa-pe hikwái.

²² —Aipo ramo, mbava'e tipo ajapo-ta Hesu Cristo héry va'e-rehe? he'i íxupe kwéry.

—Ejuka uka katu íxupe. Kurusugwasu-rehe ejuka uka íxupe, he'i joa joty íxupe.

²³ —Ajuka rei va'erã. Nahembiapo vaíry voíte Hesu ra'e, he'i Hesu-rehe íxupe kwéry.

—Emboja katu, emboja katu imoĩ-vy kurusugwasu-rehe omano hagwã, he'i joa joa hikwái onhe'ë hatãve täve-vy hikwái.

²⁴ Upe-ma ramo he'i: “Ndaxe pu'akavéi-ma upe ijaty va'e kwéry-rehe” he'i. “Xe rairõ rei-tama hikwái opoxy-gwi. Xe mongyhyje rei-ma hikwái” he'i ojúpe ikyhyje-vy. Upéa-gwi ojerure y-rehe. Upéa y-py ojepohéi atýra-py. Ojogweroaty va'e kwéry resa-py ojepohéi:

—Xe potĩ-ma, he'i. —Ko heko jejavy e'ỹ va'e ndajukaséi, he'i. —Ndaxe py'a vaíry hese. Pene nhe'ë-py ae katu ojeka va'erã Hesu, he'i Hesu-rehe Pilatos.

²⁵ —Ore nhe'ë-py voi tomano, he'i. —Hepyha ae katu ore-vy tojehu. Ore remiarirõ joapyri pyri-pe ave tojehu joty oho-vy, he'i mburuvixa-pe hikwái.

²⁶ Upe rire inhe'ë-py opoi Barrabás-gwi imondo-vy. Ha Hesu-pe katu he'i ombopi hagwã íxupe. Ome'ë ijukaharã-pe omboja hagwã kurusugwasu-rehe ijuka-vy.

Soldado kwéry onhembohory Hesu-rehe

(Mc 15.16-20; Jo 19.2-3)

²⁷ Upe ramo mburuwixa rembigwái kwéry soldado va'e, ogweraha Hesu-pe. Mburuwixa róga kakwaa koty-py ogweraha íxupe. Upe-py entéro soldado gwive onhombotatya hese. ²⁸ Ijao tee omboi íxugwi hikwái. Omonde hese ao pytã va'e. ²⁹ Upéi nhuatĩti-gwi ojapo íxupe ijegwaka ra'angarã omoí hagwã inhakã-rehe. Ipo akatúa-py omoí takwáry. Upéi gwetypy'ã-rehe onhesũ hovagwy-py onhembohory-vy hese:

—Toiko are katu judeu ruvixagwasu, he'i omboete ra'anga anga-vy íxupe, onhembohory-vy hese.

³⁰ Upéi katu onygwõ nygwõ-ma ave Hesu-rehe. Oipyhy ipo pygwa takwáry. Ipo pygware-py onhakãrupã rupã íxupe. ³¹ Onhembohorypa rire hese, omboi íxugwi ao pytã va'e. Omonde jevy hese ijao. Upe rire ogweraha íxupe omboja hagwã kurusugwasu-rehe ijuka-vy.

Omboja Hesu-pe kurusugwasu-rehe ijuka-vy

(Mc 15.21-32; Lc 23.26-43; Jo 19.17-27)

³² Ha upéi katu soldado kwéry Hesu reheve osẽ oje'ói-vy pe tetã-gwi. Osẽ jave, ohogwaitĩ Cirene tetã mygwa-pe héry va'e Simão-pe. Ogweraha uka íxupe Hesu kurusugwasurã.

³³ Ogwahẽ oho-vy Gólgota oje'e ha-py. Akãgwe rendaty-rehe he'i Gólgota. ³⁴ Upe-py uva rykwere pohã hái va'e reheve ome'ẽ íxupe ho'u uka-vy. Ome'ẽ íxupe pono ohendu eterei ojéupe hasy va'e. Ha otantea rire katu ndo'úiry. ³⁵ Upéi ijuka hagwã-pyma ogwenogwahẽ íxupe heraha-vy omboja hagwã íxupe kurusu-rehe. Omboja rire soldado kwéry ohuga onhomboja'o ja'o hagwã Hesu aokwe-rehe. Ogana gana va'e ogweraha ijaokwe.* ³⁶ Upéi ogwapy hese orepapa-vy. ³⁷ Ha Hesu-rehe hemimombe'ukwe ohai omoí ikurusu-rehe inhakã ári: “Kóã Hesu judeu ruvixagwasu va'e” he'i omoí-vy. ³⁸ Oĩ ave mokõi imonda va'e kurusu-rehe omboja ave imoí-vy. Hesu yke-rehe omoí, petei ijakatúa-koty, petei ijasu-koty. Imbyte-py oĩ Hesu. ³⁹ Gwĩ ohasa oiko-vy va'e opuka hatã hese. Onhakãreity ity onhembohory-vy hese. He'i Hesu-pe hikwái:*

⁴⁰ —“Aity-ta mo'ã Nhandejáry róga kakwaa amopu'ãmba jevy hagwã mbhapy áry-rupi” ere mo'ã kuri ndéjehe. —Aipo ramo, enheresende katu, he'i. —“Xe Nhandejáry ra'y” ere mo'ã kuri ndéjehe. Aipo ramo egwejy katu kurusu-gwi, he'i onhembohory-vy hese.

⁴¹ Upéixa ave onhembohory hese pa'i ruvixa kwéry judeu rekombo'ehaty ave. Upéixa ave onhembohory hese judeu ruvixa kwéry.

⁴² —Upéa opororesende va'ety. Ha ndaipu'akáiry gwekove-rehe onheresende hagwã, he'i hese onhembohory-vy. —“Xe Israel kwéry ruvixagwasu” he'i kuri ójehe. Aipo ramo ãy togwejy kurusu-gwi jarovia hagwã íxupe, he'i joa hese hikwái.

⁴³ —Nhandejáry-rehe ojerovia oiko-vy va'e. “Xe Nhandejáry ra'y” he'i kuri ójehe. Aipo ramo, oresendese ramo, toresende katu íxupe Nhandejáry ãy, he'i Hesu-rehe judeu ruvixa kwéry onhembohory-vy hese.* ⁴⁴ Upéixa ete ave upe mokõi imonda va'e hendive kurusugwasu-rehe onhemboja va'e, onhe'ẽ rei rei ave hese.

Omano Hesu

(Mc 15.33-41; Lc 23.44-49; Jo 19.28-30)

⁴⁵ Upéi kwarahy mbyte-py pytũba-ma upe yvy ári. Mbohapy óra peve pytũ. Ka'arugwasu peve pytũba. ⁴⁶ Upe ramo onhe'ẽ hatã Hesu. He'i:

—Eli, Eli, lamã sabactãni? he'i.

Ha'e ae onhe'ẽ-py onhe'ẽ. Upea he'ise: “Tupã xe Járy, Tupã xe Járy, ma'erã-gwi po xe rejapa xe anho eterei?”* he'i operandu-vy.

⁴⁷ Ha upe-py oĩ inhe'ẽ ohendu va'e:

—Upéa ohenói Elias-pe, he'i mo'ã Hesu-rehe.

* 27:35 Sl 22.18 * 27:39 Sl 22.7; 109.25 * 27:43 Sl 22.8 * 27:46 Sl 22.1

⁴⁸ Upe-ma ramo oripara ogweru bucha. Omoak̄y uva rykwere hepy ete e'ly va'e-py. Takwáry-py omoĩ, oiptye uka Hesu-pe omboy'u-vy.* ⁴⁹ Ha outro kwéry katu he'i:

—Eheja katu. Ou-ta para'e Elias oresende hagwā íxupe, he'i hese.

⁵⁰ Upéi onhe'ẽ hatã jevy-ma Hesu. Ha upe rire katu omano-ma. ⁵¹ Upe-ma ramo pya'e ojeka Nhandejáry róga kakwaa pygwa okêgwasu nhugwãha tuvixa ete va'e. Osoro hatã. Yvate-gwi yvy peve ojeka hatã ou-vy. Entéro-rupi omyimba yvy, itaty ojeka. ⁵² Ojepe'a ijyta. Heta heko marangatu va'e omano va'ekwe onhembotekove jevy-ma. ⁵³ Oyta-gwi osẽ oho-vy. Oike oho-vy Jerusalém tetã marangatu-py heta kente va'e-pe ojehexa uka-vy. Hesu onhemoingove jevy rire upe onhembotekove jevy va'e kwéry ojehexa uka-vy oho Jerusalém-py.

⁵⁴ Ha gwĩ capitão, soldado ruvixa va'e Hesu-rehe orepara va'e kwéry ndive katu, ohexa yvy omýi ramo. Entéro ojehu va'ekwe gwive ohexa ave. Upéa rexa-vy onhemondýi eterei hikwái. Upe jave ae he'i hikwái:

—Nhandejáry ra'y tee voi nipo ra'e, he'i Hesu-rehe hikwái.

⁵⁵ Heta kunha oĩ upe-py. Galiléia yvy-gwi ou ra'e. Hesu irũ meme voi gwĩ kunha. Ome'ẽ me'ẽ Hesu-pe hemikotevẽ. ⁵⁶ Oĩ Maria Madalena. Oĩ Maria, ha'e Tiago tyvýry José ndive isy ra'e oĩ ave upe-py. Oĩ ave Zebedeu ra'y sy. Oĩ outro kunha kwéry ou va'ekwe ave. Gwĩ kunha mombyry-gwi oma'ẽ joa Hesu-rehe hikwái.

Itakwa-py omoĩ Hesu retekwe

(Mc 15.42-47; Lc 23.50-56; Jo 19.38-42)

⁵⁷ Ka'aru ete-ma. Ogwahẽ ou-vy imba'e reta va'e héry va'e José. Arimatéia tetã-gwi ou va'ekwe. Ha'e Hesu nhe'ẽ renduha voi. ⁵⁸ Ogwahẽ rire oho mburuvixa renda-py ojerure Hesu retekwe-rehe:

—Ekwa eme'ẽ íxupe Hesu retekwe, he'i gwembigwái-pe Pilatos.

⁵⁹ Upéixa-gwi ogweraha hetekwe onhugwã ao morotĩ iporã va'e-py. ⁶⁰ Upéi oho ogweraha hetekwe imoĩ-vy hetekwe renderã ipyahu va'e-py. Ita ojo'o ra'e hetekwe renagwã. Upe-py omoĩ hetekwe. Upéi omboapajeréi imondo-vy itagwasu. Omboty hagwã itakwa rokẽ heseve omboapajeréi imondo-vy itagwasu. Ombotypa rire, oheja-ma oho-vy. ⁶¹ Ha Maria Madalena, Maria José sy ndive opyta upe-py. Hetekwe renda rokẽ rovagwy-py ogwapy oĩ-vy mokõive.

Soldado orepara Hesu retekwe renda-rehe

⁶² Iko'ẽ-my aretegwasu pegwarã omoimba rire, oho oje'ói-vy Pilatos renda-py. Upe-py oho pa'i ruvixa kwéry fariseu kwéry ndive:

⁶³ —Nde, karai, he'i íxupe —Ore mandu'a upe ijapu va'e Hesu nhe'ẽgwe-rehe. “Mbohapy áry rire anhemoingove jevy va'erã” he'i va'ekwe oikove vyteri jave, he'i. ⁶⁴ —Aipo ramo, mbohapyha áry peve, emonhangareko uka katu hyru-rehe, he'i. —Ou-ta para'e hemimbo'ekwe omonda hagwã hetekwe, he'i. —Ha upe rire katu, “Onhemoingove jevy-ma Hesu” he'i rei hagwã hese atýra-py. “Upéa Cristo, nhane remiha'arõ va'e” he'i ramo kuri hese, ijapu-ma va'erã voi hese. Ha ãy katu, “Onhemoingove jevy-ma” he'i ramo, ijapu vaive va'erã hese. Upéa-gwĩ emonhangareko uka katu hyru-rehe, he'i Pilatos-pe judeu ruvixa kwéry.

⁶⁵ —Néi, he'i íxupe kwéry. —Peraha katu soldado, he'i. —Tapeho jevy katu. Ani pene ate'y teĩ ha'arõ-vy. Penhangareko porãha-rami, pemonhangareko uka porã porã katu hese, he'i judeu ruvixa-pe. ⁶⁶ Soldado ome'ẽ rire íxupe ogweraha hagwã, oho oje'ói-vy hikwái. Oho onhangareko-vy hetekwe ryrure-rehe. Itagwasu-rehe omoĩ imbotyha ete pono oike nhemi koty-py imonda va'e. Upéi he'i:

—Perepara porã katu peiko-vy hetekwe ryrure-rehe pono oike nhemi koty-py imonda va'e, he'i soldado kwéry-pe judeu ruvixa kwéry.

* 27:48 Sl 69.21

28

Hesu onhemoingove jevy-ma

(Mc 16.1-10; Lc 24.1-12; Jo 20.1-10)

¹Pytu'uha áry rire, voi ete domingo-py, nako'ëi vyteri ramo, oho ohexa Hesu retekwe renda. Upe-py oho Maria Madalena, Tiago sy ndive. ²Upe-ma ramo, omýi eterei yvy. Ogwejy ra'e ou-vy yváy-gwi Nhandejáry rembigwái. Oho hetekwe renda-py, oipe'a imbotyha itagwasu omboapajeréi jevy-vy, ogwapy hi'ári. ³Overa va'e-rami hendy hova, nhande resa mbojevvy. Ijao moroti porã, iky'a e'y va'e ijao resakã va'e. ⁴Ha gwí hetekwe renda-rehe orepaharãgwe onhemondýi eterei-ma íxugwi. Ombopy'a ryrýipa íxupe kwéry heity-vy. Omano va'ekwe-rami ho'a oje'ói-vy hikwái.

⁵Ha Nhandejáry rembigwái va'e katu he'i kunha-pe:

—Ani pekyhyje teĩ. Hesu kurusu-rehe onhemboja va'ekwe retekwe-pe peju-ma pehexa kuri. ⁶Peheka ramo jepe, ndaiporivéi-ma ko'a-py, he'i. —Oikove jevy-ma kuri. Aipo ho'e hagwe-rami oikove jevy-ma kuri. Oho-ma kuri. Peju katu peẽ pema'ẽ hupagwe-rehe, he'i. —Hendagwe rei-ma oĩ, he'i. ⁷—Ha upe rire katu ekwa pya'e emombe'u hemimbo'e kwéry-pe, “Oikove jevy-ma Hesu” peje. “Ne renonderã-rupi oho-ta Galiléia yvy-py” ere hemimbo'e kwéry-pe. “Upe-py erehexa va'erã íxupe” peje hemimbo'e kwéry-pe, he'i. —Upéa nhe'ẽ mombe'u-vy aju, he'i mokõi kunha-pe Nhandejáry rembigwái yváy pygwa.

⁸Upe-ma ramo pya'e oripara oho-vy hetekwe rendagwe-gwi pe kunha. Okyhyje ramo jepe, ovy'agwasu joty oho-vy jevy. Hemimbo'e kwéry renda-py oripara oho-vy omombe'u hagwã. ⁹Upe-ma ramo ohogwaití íxupe Hesu:

—Mba'éixa pa, he'i kunha-pe.

Upéi kunha onhemo'agwí-ma íxugwi oipyhy ipy omboete íxupe.

¹⁰Upéi Hesu he'i:

—Ani pekyhyje teĩ. Ekwa teremombe'u gwí xe-rehe ojerovia va'e-pe, “Tapeho katu Galiléia yvy-py. Upe-py xe rexa va'erã, he'i kuri Hesu” ere íxupe kwéry, he'i kunha-pe Hesu.

Hesu retekwe-rehe orepára va'erãgwe omombe'u ojehu va'ekwe

¹¹Kunha oho jave, oĩ soldado Hesu retekwe-rehe orepára va'erãgwe va'e. Oho oje'ói-vy Jerusalém tetã-my omombe'u pa'i ruvixa kwéry-pe entéro ojehu va'ekwe gwive. ¹²Upéi ojogweroaty pa'i ruvixa kwéry judeu ruvixa ndive onhombó'e mbo'e-vy. Aipo ramo, heta plata ome'ẽ soldado kwéry-pe ijapu hagwã Hesu retekwe-rehe:

¹³—Atýra-py peje, “Pyhare ou nhemi Hesu remimbo'ekwe. Oroke jave omonda hetekwe heraha-vy” he'i. —“Nororepara porãiry-gwí, ojereraha hetekwe” peje rire, ani pekyhyje teĩ, he'i íxupe. ¹⁴—Upéa nhe'ẽ ohendu ramo mburuvixa, oronhomongeta arã hendive. Noromongo asy ukái va'erã íxupe, he'i soldado-pe hikwái plata me'ẽ-vy.

¹⁵Upe ramo upe soldado kwéry ogweraha plata. Judeu ruvixa he'i hagwe-rami ojapo, onhemombe'u mbe'u-vy. Judeu kwéry pa'ũ-rupi oho inhe'ẽgwe. Ko'ंगा ete peve upéa rehewga nhe'ẽ omombe'u mbe'u joty ojóupe.

“Tapeho opa-rupi xe moirũharã harã-pe xe mombe'u-vy” he'i Hesu gwemimbo'e kwéry-pe.

(Mc 16.14-18; Lc 24.36-49; Jo 20.19-23; At 1.6-8)

¹⁶Ha upéi katu onze hemimbo'e kwéry va'e oho oje'ói-vy Galiléia yvy-py. Ojeupi oje'ói-vy yvyaty ári upe Hesu remimombe'ukwe-py ojeupi hagwã oje'ói-vy. ¹⁷Ohexa ramo íxupe, gwetypy'ã-rehe onhesũ omboete-vy íxupe hikwái. Ha oĩ joty hese ndojerovia teéiry va'e. “Hesu para'e, tapa ndaha'ëi Hesu” he'i joty hese va'e. ¹⁸Upe ramo onhemo'agwí-ma gwemimbo'e kwéry-gwi ou-vy:

—Xe mbopu'aka-ma Nhandejáry enterove va'e-rehe, he'i. —Entéro yváy pygwa, entéro ko yvy-py oĩ va'e gwive ave oheja xe pogwy-py meme imoĩ-vy, he'i.

¹⁹—Aipo ramo, xe nhe'ẽ-py tapeho katu opa-rupi. Entéro tetã tetã ko yvy-py oĩ va'e-rupi gwive, tapeho xe moirũharã harã-pe xe mombe'u-vy, he'i. —Xe renduharã harã-pe xe mombe'u peiko-vy. Pemongarai rai íxupe kwéry xe Ru réry-py, xe ta'yry réry-py ave.

Nhe'ẽ Marangatu tee va'e réry-py ave pemongarai rai peiko-vy. ²⁰Peje, “Opamba'e ore orojapo hagwã Hesu ore-vy he'i va'ekwe gwive, nde ave ejapo katu” peje xe renduharã-pe, he'i. —Ha xe ae katu apomoirũ tee meme va'erã. Ndapoheja mo'ai voíte peẽ-my. Ko yvy oiko vyteri jave xe apomoirũ meme va'erã, he'i Hesu gwemimbo'e kwéry-pe omombe'u paha-vy onhe'ẽ.

Hesu Cristo rehegwa nhe'ẽ porã Marcos remimombe'ukwe o evangelho de Marcos

¹ ãy anhepyrũ amombe'u-vy Hesu Cristo rehegwa nhe'ẽ porã. Ha'e katu Nhandejáry ra'y tee voi.

João Batista rehegwa nhe'ẽ

(Mt 3.1-12; 11.10-14; Lc 3.1-18; Jo 1.19-28)

^{2,3} Yma va'ekwe oiko va'ekwe Isaías. Nhandejáry nhe'ẽ-py omombe'u-vy oiko va'ekwe. João Batista rekorã momba'u-vy oiko va'ekwe. Hesu rekoha momba'uha rekorã omombe'u

va'ekwe. A-rami omoĩ va'ekwe kwatia-rehe onhe'ẽ:*
“He'i Nhandejáry: Ko va'e xe nhe'ẽ momba'uhaty. Amondo-ta íxupe ne renonde omopotĩ hagwã nde raperã. Nde rerosapukái va'erã ne momba'u-vy. Tekwaty e'ỹ-my nde rerosapukái va'erã. He'i va'erã upe pygwa-pe: Pemopotĩ katu Nhandejáry raperã. Pemokarẽ karẽ e'ỹ katu íxupe tape. Penhemoatyrõ katu henonde. Pembohape porã katu íxupe tape, he'i va'erã ne momba'u-vy, he'i Nhandejáry.”*

Upéixa voi omoĩ va'ekwe kwatia-rehe onhe'ẽ Isaías, Nhandejáry nhe'ẽ-py omombe'u va'ety.

⁴ Upéa-gwi yma gware he'i hagwe-rami ojekwaa-ma Hesu rekoha momba'uha. João Batista oporomongarai va'ety ojekwaa ou-vy. Tekwaty e'ỹ-my ojekwaa. Ojekwaa ramo, ohopa João renda-py ijaty va'e kwéry. Hemimombe'urã ohenduse hikwái:

—Erova katu nde rekoha, he'i. —Enhemongarai uka katu nde ave, he'i. —Nde rekoha ererova ramo, erenhemongarai uka ramo ave, omboyke arã ndéhegwi Nhandejáry ne rembiapo vaikwe, he'i onhemonhe'ẽ-vy íxupe kwéry.

⁵ Upéixa ramo, ohopa João renda-py Judéia tetã mygwa. Ohopa ave entéro Jerusalém tetã mygwa. Onhemongarai uka hagwã Jordão ysyry-py oje'ói. Onhemombe'u ramo João-pe gwembiapo vaikwe-rehe, omongaraipa íxupe kwéry. ⁶ Camelo mymba ragwekwe-gwi onhemonde oiko-vy. Vaka pire iku'a jopyha. Tukúry-rehe okaru. Ei ka'agwy ave ho'u oiko-vy. ⁷ He'i omombe'u-vy:

—Ou-ta peteĩ xe rapykwerigwa va'e ipu'akave va'e xéhegwi. Amboete eterei íxupe. Upéa-gwi xe mirĩve-gwi, xe atĩ-gwi ave, ni hembigwái ramo jepe ndaikatúí apyta. ⁸ Xe katu oromongarai kuri y-py. Ha'e katu napene mongaraivéi-ma va'erã y-py xe oromongaraiharani. Omoingo va'erã ae peẽ-my Nhe'ẽ Marangatu tee va'e pende py'a-py opyta va'erã, he'i íxupe kwéry.

João Batista omongarai Hesu-pe

(Mt 3.13-17; Lc 3.21-22; Jo 1.32-34)

⁹ Upe jave oiko joty Hesu Nazaré tetã-my. Galiléia yvy-py oiko. Ha upéi katu ogwahẽ ou-vy João renda-py. Ha João katu omongarai íxupe Jordão ysyry-py. ¹⁰ Osẽ jave y-gwi, Hesu ohexa-ma ojekwaa pya'e ramo yváy-py. Upe-gwi ha'e ohexa ogwejy va'e. Pykasurami ogwejy ou-vy Nhe'ẽ Marangatu tee va'e. Ójehe ogwejy ramo ohexa. ¹¹ Ha upéi katu onhehendú yváy-gwi onhe'ẽ va'e:

—Nde katu xe ra'y xe rembihayhu. Xe orogwerohory ete va'e, he'i íxupe yváy-gwi onhe'ẽ va'e.

Satanás ombojevavyse mo'ã Hesu-pe

(Mt 4.1-11; Lc 4.1-13; Hb 2.18; 4.15)

¹² Ha upéi katu pya'e ogweraha Hesu-pe Nhe'ẽ Marangatu tee va'e. Tekwaty e'ỹ-my ogweraha íxupe. ¹³ Upe-py opyta Hesu. Quarenta áry opyta ohekoteta hagwã íxupe anháy ruxixa Satanás. Ombojevavyse ramo jepe íxupe, ha'e ohexa uka joty Satanás-pe gweko

* 1:2-3 Ml 3.1 * 1:2-3 Is 40.3

mbaraeteha. Opyta oĩ-vy Hesu nhu pygwa mymba ndive. Ha upe jave ogwahẽ ou-vy yváy pygwa Hesu ha-py hembigwairã.

Hesu onhemonhe'ẽ
(Mt 4.12-17; Lc 4.14-15)

¹⁴ Ha upéi katu João onhemoĩ preso. Onhemoĩ preso rire, Hesu oho outro tetã-my. Galiléia yvy-py oho. Oho omombe'u Tupã Nhandejáry rehegwa nhe'ẽ porã:

¹⁵ —Ogwahẽ-ma hi'óra, he'i. —Pene mo'agwĩ-ma ou-vy Nhandejáry pende ruvixarã, he'i. —Emboasy ne rembiapo vaikwe, he'i. —Erova katu nde rekoha. Erovia katu Nhandejáry rehegwa nhe'ẽ porã, he'i.

Eju xe moirũ, he'i Hesu
(Mt 4.18-22; Lc 5.1-11)

¹⁶ Upéi Hesu oho ogwata Galiléia yugwarusu yke-rehe. Ohexa oho-vy Simão-pe tyvúry ndive. Tyvúry héry André. Ohexa omombo ramo oity hagwã y-py kyha. Omombo ramo oipyhy hagwã pira-pe ohexa. Ha'e kwéry katu pira jopói haty voi.

¹⁷ —Eju katu xe moirũ, he'i íxupe Hesu. —Nde katu pira jopói kwaahaty voi, he'i íxupe. —Ha xe orombo'e-ta xe moirũ uka hagwã yvypóry kente kwéry-pe, he'i íxupe kwéry.

¹⁸ Ohendu-ma ramo upéa nhe'ẽ, pya'e oheja okyha. Oho hupive omoirũ hagwã íxupe.

¹⁹ Ha upéi henonde-rupi oho Hesu. Ohexa oho-vy mokõi Zebedeu ra'y, Tiago, tyvúry João ave. Ohexa omoatyro ramo kanoagwasu-py kyha. ²⁰ Ohexa ramo, pya'e ohenói íxupe kwéry Hesu. Ha ohejapa voi oirũ kwéry oho-vy. Kanoagwasu-py oheja íxupe kwéry oho-vy. Gwu Zebedeu ave oheja. Oheja ave gwembigwái. Oho hupive.

Hesu omosẽ imondo-vy anháy-pe
(Lc 4.31-37)

²¹ Upéi katu ogwahẽmba oho-vy Cafarnaum tetã-my. Pytu'uha áry-py pya'e oike Hesu ojeporahéi haty-py. Oike ramo onhemonhe'ẽ íxupe kwéry.

²² Ha henduháry,

—Mba'éixa po onhemonhe'ẽ, he'i opondera-vy hese hikwái: —Iporã ete inhe'ẽ, he'i. —Inhe'ẽ ndaha'úi gwĩ judeu rekombo'ehaty nhe'ẽ-rami, he'i hese. —Ha'e kwéry ndoik-waapáry onhemonhe'ẽ hagwã. Ha'e ae onhe'ẽ nomombe'uíry hikwái. Ha Hesu katu ha'e ae onhe'ẽ ha'e omombe'u. Oporomonhe'ẽgendu kwaa va'e-rami onhemonhe'ẽ, he'i Hesu-rehe opondera-vy hikwái.

²³ Upe-ma ramo oime ojeporahéi haty-py anháy ojepota va'e hese. Osapukái he'i-vy:

²⁴ —Nde Hesu Nazaré pygwa. Ma'erã ore toryva? he'i íxupe. —Ereju-ma pa ore hundi hagwã? oporandu íxupe. —Xe oroikwaa voi kiva'e pa nde, he'i íxupe. —Nde katu Tupã Nhandejáry ra'y imarangatu va'e, he'i Hesu-pe.

²⁵ Ha oja'o íxupe Hesu:

—Ekirirĩ katu. Esẽ íxugwi, he'i anháy-pe.

²⁶ Ha upéa-gwĩ ombohetyryĩ-ma íxupe anháy. Osapukái osẽ-vy anháy íxugwi oho-vy.

²⁷ Ha ha'e kwéry,

—Mba'éixa po omosẽ" he'i opondera eterei-vy hese: —Mba'eixagwa tipo kóa? he'i. —Teko pyahu-py nhane mbo'e ra'e, he'i. —Ohendu uka kwaa va'e-rami ombo'e Hesu. Omanda ramo, ohendu voi íxupe anháy, he'i hese ojóupe hikwái.

²⁸ Upe-ma ramo onhendu herakwã opa-rupi. Enterovete ohendupa inhe'ẽ. Galiléia yugwarusu jerekwe rupigwa gwive ohendupa.

Hesu ombogwera Simão raixo-pe
(Mt 8.14-15; Lc 4.38-39)

²⁹ Osẽ ramo ojeporahéi haty-gwĩ, ogwahẽ oike reheve Simão róga-py. André oiko ave ojoha-py. Ogwahẽ onhondive Tiago João ave. ³⁰ Ha Simão raixo onheno oĩ-vy. Hasy heteraku-gwĩ. Pya'e omombe'u hese Hesu-pe. ³¹ Oho Hesu. Oipopyhy. Omopu'ã íxupe. Oheja-ma íxupe heterakukwe. Ha upéi katu okwera rire Simão raixo, ha'e ogwera íxupe kwéry hemi'urã.

Hesu ombogwera heta hasy va'e-pe
(Mt 8.16-17; Lc 4.40-41)

³² Ka'aru ete. Oike-ma kwarahy. Oupa Hesu renda-py. Ogweru íxupe hasy va'e kwéry. Opa anháy rerekoha va'e gwive ogweru íxupe. ³³ Ha entéro tetã mygwa ijatypa hokê rovagwy-py. ³⁴ Ha Hesu ombogwera heta-ma hasy va'e-pe. Opaixagwa mba'asy-gwi ombogwera. Omosê ave íxugwi kwéry heta anháy. Ha oikwaa voi íxupe anháy. Upéa-gwi omokirirĩ íxupe kwéry. Ndohejái onhe'ê.

Hesu osê oho tekваты e'ỹ-my
(Lc 4.42-44)

³⁵ Ko'ê morotĩ jave opu'ã Hesu. Osê oho ha'e anho tekваты e'ỹ-my. Opyta upe-py onhomongeta-vy Tupã Nhandejáry ndive. ³⁶ Ha upéi katu oheka heka íxupe Simão inhirũ gwéry ave. ³⁷ Otopa-ma ramo, he'i Hesu-pe:

—Enterovete nde reka kuri, he'i íxupe. ³⁸ Ha Hesu he'i:

—Jaha katu tetã ambue mbue-rupi tanhemonhe'ê upe-py ave. Upéa ajapo hagwã asê aju-vy, he'i íxupe kwéry.

³⁹ Upe rire oho Hesu opa-rupi. Galiléia yugwarusu jerekwe-rupi oho. Onhemonhe'ê nhe'ê oiko-vy ojeporahéi haty haty-rupi. Omosê mosê ave oiko-vy kente kwéry-gwi anháy-pe.

Okwera ijaipa va'e
(Mt 8.1-4; Lc 5.12-16)

⁴⁰ Ha mba'asy vai-gwi ijaipa va'e katu ogwahê ou-vy ilha-py. Onhesũ omboete-vy Hesu-pe. Ojerure íxupe okwera hagwã:

—Nthane mbogwerahaty voi nde, he'i. —Xe-vy para'e xe mbogwera arã ave ra'e? he'i Hesu-pe.

⁴¹ Ha Hesu oiporiahuvereco íxupe. Upéa-gwi oipysa opo. Opoko hese:

—Orombogwera-ta voi katu nde-vy, he'i. —Ekwera katu, he'i íxupe.

⁴² Hesu onhe'ê-ma ramo íxupe, okwera-ma. Opa aiai íxugwi.

⁴³⁻⁴⁴ —Aníke eremombe'u avave-pe orombogweraha, he'i jevy jevy íxupe. —Ekwa mani ehaxa uka pa'i-pe erekweramaha, he'i íxupe. —Eme'ê íxupe upe Moisés amyri ereme'ê hagwã he'i va'ekwe. Ha upéixa enterove oikwaa-ta erekweramaha, he'i íxupe.

Upéi omondo pya'e íxupe Hesu.

⁴⁵ Ha upe okwera va'e katu osê omombe'upa joty. Opa-rupi omosarambi joty herakwã. Upéa-gwi ndikatuvéi-ma oike Hesu tetã tetãve-rupi. Tekваты e'ỹ-my katu opyta oĩ-vy. Oupa vyteri Hesu renda-py. Opa-rupigwi ou hikwái.

2

Hesu ombogwera hajy jeapa va'e-pe
(Mt 9.1-8; Lc 5.17-26)

¹ Ha Hesu katu nda'aréi oiko tekваты e'ỹ-my. Oho jevy oike Cafarnaum tetã-my. Oike ramo, ohendu-ma oimeha hóga-py hikwái. ² Upe rire heta ete ojogweroaty. Upéa-gwi ndikatúu oike avave hoga py-py. Gwĩ ogwahê va'e hokê rovagwy-rupi rei oiko hikwái. Ha Hesu katu omombe'u oiko-vy íxupe kwéry. Nhandejáry rehegwa nhe'ê porã omombe'u. ³ Omombe'u jave, ogweru Hesu renda-py hajy jeapa va'e. Irundyve reheve ogweru henda-py. ⁴ Heta eterei ojogweroaty-gwi ndikatúu ogweroike Hesu renda-py. Upéa-gwi ojeupi oipe'a óga, Hesu ári ombokwa. Ombogwejy mbegwe katu imbou-vy. Ombogwejy hajy jeapa va'e-pe. Hupa reheve ombogwejy. ⁵ Irundyve-pe, hajy jeapa va'e-pe ave ohexa Hesu. Ohexa ojerovia-ma ramo ójehe. Upéi he'i hajy jeapa va'e-pe:

—Amboyke-ma voi ne rembiapo vaikwe ndéhegwi, xe ra'y, he'i íxupe Hesu.

⁶ Ha oĩ upe-py gwĩ judeu rekombo'ehaty. Onhepy'amongeta-vy ogwapy upe-py: ⁷ “Ma'erã upe va'e onhe'ê upéixa?” he'i oporandu-vy ojeúpe. “Onhemonhandejáry ra'anga anga rei-vy, onhe'ê rei rei Hesu” he'i. “Tupã Nhandejáry ha'e anho mante

omboyke kwaa va'e nhandéhegwi nhane rembiapo vaikwe" he'i. "Ndaipóri avave omboyke va'erã" he'i opy'a-py ojéupe.

⁸ Onhepy'amongeta ramo upéixa hikwái, opy'a-py oikwaa-ma Hesu:

—Ma'erã-gwi erenhe'ê vai rei nde py'apy-py? he'i. ⁹—Pejeapysaka porã katu xe nhe'ê-rehe, he'i íxupe kwéry. —Oĩ ramo, “Amboyke-ma ndéhegwi ne rembiapo vaikwe” he'i va'e katu, ndajahexái hemimboyke, he'i. —Omboyke para'e. Tapa nomboykéiry ra'e. Ndajahexáiry. Ha oĩ ramo, “Epu'ã katu, eraha nde rupagwe, egwata eho-vy” he'i rei va'e katu, jahexa ave. Nomopu'áiry. ¹⁰ Áy aikwaa uka-ta peê-my xe nhe'ê rei e'ýha ko yvy-py. Xe Nhande Ryke'y tee va'e voi. Xe nhe'ê-py rei amboyke-ma voi yvypóry rembiapo vaikwe. Peikwaa porã hagwã xe nhe'ê rei e'ýha, ambogwera-ta upe hajy jeapa va'e-pe, he'i Hesu onhe'ê-vy gwĩ imbo'eháry-pe.

Upe rire-ma ojere hajy jeapa va'e-pe:

¹¹—Ha'e-ta nde-vy. Epu'ã eraha nde rupagwe. Xe nhe'ê-py tereho nde róga-py, he'i íxupe.

¹² Ha upéi inhe'ê-py opu'ã oho. Gwupa ohupi heraha-vy. Osê oho enterove rovagwyrupi. Upéixa Hesu ohexa uka íxupe kwéry onhe'ê rei e'ýha. Upéa ohexa ramo ijaty va'e kente,

—Mba'éixa po oporombogweraha, he'i ojóupe opondera-vy hese hikwái.

Nhandejáry-pe omomba'egwasu hikwái.

—Ndojehexáiry va'e koixagwa, he'i ojóupe hikwái.

Hesu ohenói Levi-pe

(Mt 9.9-13; Lc 5.27-32)

¹³ Ha upéi katu oho jevy Hesu yugwarusu rembe-py. Ojogweroatypa jevy hikwái upe-py. Ou Hesu renda-py. Onhemonhe'ê íxupe kwéry upe yugwarusu rembe-py. ¹⁴ Upéi ogwata oho-vy y rembe-rupi. Ohexa oho-vy Levi-pe. Ha Levi Alfeu ra'y. Ohexa íxupe nhane mbopaga haty-py:

—Eju xe moirũ, he'i Levi-pe.

Ha upéi katu opu'ã. Oho hupive.

¹⁵ Ha Hesu okaru oĩ-vy Levi róga-py. Okaru ave Hesu ndive, hemimbo'e kwéry ndive ave, nhane mbopaga va'ety, heta ojejavy va'e ave. Heta oĩ Hesu irũ. Upéa-gwĩ heta voi okaru indive.

¹⁶ Ha gwĩ fariseu judeu rekombó'ehaty va'e ohexa íxupe. Ohexa okaru ramo ojejavy va'ety ndive, nhane mbopaga va'ety ndive ave:

—Ma'erã po okaru ra'e Hesu nhane mbopaga va'ety ndive, gwĩ ojejavy va'e ndive ave, he'i oporandu-vy hemimbo'e kwéry-pe hikwái.

¹⁷ Ohendu-ma ramo upéa Hesu, omombe'u íxupe kwéry arandu rehegwa nhe'ê nhane mbogwerahaty rehegwa-rami:

—Nthane resãi ramo, nanhaikotevẽiry va'e nhane mbogwerahaty-rehe. Nhande rasy ramo ae, nhaikotevẽ va'e hese. Xe ndajúi ahenói hagwã, “Xe py'a poti” he'i ójehe va'e ou hagwã xe renda-py, he'i Hesu. —Ha gwĩ ojejavy va'e katu aju va'ekwe ahenói-vy, he'i joty íxupe kwéry Hesu hemimopotise-rehe onhemoirũ uka hagwã.

“*Ne remimbo'e kwéry katu ma'erã po ndohasái okaru e'ý reheve*” he'i oporandu-vy Hesu-pe

(Mt 9.14-17; Lc 5.33-39)

¹⁸ Ha upéi katu ohasa okaru e'ý reheve João remimbo'e kwéry, fariseu kwéry ave. Ndaha'úi ojóupe gwarã-rehe upéixa oiko hikwái. Nhandejáry pegwarã-rehe ae upéixa oiko hikwái. Upe ramo ogwahẽ ou-vy Hesu renda-py oporandu va'e:

—Ma'erã ohasa okaru e'ý reheve João remimbo'e kwéry fariseu kwéry ave? he'i. —Ha ne remimbo'e kwéry katu ma'erã po ndohasái okaru e'ý reheve? he'i oporandu-vy Hesu-pe.

¹⁹ Ha Hesu oiporu mendaha rehegwa nhe'ê oikwaa uka porã hagwã. He'i íxupe kwéry:

—Oĩ vyteri ramo omenda va'ekwe, ndikatúi ohasa okaru e'ý reheve he'ýi kwéry. Ma'erã ere kuri, “Tohasa okaru e'ý reheve” he'i oporandu-vy. —Ndikatúi ohasa okaru e'ý reheve

onhondive oime ramo. ²⁰ Ha upe rire katu ogwahē va'erā hi'áry. Ojereraha va'erā íxugwi kwéry omenda va'ekwe. Ojereraha rire nda'ivíyí va'erā okaru he'yí kwéry, he'i upe pygwa-pe ojehegwa omombe'u-vy.

²¹ Upéi Hesu oiporu ao rehegwa nhe'ē, uva rykwere rehegwa nhe'ē ave oikwaa uka porā hagwā íxupe kwéry. He'i íxupe kwéry:

—Nanharemendái ipyahu va'e-py ao tujakwe. Nharemenda ramo, onhy arā ra'e ipyahu va'e ojeopoapy-vy. Omondoro arā ao tujakwe-pe. Opyta arā ra'e osorove, he'i. ²² —Nanhahunháiry uva rykwere pyahu va'e hyru vakapi nda'ijyvúi ma va'e-py. Nanhunha ramo, ovu omondoropa-ma va'erā gwyrú tuja. Osyrupa arā pe uva rykwere ra'e. Osoropa arā hyrukwe. Uva rykwere pyahu va'e katu nanhunha hyru pyahu-py ave, he'i Hesu ohokombopyahu kwaa uka hagwā íxupe kwéry.

“Xe pytu'uha áry járy” he'i Hesu

(Mt 12.1-8; Lc 6.1-5)

²³ Ha upéi katu pytu'uha áry-py oho ogwata Hesu. Trigoty mbyte-rupi oho. Ha hemimbo'e kwéry oipo'o-ma oho-vy trigo rope. ²⁴ Ha he'i Hesu-pe fariseu kwéry:

—Ema'ē hese, he'i. —Ma'erā po ha'e kwéry oipo'o trigo rope pytu'uha áry-py? Jaipo'o ramo trigo rope, nhamba'apo voi. Ndikatúi nhamba'apo pytu'uha áry-py, he'i Hesu-pe.

²⁵ Ha he'i íxupe kwéry Hesu:

—Ma'erā eremonehe'ē nhe'ē rei Nhandejáry kwatia nhe'ē, Davi amyri rehegwa nhe'ē? Mba'éixa katu nderekwaáiry? he'i oporandu-vy íxupe.*
Upéi he'i:

—Nahembi'úi-gwi, ivare'apa va'ekwe Davi inhirū gwéry ave. ²⁶ Upéa-gwi oike koty-py va'ekwe. Nhandejáry-pe nhamboete haty-py oike, oiko ramo Abiatar pa'i ruvixagwasu ramo. Ho'u va'ekwe gwí mbojape Nhandejáry rovagwy-py pa'i remimoígwe. Nhandejáry ndohéjái avave-pe ho'u va'erā upe mbojape. Pa'i kwéry rembi'u ae. Upéa ndikatúi ho'u avave. Ha Davi ae katu ho'u joty va'ekwe. Pa'i e'y ramo jepe Davi ho'u joty va'ekwe. Omongaru ave oirū gwéry va'ekwe, he'i oikwaa uka-vy íxupe kwéry. —Iporā voi ra'e ja'u trigo rope ko'ánga, he'i oikwaa uka-vy.*

²⁷ Upéi he'i jevy íxupe kwéry Hesu:

—Omoí va'ekwe Tupā Nhandejáry upe pytu'uha áry nhane kane'ōgwa hagwā. Teko rei remimombe'u nhane mbohasa asy hagwā nomoíry va'ekwe. Nhande-rehe ha-py ae katu omoí va'ekwe pytu'uha áry, he'i íxupe kwéry. ²⁸ —Ha xe katu Nhande Ryke'y tee va'e. Upéa-gwi xe ae pytu'uha áry járy voi, he'i. —Xe ae pytu'uha áry moíha voi, he'i. —Xe ae amandave va'e, he'i íxupe kwéry Hesu.

3

Okwera ipo ypi va'e

(Mt 12.9-14; Lc 6.6-11)

¹ Ha upéi katu oike jevy Hesu ojeporahéi haty-py. Oike ramo ohexa-ma oí ramo ipo ypi va'e. Upe ramo judeu ruvíxa orepara Hesu-rehe:

² —Oporombogwera-ta para'e pytu'uha áry-py? he'i hese oporandu-vy ojóupe hikwái.

Upéa-gwi orepara para hese hikwái ohexa hagwā. Oity vai ukase mo'ā Hesu-pe. Oporombogwera ramo, “Omba'apo ra'e”, he'ise hese. Tembiapo vai ombojase mo'ā hese.

³ Ha Hesu he'i ipo ypi va'e-pe:

—Eju katu enhembo'y ore kwéry rovái, he'i íxupe.

⁴ Upe rire oporandu judeu ruvíxa-pe:

—Iporā tipo pytu'uha áry-py nhane rembiapo porā e'y? Erejohu porā va'erā tipo jajapo vai ramo? Iporā tipo pytu'uha áry-py nhaporombogwera e'y? Erejohu porā va'erā tipo japorojuka ramo? he'i íxupe kwéry.

Onhe'éreitypa íxupe kwéry. Ha ha'e kwéry katu opyta okiririmba hikwái íxugwi.

* 2:25 1 Sm 21.1-6 * 2:26 Lv 24.9

⁵ Ha upéi katu Hesu ndajja'éi ha'e kwéry heko vaiha-rehe orepara para-vy hese kwéry. Ndovy'avéi-ma. Ha'e kwéry nainhakā porāi-gwi, nainharanduséiry-gwi, ndovy'áiry:

—Eipyo katu nde po, he'i íxupe, ipo ypi va'e-pe.

Oipyo ramo, okwera-ma ipo.

⁶ Ha fariseu kwéry osēmba oho-vy íxugwi. Osē rire pya'e ojogweroaty Herodes irū gwéry ndive:

—Mba'éixa tamo ra'e jajuka íxupe, he'i oporandu randu-vy ojóupe hikwái.

Ombogwera gwera hasy va'e kwéry Hesu

(Mt 4.24-25; Lc 6.17-19)

⁷ Ha upéi katu oho jevy Hesu yugwarusu rembe-py. Gwemimbo'e kwéry ndive oho. Heta eterei Galiléa yugwarusu jerekwe rupigwa oho ave hapykwéri. Heta eta ou upe Hesu ojapo va'ekwe rerakwā rendu-vy. Ohendu heta Judéia pygwa ave. ⁸ Ohendu heta Jerusalém pygwa, heta Iduméia pygwa ave. Heta Jordão ysyry rovái pygwa ave ohendu. Ohendu heta Tiro jere rupigwa. Sidom jere rupigwa ave herakwā ohendu. Upéa-gwi oupa ete voi Hesu renda-py hikwái. ⁹⁻¹⁰ Ou ramo hikwái omongwera gwera heta va'e-pe Hesu. Upéa-gwi ijatypa hasy va'e kwéry opoko hagwā hese onhembogwera ukase-vy.

Upe ramo he'i Hesu:

—Emoí porā katu xe-vy xe renagwā kanóa pono xe jopy eterei, he'i gwemimbo'e kwéry-pe.

¹¹ Ha anháy rerekoha katu ohexa ramo íxupe, ojeity ity Hesu rovagwy-rupi osapukái-vy:

—Nde katu Tupā Nhandejáry ra'y voi, peteí teí he'i ojeity-vy íxupe.

¹² —Ani xe mombe'u mbe'u kiva'e pa xe, he'i peteí teí-pe oja'o-vy.

Hesu oiporavo doze kwimba'e-pe oirurā

(Mt 10.1-4; Lc 6.12-16)

¹³ Upéi ojeupi oho-vy vyvayrusu-py. Ohenói gwembiporavokwe-pe. Ha oupa Hesu renda-py. ¹⁴ Ha Hesu katu oiporavo doze kwimba'e-pe omoirū hagwā íxupe:

—Oromondo-ta erenhemonhe'ē hagwā. ¹⁵ Xe nhe'ē-py eremosē-ta anháy, he'i íxupe kwéry.

¹⁶ Upéixa-rupi oiporavo Simão-pe. Ha Simão-pe ombohéry joapy Pedro-py. ¹⁷ Oiporavo ave Zebedeu ra'y-pe, Tiago, tyvúry João ave. Upe mokoíve va'e ombohéry joapy ave Boanerges-py. Héry he'ise: Tyapu ramigwa. ¹⁸⁻¹⁹ Oiporavo ave André, Filipe, Bartolomeu ndive. Oiporavo Mateus, Tomé, Alfeu ra'y Tiago ndive. Oiporavo ave Tadeu, Simão ndive. Upe va'e gwí huvixa ramo oiko va'e-pe omosēse va'e kwéry irū va'ekwe. Oiporavo ave Judas Iscariotes. Upe va'e Hesu pyhyharā-pe omombe'u va'erā. Upe doze kwimba'e oiporavopa-ma Hesu oirurā.

Judeu rekombo'ehaty onhe'ē rei rei Hesu-rehe

(Mt 12.22-32; Lc 11.14-23)

²⁰ Upéi Hesu oike oho-vy oga py-py. Ha heta eta ojogweroaty jevy. Upéa-gwi ndikatúí okaru Hesu inhirū gwéry ave. ²¹ Upéa ohendu ramo, Hesu róga pygwa osē oho onhangareko hagwā hese heraha-vy.

—Itavy, he'i mo'ā hese hikwái.

Upéa-gwi osē oho onhangareko hagwā mo'ā hese he'yí kwéry.

²² Ha judeu rekombo'ehaty katu Jerusalém-gwi ou va'ekwe he'i:

—Gwí Belzebu anháy ruvixa katu ojepota ra'e Hesu-rehe. Upéa-gwi Belzebu nhe'ē-py omosē anháy imondo-vy. Upe anháy ruvixa nhe'ē-py omosē íxupe kwéry, he'i mo'ā hese hikwái.

²³ Upe va'e-rupi ohenói íxupe kwéry Hesu. Arandu rehegwa nhe'ē omombe'u íxupe kwéry, tetā mygwa rehegwa nhe'ē poru-vy. Imbaraete va'e rehegwa nhe'ē oiporu ave:

—Mba'éixa katu omosē-ta hesegwa Satanás, upe anháy ruvixa va'e, he'i. —Ndikatúiry omosē. ²⁴ Ha mburuvixagwasu re'yí ndaijojavéi-ma ramo, ndoiko porāvéi-ma. ²⁵ Ha hóga pygwa ndaijojavéi-ma ramo, ndoiko porāvéi-ma. ²⁶ Ha Satanás re'yí kwéry ave ndaijojavéi-ma ramo ra'e, ndoiko porāvéi-ma arā ra'e Satanás. Ndoikovéi-ma arā ra'e. Opa-ma arā

ra'e, he'i. ²⁷—Ha ndikatúí avave oike imbaraeete va'e róga-py omonda hagwā imba'e kwéry-rehe. Onhapytī ranhe ramo ae íxupe, ogwerahapa arā hóga-py oí va'e, he'i íxupe kwéry Hesu.

Upéixa ha'e kwéry ijapuha oikwaa uka íxupe. Anháy ndikatúí omosē ojehegwa, he'i ramo oikwaa uka íxupe ha'e kwéry ijapuha.

²⁸⁻³⁰—Anháy ojepota ra'e Hesu-rehe, he'i mo'ā hese kuri hikwái.

Hesu Nhe'ē Marangatu tee va'e-pe omoanha anháy hikwái. Upéa-gwi he'i íxupe kwéry Hesu:

—Anhete ko xe ha'e-ta nde-vy. Ne rembiapo vai ramo, erenhe'ē vai ramo Nhandejáry-rehe, omboyke-ta ndéhegwi Nhandejáry ne rembiapo vaikwe. Ha erenhe'ē vai ramo katu Nhe'ē Marangatu tee va'e-rehe, nande poriahuvereko mo'áiry. Nde py'a ky'a-ma. Nande py'a potī mo'ávéi opa e'y reheve, he'i íxupe kwéry Hesu.

Hesu re'yi kwéry

(Mt 12.46-50; Lc 8.19-21; Hb 2.11-12)

³¹Upe rire ou isy tyvýry kwéry ave. Opyta oka-py. Ohenói uka osē hagwā. ³²Heta ogwapy hikwái Hesu jerekwe-vy:

—Nde sy ou. Ou ave nde ryvy ne reindy ave. Oka-py ogwahē oí-vy, he'i íxupe. —Nde rexase, he'i Hesu-pe.

³³Ha ha'e noséiry joty oho-vy. Upéi he'i:

—Amombe'u-ta peē-my kiva'e pa xe sy, kiva'e pa xe ryvy, he'i íxupe kwéry.

³⁴Upe rire orepara gwenduha-rehe ojerekwe-rehe ogwapy va'e:

—Ehexa, he'i gwenduha-pe, —ko va'e kwéry xe sy. Upe va'e kwéry xe ryvy, he'i. ³⁵—Nhandejáry nhe'ē ojapo va'e gwive upéa voi xe ryvy, he'i. —Upéa xe reindy, upéa xe sy ave, he'i gwenduha-pe Hesu.

4

Hesu omombe'u arandu rehegwa nhe'ē temitýgwe rehegwa-rami

(Mt 13.1-9; Lc 8.4-8)

¹Ha upéi katu onhemonhe'ē jevy-ma Hesu yugwarusu rembe-rehe. Ha heta eterei ijatypa henda-py. Upéa-gwi oike kanoagwasu-py íxugwi kwéry. Ogwapy-ma kanóa py-py. Y rembe'y-py oí kanóa. Ha enterove opyta yvy-py hikwái. Y rembe-rehe opyta. ²Ha heta onhemonhe'ē nhe'ē íxupe kwéry arandu rehegwa nhe'ē omombe'u-vy.

Omombe'u arandu rehegwa nhe'ē íxupe kwéry temitýgwe rehegwa-rami:

³—Pejeapysaka joa joa, he'i. —Oho onhemitý onhemitý va'e. Omohái gwemity.

⁴Onhemitý jave, oime temitý ra'yí tape-rupi ho'a va'e. Ha upéi ou gwyrá opa ho'u. ⁵Oime temitý ra'yí ave yvy pererí-rupi ho'a va'e. Upe-py oí mixími yvy. Pya'e henhói-ma, yvy ndahetáiry-gwi. ⁶Kwarahy haku-ma ramo, onhandu-ma temitýgwe kwarahy aku. Ha kwarahy ohapypa voi. Ombohovirupa ave hapo e'y reheve. ⁷Oime nhuatíndy-rupi ho'a va'e ave. Ha nhuatí katu okakwaa-ma. Ojaho'ipa temitýgwe-pe. Upéa-gwi ndahopéiry. ⁸Oime yvy porā-my ho'a va'e ave. Henhói-ma hemitý. Okakwaa. Hope-ma. Oí trinta ha'yí va'e. Oí sessenta ha'yí va'e. Oí ha'yive va'e cem ha'yí va'e. ⁹Ne aranduse va'e, ejeapysaka porā katu xe nhe'ē-rehe, he'i onhemonhe'ē-vy íxupe kwéry.

Hesu oikwaa uka gwemimbo'e kwéry-pe temitýgwe rehegwa nhe'ē

(Mt 13.10-23; Lc 8.9-15)

¹⁰Ijatypa va'e oje'óí rire, oporandu Hesu-pe doze hemimbo'e kwéry inhirú gwéry ave:

—Temitýgwe rehegwa nhe'ē ereiporu kuri. Mbava'e-rehe po he'i upe va'e? he'i oporandu-vy íxupe.

¹¹Upéi he'i Hesu íxupe kwéry:

—Ha peē katu peikwaa voi mba'éixa po nhamoirú-ta Nhandejáry nhande ruvixa. Nhandejáry oikwaa uka-gwi peē-my peikwaa. Ha ambue kwéry-pe katu ndoikwaa ukáiry. Upéa-gwi temitýgwe rehegwa-rami amombe'u kuri Nhandejáry nhande ruvixarā rehegwa nhe'ē, anhemonhe'ē-vy íxupe kwéry, he'i.

¹²—Ha upéi oma'ê ma'ê hikwaí. Ha ndohexái mba'eve. Ohendu hendu. Ha ndoikwaái mba'eve. Upéa-gwi ndogwerová gweko. Ha Nhandejáry katu nomboykéiry íxugwi kwéry hembiaipo vaikwe. Upéa-rehe arandu rehegwa nhe'ê aiporu mante amombe'u-vy íxupe kwéry Nhandejáry rehegwa nhe'ê, he'i.*

¹³—Ha peê katu ndapeikwaa porái ave. Ma'erã ndapeikwaa porái? Aipo ramo, mba'éixa peikwaa-ta arandu rehegwa nhe'ê gwive amombe'u mbe'u ramo? ¹⁴ Onhemity va'e onhemity. Upéa he'ise: Omoherakwã Nhandejáry rehegwa nhe'ê porã. ¹⁵ Ha tãpe-rupi onhenhoty va'ekwe katu he'ise: Oí ohendu va'e nhe'ê porã. Ohendu-ma ramo, ou anháy ruvixa Satanás. Oipe'a ipy'a-gwi inhe'ê porã. ¹⁶ Ha yvy pererí-rupi onhenhoty va'ekwe katu he'ise: Oí ohendu va'e inhe'ê porã. Ohendu-ma ramo, ovy'a ogwerovia-vy. ¹⁷ Ha ndahapóiry. Upéa he'ise: Sapy'a ete ogwerovia. Ndogwerovia teéiry voi. Ha upe rire katu nhe'ê porã rendu-gwi, omoingo asy íxupe. Ojerereko asy-gwi, ndogweroviasévéiry. Pya'e a'e oheja nhe'ê porã. ¹⁸ Ha nhuatĩndy-rupi onhenhoty va'ekwe katu he'ise: Oí ohendu va'e voi inhe'ê porã. ¹⁹ Ha onhesamondo mondo omba'e-rehe: “Mba'éixa po aiko-ta ko'ánga?” oporandu randu ojéupe. Ovy'a-ta mo'ã imba'e reta ramo. Oipotave tave ojéupe gwarã. Upéa-gwi ohendu hendu rei inhe'ê porã. Nahembiaipo porã poráiry. ²⁰ Ha yvy porã-my onhenhoty va'ekwe katu he'ise: Oí ohendu va'e inhe'ê porã. Ohendu ramo ogwerovia tee voi. Ogwerovia-gwi, oí hembiaipo porã porã va'e. Oí hembiaipo porãve ráve va'e. Oí hembiaipo porã eterei va'e ave, he'i íxupe kwéry Hesu.

Hesu omombe'u mbe'u arandu rehegwa nhe'ê

²¹ Ha upéi katu Hesu omombe'u jevy arandu rehegwa nhe'ê tataendy rehegwa-rami:

—Ndajarúí voi tataendy nhamoí hagwã mba'e ryrú gwy-py. Ndajarúí ave nhamoí hagwã tupa gwy-py. Tataendy katu jaru nhamoí hagwã tataendy rendaty-py. ²² Oime va'e gwive onhenhomi va'e ojekwaa-ta voi. Ha pe ereikwaa e'y va'e gwive, upéa ereikwaa-ta voi ave. ²³ Ne aranduse va'e, ejeapysaka porã katu xe nhe'ê-rehe, he'i.

²⁴ —Ejeapysaka porã erehendu va'e-rehe. Ereme'ê me'ê va'ekwe ohekoviãrõ-ta nde-vy. Hetave ave ohekoviãrõ-ta. ²⁵ Heta ogwereko va'e-pe hetave ohekoviãrõ-ta. Ha naimba'e rexakwaái va'e-gwi katu, oipe'apa-ta íxugwi. Ogwereko va'e gwive oipe'apa-ta íxugwi, he'i íxupe kwéry Hesu.*

²⁶ Ha upéi katu omombe'u jevy Nhandejáry nhande ruvixarã rehegwa nhe'ê temitygwe rehegwa-rami:

—Kwimba'e oho onhemity. Onhemity yvy-rupi. ²⁷ Upéi pyhare hare oke-ma. Iko'ẽmba ẽmba opu'ã-vy. Henhói rei temity. Okakwaa. Ha ndoikwaáiry mba'éixa po henhói. ²⁸ Hemitygwe katu omohenhói rei yvy. Upe rire ombohópe. Upe rire omoha'yí. ²⁹ Ijagwyje-ma ramo, oikyti uka ogwahẽ-ma hi'áry-gwi, he'i íxupe kwéry Hesu, Nhandejáry irú ojekwaa va'erã rehegwa oikwaa uka-vy.

³⁰ —Mba'éixa aikwaa uka-ta peẽ-my Nhandejáry nhande ruvixaha? Mba'eixagwa nhe'ê aiporu-ta pene mo'arandu hagwã, he'i íxupe kwéry.

³¹ —Amombe'u-ta Nhandejáry nhande ruvixarã rehegwa nhe'ê temitygwe mostarda rehegwa-rami, he'i. —Oí temity hery va'e mostarda. Onhoty ramo, mixi eterei. Mixive opamba'e ra'yí-gwi yvy arigwa-gwi. ³² Ha onhoty-ma rire, pya'e tuvixa. Entéro temity-gwi tuvixave. Upéi hakãmy-ma. Upéa-rehe ojapo-ma gwyrã gwaityrã. Hi'ã gwy-py ojapo, he'i íxupe kwéry Hesu, Nhandejáry irú hetave tave oí va'erã rehegwa oikwaa uka-vy.*

³³ Upéixa voi omombe'u mbe'u íxupe kwéry Hesu arandu rehegwa nhe'ê temitygwe rehegwa-rami. Peteĩ teĩ oikwaa peve omombe'u. ³⁴ Onhemonhe'ê-vy íxupe kwéry, temitygwe rehegwa nhe'ê va'e-rupi, tataendy rehegwa va'e-rupi ave omombe'u íxupe. Upéa rehegwa oiporu e'y reheve nomombe'uíry íxupe kwéry. Ha hemimbo'e kwéry anho hendive oime ramo, oikwaa ukapa-ma íxupe kwéry.*

* 4:12 Is 6.9-10

* 4:25 Mt 5.14-15; Lc 8.16-18

* 4:32 Mt 13.31-32; Lc 13.18-19

* 4:34 Mt 13.34-36

Ekirirĩ katu, he'i y-pe Hesu
(Mt 8.23-27; Lc 8.22-25)

³⁵ Ha upéi ka'aru ete-ma.

—Jaha jahasa y rovái, he'i gwemimbo'e kwéry-pe Hesu.

³⁶ Upéi ohejapa oho-vy ijaty va'e-pe hikwái. Ogwapy oĩ-vy kanoagwasu-py Hesu. Upéixa ramo ogweraha íxupe y-rupí y rovái. Oho ave hupive kanóa ambue va'e. ³⁷ Ha upéi katu ou vytyugwasu. Opu'ã pu'ã-ma y. Oike kanoagwasu-py y. Upéa-gwi haimete-ma kanóa hynyhẽ y-gwi. ³⁸ Ha Hesu katu oke oĩ-vy kanóa-py. Hemimbo'e kwéry kupe-py oke. Oke inhakãngyta ári. Ha omombáy-ma íxupe hikwái.

—Nhande nhandeapymi-tama, mbo'eháry, he'i omombáy-vy íxupe. —Nerepenái tipo nhande rekove-rehe? he'i íxupe.

³⁹ Ha opáy-ma Hesu. Ha opáy jave Hesu ohexa-ma y opu'ã pu'ã va'e. Ha oja'o vytyugwasu-pe omombyta hagwã:

—Ekirirĩ katu, he'i y-pe.

Inhe'ẽ rupi opyta-ma vytyu. Okirirĩmba ete voi.

⁴⁰ Ha'e he'i:

—Ma'erã nde py'amirĩ upéixa? Nderejeroviáiry xe-rehe. Ma'erã nderejeroviáiry xe-rehe? he'i íxupe kwéry.

⁴¹ Ha onhemondyipa-ma íxugwi hikwái.

—Kiva'e po ko va'e? Oja'o ramo vytyugwasu-pe, oja'o ramo y-pe ave íxupe, ohendu voi inhe'ẽ, he'i ojóupe hikwái hese.

5

Oike kure kwéry py'a-py anháy kwéry
(Mt 8.28-34; Lc 8.26-39)

¹ Ha upéi katu Hesu gwemimbo'e kwéry ndive ohasa yugwarusu rovái. Ogwahẽ Geraseno kwéry retã-my. ² Osẽ-ma ramo Hesu kanoagwasu-gwi, ou ohugwaitĩ-vy íxupe anháy ojepota va'e hese. Oyta-gwi ou. ³ Oiko rei oyta-rupí anháy ojepota va'e hese. Ndikatuveí onhapytĩ íxupe avave. ⁴ Onhapytĩ jevy jevy rei íxupe. Oipokwa pokwa íxupe corrente-py. Oipykwa pykwa ave íxupe. Ha anháy-rehe omenda va'e katu omondohoypa-ma. Omopesẽgwe sẽgwepa, omondoho ndohoypa-ma íxugwi. Ndaipóri ipu'aka va'e hese. ⁵ Pyhare osapukái oĩ-vy oyta-rupí, vytyaty aty-rupí ave. Áry ramo osapukái ave. Onhekytĩ oiko-vy ita-rehe. ⁶ Mombyry-gwi ohexa-ma Hesu-pe. Oripara ojeity omboete hagwã íxupe. ⁷ He'i osapukái hatã-vy:

—Nde, Hesu, he'i. —Tupãgwasu ra'y nde, he'i. —Ma'erã tipo erepena xe-rehe? he'i oporandu-vy Hesu-pe. —Tupã Nhandejáry réry-py, ajerure nde-vy. Aníke xe mbohasa asy, he'i Hesu-pe.

⁸ Upéa he'i jave,

—Anháy, he'i, —esẽ katu íxugwi, he'i íxupe Hesu.

⁹ Upéi oporandu íxupe:

—Mba'éixa nde réry? he'i íxupe.

—Heta xe ae xe moirũ va'e. Upéa-gwi xe réry Heta ave, he'i Hesu-pe.

¹⁰ Upéi ojapura anháy ojerure-vy Hesu-pe pono omondopa íxupe kwéry pe tetã-gwi. ¹¹ Ha upe-py heta eterei oĩ kure. Vytyaty rembe'y-rehe okaru hikwái kure. ¹² Ha anháy kwéry ojerure íxupe:

—Ore mondo katu kure kwéry-rehe. Toroike ipy'a kwéry-py, he'i Hesu-pe.

¹³ —Tapeho, he'i íxupe kwéry Hesu.

Ha anháy kwéry katu osẽ íxugwi. Oike kure kwéry yta-py. Ha kure kwéry oriparapa ogwejy. Y rembe'y-py ogwejy oho-vy. Hi'apỹ ho'a-vy. Ofigwe-vy ho'a yugwarusu-py. Heta eterei onheapymimba y py-py. Mokõi mil-rupí, gweta hagwe-ma onheapymimba. ¹⁴ Ha

herekwa kwéry katu oriparapa oho-vy hikwái. Omombe'u tetã mygwa-pe. Tetã jerekwe-rehe oĩ va'e-pe omombe'u ave. Oupa ohexa ojehu va'ekwe. ¹⁵Ogwahẽmba Hesu renda-py. Ohexa anháy rerekohare hikwái. Ohexa íxupe ogwapy ramo. Onhemonde ramo ohexa.

—Ndaitavyvéi-ma voi ra'e, he'i hexa-vy hikwái.

Upéa-gwi ikyhyjepa-ma hikwái. ¹⁶Ha upe hexahare omombe'upa íxupe kwéry. Ojehu va'ekwe omombe'upa íxupe. Omombe'u ave anháy rerekohare rehegwa nhe'ẽ. Kure kwéry rehegwa nhe'ẽ omombe'u ave. ¹⁷Upéa-gwi upe pygwa kwéry okyhyje-ma Hesu-gwi hikwái. Ojerure-ma íxupe osẽ hagwã hetã kwéry-gwi.

¹⁸Upe rire onhemboyru kanóa-py Hesu. Onhemboyru-ma ramo ojapura upe anháy rerekohare omoirũ hagwã íxupe. ¹⁹Ha ndohejái omoirũ íxupe:

—Tereho ae katu nde róga-py. Ekwa emombe'u nde re'ýi kwéry-pe erekwera porãmaha. “Nhandejáry ojapo porã porã xe-rehe” ere katu emombe'u-vy, he'i íxupe. —“Xe poriahu-vereko eterei-ma voi Nhandejáry” ere katu emombe'u-vy, he'i íxupe Hesu. ²⁰Ha upéi katu oho omosarambi-vy anháy rerekohare Decapolis tetã mygwa-pe. “Ojapo porã porã xe-rehe Hesu” he'i omombe'u-vy.

—Nhandejáry ojapo porã porã hese, he'i opondera-vy hese hikwái.

Hesu omoingove jevy mitã kunha-pe
(Mt 9.18-26; Lc 8.40-56)

²¹Ha upéi katu Hesu oho jevy kanoagwasu-py. Ohasa oje'ói-vy y rovái. Ogwahẽ rire heta eterei jevy ijatypa henda-py. Ha Hesu yugwarusu rembe-py onhembo'y oĩ-vy. ²²Ha upéi ojapura ou-vy ojeporahéi haty-py omanda va'e. Héry Jairo. Ohexa-ma ramo íxupe, onhesũ omboete-vy Hesu renonde-py:

²³—Omano-tama xe rajymi, he'i. —Jaha katu eremoĩ hagwã hi'ári nde po okwera hagwã, nomanovéi hagwã, he'i ojapura-gwi Hesu-pe.

²⁴Upéa-gwi oho hendive Hesu. Ha ijaty va'e ojopypa íxupe oho-vy hapykwéri. ²⁵Oime kunha. Are-ma hasy. Hasy doze ro'y. Tuvixa hasyha ogwejy íxupe. ²⁶Ohasa asy ete va'ekwe. Heta oĩ imongweraharã mo'ã, ha nomongweráiry. Ha ome'ẽmba rei-ma va'ekwe ogwerekwa va'e íxupe kwéry okwera hagwã mo'ã. Ha ndokwerái joty. Opyta hasyve va'ekwe. ²⁷Upéi katu ohendu Hesu rerakwã. Upéa-rehe ojogweroaty aty ramo hikwái, oho hapykwéri, Hesu rapykwéri. ²⁸“Apoko ramo xe ijao-rehe jepe, akwera arã”, he'i ojéupe. ²⁹Upéa-gwi opoko ijao-rehe. Opoko-ma ramo hese, opi-ma íxupe imba'asy. Oikwaa okweramaha imba'asy-gwi hete.

³⁰Ha Hesu katu oikwaa-ma omongweramaha kunha-pe. Upéa-gwi ojere-ma Hesu ijatypa va'e mbyte-py:

—Kiva'e opoko-ma xe ao-rehe, he'i oporandu-vy.

³¹Ha hemimbo'e kwéry he'i íxupe:

—Ema'ẽ katu ijatypa va'e-rehe. Ojejapipa voi nde-rehe ra'e. “Kiva'e opoko xe-rehe” ma'erã ere upéixa, he'i oporandu-vy.

³²Ha Hesu oma'ẽ oĩ-vy ohexa hagwã kiva'e po ojapo upéixa ra'e. ³³Ha kunha katu oikwaa okweramaha. Upéa-gwi ikyhyje-ma. Oryryi-ma ave. Ou ojeity henonde-py. Omombe'upa íxupe anhete va'e.

³⁴—Xe rajy, he'i kunha-pe ipy'agwapy hagwã. Gwajýry-pe he'iha-rami, he'i kunha-pe, —nde erejerovia-ma kuri xe-rehe, upéa-gwi erekwera-ma. Tereho nde py'agwapy reheve. Nande rasyvéi-ma ne mba'asy-gwi, he'i kunha-pe.

³⁵Onhe'ẽ vyteri jave, ou mburuvixa róga-gwi omombe'u:

—Omano ete-ma nde rajy, he'i túvy-pe. —Eheja katu toho mbo'eháry, he'i Jairo-pe omombe'u va'e.

³⁶Ha Hesu katu ohendu omombe'u ramo:

—Aníke erekyhyje. Ejerovia katu xe-rehe, he'i mburuvixa Jairo-pe. ³⁷Ha upéi katu ndohejái omoirũ íxupe avave. Mbohapy hemimbo'e anho mante omoirũ íxupe. Oho indive omoirũ Pedro, Tiago, tyvýry João ave. ³⁸Ogwahẽ-ma mburuvixa róga-py. Ohexa

heta ijavyu joa va'e. Ha ha'e kwéry hasẽmba voi osapukái-vy. ³⁹ Oike Hesu. He'i íxupe kwéry:

—Ma'erã tipo pende ayvu? Ma'erã tipo pene rasẽmba rei pekwa-vy? he'i íxupe kwéry. —Nomano teéiry voi upe mitã kunha. Oke ae maniko oĩ-vy ra'e, he'i íxupe kwéry.

⁴⁰ Ha'e kwéry katu onhembohory Hesu-rehe. Ha ha'e katu omosẽmba imondo-vy. Ogweraha ondive mitã ru, isy oirũ ave. Oike mitã kunha oĩ ha-py. ⁴¹ Oipoppyhy íxupe.

—“Talita cumi” he'i íxupe. Ha'e ae onhe'ẽ-py ohenói omopu'ã hagwã, “Mitã kunha, epu'ã katu” he'i-vy.

⁴² Upe mitã kunha opu'ã-ma ogwata-ma. Mitã kunha katu doze ro'y ogwereco va'e. Upéa-gwi,

—Mba'éixa omoingove jevy íxupe? he'i opondera eterei-vy hese hikwái.

⁴³ Ha Hesu he'i:

—Aníke avave ohendu, he'i jevy jevy íxupe kwéry Hesu. —Emongaru íxupe, mitã kunha-pe, he'i.

6

*He'yi kwéry ndogweroviái Hesu-pe
(Mt 13.53-58; Lc 4.16-30)*

¹ Upe-gwi oho Hesu. Gwetã-my ogwahẽ jevy. Omoirũ íxupe hemimbo'e kwéry. ² Ha pytu'uha áry-py Hesu onhemonhe'ẽ jevy-ma. Ojeporahéi haty-py onhemonhe'ẽ. Heta ohendu va'e inhe'ẽ,

—Mba'éixa onhemonhe'ẽ? he'i opondera-vy hese hikwái: —Mamo-gwi upéa ohendu aipo va'e nhe'ẽ? he'i hese. —Kiva'e omombe'u hi'arandu hagwã íxupe? he'i hese. —Ema'ẽ hese. Hexapyrã-rupi voi Hesu rembiapo porã. Mba'éixa ojapo upéixa? he'i hese. ³ —Upéa óga apohatygwe voi, he'i. —Maria memby voi. Tiago, José, Judas, Simão ave ityvýry kwéry voi. Heindýry kwéry oiko voi nhane ndive. Ma'erã onhembotuvixa ukase? he'i opondera-vy hese.

Upéa-gwi ndija'evéi Hesu-rehe hikwái.

⁴ Upéi he'i íxupe kwéry Hesu:

—Ha onhemonhe'ẽ va'ety onhemboete voi. Ha hetã mygwa katu nomboetevéiry íxupe. He'yi kwéry ave nomboetevéiry íxupe. Hóga pygwa ave nomboetevéiry ave íxupe, he'i ójehe ndajja'evéi-gwi he'yi kwéry.

⁵ Upéa-gwi ndikatúi hembiaapo porã hexapyrã-rupi. Mbovymi hasy va'e-rehe mante omoí opo omongwera hagwã. ⁶ Ha ndogweroviái-gwi hikwái,

—Mba'éixa ndogweroviái? he'i opondera-vy hese kwéry Hesu.

Upéi oho tetãgwasu jerekwe-rupi. Tetã mirĩ mirĩ oĩ ha-rupi oho onhemonhe'ẽ-vy Hesu.

*Hesu remimbo'e kwéry oho onhemonhe'ẽ-vy
(Mt 10.5-15; Lc 9.1-6)*

⁷ Ha upéi katu Hesu ohenói doze gwemimbo'e kwéry-pe ogwahẽ hagwã ha'e-py. Mokõ mokõí meme omboja'o ja'o imondo-vy:

—Xe nhe'ẽ-py emosẽ imondo-vy anháy, he'i íxupe kwéry. ⁸ —Aníke ereraha mba'eve. Nde pykoka anho eraha, he'i. —Ani ereraha ne remi'urã ani ereraha nde vosã. Ani ave ereraha pirapire ne ku'asã gwy-py, he'i íxupe kwéry. ⁹ —Emonde nde pyryru. Ne kamisa katu ani erembojo'a, he'i íxupe kwéry. ¹⁰ —Ereike ramo óga-py epyta upe-py. Ani erembopopa ereiko-vy. Eresẽ peve upe tetã-gwi, eiko petéi óga-py íxupe kwéry. ¹¹ Ha oĩ ramo tetã mygwa pende rerohory e'ỹ va'e, pene nhe'ẽ renduse e'ỹ va'e katu, eresẽ ramo upe tetã-gwi embovava nde py ho'apa hagwã yvy timbore nde py-gwi. Upéixa erejapo ramo, eremomandu'a uka arã hembiaapo vaikwe-rehe. “Nhandejáry re'yi e'ỹ-rami nipo ra'e nhande” he'i va'erã ójehe, he'i íxupe kwéry Hesu. ¹² Aipo-gwi hemimbo'e kwéry oho onhemonhe'ẽ-vy enterove va'e-pe:

—Erova nde rekoha, he'i. ¹³ Omosê imondo-vy heta anháy-pe. Hasy va'e-rehe omona nhandy omongwera hagwã.*

João ojejuka

(Mt 14.1-12; Lc 9.7-9)

¹⁴ Ha Hesu rerakwã opa opa-rupi oho. Upéixa-gwi mburuvixagwasu Herodes ohendu ave Hesu rerakwã.

Kente kwéry omombe'u mbe'u ojóupe Hesu rerakwã. Gwí Hesu rexa-vy, he'i ojóupe:

—João Batista oikove jevy-ma, he'i mo'ã. —Upéa-gwi hexapyrã-rupi hembiaopo porã porã voi, oĩ he'i va'e mo'ã Hesu-rehe.

¹⁵ Hesu rexa-vy he'i ojóupe:

—Upe va'e ko Elias, oĩ he'i va'e mo'ã ave Hesu-rehe.

—Upe va'e ko onhemonhe'ê va'ety yma gwaréixa, oĩ he'i mo'ã va'e ave hese.

Upéixa voi ha'e kwéry hupi e'ỹ omombe'u. Omombe'u jokupe kupe hesegwa nhe'ê.

¹⁶ Upéixa ramo Herodes mburuvixagwasu va'e ohendu Hesu rerakwã. Upe ojapo japo va'ekwe ohendu:

—Upe João xe anhakã'o uka va'ekwe, oikove jevy-ma nipo ra'e, he'i mo'ã hese.

¹⁷⁻¹⁸ Are-ma omenda va'ekwe Herodes. Gwyvýry rembirekokwe-rehe omenda va'ekwe. Gwovajáry Herodias-rehe omenda va'ekwe. Tyvýry héry Filipe. Ha João katu he'i va'ekwe íxupe, Herodes-pe: “Ereiko ramo nde ryvy rembireko ndive, ndatekoháiry erereko” he'i va'ekwe íxupe. Upéa-gwi mburuvixagwasu omondo va'ekwe ipiári oipyhy uka hagwã João-pe. Omoĩ uka va'ekwe íxupe preso. Gwembireko-rehe onhe'ê-gwi, omoĩ uka íxupe preso. ¹⁹ Ha hambireko katu ndija'etí voi João-rehe. Ojuka-ta mo'ã. ²⁰ Ndikatúí ojuka, omboete-gwi íxupe mburuvixagwasu Herodes. Ha mburuvixa katu oheko kwaa voi íxupe. “Hi'arandu va'e João, heko marangatu va'e voi ave” he'i hese. Upéa-gwi omoĩngatu joty íxupe. Ohendu ramo inhe'ê, ojapose vérami mo'ã inhe'ê. Ha ndojaposéi ave. Ndojapói ramo jepe, ogwerohory joty inhe'ê. ²¹ Hi'áry ogwahê ojuka hagwã íxupe. Oiko hagwe áry-py mburuvixagwasu omongaru porã imboviapyre. Mburuvixa kwéry, soldado ruvixa kwéry, imba'e reta va'e kwéry, Galiléia pygwa va'e omongaru porã. ²² Ojekaru ha-py oikove ojeroky hambireko memby kunha. Ombovy'a ojeroky ramo mburuvixagwasu Herodes-pe, imboviapyre ave ombovy'a. Ha upéi he'i kunhataĩ-pe mburuvixagwasu:

—Ejerure xe-vy ne remimbota-rehe. Oime ra'ê va'e voi ame'ê-ta nde-vy, he'i íxupe. ²³ —Oime ra'ê va'e-rehe erejerure ramo, ame'ê-ta nde-vy, he'i íxupe. Pono oapu-gwi —Tupã réry-py ame'ê-ta nde-vy, he'i. —Ha opamba'e xe areko va'e katu amombyte-ta nde-vy ime'ê-vy, he'i jevy jevy íxupe.

²⁴ Upéi osê oho-vy oporandu osy-pe:

—Mbava'e-rehe tipo xe ajerure-ta, he'i omombe'u-vy osy-pe.

Isy he'i íxupe:

—Ejerure katu João Batista akágwe-rehe, he'i íxupe.

²⁵ Ojapura oike hagwã jevy mburuvixagwasu oĩ ha-py. Pya'e oike ojerure-vy:

—Áy aipota eremboyru xe-vy pya'e nha'ê-py João akágwe araha hagwã, he'i ojerure-vy.

²⁶ Ha mburuvixagwasu katu onhe'êgwe omboasy eterei. “Tupã réry-py ame'ê-ta” he'i-gwi, ohendu-gwi ave imboviapyre inhe'ê, ndikatuvéi-ma João-rehe hakate'ỹ. ²⁷ Upe-ma ramo omondo petéi gwembigwái soldado ogweruruka hagwã íxupe inhakágwe. Ha oho onhakã'o João-pe onhemói va'e preso haty-py. ²⁸ Ogweru nha'ê-py inhakágwe ome'ê kunhataĩ-pe. Ha kunhataĩ katu ome'ê osy-pe. ²⁹ Ha João remimbo'ekwe ohendu ramo, ou hetekwe ogweraha. Omoĩ vvykwa-py hetekwe.

Hesu ombopopóy cinco mil va'e-pe cinco mbojape

mokõi pira ave

(Mt 14.13-21; Lc 9.10-17; Jo 6.1-14)

* 6:13 Lc 10.1-12

³⁰Ha hemimondo kwéry katu ou jevy Hesu ha-py. Omombe'u íxupe ojapo japo va'ekwe. Ombo'e mbo'e va'ekwe ou jevy omombe'u. ³¹Ha heta ipohuha ou. Opohupáry-gwi ndikativéi okaru. Upéa-gwi he'i gwemimbo'e kwéry-pe:

—Jaha katu nhane anho ojeiko e'ý ha-py. Japytu'u mixĩ-vy jaha, he'i.

³²Akói ramo oho ha'e kwéry anho ojeiko e'ý ha-py. Kanoagwasu-py oho. ³³Ha heta kente ohexa íxupe iho ramo. Oikwaa-ma ave. Upe ramo enterove tetã-gwi osê oho-vy. Yvy-rupi oripara oho-vy. Ha'e kwéry ranhe ogwahê y rovái. Ha Hesu nogwahêi joty.

³⁴Ogwahê ramo hembey-py, osê kanóa-gwi.

—Heta ojohapypa ra'e onhomboaty, he'i hexa-vy. —Upéa ovexa ijáry e'ý va'e-rami ndoiko kwaíry ha'e kwéry anho, he'i. —Ndaherekwáiry, he'i.

Upéa-gwi oiporiahuvereco-ma íxupe kwéry. Oiporiahuvereco-gwi heta onhemonhe'ê nhe'ê íxupe kwéry.

³⁵Ka'aru ete ou Hesu ha-py hemimbo'e kwéry:

—Ndaipóri mba'eve a-py, he'i. —Ka'aru ete-ma. ³⁶Ere íxupe kwéry toho tetã mirĩ-rupi tetãgwasu-rupi ave ojogwa haggwã gwemi'urã, he'i Hesu-pe.

³⁷Ha Hesu katu he'i gwemimbo'e kwéry-pe:

—Peê katu peme'ê íxupe kwéry hemi'urã, he'i.

—Oroho-ta tipo orojogwa duzentos repy mbojape hemi'urã kwéry orome'ê haggwã íxupe kwéry ho'u haggwã, he'i íxupe oporandu-vy.

³⁸Hesu he'i:

—Mbovy a-py erereko mbojape? Ekwa terehexa, he'i íxupe.

Upe rire oho ohexa. Oikwaa rire, ou omombe'u:

—Cinco mbojape oĩ, he'i. —Mokõi pira ka'ê ave oĩ, he'i Hesu-pe.

³⁹Ha upéi katu he'i ojogweroaty mirĩ mirĩ haggwã ogwapy-vy. Kapi'i pyahu ári ogwapy haggwã, he'i íxupe kwéry. ⁴⁰Ha cem oĩ va'e, cinqüenta oĩ va'e ave ojopyy ppy-py ogwapy.

⁴¹Ha Hesu katu oipyhy upe cinco mbojape. Mokõi pira ave oipyhy. Upéi hovyava yvatekoty omboete-vy temi'urã-rehe. Otima porã ave. Omboja'o ja'o upe mbojape. Ome'ê me'ê gwemimbo'e kwéry-pe ombogwey haggwã entéro va'e rovagwy-py. Omboja'o ja'o ave mokõi pira enterovéa-pe. ⁴²Ha enterovete okaru. Hygwyatãmba-ma ave hikwái. ⁴³Upéi omono'õ ho'u va'ekwe rembyre, pira rembyre ave. Doze ajaka joty ra'e oĩ hembryre kwéry.

⁴⁴Upe okaru va'ekwe heta oĩ ra'e. Kwimba'e kwéry okaru va'e cinco mil oĩ ra'e.

Hesu oho ogwata-vy y ári

(Mt 14.22-33; Jo 6.15-21)

⁴⁵Upe ramo Hesu he'i:

—Eike katu kanoagwasu-py, he'i gwemimbo'e kwéry-pe. —Pekwa mani katu y rovái xe renonde, he'i. —Betsaida-py ekwa mani katu, he'i.

Oho rire, he'i ojogweroaty va'e-pe:

—Tapeho katu pende ro nde róga-rupi, he'i Hesu íxupe kwéry.

⁴⁶Upe rire, “Aha jevy-tama” he'i rire íxupe kwéry, oho yvyaty ári-rupi Hesu. Onhomongeta haggwã Nhandejáry ndive oho.

⁴⁷Ojekwaa-ma pytũ ou-vy. Oĩ kanoagwasu y mbyte-py y ári ave. Ha Hesu katu opyta ha'e anho yvy-py. ⁴⁸Ohexa íxupe kwéry onhemombaraete ramo oipykúí-vy. Ndogwatavéi kanóa henonde-gwi ou ramo yvytu. Hembipe ramo Hesu oho gwemimbo'e kwéry ha-py. Pytũ joty reheve oho íxupe kwéry ogwata-vy y ári. Ohenonde'a-ta mo'ã kanóa-pe.

⁴⁹Ha ha'e kwéry katu ohexa ramo íxupe ogwata y ári,

—Arygwypóry,

he'i mo'ã hese. Osapukái ave. ⁵⁰Enterovéa hemimbo'e kwéry ohexa íxupe. Onhemondýi eterei-ma ave. Upéa-gwi osapukái joa. Upe ramo pya'e he'i íxupe kwéry:

—Anive erejapura teĩ. Xe ko Hesu, he'i voi. —Ani erekyhyje teĩ, he'i.

⁵¹Upéi katu oike-ma kanoagwasu-py hendive kwéry. Ndayvytuvéi-ma.

—Mba'éixa omombyta yvytu? he'i opondera eterei-vy hese.

⁵²Ha Hesu ombopopóy ramo mbojape hexapyrã-rupi, ndoikwaáiry heko-rehe. Nainhakã porã-i-gwi ndoikwaáiry heko-rehe hikwái. Upéa-gwi,

—Mba'éixa omombyta vvytu? he'i opondera eterei-vy hese. ⁵³Upéi katu oho yugwarusu rovái. Genezaré tetã-my ogwahẽ oho-vy hikwái. Isã-py onhapytĩ kanóa. Osẽ kanóa-gwi. ⁵⁴Osẽ jave, pya'e oikwaa Hesu-pe tetã mygwa. ⁵⁵Oripara oho-vy hikwái opa-rupi. Pe tetã kupe-rupi oripara para okwa-vy. Ha hasy va'e-pe katu ogweru Hesu ha-py. Hupa reheve ogweru. Ohendu-ma ramo Hesu oĩ ha-py ogweru-ma.* ⁵⁶Ha Hesu katu ogwahẽ ramo tetãgwasu-py, ogwahẽ ramo tetã nhepyrũ-py, ogwahẽ ramo ave tetã mirĩ-my, óga pa'ũ-rupi ombogwejy meme hasy va'e-pe hikwái. Ojerure íxupe:

—Tande pyhy nde ao rembe'y-rehe jepe hasy va'e, he'i íxupe hikwái oipyhy va'e gwive okwera-ma hagwã.

7

“Ma'erã tipo ndoikói yma gware reko-rupi ne remimbo'e” he'i Hesu-pe oporandu-vy (Mt 15.1-20)

¹Ha fariseu kwéry ojogweroaty Hesu ha-py. Ogwahẽ ave ou-vy judeu kwéry rekombo'ehaty. Jerusalém tetã-gwi ou va'ekwe. ²⁻⁴“Ndajajepohéi porãi ramo ndikatúí jakaru”, he'i va'e fariseu kwéry, opa judeu kwéry gwive ave. Ojepohe pohéi e'y reheve ndokarúí va'e ojapo-gwi hembypy he'i va'ekwe. Ou jevy ramo mba'e jogwa haty-gwi nonhemopotĩry ramo ndokarúí. Ojohéi kopo'i, ojohéi japepo, ojohéi nha'ẽ kwarepoti-gwi ojejapopyre. Hupa ojohéi ave. Heta mba'e ojapo hembypy he'i va'ekwe ohendu-gwi. Ha gwi fariseu kwéry, judeu rekombo'ehaty ave ohexa Hesu remimbo'e kwéry-pe okaru ramo ojepohéi e'y reheve. Upéa he'ise: Ojepohe pohéi rei e'y reheve okaru. ⁵Upéa-gwi oporandu Hesu-pe hikwái:

—Ma'erã tipo ndoikói yma gware reko-rupi ne remimbo'e kwéry? Ma'erã okaru ojepohéi porã e'y reheve? he'i. —Ma'erã tipo nonhemopotĩsevériy nhande kwéry e'y va'e ndive oiko rire? he'i íxupe.

⁶Ha Hesu he'i íxupe kwéry:

—Peẽ katu pende py'a ky'a pemo'ã kwaa va'e. Ha Isaías amyri anheilha-rupi omombe'u va'ekwe pende rekorã. Omoĩ va'ekwe kwatia-rehe a-rami:

“Ha'e kwéry xe mboete onhe'ẽ-py rei. Opy'apy-py katu naxe mboetériy. Ndojehesa rerovái xe-rehe.

⁷Xe momba'egwasu teĩ. Xe nhe'ẽ-py nombo'ériy. Ha teko rei nhe'ẽ-py ae oporombo'e mbo'e oiko-vy”*,

he'i Nhandejáry kwatia nhe'ẽ pende-rehe. ⁸Ha Nhandejáry he'i ramo, nderejaposéi voi inhe'ẽ. Ha teko rei katu omanda ramo, he'i va'e gwive erejapo japo voi, he'i íxupe kwéry Hesu. ⁹—Nderejaposéi voi Nhandejáry he'i va'ekwe jajapo hagwã nhane rembypy he'i va'ekwe. Upéixa ramo, “Ore rembiapo porã” ere mo'ã ndéjehe.

¹⁰Ha Moisés amyri he'i va'ekwe:

“Pemboete nde ru, nde sy-pe ave. Ha entéro onhe'ẽ vai rei va'e gwu-rehe, osy-rehe ave, tojejuka katu”*,

he'i Nhandejáry kwatia nhe'ẽ. ¹¹Ha peẽ katu pepyrũ Nhandejáry nhe'ẽ-rehe. Ndapehe-jáiry gwu osy-pe ome'ẽ hagwã. Pembo'e mbo'e rei judeu kwéry-pe a-rami. Peje, “Ava he'i ramo gwu osy-pe ave, Voive ereporandu ramo ame'ẽ arã nde-vy ra'e. Áy katu ndikatuvéi-ma ame'ẽ nde-vy. Xe mba'e kwéry opa-ma. Ame'ẽmba-ma kuri Tupã Nhandejáry-pe. Aiporu jepe xe, Tupã mba'epa-ma, he'i gwu osy-pe ave.” ¹²Upéixa he'i ramo, iporã joty peẽ-my. Upéixa ndapehejái oipytygwõ gwu osy-pe ave. Ne nhe'ẽ-py gwu osy-pe ave nomboetevéi. ¹³Ne rembypy reko-rupi joty peiko. Upéa-gwi pepyrũ joty Nhandejáry nhe'ẽ-rehe, pembojke joty Nhandejáry nhe'ẽ peiko-vy. Heta gwia-rami erejapo japo ave, he'i íxupe kwéry Hesu.

* 6:55 Mt 14.34-36 * 7:7 Is 29.13 * 7:10 Êx 20.12; 21.17

¹⁴ Upe rire ohenói jevy oha-py kente kwéry ou hagwã he'i:

—Pejeapysaka joa xe nhe'ê-rehe peikwaa porã hagwã, he'i arandu rehegwa nhe'ê omombe'u-vy. ¹⁵ —Jakaru jave ndikatúi nhane mongy'a. Ndoikói tembi'u nhande py'a omongy'a va'erã. Ha nhane nhe'ê vai ramo ae katu onhemongy'a arã nhande py'a. ¹⁶ Pene arandu-ta ramo, pejeapysaka katu ko xe nhe'ê-rehe, he'i íxupe kwéry Hesu.

¹⁷ Upéi oheja íxupe kwéry Hesu. Oho oike koty-py. Oike rire, oporandu íxupe hemimbo'e kwéry. He'i:

—Tembi'u rehegwa nhe'ê ereiporu kuri. Ha upéa, mbava'e-rehe tipo aipo va'e he'ise, he'i oporandu-vy íxupe hemimbo'e kwéry.

¹⁸ Ha Hesu he'i íxupe kwéry:

—Peê katu kente kwéry-rami ave ndapeikwaa porã joty. Ma'erã tipo ndapeikwaa porã? Pekaru ramo, ndikatúi penhembohete ky'a. Ndaipóri tembi'u pene mbopy'a ky'a va'e. ¹⁹ Tembi'u katu pende py'a-rehe ndohói. Pende ryekwe-py ae oho. Upéi osêmba jevy. Upéa-gwi napene mongy'áiry, he'i íxupe kwéry Hesu. —Upéixa jaikwaa entéro tembi'u ipotái voi, he'i.

²⁰ Upéa-rehe he'i jevy íxupe kwéry Hesu:

—Ha pene nhe'ê vai ramo katu, onhemongy'a arã pende py'a, he'i. ²¹ —Pende py'apy-py katu penhemongeta peiko-vy pene rembiapo vairã-rehe. Upéa-gwi pende py'a vai. Pende py'a vai-gwi pejogwereco rei. Pende py'a vai-gwi pemonda rei peiko-vy, peporojuka ave. Pende py'a ky'a-gwi onhoembireko ndive, onhome ndive ave peiko. ²² Pende py'a vai-gwi peipota rei pende rapixa mba'e, ha pene rembiapo vai, ha peporombotavy, ha pene akã vai, napende a'éi pende rapixa-rehe, penhe'ê rei rei pende rapixa-rehe, ha penhembotuvixaseve mo'ã ave peiko-vy, ha napene nhe'ê rendúí ave. ²³ Ha opaixagwa pejapo pende py'a vai-gwi. Upéixa ramo pende py'a vai-gwi penhemongy'a-ma, he'i íxupe kwéry Hesu.

*“Ne memby-gwi opoi-ma anháy” he'i Hesu
(Mt 15.21-28)*

²⁴ Upéi opu'ã oho-vy Hesu. Upe-gwi oho ogweroajere Tiro tetã jerekwe-rupi. Sidom tetã jerekwe-rupi oho ave. Oike koty-py opyta hagwã. Ndoipotái mo'ã onhemombe'u. Ha ndikatúi onhemi. ²⁵ Ha peteí kunha pya'e ohendu herakwã. Ou ojeity Hesu rovagwy-py. Ha imemy kunha mixí va'e anháy rerekoha voi. ²⁶ Ha kunha katu onhe'ê outro nhe'ê-py. Grego nhe'ê-py onhe'ê. He'yí Sirofenícia pygwa. Ojerure Hesu-pe:

—Emosê katu imondo-vy xe memby-gwi anháy, he'i íxupe.

²⁷ —Nde ko ndaha'éí xe re'yí. Xe re'yí kwéry aipytygwõ ranhe-ta. Ha upe rire katu xe re'yí e'y-pe aipytygwõ-ta ave, he'i. —Mitãgwe-pe katu nhamongaru ranhe. Nanhambóí jagwa-pe mitã remi'urã, he'i joty Hesu itantea-vy, ojeheko rerovia uka etese-vy kunha-pe.

²⁸ Ha kunha katu he'i íxupe:

—Akói-ramima ngatu, xe Járy, he'i kunha Hesu-pe. —Ha tembi'u sururukwe ijáry apyka gwy-py ho'u joty jagwa, he'i Hesu-rehe ojerovia joty-vy.

²⁹ —Ere porã-ma, he'i. —Ekwa jevy katu. Ne memby-gwi opoi-ma anháy, he'i kunha-pe Hesu.

³⁰ Ha upéi oho gwóga-py. Ohexa omemby hupa-py. Onheno oí-vy ramo ohexa. Ha anháy osê-ma ra'e íxugwi oho-vy.

Ogweru Hesu-pe ndajapysa porã va'e

³¹ Ha upéi katu ojevy Hesu Tiro tetã jerekwe-gwi. Sidom-rupi ohasa oho-vy. Ohasa oho-vy ave Decápolis tetã-rupi. Galiléia yugwarusu-py oho. ³² Ha upe pygwa ogweru Hesu-pe ndajapysa porã va'e. Ha'e inhe'êngopa va'e ave. Inhapekũ ratã va'e-rami oiko. Ojerure íxupe omoí hagwã hi'ári opo. ³³ Ha Hesu ogwenohê íxupe. Ojogweroaty ha-gwi ogweraha íxupe ha'e anho. Ijapysaka-py okwã omopo'ê. Upéi ondyvu okwã-rehe Hesu. Upe rire omoí inhapekũ apy-rehe. ³⁴ Upe rire hovayva yvate-koty. Onhe'ê va'erã-rami ipytuhê hatã:

—Efatã, he'i ha'e ae onhe'ê-py.

Upe va'e he'ise: "Tojepe'a nde apysa mbotyha". ³⁵ Ha upéi katu ikwa-ma ijapysa. Nainhapekú ratávériy ave. Nainhe'ëngopavéi-ma ave. Onhe'ë porã-ma.

³⁶Upéi Hesu he'i íxupe kwéry omombe'u e'ý haggwã avave-pe:

—Ani xe mombe'u teĩ, he'i jevy jevy mo'ã íxupe kwéry. He'iri iri íxupe Hesu ramo, ha'e kwéry katu omombe'uve uve joty. Ndogwereco nhemíry Hesu ombogwera hagwe. Nogwenotíry Hesu-pe. ³⁷Ha henduháry gwive he'i:

—Hembiapo porã e'ý va'e ndoikóiry. Hembiapo porã porã meme ae katu Hesu. Ijapysa e'ý va'e omboapysa jevy va'e. Ha nonhe'ëi va'e omonhe'ë porã jevy va'e Hesu, he'i ojóupe hikwái opondera eterei-vy hese.

8

Hesu ombopopóy irundy mil va'e-pe sete mbojape
(Mt 15.32-39)

¹Upe ramo heta ojogweroaty jevy ramo, ndogwerekói ramo gwemi'urã, ohenói Hesu gwemimbo'e kwéry-pe ou jevy haggwã íxupe:

²—Peju katu xe ha-py, he'i. —Ojogweroaty va'e iporiahu va'e xe-vy. Mbohapy áry xe mokambara okwa-vy. Ndogwerekói ave gwemi'urã. Upéa-gwi aiporiahuvereco íxupe kwéry. ³Oĩ mombiry-gwi ou va'ekwe. Amondo ramo íxupe kwéry hóga-py ivare'a ramo, naipyatávéi arã tape-rupi, he'i íxupe kwéry Hesu.

⁴Upe ramo hemimbo'e kwéry he'i íxupe:

—Mba'éixa tamo ra'e nhahembi'u me'ë ko'a rupigwa kente kwéry-pe? A-rupi ndaipóri kente tembi'u me'ëharã, he'i íxupe hikwái.

⁵—Mbovy tipo erereko mbojape, he'i oporandu-vy gwemimbo'e-pe:

—Sete voi areko, he'i íxupe.

⁶Ha Hesu katu he'i ojogweroaty va'e-pe ogwapy haggwã vvy-py:

—Pegwapy katu, he'i íxupe kwéry.

Upe rire oipyhy upe sete mbojape. Otima Nhandejáry-pe. Otima rire ombopopóy ome'ë gwemimbo'e kwéry-pe. Ojogweroaty va'e rovagwy-rupi omoĩ haggwã ome'ë. ⁷Ha pira'i ka'ë ndogwereco hetái hikwái. Ha Hesu omboete ranhe Nhandejáry-pe pira ho'u va'erã-rehe. Upe rire omoĩ uka ave hovagwy-rupi. ⁸Upe rire ho'u-ma omohygwyatãmba porã ave íxupe kwéry. Upéi omboaty hembyre opyta va'e omboyru sete ajakagwasu. ⁹Ha heta eterei okaru va'e. Irundy mil para'e okaru va'e.

Ha upéi he'i:

—Tapeho katu pende ro nde róga-rupi, he'i íxupe kwéry Hesu.

¹⁰Upe ramo pya'e oike kanoagwasu-py gwemimbo'e kwéry ndive oho haggwã. Dal-manuta jerekwe-py oho.

"Ejapo katu ore-vy hexapyrã-rupi" he'i Hesu-pe
(Mt 12.38-42; 16.1-12)

¹¹Ha fariseu kwéry ou Hesu oĩ ha-py onhonhe'ë mbojevvy jevy haggwã:

—Ejapo katu ore-vy hexapyrã-rupi. Nhandejáry rembiapo porã ramigwa ejapo katu ore mbojerovia uka porã-vy, he'i Hesu-pe. Ombovyte íxupe ombojevvyse-vy.

¹²Ha Hesu ndojohu porã-gwi, opy'apy-py onhe'ë va'erã-rami ipytuhê hatã:

—Ma'erã äygwa ohexase hexapyrã-rupi xe rembiapo ramo. Anhete ko xe ha'e-ta peẽmy. Äygwa-pe katu naxe rembiapo mo'ãi hexapyrã-rupi, he'i íxupe kwéry Hesu.

¹³Upéi oheja oho-vy íxupe kwéry. Oike jevy ramo kanoagwasu-py oho yugwarusu rovái.

¹⁴Ha hemimbo'e naimandu'avéi-gwi ndogwerahái mbojape. Peteĩmi ogweraha hendive. Peteĩ anho mbojape oĩ kanóa-py. ¹⁵He'i Hesu gwemimbo'e kwéry-pe:

—Ivai voi mbojape mbovuha fariseu kwéry, Herodes irũ kwéry rembiporu, he'i íxupe kwéry Hesu omombe'u-vy, pono judeu ruvixa ohekombo'e vai íxupe kwéry.

¹⁶Ha mbava'e-rehe po he'ise upéa ndoikwaái voi. Upéa-gwi onhomongeta okwa-vy:

—Ma'erã po omombe'u upéixa Hesu. Nanhane mbojapéi-gwi omombe'u upéixa, he'i mo'ã ojóupe.

¹⁷ Ha Hesu katu oikwaa onhomongeta ramo. Upéa-gwi he'i gwemimbo'e kwéry-pe:

—Ma'erã pemombe'u mbojape pereko e'ÿha? Ma'erã, “Nanhane mbojapevéi” peje pemombe'u-vy? he'i. —Ma'erã tipo ndapehexa kwaavéi-ma xe-rehe? he'i. —Ma'erã tipo ndapeikwaavéi-ma xe reko? Napene akã porã vyteri, he'i. ¹⁸ —Oĩ pende resa. Ma'erã tipo ndapehexavéi-ma? Oĩ pende apysa. Ma'erã tipo napehenduvéi-ma? Ma'erã tipo napene mandu'avéi-ma? ¹⁹ Xe ambopopóy kuri heta eta va'e-pe, cinco mil va'e-pe upe cinco mbojape. Ambopopóy rire, mbovy ajakagwasu-py eremboyru hembyrekwe? he'i íxupe kwéry oporandu-vy.

—Doze ajaka, he'i íxupe hikwái.

²⁰ —Aje'i-ma ambopopóy ave kuri upe sete mbojape ame'ẽ hagwã irundy mil va'e-pe. Ambopopóy rire, mbovy ajaka-py eremboyru hembyrekwe? he'i íxupe kwéry oporandu-vy.

—Sete ajaka, he'i íxupe.

²¹ —Ndereikwaái joty? Ma'erã ndereikwaái? he'i gwemimbo'e kwéry-pe Hesu.

Hesu ombogwera hesa e'ÿ va'e-pe

²² Ha upéi katu ogwahẽmba-ma Hesu gwemimbo'e kwéry ndive. Betsaida tetã-my ogwahẽ.

Ha ojereru Hesu ha-py hesa e'ÿ va'e-pe. Ojerure íxupe opoko hagwã hese. ²³ Ha Hesu katu oipopyhy ogweraha hesa e'ÿ va'e. Tetã avyte-gwi ogweraha. Onygwõ rire hesa-py, omoĩ hi'ári opo:

—Erehexa-ma tipo? he'i íxupe oporandu-vy.

²⁴ —Ahexa-ma katu tekove-pe. Havẽ havẽ rei ahexa-vy, he'i. —Yvyra vyra-rami rei ahexa íxupe. Ogwata oĩ-vy ramo ahexa íxupe, he'i íxupe hovayva-vy hesa havẽ-gwi.

²⁵ Upéi omoĩ jevy Hesu hesa ári opo. Ha upéi ohexa katu oĩ-vy. Hesapyso jevy-ma. Ndahesa tatañvéiry. Ohexa porãmba-ma.

²⁶ —Tereho nde róga-py, he'i. —Ani ereike jevy te'ÿi avyte-py, he'i íxupe Hesu.

“Nde Cristo voi” he'i Pedro

(Mt 16.13-28; Lc 9.18-27)

²⁷ Ohasa jevy oho Hesu gwemimbo'e kwéry ndive. Cesaréia de Filipe jerekwe rupigwa tetã mirĩ mirĩ-rupi oho. Oho jave oporandu gwemimbo'e kwéry-pe:

—Mbava'e he'i ra'e xe-rehe? he'i íxupe kwéry.

²⁸ Ha'e kwéry he'i:

—Nane mombe'u porãiry. Ne mombe'u joavy avy. Oĩ, “João Batista onhemoingove jevy va'ekwe ra'e” he'i va'e mo'ã nde-rehe. Oĩ, “Elías onhemoingove jevy va'ekwe ra'e” he'i va'e mo'ã ave nde-rehe. Oĩ, “Nhandejáry nhe'ẽ-py omombe'u va'ety onhemoingove jevy va'ekwe Hesu” he'i va'e mo'ã nde-rehe, he'i íxupe hikwái.

²⁹ Upéi Hesu he'i:

—Mbava'e ere xe-rehe? he'i íxupe kwéry oporandu-vy.

—Nde Cristo voi, Nhandejáry rembiporavokwe. Enterove remiha'arõ voi ko nde, he'i íxupe Pedro.

³⁰ —Xáke ne nhe'ẽ ohendupa va'erã, he'i. —Ani xe mombe'u mbe'u teĩ avave-pe, he'i íxupe kwéry.

³¹ Upe rire omombe'u-ma íxupe kwéry Hesu ojéupe ojehu-ta va'e:

—Xe Nhande Ryke'y tee va'e voi, he'i. —Xe áry oma'emboypy hagwe-py heta-ma xe ahasa asy-ta. Xe mbojey-ta, xe juka uka-ta ave judeu ruvixa kwéry, pa'i ruvixa kwéry, judeu rekombo'ehaty kwéry ave. Mbohapy áry rire katu aikove jevy-ma va'erã, he'i.

³² Ohendupa hagwã-rami upéa he'i íxupe kwéry.

Ha Pedro katu ogwenohẽ-ma Hesu-pe ha'e anho hakate'y-gwi.

—Aníke erenhe'ẽ teĩ upéixa, he'i inhe'ẽ joko-vy íxugwi.

³³ Ha Hesu katu ojere ohexa gwemimbo'e kwéry.

—Ani xe nhe'ê joko teĩ, he'i Pedro-pe. —Ejei xe ypy-gwi, he'i Satanás-py ohenói-vy íxupe. —Neremombe'úi voi Nhandejáry nhe'ê. Anháy ruvixa nhe'ê-py ae eremombe'u voi, he'i Pedro-pe.

“Taxe moirũ katu okurusugwasu ohupi heraha-vy va'e-rami peiko-vy” he'i Hesu

(Mt 16.24-28; Lc 9.23-27)

³⁴Upéi ohenói Hesu ou hagwã oha-py ojogweroaty va'e-pe. Gwemimbo'e kwéry-pe ave ohenói:

—Peẽ xe moirũse ramo, anive pejapo rei teĩ pejapose va'e anho mante. Anive pepena teĩ pende rekove-rehe. Xe moirũ ae katu peẽ. Okurusugwasu ohupi heraha-vy va'e-rami ijukapyrã-rami ae katu peiko, he'i íxupe kwéry. ³⁵—Ha gwekove-rehe hakate'ỹ va'e katu, ndoikove mo'ái Nhandejáry ndive. Ha xe-rehe ha-py gwekove-rehe nopenái va'e, Nhandejáry rehegwa nhe'ê porã-rehe ha-py gwekove-rehe nopenái va'e ave, oikove meme va'erã Nhandejáry ndive, he'i.* ³⁶—Nde para'e ko yvy apy gwive járy ramo ereiko va'erã. Ha Nhandejáry ndive ereiko e'ỹ ramo katu mba'evete ndererekói va'erã. Opa ete-ma va'erã. Oipe'apa va'erã ndéhegwi. ³⁷Nhandejáry ndive ereiko e'ỹ ramo, nande reko repyvúi-ma va'erã. Eremano rei va'erã. Ndererekói ereme'ê va'erã Nhandejáry-pe erejhepy hagwã. Eremano joty va'erã, he'i. ³⁸—Ha ãygwa katu Nhandejáry-pe nombotéi va'e, hekoha vai va'e ave. Upéa-rupi, “Ndaikwaái íxupe” peje ramo xe-rehe, xe nhe'ê napendúséi ramo ave, xe, Nhande Ryke'y tee va'e, napena pena mo'ái ave pende-rehe. Xe amano rire aju jevy ramo xe Ru rendy-rupi, hembigwái marangatu reheve, napena pena mo'ái pende-rehe agwahẽ ramo, he'i íxupe kwéry Hesu.

9

¹Ha Hesu katu he'i ondive oĩ va'e-pe:

—Anhete ko xe ha'e-ta peẽ-my, he'i. —Pene pa'ũ-my oĩ ohexa va'erã Nhandejáry gwuvixarã-pe. Ombaraete reheve oiko ramo, ohexa va'erã. Ohexa e'ỹ reheve nomano mo'ái. Ohexa rire mate, omano va'erã, he'i íxupe kwéry Hesu.

Ojehete rekoviarõ Hesu

(Mt 17.1-13; Lc 9.28-36)

²Seis áry rire, mbohapy ogweraha gwupive Hesu. Pedro, Tiago, João-pe ogweraha. Ogwerojeupi heraha-vy vyvatyrysu-rehe ha'e kwéry anho. Upe-py ha'e kwéry hovagwyrupi ojehete rekoviarõ-ma Hesu. ³Overapa ijao hendy-vy. Hesakã ete ipotĩ-gwi. Imorotĩ ete ijao. Upéixa omomorotĩ rei ijohéi hagwã, ndikatúí ko yvy-rehe oiko va'e. ⁴Ha upéi mokõi ojekwaa íxupe kwéry. Moisés ndive ojekwaa Elias. Onhomongeta oĩ-vy Hesu ndive.

⁵Ha Pedro katu he'i Hesu-pe:

—Iporã nhande nhaime a-py, mbo'eháry, he'i Pedro íxupe, —Torojapo mbohapy tapýi, peteĩ nde-vy gwarã, peteĩ Moisés pegwarã, peteĩ Elias pegwarã ave, he'i íxupe.

⁶Upéixa he'i ndoikwaái-gwi onhe'êrã, ikyhyje eterei-gwi hikwái.

⁷Upe rire omo'ã-y-ma íxupe kwéry arai. Ohendu-ma arai-gwi onhe'ê va'e íxupe kwéry:

—Upe va'e xe ra'y, he'i. —Xe rembihayhu va'e voi, he'i. —Ejeapysaka katu inhe'ê-rehe, he'i íxupe onhe'ê va'e.

⁸Onhe'êmba rire-ma pya'e osareko reko oĩ-vy hemimbo'e. Avave ndohexavéi-ma. Hesu-pe anho mante ohexa gwupive oho ramo.

⁹Ogwejy jevy vyvaty ári-gwi. Ogwejy gwejy ou ramo he'i íxupe kwéry Hesu:

—Ani eremombe'u avave-pe erehexa va'ekwe, he'i íxupe kwéry. —Xe Nhande Ryke'y tee va'e, aikove jevy rire ae, emombe'u katu, he'i íxupe.

¹⁰Upéa-gwi avave-pe nomombe'úi hembixakwe. He'i ojúupe:

—“Xe aikove jevy-ta” he'i ramo Hesu, mbava'e-pe po he'i Hesu? he'i oporandu randu-vy ojóupe hikwái.

¹¹Ha upéi katu oporandu íxupe hikwái:

—Ma'erã, “Tou ranhe Elias” he'i judeu rekombo'ehaty, he'i íxupe.

* 8:35 Mt 10.38-39; Lc 14.27; Jo 12.25-26

¹²—Ou ranhe voi Elias omoatyrōmba hagwā. Omoatyrōmba ramo jepe, omoī joty va'ekwe kwatia-rehe xe mbohasa asy va'e rehegwa nhe'ē. “Nhande Ryke'y tee va'e-pe ombohasa asy va'erā, ombojevvy ave va'erā íxupe” he'i joty xe-rehe omoī-vy kwatia-rehe. Peikwaa tipo upe va'e nhe'ē? he'i. ¹³—Ha Elias katu ou ra'e. Ou voi kuri, ha'e-ta nde-vy. Ojapose va'e ojapo hese. Yma he'i hagwe-rami, āy ojapo-ma hese, he'i íxupe kwéry Hesu.

Hesu omosē imondo-vy kunumi-gwi anháy
(Mt 17.14-21; Lc 9.37-43a)

¹⁴Ha upéi katu Hesu ogwahē jevvy ou-vy gwemimbo'e kwéry renda-py. Ogwahē jevvy ramo ohexa heta reheve ojogweroaty aty ramo hikwái. Heta oī kente kwéry ijerekwe-rehe. Imbyte-py oī Hesu remimbo'e kwéry. Hendive onhomongeta hatā hatā oiko-vy judeu rekombó'ehaty. ¹⁵Upe ramo, osareko-ma Hesu-rehe hikwái. Hesu rexa-vy, “Mba'éixa ogwahē?” he'i opondera eterei-vy hese hikwái. Ndouitaha-gwi, ogwahē ou-vy. Ohexa ramo íxupe, oriparapa oje'ói-vy Hesu renda-py ohogwaití hagwā íxupe. Ogwerohory-ma íxupe.

¹⁶—Mbava'e-rehe tipo penhomongeta hatā hatā ra'e peiko-vy? he'i íxupe kwéry Hesu.

¹⁷Ha ojogweroaty va'e avyite-gwi peteí va'e omombe'u:

—Xe ra'y-rehe katu ojeputa kuri anháy. Xe ra'y nonhe'ēve ēvėi-ma oī-vy anháy ojeputa-gwi hese, he'i. ¹⁸—Aru mo'ā kuri nde ha-py erembogwera hagwā, xe Jary. Ha ndorotopái, he'i. —Ha ogwahē ha-py íxupe anháy, oity íxupe imondo-vy. Ijuruyjúi, onhemohāingryú, onhembohete hatā ave. Ajerure mo'ā ne remimbo'e kwéry-pe omosē hagwā imondo-vy íxugwí anháy. Ha ndikatúy omosē, he'i Hesu-pe.

¹⁹Upéi he'i Hesu íxupe:

—Aýgwa katu ndojeroviái vyteri xe-rehe. Ndapyta are mo'ái ne ndive. Ndoroiopkwaa are mo'ávėi-ma. Eru katu íxupe xe ha-py, he'i íxupe kwéry Hesu.

²⁰Ogweru íxupe kunumi hikwái. Ha anháy katu ohexa ramo Hesu-pe, ombohetyryí-ma mitā kunumi-pe. Ho'a oho-vy yvy-py. Ijapajeréi oiko-vy yvy-rehe ijuruyjúi ramo.

²¹Upéi oporandu túvy-pe Hesu:

—Are-ma voi tipo araka'e ojeputa hese anháy? he'i íxupe.

—Imitā gwive āy peve ojeputa joty hese, he'i. ²²—Oity meme voi tata-py. Ojuka hagwā mo'ā y-py ave oity íxupe. Ha nde pu'aka ramo, erejapose va'e erejapo-ta hese, he'i. —Ore poriahuvereko katu ore pytygwō hagwā, he'i Hesu-pe.

²³—Ma'erā tipo, “Nde pu'aka ramo” ere xe-vy? Ererovia tee ramo, opamba'e-rehe ipu'aka-ta Nhandejáry ojapo-vy nde-vy, he'i íxupe Hesu.

²⁴Upe ramo hatā onhe'ē mitā ru:

—Xe arovia-ma. Ha arovia e'y ramo, xe pytygwō xe arovia porāve hagwā, he'i.

²⁵Ha Hesu katu ohexa kente kwéry oripara joa ogwa'ē-vy. Ohexa ramo oja'o-ma anháy-pe:

—Erejepota-gwi kunumi-rehe, nonhe'ēvėi, nohenduvėi. Ha'e-ta nde-vy, Epoi íxugwi. Anive ereju erejepota hese, he'i íxupe Hesu.

²⁶Ha anháy katu osapukái rire, ombohetyryí eterei rire íxupe, opoi íxugwí anháy oho-vy. Te'ogwe-rami voi itúy yvy-rupi upe kunumi. Upéa-gwí,

—Omano-ma ra'e, heta he'i mo'ā va'e kunumi-rehe.

²⁷Ha Hesu katu oipyhy íxupe ipo-rehe omopu'ā hagwā. Ha opu'ā-ma kunumi.

²⁸Oike rire koty-py, oporandu Hesu-pe hemimbo'e kwéry ha'e kwéry anho:

—Ma'erā tipo ore ae ndikatúiry oromosē imondo-vy anháy-pe, he'i Hesu-pe.

²⁹—Koixagwa ndikatúy eremosē imondo-vy neremondói ramo Nhandejáry-pe ne nhe'ē, he'i. —Ha eremondo ramo ne nhe'ē íxupe, erehasa ramo erekaru e'y reheve ave katu, eremosē-ta imondo-vy, he'i íxupe kwéry Hesu.

Hesu omombe'u mbe'u gwemimbo'e kwéry-pe
(Mt 17.22-23; Lc 9.43b-45)

³⁰⁻³¹ Upe-gwi Hesu ohasa jevy oho-vy. Galiléia-rupi ohasa hasa oho-vy. Ohasa ramo, oiko va'erā omombe'u mbe'u oiko-vy gwemimbo'e kwéry-pe. Upéa-gwi ndoipotái Hesu oikwaa hapykwere entéro va'e:

—Xe Nhande Ryke'y tee va'e voi. Xe mombe'u-ta voi xe pyhyharā-pe. Teko rei po-py voi xe me'ē-ta. Gwí xe jukase va'e xe pyhy-ta voi xe reraha-vy, he'i. —Xe juka va'erā hikwái. Ha xe juka rire, mbohapy áry rire, aikove jevy-ma va'erā, he'i íxupe kwéry Hesu.

³² Hesu omombe'u porā ramo jepe, ndoikwaái joty inhe'ē.

—Mbava'e-rehe po he'i nhande-vy, he'i rei hikwái ojóupe. Ikyhyje-gwi, noporanduvéi íxupe.

³³ Upéi ogwahēmba-ma Cafarnaum tetā-my. Oime ramo koty-py, oporandu íxupe kwéry Hesu:

—Mbava'e-rehe tipo penhomongeta ra'e pejukwe-vy tape-rehe? he'i íxupe kwéry.

³⁴ Ha'e kwéry katu okiririmba ete Hesu-gwi. Ndoikwaái onhe'ērā hikwái. “Nhande kwaa-ma” he'i ojóupe hikwái. He'i ra'e hikwái tape-rehe ou-vy: “Kiva'e tipo onhembotuixave va'erā nhane pa'ū-gwi” he'i ojóupe. Upéa-gwi okiririmba ete íxugwi hikwái. Ndoikwaavéiry rei onhe'ērā hikwái.

³⁵ Ha Hesu katu ogwapy oikwaa uka íxupe kwéry:

—Peju katu a-py, he'i doze oī va'e kwéry-pe. —Erenhemboete ukaseve tipo? he'i. —Aipo ramo, enhembohokomirive katu, he'i íxupe kwéry. —Enterove va'e rembigwái ramo oiko va'e ramo eiko, he'i íxupe kwéry Hesu.

³⁶ Upéi oipyhy mitā ijavyte-py omoī. Upéi oikwavā íxupe, ohupi ojyva ári omoī-vy:

³⁷ —Eremogwahē ramo koixagwa mitā xe réry-py, xe-vy xe mogwahēha-rami, eremogwahē va'erā. Xe mogwahē ramo katu, eremogwahēha-rami ave xe mbouhare-pe, xe mogwahē va'erā, he'i íxupe kwéry Hesu.*

³⁸ Ha João katu he'i íxupe:

—Orohexa-ma kuri omosē ramo anháy-pe. Omosē imondo-vy nde réry-py rei. Ha nanhane mokambarái-gwi, “Ani eremosē teĩ Hesu réry-py rei” oro'e kuri íxupe, mbo'eháry, he'i João íxupe.

³⁹ Ha Hesu katu he'i:

—Ani erejoko teĩ íxupe. Xe réry-py hexapyrā-rupi ojapo va'e ndikatúí onhe'ē vai vai xe-rehe. Hemiapo porā rire ndaikatúiry arā onhe'ē rei rei xe-rehe, he'i. ⁴⁰ —Ha nhane rembiapo ojoko e'ý va'e katu, nhane pytygwō va'e. ⁴¹ Anhete voi ko xe ha'e-ta ndevy. Ha ne mboy'u va'e katu erejerovia-gwi xe-rehe, ombohokovia va'erā voi katu íxupe Nhandejáry, he'i.*

⁴² —Pejeapysaka katu xe nhe'ē-rehe. Ko mitā-rami oiko va'e, heko'ive va'e, xe-rehe ojerovia va'e ave, oī ohesa rerova uka va'erā xéhegwi ombojejavý uka hagwā. Hekoha vai eterei upe oporombojejavý uka va'e. Iporā arā ra'e jajuka hagwā ombo'e vai e'ý ngatu. Iporāve arā ra'e nhandehapytí hagwā ijaju'y-rehe itagwasu hese nhamoī-vy ipohyive hagwā, he'i. —Iporāve arā ra'e nhamombo ygwasu-py ombo'e vai e'ý ngatu. Iporāve voi ko ra'e omano ranhe ra'e ombo'e vai e'ý ngatu pono xe-rehe ojeroviase va'e-pe ombo'e vaipa rei, he'i.

⁴³ —Xáke, penhangareko katu pendéjehe. Nde po-gwi para'e erejevavy ramo, enhepokytí katu eremombo-vy nde po. Peteĩ nde po e'ý va'e rekoha-rami eiko. Iporāve nde posogwe reheve eregwahē hagwā ereho-vy Nhandejáry nhande ruvixa ha-py. Ha ne mombo ramo tata opa opa rei e'ý va'e-py katu mokóí nde po reheve, ivai arā nde-vy. Nde poriahu ete va'erā, he'i. ⁴⁴ —Upe-py ndopái tata. Nomanói te'ógwe'uha.* ⁴⁵ Ha nde py-gwi para'e erejevavy ramo, enhepokytí katu eremombo-vy nde py. Peteĩ nde py e'ý va'e rekoha-rami, eiko. Iporāve nde pysogwe reheve eremoirū hagwā Nhandejáry ne ruvixarā-pe. Ha ne mombo ramo tata opa opa rei e'ý va'e-py katu mokóí nde py reheve, ivai arā nde-vy. Nde poriahu ete va'erā. ⁴⁶ Upe-py nomanói te'ógwe'uha. Ndogwái tata. ⁴⁷ Ha nde resa ne mbojevavy ukase ramo, enohē katu nde resakwe emombo ndejéhegwi. Peteĩ

* 9:37 Mt 18.1-5; Lc 9.46-48 * 9:41 Lc 9.49-50 * 9:44 Is 66.24

gwesa ogwenohê va'ekwe-rami eiko. Iporãve peteĩ nde resa reheve eregwahê ereho-vy Nhandejáry nhande ruvixa oiko haty-py. Ne mombo ramo tata opa opa rei e'ỹ va'e-py mokõi nde resa reheve, ivaive arã nde-vy. ⁴⁸ Upe-py nomanói voi te'õgwe'uha. Ndopái tata. ⁴⁹ Enterovéa tata-py ohasa va'erã onhemopotĩ-vy. ⁵⁰ He porã juky. Ha ndahéi ramo katu ndikatúi eremoatyrõ jevy. Aipo ramo ereko katu nde py'apy-py juky ramigwa pono nde poxy onhondive, ne nhe'ê piro'y hagdã onhondive, he'i íxupe kwéry Hesu.

10

“*Topoi e'ỹ katu kwimba'e gwembireko-gwi*” he'i Hesu

(Mt 5.31-32; 19.1-12; Lc 16.18; 1 Co 7.10-17)

¹ Upe-gwi osê Hesu Judéia tetã tetã-rupi oho-vy. Y Jordão kupe-rupi ave oho. Ha gwĩ kente kwéry ojogweroaty aty joty iha-py hikwái. Ha Hesu katu ojapo memeha-rupi ombo'e mbo'e joty oho-vy.

² Ha gwĩ fariseu kwéry katu ogwahê ou-vy iha-py ombovyte mo'ã hagdã íxupe. He'i:

—Gwĩ omenda va'ekwe opoi rei ramo gwembireko-gwi, oiko joty tipo tekoha-rupi? he'i Hesu-pe oporandu-vy, ombojevavy ukase mo'ã-vy hikwái.

³ Upe ramo Hesu oporandu íxupe kwéry:

—Pene mandu'a vyteri pa Moisés amyri he'i va'ekwe-rehe pejapo hagdã? he'i íxupe kwéry.

⁴ Upéi ha'e kwéry he'i Hesu-pe:

—Upéa he'i voi va'ekwe Moisés amyri. He'i va'ekwe: “Erepoise ramo ne rembireko-gwi, ehai ranhe kwatia-rehe ereikwaa ukapa hagdã. Upéi eme'ê íxupe kwatia erepoi hagdã íxugwi” he'i va'ekwe Moisés amyri, he'i hikwái Hesu-pe.

⁵ Ha Hesu katu he'i íxupe kwéry:

—Ha pende py'aratã-gwi napehenduséiry inhe'ê. Upéa-gwi Moisés amyri he'i va'ekwe peê-my pepoi hagdã pene rembireko-gwi, he'i.

⁶ —Ha ojevapo hagwe áry-py kunha ypy kwimba'e ypy ndive katu gwĩ omoirũ va'ekwe Nhandejáry nde'fry voi va'ekwe opoi poi hagdã, he'i íxupe kwéry.* ⁷ —Nhandejáry nhe'ê he'i a-rami:

“Yma ete va'ekwe kwimba'e ypy ndive ojapo-ma ave kunha ypy. Upéa-gwi kwimba'e oheja va'erã gwu osy-pe gwembireko oirũrã-rehe omenda hagdã. Omoirũ teeharã ndive omenda.

⁸ Mokõi va'e-rami ndoikovéi-ma. Peteixa ae onhomoirũ-ma oiko-vy va'erã”* he'i Nhandejáry kwatia nhe'ê. Nhandejáry kwatia nhe'ê he'i hagwe-rami, jaikwaa omenda va'ekwe rekoha. Ndoikovéi ha'e anho rei. Peteixa ae hekoha. ⁹ Upéa-gwi tomomboi uka e'ỹ katu teko rei Nhandejáry remimbojehe'a, he'i fariseu kwéry-pe Hesu.

¹⁰ Ha upéa nhe'ê-rehe oporandu jevy íxupe koty-py hemimbo'e kwéry. ¹¹ Ha he'i íxupe kwéry:

—Gwembireko-gwi opoise va'e omenda jevy ramo, ojapo vai voi hese. ¹² Ha kunha oména-gwi opoise va'e omenda jevy ramo, ojapo vai voi ave hese, he'i íxupe kwéry Hesu.

Hesu ohovasa mitã-pe

(Mt 19.13-15; Lc 18.15-17)

¹³ Upe ramo ojereru Hesu ha-py mitã opo omoĩ hagdã hese. Ha hemimbo'e kwéry ojoko íxupe kwéry:

—Togweru e'ỹ katu mitã, he'i.

¹⁴ Ha Hesu katu ohexa ramo oja'o va'e, ojoko íxupe.

—Ani pejoko teĩ mitã ou va'erã, he'i. —Tou katu xe renda-py, he'i joty Hesu. —Ha'e-ta peê-my: Koixagwa omoirũ-ma va'erã Nhandejáry gwuvixarã-pe, he'i. ¹⁵ —Anhete ko xe ha'e-ta peê-my, he'i. —Erenhemboete ukase rei va'e neremoirũ-ma va'erã Nhandejáry

* 9:48 Mt 5.30; 18.6-9; Lc 17.1-2 * 10:6 Gn 1.27 * 10:8 Gen 2.24

nde ruvixarã-pe. Ha gwĩ heko'ive va'e, mitã-rami onhemoete ukase e'ỹ va'e ae, omoirũ-ma va'erã Nhandejáry gwuvixarã-pe, he'i íxupe kwéry. —Upéa-gwi ani pejoko teĩ mitã ou va'erã, he'i mitã-rehe oikwaa uka-vy kiva'e po omoirũ-ta Nhandejáry-pe.

¹⁶Upéi ohupi mitã-me oikwavã ohupi-vy ojyva ári:

—Nhandejáry tande rovasa katu, he'i peteĩ teĩ-pe Hesu omoĩ-vy opo hese.

“Mba'éixa ajapo-ta xe aikove hagwã Nhandejáry ndive apave'ỹ reheve” he'i Hesu-pe

(Mt 19.16-30; Lc 18.18-30; 1 Tm 6.6-10)

¹⁷Osẽ mo'ã oho-vy Hesu. Ha ohogwaitĩ peteĩ kwimba'e íxupe oripara ou-vy. Hovagwy-py onhesũ gwetypy'ã-rehe. Oporandu Hesu-pe:

—Nde ko nde reko porã va'e, mbo'eháry. Mba'éixa ajapo-ta xe aikove hagwã Nhandejáry ndive apave'ỹ reheve, he'i Hesu-pe.

¹⁸Hesu he'i íxupe.

—Ma'erã, “Nde reko porã va'e” ere xe-rehe? he'i oporandu-vy íxupe. —Ndaipóri ojevay e'ỹ va'e. Nhandejáry ha'e anho mante heko porã ete va'e, he'i íxupe.

¹⁹—Ereikwaa-ma Nhandejáry omombe'u va'ekwe nde rekorã:

“Ani ereporojuka teĩ ereiko-vy, ani ereiko teĩ ambue mbue ndive, ani eremonda teĩ, ani nde apu rei teĩ nde rapixa-rehe, ani erembotavy ereraha hagwã nde rapixa rembiereko.

Emboete ae katu nde ru nde sy ave”.*

Upéixa omombe'u va'ekwe Nhandejáry, he'i íxupe Hesu.

²⁰—Xe mitã ramogware äy peve upéa nhe'ẽ namokanhýry areko-vy, mbo'eháry. Ahendu vyteri aiko-vy xe, he'i Hesu-pe.

²¹Ha Hesu oma'ẽ-vy hese, ohayhu voi íxupe:

—Peteĩ oĩ va'e nderejapói vyteri, he'i íxupe. —Eraha ranhe terejerure hepy upe erereko va'e-rehe. Upe rire iporiahu va'e kwéry-pe ereme'ẽmba hagwã hepykwe, he'i íxupe. —Hetave oĩ va'erã nde-vy gwarã yváy-py, he'i íxupe. —Ha upe rire katu eju xe moirũ, he'i íxupe Hesu.

²²Upéa nhe'ẽ ha'e ohendu ramo, ipy'areraha-ma voi oiko-vy. Ndaipy'agwapyvúi-ma. Ndovy'avéi-ma oho-vy heta mba'e ogwereco-gwi.

²³Ha Hesu oma'ẽ oĩ-vy gwemimbo'e kwéry-rehe:

—Imba'e reta va'e hasy peve omoirũ va'erã Nhandejáry gwuvixarã-pe, he'i íxupe kwéry.

²⁴Ha ojavura hese hikwái. Ha Hesu katu he'i jevy íxupe kwéry:

—Xe ra'y kwéry, he'i, —hasy eterei gwĩ imba'e reta-rehe ojerovia va'e omoirũ hagwã Nhandejáry gwuvixarã-pe, he'i. ²⁵—Hasy eterei nhambohasa ka'ijugwasu kwa-rupi mymbagwasu camelo, he'i. —Ha hasyve voi gwĩ imba'e reta va'e omoirũ hagwã Nhandejáry nhande ruvixa-pe, he'i gwemimbo'e kwéry-pe Hesu.

²⁶Ha ha'e kwéry katu onhemondýi eterei-ma hikwái:

—Aipo ramo, avave nonheresende mo'ãi arã ra'e. Kiva'e nipo onheresende va'erã? Kiva'e nipo onheresende va'erã? he'i ojúpe hikwái.

²⁷Ha Hesu oma'ẽ oĩ-vy hese kwéry:

—Ojéhegwi rei nonheresendéi arã avave, he'i. —Tupã Nhandejáry ha'e anho mante oĩ ne resendeharã, he'i. —Ha'e opamba'e rereko kwaaha voi, he'i gwemimbo'e kwéry-pe.

²⁸Ha upéi katu he'i íxupe Pedro:

—Ha ore katu opamba'e oroheja oromoirũ hagwã, he'i Hesu-pe.

²⁹—Anhete ko xe ha'e-ta nde-vy, he'i íxupe Hesu. —Xe-rehe ha-py nde róga pygwa ereheja ramo, ombohekovia va'erã nde-vy ne rembiejare. Xe moirũ hagwã, nde ryke'y ereheja ramo, nde ryvy ereheja ramo, ne reindy ereheja ramo, nde ryke ereheja ramo, nde kypy'ýry ereheja ramo, nde kyvy ereheja ramo, nde sy ereheja ramo, nde ru ereheja ramo, nde nde ra'y, nde raji ereheja ramo, ne memby ereheja ramo, nde yvy ereheja ramo ave xe moirũ hagwã, ombohekoviarõ va'erã nde-vy ne rembiejare, he'i íxupe Hesu. —Xe rehegwa nhe'ẽ porã erehendu-gwi ereheja ramo, ombohekoviarõ va'erã nde-vy ne rembiejare. Nde rexakwaa rei jevy va'erã. ³⁰Hetave ome'ẽ va'erã nde-vy. Peteĩ ereheja rekovía ome'ẽ va'erã

* 10:19 Êx 20.12-16

nde-vy cem peve, he'i íxupe Hesu. —Ome'ê va'erã nde-vy nde rogarã, nde ryke'yra, nde ryvyra, ne reindyrã, nde syrã ave. Ne mitãrã ome'ê va'erã nde-vy. Nde vyvyra ome'ê va'erã nde-vy. Heta nde-vy ome'ê ramo jepe, nde rereko asy joty va'erã. Ay ome'ê va'erã nde-vy. Ha upe rire katu ko yvy opa rire-ma, ereikove meme va'erã Nhandejáry ndive erepave'y reheve, he'i íxupe Hesu. ³¹—Heta oĩ ay onhemboeteve va'e. Ha upe rire katu ndatuvixa mba'éiry va'erã Nhandejáry-pe. Heta oĩ ay heko'ive va'e. Ha upe rire katu tuvixa mba'e va'erã Nhandejáry-pe, he'i gwemimbo'e kwéry-pe Hesu.

Hesu omombe'u jevy omanotaha

(Mt 20.17-19; Lc 18.31-34)

³² Ha upéi Hesu ogwata oho-vy tapegwasu-rupi. Jerusalém tetã-my ojéupi oho-vy. Gwemimbo'e kwéry renonde-rupi oho.

—Ma'erã po oho Jerusalém tetã-my, he'i opondera-vy hese hikwái. Ha hapkwérigwa katu oiko-tagwi ikyhyje hikwái.

Upéi ogwenohê jevy gwí doze gwemimbo'e ha'e kwéry anho omombe'u hagwã ojéupe oiko-ta va'e:

³³ —Pejapysaka katu xe nhe'ê rehe, he'i. —Jaha jaiko-vy Jerusalém tetã-my. Upe-py xe Nhande Ryke'y tee va'e, xe pyhy va'erã xe me'ê hagwã pa'i ruvixa kwéry-pe, judeu rekombó'ehaty-pe ave. Upe-py, “Tomano” he'i va'erã xe-rehe. Upéi xe me'ê va'erã xe reraha-vy nhande kwéry e'y va'e-pe. ³⁴ Xe-rehe onhembohory va'erã, onygwó ave va'erã xe-rehe. Xe mbopi va'erã ave, xe juka va'erã ave. Ha upe rire katu mbhapy áry rire anhemingo jevy-ma va'erã, he'i gwemimbo'e kwéry-pe anho onhemombe'u-vy.

“Erenhemboete ukaseve ramo, erejokwái va'e-rami eiko”

he'i Hesu

(Mt 20.20-28; Mc 9.35; Lc 22.24-27; Jo 13.12-17; Ef 4.2; Fp 2.3-4; 1 Pe 5.3)

³⁵ Upéi hi' agwí-ma ou Zebedeu ra'y, Tiago João ndive. Hesu ha-py ogwahê-ma ou-vy: —Oroipota erejapo ore-vy oime raê va'e orojerure va'e nde-vy, mbo'eháry, he'i íxupe.

³⁶ —Mba'e pa ereipota xe ajapo nde-vy, he'i gwemimbo'e-pe.

³⁷ —Nde yke-rehe joja torogwapy erenhemomba'egwasu ramo, he'i íxupe.

³⁸ Ha Hesu katu he'i íxupe kwéry:

—Ndapeikwaái pene rembijerure-rehe xe-vy, he'i. —Xe mbohasa asy hagwã-rami ave, pehasa asy-ta para'e? Ajepy'apy hagwã-rami ave pejepy'apy-ta para'e? he'i oporandu-vy Zebedeu ra'y Tiago João ndive-pe.

³⁹ —Ha'e voi, he'i. —Ne ndive ore orohasa asyve, he'i íxupe.

—Néi, he'i, —Xe mbohasa asy hagwã-rami ave, pehasa asy va'erã voi. Ajepy'apy hagwã-rami ave, pejepy'apy va'erã voi, he'i íxupe kwéry mokóigwa-pe. ⁴⁰ —Ha xe Ru nde'íry apombogwapy hagwã xe yke-rehe joja. Ha'e ae ombogwapyse va'e ae, ombogwapy va'erã xe yke-rehe, he'i íxupe Hesu.

⁴¹ Ha hemimbo'e ojerure e'y va'e katu oĩ dez. Ohendu-ma ramo onhembotuvixaseve mo'ã va'e-pe ogwero'vy'are'y voi. Tyvúry reheve Tiago-rehe ija'e'y hese hikwái.

⁴² Ha upéi katu:

—Peju a-py, he'i entéro gwemimbo'e kwéry-pe Hesu. —Peikwaa voi judeu e'y kwéry rekoha, Nhandejáry kwaa e'yha rekoha. Huvixa kwéry he'íha omanda voi hese oiko-vy. Ipu'aka voi hese gwí onhemboete va'e. ⁴³ Upe va'e rekoha-rupi xe ndaipotái peiko, he'i. —Pende rekorã a-rami. Erenhembotuvixa mba'e ukaseve ramo, eiko katu nde rapixa rembigwái ramo. ⁴⁴ Erenhemboete ukaseve ramo, erejokwái va'e-rami eiko, he'i. —Nde rerekoseha-rami eiko. ⁴⁵ Xe ave Nhande Ryke'y tee va'e jepe ndajúi va'ekwe xe rembigwairã heta ajohu hagwã. Aju ae va'ekwe tembigwái-rami aiko hagwã. Ajejuka uka hagwã aju va'ekwe heta aresende va'erã-rehe, he'i gwemimbo'e kwéry-pe Hesu.

Hesu ombogwera hesapyso e'y va'e

(Mt 20.29-34; Lc 18.35-43)

⁴⁶Ogwahêmba Jericó tetã-my. Ohasa oho-vy. Upéi osê oho-vy Hesu gwemimbo'e kwéry ndive. Heta ojogweroaty va'e oho ave indive. Osê jave ogwapy oĩ-vy tapegwasu rembe'y-py hesapyso e'ỹ va'e. Héry va'e Bartimeu. Ha Bartimeu Timeu ra'y. Omba'e repyrã-rehe ojerure va'evy. ⁴⁷Ohendu ramo Hesu Nazaré pygwa ohasa ramo, onhe'ê hatã:

—Hesu, Davi remiarirõre, xe poriahuvereko katu, he'i onhe'ê hatã-vy.

⁴⁸Heta oĩ va'e inhe'ê ojoko:

—Ekirirĩ katu, he'i íxupe.

Ha Bartimeu katu hatãve tãve joty onhe'ê:

—Hesu, Davi remiarirõre, xe poriahuvereko katu, he'i onhe'ê hatã-vy.

⁴⁹Ha upéi opyta-ma Hesu:

—Ehenói katu íxupe tou xe ha-py. Hesu ne renói-ma kuri peje íxupe, he'i.

Ha ohenói hesapyso e'ỹ va'e-pe hikwái:

—Ani erejapura teĩ. Epu'ã katu. Hesu ne renói, he'i íxupe hikwái.

⁵⁰Ha upéi onhenhugwãha omombo opu'ã pya'e oho-vy Hesu ha-py.

⁵¹—Mbava'e tipo ereipota xe ajapo nde-rehe? he'i hesapyso e'ỹ va'e-pe.

—Eme'ê jevy xe-vy xe resapysorã, mbo'eháry, he'i Hesu-pe.

⁵²Upe-ma ramo Hesu he'i íxupe:

—Tereho, he'i. —Xe-rehe erejerovia-gwi, erekwera-ma, he'i íxupe Hesu.

Onhe'ê jave okwera-ma. Upe rire katu omokambara-ma íxupe tapegwasu-rupi oho jave.

11

Hesu oho Jerusalém tetã-my

(Mt 21.1-11; Lc 19.28-40; Jo 12.12-19)

¹Ha Hesu gwemimbo'e kwéry ndive ogwahê ogwata oho-vy Jerusalém tetã-my. Hi'agwĩ oĩ ramo jepe íxugwi, nogwahêi joty upe-py. Upe ramo ogwahê ranhe oho-vy Betfagé tetã mirĩ-my. Betânia-py vyvaty Oliveiras ppy-py ogwahê ranhe oho-vy. Ogwahê rire, omondo mokõi gwemimbo'e gwenonde-rupi:

²—Tapeho katu upe tetã mirĩ-my nhande rovaréhéi, he'i. —Ereike-ma ramo eretopa va'erã mburika'i onhenhapytĩ va'e. Ndojeupíry vyteri hi'ári avave. Ejora eru ko'a-py, he'i.

³—“Ma'erã erejapo upéa?” he'i ramo nde-vy upe pygwa, ere íxupe, “Oiporu-ta nhande ruvíxa” ere íxupe. “Pya'e ogweruruka jevy-ta” ere íxupe, he'i íxupe kwéry Hesu.

⁴Ha upéi katu oho otopa onhenhapytĩ ha-py mburika'i. Okê rovagwy-py, tape yke-rehe otopa. ⁵Ojora ramo mburika, oporandu íxupe mokõi hemimbo'e-pe, upe-py oĩ va'e:

—Ma'erã erejapo upéa, he'i Hesu remimbo'e-pe.

⁶Ha Hesu nhe'êgwe omombe'u íxupe kwéry. Upéa-rupi oheja ogweraha mburika'i. ⁷Ha upéi katu ogweru Hesu-pe. Omoĩ hi'ári oao. Ha Hesu ojeupi-ma hi'ári. ⁸Heta va'e omboi mboi oao oipyo hagwã Hesu renda opyrũ hagwã-rupi. Oikytĩ kytĩ omoĩ-vy vyv-rupi yvyra rogwe hakã reheve. Yvy-rupi omohasãi imoĩ-vy. ⁹Osapukái joa henonde rupigwa. Hapykwerigwa osapukái ave:

—Ereju-ma, he'i imboete-vy. —Iporã ete katu, he'i onhe'ê hatã-vy. —Nhandejáry réry-py eregwahê-ma ereju-vy. Tande rovasa porã katu Nhandejáry, he'i Hesu-pe.* ¹⁰—Upe va'e ou va'e nhande ruvíxagwasurã. Upe va'e ou va'e nhane ramoirusu Davi ramigwa voi. Ou ramo, tohovasa íxupe Nhandejáry. Nhandejáry yváy-py oĩ va'e-pe jaha nhamboete, he'i Hesu-rehe onhe'ê hatã-vy.

¹¹Ha Hesu katu ogwahê-ma Jerusalém tetã-my. Nhandejáry-pe nhamboete haty-py óga kakwaa-py oike. Oike-vy osareko reko enterovéa-rehe. Osareko rire, ka'aru ete-ma. Upéa-gwĩ osê oho-vy Betânia-py. Gwemimbo'e kwéry ndive oho. ¹²Ko'ê ramo Betânia-gwi ou-vy, ovare'a ogweru Hesu. ¹³Mombyry-gwi ohexa figo máta hogwe porã va'e. Oho ohexa: “Hi'a para'e” he'i oho-vy. Ha ogwahê ramo, ndahi'áiry íxupe. Hogwe rei oĩ. Ndaipóri figo. Ndahá'ei vyteri hi'aha áry:

¹⁴—Anive ho'u avave nde a, he'i figo máta-pe.

* 11:9 Sl 118.25-26

Upéixa omoĩ onhe'ẽ yva máta-pe. Ha ohendu hemimbo'e kwéry inhe'ẽ.*

Hesu oíke Nhandejáry-pe nhamboete haty-py óga kakwaa-py
(Mt 21.12-17; Lc 19.45-48)

¹⁵ Ha upéi katu ogwahẽ jevy-ma Jerusalém tetã-my hikwái. Ha Hesu oíke Nhandejáry róga kakwaa-py. Upe-gwi omosẽmba omba'e jogwa va'e. Oma'evende oĩ va'e ave omosẽ. Upe-py oĩ ave pirapire ombohekovia va'e hepy-rehe. Ombohekoviapa oiporu jevy va'erã-py. Upéa-gwi íxupe kwéry omosẽ imondo-vy. Imba'e renda ombovapy íxugwi kwéry. Ombovapy pykasu járy apyka kwéry ave. ¹⁶ Ndohejái avave ogweraha mba'eve Nhandejáry róga kakwaa roka-rupi. ¹⁷ Onhemonhe'ẽ-vy he'i íxupe kwéry:

—A-rami omoĩ va'ekwe Nhandejáry kwatia-rehe:

“Xe róga xe mboete haty-py héry va'erã onhe'ẽ mondo mondo Nhandejáry-pe haty. Upe-py entéro va'e gwive ombojeupi inhe'ẽ Nhandejáry-pe”*
he'i. Ha peẽ katu pemoingo a-py gwí oporosakea va'e onhemi va'e-rami, he'i íxupe kwéry Hesu.

¹⁸ Ohendu herakwã pa'i ruvixa kwéry judeu rekombo'ehaty ave. Ohendu ramo, oheka heka ojuka hagwã mo'ã Hesu-pe. Ikyhyje-gwi íxugwi ojukase. Ha enterovéa, “Iporã ete hemimombe'u mbe'u” he'i opondera-vy hese hikwái. Upéa-gwi ikyhyje íxugwi pa'i ruvixa kwéry.

¹⁹ Ka'aru ete ramo osẽ-ma Hesu gwemimbo'e kwéry ndive. Tetã-gwi osẽ oje'ói-vy.

²⁰ Ko'ẽ ramo ohasa jevy. Ohasa ramo, ohexa yva máta ipirupa ra'e hapo gwive. Hokuipa-ma. ²¹ Ha Pedro katu imandu'a Hesu nhe'ẽgwe-rehe:

—Ema'ẽ erehexa hagwã, mbo'eháry, he'i Hesu-pe. —Ipiru-ma ra'e pe yva máta ere va'ekwe-pe, “Anive nde a ho'u avave” ere kuri íxupe. Ne nhe'ẽ pokatu voi nipo ra'e, he'i Hesu-pe.

²²⁻²³ Ha upéi katu he'i íxupe kwéry Hesu:

—Ejerovia katu Nhandejáry-rehe. Anhete ko xe ha'e-ta nde-vy. Eremõ ramo ne nhe'ẽ ko yvyaty-pe, “Ejeupi enheapymi ygwasu-py” oiko-ta nde-vy. Ne nhe'ẽ hagwe-rami oikota. Oiko-ta voi ndererovia ku'a ku'ái ramo nde py'apy-py. Oiko-ta voi nde-vy ererovia tee ramo oikotaha ne nhe'ẽ hagwe-rami. ²⁴ Upéa-gwi ha'e-ta nde-vy: Oime raẽ va'e-rehe erejerure ramo erenhomongeta-vy Nhandejáry ndive, erovia porã katu íxupe. “Oime ra'e xe-vy gwarã” ere ndejeupe. Ererovia porã ramo, oiko-ta voi nde-vy. ²⁵ Erepu'ã ramo erenhomongeta hagwã Nhandejáry ndive, eiporiahuvereco katu nde-vy hembiaipo vai va'ekwe, nde poriahuvereco hagwã nde Ru yváy-py oĩ va'e erejevay va'ekwe-rehe, he'i. ²⁶ —Ereiporiahuvereco e'ỹ ramo nde rapixa-pe, nande poriahuvereco mo'ãi nde Ru yváy-py oĩ va'e erejevay va'ekwe-rehe, he'i íxupe kwéry Hesu.*

“Kiva'e tipo ojapo uka nde-vy ko'ã va'e” he'i Hesu-pe
(Mt 21.23-27; Lc 20.1-8)

²⁷ Ha upéi katu ogwahẽ jevy Jerusalém tetã-my hikwái. Ha Hesu ogwata jave Nhandejáry róga kakwaa gwy-rupi, ou henda-py pa'i ruvixa kwéry, judeu rekombo'ehaty kwéry, judeu ruvixa kwéry ave:

²⁸ —Kiva'e nhe'ẽ-py tipo ereporombo'e? he'i íxupe. —Kiva'e he'i nde-vy ra'e erejapo hagwã a-rami? he'i oporandu-vy Hesu-pe hikwái.

²⁹ —Xe-vy peporanduha-rami ave aporandu-ta peẽ-my xe aikwaase pendéhegwi va'e-rehe, he'i. —Pemombe'u ranhe katu xe-vy peẽ-my aporandu-ta va'e-rehe. Upéi, xe amombe'u-ta ave peẽ-my kiva'e nhe'ẽ-py aporombo'e, he'i íxupe kwéry Hesu. ³⁰ —Ãy aporandu ranhe-ta peẽ-my. Kiva'e nhe'ẽ-py oporomongarai va'ekwe João Batista amyri? Nhandejáry nhe'ẽ-py para'e? Teko rei nhe'ẽ-py para'e? he'i íxupe kwéry. —Pemombe'u ranhe katu xe-vy, he'i huvixa kwéry-pe.

³¹ Ha ha'e kwéry katu ndoikwaáiry onhe'erã:

* 11:14 Mt 21.18-19 * 11:17 Is 56.7; Jr 7.11 * 11:26 Mt 21.20-22; Mc 11.13-14

—Mbava'e ja'e rei-ta po Hesu-pe? he'i ojúpe oporandu randu-vy hikwái. —
 “Nhandejáry nhe'ê-py oporomongarai va'ekwe João” ja'e ramo, “Ma'erã po ndapejeroviái
 va'ekwe hese?” he'i arã nhande-vy. ³²Ha “Teko rei nhe'ê-py oporomongarai va'ekwe João”
 ja'e ramo katu, nhane mytu'e'ý arã nhandéjehe. “Pende apu” he'i arã nhande-vy te'ýi
 jusu, he'i ojúpe hikwái. —“Nhandejáry nhe'ê-py omombe'u va'ety ae katu João” he'i arã.
 Mbava'e tipo ojapo arã nhande-rehe hikwái? he'i ojúpe huvixa kwéry. ³³Upéa-gwi,
 —Ndroikwaáiry, he'i mo'ã Hesu-pe okyhyje-gwi.
 —Aipo ramo, xe-vy napemombe'uiha-rami ave, kiva'e nhe'ê-py aporombo'e a-rami,
 ndaikwaa uka mo'ãi ave peê-my, he'i judeu ruvixa kwéry-pe Hesu.

12

Hesu omombe'u arandu rehegwa nhe'ê uvaty rehegwa-rami
 (Mt 21.33-46; Lc 20.9-18)

¹Ha upéi katu Hesu omombe'u jevy judeu ruvixa kwéry-pe. Arandu rehegwa nhe'ê
 uvaty rehegwa-rami omombe'u:

—Oĩ va'ekwe uva onhotý va'ekwe. Oho onhotý uva ojapo hagwã uvaty. Upéi
 ogweroajere imboto-vy. Ojo'o itakwa hykwere ryrurã. Omboyvate ojeupi hagwã orepara
 hagwã. Upéi járy oiporuruka omba'apo va'erã-pe. Hi'aju ramo, oipota omboja'o yva
 ojúpe. Ha upe rire katu oho mombyry. Tetã ambue-py oho. ²Hi'aju-ma ramo pe yva uva,
 ombou ivía ramo gwembigwái omboja'o hagwã yva mbyte-rupi heraha-vy. ³Ha uvaty-py
 omba'apo va'e katu oipyhy imboupyre-pe oinupã ombojevvy rei mba'eve e'ý-rehe. ⁴Outro
 jevy ombou ivía ramo, ha'e kwéry katu onhakãrupã onhembosarái hese. Nomboetéiry
 íxupe. ⁵Outrove ombou jevy. Ha'e kwéry katu ojuka íxupe. Heta ou ramo, onhembosarái
 hese kwéry. Ou va'e oinupã. Oinupã e'ý ramo, ojuka. ⁶Peteĩ oikori vyteri ombou va'erã
 ta'ýry hembiahyu. Ipaha-py ombou íxupe kwéry gwa'ýry peteĩ. “Xe ra'y-pe katu omboete
 va'erã” he'i mo'ã imbou-vy. ⁷Ha gwí uvaty-py omba'apo va'e katu he'i ojúpe: “Upéa
 uvaty jaryrã voi” he'i. “Jaha jajuka íxupe. Uvaty-rehe nhanhembojáry va'erã” he'i ojúpe.
⁸Upéa-gwi oipyhy íxupe ojuka omboyke uvaty-gwi. ⁹Ha upéi katu oikwaa-ma ramo pe
 uvaty járy, mba'éixa ojapo-ta hese kwéry? he'i. —Ogwahẽ ou-vy ramo, ojuka-ma va'erã
 katu gwí hembiaho vai va'e-pe. Upéi ohekoviarõ va'erã outro omba'apo jevy va'erã, he'i
 íxupe kwéry Hesu.

Upéixa omombe'u judeu ruvixa kwéry reko uvaty rehegwa-rami.

¹⁰Ha upéi katu he'i jevy judeu ruvixa kwéry-pe:

—Pemonhe'ê nhe'ê teĩ peiko-vy yma gware nhe'ê Nhandejáry omoĩ uka va'ekwe kwatia-
 rehe, ndapeikwaáiry, he'i. —Yma gware nhe'ê a-rami:

“Ndovaléiry, he'i óga apoha ita-rehe. Ha upe ita katu ojohu vai ramo jepe, ojeporuve joty
 óga pytahoha ramo. Óga jekoha voi upe ita.

¹¹Upéa Nhandejáry rembiapo porã, ja'e. Jahexa-vy, Iporã porã katu, ja'e Nhandejáry
 rembiapo-rehe”*

he'i xe-rehe yma gware nhe'ê. Ma'erã he'i va'e ndapeikwaáiry ra'e? he'i íxupe kwéry
 Hesu hekokwe mombe'u-vy.

¹²Ohendu ramo inhe'ê, oikwaa pya'e ojehegwa hikwái:

—Nhande rehegwa nhe'ê kuri omombe'u Hesu, he'i ojúpe.

Upéa-gwi upe judeu ruvixa oipyhyse mo'ã íxupe. Ha ndoipyhyí, icyhyje-gwi.
 Nombopoxyséi-gwi Hesu ndive heta oĩ va'e-pe, ndoipyhyíry joty íxupe hikwái. Upe rire
 ohejari jevy oje'ói.

Judeu ruvixa omonhe'ê avyse mo'ã Hesu-pe
 (Mt 22.15-22; Lc 20.20-26)

¹³Ha upéi katu judeu ruvixa kwéry omonhe'ê avyse mo'ã Hesu-pe. Upéa-gwi ombou
 iha-py fariseu-pe Herodes re'ýi ndive:

* 12:11 Sl 118.22-23

¹⁴—Orohexa kwaa nde reko apu e'yha nde-rehe, mbo'eháry. Ne nhe'ë ndojohu porái ramo jepe, eremombe'u joty anhetegwa va'e. Avave-gwi neretiry eremombe'u-vy. Nhandejáry remimbota eremombe'u voi. Erehexa kwaa voi hekoha enterove-rehe. Upéa-gwi anhei-rupi ne remimombe'u Nhandejáry rape kwaa uka-vy, he'i. —Aipo ramo, iporã para'e nhande, judeu reko-rupi jaiko va'e, japaga nham'e'ë-vy mburuvixagwasu César-pe hemimbopaga uka? Iporã para'e japaga e'y? he'i. —Iporã para'e nham'e'ë? Iporã para'e nham'e'ë e'y? he'i. —Emombe'u ore-vy upéa-rehe oroikwaa hagwã, he'i oity vai ukase-vy íxupe hikwái.

¹⁵Ha ha'e ohexa kwaa hese hekoha vai: “Omo'ã kwaa voi opy'a ky'aha” he'i ojúpe hese. Upéi he'i judeu ruvixa kwéry-pe:

—Ma'erã xe monhe'ë avyze? he'i. —Eru xe-vy moeda mburuvixagwasu remimbopaga uka tahexa, he'i íxupe kwéry.

¹⁶Peteĩ ogweru. Upéi oporandu íxupe kwéry:

—Kiva'e ra'anga pa upe va'e moeda? Kiva'e ohai uka va'ekwe moeda-rehe? he'i íxupe kwéry.

—César ra'anga. Hembihai uka ave, he'i íxupe hikwái.

¹⁷—Aipo ramo, César-pe imba'e eme'ë. Ne mbopaga uka ramo, eme'ë jevy íxupe, ijáry-pe. Ha Nhandejáry-pe katu hemimbota eme'ë íxupe, he'i huvixa kwéry-pe Hesu.

—Hasy va'e-rehe jepe nhaporandu ramo íxupe, omombe'u porã joty, he'i Hesu-rehe opondera-vy hikwái.

“Nonhemoingove jevyí va'erã gwĩ omano va'ekwe” he'i mo'ã saduceu kwéry

(Mt 22.23-33; Lc 20.27-40; 1 Co 6.14; 15.12-32; 1 Ts 4.16-17)

¹⁸Ha upéi katu ou Hesu renda-py saduceu kwéry, “Nonhemoingove jevyí va'erã gwĩ omano va'ekwe” he'i va'e. Ou oporandu íxupe:

¹⁹—Moisés amyri omombe'u va'ekwe nhande-vy nhande rekorã, mbo'eháry. “Tyke'yry omano ramo, oheja ramo gwembirekokwe naimembýi vyteri ramo, tomenda tyvýry gwovajare-rehe. Upéixa ramo, Ke'y ra'y, he'i mo'ã va'erã imemby ypy-rehe” he'i nhande-vy Moisés. ²⁰Oĩ va'ekwe peteĩ tyke'yry, seis tyvýry. Tyke'yry omenda kunha-rehe. Upéi omano ramo, ndaita'yry jepéry. ²¹Tyvýry omenda hovajare-rehe. Tyvýry omano ramo, ndaita'yry. Upéi tyvýry ambue jevy omenda omano. ²²Peteĩ teĩ omenda hese gwovajare-rehe. Peteĩ teĩ omano ramo ndaita'yry jepéi. Omanomba rire, upe kunha omano ave. ²³Nhane moingove jevy ramo, kiva'e rembirekorã upe kunha? Gwĩ sete tyvýry kwéry omenda ra'e hese, he'i Hesu-pe hikwái hasy va'e-rehe oporandu-vy.

²⁴—Ha peẽ katu pejavy-ma voi pene nhe'ë, he'i Hesu. —Nhandejáry nhe'ë kwatia-rehe ohai uka va'ekwe peẽ ndapeikwaáiry. Peẽ ndapeikwaái voi ave Nhandejáry opamba'e rereko kwaaha voi. Upéa-gwi pejavy voi pene nhe'ë, he'i íxupe kwéry. ²⁵—Nhane moingove jevyha áry-py, kwimba'e nomendavéi-ma va'erã. Kunha ave nomendavéi-ma va'erã. Oiko va'erã Nhandejáry rembigwái yváy pygwa reko-rupi.

²⁶Ha Nhandejáry kwatia nhe'ë katu omombe'u peẽ-my omano va'ekwe oikove jevymaha. Moisés amyri ohai va'ekwe vyvra ra'y rehégwa nhe'ë a-rami:

“Xe katu Nhandejáry, xe Abraão járy, xe Isaque járy, xe Jacó járy ave”*

he'i Nhandejáry kwatia nhe'ë, omano va'ekwe oikove jevy-ma va'e oikwaa ukaha. Ma'erã ndapeikwaái pemonhe'ë nhe'ë va'ekwe? ²⁷Aipo ramo, Nhandejáry ndaha'ái omano va'ekwe járy, tekove járy ae. Ha'e onhemoingove jevy va'e járy. Pejavy-pa pene nhe'ë, he'i saduceu kwéry-pe Hesu nhane moingove jevyha kwaa uka-vy.

“Hayhu tee katu Nhandejáry-pe” he'i Hesu

(Mt 22.34-40; Lc 10.25-28)

²⁸Ogwahẽ ou-vy judeu rekombo'ehaty pa'ũ-gwi peteĩ va'e. Ohendu íxupe kwéry onhonhe'ë mbojevvy ramo. Ohendu ramo, “Iporã Hesu remimombe'u” he'i. Upéa-gwi oporandu Hesu-pe:

* 12:26 Êx 3.6

—Heta oĩ nhande rekoha nhe'ẽ. Kiva'e tuvixave va'e? he'i íxupe.

²⁹—Kiva'e tuvixave va'e amombe'u-ta nde-vy, he'i Hesu. Upéi oiporu Nhandejáry kwatia nhe'ẽ:

—“Pehendu katu, Israel remiarirō kwéry. Tupã Nhandejáry ha'e anho oiko va'e.

³⁰Ehayhu tee katu Nhandejáry-pe. Nde py'apy gwive ehayhu íxupe. Ehayhu íxupe nde koty gwive. Ne mandu'a meme katu hese hayhu-vy. Ehayhu mbaraete ete ave íxupe”*

he'i.

³¹—Ha upe rire katu oĩ outro tuvixa va'e:

“Ehayhu rei katu nde rapixa-pe nde ae nde rekove erehayhuha-rami”*

he'i Hesu Nhandejáry kwatia nhe'ẽ poru-vy. —Upe mokõi nhe'ẽ-gwi ndaipóri nhande rekoha nhe'ẽ tuvixave va'e, he'i íxupe Hesu.

³²—Ha'e-ma ngatu, mbo'eháry, he'i íxupe. —Anheigwa eremombe'u ere ramo Nhandejáry-rehe ha'e anho. Ndaipóri ha'e-rami tupã. ³³Ha Nhandejáry katu he'i va'ekwe nhande-vy,

“Pehapy mymba xe mboete-vy, pemoka'ẽ ave.”

Upéixa ramo iporã nhame'ẽ hembijukarã nhamboete-vy Nhandejáry-pe. Ha iporãve jahayhu íxupe nhande py'apy gwive, nhande koty gwive jahayhu. Jahayhu mbaraete ete ave. Iporãve ave jahayhu nhande rapixa-pe nhande ae nhande rekove jahayhuha-rami, he'i íxupe.

³⁴Ha Hesu katu ohendu oarandu reheve omombe'u ramo:

—Haimete-ma eremoirũ Nhandejáry nde ruvixarã-pe, he'i íxupe.

Upe rire nonhembopy'agwasúí avave oporandu hagwã Hesu-pe mbava'e-rehe po he'i upéixa.

³⁵Ha Hesu onhemonhe'ẽ nhe'ẽ oiko-vy Nhandejáry róga kakwaa-py. Onhemonhe'ẽ-vy oporandu:

—“Davi remiarirõre voi Cristo nhane remiha'arõ va'e” he'i omombe'u-vy judeu rekombo'ehaty. Ma'erã po he'i upéa hikwái?

³⁶He'i va'ekwe Davi amyri:

“Nhandejáry he'i xe Járy-pe, Egwapy katu xe yke-rehe. Xe orombopu'aka va'erã ne a'e'yha-rehe. Orombopu'akapa peve eregwapy va'erã ereĩ-vy xe yke-rehe.”*

Upéixa ome'ẽ va'ekwe Davi-pe inhe'ẽrã Nhe'ẽ Marangatu tee va'e. ³⁷Ha Davi katu xe Járy-py ohenói va'ekwe íxupe. Aipo ramo hemiarirõ pa? Ha gwemiarirõ-rehe, “Xe Járy” nde'íry, he'i íxupe kwéry Hesu omokirirĩ-vy judeu ruvixa kwéry-pe.*

Ha te'yí jusu ohendu ramo inhe'ẽ, ogwerohory joa íxupe.

“Xáke judeu rekombo'ehaty-gwi” he'i Hesu

(Mt 23.1-12; Lc 20.45-47)

³⁸—Xáke judeu rekombo'ehaty-gwi, he'i onhemonhe'ẽ-vy. —Ani erejapo teĩ ha'e kwéry hembiaipo-rami. Oao puku reheve ogwatase voi. Ogwata oho-vy mba'e jogwa haty-py. Onhemboete va'erã-rehe oho. ³⁹Ojeporahéi haty-py ogwapyse mburuvixa pa'ũmy. Mburuvixa gwapy haty-py ogwapyse onhembovia ramo ojekarugwasu haty-py. ⁴⁰Ha tembirekokwe rembiporu omonda heraha-vy. Upe rire omondo mondo ra'anga rei Nhandejáry-pe heta onhe'ẽ enterove ohexa hagwã. Upe va'e temixagwã rei ra'e. Ombohasa asyve va'erã íxupe kwéry Nhandejáry, he'i judeu rekombo'ehaty-rehe Hesu.

Tembirekokwe okwerĩ va'e

(Lc 21.1-4)

⁴¹Upéi ogwapy-ma Hesu Nhandejáry róga kakwaa-py pirapire imboyru haty rovái. Oma'ẽ heta oĩ va'e-rehe pirapire omboyru ramo hyruty-py. Heta oikotevẽ e'y va'e heta ome'ẽ me'ẽ. ⁴²Ha upéi ou tembirekokwe ogwereco e'y va'e. Mokõi moeda ombohryu, ohupity va'e peteĩ plata hatã.

* 12:30 Dt 6.4-5 * 12:31 Lv 19.18 * 12:36 Sl 110.1 * 12:37 Mt 22.41-46; Lc 20.41-44

⁴³—Peju katu. Peju a-py, he'i gwemimbo'e kwéry-pe. —Anhete ko xe ha'e-ta peẽ-my. Kóá tembirekokwe okwerĩ va'e, hetave ombohyru enterove ombohyru va'e-gwi. ⁴⁴Ha'e kwéry katu heta ogwerekogwi, ome'ẽ. Ha kunha katu opa ogwerekomi va'e hembĩ'u repyrã, ome'ẽmba ete voi, he'i gwemimbo'e kwéry-pe Hesu.

13

Oje'o va'erã kwarahy rendy

¹Ha upéi katu osẽ oho-vy Hesu Nhandejáry róga kakwaa-gwi. Oho jave he'i íxupe hemimbo'e:

—Ema'ẽ ehexa ita iporã va'e, mbo'eháry. Óga tuvixa vixa va'e ehexa, he'i Hesu-pe.

²Ha he'i íxupe Hesu:

—Ehexa katu upéa óga tuvixa va'e, he'i. —Ha upe rire katu ita reta omohãimba va'erã, omosarambipa va'erã. Ndojepota mo'ãvéi-ma ojóehe, he'i gwemimbo'e-pe.*

³Ogwapy oĩ-vy vyvaty Oliveiras ári jave, Nhandejáry róga rovarehéi ogwapy oĩ-vy. Ogwapy ha'e anho jave, oporandu íxupe Pedro, Tiago, João, André ndive:

⁴—Emombe'u katu ore-vy, he'i. —Araka'e tipo omohãimba-ta? Araka'e tipo ojehu va'erã ne remimombe'u? he'i. —Mba'éixa po oroikwaa va'erã imombe'uháry? Ojehu-tama ramo ne remimombe'u gwive, mba'éixa po oroikwaa va'erã imombe'uháry? he'i Hesu-pe hikwái.

⁵Oporandu rire-ma he'i íxupe kwéry Hesu:

—Xáke pene mbotavysse va'erã. ⁶Heta ojekwaa va'erã xe réry-py vérami mo'ã ou va'e. “Xe Cristo pene remiha'arõ va'e voi” he'i va'erã mo'ã ójehe onhemocristo ra'angase-vy, oporombotavy rei-vy. ⁷Pehendu va'erã herakwã hi'agwĩ pendéhegwi onhorairõ ramo. Mombry onhorairõ va'e rerakwã pehendu ave va'erã. Pehendu ramo, ani pekyhyje teĩ upéa-rehe. Upéa oiko va'erã voi. Upéa oiko-ma ramo, ne'írá vyteri ogwahẽ pehendu va'e ijapy-py. ⁸Ha tetã mygwa onhorairõ va'erã outro tetã mygwa ndive. Ha mburuvixagwasu re'yí onhorairõ va'erã outro mburuvixagwasu re'yí ndive. Oiko oiko ha-rupi ae oiko va'erã yvyryí. Ndaiporivéi-ma ho'u va'erã. Upéa-rupi pehasa asy ramo, ne'írá vyteri pehasa asy ete peiko-vy. Kunha imemby-ta va'e hasy íxupe. Ha upe rire katu hasyve syve oho-vy íxupe imemby hagwã. Upéixa ete yvypóry ohasa asy va'erã. Ha upe rire katu ohasa asyve syve oho-vy, he'i íxupe kwéry Hesu.

⁹—Xáke pende pyhy va'erã pende reraha-vy mburuvixa oĩ ha-py. Ojeporahéi haty-py pene nupã va'erã. Xéhegwi pene monhe'ẽ uka va'erã mburuvixa rovagwy-py. Mburuvixagwasu rovagwy-rupi ave pene monhe'ẽ uka va'erã. Xe mombe'u mbe'u hagwã-py pene monhe'ẽ uka va'erã. Xéhegwi katu pende rereko va'erã akóí-rami. ¹⁰Ha xe rehegwa nhe'ẽ porã katu pemombe'u ranhe va'erã enterove tetã-my. Ha upe rire ae katu ombopapa ave-ma va'erã ko vvy, he'i. ¹¹—Pene monhe'ẽ uka-vy pende reraha va'erã. Pende pyhy pende reraha-vy ramo oikwaa hagwã pene rembiapo vai para'e, ani erejapura teĩ ere va'erã-rehe. Ou rei va'erã nde juru-py ne nhe'ẽrã. Ome'ẽ va'erã nde-vy ne nhe'ẽrã Nhe'ẽ Marangatu tee va'e. Upéixa ramo eremombe'u va'erã, he'i. ¹²—Ha tyke'yry oipyyhy va'erã heraha-vy gwyvúry ojuka uka hagwã. Ha túvy ojuka uka va'erã gwa'yry gwajúry ave. Ha ta'yry kwéry tajy kwéry ave ogwerekogwi asy va'erã gwu osy ave ojuka uka hagwã. ¹³Ha xe-rehe ha-py katu enterovéa ndaija'e mo'ãi pende-rehe, he'i. —Ha Nhandejáry rape-gwĩ ova e'y va'e katu ko vvy opa ete peve, oresende va'erã íxupe Nhandejáry, he'i íxupe kwéry Hesu.*

¹⁴Upéi oiporu Hesu Nhandejáry kwatia nhe'ẽ:

—“Oĩ va'erã upe ivai ete va'e, pene momarã va'e. Nhandejáry róga kakwaa koty py-gwi pene mosẽ va'erã”*

he'i Hesu. —Upéa nhe'ẽ eikwaa porã äy eremone'ẽ va'e.

Upéi he'i Hesu:

* 13:2 Mt 24.1-2; Lc 21.5-6

* 13:13 Mt 24.3-14; Lc 21.7-19; 2 Tm 3.1-9

* 13:14 Dn 9.27; 11.31; 12.11

—Yma he'i hagwe-rami, pehexa va'erā upe ivai ete va'e Nhandejáry róga-py, gwenagwā e'ŷ ha-py omonhemo'y ramo. Pehexa-ma ramo upe va'e, pya'e voi tokanhymba kuri Judéia vvy pygwa kwéry oje'ói-vy. Yvyatygwasu ári-rupi tokanhy kuri oje'ói-vy. ¹⁵Ogwey ramo óga ári oĩ va'e, ani oike koty-py ogweraha hagwā mba'eve. ¹⁶Ha kokwe-py oĩ va'e ani oho jevy ranhe hóga-py oipyhy hagwā oao. Pya'e ae kuri tokanhymba katu oje'ói-vy. ¹⁷Upe áry-rupi iporiahu va'erā kunha imemby-ta va'e omokambu va'e ave. ¹⁸Ro'y eterei-rupi pekanhy ramo, ivaive arā peẽ-my. Upéa-rehe pemoĩ katu Nhandejáry-pe pene nhe'ẽ pono ivai ete peẽ-my. ¹⁹Upe áry-py ohasa asy eterei va'erā vvyppóry kente kwéry gwive. Ko vvy rembypy Nhandejáry remimoingokwe oiko jave, upe áry e'ŷ mbovyve, ndohasa asy etéiry va'ekwe. Upe ary-py ae ohasa asy eterei va'erā. Ha upe áry rire katu ndohasa asy etevéi-ma va'erā.* ²⁰Ha Nhandejáry katu nombohasa asy hetave áryry va'erā. Ombohasa asy hetave áry ramo ra'e, opa-ma arā ra'e enterove ko vvyppóry. Ha gwembiporavo-rehe opena porā-gwi ae katu, nombohasa asy hetave áryry va'erā, he'i.

²¹—Upe-ma ramo, “Ema'ẽ katu. Ko va'e Cristo voi” oĩ he'i va'erā para'e peẽ-my. “Ema'ẽ katu. Upe va'e Cristo voi” oĩ he'i va'erā para'e peẽ-my. Ani perovia inhe'ẽ. ²²Ojekwaa va'erā, “Cristo pene remiha'arõ va'e voi xe” he'i va'e mo'ã ójehe peẽ-my. “Nhandejáry nhe'ẽ-py mba'e xe-vy anho oikwaa uka xe remimombe'urā” he'i va'e mo'ã ójehe, ojekwaa va'erā ou-vy. Hexapyrã-rupi voi hembiaopo va'erā ohekoporu ou-vy ramo. Ohexa uka va'erā gwembiaopo tuvixa va'e, ikatu ramo, itavy hagwā mo'ã íxupe Nhandejáry rembiporavo. ²³Xáke. Ani joty pende tavy íxupe. Ko'ã mba'e oiko e'ŷ ngatu amombe'u-ma peẽ-my, he'i íxupe kwéry Hesu.*

²⁴—Upe-ma ramo ohasa asy ete rire-ma, oje'o va'erā kwarahy rendy. Ha jasy nahendy mo'ávéi. ²⁵Ha okúii va'erā yváy-gwi jasytata. Ova ova gwendagwe-gwi entéro yváy rehegwa imbarae va'e.* ²⁶Upe-ma ramo xe rexa va'erā vvyppóry kente kwéry gwive. Xe Nhande Ryke'y tee va'e-pe xe rexa va'erā aju jave arai-rupi. Xe pu'akaha tee jave nhande resa mbojev va'erā xe rendy porã-rupi xe rexa va'erā, he'i. ²⁷—Ambou va'erā xe rembigwái yváy pygwa ombojogweroaty hagwā xe rembiporavokwe. Opa-rupigwi ombojogweroaty va'erā íxupe kwéry. Kwarahy resẽ-gwi, ka'aru-gwi ave ombojogweroaty va'erā heraha-vy. Arapopy-gwi, vvy apy-gwi vvy apy arendaja gwive ombojogweroaty va'erā, he'i íxupe kwéry omombe'u-vy.*

Hesu omombe'u gwemimbo'e kwéry-pe orepapa hagwā

(Mt 24.32-44; Lc 21.29-36)

²⁸Upéi he'i jevy Hesu:

—A'ŷ amombe'u-ta peẽ-my ojehu va'erā rehegwa nhe'ẽ figo máta rehegwa-rami, he'i, —peikwaa porã hagwā xe agwahẽ jevytaha áry. Oĩ figo máta. Hoky kyrúu jevy-ma ramo, hogwe pyahu jevy-ma ramo, pehexa-ma voi. Pehexa ramo, peikwaa-ma voi opa-ma ra'e ro'y. Áry raku jevy-tama. ²⁹Upéixa ete upe ojehu va'erā gwive pehexa ramo, peikwaa-ma va'erā oike-ta va'e-rami xe agwahẽ jevytamaha áry. ³⁰Anhete ko xe ha'e-ta peẽ-my. Entéro peẽ-my xe remimombe'u oiko va'erā. Judeu kwéry oiko reheve joty ojehu va'erā. ³¹Opa va'erā áry vvy ave. Ha xe remimombe'u xe nhe'ẽ katu nombopapa mo'áiry, he'i.

³²—Mbava'e áry-py po ojehu va'erā ndajaikwaáiry. Araka'e óra-ma po ojehu va'erā ndajaikwaáiry. Nhandejáry rembigwái yváy pygwa jepe ndoikwaáiry. Xe ta'yry jepe ndaikwaái ave. Nhandejáry xe Ru ha'e anho mante oikwaa. ³³Araka'e óra-ma po aju jevy va'erā ndapeikwaái-gwi, xáke, perepara voi katu. Emondo mondo katu ave Nhandejáry-pe ne nhe'ẽ, he'i íxupe kwéry.

³⁴Upéi oiporu jevy Hesu óga járy rehegwa nhe'ẽ jarepara porã hagwā nhande-vy oikwaa uka-vy:

—Oĩ va'ekwe óga járy, he'i. —Heta oĩ hembigwái. Ijáry oho ramo mombyry, oheja gwembigwái onhangareko hagwā hóga-rehe. Peteĩ teĩ-pe hembiaoporã ome'ẽ. “Erepara

* 13:19 Dn 12.1; Ap 7.14 * 13:23 Mt 24.15-28; Lc 21.20-24; 2 Ts 2.3-12 * 13:25 Is 13.10 * 13:27 Mt 24.29-31; Lc 21.25-28; 2 Pe 3.10-13; Ap 1.7

porã hese” he'i okê-rehe onhangareko va'e-pe. ³⁵ Ha upéixa ha'e-ta peê-my, “Óga járy” he'i xe-rehe. Upéa-gwi perepara katu. Nderekwaái voi araka'e po xe aju va'erã. Ka'aru ete para'e, pyhare mbyte para'e, gáju sapukái-py para'e, ko'ê hembypytĩ jave para'e. ³⁶ Upéa-gwi perepara katu pono peha'arõ e'ÿ reheve aju pya'e orotopa peke jave. ³⁷ Peê-my ha'eharami, ha'e-ta enterovéa-pe oikwaa hagwã. Xe ra'arõ arõ katu perepara-vy, he'i íxupe kwéry Hesu.*

14

Judeu ruvixa kwéry onhomb'o'e mbo'e Hesu-rehe ijuka hagwã

(Mt 26.1-5; Lc 22.1-2; Jo 11.47-53)

¹ Mokõi áry rire oiko-ta areteguasu héry va'e páscoa. Upe áry-py nanhambovúiry va'ekwe ja'u va'erã. Nhane mandu'a ave nhane rembypy ojerereko asy hagwe-rehe. Yma ete upe áry-py osê va'ekwe gwĩ ipu'aka va'e po-gwi. Ha upéi katu ne'írã oiko ramo areteguasu, pa'i ruvixa kwéry judeu rekombo'ehaty ave onhomb'o'e mbo'e Hesu-rehe hikwái:

—Nhambotavy Hesu-pe jaipyhy hagwã íxupe jajuka hagwã, he'i. ²—Arete-py ae ani jaipyhy íxupe, he'i. —Atýra-py jaipyhy ramo, onhembopoxy arã ijaty jaty va'e kente kwéry nhande-vy, he'i ojóupe Hesu pyhyharã kwéry. Upéa-gwi oipyhy nhemise Hesu-pe.

Kunha onhohê Hesu akã-rehe omohyakwã porã-vy íxupe

(Mt 26.6-13; Jo 12.1-8)

³ Ha Hesu katu oime Betânia tetã'i-my. Simão róga-py oime. Ha Simão mba'asy vai-gwi ijai aipa va'ekwe nhahenói íxupe va'e. Ogwapy okaru-vy Hesu. Okaru ramo, ogwahê ou-vy petei kunha. Ogweru hyakwã porã tee va'e. Hyru reheve ogweru. Ha hyru ojejapo va'ekwe ita kyra rendy-gwi héry va'e alabastro. Ha hyakwã porã va'e héry nardo. Ha nardo hepy eterei voi. Ojoka onhohê Hesu akã-rehe omohyakwã porã-vy íxupe.

⁴ Ha upe-py oĩ ipoxy va'e:

—Ma'erã po onhohê rei upe hyakwã porã va'e Hesu akã-rehe? he'i ojóupe oporandu-vy. —Hepy eterei va'e onhohê rei, he'i ojóupe hikwái. ⁵—Ma'erã po ra'e hepy-rehe ae nome'ëiry, he'i. —Iporiahu va'e kwéry-pe nham'e'ë ramo ra'e hyakwã va'e repykwé, iporãve arã ra'e, he'i. —Hyakwã repy petei ro'y tembiapo repy para'e, hetave para'e, he'i onhe'ëngi ëngi-vy kunha-pe hikwái.

Upéixa ramo kunha ndive ipoxy voi hikwái.

⁶ Upéi he'i íxupe kwéry Hesu:

—Eheja katu, he'i. —Ma'erã po ko kunha-pe eremoakã rasy? he'i. —Hembiapo porã ete voi xe-vy. ⁷ Pene pa'ũ-my oime meme va'erã iporiahu va'e kwéry. Ereme'ëse ramo, ereme'ë-ta íxupe kwéry. Ha xe ae katu naime meméi va'erã aiko-vy pene pa'ũ-my, he'i. ⁸—Ha ko kunha katu ome'ëseha-rami ome'ë xe-vy. Nhamano va'ekwe nhande retেকে nhamohyakwãha-rami, amano e'ÿ ngatu xe mohyakwã ranhe ko kunha, he'i. ⁹—Anhetegwa va'e amombe'u-ta peê-my. Opa-rupi entéro ko yvy-rupi mamo xe rehegwa nhe'ë porã omombe'u mbe'u ha-rupi ave omombe'u va'erã voi ko kunha rembiapo porã imandú'a hagwã hese, he'i gwemimbo'e kwéry-pe Hesu.

Judas oho omombe'u Hesu pyhyharã-pe

(Mt 26.14-16; Lc 22.3-6)

¹⁰ Ha upéi katu oho petei doze hemimbo'e kwéry-gwi. Héry va'e Judas Iscariotes. Pa'i ruvixa kwéry ha-py oho omombe'u Hesu pyhyharã-pe. ¹¹ Ha ha'e kwéry ohendu ramo inhe'ë, ovy'a joa eterei:

—Ereipyhy uka ramo ore-vy, orome'ë-ta nde-vy pirapire, he'i Judas-pe.

Ha Judas katu orepara oiko-vy Hesu-rehe ipyhyharã-pe omombe'uha óra ra'arõ-vy.

*

Hesu gwemimbo'e kwéry ndive okaru imandu'a hagwã páscoa-rehe

(Mt 26.17-30; Lc 22.7-23; Jo 13.21-30; 1 Co 11.23-25)

¹²Ha upéi oiko-ma areteguasú. Upe va'e semana mbojape ovu e'ý va'e ja'u. Upe va'e áry-py jajuka ovexa nhamoka'ê-vy Nhandejáry-pe nhamboete-vy. Upe jave oporandu Hesu-pe hemimbo'e kwéry:

—Kipy tipo orombogwey-ta nde-vy ne remi'urã nhane mandu'a hagwã páscoa-rehe jakaru-vy, he'i íxupe.

¹³Ha Hesu katu omondo mokõi gwenonde:

—Tapeho katu tetã-my, he'i. —Pende topa-ta kwimba'e y ryrú reheve. Tapeho hapkwéri. ¹⁴Oike ramo hóga-py, peje óga járy-pe: “Kipy oĩ nde koty ereiporu e'ý va'e? Aiporu-ta. Xe remimbo'e kwéry ndive akaru hagwã aiporu-ta. Páscoa-rehe xe mandu'a hagwã aiporu-ta, he'i kuri nhane mbo'eháry” peje pemombe'u-vy, he'i íxupe. ¹⁵—Upéi ohexa uka-ta nde-vy koty ijyvate va'e, tuvixa va'e, oĩmba voi va'e. Nhane mohenonde katu upe-py, koty tuvixa oĩmba va'e-py, he'i gwemimbo'e-pe Hesu.

¹⁶Upéi mokõi hemimondo osê oho-vy omohenonde hagwã. Ogwahê ramo, opamba'e ojohu Hesu nhe'ê-py. Upéa-gwi omohenonde okaru hagwã imandu'a hagwã páscoa-rehe.

¹⁷Ha upéi katu ka'aru ete ramo ogwahê-ma Hesu ou-vy. Óga-py ogwahê ou-vy doze gwemimbo'e kwéry ndive. Óga oiporuruka hagwe-py íxupe ogwahê. ¹⁸Okaru joa ramo, he'i íxupe kwéry Hesu:

—Anhetegwa va'e amombe'u-ta peẽ-my, he'i. —Petei pene pa'ũ-my oĩ va'e xe karu rovái xe mombe'u va'erã xe pyhyharã-pe, he'i.

¹⁹Ohendu ramo inhe'ê ojepy'ararahapa-ma hese, ndovy'avéi-ma hikwái:

—Xe para'e ndaxéiry para'e, he'i hikwái onhemopetei teĩ oporandu-vy Hesu-pe.

²⁰—Xe mombe'u va'erã petei xe remimbo'e pende avyte-py oĩ va'e, nha'ê-py opo omói va'e. Xe ndive omoaký va'e mbojape nha'ê-py xe mombe'u va'erã, he'i. ²¹—Xe Nhande Ryke'y tee va'e aha va'erã xe ajejúka uka ha-py. Nhandejáry kwatia nhe'ê he'i hagwe-rami aha va'erã. Ha xe mombe'u va'erã katu xe pyhyharã-pe amboasy eterei íxupe. Ohasa asy eterei va'erã. Iporãve arã araka'e ndoikói ramo araka'e osyrã-pe, he'i gwemimbo'e kwéry-pe.

²²Okaru joa jave Hesu oipyhy mbojape. Otima porã Tupã Nhandejáry-pe. Upéi ombopo mbopóy mbojape. Ome'ê íxupe kwéry omongaru joty:

—Ko, he'i ome'ê-vy íxupe. —Ko mbojape xe rete-rehe ha'e, he'i íxupe kwéry Hesu.

²³Upéi oipyhy ave copo. Otima porã Nhandejáry-pe. Ho'u uka íxupe kwéry ome'ê-vy. Ho'u joa uva rykwere:

²⁴—Ko copo pygwa xe rugwy-rehe he'i. Onhehê va'erã xe rugwy imbaraeete hagwã Nhandejáry remimombe'u. Yma Nhandejáry, “Amopotĩ va'erã kente kwéry-pe” he'i va'ekwe. Upéa nhe'ê imbaraeete-ma va'erã xe rugwy onhehê-ma ramo. Heta kente-rehe ha-py onhehê va'erã xe rugwy, he'i. ²⁵—Ha'e-ta peẽ-my. Ha'u-ma kuri uva rykwere. Áy ae katu nda'u mo'ávéi-ma. Ha upe rire katu, pende ruvixa ramo xe Ru oiko haty-py, ha'u jevy va'erã, he'i. —Upe-py agwahê ramo uva rykwere pyahu ha'u jevy va'erã, he'i gwemimbo'e kwéry-pe.

“Xe ndaikwaái voi, ere va'erã xe-rehe” he'i Pedro-pe Hesu

(Mt 26.31-35; Lc 22.31-34; Jo 13.36-38)

²⁶Upéi Nhandejáry mboete-vy oporahéi joa. Oporahéi rire osê oho-vy Oliveiras vyvaty-py.

²⁷—Peẽ katu pejehesa rerova-ta xéhegwí, he'i íxupe kwéry Hesu. —Oĩ Nhandejáry kwatia nhe'ê he'i va'e a-rami:

“Ajuka va'erã herakwa osarambipa hagwã ovexa hymba kwéry” he'i.*

Yma he'i hagwe-rami, áy xe júka-tama, he'i. ²⁸—Ha upe rire xe anhemoiingove jevy rire katu aha va'erã Galiléia yvy-py. Pene renonde aha ranhe va'erã, he'i íxupe kwéry.

²⁹Upe ramo he'i Pedro:

* 14:27 Zc 13.7

—Gwĩ ne irũ kwéry ndéhegwi ojehesa rerova ramo jepe, xe ae katu ndorohejái joty va'erã, he'i íxupe Pedro.

³⁰Ha Hesu katu he'i:

—Anhete ko xe ha'e-ta nde-vy: Etería ko va'e pyhare-py ne'írã vyteri osapukái ramo gáju imokóiharehe, “Xe ndaikwaái voi” ere va'erã xe-rehe mbohapyha-rehe, he'i íxupe, Pedro-pe.

³¹Ha hatã hatã onhe'ẽ Pedro:

—Xe ajejuka uka-ta ramo jepe ne ndive, ndajehesa rerováí joty va'erã ndéhegwi. “Xe ndaikwaáiry” nda'éiry joty arã katu nde-rehe, he'i Hesu-pe.

Pedro he'i hagwe-rami ave, he'i inhirũ kwéry Hesu remimbo'e.

Hesu pyhyharã onhemoĩ-ma hese hikwái

(Mt 26.36-56; Lc 22.39-53; Jo 18.3-12)

³²Ohopa ogwata-vy hikwái. Getsêmani yvaty oje'e ha-py ogwahẽ oho-vy:

—A-py pegwapy katu, he'i. —Xe anhomongeta jave Nhandejáry ndive, xe ra'arõ ranhe a-py, he'i gwemimbo'e kwéry-pe.

³³Upéi mbohapy ondive ogweraha. Ogweraha Pedro, Tiago, João. Upéi ogwahẽ vy'are'ýgwasu íxupe. Ojepy'ajopy eterei-ma ave oiko-vy:

³⁴—Ogwahẽ-ma vy'are'ýgwasu xe-vy xe juka-ta va'e-rami, he'i. —Epyta a-py. Xe moirũ katu ereke e'ý reheve, he'i íxupe kwéry.

³⁵Upéi ha'e ae oho mbykymi ojeity yvy-rupi. Ojerure Nhandejáry-pe:

—Ikatu-ta ereipe'a xéhegwi xe ajepy'ajopyha? he'i oporandu-vy.

Upéi he'i jevy: ³⁶—Nde katu opamba'e erejapo kwaa va'e, xe Ru, he'i gwu-pe. —Upéa-gwi eipe'a katu xéhegwi xe ajepy'ajopyha. Ereipe'ase ramo, eipe'a katu xéhegwi. Ha ndereipe'aséi ramo, aní joty ereipe'a ave, he'i onhomongeta-vy Nhandejáry ndive.

³⁷Upéi ou jevy mbohapy gwemimbo'e ha-py. Ogwahẽ ramo ikéra otopa:

—Ma'erã po ereke joty ereĩ-vy, Simão? he'i Pedro-pe. —Ma'erã po naxe ra'arõí peteĩ óra-py jepe? Ma'erã nem mixími naxe moirũry? he'i. ³⁸—Epáy katu. Ejapo katu oraçãõ xe ra'arõ-vy. Nerenhembojevavy ukái arã, he'i íxupe. —Nde py'a kyre'ý voi. Ereke e'ý reheve erejapose mo'ã oraçãõ. Ha nde rete katu okese voi, he'i Pedro-pe.

³⁹Upéi oho jevy Nhandejáry ndive onhomongeta-vy. Gwemimbo'e ukwe omombe'u jevy. ⁴⁰Ouri jevy ramo, ikéra otopa jevy-ma. Hapehýi eterei-gwi okepa-ma hikwái. Otĩ-gwi ndoikwaái onhe'erã okwa-vy. ⁴¹Ouri uri. Mbohapyha-rehema ou jevy.

—Ma'erã po ereke joty eretongea-vy? he'i Hesu. —Ha'eve-ma. Ogwahẽ-ma ngatu xe óra. Xe ko Nhande Ryke'y tee va'e xe pyhy uka-tama hekoha vai va'e-pe. Xe me'ẽ va'erã gwĩ ojevavy va'e Nhandejáry kwaa e'ýha va'e po-py, he'i. ⁴²—Epu'ã katu. Jaha. Ehexa katu. Onhemo'agwĩ-ma ra'e xéhegwi ou-vy upe xe pyhy ukaharã, he'i gwemimbo'e-pe.

⁴³Onhe'ẽ jave Hesu, pya'e ogwahẽ ou-vy Judas, peteĩ Hesu remimbo'e kwéry va'e. Heta ou ave hendive ogweru opo-py kyse puku yvyra ave. Ogwahẽ ou-vy pa'i ruvixa kwéry remimbou, judeu rekombo'ehaty remimbou ave. Judeu ruvixa kwéry remimbou ave ogwahẽ ou-vy. ⁴⁴Ha Judas katu Hesu pyhy ukaha he'i ra'e: “Ahexa uka-ta peẽ-my pene rembipyhyse” he'i ra'e. “Upe va'e ahovapyte-ta va'e pene rembipyhyrã voi” he'i. “Peipyhy hatã íxupe heraha-vy pono okanhy” he'i ra'e ipyhyharã-pe. ⁴⁵Áy ou pya'e ha'e anho Hesu oĩ ha-py ohovapyte hagwã Hesu-pe:

—Mbo'eháry, he'i ogwahẽ-vy Judas íxupe.

Upéi ohovapyte Hesu-pe.

⁴⁶Ha upéi katu ha'e kwéry ou onhemoĩ-ma hese oipyhy hagwã íxupe hikwái.

⁴⁷Upe-ma ramo peteĩ upe-py oĩ va'e omopu'ã kyse oikytĩ-vy. Ohaxea pa'i ruvixagwasu rembigwái-pe onambi'o-vy. Ohupity oinambi'o hagwã.

⁴⁸⁻⁴⁹Ha Hesu katu he'i:

—Ma'erã po pegwahẽ peju-vy kyse reheve xe pyhy hagwã peju-vy? Ma'erã po yvyra reheve ave pegwahẽ peju-vy? he'i oporandu-vy íxupe kwéry. —“Hesu oporosakea va'e” peje tipo peju-vy? Ha ndaha'éiry upeixagwa xe. Iko'ẽ ko'ẽ anhemonhe'ẽ nhe'ẽ aiko-vy

Nhandejáry róga kakwaa-py. Anhemonhe'ë meme ramo, xe mokambara voi. Ha naxe pyhýiry voi ra'e. Ha Nhandejáry kwatia nhe'ë imbaraeete voi. Upéa-gwi yma he'i hagwera-rami, áy oiko-ma, he'i íxupe kwéry Hesu.

⁵⁰ Ha upéi katu ha'e anho ete-ma oheja Hesu-pe hikwái. Ohopa íxugwi hemimbo'e kwéry. ⁵¹ Ha upéi oho hapykwéri karia'y. Upe karia'y Hesu rapykwergwa morotí va'e-py mante onnehugwá. Oipyhy-ma mo'á íxupe hikwái. ⁵² Ijao rei oipe'a. Ha karia'y omboi oao oripara oho-vy. Opi-vy oheja oho-vy oaoakwe.

Judeu ruvixa oporandu Hesu-pe hekoha-rehe

(Mt 26.57-68; Lc 22.54-55,63-71; Jo 18.13-14,19-24)

⁵³ Ha upéi katu Hesu pyhy hagwe ogweraha íxupe. Pa'i ruvixagwasu róga kakwaa-py ogweraha Hesu-pe. Upe-py ojogweroaty pa'i ruvixa kwéry. Judeu ruvixa kwéry hekombo'ehaty kwéry ndive ojogweroaty. ⁵⁴ Ha Pedro oho hapykwéri meme. Hesu rapykwéri puku oho. Pa'i ruvixagwasu roka-py oike ogwahé-vy. Polícia kwéry ndive ogwapy oí-vy. Tata ypy-py ojepe'e oí-vy. ⁵⁵ Ha pa'i ruvixa kwéry entéro judeu ruvixa kwéry ndive ojuka ukase voi Hesu-pe. Upéa-gwi oheka heka mo'á Hesu-rehe onhe'ë va'erá. Ha ndotopái voi. ⁵⁶ Heta omombe'u mbe'u apu rei Hesu-rehe. Ha ndaijojái inhe'ë kwéry. Omombe'u joavy avy joty. Upéa-gwi ndaipóri Hesu-rehe onhe'ë hagwá. ⁵⁷ Ha upe rire katu ou onhembo'y va'e omombe'u. Apu rei omombe'u hese:

⁵⁸ —Upéa remimombe'ukwe orohendu va'ekwe oromombe'u-ta peë-my: “Aitypa uka-ta ko Nhandejáry róga kakwaa teko rei rembiapokwe xe ae amopu'á jevy hagwá. Teko rei rembiapo e'ý amopu'á jevy-ta xe. Mbohapy áry-rupi amopu'á jevy-ta. Upéixa he'i Hesu” he'i omombe'u-vy hikwái.

⁵⁹ Ha hemimombe'u katu ndaijojáiry vyteri. ⁶⁰ Omombe'u joavy avy joty. Upe-ma ramo onhembo'y-ma oí-vy pa'i ruvixagwasu ha'e kwéry hovái:

—Ejeapysaka katu, he'i. —Heta ne mombe'u mbe'u hikwái. Ma'erá po neremombe'u mo'ái ne mombe'uhare-pe? he'i Hesu-pe.

⁶¹ Ha ha'e katu opyta okiriri íxugwi. Mba'eve nomombe'úi. Upéi pa'i ruvixagwasu he'i: —Nde pa Cristo, nhane remiha'aró va'e? Nde pa Nhandejáry onhemomba'egwasu va'e ra'y? he'i jevy íxupe, Hesu-pe, omonhe'ëse-vy.

⁶² —Xe ko ha'e voi, he'i. —Xe Nhande Ryke'y tee va'e-pe xe rexa va'erá Nhandejáry yke-rehe ijakatúa-koty agwapy ramo xe rexa va'erá. Imbaraeteve va'e Nhandejáry. Arai-rupi xe agwey ramo xe rexa va'erá, he'i onhemombe'u-vy judeu ruvixa-pe.

⁶³⁻⁶⁴ Upéa nhe'ë ogweropoxy pa'i ruvixagwasu. Ogwerovái-gwi omondo oao:

—Pehendu-ma voi inhe'ë vaiha, he'i. —Outro imombe'uhará-rehe nanhaikotevëiry-ma, he'i. —Ojéhegwi rei onhe'ë vai-ma, onhemonhandejáry-vy mo'á, he'i hese. —Mbava'e tipo pejapo-ta hese? he'i íxupe kwéry oporandu-vy:

—Tomano katu, tojejuka katu, he'i joa joty voi hese hikwái.

⁶⁵ Upéi onygwō nygwō Hesu-rehe. Ohesagwá ojokwa. Osokea kea íxupe opo-py:

—Emombe'u ore-vy, kiva'e va'e ne nupá, he'i oinupá nupá-vy íxupe hikwái. Oinupá nupá ave íxupe policía kwéry.

“Xe ndaha'úi Hesu ndivegwa” he'i mo'á Pedro

(Mt 26.69-75; Lc 22.56-62; Jo 18.15-18,25-27)

⁶⁶ Ha Pedro katu opyta oí-vy oka-py, pa'i ruvixagwasu rokē rovagwy-py. Upe-ma ramo ogwahé ou-vy kunhatai pa'i ruvixagwasu rembigwái va'e. ⁶⁷ Ohexa Pedro-pe ojepe'e ramo. Omanha hova-rehe:

—Upe Nazaré pygwa ndive ereiko va'e voi nipo nde ra'e. Hesu ndive ereiko va'e voi ave nde, he'i íxupe hembigwái.

⁶⁸ —Ndaikói va'e voi xe, he'i. —Ndaikwaáiry mba'eve xe, he'i. —Ne nhe'ë katu ndaikwaái voi, he'i. —Mbava'e rehe po aipo ere, ndaikwaái voi xe, he'i mo'á íxupe Pedro.

Hesu irū e'ý-rami ojejapo ha'e. Upéi katu osē oho-vy mbykymi. Okē-my oho. Ha osapukái gáju.

⁶⁹ Ha ohexa jevy-ma íxupe hembigwái:

—Hesu ndivegwa voi upe va'e, he'i jevy upe-py oĩ va'e-pe.

⁷⁰—Naháni, ndaxéiry, he'i jevy Pedro kunhataĩ-pe.

Upe riremí he'i jevy íxupe upe-py oĩ-vy.

—Galiléia pygwa voi nde. Hesu ndivegwa voi nipo ra'e nde, he'i Pedro-pe.

⁷¹Upe ramo he'i:

—Xe apu ramo, taxe moingo asy katu Nhandejáry, he'i. —Upe kwimba'e ne remi-mombe'ukwe ndaikwaái voi xe, he'i mo'ã íxupe Pedro.

⁷²Ha upéi imokõiha-rehema osapukái pya'e jevy gaju. Imandu'a-ma Hesu nhe'ëgwe-rehe, “Ne'írã osapukái ramo gáju imokõiha-rehe, Xe ndaikwaáiry, ere va'erã xe-rehe mbohapyha-rehe”. Upéa nhe'ë-rehe imandu'a-ma ramo Pedro, ojahe'o-vy hasẽ.

15

Hesu ojereraha mburuvixagwasu Pilatos renda-py

(Mt 27.1-2,11-26; Lc 23.1-5,13-25; Jo 18.28-19.16)

¹Ko'ẽmba-ma ramo ojogweroaty jevy pa'i ruvixa kwéry, judeu ruvixa kwéry ndive, judeu rekombo'ehaty ndive ave. Entéro judeu ruvixa kwéry gwive ojogweroaty onhomongeta-vy:

—Mbava'e tipo jajapo-ta Hesu-rehe? he'i onhombo'e mbo'e-vy hese.

Upéi oikwaa-ma ramo, onhapytĩ-ma íxupe hikwái. Ipokwaha reheve ogweraha mburuvixagwasu Pilatos po-py ome'ẽ-vy.

²—Nde tipo ereiko ra'e judeu kwéry ruvixagwasu ramo? he'i oporandu-vy íxupe Pilatos.

—Nde ae xe renói voi. “Judeu kwéry ruvixagwasu” nde ae ere-ma xe-rehe. Xe voi, he'i joty íxupe Hesu onhemombe'u-vy.

³Ha pa'i ruvixa kwéry heta omboja rei inhe'ẽ hese va'e.

—Hembiapo vai-ma, hembiapo vai-ma, he'i joa hese.

Ha Hesu katu nomombe'uvéiry.

⁴—Heta nde-rehe nhe'ë onhemboja mboja rei va'e. Ma'erã po nerenhemombe'úiry? he'i jevy íxupe Pilatos oporandu-vy.

⁵Ha Hesu katu mba'eva joty nomombe'úiry. Nonhemombe'úi-gwi, “Ma'erã po nonhemombe'uséiry?” he'i ojéupe opondera-vy hese.

⁶Ha oiko jave aretegwasu, oĩ opoi uka íxugwí va'erã. Peteĩ onhemoĩ preso va'ekwe-gwí oĩ opoi uka jevy va'erã imondo-vy mburuvixagwasu-pe. Upe ijaty va'e kwéry ojerure va'ekwe-gwí opoi uka-ma imondo-vy. ⁷Oĩ hembiapresakwe oporojuka va'ekwe. Ohekoviarõ hagwã mo'ã mburuvixagwasu-pe, oporojuka va'ekwe. Indive kwéry oĩ héry va'e Barrabás. ⁸Ha upéi katu ou ijaty va'e ojerure-vy ojapo hagwã íxupe kwéry ojapo japo hagwe-rami:

—Epoi katu ore-vy toho jevy aretegwasu-py erepoi meme hagwe-rami, he'i Pilatos-pe hikwái.

⁹⁻¹⁰Ha mburuvixa oikwaa pa'i ruvixa kwéry rekoha vaiha. Ohexa kwaa hese: “Ndajja'éi-gwi rei hese, oipyhy ra'e íxupe heru-vy xe-vy hikwái” he'i ojéupe mburuvixa. Upéa-gwi he'i ijaty va'e-pe:

—Peipota tipo apoi peẽ-my upe judeu kwéry ruvixagwasu-gwí? he'i íxupe kwéry oporandu-vy.

¹¹Ha pa'i ruvixa kwéry katu he'i:

—Ejerure katu Hesu rekovia Barrabás-rehe, he'i jevy jevy ijaty va'e-pe ojojurupya opo'ẽ-vy hikwái.

Pa'i ruvixa nhe'ẽ-py he'i Pilatos-pe ijaty va'e:

—Epoi ore-vy íxugwí, Barrabás-gwí toho, he'i.

¹²—Aipo ramo, mbava'e tipo ajapo-ta Hesu-rehe? Upe va'e judeu ruvixagwasu pene remihenói, he'i jevy íxupe kwéry.

¹³—Ejuka uka katu íxupe. Kurusugwasu-rehe ejuka uka katu íxupe, he'i joa joty íxupe onhe'ë hatã-vy.

¹⁴—Ajuka rei va'erā. Nahembiapo vaíry voíte Hesu ra'e, he'i íxupe kwéry Hesu-rehe.

—Emboja katu, emboja katu imoĩ-vy kurusugwasu-rehe omano hagwã, he'i joa joa hikwái onhe'ẽ hatãve täve-vy.

¹⁵ Ha Pilatos katu ombovy'ase íxupe kwéry. Upéa-gwi ha'e kwéry inhe'ẽ-py opoi imondo-vy íxugwi. Barrabás-gwi opoi Pilatos. Upéi he'i ombopi hagwã Hesu-pe. Ome'ẽ ijukaharã-pe omboja hagwã kurusugwasu-rehe ijuka-vy.

Soldado kwéry onhembohory Hesu-rehe

(Mt 27.27-31; Jo 19.2-3)

¹⁶ Ha upéi katu soldado kwéry ogweraha koty-py Hesu-pe. Mburuvixa róga kakwaa-py ogweraha íxupe. Hoga kakwaa héry pretório. Upe-py enterove soldado gwive onhomboatypa hese. ¹⁷ Omonde Hesu-rehe ao pytä va'e. Upéi nhuatĩ-gwi ojapo íxupe ijegwaka ra'angarã omoĩ hagwã inhakã-rehe. ¹⁸ Upe rire omboete ra'anga anga rei íxupe onhembohory-vy:

—Toiko are katu, toiko are katu judeu ruvixagwasu, he'i onhembohory-vy hese.

¹⁹ Onhakärupã rupã íxupe takwáry-py. Onygwõ nygwõ hese. Onhesũ nhesũ gwety'ã-rehe omboete a'ã a'ã hagwã íxupe. ²⁰ Onhembohorypa rire hese, omboi íxugwi ao pytä va'e. Omonde jevy hese ijao. Upe rire ogweraha Hesu-pe omboja hagwã kurusugwasu-rehe ijuka-vy.

Omboja Hesu-pe kurusugwasu-rehe ijuka-vy

(Mt 27.32-44; Lc 23.26-43; Jo 19.17-27)

²¹ Upe ramo oĩ ohasa rei va'e. Upe va'e Cirene pygwa héry va'e Simão. Simão Alexandre ru, Rufo ru ave. Tetã jerekwe-gwi ou ra'e. Ha soldado katu ogweraha uka íxupe Hesu kurusugwasurã. ²² Upéixa ramo ogweraha Hesu-pe. Gólgota oje'e ha-py ogweraha. Akãgwe rendaty-rehe he'i Gólgota. ²³ Upe-py ogwahẽ ramo, uva rykwere-py omoĩ pohã héry va'e mirra. Ome'ẽ íxupe ho'u uka-vy. Ome'ẽ íxupe pono ohendu eterei ojéupe hasy va'e. Ha ndo'uíry. ²⁴ Ha upéi katu ijuka hagwã-pyma ogwenogwahẽ omboja íxupe kurusugwasu-rehe. Upéi omboja rire soldado kwéry ohuga onhomboja'o ja'o hagwã Hesu aokwe-rehe. Ogana gana va'e ogweraha ijaokwe. ²⁵ Pyhareve asaje ramo, omboja-ma íxupe kurusu-rehe imoĩ-vy. ²⁶ Ha Hesu-rehe hemimombe'ukwe ohai omoĩ ikurusu-rehe inhakã ári. “Kóa judeu ruvixagwasu” he'i imoĩ-vy.

²⁷ Oĩ ave mokõi imonda va'e kurusu-rehe omboja ave imoĩ-vy. Hesu yke-rehe joty ave omoĩ peteĩ ijakatúa-koty, peteĩ ijasu-koty. Imbyte-py oĩ Hesu. ²⁸ Ogwereko íxupe ojevavy va'ekwe-rami. Nhandejáry kwatia nhe'ẽ he'i hagwe-rami, äy oiko-ma. Upéa-gwi ogwerekko asy íxupe. ²⁹ Gwĩ ohasa oiko-vy va'e opuka hatã Hesu-rehe. Onhakäreity ity onhembohory-vy hese:

—Aa! Ereity-ta mo'ã Nhandejáry róga kakwaa eremopu'ãmba jevy hagwã mbohapy áry-rupi, he'i mo'ã. ³⁰—Aipo ramo, egwejy katu kurusu-gwi erenheresende-vy, he'i.

³¹ Ha upéixa ave onhembohory hese ojéupe pa'i ruvixa kwéry, judeu rekombo'ehaty ndive:

—Upéa opororesende va'ety. Ha ndaipu'akáiry gwekove-rehe onheresende hagwã, he'i hese onhembohory-vy. ³²—“Xe Cristo nhane remiha'arõ va'e. Xe Israel kwéry ruvixagwasu” he'i kuri ójehe. —Aipo ramo äy togwejy katu kurusu-gwi. Jahexa ramo, jarovia arã, he'i joa hikwái.

Hesu jave kurusugwasu-rehe onhemboja va'ekwe onhe'ẽ rei rei ave hese.

Omano Hesu

(Mt 27.45-56; Lc 23.44-49; Jo 19.28-30)

³³ Upéi kwarahy mbyte-py pytũmba-ma upe yvy ári. Upe tetã-rehe pytũmba ete-ma. Mbohapy óra peve opyta. Ka'arugwasu peve opyta. ³⁴ Ka'arugwasu ramo onhe'ẽ hatã Hesu. Ha'e ae onhe'ẽ-py onhe'ẽ:

—Eloí, Eloí, lamá sabactâni? he'i ha'e ae onhe'ê-py. Upéa he'ise, “Tupã xe Járy, Tupã xe Járy, ma'erã-gwi po xe rejapa xe anho eterei?” he'i oporandu-vy.*

³⁵ Ha upe-py oĩ inhe'ê ohendu va'e:

—Ejeapysaka katu. Upéa ohenói Elias-pe, he'i mo'ã Hesu-rehe.

³⁶ Upe ramo oripara ogweru bucha. Omoaký uva rykwere hepy ete e'ý va'e-py. Takwáry-py omoĩ. Oipyte uka Hesu-pe omboy'u-vy:

—Eheja katu. Ou-ta para'e Elias ombogwejy hagwã kurusu-gwi oresende-vy, he'i Hesu-rehe hikwái.*

³⁷ Ha upéi katu onhe'ê hatã jevy-ma Hesu. Ha upe rire katu omano-ma. ³⁸ Upe-ma ramo pya'e ojeka Nhandejáry róga kakwaa pygwa okégwasu nhugwãha tuvixa ete va'e. Osoro hatã. Yvate-gwi vyv peve ojeka hatã ou-vy. ³⁹ Ha Hesu rovagwy-rupi oĩ capitão, soldado ruvixa va'e. Onhe'ê hatã omano hagwã ramo, ohexa íxupe:

—Upe va'e Nhandejáry ra'y tee voi nipo ra'e, he'i Hesu-rehe ohexa-vy.

⁴⁰ Ha kunha heta oĩ upe-py. Mombyry-gwi oma'ê joa Hesu-rehe hikwái. Oĩ Maria Madalena, oĩ Salomé, oĩ Maria, ha'e Tiago tyvýry José sy ndive voi. Tyke'ýry héry ave Tiago ikarapemi va'e. ⁴¹ Upéa kunha kwéry omoirũ irũ ra'e Hesu-pe Galiléia-rupi. Ome'ê me'ê ra'e Hesu-pe hemikotevê. Oĩ ave heta kunha ambue va'e hendive ou va'ekwe Jerusalém-my.

Omoĩ itakwa-py Hesu retekwe

(Mt 27.57-61; Lc 23.50-56; Jo 19.38-42)

⁴² Ka'aru ete-ma. Upe áry-py judeu kwéry omoĩ porãmba gwemi'urã iko'ê ho'u va'erã. Ndoikói vyteri pytu'uha áry. ⁴³ Ndoikói-gwi vyteri, oho José Pilatos renda-py. Upe va'e José Arimatéia pygwa, judeu ruvixa va'e, onhemboete va'e voi. Ha'e ave oha'arõ arõ va'e Nhandejáry nhande ruvixa-pe omoirũ hagwã. Upéixa ramo onhembopy'agwasu oho hagwã Pilatos renda-py ojerure Hesu retekwe-rehe. ⁴⁴ Ha Pilatos ohendu ramo omanoha,

—Pya'e omano ra'e, he'i Hesu-rehe opondera-vy.

Upéi ohenói upe soldado ruvixa-pe oporandu hagwã íxupe:

—Omano-ma tipo ra'e Hesu? he'i soldado ruvixa-pe.

⁴⁵ —Ha'e voi. Omano ete-ma voi, he'i íxupe omombe'u-vy.

Upe rire he'i José-pe Pilatos:

—Aipo ramo eraha hetekwe, he'i.

⁴⁶ Ha upéi katu José oho ojogwa ao morotĩ iporã va'e onhugwã hagwã hetekwe. Ombogwejy kurusu-gwi. Onhugwã ao morotĩ-my. Upe reheve omoĩ itakwa-py hetekwe. Ita-gwi ojo'o ra'e hetekwe renagwã. Upe-py omoĩ hetekwe. Upéi omboapajeréi imondo-vy itagwasu. Omboty hagwã itakwa rokê omboapajeréi itagwasu. ⁴⁷ Ha Maria Madalena José sy ndive oma'ê oĩ-vy. Ohexa joty omoĩ ramo hetekwe.

16

Hesu onhemoingove jevy-ma

(Mt 28.1-10; Lc 24.1-12; Jo 20.1-10)

¹ Pytu'uha áry rire oho Salomé ndive Maria Madalena, Maria Tiago sy ave. Oho ojogwa pohã hyakwã va'e omana hagwã hetekwe-rehe. ² Iko'ê ramo, domingo-py osê-ma ramo kwarahy, voi oho ogwata-vy. Itakwa-py oho. ³ Oho jave,

—Kiva'e oipe'a-ta nhande-vy itagwasu itakwa rokê-gwi, he'i ojóupe oporandu randu-vy.

⁴ Oma'ê ramo ohexa-ma itagwasu ojepe'a va'ekwe. Ha ita tuvixa eterei voi. ⁵ Ha upéi katu oike itakwa rye py-py. Oike ramo ha'e-py Nhandejáry rembigwái karia'y-pe ohexa-ma. Ohexa ogwapy oĩ-vy ramo ijyke-rehe. Ao morotĩ puku va'e omonde ramo ohexa. Ohexa ramo, onhemondýi-ma.

⁶ Ha he'i íxupe karia'y:

—Aníke penhemondýi teĩ, he'i. —Peju-ma ra'e, he'i. —Peheka voi peju-vy Hesu Nazaré pygwa kurusu-rehe onhemboja va'ekwe retekwe-pe, he'i. —Oikove jevy-ma kuri Hesu.

* 15:34 Sl 22.1 * 15:36 Sl 69.21

Peheka ramo jepe ndaiporivéi-ma ko'a-py. Oho-ma kuri. Peju katu peë pema'ë hupagwe-rehe. Hendagwe rei-ma oï, he'i. ⁷—Ha upe rire katu ekwa emombe'u hemimbo'e kwéry-pe, Pedro-pe ave. Ere íxupe: “Hesu oho-ta Galiléia tetã-my. Ne renonde oho-ta. Upe-py erehexa va'erã íxupe. He'i hagwe-rami erehexa va'erã” he'i íxupe kwéry karia'y. ⁸Ha kunhagwe katu osë pya'e itakwa-gwi. Oripara oho-vy. Ipy'a ryríi-ma onhemondýi-gwi. Okyhyje-gwi nomombe'úiry avave-pe.

Hesu ojehexa uka jevy-ma

(Mt 28.16-20; Lc 24.13-35; Jo 20.11-18)

⁹Ha Hesu katu, oikove jevy ramo, ojehexa uka jevy. Voi domingo-py ojehexa uka Maria Madalena-pe. Íxugwi omosë va'ekwe imondo-vy sete anháy. Áy katu íxupe anho ranhe ojehexa uka Hesu. ¹⁰Ohexa rire, Maria oho omombe'u Hesu irügwe-pe. Ha'e kwéry hasë ojahe'o-vy hikwái. Upe jave omombe'u:

¹¹—Hesu oikove jevy-ma, he'i omombe'u-vy. —Ahexa jevy-ma íxupe kuri, he'i íxupe kwéry omombe'u-vy.

Ha ohendu ramo inhe'ë ndogweroviáiry voi íxupe. ¹²Ha upe rire katu Hesu ojehexa uka jevy moköi oirügwe-pe. Gweko ambue va'e-rami ojehexa uka íxupe tetã jere-rehe ogwata ramo oiko-vy. Oirügwe ramo jepe ndoikwaavéiry oirügwe. ¹³Ha oikwaa-ma ramo oho jevy omombe'u Hesu remimbo'e kwéry-pe. Ha ndogweroviáiry voi inhe'ë. ¹⁴Ha upéi katu ojehexa uka jevy onze gwemimbo'e kwéry-pe. Okaru joa jave ojehexa uka íxupe. He'i íxupe kwéry Hesu:

—Xe rexahare xe mombe'u ramo nde-vy, ma'erã ndereroviáiry? he'i. —Xe aikove jevymaha omombe'u ramo nde-vy, ma'erã ndereroviái? Nane akã porãi-gwi, nane mba'e reroviáiry-gwi, xe mombe'u ramo ndereroviáiry, he'i íxupe kwéry.

¹⁵Upéi he'i íxupe kwéry:

—Tereho opa-rupi emombe'u Nhandejáry rehegwa nhe'ë porã. Entéro yvypóry-pe kente kwéry va'e-pe gwive emombe'u.* ¹⁶Upe ogwerovia va'e, onhemongarai va'e ave, oresende va'erã íxupe Nhandejáry. Ha ogwerovia e'ÿ va'e katu, nomboyke mo'áiry voi íxugwi hembiaipo vaikwe, he'i íxupe kwéry. ¹⁷—Ha xe rerovia va'e katu xe réry-py omosë va'erã imondo-vy anháy. Áy oikwaa e'ÿ nhe'ë va'e-py onhe'ë va'erã. ¹⁸Oipyhy ramo mbói reheve, naimboirasy mo'áiry. Hi'upy e'ÿ jepe ho'u ramo, ndahasýi ave arã. Hasy va'e-rehe omoí ramo opo, ombogwera va'erã íxupe. Upéixa voi hexapyrã-rupi hembiaipo porã porã va'erã xe rerovia va'e, he'i íxupe kwéry Hesu.

Ogwerojeupi Hesu-pe Nhandejáry

(Lc 24.50-53; At 1.6-11)

¹⁹Upéi omombe'u rire ogwerojeupi heraha-vy íxupe Nhandejáry. Ha Hesu ogwapy-ma Nhandejáry yke-rehe ipu'aka reheve. ²⁰Ha hemimbo'e kwéry katu osë oho-vy opa-rupi onhemonhe'ë nhe'ë-vy. Ha Nhandejáry oipytygwö íxupe kwéry. Upéa-gwi hexapyrã-rupi hembiaipo porã porã hikwái. Nhandejáry Hesu Cristo rehegwa nhe'ë porã omombe'u ramo, ogwerovia inhe'ë henduháry. Hembiaipo porã rexa-vy, Anhetegwa nipo ra'e inhe'ë, he'i ogwerovia-vy.

* 16:15 At 1.8

Hesu Cristo rehegwa nhe'ê porã Lucas remimombe'ukwe o evangelho de Lucas

Onhyprũ ohai-vy onhe'ê Lucas

¹⁻²Mba'êixa pa, Teófilo? Xe, Lucas, ahai-ta ko kwatia-rehe xe nhe'ê nde-vy gwarã. Hesu Cristo rehegwa nhe'ê ahai-ta nde-vy, Teófilo. Oĩ-ma Hesu Cristo rehegwa kwatia nhe'ê gwĩ ambue kwéry ohai va'ekwe. Hesu rerakwã, mbava'e tipo ojapo araka'e ore pa'ũ-rupi ha'e kwéry kwatia-rehe omoĩ va'ekwe. Hesu irũgwe kwéry ohexapa araka'e hembiaipo, ohendu ave araka'e hemimombe'u, ha omombe'u mbe'u araka'e ojehegwa nhe'ê porã. Aipo ramo inhirũgwe omombe'u jevy ramo hesegwa nhe'ê, henduháry kwatia-rehe omoĩ va'ekwe gwemiendukwe.

³Ha xe katu, xe ave anhomongeta va'ekwe Hesu irũgwe kwéry ndive. Heta Hesu rehegwa nhe'ê aikwaase-gwi aporandu randu íxupe kwéry hesegwa nhe'ê-rehe. Aikwaa porãve haggwã aporandu randu aiko-vy va'ekwe íxupe kwéry. Omombe'upa va'ekwe xe-vy. Hexahare remimombe'ukwe ahai kuri nde-vy ko kwatia-rehe. ⁴Hesu rerakwã nhahendu meme-ma va'ekwe. Eremonha'ê-ma rire ko kwatia, hesegwa nhe'ê anhetegwa ete ereikwaa va'erã. Ere arã “Omombe'u porã xe-vy Hesu rehegwa nhe'ê”.

Nhandejáry omondo gwembigwái omombe'u haggwã Zacarias-pe ta'yryrã-rehe

⁵Herodes oime ramo mburuvixagwasu judeu kwéry yvy-pe pa'i ramo Zacarias oiko. Pa'i Abias re'yikwe ha'e Nhandejáry rembigwái ramo jevy oiko. Hembireko pa'i Arão re'yikwe va'e. Isabel hembireko réry. ⁶Ha pe mokõi ojapo meme Nhandejáry remimbota. Oiko meme Nhandejáry nhe'ê-rupi. Upéixa-gwi Nhandejáry he'i hese: “Ipy'a porã voi Zacarias, hembireko ave ipy'a porã” he'i Nhandejáry hese. ⁷Ha ha'e katu ndata'yryi va'e voi. Imemby e'y va'e voi hembireko. Ogwerogwaigwĩ-ma omemby e'y. Ogwerotuja-ma gwa'yry e'y gwajáry e'y ave.

⁸⁻¹⁰Ha peteĩ áry Nhandejáry nhe'ê-py inhirũ kwéry oiporavo Zacarias-pe omohyakwã haggwã koty'i. Abias re'yikwe ndive, Zacarias oime Nhandejáry róga kakwaa-py. Nhandejáry renonde-py omba'apo hikwái. Ha peteĩ va'e mate oiko Nhandejáry koty'i-py imohyakwã haggwã. Upe jave ojogweroaty va'e oka-gwi rei omondo onhe'ê Nhandejáry-pe. Ha peteĩ áry hapixa kwéry Nhandejáry réry-py oiporavo Zacarias-pe omoinge haggwã koty'i-py. Hyakwã jave, oka-py joa-ma oĩ hikwái. Osê ramogwarã oha'arõ hikwái. ¹¹Upe jave ou Nhandejáry rembigwái yváy pygwa ojehexa uka haggwã Zacarias-pe. Onhembo'y hyakwã va'e renda yke-rehe ha upe-py ojehexa uka íxupe. ¹²Ohexa-ma ramo Nhandejáry rembigwái, onhemondyĩ Zacarias. Ndoikwaái mba'e pa ojapo-ta. ¹³Aipo ramo Nhandejáry rembigwái he'i íxupe:

—Ani erekyhyje, Zacarias, he'i íxupe. —Nhandejáry ohendu-ma ne rembijerure. Igwaigwĩ eterei jepe ne hembireko ha'e imemby-ta joty. Nde ra'y tee oiko-ta, he'i íxupe. —Oiko-ma ramo embohéry íxupe João-py. João voi heryrã, he'i íxupe. ¹⁴—Oiko-ma ramo nde ra'y, erevy'a va'erã. Heta heta-ta kente kwéry ovy'a arã nde ra'y reko porã-rehe, he'i íxupe. ¹⁵—Nhandejáry rovagwy-py nde ra'y oiko-ta heko marangatu va'erã. Ndo'u mo'ái oporomonga'u va'e. Oiko e'y mbovyve Nhandejáry Nhe'ê Marangatu tee oiko-tama ipy'apy-py. ¹⁶Ha heta-pe ombojerovia uka va'erã Nhandejáry-rehe nde ra'y. Gwe'yí kwéry, Israel remiarirõre kwéry, ombojerovia uka va'erã Tupã Nhandejáry-rehe. ¹⁷Nhandejáry nhe'ê-py omombe'u va'etykwe Elias amyri-rami oiko-ta nde ra'y, he'i íxupe. —Nhandejáry ombopu'aka-ta íxupe, omoarandu-ta íxupe ogwata haggwã gwenonde-rupi. Inhe'ê-rupi kente kwéry ogwerova arã gwekoha. Upéixa-gwi túvy ipy'a porã va'erã gwa'yry ndive. Heta nhe'êrenduse e'yha omoarandu arã heko porã haggwã. Upeixagwarã nde ra'y oiko-ta, he'i Nhandejáry rembigwái Zacarias-pe ta'yry-rehe omotenonde-vy hesegwa nhe'ê.

¹⁸ Upe-ma ramo Zacarias he'i:

—Mba'éixa ko arovia-ta ne nhe'ê? he'i íxupe. —Xe, xe tuja-ma, xe rembireko igwaigwĩ-ma ave, he'i joty ndogweroviái-gwi.

¹⁹ Upéi Nhandejáry rembigwái he'i íxupe:

—Xe Gabriel, Nhandejáry rembigwái. Hendivegwa voi xe, he'i íxupe. —Ha'e xe mbou amombe'u hagwã nde-vy inhe'ê porã. ²⁰ Anhetegwa nhe'ê amombe'u kuri nde-vy. Ha nde, ndereroviái joty xe nhe'ê. Ndereroviái-gwi, nerenhe'ê mo'ávái-ta. Nde ra'y oiko rire ae, erenhe'ê jevy va'erã. Anhetegwa voi amombe'u kuri nde-vy, he'i íxupe.

²¹ Ha upe jave kente kwéry oha'arõ hikwái íxupe oka-py. “Hi'are eterei Zacarias. Ma'erã nosêi Nhandejáry róga-gwi” he'i joa hese hikwái.

²² Ha Zacarias osê-ma ramo koty'i-gwi ndikatuvéi onhe'ê íxupe kwéry.

“Mba'e tipo? Ma'erã-gwi nonhe'êvéi Zacarias?” he'i hese. “Yváy pygwa para'e ojehexa uka íxupe” he'i hese. “Upéixa-gwi para'e nonhe'êvéiry” he'i hikwái.

Ojepombovava rei omombe'u hagwã mo'ã onhe'ê. Ndojeroviái-gwi, opyta inhe'êngu Zacarias. Onhe'ê jokopa íxupe.

²³ Upéi gwí omba'apo hagwã áry-py omba'apopa rire, oho jevy gwóga-py Zacarias. ²⁴⁻²⁵ Ha upe rire hambireko oha'arõ oiko-vy omemby hagwã. Ha avave-pe nomombe'úi, opyta pyta meme gwóga-py hambireko. He'i ojéupe: “Xe rexakwaa ha xe poriahuvereko-ma Nhandejáry. Are-ma xe ndavy'ái. Naxe memby'i-gwi ndavy'ái” he'i. “Atĩ eterei naxe memby'i-gwi” he'i. “Áy katu avy'a voi. Ndaijegwaruvéi arã kente kwéry xéhegwi” he'i. “Ajohu-ta mitã. Avy'a ete” he'i opy'apy-py Zacarias rembireko mitã'i ojohu-tarehe.

Cinco jasy-rehema teĩ nomombe'úi avave-pe mitã'i oikotaha.

Nhandejáry omondo gwembigwái omombe'u hagwã Maria-pe imembytaha

²⁶⁻²⁷ Ha upe rire, ohasa peteĩ jasy jevy Nhandejáry omondo gwembigwái omombe'u hagwã Maria-pe imembytaha reheha-ma. Omondo gwembigwái yváy pygwa omombe'u hagwã Maria-pe. Héry va'e Gabriel. Upéi Nhandejáry nhe'ê-rupi Gabriel ou Galiléia yvy-py. Nazaré tetã-my ou omombe'u hagwã Nhandejáry nhe'ê Maria-pe. Maria kunhataĩ rei oiko-vy. Omenda e'ỹ va'e ha imena'ỹ va'e voi Maria. Ndoikói va'e vyteri kwimba'e ndive. Imerã héry José. Mburuvixa Davi amyri remiarirõkwe José. Upe ramo ndoikói vyteri Maria ndive.*

²⁸ Ha upéi katu ogwahẽ Nhandejáry rembigwái Maria ha-py. He'i ojehexa uka-vy:

—Evy'a katu, Maria, he'i. —Nhandejáry nde rexakwaa-ma. Hambiporavo voi ko nde. Nhandejáry oĩ ne ndive, he'i íxupe.

²⁹ Upéi ohendu-ma ramo Maria he'i ojéupe “Mba'e tipo, ma'erã tipo aipo he'i xe-vy?” he'i. “Tupã Nhandejáry rembigwái nipo ra'e ojehexa uka xe-vy ra'e” he'i. “Ma'erã tipo aipo he'i xe-vy?” he'i ojepy'amongeta-vy.

³⁰ Upe jave Nhandejáry rembigwái he'i jevy:

—Ani erekyhyje teĩ. Tupã Nhandejáry ovy'a nde-rehe, nde poriahuvereko voi Nhandejáry. ³¹ Ome'ê-ta voi nde-vy ne membyrã, he'i íxupe. —Kunumi voi ne memby-ta. Oiko ramo ne memby, embohéry kuri Hesu-py he'i íxupe.* ³² —Ne memby Nhandejáry voi. Teko jaryrã voi ne membyrã, he'i íxupe. —“Tupãgwasu ra'y” oje'e-ta íxupe. Tupã Nhandejáry nhe'ê-py oiko-ta mburuvixagwasu voi ne membyrã. Nhamoigwasu Davi amyri oiko hagwe-rami, oiko-ta mburuvixagwasu ramo judeu kwéry-pe ne memby, he'i íxupe. ³³ —Jacó remiarirõ kwéry-gwi oiko va'erã mburuvixagwasu. Avave nohekoviariõ íxupe. Opave'ỹ arã voi ne membyrã mburuvixagwasu ramo oiko-ta.*

³⁴ Ohendu-ma ramo inhe'ê he'i Nhandejáry rembigwái-pe Maria:

—Xe, mba'éixa xe memby-ta, he'i íxupe. —Namendái vyteri niko. Ndaikói vyteri kwimba'e ndive, he'i.

³⁵ —Ndoiko refry-ta ne membyrã. Nhe'ê Marangatu tee-rupi oiko va'erã ne membyrã. Upe ohekokwaa va'e nhe'ê-rupi ae oiko va'erã, he'i íxupe. —Tupã marangatu ne membyrã.

* 1:26-27 Mt 1.18 * 1:31 Mt 1.21 * 1:33 Is 9.7

Imarangatu va'erā voi ne memby. Upéixa-gwi he'i arā hese hikwái “Nhandejáry Tupāg-wasu ra'y” he'i hese. ³⁶—Ha nde ryke Isabel ave, igwaigwī-ma jepe imemby-ta joty, he'i omombe'u-vy íxupe. —Nde'ivéi arā hese “ikatu e'y-gwi naimembyi Isabel”. Áy oha'arō oiko-vy, he'i. ³⁷—Nhandejáry-pe ndaipóri ikatu e'y va'e. Ohekokwaa hagwā ndahekorasyi voi Nhandejáry-pe. Ohekokwaapa va'e opamba'e, he'i.

³⁸Upéi Maria he'i:

—Iporā. Arovia-ma Nhandejáry-pe, he'i. —Toiko katu hemimbota. Toiko katu ne remimombe'ukwe, he'i rire, ndohexavéi Nhandejáry rembigwái yváy pygwa-pe. Oho jevy-ma yváy-py.

Maria oho oipohu hagwā gwyke Isabel-pe

³⁹⁻⁴⁰Upe rire, ndahi'aréi Maria oho oipohu hagwā gwyke Isabel-pe. Mombyry oho. Judéia vvy-py oho. Tetā mirī-my vvyaty-py oime Zacarias róga. Upe tape-rehe oho Maria. Ha ogwahē-ma ramo hōga-py:

—Ereikove tipo? he'i oike oho-vy.

⁴¹Ohendu-ma ramo Maria nhe'ē tykéry Isabel ovy'a. Omýi-ma imembyrā ohendu jave Maria nhe'ē. Ha Nhandejáry Nhe'ē Marangatu tee va'e omohynhē Isabel py'a-py.

⁴²Upéixa-gwi Isabel onhe'ē-vy he'i.

—Entéro kunha kwéry-gwi nipo nde rovasave ra'e Nhandejáry. Ne membyrā hembihovasa tee voi. Nhandejáry nde rovasa ete-gwi nipo erevy'a ra'e. Ha xe ave, xe mbovy'a kuri, he'i Isabel okypy'yry Maria-pe. ⁴³—Nde, xe Jaryrā syrā voi, ereju ra'e xe pohu-vy. Avy'a eterei eregwahē ramo, he'i. ⁴⁴—Ahendu jave ne nhe'ē, xe membyrā ovy'a-ma ave. Omýi-ma kuri ovy'a eterei-gwi. ⁴⁵Nde ave erevy'a eterei nipo ra'e. Nhandejáry-pe ere ra'e “Arovia-ma. Toiko katu ne remimbota”. Upéixa-gwi nde rovasa ete-ma ra'e Nhandejáry, he'i Maria-pe.

Maria omboete Nhandejáry-pe oporahéi-vy

⁴⁶Upéi Maria omboete Nhandejáry-pe:

—Xe Járy,

he'i,

—xe py'apy gwive aporahéi-ta oromboete hagwā oromomba'egwasu eterei-gwi,

he'i.

⁴⁷—Xe py'apy gwive arovy'a Tupā Nhandejáry-pe.

Xe resendeha voi upe va'e.

⁴⁸Xe rexakwaa voi xe poriahuvereco hagwā.

Xe ko Nhandejáry rembigwái voi jepe, imandu'a joty xe-rehe Nhandejáry.

Yvy opa e'y mbovye kente kwéry he'i va'erā xe-rehe: “Tupāgwasu Nhandejáry rembihovasakwe voi upe va'e” he'i va'erā xe-rehe.

⁴⁹Nhande-vy ikatu e'y va'e ojapo xe-vy Nhandejáry xe ruvixa.

Héry imarangatu tee va'e,

he'i Maria oporahéi-vy Nhandejáry mboete-vy.

⁵⁰Upéi oporahéi jevy. Pporahéi-py omombe'u pyahu jevy Maria:

—Entéro ojerovia va'e gwive hese poriahuverekoha voi ha'e.

⁵¹Yvy apy-rehe gwive heta mba'e porā opu'aka-rupi ojapo Nhandejáry.

Onhemomba'egwasu rei va'e-pe omosarambi ha'e ponove oakā-gwi rei ojapo opamba'e.

⁵²Mburuvixagwasu imbarate va'e kwéry jepe

oipe'a omanda oikovyha-gwi kente rei-rami jevy oiko hagwā.

Ha omomba'egwasu eterei heko'ive va'e-pe.

⁵³Iporiahu va'e-pe heta imba'e porārā ome'ē va'erā.

Ivare'a va'e-pe ave ome'ē hemi'urā.

Ha imba'e retave va'ekwe jepe omondo ipo nandi reheve

he'i.

⁵⁴⁻⁵⁵—Nhande ramoigwasu amyri kwéry-pe omombe'u araka'e Nhandejáry:

“Apohovasa-ta, ne remiarirō kwéry-pe ave ahovasa-ta.

Āy peiko va'erā gwive apohovasa-ta.”

Upéixa he'i nhane ramoigwasu Abraão amyri-pe,
hemiarirō kwéry-pe ave.

Ha imandu'a katu gwemimombe'ukwe-rehe oiko hagwā he'i va'ekwe.

Ipokatu inhe'ē.

Upéa he'i va'ekwe-gwi oiporiahuvereko meme
nhande re'yi kwéry-pe,
Israel re'yi kwéry-pe.

Ohovasa porā nhande-vy Nhandejáry,*

he'i oporahéi-vy. Maria oporahéi Nhandejáry-pe omboete-vy.

⁵⁶Ha upe rire Maria hi'are jevy gwýkéry róga-py. Mbohapy jasy ohasa rire, oho jevy gwóga-py.*

João Batista onase ramogware

⁵⁷Imemby oikotamaha áry-py imemby-ma Isabel. Kunumi voi imemby. ⁵⁸Oiko-ma ramo, hóga ypy-rehe oĩ va'e, hapixa kwéry, ha he'yi kwéry ave ou ogwerohory íxupe imemby jave.

—Nhandejáry nde poriahuvereko-gwi ome'ē nde-vy ne membyrā, he'i íxupe.

⁵⁹Upéi ogwereco-ma ramo ocho áry ogweraha íxupe oipirekyti uka hagwā ha ombohéry hagwā ave. Ha enterove omboheryse íxupe.

—Nhambohéry-ta íxupe Zacarias-py, he'i hikwái. Omoĩse mo'ã túvy réry hese.

⁶⁰—Ani eremoĩ túvy réry hese, he'i isy. —João ae ambohéry-ta íxupe, he'i isy.

⁶¹Ndojohu porāi hikwái.

—Ndaipóri nde re'yi kwéry pa'ũ-my avave héry va'e João, he'i isy-pe hikwái.

⁶²Upéixa-gwi oporandu hikwái túvy-pe. Onhepombovava hikwái oporandu-vy túvy-pe gwa'ýry reryrā omombe'u hagwā.

⁶³Upéi onhepombovava ojerure-vy ome'ē uka hagwā ojéupe kwatia. Ome'ē-ma rire ohai kwatia-rehe. “João héry” he'i ohai-vy. Omombe'u ramo, “Ma'erā po omboheryse João-py” he'i hikwái opondera-vy.

⁶⁴Ha ohai jave gwa'ýry réry, omonhe'ē uka jevy íxupe Nhandejáry. Nainhe'ēnguvéi-ma. Onhe'ē porā jevy-ma ha omomba'egwasu Nhandejáry-pe:

—Imarangatu tee va'e Nhandejáry, he'i onhe'ē-vy. —Ndaipóri ha'eixagwa ohekokwaa va'e, he'i Nhandejáry-pe omboete-vy.

⁶⁵Ha entéro oikwaa va'e opy'amirī reheve opondera ndera hesegwa hikwái. João rehegwa rerakwā omombe'u mbe'u Judéia yvy-rupi. Tetā ambue mbue mygwa-pe omombe'u mbe'u ave hikwái.

⁶⁶Ha herakwā renduha kwéry onhemongeta opy'apy-py hese.

—Mbava'e tipo ojapo-ta upe kunumi? he'i. —Okakwaa-ma rire, mba'e po oiko va'erā íxugwi? he'i oporandu randu ojóupe. —Ha'e Nhandejáry rembihovasa voi nipo ra'e, he'i ojóupe hese.

Ha Nhandejáry ohovasa meme mitā-me. Omombaraete ave íxupe onhe'ē-py oiko hagwā.

Zacarias omotenonde gwa'ýry rehegwarā

⁶⁷Ha upéi katu Nhandejáry Nhe'ē Marangatu tee va'e omohynyhē túvy Zacarias py'apy. Ome'ē íxupe hembiporaheirā:

⁶⁸—Tonhemomba'egwasu katu Tupā Nhandejáry, he'i oporahéi-vy.

—Gwe'yi kwéry Israel remiarirōre kwéry-pe oipytygwō-ma. Nhane resende-tama. Tuvixa mba'e voi Nhandejáry, judeu kwéry Járy, he'i oporahéi-vy.

* 1:54-55 Jn 17.7,19 * 1:56 1 Sm 2.1-10

⁶⁹—Ombou-ma nhande-vy ipu'aka ete va'e nhane resende va'erã, he'i.

—Gwembigwái Davi amyri remiarirõ ombou, nhande re'ýi ete va'e voi, he'i oporahéi-vy.

⁷⁰—Yma va'ekwe Nhandejáry omombe'u ha omotenonde-ma va'ekwe nhane resende va'erã rehegwa nhe'ẽ.

Inhe'ẽ-py omombe'u va'ety kwéry heko marangatu ete va'ekwe omohenonde-ma va'ekwe omombe'u-vy hesegwarã voi va'ekwe nhe'ẽ.

⁷¹—Gwĩ nhande rayhu e'ý va'e-gwi nhane resende va'erã.

Gwĩ nhande-rehe ija'e'ý va'e-gwi ave nhane resende ave va'erã imbaraete e'ý hagwã nhande-rehe,

he'i oporahéi-vy.

⁷²—Ha inhe'ẽ-rupi oiporiahuvereko meme araka'e nhane ramoigwasu kwéry-pe Nhandejáry.

Imandu'a meme katu onhe'ẽ marangatu-rehe oikopa hagwã omombe'u hagwe-rami.

⁷³⁻⁷⁴—Onhomongeta araka'e nhane ramoigwasu Abraão amyri ndive.

He'i íxupe: “Hupigwa va'e voi amombe'u-ta nde-vy.

Ne nhemonharã kwéry-pe aresende-ta hese ija'e'ý va'erãgwe-gwi xe mboete porã hagwã kyhyje e'ý reheve aresende-ta íxupe kwéry.

⁷⁵Heko marangatu reheve, py'a potĩ reheve xe mboete hagwã. Ko vvy-rehe oiko aja oiko porã meme hagwã xe ndive aresende-ta íxupe kwéry” he'i Nhandejáry.

Nhande rehegwarã voi upéa nhe'ẽ Abraão amyri-pe omombe'u araka'e Nhandejáry, he'i Zacarias Nhandejáry-pe omboete-vy.

⁷⁶—Ha nde,

he'i Zacarias gwa'ýry-pe hekorã omohenonde-vy íxupe,

—Nde-rehe kente kwéry he'i va'erã “Nhandejáry Tupãgwasu nhe'ẽ omombe'u va'ety” he'i va'erã nde-rehe.

Nhandejáry ne mondo-ta gwembiporavo va'e renonde-rupi.

Ogwahêtamaha óra-py eremombe'u va'erã.*

⁷⁷Henonde-rupi ereho-ta eremombe'u-vy nhande re'ýi kwéry-pe.

“Nhande resendeharã ou-tama” ere va'erã ereho-vy.

“Nhande rembiapo vai omboyke-vy ou-ta.

Nhande mopy'a potĩ-vy ou-ta” ere va'erã ereho-vy eremombe'u-vy,

he'i.

—Nhandejáry renonde-rupi eremombe'u-ta hembiporavo kwéry-pe.

⁷⁸—“Nhandejáry heko porã tee va'e oiporiahuvereko kwaa va'e nhande poriahuvereko va'erã voi” ere va'erã hese.

“Nhande rayhu eterei-gwi ombou-ta yváy-gwi nhane resendeharã nhande moaranduharã” ere arã hesegwa nhe'ẽ eremombe'u-vy.

⁷⁹—“Nhande re'ýi e'ý resapeharã-rami ave upe ou-ta va'e.

Ha'e kwéry pytũ mygwa-rami oiko.

Oikwaa e'ý va'e Nhandejáry-rehe, ogwerovia e'ý-gwi íxupe, omano rire onhehundipa va'erã.

Oikwaa uka va'erã íxupe kwéry Nhandejáry remimbota oiko porã hagwã hendive.

Ombou-ta nhande-vy nhane resendeharã.

Ohexa uka-ta nhande-vy nhane raperã nhande mbopy'agwapy hagwã inhe'ẽ-rupi jaiko hagwã.”

Upe Nhandejáry nhe'ẽ eremombe'u meme-gwi he'i va'erã nde-rehe: “Nhandejáry, Tupãgwasu va'e nhe'ẽ-py omombe'u va'ety tee voi” he'i va'erã kente kwéry nde-rehe,*

* 1:76 Mt 3.1 * 1:79 Is 9.2

he'i Zacarias. Nhe'ẽ Marangatu tee va'e omohynyhẽ íxupe ipy'apy. Upéa-rupi Nhandejáry ome'ẽ inhe'erã omombe'u hagwã gwa'ýry rekorã omotenonde hesegwarã.

⁸⁰Upéi okakwaa porã-ma upe mitã. Hi'arandu porã voi upéa oiko-vy. Nhandejáry nhe'ẽ-py oiko, ojerovia ete hese. Ava rekваты e'ý-rupi ogwata gwata oiko-vy. Gwe'ýi kwéry-pe Israel remiarirõ kwéry-pe atýra-py ojehexa uka hagwã áry peve ogwata gwata oiko-vy ava rekваты e'ý-rupi.

2

Hesu oiko ramogware

(Mt 1.18-25)

¹²Quirino oiko jave Síria pygwa kwéry-pe mburuvixa ramo, Augusto ohai uka kwatia. Mburuvixagwasu voi Augusto. Omonhangareko uka entéro yvy pygwa kwéry-rehe. Omomarandu uka íxupe kwéry: “Ohai-ta kwatia-rehe pende réry. Ne ramoigwasu oiko hagwe-py tekotevẽ ereho. Upe-py mante ohai arã nde-vy nde réry.” Upéixa he'i oipapa hagwã entéro yvy pygwa kwéry-pe. Onhypyrũ upe pygwa kwéry-pe héry ohai-vy.

³Upéixa-gwi enterove oho. Gwamoigwasu oiko hagwe-py oje'ói-vy hikwái. Ohenói uka-gwi íxupe kwéry oho. ⁴⁵Ha José ave oho gwamoigwasu oiko hagwe-py. Osẽ Galiléia yvy-gwi. Nazaré tetã-gwi osẽ oho hagwã Judéia yvy-py. Oho Belém tetã-my. Gwamoigwasu Davi oiko hagwe-py oho ohenói uka-gwi íxupe kwéry. Oho Maria ndive. Imemby-tama jave ogweraha gwembirekorã. Ha hambirekorã teĩ Maria.

⁶Upéi ogwahẽ oje'ói-vy hikwái Belém tetã-my. Ha oime jave upe-py ogwahẽ-ma imemby hagwã áry. ⁷Oiko-ma mitã. Kunumi voi imemby rypykwe. Oiko-ma ramo mitã isy onhugwã omemby huparã-py. Upéi omonheno omemby mymba karu haty-py rei imoĩ-vy. Mbohupa rõga-py ndaipóri henagwã-gwi vyvranha'ẽ-py rei omoĩ omonheno-vy omemby-pe.

Nhandejáry rembigwái ojehexa uka hymba rerekwa kwéry-pe

⁸⁻⁹Upe-ma ramo gwí Belém pygwa-pe ojehexa uka Nhandejáry rembigwái yváy pygwa. Mymba rerekwa kwéry-pe ojehexa uka. Oime jave nhu-my, Belém jerekwe-rehe, pyhare ramo onhangareko gwymba ovexa-rehe. Upéi sapy'a ojehexa uka íxupe kwéry Nhandejáry rembigwái. Hembigwái ojehexa uka jave Nhandejáry omohendy hymba rerekwa jerekwe-rehe. Áry-rami rei hendy íxupe kwéry imarangatu tee va'e. Ohesapeve rei-ma ramo hendy va'e, omopy'amirĩ íxupe kwéry. ¹⁰Upéi Nhandejáry rembigwái he'i íxupe kwéry:

—Ani nde py'amirĩ teĩ ereiko-vy, he'i íxupe. —Aju pene momarandu-vy. Pene mbovy'a-ta ko nhe'ẽ porã, ha pende re'ýi kwéry-pe ave ombovy'a va'erã, he'i. ¹¹—Pene resendeharã oiko-ma kuri. Pene ramoigwasu Davi amyri oiko hagwe-py oiko-ma kuri. Mburuvixagwasu voi ha'e. Ha'e ko Cristo, Nhandejáry rebiporavo va'e voi, he'i íxupe. —Pende Járy voi ave, he'i. ¹²—Mitã'i oime-ma teĩ mymba karu haty-py. Ijao-py onhugwã rire-ma omonheno íxupe hupa-py mymba karu haty-py. Upe-py peho ramo, petopa-ma va'erã pene resendeharã-pe. Kóa nhe'ẽ amombe'u peẽ-my pene rembiexarã peikwaa porã hagwã pene resendeharã oikomaha, he'i Nhandejáry rembigwái ojehexa uka-vy íxupe kwéry.

¹³Upéa he'i jave heta heta Nhandejáry rembigwái yváy pygwa kwéry ou ojehexa uka okwa-vy íxupe kwéry. Onhe'ẽ va'e ndive oiko-vy ojehexa uka heta hikwái. Ha oporahéi omboete hagwã Nhandejáry-pe.

¹⁴—Tomomba'egwasu Tupã Nhandejáry yváy pygwa oĩ va'e-pe.

Iporã ete eterei Nhandejáry.

Avave ha'eixagwa ndoikói.

Yvypóry-pe ombopy'agwapy ohexakwaa rei-vy, he'i oporahéi-vy.

¹⁵Upéixa oporahéi rire, oho jevy yváy-py oje'ói-vy hikwái. Oho-ma rire upe mymba rerekwa va'e kwéry he'i ojõupe:

—Jaha katu, he'i. —Jaha-ta Belém tetā-my. Jahexa hagwā mba'e tipo oiko upe-py, he'i oje'ói-vy hikwái. —Jahexa-ta ko Nhandejáry omombe'u uka kuri nhande-vy va'ekwe jahexa-ta, he'i.

¹⁶ Ha pya'e oje'ói hikwái. Ogwahẽ-ma ramo upe-py ojohupa íxupe kwéry. Ohexa isy Maria-pe, ohexa José-pe, ohexa ave mitā'i-pe ave. Ha mitā'i katu onheno oĩ-vy mymba karu haty-py. ¹⁷ Ha ohexa-ma Nhandejáry remimombe'ukwe. Upéi omombe'u jevy mitā'i rehegwa nhe'ẽ. Nhandejáry rembigwái he'i va'ekwe omombe'u jevy mymba rerekwa va'e kwéry.

¹⁸ Ha entéro ohendu va'e opondera-vy rei oiko hikwái.

—Mba'eixagwa pa ko mitā, he'i ojúpe hikwái.

¹⁹ Ha isy Maria katu opondera ndera oiko-vy. Onhongatu opy'apy-py hesegwa nhe'ẽ. Imandu'a ndu'a opamba'e-rehe oiko-vy.

²⁰ Upéi hymba rerekwa kwéry oho jevy nhu-my. Oho jave oporahéi hikwái. Omomba'egwasu Nhandejáry-pe oporahéi-vy.

—Tupā xe Járy nde tuvixa, he'i oporahéi-vy. —Iporā ete va'e erehexa uka kuri ore-vy. Iporā ete va'e oroikwaa kuri. Nde tuvixa ete, he'i oporahéi omboete-vy.

Upe Nhandejáry rembigwái remimombe'ukwe otopa. Upéixa-gwi omboete ete Nhandejáry-pe oiko-vy hikwái.

Nhandejáry rogakwasu-py Hesu mitā'i-pe omboete

²¹ Ogwereco-ma ramo oito áry oikyťimírĩ uka mitā pire. Judeu va'e ra'y-gwi Nhandejáry réry-py oipirekyťĩ íxupe. Oipirekyťĩ uka rire íxupe ombohéry “Hesu” he'i íxupe. Nhandejáry rembigwái yváy pygwa omombe'u ramo oiko va'erāha omombe'u ave heryrā.

²² Ha upe rire ogwahẽ-ma isy-pe, tuvanga-pe ave hi'óra ojapo hagwā Nhandejáry nhe'ẽ. Ohai uka va'ekwe Moisés amyřĩ-pe mba'éixa pa onhemopotĩ jevy kunha oikoma rire mitā. Upéixa-gwi oho Jerusalém tetā-my. Mitā'i ave ogweraha ohexa uka hagwā pa'i-pe. ²³ Moisés amyřĩ rembihaikwe he'i ave entéro judeu kwéry-pe “Ne mitā ypykwe kwimba'e ramo ereme'ẽ íxupe Nhandejáry pegwarā”.* Upe Nhandejáry nhe'ẽ ojapo hagwā ogweraha íxupe Jerusalém-my, Nhandejáry róga kakwaa-py ogweraha íxupe.

²⁴ Mokõi gwymba ave ogweraha. Moisés rembihaikwe Nhandejáry nhe'ẽ: “Oiko-ma ramo mitā'i, erehapy uka mokõi ne rymba Nhandejáry-pe eremboete-vy” he'i va'ekwe ohai-vy. “Pa'i ojuka va'erā ohapy va'erā ereme'ẽ íxupe” he'i. “Pykasu ramo, mokõi pykasu ave eraha erehapy uka va'erā. Pyku'i ramo, mokõi pyku'i ave eraha erehapy uka va'erā.” Upéixa ohai uka va'ekwe Nhandejáry. Upéa ojapo hagwā oho hikwái Jerusalém-my. Upéa ojapo-vy oho hikwái.*

²⁵⁻²⁷ Ha ogwahẽ-ma ramo, oike Nhandejáry róga kakwaa-py. Nhandejáry nhe'ẽ ojapogwi oike. Oike jave oĩ ave upe-py peteĩ kwimba'e, héry va'e Simeão. Nhandejáry-rehe Ijerovia eterei va'e Simeão oiko Jerusalém tetā-my. Hekoha porā Nhandejáry renonde-py. Imarangatu va'e. Nhandejáry rebiporavo va'e ogwahětaha óra ra'arõ-vy oiko Simeão. Israel remiarĩrõ kwéry ombopy'agwapy va'erā oha'arõ oiko-vy. Ha Nhe'ẽ Marangatu tee va'e oiko ipy'apy-py. Henonderā omombe'u araka'e íxupe:

—Nde, Simeão, he'i íxupe Nhe'ẽ Marangatu tee va'e —erehexa-ta Nhandejáry rebiporavo va'e. Íxupe erehexa rire ae mate eremano va'erā, he'i íxupe. —Erehexa e'y reheve neremano mo'ái, he'i íxupe omombe'u mbava'e oiko-ta va'e íxupe.

Upe rire Nhe'ẽ Marangatu tee va'e he'i íxupe oho hagwā Nhandejáry róga kakwaa-py. Ha upe-py oĩ jave oike Hesu sy, tuvanga ave ogweru Hesu-pe upe-py Nhandejáry nhe'ẽ ojapo hagwā. ²⁸ Upéi Simeão ohupi Hesu mitā'i ojyva ári. Omboete ete Nhandejáry-pe, mitā'i-rehe he'i:

²⁹⁻³² —Xe Járy, yváy-py ereiko va'e, atima porā nde-vy ko mitā'i-rehe.

Ko va'e ne rebiporavokwe ra'e, ne remimbou voi ra'e.

Ko va'e ore resendeharā ra'e ahexa-ma katu.

* 2:23 Êx 13.2,12 * 2:24 Lv 12.6-8

Ne remimbou ohexa-ma yvypóry.

Erembou íxupe entéro opa opa kente ambue mbue kwéry-pe, judeu e'ý va'e-pe omo'arandu hagwã, pytũ-my rei oiko va'e-pe arakatu-py ae omoingo hagwã.

Ne remimbota oikwaa va'erã.

Nde pu'akaha reheve oikwaa uka-ta ave nde rekoha marangatu tee Israel remiarirõre kwéry-pe.

Ko mitã katu ne remimbou ore resendeharã.

Xe py'agwapy-ma.

Ahexa-ma ore resendeharã.

Naha'arovéi-ma ore mbopy'agwapyharã-pe.

Ahexa-ma katu íxupe.

Xe mbovy'a voi. Xe, ne rembigwái, amano ramo jepe xe py'agwapy-ma va'erã aiko-vy.

Ne remimombe'ukwe äy ahexa-ma,*

he'i Nhandejáry-pe omboete-vy Simeão.

³³ Ha Hesu sy, tuvanga ave ohendu-ma ramo “Mba'eixagwa po ko mitã” he'i opondera-vy mitã'i-rehe.

³⁴⁻³⁵ Upéi Simeão omondo onhe'ë Nhandejáry-pe ohovasa hagwã íxupe kwéry. Upe rire Maria-pe, Hesu sy-pe he'i:

—Ejeapsaka porã katu xe nhe'ë-rehe, he'i isy-pe. —Ko mitã'i Nhandejáry rembiporavo tee va'e voi, he'i. —Ombojoavy avypa va'erã Israel remiarirõre judeu kwéry. Ha'e kwéry onhemongeta va'erã hese opy'apy-py. Ha onhemongetaha Nhandejáry oikwaa uka va'erã enterove-pe. Heta voi ndajja'úi va'erã hese, ha upéa-rehe Nhandejáry ombohasa asy-ta íxupe kwéry. Heta ave ojerovia va'erã hese. Íxupe kwéry oresende va'erã. Oikwaa va'erã onhemongetaha okwa-vy. Ha nde, isy, eremboasy-ta íxupe. Ne memby-rehe ne mytu'e'ý-gwi, nde py'a kutu va'erã, he'i omotenonde-vy Maria-pe.

³⁶⁻³⁷ Upéa he'i jave Simeão, igwaigwí ete va'e ogwahẽ-ma. Nhandejáry nhe'ë-py omombe'u va'ety upe kunha. Aser re'ýi gwigwa. Fanuel rajy. Héry Ana. Ha igwaigwí voi. Kunhataĩ ramo omenda araka'e. Upéi, sete ro'y rire omano ime. Ime omano rire-ma hi'are jevy. Ohupity-ma oitenta e quatro ro'y tembirekokwe ramo rei-ma oiko. Ha oiko meme joty Nhandejáry róga kakwaa-py. Noséi voi upe-gwi oiko-vy. Omboete ete Nhandejáry-pe oiko-vy upe-py. Áry ramo, pyhare ramo ave omboete ete oiko-vy. Omondo mondo ave onhe'ë Nhandejáry-pe. Okaru e'ý reheve omondo mondo onhe'ë Nhandejáry-pe ojerovia tee-gwi hese.

³⁸ Ha Simeão omombe'u jave mitã'i rehegwa nhe'ë, ogwahẽ-ma Ana ou-vy. Omondo onhe'ë Nhandejáry-pe. He'i:

—Atima voi nde-vy xe Járy, he'i. —Nde pu'aka tee va'e xe mbovy'a eterei, xe Járy. Ahexa-ma ore resendeharã, he'i omboete-vy mitã'i Hesu rexa-vy. Upe rire omombe'u mbe'u mitã Hesu rehegwa nhe'ë heta judeu kwéry-pe. Gwesendeharã oha'arõ va'e-pe Jerusalém tetã mygwa-pe omombe'u igwahẽha.

³⁹ Ha ojaopapa-ma ramo Nhandejáry remimombe'ukwe mitã pypkwe kwimba'e-rehe, oho jevy gwóga-py. Galiléia yvy-py, Nazaré tetã-my oime hóga. Ojaopapa rire, ohexa ukapa rire, ogweraha jevy-ma íxupe.

⁴⁰ Upéi imbaraeete okakwaa-vy. Hi'arandu porã-ma voi Hesu. Nhandejáry rembihovasa voi.

Hesu mitã ramo onhomongeta gwĩ Nhandejáry nhe'ë mbo'eha kwéry ndive

⁴¹ Ha túvy kwéry oho meme hikwái Jerusalém-my. Aretegwasu páscoa áry ohasa meme hagwã upe-py. ⁴² Hesu ogwereco-ma ramo doze ro'y oho indive kwéry Jerusalém-my páscoa áry ohasa hagwã upe-py. Judeu kwéry reko-rupi oho hikwái. ⁴³ Ohasa-ma rire aretegwasu oho jevy-ma hikwái gwóga rape-rupi. Ha ohokwe-vy he'ýi kwéry anho-ma oje'ói hikwái. Ha Hesu katu nomoirũ íxupe kwéry oje'ói ramo. Ha ha'e opyta Jerusalém-my. Ha túvy kwéry ndoikwái ipytaha. ⁴⁴ “Gwapixa kwéry ndive oho Hesu” he'i mo'ã hese.

* 2:29-32 Is 42.6; 49.6

Ha ka'aru-ma ramo ae oheka mo'ã íxupe. Ha ndotopáiry. Gwe'ýi kwéry ndive ndoikóiry ave. Gwapixa kwéry ndive ndoikóiry ave. Upe pygwa pa'ũ-rupi oheka rei ave íxupe.

⁴⁵Íxupe ndojohúí-gwi oho jevy tuvanga, isy ave. Jerusalém-my Hesu reka-vy oho jevy.

⁴⁶Upe rire, ohasa-ma rire mbohapy áry otopa jevy íxupe. Nhandejáry róga kakwaa-py ogwapy oĩ-vy. Gwĩ Nhandejáry nhe'ẽ mbo'eha mbyte-py ogwapy oĩ-vy. Hesu ojeapysaka saka ohendu hagwã inhe'ẽ oiko-vy Hesu. Oporandu randu ave íxupe kwéry Nhandejáry nhe'ẽ oikwaave hagwã. Onhomongeta ave hendive kwéry. ⁴⁷Ha onhomongeta jave porombo'eha kwéry ndive heta kente kwéry ohendu va'e ave. Ha'e kwéry opondera ndera voi hese hi'arandu eterei-gwi. Oporandu ramo íxupe, hi'arandu voi omombe'u hagwã oporandu va'e-pe.

⁴⁸Upéixa oiko jave ogwahẽ tuvanga, ha isy ave. Isy ohexa-ma ramo Hesu-pe he'i "Ma'erã po opyta ra'e ko'apy?" he'i opondera-vy hese. Upéi isy he'i íxupe:

—Ma'erã-gwi ko va'e erejapo ore-vy? Ne ruvanga ndive orojapura voi kuri nde-rehe. Oroheka heka voi kuri nde-vy oroiko-vy, he'i íxupe isy onhemonhe'ẽ-vy.

⁴⁹Ha'e katu he'i osy-pe:

—A-py voi aime, he'i osy-pe onhemombe'u-vy. —Xe rendagwe-rupi xe reka rei ereiko-vy. Ndapyta reíry. Xe Ru yváy-py oĩ va'e remimombe'ukwe-rehe apena eterei-gwi apyta ko'a-py, he'i osy-pe. —Tekotevê amondo xe resa hese aiko-vy, he'i osy-pe.

⁵⁰Ha isy, tuvanga ave nohendu kwaái inhe'ẽ. ⁵¹Upéi Hesu oho jevy ndive kwéry Nazaré-py. Ha tuvanga nhe'ẽ-py oiko. Isy imandu'a ndu'a opy'apy-py hese, omono'õ no'õ hesegwa nhe'ẽ. ⁵²Hesu katu okakwaa porã. Hi'aranduve nduve oiko-vy. Nhandejáry ndive kente kwéry ndive ave ipy'a porã ave oiko-vy.

3

Kente kwéry-pe onhemonhe'ẽ João Batista

(Mt 3.1-12; Mc 1.1-8; Jo 1.19-28)

¹Tekwaty e'ỹ-my oiko ramo Zacarias ra'y João Batista, Nhandejáry omombe'u íxupe inhe'ẽrã.

Upe jave Tibério César oiko mburuvixagwasu ramo. Ojapo-ma quinze ro'y oiko hagwe mburuvixagwasu ramo upe pygwa kwéry-pe. Ha Judéia yvy pygwa-pe katu Pôncio Pilatos oiko mburuvixa ramo ave. Ha Galiléia yvy pygwa-pe katu Herodes oiko mburuvixa ramo ave. Ha tyvýry Filipe katu oiko mburuvixa ramo Ituréia yvy pygwa-pe, Traconites yvy pygwa-pe ave. Ha Abilene yvy pygwa-pe katu Lisâniás oiko mburuvixa ramo ave. Upe mburuvixa kwéry omanda-ma jave, Nhandejáry onhomongeta João Batista ndive.

²Upe jave oiko ave pa'igwasu Anás ha pa'igwasu Caifás ave. Pa'i kwéry-gwi imburuvixave va'e upe mokõi va'e. Ha upe jave Nhandejáry omondo João Batista-pe omombe'u hagwã inhe'ẽ. ³Upéixa-gwi oho Jordão ysry jere-rupi upe pygwa-pe Nhandejáry nhe'ẽ omombe'u mbe'u-vy. Ha upe pygwa okwa va'e kwéry-pe onhemonhe'ẽ ramo João Batista he'i:

—Pende rekoha vai eterei. Taperova katu pende rekoha, he'i íxupe kwéry. —Enhemongarai uka katu Nhandejáry nhe'ẽ-rupi ereiko hagwã, he'i. —Nde rekoha ererova ramo, erenhemongarai uka ramo ave, ne rembiapo vaikwe emboyke arã ndéhegwi Nhandejáry, he'i Nhandejáry nhe'ẽ-rupi omombe'u-vy íxupe kwéry.

⁴Nhandejáry nhe'ẽ kwatia-rehe ohai va'ekwe Isafás amyrĩ:

“Tekwaty e'ỹ-my ou va'e-pe osapukái va'erã xe nhe'ẽ-py omombe'u va'ety: Ou-tama Nhandejáry rembiporavo va'e, osapukái va'erã ho'e-vy. Pembohape porã katu íxupe, he'i va'erã. Pemopotĩ íxupe haperã. ⁵Entéro yvy pyko'ẽ ko'ẽ gwive emohynyhẽ katu. Eity entéro vvyatyrusu gwive. Entéro yvy atymirĩ ave eity katu erembojoja hagwã haperã. Emokarẽ karẽ e'ỹ katu tape ikarẽ va'e. Emboyke katu ne rembiapo vaikwe ndejéhegwi, he'i va'erã onhe'ẽ hatã-vy.

⁶Enterove ohexa va'erã Nhandejáry rembiporavo nhane resendeharã voi, he'i va'erã onhe'ẽ hatã-vy tekwaty e'ỹ-my ou va'e kwéry-pe xe nhe'ẽ-py omombe'u va'ety”

he'i Nhandejáry nhe'ê kwatia-rehe oĩ va'e. Isaías amyrĩ Nhandejáry nhe'ê-py omombe'u va'ety omotenonde va'ekwe ohai-vy João Batista rehegwarã nhe'ê.*

⁷ Ha upéixa-gwi Nhandejáry nhe'ê-py João Batista omombe'u gwenda-py ou va'e-pe gwive. Ojogweroatypa henda-py onhemongarai uka hagwã. Upéa-rehe João onhemonhe'ê íxupe kwéry:

—Xáke, he'i. —Kiva'e nhe'ê-rupi po ereju erenhemokanhy uka hagwã mo'ã nde rereko asy eteharã-gwi? Mbói ramigwa voi peê, pende rekoha vai va'e. Ndikatúí erenhembotavy rei Nhandejáry-pe, he'i. ⁸ —Nhandejáry ko oikwaa. Erova tee nde rekoha. Ne rembiapo porãrã-rupi erehexa uka katu nde rekoha pyahurã. Ani ave ere rei nde py'apy-py “Xe Abraão remiarirõre, upéixa-gwi naxe mbohasa asy mo'ãi-ta Nhandejáry” ani ere rei aiporami nde py'apy-py. Xe ha'e-ta katu peê-my, oipota ramo Nhandejáry, onhe'ê-py rei omoingo arã ita-gwi rei Abraão remiarirõrã. Inhe'ê pokatu voi Nhandejáry. Opa mba'e rekokwaaha voi ko Nhandejáry, he'i onhemonhe'ê-vy.

⁹ —Ha ndahi'aréi-tama ou hagwã Nhandejáry. Ogwahê-tama nhande rekoha vai rexa-vy. Yvyra hi'a vai va'e-rami nhande rekoha vai ramo nhane mbohasa asy-ta. Yvyra oityharami nhane mbohasa asy-ta. Oity rire ohapypa. Upe-rami ave omoingo asy-ta hekoha vai va'e-pe. Erova katu nde rekoha, he'i.

¹⁰ Ha ha'e kwéry he'i:

—Mbava'e tipo orojapo-ta orogwerova hagwã ore rekoha oroiko porã hagwã Nhandejáry ndive, he'i hikwái oporandu-vy íxupe.

¹¹ João Batista he'i íxupe kwéry:

—Mokõi nde kamisa erereko ramo, eme'ê peteĩ ogwereco e'ỹ va'e-pe. Ne remi'urã erereko ramo, emboja'o ja'o ereme'ê hagwã ogwereco e'ỹ va'e-pe, he'i íxupe kwéry.

¹² Upéi gwĩ plata-py oporombopaga va'ety kwéry ave ou onhemongarai ukase-vy íxupe:

—Ha ore tipo, he'i, —mbava'e tipo orojapo-ta? he'i oporandu-vy.

¹³ Ha João Batista he'i:

—Ereporokobra ramo, ani erembopaga hepy eterei. Ani eremombyta ndejéupe peipe'ave va'ekwe, he'i oporombopaga va'ety kwéry-pe.

¹⁴ Upe rire soldado kwéry ave oporandu íxupe:

—Ha ore tipo, he'i, —mbava'e tipo orojapo-ta orogwerova hagwã ore rekoha? he'i oporandu-vy.

João he'i íxupe:

—Ani pene rembiapo vai avave-rehe. Ani pembohasa asy avave-pe peipe'a vai hagwã íxugwi iplata. Ani ave pende apu avave-rehe nde platarã ome'ê hagwã peê-my. Pene rembiapo repy-rehe ani katu erenhe'ê rei rei ereiko-vy. Pevy'a joty, he'i onhemonhe'ê-vy soldado kwéry-pe oipe'a uka hagwã ha'e gwekoha vaikwe. —Pende rekoha porã katu, he'i íxupe kwéry.

¹⁵ Upeixagwa onhemonhe'ê ramo, kente kwéry onhemongeta opy'apy-py:

—Hi'are-ma nhaha'arõ Nhandejáry rembiporavo tee va'e ou hagwã. Ogwahê vyteri para'e, nogwahêi-ma para'e. João nipo ra'e Nhandejáry rembiporavo tee voi ra'e? Ha'e Cristo voi nipo ra'e, he'i rei João-rehe hikwái.

¹⁶ Ha João Batista he'i enterovéa-pe:

—Xe katu oromongarai y-py. Ou-ta peteĩ va'e xe rapykwerigwa ipu'akave va'e xéhegwi. Amboete eterei-gwi íxupe, atĩ amba'apo hagwã íxupe. Ha'e niko nane mongarai mo'ãi xe oromongaraiha-rami. Ha'e niko ombou-ta nde-vy Nhe'ê Marangatu tee va'e omohynyhê hagwã nde py'a erehupity hagwã nde rekoha porãrã. Temimombokwe jahapyha-rami ave ombou va'erã tata nde reko tujakwe pe'a-vy ndéhegwi, he'i Hesu rekorã mombe'u-vy João Batista.

He'i ave:

* 3:6 Is 40.3-5

¹⁷—Trigo rehegwa nhe'ê-rami aiporu-ta ereikwaa porãve hagwã Nhandejáry ogwahêha rehegwa nhe'ê, he'i. —Jaipiro trigo-gwi ipire. Ha'yigwe katu hyru-py nhandhongatu imoï-vy ha ipirekwe katu nhamboaty jahapy hagwã. Upeixagwa pire oïpiro va'e-rami nhande rereko arã. Ha'e nhande rekokwaaha. Hese ojerovia va'ekwe hendive opyta va'erã. Hese ojerovia e'y va'ekwe trigo pirekwe-rami omboaty-ta tata-py. Tata opave'y-my voi oiko-ta ohasa asy meme hagwã.

¹⁸Upéixa voi onhemonhe'ê kente kwéry-pe. Nhandejáry Hesu rehegwa nhe'ê porã omombe'u mbe'u voi oiko-vy. ¹⁹Hembiapo vai-rehe onhemonhe'ê voi íxupe kwéry João Batista. Upéixa-gwi mburuvixagwasu Herodes-pe ave onhemonhe'ê.

—Ne rembiapo vai nde ryvy-rehe, he'i íxupe. —Hembirekokwe ereipe'a araka'e íxugwi eremenda hagwã hese. Naiporã voi erereko Herodias nde rojavare-pe. Ne rembiapo vai meme-ma nde. Nde rekoha vai voi, he'i mburuvixagwasu Herodes-pe.

²⁰Upéa-rehe ojapo vai eteve jevy Herodes. Oipokwa uka João Batista-pe oapresa hagwã imoï-vy.

Omongarai João Batista Hesu-pe

(Mt 3.13-17; Mc 1.9-11)

²¹⁻²²Ne'írã oiko preso ramo João Batista omongarai heta kente kwéry-pe. Ha upe rire, omongarai ave Hesu-pe. Hesu onhemongarai jave omondo onhe'ê Nhandejáry-pe oiko-vy. Ha upe jave yváy-gwi ogwey Nhe'ê Marangatu tee va'e ou-vy. Pykasu-rami ojehexa uka ogwejy-vy Hesu-rehe. Ha upe jave ohendu ave yváy-gwi onhe'ê va'e:

—Nde xe ra'y tee va'e, xe rembihayhu tee voi nde, he'i Hesu-pe. —Nde xe mbovy'a voi ereiko-vy, he'i Hesu-pe.

Hesu ypykwe

(Mt 1.1-17)

²³Ogwereko-ma ramo trinta ro'y, Hesu onhepyrũ-ma oporombo'e mbo'e-vy. “José ra'y tee voi” he'i rei va'e hese heta oï. Tuvanga mate José. Ha José ratyu Eli.

²⁴Upéi myamyrĩ nhamoigwasu kwéry ko va'e: Eli Matã ra'y. Matã Levi ra'y. Levi Melqui ra'y. Melqui Janai ra'y. Janai José ra'y. ²⁵José Matatias ra'y. Matatias Amós ra'y. Amós Naum ra'y. Naum Esli ra'y. Esli Nagai ra'y. ²⁶Nagai Máate ra'y. Máate Matatias ra'y. Matatias Semei ra'y. Semei José ra'y. José Jodá ra'y. ²⁷Jodá Joanã ra'y. Joanã Resá ra'y. Resá Zorobabel ra'y. Zorobabel Salatiel ra'y. Salatiel Neri ra'y. ²⁸Neri Melqui ra'y. Melqui Adi ra'y. Adi Cosã ra'y. Cosã Elmadã ra'y. Elmadã Er ra'y. ²⁹Er Josué ra'y. Josué Eliézer ra'y. Eliézer Jorim ra'y. Jorim Matã ra'y. Matã Levi ra'y. ³⁰Levi Simeão ra'y. Simeão Judá ra'y. Judá José ra'y. José Jonã ra'y. Jonã Eliaquim ra'y. ³¹Eliaquim Meleá ra'y. Meleá Mená ra'y. Mená Matatã ra'y. Matatã Natã ra'y. Natã Davi ra'y. ³²Davi Jessé ra'y. Jessé Obede ra'y. Obede Boaz ra'y. Boaz Salá ra'y. Salá Naassom ra'y. ³³Naassom Aminadabe ra'y. Aminadabe Admim ra'y. Admim Arni ra'y. Arni Esrom ra'y. Esrom Farés ra'y. Farés Judá ra'y. ³⁴Judá Jacó ra'y. Jacó Isaque ra'y. Isaque Abraão ra'y. Abraão Terá ra'y. Terá Nacor ra'y. ³⁵Nacor Serugue ra'y. Serugue Ragaú ra'y. Ragaú Fáleque ra'y. Fáleque Éber ra'y. Éber Salá ra'y. ³⁶Salá Cainã ra'y. Cainã Arfaxade ra'y. Arfaxade Sem ra'y. Sem Noé ra'y. Noé Lameque ra'y. ³⁷Lameque Metusalém ra'y. Metusalém Enoque ra'y. Enoque Jarete ra'y. Jarete Maleleel ra'y. Maleleel Cainã ra'y. ³⁸Cainã Enos ra'y. Enos Sete ra'y. Sete Adão ra'y. Adão Nhandejáry ra'y.

4

Anhaywasu ombojevavy ukase mo'ã Hesu-pe

(Mt 4.1-11; Mc 1.12-13; Hb 2.18; 4.15)

¹Hesu py'a omohynyhêmba Nhe'ê Marangatu tee va'e. Upe rire ombou íxupe jevy ysryy Jordão-gwi, ogweraha íxupe tekwaty e'y-my. ²Quarenta áry opyta upe-py anháy ruvixa ombojevavy uka mo'ã Hesu-pe. Ha mba'eva ndo'úi upe-py. Upéi ivare'a voi Hesu. ³Upe-ma ramo anhaywasu he'i íxupe:

—Nde Tupã Nhandejáry ra'y tee ramo, kóa erejapo kwaa arã. Ita-gwi erejapo va'erã mbojape, he'i anhaygwasu Hesu-pe ombojevavy hagwã mo'ã íxupe.

⁴Hesu katu he'i íxupe inhe'ê ojoko-vy:

—Nhandejáry ohai uka va'ekwe onhe'ê marangatu he'i uka nhande-vy:

“Ndaha'éí tembi'u-rehe anho oikove kente kwéry, he'i Nhandejáry onhe'ê-py”^{*}
he'i Hesu anhaygwasu-pe ojoko-vy.

⁵⁻⁷Upéi anhaygwasu ogweraha Hesu-pe ijyvate va'e ári. Cerro apyte-py oiko ramo ombojevavyse-gwi he'i Hesu-pe:

—Tetã tetã erehexa pa? Entéro tetã vvy arigwa oĩ va'e gwive erehexa pa? Upe oĩ va'e gwive xe mba'e meme voi, he'i íxupe. —Upe oĩ va'e gwive xe-vy onheme'ẽmba va'ekwe. Ame'ẽse va'e-pe ame'ẽ jevy va'erã. Erenhesũ ramo xe-vy, xe momba'egwasu ramo, ame'ẽ va'erã nde-vy, he'i. —Apomomburuvixa va'erã enterove ne mboete hagwã, he'i ombojevavyse-vy mo'ã Hesu-pe.

⁸Ha Hesu katu he'i íxupe inhe'ê ojoko-vy:

—Nhandejáry ohai uka va'ekwe onhe'ê, he'i uka nhande-vy:

“Tupã Nhandejáry-pe mante erenhesũ va'erã. Ha'e ae eremboete tee va'erã”^{*}
he'i nhande-vy Nhandejáry nhe'ẽ, he'i Hesu anhaygwasu-pe inhe'ê ojoko-vy.

⁹Upe rire anhaygwasu ogweraha jevy íxupe Jerusalém tetã-my. Nhandejáry róga kakwaa apy-rehe omoí íxupe. Ombojevavy ukase mo'ã-gwi Hesu-pe he'i:

—Nde Tupã Nhandejáry ra'y tee ramo, a-gwi erejeity va'erã vvy-py, he'i íxupe otantea-vy. ¹⁰He'i ave —Tupã Nhandejáry nhe'ẽ ohai uka va'ekwe-py he'i:

“Tupã Nhandejáry he'i va'erã gwembigwái yváy pygwa kwéry-pe onhangareko hagwã nde-rehe pono mba'e vai ojehu nde-vy, pono erevyapi.

¹¹Ipo-py nde reraha va'erã pono ererokwa nde py ita-rehe”^{*}
he'i anhaygwasu Hesu-pe.

¹²Upéi Hesu he'i:

—Nhandejáry nhe'ẽ-py he'i ave:

“Ani katu eretantea teĩ Tupã Nhandejáry-pe hemimbota e'ỹ erejapo-vy”^{*}
he'i íxupe Hesu.

¹³Upéi anhaygwasu ndojohuvéi ombojevavy uka hagwã mo'ã. Upe rire anhaygwasu oho sapy'a jevy íxugwi.

Hesu omombe'u Nhandejáry nhe'ẽ Galiléia vvy pygwa kwéry-pe

(Mt 4.12-17; Mc 1.14-15)

¹⁴Aipo ramo Hesu ou jevy Galiléia vvy-py. Nhandejáry Nhe'ẽ Marangatu tee va'e mbaraete reheve ogwahẽ jevy ou-vy Galiléia vvy-py. Ha enterove herakwã porã ohendu. ¹⁵Ha Hesu oho omombe'u mbe'u ojeporahéi haty-rupí. Ha henduháry kwéry omomba'egwasu íxupe.

Nazaré tetã mygwa-pe Hesu onhemombe'u

(Mt 13.53-58; Mc 6.1-6)

¹⁶Hesu ogwahẽ jevy okakwaa hagwe-py. Nazaré tetã-my ogwahẽ jevy ou-vy. Ha oiko meme hagwe-rami joty oiko upe-py. Pytu'uha áry-py oho oike ojeporahéi haty-py. Opu'ã onhembo'y omonhe'ẽ hagwã Nhandejáry kwatia nhe'ẽ. ¹⁷Upéi ome'ẽ íxupe hemimonhe'ẽrã Nhandejáry nhe'ẽ-py omombe'u va'ety héry va'e Isaías ohai va'ekwe. Oipe'a pe'a ojohu ramo petei nhe'ẽ katu omonhe'ẽ-ma. Omonhe'ẽ ohendu hagwã ojogweroaty va'e:

¹⁸—“Tupã Nhandejáry Nhe'ẽ Marangatu tee va'e oĩ xe py'apy-py. Amombe'u hagwã iporiahu va'e kwéry-pe inhe'ẽ marangatu xe poravo-ma. Preso oiko va'e kwéry-pe ha'e hagwã, Preso ereiko ha-gwi ne mosẽ-tama, ha'e hagwã íxupe kwéry xe mbou.

* 4:4 Dt 8.3 * 4:8 Dt 6.13 * 4:11 Sl 91.11-12 * 4:12 Dt 6.16

Hesapypo e'y va'e-pe ambohesapypo hagwã xe mbou. Anohẽ hagwã aresende-vy gwĩ ojerereko asy va'e-pe xe mbou.

¹⁹Enterovéa-pe ha'e hagwã, Ndahi'are ete mo'ãi Nhandejáry oresende hagwã gwa'yry tee kwéry-pe, gwajýry tee kwéry-pe ave, ha'e hagwã amombe'u-vy xe mbou** he'i omonhe'ẽ-vy kwatia nhe'ẽ Hesu.

²⁰Upéi omboty kwatia. Ome'ẽ jevy herekwa-pe. Upe rire ha'e ogwapy. Ha entéro upe-py ojogweroaty va'e oma'ẽ hese. Ohexa katu katu íxupe.

²¹Upéi Hesu he'i íxupe kwéry onhemombe'u-vy:

—Xe rehegwa ohai va'ekwe omotenonde-vy, ãy oiko-ma. Amonhe'ẽ kuri kwatia-py Nhandejáry nhe'ẽ. Xe rehegwa voi nhe'ẽ pehenduma kuri, he'i onhemombe'u-vy.

²²Ha enterove ohendu va'e ojohu porã Hesu-rehe. Onhomongeta porã Hesu-rehe:

—Iporã voi omonhe'ẽ va'e kuri, he'i. —Imarangatu voi inhe'ẽ hemimombe'u, he'i opondera-vy hese. —José ra'y ae nipo ra'e ko va'e, he'i ave opondera-vy ndojeroviaséi-gwi hese.

²³Upéi Hesu he'i ave íxupe kwéry:

—Pejese mo'ã xe-rehe, “Xe ndaroviái voi. Ndajerovia mo'ãi hese” peje mo'ã xe-rehe. “Ne rerakwã orohendu va'ekwe Cafarnaum tetã mygwa-gwi ogwahẽ va'ekwe ko'a-py. Apy ave ne mongakwaa hagwe-py ejapo hexapyrã-rupi ave ore remiexagwã-rupi ejapo ave” peje mo'ã kuri xe-vy xe-rehe nderejeroviaséi-gwi, he'i íxupe kwéry. ²⁴—Anhetegwa ha'eta peẽ-my, he'i. —Nhandejáry nhe'ẽ-py omombe'u va'ety gwetã mygwa-pe nohenduséi voi, he'i Hesu ojerovia e'yha-rehe onhemonhe'ẽ-vy íxupe kwéry.

²⁵⁻²⁶—Napene mandu'a porã ra'e myamyrĩ nhande re'yí hekoha kwéry-rehe. Nhande judeu kwéry Nhandejáry re'yí tee jepe, myamyrĩ kwéry ndojeroviái-gwi hese Nhandejáry ndovy'ái joty. Upéa ereikwaa porã hagwã judeu e'y va'e-pe ójehe ojerovia va'e-pe ohexakwaa porã va'ekwe Nhandejáry, he'i. —Israel remiarirõre judeu kwéry ndojeroviái va'ekwe ójehe jave, Elias amyrĩ-pe omondo va'ekwe oipytygwõ hagwã judeu e'y va'e-pe. Nhandejáry nhe'ẽ-rupi oho. Sidom vvy-py, Sarepta tetã-my omogwahẽ. Judeu e'y va'e-pe jepe Nhandejáry omogwahẽ joty. Peteĩ tembirekokwe-pe mate oipytygwõ. Ha ndaha'úi Israel remiarirõre-pe. Ha'e kwéry katu upe jave ivare'apa rei va'ekwe okwa-vy, hi'are eterei ndokyvéi-gwi. Mbohapy ro'y-rupi, ha seis jasy-rupi ave ndokyvéiry. Hi'upy ndoikovéi. Ha ivare'apa okwa-vy. Nahembi'uvéi. Ha judeu e'y va'e-pe ójehe ojerovia va'e-pe mate oipytygwõ uka Nhandejáry, he'i.*

²⁷Upéi he'i jevy:

—Nhandejáry nhe'e-py omombe'u va'ety Eliseu amyrĩ oiko jave oime ave heta mba'asy vai-gwi ijai aipa va'e Israel tetã mygwa judeu kwéry. Ha ha'e kwéry-pe nomopotĩry, nombogwerái íxupe kwéry. Peteĩ Israel e'y va'e-pe mate ójehe ojerovia-gwi ombogwera joty. Síria gwigwa va'e-pe ombogwera. Héry va'e Naamá, he'i Hesu onhemonhe'ẽ-vy ojeporahéi haty-py oime va'e kwéry-pe.*

²⁸Upéi inhe'ẽ renduha ipoxy voi Hesu-rehe “Onhemonhe'ẽ rei nhande-vy Hesu” he'i mo'ã Hesu-rehe hikwái. ²⁹Ipoxy eterei-gwi opu'ã onhembo'ypa hikwái ogwenohẽ hagwã Hesu-pe gwetã-gwi. Hesu rupive ojeupi oje'ói-vy oity hagwã mo'ã Hesu-pe vvyaty aty apyte-gwi. Upe tetã oime vvyaty aty yke-rehe. Yvateve teve hupive oje'ói oity hagwã mo'ã vvyaty apyte-gwi ojuka hagwã mo'ã. ³⁰Ha Hesu katu ohasa rei jepe ipa'ũ-rupi ohovy. Ohose ha-py oho joty.

Hesu omosẽ imondo-vy anháy-pe

(Mc 1.21-28)

³¹Hesu ogwejy ou-vy Galiléia vvy-py. Cafarnaum tetã-my ogwahẽ ou-vy. Pytu'uha áry-py omombe'u upe pygwa kwéry-pe.

³²Ha onhemonhe'ẽ ramo ohendu va'e kwéry opondera hese hikwái.

* 4:19 Is 61.1-2 * 4:25-26 1 Rs 17.1,8-16 * 4:27 2 Rs 5.1-14

—Onhemonhe'ě porā tee nipo ra'e Hesu, he'i hese ojúpe hikwái. —Onhe'ě voi omombe'u, he'i. —Oikwaa arandu tee omombe'u hagwā, he'i opondera eterei-vy hese hikwái.

³³Ha upe-py, ojeporahéi haty-py, oĩ ave anháy ojepota va'e. Anháy réry-rupi ae osapukái he'i mo'ā Hesu-rehe:

³⁴—Nde, Hesu Nazaré pygwa, ma'erā-gwi eregwahě? Nde katu Tupā Nhandejáry ra'y tee. Ne marangatu voi ko nde. Ore hundi hagwā ereju para'e? he'i Hesu-pe anháy.

³⁵Hesu ae oja'o-ma íxupe. Omokirirĩ uka íxupe:

—Ekirirĩ katu, he'i íxupe. —Esě katu kwimba'e-gwi, he'i íxupe omosě-vy.

Upéi anháy oity upe kwimba'e-pe yvy-py. Ojogweroaty va'e pa'ũ-my oity rire osě-ma íxugwi. Mba'eva jepe ndojapóiry kwimba'e-rehe.

³⁶Ha upe pygwa oĩ va'e kwéry opondera Hesu-rehe.

—Mba'eixagwa ko nhe'ě? he'i oporandu-vy ojúpe. —Hesu ipu'akave para'e anháy-rehe, he'i. —Ha'e onhe'ě-py rei omosě anháy kwéry imondo-vy, he'i ojúpe hikwái Hesu-rehe opondera-vy.

³⁷Upeíxa-gwi Hesu réry opa-rupi oho. Upe yvy jerekwe-rupi oikwaapa-ma Hesu rehegwa nhe'ě herakwā porā eteha.

Hesu ombogwera Simão raixo-pe

(Mt 8.14-15; Mc 1.29-31)

³⁸Osě-ma ramo ojeporahéi haty-gwi oho oike Simão róga-py. Ha Simão raixo katu hasy voi oĩ-vy upe-py. Heteraku eterei. Upéa-rehe ojerure hikwái Hesu-pe ombogwera hagwā íxupe.

³⁹Upéi Hesu oho hasy va'e renda-py. He'i:

—Epoi íxugwi, he'i mba'asy-pe.

Oipe'a heterakwé íxugwi. Omoro'ysā hete inhe'ě-rupi. Okwera-magwi Simão raixo oho omomimói imbohupa remi'urā kwéry.

Hesu ombogwera heta hasy va'e-pe

(Mt 8.16-17; Mc 1.32-34)

⁴⁰Oike-ma kwarahy. Oupa Hesu renda-py. Ogweru íxupe hasy va'e kwéry. Opaixagwa mba'asy oiporu va'e ogweru henda-py. Ha Hesu ombogwera íxupe kwéry. Peteĩ teĩ-rehe omoĩ opo ombogwera hagwā íxupe kwéry. ⁴¹Heta anháy omosě ave íxugwi kwéry. Osě-vy osapukái imombe'u-vy.

—Nde Hesu Nhandejáry ra'y tee nde, he'i. Oikwaa voi Hesu-pe. —Nde Cristo voi. Nhandejáry rembiporavo tee va'e voi nde, he'i anháy Hesu-pe.

Upéi omokirirĩmba íxupe kwéry.

—Ekirirĩ katu. Ani xe mombe'u avave-pe, he'i jevy íxupe Hesu. Omokirirĩmba íxupe kwéry. Ndohejái onhe'ě anháy. Omokirirĩ íxupe.

Hesu onhemonhe'ě Judéia pygwa kwéry-pe

(Mc 1.35-39)

⁴²Ko'ěmba-ma ramo osě oho Hesu anho tekoha e'ỹ-my. Ha heta eta ou hapykwéri oheka heka íxupe. Otopa-ma ramo, he'i Hesu-pe:

—Ani ereho teĩ. Epyta katu ko'a-py. Ani ore reja rei ereho-vy, he'i Hesu-pe.

⁴³Upéi Hesu he'i:

—Tekotevė aha tetā ambue mbue-rupi. Gwĩa-rupi ave taha tamombe'u Nhandejáry nhande ruvixarā rehegwa nhe'ě porā, he'i. —Upe va'e ajapo hagwā xe mbou Nhandejáry ko yvy-py, he'i.

⁴⁴Upe rire oho Hesu opa-rupi. Galiléia yvy jerekwe-rupi oho. Ojeporahéi haty haty-rupi ogwahě omombe'u hagwā nhe'ě oiko-vy.

5

Pira mbo'a haty-py heta ombo'a pira

(Mt 4.18-22; Mc 1.16-20)

¹ —Ha upéi katu onhemonhe'ê jevy-ma Hesu yugwarusu rembe'y-py. Genesaré yugwarusu héry. Ha heta eterei ijatypa henda-py ohendu hendu Nhandejáry nhe'ê hemimombe'u.

² Upe jave Hesu ohexa mokõi kanoagwasu. Y rembe-rehe oĩ kanóa. Pira jopoihaty osêsê kuri ra'e hikwái. Okyha pira mbo'a haty kwéry ojohéi-vy osêsê ijáry. ³ Upéi oike Hesu kanóa-py. Simão mba'e voi kanóa. Aipo ramo Hesu he'i Simão-pe:

—Jaha mixĩ y rembe'y-gwi enterove ohendu porã hagwã xe nhe'ê. He'i-vy ogwapy-ma kanóa-py.

Ogwapy jave onhemonhe'ê nhe'ê ojogweroaty va'e-pe. Ojeapysaka Hesu remimombe'u-rehe ohendu hagwã yvy-gwi.

⁴ Opa-ma, onhemonhe'ê rire he'i Simão-pe:

—Jaha hypyve ha-py ereity hagwã nde kyha heta pira ereipyhy hagwã, he'i íxupe.

⁵ Ha Simão katu he'i:

—Oromba'apo kuri, mbo'eháry. Pyhare puku jave oromba'apo ha mba'eve norogwenohêi. Ne nhe'ê-py ae oroity jevy-ta ore kyha kwéry.

⁶ He'i-vy ombogwejy jevy hikwái ombo'a hagwã pira. Hesu nhe'ê-py oity jevy okyha opira jopói-vy. Upe rire heta pira oipyhy. Haimete omondoro kyha. Pira ipohýi eterei-gwi.

⁷ Upe-ma ramo ohenói opytygwõharã inhirũ kanóa ambue pygwa kwéry. Upéi ou hikwái omohynyhê kanoagwasu kwéry-py pira. Pira ipohýi eterei-gwi haimete-ma onheapymĩ kanóa mokõive va'e. ⁸ Pira heta eterei-ma ramo onhesũ Hesu renonde-py Simão Pedro Hesu omboete-vy. He'i íxupe:

—Xe Járy, ejei katu xéhegwi. Xe py'a ky'a eterei aiko hagwã ne ndive, atĩ eterei aiko hagwã ne ndive, he'i Simão opondera ndera Hesu-rehe.

⁹ Heta eterei pira-gwi opondera hese. Inhirũ gwéry ave opondera ndera Hesu-rehe.

¹⁰ Tiago, João ave opondera ave. Simão ndive ojopói meme upe mokõi Zebedeu ra'y. Onhemongeta opy'apy-py Hesu-rehe oiko-vy hikwái. “Mba'éixa po oikwaa Hesu pirarehe?” he'i opondera-vy. Ha Hesu he'i Simão-pe:

—Ani eretĩ teĩ xéhegwi, he'i. —Áy erenhypyrũ-ta Nhandejáry nhe'ê eremombe'u-vy. Ne nhe'ê rendu ramo, heta kente kwéry xe moirũ va'erã.

—Iporã, he'i Hesu-pe.

¹¹ Upéi ogweru jevy okanóa kwéry y rembe-py omoĩ. Ha oheja okanóa oho Hesu omoirũ hagwã.*

Mba'asy vai oiporu va'e-pe Hesu ombogwera

(Mt 8.1-4; Mc 1.40-45)

¹² Hesu oime jave tetã-my ogwahê hasy vai va'e. Mba'asy vai oipiremboaipe íxupe. Ohexa-ma ramo Hesu-pe, onhesũ henonde-py. Ovapy-py ho'a oĩ-vy omboete-vy Hesu-pe. Ojerure rure íxupe:

—Xe Járy, nde porombogwerahaty voi nde. Nde ae xe rexakwaa ramo xe mbogwera hagwã, he'i Hesu-pe.

¹³ Hesu katu oipyso-ma opo hese:

—Xe katu orohexakwaa voi, he'i omoĩ opo hese-vy ombogwera hagwã íxupe. —Tane mopotĩ katu ko mba'asy vai-gwi, he'i íxupe ombogwera hagwã.

Onhe'ê jave íxupe okwera-ma. Hesu opoko hese va'e ijai va'ekwe okwera-ma. ¹⁴ Upéi he'i jevy íxupe:

—Aníke eremombe'u avave-pe, he'i. —Tereho mani ehexa uka pa'i-pe erekweramaha, he'i. —Eme'ê íxupe upe myamyri Moisés he'i va'ekwe ereme'ê hagwã erenhemopotĩ jevy hagwã. Upéixa oikwaa-ta enterove erekweramaha, he'i omondo-vy íxupe.

¹⁵ Ha opa-rupi omosarambi Hesu rerakwã. Upéa-gwi hetave tave ojogweroaty henda-py ohendu hagwã inhe'ê onhemogwera uka hagwã ave entéro imba'asy-gwi.

¹⁶ Hesu oho joty tekwaty e'y-my Nhandejáry-pe ombojeupi-vy onhe'ê.

* 5:11 Jo 21.1-14

Hajy jeapa va'e-pe Hesu ombogwera
(Mt 9.1-8; Mc 2.1-12)

¹⁷ Upéi Hesu omombe'u jevy Nhandejáry rehegwa nhe'ê porã. Óga py-py ogwapy va'e kwéry ohendu. Oĩ upe-py fariseu va'e kwéry. Oĩ Moisés amyri rembihai va'ekwe omombe'u va'e kwéry. Opa rupi-gwi ha'e kwéry ou. Galiléia vvy jerekwe-rehe tetã'i tã'i-rupi oĩ va'e gwive ou ave. Judéia vvy jerekwe-rehe tetã'i tã'i-rupi oĩ va'e gwive ou ave. Jerusalém tetãgwasu-gwi ou ave. Ha Nhandejáry ombopu'aka Hesu ombogwera gwera hagwã hasy va'e kwéry-pe.

¹⁸ Upe jave gwĩ kwimba'e kwéry ogweru hajy jeapa va'e. Hupa reheve ogweru Hesu renda-py. Ha ndaikatúí oike. Mba'éixa oike arã óga-py. ¹⁹ Heta eterei ojogweroaty-gwi ndikatúí ogwerohasa hasy va'e-pe okê-rupi. Upéa-gwi ojeupi oipe'a óga arigwa. Ombokwa Hesu ári. Ikwa-rupi ombogwejy hajy jeapa va'e. Hupa reheve ombogwejy gwejy íxupe. Ojogweroaty va'e pa'ũ-my, Hesu renonde-py omoĩ hasy va'e ombogwejy-vy.

²⁰ Ohexa-ma íxupe kwéry Hesu. Oikwaa-ma ojerovia etemaha ójehe.

Upéa-gwi he'i hajy jeapa va'e-pe:

—Amboyke-ma ne rembiapo vaikwe ndéhegwi, he'i íxupe Hesu.

²¹ Ha judeu rekombo'ehaty kwéry, fariseu kwéry ave upe-py oĩ va'e onhepy'amongeta-vy ogwapy okwa-vy. “Onhe'ê vai rei nipo ra'e upe va'e. Onhemonhandejáry rei ra'e” he'i mo'ã hikwái Hesu-rehe. “Tupã Nhandejáry ha'e anho mante omboyke va'e nhandéhegwi nhane rembiapo vaikwe. Ha'eixagwa ndaipóri voi. Ndaipóri ambue omboyke va'erã nhane rembiapo vaikwe” he'i. “Ma'erã, Amboyke-ma ne rembiapo vaikwe ndéhegwi, he'i kuri Hesu. Onhemonhandejáryse mo'ã” he'i rei hikwái Hesu-rehe.

²² Upéi Hesu he'i íxupe kwéry:

—Ma'erã-gwi aipo-rami ere nde py'apy-py xe-rehe? he'i íxupe. ²³ —Mbava'e pa hasyve jajapo hagwã nhambogwera íxupe para'e, nhamboyke hembiaapo vaikwe íxugwi para'e? he'i. ²⁴ —Nhambogwera ramo pya'e enterove oikwaa arã. Ha nhamboykepa ramo hembiaapo vaikwe íxugwi ndajahexáiry. Ajehexa uka-ta nde-vy xe ko ipu'aka tee va'e voi. Xe ko Nhande Ryke'y tee va'e amboyke kwaa voíte hembiaapo vaikwe aporombogwera kwaa ave, he'i. —Xe nhe'ê-py joty amboyke vvy arigwa rembiapo vaikwe. Upéa peikwaa hagwã anhe'ê-ta hajy jeapa va'e-pe ambogwera hagwã íxupe, he'i Hesu.

Upéi katu he'i hajy jeapa va'e-pe:

—Epu'ã katu. Tereho nde róga-py. Eraha nde rupa ave, he'i.

²⁵ Aipo ramo inhe'ê-py opu'ã oho-vy. Enterove rovagwy-rupi opu'ã ohupi-ma gwupagwe heraha-vy. Gwóga-py oho jave omomba'egwasu-ma Tupã Nhandejáry-pe.

²⁶ Upéa-gwi enterove opondera eterei Hesu-rehe hikwái. Onhemondýi okwa-vy. Otimba ete-ma hikwái.

—Nhandejáry pu'aka-rupi nipo ombogwera ra'e, he'i. —Ipu'aka tee va'e jepe imandu'a porã nhande-rehe Nhandejáry, he'i omomba'egwasu-ma Nhandejáry-pe hikwái. —Áy hembiaapo porã hexapyrã-ma nipo ra'e jahexa-ma. Ohexa uka-ma nhande-vy heroviapyrã, he'i opondera-vy hese hikwái.

Levi-pe Hesu ohenói

(Mt 9.9-13; Mc 2.13-17)

²⁷ Upe rire-ma osê oho-vy. Ohexa plata-py governo pegwarã nhane mbopaga uka va'etye-py. Héry va'e Levi. Ohexa íxupe ogwapy oĩ-vy nhane mbopaga haty-py. He'i íxupe:

—Eju, xe moirũ, he'i íxupe.

²⁸ Ha upéi katu opu'ã, ohejapa omoirũ hagwã íxupe.

²⁹ Upe rire Levi omongaru heta inhirũ gwéry-pe. Hesu ndive okaru hagwã ohenói íxupe kwéry. Oĩ upe-py heta nhane mbopaga va'ety. Levi remienói kwéry pa'ũ-my oime hikwái. Ogwapy oĩ-vy okaru va'e renda-py. Hesu ndive okaru ave hikwái.

³⁰ Ha gwĩ fariseu kwéry judeu rekombo'ehaty kwéry gwive hemimbo'e kwéry-pe onhe'ê rei rei:

—Ma'erã-gwi pekaru gwĩ nhane mbopaga va'ety ndive, hekoha vai va'e ndive ave? he'i oporandu-vy íxupe kwéry.

³¹ Hesu katu onhemonhe'ẽ oporandu va'e-pe:

—Nhane resãí ramo nanhaikotevêi nhane mbogwerahaty-rehe. Nhande rasy ramo ae nhaikotevê-ma va'erã hese. ³² Upéixa voi ave hembíapo vai va'e oikotevê-ma va'erã xe-rehe ave, he'i. —Aju ahenói íxupe ogwerova-ma haggwã gwekoha. “Xe rekoha porã” he'i onhemboete-vy va'e-pe ndajúí ahenói-vy, he'i Hesu onhemonhe'ẽ-vy íxupe kwéry.

Okaru e'ỹ reheve va'e rehegwa nhe'ẽ

(Mt 9.14-17; Mc 2.18-22)

³³ Upéixa-gwi he'i Hesu-pe:

—João remimbo'e kwéry, fariseu remimbo'e kwéry ave heta gwembi'u ogwereco jepe, ohasa meme okaru e'ỹ reheve ombojeupi-vy onhe'ẽ Nhandejáry-pe. Ne remimbo'e kwéry ae okaru joty hoy'u joty ave oiko-vy. Ma'erã tipo upéixa ojapo? Ma'erã tipo ndohasáiry okaru e'ỹ reheve ne remimbo'e kwéry? he'i ojohu vaise mo'ã Hesu-pe.

³⁴⁻³⁵ Upéi Hesu oiporu omenda va'e rehegwa-rami nhe'ẽ omombe'u haggwã íxupe kwéry.

—Ojogweroaty omenda va'erã-rehe. Upéi omenda rire oukwe-vy okaru hikwái. Avave nde'íry arã hendive oí va'e-pe ohasa haggwã okaru e'ỹ reheve. Ogwahê-ta joty hi'áry ojereraha va'erã íxugwi upe omenda va'ekwe kuri. Ojereraha rire ae, heta jepe ogwereco gwemi'urã, ohasa joty va'erã okaru e'ỹ reheve oiko-vy, he'i Hesu arandu nhe'ẽ oiporu-vy ojéhegwa nhe'ẽ omombe'u haggwã.

³⁶ Ha upéi katu Hesu omombe'u jevy tekoha pyahurã rehegwa nhe'ẽ. Ao nharemenda va'e rehegwa nhe'ẽ-rami oiporu omombe'u-vy.

—Ao pyahu-gwi nanhaikyíry nharemenda haggwã ao tuja-pe. Upéixa nharemenda ramo, ojepoapy arã ra'e ipyahu va'e. Ndojehe'a porãí arã ra'e ituja va'e ndive, he'i Hesu arandu nhe'ẽ oiporu-vy.

³⁷ Upéi katu oiporu jevy arandu nhe'ẽ teko pyahu-rehe omombe'u jevy-vy. Uva rykwere ryrú rehegwa nhe'ẽ-rami oiporu.

—Nanhanhunháiry uva rykwere pyahu va'e hyru tujakwe vakapi va'e-py. Nnanhunha ramo, ombovu omondoro arã ra'e gwyrú vakapi tujakwe. Osyrypa arã pe uva rykwere osoropa arã hyrukwe. ³⁸ Uva rykwere pyahu va'e nnanhunha hyru pyahu-py ave. Upéixa ramo mokóive hi'are porã. ³⁹ Ha'e-ta ave peẽ-my: Uva rykwere ituja va'e ho'u rire, tpyahu va'e ndo'uséiry avave. “He porã eterei ko va'e” he'i voi ituja-rehe hikwái, he'i Hesu arandu nhe'ẽ oiporu-vy omombe'u haggwã tekoha pyahu ndaha'etí tekoha tujakwe-rami.

6

“Pytu'uha áry Járy voi ko xe” he'i Hesu

(Mt 12.1-8; Mc 2.23-28)

¹ Ha upéi katu pytu'uha áry-py oho ogwata Hesu. Kokwe mbyte-rupi oho. Ha hemimbo'e kwéry oipo'o-ma trigo rope. Oipokyty opo-py ho'u haggwã inhapígwé. ² Ha gwí fariseu kwéry he'i íxupe kwéry:

—Ma'erã tipo upéixa erejapo? Naiporãí voi jaipo'o trigo rope pytu'uha áry-py, he'i íxupe. —Tekotevê japytu'u opa nhane rembiapo-gwi, he'i ojohu vai-vy íxupe kwéry.

³ Upéa he'i-gwi Hesu he'i ojohu vai va'e kwéry-pe:

—Peẽ, pemonhe'ẽ rei ra'e Nhandejáry nhe'ẽ kwatia-rehe. Napene mandu'áiry nhane ramoigwasu Davi rehegwa nhe'ẽ-rehe. Yma, nahembi'úi-gwi ivare'a eterei va'ekwe myamyrí Davi inhírũ gwéry ndive.* ⁴ Upéa-gwi oike Nhandejáry-pe nhamboete haty-py. Koty-py oike rire, ho'u gwí mbojape Nhandejáry rovagwy-py pa'i remimoígwé. Upéa ndaikatúí ho'u avave. Nhandejáry ndohájái avave-pe ho'u rei upe mbojape. Pa'i kwéry rembi'u va'e ae upéa. Pa'i e'ỹ ramo jepe ho'u joty va'ekwe Davi. Ome'ẽ ave oirũ gwéry-pe.

* 6:3 1 Sm 21.1-6

Ha'e kwéry ho'u ave. Nhandejáry oheja rei íxupe kwéry. ⁵Ha xe katu, xe Nhande Ryke'y tee va'e. Upéa-rupi pytu'uha áry Járy voi ko xe, he'i íxupe kwéry Hesu onhemonhe'ê-vy.

Ipo ypi va'e-pe ombogwera
(Mt 12.9-14; Mc 3.1-6)

⁶Ha upéi katu pytu'uha áry jevy-ma ramo Hesu oike ojeprahéi haty-py. Omombe'u jave ohexa oí ave upe-py ipo ijakatúa ypi va'e. ⁷Ha gwí judeu rekombo'ehaty kwéry, fariseu kwéry ave omangea ngea mo'á Hesu-rehe omboja reise mo'á Hesu-rehe nhe'ê. "Hembiapo-gwi opytu'u-ta para'e, ndopytu'ú mo'ái para'e?" he'i ojéupe hikwái. "Ombogwera hagwá omba'apo-ta para'e. Japytu'uha áry-py niporái nhamba'apo. Ndahá'ei Nhandejáry remimbota" he'i rei ojéupe hikwái. Omboja rei Hesu-rehe nhe'ê. Upéixa-gwi Hesu-rehe oma'ê oha'arô-vy. ⁸Hesu ae ipy'amongetaha jepe oikwaa-ma. Upéa oikwaa jave he'i ipo ypi va'e-pe:

—Epu'á katu. Eju enhembo'y ore mbyte-py, he'i íxupe.

Upéixa-gwi ha'e opu'á ou-vy Hesu rovagwy-py. ⁹Upe-ma ramo Hesu oporandu upe pygwa kwéry-pe.

—Aporandu-ta peê-my pene arandurã-rehe, he'i íxupe kwéry. —Mbava'e tipo pejohu porãve jajapo hagwá pytu'uha áry-py? Jajapo porã tipo? Jajapo vai tipo? he'i. —Peê-my iporã tipo nhaporombogwera pytu'uha áry-py? Iporã tipo japorojuka para'e? Mbava'e pa pejohu porãve peê? he'i onhemonhe'ê-vy íxupe kwéry.

¹⁰Upéi ojogweroaty va'e-rehe osareko ranhe. Upéi he'i ipo ypi va'e-pe:

—Eipysu katu nde po, he'i íxupe.

Oipysu-ma ramo opo. Pe ipo ypi va'ekwe okwera-ma.

¹¹—Ombogwera-ma íxupe. Hembiapo-gwi ndopytu'úi Hesu, he'i rei ipoxy-vy hese hikwái. —Nhandejáry remimbota ndojapói ra'e. Mba'e tipo jajapo-ta hese? he'i oporandu randu-vy ojéupe hikwái.

Ha ojapo vaise mo'á Hesu-rehe hikwái.

Hesu oiporavo doze kwimba'e-pe onhe'ê mombe'uharã
(Mt 10.1-4; Mc 3.13-19)

¹²Ha upéi katu Hesu ojeupi oho-vy vvyatyrsu-py. Oho ombojeupi hagwá onhe'ê Nhandejáry-pe upe-py. Pyhare-rupi omondo mondo Nhandejáry-pe onhe'ê. ¹³Ko'êmba-ma ramo ohenói gwemimbo'e kwéry-pe ogwahê hagwá henda-py. Upéi oiporavo doze kwimba'e-pe.

—Peê xe remimondorã kwéry voi, he'i upe doze gwembiporavo kwéry-pe.

¹⁴Oiporavo Simão-pe. Ha ombohéry joa íxupe Pedro. Oiporavo Simão ryvy André-pe ave. Oiporavo Tiago-pe ave, João-pe ave, Filipe-pe ave, Bartolomeu-pe ave, ¹⁵Mateus-pe ave, Tomé-pe ave, Alfeu ra'y Tiago-pe ave, Simão-pe ave. Ha'e gwí huvixa ramo oiko va'e-pe omosêse va'e kwéry irũ va'ekwe. ¹⁶Hesu oiporavo ave Tiago ra'y Judas-pe ave, Judas Iscariotes-pe ave. Doze kwimba'e-pe oiporavo omombe'u porãve hagwá inhe'êgwe. Ha Judas Iscariotes oiko va'erã Hesu pyhy ukaharã.

Hesu ombogwera heta hasy va'e-pe
(Mt 4.23-25)

¹⁷Upe rire ogwey jevy gwemimondo va'erã kwéry ndive. Ogwahê-ma ramo vvyatyrsu renonde-py opyta. Upe-py heta eta onhe'ê renduha kwéry-pe otopa jevy. Heta eta ojogweroaty va'e oí ave upe-py ou araka'e Judéia vvy jerekwe rehegwa. Ou araka'e Jerusalém tetã mygwa ave. Ou ave araka'e mombyryvegwa. Ygwasu rembe'y rehegwa Tiro tetã jerekwe rehegwa, Sidom tetã jerekwe rehegwa ou ojogweroaty upe-py. ¹⁸Hesu nhe'ê rendu-vy ou. Nhembogwera uka hagwá ave mba'asy-gwi ou. Ha gwí anháy ombohasa asy va'e-pe ave Hesu ombogwera. ¹⁹Ha enterove ojogweroaty aty va'e omoise opo Hesu-rehe. Ipu'aka reheve onhembogwera ukase eterei-gwi omoise opo hese. Ha ombogwera joty enterovéa-pe.

Pende reko vy'a ete joty voi katu

(Mt 5.1-12)

²⁰ Ha upéi katu Hesu ojerova-ma oma'ê gwemimbo'e kwéry-rehe ohekombó'e hagwã íxupe kwéry. He'i ranhe iporiahu va'e kwéry-pe:

—Peê, xe-rehe pepena-gwi pende poriahu va'e, pende reko vy'a ete joty peiko-vy. Nhandejáry pende ruvíxa tee ndive gwarã voi peê. Upéa-gwi pevy'a katu.

²¹ —Peê pende vare'a va'e pende reko vy'a ete joty peiko-vy. Áy ae joty pende vare'a. Nhandejáry pene moangapyhy porã va'erã. Upéa-gwi pevy'a.

—Peê pejahe'o va'e pende reko vy'a ete joty peiko-vy. Áy ae pejahe'o. Pepuka va'erã. Upéa-gwi pevy'a.

²² —Peê ave, xe moirũ-gwi pende rereko asy va'e, pende reko vy'a ete joty. Xe Nhande Ryke'y tee va'e. Oĩ ramo xéhegwi pende-rehe ndaija'ái va'e, pende joko ramo ave, onhe'ê rei rei ramo ave pende-rehe, pevy'a katu. Oĩ ramo nde-vy he'i va'e: “Nde Hesu-rehe erejerovia va'e ndorohexasevéi. Nahendusevéi ave nde réry. Ejei katu a-gwi” he'i ramo nde-vy, evy'a joty kuri eiko-vy. ²³ Aipo-rami pende rereko ramo, pevy'a katu. Erovy'a joty katu nde-rehe hembiaipo vai va'e. Pende rexakwaa-ta voi katu peê-my Nhandejáry yváy pygwa. Heta voi oĩ nde-vy gwarã yváy-py. Upéa-gwi evy'a katu. Yma va'ekwe myamyri nhane ramoigwasu kwéry upéixa ave ogwereco asy va'ekwe Nhandejáry nhe'ê-py omombe'u va'ety kwéry-pe. Yma gware-pe pene renonderã-pe ogwereco asy hagwe-rami ave, áy pende rereko asy ave va'erã.

Pende reko vy'are'ỹ va'erã peiko-vy

²⁴ Upe-ma ramo Hesu onhemonhe'ê imba'e reta-rehe ojerovia va'e kwéry-pe:

—Peê, pene mba'e reta reta va'e, pendejúpe gwarã-rehe mate pepena rei va'e, apomboasy eterei pee-my. Pende reko vy'are'ỹ va'erã. A-py mate pevy'a va'erã peiko-vy.

²⁵ —Peê, mba'eve pene rekotevê pene rygwyatã jepe va'e, apomboasy eterei peê-my. Pende reko vy'are'ỹ va'erã. Ivare'a ete va'e-rami peiko va'erã.

—Peê, pepuka va'e, apomboasy eterei peê-my. Áy ae pepuka. Teko rei-rehe pevy'a. Pejahe'o va'erã penheapirõ-vy.

²⁶ —Peê, opavave pene mboete va'e, apomboasy eterei peê-my. Pende reko vy'are'ỹ va'erã. Upéixa ave yma gware nhane ramoigwasu amyri kwéry omboete rei va'ekwe Nhandejáry nhe'ê mombe'u a'ã a'ãha rei va'e kwéry-pe. Yma gware-pe pene renonderã-pe omboete rei hagwe-rami ave, áy pene mboete rei ave. Apomboasy voi peê-my.

Peiko porã, Nhandejáry-rami pene rembiapo porã va'erã

(Mt 5.38-48; Rm 12.14)

²⁷ —Ha peê, xe renduha kwéry, peê-my ha'e tee-ta katu. Peiko porã katu. Ehayhu katu nde-rehe ija'e'ỹ va'e-pe. Ejapo porã katu nde rayhu e'ỹ va'e-pe. ²⁸ Ejerure Nhandejáry-pe ohovasa porã hagwã nde-rehe onhe'ê rei rei va'e-pe. Ha ne mbohassa asy va'e-rehe ejerure rure joty Nhandejáry-pe ohexakwaa porã hagwã íxupe oiporiahuvereco hagwã íxupe. ²⁹ Ha nde rova pete ramo, ejerova joty íxugwi eme'ê joty íxupe nde rova rovái nde rova pete jevy hagwã. Ha oi'pe'a ramo ndéhegwi nde kamisa, eheja joty togweraha nde ao jo'a reheve. ³⁰ Nde-vy ojerure va'e-pe eme'ê hemimbota. Ha ogweraha ramo ndéhegwi ne mba'e ani erejerureve tei joty ne mba'ekwe-rehe. ³¹ Peiko porã joty. Nde rerekoseha-rami eiko enterovéa-pe.

³² —Eiporiahuvereco katu enterovéa-pe. Nde rayhu va'e-pe anho erehayhu ramo, upe ne rembiapo porã-rehe “Hekoha porã voi” nde'i mo'airy nde-rehe Nhandejáry. Hekoha vai va'e ave ohayhu kwaa gwapixa-pe. ³³ Nde-vy ojapo porã va'e-pe mante ne rembiapo porã ramo, ani ere upéa-rehe, “Ko xe rembiapo porã-rehe Nhandejáry xe rexakwaa arã”. Hekoha vai va'e kwéry ave ojapo porã ave íxupe hembiaipo porã va'e-pe. Nde reko-rami ave oiko hikwái. ³⁴ Ha oiporuse va'e-rehe ani ere, “Aiporu uka ramo ko va'e-pe ohekoviarõ porã va'erã xe-vy. Upéixa-gwi aiporu uka-ta íxupe” ani aipo ere tei. Aipo he'i ave hekoha vai va'e gwapixa kwéry-rehe. Upéixa ereiporu uka ramo jepe, niporã arã. ³⁵ Ha'e-ta

katu peẽ-my: Ehayhu katu nde-rehe ija'e'y va'e kwéry-pe gwive. Ejapo porã meme katu. Ani ereha'arõ mba'eve-rehe ne rembiporu ukakwe-rehe ome'ẽ jevy va'erã. Ani ere teĩ, “Ndaiporu uka mo'ãi nde-vy xe mba'e”. Eiporu uka rei katu, he'i Hesu ohekombo'e-vy.

—Ko xe nhe'ẽ-rupi ereiko ramo, he'i, —pende rexakwaa va'erã voi peẽ-my Nhandejáry yváy pygwa, he'i. —Ha'e he'i arã ave nde-rehe “Xe ra'y, xe rajy” he'i arã ave nde-rehe Nhandejáry Tupágwasu. Oĩ heta hembiaipo vai va'e. Oĩ ave heta Nhandejáry-pe nomboetéi va'e. “Iporã voi Nhandejáry” nde'íry. “Ome'ẽ-ma xe-vy xe remikotevẽ” nde'íry. Ha Nhandejáry katu ipy'a porã hese kwéry. Ome'ẽ me'ẽ íxupe kwéry hemikotevẽ. Nhandejáry, Nhande Ru yváy-py oĩ va'e nhande poriahuvereko meme va'e. ³⁶Upéixa-gwi ha'e-ta peẽ-my: Peiporiahuvereko porã enterovéa-pe. Nhandejáry nhande Ru yváy-py oĩ va'e-rami pejoporiahuvereko porã katu.

Ani erehekojohu rei nde rapixa-pe

(Mt 7.1-5; Rm 2.1-3; 14.1-4; 1 Co 4.5; Tg 4.11-12)

³⁷—Ani erehekojohu rei nde rapixa-pe. Ani erejohu vai nde rapixa rembiapo ani hagwã upéixa ave Nhandejáry ojohu vai nde-vy ne rembiapo. Ani ave ere mo'ã teĩ nde rapixape: “Tane mbohasa asy ne rembiapo vaikwe-rehe” ani upéixa ave Nhandejáry he'i hagwã nde-rehe. Eiporiahuvereko katu nde-rehe hembiaipo vai va'ekwe-pe. Upéixa nde rapixape ereiporiahuvereko hagwe-rami nde poriahuvereko va'erã Nhandejáry ne rembiapo vaikwe-rehe. ³⁸Eme'ẽ katu hemikotevẽ nde rapixa kwéry-pe. Hemikotevẽ ereme'ẽ porã ramo ne remime'ẽgwerekovia hetave ome'ẽ va'erã nde-vy Nhandejáry. Eremboyrú ime'ẽ-vy mba'e ryrú-py. Upe va'ekwe-gwi hetave ome'ẽ arã nde-vy. Omohynyhëve va'erã nde-vy ime'ẽ-vy ne mba'e ryrú. Ojapete peteve va'erã imoi-vy mba'e ryrú-py ome'ẽ hagwã nde-vy ombohekovia-vy hetave ome'ẽ va'erã nde-vy. Nde rapixa ererekoha-rami ave nde rereko arã Nhandejáry.

Arandu nhe'ẽ hesapyso e'y va'e rehegwa nhe'ẽ-rami

³⁹Upe-ma ramo omombe'u íxupe kwéry arandu nhe'ẽ hesapyso e'y va'e rehegwa nhe'ẽ-rami.

—Ndovaléi voi hesapyso e'y va'e oporogweraha hagwã. Ndaikatuí voi ogweraha gwapixa hesapyso e'y va'e-pe ave. Ojopopyhy rei arã ojereraha uka mo'ã-vy ohexa e'y-gwi. Mokõive rei ho'a arã yvykwa-py oje'ói-vy. ⁴⁰Upéixa ave ndaipóri heko tuvixave va'e ombo'eha-gwi. Avave ndaheko tuvixavéi ombo'eha-gwi. Ombo'e hagwe-rupi ae-ma ha'e oiko.

Nde resa-py oĩ va'e rehegwa nhe'ẽ-rami arandu nhe'ẽ

(Mt 7.3-5)

⁴¹⁻⁴²Upéi omombe'u jevy íxupe kwéry nde resa-py oĩ va'e rehegwa nhe'ẽ-rami omombe'u.

—Nde, nde resa-py vyvragowe oĩ va'e, ma'erã-gwi ere nde rapixa-pe “Nde resa-py oĩ vyvra ra'ykwe. Upéixa-gwi nande resapysovéi-ma”. Upéa ere jave tuvixave va'e oĩ joty nde resa-py. Ndovaléi voi ereheka rei hagwã mixíve va'e nde rapixa resa-py oĩ va'e, nde resa e'y jave. “Tanohẽ nde resa-gwi” ere rei nde rapixa-pe nde reko porã a'ã a'ã-vy. Enohẽ ranhe katu nde resa-gwi upe vyvragowe nde rekoha ererova-vy. Upe rire ae erehexa porã-ta. Erehexa porã-ma ramo, erenohẽ arã hesa-gwi upe-py oĩ va'e, he'i Hesu íxupe kwéry onhemonhe'ẽ-vy. Arandu nhe'ẽ oiporu ponove ojohu vai rei gwapixa rekoha.

Hi'a ro'opy-rehe jaikwaa vyvra rehegwa nhe'ẽ

(Mt 7.16-20; 12.33-37)

⁴³Upéi omombe'u jevy ipy'a rekoha rehegwa nhe'ẽ hi'a ro'opy-rehe jaikwaa vyvra rehegwa nhe'ẽ-rami.

—Vyvra jaikwaa hi'a ro'opy-rehe. Ndaipóri vyvra porã hi'a vai va'e. Vyvra porã hi'a porã meme. Ndaipóri ave vyvra vai hi'a porã va'e. Hi'a vai meme. Yva aju-rehe ohexa uka nhande-vy gwekoha vyvra. ⁴⁴Petei vyvra-gwi petéixa meme hi'a. Nhuatí máta-gwi nanhamondohóry yva aju ja'u va'erã. Ha jukéri-gwi ndajaipo'ói yva aju ja'u va'erã.

⁴⁵ Upéixa ave nhande kwéry, mba'e aju-rami jahexa uka nhande py'apóry nhande rekoha-rehe. Nhande py'a porã ramo nhande rekoha porã meme va'erã. Ha nhande py'a vai ramo nhande rekoha vai va'erã. Upéixa ave nhande py'a rekoha-ramima nhande'e.

Hesu-rehe ojerovia va'e rehegwa nhe'ẽ

(Mt 7.24-27)

⁴⁶ —Erejapo e'ỹ jave xe nhe'ẽ ere rei xe-vy “Xe Jary” he'i Hesu onhemonhe'ẽ-vy íxupe kwéry.

⁴⁷ —Amombe'u-ta peẽ-my mba'ëixa pa oiko va'erã xe-rehe ojerovia va'e. Ou xe renda-py, ohendu porã xe nhe'ẽ, oiko meme xe nhe'ẽ-rupi. Aiporu jevy-ta xe-rehe ojerovia va'e rehegwa nhe'ẽ ita ári omoĩ gwoyrã va'e rehegwa nhe'ẽ-rami.

⁴⁸ —Peteĩ kwimba'e ojapo va'ekwe gwogarã. Ysry rembe'y-py ojo'o okytakwarã. Yvykwa ipy pukukwe ojo'o okytakwarã. Ita ári omoĩ okyta. Ojapopa rire ou sapy'a peteĩ marány. Heta eterei oky-gwi, ysrygwasu hynyhẽmba-ma. Oipete pete hóga-pe. Ha ndoityry joty hóga. Hatã joty oĩ hatã ojapo va'ekwe-gwi. Omombaraete porã gwóga-gwi ndo'áiry joty hóga. Ita ári omoĩ-gwi hatã joty hóga oĩ, he'i arandu nhe'ẽ omombe'u-vy. Upéi he'i jevy:

—Ha'e-ta ave peẽ-my, Xe-rehe ojerovia va'e upéixa ete ave ndojeity ukase mo'ái, oiko meme va'erã voi xe nhe'ẽ-rupi.

⁴⁹ —Ha upe xe nhe'ẽ nohendu porã va'e, ohendu rei-gwi ndoikói xe nhe'ẽ-rupi va'e-rehe amombe'u-ta peẽ-my gwĩ pya'e vérami gwóga ojapo va'e rehegwa nhe'ẽ-rami.

—Peteĩ kwimba'e ojapo araka'e gwogarã. Pya'e a'e ojapo gwogarã. Ysry rembe'y-py ojo'o okytakwarã. Yvykwa nandi rei-py omoĩ okyta. Ndaipy pukúí ave. Upéi oky heta ramo, ysry okakwaa-ma ramo, y oipete hatã ramo hóga-pe, oitypa-ma hóga. Ojejapipama hóga-rehe. Ndojapo porãiry gwóga. Upéa-gwi oity. Ijary nahi'arandu porã-gwi, oity uka gwóga, he'i arandu nhe'ẽ omombe'u-vy. Upéi he'i: —Ha'e-ta peẽ-my: Xe nhe'ẽ-rupi oiko e'ỹ va'e upéixa ave ojeity uka rei arã voi oho vai rei hagwã upe xe nhe'ẽ ohendu rei va'e nahi'arandu porã-gwi, he'i.

7

Mburuvixa rembigwái-pe Hesu ombogwera

(Mt 8.5-13)

¹ Ojogweroaty aty va'e-pe omombe'u heta rire Hesu ohasa-ma ou-vy oike hagwã Cafarnaum tetã-my. ² Ha upe-py oime capitão, soldado ruvixa va'e judeu e'ỹ va'e. Heta soldado-rehe omanda va'e, heta hembigwái ave. Ha peteĩ hembigwái hembihayhu porã va'e katu hasy ete. Omano-tama oĩ-vy hembigwái. ³ Hasy ete jave hembigwái soldado ruvixa ohendu-ma Hesu rerakwã. Ohendu-ma ramo he'i gwĩ judeu ruvixa-pe:

—Tereho Hesu renda-py. Emombe'u íxupe ou hagwã xe ha-py. Aikotevẽ hese. Aipota eterei ou ombogwera hagwã xe rembigwái xe rembiayhu ete va'e-pe, he'i omondo-vy íxupe.

⁴ Aipo ramo judeu ruvixa kwéry oho onhomongeta Hesu ndive. Ojerure rure Hesu-pe:

—Iporã voi ereho erembogwera upe romano va'e soldado ruvixa rembigwái-pe, he'i íxupe. —Iporã voi ereiporiahuvereco íxupe. ⁵ Ha'e nhande rayhu ra'e. Nhande re'ýi kwéry-pe hembiaipo porã meme va'e. Ojapo uka va'ekwe peteĩ ogagwasu nhande porahéi hatygwã. Upéa-gwi iporã voi ereiporiahuvereco íxupe hembigwái-pe erembogwera hagwã, he'i jevy jevy Hesu-pe.

⁶ Aipo ramo Hesu ou indive hasy va'e rexa-vy ou oiko-vy. Ogwahẽ-tama ramo ou-vy Hesu ohogwaití jevy-ma íxupe ou-vy. Soldado ruvixa omondo gwapixa kwéry Hesu rogwaití uka-vy.

Ha igwahẽ ramo he'i íxupe:

—Ani erenhemomirĩ eregwahẽ hagwã xe róga-py nde, mbo'eháry. Ne rembiapo porã eterei va'e atí eterei ereju hagwã xe renda-py. Naxe py'a porã-gwi xe atí eterei

orohogwaitĩ hagwã. ⁷Atĩ eterei-gwi ndahái kuri anhomongeta ne ndive. Iporãve ne nhe'ê-py rei erembogwera xe rembigwái-pe, he'i uka.

⁸Ha ha'e he'i uka ave

—Aikwaa voi mburuvixa nomanda reíry. Xe ko, xe ave mburuvixave va'e nhe'ê gwy-py ave aiko. Ha oime ave soldado kwéry xe nhe'ê gwy pygwa ave. Ha'e ramo peteĩ soldado-pe, “Tereho” amanda ramo íxupe, oho joty. Ha'e ramo outro-pe, “Eju” ou joty ave. Ha'e ramo xe rembigwái-pe, “Ejapo ko xe remimbota” ha'e ramo, ojapo joty ave. Upéa-rehe aikwaa ne nhe'ê-py rei okwera arã xe rembigwái, he'i uka Hesu-pe soldado ruvixa.

⁹Ohendu-ma ramo inhe'ê kwéry Hesu ojere omongeta hagwã omoirúhaty-pe:

—Ndajohúí vyteri Israel pygwa kwéry-pe ko judeu e'ý va'e-rami xe-rehe ojerovia va'e. Ne'írã ojerovia tee Israel pygwa kwéry xe-rehe, he'i.

¹⁰Upe rire soldado ruvixa remimbou kwéry oho jevy. Ogwahẽ-ma ramo mburuvixagwasu róga-py, ohexa hembigwái. Hesãi jevy-ma hembigwái. Okwera porã-ma ra'e.

Omano va'ekwe Hesu omoingove jevy

¹¹Upe rire Hesu oho tetã Naim-my. Hemimbo'e kwéry ave, ojogweroaty va'e ave oho indive. ¹²Ogwahẽ-tama ramo upe tetã rokẽ-my ohexa osêsê va'e kwéry. Omano va'ekwe ogweraha-tama hetekwe rendaty-py. Túvy omano rire ae-ma omano ta'ýry ave. Isykwe tembirekokwe memby voi omano jevy. Peteĩmi oiko va'e. Ha heta upe tetã mygwa oho omoirú upe tembirekokwe-pe. Osêsẽmba hikwái. ¹³Ohexa-ma ramo kunha-pe Hesu oporiahuvereko íxupe. He'i upe tembirekokwe-pe:

—Ani erehapirõ ne memby-pe, he'i.

¹⁴Upéa he'i-vy ogwahẽ hyru ppy-py omoĩ opo hyru-rehe. Herahahare kwéry opyta. Opyta-ma ramo Hesu he'i:

—Ha'e-ta nde-vy: Epu'ã katu, karia'y, he'i omano tee-ma va'ekwe-pe.

¹⁵He'i-ma ramo upe omano tee va'ekwe opu'ã jevy ogwapy-vy. Onhyppyrũ jevy-ma onhe'ê. Upéi Hesu he'i isy-pe:

—Ko ne memby amoingove jevy-ma, he'i.

¹⁶Upe-ma ramo ikyhyjepa rei Hesu-gwi hikwái. Ikyhyjepa-gwi omboete katu Nhandejáry-pe:

—Ou-ma nipo nhane pa'ũ-my Nhandejáry nhe'ê-py omombe'u va'ety ra'e. Ipu'aka va'e voi oiko-ma nhane pa'ũ-my, he'i Hesu-rehe Nhandejáry-pe omomba'egwasu-vy.

He'i ave hikwái:

—Nhandejáry nipo ou-ma ra'e oresende hagwã oipytygwõ hagwã gwe'ýi kwéry-pe, he'i hese hikwái.

¹⁷Opa-rupí oho Hesu rerakwã. Judéia pygwa kwéry ohendu-ma, ijerekwe-rupí ave tetã ambue mbue pygwa kwéry ohendu-ma Hesu rembiapo porãgwe.

João Batista rembijokwái rehegwa nhe'ê

(Mt 11.2-26)

¹⁸Ha João remimbo'e kwéry omombe'u jevy íxupe Hesu rerakwã: “Omano ete va'e omoingove jevy” omombe'u íxupe. Upéa ohendu-gwi João ohenói mokõi gwemimbo'e va'e:

¹⁹—Tereho Hesu ha-py, he'i ojokwái-vy. —Eporandu íxupe, “Nde tipo, Nhandejáry rembiporavo tee va'e nhane remiha'arõ va'e voi nipo ra'e nde?” ere íxupe. Ha ndoikói ramo, eporandu ave, “Ambueve va'e-rehe para'e tekotevẽ nhaha'arõ?” ere Hesu-pe, he'i João mokõi gwemimbo'e-pe imondo-vy.

²⁰Ogwahẽ-ma ramo Hesu ha-py oporandu-ma íxupe:

—João Batista ore mbou oroporandu hagwã nde-vy. Nde tipo, Nhandejáry rembiporavo tee va'e voi tipo nde ra'e? he'i íxupe. —Ambueve va'e-rehe pa tekotevẽ nhaha'arõ? he'i oporandu-vy Hesu-pe.

²¹Ha Hesu ae onhemokirirĩ íxugwi. Henonde-py ombogwera heta hasy va'e-pe, imba'asy va'ekwe ombogwera ave. Omosêsê ave anháy kente kwéry-gwi, ohexa e'ý va'e kwéry-pe ombohesapyso ave. ²²Upéa ojapo rire ae-ma he'i João remimbou kwéry-pe:

—Tapeho jevy katu. Emombe'u João Batista-pe mba'e pehexa kuri mba'e pehendu kuri ave. Hesapyso e'ÿ va'ekwe gwive hesapyso-ma. Ikarê va'ekwe opu'ã porã jevy-ma ave. Mba'asy vai-gwi ijai aipa va'ekwe ipire porã jevy-ma ave. Ijapysa e'ÿ va'ekwe ijapysa porã-ma ave. Omano ete va'ekwe oikove jevy ave. Iporiahu va'e kwéry-pe omombe'u Nhandejáry nhe'ê porã.*²³ Hexapyrã-rupi voi ojapo Nhandejáry heroviapyrã-rupi ojapo. Upéixa-gwi heko vy'a va'erã upe xe-rehe ojerovia tee va'e kwéry. Ha ndovy'a mo'ãi arã upe xe-rehe, “Ha'e para'e, ndaha'êi para'e Nhandejáry rembiporavo tee va'e?” he'i va'e. Tereho eremombe'u hagwã João-pe jevy, he'i Hesu João remimbou kwéry-pe.

*João Batista-rehe omombe'u Hesu
(Mt 11.7-19)*

²⁴⁻²⁵ Oho jevy-ma ramo João Batista remimbou, Hesu omombe'u jevy ojogweroaty va'e-pe hesewa nhe'ê:

—Peho araka'e João Batista pehexa hagwã. Peho ae tekwyaty e'ÿ-my. Ndapehói para'e ikangy kangy va'e rexa-vy jahapéixa onhembovava va'e ndapehexaséi para'e peho-vy ra'e. Ndapehói ave ijao porã porã va'e erehexa-vy. Ijao porã porã va'e ndopytái tekwyaty e'ÿ-my. Gwí ijao porã porã va'e, imba'e reta reta va'e mburuvixagwasu róga-py oiko.²⁶ Peho ra'e pehexa hagwã ae Nhandejáry nhe'ê-py omombe'u va'ety. Anhete ha'e-ta: Upéa voi ko João Batista. João Batista oĩ ha-py peje'ói-vy ra'e. Ha'e-ta ave peẽ-my: Oĩ heta Nhandejáry nhe'ê-py omombe'u va'ety. João Batista rekoha ae ipu'akave hese kwéry-gwi.²⁷ Nhandejáry kwatia-rehe oĩ João Batista rehegwa nhe'ê.

“Amondo-ta xe rembigwái ne renonde-py. Xe nhe'ê mombe'uha upe va'e. Amondo-ta íxupe omopotĩ hagwã nde raperã”^{*} he'i va'ekwe Nhandejáry ohai uka-vy hese va'ekwe.

²⁸ —Xe katu ha'e-ta peẽ-my: Yma gwive ãy peve ndaipóri va'ekwe Nhandejáry nhe'ê-py omombe'u va'ety João Batista rekoha-gwi tuvixave va'e. Upéixa ramo jepe oiko-ta hekoha tuvixave va'e kwéry íxugwi, he'i Hesu. —Nhandejáry nhande ruvixa-pe omoirũ tee va'e gwive, hese ojerovia va'e ogwereco arã gwekoha tuvixave João Batista rekohagwe-gwi. Gwí Nhandejáry ndive oiko va'e entéro upe pygwa-gwi heko mirĩve va'e jepe hekoha tuvixave va'erã João Batista rekohagwe-gwi.

²⁹ Enterove ohendu va'e, gwí plata-py nhane mbopaga va'ety kwéry gwive, onhemongarai uka va'ekwe João Batista-pe va'e kwéry he'i:

—Nhandejáry hembiaipo porã meme ete va'e voi, he'i íxupe omboete-vy.

³⁰ Gwí fariseu kwéry ae, ndoikoséi Nhandejáry reko potiha-rupi, gwí Moisés remimombe'ukwe-rehe oporombo'eha ave ndoikoséi Nhandejáry reko potiha-rupi ave. Upéixa-gwi nonhemongarai ukáiry va'ekwe João-pe hikwái.

³¹ Upéi Hesu onhemonhe'ê jevy enterove upe-py ojogweroaty va'e-pe. He'i:

—Mba'eixa pa oiko ko'ãygwa amombe'u-ta peẽ-my.³² Mitágwe reko rami voi ãygwa reko. Onhembysarái mitã mba'ejogwa haty-py. Osapukái oirũrã-rehe “Mbaraka orombopu kuri ha peẽ katu ndapejerokyséi ra'e. Orohapirõ ra'anga kuri ha peẽ katu ndapejahe'oséiry ra'e” he'i oirũrã kwéry-pe nonhembysaraiséi-gwi. Ha ko'ãygwa mitágwe ramigwa voi ndogwero'v'ái gwapixarãgwe reko, he'i.³³ —Ou va'ekwe João Batista. Mbojape ndo'úi. Uva rykwere ndo'úi ave Nhandejáry-pe omboete tee-vy. Peẽ ae peje mo'ã hese: “Anháy voi ra'e ijáry” peje mo'ã hese napehenduséi-gwi rei inhe'ê, he'i.

³⁴ —Xe-ma Nhande Ryke'y tee va'e voi xe. Xe aju-ma ko'a-py akaru reheve uva rykwere ha'u ave aiko-vy. Peẽ ae, peje mo'ã xe-rehe: “Uva rykwere ho'u eterei upe va'e” peje mo'ã xe-rehe napehenduséi-gwi. “Okaru eterei upe va'e” peje mo'ã xe-rehe. “Plata-py oporombopaga va'ety kwéry ndive oiko va'e upéa” peje vai xe-rehe. “Ojevavy va'e kwéry ndive oiko va'e upéa” peje vai ave xe-rehe.³⁵ Anhete voi ha'e-ta peẽ-my: Nhandejáry roviaha oikwaa-ma voi Nhandejáry inharanduve ete va'e voi. Jaiko ramo Nhandejáry nhe'ê-rupi, nanhamombe'u pehẽ pehẽmba reiry mba'eve-rehe, he'i Hesu.

* 7:22 Is 35.5-6; 61.1 * 7:27 Mt 3.1

Hesu oiko fariseu va'e róy-py

³⁶ Peteĩ fariseu va'e ohenói Hesu-pe okaru hagwã ondive. Héry va'e Simão. Ha ohenói-gwi Hesu oho hóga-py. Oike rire ogwapy-ma oĩ-vy okaru hagwã. ³⁷⁻³⁸ Oime jave upe-py peteĩ kunha ou Hesu renda-py. Upe tetã mygwa voi upe kunha. Enterove upe tetã mygwa kwéry oikwaa-ma mandu'aha porã e'ýha voi upe kunha. Ha ohendu-ma ramo Hesu okaru-vy oĩ-vy fariséu róga-py, upe kunha ou-ma ave. Ogweru hyakwã porã tee va'e omboete hagwã Hesu-pe. Hyru reheve ogweru. Upe hyru ojejapo va'ekwe ita-gwi héry va'e alabastro. Hepy eterei. Hepy ave hyakwã va'e. Ha hyakwã va'e reheve ou oike fariseu róga-py. Onhemoagwive Hesu-gwi. Ovy'a eterei Hesu ombogwera hekoha-gwi. Ojahe'o opyta-vy. Omoakỹ akỹ Hesu py gwesay-py. Omokã mokã ipy ho'ávy-py. Oipyte pyte Hesu py omboete-vy. Hyakwã porã ogweru va'ekwe onhohẽ ave Hesu py-rehe otima porã hagwã íxupe.

³⁹ Upéixa ojapo jave upe kunha, fariseu va'e ohexa katu íxupe. He'i rei opy'apy-py: “Ko kwimba'e Nhandejáry nhe'ẽ-py omombe'u va'ety mo'ã” he'i rei rei hese. “Nhandejáry nhe'ẽ-py omombe'u va'ety ramo, oikwaa-ma arã ra'e kóa ko kunha mandu'a vaiha voi. Ndoikwaái para'e” he'i mo'ã Hesu-rehe. “Ndoikwaái-gwi para'e: Ani eremoĩ nde po xe-rehe, nde'íry kunha tavy-pe. Ndoikwaái para'e” he'i rei rei Hesu-rehe opy'apy-py. Mba'eve nohendu ukái joty.

⁴⁰ Ha Hesu katu he'i íxupe:

—Simão, anhomongetase ne ndive, he'i íxupe.

—Mbava'e-rehe erenhomongetase xe ndive? he'i Simão Hesu-pe.

⁴¹ Upéi Hesu omombe'u arandu nhe'ẽ oiporiahuvereco va'e rehegwa nhe'ẽ-rami omombe'u Simão-pe hesegwa nhe'ẽ:

—Mokõi kwimba'e oiporu va'ekwe plata peteĩ oiporu uka va'e-gwi. Ha peteĩ oreve vyterĩ quinhentos opaga va'erã ha peteĩ oreve cinqüenta opaga va'erã. ⁴² Ha ndogwerekói mba'eve ombohekovia hagwã ijáry-pe. Aipo ramo upe plata járy oiporiahuvereco íxupe kwéry. He'i íxupe kwéry: “Iporãve aheja rei nde-vy upe plata ereiporu va'ekwe xéhegwi” he'i íxupe. “Ani katu erembohekovia jevy xe-vy xe platakwe. Ne mba'e tee-rami voi ame'ẽ va'ekwe nde-vy” he'i íxupe kwéry. Upe mokõi nombohekoviái va'e ovy'a voi ijarykwe-rehe imboete-vy. Oheja rei-gwi nipo ha'e kwéry omboete voi plata jarykwe-pe ra'e. Kiva'e tipo nde-vy omboeteve arã upe pirapire jarykwe-pe? he'i Hesu omombe'u Simão-pe arandu rehegwa nhe'ẽ hesegwa nhe'ẽ.

⁴³ —Xe-vy, pirapire hetave ojéupe ome'ẽ va'ekwe omboeteve arã, he'i.

—Upéixa voi, he'i Hesu.

⁴⁴ Upéi Hesu oma'ẽ upe kunha-rehe ha he'i jevy Simão-pe:

—Peteĩ nhe'ëve ha'e-ta nde-vy, he'i jevy. —Erehexa ko kunha, he'i íxupe. —Ha'e ojapo porã kuri xe-vy, he'i. —Agwahẽ ne mbohupa-vy kuri xe. Ha nhande re'ýi ojapoha ramigwa nderejapói kuri xe-vy. Nhande re'ýi ome'ẽ ombohupa-pe y ojepyhéi hagwã. Nde, nereme'ẽi kuri ajepyhéi hagwã. Nde rekovia ko kunha aje'i-ma ra'e xe py omoakỹ gwesay-py. Ho'ávy-py oikyty omokã hagwã omoakỹ va'ekwe. ⁴⁵ Ha nde, ndaxe rova pytéi voi nde nhande re'ýi ojapoha-rami. Ha agwahẽ gwive ko kunha oipyte pyte xe py. ⁴⁶ Nde neremohyakwã xe akã aceite hyakwã porã va'e-py nhande re'ýi ojapoha-rami. Ha ko kunha nde rekovia ojapo porãve xe-rehe. Omohyakwã xe py. Onhohẽ nhohẽ xe py-rehe hepyve pyve va'e. Hyakwã porã va'e onhohẽ xe py-rehe omohyakwãmba xe py. ⁴⁷ Anhete ha'e-ta nde-vy. Ko kunha-gwi amboyke-ma heta eta hembiaipo vaikwe. Upéa-rehe xe rayhu-ma voi. Ha “Ndahetái xe rembiapo vaikwe” he'i va'e-gwi eremboyke ramo hembiaipo vaikwe, mixĩ mate nde rayhu arã upe va'e, he'i Simão-pe onhemonhe'ẽ-vy.

⁴⁸ Upéi:

—Amboyke-ma ndéhegwi ne rembiapo vaikwe, he'i kunha-pe.

⁴⁹ Ohendu-ma ramo Hesu nhe'ẽ entéro upe-py ogwapy va'e oporandu randu ojéupe: “Kiva'e tipo ko kwimba'e: Amboyke-ma ne rembiapo vaikwe ndéhegwi, he'i kuri. Onhe'ẽ rei nipo ra'e” he'i rei hikwaí opy'apy-py.

⁵⁰Upéi Hesu he'i kunha-pe:
—Xe-rehe erejerovia tee-ma. Upéixa-gwi Nhandejáry omboyke-ma ndéhegwi ne rembiapo vaikwe. Nde py'agwapy reheve tereho katu he'i kunha-pe.

8

Oho Hesu ndive kunha kwéry ave

¹Ha upe rire-ma Hesu oho omombe'u Nhandejáry nhe'ê porã. Oho tetãgwasu kwéry-rupi. Oho tetã mirĩ kwéry-rupi ave. Oho-vy omombe'u mbe'u "Pemoirũ katu Nhandejáry pende ruvixarã-pe" he'i omombe'u mbe'u oho-vy. Upe doze hembiporavokwe va'e oho indive. ²Gwĩ kunha hemimbogwerakwe ave oho indive. Gwĩ íxugwi omondopa va'ekwe anháy ave oho. Heta kunha oho. Oho Maria Madalena. Upe va'e-gwi omosê va'ekwe sete anháy. ³Oho Joana, Cuza rembireko upéa. Cuza mburuvixa voi. Onhangareko mburuvixagwasu Herodes mba'e kwéry-rehe. Hembireko Joana oho. Oho Suzana ave. Hetave ave kunha Hesu ndive oho. Upe kunha kwéry ome'ê meme hemikotevê Hesu-pe, doze hembiporavo va'e-pe ave ome'ê hemikotevê. Oho meme indive ojapo hagwã gwemi'urã indive ho'u hagwã.

Temitygwe rehegwa nhe'ê

(Mt 13.1-23; Mc 4.1-20)

⁴Upéi ojogweroaty ati kente kwéry oikwaa porã hagwã Hesu nhe'ê. Entéro tetã tetã-gwi osêšê hikwái ojogweroaty aty-vy. Ha Hesu omombe'u arandu nhe'ê temitygwe rehegwa nhe'ê-rami.

⁵—Oho onhemity va'e onhemity hagwã. Omohái temity. Onhemity jave oime temity ra'yi tape rembe'y-rupi ho'a va'e. Ha upéi ohasa va'e opyrũmba hese, gwya ou ho'upa ave. ⁶Oime ave temity ra'yi itaty-rupi vvy pererĩ-rupi ho'a va'e ave. Upéi henhói-ma ramo pya'e ipirupa jevy nainhakĩ-gwi vvy. ⁷Oime ave temity ra'yi nhuatĩndy-rupi ho'a va'e ave. Upéi ojoparapa henhói-vy hemity ndive okakwaa nhuatĩ. Ojaho'ipa upe temitygwe-pe. ⁸Oime ave temity ra'yi vvy porã-my ho'a va'e. Upéi okakwaa-ma hemity. Hope porã-ma oho-vy. Hi'a porã-ma rire cem ha'yi meme-ma oi, he'i Hesu íxupe kwéry omombe'u-vy arandu nhe'ê.

Upéi:

—Ne aranduse va'e ejeapysaka katu ko xe nhe'ê-rehe, he'i onhe'ê hatã-vy íxupe kwéry.

⁹Upe rire Hesu roviaha kwéry oporandu íxupe:

—Mbava'e tipo eremombe'use kuri ore-vy? Ore, norohendu kwaái kuri upe temitygwe rehegwa nhe'ê, he'i oporandu-vy íxupe.

¹⁰—Peê peikwaa voi ra'e mba'éixa po nhamoirũ Nhandejáry-pe nhane ruvixarã. Nhandejáry ome'ê-ma peê-my pene arandurã. Oikwaa uka-gwi peê-my peikwaa-ma. Ha kente ambue kwéry-pe ndojeroviái va'e-pe ndoikwaa ukáiry. Upéa-gwi arandu rehegwa nhe'ê aiporu ramo, ndojeroviái-gwi okanhy inharandurã íxugwi kwéry, he'i. —Upéixa-gwi oma'ê ma'ê rei ha'e kwéry, ha mba'eve ndohexáiry. Ohendu hendu rei hikwái, mba'eve ndoikwaáiry. Ndojeroviái hese-gwi Nhandejáry ndoikwaa ukáiry íxupe kwéry, he'i Hesu omombe'u-vy.*

¹¹Upéi he'i ave:

—Temitygwe rehegwa nhe'ê amombe'u kuri aikwaa uka-ta peê-my, he'i.

—“Temity ra'yi” he'ise Nhandejáry nhe'ê porã. ¹²Upe tape rembe'y-rupi ho'a va'e nhe'ê he'ise: Oi nhe'ê porã nohendu kwaái va'e. Ohendu-ma ramo, ou oipe'a anhaygwasu nhe'ê porã inharandu porãrãgwe ipy'a-gwi pono ogwerovia, pono onheresende uka Nhandejáry-pe, he'i.

¹³—Ha itaty-rupi ho'a va'e nhe'ê he'ise: Oi nhe'ê porã ohendu rei va'e. Ohendu-ma ramo ovy'a ogwerovia-vy. Ha pya'e henhói ndahapóiry va'e-rami ndogweroviái ipy'apy reheve. Sapy'a ndogweroviavéi. Ohasa asy-tama ramo, imbojevavyharã ou ramo naimandu'avéi-ma Nhandejáry nhe'ê porã-rehe.

* 8:10 Is 6.9-10

¹⁴—Ha nhuatĩndy-rupi ho'a va'e nhe'ẽ he'ise: Oĩ nhe'ẽ porã ohendu mixĩ va'e. Ha onhesamondo mondo omba'e-rehe: “Mba'e tipo ojehu-ta xe-vy ko'ángã” he'i ojepy'apy-vy. Imba'e reta reta-rehe ojapura. Oipotave tave ojeupe gwarã. Opaixagwa ojapose ojererohory mo'ã hagwã. Omba'e retarã-rehe ete ha'e oikotevẽ. Nhandejáry remimbota, gwembiapo porãrã mo'ã ojapo. Ha nopenái inhe'ẽ porã-rehe. Temitýgwe naha'yiry va'e-rami opyta. ¹⁵Ha vyv porã-my ho'a va'e nhe'ẽ he'ise: Oĩ nhe'ẽ porã-rehe ojeapysaka va'e. Ohendu-ma ramo ogwerovia tee voi. Ogwerovia-gwi ipy'a potĩ porã. Nhandejáry rape-rehe ogwata gwata. Hembaliapo porãve rãve va'e ogwerovia-gwi. Upéixa-gwi “Heta ha'yí va'e ramigwa” ha'e hese, he'i Hesu gwemimbo'e kwéry-pe gwemimombe'ukwe oikwaa uka-vy íxupe kwéry.

Tataendy rehegwa nhe'ẽ

(Mc 4.21-25)

¹⁶Upéi Hesu omombe'u jevy arandu nhe'ẽ tataendy rehegwa nhe'ẽ-rami:

—Tataendy nhamoendy ramo jepe ndaha'etí nhamoĩ hagwã mba'e ryrú gwy-py. Ndaha'etí ave nhamoĩ hagwã tupa gwy-py. Tataendy nhamoendy nhamoĩ hagwã tataendy rendaty-py, nhande resape porã hagwã. ¹⁷Upéixa ave ojekwaa porã va'erã gwĩ onhenhomi va'ekwe gwive. Ha Nhandejáry oikwaa uka va'erã enterove va'e-pe oikwaa e'y va'ekwe gwive oikwaa porãmba hagwã. Hesakã va'e ramigwa-py ojekwaapa va'erã. Nhande py'apy-py oime va'e gwive ojekwaa uka va'erã.

¹⁸—Ejeapysaka porã katu xe nhe'ẽ-rehe. Ne arandu porã-ma ramo, hetave ojekwaa va'erã nde-vy ne aranduve nduve hagwã-vy ereho. Nahi'arandúí va'e ae nohendu kwaái-vy voi. Okanhymba va'erã íxugwi inharandurãgwe, he'i Hesu omombe'u-vy gwemimbo'e kwéry-pe.

Hesu re'yí kwéry

(Mt 12.46-50; Mc 3.31-35; Hb 2.11-13)

¹⁹Upe ramo ou isy tyvryry kwéry ndive. Ndikatúí ogwahẽ henda-py. Hesu jerekwe-rehe heta eterei onhomboaty hikwái. ²⁰Upéi oikwaa va'e he'i Hesu-pe.

—Nde sy oĩ oka-py. Nde rvyv kwéry ave oĩ upe-py. Nde rexase, he'i omombe'u Hesu-pe.

²¹Ha'e katu he'i:

—Nhandejáry nhe'ẽ ohendu va'e gwive, inhe'ẽ ojapo va'e gwive upe va'e kwéry-pe xe ha'e, “Xe sy, xe rvyv” ave, he'i íxupe kwéry Hesu hekorã omombe'u-vy.

Hesu omokirirĩ y, yvytu ave

(Mt 8.23-27; Mc 4.35-41)

²²Ha upe rire, peteĩ áry-py, Hesu onhemboyru kanoagwasu-py gwemimbo'e kwéry ndive:

—Jaha jahasa hagwã y rovái, he'i íxupe kwéry.

He'i-vy oho hikwái.

²³Oipykúí oje'ói-vy jave hikwái Hesu oke oĩ-vy. Upe jave y-rehe ho'a vvytugwasu. Omopu'ã pu'ã y-pe. Onhehẽ-ma kanoagwasu-py y. Haimete ete y omohynyhẽ kanóa. Ombopohýí eterei kanóa y. Haimete ete omonheapymi kanóa y gwy-py. ²⁴Upéixa-gwi oho omombáy Hesu-pe:

—Epáy katu, mbo'eháry. Nhanheapymimba-tama. Onheapymi-tama nhande ryrú y gwy-py, he'i Hesu-pe omombáy-vy.

Opáy-ma Hesu. Oja'o vvytugwasu-pe. Omombyta y. Inhe'ẽ-py okirirĩ-ma. ²⁵Upéi he'i ondivegwa kwéry-pe:

—Ma'erã nderejeroviái xe-rehe, he'i onhemonhe'ẽ-vy ondivegwa kwéry-pe.

Ha oponderapa hese hikwái:

—Mba'eixagwa po ko va'e? Onhe'ẽ ramo y-pe vvytu-pe ave omokirirĩ inhe'ẽ-py rei. Mba'eixagwa po ko va'e, he'i joa Hesu-rehe hikwái.

Anháy rerekoha-gwi Hesu omosẽ anháy kwéry

(Mt 8.28-34; Mc 5.1-20)

²⁶Ha upe rire oipykúí pykúí oho-vy ogwahê hagdã Geraseno kwéry retã-my. Upe tetã opyta yrusu rembe'y-py. Galiléia vvy rovake opyta. ²⁷⁻²⁹Ha osê-ma ramo kanóa-gwi, ou ohogwaití-vy íxupe upe anháy ojepota va'e va'ekwe hese. Tetã-gwi ou. Hí'are-ma oiko opi-vy. Óga-py ndoikovéi ave. Oiko rei ijyta-rupi upe anháy ojepota va'e hese. Ojepota-gwi omenda va'ekwe anháy-rehe. Oiko meme indive. Upe tetã mygwa kwéry oapresa mo'ã íxupe. Ndikatuvéi onhapytí íxupe. Onhapytí jevy rei íxupe. Ojokwa jokwa íxupe oipokwa oipykwa ave calena-py. Ha omondohoypa. Omopêmba íxupe oho-vy. Anháy ogweraha íxupe tekwaty e'ý-my oheja.

Upéi Hesu ou ohogwaití íxupe. Ohexa-ma ramo Hesu-pe osapukáí-vy ojeity íxupe:

—Hesu Tupãgwasu ra'y tee voi ko nde, he'i íxupe. —Mba'e tipo erejapo-ta xe-rehe, he'i oporandu-vy íxupe. —Ajerure nde-vy ani xe mbohasa asy teĩ, he'i Hesu-pe anháy.

Upe jave:

—Esê katu ko kwimba'e-gwi, he'i Hesu anháy-pe.

³⁰Ha kwimba'e-pe he'i:

—Emombe'u xe-vy nde réry, he'i íxupe.

—Ore reta-gwi xe réry Heta ave, he'i. Heta-ma voi anháy-rehe ojepota-ma va'ekwe.

³¹Upéi ojerure rure Hesu-pe anháy kwéry pono omondopa íxupe kwéry anháy opyta hagdã-my. ³²Upe jave y rembe'y-py oĩ heta kure. Yvyaty rembe'y-rehe okaru joa kure. Ha anháy kwéry ojerure Hesu-pe oheja hagdã kure yta-py oike.

—Tapeho katu, he'i íxupe kwéry.

³³Ha anháy kwéry osê kwimba'e-gwi oike jevy kure yta-py. Ha kure kwéry oriparapa ogwey-vy. Y rembe'y-py ogwey oje'ói-vy yugwarusu-py. Onheapymimba y gwy-py oje'ói-vy hikwái.

³⁴Upéa ohexa-ma ramo, kure-rehe onhangareko va'e kwéry oriparapa oho-vy hikwái. Omombe'u tetã mygwa kwéry-pe. Tetã jere rehegwa-pe ave omombe'u. ³⁵Oupa oje-hexapa ojehu va'ekwe gwive. Ogdahêmba Hesu renda-py. Ohexa anháy rerekohare ave ogwahê hikwái. Ohexa íxupe Hesu renonde-py ogwapy-vy oĩ-vy. Onhemonde-ma oĩ-vy. Ndaitavyéi-ma anháy rerekohare. Upéa-rehe ipy'amirimba hikwái. Ipu'aka eterei Hesu.

³⁶Ha gwĩ hexahare omombe'upa íxupe kwéry. Anháy rerekohare rehegwa nhe'ê omombe'u. Mba'eixagwa pa ombogwera anháy rerekohare omombe'u. ³⁷Ha upéa-rehe ipy'amirimba Hesu-gwi Geraseno kwéry. He'i íxupe opoi hagdã hetã-gwi. Upéixa-gwi onhemboyru jevy kanóa-py Hesu hendive kwéry ave ohasa jevy y rovái oje'ói-vy. ³⁸Oike-ma ramo kanóa-py, anháy rerekohare ojerure íxupe omoiruse eterei íxupe. Ha ndohejái oho ondive. Omondo íxupe:

³⁹—Tereho nde róga-py, he'i. —Emombe'u nde re'ýi kwéry-pe erekwera porãmaha. “Nhandejáry ojapo porã porã xe-rehe” ere katu emombe'u-vy íxupe kwéry, he'i Hesu íxupe.

Ha upéi katu oho omoherkwã upe tetã mygwa-pe:

—Xe-rehe ojapo porã porã Hesu, he'i. —Inhe'ê-py rei omosê imondo-vy xéhegwi anháy kwéry. Xe mbogwera-ma. Ndaxe tavyvéi-ma ãy, he'i. —Ojapo porã voi xe-rehe Hesu, he'i omombe'u-vy gwe'ýi kwéry-pe.

Jairo rajy rehegwa nhe'ê, kunha ombogwera va'e rehegwa nhe'ê ave

(Mt 9.18-26; Mc 5.21-43)

⁴⁰Ha y rovái ogwahê jevy ramo heta eta ojogweroaty aty y rembe'y-py Hesu ra'arõ-vy. Ogwerohory eterei Hesu ogwahê ramo. ⁴¹⁻⁴²Ha upe ramo ogwahê ou-vy kwimba'e. Ojeporahéi haty pygwa ruvixa upéa. Héry Jairo. Ogdahê-ma ramo onhesũ omboete-vy Hesu rovagwy-py.

—Mbo'eháry, he'i, —Omano-tama xe rajy, he'i. —Eju katu, jaha, he'i íxupe. —Ha'enhomi xe rajy oiko, he'i. —Ogwereko-ma doze ro'y, ha omano-tama. Eju katu jaha embogwera íxupe ani hagdã omano, he'i ojapura-vy hese.

Upéa-gwi Hesu oho hendive. Tape-rehe oho ramo, ijaty jaty Hesu-rehe ojoko-vy ojopypa íxupe.

⁴³Tape ku'a-rupi ou kunha. Hapykwéri ete-ma ou. Are-ma hasy. Doze ro'y-ma ogwereco ojegwaha. Ome'ẽmba va'ekwe ogwereco va'e ombogwerahaty kwéry-pe okwera hagwã mo'ã. Opaga paga rei okwera hagwã mo'ã. Ha ndokwerái joty. ⁴⁴Upéa-gwi ou Hesu rapykwéri. Opoko ijao poty-rehe. Opoko-ma ramo omoí opo hese, opi-ma íxugwi ijegwaha. Okwera-ma kunha.

⁴⁵Upéa-rehe Hesu oporandu:

—Kiva'e opoko kuri xe-rehe? he'i oporandu-vy onhomongeta hagwã indive.

Enterove he'i joa:

—Ndaha'úi xe, he'i Hesu-pe.

Ha Pedro katu, oirũ gwéry ndive, he'i:

—Ijatyapa hikwái, mbo'eháry. Ojogweroaty aty oje'ói-vy nde rexa-vy. Ojejapi japipa oje'ói-vy, he'i íxupe. —Ereporandu rei para'e, “Kiva'e opoko kuri xe-rehe?” ere rei ra'e, he'i.

⁴⁶Upéi katu Hesu he'i jevy:

—Opoko-ma voi xe-rehe kuri. Onhembogwera uka hagwã opoko xe-rehe kuri. Okwera-ma xe-rehe opoko-gwi, he'i.

⁴⁷Ha kunha katu oikwaa.

“Ndikatúí anhemí Hesu-gwi” he'i opy'apy-py. Ou, icyhyje omboryrí. Ou ojeity henonde-py. “Ipoxy para'e xe-rehe. Naxe mbogweraséi para'e” he'i mo'ã Hesu-rehe opy'a-py. Omombe'upa anhetegwa va'e. Ijaty va'e ohendu ave omombe'u ramo.

—Anhembogwera uka hagwã kuri nde-rehe apoko kuri, he'i íxupe. —Xe po amoí ramo nde-rehe akwera-ma, he'i Hesu-pe hasy va'ekwe kunha.

⁴⁸—Áy katu erekwera-ma. Xe raji-rami voi oroporahuvereco, he'i kunha-pe imbopy'agwapy-vy Hesu. —Nde erejerovia-ma xe-rehe. Upéa-gwi erekwera-ma. Ne resái porã-ma. Nde py'agwapy reheve tereho, he'i Hesu íxupe.

⁴⁹Onhe'ẽ jave kunha-pe, ou mburuvixa Jairo róga-gwi omombe'u:

—Omano ete-ma nde raji. Ndovaléví, natekotevêi oho mbo'eháry nde róga-py. Eheja katu toho, he'i mburuvixa-pe.

⁵⁰Ha Hesu ohendu omombe'u ramo:

—Ani eremboasy teĩ. Ejerovia katu xe-rehe. Ambogwera-ta íxupe, he'i túvy-pe.

Upéi oho ohexa omano va'ekwe.

⁵¹⁻⁵⁴Ogwahẽ-ma ramo óga-py ndohejái avave oike indive. Pedro mante oike, João, Tiago, mitã ru, mitã sy ave oike. Upe va'e mante oike omoirũ-vy Hesu-pe.

Ha ijayvu joa hikwái gwĩ ndoikéi va'e kwéry. Hasẽmba hapirõ-vy.

Hesu ae he'i:

—Ani pene rasẽ teĩ, he'i. —Nomano tee mo'áiry. Oke ae-ma oĩ-vy, he'i omano tee va'e-rehe.

Ha ha'e kwéry onhembohory hese hikwái.

—Omano ete-ma, he'i hikwái ohapirõ joa-vy.

Upéi oike Hesu mitã kunhagwasu oĩ va'e ha-py. Inhirũ mbohapy reheve, mitã kunha ru, isy ave ogweroike ondive. Oipopyhy mitã kunhagwasu-pe:

—Mitã kunhagwasu, epu'ã katu, he'i ohenói-vy mitã kunha omano va'ekwe-pe.

⁵⁵He'i-ma ramo Hesu, oikove jevy mitã kunha. Pya'e opu'ã.

—Emongaru mani katu ne memby, he'i Hesu isy-pe.

⁵⁶“Mba'éixa omoingove jevy íxupe?” he'i opondera eterei-vy hese hikwái. Ha Hesu katu he'i:

—A-rami xe amoingove jevyha kuri, ani ae teĩ xe mombe'u kuri, he'i íxupe kwéry Hesu.

9

Gwemimbo'e kwéry omondo Hesu

(Mt 10.1,5-15; Mc 6.7-13)

¹Ha upéi katu Hesu ohenói doze gwemimbo'e kwéry-pe ojogweroaty hagwã henda-py.

—Xe nhe'ê-py emosê sêmba katu anháy imondo-vy, he'i íxupe kwéry. —Xe nhe'ê-py epreporombogwera-ta ave, he'i. ²—Tereho eremombe'u hagwã Nhandejáry rehegwa nhe'ê. “Pemoirũ katu Nhandejáry pende ruvixarã-pe” ere kuri xe mombe'u-vy, he'i íxupe kwéry. —Ha hasy va'e-pe erembogwera-ta ave, he'i íxupe kwéry imondo-vy. ³—Ani ereraha mba'eve nde rupive. Nde pykoka ani ereraha teĩ. Nde plata ryrũ ani ereraha teĩ ave. Nde avío ani ereraha teĩ ave. Nde plata ani ereraha teĩ ave. Ne kamisa mokõi ani ave ereraha teĩ, he'i. —Nandi ete voi tapeho, he'i íxupe kwéry. ⁴—Ereike ramo óga-py, epyta upe-py. Eresê peve upe tetã-gwi, eiko peteĩ óga-py. Ani erembopopa óga ereiko-vy. ⁵Ha tetã mygwa kwéry nane mogwahêséiry ramo, eresê jave embovava nde py ho'apa hagwã yvy timbore nde py-gwi. Hekoha vaipaha eremombe'u hagwã emopotĩ porã nde py. He'i arã upe pygwa, “Nhande rekoha vai eterei-gwi nipo ra'e opy omopotĩ potĩ oho-vy” he'i arã nde-rehe. “Nhandejáry re'ýi e'ỹ-rami nipo ra'e nhande kwéry rekoha” he'i arã gwekoha vaiha oikwaa-vy hikwái, he'i íxupe kwéry Hesu omondo-vy.

⁶Aipo ramo oho hemimbo'e kwéry. Tetã'i tã'i-rupi onhemonhe'ê enterove-pe oho-vy. Nhandejáry Hesu Cristo rehegwa nhe'ê porã omombe'u. Ha opa ohoha-rupi ombogwera hasy va'e-pe.*

Hesu rerakwã ohendu Herodes

(Mt 14.1-12; Mc 6.14-29)

⁷Upe jave Galiléia pygwa mburuvixagwasu ohendu-ma Hesu rerakwã. Herodes mburu-vixagwasu réry. Ohendu-ma ramo herakwã, he'i:

—Kiva'e tipo upe va'e, he'i opondera-vy.

Omombe'u joavy avy, omombe'u jokupe kupe rei íxupe. Oĩ he'i va'e Hesu-rehe: “João Batista amyri voi ra'e ojehexa uka jevy ra'e” he'i rei va'e hese. ⁸Oĩ ave he'i rei va'e hese: “Upéa ko myamyrikwe Elias ojehexa uka jevy ra'e” he'i rei hese. Oĩ ave he'i va'e hese: “Upéa ko yma myamyrikwe Nhandejáry nhe'ê-py omombe'u va'ety ojehexa uka jevy-ma ra'e” he'i rei va'e hese. ⁹Upéa-rehe Herodes he'i:

—Kiva'e tipo upe va'e, he'i. —João amyri anhakã'o uka va'ekwe ndaha'ei nipo ha'e voi ra'e, he'i mo'ã hese. —Aipo ramo kiva'e nipo aipo va'e ra'e, he'i rei hese. —Ahendu herakwã jokupe kupe rei. Ahexase eterei Hesu-pe, he'i.

Hesu ombopopóy heta va'e-pe cinco mbojape, mokõi pira ave

(Mt 14.13-21; Mc 6.30-44; Jo 6.1-14)

¹⁰Upe rire hemimondo kwéry ou jevy-ma ramo Hesu renda-py omombe'upa íxupe. Ojapo japo va'ekwe omombe'u íxupe. Upe-ma ramo ha'e ogweraha íxupe kwéry Betsaida tetã-my omokane'ogwa-vy mo'ã ogweraha. ¹¹Oikwaa-ma ramo jepe kente kwéry oho hapykwéri. Ogwahê-ma ramo hikwái ojogwerohory ogwahê-vy Hesu ha-py. Omombe'u íxupe kwéry. Nhandejáry nhande ruvixarã rehegwa nhe'ê omombe'u íxupe kwéry. Ha hasy va'e-pe ombogwera meme.

¹²Ka'aru ete-tama ramo upe doze hemimondo kwéry ou onhemoagwĩve-ma Hesu-gwi. He'i Hesu-pe:

—Ere ojogweroaty va'e-pe toho tetã mirĩ-rupi tetã jerekwe-rupi gwemi'urã toheka, oke hagwã ave, he'i Hesu-pe. —Ndaipóri mba'eve a-py, he'i Hesu-pe.

¹³Ha'e katu he'i íxupe kwéry:

—Peẽ jepe peme'ê hemi'urã kwéry íxupe kwéry, he'i.

—Ndahetái nhane remi'urã, he'i —cinco mbojape, mokõi pira ka'ê mate oĩ, he'i. —Oroho-ta tipo orojogwa heta hetave hemi'urã kwéry hetave ho'u hagwã, he'i oporandu-vy Hesu-pe.

He'i ave íxupe:

—Heta eterei oime kente kwéry ko'a-py, he'i onhomongeta-vy Hesu-pe.

¹⁴Haimete cinco mil Hesu nhe'ê renduhaty oime upe-py. Upéixa-gwi he'i hese kwéry “Heta eterei voi oime kente kwéry ko'a-py” he'i.

Ha Hesu he'i:

* 9:6 Lc 10.1-12

—Nahániry, pembogwapy uka katu íxupe kwéry. Cinqüenta oĩ va'e ojopypy ypy-py ogwapy hagwã, he'i gwemimondo kwéry-pe. —Ojogweroaty mirĩ mirĩ-vy pembogwapy uka íxupe kwéry, he'i íxupe kwéry.

¹⁵Ha'e kwéry omombe'u enterove ogwapy hagwã. Ha ogwapy-pa-ma hikwái. ¹⁶Upéi Hesu oipyhy upe cinco mbojape. Mokõĩ pira ave oipyhy. Upéi hovayva temi'urã-rehe omboete-vy. Hemime'erã-rehe Hesu otima porã Nhandejáry-pe. Upéi ombopopóy temi'urã. Ome'ẽ me'ẽ gwemimbo'e kwéry-pe ombogwey hagwã enterove rovagwy-py. ¹⁷Ha enterovete okaru. Hygwyatãmba-ma ave hikwái. Upéi ombohyru ho'u va'ekwe rembyre. Doze ajaka jevy joty ombohyru hembyre kwéry. Hynyhẽmba.

*“Nde ko Nhandejáry rembiporavokwe voi” he'i Hesu-pe Pedro
(Mt 16.13-23; Mc 8.27-33)*

¹⁸Hesu omondo jevy onhe'ẽ Nhandejáry-pe. Ha'enho ombojeupi onhe'ẽ. Ha hemimbo'e kwéry oĩ ave hendive. Upéi oporandu íxupe kwéry ojekwaa uka hagwã.

—Mbava'e tipo he'i ra'e kente kwéry xe-rehe? he'i oporandu-vy.

¹⁹Ha'e kwéry he'i:

—Ne mombe'u joavy avypa kuri hikwái. “Yma myamyri omano va'ekwe ojehexa uka jevy kuri nhande-vy” he'i joa kuri nde-rehe entero kente kwéry, he'i íxupe. —“João Batista amyri voi ojehexa uka jevy nipo ra'e” oĩ he'i va'e nde-rehe. “Elias amyri ojehexa uka jevy nipo ra'e” oĩ ave he'i va'e nde-rehe. “Myamyri Nhandejáry nhe'ẽ-py omombe'u va'ety ojehexa uka jevy nipo ra'e” oĩ he'i ave va'e nde-rehe, he'i íxupe.

²⁰—Ha nde katu, mbava'e ere xe-rehe? he'i ave oporandu-vy íxupe kwéry.

Ha Pedro katu he'i:

—Nde ko Cristo voi, he'i íxupe. —Nde ko Nhandejáry rembiporavokwe voi nde, he'i íxupe Pedro.

²¹—Ha'e voi xe. Ani ae katu xe mombe'u teĩ kuri avave-pe, he'i. —“Cristo nhane remiha'arõ voi upe va'e” ani peje teĩ avave-pe xe mombe'u-vy, he'i íxupe kwéry.

²²—Xe Nhande Ryke'y tee va'e voi ko xe, he'i. —Tekotevẽ xe ahasa asy aiko-vy. Xe mbojevvyta judeu ruvixa kwéry, pa'i ruvixa kwéry ave, judeu rekombo'ehaty kwéry ave. Upéi xe jukase-ta hikwái. Ha xe juka uka-ta joty hikwái. Xe juka-ma rire, mbohapy áry rire aikove jevy-ma va'erã, he'i ojehegwa omotenonde-vy íxupe kwéry.

Hesu moiruse va'e rehegwa nhe'ẽ

(Mt 10.38-39; 16.24-28; Mc 8.34-9.1; Lc 14.27)

²³—Xe moiruse ramo anive ne rakate'y nde rekove-rehe. Okurusugwasu-rehe omano va'erã-rami ae katu eiko nderejapovéi hagwã erejapose va'e. Xe reko-rupi ae ereiko meme hagwã. ²⁴Gwekove-rehe hakate'y va'e ndoikói va'erã voi Nhandejáry ndive. Ha xe-rehe hapgy gwekove-rehe nopenái va'e oikove meme va'erã Nhandejáry ndive. ²⁵Ndovaléi va'erã nde-vy ko yvy apy gwive járy ramo ereiko hagwã, ne mba'e retave erereko hagwã erepena e'y Nhandejáry-rehe. Ndereiko porái ramo Nhandejáry ndive, ndovaléi arã nde-vy nde rekoha porã mo'ã. Ha'e nde joko-ta gwenda-gwi, he'i. ²⁶—Ha kente gwapixa rendapy ogwenotĩ he'i hagwã, “Ajerovia-ma Hesu-rehe” he'i hagwã va'e, nohenduséi ave xe nhe'ẽ. Upéa-rehe xe ave, xe Nhande Ryke'y tee va'e voi, napena mo'ái ave hese, he'i. —Xe amano rire aju jevy va'erã. Xe pu'aka resakã reheve agwahẽ jevy va'erã aju-vy. Xe Ru pu'aka resakã reheve agwahẽ jevy va'erã aju-vy. Hembigwái marangatu va'e yváy gwigwa va'e ndive agwahẽ jevy va'erã aju-vy. Ha upéixa aju ramo, napena pena mo'ái hese kwéry xéhegwi otĩ va'ekwe-rehe, he'i voi.

²⁷—Anhete ko xe ha'e-ta nde-vy. Oĩ a-py gwĩ nhane pa'ũ mygwa ohexa ranhe-ta mba'eixagwa pa oiko va'e Nhandejáry nhande ruvixarã. Ohexa e'y reheve nomano mo'ái. Ohexa rire mate omano va'erã, he'i onhemombe'u-vy íxupe kwéry Hesu.

Hesu onhomongeta mokõĩ ojereropyahu jevy va'e ndive

(Mt 17.1-8; Mc 9.2-8)

²⁸Peteĩ semana rire mbohapy ogweraha gwupive Hesu. Pedro, João, Tiago ave ogweraha omondo hagwã onhe'ê Nhandejáry-pe. Ogwerojeupi vyatyryusu-rehe heraha-vy. ²⁹Ha Nhandejáry ndive onhomongeta jave ojehekoviãrõ-ma oiko-vy Hesu. Ijao imorotigwasu ete va'e voi. Nhande resa mbojevvy ete hesakã-gwi ijao. ³⁰Ha sapy'a mokõi va'e ojereropyahu jevvy va'ekwe onhomongeta indive. Moisés, Elias ave ³¹ojereropyahu jevvy ramo va'ekwe ojehexa uka jevvy íxupe. Nhandejáry omoendy porã ijere-rehe. Upe reheve ojehexa uka. Hesu ndive onhomongeta jave ojehexa uka. Mba'e ojehu va'erã-rehe onhomongeta. Hesu ohasa asy va'erã Jerusalém-my. Ojuka-tama íxupe upe-py. Upéa-rehe onhomongeta-ma Hesu ndive upe mokõigwa. ³²Ha upe jave Pedro, inhiri ndive hapehýi eterei-gwi oke hatã-ma oĩ-vy. Opáy-ma ramo, ohexa Hesu hendy ete reheve. Mokõi indive onhomongeta va'e ave ohexa-ma ave. ³³Ha upéi katu upe mokõigwa oje'ói-tama hikwái. Upe jave Pedro he'i Hesu-pe:

—Iporã voi japyta ko'a-py, mbo'eháry. Iporã arã orojapo-ta peẽ-my gwarã tapyirã. Peteĩ nde-vy gwarã, peteĩ Moisés pegwarã, peteĩ Elias pegwarã orojapo-ta, he'i Pedro. Onhemondýi eterei íxugwi ndoikwaáiry mba'e pa he'i.

³⁴Onhe'ê jave omo'ã-ma íxupe kwéry arai. Oiko jave arai-py onhemondyipa íxugwi hexa-vy. ³⁵Ohendu-ma arai pa'ũ-my onhe'ê va'e:

—Hesu xe ra'y tee, he'i. —Xe rembiporavo va'ekwe, he'i. —Ejeapysaka porã katu inhe'ê-rehe, he'i. —Inhe'ê-rupi eiko katu, he'i íxupe kwéry Nhandejáry.

³⁶Opa-ma ramo upe va'e nhe'ê, ohexa Hesu anho-ma opyta oĩ-vy. Mokõi indive onhomongeta va'ekwe-pe ndohexavéi-ma. Upéa-rehe Hesu remimbo'e okiririmba opyta-vy. Ohexa va'ekwe avave-pe ndoikwaa ukáiry.

Hesu omosê imondo-vy anháy

(Mt 17.14-21; Mc 9.14-29)

³⁷Upéi áry ambue-ma ramo, ogwejvy jevvy hikwái vyatyryusu ári-gwi. Ha heta eta ou ohogwaitĩ-vy Hesu-pe. ³⁸Upéi ojogweroaty va'e pa'ũ-my oĩ inhe'ê hatã va'e:

—Ajerure-ta nde-vy xe ra'y-rehe, mbo'eháry. Ha'e anhomi xe ra'y. ³⁹Ha anháy ojepota-ma hese. Ogwereco ramo sapy'a ombosapukái oity imondo-vy íxupe, he'i omombe'u Hesu-pe. —Onhembohete hatã ombojuruyjuipa-ma íxupe. Omboheterýi oiko-vy oityha óra. Ndopoi mo'ái voi íxugwi, he'i. ⁴⁰—Ajerure rei ne remimbo'e-pe omosê hagwã mo'ái imondo-vy. Ndikatuí omosê, he'i Hesu-pe ojerure-vy gwa'yry ombogwera hagwã.

⁴¹Hesu katu he'i:

—Áygya katu ndojeroviái vyteri xe-rehe. Ndogwerovaséi gwekoha xe ndive oiko hagwã. Ndapyta are mo'ái pene ndive. Ndoroi pokwaa mo'ávái-tama.

Upéi he'i túvy-pe:

—Eru katu nde ra'y xe ha-py.

⁴²Ou-tama ramo nogwahê jepéiry ramo, anháy oity jevvy-ma íxupe imondo-vy yvy-py, omboheterýi íxupe. Hesu ae oja'õ-ma anháy-pe:

—Epoi íxugwi. Anive erejepota hese, he'i anháy-pe ombogwera hagwã kunumĩ-pe.

Ombogwera-ma rire he'i:

—Eraha jevvy nde ra'y, he'i túvy-pe.

⁴³Ha entéro ohexa va'e opondera ndera oiko-vy:

—Ipu'aka tee va'e voi nipo Nhandejáry ra'e, he'i hikwái hese.

Gwenonde-rupi Hesu omombe'u ojejukaha

(Mt 17.22-23; Mc 9.30-32)

Ha Hesu rembiapo porã ete-rehe opondera-vy oiko jave, Hesu he'i gwemimbo'e kwéry-pe:

⁴⁴—Pejeapysaka porã katu ko xe nhe'ê amombe'u va'erã-rehe peẽ-my. Ajekwaa uka-tama peẽ-my. Xe Nhande Ryke'y tee va'e xe mombe'u-ta voi xe pyhyharã-pe. Xe pyhy-ta xe reraha-ta kente kwéry xe juka hagwã, he'i.

⁴⁵ Ha Hesu nhe'ē katu ndoikwaái voi. Ojeapysaka rei hikwái ndoikwaái inhe'ē. Onhenhomi íxugwi, upéa-gwi ndoikwaái. Ha mba'eve noporandúí íxupe. Otí eterei oporandu hagwā.

Kiva'e po Nhandejáry ombotuvixave-ta?

(Mt 18.1-5; Mc 9.33-37)

⁴⁶ Ha onhomongeta onhondive hemimbo'e kwéry:

—Kiva'e opyta-ta onhembotuvixave hagwā —oporandu randu ojóupe. Onhembotuvixaseve mo'ã hikwái.

⁴⁷ Hesu ae katu oikwaa-ma joty mba'e-rehe onhepy'amongeta hikwái. Upéa-rehe oipyhy mitã oyke-py omoí omombe'u hagwā íxupe kwéry hekorã.

⁴⁸ —Eremogwahẽ ramo mitã xe réry-py, ererovy'a ramo íxupe, xe mogwahẽ ave arã. Xe mogwahẽ ramo katu, eremogwahẽ ave arã xe mbouhare-pe ave, he'i. —Nonhemboete ukái va'e-pe Nhandejáry ombotuvixa-ta joty imboete-vy, he'i.

“Nhande-rehe ndaija'e'ýi va'e nhane pytygwõ va'e joty” he'i Hesu

(Mc 9.38-40)

⁴⁹ Ha João katu he'i íxupe:

—Orohexa-ma kuri kwimba'e omosẽ ramo anháy-pe, mbo'eháry. Omosẽ imondo-vy nde réry-py. Ha upe va'e nanhane moirüi-gwi oro'e íxupe “Ani eremosẽ teĩ Hesu réry-py” oro'e kuri íxupe, he'i Hesu-pe João.

⁵⁰ Ha Hesu katu he'i:

—Ani erejoko teĩ íxupe xe nhe'ē-py oiko va'e. Nhande-rehe ndaija'e'ýi va'e nhane pytygwõ va'e joty, he'i íxupe.

Hesu ohose jevy Jerusalém tetã-my nhande-rehe ha-py ojejuka uka hagwā

⁵¹ Haimete ogwahẽ-ma hi'óra ojeupi jevy hagwā yváy-py. Upe-ma ramo he'i gwemimbo'e kwéry-pe:

—Taha jevy ranhe Jerusalém tetã-my, he'i.

Ohose eterei jevy Jerusalém-my. ⁵² Omondo gwenonderã gwĩ hendive okwa va'e. Osẽ-ma oho-vy ohexa hagwā Hesu rejupagwā. Jerusalém tetã rape ku'a-py rei Samaria yvy pygwa tetã'i-my ogwahẽse mo'ã. ⁵³ Ha upe pygwa oikwaa-ma ramo Hesu ohose Jerusalém-my, nomogwahẽ mo'ãi henonderã-rupi oho va'e-pe gwetã-my. ⁵⁴ Upéa-rehe hemimbo'e Tiago, João ave oporandu Hesu-pe:

—Mbo'eháry, ereipota tipo orohenói tata yváy-gwi ho'a hagwā ko tetã mygwa ári ohundipa hagwā íxupe kwéry, he'i oporandu-vy nomogwahẽ ukái-gwi íxupe upe pygwa kwéry.

⁵⁵ Hesu ojere ha onhemonhe'ē íxupe kwéry:

—Naháni. Ndikatúí. Ani erejapo vai hese kwéry, he'i. —Ndereikwaái vyteri xe ae xe rekoha. ⁵⁶ Xe Nhande Ryke'y tee va'e aju aresende hagwā kente kwéry. Nahundiséiry avave-pe, he'i onhemonhe'ē-vy íxupe kwéry.

Upéi ohasa oho-vy tetã'i ambue-py ogwahẽ oho-vy.

“Xe moirü katu” he'i Hesu

(Mt 8.18-22; Lc 14.26-27)

⁵⁷ Hesu ndive oje'ói hikwái. Ha peteĩ va'e he'i íxupe:

—Oromoirü meme-ta mamó ereho ha-py.

⁵⁸ Hesu ae he'i íxupe:

—Mba'eixagwa pa xe amombe'use peẽ-my. Agwara kwéry ogwereco okeha yvyrakwa, gwyrá kwéry gwaity ogwereco. Ha xe, Nhande Ryke'y tee va'e, ndarekói xe rupagwā anhemokane'õgwa hagwā, he'i oikwaa hagwā gwekorã.

⁵⁹ Peteĩ upe-py oĩ va'e-pe ae he'i:

—Xe moirü katu, he'i.

Upe va'e he'i Hesu-pe:

—Xe reja ranhe aha'arõ hagwā xe ru omano. Upe rire ae-ma aha va'erã ne ndive oromoirü hagwā, he'i íxupe.

⁶⁰Upéi:

—Nahániry. áy voi aipota xe moíru, he'i íxupe. —Xe moirúse e'ý va'e ae taimandu'a ranhe katu omano va'ekwe ojaty hagwā-rehe, he'i. —Nde xe moirū meme katu, he'i. —Emoherakwā Nhandejáry nhande ruvixarā rehegwa nhe'ë, he'i.

⁶¹Upéi peteí va'e he'i jevy íxupe:

—Oromoirū-ta xe Járy. Taha ranhe tamombe'u xe róga ygwa-pe oromoirū hagwā, he'i Hesu-pe.

⁶²Hesu ae he'i íxupe:

—Xe moirū katu. Kavaju-py omba'apo va'e-rami ani erejapo. Kavaju omboasuru vvy jave ojeapa ramo, ojapo parí parí oho-vy. Gwapykwe-koty orepara-gwi ndohexái gwenonderā. Xe-rehe nderejerovia porāi ramo kavaju-py omba'apo va'e-rami upéixa nde rekoha karē karē arā ave. Upéixa ramo ou ramo Nhandejáry nhande ruvixarā nande py'a porāi va'erā ereiko hagwā indive, he'i íxupe. —Ani ererepara rei teí nde rekoke-rehe. Xe moirū ae katu, he'i íxupe.

10

Setenta gwemimbo'e kwéry-pe omondo Hesu

¹Upe rire oiporavo Hesu setenta kwimba'e omondo hagwā gwenonderā. Onhe'ë mombe'uharā omondo mokō mokōi tetā tetā-rupi oho hagwā. ²Arandu nhe'ë temitygwe kytiháry rehegwa-rami oiporu omombe'u hagwā íxupe kwéry hekoharā. He'i íxupe kwéry:

—Tuvixa eterei voi kokwe ha temitygwe hi'aju va'ekwe heta eterei oí. Upéixa ave oí heta eterei nohendúí vyteri va'e Nhandejáry nhe'ë.

—Ha temitygwe kytiháry ndahetáiry. Ndahetáiry-gwi ojerure kokwe járy-pe om-bohetave hagwā kytiharā imondo-vy. Upéixa ete peë pejerure katu Nhandejáry-pe ombohetave hagwā onhe'ë mombe'uharā omosarambi hagwā onhe'ë.

³—Tapeho, he'i ave íxupe kwéry. —Xe oromondo-ta áy hembiaipo vai va'ety ha-rupi, he'i. —Mymba ra'y jagwarete pa'ú-my oiko va'e-rami peiko va'erā upe-py. ⁴Ani ereraha mba'eve rei nde rupive. Ani ereraha ne mba'e ryrú. Nde plata ryrú ave, ani ereraha teí. Nde py rehegwa ave ani ereraha teí. Ne rogwaití ramo tape-rupi, ani joty erepyta teí. ⁵Eregwahē-ma ramo óga-py ereike-ma ramo, ere-ta óga pygwa-pe “Nhandejáry tane mbopy'agwapy porā katu” ere arā óga pygwa-pe. ⁶Upe óga pygwa kwéry ojohayhu porā ramo, ipy'agwapy porā va'erā. Ha ndojohayhu porāi ramo upe pygwa kwéry, ojevypa jevy arā nde-vy ne nhe'ë. ⁷Peteí va'e óga-py mate erepyta. Ani erembopopa óga ereho-vy. Ome'ë arā ne remi'urā, ne mboy'u ave arā. Ani nde py'amirí teí erekaru hagwā. Omba'apo va'e-pe ohembi'u me'ë voi.

⁸—Tetā ambue-py eregwahē ereho-vy ramo, ne mogwahē porā ramo terepyta upe-py. Ne rembi'u me'ë rire tere'upa mani. ⁹Terembogwera hasy va'e upe-py okwa va'e-pe ha teremombe'u mbe'u íxupe kwéry: “Hi'agwí-ma pendéhegwi hi'óra Nhandejáry oiko hagwā nhande ruvixarā” ere eremombe'u-vy, he'i Hesu gwemimondorā kwéry-pe.

¹⁰⁻¹¹Upéi:

—Eregwahē ramo tetā ambue-py ha nane mogwahē porāi ramo, hape heta-rupi teregwata gwata-vy eremombe'u-vy. Enhe'ë hatā atā eremombe'u-vy, “Oí xe py-rehe ne retā timbore. Ambovava-ta xe py xe py-gwi ho'apa hagwā ereikwaa tee hagwā Nhandejáry nhe'ë nrehenduséiha. Ne mo'agwí-ma ra'e ou-vy Nhandejáry nhande ruvixarā, ha nrehenduséi upe xe remimombe'u hesegwa nhe'ë. Upéixa-gwi napene arandu poráiry pejevavy-vy” emombe'u íxupe kwéry, he'i. ¹²—Anhetegwa ha'e-ta peë-my, Nhandejáry ojohu-ta enterovéa-pe hembiapokwe-rehe, ha ombohasa asy-ta ójehe ojerovia e'ý va'e-pe. Hekoha vai eterei va'ekwe Sodoma tetā mygwa kwéry. Upéixa-gwi Nhandejáry ombohasa

asy va'ekwe íxupe kwéry. Ha ko'áygwa nohenduséi ramo ne remimombe'u, nohenduséi-gwi ombohasa asy eterei va'erā íxupe kwéry. Sodoma tetā mygwa ohasa asy va'erā, ha upe ne nhe'ē xe rehegwa nohenduséi va'e ohasa asyve va'erā.*

Ovy'are'y va'erā Hesu-rehe
(Mt 11.20-24)

¹³ Upe rire Hesu omombe'u tetā ambue-rehe.

—Peē Corazim tetā mygwa kwéry apomboasy peē-my. Pehasa asy ete va'erā. Peē Hexapyrā-rupi xe rembiapo porā meme pene retā-my ajapo-ma pejerovia hagwā mo'ā xe-rehe. Ko'āixagwa hexapyrā-rupi xe rembiapo porā ramo ra'e Tiro tetā-my, Sidom tetā-my, pya'e voi ojerovia arā araka'e xe-rehe upe pygwa kwéry. Omboasy arā araka'e gwembiapo vaikwe. Gwekohakwe-rupi ivy'are'y va'e ao omonde arā araka'e, ivy'are'y va'e renda-py ogwapy arā araka'e onhehapirō-ma voi arā araka'e. Tanimbu oipixy arā ójehe araka'e ojekwaavy. Ogwerova arā araka'e gwekoha, oiko arā mo'ā araka'e Nhandejáry reko-rupi. Ndaxe rexái-gwi ndojerovái xe-rehe. Ohexa ramo araka'e, pya'e ogwerova arā gwekoha araka'e.

¹⁴ Kente kwéry hembiaapo apokwe-rehe ojerereko ramo, hembiaapo vai va'e-pe ombohasa asy va'erā Nhandejáry. Upe áry ombohasa asy voi arā Tiro tetā mygwa-pe, Sidom tetā mygwa-pe ave. Ha peē-my ombohasa asyve syve va'erā íxugwi upe tetā mygwa kwéry-gwi.* ¹⁵ Peē Cafarnaum tetā mygwa napenhembojeupi mo'ái Nhandejáry renda-py. Ndereho mo'ái yváy-py. Peē-my pene mbogwejy va'erā tatagwasu ogwe'e'y va'e-py, anháy renda-py peho va'erā, he'i Hesu omotenonde-vy gwekoha vai-gwi ndogwerová va'e-pe.*

¹⁶ Upéi he'i gwemimondorā kwéry-pe:

—Kente ohendu ramo ne nhe'ē, xe nhe'ē ave ohendu-ma va'erā. Ha nde-rehe ija'e'y va'e, ija'e'y ave arā xe-rehe. Ha xe-rehe ija'e'y va'e, ija'e'y ave arā Nhandejáry xe mbouhare-rehe ave arā. Tereho xe renonde-rupi xe nhe'ē eremombe'u hagwā tetā tetā-rupi, he'i.

Hesu ha-py ogwahē jevy hemimondo kwéry

¹⁷ Ha upéi katu omombe'u mbe'u Hesu nhe'ē rire, ou jevy upe setenta hemimondo va'ekwe, Hesu ha-py ogwahē jevy ou-vy. Ovy'a ete reheve ogwahē jevy omombe'u Hesu-pe:

—Mbo'eháry, ore nhe'ē-py osēsēmba oje'ói-vy anháy hese omenda va'ekwe-gwi. Nde réry orohenói ramo, ore nhe'ē-py osēsēmba oje'ói-vy, he'i omombe'u Hesu-pe ovy'a voi.

¹⁸ Ha'e katu:

—Ha'e voi. Ahexa-ma kuri anhaywasu Satanás ho'a-ma yváy-gwi. Overa va'e-rami ho'a va'ekwe.

¹⁹ —Pejeapysaka porā katu xe nhe'ē-rehe. Xe apombopu'aka-ma opamba'e vai-rehe, anháy-rehe jepe apombopu'aka-ma joty. Ndojehu mo'ái peē-my mba'eve ivai va'e. Erepyrū ramo mbói-rehe erepyrū rei va'erā joty. Japeusa-rehe ave erepyrū rei va'erā joty. Xe nhe'ē-py apombopu'aka-ma.

²⁰ —Anháy kwéry ohendu-ma jepe ne nhe'ē, ani erevy'a joty teí upéa-rehe. Oí iporāve va'e nde-vy ne mbovy'a tee hagwā. Oiko-ma petéi teí pende réry yváy-py. Ohai uka va'ekwe Nhandejáry kwatia-rehe. Peē he'yí tee voi. Upéa-rehe ae voi peē pevy'a tee katu peiko-vy.

Ovy'a voi oiko-vy Hesu
(Mt 11.25-27; 13.16-17)

²¹ Ha upéi katu Hesu-pe ombohory ete Nhe'ē Marangatu tee va'e. Ovy'a eterei-gwi he'i:

—Oromboete voi katu, oromomba'egwasu ave xe Ru, yváy-py ereiko va'e. Nde ko, yváy Járy voi, nde. Nde ko, yvy Járy ave ko nde. Ne arandu, nde rekoha rehegwa ereikwaa uka gwí ne arandu oikwaase va'e-pe. Ha onhemo'aranduseve va'e-pe nderejekwaa uka

* 10:12 Gn 19.24-28

* 10:14 Is 23.1-18; Ez 26.1-28.26; Jl 3.4-8; Am 1.9-10; Zc 9.2-4

* 10:15 Is 14.13-15

mo'airy nde. Eremokanhy uka ne arandu porã íxugwi. Nonhemo'arandusevegwasúi va'e-pe ae, gwí “Mitã-rami ne'írá aikwaapa” he'i ójehe onhemomixí-vy va'e-pe erejekwaa uka. Ne remimbota porã-rupi erejapo upéa. Ne arandu tee va'e nde, he'i Nhandejáry-pe omboete-vy.

²²Upéi he'i:

—Xe Ru omoĩ va'ekwe opa va'e xe pogwy-py. Xe mbopu'aka va'ekwe hese kwéry, he'i. —Ha xe kwaapaha ndaipóri. Xe Ru mate xe kwaapaha. Ha ndaipóri ave xe Ru kwaapaha. Xe ae, ta'yry, xe anho mante aikwaapa íxupe. Aikwaa ukase ramo ambue va'e-pe, ha'e ave oikwaapa va'erã xe Ru-pe, he'i Hesu ojekwaa uka-vy íxupe kwéry.

²³Upéi ojere onhe'ẽ mbegwe hagwã gwemimbo'e kwéry-pe.

—Ovy'a ete va'erã pene rembiexa exa ohexa va'e. ²⁴Ha'e-ta voi peẽ-my: Yma gware, Nhandejáry nhe'ẽ-py omombe'u va'ety amyri kwéry, mburuvixagwasu amyri kwéry ave oipota eterei mo'ã va'ekwe ohexa pene rembiexa va'e ha ndohexáiry. Xe, Nhandejáry rembiporavo va'e xe rexase eterei mo'ã va'ekwe. Ndaxe rexáiry. Ohenduse eterei mo'ã ave va'ekwe pene remiendu endu va'e ha nohendúiry. Ha peẽ pehendú-gwi pevy'a ete voi peiko-vy, he'i Hesu gwemimbo'e kwéry-pe.

“Kiva'e tipo ahayhu-ta” oporandu Hesu-pe

(Mt 22.34-39; Mc 12.28-31)

²⁵Upéi petei judeu rekombó'ehaty omonhe'ẽ avyse mo'ã Hesu-pe. Moisés amyri rembihaikwe-rehe omombe'u meme upe va'e ha he'i Hesu-pe:

—Mba'e tipo ajapo-ta opave e'y hagwã xe rekove, mbo'eháry, he'i ombojejavy ukase mo'ã-vy.

²⁶Ha Hesu katu he'i:

—Moisés amyri ohai va'ekwe kwatia-rehe jaikwaa hagwã Nhandejáry remimombe'ukwe. Nde, eremonhe'ẽ kwatia nhe'ẽ kwaa va'e ereikwaa-ma ra'e eremombe'u jevy hagwã. Mba'e tipo eremonhe'ẽ upe-py? he'i Hesu mbo'eháry-pe oporandu-vy.

²⁷Upéi upe mbo'eha he'i jevy Hesu-pe:

—“Ejerovia katu Tupã Nhandejáry-rehe. Ehayhu íxupe nde py'apy gwive. Nde koty gwive ave ehayhu íxupe. Ne mandu'a meme hese hayhu-vy. Íxupe ehayhu mbaraete ete porã katu.” Ha “Ehayhu katu nde rapixa kwéry-pe. Nde ae nde rekoha erejehayhuha-rami ehayhu rei katu íxupe kwéry” he'i oikwaa-vy.*

²⁸—Ere porã —Hesu he'i upe mbo'eha-pe. —Upéixa erejapo ramo nde rekove opave'y va'erã, he'i Hesu íxupe.

²⁹He'i-ma ramo upe Moisés remimombe'ukwe-rehe mbo'eha onhemoheko porãse mo'ã. Upéixa-gwi oporandu jevy Hesu-pe.

—Kiva'e-rehe he'ise xéhegwi hi'agwí va'e? Kiva'e tipo ahayhu-ta? he'i.

³⁰Upéi Hesu omombe'u íxupe kiva'e jahayhu hagwã ojeporiahuvereco va'e rehegwa nhe'ẽ-rami:

—Petei kwimba'e ogwejy oho-vy Jerusalém tetã-gwi, he'i. —Ohose mo'ã Jericó tetã-my upe judeu va'e. Tape ku'a-rupi hekoha vai va'e oipyhy íxupe. Oipe'a ijao, oinupã íxupe, ogwerahapa imba'e kwéry omondapa íxugwi. Mba'eve ndohejái íxupe. Ogwerahapa imba'e kwéry íxugwi. Ha oinupã eterei-gwi haimete ojuka íxupe. Omano-tama ramo oheja íxupe tape yke-rehe.

³¹—Upe rire, oime jave tape yke-rehe ou pa'i judeu kwéry ruvíxa pa'i va'e. Ohexa-ma ramo omano-tama va'e ohasa rei joty tape yke rovái-rupi oho-vy. Noipytygwõi hasy va'e-pe.

³²—Upéixa ave ojapo pa'i pytygwõha ave. Noipytygwõi omano-tama va'e-pe. Ogwahẽ-ma ramo henda-py, ohexa-ma ramo íxupe oikupe'o hasy va'e-pe oho-vy.

³³—Upéi petei Samaria pygwa va'e ogwahẽ ou-vy tape-rupi. Samaria vvy pygwa judeu kwéry-rehe ija'e'y va'e jepe, ohexa-ma ramo omano-tama va'e-pe, oiporiahuvereco íxupe.

* 10:27 Dt 6.5; Lv 19.18

³⁴Ha'e ae jepe oipytygwō judeu va'e-pe. Oipohano íxupe. Ikutu hagwe-py omoĩ óleo, omoĩ ave vinho, ombogwera hagwā. Upéi ojokwa ave íxupe ikutu hagwe. Upe rire ohupi gwenda ári ogweraha hagwā ombohupa róga-py. Upe-py onhangareko hese.

³⁵—Ko'ẽmba-ma ramo, oho mombyry e'ỹ ngatu, upe Samaria pygwa onhomongeta mbohupa róga járy ndive. He'i: “Taha xe tape puku-rupi. Mombyryve aha-ta. Ko, mokōi plata ame'ẽ-ta nde-vy. Enhangareko porā ko hasy va'e-rehe xe rekovia enhangareko porā hese” he'i. “Ereiporupa ramo ko plata hese erenhangareko-gwi, hetave ame'ẽ-ta nde-vy. Agwahẽ jevy ramo hepyve ramo ame'ẽ jevy-ta nde-vy. Enhangareko porā hese xe rekovia” he'i mbohupa róga járy-pe, he'i Hesu arandu rehegwa nhe'ẽ mombe'u-vy.

³⁶Upéa omombe'u rire, Hesu oporandu mbo'eha-pe:

—Mbohapy ohexa upe haimete omano va'e-pe. Nde-vy ramo kiva'e tipo onhangareko hese ohayhu va'e ramigwa? he'i oporandu íxupe onhemonhe'ẽ-vy.

³⁷—Upe oiporiahuvareko íxupe va'e, he'i Hesu-pe.

—Upéixa voi, he'i Hesu. —Ha nde, nde ave tekotevẽ ereiporiahuvareko kente kwéry-pe ave, he'i Hesu upe oity vai ukase mo'ã va'e-pe.

Hesu oho Marta kwéry róga-py oipohu-vy

³⁸⁻³⁹Hesu, gwemimbo'e kwéry ndive, ogwahẽ oike-vy tetã'i-my. Ogwahẽ-ma ramo opyta Marta róga-py. Ha ikypy'y Maria oime ave hóga-py ogwapy oí-vy Hesu ha-py ohendu hagwā inhe'ẽ. Ohenduse eterei inhe'ẽ naimandu'avéi mba'eva-rehe.

⁴⁰Ha tykéry katu ojapura pura omba'apo-vy. Hemi'urã heta ojapo-vy oho ou oho ou. Upéi ou Hesu-pe ojapura-vy:

—Nerepena mo'ãi tipo xe-rehe, xe Járy? Xe kypy'y xe reja rei. Naxe pytygwōiry, he'i. —Xe ae ajapopa hagwā nhane remi'urã xe reja ou-vy naxe pytygwōséi para'e, he'i okpy'yry-rehe. —Ere íxupe xe pytygwō hagwā, he'i Hesu-pe.

⁴¹Ha Hesu he'i:

—Nahániry, he'i íxupe. —Nde erejapura eterei opamba'e-rehe. Nande py'agwapyvéi-ma, he'i íxupe. ⁴²—Nanhaikotevẽ mo'ãi heta mba'e-rehe. Peteĩ mate nhaikotevẽve va'e. Ha nde kypy'y katu imandu'a upéa-rehe. Íxupe gwarã opa e'ỹ va'erã-rehe imandu'a, he'i Hesu onhemonhe'ẽ-vy Marta-pe.

11

Koixagwa nghanomongeta Nhandejáry ndive

(Mt 6,9-15)

¹Gwemimbo'e kwéry ndive Hesu oime peteĩ henda-py. Upe jave Hesu omondo mondo onhe'ẽ Nhandejáry-pe. Onhe'ẽmba-ma rire, peteĩ indive oĩ va'e he'i íxupe ojerure-vy:

—Ore Járy, emombe'u ore-vy orombojeupi kwaa hagwā ore nhe'ẽ Nhandejáry-pe, he'i. —João araka'e omombe'u gwemimbo'e kwéry-pe. Upe va'e ramigwa ave, nde emombe'u orombojeupi kwaa hagwā ore nhe'ẽ Nhandejáry-pe, he'i ojerure-vy íxupe. Oporandu onhe'erã-rehe.

²Aipo ramo Hesu he'i omombe'u-vy:

—Koixagwa nhane nhe'ẽ Nhandejáry ndive nghanomongeta porã ramo:

“Ore Ru” ja'e-ta. “Tonhemomarangatu kena nde réry. Nde ko ore ruvixa voi. Xe ruvixa ete ko nde, te'i enterove nde-vy. ³Ha ãy katu eme'ẽ meme ore-vy ãy gwarã ore remi'urã, ore remikotevẽ ave eme'ẽ ore-vy. ⁴Ore poriahuvareko katu ore rembiapo vaikwe-rehe anive hagwā ne mandu'a hese. Ore-rehe hembiaipo vai va'ekwe-pe oroiporiahuvarekoha-rami, ore poriahuvareko katu. Ani teĩ ereheja ore rekombo'e vai anháy.”

Aipo-rami voi nghanomongeta Nhandejáry ndive, he'i íxupe kwéry.

Hemikotevẽ-rehe ojerure va'e-rami rehegwa nhe'ẽ

(Mc 11.24-25; Lc 18.1; Rm 12.12; Ef 6.18; 1 Ts 5.17)

⁵⁻⁷Upéi omombe'u íxupe kwéry arandu rehegwa nhe'ẽ. Hemikotevẽ-rehe ojerure rure va'e rehegwa nhe'ẽ-rami omombe'u:

—Nde, ne remikotevê-rehe ereho nde re'ýi róga-py. Pyhare mbyte-py ogwahê ramo ne mbohupa, ha ndaipóri ramo hemi'urã, ereho nde re'ýi róga-py erejerure-vy hemi'urã-rehe. “Eme'ê xe-vy xe mbohupa ho'u va'erã” ere erejerure-vy. “Mbohapy mbojape eme'ê xe-vy amongaru hagwã íxupe. Ogwahê kuri xe mbohupa. Ha xe, ndarekói hemi'urã ame'ê va'erã” ere nde re'ýi-pe. Oí ramo kóixa he'i va'e nde-vy: “Oronhenomba-ma. Mitã kwéry ndive oronhenoma. Okepa-ma mitã. Ndikatúí apu'ã aipe'ã hagwã ore rokê.”⁸ Oí ramo aipo-rami he'i va'e nde-vy, erejerure rure jevy va'erã. Nde re'ýi-gwi jepe nopu'ã mo'ái joty. Erejerure eterei-gwi joty opu'ã va'erã ome'ê va'erã nde-vy ne remikotevê, he'i omombe'u-vy arandu rehegwa nhe'ê.

Hesu omombe'u gwemiendu kwéry ojapo hagwã oraçãõ
(Mt 7.7-11)

⁹—Ha xe katu, xe ha'e-ta peê-my: Upéixa va'e-rami tekotevê erejerure rure Nhandejáry-pe. Ejerure rure katu íxupe, ne rembijerure ome'ê va'erã nde-vy. Eheka eka katu ndejeúpe gwarã. Ne rembieka katu erejohu va'erã. Okê onhemboty va'e oipe'a uka hagwã ombota mbota va'e-rami, pene kyre'ý katu pejapo hagwã oraçãõ. Nde-vy oipe'a-ma va'e-rami okê, ohendu va'erã Nhandejáry pene nhe'ê.¹⁰ Gwí ojerure rure va'e-pe gwive ome'ê va'erã. Gwí oheka heka va'e gwive ojohu va'erã. Gwí ombota mbota va'e-rami oha'arõ oí-vy va'e-pe gwive ojope'a va'erã.

¹¹—Nde, túvy kwéry, ereme'ê mba'e porã nde ra'y kwéry-pe. Pão-rehe ojerure ramo, pão rekoviarã avave nome'êi ita gwa'yry-pe. Upéixa ave pira-rehe ojerure ramo, pira rekoviarã avave nome'êi mbóí íxupe.¹² Yrygwasu rupi'a-rehe ojerure ramo, hekoviarã avave nome'êi japeusa íxupe.¹³ Peê kwéry pende rekoha vai ramo jepe, peme'ê kwaa joty iporã porã va'e pene mitãgwe-pe. Ha pende Ru yváy pygwa katu hekoha porã tee va'e. Upéa-gwi ome'ê kwaa porãve voi peê pejerure va'e-pe. Omohynyhê-ta nde py'a Nhe'ê Marangatu tee va'e. Ojerure va'e py'a omohynyhê-ta.

“Ndaha'úi Belzebu nhe'ê-py amosê anháy kwéry” he'i Hesu
(Mt 12.22-30; Mc 3.20-27)

¹⁴ Ha upéi katu Hesu omosê kwimba'e-gwi anháy imondo-vy. Anháy ojepota hese-gwi nainhe'êi, inhe'enge'ý va'e. Anháy osê-ma ramo íxugwi, onhe'ê jevy-ma. Upéa-rehe,
—Mba'éixa po oporombogweraha? he'i ojóupe opondera-vy Hesu-rehe.

¹⁵ Ha gwí ipa'ũ-my oí va'e he'i rei Hesu-rehe:

—Belzebu ojepota ra'e hese, Hesu-rehe, he'i. —Belzebu anháy ruvixa. Upéa-gwi Belzebu nhe'ê-py omosê anháy imondo-vy, he'i rei Hesu-rehe.

¹⁶ Ha kente ambue he'i ave íxupe:

—Orohexase ne rembiapo porã voiha. Nderejapo kwaái para'e, erejapo kwaa para'e. Yváy-gwi hexapyrã-rupi orohexase erejapo ramo, he'i ave Hesu-pe. Opu'akaha oiporu avy ukase mo'ã íxupe hikwái.

¹⁷ Ha Hesu katu oikwaa-ma ipy'a-py onhemongeta okwa-vy ramo. Upéa-rehe he'i íxupe kwéry:

—Ndaha'úi Belzebu nhe'ê-py amosê anháy kwéry, he'i. —Mburuvixa reminhangareko kwéry ndaijojái ramo, onhorairõ ramo, ndikatuvéi arã oiko porã onhondive. Upéixa ave óga pygwa kwéry ndaijojái ramo, onhorairõ ramo, ndikatuvéi arã oiko porã onhondive.

¹⁸ Ha anháy ruvixa Satanás re'ýi kwéry ave ndaijojái ramo ra'e, onhorairõ ramo ra'e ave, ndikatuvéi arã ra'e oiko porã ra'e anhaygwasu gwe'ýi ndive. Ndoikovéi arã ra'e gwe'ýi kwéry-pe mburuvixa. Aipo ramo omosê arã mo'ã ra'e avave-gwi anhaygwasu pe anháy ruvixa va'e réry-py voi, he'i. —Ere rei kuri xe-rehe, “Belzebu nhe'ê-py omosê anháy imondo-vy” ere rei kuri xe-rehe.

¹⁹ —Ha pende re'ýi kwéry omosê ave anháy imondo-vy. Ma'erã-gwi nderéiry “Belzebu nhe'ê-py omosê anháy imondo-vy nhande re'ýi kwéry”? Upéa ndere mo'ái nde re'ýi-rehe. Nde re'ýi kwéry rembiapokwe-rehe enterove oikwaa ne akã tavyha, ne rembiapo vaiha ave.

²⁰—Ndaha'úi Belzebu nhe'ê-py xe rembiapo. Nhandejáry nhe'ê-py voi amosê mosê imondo-vy anháy kwéry, he'i. —Aipo ramo, xe rekoha-rehe pehexa kwaa ramo ra'e, “Oiko-ma nipo Nhandejáry nhande ruvixa ramo ra'e” peje arã ra'e xe-rehe, he'i.

²¹ Imbaraete va'e rehegwa nhe'ê-rami omombe'u arandu nhe'ê. Anháy-rehe opu'akaveha omombe'u.

—Omonda va'e ndoikéiry imbarate va'e róga-py. Onhangareko voi omba'e-rehe.

²² Ogwahê-ma ramo imbarateve va'e ipu'aka va'erã hese, oipe'apa-ma va'erã íxugwi. Inhemombaraeteha, imba'e kwéry ogwerahapa arã íxugwi omboja'o ja'o arã gwapixa-pe ime'ê-vy.

²³—Xe ndive omba'apo e'y va'e, ojoko xe rembiapo. Xe renda-py ogwenogwa'ê e'y va'e, xe renda-gwi omondo mombyry omosarambi-vy, he'i Hesu onhemombe'u-vy.

Anháy ou jevy gwendagwe-py

(Mt 12.43-45)

²⁴ Upéi he'i jevy:

—Ojepota va'ekwe hese osê rire, ogwata gwata jevy-ma oiko-vy anháy. Opytu'u renda-py oheka eka-vy ojehasa asa y e'yha renda-rupi. Ha ndotopái gwenagwã. “Xe rendagwe-py jevy aha-ta, asê hagwe-py aha jevy-ta” he'i ojeupe. ²⁵ Ogwahê jevy-ma ramo oheka gwendagwe. Omoatyrõmba-ma opy'a kwimba'e. Ndaiporivéi anháy ipy'a-py. Gwendagwe oheka jevy: “Iporã voi xe rendagwe” he'i, “Opyta rei” he'i ojeupe kwimba'e py'a-rehe. “Óga járy oitypei porã rire, omoí porã jevy imba'e kwéry omopotí-vy. Upéixa upe óga járy-rami omopotí opy'a kwimba'e ra'e. Opyta rei xe rendagwe” he'i anháy ojeupe. ²⁶ Upe-ma ramo, oho oheka oírurã kwéry. Sete anháy ojohu ivaive va'e ojehegwí. Ogweru, omoinge jevy gwendagwe-py. Oike rire pe kwimba'e reko ivai voi. Are va'ekwe pe kwimba'e petei anháy ojepota hese ramo, omboheko vai voi íxupe. Ha ãy katu ombohekoha vaive ive, he'i Hesu omombe'u-vy.

Ovy'a ete va'e

²⁷ Upe he'i jave petei kunha omboaty va'e pa'ũ-gwi osapukái:

—Tovy'a katu nde sy, he'i, —ne mokambuhare, ne moingohare. Tovy'a voi katu he'i omboete-vy íxupe.

²⁸ Hesu katu:

—Tovy'ave katu Nhandejáry nhe'ê renduha inhe'ê-rupi ogwata va'e tovy'ave xe sy-gwi, he'i.

“Ipu'aka ete tee va'e Nhandejáry” he'i Hesu

(Mt 12.38-42)

²⁹ Ha upéi katu Hesu omombe'u jevy ojogweroaty va'e-pe:

—Áy gwa heko vai voi Nhandejáry-rehe. Inhe'ê ndojaposéi-gwi, ndojeroviaséi ave xe-rehe. “Ne rembiaporã avave ndohexái vyteri va'e ramigwa erejapo ramo, oroikwaa arã mba'exagwa nde” ere rei xe-vy. Upéa erehexa hagwã ndajapo mo'ái.

—Pene mandu'a katu myamyri Jonas rehegwa nhe'ê-rehe. ³⁰ Yma va'ekwe Nhandejáry omondo myamyri Jonas-pe oho hagwã Nínive tetã-my. Upe tetã mygwa kwéry oikwaa hagwã ipu'aka tee va'e voi Nhandejáry, Jonas oho upe-py. Ha xe ave, Jonas ramigwa xe mbou ave Nhandejáry pende ha-py. Xe Nhande Ryke'y tee va'e voi xe mbou áygwa oikwaa porã hagwã ipu'aka teeha Nhandejáry.

³¹ —Ha'e-ta ave peê-my: Gwenonde-py Nhandejáry ombojogweroaty va'erã kente kwéry petei tei ogwereco hagwã hembiapokwe-rehe. Upe-py ko'áygwa onhembo'y ramo ojekwaa hagwã hembiapokwe. Áygwa onhembo'y jave, yma gware kunha mburuvixa Sabá tetã mygwa onhembo'y ave omombe'u hagwã pene rembiapo vaiha.

—Upe kunha amyri ou va'ekwe amo mombyry ete ko yvy apy gwive ou ohendu hagwã mburuvixagwasu Salomão amyri. Ha xe aiko ko'a-py pene pa'ũ-my. Xe tuvixave myamyri Salomão-gwi. Aikwaave íxugwi ha napehenduséi xe nhe'ê. Upe pene rembiapo vaiha-rehe omombe'u va'erã upe kunha. ³² Ha yma gware Nínive pygwa kwéry opu'ã va'erã

onhembo'y. Áygywa omombe'u-vy onhembo'y va'erã Nhandejáry renonde-py. Pene rembiapo vaiha omombe'u va'erã. Ha'e kwéry ohendu-ma va'ekwe Jonas remimbo'e. Inhe'ẽ ohendu-gwi ogweroava gwekoha va'ekwe. Ojerovia-ma va'ekwe Nhandejáry-rehe. Ha xe aiko ko'a-py. Xe tuvixave myamyri Jonas-gwi, ha napehendu mo'ãi xe nhe'ẽ, he'i onhemombe'u-vy.

Tataendy rehegwa nhe'ẽ
(Mt 5.15; 6.22-23)

³³ Upeí he'i jevy ojogweroaty va'e-pe:

—Nanhamoendýi tataendy nhanhomi hagwã. Nanhamoíry mba'e ryrú gwy-py. Tataendy nhamoendy nhamoí hagwã hendaty-py ohesape porã hagwã oíke va'e-pe.

³⁴ —Upéixa ave nhande resa. Hesã porã ramo nhande resa, jahexa porã. Hembipe porã-rupi jagwata porã. Upéixa nde py'a porã ramo, Nhandejáry arandu ohesape nde py'a-py hemimbota-rupi ereiko hagwã. Ha nde resa hasy ramo, nde resa ivai ramo katu, nande resapysovéi-ma. Ndereiko porãvéi-ma. Pytũ-my vérami rei ereiko. Opyta rei ndéhegwi Nhandejáry arandu.

³⁵ —Erepara katu nde py'a reko-rehe. Nande py'a porã ramo, pytũ-my rei vérami ereiko va'erã. ³⁶ Nde py'a porã meme ramo, nde py'a vai e'y reheve erehexa porã va'erã. Tataendy nde resape porãha-rami erehexa porã va'erã, he'i onhemonhe'ẽ-vy upe pygwa kwéry-pe.

Hesu onhemonhe'ẽ fariseu kwéry-pe, tekoha mbo'eha kwéry-pe ave
(Mt 23.1-36; Mc 12.38-40)

³⁷ Onhemonhe'ẽmba ríre Hesu, peteí fariseu va'e he'i íxupe:

—Jaha katu xe róga-py jakaru hagwã, he'i Hesu-pe.

Upéixa-gwi oho indive. Ogwahẽ-ma ramo ogwapy okaru hagwã. ³⁸ Ha Hesu ndoje-pohéiry okaru hagwã judeu kwéry ojapoha-rami. Upéa-rehe upe fariseu he'i ojéupe: “Ma'erã-gwi ndojepohéiry Hesu? Nhande re'ýi kwéry ojapoha-rami ndoikóiry” he'i opy'apy-py opondera-vy hese.

³⁹⁻⁴¹ Upéi Hesu he'i íxupe:

—Peẽ fariseu kwéry erejohéi ramo copo, nha'ẽ ave, ijape meme rei mate erejohéi. Nderejohéiry ipy. Jahexa ramo, “Omopotí porã poku” ja'e mo'ã. Ha neremopotí porã joty ra'e. Ipy iky'a vyteri. Upéixa ave peẽ, nde py'a ky'a meme ne rembiapo vai-gwi. Pendejúpe gwarã peipotave tave. Upéixa ave eremonda monda-py ereiko, nane arandu porã. Ndereikwaái para'e ijajepapoha ipy'a ave ojapo va'ekwe. Ha'e-ta ko pe'ẽ-my: Ejepy'a me'ẽ kena Nhandejáry-pe. Upe ríre nde py'a potíha rexa uka-vy eme'ẽ iporiahu va'e-pe ne remime'erã.

⁴² —Apomboasy voi peẽ-my, fariseu kwéry. Pehasa asy va'erã peẽ. Nhande re'ýi ojapoha-rami pejapo meme ha Nhandejáry remimbota tee nderejapói. Pene mandu'a porã peme'ẽ hagwã pene mba'e Nhandejáry-pe, ha napene mandu'ái ae peiko porã hagwã indive, kente kwéry ndive ave. Ne rembiapo porã-rehe erejerovia eterei. Eremboaty mirí mirí ne mba'e kwéry dez oí va'e meme eremboaty. Ha upe ríre ereipe'a dez-gwi peteí ereme'ẽ va'erã Nhandejáry-pe. Hembyre opyta va'erã nde-vy. Mixí mixí va'e gwive ereme'ẽ Nhandejáry-pe. Ereme'ẽ itái va'e, pohã ka'agwy pygwa ave, temitygwe nhane remimbojehe'a va'e ereme'ẽ ave. Upéa erejapo ramo iporã. Nhande re'ýi ojapoha-rami erejapo upe va'e mba'e ereme'ẽ meme hagwã Nhandejáry-pe. Oíve joty erejapo va'erã íxupe. Tapejogwereco porã katu. Tapehayhu rei katu Nhandejáry-pe. Upéixa mixíve va'e-rehe pende resarái e'yha-rami ave, pepena katu tuvixave va'e-rehe, he'i onhemboasy-vy fariseu kwéry-rehe.

⁴³ —Apomboasy voi peẽ-my, fariseu kwéry. Pehasa asy va'erã peẽ penhemboetese rei-gwi, he'i. —Ojeporahéi haty-rupi ereho penhemboetese rei hagwã. Upéixa-gwi eregwapyse mburuvixa kwéry pa'ũ-my ha peho ramo mba'ejogwa haty-py ereipota enteroe ne mboete rei.

⁴⁴ —Apomboasy voi peẽ-my, pemohembiapo vai uka kente kwéry-pe. Upéa-rehe erehasa asy va'erã, he'i. —Peẽ peikwaa niporã voi judeu kwéry ogwata hetekwe renda ári. Ha oí omano va'ekwe retekwe omoí rei itagwy-py hendaty e'y-py omoí. Upéi oikwaa e'y-gwi

judeu ogwata arā hi'ári. Ndoikwaái-gwi ojapo vai arā. Ha peē fariseu kwéry upéixa ave penhomi kente kwéry-gwi Nhandejáry nhe'ē hi'arandurāgwe ha upéixa pemohembiapo vai uka íxupe kwéry, he'i Hesu onhemonhe'ē-vy.

⁴⁵Upéa-rehe he'i íxupe peteī teko mbo'eha:

—Mbo'eháry, upéixa ramo ere vai ore-rehe ave, erenhe'ēngi arā mo'ā ore-rehe, he'i Hesu-pe ndovy'áiry-gwi. Ndojohu porāi inhe'ēgwe.

⁴⁶Ha Hesu katu he'i:

—Apomboasy voi peē-my peē Moisés remimombe'ukwe mbo'eha kwéry, pehasa asy-ta ave. Pene rembiapo vai kente kwéry-rehe. Pemombe'u ramo Nhandejáry nhe'ē, Moisés amyri ohai va'ekwe, hasyve nhe'ē pemombe'u. “Tapeiko ko nhe'ē-rupi” peje rei pene renduha kwéry-pe. Mba'e ipohíy eterei ogweraha mo'ā haggwāixa pene remimombe'ukwe oiko íxupe kwéry. Ha, “Tapeiko ko nhe'ē-rupi” peje hese. Peē ae ndereiko mo'āi va'erā upe ne remimombe'ukwe-rupi.

⁴⁷—Pehasa asy-ta ave pene rembiapo vaikwe-rehe. Myamyri kwéry pene ramoigwasu kwéry ojuka meme va'ekwe Nhandejáry nhe'ē-py omombe'u va'ety-pe. Ha peē katu pemopu'ā ita'i pemoi porā haggwā ijukapyre rendagwe-py. ⁴⁸Upéa-rupi pemoiru joty hembiao vai va'e kwéry-pe. “Hembiao porā oiko-vy va'ekwe nhane ramoigwasu” peje joty pemombe'u-vy. Nhandejáry nhe'ē omombe'u va'ety-pe ojuka va'ekwe, ha āy katu peē pejohu porā upe hembiao vaikwe.

⁴⁹—Upéa-rehe Nhandejáry, inharandu tee va'e, he'i va'ekwe:

“Amondo-ta íxupe kwéry xe nhe'ē-py omombe'u va'ety, xe nhe'ē mosarambihaty ave. Oī arā gwī pene rembijuka ukarā. Oī ave arā gwī pene remimobhasa asyrā” he'i va'ekwe Nhandejáry omombe'u-vy, he'i Hesu onhemonhe'ē-vy íxupe kwéry.

⁵⁰⁻⁵¹—Ha ha'e-ta peē-my, he'i. —Upéa he'i va'ekwe Nhandejáry omobhasa asy haggwā āygya-pe ave. Ymagware inhe'ē-py omombe'u va'ety kwéry jukahare-rehe omobhasa asy-ta āygya-pe ave.

—Ymagware Abel amyri gwive Zacarias amyri peve ojuka meme va'ekwe Nhandejáry nhe'ē mombe'uhaty-pe. Zacarias amyri-pe ojuka Nhandejáry roka-py. Mymba ohapyhaty renda ypy-py onhegwahē e'y haty renonde-py ipa'ū-my oime jave Zacarias amyri, ojuka va'ekwe ave íxupe. Ha āygya, “Iporā rei” he'i mo'ā ymagware rembiapokwe-rehe. Upéixa-gwi, ymagware rembiapo vaikwe ojohu porā-gwi omobhasa asy-ta ave āygya kwéry-pe Nhandejáry.

⁵²—Apomboasy voi peē-my, peē Moisés remimombe'ukwe mbo'eha kwéry. Pevy'are'y va'erā. Naiporāi pende rekoha. Pemonhe'ē rei rei meme Nhandejáry nhe'ē. Ndaperovi-aséi íxupe. Ha hese ojeroviasa va'e-pe ndapehejái ojerovia ave hese peiko-vy. Upéa-rehe pehasa asy-ta voi, he'i Hesu Moisés amyri remimombe'ukwe omombe'u va'e kwéry-pe onhe'ē-vy.

⁵³He'i rire, Hesu osē oho-vy upe fariseu róga-gwi. Osē rire judeu rekombo'ehaty kwéry, fariseu kwéry ave opyta ipoxy hese. Ombojevvy jevy inhe'ē. Oporandu opaixagwa-rehe omonhe'ē avy ukase mo'ā haggwā hikkwái. Oheka heka rei ndotopái hembiao vaikwe. ⁵⁴Inhe'ē-rehe, hembiao-rehe hembiao vai ombojase mo'ā hese. Ha ndikatúí omboja rei hese. Hembiao porā mate Hesu.

12

*“Pene mbotavysa fariseu kwéry” he'i Hesu kente kwéry-pe
(Mt 10.26-33)*

¹Upe jave ojogweroaty aty heta kente. Heta eterei-gwi onhomoanhamba, opyrumba ojoehe. Ha Hesu katu gwemimbo'e kwéry-pe ranhe he'i:

—Ani kena ererovia rei fariseu nhe'ē. Pene mbotavysa. Mbojape mbovuha nhanhomiha-rami opy'a ky'aha omo'ā kwaa, he'i. —Ani katu upéixa ereiko teī.

²Omokanhvy va'ekwe gwive ojehexa uka jevy joty va'erā. Nhane reminhomigwe gwive ojekwaapa joty va'erā. ³Opa ne remimombe'ukwe nhemi ha-py ere va'ekwe, atýra-py

ohendu endu va'erã. Ere mbegwe mbegwe va'ekwe nde róga-py omombe'u hatã hatã jevy va'erã. Enterove remiendurã-rupi omombe'u hatã hatã va'erã. Fariseu rekoha-rami ani ereiko teĩ, he'i Hesu ohekombo'e-vy gwemimbo'e kwéry-pe.

⁴He'i ave Hesu:

—Peẽ, xe rembiayhu va'e kwéry, ani erekyhyje rei teĩ. Oĩ nhande rete jukaharã. Nhane nhe'ëgwe-rehe ae ndaipu'akáiry voi. Ani erekyhyje rei teĩ íxugwi. ⁵Tupã Nhandejáry tee-gwi ae ennhemokirirĩ ennhemomirĩ va'erã. Ha'e oiipe'a va'erã ndéhegwi nde rekove. Ha upe rire oikwaa mamo pa ogwahẽ-ta ne nhe'ëgwe. Ha'e ipu'aka tee va'e voi. Oikwaa ne mondo hagwã anháy renda-py. Upe nde rekove oiipe'a kwaa va'e-gwi mate ennhemomirĩ va'erã.

⁶⁻⁷—Ani erekyhyje teĩ. Nhandejáry pene nhangarekoha voi. Ne mandu'a katu manimbe-rehe. Mixĩ eterei-gwi vyypóry nopenáiry hese. Nhavende ramo, mokõi-rehe mixĩmi nhagana arã. Ndovaléi voi vyypóry-pe. Nhandejáry ae onhangareko hese kwéry. Hymba tee voi manimbe. Omano ramo peteĩ, ha'e oikwaa gwymba omano ramoha hese kwéry opena-gwi. Ha nde-rehe openave gwembiayhu tee-gwi. Oikwaa voi nde rehegwa. Ne akã ragwe jepe peteĩ teĩ oipapapa-ma gwembiayhu tee-gwi. Upéixa-gwi ani erekyhyje teĩ va'erã avave-gwi.

⁸—Ha xe katu, he'i ave —xe Nhande Ryke'y tee va'e. Ere ramo nde rapixa-pe: “Hesu reroviahá voi ko xe” xe ave ha'e arã Nhandejáry rembigwái yváy pygwa kwéry-pe: “Xe rembiayhu voi upe va'e” ha'e arã nde-rehe. ⁹Ha ere ramo “Xe ndajerovia mo'ái Hesu-rehe. Xe ndaiko mo'áiry Hesu rembigwái ramo” ere ramo, xe ave ha'e arã Nhandejáry rembigwái yváy pygwa kwéry-pe: “Ndaha'éi voi xe re'yí upe va'e” ha'e arã nde-rehe.

¹⁰—Xe ko Nhande Ryke'y tee va'e. Ne rembiapo vai ramo, xe-rehe enhe'ë rei rei ramo jepe, omboyke-ta joty ndéhegwi Nhandejáry ne rembiapo vaikwe. Nhandejáry Nhe'ë Marangatu tee va'e-rehe ae enhe'ë vai vai ramo nomboyke mo'ávái-ta ndéhegwi ne rembiapo vaikwe Nhandejáry. Nande py'a potĩ mo'ávái opa e'y reheve.

¹¹—Upéixa-gwi ou ramo ipoxy va'e nde pyhy nde reraha-vy, ani erejapura nde py'apy-py. Nde reraha ramo ojeporahéi haty-py, ani erejapura teĩ. Nde reraha ramo mburuvixa renonde-py, mburuvixagwasu renonde-py ave, ani erejapura teĩ ne nhe'ërã-rehe. “Mba'e tipo ha'e va'erã? Mba'éixa tipo anhe'ë-ta?” aipo-rami ani ere rei teĩ nde py'apy-py erehovy. ¹²Nhe'ë Marangatu tee va'e ae ne nonhe'ë uka va'erã. Ipoxy va'e nde reraha jave, Nhe'ë Marangatu tee va'e ome'ë va'erã nde-vy ne nhe'ërã, he'i Hesu gwemimondo kwéry-pe pono ikyhyje oho-vy.*

Hesu onhemonhe'ë omba'e reta-rehe opena eterei va'e-pe

¹³Ha ojogweroaty va'e pa'ũ-gwi peteĩ he'i Hesu-pe:

—Mbo'eháry, emombe'u xe ryke'y-pe omboja'o ja'o hagwã ore ru amyri mba'ekwe. Xe ave aipota xe mba'erã, he'i Hesu-pe.

¹⁴Aipo ramo Hesu he'i íxupe:

—Nahániry. Ndajúiry mba'ekwe amboja'o hagwã. Mba'eve namboja'o ukáiry. Ndaha'éi upearã xe aju.

¹⁵Upéi he'i ave íxupe kwéry:

—Pejeapysaka katu ko xe nhe'ë-rehe. Xáke, ani ereipota rei rei pende rapixa mba'e. Nhane mba'e reta reta rei ndaha'éi nhande rekoerã tee. Mba'eve ndererekói ramo jepe, nde py'a potĩ ramo ereiko porã va'erã, he'i onhemonhe'ë-vy íxupe kwéry.

¹⁶Upéi arandu nhe'ë omombe'u ojogweroaty va'e kwéry-pe. Imba'e reta va'e rehegwa-rami omombe'u gwekorã:

—Oime araka'e peteĩ imba'e reta va'e, ijyvy porã va'e. Ijyvy porã-gwi nipo opu'ã porã íxupe hemitygwe ra'e. Heta eterei hemitygwe. ¹⁷Upéixa-gwi he'i opy'apy-py: “Upe xe remitygwe ryrurã mixĩ eterei. Heta eterei xe remitygwe. Ndajái arã xe remitygwe ryrupy. Mba'e tipo ajapo-ta?” he'i opy'apy-py. ¹⁸Upéi he'i ave, “Aikwaa-ma ajapo va'erã. Aitypa uka-ta upe xe remitygwe rryru kwéry. Ambotuvixave-ta xe remitygwe ryrurã.

* 12:12 Mt 10.19-20; Mc 13.11; Lc 21.14-15

Ipyahu va'e-py ambovyru-ta xe remitȳgwe, xe mba'e reta ave" he'i opy'apy-py. ¹⁹“Avy'a va'erā voi ko xe” he'i. “Xe mba'e reta reta xe mbovy'a va'erā” he'i. “Namba'apovéi arā aiko-vy, heta eterei-ma xe mba'e kwéry-gwi. Naxe kane'ovéi-ma va'erā” he'i. “Apytu'u-ta. Akaru-ta. Opaixagwa ajapo-ta anhembovy'a hagwā” he'i upe imba'e reta va'e opy'apy-py, he'i Hesu omombe'u-vy arandu rehegwa nhe'ē. ²⁰—Ha upéixa oiko jave upe imba'e reta va'e, Nhandejáry he'i íxupe: “Nde, nane arandu porāi voi. Ne rembiereko heta ndovalevéi va'erā nde-vy. Ko pyhare eremano ete-ma va'erā. Ne mba'ekwe opyta rei-ta. Nde rekoviare mate oiporu-ta. Ndovaléi voi arā nde-vy ne mba'e reta” he'i Nhandejáry upe omba'e reta-rehe opena eterei va'e-pe, he'i Hesu omombe'u-vy arandu rehegwa nhe'ē.

²¹Upéi he'i ave omombe'u-vy íxupe kwéry:

—Upéixa voi omba'e reta-rehe opena eterei va'e. Omba'e reta reta ojúepe gwarā-rehe mate opena. Ha Nhandejáry remimbota-rehe nopenáiry. Ojúepe gwarā nonhongatu mo'ái yváy-py.

Nhandejáry onhangareko kente kwéry-rehe

(Mt 6.25-34)

²²Upéi omombe'u gwemimbo'e kwéry-pe imba'e-rehe:

—Ani erejep'y apy teĩ ne remikotevêrā-rehe. Anive ereporandu randu nde py'apy-py upéa-rehe. “Ma'erā tipo ajapo-ta xe remi'urā-rehe? Mba'éixa tipo ajapo-ta xe aorā-rehe?” nipurāi aipo ere erejep'y apy eterei ereiko-vy. ²³Ndaha'éi nhane rembi'u-rehe, nhande aorehe jaiko porā Nhandejáry ndive.

²⁴—Ne mandu'a porā katu xopígwasu-rehe. Onhemitȳ e'ỹ va'e upéa, omono'õ e'ỹ va'e ave, ojapo e'ỹ va'e gwembi'u renagwā va'e ave, nomoingatúí gwemi'urā. Nhandejáry ae omongaru íxupe kwéry. Ha kente katu iporāve gwyrā kwéry-gwi. Iporāve-gwi onhangareko porāve-ta hese kwéry Nhandejáry.

²⁵⁻²⁶—Erejep'y apy eterei ne remikotevê-rehe. Nde ae nande pu'akái ndéjehe. Nde ae ni peteĩ áry nderehupitȳ kwaáiry nde tujave hagwā. Nde ae nande pu'akái ndéjehe. Upéixa ramo anive erejep'y apy teĩ ne remikotevê-rehe, he'i Hesu omombe'u-vy.

²⁷Upéi he'i ave:

—Tapene mandu'a katu yvoty nhu mygwa-rehe, okakwaa rei va'e-rehe. Nomba'apói, noipogwáiry. Iporā rei oĩ-vy. Ha'e-ta katu xe, Mburuvixagwasu Salomão amyri ao iporā ete voi va'ekwe. Ha ijao-gwi iporāve voi yvoty. ²⁸Ndahi'aréi va'e voi yvoty. Áy katu oĩ, ko'ē ramo ipirupa jevy-ma va'erā, ohapy jevy-ma va'erā, ndaiporivéi jevy-ma va'erā. Nhandejáry mba'e voi yvoty. Onhangareko porā omba'e-rehe. Ha nde katu, nde ave Nhandejáry remimoingo va'e voi nde. Yvoty-gwi nde tuvixave íxupe. Upéixa-gwi onhangareko porāve ave nde-rehe Nhandejáry. Ma'erā nderejeroviái hese? Ejerovia ete katu hese nde py'agwapy hagwā.

²⁹—Ani erejapura teĩ ani erevy'are'ỹ teĩ ne remikotevê-rehe. Ere rei rei nde py'a-py, “Mba'e tipo ajapo-ta ajohu hagwā xe remi'urā, xe ay'u hagwā?” ere rei nde py'apy-py.

—Ani erejapura eterei teĩ ne remikotevê-rehe. ³⁰Entéro kente, Nhandejáry-rehe ojerovia e'ỹ va'e gwive upéa ojapo. Ha nde, ani erejapo ha'eixagwa. Nhandejáry, nde Ru yváy pygwa oikwaa-ma ne remikotevê. ³¹Nde katu epena meme hese. Ha'e ne ruvixarā. Hemimbota-rehe mate opena. Upéixa erejapo meme ramo, ha'e nde rexakwaa porā-ta. Ome'ē-ta nde-vy ne remikotevê va'e.

³²—Upéixa-gwi peẽ, xe rembiayhu kwéry ani pejapura rei teĩ. Napende retái ramo jepe, ani pekyhyje rei teĩ. Nhandejáry Nhande Ru yváy pygwa pende poravo-ma va'ekwe peiko hagwā hendive. Pemoirū-ma va'erā íxupe pene ruvixarā. ³³⁻³⁴Upéixa-gwi anive ne rakate'ỹ eterei ne mba'e kwéry-rehe. Iporāve ne rakate'ỹ Nhandejáry remimbota-rehe nde rekoha porārā hagwā. Upéa-rehe evendepa ne mba'e kwéry hepykwe ereme'ē hagwā iporiahu va'e kwéry-pe. Upéixa erejapo nde rekoha porāve hagwā yváy-py. Hyru-py eremono'õ va'e, ne mba'e, ndohói arā ne ndive yváy-py. Ndaha'éi upe pygwarā ne mba'e ko yvy pygwa va'e. Nhandejáry remimbota-rupi ereiko ramo ae, nde rekoha porārā erehupitȳ arā yváy-py. Nde rekoha porārā hemimonda e'ỹ va'e, hembi'u e'ỹ va'e ave nde ao raso rembi'u

e'ŷ va'e ave nde rekoha porārā. Ne rakate'ŷha-rehe erepena pena va'erā. Erepytase arā indive. Upéixa-gwi iporāve nde-vy ne rakate'ŷ Nhandejáry remimbota-rehe, he'i Hesu gwemimbo'e kwéry-pe.*

Mburuvixa-pe oha'arō va'e rehegwa nhe'ē oiporu Hesu

(Mt 24.43-44; 25.1-13; Mc 13.35-37; Lc 21.34-35)

³⁵⁻³⁷Upéi he'i jevy Hesu:

—Xe ra'arō katu xe Nhande Ryke'y tee va'e agwahēha óra. Amombe'u-ta peē-my mba'éixa pa tekotevē xe ra'arō mburuvixa-pe oha'arō va'e rehegwa nhe'ē-rami.

—Oí va'ekwe imba'e reta va'e. Oho omenda va'e karugwasu ha-py. Ha hembigwái kwéry oha'arō arō íxupe ou jevy hagwā. Oku'a jopyha ndoipe'áiry. Tataendy nombogwéry. Oha'arō tee oiko-vy. Omonhenduha oha'arō. Ogwahēhaty oha'arō sapy'a ogwahē ramogwarā oipe'a hagwā okē.

—Ha'e-ta katu peē-my: Ovy'a voi va'erā upe ijáry-rehe oha'arō va'e kwéry. Ogwahē ramo ijáry, ogwereco porā va'erā gwí gwembigwái ndokéiry va'e-pe.

³⁸⁻⁴⁰—Avave ndoikwaái igwahē hagwā áry. Pyhare pyte-py para'e ogwahē-ta, haimete-ma ko'ē jave para'e ogwahē-ta. Oha'arō arō joty oiko-vy hembigwái. Ogwahē ramo ijáry ndokéi va'e ovy'a va'erā. Ijáry joty ohexakwaa va'erā upe gwembigwái ha'arōha-pe.

—Upe hembigwái ha'arōháixa peē katu tapeiko xe ra'arō-vy, he'i Hesu. —Xe Nhande Ryke'y tee va'e aju jevy-ta. Avave ndoikwaái agwahē hagwā áry. Xe ra'arō arō-vy katu peiko kena.

—Amombe'u jevy-ta mba'éixa pa tekotevē xe ra'arō óga járy nhe'ē-rami, he'i Hesu.

—Óga járy oikwaa ramo ra'e imonda va'e ogwahē ramoha áry ndokéi arā ra'e ha'arō oiko-vy pono oike imondase va'e.

—Upéixa ave peē xe ra'arō-vy peiko katu. Nderekwaái arā xe agwahē hagwā áry. Tane mandu'a meme katu xe-rehe. “Ogwahē-tama para'e” ere xe-rehe. Upéixa xe ra'arō, he'i Hesu gwembiayhu kwéry-pe.*

Tembigwái gwerekwa rekovia opyta va'e rehegwa nhe'ē

⁴¹Upéi Pedro he'i Hesu-pe oporandu-vy:

—Kiva'e-pe eremombe'u kuri arandu rehegwa nhe'ē, ore Járy? Ore-vy gwarā para'e, entéro va'e pegwarā para'e? he'i oporandu-vy. —Ore, ndoroikwaáiry, he'i.

⁴²—Amombe'u-ta peē-my tembigwái rekoha rehegwa nhe'ē-rami peha'arō hagwā peiko-vy, he'i. —Kiva'e po hekoha porā va'e, kiva'e po hekoha vai ave amombe'u-ta peē-my, he'i.

—Oí va'ekwe kwimba'e heta hembigwái va'e. Mombyry ohose-gwi he'i gwembigwái hi'arandu va'e-pe: “Xe mba'e-rehe enhangareko katu. Xe rembigwái kwéry-rehe eremanda ave. Eremboja'o ja'o hagwā ereme'ē-vy hemi'urā kwéry íxupe gwarā” he'i. Upéa he'i rire oho oheja gwekoviarā ijáry.

⁴³—Ogwahē jevy-ma ramo otopa jevy gwembigwái-pe. Ovy'a voi arā upe ijáry nhe'ē-rupi omanda porā va'e ogwahē jevy-ma ramo herekwa.

⁴⁴—Anhetegwa amombe'u-ta peē-my: Upe herekwa va'e ovy'a eterei va'erā gwembigwái ndive. Ovy'a-gwi he'i va'erā íxupe: “Iporā voi ne rembiapokwe. Avy'a voi ne rembiapokwe-rehe. Upéixa-gwi xe areko va'e-rehe enhangareko meme-ta.” Aipo he'i arā ijáry gwembigwái porā va'e-pe.

⁴⁵—Ha ndovy'a mo'ái va'erā upe ijáry nhe'ē-rupi ndoikói va'e, omanda vai va'e. Upéa, ndoúí jave ijáry, he'i rei arā nipo opy'apy-py “Hi'are-ta voi xe rerekwa.” Ha upéa-rehe nahembiajo porávéi-ma. Tembiapo vai vai ojapo. Onhembosarái hembigwái ambue kwéry-rehe, kwimba'e-pe kunha-pe ave oinupā nupā oiko-vy. Okaru karu oiko-vy. Oka'u ka'u ave oiko-vy.

* 12:33-34 Mt 6.19-21

* 12:38-40 Mt 24.42-44; Mc 13.32-37; Lc 21.34-36

⁴⁶—Ha hembiaipo vai jave, ojáry-rehe naimandu'avéi jave, ogwahê jevy va'erã ijáry. Ogwereko asy asy ete uka va'erã gwembigwái hembiaipo vaikwe-rehe. Omoí uka va'erã upe gwembigwái hembiaipo vai va'e kwéry ha-py. Nhandejáry-rehe ndojeroviái va'e ha-py omondo arã íxupe.

⁴⁷—Ha'e-ta ave peê-my: Upe ijáry remimbota oikwaa-ma jave ojapo e'ý va'e ohasa asy asy va'erã. Gwembiaipo porã e'ý-rehe ohasa asy va'erã. Ndojaposéi-gwi ndojapói. ⁴⁸Ha upe ijáry remimbota ndoikwaái va'e hembiaipo vai-rehe jepe ndohasa asy etéiry va'erã joty.

—Heta ome'ê me'ê rire nhande-vy, hekovia heta ojerure rure ave arã. Hetave tave ome'ê rire, hetave tave ave ojerure rure arã nhande-vy.

“Tata-rami aru xe pu'aka kente kwéry-rehe” he'i Hesu

(Mt 10.34-36)

⁴⁹Upéi he'i jevy Hesu:

—Aju va'ekwe ko yvy-py. Tata-rami aru xe pu'aka kente kwéry-rehe. Ambojepotase eterei va'e vérami aiko-vy pya'e hendy porã hagwã. ⁵⁰Tekotevê ae ahasa asy xe aiko-vy ou e'ý mboyyve. Ajepy'apy hese aha'arõ-vy. Ahasa asy ha'arõ-vy.

⁵¹—Pende py'a-py penhemongeta rei xe-rehe. “Ou ombopy'agwapy enterove-pe peteíxa oiko hagwã hikwái. Ou ponove ndajia'éi ojóhe ou-vy” peje rei xe-rehe peiko-vy. Nda'ha'éiry upéa-rehe xe aju. Aju kente kwéry amboja'o-vy. Ndaijojavéi voi va'erã kente kwéry xe-rehe ha-py. Napeteixáiry voi va'erã. ⁵²Áy gwive he'ýi kwéry, peteí óga gwigwa napeteixavéi va'erã xe moirũ va'e ipa'ũ-my oí-gwi. Ndaijojavéiry arã gwe'ýi kwéry ndive upéixa-gwi. ⁵³Túvy ija'e'ý va'erã gwa'ýry-rehe ha ta'ýry gwu-rehe. Kunha ija'e'ý va'erã omemby kunha-rehe ha imemby kunha osy-rehe. Kunha ija'e'ý va'erã ome sy-rehe. Imena sy ija'e'ý va'erã omemby rembireko-rehe ave. Napeteixái ojohayhu va'erã xe-rehe ha-py, he'i onhemombe'u-vy Hesu.

“Áry-rehe ne arandu voi” he'i Hesu

(Mt 16.2-3; 5.25-26)

⁵⁴He'i ave gwenonde-py ijaty okwa va'e-pe:

—Ygwasu-gwi ou ramo arai oky hagwã, “Oky-tama nhande-vy” peje ramo, oky voi. ⁵⁵“Yvy aku-gwi ou yvytu haku vai hagwã nhande-vy” peje ave. Haku vai voi ave. ⁵⁶Arai erehexa ramo ereikwaa-ma oky hagwã. Yvytu aku nde pete ramo ereikwaa-ma haku vai-ta ave. Áry-rehe ne arandu voi. Ma'erã-gwi nane arandu porãi Nhandejáry rehegwa nhe'ê erehendu hagwã. Nde, nde py'a ky'aha eremo'ã kwaa, ma'erã-gwi nane arandu porãi erehexa kwaa hagwã xe-rehe. Mbava'e-rehe po he'ise xe rembiaipo porã ndapeikwaái voi. ⁵⁷Ma'erã-gwi po nderejehexa kwaáiry nde rekoha-rehe ne arandu porã hagwã? he'i onhemonhe'ê-vy. ⁵⁸Oí ramo nde-vy ipoxy va'e, he'i ramo nde-vy: “Ne rembiaipo vai va'ekwe xe-vy. Nerembohekoviái xe-vy xe mba'e ne rembiporu va'ekwe. Upéa-rehe aha-ta mburuvixa-pe oromombe'u-vy.” Aipo he'i ramo nde-vy, ani nde poxy teí joty. Enhe'ê mbegwe mbegwe joty íxupe. Nde reraha ramo mburuvixa renda-py, tape-rupi erenhe'ê porã porã joty íxupe ponove ipoxy ne ndive. Ereiko porã jevy hagwã indive embopy'a porã jevy ndejeupe. Ipoxy reheve ogwahê ramo mburuvixa renda-py, niporã arã voi nde-vy. Ne rembiaipo vai-rehe mburuvixa ne moí uka arã preso. Polícia-pe nde pyhy uka va'erã, nde reraha uka va'erã. ⁵⁹Nde, neresêvéi-ma va'erã ne moí hagwe-gwi. Erembohekoviapa ete-ma rire mate, ne mosê jevy va'erã, he'i Hesu.

13

Ndererovái ramo nde rekoha, eremano va'erã

¹Upe jave ogwahê Hesu ha-py omombe'u íxupe:

—Mburuvixa Pilatos ojuka uka araka'e gwí galileu kwéry-pe. Oime jave Nhandejáry-pe ojeporahéi haty-py, ojuka íxupe kwéry. Nhandejáry-pe omboete jave gwymba ojuka uka-vy íxupe ave ojuka, he'i omombe'u-vy.

²⁻³Upéa-rehe Hesu he'i íxupe kwéry:

—Ani ere teĩ nde py'apy-py: “Ojevavy eterei va'e-pe mate Nhandejáry ombohasa asy onhehundipa” ani ere teĩ upéa-rehe, he'i. —Anhete ha'e-ta nde-vy, ndererováí ramo nde rekoha, sapy'a ou va'erã Nhandejáry ne mbohasa asyharã, ne rembiapo vai-rehe eremano va'erã, he'i onhemonhe'ẽ-vy íxupe kwéry.

⁴⁵—Ho'a-ma ramo va'ekwe upe óga yvate vate va'e héry Siloé, dezoito omano va'ekwe. Hi'ári ho'a-gwi omano joa-ma hikwái. Kóxa ani peje teĩ hese kwéry: “Hembiapo vai eterei va'e voi nipo ra'e. Jerusalém mygwa kwéry-gwi nipo ra'e hembiapo vaive ra'e. Upéa-gwi nipo ra'e ombohasa asy íxupe Nhandejáry onhehundipa hagwã.” Ani peje teĩ aiporami hese kwéry. Anhete ha'e-ta nde-vy. Ndererováí ramo nde rekoha, nderejerováí ramo Nhandejáry-rehe, nde ave upeixa sapy'a eremano arã, erenhendi arã, he'i Hesu onhemonhe'ẽ-vy íxupe kwéry.

Figó máta rehegwa nhe'ẽ

⁶Ha upéi katu Hesu omombe'u arandu nhe'ẽ figo máta rehegwa nhe'ẽ-rami.

—Uvaty mbyte-py kwimba'e onhoty va'ekwe peteĩ figo vyryrã. Upéi hi'are rire ou oheka mo'ã ijyva figo. Ha ndojohúí. ⁷Upéixa-gwi he'i gwembigwái-pe uvaty-rehe onhangareko va'e-pe: “Ohasa-ma mbohapy ro'y upe figo máta anhoty hagwe. Hi'a-rehe aju meme mo'ã. Ndaipóri. Ndahi'áiry joty. Oĩ rei-ma. Eity íxupe” he'i gwembigwái-pe. ⁸Ha hembigwái he'i íxupe: “Iporãve ereheja peteĩ ro'yve íxupe” he'i hembigwái gwerekwa-pe. “Ajo'o porã-ta ijerekwe-rehe. Amohu'ũ-ta amoporãve yvy ijerekwe-rehe. ⁹Peteĩ ro'y rire jevy hi'a ramo iporã arã. Ha hi'a e'y vyteri ramo katu, aity arã íxupe” he'i gwerekwa-pe.

Upe arandu rehegwa nhe'ẽ, figo vyryra rehegwa-rami omombe'u Hesu.

Kunha ikarapã va'e-pe ombogwera Hesu

¹⁰Peteĩ pytu'uha áry-py Hesu oho jevy omombe'u ojeporahéi haty-py. ¹¹Ha ogwahẽ kunha ikarapã va'e. Ojapo-ma dezoito ro'y ikarapãha oiko-vy. Ndahi'yvi porãvéi-ma. Anháy ojepota hese-gwi omokarapã íxupe. ¹²Ha ohexa-ma ramo íxupe, Hesu ohení gwendá-py. Upéi he'i íxupe:

—Kunha, ombogwera-ma nde rasy vaikwe-gwi, ¹³he'i hese opo omoĩ-vy. Upe jave opu'ã porã-ma kunha.

—Nhandejáry imarangatu tee va'e, he'i kunha omboete-vy. Nhandejáry ombogwera-pe omomba'egwasu.

¹⁴Upéa-rehe ojeporahéi haty járy he'i ojogweroaty va'e kwéry-pe:

—Ani teĩ ereju pytu'uha áry-py ne mbogwera uka hagwã, he'i. —Áry rei-py katu ereju va'erã, he'i íxupe. —Seis áry meme-py nhamba'apo meme. Peteĩ áry-py japytu'u. Anive ereju pytu'uha áry-py ne mbogwera hagwã, he'i íxupe ipoxy-vy.

¹⁵Hesu katu he'i íxupe:

—Nde, nde py'a ky'aha eremo'ã kwaa eterei. Erenhemoete rei ereiko-vy. Ndereikwaa porãí Nhandejáry nhe'ẽ, he'i. —Pytu'uha áry-py meme eremboy'u ne rymba kwéry. Erejora ne rymba vaka, ne rymba mburika ave eremboy'u hagwã ereraha-vy y rembe-py imboy'u-vy, he'i. —“Ndaha'éi tembapiro rei ajapo amboy'u-vy” ere ereho-vy. “Áry meme hoy'u hagwã ndaha'éi hembiapo rei” ere. “Amboy'u hagwã ae xe rymba” ere.

¹⁶—Upéixa voi ave ombogwera arã pytu'uha áry-py. Kente iporãve voi mymbagwi. Ha ko kunha Abraão remiarirõre voi. Ojapo-ma dezoito ro'y anhaygwasu Satanás ndopoíry íxugwi. Omokarapã-ma íxupe. Iporã voi pytu'uha áry-py imba'asy, anhaygwasu remimoigwe ajorapa-ma kunha-gwi, he'i oikwaa ukase-vy huvixa kwéry-pe gwembiapo porã.

¹⁷Inhe'ẽgwe ohendu-ma ramo, otĩ-ma hese ija'e'y va'e kwéry. Ha enterove ojogweroaty aty va'e ogwerovy'a Hesu rembiapokwe.

Temitỹ mostarda rehegwa nhe'ẽ-rami arandu nhe'ẽ
(Mt 13.31-32; Mc 4.30-32)

¹⁸He'i íxupe kwéry Hesu:

—Mba'éixa aikwaa uka-ta peẽ-my Nhandejáry nhande ruvixaha? Mba'eixagwa nhe'ẽ aiporu-ta pene mo'arandu hagwã? he'i. ¹⁹—Ne arandurã amombe'u-ta temitỹ mostarda rehegwa nhe'ẽ-rami aiporu-ta, he'i.

—Kwimba'e kokwe-py onhotỹ araka'e temitỹ. Héry va'e mostarda onhotỹ. Mixĩ ete va'e mostarda ra'ỹi. Okakwaa-ma rire ae oiko-ma tuvixa va'e vyvra. Hakãmbý-py gwyra ojeaityvapo-ma, he'i Hesu Nhandejáry irũ hetave tave oĩ va'erã rehegwa kwaa uka-vy.

Mbojape mbovuha rehegwa nhe'ẽ-rami arandu nhe'ẽ
(Mt 13.33-35)

²⁰Upéi he'i jevy:

—Mba'eixagwa nhe'ẽ aiporu-ta aikwaa uka hagwã peẽ-my Nhandejáry nhande ruvixaha? he'i. ²¹—Mbojape mbovuha rehegwa nhe'ẽ-rami amombe'u-ta.

—Kunha oipyhy hu'i ojapo hagwã mbohapy mbojaperã. Ha hu'i-py omoĩ moĩ imbovuha. Ijavyte-rupi voi ojehe'apa hese. Indive ovu. Ombovupa-ma íxupe, he'i Hesu, Nhandejáry nhe'ẽ irũ hetave tave oĩ va'erã rehegwa kwaa uka-vy.

Okẽ po'i rehegwa nhe'ẽ
(Mt 7.13-14,21-23; Jo 10.7)

²²Hesu ogwata gwata oho-vy Jerusalém-my. Tetã-rupi, tetã'i-rupi ohasa oho-vy. Ohasa ramo ombo'e mbo'e upe pygwa kwéry-pe. ²³Upe jave peteĩ oporandu íxupe:

—Mbo'eháry, ndahetái tipo onheresende va'erã? he'i.

²⁴Hesu katu arandu nhe'ẽ omombe'u íxupe, okẽ rehegwa nhe'ẽ-rami.

—Oĩ okẽ ereike hagwã yváy-py. Ipo'i va'e voi. Hasy peve ohasa va'erã. Heta va'e ohasase mo'ã pe okẽ-rupi. Anhetegwa ha'e-ta nde-vy. Ne kyre'ỹ re'ỹ katu erehasa porã hagwã pe okẽ-rupi, he'i Hesu ombojerovia ukase mo'ã-vy íxupe.

²⁵Upéi omombe'u jevy Nhandejáry rehegwa nhe'ẽ óga járy rehegwa-rami.

—Óga járy opu'ã omboty hagwã gwokẽ. Omboty-ma ramo ndikatuvéi-ma ereike koty-py. Okẽ-my rei erenhe'ẽ-ta. “Eipe'a ne rokẽ oroike hagwã” ere rei arã óga járy-pe. Ha upéixa ave ere rei arã Nhandejáry-pe. Ereiota mo'ã okẽ oipe'a-gwi nde-vy. “Ndorokwaái voi nde” he'i arã nde-vy. “Ndaikwaái xe” he'i arã nde-rehe. ²⁶Ha nde katu ere arã, “Nde karu rovái tee va'ekwe xe. Ne ndive hay'u va'ety tee va'ekwe xe. Xe retã-my xe mbo'e tee va'ekwe ave nde” ere arã íxupe. ²⁷Ha'e ae he'i arã nde-vy, “Xe katu, ndorokwaái voi” he'i arã nde-vy. “Tereho mombyry xéhegwí. Nde ne rembiapo vai-gwi ndikatúí ereike ko'a-py. Nde-vy ndaípe'a mo'ái ereike hagwã” he'i arã Nhandejáry nde-vy. ²⁸Upéa-rehe erejahe'o va'erã. Ndaikatúí ereike-gwi Nhandejáry nhande ruvixa oiko haty-py, nde vy'are'ỹ va'erã. Ne ramói amyri Abraão oiko-ta Nhandejáry ndive. Ne ramói amyri Isaque ave oiko-ta Nhandejáry ndive ave. Ne ramói amyri Jacó ave oiko-ta Nhandejáry ndive ave. Nhandejáry nhe'ẽ-py omombe'u va'ety amyri kwéry ave oiko-ta indive. Ha'e kwéry meme Nhandejáry ndive oikopa va'erã. Ha nde, mombyry-gwi rei erehexa arã íxupe kwéry. “Ndikatúí ereike ko'a-py” he'i arã Nhandejáry nde-vy, he'i arandu nhe'ẽ oiporu-vy íxupe kwéry.

²⁹—Ha'e-ta peẽ-my heta heta judeu e'ỹ va'e omoirũ-ta Nhandejáry gwuvixarã-pe. Yvy apy gwive opa yvy arigwa oho-ta ave oiko hagwã Nhandejáry nhande ruvixa oiko haty-py. Upe-py ogwapy-ta indive yváy-py. ³⁰Ha heta oĩ ãy onhemboete uka e'ỹ va'e. Ha yváy-py tuvixa mba'e va'erã Nhandejáry-pe. Heta oĩ ave ãy onhemboete ukaseve va'e. Ha natuvixa mba'éiry voi va'erã Nhandejáry-pe, he'i íxupe kwéry Hesu omombe'u-vy.

Jerusalém tetã mygwa-pe ohayhu Hesu
(Mt 23.37-39)

³¹Ha upe jave gwí fariseu kwéry ogwahẽ ijukaharã omombe'u íxupe.

—Nde jukaharã ogwahẽ-tama, he'i íxupe. —Ekwa katu. Ekanhy maní íxugwi. Herodes, nhande ruvixagwasu nde juka ukase-ma, he'i íxupe.

³²Hesu ae he'i:

—Xe areve-ta ko'a-py. Nakanhy mo'ái voi íxugwi. Nhandejáry oipotama ramo mate amano va'erã. Ndaha'úi mburuvixa nhe'ẽ-py amano va'erã, he'i Hesu. —Mbarakajagwasu

hembiaapo nhemi nhemi ombotavy gwemi'urā-pe. Upéixa ete ne mbotavy meme Herodes, he'i Hesu Herodes-rehe. —Tereho jevy emombe'u íxupe xe nhe'égwe, he'i. “Oíve xe rembiaporā” ere íxupe. “Hetave anháy amosê-ta, hetave tave ambogwera-ta vyteri” ere íxupe, he'i Hesu omombe'u uka-vy. —“Ko'ê mbue mbue ramo mate ambopa-ta xe rembiaporā” ere íxupe kuri. ³³“Aikwaa-ma amanotaha óra” ere íxupe, he'i. —“Áy katu, ko'ê ramo ave ahase ha-py aha-ta” ere íxupe. “Ndaha'éí ko tetā-my amano va'erā. Aha ranhe-ta Jerusalém tetā-my amano hagwā upe-py” ere íxupe. “Jerusalém tetā mygwa meme ojuka Nhandejáry nhe'ê-py omombe'u va'ety-pe” ere íxupe, he'i Hesu omondo onhe'égwe mburuvixagwasu-pe.

³⁴Upéi he'i Jerusalém tetā mygwa kwéry-rehe:

—Yma gware áy peve erejuka meme Nhandejáry nhe'ê-py omombe'u va'ety-pe. Ombou ramo nde ha-py, erejuka meme íxupe. Ita-py erejapi íxupe ijuka-vy. Upéixa pejapo meme voi peê. Xe aipota voi xe-rehe erejerovia. Xe rembiayhurā amboatyse xe ndive xe renda pygwarā. Ha nderejeroviaséi xe-rehe, he'i. —Yrygwasu ra'y kwéry ojerovia osy-rehe. Ojohu-tama ramo ivai va'e ou, omboaty ipepogwy-py. Ha'e onhangareko porā hese kwéry. Ohayhu porā gwa'y kwéry-pe. Xe ave, yrygwasu-rami, onhangareko porāse mo'ā pende-rehe kwéry. Ha nderejeroviaséi xe-rehe.

³⁵—Pejeapysaka katu, anhete ha'e-ta nde-vy, aha-tama ko xe, oroheja-tama. Ava osê va'e-rami hóga-gwi, aha ave ne renda-gwi. Ha ndaxe rexavéi-ma va'erā. Agwahê jevy-ma ramo, xe rexa jevy-ma ramo, ere arā xe-vy: “Tande rovasa ete katu Nhandejáry. Ha'e ne mbouha-rupi eregwahê ore-vy” ere arā xe-vy, he'i Hesu onhemombe'u-vy íxupe kwéry.*

14

Irurupa va'e-pe ombogwera Hesu

¹³Petēi pytu'uha áry-py Hesu oho okaru fariseu róga-py. Fariseu kwéry ruvixa upe va'e. Ha heta heta kente oí hóga-py. Orepara para Hesu-rehe oí-vy hikwái. Hí'ypa-ma kwimba'e irurupa va'e oí ave upe-py. Hesu renonde-py oí. Ha fariseu kwéry, Moisés remimombe'ukwe mbo'eha kwéry ave oha'arō ohexa hagwā.

—Mbava'e nipo Hesu ojapo arā, he'i ojóupe hikwái. —Oporombogwera-ta para'e pytu'uha áry-py. Ndopytu'u tee mo'ái para'e gwembiaapo-gwi, he'i ojóupe orepara para jave Hesu-rehe.

Upéi Hesu he'i íxupe kwéry:

—Mbava'e tipo iporā Nhandejáry-pe jajapo hagwā pytu'uha áry-py? Oipota tipo nhaporombogwera? Oipota tipo ndajaiporiahuverekóí hasy va'e-pe? Peê nipo pejohu vai ra'e nhaporombogwera ramo pytu'uha áry-py.

⁴Ha okiririmba íxugwi.

Upe-ma ramo ombogwera hasy va'e-pe. Upéi he'i íxupe:

—Tereho jevy nde róga-py, he'i íxupe Hesu.

⁵Upéi omombe'u jevy íxupe kwéry pytu'uha áry rehegwa nhe'ê.

—Peê kwéry, sapy'a pempa'apo ave pytu'uha áry-py, he'i íxupe kwéry. —Nde ra'y ho'a ramo ygwa-py, ne rymba ho'a ramo ave, sapy'a erenohê jevy arā upe ygwa-gwi. Nderéi va'erā “Nanohê mo'ái pytu'uha áry-py” aipo ndere mo'ái. Erenohê pya'e va'erā.

⁶Ohendu-ma ramo upéa nhe'ê, ndikatúí ojohu vai.

Mba'éixa pa oiporavo gwenagwā ogwapy hagwā rehegwa nhe'ê

⁷Ha gwí fariseu ohenóí va'ekwe ou heta okaru porā hagwā. Ha ogwahê ramo petéi teí oiporavo gwenagwā ogwapy hagwā. Iporāve ráve va'e-py ogwapyse. Upéa-rehe Hesu omombe'u íxupe kwéry arandu rehegwa nhe'ê omenda va'e rehegwa nhe'ê-rami. He'i:

⁸⁻⁹—Ne renóí ramo erekaru hagwā omenda va'e ha-py, ani erenhembotuvixa eterei eregwapy hagwā. Ejehexa uka porā katu. Imbotuvixapyrā va'e renda-py ani eregwapy teí. Imbotuvixapyrā e'ỹ-rupi eiko pono ne mbova óga járy nde gwapy ha-gwi. “Niporāi

* 13:35 Sl 118.26

eregwapy ko'a-py. Ko va'e mburuvixave renda ae ko. Ha'e ae ogwapy-ta ko'a-py. Nde, eregwapy mombyryve xéhegwi” pono he'i nde-vy. Aipo-rami ne mbova ramo nane mbovy'ái arā. Ne mopu'ā pu'ā ramo ne moti-ma arā. ¹⁰Iporāve eregwapy imbotuvixapyrā e'ŷ hagwā-rami. Upe-py eregwapy jave óga járy ou arā nde ha-py: “Iporāve xe ypy pyve eregwapy ko'a-py erekaru porāve arā nde” he'i arā nde-vy ne mbotuvixave-vy va'erā. Upéixa ramo ohendu va'e ne mbotuvixave va'erā enterovéa-gwi. ¹¹Ha'e-ta peë-my, onhembotuvixaseve va'e-rehe avave nopenáiry, ha upe onhemomirive va'e-pe katu ombotuvixave va'erā.

¹²Upéa omombe'u rire he'i gwenoihare-pe:

—Nde, ereporomongaru porāse ramo, ani erehenói nde-vy jevy ne mongaru va'erā kwéry-pe. Nde rapixa kwéry, nde ryvy kwéry, nde ryke'y kwéry, nde re'ŷi kwéry, nde rapixa imba'e reta va'e kwéry ave ani erehenói upe va'e kwéry mante eremongaru porā hagwā. Ha'e kwéry ne renói jevy arā ne mohekoviārō uka arā. Ha ko yvy-py mate iporā va'erā nde-vy.

¹³⁻¹⁴—Iporāve ereporomongaru porāse ramo jepe ne mohekoviārō e'ŷ va'erā-pe joty erehenói. Iporiahu va'e kwéry, ikarapā va'e kwéry, ogwata e'ŷ va'e kwéry, hesapyso e'ŷ va'e kwéry ave erehenói va'erā eremongaru porā hagwā íxupe kwéry. Upe va'e kwéry ndogwerekói mba'eve ne mongaru jevy hagwā. Upéa erejapo ramo Nhandejáry katu nde rovasa porā arā yváy-py, he'i íxupe. —Upe áry-py, entéro omano va'ekwe gwive omoingove jevy va'erā áry-py, nde rereko porā va'erā Nhandejáry ne rembiapo porākwe-rehe, he'i Hesu ombo'e-vy.

Kente kwéry omongaru uka va'e rehegwa nhe'ë

¹⁵Petei indive okaru va'e ohendu-ma ramo he'i íxupe:

—Nhandejáry nhande ruvixa oiko haty-py, ovy'a ete va'erā indive okaru ramo.

¹⁶—Néi, he'i Hesu. —Amombe'u-ta peë-my Nhandejáry ndive oiko va'erā rehegwa nhe'ë kente kwéry omongaru uka va'e rehegwa nhe'ë-rami.

—Kwimba'e ojapo uka heta temi'urā omongaru porā hagwā heta kente-pe. Ha omombe'u heta va'e-pe ou hagwā okarugwasu ha-py. ¹⁷Ojapopa-ma rire omondo gwembigwái omombe'u hagwā okaru va'erā-pe. “Ejo katu, jaha jakaru. Ojapopa-ma nhane remi'urā, ere xe remihenói-pe” he'i omondo-vy íxupe kwéry.

¹⁸—Ohenói-ma ramo avave ndouséi indive. Petei va'e he'i uka íxupe: “Yvy ajogwa va'ekwe ahexa ranhe-ta” he'i uka. “Ahexa ranhe-ta ndaha mo'ái ranhe. Ani erejohu vai tei aha e'ŷ ramo” he'i uka jevy íxupe.

¹⁹—Upéi, hemienói ambue va'e ave he'i uka íxupe: “Heta xe rymba pyahu ajogwa va'ekwe. Tekotevë aikwaa nomba'apo porāi para'e, omba'apo porā para'e. Upéa-rehe ndaha mo'ái akaru hagwā ne ndive. Ani erejohu vai tei, ndahái ramo” he'i uka jevy íxupe.

²⁰—Upéi, outro he'i uka ave íxupe: “Amenda-ma kuri. Ndikatúí aha” he'i uka ave.

²¹—Ogwahë jevy-ma ramo hembigwái omombe'upa gwerekwa-pe. Oikwaa-ma ramo ndovy'ái voi ijáry. Ima'eandu-gwi he'i gwembigwái-pe “Ekwa katu. Tereho hekoviārā embou iporiahu va'e kwéry okaru hagwā” he'i. “Tetāgwasu-py ekwa ehexa íxupe kwéry. Tapeguasu rupigwa, tape po'i rupigwa embou. Ikarapā va'e kwéry, hesapyso e'ŷ va'e kwéry, ogwata e'ŷ va'e kwéry ave embou katu okaru hagwā” he'i gwembigwái-pe.

²²—Upéi oho jevy hembigwái. Ogwerupa ete rire-ma, he'i gwerekwa-pe: “Aha amboví va'ekwe kuri ogwahëmba-ma” he'i. “Ajohu va'e kwéry gwive ogwahëmba-ma” he'i. “Nomboaty hetái joty. Hendarā kwéry ne'írá vyteri omohynyhëmba” he'i.

²³—“Aipo ramo ekwa jevy tape tape-rupi tereho. Erejohu va'e gwive erembou hagwā henagwā-rupi ogwapy hagwā. Oí rei tenda va'e nhamohynyhë hagwā. ²⁴Anhete ha'e-ta katu nde-vy: Tenonde-rupi ahenói uka va'ekwe ndo'u mo'ávëi-ma xe rembi'u” he'i ndovy'ái-gwi hese kwéry, he'i Hesu arandu nhe'ë omombe'u-vy.

Tekotevë omoirū hagwā Hesu-pe

(Mt 10.37-38; Mc 8.34; Lc 9.23)

²⁵Ogwata ramo Hesu heta eterei oho ave hapykwéri. Upéi ojere he'i hagwā íxupe kwéry:

²⁶—Xe moirūse ramo ndikatúí xéhegwi erehayhuve avave-pe. Nde ru-pe, nde sy-pe, ne rembireko-pe, nde ra'y kwéry-pe, nde rajy kwéry-pe, nde ryke'y kwéry-pe, nde ryvy kwéry-pe, ne reindy kwéry-pe, ne ména-pe, ne memby kwéry-pe, nde ryke kwéry-pe, nde kypy'y kwéry-pe, nde kyvy kwéry-pe ave erehayhuve ramo xéhegwi ndikatúí arā xe moirū. Xe moirūse ramo ndikatuvéi ne rakate'y nde rekove-rehe.

²⁷Tekotevê ereiko okurusugwasu ogweraha va'e-rami. Upéixa ijukapyrā-rami nderekoséi ramo ndikatúí xe moirū xe re'yí tee ramo.

²⁸—Amombe'u-ta peē-my xe moirūse va'e rehegwa nhe'ê gwogarā omopu'āse va'e rehegwa nhe'ê-rami.

—Kwimba'e omopu'āse ramo gwogarā ijyvate vate va'e, opy'a ndive onhemongeta porā arā. “Oí tipo heta xe plata ajapopa hagwā? Oí tipo xe pytygwōharā jajapo porā hagwā? Arekopa tipo ajapopa hagwā xe rogarā?” oporandu arā opy'apy-py. ²⁹Nonhemongeta porāi ramo omopu'ā rei ramo gwóga mo'ārā, entéro ohexa va'e opuka va'erā hese hógarā-rehe mo'ā ohexa ramo. ³⁰“Omoí mo'ā gwóga renagwā. Omopu'ā ku'a ku'a rei henagwārāgwe. Ndojapopái oheja hagwā” he'i va'erā onhembohory va'erā hóga-rehe. “Ojapo-ta mo'ā óga oheja jevy gwogarāgwe” he'i arā, he'i Hesu arandu nhe'ê omombe'u.

³¹Upéi he'i jevy:

—Amombe'u jevy-ta peē-my xe moirūse va'e rehegwa nhe'ê mburuvixagwasu onhorairō va'e rehegwa nhe'ê-rami.

—Mburuvixagwasu onhorairō-tama ramo mburuvixagwasu ambue ndive, onhemongeta porā opy'apy ndive soldado kwéry-rehe. Dez mil mate ogwereco ramo, ha hese ija'e'y va'e hetave ogwereco ramo, vinte mil ogwereco ramo, oporandu arā opy'apy-py: “Isoldado kwéry imbarateve tipo xe soldado kwéry-gwi?” he'i arā. “Ome'ê-ta tipo aipe'a imburuvixave ramo oikoha íxugwi?” oporandu arā opy'apy-py.

³²—Ha nome'êi-tama ramo, nonhorairōsevêi-ma va'erā. Gwenonde-rupi omondo arā onhomongeta va'e. Ojerure uka-ta upe ipu'akave va'e-pe oiko porā jevy hagwā onhondive, he'i omombe'u arandu nhe'ê.

³³—Upéixa ave, xe moirūse va'e tonhemongeta porā opy'a ndive. Nome'êi voi xe moirū ku'a ku'a. Gwekove-rehe hakate'y va'e, gwe'yí kwéry-rehe hakate'y va'e, omba'e-rehe hakate'y va'e naxe moirū etéi arā oiko-vy, he'i íxupe kwéry oiporavo uka hagwā.

Juky rehegwa nhe'ê

(Mt 5.13; Mc 9.50)

³⁴Upéi he'i jevy:

—Amombe'u jevy-ta peē-my xe moirūse va'e rehegwa nhe'ê juky rehegwa nhe'ê-rami.

—He porā juky. Ha ndahéi ramo katu, ndikatúí eremoatyrō jevy. ³⁵Ndovalevéi-ma. Yvy pygwarā ndovaléiry. Ha ne remimomborā-ma voi va'erā upéa, he'i. —Ne aranduse ramo, ejeapysaka porā ko xe nhe'ê-rehe, he'i Hesu omombe'u-vy íxupe kwéry.

15

Hembiapo vai va'e ndive Hesu oiko

¹Onhemboja Hesu renda-py plata-py oporombopaga va'ety kwéry, gwī ojevavy va'e kwéry ave inhe'ê rendu-vy. ²Ha upéa-rehe fariseu kwéry, judeu rekombo'ehaty kwéry ave onhe'ê rei rei hese:

—Kóa nahi'arandúiry voi, he'i rei hese. —Gwī ojevavy va'e kwéry ndive oiko meme okaru ave indive kwéry, he'i hese ojohu vai-vy hese.

Ovexa kanhygwe rehegwa nhe'ê

(Mt 18.12-14)

³Upéa-rehe Hesu omombe'u gwī ójehe ojerovia va'erā rehegwa nhe'ê ovexa kanhygwe rehegwa nhe'ê-rami.

⁴—Ne rymba ovexa heta ete erereko ramo, cem erereko ramo, erenhangareko hese. Peteí okanhy-ma ramo, ereheja upe okanhy e'y va'e kwéry anho nhu porā-my ereheka heka hagwā íxupe. ⁵Erejohu-ma ramo, “Ajohu-ma xe rymba” ere va'erā. Erehupi va'erā

íxupe nde ati'y-rupi ereru haggwā ne rymba kanhygwe. Erevy'a eterei ne rymba erejohu jevy-ma ramo. ⁶Eregwahē-ma ramo rire nde róga-py erehenói arā enterove-pe jevy ovy'a ave haggwā. Nde re'yí kwéry, nde rapixa kwéry ave erehenói arā ovy'a ave haggwā. “Ajohu jevy xe rymba okanhy va'ekwe” aipo ere arā eremombe'u-vy íxupe kwéry erembovy'a-vy jevy, he'i.

⁷—Upéixa ave yváy pygwa ovy'a joa arā. Hembiaipo vaikwe va'e ogwerova-ma oiko-vy ramo gwekoha ovy'a joa-ma va'erā oiko-vy. Ojejavý va'e ojerovia-ma ramo xe-rehe ovy'a joa-ma va'erā yváy pygwa ave. Heta heko porā va'e ojerovia oiko-vy ramo xe-rehe ombovy'a arā yváy pygwa kwéry. Ha petei hekoha vai va'ekwe ogwerova ramo gwekoha katu, ombovy'agwasuve arā íxupe kwéry, he'i Hesu.

Omba'e oheka oiko-vy kunha

⁸Upéi omombe'u jevy arandu rehegwa nhe'ē omba'e oheka va'e rehegwa nhe'ē-rami.

—Kunha ogwereco araka'e dez plata, ovale voi va'e. Ha okanhy petei íxugwi. Upéixa-gwi omohendý taendý, oitypei porā koty-py. “Tajohu jevy xe mba'e kanhygwe” he'i. Ndohejái mba'eve gwendagwe-py oitypei oheka-vy. ⁹Ojohu-ma ramo ohenói kunha kwéry-pe ogwerovy'a jevy va'erā. Hapixa kwéry, he'yí kwéry hóga ypy rupigwa kwéry ogwahē-ma ramo, omombe'u: “Ajohu-ma xe plata okanhy va'ekwe. Pevy'a katu xe ndive ajohu jevy-ma xe plata” he'i íxupe kwéry.

¹⁰—Upéixa ave ogwerovy'a arā Nhandejáry hekoha vai va'ekwe-pe ogwerova-ma ramo gwekoha. Ovy'a arā gwembigwái kwéry yváy pygwa ndive.

Ta'yimirí okanhy va'ekwe rehegwa nhe'ē

¹¹Hesu omombe'u jevy arandu rehegwa nhe'ē ta'yimirí okanhy va'ekwe rehegwa nhe'ē-rami.

—Oiko va'ekwe kwimba'e. Mokōi ta'yíry va'e upéa.

¹²—Ha ta'yimirí he'i gwu-pe: “Eme'ē mani xe-vy xe mba'erā. Āy voi eme'ē xe-vy. Naha'arósi eremano rire ae areko haggwā ne mba'ekwe” he'i gwu-pe. “Iporáve ereme'ē xe-vy ereikove reheve” he'i gwu-pe ta'yimirí hereko asy-vy.

Upéixa-gwi túvy omboja'o ja'o opa omba'e. Heta voi omba'ekwe omboja'o ja'o gwa'y kwéry-pe ome'ēmba íxupe kwéry.

¹³—Upéi, ndahi'aréi ta'yimirí oho-ma mombyry. Omboatypa omba'e gwu mba'ekwe ome'ē kuri va'e ovendepa oho-vy. Hepykwe ae ogweraha. Mombyry ete oho. Ogwahē ramo tetā ambue-py ojapo opaixagwa. Omokanhy rei rei omba'e repykwe.

¹⁴Omokanhymba-gwi mba'eve ndogwerekói, ndaiporivéi-ma imba'e, ndaiporivéi-ma ave imba'e repyrārgwe. Iporiahu ete jevy opyta-vy.

—Ha upe rire, iporiahu ete jave tetā ambue pygwa kwéry-pe nahenhóiry hemitygwe. Upéixa-gwi ohasa asy upe tetā mygwa. Ndogwerekóvi gwemi'urā-gwi ivare'apa upe pygwa. Ha ohasa asyve ta'yimirí. Ndaipóri tembi'u-gwi ohasa asy oiko-vy.

¹⁵—Ivare'apa eterei-gwi oho upe-py oiko va'e-pe ojerure gwemi'urā-rehe. Ha upe va'e omomba'apo íxupe. “Eremba'apose ramo, tereho xe yvy nhu-my enhangareko xe rymba kure kwéry-rehe, xe rymba kure mongaruha ramo ereiko haggwā” he'i upe pygwa ta'yimirí-pe. “Iporā. Apyta-ta ne rembigwái ramo” he'i.

¹⁶—Ha hymba kwéry-rehe onhangareko jave, ta'yimirí ivare'a vyteri oiko-vy. “Xe vare'a” he'i. “Akaruse eterei. Xe vare'a-gwi ha'use mo'ā kente rembi'u e'y va'e, ko kure rembi'u rei-ma ha'use. Pono xe juka xe vare'a ha'use mo'ā ko kure rembi'u.” He'i-ma ramo ojeupe, avave ho'u va'erā nome'éséi ta'yimirí-pe.

¹⁷—Upe rire ae imandu'a jevy gwu-rehe: “Oí heta xe ru rembigwái omba'apo va'e. Upe xe ru róga pygwa kwéry okaru porā. Hembigwái kwéry ave okaru porā ave. Ndaivare'ái voi xe ru ndive omba'apo va'e kwéry. Ha xe, amano-tama xe vare'a eterei-gwi ko xe yvy e'y-py aiko-vy” he'i ojeupe. ¹⁸“Taha jevy xe ru róga-py. Ha'e-ta íxupe, Ajapo vai va'ekwe nde-rehe, aipo ha'e-ta íxupe. Nhandejáry-rehe ave ajapo vai va'ekwe ave. ¹⁹Ajapo vai eterei-gwi xe atí agwahē jevy haggwā. Xe rembiaipo vai eterei nde-rehe, anive, Xe ra'y,

ere xe-rehe. Atĩ eterei, Xe ra'y, ere hagwã xe-vy. Aikose eterei ne rembigwái ramo, aipo ha'e-ta xe ru-pe" he'i opy'apy-py.

²⁰—He'i-ma ramo osê upe yvy-gwi ojevy hagwã gwu renda-py. Mombyry-gwi ou jevy. Ogwahê e'ỹ jave gwu róga-py, mombyry vyteri gwu róga-gwi ou-vy ohexa-ma íxupe túvy. Ohexa-ma ramo, oiporiahuvereko gwa'yimirĩ-pe. Oripara oho-vy ohogwaitĩ hagwã gwa'yry-pe. Ohova pyte pyte íxupe. Oiporiahuvereko voi gwa'yry-pe.

²¹—Aipo ramo ta'yimirĩ he'i gwu-pe: “Xe rembiapo vai va'ekwe nde-rehe. Xe rembiapo vai va'ekwe Nhandejáry-rehe ave. Xe rembiapo vai-gwi xe atĩ voi ndéhegwi. Anive, Xe ra'y, ere teĩ xe-vy xe rembiapo vai eterei va'ekwe-gwi” he'i gwu-pe.

²²⁻²³—“Ani eretĩ teĩ xéhegwi. Nde xe ra'y tee” he'i. “Orohayhu eterei. Avy'a orohexa-vy” he'i túvy íxupe.

—Upéi he'i gwembigwái kwéry-pe omanda-vy: “Pekwa pya'e peru xe ra'y aorã. Eru ao porã ete omonde hagwã. Ikwãyrurã eru ikwã-rehe omoĩ hagwã. Ipy ryrurã eru ave omonde hagwã. Iporã porãve va'e eru xe ra'y pegwarã” he'i.

—“Peru ave vaka ra'y ikyrave va'e pejuka hagwã íxupe. Heta eta vaka ro'o ja'u-ta javy'a eterei-gwi. ²⁴Ko xe ra'y okanhy va'ekwe oiko-vy ha ko'ánga ogwahê jevy ou-vy. Omano vérami va'ekwe ha oikove jevy-ma nipo ra'e” he'i hese gwembigwái kwéry-pe.

—Upéi onhepyrũ ogwahê ramo ovy'a joa. ²⁵Upe jave ta'y rypkywe oime kokwe-py. Gwóga-py ogwahê-tama ramo ohendu ombopu va'e, ohendu ave ogwahu va'e. ²⁶Ohendu-ma ramo ohenói hembigwái oikwaa hagwã: “Mbava'e tipo aipo va'e?” he'i. ²⁷“Nde ryvy ogwahê kuri. Hesãi porã ogwahê ou-vy. Ovy'a eterei nde ru. Upéixa-gwi ojuka uka vaka ra'y ikyrave va'e hemi'urã.”

²⁸—Aipo ohendu-ma ramo ta'yurusu ipoxy gwyvýry-rehe, ndoikeséi gwóga-py. Upe-ma ramo túvy osê oho-vy ohogwaitĩ-vy íxupe. Ojerure rure gwa'y rypy-pe oike hagwã gwóga-py.

²⁹—Upe va'e ae he'i gwu-pe: “Xe katu, xe are-ma amba'apo ne ndive. Are-ma aiko ne nhe'ê-rupi. Ne remimbota mate ajapo aiko-vy. Ne'íra vyteri ereme'ê xe-vy ne rymba mixĩ va'e ha'u va'erã xe rapixa kwéry ndive. ³⁰Ha ko ne mba'e hundipahare katu ogwahê ramo, ne rymba ikyrave va'e erejuka íxupe. Hemiapo vai va'ekwe nde-rehe. Opa mba'e ojapo nipo oiko-vy ra'e kunha vai ndive nipo oiko ra'e ave ha ogwahê ramo, ne rymba ikyrave va'e erejuka nipo ra'e íxupe.”

³¹—He'i-ma ramo, túvy he'i íxupe: “Xe ra'y, nde ko ereiko meme xe ndive. Entéro xe mba'e gwive ne mba'e voi. ³²Tekotevê javy'a ko'ánga onhondive. Ko nde ryvy, Omano, ha'e mo'ã va'ekwe hese, oikove teĩ nipo ra'e. Okanhy va'ekwe ha ko'ánga ogwahê jevy ou-vy. Tekotevê nhanhombovy'a jevy katu” he'i túvy gwa'yurusu-pe, he'i Hesu, gwĩ ojevavy rire ojehesa rerova uka va'e-rehe Nhandejáry ovy'aha kwaa uka-vy.

16

Tembigwái nonhangareko porã gwerekwa mba'e-rehe rehegwa nhe'ê

¹Hesu omombe'u jevy doze gwemimbo'e kwéry-pe. Arandu nhe'ê omombe'u tembigwái rehegwa nhe'ê-rami.

—Kwimba'e onhangareko uka omba'e reta reta peteĩ gwembigwái-pe. Upe imba'e reta va'e oiporu uka meme omba'e kente kwéry-pe ombohekovia hetave hagwã íxupe. Ha ohekoviarõ-vy hembigwái-pe ogweru hikwái. Ijáry ete nonhangarekói voi hese, hembigwái mate ojapo.

—Upe jave gwĩ oikwaa va'e he'i imomba'apoha-pe: “Nonhangareko porã voi ne rembigwái ne mba'e-rehe. Ndohekoviarõ porã nde-vy oiporuruka hagwe” he'i omombe'u-vy.

²—Ha upéi katu upe va'e ohenói uka gwembigwái-pe: “Ne rembiapo vai rerekwã ahendu kuri. Anhete pa erejapo. Nerembohekovia porã nipo xe mba'e aheja nde-vy va'ekwe ereiporuruka hagwã. Upéixa ramo noromomba'apo mo'avéi” he'i gwembigwái-pe, hemiapo vai va'ekwe-rehe.

³—Ha upéi katu hembigwái onhemongeta opy'apy-py: “Mbava'e tipo ajapo-ta? Xe momba'apoha xe mosê-ta. Namba'apo mo'ávêi-ma íxupe. Xe kangy eterei amba'apo hatã hagwã. Ndikatuíry amba'apo mbaraete hagwã. Ndajo'o kwaái yvy. Atí eterei ajerure rure hagwã xe remikotevê-rehe. Mbava'e tipo ajapo-ta aiko porã hagwã namba'apovéi-ma ramo a-py?” he'i opy'a-py onhemongeta-vy.

⁴—Upéi he'i jevy opy'a-py: “Aikwaa-ma mba'e ajapo-ta kente kwéry xe moirũ porã hagwã, xe mogwahê hagwã gwóga-py” he'i opy'apy-py.

⁵—Upéi omomba'apoha mba'e oiporu va'ekwe ohenói. Ogwahê ypy va'e-pe he'i: “Mbovy tipo erereve vyteri xe momba'apoha-pe?” he'i oporandu-vy íxupe. ⁶“Heta nhandy aiporu va'ekwe. Cem ryrugwasu-rehe areve voi íxupe.” “Ki, ehái nde kwatia-py mixíve ereve hagwã. Cinqüenta ryrugwasu-rehe erehai” he'i oreve va'e-pe. Ome'ê íxupe ikwatia ohai mixíve oreve hagwã.

⁷—Upéi oporandu kwimba'e ambue-pe: “Ha nde tipo, mbovy tipo erereve ave nde?” he'i. “Heta trigo aiporu va'ekwe. Cem ryrugwasu-rehe areve vyteri ne momba'apoha-pe” he'i. “Ehai mixíve nde kwatia-rehe. Oitenta ryrugwasu-rehe mate erehai” he'i ome'ê-vy íxupe ikwatia ohai hagwã.

⁸—Ha upéa oikwaa-ma ramo imomba'apohare he'i hese: “Hi'arandu nipo ra'e xe rembigwaikwe xe mbotavy hagwã” he'i gwembigwaikwe-rehe, he'i Hesu arandu nhe'ê tembígwái rehégwa nhe'ê-rami omombe'u-vy.

Ha Hesu he'i ave:

—Ha'e-ta katu peê-my ko'áygwa pytũ mygwa-rami oiko va'e hi'arandu voi ombovia uka hagwã gwapixa-pe. Ha oĩ arakatu pygwa-rami oiko va'e, Nhandejáry-rehe ojerovia va'e, nahi'arandu porãi gwapixa ndive oiko porã hagwã.

⁹—Ha'e-ta ave peê-my, ani ereiporu rei ne mba'e, nde pirapire ave ndejéupe gwarã anho-rehe. Iporãve ereme'ê hemikotevê iporiahu va'e kwéry-pe. Upéixa nde py'a porã reheve ereiporu ramo ne mba'e reta, gwĩ ereiporiahuvereko va'ekwe ovy'a jevy va'erã ne ndive. Ha eregwahê-ma ramo yváy-py ne mogwahê porã arã. ¹⁰Tereiporu porã ne mba'e ereiko porã hagwã. Ndahetái ramo ne mba'e, ereiporu kwaa ramo, iporã arã nde-vy. Hetave tave erereko ramo ereiporu kwaa arã upe ne mba'e reta voi ave. Nde py'a porã-gwi ereiporu kwaa ne mba'e. Ha ndahetái ramo ne mba'e, ndereiporu porãi ramo upe ne mba'e mbovy, hetave tave erereko ramo, ndereiporu kwaái arã upe hetave va'e ave. Nande reko porã-gwi ndereiporu kwaái ne mba'e.

¹¹—Ha nane arandu porãi-gwi ndereiporu porãi ne mba'e ko yvy pygwa. Mba'éixa po ereiporu kwaa va'erã Nhandejáry remime'erã? he'i Hesu omombe'u-vy. ¹²—Ha ndereiporu porãi ramo ko'a-py ereiporu va'e, avave nome'êi arã ne mba'e teerã nde-vy.

¹³—Ndaikatúí eremba'apo mokõive-pe. Peteĩ va'e-rehe nande a'e porãiry va'erã. Ambue katu erehayhu tee va'erã. Peteĩ va'e-rehe ne rakate'ýve arã. Ha outro-rehe katu nerepenái arã. Peteĩ va'e nhe'ê-rupi mate ereiko arã, he'i omombe'u-vy. —Upéixa ave ereiko ramo Nhandejáry nhe'ê-py, ndikatuvéi erepena eterei ko yvy-rehe oiko va'e nde pirapire-rehe. Ne rakate'ý eterei ramo pirapire-rehe, ipu'aka va'erã nde-rehe. Nerepenái va'erã Nhandejáry-rehe. Nde kupe-py rei oĩ va'e-rami erereko va'erã íxupe.

Fariseu kwéry-pe onhemonhe'ê Hesu

¹⁴Ohendu-ma ramo upe nhe'ê fariseu kwéry, onhembohory hese. Plata rayhuha ha'e kwéry. Omba'e reta rayhuha ave ha'e kwéry. Upéixa-gwi Hesu remimombe'u-rehe ndovy'áiry. ¹⁵Upéa-gwi Hesu he'i íxupe kwéry:

—Peê penhemboheko marangatu rei yvypóry renonde-py. Peje rei pendéjeupe “Aiko porã Nhandejáry nhe'ê-py” peje mo'ã, pende apu rei pendéjehe, pende rerovia rei kente kwéry. Nhandejáry ae ohexa porã nde py'apy-py. Oikwaa-ma katu mbava'e-rehe erejerovia ete. Oikwaa-ma ave mbava'e-rehe erenhemongeta nde py'apy-py, he'i onhemonhe'ê-vy íxupe kwéry. —Oĩ heta mba'e, heta hembiaipo ave ovale e'ý va'e voi katu

Nhandejáry-pe. Ha kente kwéry he'i rei upe mba'e-rehe, "Iporã katu" he'i rei hembiaoprehe. "Ovale voi" he'i rei hese. Ndoikói peteixa Nhandejáry ndive-gwi, aipo he'i rei hese, he'i Hesu onhemonhe'ê-vy.

¹⁶—Myamyri ojerovia araka'e Nhandejáry-rehe. Upéixa-gwi oiko porã araka'e inhe'ê-py. Ohendu meme katu araka'e Moisés amyri rembihaikwe. Nhandejáry nhe'ê-py omombe'u va'ety amyri kwéry rembihaikwe ave ohendu meme ave araka'e. Upéa-rehe oikwaa-ma araka'e Nhandejáry remimbota ojapo haggwã, he'i.

—Upe rire ou-ma va'ekwe João Batista. "Ou-tama Nhandejáry nhande ruvixarã" omombe'u meme. Upe rire ãy peve onhemosarambi rambi upe nhe'ê. Ha heta kente ikyre'ỹ voi omoirũ haggwã Nhandejáry-pe. Oikese ha-py pya'e a'e oike ha-rami ojapura-ma va'e-rami omoirũse eterei Nhandejáry-pe gwuvixarã, he'i. ¹⁷—Ha'e-ta ave peẽ-my, áry opa va'erã. Yvy ave opa va'erã ave. Nhandejáry nhe'ê ae Moisés amyri remimombe'ukwe ndopái va'erã. He'i hagwe-rami oikopa peve nonhehekoviãrõ mo'ãi voi, he'i Hesu.

Mendare rehegwa nhe'ê

(Mt 19.1-12; 5.31-32; Mc 10.11-12)

¹⁸He'i ave:

—Gwembireko-gwi opoi va'ekwe omenda jevy ramo ambue kunha-rehe, ojapo vai voi Nhandejáry renonde-py. Ha kunha ome oheja va'ekwe-rehe omenda va'e ojapo vai ave Nhandejáry renonde-py, he'i Hesu ombo'e-vy íxupe kwéry.

Mokõi kwimba'e rehegwa nhe'ê

¹⁹Upéi Hesu omombe'u jevy arandu nhe'ê mokõi kwimba'e rehegwa nhe'ê-rami.

—Oiko va'ekwe petei kwimba'e imba'e reta va'e. Hepyve pyve va'e ao meme voi katu ha'e omonde. Ha okaru porã porã meme ave. ²⁰Ha hokê-my ogweru omoi-vy kwimba'e iporiahu ete va'e. Héry va'e Lázaro. Hasy va'e voi Lázaro. Ipire aipa va'e voi. Ikangy voi hasy ete-gwi. ²¹Ha ivare'a eterei-gwi ogwapy oi-vy upe-py. Oha'arõ ho'u va'erã mo'ã. Tembi'u sururukwe ho'a va'ekwe ho'u haggwã oi upe-py. Onhemohygyatã-vy mo'ã ou oha'arõ oi-vy upe-py. Ha upéixa oi jave gwi jagwa ou ohere íxugwi ijai ai.

²²—Upe rire omano Lázaro. Omano ramo Nhandejáry rembigwái yváy pygwa ou ogw-eraha íxupe oiko haggwã Abraão amyri ndive ogwenogwahê íxupe heraha-vy Nhandejáry renda-py.

—Upéi omano ave upe imba'e reta va'ekwe ave. Ha omoi hetekwe hetekwe rendaty-py.

²³Omano rire-ma oime jave nhane mbohasa asy va'e renda-py, ohasa asy-ma voi oiko-vy.

—Upéi oma'ê jave mombyry-kotypy ohexa Lázaro amyri-pe oiko ramo Abraão amyri ndive. ²⁴Upéi osapukái Abraão amyri-pe. He'i "Xe poriahuvereko katu, xe ramoigwasu Abraão" he'i gwamoigwasu-pe. "Embou Lázaro xe pytygwõ uka-vy. Omoakými haggwã jepe xe apekũ" he'i. "Okwã apy omoaký haggwã y-py omoro'ysã haggwã xe apekũ" he'i. "Aiko asy eterei ko tata rendy-py" he'i.

²⁵—Upéa-rehe Abraão amyri he'i íxupe: "Namondo mo'ãi nde ha-py Lázaro" he'i íxupe. "Nde, tekotevê ne mandu'a nde rekohagwe-rehe. Eremano e'ỹ mboyve va'ekwe, ereiko ramo yvy ári ne mba'e reta-rehe mate erepena va'ekwe ereiko-vy. Ha upe-py nde rekoha porã va'ekwe. ãy ae katu ereiko asy va'erã. Nde rekoha porãgwe ndovaleví-ma va'erã nde-vy. Erehasa asy-ta voi katu ereiko-vy" he'i íxupe. "Ha Lázaro amyri nde ramigwa e'ỹ va'ekwe. Ha'e oiko ramo va'ekwe yvy ári ohasa asy voi va'ekwe. ãy katu ha'e oiko porã-ma" he'i Abraão amyri imba'e reta va'ekwe-pe. ²⁶"Oĩ ave vykwagwasu nhane mbyte-py. Ko'a pygwa ohasase mo'ã upe-py. Ndikatúi ohasa vykwagwasu-gwi" he'i. "Ha ndikatúi ave upe pygwa ohasa ou haggwã ore ha-py ave" he'i Abraão amyri upe imba'e reta va'ekwe-pe.

²⁷—"Aipo ramo" he'i Abraão amyri-pe, "Emondo emogwahê uka Lázaro amyri xe ru róga-py" he'i. ²⁸"Oiko cinco xe ryvy kwéry oikove va'e. Emondo Lázaro amyri omombe'u haggwã íxupe kwéry Nhandejáry nhe'ê pono omano rire ha'e kwéry ave ou ko'a-py, ko ohasa asy haggwã-py" he'i ojerure-vy íxupe.

²⁹—Upéi Abraão amyri he'i íxupe: “Oĩ Nhandejáry nhe'ê ohai uka va'ekwe. Upéa ae mate ha'e kwéry tohendu” he'i íxupe. “Nhandejáry nhe'ê Moisés amyri rembihaikwe ogwereco nipo ra'e. Nhandejáry nhe'ê-py omombe'u va'ety rembihaikwe ogwereco ave nipo ra'e. Upéa nhe'ê ae katu ha'e kwéry tohendu” he'i Abraão amyri íxupe.

³⁰—Ha'e he'i “Nahániry” he'i jevy. “Nde, ereikwaa, upe hembihaike rehegwa nhe'ê ha'e kwéry nohenduséi voi. Ohexa ramo petei omano va'ekwe oikove jevy-ma ramo ae ogwerovia arã inhe'ê. Ogwerovia arã gwekoha ave” he'i ojerure rure-vy.

³¹—“Ndojeroviaséi voi nipo ra'e hikwái” he'i Abraão amyri íxupe. “Nohenduséi nipo ra'e Moisés amyri rembihaikwe. Nohenduséi nipo ra'e Nhandejáry nhe'ê-py omombe'u va'ety amyri rembihaikwe ave. Omano va'ekwe oikove jevy-ma ramo nohenduséi ave arã voi inhe'ê. Nohenduséi ete voi Nhandejáry nhe'ê” he'i íxupe Abraão amyri. “Namondo mo'ái Lázaro amyri upe-py” he'i ave Abraão amyri, he'i Hesu omombe'u ramo arandu rehegwa nhe'ê íxupe kwéry.

17

Kente-pe ombotavysse va'erã rehegwa nhe'ê

(Mt 18.6-7; Mc 9.42)

¹Upéi Hesu he'i gwemimbo'e kwéry-pe:

—Oĩ heta kente-pe ombotavy va'erã. Ohesa rerova uka va'erã xéhegwi ombojevavy uka-vy. Amboasy upe imbotavyharã-pe. Ohasa asy eterei va'erã. ²Iporãve arã ra'e jajuka ombo'e vai e'ỹ ngatu. Iporãve arã ra'e nhandehapiti nhamoi-vy ijaju'y-rupi itagwasu-rehe ipohyive hagwã. Iporãve arã ra'e nhamombo ygwasu-py ombo'e vai e'ỹ ngatu omano pono xe-rehe ojeroviasse va'e-pe ombotavy rei.

Nde-rehe hembiaipo vai va'e ndive eiko porã

³—Peê xe reroviaha va'e kwéry, penhangareko porã katu petei tei pendéjehe. Oĩ ramo nde rapixa xe reroviaha va'e jepe nde-rehe hembiaipo vai va'e, enhemonhe'ê porã jevy katu íxupe. Ha ohendu-ma ramo ne nhe'ê, “Arova-ta xe rekoha xe anhemboasy xe rembiaipo vaikwe-rehe nde-vy” he'i ramo eiporiahuvereco íxupe. Anive eremomandu'a hembiaipo vaikwe-rehe. ⁴Nde-rehe hembiaipo vai meme ramo, ha onhemboasy meme gwembiaipo vaikwe-rehe ramo, eiporiahuvereco meme katu íxupe. Eiko porã rei indive, he'i Hesu omombe'u-vy hekoha kwéryrã.

⁵Upéa-rehe hemimbo'e kwéry he'i íxupe:

—Ore pytygwõ katu orojerovia teeve hagwã Nhandejáry-rehe, he'i onhepytygwõ ukaseve-vy ojerovia ete hagwã.*

⁶—Erejerovia miximi-ma ramo Nhandejáry-rehe, ome'ê-ta nde-vy ne rembijerure, he'i. —Oĩ temitygwe héry va'e mostarda. Mixi eterei haimete nome'ei erehexa hagwã. Upe mixigwe va'e-gwi osê tuvixa va'e. Yvyra-rami opyta. Upéixa ave miximi jepe erejerovia tee ramo Nhandejáry-rehe, “Ehapo'o ehekỹi ko yvyragwasu” ere ramo, ohapo'o joty va'erã. “Erenhotỹ jevy ko yvyragwasu ygwasu-py” ere ramo íxupe, onhotỹ jevy va'erã y-py. Ne rembijerurekwe ojapo-ta Nhandejáry, he'i íxupe kwéry. —Nde-vy ikatu e'ỹ va'e ojapo va'erã nde-vy ne rembijerurekwe, he'i Hesu.

⁷⁻⁹He'i ave íxupe kwéry:

—Eremomba'apo heta ne rembigwái kokwe-py omba'apo va'e. Mymba-rehe onhangareko va'e omba'apo heta. Omba'apo rire-ma ogwahẽ jevy nde róga-py. Upéi ere íxupe: “Ekwa katu ejapo xe remi'urã. Eru xe-vy ha'u va'erã, hay'u hagwã ave”.

Erekaru porã rire ae-ma ere ne rembigwái-pe, “Ekaru katu”. Avave nde'íry omba'apo va'e-pe: “Atima nde-vy ne rembiaipo-rehe” nde'íry. Nde'íry ave, “Atima nde-vy xe nhe'ê-rupi eremba'apo-gwi” nde'íry.

¹⁰—Peê ave, peiko ramo Nhandejáry nhe'ê-py, hemimbota meme petei tei pejapo ramo, ani peje pendéjehe, “Xe rembiaipo porã voi ko xe” ani peje tei pendéjehe. Iporãve ere

* 17:5 Mt 17.20; 21.21; Mc 11.23

“Hembigwái porã ete ndaikói Nhandejáry-pe. Hemimbotami mate ajapo íxupe” peje ae katu pendéjehe, he'i hekoharã omombe'u gwemimbo'e kwéry-pe.

Dez mba'asy vai ogwereco va'e-pe ombogwera Hesu

¹¹Hesu ogwata oho-vy Jerusalém tetã-my. Tape puku-rehe oho. Samaria pygwa yvy-rupi oho, Galiléia pygwa yvy-rupi ave oho. ¹²Oike-tama peteĩ tetã'i-my ou ohogwaitĩ mo'ã íxupe dez aiai mba'asy vai ogwereco va'e. Ipire omboai mba'asy ani eremoagwĩ teĩ mba'asy vai ogwereco va'e-pe. Ogwahẽ mo'ã Hesu renda-py. Mombyry jave íxugwi opyta. Onhe'ẽ hatã he'i-vy:

¹³—Mbo'eháry Hesu, ore poriahuvereko katu ore mbogwera katu, he'i onhe'ẽ hatã-vy.

¹⁴Hesu ohexa-ma ramo íxupe kwéry he'i:

—Tapeho pejehexa uka pa'i kwéry-pe judeu kwéry rekoha-rupi, he'i íxupe kwéry.

Ha oho hikwái. Tape-rupi ogwata oho jave okwera-ma hikwái. Hesu nhe'ẽ-py okwera-ma.*

¹⁵Oikwaa-ma ramo ikweraha peteĩ ou jevy ohogwaitĩ Hesu-pe:

—Xe mbogwera-ma hexapyrã-rupi xe mbogwera-ma, he'i. —Tonhemomarangatu katu Nhandejáry réry. Onhemomba'egwasu ete va'e Nhandejáry, he'i.

Omboete Nhandejáry-pe osapukái-vy ou jave tape-rupi ovy'a eterei-gwi. ¹⁶Ogwahẽ-ma ramo Hesu-pe onhesũ henonde-py omboete íxupe-vy:

—Xe Járy, ne rembiapo porã eterei. Nde ko ne marangatu tee va'e. Atima voi nde-vy xe mbogwera-gwi. he'i íxupe.

Ovy'a eterei okwera-ma ramo upe Samaria pygwa va'e.

¹⁷⁻¹⁸Upéi Hesu he'i íxupe:

—Ndaha'etí ne anho orombogwera kuri, he'i. —Enterovéa-pe voi ambogwera kuri, he'i. —Ha ne anho mate ereju xe mboete-vy, he'i okwera va'e-pe.

Ha ojogweroaty va'e-pe omombe'u.

—Ko samaritano va'e mate ou jevy xe mboete-vy. Nhande re'ýi e'ỹ va'e mate ovy'a para'e ambogwera-magwi íxupe, he'i. —Nove ndoúiry va'e kwéry-pe ambogwera ave kuri, he'i.

¹⁹Upéi he'i samaritano va'e-pe:

—Epu'ã katu. Orombogwera-ma. Xe-rehe erejerovia-gwi ororesende-ma, he'i íxupe Hesu.

Kóixa Nhandejáry nhande ruvixa ramo

(Mt 24.23-28,37-41)

²⁰Gwĩ fariseu kwéry oporandu Hesu-pe:

—Araka'e tipo ojekwaa-ta Nhandejáry nhande ruvixarã, he'i oporandu-vy.

—Ndaha'etí nhande resa-rupi jahexa Nhandejáry nhande ruvixa ramo, he'i omombe'u-vy íxupe kwéry. ²¹—Upéa-rehe ndikatúí ere, “A-py ou-ma Nhandejáry. A-py ojekwaa-ma huvixarã”. Nde'íry ave “Upe-py ou-ma. Ojekwaa-ma huvixarã upe-py” nde'íry ave, he'i Hesu omombe'u-vy. —Avave ndohexái kipy po oiko. Nhande py'apy-py oiko nhande ruvixarã, he'i upe fariseu kwéry-pe ombo'e-vy.

²²Upéi he'i doze gwemimbo'e kwéry-pe:

—Ou va'erã peẽ-my peteĩ áry xe rexase eterei va'erã. Ha xe Nhande Ryke'y tee va'e-rehe peje-ta, “Ahexa nga'u íxupe. Peteĩ áry-rupi ahexa ramo íxupe avy'a va'erã” peje arã xe-rehe. Ha ndaxe rexa mo'ái-ta vyteri. ²³“Ogwahẽ-ma ko'a-py” he'i rei va'erã xe-rehe. Ijapu rei va'erã xe-rehe. “Ogwahẽ-ma upe henda-py” he'i rei va'erã xe-rehe ijapu va'e. Ani erejerovia teĩ hese kwéry. Ani teĩ ereho xe reka-vy ave. ²⁴Agwahẽ ramo xe, Nhande Ryke'y tee va'e, enterove oikwaa-ta, ohexa-ta xe gwahẽ ramo. Ha'e-ta peẽ-my: Omohembipepa aragwaju-rami va'erã peẽ-my agwahẽ-ma ramo. Xe rexapa va'erã.

²⁵—Ahasa asy ranhe-ta. Áynga xe joko-ta ija'e'ỹ-ta xe-rehe. ²⁶Xe Nhande Ryke'y tee va'e agwahẽ jevy ramo, yma gware-pe ojehu hagwe-rami ave, ojehu jevy va'erã. Oikove vyteri jave Noé amyri ²⁷gwĩ kente kwéry oiko rei araka'e. Okaru, oy'u, omenda ave,

* 17:14 Lv 14.1-32

ome'ë gwajýry omenda hagwã ave. Upéixa rei okwa araka'e hikwái. Nhandejáry-rehe katu nopenáiry araka'e hikwái. Upéi Noé oike okanoagwasu-py. Oike rire-ma, pya'e oky araka'e. Tuvixa oky. Yvu mbovu-vy araka'e oky. Ha onhehundipa oike e'y'ý va'ekwe gwive.

²⁸—Upéixa ave ojehe araka'e myamyrí Sodoma tetã mygwa kwéry-pe. Oiko-ma jave Ló amyrí upe pygwa kwéry oiko rei ave araka'e. Okaru, oy'u rei, ojogwa omba'erã, ovende ave omba'ekwe, kokwe ojaty, gwogarã omopu'ã ave. Upéixa rei okwa araka'e. ²⁹Upéi Ló osë araka'e tetã-gwi oho-vy. Osëha áry-py ho'a tata yváy-gwi ohapy hagwã araka'e tetã mygwa. Iku'i sa'yju va'e ho'a-ma araka'e ohapy hasyve hagwã tetã mygwa kwéry ohundipa hagwã.

³⁰—Upéixa oiko-ta ave agwahë jevy ramo. Xe, Nhande Ryke'y tee va'e agwahë jevy-ta. ³¹Agwahëha áry ramo xe-rehe mate pepena va'erã. Agwahë jave ereime ramo óga ári, ani tei ereike koty-py mba'eve ereraha hagwã. Ereime ramo kokwe-py, ani erejevy nde róga-py. ³²Ne mandu'a jevy katu Ló amyrí rembireko-rehe. Ojevysse mo'ã onhehundima va'ekwe. ³³Gwekove-rehe hakate'y'ý va'e katu, onhehundipa ete va'erã. Ndohói va'erã Nhandejáry renda-py. Ha xéhegwi gwekove-rehe nopenái va'e, ohekoviarõ arã hekove íxupe. Oresende-ta íxupe Nhandejáry.

³⁴—Ha'e-ta ave peë-my: Pyhare-py agwahë jevy ramo, mokõi va'e oke jave koty-py. Petei va'e-pe Nhandejáry ogweraha va'erã. Inhirügwe-pe katu oheja va'erã. ³⁵Mokõi kunha hu'irá ojoso va'e oime jave agwahë ramo, petei va'e-pe Nhandejáry ogweraha va'erã. Inhirügwe-pe oheja va'erã. ³⁶Mokõi oime jave kokwe-py agwahë ramo, petei va'e-pe ogweraha va'erã. Inhirügwe-pe oheja va'erã, he'i ombo'e-vy doze gwemimbo'e kwéry-pe.

³⁷Upéa-rehe oporandu íxupe:

—Mamo típo oiko va'erã upéa, ore Járy, he'i íxupe.

Upéi Hesu he'i íxupe kwéry:

—Anhete voi oí ramo hetekwe, yruvu kwéry ogwey katu ete arã ho'u hagwã. Anheteve ha'e-ta nde-vy: Oikopa-ma ramo xe remimombe'u, aju jevy-ma va'erã, he'i Hesu omombe'u-vy gwemimbo'e kwéry-pe.

18

Tembirekokwe ojerure rure va'e rehegwa nhe'ë

¹Upéi Hesu he'i gwemimbo'e kwéry-pe:

—Tapembojeupi meme katu pene nhe'ë Nhandejáry-pe peiko-vy. Ani ne ate'y'ý tei ne nhe'ë erembojeupi-vy, he'i.

Upéi arandu nhe'ë omombe'u íxupe kwéry. Tembirekokwe rehegwa nhe'ë-rami omombe'u.

²—Mburuvixa ipy'a vai va'e oí va'ekwe petei tetã-my. Ndojerovíai Nhandejáry-rehe nopenái hese. Ojúpe gwarã mate ojapo. Ndojapóiry mba'eve avave pegwarã.

³—Ha petei tembirekokwe upe pygwa va'e oho meme mburuvixa renda-py. Ojerure rure rei íxupe ohepy hagwã imbohassa ashare-pe. Ha ndojapói inhe'ë. ^{4,5}Jerureha ndojapóiry íxupe. Are ohendu hendu rei kunha nhe'ë. Upéi he'i opy'apy-py: “Xe mokane'o eterei ko tembirekokwe nhe'ë. Upéa-gwi ajapo-ta inhe'ë. Ndaha'úi pono xe mbohassa asy Nhandejáry. Napenáí hese. Ndaha'úi ave pono onhe'ë vai hagwã avave xe-rehe. Xe napenáiry avave-rehe aiko-vy. Pono xe toryvave ajapo-ta íxupe inhe'ë, aipytygwõ-ta íxupe” he'i mburuvixa kunha-rehe, he'i Hesu omombe'u ramo arandu nhe'ë.

⁶Upéi he'ive íxupe kwéry:

—Ha'e-ta peë-my: Upe mburuvixa ipy'a vai jepe hembiaopo porã nainhate'y'yi va'e-pe. Hembijerure ojapo voi íxupe.

⁷Ha Nhandejáry katu ipy'a porã ete nhane ndive. Gwembiporavo-pe oiporiahuvereko meme. Oipytygwõ-ta íxupe, omondo mondo íxupe onhe'ë va'e-pe oipytygwõ. Ohendu voi inhe'ë. Ani ere tei, “Hi'are eterei Nhandejáry xe rembijerure ojapo hagwã”. Omondo mondo íxupe onhe'ë va'e-pe oipytygwõ. Ani ave ere tei, “Xe nhe'ë nohendúí para'e

ohendu para'e Nhandejáry” ani ere teĩ Nhandejáry-rehe, he'i Hesu omombe'u-vy. — Ereikokwe-vy joty ani ne ate'ỹ teĩ eremondo hagwã ne nhe'ẽ íxupe. Áry-py, pyhare-py ave eremondo mondo ne nhe'ẽ íxupe. Nde poriahuvereko-ta ne rembijerure ojapo-ta nde-vy. ⁸Ndahi'aréi ne pytygwõ hagwã nde hese erejerovia va'e, he'i. —Xe ko Nhande Ryke'y tee va'e. Agwahẽ jevy ramo, ndahetái arã voi nipo ra'e upéixa ojerure rure va'e xe ra'arõ va'erã. Ani katu ne ate'ỹ eterei ereiko-vy. Emondo mondo katu ne nhe'ẽ Nhandejáry-pe, he'i Hesu omombe'u-vy.

Mokõi kwimba'e ombojeupi onhe'ẽ Nhandejáry-pe rehegwa nhe'ẽ

⁹Upéi Hesu omombe'u jevy ojogweroaty va'e-pe. Upe-py oĩ onhemboete rei va'e kwéry. Oĩ ave gwapixa-rehe onhe'ẽ rei rei va'e kwéry. Upéa-rehe Hesu onhemonhe'ẽ íxupe kwéry. Arandu nhe'ẽ oiporu omombe'u hagwã mba'eixagwa py'a jareko nhambojeupi ramo nhane nhe'ẽ Nhandejáry-pe. Mokõi kwimba'e rehegwa nhe'ẽ-rami omombe'u.

¹⁰—Mokõi kwimba'e oho ojeporahéi haty-py ojapo hagwã oração. Peteĩ fariseu va'e, outro plata-py nhane mbopaga va'ety. ¹¹Ha omondo hagwã onhe'ẽ Nhandejáry-pe upe fariseu va'e onhembo'y. Ipy'apy-py ae onhemongeta. Onhembotuvixa eterei-gwi onhenohẽ porã mo'ã Nhandejáry-pe.

—“Tupã xe Járy” he'i onhemongeta-vy. “Avy'a ete xe rekoha-rehe” he'i mo'ã. “Ambue kwéry-rami ndaikói voi xe” he'i. “Imonda e'ỹ va'e xe. Hekoha vai e'ỹ va'e ave xe. Namenda mendái kunha ambue-rehe ave aiko-vy. Naxe rembiapo va'ry voi avave-rehe” he'i mo'ã. “Avy'a eterei. Xe ndaikói voi ko plata-py oporombopaga va'ety rekoha-rami” he'i onhembotuvixa-vy. “Xe rembiapo porã voi aiko-vy” he'i. ¹²“Ha nde-rehe ajerovia-gwi peteĩ teĩ semana mokõi áry meme ahasa asy karu e'ỹ reheve aiko-vy” he'i. “Xe areko va'e aipapa meme dez-gwi aipe'a peteĩ ame'ẽ nde-vy gwarã” he'i omondo-vy onhe'ẽ Nhandejáry-pe onhenohẽ porã hagwã mo'ã íxupe, he'i Hesu omombe'u-vy.

¹³—Ha upe oporombopaga va'ety oĩ oíke hagwã ojeporahéi haty-py. Mombyry-rupi rei oiko. Noma'ẽ ma'ei voi oiko-vy oĩ eterei-gwi. Ndojeesaupíry ojahe'o voi oĩ-vy onhemboasy-vy “Xe ko xe py'a vai voi aiko-vy” ho'e-vy hasẽ. “Tupã, xe Járy” he'i, “Xe poriahuvereko katu” he'i onhemboasy-vy íxupe. “Xe rembiapo vai eterei voi aiko-vy” he'i onhemboasy-vy, he'i Hesu omombe'u-vy.

¹⁴Ha he'i ave Hesu:

—Ha'e-ta katu xe: Onhemboasy va'e-gwi omboyke voi-ma hembiaipo vaikwe Nhandejáry. Ohendu voi inhe'ẽ. Ipy'a potĩ-vy oho jevy gwóga-py. Ha upe fariseu va'e-gwi hembiaipo vaikwe nomboyke mo'ãi voi onhenohẽ porãse mo'ã íxupe-gwi, he'i Hesu arandu nhe'ẽ oiporu-vy.

Upéi he'i jevy.

—Anhete ha'e-ta peẽ-my: Onhemboeteseve va'e-rehe avave nopenái arã, ha onhemomirĩ va'e-pe ae katu omboete va'erã, he'i Hesu omombe'u-vy.

Mitãgwe-pe Hesu ohovasa

(Mt 19.13-15; Mc 10.13-16)

¹⁵Ogweru ave okwa-vy Hesu renda-py mitãgwe Hesu omoĩ hagwã opo mitã kwéry-rehe ohovasa hagwã. Ha hemimbo'e kwéry ohexa-ma ramo, hakate'ỹ Hesu-rehe.

—Ani ereru Hesu ha-py mitã mixĩ mixĩ va'e, he'i ojoko-vy.

¹⁶Ha Hesu katu he'i:

—Eheja katu tou mitã'i gwive xe renda-py. Ani erejoko teĩ. Mitã'i reko mirĩ vérami va'e meme omoirũ-ta Nhandejáry gwuvixarã-pe, he'i omombe'u-vy. ¹⁷—Anhete ko ha'e-ta peẽ-my. Nhandejáry oiko ha-rupi huvixa ramo ndaipóri-ta onhembotuvixave va'e. Onhemohekomirĩve va'e ae omoirũ-ta íxupe, he'i Hesu omombe'u-vy.

Imba'e reta va'e onhomongeta Hesu ndive

(Mt 19.16-22; Mc 10.17-22)

¹⁸Peteĩ mburuvixa oporandu Hesu-pe:

—Mbo'eháry, nde reko porã va'e. Mba'e tipo ajapo-ta xe aikove hagwã Nhandejáry ndive opave'y reheve? he'i oporandu-vy Hesu-pe.

¹⁹—Ne mandu'a porã katu ne nhe'ëgwe-rehe, he'i íxupe Hesu. —“Nde reko porã va'e” ere kuri xe-rehe. Nhandejáry, ha'e anho mante heko porã tee va'e, he'i Hesu íxupe.

²⁰—Ereikwaa-ma Nhandejáry omombe'u va'ekwe nhande rekorã, he'i ave Hesu. —Ani ereiko teĩ ambue mbue ndive, he'i. —Ani ereporojuka teĩ. Ani eremonda teĩ. Ani nde apu teĩ avave-rehe. Emboete katu nde ru, nde sy ave. Upéixa omombe'u va'ekwe Nhandejáry nde rekorã, he'i íxupe Hesu.*

²¹—Xe mitã ramogware äy peve upéa nhe'ë namokanhÿi, he'i. —Ahendu vyteri aiko-vy xe, he'i Hesu-pe.

²²Ohendu-ma ramo, Hesu he'i íxupe:

—Peteĩ oĩ va'e nderejapói vyteri, he'i íxupe. —Erereko va'e gwive evendepa katu. Hepykwe ae eru eme'ëmba iporiahu va'e kwéry-pe. Upéixa erejapo ramo, nde rekoha porãrã erereko arã yváy-py. Upe rire eju katu xe moirũ, he'i íxupe Hesu.

²³Ohendu-ma ramo inhe'ë ndovy'avéi-ma. Ipy'a reraha eterei omba'e reta reta-rehe.

Hasy eterei opamba'e ogwereco va'e oiko hagwã Nhandejáry mburuvixa ramo oiko ha-rupi (Mt 19.23-30; Mc 10.23-31)

²⁴Ha Hesu oma'ë hese. Oikwaa-ma ndovy'avéi-ma upe va'e. Upéixa-gwi he'i onhondive oĩ va'e-pe:

—Hasy peve opamba'e ogwereco va'e omoirũ hagwã Nhandejáry gwuvixarã-pe, he'i.

²⁵—Hasy eterei nhambohasa ka'ijugwasu kwa-rupi mymbagwasu camelo, ndaijaséiry. Ha hasyve imba'e reta va'e omoirũ hagwã Nhandejáry gwuvixarã-pe, he'i.

²⁶Ha ohendu va'e kwéry he'i:

—Kiva'e onheresende-ta, aipo ramo? Hasy eterei nipo nhanheresende hagwã ra'e, he'i.

²⁷Ha Hesu katu he'i:

—Peë-my hasy eterei va'e ndahasy mo'ãi Tupã Nhandejáry-pe. Ha'e anho mante ne resende va'erã, he'i.

²⁸Ha upéi katu he'i íxupe Pedro:

—Ore niko orogwereco va'e gwive orohejapa oroju-vy oromoirũ hagwã, he'i Hesu-pe.

²⁹—Anhete ko xe ha'e-ta nde-vy, he'i íxupe Hesu. —Xe moirũ hagwã gwóga, gwóga pygwa ave oheja va'e hetave ojohu va'erã gwembiejare rekoviarã. Gwembireko, gwyke'yry, gwyvýry, gweindýry, gwa'yry, gwajýry, oména, omembýry, gwykéry, okypy'y kwéry, okyvýry, gwu, osy oheja ramo omoirũ hagwã Nhandejáry gwuvixarã-pe, ³⁰hetave tave ome'ë va'erã íxupe Nhandejáry. Ohexakwaa rei va'erã íxupe ko'äy, ha yvy opa-ma rire aikove meme va'erã Nhandejáry ndive opave'y reheve, he'i Hesu.

Omanotaha omombe'u Hesu

(Mt 20.17-19; Mc 10.32-34)

³¹Upéi ohenói jevy gwĩ doze gwemimbo'e íxupe kwéry anho omombe'u hagwã.

—Jaha jaiko-vy Jerusalém tetã-my. Ha xe Nhande Ryke'y tee va'e ahasa asy-ta upe-py, he'i. —Nhandejáry nhe'ë-py omombe'u va'ety kwéry omohenonde va'ekwe ihai-vy mba'e pa ojehu-ta xe-vy. Upe ohai va'ekwe xe rehegwa äy ojapopa-ta, he'i. ³²—Xe pyhy-ta xe reraha judeu e'y va'e kwéry-pe. Onhembohory-ta xe-rehe, xe rereko asy-ta ave, onygwō-ta ave xe-rehe. ³³Xe mbopi rire xe juka-ta. Mbohapy áry-py anhemoingove jevy-ma va'erã, he'i gwemimbo'e kwéry anho-pe onhemombe'u-vy Hesu.

³⁴Ha hemimbo'e kwéry nohendu kwaái voi Hesu nhe'ë. Ojeapysaka rei hikwái. Onhenhomi voi íxugwi kwéry pono oikwaa he'ise va'e.

Jericó tetã mygwa hesapyso e'y va'e-pe ombogwera Hesu

(Mt 20.29-34; Mc 10.46-52)

³⁵Ogwahẽ-tama Jericó tetã-my. Hi'agwĩ-ma oĩ ramo tetã hesapyso e'y va'e ogwapy oĩ-vy tapegwasu rembe'y-py. Omba'e repyrã-rehe ojerure oĩ-vy. ³⁶Ha Hesu ndive ojogweroaty va'e ohasa oje'ói-vy tape-rupi. Ohendu ramo ijayvu, oporandu ohexa va'e-pe:

* 18:20 Êx 20.12-16

—Mbava'e tipo ojapo oje'ói-vy? he'i hese.

³⁷—Hesu Nazaré pygwa ohasa oje'ói-vy, he'i íxupe.

³⁸Ohendu-ma ramo, onhe'ẽ hatã ohenói-vy:

—Hesu, Davi remiarirõre, xe poriahuvereko katu, he'i.

³⁹Henonde-rupi ohasa va'e inhe'ẽ ojoko mo'ã íxugwi:

—Ekirirĩ katu, he'i íxupe omongirirĩse mo'ã-vy íxupe.

Ha'e katu hatãve tãve joty osapukái oĩ-vy:

—Xe poriahuvereko katu, Davi remiarirõkwe, he'i joty.

⁴⁰Upéi opyta-ma Hesu.

—Eru íxupe, he'i.

Ou-ma ramo oporandu íxupe Hesu:

⁴¹—Mbava'e tipo ereipota xe ajapo hagwã nde-rehe? he'i hesapyso e'ỹ va'e-pe ijeroviaha ojekwaa uka hagwã.

—Eme'ẽ xe resarã xe-vy, mbo'eháry, he'i.

⁴²—Ema'ẽ. Nde resapyso-ma ngatu, he'i. —Xe-rehe erejerovia-gwi erekwera-ma, he'i.

⁴³Onhe'ẽ jave okwera-ma. Okwera-ma ramo, omoirũ-ma íxupe oho-vy. Omboete ete Nhandejáry-pe oho-vy Hesu rapykwéri.

Ha upe pygwa oĩ va'e gwive, upéa ohexa va'e gwive, Nhandejáry-pe omomba'egwasu ete voi.

19

Zaqueu rehegwa nhe'ẽ

¹Ogwahẽ-ma Hesu Jericó tetã-my. Ohasa oho-vy tetã-rupi. ^{2,3}Ha peteĩ mburuvixa ohexase eterei Hesu-pe. Pirapire-py nhane mbopaga va'ety kwéry-pe mburuvixa upéa. Imba'e reta va'e. Ikarape va'e. Héry va'e Zaqueu. Ikarape-gwi ndikatúí ohexa kente ári-rupi Hesu-pe. Heta eterei ojogweroaty va'e ogweroajere Hesu-pe omanha manha hese-vy. ⁴Upéi Hesu oho hagwã-rupi oho yvyra-rehe ojeupi Zaqueu. Oripara oho-vy yvate ojeupi oĩ-vy ohexa hagwã Hesu-pe.

⁵Ogwahẽ-ma ramo Hesu upe yvyra gwy-py, opyta. Orepara yvate-koty oma'ẽ Zaqueu-rehe.

—Zaqueu, egwejy. Pya'e egwejy. Aha-ta nde róga-py, he'i íxupe.

⁶Pya'e ogwejy oho ohogwaitĩ Hesu-pe. Ovy'a eterei Zaqueu. He'i Hesu-pe:

—Jaha katu, he'i.

Pya'e oho indive.

⁷Hexaháry ndojohu porãi. Ojohu vaipa voi. Onhe'ẽ vai vai Hesu-rehe.

—Hesu omoirũ rei opaixagwa va'e-pe. Ojejavy va'ety jepe, Hesu katu omoirũ joty íxupe, he'i hese ojohu vai-vy.

⁸Ha upe rire, ogwahẽ-ma rire, hóga-py oĩ-ma rire, Zaqueu he'i:

—Xe Járy, arova katu xe rekoha, he'i íxupe. —Iporiahu va'e kwéry-pe ame'ẽ-ta heta xe mba'ekwe. Amboja'o ja'o-ta xe rembierekókwe. Ame'ẽ-ta iporiahu va'e kwéry-pe. Ha xe rembiapo vaikwe-gwi heta voi xe pirapire, he'i. —Peteĩ va'e-rehe areko ramo xe rembiapo vai-rupi ahekoviãrõ-ta ame'ẽve-ta voi. Ijarykwe-pe irundy voi ame'ẽ-ta hekovia. Arova-ta ave xe rekoha, he'i Hesu-pe.

⁹Upe-ma ramo Hesu he'i:

—Áy eremoirũ-ma Nhandejáry nde ruvixa-pe. Omboyke-ma ndéhegwi ne rembiapo vaikwe. Ne resende-ma. AAraão remiarirõre voi ko nde. ¹⁰Xe, Nhande Ryke'y tee va'e agwahẽ-ma aju-vy aheka Nhandejáry-gwi mombyry oiko va'e-pe aresende hagwã.

Mburuvixagwasu oplata oiporu uka va'e rehegwa nhe'ẽ

(Mt 25.14-30)

¹¹Upe nhe'ẽ ohendu hikwaí. Ha namombyry etéiry Jerusalém tetã-gwi. Upéixa-gwi ohendu-ma ramo upe nhe'ẽ ojogweroaty va'e he'i opy'a-py. “Ojekwaa-tama para'e Nhandejáry nhande ruvixarã. Ogwahẽ-tama Hesu Jerusalém-my” he'i. “Ojekwaa-tama para'e nhande ruvixarã.”

Upéa-rehe Hesu omombe'u jevy íxupe kwéry arandu nhe'ê mburuvixagwasu oplata oiporuruka va'e rehegwa nhe'ê-rami. He'i:

¹²—Peteĩ mburuvixa oho mombry. Yvy ambue-py oho onhemomburuvixagwasu hagwã. Oiko-ma ramo mburuvixagwasu, ou jevy va'erã oiko hagwe-py. ¹³Oho e'ỹ ngatu ohenói gwĩ dez va'e gwembigwái. Peteĩ teĩ-pe ome'ê plata. Peteĩ meme ome'ê íxupe ohenói gwĩ dez va'e gwembigwái-pe. “Ko xe plata eiporu porã erembohe'yi hagwã xe rapykwe-py. Agwahê jevy-ma aju-vy ramo, aporandu jevy arã nde-vy he'yiverã-rehe” he'i omanda-vy gwembigwái-pe.

¹⁴—Ha heta he'yi kwéry ndija'ei rei mburuvixa-rehe. Upéixa-gwi nhe'ê rei omondo hapykwéri mburuvixave va'e-pe: “Upe va'e ore ndoroipotái ore ruvixarã. Ipogwy-py ndoroikoséiry. Hekoha vai eterei” he'i rei hese.

¹⁵—Oiko-ma ramo mburuvixagwasu ramo, ogwahê jevy ovyvy-py. Upéi ohenói gwembigwái kwéry oplata rehegwa oikwaa hagwã.

¹⁶—Ogwahê ppy va'e omombe'u íxupe: “Xe ruvixa, aiporu va'ekwe nde plata” he'i omombe'u-vy. “Ereme'ê peteĩ xe-vy va'ekwe amoive nde-vy. Ambohekovia nde-vy dez jevy” he'i omombe'u-vy.

¹⁷—Ovy'a hemimbohekoviakwe-rehe mburuvixa. “Iporã voi” he'i. “Xe rembigwái porã voi, nde. Ndahetái mba'e jepe erenhangareko kwaa porã hese. Upéixa-gwi dez tetã mygwa-pe ereiko-ta mburuvixa ramo” he'i íxupe.

¹⁸—Upéa ogwahê rire, peteĩ jevy ogwahê: “Peteĩ nde plata aiporu-gwi amoive nde-vy cinco jevy ave” he'i íxupe.

¹⁹—“Aipo ramo erenhangareko kwaa ave nde. Upéixa-gwi ereiko-ta mburuvixa ramo. Cinco tetã va'e-rehe erenhangareko-ta” he'i gwembigwái-pe.

²⁰—Upe rire ou peteĩ jevy hembigwái ave he'i gwerekwa-pe: “Ame'ê jevy-ta nde-vy nde plata” he'i íxupe. “Upe peteĩ ereme'ê va'ekwe xe-vy anhangareko porã hagwã anhwagwã imoĩ-vy ao-py. ²¹Xe ko, atĩ voi ndéhegwi” he'i íxupe. “Aikwaa voi ne rakate'ỹha. Ereme'ê e'ỹ va'ekwe jepe, ereipe'a joty ijáry-gwi. Erenhemity e'ỹ reheve, eremono'õ uka vai joty ne mba'erã ijarykwe-gwi. Upéixa-gwi atĩ ndéhegwi” he'i.

²²—“Ne rembiapo vai voi ko nde xe-rehe” he'i herekwa íxupe. “Nderevaléi voi” he'i ave. “Ma'erã-gwi ndereiporu porã xe plata?” he'i íxupe. “Ere kuri xe-vy: Ne rakate'ỹha aikwaa voi, ere” he'i íxupe. “Ereme'ê e'ỹ va'ekwe ereipe'a ijáry-gwi, ere xe-vy, Eremono'õ uka vai ne mba'erã ijarykwe-gwi, ere ave kuri xe-vy. ²³Aipo ramo ma'erã-gwi nereme'êi va'ekwe xe plata pirapire oiporuruka va'e-pe? Oiporuruka va'ekwe repy ohekoviario jevy hagwã xe-vy. Ne rembiapo vai voi xe-rehe” he'i ovy'are'ỹ-vy inhate'ỹ va'e-pe.

²⁴—Upéi he'i gwembigwái ambue-pe: “Eipe'a jevy xe plata íxugwi. Upéa ave ereme'ê jevy hagwã upe dez plata omono'õ va'e-pe” he'i.

²⁵—Upéa-rehe he'i gwerekwa-pe: “Ogwereko-ma dez. Naiporã ereme'ëve íxupe” he'i jevy.

²⁶—“Iporã ereme'ëve íxupe” he'i herekwa. “Nhande re'yi he'i meme: Heta ogwereco va'e-pe hetave ome'ê jevy va'erã. Ha inhate'ỹ va'e, naimba'e rexakwái va'e-gwi oipe'apa va'erã íxugwi. Mixi ogwereco ramo jepe, ogwereco va'e gwive oipe'apa jevy-ta íxugwi” he'i. ²⁷“Ha'e-ta ave peẽ-my: Peru katu xe-rehe ija'e'ỹ va'ekwe. Ndaxe potáiry va'ekwe gwuvixarã. Xe renonde-py jevy pejuka íxupe kwéry” he'i omanda-vy ijukaharã-pe, he'i Hesu nhande ruvixa ramo ndojehexa uka pya'eséi-vy.

Jerusalém tetã-my ogwahê Hesu

(Mt 21.1-11; Mc 11.1-11; Jo 12.12-19)

²⁸Upe rire, upéa omombe'u rire, Hesu oho Jerusalém tetã-my. Gwemimbo'e kwéry renonde-rupi oho tape-rupi oje'ói-vy. ²⁹Ha nogwahêi vyteri, onhemoagwĩ ranhe Betfagé tetã mirĩ-gwi. Betânia tetã-gwi ave. Yvyatyrysu Oliveiras ppy-py ogwahê gwahê ranhe oho-vy. Upe-gwi omondo gwenonde-rupi mokõi gwemimbo'e:

³⁰—Tereho tetã mirĩ-my ore renonderã-rupi, he'i íxupe. —Ereike-ma ramo eretopa-ta mburika'i onhenhapytĩ ha-py. Hi'ári ojejeupi e'ỹ va'e. Ejora heru-vy, he'i. ³¹—Erejora

ramo mburika, “Ma'erã tipu erejora mburika?” he'i va'erã nde-vy. Aipo ramo ere íxupe, “Araha-ta. Oikotevê hese nhande ruvixa” ere kuri íxupe, he'i imondo-vy.

³²Ha upéi katu oho upe mokõi va'e ha otopa omombe'u hagwéixa. ³³Ojora jave mburika'i ijáry oporandu mokõi hemimbo'e-pe:

—Ma'erã tipu erejora xe rymba mburika'i? he'i.

³⁴—Nhande ruvixa oiporu-ta íxupe. Oiporu hagwã araha-ta, he'i.

—Aipo ramo eraha, he'i.

³⁵Ha upéi katu ogweru Hesu-pe. Omoĩ hi'ári oao. Ha Hesu-pe ohupi omoĩ mburika ári oho mombyryve hagwã. ³⁶Ha oho jave heta va'e omboi oao oipyo hagwã Hesu ogwata hagwã hi'ári. Haperã-rupi omoĩ omboete-vy. Hesu mboete-vy ha'e oipyo oao. Ogwey oje'ói-vy hikwái. ³⁷Upéi ogwahẽ-tama ramo ogwey tape-rupi vyvaty Oliveiras ári-gwi. Ogwey oje'ói-vy jave, ogwahẽ-tama ramo Jerusalém tetã-my, hese ojerovia va'e kwéry ogwerohory Hesu-pe. Osapukái joa oporahéi ave omboete Nhandejáry-pe. Heta hembiaapo porã hexapyrã-rupi ohexa va'ekwe-rehe omboete íxupe:

³⁸—Ereju-ma, he'i. —Iporã katu, he'i osapukái-vy íxupe. —Nhandejáry ombou-ma nhande-vy mburuvixagwasu. Tohovasa vasa katu Nhandejáry, he'i hese. —Toiko yváy-py py'agwapy porã. Nhandejáry yváy-py oĩ va'e-pe jaha nhamboete, he'i oporahéi-vy.*

³⁹Upéa-rehe gwĩ fariseu va'e oĩ jave ojogweroaty va'e pa'ũ-my he'i Hesu-pe:

—Mbo'eháry, ejoko katu íxupe kwéry pono aipo-rami he'i nde-rehe, he'i Hesu-pe.

⁴⁰—Tekotevê oiko xe mboete va'erã. Kente kwéry naxe mboetéi ramo ra'e Nhandejáry omonhe'ẽ uka va'erã ra'e ita kwéry-pe xe mboete hagwã. Kente rekoviarã xe mboete hagwã, he'i Hesu fariseu kwéry-pe.

Hesu ojahe'o Jerusalém tetã mygwa kwéry-rehe

⁴¹Ogwahẽ-tama ramo, ohexa-ma ramo Jerusalém tetã Hesu ojahe'o upe pygwa kwéry-rehe.

⁴²—Apomboasy voi peẽ-my. Ndapeikwaái vyteri mba'eixagwa pa pene mbopy'agwapy, he'i. —Nhandejáry xe mbou va'ekwe pene mo'arandu hagwã mo'ã ha napehenduséi xe nhe'ẽ. Napehenduséi-gwi pene arandurãgwe okanhy-ma pendéhegwi. ⁴³Ogwahẽ-tama peẽ-my pehasa asy hagwã. Pende-rehe ija'e'ỹ va'e kwéry ou va'erã. Pene retã jerekwe-rehe ojo'o-ta yvykwa. Omopu'ã-ta ave ne mbotyhaty ponove avave osẽ pene retã-gwi, pende jopy-ta. ⁴⁴Pene hundipa-ta. Oity-ta pene retã. Ha peẽ kwéry upe-py oĩ va'e onhehundipa-ta. Ita-gwi pejapo va'ekwe pende róga kwéry. Ha upe ita kwéry oity-ta. Ndohejái arã ni pete'ĩ ita hendagwe-py. Oitypa ete arã. Upéixa pene mbohasa asy-ta. Nhandejáry xe mbou-ma ha “Nhande remiha'arõ ogwahẽ-ma ra'e” nderéiry xe-rehe. Ndapejeroviáiry joty xe-rehe. he'i. —Upéa-rehe pene hundipa-ta Nhandejáry, he'i Hesu Jerusalém mygwa kwéry-rehe.

Omba'evende va'e kwéry-pe omosẽmba Nhandejáry róga kakwaa-gwi Hesu

(Mt 21.12-17; Mc 11.15-18; Jo 2.13-22)

⁴⁵Upe rire oiko Hesu Nhandejáry róga kakwaa-py. Omba'evende va'e-pe omosẽmba.

⁴⁶He'i íxupe kwéry onhemonhe'ẽ-vy:

—Oĩ kwatia-rehe Nhandejáry nhe'ẽ he'i: “Héry-ta xe róga xe mboete haty inhe'ẽ mondo haty Nhandejáry-pe”. Ha peẽ katu peiporu Nhandejáry róga oporosakea nhemi va'e róga-rami, he'i íxupe kwéry Hesu omosẽ-ma ramo imondo-vy.*

⁴⁷Ha Hesu oho meme Nhandejáry róga kakwaa-py ombo'e mbo'e oiko-vy. Iko'ẽmba ẽmba ombo'e meme-vy upe-py.

Ha pa'i ruvixa kwéry, judeu rekombo'ehaty kwéry, judeu ruvixa kwéry ave oheka heka ojuka hagwã Hesu-pe. ⁴⁸Ha ndotopái mba'e-rehe ojuka íxupe. Enterovéa kente kwéry ojeapysaka katu katu eterei ohendu hagwã inhe'ẽ.

*

19:38 Sl 118.26

*

19:46 Is 56.7; Jr 7.11

20

“Kiva'e nhe'ë-rupi ko'ã va'e erejapo?” oporandu Hesu-pe

(Mt 21.23-27; Mc 11.27-33)

¹ Ha petei áry Hesu oime jevy Nhandejáry róga kakwaa-py omombe'u mbe'u hagwã Nhandejáry nhe'ë porã. Ha omombe'u jave ou henda-py pa'i ruvixa kwéry, judeu rekombo'ehaty kwéry, judeu ruvixa kwéry ave:

² —Kiva'e nhe'ë-py ko'ã va'e erejapo? he'i. —Kiva'e tipo nde-vy a-rami oporombo'e uka ave nde-vy? he'i ave. Oporandu Hesu-pe hikwái.

³ —Xe ave aporandu-ta peë-my petei mba'e, he'i. —Pemombe'u ranhe ramo xe-vy aporandu-ta va'e-rehe, amombe'u-ta ave nde-vy kiva'e nhe'ë-py xe rembiapo, he'i.

Upéi oporandu omokiriri hagwã íxupe kwéry:

⁴ —Kiva'e nhe'ë-py va'ekwe João Batista amyri oporomongarai oiko-vy va'ekwe? Nhandejáry nhe'ë-py para'e, teko rei nhe'ë-py para'e oporomongarai oiko-vy ha'e ae ho'arandu-rupi rei para'e ojapo? he'i. —Emombe'u ranhe katu xe-vy, he'i íxupe kwéry Hesu. Ha'e katu oikwaa-ma.

⁵ Upéa-rehe oporandu randu ojóupe:

—“Nhandejáry nhe'ë-py katu oporomongarai va'ekwe” ja'e ramo “Ma'erã nderejeroviái va'ekwe hese?” he'i arã nhande-vy, he'i ojóupe hikwái. ⁶ —Ha, “Teko rei nhe'ë-py oporomongarai va'ekwe” ja'e ramo, nhande api va'erã ita-py kente kwéry nhande juka hagwã, he'i ojóupe. “João niko Nhandejáry nhe'ë-py omombe'u va'ety voi” he'i kente kwéry hese, he'i ojóupe hikwái. —Iporãve nhakiriri rei hese jaiko-vy, he'i ojóupe.

⁷ Upéa-rehe he'i Hesu-pe:

—Ndoroi kwaáiry, he'i mo'ã.

⁸ —Aipo ramo, xe ave namombe'u mo'ãi peë-my kiva'e pa ojapo uka xe-vy ko'ã va'e, he'i íxupe kwéry Hesu.

Arandu rehegwa nhe'ë uvaty-py omba'apo va'e rehegwa nhe'ë-rami

(Mt 21.33-46; Mc 12.1-12)

⁹ Ha upéi katu omombe'u upe pygwa-pe arandu rehegwa nhe'ë uvaty-py omba'apo va'e rehegwa-rami:

—Oĩ va'ekwe uva onhoty va'ekwe. Oho onhoty uvaty omoi hagwã. Ha omoi rire oheja omba'apo va'erã-pe yva aju omboja'o ja'o arã ime'ë-vy va'e-pe. Upéi oho mombry. Tetã ambue-py hi'are voi oiko-vy. ¹⁰ Hi'aju ramo omondo va'erã ivía ramo gwembigwái omboja'o hagwã yva mbyte-rupi ogweruruka hagwã ojéupe. Ha uvaty-py omba'apo va'e katu hembigwái-pe oinupã jevy imbou-vy. Nome'ëi íxupe ogweraha va'erã. Ombojevy oinupã-vy. ¹¹ Ambue jevy omondo ivía ramo. Ha'e kwéry oinupã onhembosarái hese, ombojevy rei ave mba'eve e'ý ogweru hagwã íxupe nomboetéi-gwi. ¹² Ambueve omondo jevy ombohugwypa, omonha imbojevy imbou-vy. ¹³ Upe rire uvaty járy he'i opy'a-py: “Mbava'e tipo ajapo-ta” he'i opy'a-py. “Amondo jevy-ta xe rembiayhu tee. Amondo-ta xe ra'y. Omboete-ta para'e xe ra'y ogwahë oho-vy ramo” he'i mo'ã. Upéa-rehe gwa'ýry omondo. ¹⁴ Ohexa-ma ramo ta'ýry omba'apo va'e he'i ojóupe:

—Upéa uvaty jaryrã. Jaha jajuka íxupe, he'i jevy hese. —Upéixa ramo opyta arã nhande-vy imba'erãgwe, he'i ojóupe. ¹⁵ Upéixa-gwi uvaty-gwi ogwenohë ojuka íxupe. Oikwaa-ma ramo uvaty járy, mba'e tipo ojapo-ta íxupe kwéry? ¹⁶ Ohepy joty va'erã íxupe kwéry. Ogwahë-ta voi ojuka uka upe hembiaapo vai va'e-pe. Ohekoviarõ-ta omba'apo va'erã, he'i Hesu judeu ruvixa kwéry rekokwe oikwaa uka-vy.

Ohendu-ma ramo Hesu nhe'ë, upe uvaty rehegwa-rami hesegwa omombe'u va'e nhe'ë, he'i:

—Niporã voi oiko ramo upéixa, he'i.

¹⁷ Upéi Hesu oma'ë hese kwéry ha he'i jevy:

—Pene mandu'a kena Nhandejáry nhe'ë ohai uka va'ekwe-rehe.

“Ndovaléi upe ita, he'i óga omopu'ã va'e imboyke-vy. Ha ojohu vai jepe, upe ita óga pytahoha ramo oiporu. Óga pytahoha voi ita.”*
 he'i Nhandejáry kwatia nhe'ê. ¹⁸ Ho'a-ma ramo upe ita-rehe opêmba va'erã ho'a va'e. Ha ho'a-ma ramo upe ita kente ári omongu'ipa-ma va'erã íxupe, he'i jevy ita rehegwa nhe'ê-rami ojéhegwa nhe'ê henduháry rehegwa nhe'ê ave omombe'u-vy.

Iporã tipo japaga nham'e-vy mburuvixagwasu César-pe hemimbopaga uka?
 (Mt 22.15-22; Mc 12.13-17)

¹⁹ Ohendu ramo inhe'ê oikwaa pya'e ojéhegwa hikwái.

—Nhande rehegwa nhe'ê omombe'u Hesu arandu nhe'ê oiporu ramo, he'i ojóupe judeu rekombo'ehaty kwéry, pa'i ruvixa kwéry ave.

Upéa-gwi oipyhyse mo'ã íxupe. Haikyhyje-gwi ndoipyhyjiry. Hesu reroviaha heta oĩ indive-gwi ikyhyje. Nombopoxyséiry íxupe kwéry.

²⁰ Upéixa-gwi ome'ê plata gwembigwairã-pe:

—Peho meme Hesu ndive pemonhe'ê avy hagwã íxupe, he'i ome'ê-vy inhe'ê mbojevay uka va'erã-pe mo'ã hepyrã. —Pejeapysaka porã katu inhe'ê-rehe. Pende rekoha porã va'e-rami peiko-vy pehendu hendu ra'anga inhe'ê. Peteĩ nhe'ê va'e ojavy ramo nhamombe'uta mburuvixa-pe oipyhy uka va'erã ojuka uka hagwã, he'i omonhe'ê avyse mo'ã-vy Hesu-pe.

Inhe'ê avy ramo ohendu hagwã mo'ã oiko indive.

²¹ Aipo ramo imonhe'ê avyharã mo'ã oho indive. Oporandu íxupe:

—Mbo'eháry, jaikwaa anhei-rupi erenhe'ê. Anhei-rupi ne remimombe'u mbe'u, he'i omonhe'ê avyse-vy. —Nrepenái avave-rehe neremo'ái avave-pe. Nde-vy enterovéa peteĩxante. Anheigwa eremombe'u Nhandejáry rape porã-rehe ereporombo'e ramo, he'i.

²² —Iporã tipo nhande judeu reko-rupi jaiko va'e japaga nham'e-ve vy hemimbopaga uka mburuvixagwasu César-pe? Iporã tipo japaga e'ý íxupe? he'i oporandu-vy hikwái Hesu-pe.

²³ Ha Hesu katu oikwaa voi hese. Ndogwerekói ramo gwova-py mba'eve, oikwaa joty ipy'a ky'aha.

²⁴ —Eme'ê xe-vy plata atã mburuvixagwasu remimbopaga uka xe ahexa hagwã, he'i.

Ome'ê rire oporandu rei íxupe kwéry:

—Kiva'e ra'anga oĩ ko'a-py? Kiva'e ohai uka va'ekwe? oporandu rei íxupe kwéry.

—César ra'anga, he'i. —Hembihai uka ave, he'i íxupe.

²⁵ —Aipo ramo, eme'ê César-pe imba'e. Ha Nhandejáry-pe katu eme'ê hemimbota ave, he'i íxupe kwéry Hesu.

²⁶ Ndikatúi omonhe'ê avy íxupe ojogweroaty pa'ũ-rupi. “Hasy va'e-rehe jepe nhaporandu ramo íxupe, omombe'u porã joty” he'i hese opondera-vy. Ha mba'eve noporandu-véi íxupe.

Jaikove jevy va'e rehegwa nhe'ê

(Mt 22.23-33; Mc 12.18-27)

²⁷ Ha upéi ou henda-py gwí saduceu kwéry. “Ndoikovéi-ma va'erã omano va'ekwe” he'i rei va'e saduceu kwéry. ²⁸ Ou oporandu Hesu-pe:

—Mbo'eháry, he'i íxupe hikwái, —Moisés amyri omoĩ va'ekwe kwatia-rehe Nhandejáry remimbota ohai nhande-vy:

“Tyke'ýry omano ramo, oheja ramo gwembirekokwe naimemby jepéi ramo, tomenda katu tyvýry gwovajare-rehe. Upéixa ramo, Ke'y ra'y, he'i mo'ã va'erã imemby ppy-rehe.”*

Upéixa voi Moisés amyri omoĩ va'ekwe nhande-vy kwatia-rehe, he'i.

²⁹ —Oĩ va'ekwe peteĩ tyke'ýry seis tyvýry. Tyke'ýry omenda kunha-rehe. Upéi omano ramo, ndata'ýry jepéiry. ³⁰ Tyvýry omenda gwovajare-rehe. Ndata'ýry jepéi ramo omano

* 20:17 Sl 118.22 * 20:28 Dt 25.5

ave tyv'ýry. Upéi tyv'ýry ambue jevy omenda hese. ³¹ Peteĩ teĩ omenda hese, gwovajare-rehe. Peteĩ teĩ omano ramo ndaita'ýry jepéi hikwái. ³² Upe rire upe kunha ave omano-ma ave. ³³ Oikove jevy ramo, kiva'e rembirekorã upe kunha? Gwĩ sete tyv'ýry kwéry omenda va'ekwe hese, he'i oporandu-vy Hesu-pe upe "Omano va'ekwe ndoikove jevy'i" he'i va'e kwéry.

³⁴⁻³⁵ Ha upéa-rehe Hesu omombe'u íxupe kwéry:

—Amombe'u-ta peẽ-my omano va'ekwe oikove jevymaha. Tekoha-rupi porã oiko va'ekwe gwive onhemoingove jevy rire katu nomendavéi-ma va'erã äygwa omendaharami, he'i íxupe. —Kwimba'e kwéry nomendavéi-ma va'erã. Kunhagwe ave nomendavéi-ma va'erã. ³⁶ Oiko va'erã Nhandejáry rembigwái yváy pygwa reko-rami. Upéixa-gwi nomendavéi-ma va'erã. Nomanovéi-ma va'erã ave, he'i. —Ha'e kwéry Nhandejáry ra'y voi, Nhandejáry rajy ave. Oikove jevy-ma va'erã.

³⁷ Upéixa ave Moisés amyri omombe'u ave omano va'ekwe oikove jevy va'erã. Yvyra ra'y okái va'e rehegwa nhe'ẽ omombe'u ramo, omombe'u ave Nhandejáry nhe'ẽ. He'i Moisés: "Nhandejáry a-rami he'i: Xe-ma Abraão Járy va'e xe. Isaque Járy va'e ave xe. Jacó Járy va'e ave xe"*

he'i Nhandejáry Moisés amyri kwatia-rehe. Ha omanomba rire ae upe myamyri, he'i va'ekwe upéixa, he'i Hesu.

Upéi he'i:

³⁸ —Ha'e-ta katu xe: Nhandejáry ndaha'úi omano va'ekwe Járy. Oikove va'e Járy voi Nhandejáry. Íxupe oikovepa joty, he'i Hesu nhane moingove jevyha-rehe omombe'u-vy.

³⁹ Upéa-rehe gwĩ judeu rekombo'ehaty he'i íxupe:

—Iporã voi ne nhe'ẽ. Hasy va'e-rehe jepe oroporandu ramo nde-vy, eremombe'u porã joty, he'i íxupe.

⁴⁰ Ha upe rire ave ndaipy'agwasuvéi oporandu mba'eve-rehe Hesu-pe. Ndikatúí omonhe'ẽ avy íxupe.

Nhane remiha'arõ va'e Davi remiarirõre
(Mt 22.41-46; Mc 12.35-37)

⁴¹ Ha upéi katu Hesu oporandu imonhe'ẽ avyse mo'ã va'e kwéry-pe.

—Mba'éixa tipo Cristo ymagware Davi remiarirõre? ⁴² Iporahéi kwéry-py kwatia-rehe omoĩ-vy omombe'u va'ekwe Davi Cristo rehegwa nhe'ẽ:

"Nhandejáry he'i xe Járy-pe: Egwapy katu xe yke-rehe, he'i.

⁴³ Xe orombopu'aka-ta ne a'e'ýha-rehe, he'i. Xe yke-rehe eregwapy ereha'arõ-vy nde pogwy-py amoingo hagwã ne a'e'ýha kwéry, he'i Nhandejáry xe Járy-pe."*

Upéixa ohai va'ekwe Davi amyri Nhandejáry kwatia nhe'ẽ héry va'e Salmo-py. ⁴⁴ Ha Davi amyri katu "Xe Járy" he'i Cristo-rehe. Nhane remiarirõ-rehe "Xe Járy" ndaja'éiry. Aipo ramo hemiarirõ pa? he'i Hesu omokiriri-vy íxupe kwéry.

Judeu rekombo'ehaty kwéry reko-rehe Hesu onhemonhe'ẽ
(Mt 23.1-37; Mc 12.38-40)

⁴⁵ Enterovete va'e ohendu jave Hesu he'i gwĩ doze gwemimbo'e kwéry-pe:

⁴⁶ —Xáke, onhemoetese rei judeu rekombo'ehaty kwéry. Oao puku reheve ogwatase voi. Kente kwéry-pe omboete uka onhembotuvixa vixa oho-vy mba'e jogwa haty-py. Ojeporahéi haty-py ogwapyse mburuvixa pa'ũ-my. Mburuvixa gwapy haty-rupi ogwapyse onhembovia ramo jekarugwasu haty-py. ⁴⁷ Ha tembirekokwe rebiporu omonda heraha-vy. Upe rire temixagwã rei omondo mondo ra'anga rei Nhandejáry-pe heta onhe'ẽ enterove ohendu hagwã. Ombohasa asyve-ta íxupe kwéry Nhandejáry, he'i judeu rekombo'ehaty-rehe omombe'u-vy.

* 20:37 Êx 3.6 * 20:43 Sl 110.1

21

Tembirekokwe iporiahu va'e rehegwa nhe'ẽ
(Mc 12.41-44)

¹Ohexa Hesu kente kwéry Nhandejáry roga kakwaa-py. Oma'ẽ oĩ-vy plata mboyru haty-rehe Hesu. Ogwahẽ imba'e heta va'e kwéry omoĩ heta jepe hetave tave omombyta joty ojéupe gwarã. ²Ohexa ave kunha tembirekokwe okweri ome'ẽ va'e mokõi plata atã, omoĩ hyru-py. ³Upe-ma ramo Hesu he'i:

—Anhete ha'e-ta peẽ-my, he'i. —Ko kunha tembirekokwe iporiahu va'e ome'ẽ hetave enterove-gwi. ⁴Ha'e kwéry katu ome'ẽ heta jepe hetave tave omohemby ojéupe gwarã kwéry. Ko kunha katu imboriahu-gwi ome'ẽmba-ma gwembi'u repyrãgwe, he'i Hesu.

Hesu he'i Nhandejáry róga kakwaa opa va'erã
(Mt 24.1-2; Mc 13.1-2)

⁵Oĩ Nhandejáry róga kakwaa-rehe omombe'u mbe'u ojéupe. Iporã eterei omoĩ hese omobjegwa-vy. Hemime'ẽgwe ẽgwe-rehe ita porã porã va'e-rehe onhomongeta hikwái.

⁶Ha Hesu he'i:

—Ogwahẽ va'erã áry gwĩ pehexa va'e gwive ho'apa va'erã. Ndopytái va'erã peteĩ ita ojo'ári, he'i.

Nhandejáry rogakwasu opa va'erã rexa ukaha
(Mt 24.3-14; Mc 13.3-13)

⁷Ha oporandu hikwái Hesu-pe:

—Mbo'eháry, araka'e tipo oiko va'erã upéa? Mbava'e tipo oiko-ta oroikwaa hagwã ojehu-ta ramo ne remimombe'ukwe gwive? he'i oporandu-vy hikwái.

⁸Ha Hesu he'i:

—Aníke penhembotavy teĩ. Heta he'i rei va'erã, “Xe ko Cristo, pene remiha'arõ va'e” he'i arã ijapu-vy. Ani ererovia teĩ íxupe. He'i rei arã ave, “Ogwahẽ-ma hi'óra oiko hagwã Nhandejáry nhande ruvixarã” he'i arã oapu rei-vy. Ani ererovia teĩ íxupe. ⁹⁻¹⁰Nhorairõ rerakwã erehendu ramo ani erekyhyje teĩ. Nhorairõ-py ohekoviarõ arã mburuvixa. Upéa oiko va'erã voi. Upe jave jepe ne'írã vyteri ogwahẽ inhe'ẽ ijapy-py, he'i.

Upéi he'i jevy íxupe kwéry:

—Ojehu va'erã pene mongyhyje va'erã. Yvypóry onhorairõmba va'erã onhondive. Tetã mygwa kwéry onhorairõ va'erã tetã ambue mygwa kwéry ndive. Mburuvixagwasu gwembigwái soldado kwéry-pe omonhorairõ uka ave arã ambue mburuvixagwasu rembigwái soldado kwéry ndive. ¹¹Heta tetã-rupi oiko va'erã yvyrýyí hatã, nhembyahýi ave, ha mba'asy ave oiko va'erã. Oĩ va'erã heta pene mongyhyjeharã. Yváy-rehe ave ojehexa va'erã hexapyrã.

¹²—Ojehu e'ỹ mboyye upéixa pehasa asy ete va'erã. Nde pyhy arã nde reraha ne mbohassa asy-vy, ojeporahéi haty-py ne monhe'ẽ uka hagwã. “Erenhemonhandejáry rei Hesu-rehe” he'i arã nde-vy. Upéi katu ne mombo va'erã preso ojepyta haty-py. Xe-rehe ha-py nde reraha va'erã mburuvixa renda-py, mburuvixagwasu renda-py ave. ¹³Upéixa nde rereko asy va'erã xe rehegwa nhe'ẽ remombe'u hagwã íxupe kwéry. Emombe'u porã katu xe rehegwa nhe'ẽ. ¹⁴Ani nde py'a nhemondýi teĩ ere va'erã-rehe. Xe oromoarandu va'erã. ¹⁵Ne nhe'ẽrã ame'ẽ va'erã nde-vy, ne arandurã ave ame'ẽ va'erã nde-vy ndikatúí hagwã gwĩ nde-rehe ija'e'ỹ va'e ne mboapu. Onhe'ẽ poxy rei rei va'e nane nhe'ẽ mbojeyv kwaái va'erã.* ¹⁶Nde re'ýi ete va'e kwéry ave pende rereko asy va'erã. Nde ru, nde sy, nde ryke'y, nde ryvy, ne reindy, nde kyvy, nde kypy'y, nde ryke enterovete nde reraha uka va'erã nde rereko asy-vy, ne irũ kwéry ave xe-rehe ha-py pende rereko asy asy va'erã. Ija'e'ỹ va'erã pende-rehe. Oĩ gwĩ pene pa'ũ mygwa-pe ojuka va'erã ave. ¹⁷Xe-rehe ha-py enterove ija'e'ỹ va'erã pende-rehe. ¹⁸Upéixa ramo jepe ne mbaraete katu. Xe ororesende jevy va'erã. Peteĩ jepe nde ávy nokanhýi va'erã. ¹⁹Xe nhe'ẽ-py meme katu eiko erenheresende hagwã, he'i Hesu omotenonde-vy íxupe kwéry hekorã.

* 21:15 Mt 10.18-19; Lc 12.11-12; Jo 16.2-3

Onhehundi-ta Jerusalém tetã
(Mt 24.15-21; Mc 13.14-19)

²⁰ Hesu he'i jevy:

—Pehexa ramo Jerusalém tetã-my ogweroajere ramo soldado kwéry mburuvixa ndive peikwaa-ma va'erã onhehunditamaha. ²¹ Upe-ma ramo Judéia-py oĩ va'e tokanhymba katu vyatyryrusu-rupi tokanhymba oje'ói-vy. Tetã-my oĩ va'e tošẽ katu pya'e okanhy-vy. Nhumy oĩ va'e ani oike teĩ tetã-my. Tokanhymba katu. ²² Upe áry-py Nhandejáry nhe'ẽ he'i va'ekwe gwive oiko va'erã. Judeu kwéry ohasa asy asy va'erã hembiaapo apokwe-rehe. ²³ Ombovy'are'ỹ va'erã íxupe kwéry. Ivy'are'ỹve va'erã gwĩ kunha imemby va'erã, gwĩ imemby mixĩ va'e ave. Ohasa asy eterei va'erã hikwái. Judeu kwéry-pe ijyvy reheve Nhandejáry ombohasa asy-ta voi. ²⁴ Oĩ va'e kysepuku-py omano va'erã. Oĩ va'e omboja'o heraha-vy tetã ambue-py oiko hagwã tembigwái ramo. Oĩ ave opyta va'e Jerusalém tetã-my judeu e'ỹ va'e pogwy-py. Hi'are va'erã upéixa. Judeu e'ỹ va'e kwéry ojavopa upe Nhandejáry omotenonde hesegwa peve, opyta va'erã ipogwy-py Jerusalém tetã upe-py oĩ va'e gwive.

Nhande Ryke'y tee va'e ou jevymaha rehegwa nhe'ẽ
(Mt 24.29-31; Mc 13.24-27)

²⁵ Hesu he'i jevy:

—Gwĩ yváy rehegwa ojei va'erã gwape-gwi. Yváy-gwi kwarahy oje'o va'erã. Jasy ave hendy'ã va'erã, jasytata ave ojei va'erã gwape-gwi. Kente kwéry tetã tetã mygwa katu onhemondýi va'erã yguasu ryapu rendu ramo. ²⁶ Kwimba'e kwéry katu ikyhyje etegwi omano va'e-rami oiko va'erã. Ova ova va'erã gwendagwe-gwi entéro yváy rehegwa imbaraete va'e. Upéa-gwi onhepy'a mondýi va'erã oha'arõ-vy ou va'erã-rehe. ²⁷ Upéi katu xe Nhande Ryke'y tee va'e ajehexa uka va'erã agwejy ramo arai-rehe. Xe pu'aka reheve, xe rendy marangatu pende resa mbojevý va'e reheve xe rexa va'erã aju-vy.* ²⁸ Upe va'e ojehu-ma ramo, tane mbaraete katu. Ani katu ne kyre'ỹ e'ỹ teĩ, hi'agwĩ ne resende va'erã.

“Aju jevymaha óra eha'arõ eiko-vy” he'i Hesu
(Mt 24.32-35; Mc 13.28-31)

²⁹ Upéi omombe'u jevy Hesu arandu rehegwa nhe'ẽ figo máta rehegwa-rami:

—Pema'ẽ katu figo máta-rehe, opa vyrya rakã-rehe. ³⁰ Henhói-ma ramo hogwe pyahu-ma ramo peikwaa-ma voi ogwahẽ-tama áry hakuha. Pehexa ramo peikwaa. ³¹ Upéixa ave xe remimombe'ukwe. Pehexa ramo oikomaha xe remimombe'ukwe, peikwaa va'erã Nhandejáry oiko-tama entéro va'e ruvixarã. ³² Anhete ko ha'e-ta peẽ-my: Áygwa omano e'ỹ mbovyve ojehu va'erã ko va'e. ³³ Áry opa va'erã, ko yvy gwive opa va'erã. Xe nhe'ẽ, xe remimombe'ukwe ae ndopái va'erã. Opyta va'erã opa e'ỹ reheve.

³⁴⁻³⁵ —Xáke! Perepara porã katu pende rekoha-rehe. Peiko porã katu xe ra'arõ-vy. Ani pene mandu'a eterei teĩ pene monga'uharã-rehe. Ani pene mandu'a eterei teĩ ave pene mbohoryharã-rehe. Ani ave pejepý'apy eterei teĩ pene remikotevẽ ko'a pygwa-rehe. Xe aju jevy hagwã-rehe ae tapene mandu'a ndu'a katu peiko-vy. Sapy'a, ndorepara porãiha óra-py ombo'a nhuhã mymba. Upéixa ave sapy'a naxe ra'arõ porãiha óra-py ojekwaa va'erã entéro ko yvy rupigwa kwéry-pe xe aju jevyha áry. ³⁶ Upéa-rehe perepara katu ha'arõ-vy xe agwahẽ hagwã-rehe. Pejerure rure katu Nhandejáry-pe mba'eve rei ndoikói hagwã peẽ-my. Xe Nhande Ryke'y tee va'e aju jevy va'erã. Pejerure íxupe pene mbopy'a porã hagwã pono penotĩ pende rekoha xe renonde-py.*

Enterove ohenduse Hesu oiko-vy

³⁷ Nhandejáry róga kakwaa-py Hesu oporombo'e áry jave. Pyhare ramo osẽ oho-vy vyatyryrusu Oliveiraty-py. ³⁸ Ha pyharevete meme ou jevy Nhandejáry róga kakwaa-py. Entéro tetã mygwa oho-ma ohendu hagwã Hesu remimombe'u.

* 21:27 Dn 7.13 * 21:36 Mt 24.42-44; Mc 13.35-37; Lc 12.35-40; Rm 13.12-13

22

“Mba'éixa pa jajuka-ta Hesu-pe?” oporandu ojóupe

(Mt 26.1-5; Mc 14.1-2; Jo 11.45-53)

¹Ogwahê-tama areteguasú. Upe-ma ramo gwĩ ija'e'yha ojukase eterei Hesu-pe. Judeu kwéry-pe mate upe areteguasú. Héry va'e páscoa. Oime jave páscoa mbojape imbovuha e'y va'e ho'u judeu kwéry. ²Ha ogwahê-tama ramo areteguasú, gwĩ judeu va'e ojukase voi Hesu-pe. Pa'i ruvixa kwéry, hekombo'ehaty kwéry ndive ija'e'yha kwéry ojukase íxupe.

—Mba'éixa pa jajuka-ta upe va'e, he'i meme ojóupe hikwái. —Iporãve jajuka uka nhemi íxupe ani hagwã nhambopoxy ija'eha kwéry-pe.

Upéixa he'i meme ojóupe ojukase eterei-gwi Hesu-pe. Ijaty jaty va'e-gwi ikyhyje eterei-gwi hikwái.

Judas onhomongeta pa'i ruvixa kwéry ndive Hesu oipyhy uka hagwã

(Mt 26.14-16; Mc 14.10-11; Jo 13.2,27)

³Upe jave anhayguasú Satanás oike-ma gwembigwairã py'a-py. Judas Iscariotes héry ete. Peteĩ doze Hesu remimbo'e kwéry va'e Judas. Ha anhayguasú ogwapy ijyke-rehe ojokwái hagwã. ⁴Upéi Judas oho onhomongeta pa'i ruvixa kwéry ndive. Anhayguasú nhe'ê-rupi oho. Oho otopa hagwã Hesu-rehe ija'e'yha kwéry. Pa'i ruvixa kwéry ndive Nhandejáry róga kakwaa-rehe onhangareko va'e kwéry ndive ave ojotopa he'i hagwã mba'e-rami po oipyhy arã Hesu-pe. ⁵Upéa-rehe ovy'a eterei okwa-vy.

—Nde, ereme'ê ramo Hesu ore-vy, orome'ê-ta nde-vy nde platarã. Hesu-rehe orome'ê-ta nde platarã, he'i Judas-pe ovy'a-vy hikwái.

⁶—Iporã ereme'ê kuri xe-vy xe platarã, he'i íxupe kwéry.

Upéixa-ma ramo, Judas orepara oiko-vy Hesu-rehe ipyhyharã-pe omombe'uha óra ra'arõ-vy. Ijaty aty e'yha óra-rehe oha'arõ arõ oiko-vy.

Areteguasú remi'urã ojapo Hesu remimondo va'e

(Mt 26.17-19; Mc 14.12-16)

⁷Ogwahê-ma ramo areteguasú, Hesu omondo Pedro, João ndive ojapo hagwã tembi'u areteguasú-py ho'u va'erã. Páscoa áry-gwi judeu kwéry ojuka ovexa ho'u va'erã Nhandejáry-pe omboete-vy. Ojapo ave mbojape ombovu e'y va'e ho'u va'erã. Upéixa ojapo hagwã Hesu omondo Pedro-pe, João-pe ave gwenonde.

—Tapeho tetã-my, he'i. —Pejúka peteĩ mymba ovexa ja'u va'erã nhande ave areteguasú-py so'o mbixy, he'i imondo-vy.

⁹—Kipy tipo orojapo-ta? he'i oporandu-vy hikwái íxupe.

¹⁰—Peike jave ramo upe tetã-my, pehexa-ta peteĩ y ogweraha va'e. Kwimba'e y ryru ogweraha va'e pehexa-ta. Tapeho hapykwéri. Oike-ma ramo óga-py, pegwahê penhomongeta óga járy ndive. ¹¹A-rami penhe'ê kuri íxupe, he'i. —“Mbo'eháry ore mbou oroporandu hagwã nde-vy: Kiva'e koty-py ha'u-ta páscoa remi'urã xe remimbo'e kwéry ndive? Aiporuse nde koty ore mandu'a hagwã páscoa-rehe” ere íxupe. ¹²Ohexa uka-ta peẽ-my peteĩ koty jaiporu-ta va'e. Kotyguasú, ijyvate va'e oimba-ma va'e ohexa uka-ta peẽ-my. Upe koty-py ja'u-ta nhane remi'urã, páscoa-rehe imandu'a va'e pegwarã. Ore mohenonde pejúka mymba vexa nhande-vy gwarã, he'i Hesu omondo-vy gwenonde.

¹³Upéi oho-ma okwa-vy. Mokõive oho tetã-my. Ha Hesu he'i hagwe-rami ojohu. Upéi ojapo tembi'u areteguasú páscoa-rehe imandu'a-vy ho'u va'erã.

Areteguasú áry ramo okaru paha-ma Hesu

¹⁴Upéi okaru hagwã óra-py Hesu ogwapy doze gwemimondo kwéry ndive. ¹⁵Okaru-tama ramo he'i íxupe kwéry:

—Ha'use eterei pene ndive ko areteguasú-py tembi'u. Xe rereko asy amano hagwã e'y mboyye akaruse pene ndive, he'i. ¹⁶—Ha'e-ta katu peẽ-my: Ko'a-py nda'uvéi-ma áy-rami areteguasú-py tembi'u. Xe are-ta ha'u jevy hagwã. Oikopa-ma rire, ha'u jevy va'erã, he'i íxupe kwéry. —Nhandejáry nhande ruvixa oiko haty-py mate ha'u jevy va'erã, he'i gwemimondo kwéry-pe.

¹⁷ Upe-ma ramo Hesu oipyhy uva rykwere ryru. Omboete Tupã Nhandejáry-pe. Upéi ho'u uka gwemimondo kwéry-pe:

—Pe'upa katu, he'i. ¹⁸ —Anhete ha'e-ta peẽ-my. Nda'uvéi-ma voi uva rykwere. Nhandejáry nhande ruvixarã ojekwaa rire ae ha'u jevy va'erã, he'i onhemohekotenonde-vy.

Hesu-rehe nhane mandu'a va'erã

(Mt 26.20-30; Mc 14.17-26; Jo 13.21-30; 1 Co 11.23-25)

¹⁹ Oipyhy ave mbojape páscoa áry pegwa. Upéi otima rire Nhandejáry-pe ombopo mbopóy ome'ẽ-vy gwemimbo'e kwéry-pe ho'u hagwã. Ha he'i:

—Ko mbojape-rehe ha'e “Xe rete” he'i. —Pende-rehe ha-py anheme'ẽ va'erã peẽ-my amano hagwã, he'i. —Kóá ere'u ramo ne mandu'a kena xe-rehe, he'i.

²⁰ Upéixa ojapo ave okarupa-ma rire. Ome'ẽ íxupe kwéry ho'u uka-vy uva rykwere:

—Ko va'e pe'u katu, he'i. —Ko va'e-rehe ha'e “Xe rugwy” voi, he'i. —Osyry va'erã xe rugwy kente kwéry rekove-rehe. Tupã Nhandejáry he'i hagwã kente kwéry-rehe, “Ipy'a potĩ-ma. Hesu-rehe ojerovia-gwĩ omopotĩ-ma ipy'a” he'i hagwã Tupã Nhandejáry osyry va'erã xe rugwy, he'i íxupe kwéry.

²¹⁻²² —Xe Nhande Ryke'y tee va'e amano-ta. Xe ndive ogwapy oĩ-vy xe juka uka nhemi va'erã, he'i Hesu. —Tekotevẽ amano kente kwéry aresende hagwã. Amboasy upe xe juka ukaharã. Ohasa asy eterei va'erã, he'i Hesu.

²³ Upe-ma ramo oporandu randu ojóupe hikwái:

—Kiva'e pa ojuka uka nhemi-ta Hesu-pe, he'i ojóupe.

Tuvixaseve va'e tekotevẽ onhemomixĩve

(Mt 20.25-27; Mc 10.42-45)

²⁴ Ha hemimbo'e kwéry katu onhomongeta ngeta onhondive:

—Kiva'e pa tuvixave nhane pa'ũ-my, he'i ojóupe.

²⁵ Upe-ma ramo Hesu he'i:

—Mburuvixa kwéry, ko yvy pygwa ogwereco pu'aka yvypóry kwéry-rehe. Onhe'ẽ-py omanda manda íxupe kwéry. Ha oĩ gwĩ mburuvixa katu onhembotuvixave kente kwéry renonde-py. ²⁶ Peẽ onhopa'ũ-my ndaikatúí upéixa peiko. Peẽ onhopa'ũ-my pende tuvixave ramo jepe penhemohekomiirĩve katu peiko-vy onhopa'ũ-my. Mburuvixa katu toiko tembigwái-ramo. ²⁷ Ha'e-ta ave peẽ-my: Tuvixave va'e-pe hembigwái ogweru hemi'urã. Ha xe katu tembigwái-rami voi aiko pene pa'ũ-my, he'i.

²⁸ —Peẽ katu xe moirũ meme peiko-vy. Ambue kwéry xe mbojejavyse mo'ã meme jave xe moirũ-ma peẽ. ²⁹ Yma va'ekwe Nhandejáry he'i xe-vy: “Xe ra'y, nde ereiko-ta mburuvixa ramo xe moirũ va'erã-pe”. Upe va'e-rehe, pe xe Ru ome'ẽ hagwéixa xe-vy, xe ame'ẽ va'erã peẽ-my ave. Peiko-ta ave mburuvixa ramo. ³⁰ Nhandejáry ha-py xe aiko-ma ramo nhande ruvixarã, peiko-ta xe ndive. Pekarú ha pey'u-ta xe ndive. Pegwapy-ta ave mburuvixa gwapy haty-rupi pejohu hagwã Israel re'yí kwéry-rehe hembiapokwe.

Ndojerovia teéi va'erã

Hesu-rehe Pedro

(Mt 26.31-35; Mc 14.27-31)

³¹ He'i ave Hesu:

—Ejeapysaka porã kena xe nhe'ẽ-rehe, Simão. Anhaygwasu ojerure-ma kuri pende-rehe. Oikwaase kiva'e-rehe pa pejerovia ete. Ipirekwe osêsẽ hagwã ovale va'e-gwĩ nhambovava trigo-pe. Upéixa ave anháy ruvixa Satanás pende rerekose. Pene mbotavyse ponove peiko xe nhe'ẽ-rupi. ³² Xe katu ambojeupi kuri xe nhe'ẽ Nhandejáry-pe nde-rehe, Simão, erejerovia tee hagwã xe-rehe pono inhe'ẽ-rupi ereiko. Erejerovia ete jevy ramo xe-rehe, emokyre'y katu nde rapixa kwéry-pe oiko porãve hagwã xe nhe'ẽ-rupi.

³³ Upe-ma ramo Pedro he'i:

—Aháni, oromoirũ-ta xe. Nde erepyta ramo preso, xe apyta ave arã ne ndive preso, he'i íxupe. —Eremano ramo amano ave va'erã ne ndive, he'i.

³⁴ Hesu katu he'i íxupe:

—Anhetegwa ha'e-ta nde-vy, he'i íxupe: —Etería gáju ndosapukái vyteri ramo jepe, mbohapy-ma ere-ta xe-rehe, “Upéa Hesu xe ndaikwaái” ere-ta xe-rehe, he'i íxupe.

“Nde kysepuku reheve ereho eremombe'u hagwã xe nhe'ê” he'i Hesu

³⁵Upéi he'i íxupe kwéry:

—Apomondo mondo ramogware, peho nandi voi. Ndaperaháiry voi va'ekwe mba'eve. Pene mba'e ryrú ndaperahái va'ekwe. Pende pirapire ryrú ndaperahái ave va'ekwe. Upéixa nandi peho va'ekwe ramo mba'e tipo pene remikotevê? he'i joty Hesu oporandu-vy.

—Mba'eve-rehe noroikotevêi upe jave, he'i íxupe hikwái.

³⁶—Áy katu ha'e-ta peê-my: Ogwereko va'e opirapire ryrú omba'e ryrú ave, oipyhy-ta. Kysepuku ogwereco e'y va'e kyse peyrã-rehe ome'ê-ta oao jo'a.

³⁷—Nhandejáry nhe'ê kwatia-rehe ohai va'ekwe xe-rehe he'i: “Hembiapo vai va'e-rami ojerereko va'erã”. Anhete ha'e-ta: Ojehu-tama xe-rehe ojehai va'ekwe, he'i íxupe gwekoharã omotenonde-vy.*

³⁸Upe-ma ramo hemimbo'e kwéry he'i:

—Ko'a-py niko oĩ mokõi kysepuku, ore Járy.

Ha ha'e he'i:

—Iporã, he'i joty.

Yvyaty-gwi Hesu ombojeupi onhe'ê Nhandejáry-pe

(Mt 26.36-46; Mc 14.32-42)

³⁹Oho meme ha-py oho jevy Hesu. Yvyatyrusu héry va'e Oliveiras ha-py oho. Gwemimbo'e kwéry ndive oho. ⁴⁰Ogwahê-ma jave oho-ta ha-py oiporavo hagwe-py, ha'e he'i:

—Pejerure Nhandejáry-pe pono eremondo nde resa ne mbojejavy uka va'e-rehe, he'i.

⁴¹Upe rire ojei íxugwi kwéry mombyrymive ojei. Gwetymy'ã-rehe onhesũ ha onhepyrũ onhomongeta-vy Nhandejáry ndive:

⁴²—Ereipota ramo, xe Ru, eipe'a xéhegwi xe reko asyha. Ani oiko teĩ xe remimbota, ne remimbota ae toiko, he'i.

⁴³Upe jave Nhandejáry rembigwái yváy pygwa ojehexa uka omombaraeteve hagwã íxupe. ⁴⁴Ojepy'ajopy jave Hesu imbaraete pyve onhomongetave Nhandejáry ndive. Ombojeupi jave onhe'ê Nhandejáry-pe mba'e rugwy-rami otyky yvy-py hy'aikwe ojepy'ajopy-vy. ⁴⁵Upéi opa-ma ramo hi'oração opu'ã jevy ou-vy gwemimbo'e kwéry renda-py, oke okwa-vy va'e ojohu. Tuvixa ima'emboasy omonge íxupe kwéry. ⁴⁶Ha Hesu he'i:

—Ma'erã tipo peke? Pepu'ã katu pejerure Nhandejáry-pe pene mombaraete hagwã, pono ne mbojehesa rerova uka íxugwi mba'eve nembojejavy uka-vy, he'i onhemonhe'ê-vy.

Preso ogweraha Hesu-pe

(Mt 26.47-56; Mc 14.43-50; Jo 18.3-11)

⁴⁷Hesu onhe'ê vyteri oĩ-vy, ogwahê heta kente kwéry. Peteĩ doze hemimbo'e kwéry va'e, héry va'e Judas ogweru íxupe kwéry. Judas katu ogwahê Hesu ypy-py ohovapyte hagwã íxupe. ⁴⁸Upe-ma ramo Hesu he'i:

—Judas, peteĩgwe xe rovapyte mo'ã xe pyhy uka hagwã, xe Nhande Ryke'y tee va'e xe pyhy uka-ma, he'i.

⁴⁹Upe jave hemimbo'e kwéry oĩ va'e Hesu ndive, ohexa-ma ramo ojehu va'erã he'i hikwái:

—Mba'e tipo jajapo-ta, ore Járy? Oroipyhy-ta para'e ore kysepuku, orojoکو hagwã íxupe kwéry? he'i.

⁵⁰Peteĩ hemimbo'e katu oinambi'o-ma pa'i ruvixa rembigwái. Ijakatúa-koty oĩ va'e inambikwe oipe'a-ma.

⁵¹Ha Hesu katu:

—Iporãvete peheja, he'i-vy opoko inambikwe-rehe imbogwera-vy.

* 22:37 Is 53.12

⁵² Upe-ma rire he'i pa'i ruvixa kwéry-pe, porahéi haty pygwa ruvixa kwéry-pe ave, judeu ruvixa kwéry-pe ave gwí ou oipyhy hagwā Hesu va'e gwive-pe, he'i Hesu:

—Niporāi katu peju pende kysepuku reheve, ha pende vyvra reheve, xe pyhy hagwā. Xe ndaikói oporosake'a va'e-rami kysepuku reheve xe reraha hagwā. ⁵³ Heta áry-ma aiko pene ndive. Nhandejáry róga kakwaa-py aime meme ramo napemopu'áiry pende po xe pyhy hagwā. Áy mate xe pyhy-ta. Kóa pende óra pene remimbota pejapo hagwā xe-rehe. Gwí pytügwy-rupi ipu'aka va'e nhe'ë-rupi peiko-ma pene rembiaporā pejapo hagwā.

“Upéa ndaikwaái xe” he'i Pedro Hesu-rehe

(Mt 26.57-58,69-75; Mc 14.53-54,66-72; Jo 18.12-18,25-27)

⁵⁴ Oipyhy-ma ramo Hesu-pe ogweraha íxupe pa'i ruvixagwasu róga kakwaa-py. Ha Pedro katu oho Hesu rapykwéri puku. ⁵⁵ Omoendy-ma ramo tata, upe-py Pedro oho ave ojepe'e hagwā. Tata py-py ogwapy oĩ-vy va'e ndive ogwapy ave Pedro. ⁵⁶ Ohexa-ma ramo íxupe tata rendy-py Pedro-pe tembigwái kunha va'e, ohexa katu porā porā íxupe ha he'i:

—Ko kwimba'e Hesu ndivegwa va'e ave ra'e, he'i.

⁵⁷ Upe-ma ramo Pedro he'i:

—Upéa ndaikwaái voi xe, kunha, he'i íxupe Pedro.

⁵⁸ Upe riremí ohexa jevy íxupe peteĩ kwimba'e.

—Nde ave ra'e ha'e kwéry va'e, he'i.

Pedro he'i jevy:

—Upéa xe ndaikwaái. Ndaha'éi hesegwa kwéry xe, he'i rei.

⁵⁹ Upe rire peteĩ óra-rupi, he'i jevy Pedro-pe ambue va'e:

—Anhete voi ra'e nde ave ereiko va'e ndive. Nde ave ha'e Galiléia yvy pygwa ra'e, he'i íxupe.

⁶⁰ He'i jevy Pedro:

—Upéa xe ndaikwaái, mba'e-rehe tipo aipo-rami ere xe-vy? he'i rei.

Upéixa onhe'ë oĩ-vy jave ete, gáju osapukái. ⁶¹ Upe-ma ramo ojere Hesu oma'ë porā porā Pedro-rehe. Ha Pedro katu imandu'a Hesu he'i va'ekwe-rehe íxupe, “Ko'ánga gáju ndosapukái vyteri jepe, mbohapy-ma nde ere-ta xe-rehe: Upéa xe ndaikwaái, ere-ta”.

⁶² Upéa-gwi hasë-ma Pedro. Onhemboasy eterei-gwi ojahe'o oho-vy.

Onhenupā ramogware Hesu

(Mt 26.67-68; Mc 14.65)

⁶³ Gwí kwimba'e Hesu-rehe onhangareko va'e onhembohory hese. Ogwerohasa asy eterei Hesu-pe. Oinupā eterei íxupe. ⁶⁴ Ohesamboty íxupe ha he'i:

—Kiva'e pa ne nupā? Emombe'u katu, he'i íxupe.

⁶⁵ Heta mba'e he'i rei rei íxupe onhembohory-vy hese.

Hesu pa'i ruvixa renonde-py

(Mt 26.59-66; Mc 14.55-64; Jo 18.19-24)

⁶⁶ Ko'ë jave ramo ojogweroaty jevy judeu ruvixa kwéry, pa'i ruvixa kwéry, judeu rekombo'ehaty kwéry ndive ave, onhomongeta geta okwa-vy. Upéi katu oipyhy heru-vy Hesu-pe mburuvixa kwéry renonde-py. Ogwahë-ma ramo oporandu íxupe:

⁶⁷ —Nde tipo Cristo judeu kwéry remiha'arō va'e? Emombe'u katu ore-vy, he'i íxupe.

Upe ramo Hesu he'i:

—“Xe Cristo judeu kwéry remiha'arō va'e voi” ha'e ramo, ndaperoviái joty arā.

⁶⁸ Anhetegwa ha'e-ta peë-my: Aporandu ramo peë-my, napemombe'u mo'ái xe-vy. ⁶⁹ Xe Nhande Ryke'y tee va'e áy gwive agwapy-ta yváy-py Tupā Nhandejáry yke-rehe. Upe ipu'aka ete va'e ndive xe agwapy-ta, he'i íxupe kwéry Hesu.

⁷⁰ Upe-ma ramo enterove oĩ va'e oporandu íxupe:

—Aipo ramo Nhandejáry ra'y tee voi va'e tipo nde? he'i íxupe.

—“Nde ha'e voi” peje kuri xe-vy, he'i íxupe kwéry Hesu.

⁷¹ Upe-ma ramo he'i ojóupe:

—Nanhaikotevëvéi-ma imombe'uharā-rehe. Nhande katu nhahendu-ma voi ha'e inhe'ë tee voi. Onhemonhandejáry rei Hesu, he'i ojohu vai-vy Hesu nhe'ë.

23

Hesu ojereraha mburuvixa héry va'e Pilatos renonde-py

(Mt 27.1-2,11-14; Mc 15.1-5; Jo 18.28-38)

¹ Upe jave kente kwéry ijaty va'e opu'amba ojereraha hagwã Hesu ndive mburuvixagwasu Pilatos renda-py.

² —Oroipyhy-ma katu ko kwimba'e. Ohekombo'e va'ekwe-gwi ore re'ýi kwéry ndoikosevéi-ma mburuvixagwasu César nhe'ẽ-rupi, he'i hese. —Ha'e katu omombe'u kente kwéry-pe pono ome'ẽ mburuvixagwasu César-pe mba'eve, he'i rei ave hese. —“Xe Cristo Nhandejáry remimbou va'e pene ruvixarã” he'i ójehe, he'i omoĩ vai-vy Hesu-pe.

³ Upe-ma ramo Pilatos oporandu Hesu-pe:

—Nde tipo judeu kwéry ruvixagwasu? he'i íxupe.

—Nde voi katu aipo ere kuri, he'i joty íxupe Hesu.

⁴ Upéi Pilatos he'i pa'i ruvixa kwéry-pe, ojogweroaty va'e kente kwéry-pe ave:

—Ko kwimba'e katu nahambiapo va'ry va'e voi. Aipo ramo niporã ajuka uka íxupe, he'i.

⁵ Kente kwéry katu he'i jevy jevy:

—Hese ha-py hemimombe'u-gwi voi Judéia vvy pygwa kwéry ndogwerojojái onhonhe'ẽ onhomboja'o ja'o upéixa-gwi. Galiléia-gwi ko'a peve ndaija'éví ojóehe íxugwi. ãy katu ogwahẽ-ma ko'a-py.

⁶ Aipo va'e rendu-vy Pilatos oporandu:

—Ko kwimba'e tipo Galiléia vvy pygwa? he'i oporandu-vy.

⁷ Oikwaa-ma ramo Pilatos Hesu upe pygwaha, omondo Hesu-pe upe pygwa ruvixa héry va'e Herodes-pe. Upe va'e oiko ave Jerusalém tetã-my ombohupa-vy. Upéixa-gwi omondo Hesu Herodes renda-py oporandu hagwã hembiapokwe-rehe. Ojohuse mo'ã Hesu-rehe hembiaipo vaikwe.

Hesu ojereraha mburuvixa héry va'e Herodes renonde-py

⁸ Ovy'a mburuvixa Herodes ohexa-ma ramo Hesu-pe. Ohendu va'e voi ave Hesu rerakwã porã. Yma-ma upéa-gwi ohexase eterei íxupe. Ohexase ave Hesu ojapo ramo hembiaipo porã va'e hexapyrã-rupi jahexa e'ý vyteri va'e. ⁹ Oporandu heta Hesu-pe. Ha Hesu katu nonhe'ëiry íxupe. ¹⁰ Upe-ma ramo pa'i ruvixa, judeu rekomb'oehaty kwéry ndive ijapu hese hembiapokwe-rehe omboja hagwã mo'ã hembiaipo vai Hesu-rehe.

¹¹ Soldado kwéry, huvixa ndive, omoingo asy-ma Hesu-pe. Omoingo vai-ma voi íxupe. Omoĩ hese ijahoja porã va'e omomburuvixa a'ã hagwã íxupe, onhembohory hory hese, ha upe rire omondo jevy Pilatos oĩ ha-py.

¹² Upe mbove Herodes, Pilatos ndive ndaija'éiry ojóehe. Upe áry gwive oiko porã onhondive.

“Tojuka kena íxupe” osapukái Hesu-rehe

(Mt 27.15-26; Mc 15.6-15; Jo 18.39-19.16; At 3.13-14)

¹³ Omboaty uka Pilatos pa'i ruvixa kwéry, judeu ruvixa kwéry, judeu kwéry ave. ¹⁴ Upéi he'i:

—Ma'erã tipo peru xe-vy ko kwimba'e pemombe'u hagwã hese hembiaipo vaiha. “Ohekombo'e va'ekwe-gwi ore re'ýi kwéry ndoikosevéi-ma mburuvixagwasu nhe'ẽ-rupi” peje rei kuri hese. Upéa-rehe xe ajohu-ma kuri hese pene renonde-py. Ndoikói ra'e hese ivai va'e penhe'ẽ vai hagwã hese. ¹⁵ Herodes ave ndotopái hese mba'eve. Upéa-gwi ombou jevy nhande-vy. Upéixa ramo ko kwimba'e ndojapói ko ra'e mba'eve pejuka uka hagwã. ¹⁶ Ambopi uka-ta mante íxupe upéi apoi-ta íxugwi oho jevy hagwã, he'i íxupe kwéry.

¹⁷ Aretegwasu ramo mburuvixagwasu rekoha-rupi opoi peteĩ onhemoĩ preso va'ekwe. Upéa-rehe, “Apoi-ta íxugwi” he'i.

¹⁸ Upéa ohendu-ma ramo entéro kente kwéry osapukái:

—Tojuka kena ko kwimba'e, he'i osapukái-vy. —Epoi Barrabás-gwi ore-vy gwarã, he'i osapukái-vy.

¹⁹ Barrabás katu onhemoĩ araka'e preso. Upe tetã-my onhorairõ araka'e ohekoviarõ hagwã mo'ã mburuvixagwasu. Oporojuka ave. Upéa-gwi onhemoĩ preso araka'e. Ha “Epoi Barrabás-gwi” he'iri iri hikwái. ²⁰ Mburuvixa ae katu opoise mo'ã Hesu-gwi. Upéa-rehe onhe'ẽ jevy kente kwéry ndive.

²¹ Ha'e kwéry ae katu osapukái hatãve tãve.

—Ejuka uka katu íxupe ehupi uka kurusugwasu-rehe ijuka-vy, he'i hese.

²² Mbohapyha-ma Pilatos he'i hese:

—Mba'eixagwa ivai va'e tipo ojapo? Ndahexái mba'eve ivai va'e hembiapokwe ajuka uka rei hagwã íxupe, he'i. —Ambopi uka rei-ta íxupe oho jevy hagwã, he'i.

²³ Aipo ramo ha'e kwéry osapukái joty:

—Tojuka katu, he'i osapuka pukái okwa-vy hese. —Kurusugwasu-rehe tojuka kena. he'i hese hikwái

Isapukái katu imbaraeteve ojapo uka hagwã gwemimbota. Upéa-rupi isapukái-rupi ipoxyha-rupi ojapo joty íxupe kwéry. ²⁴ Jaty va'e nhe'ẽ rendu-vy, mburuvixa Pilatos ojapo uka hemimbota. ²⁵ Upe kwimba'e onhorairõ va'ekwe, oporojuka va'ekwe ave, kente kwéry oipota va'ekwe osẽ preso onhemoĩ ha-gwi, upe kwimba'e-gwi opoi uka. Hesu rekovia opoi hembiaipo vai va'e-gwi. Ha ome'ẽ Hesu ijukaharã-pe onhemoaty va'e remimbota rei-rupi ogwerekho hagwã íxupe.

Hesu onhemoĩ ramogware kurusugwasu-rehe

(Mt 27.32-44; Mc 15.21-32; Jo 19.17-27)

²⁶ Ha upéi katu soldado kwéry ogweraha Hesu-pe ojuka hagwã. Ogweraha jave ohogwaiti Cirene pygwa, héry va'e Simão. Ou oiko-vy tetã jerekwe-gwi. Oipyhy ave Simão:

—Nde, eraha ko kurusugwasu Hesu rapykwéri, he'i-vy omoĩ kurusugwasu Simão ape-rehe ogweraha hagwã Hesu rapykwéri.

²⁷ Heta oho va'e hapkykerigwa. Ipa'ũ-my kwéry oĩ ave kunha ojahe'o Hesu-pe ombyasy va'e. ²⁸ Upe-ma ramo Hesu ojere ha oma'ẽ hese kwéry. He'i:

—Ani xe mboasy, peẽ kunha. Peẽ ha pene memby ae kuri pemboasy, he'i Jerusalém mygwa-pe.

²⁹ —Ogwahẽ va'erã áry oporombohasa asy va'erã, entéro he'i va'erã: “Ovy'a ete gwĩ kunha imemby e'ỹ va'e. Ikatu e'ỹ imemby va'e ave. Oporomokambu e'ỹ va'ekwe ave. Naimembýi-gwi ovy'a” he'i va'erã oporombohasa asy-gwi.

³⁰ Upe ramo he'i arã ave: “To'a vvyatyrysu nhande ári. Tanhande jatypa vvyatyrysu oitypa-vy. Nhande rekove reheve tanhande aty” he'i arã ohasa asy eterei-gwi.*

³¹ —Ha ko'ánga koixagwa ojapo xe-rehe. Vaive ojapo arã pende-rehe. Xe, vvyra aky-rami heko porã va'e ko xe, ha xe-rehe hembiaipo vai joty. Hembiaipo vaive ive arã pende-rehe. Peẽ vvyra pirukwe-rami pende reko porã e'ỹ va'e. Hembiaipo vaive ive arã pende-rehe, he'i Hesu kunhagwe-pe omboasy-vy.

³² Ha soldado kwéry ogweraha ave mokõi hembiaipo vai va'e-pe Hesu ndive ojuka va'erã ogweraha. ³³ Akãgwe renda héry va'e-py ogweraha. Ogwahẽ-ma ramo upe-py omoĩ íxupe kurusugwasu-rehe ohupi-vy. Upe mokõi hembiaipo vai va'e ohupi ave hendive. Hesu kurusugwasu yke-rehe omoĩ kurusugwasu mokõi. Hesu oĩ hembiaipo vai va'e mbyte-py. Ijakatúa-koty oĩ petei, ijasu-koty oĩ ave petei. Kurusugwasu-rehe meme ohupi ojuka-vy.

³⁴ Oime jave kurusugwasu-rehe Hesu ombojeupi onhe'ẽ Nhandejáry-pe:

—Eiporiahuvereko íxupe kwéry, xe Ru. Ndoikwaái-gwi kóixa ojapo hikwái, he'i.

Upéi onhomboja'o ja'o Hesu aokwe-rehe hikwái. Onhomboja'o hagwã ohuga soldado kwéry.

³⁵ Ha entéro ojogweroaty va'e oma'ẽ ma'ẽ oiko-vy. Ohexapa hikwái.

Ha huvixa kwéry ave onhembohory ave Hesu-rehe. He'i rei rei-vy:

—Kóa opororesende araka'e, he'i onhembohory hese. —Áy katu tonheresende kena. Heta he'i hese araka'e: “Hesu ko Cristo nhane remiha'arõ va'e. Nhandejáry rembiporavo

* 23:30 Os 10.8

va'e voi Hesu" heta va'e he'i va'ekwe Hesu-rehe. Ha ãy tipo ndoikwaái para'e onheresende hagwã. Tonheresende kena, he'i huvixa kwéry onhe'ẽ rei rei onhembohory hese.

³⁶ Ha soldado kwéry ave onhembohory hese. Onhemoagwĩ íxugwi ome'ẽ íxupe uva rykwere ndahepýi va'e ho'u hagwã mo'ã. Onhe'ẽ rei rei íxupe:

³⁷ —Nde para'e judeu kwéry ruvixagwasu va'e. Aipo ramo enheresende kena, he'i onhembohory-vy hese.

³⁸ Ha ohai omoĩ hagwã Hesu akã ári. “Kóa judeu kwéry ruvixagwasu” he'i ohai omoĩ-vy. Mbohapy nhe'ẽ-py ohai. Grécia pygwa nhe'ẽ-py ohai. Roma pygwa nhe'ẽ-py ohai. Hebreu kwéry nhe'ẽ-py ohai ave. “Kóa judeu kwéry ruvixagwasu” he'i. Mbohapy nhe'ẽ-py ohai rire omoĩ inhakã ári.

³⁹ Ha peteĩ hembiaipo vai va'e ave onhe'ẽ rei rei íxupe. Oime jave okurusugwasu-rehe, onhe'ẽ rei rei Hesu-pe he'i-vy:

—“Xe Cristo, Nhandejáry rembiporavo va'e” ere kuri ndéjehe. Aipo ramo enheresende katu. Ore ave ore resende katu.

⁴⁰ He'i-ma ramo, upe outro kurusugwasu-rehe oĩ va'e onhemonhe'ẽ oirũ-me:

—Nde tipo, ma'erã-gwi nderekyhyjéi Tupã Nhandejáry-gwi? he'i. —Nhande ave nhamano-tama nhande kurusugwasu-rehe. ⁴¹ Nhane rembiapo vaikwe-rehe jahasa asy jaiko-vy. Ha'e ae rei ohasa asy. Mba'eve ndojapói, he'i gwembiaipo vaikwe-gwi okurusugwasu-rehe oĩ va'e-pe.*

⁴² Upéi he'i ave:

—Nde, Hesu, xe poriahuvereko erejehexa uka ramo nde ore ruvixa ramo, xe poriahu-vereko katu.

⁴³ Aipo ramo Hesu he'i íxupe:

—Anhete ko'ánga ereiko-ta xe ndive yváy-py, he'i Hesu upe ójehe ojerovia va'e-pe.

Hesu omano ramogware

(Mt 27.45-56; Mc 15.33-41; Jo 19.28-30)

⁴⁴⁻⁴⁶ Kwarahy mbyte-py pytũmba-ma upe yvy ári. Upe tetã pytũmba ete-ma. Opyta pytũ mbohapy óra-rupí. Ka'arugwasu peve opyta. Kwarahy ndohesapevéi-ma. Ka'arugwasu ramo onhe'ẽ hatã Hesu. Upéi he'i Nhandejáry-pe:

—Xe Ru, xe mogwahẽ katu nde ha-py.

He'i-ma ramo omano ete-ma Hesu.

Ha upéi oĩ Nhandejáry róga kakwaa pygwa okẽgwasu nhugwãha tuvixa ete va'e. Omano-ma ramo Hesu, pya'e osoropa. ⁴⁷ Ha omano ramo soldado ruvixa ohexapa. Upéixa-gwi omboete Nhandejáry-pe:

—Péa ha'e voĩnte hembiaipo vai e'ỹ va'e, he'i hese.

⁴⁸ Ha heta heta ojogweroaty aty va'e ou va'ekwe oma'ẽ hagwã ikurusu-rehe ojejuka va'e kwéry-rehe. Ha entéro ojehu va'ekwe gwive ohexa-ma ramo, onhemboasy oiko-vy. “Xe ko, xe py'a vai voi aiko-vy” he'i. “Upe kwimba'e-rami ndaikói voi-ma xe” he'i onhemboasy-vy.

⁴⁹ Ha heta hese ojerovia va'e oĩ ave upe-py. Gwĩ kunhagwe Hesu rapykwéri ou va'ekwe Galiléia-gwi oĩ ave ijaty va'e pa'ũ-my. Mombyry-gwi oma'ẽ Hesu-rehe hikwaí.

Itakwa-py omoĩ ramogware Hesu retekwe

(Mt 27.57-61; Mc 15.42-47; Jo 19.38-42)

⁵⁰⁻⁵¹ Ha upéi katu José oho Pilatos renda-py. Arimatéia pygwa José. Judeu kwéry retã Arimatéia. Ha José judeu ruvixa va'e, hembiaipo porã va'e. Onhemboete va'e voi. Judeu ruvixa ambue kwéry ojukase ramo Hesu-pe, José ndojohu porã hembiaiporã. Ha'e oha'arõ arõ voi Nhandejáry nhande ruvixa-pe omoirũ hagwã. ⁵² Ha José oho Pilatos renda-py ojerure Hesu retekwe-rehe.

⁵³ Upéi ombogwejy kurusugwasu-gwi hetekwe. Onhugwã ao morotĩ iporã va'e-py. Upéi omoĩ itakwa-py hetekwe. Ita-gwi ojo'o va'ekwe-py omoĩ. Ipyahu itakwa. Ne'írá onhemotĩ tetekwe upe itakwa-py. Hesu retekwe omoĩ upe-py.

* 23:41 Sl 31.5

⁵⁴ Ka'aru-tama, haimete-ma pytu'uha áry. Ha upe áry-py judeu kwéry omoimba-ma nga'u pono omba'apo pytu'uha áry-py. ⁵⁵ Ha kunha kwéry Hesu ndive ou va'ekwe Galiléia-gwi va'e oho José rapykwéri. Ohexa itakwa. Ohexa ave omoi ramo hetekwe hyepy-py. ⁵⁶ Upe rire oho jevy gwóga-py omongu'i ngu'i hyakwā porā va'e hykwere omona hagwā Hesu retekwe-rehe omohyakwā hagwā hetekwe.

Ha pytu'uha áry-py Nhandejáry remimombe'ukwe-py opytu'u oiko-vy.

24

Oikove jevy-ma Hesu

(Mt 28.1-10; Mc 16.1-8; Jo 20.1-16)

¹ Domingo kwarahy osē-ma ramo, voi oho kunha kwéry ogwata. Hyakwā porā va'e omongu'i ngu'i va'ekwe ogweraha omona hagwā Hesu retekwe-rehe. Itakwa-py oho. ² Ogwahē-ma ramo ohexa-ma itagwasu ojepe'a va'ekwe. ³ Oike voi itakwa rye py-py. Oike-ma ramo ndotopavéi-ma hetekwe. ⁴ Ha upéa-rehe mba'eve ndoikwaái.

—Mbava'e tipo jajapo-ta, he'i.

Opondera-vy oiko jave mokōi karia'y ohexa, yváy pygwa rembihexa uka ra'e. Ao hesakā ete hemimonde ohexa. ⁵ Ohexa jave onhemondýi-ma, ojeayvy oma'ē yvy-rehe.

Upéi karia'y he'i:

—Ma'erā-gwi ereheka oikove va'e omano va'e renda-py? he'i. ⁶ —Hesu ndaipóri a-py. Opu'ā jevy-ma kuri oho-vy, he'i Hesu-rehe. —Nane mandu'avéi tipo inhe'ēgwe-rehe? Oime-ma ramo pene ndive Galiléia-py omombe'u-ma voi va'ekwe oikove jevymaha hagwā-rehe. ⁷ He'i va'ekwe nde-vy: “Xe Nhande Ryke'y tee va'e. Tekotevē xe pyhy xe reraha-vy hembiaipo vai va'e kwéry-pe. Xe juka-ta kurusugwasu-rehe. Mbohapy áry-py katu aikove jevy-ta” he'i voi va'ekwe. Upe va'e he'i va'ekwe-rehe napene mandu'áry nipo ra'e, he'i.

⁸ Ohendu-ma jave imandu'a jevy inhe'ēgwe-rehe. ⁹ Upéi oho jevy itakwa-gwi kunha kwéry. Oho ohexa Hesu remimbo'e kwéry-pe. Gwī onze hemimbo'ekwe-pe omombe'u. Hendive oī va'e-pe omombe'u ave.

—Hesu oikove jevy-ma katu, he'i.

¹⁰ Heta kunha ohexa kuri omombe'u hagwā íxupe kwéry. Maria Madalena ohexa kuri. Joana ave ohexa kuri. Tiago sy héry Maria ave ohexa kuri ave. Hapixa kwéry, indive oikoma ave itakwa-py ohexa kuri ave. Ha enterove omombe'u peteixa nhe'ē Hesu remimondo kwéry-pe.

¹¹ Ohendu-ma ramo,

—Itavy kunha kwéry, he'i mo'ā.

Ndogwerováí Hesu oikove jevymaha.

¹² Pedro ae opu'ā oripara oho-vy itakwa-py. Ojeayvy ohovapyexa hagwā. Inhugwā hagwe mate ohexa. Ijaokwe morotí va'e anho oime. Ohexa rire oho jevy gwóga-py. Opondera eterei-ma oiko-vy.

Emaús tetã rape-rupi Hesu onhomongeta mokōi gwemimondo ndive

(Mc 16.12-13)

¹³ Upe áry-py mokōi inhirügwe ogwata oho-vy Emaús tetã'i-my. Namombyryí Jerusalém-gwi upe tetã'i. Dez quilómetro mate oī. ¹⁴ Tape-rupi ogwata jave onhomongeta Hesu rehegwa nhe'ē-rehe. Hetekwe okanhy hagwe rehegwa nhe'ē-rehe onhomongeta hese oje'oi-vy. ¹⁵ Onhomongeta jave ogwahē-ma Hesu omoirū íxupe kwéry ogwata-vy. ¹⁶ Ha'e katu ohexa teí Hesu-pe. “Ndoikovéi” he'i mo'ā hese-gwi ndoikwaái íxupe.

¹⁷ —Mbava'e-rehe penhomongeta peho-vy? Penhemboasyha-rehe para'e penhomongeta peho-vy, he'i Hesu íxupe kwéry, ogwahē-ma jepe íxupe.

Upéi opyta rei onhemboasy-vy hikwái. ¹⁸ Ha peteí, héry va'e Cléopas he'i íxupe:

—Nde tipo, ne anho nipo ndereikwaái ra'e mba'e pa oiko kuri Jerusalém-my? Enterove upe pygwa kwéry oikwaa-ma. Nde tipo upe-py ereiko rei nipo herakwā erehendu e'ý reheve ra'e? he'i oporandu Hesu-pe jevy.

Ndohexa kwaáiry Hesu-pe Hesu voiha.

¹⁹—Mba'e tipo oiko upe-py? he'i oporandu rei-vy Hesu.

Upéi omombe'u hikwái:

—Hesu rehegwa nhe'ê ndereikwaái nipo ra'e. Ha'e Nazaré pygwa. Nhandejáry nhe'ê-py omombe'u va'etykwe. Ipu'aka va'ekwe. Hexapyrã-rupi hembiapokwe. Nhandejáry nhe'ê-py oiko porã va'ekwe. Hemimombe'ukwe, hembiapokwe kente kwéry ojohu porã voi va'ekwe, he'i omombe'u-vy. ²⁰—Upéi mburuvixa kwéry ojuka uka va'ekwe íxupe. Pa'i ruvixa kwéry, nhande ruvixa kwéry ave íxupe ogweraha uka-ma judeu e'y va'e-pe ojuka uka hagwã Hesu-pe. Ha ojuka-ma íxupe. Kurusugwasu-rehe ojejuka-ma va'ekwe, he'i Hesu-pe jevy omombe'u-vy hesegwa.

He'i ave:

²¹—Ha ore katu, oro'e mo'ã va'ekwe hese, “Israel remiarirõre judeu kwéry resendeharã” oro'e mo'ã hese. Ohasa-ma mbohapy áry omano hagwe rire, he'i omombe'u-vy. ²²—Gwĩ ore ndive oiko meme va'e, kunha kwéry, ore mondýi kuri hesegwa nhe'ê omombe'u-vy. Kwarahy osẽ-ma ramo oho ra'e itakwa-py. Hetekwe rexa-vy mo'ã oho kuri. ²³Ndaiporivéi itakwa-py. Ogwahẽ jevy ore ha-py omombe'u kuri: “Nhandejáry rembigwái yváy pygwa ojehexa uka-ma kuri ore-vy” he'i omombe'u-vy ore-vy. “Oikove jevy-ma, he'i ojehexa uka va'e” kunha kwéry he'i ore-vy omombe'u-vy, he'i Hesu-pe inhirũgwe. ²⁴—Ha gwĩ ore irũ oho ohexa, he'i. —Kwimba'e oho itakwa-py kunha rapykwéri oho. Kunha omombe'u harami voi omombe'u. Ndohexáiry ae Hesu-pe, he'i omombe'u-vy Hesu-pe jevy.

²⁵Upe-ma ramo Hesu he'i íxupe kwéry:

—Peẽ napene arandúi voi ra'e. Ndapeikwaái voi Nhandejáry nhe'ê, he'i íxupe kwéry. —Nde are eterei erejerovia tee hagwã inhe'ê-py omombe'u va'ety remimombe'ukwe-rehe, he'i. ²⁶—Nhandejáry nhe'ê-rupi tekotevẽ oiko upéixa. Tekotevẽ hembiporavo va'e ohasa asy, omano ave kente kwéry oresende hagwã. Tekotevẽ oho yváy-py onhemomba'egwasu hagwã. Nhandejáry remimombe'ukwe ojehu-ma íxupe, he'i omombe'u-vy.

²⁷Upéixa ojéhegwa nhe'ê omombe'u Hesu íxupe kwéry. Nhandejáry nhe'ê ohai uka va'ekwe Moisés amyri-pe, onhe'ê-py omombe'u va'ety amyri kwéry-pe ave. Upéa omombe'u jevy Hesu íxupe kwéry. Nhandejáry remimombe'ukwe ojéhegwa nhe'ê omombe'u mbe'u ogwata-vy.

²⁸Upéi ogwahẽ oho ha-py, tetã'i Emaús-py ogwahẽ. Ha Hesu mombyryve oho-ta mo'ã.

²⁹—Epyta ore ndive. Ka'aru ete-ma. Oike-tama kwarahy, he'i Hesu-pe hikwái.

Aipo ramo oho omoirũ íxupe kwéry. Oike hõga-py. ³⁰Ho'u-tama ramo Hesu oipyhy mbojape. Ha gwemi'urã-rehe omboete Nhandejáry-pe. Íxupe oondo onhe'ê rire omboja'o ja'o mbojape ome'ê íxupe kwéry ho'u hagwã. ³¹Upe jave ae oikwaa-ma hikwái Hesu-pe Hesuha. Oikwaa-ma jave ndohexavéi jevy-ma íxupe. Okanhy-ma Hesu hesa kwéry-gwi.

³²—Nthane mbovy'agwasu kuri nhanhomongeta ramo tape-rehe. Nhandejáry nhe'ê, kwatia-rehe oĩ va'e omombe'u kuri tape-rehe. Oikwaa uka-ma kuri nhande-vy nhane mo'aranduve hagwã, nhane mbopy'agwapy voi kuri, he'i Hesu-rehe ojõupe.

³³Pyae opu'ã jevy oho jevy Jerusalém-my. Ogwahẽ-ma ramo ojohu gwĩ onze Hesu remimondokwe. Indive hetave oiko ojogweroaty-vy.

³⁴—Oikove jevy-ma Nhandejáry Hesu, he'i omombe'u-vy. —Simão ohexa-ma íxupe, he'i hikwái upe mokõi ogwahẽ va'e-pe.

³⁵Ha upéi katu ou va'e omombe'u ave Hesu rexahare.

—Ore ave orohexa íxupe kuri, he'i omombe'u-ma. —Ore moirũ kuri tape-rehe Hesu, he'i omombe'u-ma. —Ore mbo'e jevy kuri tape-rehe. Orokaru-tama ramo ae orohexa kwaa hese, he'i. —Hembiapoy voi ojapo-ma Hesu. Oondo onhe'ê Nhandejáry-pe omboete-vy. Ha upe rire omboja'o ja'o mbojape. Upe ojapo jave oroikwaa-ma hese, he'i omombe'u-vy Hesu irũgwe-pe. —Oroikwaa-ma Hesu voi ra'e, he'i.

Gwemimbo'e kwéry-pe ojehexa uka jevy Hesu

(Mt 28.16-20; Mc 16.14-18; Jo 20.19-23; At 1.6-8)

³⁶ Upéa omombe'u jave Hesu ogwahê íxupe kwéry. Ipa'ũ-my ojekwaa-ma:

—Pende py'agwapy tapeiko-vy, he'i íxupe kwéry.

³⁷ Onhemondýi voi íxugwi hikwái. Ndaipy'agwapyvéi-ma hikwái. Ikyhyje hexa-vy.

—Aragwypóry, he'i mo'ã hese ikyhyje va'e onhemondýi íxugwi.

³⁸ —Ani penhemondýi rei tei xéhegwi, he'i. —Ma'erã-gwi nde py'a-py ereporandu randu xe-rehe, “Oikove para'e Hesu, ndoikovéi para'e” anive upéixa peje tei xe-rehe. Ejerovia katu, he'i íxupe kwéry Hesu. ³⁹ —Pema'ê katu xe-rehe, he'i. —Xe po-rehe pema'ê, xe py-rehe ave pema'ê, he'i. —Epoko katu xe rete-rehe ereikwaa porã hagwã. “Aragwypóry rei-ma oiko” peje mo'ã xe-rehe kuri. Ha'e-ta peẽ-my: Aragwypóry ndaipiréi naikãgwéi ave. Ha xe ndaha'éiry. Xe rete renogwahê jevy peẽ-my, he'i.

⁴⁰ Ho'e-vy ohexa uka íxupe kwéry opo, opy ave:

—Pehexa katu xe kutu hagwe ave, he'i.

⁴¹ Ha ohexa jepe ndogweroviái joty íxupe. Ovy'a eterei-gwi opondera ndera eterei-gwi mba'eve-rehe ndojeroviái hikwái.

Aipo ramo Hesu oporandu:

—Oime tipo temi'urã, he'i ohexa ukave hagwã gwekoha.

⁴² Upéi ome'ê íxupe hemi'urã, piky mbixypyre eíra ave ome'ê íxupe. ⁴³ Ha ha'e kwéry hesa-py ho'u.

⁴⁴ Ho'u-ma rire he'i jevy:

—Oiko-ma xe remimombe'ukwe xe rehegwa amombe'u mbe'u va'ekwe peẽ-my. Aiko ramo va'ekwe pene pa'ũ-my amombe'u mbe'u va'ekwe upe nhe'ê peẽ-my. Xe rehegwa nhe'ê Nhandejáry ohai uka va'ekwe kwatia-rehe. Ymagware-pe Moisés amyri-pe ohai uka va'ekwe, onhe'ê-py omombe'u va'ety amyri kwéry-pe ave ohai uka va'ekwe. Davi amyri-pe ave ohai uka va'ekwe porahéi kwéry héry va'e Salmo. Xe rehegwa nhe'ê meme ohai uka va'ekwe íxupe kwéry. Omotenonde xe rehegwa nhe'ê gwemimombe'ukwe ohai hagwã. Ha tekotevê oikopa Nhandejáry remimombe'ukwe, he'i.

⁴⁵ Upe-ma ramo oikwaa uka íxupe kwéry Nhandejáry nhe'ê kwatia-rehe omoí uka va'ekwe. ⁴⁶ He'i íxupe kwéry:

—Yma va'ekwe Cristo rekorã omoí va'ekwe kwatia-rehe Nhandejáry nhe'e. “Xe rembiporavo va'e pene remiha'arõ ojerereko asy va'erã. Omano tee rire oikove jevy-ta. Mbohapy áry-py oikove jevy-ta. ⁴⁷ Héry-py omombe'u mbe'u va'erã: Perova katu pende rekoha Nhandejáry omboyme hagwã pendéhegwi pene rembiapo vaikwe. Gwembiporavo réry-py omopotí va'erã pende py'a ky'akwe, he'i va'erã omombe'u-vy opa rupigwa ohendu hagwã Cristo rehegwa nhe'ê. Jerusalém mygwa-pe omombe'u ranhe-ta. Upe rire oho omombe'u entéro tetã tetã mygwa kwéry-pe.” Upéixa omombe'u Nhandejáry kwatia nhe'ê, he'i Hesu onhemombe'u-vy. ⁴⁸ —Upéa pehendu va'ekwe, pemoherakwã pemombe'u mbe'u opa-rupi xe aikove jevymaha, he'i. ⁴⁹ —Xe Ru nhe'ê amombe'u va'ekwe peẽ-my. “Ambou-ta Nhe'ê Marangatu tee va'e” he'i xe-vy va'ekwe xe Ru. Upe xe Ru remimbou ambogwey-ta. Upéa-rehe peha'arõ Jerusalém tetã-my. Pene mbopu'aka tee rire-ma ae eresê upe-gwi, he'i íxupe kwéry Hesu.

Hesu ojereraha yváy-py ramogware

(Mc 16.19-20; At 1.9-11)

⁵⁰ Upe rire ogweraha íxupe kwéry Betânia ypy-py. Ohupi opo omondo onhe'ê Nhandejáry-pe.

—Enhangareko porã xe irügwe-rehe, he'i ohovasa hagwã íxupe kwéry.

⁵¹ Omondo jave onhe'ê Nhandejáry-pe ojei oirügwe-gwi ojereraha yváy-py.

⁵² Aipo ramo inhirügwe omondo ave onhe'ê Nhandejáry-pe omboete-vy.

—Ore Ru, nde tuvixa voi. Nde pu'aka tee va'e voi katu, he'i omboete-vy.

Upe rire oho jevy Jerusalém tetã-my. Ovy'a eterei hikwái oje'ói-vy. ⁵³ Ha opyta meme Nhandejáry róga kakwaa-py. Omboete ete Nhandejáry-pe oiko-vy hikwái upe-py.

Hesu Cristo rehegwa nhe'e porã João remimombe'ukwe o evangelho de João

Hesu Cristo Nhandejáry reko kwaa ukaha voi

¹ Ko'yvy nhepyrũ e'ỹ vyteri ramo, oiko-ma va'ekwe Nhandejáry reko kwaa ukaha. Upe heko kwaa ukaha Nhandejáry ndive oiko. Upe heko kwaa ukaha Nhandejáry va'e ave voi ko. ² Ko'yvy nhepyrũ e'ỹ vyteri ramo, ha'e oiko va'ekwe Nhandejáry ndive. ³ Entéro mba'e rereko kwaaharã voi ha'e oiko va'ekwe. Ojapo e'ỹ ramo mba'eve ndoikói. Ha'e anho mba'e apoharã oiko. ⁴ Ha'e nhane moingoharã voi. Nhane moingo rire, nhande py'a-py nhande resape va'e-rami nhane mo'arandu porã va'ekwe.*

⁵ Pytũ-my oiko vérami va'e-pe ohesape. Ha ndaipóri imbogweharã.*

⁶ Ha upéi katu ojekwaa va'ekwe kwimba'e héry va'e João. Ha'e Nhandejáry remimoí omombe'u hagwã.* ⁷ Ojekwaa ou-vy João anhetegwa mombe'uharã, hembixagwe hemiendukwe mombe'uharã ave. He'i João: "Nhande resapeha va'e ko upe va'e nhane mo'arandu-vy" he'i ou-vy Nhandejáry reko kwaa ukaha-rehe. Ou omombe'u ogwerovia uka porã porã hagwã enterove va'e-pe. ⁸ Ha João katu ndaha'úi nhande resape teeharã. Nhande resapeharã mombe'uharã ae ojekwaa ou-vy. ⁹ Ha upe Nhandejáry reko kwaa ukaha katu nhande resape teeharã va'e voi. Upe ramo ogwahẽ-ma va'ekwe nhande-vy ou-vy ko yvy ári upe heko kwaa ukaha. Petei tei nhande resapepa hagwã nhane mo'arandu-vy ou va'ekwe. Ha'e nhande resape teeharã va'e voi.

¹⁰ Ha'e oiko va'ekwe nhane pa'ũ-rupi. Nhande kwéry-pe nhane moingo ramo jepe va'ekwe, ndajakwaáiry joty va'ekwe voi íxupe. ¹¹ Ogwahẽ ou-vy ramo jepe va'ekwe gwe'ýi kwéry retã-my, ndogwero-vy'áiry joty íxupe. Ombojevy ae íxupe he'ýi judeu kwéry va'e. ¹² Ha inhe'ẽ renduha-pe gwive he'i: "Eiko katu xe nhe'ẽ-py Nhandejáry ra'y ramo" he'i petei tei-me. Ojerovia héry-rehe va'e-pe gwive: "Eiko katu Nhandejáry ra'y ramo" he'i.

¹³ Jaiko ramo nhande sy-gwi, ndajaikói vyteri Nhandejáry ra'y ramo. Jaiko ramo nhande ru gwa'yryrã oipota-gwi, ndajaikói vyteri Nhandejáry ra'y ramo. Ojereropyahu nhande rekoha rire ae, oiko Nhande Ru tee ramo Nhandejáry. Nhandejáry ra'y ramo jaiko. Teko rei remimbota-rupi ndajaikói Nhandejáry ra'y ramo. Nhandejáry remimbota-rupi ae jaiko Nhandejáry ra'y ramo.*

¹⁴ Ha Nhandejáry reko kwaa ukaha nhande rete poru-ma va'ekwe. Nhande-rami oiko-ma va'ekwe. Nhane pa'ũ-rupima oiko. Oroma'ẽ ma'ẽ va'ekwe hese. Ore resa-rupi oiko va'e. Hekoha porã tee va'e ra'e. Orohexa porã ramo: "Ha'eixagwa ndaipóri" oro'e hese. "Nhande Ru ra'y tee ha'e anho oiko va'e rekoha-rami voi upéa" oro'e orohexa-vy. Ha'e nhande rereko porã porã meme va'ety nhande rexakwaa rei-vy. Ha'e anhetegwa meme va'e mombe'uha ave.*

¹⁵ Ha João katu omombe'u va'ekwe hesegwa. He'i:

—Upe va'e xe remimombe'ukwe kuri, he'i. —Ha'e kuri hese amombe'u-vy, "Ha'e ipyahuve ramo jepe xéhegwi, xe renondegwa joty" ha'e hese. "Upe va'e onhemboeteve va'e xéhegwi, hi'aranduve va'e xéhegwi. Xe rekove e'ỹ ramo vyteri, ha'e oiko va'ekwe yváy-py" ha'e kuri hese amombe'u-vy, he'i va'ekwe omombe'u-vy onhe'ẽ hatã-vy.

¹⁶ Ha ha'e katu ojehegwigwa-py nhande rovasapa porã rei kuri. Iporãve ráve va'e-py nhande rexakwaa rei oiko-vy. ¹⁷ Yma va'ekwe omombe'u nhande-vy va'ekwe tekoharã myamyri Moisés omombe'u va'ekwe. Nhandejáry nhe'ẽ-py omombe'u nhane rekoharã. Ha upéi katu Hesu Cristo nhande rovasa kuri nhande rexakwaa rei-vy. Anhetegwa tee

* 1:4 Gn 1.1; Jo 1.14; 10.30; 17.5; Hb 1.2-3; Ap 19.13

* 1:5 Jo 8.12; 1 Jo 1.5

* 1:6 Mt 3.1; Mc 1.4; Lc 3.1-2

* 1:13

Rm 8.14-17; Gl 3.26; Ef 1.5

* 1:14 Fp 2.7-8; Cl 2.9

va'e omombe'u kuri nhande-vy. ¹⁸ Ha Nhandejáry katu nhane rembiexa e'ỹ va'e voi. Ha ta'ýry katu peteĩmi oiko va'e, Nhandejáry rembiayhu tee va'e voi, oikwaa uka nhande-vy Nhandejáry rehegwa.

João oikwaa uka Hesu Cristo rehegwa

(Mt 3.1-12; Mc 1.1-8; Lc 3.1-18)

¹⁹ Ha judeu ruvixa kwéry katu ombou va'ekwe João renda-py Jerusalém pygwa ombou. Hemimbou pa'i levita héry va'e ave. Ogwahẽ ramo ha'e-py, oporandu João-pe:

—Mbava'e tipo ere ndéjehe? he'i íxupe.

²⁰ Ha João katu omombe'upa Hesu Cristo rehegwa nhe'ẽ. “Mbava'e tipo ere ndéjehe?” he'i ramo íxupe, nokiririry omombe'upa voi:

—Xe ndaha'etí Cristo. Xe katu nhane resende ou-vy va'erã e'ỹ va'e voi. Pene remiha'arõ e'ỹ xe, he'i ójehe íxupe kwéry.

²¹ Upe-ma ramo Jerusalém-gwi ou va'ekwe oporandu jevy íxupe:

—Aipo ramo, mbava'e tipo eremombe'u ndejehegwigwa? he'i íxupe. —Nde Nhandejáry nhe'ẽ-py omombe'u va'ety héry va'e Elias ymagware remimoherakwãkwe pa nde ra'e? he'i oporandu íxupe.

Ha João katu he'i:

—Upe va'e e'ỹ ave xe, he'i íxupe kwéry.

Upéi oporandu jevy íxupe hikwái:

—Nde Nhandejáry nhe'ẽ-py omombe'u va'ety nhane remiha'arõ va'e ymagware remimoherakwãkwe pa nde ra'e, he'i íxupe.

—Ndaha'éiry. Upéa e'ỹ ave xe, he'i íxupe kwéry.

²² —Aipo ramo, mbava'e tipo eremombe'u ndejehegwigwa? he'i íxupe. —Emombe'u katu ore-vy orogweraha hagnã ne nhe'ẽgwe ore mbouhare-pe, he'i. —Mbava'e tipo ere ndéjehe? he'i íxupe hikwái.

²³ Upéixa he'i-ma ramo, ha'e oiporu yma gware nhe'ẽ. Nhandejáry nhe'ẽ-py omombe'u va'ety héry va'e Isafas nhe'ẽ oiporu oikwaa uka hagnã mba'éixa hembiaipo:

—Xe ko tekваты e'ỹ-my gwí ou va'e-pe anhe'ẽ hatã va'e: “Pemoatyrõ katu Nhandejáry raperã” ha'e va'e voi kente kwéry-pe. Amombe'u íxupe tape ramigwarã-rami ambojehesa rerova uka hagnã hese, he'i ójehe oporandu va'e-pe.*

²⁴ Upe ramo he'i íxupe hikwái. Upéa onhembou va'ekwe fariseu kwéry va'e he'i:

²⁵ —Aipo ramo mbava'e-gwi po epeporomongarai ereiko-vy? he'i íxupe. —Cristo ou va'erã e'ỹ nde. Elias héry va'e e'ỹ ave nde. Nhandejáry nhe'ẽ-py omombe'u va'ety, nhane remiha'arõ va'e e'ỹ ave nde. Upéa-gwi ma'erã po epeporomongarai ereiko-vy? he'i oporandu íxupe.

²⁶ Upe ramo he'i:

—Xe, he'i —y-py mante aporomongarai va'e. Ha pene pa'ũ-my katu oĩ peikwaa e'ỹ va'e.

²⁷ Ha'e ipyahuve ramo jepe xéhegwi, xe rekove e'ỹ ramo, oiko va'ekwe yváy-py, he'i. —Amboete eterei íxupe. Upéa-gwi, xe miríve-gwi, xe atí-gwi ave, ni hembigwái ramo jepe ndikatúí aiko, he'i íxupe kwéry oporandu va'e-pe.

²⁸ Upéixa oporandu randu ojúpe Betânia tetã-my, Jordão ysyry rovái. João oporomongarai ha-py onhomongeta hikwái.

Nhandejáry gwigwa ovexa ra'y ijukapyrã ramigwa voi Hesu

²⁹ Iko'ẽmba-ma ramo ohexa Hesu-pe ogwahẽ ou-vy ramo henda-py. Ohexa ramo, he'i íxupe:

—Upe va'e ko Nhandejáry gwigwa ovexa ra'y ijukapyrã ramigwa ou upéa. Nhane rembiaipo vaikwe omboyke va'erã nhandéhegwi, he'i hese. ³⁰ —Upe va'e xe remimombe'u kuri, “Xe rapykwerigwa jepe ha'e. Xe aiko e'ỹ ramo, oiko-ma voi ha'e. Upe va'e onhemboeteve va'e xéhegwi. Xe aiko e'ỹ ramo, oiko-ma voi va'ekwe ha'e” ha'e kuri hese amombe'u-vy. ³¹ Xejéhegwi rei ramo ndahexa kwaái hese hekoha. Ha Nhandejáry nhe'ẽ-py

* 1:23 Is 40.3

xe agwahê va'ekwe aju-vy aporomongarai hagwã y-py. Ojehexa uka hagwã myamyri Israel remiarirô kwéry-pe upe nhane remiha'arô va'e aporomongarai aiko-vy, he'i Hesu-rehe.

³²⁻³³ Upéi João omombe'u gwembixagwe, gwemiendukwe omombe'u ave:

—Upe va'e, nhane remiha'arô va'e ahexa ramo jepe, xejéhegwi rei ramo ndahexa kwaí hese hekoha. Nhandejáry oikwaa uka ramo xe-vy ae, aikwaa-ma hekoha. He'i va'ekwe xe-vy Nhandejáry: “Eporomongarai katu y-py” he'i. Upéi he'i jevy: “Erehexa-ta Nhe'ê Marangatu tee va'e ogwejy ou-vy ramo pykasu-rami. Ogwapy hese oĩ-vy ramo erehexa-ta ave. Upe va'e hese ogwejy va'erã voi omoingo va'erã pende py'a-py Nhe'ê Marangatu tee va'e-pe” he'i kuri xe-vy Nhandejáry. Ha upe rire katu ahexa Nhe'ê Marangatu tee va'e-pe pykasu-rami ogwejy ou-vy ramo. Yváy-gwi ogwejy ogwapy hese. Upe va'e ahexa voi. ³⁴ Ahexapa-ma voi. Upéa-gwi amombe'u peê-my ahexa va'ekwe. Upe va'e katu Nhandejáry ra'y voi, he'i João omombe'u-vy.*

³⁵ Iko'ê jevy-ma ramo, João onhembo'y jevy oĩ-vy mokôí hemimbo'e ndive. ³⁶ Ha Hesu katu ohasa oho-vy. Ohexa ramo Hesu-pe:

—Upe va'e ko Nhandejáry gwigwa ovexa ra'y ijukapyrã ramigwa upéa, he'i Hesu-rehe.

³⁷ Ha mokôí hemimbo'e katu ohendu ramo inhe'ê, oho Hesu ³⁸ Ha Hesu ojeapa hese ohexa ou ramo gwapykwéri:

—Mbava'e tipo ereipota? he'i mokôíve va'e-pe.

—Kipy tipo ereiko va'e nde, porombo'eháry? he'i Hesu-pe.

³⁹ —Peju katu pehexa, he'i íxupe.

Upe-ma ramo oho ohexa oiko ha-py. Ka'arugwasu-ma. Upéa-gwi opyta Hesu ndive. Ka'aru ete peve indive opyta.

⁴⁰ Upe mokôí va'e ohendu rire João nhe'ê oho ra'e Hesu rapykwéri. Peteí héry va'e André. Ha'e Simão Pedro ryvy va'e. ⁴¹ Pya'e oho gwyke'ýry reka-vy. Otopa rire he'i íxupe:

—Orotopa-ma Messias héry va'e, he'i íxupe.

Cristo nhane remiha'arô va'e-pe he'i Messias.

⁴² Ogweru gwyke'ýry-pe Hesu renda-py. Ogwahê rire, ohexa katu katu íxupe Hesu:

—Nde katu João ra'y. Nde réry Simão. Ha ahekoviarô-ta nde réry. Erenhehenói-ta Cefas-py, he'i tyke'ýry-pe.

Ha inhe'ê ambue-py ohenói Pedro-pe. Pedro he'ise ita.

“Eju xe moirũ katu” he'i Filipe-pe Hesu

⁴³ Iko'ê jevy-ma ramo:

—Jaha katu Galiléia yvy-koty, he'i Hesu.

Upéi otopa Filipe-pe:

—Eju, xe moirũ katu, he'i íxupe.

⁴⁴ Ha Filipe katu Betsaida tetã mygwa. André tyke'ýry ndive upe tetã mygwa ave.

⁴⁵ Ha upéi katu Filipe oho otopa Natanael-pe. Ha omombe'u íxupe:

—Orotopa-ma voi José ra'y Hesu-pe, Nazaré pygwa va'e. Upe va'e-rehe yma ohai va'ekwe kwatia-rehe Moisés amyri, nhane rekorã omombe'u jave nhane kwéry-pe. Ohai va'ekwe hese myamyri Nhandejáry nhe'ê-py omombe'u va'ety kwéry ave, he'i Natanael-pe.

⁴⁶ —“Nazaré pygwa” ere kuri xe-vy, he'i. —Upéa tetã-gwi xe ndaikwaái osê porã va'e, he'i Filipe-pe imombe'u-vy.

—Nde katu eju terehexa, he'i Natanael-pe.

⁴⁷ Upéi Hesu ohexa Natanael-pe ogwahê ou-vy ramo henda-py:

—Upéa ko Israel re'ýi tee va'e. Nhane mbotavy e'ý va'e voi, he'i hese.

⁴⁸ Ohendu ramo inhe'ê, he'i:

—Mba'éixa po xe kwaa? he'i Hesu-pe.

—Eregwapy erei-vy ramo vyteri figo máta gwy-py, orohexa-ma voi. Orohexa-ma voi kuri eregwapy ramo ha upe rire katu ne renói-ma Filipe, he'i Natanael-pe Hesu.

* 1:34 Mt 3.13-17; Mc 1.9-11; Lc 3.21-22

⁴⁹—Nde katu Nhandejáry ra'y tee voi, porombo'eháry. Myamyrĩ Israel remiarirõ ruvixagwasu ave nde, he'i Hesu-pe.

⁵⁰Upe-ma ramo Hesu he'i íxupe:

—Ha'e-ma kuri nde-vy, “Eregwapy ereĩ-vy ramo figo máta gwy-py orohexa-ma” ha'e nde-vy. Upe va'e-gwi mante xe rerovia-ma tipo? he'i. —Ha ko'ánga katu tuvixa mba'e va'e erehexa va'erã iporãve va'e ave, he'i Natanael-pe Hesu.

⁵¹Upéi he'i upe-py oĩ va'e-pe gwive:

—Anhetegwa va'e amombe'u-ta peẽ-my. Pehexa va'erã ojekwaa ramo yváy-py, Nhandejáry rembigwái ojeupi ramo xéhegwi. Ogwejy jevy ou-vy ramo ave xe renda-py pehexa va'erã. Pehexa ramo, pehexa kwaa va'erã xe-rehe. “Ha'e ko Nhande Ryke'y tee va'e voi nipo ra'e” peje va'erã xe-rehe, he'i íxupe kwéry Hesu.

2

Omenda-ma omenda va'erã

¹Mokõĩ áry rire omenda-ta Hesu re'ýi omenda va'erã. Caná tetã-my omenda-tama. Upe Caná Galiléia yvy pygwa. Upe-py omenda ha-py Hesu sy oĩ ave. ²Onhehenói Hesu oho hagwã gwe'ýi menda hagwã-py:

—Eju katu, he'i. —Ne remimbo'e kwéry ndive eju katu, he'i íxupe.

Upe-ma ramo ohopa hikwái omenda va'erã ha-py. ³Upéi katu omendaha óra ndoikovéi-ma uva rykwere. Ho'upa-ma ra'e hikwái. Opa ramo, oho Hesu ha-py isy:

—Ndogwerekovéi-ma uva rykwere, he'i omombe'u-vy.

⁴—Ma'erã tipo eremombe'u xe-vy xe rembiaporã, he'i osy-pe. —Hi'óra-pyma voi xe xe rembiapo-ma va'erã, he'i osy-pe.

⁵Upéi he'i hembigwái kwéry-pe isy:

—Peẽ-my he'i va'erã gwive pejapo katu, he'i.

⁶Upe-py oĩ seis y ryrugwasu. Ita gwigwa ijapopyre y rryru. Ojoha'e-rami meme. Hynyhẽ ramo, peteĩ teĩ ogwereco oitenta litro para'e, cem litro para'e ogwereco. Upe y rryru-gwi judeu kwéry reko-rupi ogwenohẽ va'e y onhemopotĩ hagwã.

⁷Ha upéi katu Hesu he'i íxupe kwéry:

—Pemohynyhẽ katu upe y rryru y-gwi, he'i hembigwái kwéry-pe.

Omohynyhẽmba-ma. Ijuru gwive omoĩ omohynyhẽ-vy.

⁸Upéi he'i íxupe kwéry:

—Áy pejara mixĩ mixĩ peraha temi'urã rerojaha-pe otantea hagwã, he'i. Upe-ma ramo ojara ogweraha. ⁹Upéi pe huvixa otantea hembierukwe. Y omondo ra'e uva rykwere ramo. Hesu nhe'ẽ-py y ojere uva rykwere ramo ra'e. Otantea ramo ohendu:

—Uva rykwere tee va'e, he'i ho'u-vy. —Kigwigwa po ojara ra'e? he'i.

Ndoikwaái. Ha ijarahare ae oikwaa voi. Upéa-gwi pe huvixa ohenói ou hagwã omenda va'erã-pe. Osapukái ou hagwã:

—Eju katu a-py, he'i íxupe.

¹⁰Ogwahẽ ramo, he'i íxupe:

—Nhande kwéry uva rykwere tenonde nname'ẽ va'e iporãve. Upe rire katu heta ho'u rire nhane remienoi-gwe, nname'ẽ jevy va'e naiporãvéi-ma, he'i. —Ha nde katu nderejapo kwaáiry upéixa. Iporãve va'e eremoĩ ngatu-ma. Ko'ánga ete peve eremoĩ ngatu, he'i omenda va'erã-pe.

¹¹Upéixa onhepyrũ Hesu heroviapyrã-rupi hembia-po porã. Caná, Galiléia tetã-my hembia-po porã. Ohexa uka gwemimbo'e kwéry-pe gwekoha porãha. Ohexa kwaa ramo hese hekoha porã, ojerovia-ma hese hikwái.

¹²Upe rire oho Hesu Cafarnaum tetã-my. Omoirũ íxupe isy, tyvy kwéry hemimbo'e kwéry ave. Upe-py ndahi'aréiry opyta hikwái.

*Hesu oho oike Nhandejáry róga kakwaa-py
(Mt 21.12-13; Mc 11.15-17; Lc 19.45-46)*

¹³ Ha upéi katu hi'agwĩ-ma ogwahẽ haggwã areteguasú áry héry va'e páscoa. Judeu kwéry remimboete upe arete. Upe-ma ramo Hesu oho Jerusalém tetã-my.* ¹⁴ Nhandejáry róga kakwaa-py oike ramo, otopa heta oma'e vende va'e. Upe-py oĩ vaka vendeha ovexa vendeha pykasu vendeha ave. Upe-py ogwapy oĩ-vy plata kambiaha. Okambiaseha-pe okambia. ¹⁵ Upe-ma ramo Hesu omosã ombopi haggwã. Omosẽmba Nhandejáry róga-gwi ovexa reheve. Vaka reheve omosẽmba íxupe kwéry imondo-vy. Ombohokovia va'e apyka ombovayva. Ombojerepa. Iplata oitypa vyv-py. Omosarambipa iplata. ¹⁶ Ha pykasu járy-pe katu he'i:

—Penohẽmba katu pykasu peraha-vy ko'a-gwi, he'i ijáry-pe. —Ani pereko teĩ xe Ru róga gwery-py pevende va'erã, imondopa haggwã he'i íxupe.

¹⁷ Upe va'e ohexa ramo, imandu'a hemimbo'e kwéry Nhandejáry kwatia nhe'ẽ-rehe oĩ va'e-rehe:

“Xe rakate'ỹ eterei nde róga-rehe. Upéa-gwi xe juka va'erã”*

he'i Nhandejáry kwatia nhe'ẽ Hesu-rehe.

¹⁸ Ha judeu ruvixa kwéry katu ogwahẽ ou-vy iha-py:

—Kiva'e nhe'ẽ-py erejapo-ma upéa? he'i íxupe. —Ejapo katu tuvixa mba'e oroikwaa haggwã Nhandejáry nhe'ẽ-py para'e erejapo hagwe, ne nhe'ẽ-py para'e, he'i íxupe judeu ruvixa kwéry.

¹⁹ —Néi, ajapo-ta. Pemboai ramo ko óga, mbohapy áry rire amopu'ã jevy arã, he'i judeu ruvixa kwéry-pe.

Ha ndoikwaáiry inhe'ẽ hikwái.

²⁰ —Imopu'ã hagwe Nhandejáry róga kakwaa quarenta e seis ro'y-ma ojapo, he'i íxupe. —Ma'erã ere kuri ore-vy, “Amopu'ã jevy-ta mbohapy áry rire” he'i oporandu-vy íxupe judeu ruvixa kwéry.

²¹ Ha, “ko óga” he'i ramo, nde'íry óga tee-rehe. Gwete-rehe ae he'i Hesu. ²² Upéa ohendu-ma ramo, ndoikwaáiry Hesu nhe'ẽ hemimbo'e kwéry. Ha omano rire onhemoingove jevy ramo katu, imandu'a hemimbo'e kwéry inhe'ẽgwe-rehe. Imandu'a ramo, ogwerovia-ma Nhandejáry kwatia nhe'ẽ. Hesu nhe'ẽgwe ogwerovia-ma ave.

Nhande py'apóry oikwaapa Hesu

(Jo 5.41)

²³ Oiko jave areteguasú héry va'e páscoa, oĩ Hesu Jerusalém-my. Heta hembiape porã voi heroviapyrã-rupi. Upe-ma ramo Hesu rembiape ohexa-ma ramo, heta oĩ ojerovia va'e hese:

—Jajerovia-ma hese. Hesu réry-rehe jajerovia-ma, he'i hese hikwái.

²⁴ Ha Hesu katu ndojeroviái vyteri hese kwéry. Ndojerovia teí vyteri ojeheha-gwi oikwaa voi. Upéa-gwi ndojeroviái vyteri hese kwéry.

²⁵ Nhande kwéry-pe peteĩ teĩ nhande kwaa porã-ma voi. Avave omombe'u e'ỹ reheve íxupe, nhande rekoha ohexa kwaapa-ma voi nhande-rehe. Oikwaapa voi nhande py'a-py oĩ va'e. Nhande py'apóry oikwaapa voi. Ndaipóri íxugwi okanhy va'e.

3

Peteĩ mburuvixa onhomongeta Hesu ndive

¹² Ha upéi katu ogwahẽ ou-vy Hesu ha-py mburuvixa héry va'e Nicodemos. Pyhare-ma ou. Upe va'e fariseu kwéry va'e. Judeu kwéry ruvixa ave. Ogwahẽ rire he'i Hesu-pe:

—Avave onhe'ẽ-py rei nahembiape porãiry ne rembiapoha-rami, porombo'eháry. Nhandejáry nhe'ẽ-py ae hembiape porã arã ne rembiapora-rami. Upéa-gwi ne mbou-ma nipo ra'e Nhandejáry ore mbo'e haggwã, he'i Hesu-pe.

³ Upe ramo Hesu he'i íxupe:

—Ejeapysaka porã katu. Anhetegwa va'e amombe'u-ta nde-vy. Ndikatúi avave ojoho Nhandejáry-pe gwuvixarã. Onhembopyahu jevy ramo ae oikwaa va'erã, he'i mburuvixa-pe.

* 2:13 Êx 12.1-27 * 2:17 Sl 69.9

⁴Ha mburuvixa he'i íxupe:

—Mba'éixa po nhandembopyahu-ta nhande tuja ramo? he'i. —Ndikatuvéi-ma jaike nhande sy rye py-py jaiko jevy hagwã, he'i íxupe mburuvixa.

⁵He'i jevy mburuvixa-pe:

—Ejeapysaka porã katu. Anhetegwa va'e amombe'u-ta nde-vy, he'i. —Ojêhegwi rei avave nomoirũ mo'ãi Nhandejáry-pe gwuvixarã. Onhemopotĩ rire, onhembopyahu jevy-ma rire Nhe'ẽ Marangatu tee va'e oiko-magwi ipy'a-py ae, ojohu va'erã íxupe, he'i. ⁶—Jaiko ramo nhande sy-gwi jaiko rei. Ha nhandembopyahu jevy ramo katu, Nhe'ẽ Marangatu tee va'e-rupi jaiko va'erã. ⁷Ha'e kuri nde-vy, “Nhandejáry oipota erenhembopyahu jevy” ha'e nde-vy. Ma'erã po erepondera xe nhe'ẽ-rehe? he'i. ⁸—Oho yvytu. Ohose ha-koty rei oho. Nhahendu ou ramo hyapu va'e. Nhahendu ramo jepe, ndajai kwaái joty ki-gwi po ou. Ki-koty po iho hagwã ndajai kwaáiry ave. Upéixa ete voi Nhe'ẽ Marangatu tee va'e-rupi nhandembopyahu jevy va'e gwive. Yvytu-rami rei ou Nhe'ẽ Marangatu tee va'e. Ndjai kwaái ki-gwi po ou. Ki-koty po iho hagwã ndajai kwaái ave, he'i upe mburuvixa-pe.

⁹—Mba'éixa po oiko upéa? he'i Hesu-pe.

¹⁰—Nde ko Israel remiari róre judeu kwéry mbo'eháry voi. Imbo'eháry jepe, ndereikwaái joty voi xe nhe'ẽ. Ne arandu teĩ, he'i. ¹¹—Amombe'u-ta nde-vy anhetegwa va'e. Oroikwaagwi oronhe'ẽ va'e. Oromombe'u va'e ore rembiexagwe. Ha ndaperoviái voi joty ore nhe'ẽ, he'i íxupe Hesu. ¹²—Ndaxe roreviáiry-ma kuri amombe'u ramo peẽ-my vvy arigwa rehegwa. Aipo ramo, mba'éixa po xe rorevia-ta amombe'u ramo peẽ-my yváy pygwa rehegwa? ¹³Upéa rehegwa avave ndoikwaái yváy-py ndojeupíry-gwi oho-vy. Ha xe ae katu Nhande Ryke'y tee va'e aiko upe-py. Upe-gwi aju kuri. Upéa-gwi xe aikwaá voi upéa rehegwa, he'i mburuvixa-pe.

¹⁴—Amombe'u-ta nde-vy myamyri Moisés rehegwa nhe'ẽ. Yma va'ekwe Moisés ohupi va'ekwe mbói ra'anga imoi-vy yvate yvyra-rehe. Tekwaty e'ỹ-my oiko jave ohupi va'ekwe. Upéixa voi Nhandejáry nhe'ẽ-py xe rupi-ta. Xe Nhande Ryke'y tee va'e-pe xe rupi-ta yvyra-rehe.* ¹⁵Xe moi-ta kurusugwasu-rehe entéro ojerovia va'erã gwive xe-rehe oiko porã meme ete hagwã Nhandejáry ndive. Opa e'ỹ va'erã voi, he'i mburuvixa-pe.

¹⁶—Nhande kwéry va'e-pe nhande rayhu tee rei-ma va'ekwe Nhandejáry. Upéa-gwi nhande rayhu-gwi, ombou ime'ẽ-vy va'ekwe nhande-vy gwa'ýry ha'e anho oiko va'e. Upéixa ramo jajerovia va'e gwive hese, nanhane mondói va'erã mombyry ojêhegwi. Jaiko meme ete va'erã ae Nhandejáry ndive. Japave e'ỹ reheve jaikove joty va'erã voi.* ¹⁷Nhande kwéry va'e-pe ombou va'ekwe gwa'ýry. Nombouí íxupe nhane mbohasa asy hagwã. “Pene rembiapo vai ko” nde'íry nhande-vy ou-vy. Ombou rei ae va'ekwe nhande kwéry va'e-pe. Nhane resendeharã rei ombou va'ekwe.

¹⁸—Upéixa ramo jajerovia va'e gwive hese nhasẽ rei-ma nhane monhe'ẽ e'ỹ reheve. Ha jajerovia e'ỹ va'e gwive hese katu nhane mbohasa asy hagwã-ma voi. Ndajajeroviái-gwi Nhandejáry ra'y réry anho-rehe, nhane mbohasa asy va'erã. ¹⁹Ogwahẽ-ma va'ekwe ou-vy ko yvy ári nhande py'apy-py nhande resapeharã. Ha hembiaapo vai va'e gwive katu ndojohu porã nhande resapeha. Pytũ ae ha'e kwéry ojohu porã va'ekwe. Upéa-gwi Nhandejáry, “Ambohasa asy va'erã” he'i imandu'a hese kwéry ombohasa asy hagwã. ²⁰Ha hembiaapo vai va'e gwive ndaija'úi nhande resape va'e-rehe. Ndoipotái ojekwaa hembiaapo vaikwe. Upéa-gwi ndohói nhande resape va'e ha-py. Hembiaapo vaikwe ojekwaa hagwã-my ndohoséiry voi. ²¹Ha anhetegwa ojapo va'e gwive hembiaapo ojekwaa porã hagwã-my oho va'e. Upe-py oho entéro ohexa porã hagwã hembiaapo porãkwe. “Nhandejáry reko-rupi hembiaapo porã” oipota he'i ójehe, he'i pe mburuvixa-pe Hesu.

João omombe'u Hesu rehegwa, ojehegwa omombe'u ave

²²Onhomongeta rire mburuvixa ndive, oho oje'ói-vy Hesu hemimbo'e kwéry ndive Judéia yvy-py. Upe-py hendive kwéry opyta oporomongarai uka oiko-vy. ²³Upe jave João

*

3:14 Nm 21.9

*

3:16 Jo 3.36; 6.40; 11.25-26; 20.31; Rm 5.8; 1 Jo 5.11-12

oporomongarai oiko-vy ave. Enom tetā-my Salim ppy-py oporomongarai. Upe-py heta oī y. Heta oī va'e henda-py oje'ói. Onhemongarai uka-vy oje'ói. ²⁴Oī e'ỹ ngatu preso omongarai joty entéro va'e-pe.

²⁵Ha upéi katu onhonhe'ẽ mbojevvy jevy-ma João remimbo'e kwéry judeu kwéry va'e ndive:

—Nhanhemongarai hagwā a-rami tekoha, he'i.

—Ndaha'úi. Ndaikoséi nde reko-rupi. A-rami ae aikose, he'i outro.

Nohenduséi onhonhe'ẽ.

²⁶Upe-ma ramo oje'oipa João renda-py:

—Naiporāi voi, porombo'eháry, he'i João-pe hikwái. —Oī va'ekwe kwimba'e ne ndive Jordão ysyry rovái. Hesegwa eremombe'u va'ekwe. Ha ko'ánga katu ogwahẽ ko'a-py upe va'e. Oporomongarai ko oiko-vy ko'a-py ave. Enterove ete oho henda-py, he'i íxupe hikwái.

²⁷Ha João he'i:

—Nhande-vy Nhandejáry remime'ẽgwe mante jareko, he'i. ²⁸—Ha'e kuri hese: “Xe ko ndaha'úi Cristo héry va'e. Pene remira'arõ e'ỹ xe. Cristo renonde-rupi mante xe mbou-ma” ha'e hese. Pehendu-ma voi xe nhe'ẽ anhemombe'u ramo, he'i.

²⁹Upéi omombe'u íxupe kwéry pete'i nhe'ẽ.

—Kunha-rehe nhamenda-tama ramo, nhane rembirekorā voi pe kunha. Ndaha'úi nhane irũ rembirekorā. Ha nhane irũ katu, nomendái ramo jepe, ovy'a joty. Nhande ayvu ohendu ramo, ogwerohory joty nhande ayvu. Upéixa ete xe avy'a Hesu-rehe. Heta ojehesa rerova kuri hese oiko-vy. Ha xe irũ katu ndahetái. Ndahetái ramo jepe, xe avy'a joty Hesu-rehe. Xe avy'a eterei ko'ánga, he'i ójehe. ³⁰—Nhandejáry nhe'ẽ-py ha'e onhembotuvixave xave oho-vy va'erā. Ha xe katu aiko kirirĩve rĩve aiko-vy va'erā, he'i ójehe João.

Yváy-gwi ogwejy va'ekwe

³¹Yváy-gwi ogwejy va'ekwe entéro va'e-gwi heko porāve va'e. Ha yvy pygwa katu oiko rei yvy ári ojehegwigwa mante omombe'u. Ha yváy gwigwa ou va'ekwe katu enterove va'e-gwi hekoha porāve va'e. ³²Ha'e omombe'u gwembixagwe ha gwemiendukwe mate. Ha avave joty ndogweroviái joty íxupe. ³³Inhe'ẽ ogwerovia va'e ae: “Nhandejáry ijapu e'ỹ va'e. Anhetegwa voite omombe'u va'e ae” he'i ete hese. ³⁴Ha'e ko Nhandejáry remimbou va'e. Nhandejáry nhe'ẽ tee omombe'u va'e voi. Ha Nhandejáry katu nahakate'ỹry ime'ẽ-vy íxupe Nhe'ẽ Marangatu tee va'e. Ome'ẽ me'ẽ rei íxupe. Upéa-gwi ha'e Nhandejáry nhe'ẽ tee omombe'u va'e voi. ³⁵Ha Nhandejáry katu Nhande Ru va'e ohayhu va'e gwa'ýry. Enterove va'e járy-ma voi oiko ta'ýry. ³⁶Jajerovia ramo Nhandejáry ra'y-rehe, jaiko-ma opa e'ỹ reheve va'erā Nhandejáry ndive. Ha nhahendu e'ỹ ramo katu inhe'ẽ, ndajaiko mo'ávái-ma va'erā Nhandejáry ndive. Ha'e nhande rereko asy va'erā.

4

Hesu onhomongeta kunha Samaria pygwa ndive

¹⁻³Upe ramo omombe'u fariseu kwéry-pe:

—Are-ma omoirũ heta João-pe. Ha ko'ánga katu hetave Hesu-rehe ojehesa rerovapa. Hesu-pe háma omoirũ heta. Omongarai-ma íxupe kwéry Hesu gwemimbo'erā, he'i omombe'u-vy.

Upéa oikwaa-ma ramo, osẽ oho-vy Hesu Judéia yvy-gwi. Oho jevy Galiléia yvy-koty. Ha Hesu katu oporomongarai e'ỹ va'e. Hemimbo'e kwéry mante ae oporomongarai va'e. ‘Ha upéi katu ohasa oho-vy Samaria yvy-rupi. Upe-rupi ndoho reíry.

⁵Upéixa ramo ogwahẽ oho-vy Samaria pygwa tetā héry va'e Sicar-py. Ha Sicar katu hi'agwí oī myamyri Jacó vvykwe-gwi pe ome'ẽ gwa'ýry José-pe va'ekwe-gwi. * ⁶Upe-py oī Jacó ygwa. Ha upéi katu Hesu ogwahẽ rire ogwapy ygwa ppy-py. Ogwata puku ou-vy rire ikane'o. Upéa-gwi okane'o ramo ogwapy otongea-vy. Larose-ma ramo ogwapy oī-vy onhemokane'õgwa hagwā.

* 4:5 Gn 33.19; Js 24.32

⁷Upe-ma ramo ogwahẽ ou-vy kunha Samaria pygwa va'e. Ogwenohẽ hagwã y ou. He'i íxupe Hesu:

—Hay'u-ta, he'i.

⁸Ha ndaipóri inhirũ. Hemimbo'e kwéry oje'ói kuri tetã-my oho ojogwa hagwã gwemi'urã kwéry.

⁹Ha upéi he'i íxupe pe kunha:

—Nde ko judeu kwéry va'e. Xe katu Samaria pygwa va'e. Pende a'e'yha ore, he'i. —Aipo ramo ma'erã po erejerure xe-vy y-rehe. Judeu kwéry katu ndore rerohorýi va'e. Ndoiporúí ore mba'e, he'i íxupe.

¹⁰Upéi Hesu he'i pe kunha-pe:

—Nderikwaái voi Nhandejáry remime'ērã. “Hay'u-ta” ha'e ramo nde-vy, ndaxe kwaái ave. Ha xe kwaa rire ra'e, erejerure arã xe-vy ra'e. Ame'ẽ arã nde-vy ra'e y. Yvu ramigwa va'e ame'ẽ arã nde-vy nde rekoerã, he'i kunha-pe.

¹¹Upéi he'i íxupe pe kunha:

—Hypy voi ygwa, porombo'eháry, he'i. —Ndererekói henohẽha. Mamo-gwi nipo erenohẽ-ta y yvu ramigwa va'e, he'i íxupe kunha. ¹²—Ore ramói ypykwe Jacó ome'ẽ va'ekwe ore-vy upéa ygwa. Hoy'u ave íxugwi. Ta'yry hoy'u ave íxugwi va'ekwe. Omboy'u ave íxugwi va'ekwe gwymba, he'i. —Ha nde nerenhembotuvixa mba'úi tipo íxupe? he'i íxupe kunha.

¹³Upéi he'i kunha-pe:

—Ko va'e y ja'u ramo, jay'u jevy jevy va'erã, nhande y'uhéi jevy va'erã. ¹⁴Ha xe remime'ērã ere'u ramo, nande y'uhéi mo'ávúi-ma va'erã, he'i. —Xe mba'e y ame'ẽ va'erã nde-vy nde py'a-py ndopái va'erã. Yvu-rami opupu va'erã. Yvu-rami oĩ va'erã nde py'a-py nde rekoerã. Ndopái-gwi ereiko va'erã opa e'y reheve Nhandejáry ndive, he'i kunha-pe.

¹⁵Upe-ma ramo he'i íxupe kunha:

—Eme'ẽ maní katu xe-vy, porombo'eháry, aipo erereko va'e y. Ndaxe y'uheivéi-ma va'erã. Ndajuvéi-ma va'erã y-rehe ko'a-py, he'i íxupe.

¹⁶Upéi he'i kunha-pe:

—Ekwa emombe'u ne ména-pe ou ave hagwã a-py. Upe rire peju katu ko'a-py, he'i.

Ha kunha he'i íxupe:

¹⁷—Naxe ménai voi, he'i.

Ha Hesu he'i íxupe:

—“Naxe ménai” ere-ma ramo, anhetegwa voi eremombe'u xe-vy. ¹⁸Eremenda menda voi ereiko-vy va'ekwe. Cinco voi oiko ne menakwe. Indive áy ereiko va'e ndaha'úi ne ména tee. “Naxe ménai” ere ramo, anhetegwa voi eremombe'u xe-vy, he'i kunha-pe Hesu.

¹⁹Ohendu ramo inhe'ẽ: “Xe kwaa-ma ra'e” he'i ójehe.

Upéa-gwi he'i íxupe kunha:

—Nde ko, porombo'eháry, Nhandejáry nhe'ẽ-py eremombe'u va'ety nipo ra'e. Ahexa kwaa-ma nde-rehe, he'i oikwaa-gwi íxupe Hesu.

²⁰—Upe va'e vyvaty ári ojeupi meme va'ekwe ore ramói kwéry. Nhandejáry nhamboete haty-py oho meme. Ha peẽ, judeu kwéry va'e katu ndapejohu porái upe-py oroho ramo. Jerusalém tetã-my mante oipota jaha Nhandejáry mboete-vy. “Upe-py ae tekoha” he'i judeu kwéry, he'i kunha omombe'u-vy.

²¹Upéi he'i kunha-pe:

—Xe rerovia katu, kunha. Ogwahẽ-tama Nhandejáry óra, nhamboete tee hagwã íxupe óra. Ogwahẽ-ma rire, upe vyvaty ári napemboete mo'ávúi-ma Nhandejáry Nhande Ru-pe. Napemboete mo'ávúi-ma ave íxupe Jerusalém-my, upe oromboete haty-py. ²²Ha pende kwéry niko peikwaa e'y va'e pemboete va'e. Ha ore kwéry katu oroikwaa va'e oromboete voi. Nhane resendeharã ko judeu kwéry va'e. Upéa-gwi oromboete va'e oroikwaa voi.

²³Ogwahẽ-ta hi'óra, he'i. —Áy ogwahẽ pota-ma voi hi'óra. Ko'anga katu Nhandejáry-pe omboete tee va'e gwive, omboete va'erã íxupe opy'a gwive. Nomboete ra'anga anga rei mo'ávúi-ma íxupe. Upéa rehewga omboete teeharã Nhandejáry oipota, he'i. ²⁴—Ha Nhandejáry katu hete e'y va'e jahexa e'y va'e ha'e. Upéa-gwi jahexa e'y ramo jepe,

tanhamboete tee joty íxupe nhande py'a gwive. Ndikativéi-ma nhamboete ra'anga anga rei íxupe, he'i kunha-pe.

²⁵ Upe ramo he'i íxupe kunha:

—Nhane remiha'arō ko ou va'erā, he'i.

Nhane remiha'arō va'e héry va'e Cristo.

Upéi he'i:

—Ogwahē rire ou-vy, opamba'e jaikwaa e'ỹ va'e gwive oikwaa uka va'erā nhande-vy, he'i íxupe.

²⁶ —Xe voi niko ha'e. Xe Cristo-ma voi. Xe ne ndive anhomongeta va'e ha'e-ma voi, he'i kunha-pe Hesu.

²⁷ Upéa he'i-ma ramo, ogwahē ou-vy hemimbo'e kwéry. Opondera hese:

—Mbava'e-gwi po onhomongeta kunha ndive oĩ-vy, he'i ojéupe.

Ha Hesu-pe katu nomongetáiry: “Mbava'e tipo ereipota?” nde'íry. “Ma'erā tipo erenhomongeta kunha ndive erei-vy?” nde'íry íxupe. Opondera rei hese. Noporandúiry.

²⁸ Upe ramo pe kunha oheja omba'e y ryrú oho jevy pe tetā-my:

²⁹ —Pekwa mani. Oĩ kwimba'e opamba'e xe rembiapokwe gwive omombe'u-ma va'e xe-vy. Peju katu jaha pehexa hagwā íxupe. Nhane remiha'arō va'e para'e ha'e, he'i omombe'u-vy pe tetā mygwa-pe.

³⁰ Osēmba-ma upe tetā-gwi hikwái. Oime ou-ma hikwái. Hesu renda-koty ogwa'ě. Ne'írā vyteri ogwahē Hesu-pe.

³¹ Upe-ma ramo ou jave hikwái:

—Ekaru mani, ekaru mani, porombo'eháry, he'i íxupe hikwái.

Ojapura okaru hagwā mo'ā.

³² —Nda'u mo'ái, he'i. —Xe areko ha'u va'erā peikwaa e'ỹ va'e, he'i gwemimbo'e kwéry-pe.

³³ Upe-ma ramo he'i ojóupe hikwái:

—Ndogwerúí tipo avave Hesu-pe hemi'urā ra'e? he'i ojóupe.

³⁴ Upéi he'i gwemimbo'e kwéry-pe:

—Xe ajapo meme xe mbouhare remimbota ajapopa peve xe rembiaporā. Peẽ pejapura pene remi'urā-rehe. Ha xe ajapurave xe rembiaporā-rehe. Upéa ajapo ramo, ndakarúi ramo jepe, xe rygwyatá vérami joty voi. Akaru-ma va'e-rami xe, he'i ójehe.

³⁵ Upéi he'i jevy gwemimbo'e kwéry-pe:

—“Irundy jasy rire ijagwyje-ma” ja'e va'e voi. Ha xe katu ha'e-ma peẽ-my. Pema'ě katu pehexa hagwā. Hi'aju-ma nipo ra'e temitýgwe, he'i Hesu gweroviahará-rehe temitýgwe rehegwa-rami.

Upéi he'i:

³⁶⁻³⁷ —Peteĩ onhemitý va'e, outro kwéry oikytí va'e. Pe temitý omosarambi va'e-rami, peteĩ omombe'u mbe'u Nhandejáry nhe'ě. Pe oikytí va'e-rami, outro kwéry oporogwerovia uka va'e. Ko'ánga oĩ inhe'ě rerovia ukaha oikove opa e'ỹ reheve hagwā Nhandejáry ndive heroviaha. Hemiapo porā-rehe ohekoviārō va'erā íxupe Nhandejáry. Peteĩ onhemitý, outro kwéry oikytí. Ovy'a onhondive hikwái. Peteixa hemiapo. Upéixa ete inhe'ě mombe'uhaty inhe'ě rerovia ukaha ndive ovy'a. Peteixa hemiapo. ³⁸ Oromondo kuri peporogwerovia uka hagwā pemombe'u ranhe e'ỹ reheve. Outro kwéry oho pene renonde va'ekwe omombe'u hagwā Nhandejáry nhe'ě. Ha ko'ánga katu outro kwéry rembiapo porā porā-gwi, peporogwerovia uka-ma, he'i gwemimbo'e kwéry-pe Hesu.

³⁹ Ha heta oĩ Samaria pygwa va'e ojerovia va'e Hesu-rehe. Pe kunha, “Entéro xe rembiapokwe gwive omombe'u-ma kuri xe-vy” he'i ramo tetā mygwa-pe omombe'u-vy, ojerovia-ma hese hikwái. ⁴⁰ Ha upéi katu ogwahē ou-vy Hesu renda-py hikwái:

—Epyta katu ore ndive, epyta katu ore ndive, he'i íxupe.

Upéa-gwi mokōi áry opyta hendive kwéry.

⁴¹ Inhe'ě ohendu ramo hetave-ma ogwerovia va'e oĩ. ⁴² He'i kunha-pe hikwái:

—Eremombe'u ramo kuri ore-vy orogwerovia-ma íxupe. Ha ko'ánga katu ore-vy tee-ma onhe'ě. Ore apysa-rupima orohendu inhe'ě. Upéa-gwi orogwerovia tee-ma voi íxupe,

he'i. —Upe va'e entéro ko yvy ári oiko va'e gwive resendeharã nipo ra'e, he'i hese kunha-pe hikwái.

Hesu ombogwera mburuvixa ra'y-pe

⁴³ Mokõi áry rire upe-gwi oho jevy-ma Hesu. Ogwahẽ oho-vy Galiléia yvy-py:

⁴⁴ —Nhandejáry nhe'ẽ-py omombe'u va'ety ko nombotetĩ íxupe hetã mygwa, he'i Hesu.

⁴⁵ Ha upéi katu ogwahẽ rire Galiléia yvy-py, ogwerohory íxupe upe pygwa kwéry. Oje'ói va'ekwe upe pygwa Jerusalém-my. Oiko jave areteguasú héry va'e páscoa, upe-py ohopa. Upe-py ohexa va'ekwe entéro Hesu rembiapo porãgwe. Upéa-gwi ogwerohory voi íxupe hikwái.

⁴⁶ Ha upéi katu Hesu ogwahẽ jevy oho-vy Caná tetã-my, Galiléia yvy pygwa-py ogwahẽ oho-vy. Upe-py ykwe omondo va'ekwe uva rykwere ramo. Ha outro tetã-my héry va'e Cafarnaum mburuvixa ramo oĩ va'e upe-py. Hasy voi ta'ýry.*

⁴⁷ —Ou-ma kuri Hesu Judéia yvy-gwi. Ogwahẽ-ma ko'a-py, he'i-ma ramo mburuvixa-pe, oho ogwahẽ Hesu renda-py.

He'i Hesu-pe:

—Jaha mani katu embogwera xe-vy xe ra'y-pe, he'i íxupe. —Omano hagwã rami-ma oĩ. Embogwera mani íxupe, he'i íxupe mburuvixa. ⁴⁸ Upe-ma ramo he'i íxupe Hesu:

—Ndaxe rerovia mo'ái nde xe rembiapo erehexa e'ỹ reheve. Heroviapyrã-rupi xe rembiapo ramo, jahexa e'ỹ va'e ajapo ramo ae, xe rerovia va'erã, he'i mburuvixa-pe.

⁴⁹ Upe-ma ramo he'i íxupe mburuvixa:

—Eju mani, porombo'eháry. Ani ne ate'ỹ teĩ ereju hagwã pono omano xe ra'y, he'i íxupe.

⁵⁰ —Tereho katu. Oikove jevy-ma nde ra'y, he'i mburuvixa-pe.

Ogwerovia-ma inhe'ẽ oho-ma. ⁵¹ Oho jave, ohogwaitĩ íxupe hembigwái ou-vy:

—Oikove jevy-ma nde ra'y, he'i íxupe omombe'u.

⁵² Upéi oporandu hembigwái-pe:

—Mbovy óra-py oikove jevy-ma xe ra'y? he'i oporandu-vy gwembigwái-pe.

—Kwehe larose rire nahete rakuvéi-ma, he'i túvy-pe hembigwái.

⁵³ “Upéa óra-py ete voi Hesu omombe'u kuri xe-vy nipo ra'e, Oikove jevy-ma nde ra'y, he'i voi xe-vy” he'i ojúupe. Upe-ma ramo ojerovia tee voi hese. Hóga pygwa gwive ave ojerovia tee ave hese.

⁵⁴ Upéixa imokõiha-rehe hembiaapo porã heroviapyrã-rupi ogwahẽ rire Galiléia-py Judéia yvy-gwi.

5

Hesu ombogwera hasy va'e-pe ygwa ypy-py

¹ Ha upe rire hi'agwĩ-ma ogwahẽ hagwã Judeu kwéry-pe arete áry hagwã. Upéa-rehe oho Hesu Jerusalém tetã-my. ² Upe-py oĩ ygwa héry va'e Betesda hebreu nhe'ẽ-my. Ovexa rokẽ ypy-py oĩ. Ygwa ypy-py oĩ cinco ogapy onhemboty e'ỹ va'e. ³ Upe-py heta eterei oĩ hasy va'e. Onhenjo joa okwa-vy. Heta oĩ hesapyso e'ỹ va'e, heta oĩ ndogwata porã va'e. Heta oĩ ijapa va'e ave. ⁴ Ha Nhandejáry rembigwái yváy-py oiko va'e ogwejy ou-vy va'e. Ndogwejy meméiry. Hi'óra-py ae ogwejy ou-vy y-py. Omomyí hagwã mante y ou ogwejy. Omýi rire y, ha'e ranhe oike va'e y-py, okwera-ma. Oime raẽ va'e mba'asy opoi-ma íxugwi. Upéa oha'arõ oĩ-vy entéro hasy va'e gwive. ⁵ Upe-py oĩ kwimba'e. Are-ma hasy. Ojapo trinta e oito ánhó hasy hagwe. ⁶ Ha upéi katu ohexa íxupe Hesu. Ohexa kwaa hese are hasyha. “Are-ma onhenjo-vy rei oiko upe-py” he'i ojúupe. Upe-ma ramo ha'e he'i:

—Erekwerase tipo? he'i hasy va'e-pe oporandu-vy.

⁷ —Ndaipóri omýi jave xe moĩ va'erã y-py. Aikese mo'ã y-py, porombo'eháry. Ndaikatúi aike y-py. Oike xe renonde-rupi voive va'e, he'i Hesu-pe hasy va'e.

Upe-ma ramo he'i íxupe:

⁸ —Epu'ã katu, ehupi nde rupa. Upéi egwata, he'i íxupe Hesu.

*

4:46 Jo 2.1-11

⁹ Upe-ma ramo okwera-ma Hesu nhe'ẽ-py. Ohupi gwupa ogwata-ma voi. Japytu'uha áry-py okwera. ¹⁰ Upéa-gwi omombe'u mbe'u okwera va'ekwe-pe judeu ruvixa kwéry:

—Etería ko japytu'uha áry. Nde rupa ereraha ramo, eremba'apo voi. Ha naiporã iremba'apo pytu'uha áry-py, he'i omombe'u-vy hasy va'ekwe-pe.

¹¹ Upéi he'i judeu ruvixa kwéry-pe:

—He'i kuri xe-vy, “Ehupi nde rupa egwata katu” he'i xe-vy xe mbogwerahare, he'i omombe'u-vy.

¹² —Kiva'e tipo, “Ehupi nde rupa egwata katu” he'i nde-vy, he'i oporandu-vy íxupe hikwái.

¹³ Ha okwera va'ekwe katu ndoikwaáiry ombogwerahare réry. Upe-py oĩ heta ojog-woeroaty va'e. Ha Hesu katu ndojehexa ukavéi-ma oho-vy.

¹⁴ Ha upe rire katu Hesu otopa okwera va'ekwe-pe. Nhandejáry róga kakawaa-py otopa íxupe:

—Nde ko erekwera-ma. Anive erejavy teĩ pono ojehu jevy nde-vy ivaive va'e, he'i íxupe Hesu.

¹⁵ Upe ramo oho jevy omombe'u judeu ruvixa kwéry-pe:

—Hesu ko xe mbogwerahare ra'e, he'i omombe'u-vy. ¹⁶ Upéa-gwi ojukase voi Hesu-pe judeu ruvixa kwéry:

—Hesu ko omba'apo va'e japytu'uha áry-py, he'i ojóupe hese hikwái.

¹⁷ Upéi he'i íxupe kwéry Hesu:

—Ko'ánga ete peve xe Ru ndopytu'úi omba'apo-vy. Omba'apo meme ha'e oiko-vy. Ha'e-rami xe amba'apo ave aiko-vy, he'i ójehe Hesu.

¹⁸ Upéa ohendu ramo, ojukaseve voi íxupe hikwái. He'i ojóupe:

—Upe va'e ojapo meme va'e jajapo e'ỹ va'e japytu'uha áry-py, he'i hese. —Ha ko'ánga katu, “xe Ru tee” he'i Nhandejáry-rehe. “Nhandejáry ko xe-rami” he'i. “Xe tuvixa mba'e Nhandejáry-rami” he'i Hesu ójehe. Upe va'e onhemonhandejáry ra'anga anga rei oiko-vy, he'i mo'ã Hesu-rehe onhomb'o'e mbo'e-vy judeu ruvixa kwéry.

Upéa-gwi ojukase voi Hesu-pe hikwái.

Nhandejáry nhe'ẽ-py Hesu omonhe'ẽ ranhe enterove va'e-pe

¹⁹ Upéi he'i jevy judeu ruvixa kwéry-pe Hesu:

—Anhetegwa voi amombe'u-ta peẽ-my. Xe ko Nhandejáry ra'y tee ramo jepe, xejéhegwi rei mba'eve ndajapói. Xe Ru xe-vy ohexa uka va'e gwive ae ajapo. Xe Ru rembiapo gwive katu ajapo ave xe. Xe Ru-rami ave ajapo, he'i. ²⁰ —Xe ko xe Ru rembiayhu va'e. Entéro hembiaapo gwive ohexa uka va'e xe-vy. Ha tuvixave va'e katu ohexa uka va'erã xe-vy pepondera va'erã hese. ²¹ Xe Ru ko ombotekove jevy va'e omano va'ekwe omoingove jevy íxupe. Ha'e-rami voi xe amoingove va'e amoingove va'erã-pe gwive. ²² Ha xe Ru nomonhe'ẽi va'e avave-pe. He'i va'ekwe xe-vy xe Ru xe amonhe'ẽ ranhe hagwã enterove va'e-pe hembiaapo apokwe-rami ajapo hagwã hese. ²³ He'i va'ekwe xe-vy xe Ru aporomonhe'ẽ hagwã entéro xe mboete hagwã omboeteha-rami xe Ru-pe. Avave xe mboete e'ỹ ramo, nomboetéi ave xe mbouhare-pe. Xe Ru-pe nomboetéi.

²⁴ —Anhetegwa va'e amombe'u-ta nde-vy. Peteĩ teĩ xe nhe'ẽ rendu va'e, xe mbouhare-pe ogwerovia va'e gwive, oikove-ma va'erã opa e'ỹ reheve Nhandejáry ndive. Ha'e nomondovéi-ma va'erã íxupe ojéhegwi ohasa asy hagwã. Oiko-ma va'erã opa e'ỹ reheve Nhandejáry ndive, he'i judeu ruvixa kwéry-pe Hesu.

²⁵ Upéi he'i jevy omombe'u-vy:

—Anhetegwa va'e amombe'u-ta peẽ-my. Ogwahẽ-tama omano va'ekweha áry, he'i. —Áy ogwahẽ-ma voi. Ohendu-ta xe nhe'ẽ omano va'ekwe. Xe ko Nhandejáry ra'y tee voi. Xe nhe'ẽ rendu va'e oikove jevy-ta. ²⁶ Ojéhegwi rei voĩnte oiko xe Ru. Upéixa ete ome'ẽ xe-vy xejéhegwi réĩnte aiko hagwã ave. ²⁷ Xe ko Nhande Ryke'y tee va'e voi. Upéa-gwi Nhandejáry nhe'ẽ-py amonhe'ẽ ranhe va'erã enterovéa-pe ajapo hagwã hese hembiaapo apokwe-rami.

²⁸—Ani pepondera teĩ xe nhe'ê-rehe. Ogwahẽ va'erã omano va'ekweha áry. Ohendu va'erã xe nhe'ê entéro ijeta-py oĩ va'e gwive. ²⁹Osẽ va'erã ojejaty hagwe-gwi gwĩ hembiaipo porã va'ekwe. Oikove jevy va'erã oiko meme hagwã Nhandejáry ndive. Ha gwĩ hembiaipo vai va'ekwe oikove jevy va'erã amondo mombyry hagwã xejéhegwi, he'i omombe'u-vy judeu ruvixa kwéry-pe Hesu.

“Oĩ xe mombe'u va'e” he'i ójehe Hesu

³⁰Upéi he'i jevy omombe'u-vy Hesu:

—Xejehegwinte mba'eve ndajapói. Nhandejáry remimombe'u xe-vy va'e ae xe ajapo. Xe ajapose va'e mante ndajapói ave. Xe mbouhare remimbota ae ajapose meme voi. Upéa-gwi “Ko va'e heko porã va'e. Upe va'e heko vai va'e” xe ha'e ramo, anhetegwa amombe'u va'e voi.

³¹—Xe amombe'u ramo xejehegwigwa mante: “Ijapu-ma” peje arã xe-rehe.* ³²Oĩ outro xe rekoha omombe'u va'e. Hemimombe'u va'e xe-rehe anhetegwa voi. Xe aikwaa ijapu e'ỹha. ³³Ha pene remimondokwe oho kuri João renda-py. Oporandu ramo xe-rehe, ha'e omombe'u-ma íxupe kwéry anhetegwa va'e. ³⁴Teko rei remimombe'u xéjehe napenáiry. Xe mombe'u joty Nhandejáry. Ha amombe'u peẽ-my xe-rehe teko rei he'i va'e, xe rerovia hagwã, pene resende hagwã Nhandejáry.

³⁵—Ha João katu omombe'u porã va'ekwe xe rehegwa. Sapy'a perohory inhe'ê va'ekwe. Nhande resape sapy'aha-rami omombe'u. Ha tataendy hendy porã nhande resape-vy. Nhande resape jave javy'a voi. Upéixa ete voi sapy'a perohory inhe'ê. ³⁶Xe mombe'u porã va'ekwe João. Ha ko'ánga katu xe rembiapo porã porã rexa-vy, pehexa kwaa-ma va'erã xe-rehe xe rekoha. Ome'ê va'ekwe xe-vy xe Ru xe rembiaporã. Upe va'e xe ajapo voi. Ereikwaa porã ramo xe rembiapo, ere arã xe-rehe, “Upe va'e Nhandejáry Nhande Ru va'e remimbou voi nipo nhande-vy ra'e” ere arã xe-rehe. ³⁷Ha xe mbouhare katu ha'e nga'u xe mombe'u-ma va'ekwe. Ha peẽ katu napehendúí va'e onhe'ê jave. ³⁸Mba'eixagwa po Nhandejáry ndapehexái va'e. Nhandejáry remimbou ndaperoviái va'e. Upéa-gwi ndopytái voi pende py'a-py inhe'ê. ³⁹Peje ojúpe, “Jaikwaa porã ramo Nhandejáry kwatia nhe'ê, jaikwaa va'erã mba'éixa po jaiko opa e'ỹ reheve va'erã Nhandejáry ndive” peje pendéjehe. Upéa-gwi pemonhe'ê nhe'ê mo'ã peiko-vy Nhandejáry kwatia nhe'ê. Ha ndapeikwaái voi he'ise va'e. Upe va'e nhe'ê pemonhe'ê nhe'ê va'e xe mombe'u voi. ⁴⁰Xe mombe'u ramo jepe inhe'ê, peẽ naxe moirúséiry joty peikove meme hagwã Nhandejáry ndive.

⁴¹—Naxe mboetéi ramo teko rei, apyta akirirĩ joty. Napenáí joty hese. Xe Ru ae katu xe mboete va'e. ⁴²Ha peẽ katu peipota va'e pende rapixa ne mboete. Pende py'apy-py ndapehayhúí va'e Nhandejáry-pe. Aikwaa voi xe upe va'e. ⁴³Nhandejáry nhe'ê-py aju amombe'u-vy va'ekwe ha naxe rorov'yáiry joty-ma peẽ. Ha xe e'ỹ va'e katu onhe'ê-py rei ou ramo jepe, upe va'e perovy'a joty arã. ⁴⁴Peipota pende rapixa pene mboete. Ha Nhandejáry ha'e anho va'e katu napenhemboete ukáiry voi íxupe. Napepenái hese. Upéa-gwi ndikatúí xe rerovia. ⁴⁵Ani “Hesu ko omombe'u va'erã Nhandejáry-pe nhande rekoha vai” ani peje teĩ pendéjeúpe. Myamyri Moisés remimombe'ukwe-gwi ae ojekwaa-ma va'erã pende-rehe pende rekoha. “Nhande kwéry Moisés nhe'êgwe renduha va'e voi. Upéa-gwi nanhane mboykéi va'erã ojehegwi Nhandejáry” peje mo'ã pendéjehe. Ha Moisés nhe'êgwe napehenduséi-gwi ae, ojekwaa-ma va'erã pende-rehe pende reko vaiha. ⁴⁶Moisés omoĩ va'ekwe kwatia-rehe xe rehegwarã. Upéa-gwi perovia ramo íxupe ra'e, xe rerovia arã ra'e ave. ⁴⁷Ha mba'éixa po xe rerovia-ta? Naperoviavéi-ma kwatia-rehe omoĩ va'ekwe. Upéixa ramo mba'éixa po xe rerovia-ta? he'i judeu ruvixa kwéry-pe Hesu.

6

Hesu omongaru cinco mil kwimba'e-pe
(Mt 14.13-21; Mc 6.30-44; Lc 9.10-17)

* 5:31 Jo 8.14-18

¹ Ha upe rire Hesu ohasa oho-vy yugwarusu rovái. Upe yugwarusu mokõi héry va'e. Héry Galiléia yugwa. Héry va'e ave Tiberíades yugwa. ² Ha upéi katu heta eterei oi kente kwéry. Ohexa okwa-vy Hesu-pe omogwera gwerá ramo hasy va'e-pe. Jahexa e'y va'e hexapyrã-rupi ojapo ramo, ohexa. Upéa-gwi oho Hesu piári hikwái. ³ Upe ramo ha'e ojeupi oho-vy vyvaty-rehe. Upe-py ogwapy-ma oi-vy gwemimbo'e kwéry ndive. ⁴ Oiko-tama judeu kwéry areteguasú va'e áry héry va'e páscoa.

⁵ Ha upéi katu ha'e oma'ê ohexa heta eterei kente ogwa'ê ou-vy ramo henda-py ohexa. Upe-ma ramo he'i Filipe-pe:

—Mba'e-rami po jajogwa-ta hemi'urã ho'u va'erã mbojape? he'i oporandu Filipe-pe.

⁶ Upéa he'i oikwaa hagwã Filipe nhe'ê. Ha'e katu oikwaa-ma voi mbava'e tipo ojapo-ta.

⁷ He'i íxupe Filipe:

—Jajogwa ramo seis jasy omba'apo va'ekwe repy-rehe mbojape hemi'urã kwéry, nome'êi arã peteĩ teĩ ho'u mixími hagwã, he'i íxupe kente kwéry-rehe.

⁸ Upe-ma ramo he'i íxupe hemimbo'e Simão Pedro ryke'y, héry va'e André:

⁹ —Ko va'e karia'y ogwereco cinco mbojape cevada-gwi ojejapo va'ekwe. Mokõi pira ka'ê ogwereco ave. Ha upe va'e ndaha'êi heta kente remi'urã, he'i íxupe André.

¹⁰ —Pembogwapy katu íxupe kwéry yvy-rupi, he'i gwemimbo'e-pe. Upe-py heta oi kapi'ipety. Ha upéi katu ogwapy-ma hikwái kapi'ipety-py. Cinco mil kwimba'e nunga-rupi ogwapy hikwái. Ndoipapái mitã-pe kunha-pe ave. ¹¹ Upéi ha'e oipyhy mbojape, otima porã Nhandejáry-pe ome'ê me'ê ogwapy va'e kwéry-pe. Pira ome'ê ave ho'useha-rami. ¹² Okaru porã hikwái, hygwatãmba-ma hikwái. Okaru porã rire, he'i gwemimbo'e kwéry-pe:

—Pemono'õ no'õ pembohyru tembi'u rembyre pono onhehundi rei ho'a va'ekwe gwive, he'i gwemimbo'e kwéry-pe.

¹³ Upe-ma ramo omono'õmba cinco mbojape rembyre. Okaru va'e ho'u porã rire oheja ra'e. Upéa omono'õ no'õ omohynyhê nyhê doze ajaka jevy hembyre kwéry.

¹⁴ Upéi hexapyrã-rupi Hesu rembiapo porã ohexa ramo, he'i ojóupe hikwái:

—Upe va'e ko Nhandejáry nhe'ê-py omombe'u va'ety ojekwaa va'erã voi va'ekwe ko yvy ári, he'i ojóupe Hesu-rehe upe pygwa kwéry.

¹⁵ Upe-ma ramo he'i opy'a-py Hesu: “A pygwa voi ou-tama xe jopyse mo'ã xe pyhy-vy xe moingo hagwã huvixagwasú ramo” he'i ójehe. Upéa oikwaa ramo okanhy jevy ha'e anho vyvaty-rehe oho-vy.

Y ári ogwata Hesu

(Mt 14.22-33; Mc 6.45-52)

¹⁶ Ka'aru ete-ma. Ha hemimbo'e kwéry katu ogwey oho-vy yugwarusu rembe-py. ¹⁷ Upéi onhemboyru kanóa-py. Oho y-rupi hikwái. Cafarnaum tetã-ngoty oho. Pytũ-ma voi ha Hesu katu ne'írá vyteri ogwahê ou-vy gwemimbo'e kwéry renda-py. ¹⁸ Yvytu eterei-ma ramo opu'ã y. ¹⁹ Oipykúí oho-vy cinco quilômetro para'e, seis quilômetro para'e. Ne'írá ogwahê ogwahêse ha-py. Upe-ma ramo ohexa Hesu-pe hikwái y ári ogwata ou-vy ramo ohexa. Ohexa-ma ramo íxupe, onhemondýi voi hikwái.

²⁰ Ha Hesu onhe'ê íxupe:

—Xe ae ko, he'i. —Ani pekyhyje teĩ, he'i gwemimbo'e kwéry-pe.

²¹ Inhe'ê ohendu ramo, ovy'a joa ogwerohory íxupe:

—Eike katu kanóa-py, he'i Hesu-pe hikwái.

Upe-ma ramo pya'e ogwahê kanóa ogwahêse ha-py yvy ete-py oho-vy.

Hesu piári oho kente kwéry

²² Ko'ẽmba-ma ramo, kente kwéry opyta va'e y rovái oho e'y va'e he'i ojóupe:

—Mamo po oho ra'e Hesu? he'i ojóupe.

Oĩ ra'e peteĩ kanóa. Upe va'e-py onhemboyru jave hemimbo'e kwéry nonhemboyruí ra'e Hesu. Hemimbo'e kwéry ae ha'e kwéry anho osê oje'ói-vy ra'e Hesu e'y reheve. Upéa-gwi he'i ojóupe: “Mamo po oho ra'e Hesu?” he'i.

²³ Upe jave ogwahê ou-vy outro kanóa Tiberíades tetã-gwi. Ogwahê-ma ou-vy yvy ete-py. Upe tetã-my Nhandejáry Hesu otima porã kuri Nhandejáry-pe upe va'e mbojape-rehe. Upe-py ho'u kuri upe va'e mbojape kente kwéry.

²⁴ Ha upéi katu gwí ogwahê ramo va'e he'i ojóupe:

—Ko'a-gwi oho nipo ra'e Hesu. Hemimbo'e kwéry oho ave nipo ra'e, he'i ojóupe.

Upéa-gwi onhemboyruma ma kanóa-py hikwái oho y-rupi Cafarnaum-my. Hesu piári oho.

“Mbojape tee-rami pene moingovehaty voi ko xe” he'i ójehe Hesu

²⁵ Ogwahê rire oho-vy y rovái otopa Hesu-pe hikwái:

—Araka'e po ereju ra'e ko'a-py, porombo'eháry, he'i íxupe hikwái.

²⁶ Upe-ma ramo he'i íxupe kwéry Hesu:

—Anhetegwa va'e amombe'u-ta peẽ-my. Pe'u kuri upe va'e mbojape pene rygwyatãmba-ma voi kuri. Upéa-gwi peju-ma xe piári. Heroviapyrã-rupi xe rembiapo ramo, ndapeikwaái voi mbava'e-rehe xe rembiapo porã. ²⁷ Ani pepena eterei teĩ pene remi'urã-rehe. Pemoi porã ramo jepe, opa arã pendéhegwi. Pemba'apo ae katu pene rembi'u teerã-rehe peiko hagwã opa e'ý reheve Nhandejáry ndive. Pene rembi'u teerã ko xe Nhande Ryke'y tee va'e remime'êrã peẽ-my. Nhandejáry nhe'ê-py xe rembiapo. Upe va'e oikwaa uka-ma kuri peẽ-my Nhandejáry, he'i judeu kwéry-pe.

²⁸ Upéi he'i íxupe hikwái:

—Orojapose voi oipota va'e Nhandejáry orojapo va'erã. Mba'éixa tipo orojapo-ta hemimbota, he'i oporandu-vy íxupe hikwái.

²⁹ —No'ã-rami pene rembiaporã. Xe ko Nhandejáry remimbou. Pejerovia katu xe-rehe, he'i íxupe kwéry.

³⁰ Upéi judeu kwéry:

—Néi, he'i, —Mba'éixa ne rembiapo porã-ta heroviapyrã-rupi, orohexa va'erã orogwerovia hagwã. Ehexa uka ore-vy nde pu'akaha-rupi ne rembiaporã oropondera hagwã hese.

³¹ Yma va'ekwe nhane ramoigwasu amyri kwéry tekwyaty e'ý-my oime jave va'ekwe ho'u va'ekwe temb'u héry va'e maná:

“Ome'ê va'ekwe íxupe kwéry yváy gwigwa mbojape ho'u va'erã.”*

Upéixa omoĩ va'ekwe kwatia-rehe Nhandejáry nhe'ê, he'i íxupe omombe'u-vy.

³² Upéi he'i Hesu:

—Anhetegwa amombe'u-ta peẽ-my. Ndaha'úi Moisés ome'ê va'ekwe nhane ramói kwéry-pe upe va'e yváy gwigwa mbojape. Nhandejáry remime'êgwe ae upe va'e. Ko'ánga katu Nhandejáry ome'ê peẽ-my yváy gwigwa mbojape tee va'e. ³³ Upe mbojape tee Nhandejáry mba'e voi yváy gwigwa ogwejy va'ekwe pene moingove va'erã, he'i judeu kwéry-pe.

³⁴ —Eme'ê me'ê katu ore-vy upe va'e mbojape, porombo'eháry, he'i íxupe hikwái.

³⁵ —Xe ko mbojape tee ramigwa pene moingove va'e. Peteĩ teĩ xe moirũ va'e gwive ivare'a e'ý va'e-rami oiko va'erã. Ojerovia va'e gwive xe-rehe ijy'uhéi e'ý va'e-rami oiko va'erã, he'i. ³⁶ —Ha'e kuri peẽ-my, Peẽ ko xe rexa ramo jepe, ndapejeroviái joty xe-rehe. ³⁷ Entéro xe rerovia uka va'e gwive xe Ru, xe moirũ va'erã. Xe-vy ou va'erã gwive, namboyke mo'ávúi-ma va'erã íxupe. ³⁸ Ndaha'úi ajapose va'e mante ajapo hagwã agwejy va'ekwe aju-vy yváy-gwi. Xe mbouhare remimbota ae mante ajapo va'erã agwejy aju-vy. ³⁹ Ha xe mbouhare remimbota no'ã-rami. Ndoipotái xe amokanhy ni peteĩ xe moirũ uka va'ekwe gwive. Oipota xe amoingove jevy íxupe kwéry. Gwí omano va'ekwe opu'ã jevyha áry-py, oipota xe amoingove jevy enterove va'e xe moirũ uka va'ekwe gwive. ⁴⁰ Xe Ru remimbota no'ã-rami. Oipota xe rexa va'e gwive, xe rerovia va'e gwive ave oiko opa e'ý reheve hendive. Upe va'e amoingove jevy va'erã gwí omano va'ekwe oikove jevyha áry-py, he'i judeu kwéry-pe Hesu.

⁴¹ Upe-ma ramo judeu kwéry ndojohu porãi inhe'ê:

* 6:31 Êx 16.4; Sl 78.24

—“Xe ko Nhandejáry gwigwa. Mbojape-rami aju pene moingove hagwã” he'i kuri Hesu, he'i ojúpe hikwái.

Hesu nhe'ê ndojohu porãi voi. Upéi he'i jevy hikwái:

⁴²—Upe va'e ko José ra'y voi. Ha'e Hesu voi. Túvy isy ndive ikwaapy voi-ma upe va'e. Aipo-rami, ma'erã po, “Xe ko yváy-gwi agwejy va'ekwe” he'i kuri nhande-vy, he'i ojúpe hikwái. Ndojohu porãiry Hesu nhe'ê.

⁴³Upe-ma ramo ha'e he'i:

—Anive penhe'ê poxy xe-rehe, he'i. ⁴⁴—Ndou mo'ãi xe-vy avave ojéhegwite. Xe Ru xe mbouhare xe moirũ uka ramo ae, xe moirũ va'erã. Gwĩ omano va'ekwe oikove jevyha áry-py, amoingove jevy va'erã xe reroviaha-pe.

⁴⁵Yma va'ekwe omoĩ va'ekwe: “Enterove va'e-pe ombo'e-ta Nhandejáry” he'i. Upéixa ramo entéro Nhandejáry nhe'ê ohendu va'e, Nhandejáry ombo'e íxupe va'e gwive, upe va'e gwive ou xe-vy.* ⁴⁶Xe Ru-pe katu avave ndohexái va'e. Ha xe katu Nhandejáry-gwi aju va'ekwe ahexa va'e íxupe.

⁴⁷—Anhetegwa va'e amombe'u-ta peẽ-my. Xe rerovia va'e gwive oikove-ma va'erã opa e'ỹ reheve Nhandejáry ndive. ⁴⁸Xe ko mbojape tee-rami pene moingove va'e. ⁴⁹Yma va'ekwe pene ramói kwéry ho'u va'ekwe maná héry va'e. Tekwaty e'ỹ-my ho'u hikwái. Ho'u ramo jepe, omano joty va'ekwe. ⁵⁰Ãy katu ko va'e yváy gwigwa va'e mbojape tee ramigwa ndaha'úi upe maná héry va'e ramigwa. Ko mbojape tee ramigwa ho'u va'e gwive ae nomano mo'ávêi-ma va'erã. Oikove meme va'erã Nhandejáry ndive. ⁵¹Xe katu yváy-gwĩ agwejy va'ekwe aju-vy pene moingoveharã. Mbojape tee-rami xe ko pene moingove va'e. Upe mbojape tee ho'u va'e gwive oikove meme va'erã. Upe mbojape tee ame'ê va'erã kente kwéry-pe oikove hagwã. Upe mbojape tee xe rete voi, he'i ójehe judeu kwéry-pe.

⁵²Upéa nhe'ê ohendu ramo, onhe'ê poxy-ma ojúpe:

—Hesu he'i kuri ja'u hagwã hete, he'i mo'ã ojúpe. —Mba'éixa po Hesu ome'ê-ta nhande-vy gwete ja'u va'erã, he'i.

Upéa-gwi ogweropoxy Hesu nhe'ê hikwái.

⁵³Upe-ma ramo he'i judeu kwéry-pe:

—Anhetegwa va'e amombe'u-ta peẽ-my. Xe ko Nhande Ryke'y tee va'e. Xe rete ndape'úi ramo, xe rugwy ndape'úi ramo, pemano va'erã, ndapeikovéi va'erã, name'ei va'erã peẽ-my pende rekoverã. ⁵⁴Xe rete ho'u va'e gwive, xe rugwy ho'u va'e gwive, ame'ê-ta íxupe hekoverã. Gwĩ omano va'ekwe oikove jevyha áry-py, amoingove jevy va'erã íxupe kwéry.

⁵⁵Xe rete ko pene rembi'u teerã voi. Xe rugwy pene rembi'u teerã voi. ⁵⁶Xe rete ho'u va'e, xe rugwy ho'u va'e, xe moirũ tee va'e. Xe py'apy-py areko íxupe va'e voi. Opy'apy-py xe rereko voi ave. ⁵⁷Nhandejáry Nhande Ru nhane moingove va'e xe mbou va'ekwe. Ame'ê va'ekwe-gwi xe-vy xe rekoverã, xe aiko ave. Upéixa ete voi xéhegwi okaru va'e ame'ê va'erã íxupe hekoverã. ⁵⁸Ko va'e mbojape tee ramigwa yváy-gwĩ ogwejy va'ekwe kuri he'i xe-rehe. Ndaha'úi nhane ramói kwéry ho'u hagwe-rami. Ho'u ramo jepe, omano joty va'ekwe hikwái. Ko va'e mbojape tee ramigwa ae ho'u va'e gwive oiko meme va'erã, he'i judeu kwéry-pe Hesu.

⁵⁹Upe va'e he'i Cafarnaum tetã-my, ombo'e mbo'e jave Hesu judeu kwéry oporahéi haty-py. Oipota ojerovia tee ójehe gwete rehegwa nhe'ê, gwugwy rehegwa nhe'ê ave omombe'u-vy íxupe kwéry.

“Ne nhe'ê ae mante orohendu ramo, oroiko meme-ma va'erã Nhandejáry ndive”

he'i Hesu-pe Pedro

⁶⁰Upéa nhe'ê ohendu ramo, heta oĩ hemimbo'e kwéry va'e ndojohu porãi inhe'ê:

—Ipohýi voi upe va'e nhe'ê. Ndikatúi nhahendu. Kiva'e po ohendu-ta, he'i ojúpe hikwái.

*

6:45 Is 54.13

⁶¹ Ha Hesu katu opy'a-py oikwaa-ma gwemimbo'e kwéry he'i va'e: "Ndojohu porái xe nhe'ê" he'i ojúpe.

Upéi he'i gwemimbo'e kwéry-pe:

—Xe reja-ta tipo peê, he'i. —ndapejohu porái-gwi xe nhe'ê? he'i. ⁶²—Peê ko xe rexa va'erã para'e Nhande Ryke'y tee va'e xe ajeupi jevy aha-vy ramo xe rekwegwe-py. Upéixa xe rexa ramo, xe reja joty arã joty tipo, he'i. ⁶³—Nhandejáry Nhe'ê Marangatu tee va'e ko nhane moingove va'e. Ha nhande kwéry katu nhandejéhegwi mba'eve ndajajapói va'e. Ha xe nhe'ê katu pehendu ramo opyta pende py'a py'apy-rupi nhe'ê marangatu ramo. Pene moingove va'e ave xe nhe'ê. ⁶⁴Xe nhe'ê pehendu ramo jepe, oí joty pene pa'ũ-my xe rerovia e'ỹ va'e, he'i gwemimbo'e kwéry-pe.

Oikwaa voi ra'e kiva'e va'e po ndogweroviái voínte va'erã ra'e íxupe. Kiva'e po omombe'u hesegwa va'erã ra'e ija'e'ỹha-pe oikwaa-ma ra'e ave.

⁶⁵He'i jevy gwemimbo'e kwéry-pe:

—Oí pene pa'ũ-my xe rerovia e'ỹ va'e. Upe va'e-gwi ete ha'e kuri peê-my, "Ndou mo'ái avave xe-vy ojéhegwi. Xe Ru, Tou, he'i ramo ae, ou va'erã" ha'e kuri peê-my, he'i gwemimbo'e kwéry-pe.

⁶⁶Inhe'ê ohendu ramo, heta oí íxupe omoirũ va'e ojere íxugwi. Nomoirũsevéi íxupe.

⁶⁷Upe ramo he'i upe doze gwemimbo'e kwéry-pe:

—Ha xe rejase tipo peê ave, he'i.

⁶⁸Ha Simão Pedro katu:

—Oroheja ramo, ndaipóri ore mbo'eharã oroho hagwã ha'e-py, ore Jary. Ne nhe'ê ae mante orohendu ramo, oroiko-ma va'erã opa e'ỹ reheve Nhandejáry ndive. ⁶⁹Ko'ánga katu orogwerovia tee-ma. Ne mbou tee va'ekwe nipo ra'e Nhandejáry. Nde reko marangatu tee nipo ra'e, he'i íxupe Pedro.

⁷⁰Upe ramo Hesu:

—Xe apoporavo va'ekwe pepyta hagwã doze. Oroporavo ramo jepe, peteĩ pene pa'ũ-my oí joty anháy nhe'êngenduha, he'i gwemimbo'e kwéry-pe.

⁷¹Upéa he'i ramo omombe'u Simão Iscariotes ra'y Judas-rehe. Hese gwarã nhe'ê omombe'u. Ha Judas katu doze hemimbo'e kwéry va'e voi. Indivegwa jepe, omombe'u joty va'erã ija'e'ỹha-pe Hesu rehegwa.

7

Hesu ryvy kwéry rehegwa nhe'ê

¹Ha upe rire katu ndogwatavéi-ma Hesu Judéia vvy-rupi. Upe pygwa judeu kwéry va'e ojukase íxupe. Upéa-gwi ndogwatavéi upe-rupi. Galiléia vvy-rupi ae ogwata oiko-vy.

²Ha upéi katu hi'agwi-ma oí ogwahê hagwã judeu kwéry arete áry, héry va'e Festa dos Tabernáculos, kwarahy äy-my jaiko ramo peteĩ semana. ³Upe ramo he'i íxupe Hesu ryvy:

—Tereho katu Judéia vvy-py, ne nhe'ê renduha ohexa hagwã ne rembiapo, he'i. ⁴—Erehexa ukase ramo, ani erejapo nhemi ne rembiapo. Nde pu'akaha-rupi, hexapyrã-rupi ne rembiapose ramo, atýra-py katu ehexa uka, he'i íxupe tyvýry.

⁵Tyvýry jepe ndojeroviáry joty hese: "Ha'e Cristo voi" nde'fry vyteri gwyke'y-rehe.

⁶Upéi he'i gwyvýry-pe:

—Nogwahêi vyteri xe óra aha hagwã. Ha peê katu napende órai peho hagwã. Pehose ramo, tapeho mani katu, he'i. ⁷—Ha teko rei ndaija'e'ỹi pende-rehe. Ha xe katu aikwaa uka íxupe kwéry hembapo vaikwe-gwi, ndaija'e porái voi xe-rehe teko rei. ⁸Tapeho katu Jerusalém-my aretegwasu mboete-vy. Ha xe katu nogwahêi vyteri xe óra aha hagwã. Upéa-gwi ndaha mo'ái joty, he'i gwyvýry-pe.

⁹Upe rire katu ndohói opyta joty Galiléia-py.

Hesu oho aretegwasu mboete hagwã-py

¹⁰Ha tyvýry oho-ma tenonderã. Aretégwasu mboete hagwã-py oho-ma. Oho rire hikwái, oho ave Hesu. Ha hexapyrã-rupi katu ndohói. Onhemo'ã ha-rupi ae oho. ¹¹Ogwahê e'ỹ ngatu oheka Hesu-pe judeu ruvixa kwéry aretegwasu mboete haty-py:

—Ne'írā vyteri tipo ogwahē, he'i oporandu Hesu-rehe.

¹² Ha kente kwéry omombe'u joavy avy hese:

—Hekoha porā va'e ha'e, he'i hese.

Outro he'i:

—Ndaha'úi hekoha porā va'e. Nhane mbotavy rei oiko-vy va'e ae, he'i mo'ā hese.

¹³ Ha atýra-py katu Hesu rehegwa nhe'ē nomombe'úiry. Hevovo rei onhe'ē-vy, judeu ruvixa kwéry-gwi ikyhyje-gwi hikwái.

¹⁴ Ha upéi katu oho Hesu upe-py. Aretegwasu mbyte-py oike oho-vy Nhandejáry róga kakwaa-py. Ombo'e upe pygwa-pe. ¹⁵ Inhe'ē ohendu ramo, opondera hese hikwái:

—Mba'éixa po hi'arandu? he'i hese. —Onhembo'e e'ý reheve, oikwaa rei onhe'ērā, he'i judeu ruvixa kwéry hese.

¹⁶ Onhe'ē íxupe kwéry Hesu:

—Ndaha'úi xejéhegwi xe ambo'e. Xe mbouhare rembigwaa uka xe-vy ae amombe'u. Nhandejáry rembiexa uka-py xe-vy ambo'e. ¹⁷ Hemimbota ojapose va'e gwive oikwaa va'erā ki-gwi po ou ra'e xe nhe'ē, Nhandejáry gwigwa para'e, xejéhegwigwa rei para'e. Nhandejáry gwigwa voínte xe nhe'ērā. ¹⁸ Ojéhegwi onhe'ē va'e onhembotuvixase mba'e. Ha imbouhare-pe ombotuvixase mba'e va'e katu, anhetegwa omombe'u. Ijapu e'ý va'e. ¹⁹ Pene rembypy Moisés omombe'u va'ekwe ramo jepe pende rekoharā, pene pa'ũ-my ndaipóri tekoha-rupi oiko va'e, he'i. —Upéa-gwi xe jukase voi. Ha naiporāi xe juka, he'i judeu ruvixa kwéry-pe Hesu.

²⁰ —Anháy ojepota nde-rehe ra'e, he'i. —Kiva'e nipo nde jukase? he'i íxupe ijaty va'e kwéry.

²¹ Upéi Hesu he'i:

—Petei mba'e ajapo va'ekwe hexapyrā-rupi ajapo. Pehexa ramo pepondera joa hese.

²² Ha peē katu ndapepytu'u teéiry japytu'uha áry-py. Japytu'uha áry-py ereikyti miximi joty nde ra'y pire. Moisés nhe'e-py ereikyti ipire. Ha Moisés nomombe'u ranhéi va'ekwe nhande-vy ko'a-rami nhande rekorā. Nhane rembypy ae omombe'u va'ekwe nhane rekorā. ²³ Upéixa ramo japytu'uha áry-py jepe ereikyti joty arā ipire Moisés nhe'égwe apo-vy. Upéa erejapo ramo, eremba'apo joty voi, he'i. —Nderepytu'u teéiry, eremba'apo ave nde. Ha ko'ánga katu xe amohesáimba kuri petei hasy va'e. Japytu'uha áry-py amohesáimba-ma íxupe. Ma'erā po pende poxy xe-vy ra'e upeakwe-rehe? he'i íxupe kwéry. —Peē kwéry ave ndapepytu'u teéiry japytu'uha áry-py, he'i íxupe kwéry. ²⁴ —Ani ere rei tei nde rapixa-rehe, “Hemiapo vai ra'e”. Erehexa porā rire mante ae hembiapo vaikwe, “Hemiapo vai-ma” ere arā hese ra'e, he'i judeu kwéry-pe Hesu.

Judeu ruvixa kwéry oipyhyse mo'ā Hesu-pe

²⁵ Upéixa ramo oĩ Jerusalém pygwa he'i va'e Hesu-rehe:

—Upe va'e hambijukase voi, he'i ojóupe Hesu-rehe. ²⁶ —Ha'e ko atýra-py omombe'u. Ha mburuvixa kwéry nombojevíy joty inhe'ē. Ohexa kwaa para'e hese hekoha hikwái. “Ha'e Cristo nhane remiha'arō va'e” he'i para'e hese hikwái, he'i ojóupe.

²⁷ Ha oĩ he'i va'e, “Ojekwaa ramo Cristo, ki-gwi po ojekwaa uka ou-vy va'erā avave ndoikwaái” he'i Cristo, hemiha'arō va'e-rehe he'i. Upéa-gwi he'i ojóupe:

—Ha upe va'e ae katu, ki-gwi po ou ra'e jaikwaa voi ogwahēha. Upe va'e ndaha'úi nipo Cristo ra'e, he'i mo'ā hese Jerusalém pygwa kwéry.

²⁸ Ha upe-ma ramo Nhandejáry róga kakwaa-py oporombo'e jave, onhe'ē hatā Hesu:

—“Jaikwaa voi íxupe. Ki-gwi po ou ra'e jaikwaa voi ogwahēha” peje mo'ā xe-rehe, he'i. —Xe katu ndajúu va'ekwe xe nhe'ē-py. Oime voi xe mbouhare. Ha'e Nhandejáry tee va'e. Peē katu ndapeikwaái íxupe. ²⁹ Xe ae aikwaa íxupe. Íxugwi-ma aju va'ekwe. Ha'e xe mbou va'ekwe. Upéa-gwi aikwaa voi íxupe, he'i ójehe íxupe kwéry Hesu.

³⁰ Inhe'ē ohendu ramo, oipyhyse mo'ā íxupe hikwái. Ha nogwahēi vyteri oipyhy hagwā óra. Upéa-gwi ndoipyhyi vyteri íxupe. ³¹ Heta oĩ jepe ojerovia va'e hese:

—Heta hembaliapo porã va'ekwe Hesu. Opu'akaha-py, hexapyrã-rupi hembaliapo, he'i. — Ojehexa uka ramo Cristo nhane remiha'arõ va'e, hetave íxugwi ndojapo mo'ãi va'erã voi. Ha'e nipo Cristo voi ra'e, he'i ojoupe ojerovia va'e hese.

Mburuvixa kwéry he'i oipyhy hagwã Hesu-pe

³² Upe ramo kente kwéry omombe'u joavy avy Hesu-rehe. Inhe'ẽ ohendu ramo he'i oipyhy hagwã íxupe pa'i ruvixa kwéry ndive fariseu kwéry. Oipyhy uka gwí Nhandejáry róga kakwaa-rehe onhangareko va'e polícia kwéry-pe mo'ã.

³³ Upe-ma ramo Hesu he'i:

—Ndaxe are mo'ãi ne ndive aiko-vy. Upe rire katu aha jevy-ta xe mbouhare ha-py. ³⁴ Peẽ xe reka va'erã ha ndaxe topa mo'ãi. Ndikatúí peju va'erã xe aha hagwã-py, he'i ójehe judeu ruvixa kwéry-pe.

³⁵ Upéi oporandu ojoupe hese hikwái:

—Upe va'e mamopy po oho-ta jatopa e'ỹ hagwã-py íxupe? Oho-ta para'e oiko hagwã judeu kwéry pa'ũ-my grego yvy-py oiko va'e pa'ũ-my? Ombo'e-ta para'e nhande kwéry e'ỹ va'e, grego kwéry va'e-pe? he'i. ³⁶ —He'i kuri nhande-vy: “Peẽ xe reka reka-ta ha ndaxe topa mo'ãi” he'i. Upéi he'i, “Ndikatúí peju va'erã xe aha hagwã-py” he'i. Upéa he'i ramo, mbava'e-pe po he'i, he'i oporandu-vy ojoupe.

“Xe reroviaha py'apy gwive osẽ oho-vy va'erã yvu ramigwa” he'i Hesu

³⁷ Aretegwasu áry paha-py, iporã ete va'e-py, onhembo'y-ma Hesu. Hatã onhe'ẽ. Entero ohendu hagwã-rami onhe'ẽ:

—Ijy'uhéi va'e gwive tou katu xe ha-py hoy'u hagwã, he'i. —Ijy'uhéi va'e ouse va'e-rami y-py hoy'u hagwã, taxe moirũ katu xe moirũse va'e gwive, he'i. ³⁸ —Xe-rehe ojerovia va'e gwive, ipy'apy gwive osẽ oho-vy va'erã yvu ramigwa hapixa pegwarã. Upéixa he'i Nhandejáry kwatia nhe'ẽ, he'i ójehe omombe'u-vy Hesu.*

³⁹ Yvu ramigwa he'i ramo, Nhe'ẽ Marangatu tee va'e-pe ae he'i. Entéro jajerovia hese va'e-pe gwive Nhe'ẽ Marangatu tee va'e hemime'ẽrã ae. Ne'írá omano Hesu oikove jevy hagwã onhembotuvixa mba'e hagwã. Upéa-gwi nome'ẽi vyteri Nhe'ẽ Marangatu tee va'e nhande-vy gwarã.

Kente kwéry omombe'u joavy avypa Hesu regegwa nhe'ẽ. Ndogwerojojái inhe'ẽ

⁴⁰ Hesu nhe'ẽ ohendu ramo, oí he'i va'e hese:

—Upe va'e ko Nhandejáry nhe'ẽ-py omombe'u va'ety ou va'erã va'ekwe voi, he'i Hesu-rehe.

⁴¹ Oí outro he'i va'e:

—Upe va'e ko Cristo nhane remiha'arõ va'e voi, he'i.

Oí ave outro he'i va'e:

—Cristo ndaha'éi ou va'erã va'ekwe Galiléia-gwi, he'i mo'ã. ⁴² —Ha'e ae ko myamyri Davi remiarirõ voi, he'i. —Belém-gwi ou va'erã va'ekwe. Davi oiko hagwe-gwi ou va'erã va'ekwe. Upéixa voi he'i Nhandejáry kwatia nhe'ẽ, he'i hese hikwái.*

⁴³ Upéixa ramo omombe'u joavy avypa hesegwa nhe'ẽ. Ndogwerojojái inhe'ẽ hikwái.

⁴⁴ Oí oipyhyse va'e mo'ã íxupe. Ha ndoipyhí joty íxupe.

Mburuvixa kwéry ndojeroviái Hesu-rehe

⁴⁵ Ha upéi katu ou jevy imondohare-pe gwí Nhandejáry róga kakwaa-rehe onhangareko va'e polícia. Ha pa'i ruvixa kwéry fariseu kwéry ndive oporandu polícia-pe:

—Ma'erã po ndereipyhí íxupe heru-vy? he'i oporandu-vy.

⁴⁶ Ha polícia katu he'i:

—Ha'eixagwa ndoikói onhe'ẽ porã va'e. Onhe'ẽ porã tee voi, he'i mburuvixa-pe.

⁴⁷ He'i fariseu kwéry polícia-pe:

—Penhembotavy nipo ra'e peẽ ave, he'i. ⁴⁸ —Ndojeroviái hese mburuvixave. Fariseuve ndojeroviái hese ave. ⁴⁹ Teko rei katu nhande rekoha-rupi oiko e'ỹ va'e, ha'e kwéry anho

* 7:38 Ez 47.1; Zc 14.8 * 7:42 Mq 5.2

ojerovia-ma hese. Ha gwĩ teko rei-rehe he'i vai-ma Nhandejáry, he'i mo'ã hese fariseu kwéry.

⁵⁰ Ha peteĩ ipa'ũ-my oĩ va'e ndojohu porãi inhe'ẽ. Héry va'e Nicodemos. Pyhare onhomongeta ra'e Hesu ndive. Āy katu he'i hese:

⁵¹ —“Hembiapo vai ra'e” ja'e ramo hese nhamonhe'ẽ ranhe e'ỹ reheve íxupe ndajajokóiry tekoha-rupi. Jaikwaa e'ỹ reheve hembiapokwe, “Hembiapo vai ra'e” ja'e ramo ave, tekoha-rupi ndajajokói voi ave, he'i mburuvixa kwéry-pe Nicodemos.

⁵² —Nde Galiléia gwigwa para'e, he'i íxupe. —Emonhe'ẽ nhe'ẽ katu Nhandejáry kwatia nhe'ẽ. Ndaipóri Nhandejáry nhe'ẽ-py omombe'u va'ety Galiléia-gwi ou va'erã. Upéa ereikwaa porã hagwã emonhe'ẽ katu, he'i Nicodemos-pe hikwái.

⁵³ Upe ramo mburuvixa kwéry ohopa jevy oje'ói-vy. Peteĩ teĩ jevy oje'ói hikwái. Gwóga gwóga-rupi oje'oi pa jevy hikwái.

8

“Ko va'e kunha orojohu íxupe kuri oména e'ỹ ndive oiko jave” he'i

¹ Ha Hesu katu osẽ oho-vy Oliveiras vvyaty-py. Upe-py oke. ² Iko'ẽ-my oike jevy Jerusalém tetã-my. Nhandejáry róga kakwaa-py oike. Oike rire upe-py, enterove va'e ou henda-py. Upe-ma ramo ogwapy-ma ombo'e hagwã íxupe kwéry. ³ Ha escriba kwéry fariseu kwéry ndive ogwenogwahẽ heru-vy kunha-pe. Upéi entéro va'e pa'ũ-my omói íxupe hikwái. ⁴ He'i Hesu-pe hikwái:

—Porombo'eháry, ko va'e kunha orojohu íxupe kuri oména e'ỹ ndive oiko jave, he'i.

⁵ —Koixagwa kunha-pe gwive iporã ita-py jajapi jajuka hagwã he'i va'ekwe Moisés amyri nhane rekorã mombe'u-vy, he'i Hesu-pe. —Ha ģy emombe'u katu ore-vy ne nhe'ẽ, he'i. —Mbava'e tipo ere-ta hese? he'i íxupe kunha-rehe.

⁶ Upéa he'i oipota-gwi mo'ã Hesu ojavy onhe'ẽ kunha-rehe. Ombojase mo'ã hese hikwái, “Ojevavy-ma Hesu” he'i hagwã mo'ã hese hikwái. Ha ha'e katu okiriri joty íxugwi. Ojevavy ohai rei joty vvy oĩ-vy. Okwã-my ohai vvy oĩ-vy.

⁷ —Mbava'e tipo erejapo uka-ta hese? he'i jevy jevy oporandu-vy íxupe.

Upe-ma ramo onhembo'y-ma oĩ-vy. He'i:

—Pene pa'ũ-my ojevavy e'ỹ va'e tojapi ranhe katu íxupe, he'i íxupe kwéry Hesu.

⁸ Upéa he'i rire ojevavy jevy. Ohai jevy ikwã-my vvy. ⁹ Itujave va'e ranhe osẽ oho-vy ojóupe, tenonderã voi ha'e osẽ oho-vy. Upéixa-gwi Hesu anho jevy-ma opyta. Ha upe kunha katu onhembo'y oĩ-vy hendive.

¹⁰ Upe ramo hovayva-ma Hesu. He'i:

—Mamo tipo oje'oi pa hikwái? he'i. —Ndopytái tipo peteĩ jepe he'i hagwã “Iporã ojevuka ko kunha” he'i hagwã nde-rehe? he'i kunha-pe.

¹¹ —Peteĩ jepe ndopytáiry, porombo'eháry, he'i íxupe kunha.

Upéi he'i kunha-pe:

—Xe nda'e mo'ã ave nde-rehe, “Iporã ojevuka ko kunha” nda'e mo'ã nde-rehe, he'i íxupe Hesu. —Ha tereho katu. Anive katu erejevavy teĩ, he'i ae kunha-pe Hesu.

“Xe ko vvyppy kwéry-pe pytũ-rupi oiko va'e-rami va'e-pe ahesape va'e” he'i

¹² Ha upéi katu Hesu he'i jevy upe pygwa-pe:

—Xe ko gwĩ pytũ-my oiko vérami va'e-pe ahesape va'e, he'i. —Xe moirũ va'e gwive ndoikói va'erã pytũ-rupi. Arakatu-rupi ae meme oiko va'erã Nhandejáry ndive, he'i upe pygwa-pe Hesu.

¹³ Ha fariseu kwéry katu he'i íxupe:

—Ndejehegwigwa rei mante eremombe'u-ma. Nde apu rei eremombe'u-vy, he'i íxupe mo'ã.

¹⁴ Ha Hesu he'i:

—Ndaxe apúii voi, he'i. —Ha peẽ katu ndapeikwaái voi ki-gwi po aju ra'e. Kipy po aha jevy va'erã peẽ ndapeikwaái voi ave. Ha xe katu aikwaa voi xe aju hagwe. Xe aha hagwã aikwaa voi ave. Upéa-gwi xejehegwigwa amombe'u ramo jepe, anhetegwa joty amombe'u.

Naxe apúi voi, he'i. ¹⁵—Ha peẽ pene akã gwigwa rei pemombe'u. “Ko va'e hembiape porã va'e. Upe va'e hembiape vai va'e” peje mo'ã ramo, peje rei-ma peẽ. Pene akã gwigwa rei mante pemombe'u. Peiporavo vérami mo'ã. Ha xe pene nhe'ê-rami namombe'úiry voi. Xe nda'e reíry pende rekoha-rehe, he'i. ¹⁶—Amombe'u ramo ae peẽ-my, anhetegwa tee voi amombe'u joty. Naxe anho reíry amombe'u. Xe Ru xe mbouhare ave omombe'u, he'i. ¹⁷—Pejeapysaka katu myamyri Moisés he'i va'ekwe-rehe, kwatia-rehe omoi va'ekwe-rehe. He'i va'ekwe peẽ-my:

“Mokõive ogwerojoja voi onhe'ê ramo, mba'e tee voi omombe'u”

he'i pene rekorã mombe'u-vy. ¹⁸Xe amombe'u va'e xejehegwigwa. Ha xe Ru xe mbouhare xe mombe'u va'e ave. Ha ijoja voi ore nhe'ê. Upéa-gwi mba'e tee voi oromombe'u va'e, he'i fariseu kwéry-pe Hesu.

¹⁹Upe va'e he'i-gwi:

—Kipy oĩ nde Ru? Kipy oĩ nde Ru? he'i íxupe hikwái oporandu-vy.

He'i fariseu kwéry-pe:

—Naxe kwaái voi peẽ. Ndapeikwaái xe ae xe rekoha. Xe Ru ndapeikwaái ave. Ha xe kwaa ramo ra'e katu, xe Ru-pe ave peikwaa arã ra'e, he'i fariseu kwéry-pe Hesu.

²⁰Upéa he'i omombe'u, Nhandejáry róga kakwaa-py ombo'e jave. Pirapire omboyru haty-py ombo'e jave, he'i upéa. Ha nogwahêi vyteri ojuka hagwã áry. Upéa-gwi ndoipyhí íxupe heraha-vy avave.

“Napegwahêi va'erã peho-vy xe aha hagwã-py” he'i

²¹Ha upéi katu he'i judeu kwéry-pe:

—Xe aha va'erã pendéhegwi. Aha rire xe reka rei va'erã peiko-vy. Xe reka ramo jepe, pemano joty va'erã. Pende py'a ky'a reheve pemano va'erã. Napegwahêi va'erã xe ho ha-py, he'i judeu kwéry-pe Hesu.

²²Upe ramo he'i ojóupe hikwái:

—“Napegwahêi va'erã peho-vy xe aha hagwã-py” he'i kuri ore-vy. Ha'e voi ojeahéi-tapa ójehe ra'e? he'i mo'ã hese ojóupe hikwái.

²³Upéi ha'e voi he'i:

—Peẽ vvy pygwa voi. Ha xe katu yváy pygwa. Peẽ teko rei rekoha-rupi peiko va'e. Ha xe katu hemimbota-rupi ndaikói va'e, he'i. ²⁴—Pende py'a ky'a reheve pemano va'erã, ha'e kuri peẽ-my. Xéjehe ha'e va'e ndaperoviái ramo, pemano va'erã voi pende py'a ky'a reheve, he'i judeu kwéry-pe.

²⁵Upe ramo he'i íxupe hikwái:

—Nde ko ma'erã tipo upéixa ere? Kigwigwa po nde? he'i oporandu-vy íxupe.

—Upéa amombe'u meme va'e peẽ-my, he'i. ²⁶—Heta pende rehegwa nhe'ê xe amombe'u va'erã. Heta pende rekoha vai hegwa nhe'ê xe amombe'u va'erã. Napehendúi ramo jepe xe nhe'ê, anhetegwa va'e joty amombe'u. Ha xe mbouhare anhetegwa va'e omombe'u va'e. Xe Ru nhe'ê ahendu va'e gwive amombe'u entéro yvypóry-pe gwive, he'i judeu kwéry-pe.

²⁷Upéa he'i ramo, Gwu rehegwa nhe'ê omombe'u. Ha judeu kwéry katu ndoikwaái voi inhe'ê. Naimba'ereroviái voi.

—Kiva'e po mbouhare, he'i ojóupe.

²⁸Upéixa ramo he'i jevy judeu kwéry-pe:

—Xe ko Nhande Ryke'y tee va'e. Xe rupi rire xe moĩ-vy kurusugwasu-rehe xe juka hagwã, “Anhetegwa nipo ra'e he'i va'e ójehe” peje va'erã xe-rehe. “Ojehegwínte mba'eve ndojapói nipo ra'e. Túvy ombo'e íxupe va'ekwe mante omombe'u nipo nhande-vy ra'e” peje va'erã xe-rehe, he'i. ²⁹—Xe mbouhare remimbota ajapo meme va'e. Upéa-gwi xe mbouhare naxe rejái xe anho. Xe moirũ meme voi oiko-vy, he'i judeu kwéry-pe.

³⁰Ha henduha heta oĩ hese ojerovia va'e.

“Xe oromoingo ramo Nhandejáry ra'y ramo, ndapeikói va'erã anháy rembigwái-rami” he'i

³¹Upéa-gwi he'i judeu kwéry-pe gwí hese ojerovia va'e-pe:

—Xe nhe'ê pehendu ramo peiko-vy, xe remimbo'e tee ramo peiko, he'i. ³²—Upéixa xe remimbo'e ramo peiko ramo, peikwaa va'erã anhetegwa va'e. Upe ramo peñte-ma pemanda va'erã pendéjehe, he'i judeu kwéry-pe, hese ojerovia va'e-pe.

³³He'i íxupe hikwái:

—Myamyri Abraão ko nhane rembypy voi. Avave nomandái va'e nhande-rehe, he'i. —Ma'erã ere kuri ore-vy, “Pendejehénte-ma pemanda va'erã” he'i íxupe.

³⁴Upéi he'i jevy judeu kwéry-pe:

—Pejeapysaka katu xe nhe'ê-rehe. Amombe'u-ta peẽ-my anhetegwa va'e. Ojevavy va'e gwive hekoha porã hagwã ndaipu'akái ójehe. Anháy rembigwái-rupi oiko-gwi, nomandái ójehe. Ha naiporái jaiko anháy rembigwái ramo. Iporãve jaiko Nhandejáry re'ýi ramo. ³⁵Nhane irũ memerá voi nhande re'ýi ha nhane rembigwái katu ndaha'úi nhande re'ýi-rami. Nhamosêse ramo, nhamosê íxupe oho hagwã. ³⁶Ha xe ko Nhandejáry ra'y voi. Upéa-gwi xe oromoingo ramo Nhandejáry ra'y ramo, ndapeikói va'erã anháy rembigwái-rami, hembiaPOSE e'ý va'e vérami. Nomandavéi va'erã pende-rehe anháy. Pende pu'aka va'erã pendéjehe ani pejevavy hagwã. Nhandejáry ra'y ramo peiko meme va'erã. Nomandavéi va'erã avave pende-rehe, he'i. ³⁷—Ha Abraão katu pene rembypy voi. Aikwaa upéa. Ha hemiarirökwe ramo jepe, ndapeikói heko-rupi. Xe jukase joty voi peiko-vy, napehenduséi xe nhe'ê-gwi. Upéa-gwi xe jukase joty peẽ peiko-vy, he'i íxupe kwéry. ³⁸Xe ko amombe'u va'e xe-vy ohexa uka va'ekwe xe Ru. Ha peẽ katu pejapo va'e peẽ-my he'i va'ekwe pende ru, he'i judeu kwéry-pe.

³⁹Upéi he'i hikwái:

—Abraão ko ore ru tee voi, he'i íxupe.

He'i jevy judeu kwéry-pe:

—“Abraão ore ru tee voi” peje kuri xe-vy. Aipo ramo ma'erã ndapeikói Abraão reko-rupi? he'i. ⁴⁰—Nhandejáry remimombe'ukwe xe-vy, anhetegwa tee va'e, amombe'u ramo jepe peẽ-my, xe jukase joty peẽ peiko-vy. Ha pende reko-rupi ndoikói va'ekwe Abraão, he'i. ⁴¹—Pende ru reko-rupi ae peiko peẽ, he'i judeu kwéry-pe.

Upéi ha'e kwéry he'i:

—Ore sy naimemby reíry va'ekwe. Nhandejáry ha'e anho ore Ru va'e. Ore kwéry ta'ýry tee, he'i íxupe.

⁴²Upéi ha'e he'i:

—Nhandejáry-gwi aju va'ekwe. Nhandejáry gwigwa voi xe. Xe ae xe nhe'ê-py ndajúi va'ekwe. Nhandejáry nhe'ê-py ae aju va'ekwe. Upéa-gwi Nhandejáry pende Ru ramo oiko ramo ra'e, xe rayhu arã peẽ ra'e. ⁴³Ma'erã po ndapeikwái xe nhe'ê. Napehenduséi voi xe nhe'ê. Upéa-gwi ndapeikwái voi xe nhe'ê, he'i. ⁴⁴—Anháy ruvixa ra'y voi peẽ, he'i. —Pende ru voi anháy. Peiko voi katu hemimbota-rupi. Yma ete gwive ko'ánga ete peve nhande jukase va'e voi. Anhetegwa tee va'e-rehe nopenái voi. Upéa-gwi anhetegwa va'e omombe'u e'ý va'e voi. Ha'e ijapu va'e. Ijapu va'e gwive ru ave. Upéa-gwi ojehegwínte ijapu. Gweko-rupi meme oiko. Ijapuse-gwite ijapu, he'i. ⁴⁵—Xe katu anhetegwa tee va'e amombe'u va'e. Upéa-gwi xe remimombe'u ndaperoviái peiko-vy. Ha peẽ katu anháy reko-rupi peiko-gwi ndaperoviái xe remimombe'u, he'i. ⁴⁶—Kiva'e po pene pa'ũ-gwi he'i-ta xe-rehe, “Ipy'a ky'a nipo Hesu ra'e ojevavy-gwi?” Ha “Ojevavy ko ra'e” he'i va'erã xe-rehe, ndoikóiry. Upéixa ramo peikwaa ramo xe remimombe'u anhetegwa tee ramo, ma'erã katu ndaxe reroviaséiry, he'i. ⁴⁷—Nhandejáry re'ýi gwive ohendu inhe'ê. Ha peẽ katu ndaha'úi Nhandejáry re'ýi. Upéa-gwi napehenduséi voi inhe'ê, he'i judeu kwéry-pe Hesu.

Ne'írã vyteri myamyri Abraão oiko ramo, xe Nhandejáry ramo aiko-ma voi va'ekwe

⁴⁸Upe-ma ramo he'i íxupe judeu kwéry:

—Nde ko ore kwéry e'ý va'e, Samaria pygwa va'e nipo ra'e. Anháy nipo ra'e ojepota nde-rehe oro'e hagwe-rupi ra'e, he'i mo'ã íxupe.

⁴⁹—Ndojepotáiry voi teĩ kuri xe-rehe anháy, he'i judeu kwéry-pe. —Xe Ru-pe amboete va'e. Ha peẽ xe mboete e'ý ramo, napemboetéi íxupe. ⁵⁰Nanhemboete ukái voi teko rei-pe.

Ha peẽ xe mboete e'ÿ ramo jepe oĩ joty xe mboeteseharã. Anhetegwa va'e xe amombe'uha oikwaa voi. ⁵¹ Anhetegwa va'e amombe'u-ta peẽ-my. Xe nhe'ẽ renduha gwive nomano mo'ávêi-ma. Oiko va'erã opa e'ÿ reheve Nhandejáry ndive, he'i judeu kwéry-pe.

⁵² Upe ramo he'i íxupe hikwái:

—Anháy ojepota-ma nipo nde-rehe oiko-vy ra'e. Anhete teegwa-ma, he'i mo'ã. — Ojepota-ma nde-rehe anháy. Oroikwaa-ma voi ojepotaha nde-rehe anháy. Omano va'ekwe Abraão. Omano va'ekwe ave Nhandejáry nhe'ẽ-py omombe'u va'ety kwéry. Omano ramo jepe, “Xe nhe'ẽ renduha gwive nomano mo'ávêi-ma” ere kuri ore-vy. Ojepota-ma voi nde-rehe oiko-vy ra'e anháy, he'i mo'ã Hesu-pe. ⁵³ —Omano-ma voi va'ekwe nhane ramói myamyri Abraão. Ha Abraão enterove remimboete voi. Ha nde erenhemoete ukaseve mo'ã tipo ereiko-vy? Myamyri Nhandejáry nhe'ẽ-py omombe'u va'ety omano-ma voi va'ekwe ave. Erenhemonhandejáry ra'anga anga rei nipo ra'e, he'i íxupe judeu kwéry.

⁵⁴ Upéi Hesu he'i judeu kwéry-pe:

—“Tuvixave va'e mba'e voi xe” ha'e ramo xéjehe, nanhemboete teéiry arã ra'e. Ha xe mboete va'e xe Ru. Upe va'e, “Ore Járy” peje mo'ã hese, he'i. ⁵⁵ —Nhandejáry kwaa e'ÿha peẽ. Xe katu aikwaa voi íxupe. “Xe ndaikwaáiry íxupe” ha'e ramo, xe apu-tama xe ave. Pende reko-rupima xe aiko arã ra'e. Ha Nhandejáry kwaaha xe. Aikwaa voi íxupe. Ahendu va'e inhe'ẽ, he'i. ⁵⁶ —“Nhandejáry ra'y áry ahexa va'erã” he'i ojúpe myamyri Abraão xe-rehe va'ekwe. Upéa-gwi ovya eterei va'ekwe. Upéi xe ajehexa ukaha áry ohexa rire, ogwerohory hembixagwe, he'i judeu kwéry-pe.

⁵⁷ Ha'e kwéry he'i:

—Ne'irã eremboty cinqüenta ro'y. Ma'erã po ere kuri ore-vy, “Myamyri Abraão-pe ahexa va'ekwe” ere kuri? he'i íxupe hikwái.

⁵⁸ —Amombe'u-ta peẽ-my anhetegwa va'e, he'i. —Ne'irã vyteri myamyri Abraão oiko ramo imitã ramo, xe Nhandejáry ramo aiko-ma voi va'ekwe, he'i judeu kwéry-pe.

⁵⁹ Upe-ma ramo ojapi hagwã mo'ã íxupe oheka heka-ma ita. Oipyhy pyhy ojuka hagwã mo'ã íxupe. Ha Hesu okanhy onhemo'ã íxugwi kwéry. Upéi osê oho-vy íxugwi kwéry Nhandejáry róga kakwaa-gwi.

9

Hesu ombohesa hesapyso e'ÿ va'e-pe

¹ Ha upéi katu oho ogwata-vy Hesu. Ogwata jave ohexa peteĩ hesapyso e'ÿ va'e-pe. Imitã gwive ndahesapysóiry va'e. ² Ohexa ramo, oporandu Hesu-pe hemimbo'e:

—Mba'e-gwi upe va'e ndahesapysóiry va'e imitã gwive, porombo'eháry? Ha'e ojevavy-gwi para'e. Ojevavy-gwi para'e túvy isy ave? he'i íxupe oporandu-vy.

³ Upéi Hesu he'i íxupe:

—“Upe va'e hesa e'ÿ va'e ojevavy-gwi para'e, túvy isy ave ojevavy-gwi para'e, onase hesa e'ÿ reheve” peje mo'ã. Ha ndaupéixairy, he'i. —Hesapyso e'ÿ va'e ae hembiape porã hagwã íxupe Nhandejáry hexapyrã-rupi. ⁴ Áry ramo jajapo katu xe mbouhare rembiapo. Ou va'erã pyhare. Pytũ jave ndikatúĩ omba'apo avave. Áy ome'ẽ nhamba'apo. Ha nhamba'apo e'ÿ va'erã óra-py, nanhamba'apo mo'ávêi-ma va'erã, he'i ójehe. ⁵ —Xe aime jave ko vvy ári, yypóry kwéry-pe, pytũ-rupi oiko va'e-rami va'e-pe ahesape va'e, he'i gwemimbo'e kwéry-pe Hesu.

⁶ Upéa he'i rire, onygwõ vvy-py ombotuju hagwã gwendy-py. Ombotuju rire katu omona-ma hesa e'ÿ va'e resa-rehe.

⁷ —Tereho katu Siloé ykwa-py ejehesahéi, he'i hesa e'ÿ va'e-pe.

Y ojereru va'ekwe-pe he'i Siloé.

Ha upéi katu oho ojehesahéi. Hesapyso porã-ma oukwe-vy. ⁸ Ha hapixa kwéry, imba'ejerure oĩ-vy ramo hexaháry ave he'i ojúpe:

—Kiva'e tipo upéa? he'i. —Ogwapy va'evy va'ekwe ko upéa kwimba'e. Omba'e repyrã-rehe ojerure rure va'ekwe. Ha áy hesapyso-ma nipo ra'e, he'i ojúpe hese hikwái.

⁹ —Ha'e voi —oĩ he'i va'e hese. —Imba'ejerure va'ekwe hesapyso voi ra'e ãy, he'i.

Outro kwéry he'i hese:

—Ndaha'éi. Ijogwaha rei upe va'e, he'i mo'ã hese.

Ha ha'e voi katu he'i:

—Xe mba'ejerure va'ekwe voi xe, he'i ójehe.

¹⁰ Upe ramo he'i íxupe hikwái:

—Mbava'e tipo erejapo nde resa-rehe erehexa porã haggwã? he'i oporandu-vy.

Ha ha'e he'i:

¹¹ —Hesu héry va'e ombotuju kuri yvy omoĩ xe resa-rehe. Upéi, “Tereho katu Siloé ykwa-py ejehesahéi” he'i xe-vy. Upe ramo aha ajehesahéi xe resapyso-ma, he'i íxupe kwéry.

¹² —Kipy oime Hesu? he'i íxupe hikwái.

—Ndaikwaáiry kipy po oĩ, he'i íxupe kwéry.

“Mba'éixa ne mbohesa ra'e?” he'i íxupe judeu ruvixa kwéry

¹³⁻¹⁴ Ha upéi katu hesapyso e'ỹ va'ekwe ojereru fariseu kwéry renda-py. Ndojohu porã ra'e Hesu rembiapo fariseu kwéry:

—Japytu'uha áry-pyte ombotuju Hesu hesapyso haggwã, he'i ojóupe fariseu kwéry.

¹⁵ Upéa-gwi oporandu íxupe:

—Mba'éixa pa nde resapyso jevy-ma? he'i íxupe fariseu kwéry.

—Xe resa-rehe omoĩ kuri tuju. Upéi aha ajehesahéi xe resapyso-ma, he'i fariseu kwéry-pe.

¹⁶ Upe ramo omombe'u joavy avy ojóupe fariseu kwéry:

—Hesu ko japytu'uha áry reko-rupi ndoikóiry. Upéa-gwi Nhandejáry nhe'ẽ e'ỹ-py hembiaipo, oĩ he'i va'e hese.

Ha outro fariseu he'i:

—Hesu hexapyrã-rupi hembiaipo porã va'e. Ma'erã, “Ojevavy ra'e” peje hese mo'ã? he'i ojóupe hese hikwái.

Upéixa ramo omombe'u joavy avy ojóupe Hesu-rehe. ¹⁷ Upéa-gwi oporandu jevy hesapyso e'ỹ va'ekwe-pe:

—Mba'eixagwa hekoha va'e tipo nde resa apohare? he'i. —Emombe'u katu ore-vy hesegwa, he'i íxupe fariseu kwéry.

—Nhandejáry nhe'ẽ-py omombe'u va'ety voi upe va'e, he'i fariseu kwéry-pe.

¹⁸ “Xe resapyso-ma” he'i ramo, ndogweroviái inhe'ẽ judeu ruvixa kwéry. Upéa-gwi ohenói uka hesapyso e'ỹ va'ekwe ru-pe. Isy-pe ohenói uka ave ou haggwã.

¹⁹ Ogwahẽ ramo, oporandu túvy-pe isy-pe ave:

—Nde ra'y tipo upe va'e, he'i túvy-pe. —Imitã gwive ndahesapysóiry va'e peje hese va'e? Mba'éixa tipo ohexa oiko-vy? oporandu túvy-pe isy-pe ave.

²⁰ He'i judeu ruvixa kwéry-pe:

—Ko va'e katu aikwaa voi xe ra'y teeha. Imitã gwive hesapyso e'ỹha aikwaa voi, he'i.

²¹ —Ha ndoroikwái mba'éixa po ohexa ãy. Kiva'e po ombohesa ra'e íxupe ndoroikwái ave. Ha xe ra'y-pe katu peporandu peikwaa haggwã. Naimitávériy-ma voi xe ra'y. Ójehe gware omombe'u va'erã peẽ-my, he'i judeu ruvixa kwéry-pe.

²² Upéa he'i ikyhje-gwi judeu ruvixa-gwi. Onhombó'e ra'e ojóupe judeu ruvixa kwéry:

—“Cristo, nhane remiha'arõ va'e voi Hesu” he'i va'e gwive, nhamosẽ katu ojeporahéi haty haty-gwi, he'i ojóupe.

Upéa-gwi ikyhje voi túvy isy ave. Upéa-gwi he'i: ²³ “Naimitávériy-ma voi xe ra'y. Ójehe gware omombe'u va'erã peẽ-my” he'i judeu kwéry-pe túvy isy ave.

²⁴ Upéa he'i-gwi:

—Eju katu, he'i jevy hesapyso e'ỹ va'ekwe-pe judeu ruvixa kwéry. —Ore kwéry ko oroikwaa voi pe kwimba'e Hesu héry va'e ojevavy javyha. Upéa-gwi etima porã katu Nhandejáry-pe nde resapyso jevymaha-rehe, he'i íxupe judeu ruvixa kwéry.

²⁵—Ojejavu va'e para'e pe kwimba'e. Tapa ojejavu e'ÿ va'e. Xe ndaikwaáiry. Ha peteĩ mba'e xe aikwaa. Kwehe ndaxe resáiry va'e xe. Áy katu xe resa-ma voi. Áy katu ahexa porã-ma, he'i judeu ruvixa kwéry-pe.

²⁶Upe ramo he'i íxupe hikwái:

—Mbava'e tipo ojapo nde-vy ra'e ne mbohesa haggwã? he'i. —Mba'éixa tipo ne mbohesa haggwã ra'e? he'i jevy íxupe judeu ruvixa kwéry.

²⁷—Ma'erã po pehenduse jevy? Napehenduséi kuri xe remimombe'u peẽ-my. Peikose para'e Hesu remimbo'e ramo peẽ ave, he'i judeu ruvixa kwéry-pe.

²⁸Upe-ma ramo ipoxy-ma íxupe. Onhe'ẽ rei rei-ma íxupe:

—Hesu remimbo'e voi nde. Ha ore kwéry katu Moisés remimbo'e voi, he'i. ²⁹—Nhandejáry remimombe'ukwe nipo araka'e Moisés-pe. Ha ki-gwi po ou Hesu ra'e ndoroikwaáiry, he'i íxupe judeu ruvixa kwéry.

³⁰Upe ramo ha'e he'i:

—Apondera voi pende-rehe. Hesu xe mbohesa ramo jepe, ki-gwi po ou ra'e ndapeikwaái joty, he'i. ³¹—Nhandejáry rekoha jaikwaa voi. Ojejavu va'e-pe gwive ndohexa mo'ái. Ha imboeteha gwive katu hemimbota apoha ave, upe va'e-pe ohexa va'erã, he'i. ³²—Pejeapysaka katu xe nhe'ẽ-rehe. Ko yvy nhapyrũ gwive áy ete peve, “Hesapyso-ma imitã gwive hesa e'ÿ va'e” nde'íry va'e, he'i. ³³—Ojéhegwi mba'eve ndojapói va'e Hesu. Xa mbohesa-ma kuri. Nhandejáry remimbou voi nipo ra'e Hesu, he'i judeu ruvixa-pe.

³⁴Upe nhe'ẽ ohendu-ma ramo ipoxy-ma hikwái:

—Nde py'a ky'apa-ma reheve ereiko va'ekwe. Upéa-gwi naiporái voi nde ore mbo'e, he'i hesapyso e'ÿ va'ekwe-pe judeu ruvixa.

Upe rire omosẽ íxupe:

—Anive ereike teĩ ojeporahéi haty haty-rupi, he'i íxupe judeu ruvixa kwéry.

“Hi'arandu e'ÿ va'e aipota hesapysomaha va'e-rami oiko” he'i Hesu

³⁵Ha upéi katu:

—Omosẽ ra'e hesapyso va'ekwe-pe judeu ruvixa, he'i Hesu-pe.

Upéa-gwi oho oheka íxupe Hesu. Otopa ramo, he'i:

—Erejerovia-ma tipo nde ereiko-vy Nhande ryke'y tee va'e-rehe, he'i oporandu-vy íxupe.

³⁶—Kiva'e po ndaikwaái, porombo'eháry, ajerovia-ma haggwã hese, he'i Hesu-pe.

³⁷—Erehexa-ma erei-vy íxupe. Xe voi, he'i ójehe. —Pende ryke'y tee va'e xe voi nde-vy anhe'ẽ va'e, he'i íxupe Hesu. ³⁸—Ajerovia-ma nde-rehe, xe Járy, he'i íxupe.

Gwety'p'ã-rehe onhesũ omboete-vy íxupe.

³⁹Ha upéi katu he'i upe pygwa-pe Hesu:

—Ko yvy-py aju va'ekwe ojekwaa haggwã yvypóry kwéry rekoha, ipy'a-py oĩ va'e ojekwaa haggwã. Hesapyso e'ÿ va'e-rami voi oiko hi'arandu e'ÿ va'e. Aipota hesapyso-ma va'e-rami oiko hikwái. Ha, “Nthane arandu va'e” he'i ra'anga anga rei va'e katu, aipota hi'arandu e'ÿha enterove ohexa. Upéa-gwi aju va'ekwe ko yvy ári, he'i upe pygwa-pe Hesu.

⁴⁰Oĩ fariseu kwéry va'e hendive oĩ va'e, upéa ohendu va'e:

—“Pene arandu e'ÿ peẽ ave” ere tipo ra'e kuri ore-vy ave, he'i oporandu-vy íxupe.

⁴¹—Pende resapyso e'ÿ va'e-rami peiko ramo ra'e, ndaiky'ái arã ra'e pende py'a. Áy katu, “Ore resapyso va'e-rami ore arandu porã va'e” peje mo'ã pendéjehe. Upéa-gwi pende apu-gwi, iky'a-ma voi oĩ-vy pende py'a, he'i fariseu kwéry-pe Hesu.

10

Arandu rehegwa nhe'ẽ omombe'u Hesu ovexa rehegwa nhe'ẽ-rami

¹Ha upéi katu he'i jevy upe pygwa-pe Hesu:

—Amombe'u-ta peẽ-my anhetegwa va'e. Jaike ramo xikéro-py ovexa oĩ ha-my, okẽ-rupi jaike va'e. Ha imondaháry oporosakeahaty va'e ave katu okẽ-rupi ndoikéiry. Ojeupi ae ohasa xikéro ári-rupi oike haggwã ovexa oĩ ha-my, he'i. ²—Ha okẽ-rupi oike va'e katu ovexa rerekwa voi, he'i. ³—Ogwahẽ ou-vy ramo, imbotyhaty járy onhokendavo íxupe. Upéi

ohenói gwymba. Peteĩ teĩ héry-py ohenói. Ohenói ramo, ohendu inhe'ẽ hymba. Upéi oka-py ogweraha. ⁴Ogwenohẽ rire gwymba gwive, oho henonde-rupi. Oikwaa inhe'ẽ. Upéa-gwi oho hupive hikwái, he'i. ⁵—Ha herekwa e'ỹ va'e-pe katu nomoirúséi voi. Ndososéi hupive. Herekwa e'ỹ va'e nhe'ẽ ndoikwaái voi. Upéa-gwi okanhy oje'ói-vy íxugwi, he'i upe pygwa-pe Hesu.

⁶Arandu rehegwa nhe'ẽ omombe'u íxupe kwéry ovexa rehegwa nhe'ẽ-rami. Ha henduha katu mbava'e-rehe po he'ise Hesu ndoikwaái voi hikwái.

“Pe herekwa heko porã tee va'e xe-rehe voi he'i” he'i Hesu

⁷Upéixa ramo he'i jevy íxupe kwéry Hesu:

—Amombe'u-ta peẽ-my anhetegwa va'e. Ovexa rokẽ he'ise xe-rehe. ⁸Xe renonde-py ou va'ekwe-rehe gwive he'ise imondaháry oporosakeahaty ave. Ha nohendúiry íxupe ovexa. Xe nhe'ẽ renduha-pe he'ise ovexa. ⁹Okẽ, ha'e ramo xéjehe voĩnte ha'e. Okẽ-rupi oike va'e gwive xe-rehe ojerovia va'e aresende va'erã íxupe. Ndaikyhyjéi va'erã oike ike-vy. Ikyhyje e'ỹ reheve osẽ osẽ va'erã. Oĩ hese onhangareko va'e. Oheka va'erã ho'u va'erã, he'i gwĩ hese ojerovia va'e-rehe. ¹⁰—Ha imondaháry katu nopenái ovexa-rehe. Omonda hagwã mante íxupe ou va'e. Ijukapyrã voi ovexa. Ohundi hagwã mante íxupe ou. Ha xe katu aju va'ekwe amoingove hagwã ovexa-pe. Amoingove porãve rãve va'erã íxupe, he'i.

¹¹—Herekwa heko porã tee va'e gwymba ndive ojejúka uka hagwãixa opyta. Pe herekwa heko porã tee va'e xe-rehe voi he'i, he'i.* ¹²⁻¹³—Hembigwái ae katu ogana hagwã mante omba'apo va'e ndaha'éi herekwa tee. Ijáry e'ỹ voi upéa. Upe va'e nopenái mymba-rehe. Ogana hagwã mante omba'apo. Upéa-gwi ogwahẽ ou ramo jagwarete, nonhangareko porái hymba-rehe. Oripara mante íxugwi. Upe-ma ramo oipyhy mymba-pe jagwarete omosarambipa hagwã.

¹⁴⁻¹⁵Pe ovexa rerekwa hekoha porã tee va'e, ha'e ramo, xéjehe voĩnte ha'e. Xe Ru rekoha aikwaapa voi. Xe kwaa ave xe Ru. Upéixa ete aikwaa xe rymba. Ha xe rymba xe kwaa ave. Xe rymba rekovia ajejúka ukase va'erã voi. Naxe rakate'jyry xe rekove-rehe xe rymba aresende hagwã, he'i. ¹⁶—Momybyry mbyry oĩ va'e xe rymba xe areko va'e ave. Ndaha'éi a pygwa, ko xikéro pygwa. Momybrygwa-pe ajererovia uka va'erã. Xe nhe'ẽ ohendu va'erã. Henda henda-rupi peteĩxa oiko va'erã. Peteĩ mante oĩ va'erã herekwa.

¹⁷Xe rymba rekovia ajejúka uka va'erã voi, xe aikove jevy hagwã. Upéa-gwi xe rayhu voi xe Ru. ¹⁸Xe rekove-rehe ipu'akave va'e ndaipóri. Xe jukase-gwi mante naxe jukái va'erã avave. Xe nhe'ẽ-rupi mante xe júka va'erã. Xe nhe'ẽ-py joty ajejúka uka va'erã. Xe nhe'ẽ-py joty aikove jevy va'erã. Upe va'e ajapo hagwã he'i va'ekwe xe-vy xe Ru omanda-vy, he'i judeu kwéry-pe Hesu.

¹⁹Upe va'e nhe'ẽ ohendu ramo, omombe'u joavy avy judeu kwéry:

²⁰—Ojepota-ma ra'e hese anháy, he'i. —Itavy voi. Ma'erã po pehenduse inhe'ẽ? he'i hese heta oĩ va'e.

²¹Outro kwéry he'i:

—Anháy ojepota hese va'e nonhe'ẽi ha'e-rami. Anháy rerekoha ndikatúí ombohesa jevy hesapyso e'ỹ va'e-pe, he'i ojóupe hese.

“Erenhemonhandejáry ra'anga anga rei ereiko-vy” he'i mo'ã Hesu-pe

²²Ha upéi katu oiko-ma Jerusalém tetã-my judeu kwéry arete. Nhandejáry róga kakwaa nhamoatyrõmba hagwe áry arete héry va'e. Upe ramo ro'y eterei voi. ²³Ha Hesu katu ogwata oiko-vy Nhandejáry róga kakwaa-py. Ogapy onhemboty e'ỹ va'e gwy-py, Salomão onhehenói va'e gwy-py ogwata oiko-vy. ²⁴Upe-ma ramo ogwahẽ ou-vy judeu ruvixa kwéry. Ogwata jave Hesu, ogweroajere íxupe hikwái:

—Are gwive ko'ánga ete peve orojapura eremombe'u hagwã ore-vy kiva'e tipo nde oroikwaa porã hagwã. Emombe'u porã katu ore-vy, he'i. —Nde tipo Cristo voi ore remiha'arõ va'e? he'i oporandu-vy íxupe hikwái.

²⁵Upéi Hesu he'i íxupe kwéry:

*

—Xe jehegwigwa nhe'ẽ amombe'u kuri peẽ-my. Ha ndaperoviái voi xe nhe'ẽ. Xe Ru réry-py xe rembiapo porã va'e. Pende rexapyrã-rupi xe rembiapo. Upe va'e pehexa ramo, ma'erã peje xe-rehe, “Hesu nipo ndaha'úi Cristo ra'e” peje kuri xe-rehe, he'i. ²⁶—Xe rymba kwéry e'ỹ va'e-rami peiko va'e xe-vy. Xe re'úi e'ỹ va'e peẽ. Upéa-gwi ndaperoviáiry xe nhe'ẽ. ²⁷Xe rymba kwéry xe nhe'ẽ renduha va'e voi. Peteĩ teĩ va'e-pe aikwaa. Xe rupive oje'ói va'erã. ²⁸Xe rymba gwive amoingove va'e Nhandejáry ndive opa e'ỹ reheve opyta hagwã. Mombyry oréhegwi noĩry va'erã. Xe po pyte-py xe rembiereko meme voi. Ha ndikatúí ogweraha avave xe po pyte-gwi. ²⁹Upéa xe Ru remimonhangareko uka xe-vy ime'ẽ-vy. Ha'eixagwa ndaipóri. Ipo pyte-py xe Ru rembiereko voi. Ha ndikatúí ogweraha avave ipo pyte-gwi, he'i. ³⁰—Xe xe Ru ave peteĩxa, he'i judeu ruvixa kwéry-pe.

³¹Upéa he'i-ma ramo, ojapi hagwã íxupe, ita oipyhy hikwái. Ojukase íxupe mo'ã hikwái.

³²Ha Hesu he'i:

—Pene pa'ũ-rupi heta xe rembiapo porã. Xe Ru nhe'ẽ-py ahexa uka peẽ-my xe ajapo porãha. Kiva'eixagwa-rehe po xe api apise peẽ? he'i judeu ruvixa kwéry-pe.

³³—Ndoorjapi mo'ái ne rembiapo porã-rehe. Nhandejáry-rehe erenhe'ẽ rei hagwe-rehe ae orojapi-ta. Teko rei jepe erenhemonhandejáry ra'anga anga rei ereiko-vy. Upéa-rehe orojapise, he'i mo'ã íxupe judeu ruvixa kwéry.

³⁴Upe-ma ramo omombe'u judeu ruvixa kwéry-pe Nhandejáry nhe'ẽ:

—Nhandejáry kwatia nhe'ẽ, pehendu va'e he'i no'ã-rami:

“Tupã kwéry voi peẽ, ha'e-ma peẽ-my”*

he'i Nhandejáry. ³⁵Ha Nhandejáry nhe'ẽ anhetegwa tee va'e he'i meme. Upéa jaikwaa voi. Pejeapysaka katu xe nhe'ẽ-rehe. Gwĩ inhe'ẽ renduha-pe tupã kwéry-py ohenói va'ekwe Nhandejáry. ³⁶Xe katu Nhandejáry rembiaporavo ko yvy-py hemimbou voi xe. Ha, Nhandejáry ra'y voi xe, ha'e ramo xéjehe, ndapejohu porái va'erã voi xe nhe'ẽ. Teko rei-pe tupã kwéry-py ohenói rei va'ekwe Nhandejáry. Aipo ramo, ma'erã po, “Erenhe'ẽ rei rei ereiko-vy Nhandejáry-rehe” peje joty xe-vy, “Nhandejáry ra'y voi xe, ere ramo”. Ma'erã aipo peje joty xe-vy? he'i. ³⁷—Xe Ru rembiapo ajapo e'ỹ ramo, ani xe rerovia teĩ peẽ, he'i. ³⁸—Ha hembiapo voi katu ajapo ramo, xe rerovia katu peẽ. Ha naxe reroviái ramo jepe peẽ, pejerovia joty katu xe rembiapo porã-rehe. Aipo ramo peikwaa porã-ma arã voi ore rekoha peiko-vy. Peteĩxa xe moirũ xe Ru oiko-vy. Ha xe katu amoirũ peteĩxa xe Ru aiko-vy. Upe va'e peikwaa porã arã, he'i judeu kwéry-pe.

³⁹Upéa he'i-gwi, oipyhyse jevy mo'ã íxupe hikwái. Ha judeu kwéry ndaipu'akái hese oipyhy hagwã. Osẽ oho-vy íxugwi kwéry.

⁴⁰Ha upéi katu oho jevy Jordão ysyry rovái. João Batista oporomongarai hagwe-py oho. Upe-py opyta. ⁴¹Oiko jave upe-py, heta ou oheka-vy:

—Jahexa e'ỹ va'e ndojapói va'ekwe João. Ha Hesu-rehe hemimombe'u gwive anhetegwa nipo ra'e, he'i João-rehe hikwái. ⁴²Upéa-gwi upe-py heta oĩ ojerovia-ma va'e Hesu-rehe hikwái.

11

“Omano ete-ma Lázaro” he'i Hesu gwemimbo'e kwéry-pe

¹Ha upéi katu oĩ hasy va'e Lázaro héry va'e. Oiko Betânia tetã'i-my. Upe-py oiko ave heindýry Maria, heindýry Marta ave. ²Upéa Maria Nhandejáry Hesu py omohyakwã va'erã. Ho'a vuku apy-py oikyty va'erã ipy omokã hagwã. ³Upe va'e Maria tykéry Marta ndive omomarandu uka Hesu-pe:

—Porombo'eháry, ha'e ko ne rembiayhu va'e hasy-ma, he'i Hesu-pe.

⁴Upéa ohendu ramo:

—Omano hagwã-rami ndahasýi. Hasy-ma ae oĩ-vy Nhandejáry ohexa uka hagwã gwembiapo porãha. Hasy-gwi xe Nhandejáry ra'y va'e ahexa uka va'erã ave xe rembiapo porãha anhembotuvixa mba'e hagwã, he'i hasy va'e-rehe Hesu.

*

⁵ Ha Marta Hesu rembiayhu voi. Iky'py'ýry ikyvy ave hembaiyhu ave. ⁶ Ha upéixa ramo jepe oikwaa-ma ramo Lázaro hasymaha, opyta joty upe oĩ ha-py. Mokõi áry opyta joty upe-py.

⁷ Upe rire ae he'i gwemimbo'e kwéry-pe:

—Jaha jevy katu Judéia vvy-py, he'i íxupe kwéry.

⁸ —Nde api apise kuri mo'ã ita-py judeu ruvixa kwéry, porombo'eháry. Ma'erã po erehose jevy joty ha'e kwéry oĩ ha-my? he'i íxupe hemimbo'e.

⁹ Upéi he'i ha'e:

—Áry ramo hesakã meme voi. Jahexa nhande resapeha. Upéa-gwi jagwata porã nhanhepysanga e'ý reheve. ¹⁰ Ha pyhare katu nhande resapeha e'ý reheve jaiko. Upéa-gwi jagwata ramo, nhanhepysanga ramo, ja'a arã, he'i ójehe omanotaha áry-rehe.

¹¹ Upéa he'i rire, Lázaro rehegwa omombe'u gwemimbo'e kwéry-pe:

—Oke oĩ-vy nhande rapixa Lázaro. Aha-ta amombáy íxupe, he'i gwemimbo'e kwéry-pe.

¹² —Oke oĩ-vy ramo, okwera arã, ore Járy, he'i íxupe hemimbo'e kwéry.

¹³ Ha Hesu omombe'u Lázaro omanoha rehegwa nhe'ẽ okeha rehegwa nhe'ẽ-rami. Ha hemimbo'e kwéry katu mbava'e-pe po he'ise Hesu nhe'ẽ ndoikwaái voi:

“Lázaro oiko porã oke jave” he'i mo'ã ojóupe. ¹⁴ Upéa-gwi omombe'u porã íxupe kwéry omano hagwe:

—Omano ete-ma Lázaro, he'i. ¹⁵ —Naiméi-gwi omano jave, avy'a joty xe. Naiméi-gwi pejerovia va'erã xe-rehe. Upéa-rehe avy'a. Omano jepe jaha katu jahexa íxupe, he'i gwemimbo'e kwéry-pe.

¹⁶ —Jaha katu nhande ave nhamano hagwã indive, he'i hapixa kwéry-pe Hesu-rehe Tomé. Dídimó héry ave Tomé.

“Xe ko apomoingove jevy va'ety” he'i Hesu

¹⁷ Upe ramo oho oje'ói-vy Betânia tetã'i-my. Upe-py ogwahẽ ramo Hesu, Lázaro retekwe omói-ma ra'e oheja-vy itakwa-py. Ojapo irundy áry oheja hagwe upe-py. ¹⁸ Ha Jerusalém hi'agwĩ oĩ Betânia tetã'i-gwi. Mbohapy quilômetro para'e. ¹⁹ Upéa-gwi heta judeu kwéry ou Jerusalém-gwi omoirũ hagwã Marta-pe iky'py'ýry ndive. Ou pono omboaso eterei okyvýry-pe. ²⁰ Ha upéi katu ogwahẽ-tama Hesu Marta renda-py. Oikwaa-ma ramo Hesu ogwahêtaha ou-vy, oho ohogwaitĩ íxupe. Ha iky'py'ýry katu opyta hóga-py. Ha upéi Marta ogwahẽ ohogwaitĩ-vy Hesu-pe.

²¹ —Ereime ramo ra'e a-py, xe Járy, nomanói arã ra'e xe kyvy, he'i Hesu-pe. ²² —Omano jepe, erejerure va'e-rehe gwive, ome'ẽ arã voi nde-vy Nhandejáry. Upéa aikwaa voi, he'i íxupe Marta.

²³ —Oikove jevy va'erã nde kyvy, he'i Marta-pe.

²⁴ —Ha'e voi. Aikwaa voi upéa. Jaikove jevy va'eha áry-py oikove jevy va'erã, he'i íxupe Marta.

²⁵ Upéi Hesu he'i:

—Xe ko apomoingove jevy va'ety. Apomoingove meme va'ety voi xe. Xe-rehe ojerovia va'e gwive omano ramo jepe, xe ndive oikove meme va'erã, he'i. ²⁶ —Xe ndive oikove va'e gwive, xe-rehe ojerovia va'e gwive nomano mo'ávéi-ma. Ha omano ramo katu, namomyry mo'ái voi opyta xéhegwi. Xe moirũ va'erã voi opa e'ý reheve. Ererovia tipo ko xe nhe'ẽ? he'i Marta-pe Hesu.

²⁷ —Ha'e. Arovia-ma, xe Járy, he'i. —Cristo voi nde nipo ra'e. Nhandejáry ra'y voi nde ra'e. Ko vvy-py ou va'erã va'ekwe voi nde nipo ra'e, he'i Hesu-pe Marta.

Hesa'y-ma Hesu

²⁸ Upéa he'i rire oho ohenói okypy'ýry. Íxupe anho he'i:

—Ogwahẽ-ma ou-vy porombo'eháry. Ne renói-ma, he'i nhemi okypy'ýry-pe.

²⁹ Inhe'ẽ ohendu-ma ramo, pya'e opu'ã oho-ma Hesu ha-py. ³⁰ Ha Hesu nogwahêi vyteri tetã'i-my. Oĩ joty Hesu Marta ohogwaitĩ íxupe hagwe-py. ³¹ Ha upéi katu iky'py'ýry Maria opu'ã osê pya'e oho iha-py.

Ohexa ramo hupive oho ave judeu kwéry hóga-py oĩ va'e, omoirũ hagwã íxupe ou va'ekwe:

—Oho-tama ijyta-py Maria ojahe'o hagwã upe-py, he'i mo'ã hese hikwái. Upéixa ramo oho hupive hikwái.

³²Upéi ogwahẽ oho-vy Hesu renda-py. Ogwahẽ-ma ramo, ojeity Maria Hesu rovagwy-py:

—Ereime ramo ra'e a-py, xe Járy, nomanói arã ra'e xe kyvy, he'i íxupe.

³³Upe ramo ha'e ohexa Maria hasẽ ramo. Indive oĩ va'e judeu hasẽ ramo ohexa ave. Ohexa ramo, ndovy'avéi-ma. Ndaipy'agwapyvéi-ma voi Hesu:

³⁴—Kipy pemoĩ ra'e omano va'ekwe-pe, he'i oporandu-vy upe pygwa-pe.

—Eju katu erehexa hagwã, porombo'eháry, he'i íxupe hikwái.

³⁵Hesa'y-ma Hesu. ³⁶Aipo ramo:

—Hembiayhu tee voi nipo ra'e, he'i omano va'ekwe-rehe hikwái.

³⁷Outro he'i:

—Hesapyso e'ỹ va'ekwe-pe ombohesa kuri. Mba'éixa Hesu ndojapói Lázaro-rehe ombogwera hagwã? he'i Hesu-rehe hikwái.

Hesu omoingove jevy omano va'ekwe-pe

³⁸Upe ramo ndaipy'agwapy etéi jevy-ma Hesu oho Lázaro retekwe ombosuru hagwe-py. Omoĩ araka'e itagwasu omboty hagwã.

³⁹—Peipe'a katu imbotyha, he'i Hesu.

—Ani ereipe'a teĩ. Ine-ma voi ra'e, xe Járy, he'i íxupe. —Xáke ine-ma voi. Ojapo irundy áry ombosuru hagwe, he'i íxupe Marta, omano va'ekwe reindykwe.

⁴⁰Upéi Hesu he'i:

—Ha'e-ma kuri nde-vy, Xe rerovia ramo ojehexa uka va'erã nde-vy Nhandejáry. Tuvixa mba'eha-rupi ojehexa uka va'erã nde-vy, he'i Marta-pe.

⁴¹Upe ramo oipe'a ita imboty hagwe hikwái. Ha Hesu hovayva-ma oĩ-vy yvate-koty:

—Erehendu-ma kuri xe nhe'ẽ, xe Ru, he'i Nhandejáry-pe. —Upéa-gwi atima porã nde-vy, he'i. ⁴²—Xe rendu meme va'e nde. Aikwaa. Upéa ha'e-ma a-py ijaty va'e ohendu hagwã, he'i hagwã xe-rehe, “Nhandejáry remimbou nipo ra'e ha'e” he'i hagwã xe-rehe, he'i Nhandejáry-pe oração apo-vy.

⁴³Upéa he'i rire, he'i:

—Lázaro, esẽ katu, he'i onhe'ẽ hatã-vy.

⁴⁴Upe-ma ramo osẽ ou-vy omano va'ekwe. Onhenhugwãmba-ma ipy ipo ave ou-vy. Ohovami ra'e ao-py íxupe:

—Pejora katu íxugwi oho hagwã, he'i upe pygwa-pe Hesu.

Onhomb'o mbo'e-ma okwa-vy mburuvixa kwéry ojuka hagwã Hesu-pe

(Mt 26.1-5; Mc 14.1-2; Lc 22.1-2)

⁴⁵Ha heta oĩ judeu Marta pohuháry ou va'ekwe. Hesu rembiapo ohexa ramo, ojerovia tee-ma hese oiko-vy. ⁴⁶Ha ojerovia e'ỹ va'e katu oho jevy fariseu kwéry-pe omombe'u Hesu rembiapokwe. ⁴⁷Upe-ma ramo ojogweroaty fariseu kwéry pa'i ruvixa kwéry ndive:

—Jahexa e'ỹ va'e heta ojapo va'e Hesu. Mbava'e po jajapo-ta hese? ⁴⁸Anive erejapo teĩ koixagwa, ndaja'ei ramo íxupe, enterove ojerovia tee arã hese, he'i. —Aipo ramo, mburuvixa kwéry romano va'e omanda pohýi arã nhande-rehe kwéry. Ohundi arã Nhandejáry róga kakwaa nhamboete haty-py. Nhane retã ave ogwereco asy arã. Omosẽmba va'erã nhande ruvixa kwéry hekovia omanda mbaraeteve hagwã nhande-rehe, he'i ojõupe hikwái.

⁴⁹Upe ramo he'i íxupe kwéry Caifás. Upe ángo-py pa'i ruvixagwasu voi Caifás. Ha upéi he'i:

—Mba'eve ndapeikwaáiry voi peẽ, he'i. ⁵⁰—Pejeapysaka katu xe nhe'ẽ-rehe. Nhane retã retã gwive ogwereco asy ramo, naiporãi arã nhande-vy. Nhande-vy iporãve arã nhande rekovia peteĩ va'e omano ramo, he'i Hesu-rehe ojogweroaty va'e-pe.

⁵¹Upéa he'i-ma ramo nomombe'úi ojehegwigwa. Upe ángo-py oiko pa'i ruvixagwasu ramo. Upéa-gwi Hesu rekorã-rehe omotenonde uka íxupe Nhandejáry: “Judeu kwéry

rekovia omano va'erã Hesu" he'i ojehegwigwa e'ÿ va'e omombe'u-vy. ⁵² Ndaha'êi judeu kwéry rekovia mante omano va'erã Hesu. Entéro Nhandejáry re'ÿi kwéry opa-rupi osarambi va'ekwe rekovia ave omano va'erã. Henda henda-rupi peteixa ijoja hagwã oiko-vy omano va'erã Hesu.

⁵³ Upéa-gwi upe va'e áry gwive onhomb'e mbo'e-ma okwa-vy mburuvixa kwéry judeu va'e ojuka hagwã íxupe. ⁵⁴ Upéa-gwi ndogwatavéi-ma judeu kwéry oĩ ha-rupi. Oho oje'ói-vy tekwaty e'ÿ-koty. Efraim tetã-my oho. Upe-py gwemimbo'e kwéry ndive opyta.

⁵⁵ Ha upéi katu oiko-tama areteguasú páscoa héry va'e, Egito yvy-gwi judeu rembypy osê hagwe áry arete héry va'e. Ne'írã oiko jave arete, heta judeu oho Jerusalém-my. Gweko-py oho. Tenondeve oho onhemopotĩ uka hagwã Nhandejáry róga kakwaa-py. ⁵⁶ Ogwahê ramo upe-py osareko reko Hesu-rehe hikwái:

—Emombe'u katu ore-vy Hesu rehegwa nhe'ê. Ou-ta para'e. Tapa ndou mo'ãi katu Nhandejáry róga kakwaa-py, peteĩ teĩ he'i ojóupe Nhandejáry róga-py.

⁵⁷ Pa'i ruvixa kwéry fariseu ndive oipyhyse íxupe. Upéa-gwi he'i:

—Erekwaa ramo oimeha, emombe'u katu ore-vy, he'i Hesu-rehe omanda-vy hikwái.

12

Maria omohyakwã Hesu py

(Mt 26.6-13; Mc 14.3-9)

¹ Ha upéi katu oiko-ta areteguasú páscoa héry va'e. Seis áry rire oiko-ta. Upe ramo Hesu ogwahê oho-vy Betânia tetã'i-my. Upe-py oiko Lázaro Hesu remimoingovekwe. ² Upe-py ogwahê rire Hesu, omongaru porã íxupe. Ha Marta ogweroja íxupe hemi'urã oiko-vy. Heta Hesu karu irũ. Ipa'ũ-my ave okaru Lázaro. ³ Upe ramo Lázaro reindy Maria ogweru hyakwã porã tee va'e, nardo héry va'e. Hyru reheve peteĩ litro ogweru. Upe va'e hyakwã porã va'e hepy va'e. Upéi Maria onhohê Hesu py-rehe, omohyakwã-vy ipy. Upe rire ho'avuku-py oikyty ipy omokã hagwã. Ha ohasapa hyakwã. Ojohupa koty hyakwã. ⁴ Upe-ma ramo he'i Judas Iscariotes, Hesu mombe'uharã ipyhyharã-pe:

⁵ —Hepy eterei hyakwã va'e. Ma'erã nome'êi hepy-rehe ra'e? he'i. —Doze jasy omba'apo va'ekwe repy upe va'e. Ma'erã po nome'êi ra'e iporiahu va'e-pe hyakwã va'e repy? he'i mo'ã Judas hyakwã va'e-rehe.

⁶ Ndaha'êiry ome'êse-gwi iporiahu va'e-pe. Mmondaháry voi Judas. Pirapire ryrurehe onhangareko va'e. Ha hyru-py oĩ va'e omonda monda oiko-vy va'e.

⁷ Upe ramo he'i Hesu:

—Ani nde poxy teĩ Maria-rehe. Eheja taxe mohyakwã. Heko-rupi ha'e ou. Xe mohyakwãse rei amano e'ÿ ngatu. Upéa-gwi gweminhongatu omoĩ xe-rehe, he'i judeu rekoha-rehe. ⁸ —Oiko meme pene pa'ũ-rupi iporiahu va'e kwéry. Peme'êse ramo, peme'ê va'erã íxupe kwéry. Xe ae ndaiko are mo'ãi pene pa'ũ-rupi, he'i upe pygwa-pe Hesu.

Judeu kwéry onhomb'e mbo'e-ma Lázaro-pe ave ojuka hagwã

⁹ Ha upéi katu heta ijaty va'e, judeu kwéry va'e, ohendu Hesu oimeha Betânia tetã'i-my. Upéa-gwi oje'ói ohexa-vy. Lázaro-pe, Hesu remimoingovekwe rexa-vy ave oje'ói. ¹⁰⁻¹¹ Ha pa'i ruvixa kwéry katu oje'ói ohexa va'e ndojohu porã:

—Heta judeu ko nanhane moirũvéi-ma, he'i. —Hemimoingovekwe-gwi ojehesa rerova-ma oiko-vy Hesu-rehe. Ojerovia-magwi, ojehesa rerova-ma hese, he'i Hesu-rehe Lázaro-rehe ave.

Upéa-gwi onhomb'e mbo'e-ma Lázaro-pe ave ojuka hagwã hikwái.

Ogwahê ou-vy Jerusalém tetã-my Hesu; mburika ári ogwahê ou-vy

(Mt 21.1-11; Mc 11.1-11; Lc 19.28-40)

¹² (y 17-18) Iko'ê-my heta oĩ ijaty va'e Jerusalém-my oho va'ekwe, páscoa areteguasú-py oho va'ekwe. Upe ramo ohendu-ma Hesu rerakwã hikwái:

—Ogwahê-tama ou-vy Hesu, he'i ijaty va'e-pe Hesu rerakwã omombe'u-vy.

Upe-py oĩ Hesu rembiapo porã rexahare. Omoirũ ra'e Hesu-pe ohenói ramo Lázaro-pe oyta-gwi osê jevy hagwã. Omoingove jevy jave Lázaro-pe, omoirũ ra'e íxupe hikwái. Upéa-gwi omombe'u mbe'u herakwã. Ha upéi katu henduhare oho ohogwaitĩ-vy íxupe:

—Jahexa e'ỹ va'e opu'akaha-py ojapo kuri Hesu, he'i hese omombe'u-vy.

Upéa-gwi oho ohogwaitĩ-vy íxupe.

¹³Upe-ma ramo gwĩ henduhare oikyĩ heraha-vy pindo rogwe hakã reheve. Ohogwaitĩ-vy oho. He'i:

—Tonhemomba'egwasu katu Nhandejáry, he'i onhe'ẽ hatã-vy hikwái. —Nhandejáry réry-py ou va'e-pe tohovasa katu, he'i. —Nhande ruvixarã-pe tohovasa katu. Nhande Israel kwéry ruvixagwasurã-pe tohovasa, he'i Hesu-rehe onhe'ẽ hatã hatã-vy hikwái.*

¹⁴Ha upéi katu Hesu ojohu gwenagwã mburika ra'y ojeupi hagwã hi'ári. Upéixa ete omombe'u va'ekwe Nhandejáry kwatia nhe'ẽ Hesu rehegarã nhe'ẽ:

¹⁵“Ani pekyhyje teĩ, he'i Sião mygwa-pe, Pene ruvixagwasurã ko ogwahẽ-ma ou-vy mburika ári ou. Upéa-gwi ani pekyhyje teĩ”*

he'i Nhandejáry nhe'ẽ Jerusalém pygwa-rehe.

¹⁶Upéixa voi he'i va'ekwe Nhandejáry kwatia nhe'ẽ Hesu rekorã omombe'u-vy. Ha hemimbo'e ndoikwaái voi ra'e Hesu rekorã rehegwa nhe'ẽ. Mburika ári oho ramo, mbava'e-pe po he'ise upe va'e ndoikwaáiry voi. Ha onhembotuvixa mba'e rire katu Hesu, oikove jevy rire katu, imandu'a jevy Nhandejáry kwatia nhe'ẽ-rehe hikwái. Hesu rekorã rehegwa nhe'ẽ-rehe imandu'a jevy hikwái. Upe ramo:

—Nhandejáry kwatia he'i hagwe-rami oiko nipo ra'e Hesu-pe. Hesu-pe jajapo va'ekwe, Nhandejáry nhe'ẽ-rupi jajapo nipo ra'e íxupe, he'i omombe'u ojóupe hemimbo'e kwéry.

Ha mburika ra'y ári ou jave omboete ete Hesu-pe ijaty aty va'e kwéry. ¹⁷⁻¹⁸(-) ¹⁹Ha fariseu kwéry:

—Erehexa pa? Enterove va'e ko ojehesa rerovapa-ma hese hikwái. Ha ojehesa rerova hagwã hese ndikatúĩ jajoko, he'i ojóupe fariseu kwéry.

“Orohexas Hesu-pe” he'i judeu e'ỹ va'e grego-py onhe'ẽ va'e

²⁰Ha Jerusalém-py ogwahẽ ogwa'ẽ-vy heta eta va'ekwe areteguas mboeteha. Ipa'ũ-my oĩ ave gwĩ judeu e'ỹ va'e grego-py onhe'ẽ va'e. ²¹Upe ramo ou Filipe oĩ ha-py. Filipe Galiléia yvy pygwa voi. Betsaida tetã mygwa voi. Ha upéi:

—Mba'ejáry, orohexas Hesu-pe, he'i Filipe-pe.

Oporandu jevy jevy oho hagwã-rehe.

²²Upe ramo oho omombe'u André-pe. Upéi mokõive oho omombe'u Hesu-pe. ²³Inhe'ẽ ohendu ramo, he'i Hesu:

—Xe Nhande Ryke'y tee va'e. Ogwahẽ-ma anhemomba'egwasu ukaha óra, he'i. ²⁴—Amombe'u-ta peẽ-my anhetegwa tee va'e. Xejehegwa amombe'u-ta trigo ra'ỹi rehegwa nhe'ẽ-rami. Trigo ra'ỹi nhanhotỹ va'e yvy-py henhói hagwã. Henhói e'ỹ ramo trigo ra'ỹi mante oĩ. Peteĩ mante oiko. Ha henhói ramo katu ndoikovéi-ma ha'ỹigwe. Ndoikovéi ójehe. Henhói ijagwyje hagwã, onhembohetave hagwã, he'i. ²⁵—Upéixa ete gwekove-rehe hakate'ỹ va'e, ojehéte oiko va'e, onhehundipa rei va'erã hekove. Ndotopái va'erã gwekove repyrã. Ha gwakate'ỹ hagwã gwekove-rehe nopenái va'e katu ko yvy ári, omõi ngatu va'erã gwekove Nhandejáry ndive oiko opa e'ỹ reheve hagwã, he'i. ²⁶—Xe rembigwái ramo oikose va'e gwive taxe moirũ katu, he'i. —Upéixa ramo xe aime ha-rupi, xe ndive oiko va'erã ave xe rembigwái. Xe rembigwái va'e gwive omboete va'erã íxupe xe Ru, he'i upe pygwa-pe Hesu.

Kurusu-rehe omanotaha omombe'u Hesu

²⁷Ha upéi katu he'i jevy upe pygwa-pe Hesu:

—Ko'ánga katu ajepy'apy-ma xéjehe, he'i. —Ndaxe py'agwapyvéi-ma xéjehe. Mbava'e po ha'e-ta xe Ru-pe, ndaikwaái. Ha'e-ta para'e, Xe resende katu xe áry-py. Xe amano hagwã áry-py xe resende katu, ha'e-ta para'e. Nahániry. Xe resende katu, aipo nda'e

* 12:13 Sl 118.25-26 * 12:15 Zc 9.9

mo'áiry. Amano hagdā-ma agwahē aju-vy xe óra-py, he'i. ²⁸—Tomomba'egwasu uka nde réry, he'i Gwu-pe.

Upe-ma ramo ohendu yváy-gwi onhe'ē va'e:

—Xe réry amomba'egwasu-ma kuri. Áy amomba'egwasu jevy-ta, he'i upe pygwa-pe Túvy.

²⁹Ha ijaty va'e ohendu ave onhe'ē va'e. Hyapu va'e-rami ae ohendu inhe'ē:

—Hyapu-ma. Osunu-ma, he'i mo'ā yváy pygwa nhe'ē rendu-vy hikwái.

Outro he'i:

—Nhandejáry rembigwái yváy pygwa omombe'u íxupe, he'i mo'ā onhe'ē va'ekwe-rehe.

³⁰Upéixa ramo he'i Hesu:

—Ndaha'éiry xe-vy anho omombe'u va'ekwe. Peē-my ave omombe'u onhe'ē va'e, he'i.

³¹—Áy ogwahē-ma áygya óra. Yvypóry-pe ahexa uka-tama hekoha vaiha. Ha yvypóry ruvixa-pe amosē-tama imondo-vy, he'i anháy ruvixa-rehe. ³²—Ha xe ko, ko vvy-gwi xe rupi rire kurusu-rehe, anhemoirú uka-ta entéro kente kwéry-pe, he'i ijaty va'e-pe Hesu.

³³Upéa he'i kurusu-rehe omanotaha omombe'u-vy.

³⁴Ha upéi he'i íxupe ijaty va'e kwéry:

—Nhandejáry kwatia nhe'ē, orohendu va'e, he'i no'ā-rami, “Nomanói va'erā Cristo. Oiko meme va'erā opa e'y-rehe” he'i. Upéixa ramo ma'erā, “Ohupi va'erā omoí-vy ko vvy-gwi Nhande Ryke'y tee va'e-pe” ere kuri ore-vy? Kiva'e po ko Nhande Ryke'y tee va'e, ndoroikwaí, he'i íxupe hikwái.*

³⁵Upéi he'i Hesu:

—Sapy'a apombo'eve-ta ohesape va'e-rami. Ha upe rire katu, aha jevy-ma va'erā, he'i. —Pene pa'ü-rupi xe aime jave, arakatu-rupi oiko va'e-rami tapeiko kena. Arakatu-rupi peiko ramo, ndapeikói va'erā hesapyso e'y oiko va'e-rami. Pytū-rupi oiko va'e gwive ndohexáiry gwaperā. ³⁶Apoheape jave pejerovia katu xe-rehe. Upéixa peiko-ma va'erā arakatu-rupi meme oiko va'e-rami, he'i ijaty va'e-pe Hesu.*

Judeu kwéry ndogweroviáiry Hesu nhe'ē

Onhe'ē oí-vy rire onhemo'ā-ma oho-vy Hesu. Ijaty va'e-gwi okanhy-ma oho-vy. ³⁷Heta jahexa e'y va'e gwive hexapyrā-rupi voi ojapo-ma. Ohexa jepe, ndojerovia etéi voi hese hikwái.

³⁸Yma va'ekwe omoí kwatia-rehe. Hesu rekorā omoí va'ekwe Nhandejáry nhe'ē-py omombe'u va'ety héry va'e Isaías. Ohai va'ekwe no'ā-rami:

“Kiva'e po ogwerovia nhane remimombe'u, xe Járy? Kiva'e-pe po ohexa uka Nhandejáry ipu'akaha?”*

he'i Nhandejáry nhe'ē. ³⁹Upéa-gwi hembihaike-rami ndogweroviáiry ave Hesu nhe'ē hikwái.

Ohai jevy va'ekwe Isaías no'ā-rami:

⁴⁰“Ogwerovia e'y va'e-pe omoingo Nhandejáry pytū-rupi. Inharandu porārāgwé oipe'apa íxugwi. Upéa-rehe hesapyso e'y va'e-rami oiko. Nahi'arandu porāi voi. Ndojeréi Nhandejáry-rehe omoirú hagdā íxupe, Nhandejáry ombogwera hagdā íxupe kwéry”*

he'i Nhandejáry nhe'ē. Upéixa ete ohai va'ekwe judeu rekorā Isaías amyri. Upéa-gwi ohai hagwe-rami ndikatúí ojerovia Hesu-rehe hikwái.

⁴¹Ha Isaías upéte ojehexa uka va'ekwe Hesu rekoha. “Tuvixa mba'e” he'i Hesu rexa-vy. Upéa-gwi omoí va'ekwe kwatia-rehe Hesu rehegwarā.

⁴²Judeu kwéry ndogweroviái ramo jepe, heta oí mburuvixa judeu va'e ojerovia joty hese. Ha atýra-py katu nomombe'úiry ojeroviaha. Ikyhyje fariseu kwéry-gwi. Nonhemosē ukaséi ojeporahéi haty haty-gwi. ⁴³Onhemboete ukase ramo jepe Nhandejáry-pe, ojehexa uka porāse ave oiko-vy teko rei-pe. Upéa-gwi nomombe'úiry ojeroviaha atýra-py.

* 12:34 Sl 110.4; Is 9.7; Ez 37.25; Dn 7.14 * 12:36 Jo 1.4-5; 3.19,21; 8.12; Ef 5.8-13; 1 Ts 5.4-5; 1 Jo 1.5-7 * 12:38 Is 53.1 * 12:40 Is 6.10

“Xe *nhe'ẽ* mbojevý va'e gwive, hekoha vai mombe'uharã oĩ ave íxupe” he'i Hesu

⁴⁴Ha upéi katu onhe'ẽ hatã Hesu:

—Xe-rehe ojerovia tee va'e gwive ojerovia xe mbouhare-rehe ave. Ndaha'éiry xe-rehete anho ojerovia va'e, he'i. ⁴⁵—Xe reko ohexa kwaa va'e gwive, xe mbouhare reko ohexa kwaa ave. ⁴⁶Yvypóry kwéry-pe ahesape hagdã aju va'ekwe xe-rehe ojerovia tee va'e gwive oiko e'y hagdã pytũ-rupi. ⁴⁷Xe remimombe'u renduse e'y va'e gwive, namombe'u mo'ãi íxupe hekoha vaiha. Ndajúi va'ekwe yvypóry rekoha vai mombe'u-vy. Aresende-vy ae aju va'ekwe, he'i. ⁴⁸—Ha xe *nhe'ẽ* mbojevý va'e gwive, xe *nhe'ẽ* nohenduséi va'e gwive, oikwaa va'erã gwekoha vaiha. Xe aju jevytaha áry-py oikwaa va'erã gwembiapo vaikwe. Áy xe remimombe'u nohenduséi-gwi ombohasa asy va'erã íxupe kwéry Nhandejáry, he'i.

⁴⁹—Xe jehegwigwa namombe'úi va'e. Xe Ru *nhe'ẽ* ae amombe'u. Xe Ru xe mbouhare omombe'u xe-vy xe *nhe'ẽ*rã. Xe remimombe'urã ave omombe'u xe-vy. Upéa-gwi xe aju jevytaha áry-py xe *nhe'ẽ* nohenduséi-gwi ojekwaapa va'erã íxupe hembiaapo vaikwe. ⁵⁰Ha xe Ru omombe'u va'e xe-vy xe *nhe'ẽ* katu ohendu va'e gwive amoingove va'erã íxupe Nhandejáry ndive opa e'y reheve oiko hagdã. Xe jehegwigwa *nhe'ẽ* namombe'úi. Xe *nhe'ẽ*rã xe Ru omombe'u va'ekwe ae amombe'u voi xe, he'i Hesu upe pygwa-pe.

13

Hesu oipyhéi peteĩ teĩ gwemimbo'e kwéry-pe

¹Ha upéi katu ogwahẽ-tama areteguasú héry va'e páscoa. Ogwahẽ-ma Hesu omanoha óra oheja hagdã ko yvy oho-vy. Ojeupi jevy-tama oho-vy Gwu oiko ha-py. Upéa oikwaa voi Hesu. Ko yvy pygwa he'yí va'e hembiahyhu meme voi. Meme ete ohayhu íxupe kwéry. Omano peve ohayhu.

²Okaru jave gwemimbo'e kwéry ndive, anháy ruvixa anhayguasú ombo'e ra'e Simão ra'y Judas Iscariotes-pe. Omomandu'a uka ra'e Hesu pyhyharã-rehe:

—Emombe'u katu Hesu oimeha a-py. Ipyhyharã-pe emombe'u katu, he'i ra'e íxupe anhayguasú.

³Ha Nhandejáry omoingo ra'e Hesu-pe enterove va'e ruvixarã. Upéa oikwaa voi Hesu. Nhandejáry-gwi voi ou ra'e. Ko'ánga oho jevy-tama Nhandejáry oiko ha-py. Upéa oikwaa voi ave Hesu. ⁴Upe-ma ramo opu'ã omboi oao jo'a. Oipyhy jepykytyhaty. Gwumby-rupi omoi oku'a jopy hagdã. ⁵Upéi hyrurã-py y onhohẽ oipyhéi-ma peteĩ teĩ gwemimbo'e kwéry-pe oipyhéi. Peteĩ teĩ oipyhéi rire omokã jepykytyhaty-py. ⁶Ogwahẽ ramo Simão Pedro renda-py:

—Nde ko xe pyhéi-ta tipo, xe Járy? he'i íxupe oporandu-vy.

⁷—Ko'ánga ndereikwaái voi mbava'e po xe ajapo-ta nde-rehe. Ha nde-vy oikwaa ukataha óra-py ereikwaa va'erã, he'i Simão Pedro-pe.

Upe ramo he'i:

⁸—Xe ko apa e'y ngatu nde ndaxe pyhéiry va'erã, he'i íxupe Pedro.

—Ndoropyhéiry ramo, naxe moirũ mo'ãvéi-ma voi nde, he'i Pedro-pe Hesu.

⁹—Aipo ramo, he'i —xe pyhéi katu, xe Járy. Upéi xe pohéi mani ave, he'i. —Xe akáhéi mani ave, he'i íxupe Pedro.

¹⁰Upe ramo Hesu he'i:

—Ne *nhe'ẽ* katu ndajapo mo'ãi. Jajahu rire, nhane potĩ-ma voi, he'i. —Nhande jajahu rire, nhande rete gwive ipotĩ. Upéixa ramo nhande py mante jaikyty. Upéixa ete peteĩ teĩ pende py'a onhemopotĩ-ma áy. Ha peteĩ va'e katu opyta ipy'a ky'a reheve.

¹¹Upéa he'i kiva'e po oikwaa uka-ta ipyhyharã-pe oikwaa-gwi voi.

¹²Ha upéi katu oipyhéi rire omonde jevy oao jo'a omoirũ jevy hagdã íxupe kwéry:

—Peikwaa tipo mbava'e ajapo kuri pende-rehe, he'i. ¹³—Peẽ, “Ore mbo'eháry” peje voi xe-rehe. “Ore járy” peje xe-rehe. Peje porã voi, he'i. —Pene mbo'eháry voi xe. Pende járy ave voi xe, he'i. —Peje porã voi, he'i. ¹⁴—Pende járy jepe, pene mbo'eháry jepe apopyhéi joty kuri, he'i. —Upéa-gwi iporã pejopyhéi. ¹⁵Oropyhéi ranhe xe reko ra'ã hagdã peẽ, peiko hagdã-ma xe rekoha-rupi, penhopytygwõ hagdã tembigwái-rami. ¹⁶Amombe'u-ta

peẽ-my anhetegwa tee va'e. Ani, "Hembigwái voi xe jepe, xe járy-gwi tuvixave va'e voi xe" peje mo'ã pende py'apy-py. "Hemimondo voi xe jepe, xe mondohare-gwi tuvixave va'e voi xe" ani aipo peje mo'ã pende py'apy-py.* ¹⁷ Pene rembiaporã peikwaa voi. Upéa pejapo ramo pevy'a va'erã, he'i.

¹⁸—Xe rembiporavo voi peẽ apokwaa voi. Ha pene pa'ũ-rupi oĩ peteĩ hembiaipo porã e'ỹ va'e. Ovy'a va'erã, nda'éiry hese. Yma gwive he'i va'ekwe Nhandejáry nhe'ẽ upe va'e-rehe:

"Xe karu irũ omoirũ-ma xe a'e e'ỹha-pe omoirũ"

he'i Nhandejáry nhe'ẽ. Upéa-gwi Nhandejáry nhe'ẽ he'i hagwe-rami omoirũ-ma kuri xe a'e e'ỹha-pe xe irũ, he'i Judas Iscariotes-rehe. ¹⁹—Upéa ãy ha'e-ma peẽ-my peje hagwã xe-rehe, "Nhandejáry voi Hesu nipo ra'e" peje hagwã xe-rehe. Ne'íra ojehu xe-vy mba'eva. Ha ojehu rire katu, peje va'erã xe-rehe, "Hesu oikwaa ra'e ojehegwa nhe'ẽ ra'e. Nhandejáry voi Hesu nipo ra'e" peje va'erã xe-rehe, he'i.* ²⁰—Amombe'u-ta peẽ-my anhetegwa tee va'e. Xe remimondo omogwahẽ va'e, xe mogwahẽ ave. Ha xe mogwahẽ va'e xe mbouhare-pe omogwahẽ ave, he'i gwemimbo'e kwéry-pe Hesu.

"Pene pa'ũ-rupi peteĩ va'e xe momba'u va'erã xe pyhyharã-pe" he'i gwemimbo'e kwéry-pe Hesu

²¹ Upéa he'i rire, ndaipy'agwapyvúi-ma Hesu oiko-vy. Omombe'u porã gwemimbo'e kwéry-pe:

—Amombe'u-ta peẽ-my anhetegwa tee va'e. Pene pa'ũ-rupi peteĩ va'e xe momba'u va'erã xe pyhyharã-pe, he'i íxupe kwéry.

²² Upe ramo osareko ojéhe hikwái. Kiva'e-rehe po he'i Hesu ndoikwaáry. ²³ Ha xe katu Hesu remimbo'e, ijyke-rehe agwapy va'e. Xe Hesu rembiayhu voi. ²⁴ Upe ramo Simão Pedro xe renói arepara hagwã hese. Upéi he'i:

—Kiva'e-rehe tipo ere kuri, eporandu katu íxupe, he'i xe-vy Pedro.

²⁵ Upe ramo ojyke reheve aĩ ramo, ha'e Hesu-pe:

—Kiva'e-rehe tipo ere kuri, xe Járy —ha'e Hesu-pe anho aporandu-vy.

Ha Hesu he'i:

²⁶—Upe ame'ẽ-ta va'e íxupe mbojape pehẽgwe amoakỹ rire. Upe va'e-pe ame'ẽ-ta, he'i xe-vy Hesu.

Upe-ma ramo oipyhy-ma mbojape. Hyru-py omoakỹ rire ome'ẽ Simão Iscariotes ra'y Judas-pe.

²⁷ Upe-ma ramo Judas oipyhy rire íxugwi mbojape, oheko me'ẽ-ma íxupe anháy ruvixa anhaygwasu. He'i íxupe Hesu:

—Ejapo pya'e katu erejapose va'e, he'i Judas-pe.

²⁸ Ikaru irũ mbava'e-pe po he'ise Hesu ndoikwaái voi. ²⁹ Ha Judas katu pirapire ryru-rehe onhangareko va'e. Upéa-gwi he'i rei hese opy'apy-py hikwái: "Ojogwa-ta para'e nhane remi'urã" he'i rei hese. "Ome'ẽ-ta para'e iporiahu va'e-pe" he'i rei hese opy'apy-py.

³⁰ Ha Judas mbojape oipyhy rire-ma íxugwi, pya'e osẽ oho-vy. Pytũ-ma ramo osẽ oho-vy.

"Xe apohayhuha-rami, pejoyayhu katu peẽ ave" he'i Hesu gwemimbo'e kwéry-pe

³¹ Osẽ rire, he'i jevy Hesu gwemimbo'e kwéry-pe:

—Ko'ánga xe Nhande Ryke'y tee va'e, aikwaa uka-ta peẽ-my xe rekoha porã tee. Xe-rehe ohexa kwaa va'e, ohexa kwaa ave Nhandejáry-rehe hekoha porã tee va'e. ³² Nhandejáry rekoha porã tee aikwaa-gwi, Nhandejáry oiko ha-rupi ohexa uka-ta enterove ohexapa va'erã xe rekoha porã tee. ãy katu xe rekoha porã tee ohexa uka-tama, he'i. ³³—Naxe are mo'ái pene pa'ũ-rupi, xe ra'y kwéry. Aha rire, xe reka va'erã. Ko'ánga xe ha'e hagwe-rami judeu kwéry-pe, amombe'u-ta peẽ-my. Xe aha hagwã-py ndikatúi peho ave, he'i.

³⁴—Ãy ame'ẽ-ta peẽ-my pende reko pyahurã: Pejoyayhu rei katu. Xe apohayhuha-rami, pejoyayhu katu peẽ ave. ³⁵ Pejoyayhu peiko-vy ramo, "Hesu nhe'ẽ renduha tee voi nipo ra'e" entéro he'i va'erã pende-rehe.*

* 13:16 Mt 20.24-28; 23.8-12; Mc 9.35; Fp 2.3-7; 1 Pe 5.3

* 13:19 Sl 41.9; Mt 26.20-25; Mc 14.17-21; Lc 22.21-23

* 13:35 Mt 22.39; Jo 15.12; Gl 5.14; 1 Pe 1.22; 1 Jo 3.11; 4.7

“Ne'írã osapukáí ramo gáju, ere-ta xe-rehe mbohapyha, Ndaikwaái voi íxupe, ere-tama xe-rehe” he'i Pedro-pe Hesu

³⁶Ha upéi katu oporandu íxupe Simão Pedro:

—Kipy tipo ereho-ta, xe Járý? he'i Hesu-pe.

—Xe aha hagwã-py ndikatúí ereho äy. Ha upe rire katu ereho va'erã xe rapykwéri, he'i Pedro-pe.

³⁷—Ma'erã tipo, xe Járý, äy voi nderehejáí aha nde rapykwéri, he'i íxupe. —Nde rekovía amano hagwã-rami aï, he'i íxupe Pedro.

³⁸—Upéa ere ramo, anhetegwa tipo ere xe-vy? he'i. —Amombe'u-ta nde-vy anhetegwa tee va'e. Ne'írã osapukáí ramo gáju, ere mo'ã va'erã xe-rehe mbohapyha, “Ndaikwaái voi íxupe” ere mo'ã va'erã xe-rehe, he'i Pedro-pe Hesu.*

14

“Xe ko Nhandejáry rape rexa ukaha voi” onhe'ë paha-vyma he'i ójehe Hesu

¹Upe ramo Hesu he'i jevy gwemimbo'e kwéry-pe:

—Ndikatuvéi xe moirũ ramo jepe, anive pende py'agwapy e'ÿ peiko-vy. Pejerovia katu peiko-vy Nhandejáry-rehe. Pejerovia katu peiko-vy xe-rehe ave, he'i.

²—Xe Ru oiko ha-py heta oï jaiko hagwã. Ha ndaipóri ramo ra'e pene renagwã katu, amombe'u ave arã ra'e peë-my ra'e. Ha aha-tama amoï porã porã hagwã pene renagwã, he'i. ³—Amoï porãmba rire katu, aju jevy arã pende-rehe apogweraha hagwã xe aiko ha-py peë ave peiko hagwã xe ndive.* ⁴Xe agwahë hagwã-py peikwaa voi. Xe raperã peikwaa ave, he'i gwemimbo'e kwéry-pe Hesu.

⁵Upéi Tomé he'i:

—Kipy po eregwahë-ta, ndoroikwaái voi, ore Járý. Upéa-gwi ndikatúí oroikwaa nde raperã, he'i íxupe Tomé.

⁶Upéi Hesu he'i:

—Xe ko Nhandejáry rape rexa ukaha voi, he'i ójehe. —Xe apu e'ÿ va'e. Anhetegwa mante mombe'uha voi xe, he'i ójehe. —Apomoingove va'e xe. Pene moingoveha voi xe, he'i ójehe Hesu. —Ojéhegwi rei nogwahëi va'erã oho-vy xe Ru oiko ha-py avave. Ha xe ae araha ramo katu íxupe, ogwahë va'erã oho-vy xe Ru ha-py.* ⁷Xe-rehe pehexa kwaa ramo ra'e, xe Ru-rehe pehexa kwaa ave arã ra'e. Ha ko'ánga katu pehexa kwaa-ma hese. Peikwaa-ma hekoha, he'i Tomé-pe.

⁸Upéi he'i Filipe:

—Ehexa uka katu ore-vy nde Ru, ore Járý. Xe remiporandu va'e orohexa-ma ramo, orovya arã. Naporanduvéi-ma arã nde-vy, he'i íxupe Filipe.

⁹Upe ramo Hesu he'i:

—Xe are-ma voi pene pa'ũ-rupi aiko-vy. Ma'erã nderehexa kwaái vyteri xe-rehe, Filipe? Xe-rehe ohexa kwaa va'e, xe Ru-rehe ohexa kwaa-ma ave. Oikwaa-ma ave xe Ru-pe. Upéa-gwi ma'erã, “Ehexa uka katu ore-vy nde Ru” ere joty xe-vy. Ma'erã xe Ru erehexase joty? he'i. ¹⁰—Xe reja e'ÿha voi xe Ru. Hembieja e'ÿ voi xe. Peteixa oronhomoirũ va'e voi, he'i. —Ma'erã po ndereroviái xe nhe'ë, he'i Filipe-pe.

Upéi he'i jevy gwemimbo'e kwéry-pe:

—Ndaha'éí xe jehegwigwa xe remimombe'u va'e peë-my. Xe Ru ae Peteixa xe moirũ va'e. Xe Ru ae ojapo uka xe-vy xe rembiaporã. ¹¹Peteixa xe moirũ va'e xe Ru. Ha Peteixa amoirũ va'e íxupe. Perovia katu xe nhe'ë. Ha ndaperoviaséi ramo jepe, pehexa-ma niko xe rembiapo porã. Upéa-rehe xe rerovia katu, he'i.* ¹²—Amombe'u-ta peë-my anhetegwa tee va'e. Aha jevy-ta xe xe Ru oiko ha-py. Upéa-gwi xe-rehe ojerovia-ma oiko-vy va'e gwive, aipytygwõ va'erã íxupe kwéry. Xe rembiapo-rami hembiaapo porã va'erã. Hembiaapo porãve ráve va'erã katu aipytygwõ ramo íxupe, he'i.

* 13:38 Mt 26.31-35; Mc 14.27-31; Lc 22.31-34
Jo 10.30; Cl 2.9

* 14:3 2 Co 5.1; Ap 21.1-4

* 14:6 At 4.12; Ef 2.18; 3.12

* 14:11

¹³—Oime raë va'e-rehe xe réry-py pejerure ramo, xe réry pehenói ramo, ajapo va'erã peë-my, aikwaa uka hagwã xe Ru rekohe porã tee peë-my. ¹⁴Oime raë va'e-rehe pejerure ramo xe réry-py, xe-rehe pejerovia-gwi, ajapo va'erã peë-my, he'i gwemimbo'e kwéry-pe Hesu.*

“Xe rekovia ome'ë va'erã peë-my pene pytygwōharã pene ndive oiko meme va'erã” he'i Hesu

(Jo 7.38-39; 16.5,7,13; At 2.2-4; Rm 5.5)

¹⁵Upéi he'i jevy Hesu:

—“Xe rembiayhu va'e voi Hesu” peje ramo xe-rehe, xe nhe'ë pejapo-ma va'erã, he'i.

¹⁶—Xe nhe'ë pejapo ramo, xe ko ajerure va'erã xe Ru-pe pende-rehe. Xe rekovia ome'ë va'erã peë-my pene pytygwōharã. Pene ndive oiko meme hagwã ome'ë va'erã peë-my. ¹⁷Upe va'e hemime'ërã Nhe'ë Marangatu tee va'e voi, anhetegwa tee va'e mombe'uha voi ha'e. Ha teko rei-pe katu nogwahë mo'airy ou-vy Nhe'ë Marangatu tee va'e. Ndohexa kwaái hese teko rei. Ndoikwaairy íxupe. Ha peë katu peikwaa voi íxupe. Pene ndive oiko Nhe'ë Marangatu tee va'e. Pende py'apy-py oiko va'erã, he'i.

¹⁸—Pene tyre'y hagwã ndapoheja mo'ái. Pene renda-py aju jevy va'erã, he'i. ¹⁹—Áy ndaxe rexa are mo'ái ko yvypóry kwéry. Upe rire ndaxe rexa mo'ávéi jevy-ma. Ndaxe rexái ramo jepe teko rei, peë katu xe rexa joty va'erã. Xe aikove jevy-ma va'erã. Upéa-gwi xe jave peikove ave va'erã peë. ²⁰Xe aikove jevytaha áry-py peje va'erã xe-rehe, “Peteixa omoirũ nipo ra'e Gwu-pe. Peteixa nhamoirũ nipo ra'e Hesu-pe. Peteixa nhane moirũ nipo ra'e Hesu” peje va'erã xe-rehe, he'i. —Nhanhomoirũha peë peikwaa porã va'erã voi, he'i.

²¹—Xe nhe'ë renduha, xe nhe'ë apoha, xe rayhuha voi upe va'e. Ha xe rayhu va'e, ohayhu ave va'erã íxupe xe Ru ave. Xe ave ahayhu ave va'erã íxupe. Ajekwaa uka ave va'erã íxupe, he'i gwemimbo'e kwéry-pe Hesu.

²²Upe-ma ramo oporandu íxupe Judas, ndaha'úi upe Judas ipyhy ukaharã:

—Ma'erã po nderejekwaa uka mo'ái entéro yvypóry-pe, he'i íxupe. —Ma'erã po ore-vy anho erejekwaa uka-ta, ore Járy? he'i íxupe Judas oporandu-vy.

²³Upéi Hesu he'i íxupe kwéry:

—Xe rayhu va'e gwive ohendu va'erã xe nhe'ë. Ohayhu va'erã íxupe xe Ru ave. Upéa-gwi orogwahë va'erã íxupe oroju-vy. Hendive oroiko va'erã, he'i Gwu-rehe, ójehe ave.

²⁴—Ha xe rayhu e'y va'e gwive, nohendu mo'ái xe nhe'ë. Ha xe remimombe'u peë-my ndaha'úi xe jehewigwa. Xe Ru xe mbouhare remimombe'u ae amombe'u peë-my, he'i.

²⁵—Upe va'e peë-my xe remimombe'u voi pene pa'ũ-rupí aime jave.

²⁶Ha ndaikovéi ramo, pene mbo'e va'erã pene pytygwōharã. Nhe'ë Marangatu tee va'e voi upe va'e. Upe va'e xe Ru remimbourã xe réry-py voi. Entéro xe-rehe omombe'u va'ekwe-rehe gwive, entéro xe remimombe'ukwe-rehe ave pene momandu'a uka va'erã, he'i.*

²⁷—“Tereho katu nde py'agwapy reheve” he'i rei teko rei. Ha xe katu nda'e réry upéixa. Orombopy'agwapy-ta. Xe py'agwapyha-rami orombopy'agwapy-ta. Upéa-gwi anive pene py'agwapy e'y tei. Anive pekyhyje tei, he'i.* ²⁸—“Aha jevy-ta. Ha upe rire katu aju jevy-ta pene ndive apyta hagwã” ha'e kuri peë-my. Upéa pehendu voi. Áy xe rayhu tee ramo, pevy'a arã ra'e. Xe Ru ko tuvixave va'e xéhegwi. Aha-ta xe Ru-pe agwahë. Upéa-gwi aha jevy ramo jepe, pevy'a arã ra'e. ²⁹Aha e'y reheve amombe'u-ma peë-my xe aha hagwã. Aha rire-ma katu, aipota, “Anhetegwa voi nipo ra'e hemimombe'u” peje va'erã xe-rehe pene mandu'a-vy. Upéa-gwi amombe'u áy xe aha hagwã peë-my. ³⁰Áy ogwahë-ta ou-vy anhaywasu gwí Nhandejáry-rehe ija'e'yha-rehe omanda va'e voi. Upéa-gwi nanhomongeta puku mo'ái pene ndive. Ndaipu'akái xe-rehe anhaywasu. Xe ndaikóiry inhe'ë-rupí. Xe Ru nhe'ë-py ae aiko. ³¹Aipota teko rei oikwaa xe ahayhuha xe Ru-pe. Upéa-gwi xe Ru he'i va'e gwive ajapo-ta inhe'ë, he'i. —Nhapu'ã katu ko'a-gwi jaha, he'i.

* 14:14 Mt 18.19-20; Mc 11.24; Cl 11.9-10; Jo 15.7; 16.23; 1 Jo 5.14-15

* 14:26 1 Co 2.12

* 14:27 Fp 4.7; Cl 3.15

15

“Uva máta tee va'e he'ise xe-rehe” he'i ójehe Hesu

¹Upéi he'i jevy gwemimbo'e kwéry-pe Hesu:

—Amombe'u-ta peẽ-my xe rehegwa nhe'ẽ uva máta rehegwa nhe'ẽ-rami. Uva máta tee va'e he'ise xe-rehe. Uva máta járy he'ise xe Ru-rehe. ²Hakã hi'a e'y va'erã gwive oipe'a. Uva máta-gwi oipe'a. Ha hakã hi'a porã va'erã katu oheja íxupe. Hakã gwyre mante oipe'a íxugwi. Hi'a porãve hagwã omopotí íxupe, he'i. ³—Upéixa pene potí-ma pende py'a-py. Xe remimombe'u pehendu va'e gwive pene potí-ma voi pende py'a-py. ⁴Xe moirũ katu peiko-vy peteixa. Ha xe ave peteixa oromoirũ-ta. Imáta-gwi oipe'a hakã va'e-rami upe va'e hakã ndahi'áiry. Upéixa ete naxe moirũvéi-ma ramo, napene rembiapo porãvéi-ma va'erã. Mba'eve ndapejapovéi-ma va'erã, he'i.

⁵—Ha uva máta he'ise xe-rehe. Pende-rehe he'ise uva rakã. Peteixa xe moirũ va'e, xe ave amoirũ íxupe va'e, upe va'e heta hembiaapo porã porã va'erã hi'a porã porã oĩ va'e-rami. Xe e'y reheve mba'eve ete voi ndapejapo mo'ávéi-ma va'erã, he'i. ⁶—Ha peteixa xe moirũ e'y va'e katu hi'a e'y va'e rakã-rami onhemombo va'erã. Ipiru va'erã. Ipiru rire omboaty va'erã ohapy hagwã-py, he'i. ⁷—Peteixa xe moirũ ramo, pende py'a-py oiko ramo xe nhe'ẽ, oime raẽ va'e-rehe pejerure ramo katu, ome'ẽ va'erã peẽ-my. ⁸Pene rembiapo porã porã ramo, ohexa kwaa va'erã xe Ru-rehe hekoha porã tee. Upéixa ramo pene rembiapo porã ramo, xe remimbo'e ramo peiko va'erã. ⁹Xe Ru xe rayhuha-rami, xe ave apohayhu peẽ-my. Pene mandu'a meme katu apohayhuha-rehe. ¹⁰Xe nhe'ẽ pehendu peiko-vy ramo, pene mandu'a meme va'erã apohayhuha-rehe. Upéixa voi xe Ru nhe'ẽ ahendu-gwi xe mandu'a meme xe rayhuha-rehe, he'i.

¹¹—Upéa ha'e-ma peẽ-my pevy'a hagwã. Xe avy'aha-rami aipota pevy'a ave. Pevy'apa hagwã peiko-vy ha'e-ma peẽ-my.

¹²Áy ha'e-ta peẽ-my: Pejohayhu katu peiko-vy. Apohayhuha-rami pejoyhayhu katu, he'i.*

¹³—Oirũ rekovia ojejuka uka va'e, ohayhu tee rei oirũ-pe. Ndoikói ohayhuve va'e, he'i. ¹⁴—Ha xe irũ voi peẽ. Xe nhe'ẽ pehendu ramo xe irũ tee voi peẽ. ¹⁵Xe rembigwái, nda'evéi-ma pende-rehe. Mbava'e po ojapo ijáry ndoikwaái voi hembigwái. Ha xe Ru nhe'ẽ ahendu va'ekwe gwive, amombe'u-ma peẽ-my. Upéa-gwi, Xe rembigwái, nda'evéi-ma pende-rehe. Xe irũ tee-py ae apohenói.

¹⁶Ndaxe poravóiry va'ekwe pene mbo'eharã. Apoporavo va'ekwe ae xe irũrã. Ame'ẽ va'ekwe peẽ-my pene rembiaporã hetave hi'a va'e-rami peiko hagwã. Aipota pende rekoha porã porã meme opa e'y-rehe hi'a meme va'e-rami. Ndaipotái hesarái rei pende rekoha porã-rehe. Upéixa ramo oime raẽ va'e-rehe pejerure ramo xe réry-py ome'ẽ va'erã peẽ-my.* ¹⁷Ha'e jevy-ta peẽ-my, Pejohayhu katu peiko-vy, ha'e, he'i gwemimbo'e kwéry-pe Hesu.

“Ndaija'úi pende-rehe teko rei” he'i Hesu gwemimbo'e kwéry-pe

¹⁸Upe ramo he'i jevy gwemimbo'e kwéry-pe Hesu:

—Ha teko rei katu ndaija'úi xe-rehe. Áy ndaija'e mo'ái pende-rehe. Ndaija'úi ramo pende-rehe, pene mandu'a katu xe-rehe ija'e'y hagwe-rehe. ¹⁹Teko rei reko-rupi peiko ramo ra'e, gwe'yí-rami pende rayhu arã ra'e. Ha apoporavo va'ekwe ndapeikovéi-ma hagwã teko rei reko-rupi. Ndapeikoví teko rei re'yí va'e-rami. Upéa-gwi ndaija'úi pende-rehe teko rei, he'i. ²⁰—Ha'e kuri peẽ-my, Ani, “Hembigwái jepe xe, xe járy-gwi tuvixave va'e voi xe” peje mo'ã pende py'apy-py pendéjehe. Ani pende resarái ha'e va'ekwe-rehe. Xe rereko asy hagwe-rami, pende rereko asy ave va'erã. Xe rendu hagwe-rami, pene nhe'ẽ ave ohendu va'erã. ²¹Teko rei ndoikwaái xe mbouhare-pe. Upéa-gwi koixagwa gwive ojapose va'e ojapo va'erã pende-rehe. ²²Ndajúi ramo ra'e, namombe'úi ramo yvypóry-pe ra'e, ndojekwaái arã ra'e ipy'a ky'aha. Ha ko'ंगा katu, “Ndajai kwaái voi nhande py'a ky'aha” ndikatuvéiry he'i ójehe. Hekoha vaiha amombe'u teko rei-pe. ²³Xe-rehe ndaija'úi

* 15:12 Mt 22.39; Jo 13.34; Gl 5.14; 1 Pe 1.22; 1 Jo 3.11; 4.7

* 15:16 Rm 8.29; Ef 1.4; 1 Ts 1.4; 1 Pe 1.2; 2.9

va'e xe Ru-rehe ndaija'íei ave. ²⁴ Ipa'ũ-rupi xe rembiapo porã porã xeixagwa ojapo va'e ndaipóri. Upéa rehegwa ndajapói ramo ra'e, ndaipya ky'ái arã ra'e hikwái. Ha ko'ánga katu xe-rehe ohexa kwaa ramo jepe, ndaija'éiry rei xe-rehe. Xe-rehe ndaija'éiry jave xe Ru-rehe ndaija'éiry ave, he'i.

²⁵—Yma va'ekwe he'i Nhandejáry kwatia nhe'ê judeu kwéry ohendu va'e. Áygwa rekorã omombe'u-ma voi va'ekwe: “Ija'e'y rei xe-rehe” he'i Nhandejáry nhe'ê áygwa rekorã mombe'u-vy. Upéa-gwi hembihaike-ramima ija'e'y rei xe-rehe hikwái, he'i.^{*}

²⁶—Ha pene pytygwoharã Nhe'ê Marangatu tee va'e xe Ru gwigwa voi, anhetegwa tee va'e mombe'uha voi. Peê-my xe remimbourã voi upe va'e. Xe Ru-gwi xe remimbourã voi. Ou ramo xe mombe'u va'erã. “Anhetegwa voi” he'i xe-rehe. ²⁷ Ha peê katu xe anhepyrũ xe rembiapo gwive áy peve xe moirũ-ma peiko-vy. Upéa-gwi xe mombe'u va'erã peê ave, he'i gwemimbo'e kwéry-pe Hesu.

16

¹ Upe ramo he'i jevy gwemimbo'e kwéry-pe Hesu:

—Pende rereko asyharã amombe'u-ma peê-my. Xe aha rire pende rereko asy va'erã gwí pende-rehe ija'e'y va'e. Pende rereko asy ramo, ndaipotáí penhemondýi. Ndaipotái, “Ma'erã po nhande rereko asy oiko-vy” peje pendéjehe, he'i. ²—Pene mosê va'erã imondovy ojeporahéi haty haty-gwi. “Anive peike tei” he'i arã peê-my gwí pende-rehe ija'e'y va'e. Upéi ogwahê va'erã peê-my pemano hagwã áry. Upe-ma ramo pende jukaharã: “Nhandejáry remimbota-rupi jajuka íxupe” he'i mo'ã va'erã pende-rehe. ³ Upéixa voi pene moingo asy va'erã hikwái, ndoikwaái-gwi xe Ru rekoha, xe rekoha ndoikwaái-gwi ave. ⁴ Upéixa amombe'u-ma peê-my pende-rehe ija'e'y va'e rekorã. Ha upe rire katu pene moingo asy ramo, pene mandu'a va'erã xe remimombe'ukwe-rehe peê-my, he'i íxupe kwéry.

Hesu omombe'u Nhe'ê Marangatu tee va'e rehegwa nhe'ê

(Jo 14.16)

Upéi he'i jevy gwemimbo'e kwéry-pe Hesu:

—Yma gwive ko'ánga ete peve xe aiko pene pa'ũ-rupi. Upéa-gwi namombe'úi peê-my pende-rehe ija'e'y va'e rekorã, he'i. ⁵—Ha ko'ánga katu aha jevy-ta xe xe mbouhare oiko ha-py. Aha-tama jepe aiko-vy, “Kipy tipo ereho-ta?” ndapejéiry xe-vy. ⁶ Ha xe aha hagwã amombe'u-gwi katu ndapevy'avéi-ma voi.

⁷ Ha anhetegwa tee va'e amombe'u-ta peê-my. Xe apytave ramo pene ndive, naiporã arã peê-my. Ha aha ramo katu iporãve va'erã peê-my. Ndahái ramo, nogwahéi arã ou-vy peê-my pene pytygwōharã. Ha aha ramo katu, ambou va'erã peê-my pene pytygwōharã. ⁸⁻¹¹ Ogwahê ou-vy ramo pene pytygwōharã Nhe'ê Marangatu tee va'e, oikwaa uka va'erã yvypóry kwéry-pe ijapuha, “Jajejavy e'y va'e voi nhande” he'i ramo mo'ã ójehe. Ndojeroviái voi xe-rehe oiko-vy. Upéa-gwi oikwaa uka va'erã íxupe kwéry hembiaipo vaikwe. Ha Nhe'ê Marangatu tee va'e oikwaa uka ave va'erã íxupe kwéry ijapuha “Onhemonhandejáry rei voi Hesu” he'i ramo mo'ã xe-rehe. Ha aha ramo xe Ru oiko ha-py, peê ndaxe rexavéi-ma ramo katu, oikwaa uka va'erã íxupe kwéry xe-rehe ijapuha. Ha Nhe'ê Marangatu tee va'e oikwaa uka ave va'erã yvypóry kwéry-pe ijapuha, “Nhande rexakwaa rei va'erã voi Nhandejáry. Nhande rembiapo vaikwe-rehe katu nanhane rereko asy mo'ái” he'i rei ramo ójehe. Ha ohexa kwaa-ma ramo anháy ruvixarehe gwí teko rei-pe ombo'e mbo'eha-rehe ndaipu'akaveimaha nhande-rehe katu, Nhe'ê Marangatu tee va'e oikwaa uka va'erã íxupe Nhandejáry-rehe ijapuha, he'i.

¹²—Hetave voi oí xe remimombe'use peê-my. Ha áy amombe'u pukuve ramo katu, ipohýive arã peê-my. ¹³ Ha upe rire katu Nhe'ê Marangatu tee va'e, anhetegwa tee mombe'uha ou ramo, oikwaa uka va'erã peê-my anhetegwa va'e gwive. Ojehegwígwa va'e nomombe'u mo'ái. Ha hemiendu katu omombe'u va'erã. Oiko-ta va'erã pene renonderã omombe'u va'erã. ¹⁴ Xe rehegwa omombe'u va'erã peê-my. Upéa-gwi xe rekoha porã tee

*

15:25 Sl 35.19; 69.4

oikwaa uka va'erã. ¹⁵Ha xe rehegwa katu xe Ru rehegwa ave voi. Upéa-gwi ha'e kuri peẽ-my, Xe rehegwa omombe'u va'erã ave peẽ-my Nhe'ẽ Marangatu tee va'e ou ramo, he'i gwemimbo'e kwéry-pe Hesu.

“Xe rexa jevy ramo, pevy'agwasu ete jevy-ma va'erã” he'i Hesu

¹⁶Upéi he'i jevy íxupe kwéry:

—Áy ndaxe rexa are mo'ái peẽ, he'i. —Ha upe rire katu xe rexa jevy va'erã, he'i íxupe kwéry Hesu.

¹⁷Ha hemimbo'e kwéry ndoikwaáiry inhe'ẽ. He'i ojóupe:

—“Áy ndaxe rexa are mo'ái peẽ. Ha upe rire katu xe rexa jevy-ta” he'i kuri nhande-vy. “Aha-gwi xe Ru oiko ha-py” he'i kuri nhande-vy, he'i ojóupe. ¹⁸—Ma'erã po, “Ha upe rire katu xe rexa jevy-ta” he'i kuri nhande-vy. Mbava'e-rehe nipo he'i nhande-vy, ndajaikwaáiry aipo he'i ramo, he'i ojóupe hikwái Hesu nhe'ẽ-rehe.

¹⁹Ha Hesu oikwaa-ma oporanduseha ojóupe. Upéa-gwi he'i íxupe kwéry:

—Ha'e kuri peẽ-my, “Áy ndaxe rexa are mo'ái peẽ. Ha upe rire katu xe rexa jevy va'erã” ha'e kuri peẽ-my. Upe va'e xe nhe'ẽ-rehe peporandu randu tipo ojóupe peiko-vy? he'i íxupe kwéry. ²⁰—Amombe'u-ta peẽ-my anhetegwa tee va'e. Pene rasẽ va'erã pejahe'o-vy. Ha teko rei katu ovy'a va'erã. Pevy'a e'y va'erã. Ha upe rire katu ndapevy'avéi rire, pevy'a jevy-ma va'erã peiko-vy. ²¹Imemby-ta va'e-rami peiko va'erã. Imemby-tama ramo kunha ndovy'avéi-ma. Imembytamaha óra-py ohendu-ma ramo gwasy, ndovy'avéi-ma. Ha imemby rire-ma katu, ovy'a jevy omemby-rehe: “Oiko-ma mitá'i. Kunumi ra'e” he'i ojóupe. Upéa-gwi gwasy hagwe-rehe naimandu'avéi-ma, he'i. ²²—Upéixa ete peiko áy. Imemby-tama va'e-rami peiko. Áy ndapevy'avéi-ma. Ha upe rire katu apohexa jevy-ta. Xe rexa jevy ramo pevy'agwasu ete jevy-ma va'erã, he'i. —Upe ramo pene mbovy'are'y va'e ndoikovéi-ma va'erã. Pevy'a meme ete va'erã, he'i.

²³—Upe áry-py napeporanduvéi-ma va'erã xe-vy. Amombe'u-ta peẽ-my anhetegwa tee va'e. Oime raẽ va'e-rehe pejerure ramo xe Ru-pe xe réry-py, ome'ẽ va'erã peẽ-my xe Ru. ²⁴Ko'ánga ete peve ndapejeruréiry xe réry-py. Áy pejerure rure katu xe réry-py. Ome'ẽ va'erã peẽ-my. Hemime'égwe-rehe pevy'apa-ma va'erã, he'i gwemimbo'e kwéry-pe Hesu.*

“Xe ko xe pu'akave-ma aiko-vy vyypóry kwéry-rehe” he'i Hesu

²⁵Upe ramo he'i jevy gwemimbo'e kwéry-pe Hesu:

—Amombe'u-ma kuri peẽ-my xe Ru rehegwa nhe'ẽ ambue-py orombo'eha-rami. Ha ogwahẽ va'erã xe amombe'u porãha áry. Upe áry-py xe Ru rehegwa nhe'ẽ ambue va'e orombo'eha-rami namombe'uvéi-ma va'erã. ²⁶Upe áry-py pejerure va'erã xe Ru-pe. Xe réry-py pejerure va'erã íxupe. Pejeapysaka katu xe nhe'ẽ-rehe. Pende rekovia ndajerure mo'ái íxupe. Xe Ru-pe voi katu pejerure va'erã xe réry-py. ²⁷Xe rayhu-gwi peẽ ha'e katu pende rayhu ave. “Nhandejáry-gwi ou va'ekwe nipo ra'e Hesu” peje-gwi xe-rehe, pende rayhu ave ha'e. Upéa-gwi xe Ru-pe voi katu pejerure va'erã. ²⁸Xe ko asẽ va'ekwe xe Ru oiko ha-gwi aju-vy. Ko yvy-py aju va'ekwe. Ha ko'ánga katu aheja jevy-ta ko yvy aha-vy. Xe Ru oiko ha-py aha jevy-ta, he'i gwemimbo'e kwéry-pe Hesu.

²⁹Upe ramo he'i íxupe hikwái:

—Áy katu eremombe'u porã-ma ore-vy. Nde rehegwa nhe'ẽ neremombe'uvéi-ma ambue-py ore mbo'eha-rami, he'i. ³⁰—Opamba'e kwaaha voi nipo nde ra'e, he'i. —Oroikwaase va'e ereikwaa uka ore-vy. Áy noroporandu mo'avéi-ma nde-vy. Upéa-gwi Nhandejáry-gwi ereju va'ekwe nipo ra'e, he'i íxupe hemimbo'e kwéry.

³¹Ha Hesu he'i:

—Ne'irá pejerovia tee xe-rehe peiko-vy, he'i.

³²—Ogwahẽ-tama ou-vy xe áry. Upe áry-py pesarambipa-ta peteĩ teĩ pende róga-rupi peho-vy. Upéixa xe anho xe rejapa-ta peho-vy. Xe rejapa ramo jepe, naxe anhói joty apyta va'erã. Xe moirũ joty arã xe Ru, he'i.* ³³—Koixagwa peẽ-my xe remimombe'u voi.

*

*

Aipota xe moirũ pende py'agwapy hagwã. Pene moingo asy va'erã teko rei. Pene moingo asy ramo jepe, ani joty pekyhyje teĩ. Ndaipu'akái va'erã pende-rehe teko rei. Xe ko xe pu'akave-ma aiko-vy xe rendu e'yha-rehe. Upéa-gwi ani pekyhyje teĩ teko rei-gwi, he'i gwemimbo'e kwéry-pe Hesu.

17

“Xe irũ-rehe ajerure-ma nde-vy” he'i Nhandejáry-pe Hesu gwemimbo'e-rehe

¹Upéa he'i rire, hovayva Hesu ombojeupi onhe'ẽ Nhandejáry-pe:

—Ogwahẽ-ma ou-vy xe aha hagwã óra, xe Ru, he'i íxupe. —Nde ra'y voi xe, he'i Gwu-pe. —Xe reko porãha ehexas uka katu ahexas uka hagwã nde reko porãha. ²Yma va'ekwe nde katu xe moingo entéro yvypóry gwive jaryrã, xe amoingove hagwã ne rembiporavo va'e gwive ne ndive oiko hagwã opa e'y reheve. ³Ha xe remimoingove katu ohexas kwaa porã nde-rehe nde rekoha. Ne anho Tupã tee voi. Ne ramigwa ndaipóri. Ha xe ne remimbo voi. Xe rekoha ohexas kwaa porã ave xe-rehe xe remimoingove. Upéa-gwi ehexas uka katu xe reko porãha. ⁴Yvypóry-pe ahexas uka-ma nde reko porãha. Ereme'ẽ va'ekwe xe rembiaporã gwive ajapo-ma katu. ⁵Ko yvy oiko e'y mboyye xe tuvixa mba'e-ma aiko ne ndive va'ekwe. Ko'anga ne ndive aiko hagwe-rami, xe moingo jevy katu, xe Ru. Xe mbotuvixa mba'e jevy katu.

⁶—Yvypóry pa'ũ-gwi ereiporavo va'ekwe xe irũrã ereme'ẽ hagwã xe-vy. Íxupe aikwaa uka-ma nde rekoha. Ne rembiporavo nde re'yí voi. Upéi ereme'ẽ va'ekwe xe-vy xe re'yirã. Ne nhe'ẽ ohendu hikwái. ⁷Ko'anga katu, “Nhandejáry remime'ẽgwẽ voi íxupe nipo ra'e” he'i ereme'ẽ va'ekwe-rehe xe-vy. ⁸Xe-vy ne remimombe'u amombe'u íxupe. Ha xe remimombe'u katu ohendu voi hikwái. “Nhandejáry-gwi ou nipo ra'e Hesu. Ombou nipo ra'e íxupe Nhandejáry” he'i nhande-rehe hikwái.

⁹—Ha teko rei-rehe katu ndajerure mo'ái nde-vy. Xe-vy ne remime'ẽgwẽ-rehe ae ajerure-ta nde-vy. Nde re'yí voi. Upéa-gwi ajerure-ta nde-vy hese. ¹⁰Xe areko va'e gwive ne mba'e ave. Ha nde erereko va'e gwive xe mba'e ave. Ha xe remimbo'e katu xe-vy ne remime'ẽgwẽ xe irũrã ohexas uka-ma xe reko porã teeha. ¹¹Ãy katu aha-ta xe nde ereiko happy. Ndaiko mo'ávẽi-ma ko yvy ári. Ha xe remimbo'e katu oiko joty va'erã ko yvy ári. Nde reko marangatu voi, xe Ru. Ne nhe'ẽ-rupi aikwaa uka-ma kuri íxupe kwéry nde rekoha. Ãy nde réry-py enhangareko porã katu hese ijoja meme oiko-vy hagwã. Peteixa nhande, nhande johana-rami, aipota ijoja ave onhondive hikwái. ¹²Hendive xe aime jave ko yvy ári, anhangareko hese aiko-vy nde réry-py, ahexas uka íxupe va'ekwe-py. Anhangareko porã hese aiko-vy. Avave ndaxe rejái oho-vy. Peteĩ va'e mo'ã xe reja kuri oho-vy. Xe irũ tee e'y va'e upéa anhaygwasu rembieraha. Yma hekorã omoĩ va'ekwe kwatia-rehe. Upéa-gwi hambihaike-rami naxe moirũvéi-ma ay.*

¹³—Ko'anga aheja-tama ko yvy aha-vy nde ereiko happy. Ha aime jave katu kóxa xe nhe'ẽ amombe'u íxupe kwéry ovy'a hagwã. Xe avy'aha-rami aipota ovy'apa hikwái. ¹⁴Ne nhe'ẽ amombe'u-ma kuri íxupe ha teko rei katu ndajja'ẽi-ma hese. Teko rei reko-rupi aiko e'yha-rami, xe irũ ave ndoikovéi-ma heko-rupi. Upéa-gwi ndajja'evéi-ma hese teko rei. ¹⁵“Eipe'a katu íxupe heraha-vy ko yvy-gwi” nda'e mo'ái nde-vy. Ha'e-ta ae, “Eresende katu íxupe. Anháy reko e'y-rupi oiko hagwã eresende katu” ha'e-ta ae nde-vy hese kwéry. ¹⁶Teko rei reko-rupi xe aiko e'yha-rami xe irũ ave ndoikovéi-ma heko-rupi. ¹⁷Teko rei reko-rupi ndoikovéi-gwi, ipotĩ-magwi eheja katu toiko ne irũ tee ramo. Anhetegwa tee va'e ne nhe'ẽ. Ne nhe'ẽ rendu ramo emoingo katu ne irũ tee ramo. ¹⁸Yvypóry kwéry-pe amombe'u hagwã xe mbou va'ekwe. Upéixa ete, “Tapeho opa-rupi xe mombe'u-vy” ha'e kuri xe irũ-pe. ¹⁹Ãy apena hese-gwi, napenavéi-ma xéjehe. Hekovia ae amano hagwã-rami aĩ. Nde-vy anheme'ẽ-ta ne irũ tee ramo oiko hagwã xe irũ.

*

17:12 Sl 41.9

²⁰—Xe irũ-rehe ajerure-ma nde-vy. Ha ko'ánga katu xe irũ nhe'ẽ renduharã-rehe ave ajerure-ta ave. Inhe'ẽ rendu-gwi ojerovia-ma va'erã xe-rehe. ²¹Xe-rehe ojerovia va'erã-rehe ajerure-ta nde-vy peteixa ijoja tee hagwã xe-rehe ojerovia va'e gwive. Nde ko xe moirũha-rami, xe Ru, xe oromoirũha-rami ave, aipota peteixa nhane moirũ hikwái, “Nhandejáry remimbou voi nipo ra'e Hesu” he'i hagwã xe-rehe yvypóry. ²²Nde rekoha erehexa uka xe-vy va'ekwe-rami, ahexa uka ave kuri íxupe xe rekoha peteixa ijoja tee hagwã oiko-vy. Nhande nhande jojaha-rami aipota ijoja ave hikwái. ²³Peteixa amoirũ íxupe. Peteixa ave xe moirũ nde. Upéixa jaiko ha'e kwéry ijoja porã tee hagwã. Ijoja porã tee ramo, “Nhandejáry remimbou voi nipo ra'e Hesu” aipota he'i va'erã xe-rehe teko rei. Aipota he'i va'erã, “Hesu-pe ohayhuha-rami Nhandejáry, Nhandejáry reroviaha ave hembiahyu voi nipo ra'e” he'i va'erã.

²⁴—Áy, xe Ru, ko va'e xe-vy ne remime'ëgwé voi xe irũrã. Xe aiko ha-rupi, aipota xe moirũ ave. Ndoikói výteri ramo ko yvy xe rayhu va'ekwe ereiko-vy. Upéa-gwi xe momba'egwasu va'ekwe xe rereko-vy. Áy aipota xe moirũ xe momba'egwasuha ohexa hagwã hikwái. ²⁵Nde ko erejéjavy e'ỹ va'e, xe Ru. Teko rei katu nde kwaa e'ỹha voi. Xe ko ae nde kwaaha voi. Ha xe irũ katu oikwaa-ma nde xe mbouhare. ²⁶Aikwaa uka va'ekwe íxupe nde rekoha aiko-vy. Áy aikwaa uka jevy-ta aiko-vy, xe rayhuha-rami ereiko-vy, ojohayhu porãve ráve hagwã ave. Peteixa amoirũse ave íxupe kwéry, he'i Nhandejáry-pe onhe'ë ombojeupi-vy.

18

Soldado kwéry polícia ndive oipyhy Hesu-pe

(Mt 26.47-56; Mc 14.43-50; Lc 22.47-53)

¹Upe oração ojapo rire, Hesu osẽ oho-vy gwemimbo'e kwéry ndive. Cedrom y rupagwepi ohasa oje'ói-vy. Upe-py oí yvotyty. Upe-py oíke oho-vy hikwái. ²Upe va'e yvotyty-py onhomboaty aty va'e gwemimbo'e kwéry ndive. Upéa-gwi Judas, Hesu pyhyharã-pe omombe'u va'erã oikwaa voi yvotyty. ³Upéixa ramo Judas Hesu piári oho upe-py. Hendive oho soldado kwéry. Polícia pa'i ruvixa remimondo va'e, fariseu remimondo va'e ave indive oho. Gwesapeharã ave ogweraha. Gwataendyrã ave ogweraha. Ikutu hagwã reheve oho.

⁴Ha Hesu oikotaha gwive oikwaapa voi. Upéa-gwi oho ohogwaitĩ joty íxupe:

—Kiva'e-pe tipo peheka peiko-vy? he'i oporandu-vy soldado kwéry-pe Hesu.

Ha soldado kwéry he'i íxupe:

⁵—Oroheka Nazaré pygwa Hesu-pe, he'i íxupe hikwái.

—Xe voi ko ha'e, he'i onhemombe'u-vy soldado kwéry-pe.

Ha Judas katu Hesu pyhyharã-pe omombe'uhare ou ave Hesu pyhyharã ndive. Onhembo'y ave oĩ-vy upe-py.

⁶“Xe voi ko ha'e” he'i-ma ramo Hesu, onhemondýi hikwái. Ogwevi mo'ã ramo ho'a oje'ói-vy yvy-py soldado kwéry. ⁷Ha Hesu oporandu jevy íxupe kwéry:

—Kiva'e-pe tipo peheka? he'i jevy íxupe kwéry.

—Nazaré pygwa Hesu oroheka va'e, he'i jevy íxupe.

⁸—Xe voi ko ha'e, ha'e-ma kuri peẽ-my. Néi. Xe voi xe reka peiko-vy ramo, peheja katu toho xe irũ gwéry, he'i soldado kwéry-pe.

⁹Upéa he'i oiko hagwã he'i hagwe-rami. He'i-ma kuri Gwu-pe: “Ne remime'ëgwé-rehe anhangareko porã porã aiko-vy. Ndojehesa rerováí xéhegwí avave” he'i kuri gwemimbo'e kwéry-rehe. Upéa-gwi áy he'i: “Peheja katu toho xe irũ gwéry” he'i.

¹⁰Upe-ma ramo Simão Pedro ohekýi hyru-gwi okyse. Omopu'ã-vy oikyti-ma pa'i ruvixagwasu rembigwái-pe, Malco héry va'e-pe. Oinambijo-ma íxupe. Ijakatúa kotygywa oikyti íxugwi inambi. ¹¹Upéi he'i Pedro-pe Hesu:

—Emoĩ jevy katu hyru-py nde kyse, he'i. —Nhandejáry nhe'ë-py ahasa asy va'erã. Ani, “Ndohasa asy mo'ãi Hesu” ere erenhemongeta-vy teĩ nde py'apy-py, he'i Pedro-pe.

Ogweraha Hesu-pe Anás róga-py hikwái

¹² Upe rire soldado kwéry huvixa ndive, judeu remimbou polícia ave oipyhy Hesu-pe oipokwa-ma heraha-vy. ¹³ Ogweraha ranhe Anás róga-py. Ha Anás katu Caifás ratyu. Ha Caifás upe va'e ro'y-py pa'i ruvixagwasu ramo opyta. ¹⁴ Upe va'e he'i-ma kuri judeu ruvixa kwéry-pe: “Peẽ-my iporãve arã nhande rekovia peteĩ va'e omano ramo” he'i kuri Hesu-rehe. Ha upéi katu ogweraha íxupe Anás róga-py.

“Ndaha'úi xe hemimbo'e” he'i mo'ã Hesu-rehe Pedro
(Mt 26.57-58,69-70; Mc 14.53-54,66-68; Lc 22.54-57)

¹⁵ Ha Simão Pedro outro Hesu remimbo'e ndive oho hapykwéri. Pe outro hemimbo'e katu pa'i ruvixagwasu kwaaha. Upéa-gwi oike pa'i ruvixa róga kakwaa-py Hesu rapykwéri.

¹⁶ Ha Pedro katu opyta oka-py. Okẽ-my rei oĩ. Upéi pe outro hemimbo'e pa'i ruvixagwasu kwaaha osẽ jevy ou-vy omombe'u pa'i rembigwái-pe okẽ-rehe onhangareko va'e-pe. Upe-ma ramo oheja Pedro oike:

—Eike katu, he'i íxupe pa'i rembigwái.

¹⁷ Oike rire he'i jevy Pedro-pe pa'i rembigwái:

—Nde tipo ndaha'úi Hesu remimbo'e, he'i oporandu-vy íxupe.

—Ndaha'úi xe, he'i mo'ã.

¹⁸ Ro'y eterei voi. Upéa-rehe pa'i rembigwái kwéry polícia ndive ohatapy ra'e ojepe'e hagdã. Áy onhembo'y tata ypy-py ojepepe okwa-vy. Ipa'ũ-my ave Pedro ojepepe oĩ-vy.

Pa'i ruvixagwasu oporandu Hesu-pe
(Mt 26.59-66; Mc 14.55-64; Lc 22.66-71)

¹⁹ Ha upéi katu pa'i ruvixagwasu oporandu Hesu-pe hemimbo'e kwéry-rehe.

—Mbava'e eremombe'u ijaty va'e-pe? he'i íxupe oporandu-vy.

²⁰ Ha Hesu he'i:

—Xe ko atýra-py meme amombe'u-ma enterove va'e-pe aiko-vy. Ojeperahéi haty haty-rupi xe ambo'e-ma aiko-vy. Nhandejáry róga kakwaa-py ave ambo'e-ma aiko-vy. Judeu kwéry ojogweroaty aty ha-rupi ambo'e aiko-vy. Nhemi ha-rupi ae namombe'úiry aiko-vy, he'i. —Ambue mbue va'e katu namombe'úi nhemi ha-rupi aiko-vy, he'i. ²¹—Ani xe-vy ereporandu teĩ, he'i. —Xe renduhare-pe ae katu eporandu. Xe renduhare oikwaa porã va'e xe remimombe'ukwe, he'i pa'i ruvixagwasu-pe.

²² Upe-ma ramo peteĩ polícia upe-py oĩ va'e ohovapete íxupe:

—Ma'erã po nde py'agwasu-ma upéixa ere hagdã pa'i ruvixagwasu-pe, he'i íxupe pe polícia.

Upéi Hesu he'i:

²³—Ereikwaa ramo xe nhe'ẽ porã e'ýha, emombe'u katu a pygwa-pe xe apuha. Ha xe nhe'ẽ porã ramo jepe, ma'erã katu xe rovapete rei? he'i polícia-pe.

²⁴ Upe-ma ramo Anás omondo Hesu-pe. Pa'i ruvixagwasu Caifás oiko ha-py omondo. Ipokwaha reheve oho Hesu upe-py.

“Ndaha'úi xe hemimbo'e” he'i jevy mo'ã Hesu-rehe Pedro
(Mt 26.71-75; Mc 14.69-72; Lc 22.58-62)

²⁵ Upe ramo Pedro opu'ã joty ojepe'e oĩ-vy tata ypy-py. Ha oporandu íxupe upe pygwa:

—Nde tipo ndaha'úi Hesu remimbo'e? he'i íxupe.

—Nahániry xe, he'i joty mo'ã. —Ndaha'éiry Hesu remimbo'e xe, he'i mo'ã upe pygwa kwéry-pe.

²⁶ Upéi oporandu íxupe pa'i ruvixagwasu rembigwái va'e. Inambikytypyre re'ýi voi. Ha upéi katu oporandu íxupe:

—Nde tipo Hesu irũ? he'i. —Yvotyty-py nde orohexa voi kuri, he'i íxupe hembigwái.

²⁷—Xe ndaikói kuri, he'i jevy mo'ã Pedro.

Upe-ma ramo osapukái-ma gáju.

Mburuvixagwasu róga kakwaa-py ogweraha Hesu-pe
(Mt 27.1-2,11-14; Mc 15.1-5; Lc 23.1-5)

²⁸ Ha upéi katu oipyhy jevy-ma Hesu-pe heraha-vy hikwái. Osẽ Caifás róga-gwi oje'ói hagdã mburuvixagwasu róga kakwaa-py. Voi ogwahẽ oje'ói-vy upe-py. Ha judeu ruvixa

kwéry ndoikéiry mburuvixa róga-py. Pe mburuvixa ndaha'éi judeu kwéry va'e. Heko-rupi oiko e'y-gwi ndoikéiry koty-py. Judeu kwéry e'y va'e koty-py ndoikéiry. He'i judeu ruvixa kwéry:

—Jaike ramo nhande kwéry e'y va'e róga-py nhandemongy'a arã. Aipo ramo, nhandemongy'a ramo, ndikatúí arã jakaru areteguasú-py, he'i ójehe kwéry.

Ha judeu ruvixa kwéry okaruse voi areteguasú-py. Upéa-gwi ndoikéiry voi mburuvixagwasu róga-py. ²⁹Upéixa ramo mburuvixagwasu Pilatos osê ou-vy koty-gwi:

—Mbava'e tipo ojapo vai ra'e peru hagwã, he'i oporandu-vy judeu ruvixa kwéry-pe.

³⁰—Nahembiapo váiry ramo ra'e, ndorogwerúí arã ra'e íxupe nde ha-py, he'i joty hese mburuvixa-pe.

³¹—Néi, he'i Pilatos. —Peẽ ko peraha katu íxupe pende reko-rupi pejapo hagwã hese, he'i íxupe kwéry.

Upéi he'i judeu ruvixa kwéry:

—Nderejuka ukaséiry joty ore-vy hembiaipo vai va'e, he'i. —Ne nhe'ẽ-py mante ojuka va'erã hembiaipo vai va'e, he'i mburuvixa-pe.

³²Ha Hesu katu onhemombe'u-ma kuri mba'éixa omano-ta. Áy onhemombe'u hagweramima oiko-tama voi. Onhemombe'u hagweramima onhe'ẽ-ma áy judeu ruvixa kwéry.

³³Ha upéi katu mburuvixa oíke jevy koty-py ohenói tou Hesu. Ou ramo, oporandu íxupe:

—Nde tipo judeu kwéry ruvixagwasu va'e? he'i íxupe mburuvixa Pilatos.

³⁴Ha Hesu he'i:

—Ndejehegwi rei para'e ereporandu xe-vy xe kwaa hagwã. Xe mombe'u para'e nde-vy, he'i mburuvixa-pe.

³⁵—Ndaha'éiry xe judeu kwéry va'e. Nde re'yí ae pa'i ruvixa kwéry ave nde reru-ma ne moĩ xe po-py. Mbava'e tipo erejapo ra'e? he'i íxupe Pilatos.

³⁶Upéi Hesu he'i:

—Xe ko mburuvixagwasu jepe, namandái va'e yvypóry-rehe, he'i. —Amanda ramo hese kwéry ra'e, aheja arã ra'e xe irũ onhorairõ xe-rehe. Aheja arã ra'e xe resende judeu kwéry-gwi. Ko yvy arigwa-rami katu namandái va'e voi, he'i mburuvixa-pe.

³⁷—Aipo ramo, nde mburuvixagwasu voi ra'e, he'i íxupe Pilatos.

Upéi he'i Hesu:

—Mburuvixagwasu-py xe renói-ma kuri, he'i. —Xe ko ndaju reíry va'ekwe ko yvy ári. Anhetegwa tee va'e mombe'uharã xe aiko-ma va'ekwe ko yvy-rehe. Ha anhetegwa reroviaha gwive katu xe nhe'ẽ ohendu ave arã, he'i mburuvixa-pe.

³⁸—Mbava'e nipo anhetegwa va'e, he'i Hesu-pe Pilatos.

“Emboja katu kurusu-rehe” he'i Hesu-rehe

(Mt 27.15-31; Mc 15.6-20; Lc 23.13-25)

Upéa he'i rire osê jevy koty-gwi omombe'u hagwã judeu kwéry-pe:

—Nahembiapo váiry ra'e, he'i Hesu-rehe. ³⁹—Páscoa areteguasú-py peteĩ preso oĩ va'e apoi-ta va'e íxugwi. Pende reko-rupi apoi íxugwi, he'i. —Aipo ramo, peipotata tipo xe apoi pende ruvixagwasu Hesu-gwi, he'i judeu kwéry-pe.

⁴⁰Upe-ma ramo entéro judeu kwéry va'e gwive onhe'ẽ hatã-ma osapukái-vy hikwái:

—Nahániry, he'i. —Hesu-pe katu ndoroipotáiry erepoi. Barrabás ae oroipota erepoi, he'i mburuvixa-pe judeu kwéry.

Ha Barrabás katu oporasakeahaty voi.

19

¹Ha upéi katu Pilatos omanda Hesu-rehe:

—Peipyhy katu Hesu-pe peraha-vy. Pembopi mbopi katu íxupe heraha-vy, he'i omanda-vy Hesu-rehe.

²Upe ramo soldado kwéry oipyhy ombopi íxupe. Upéi nhuatĩ-gwi ojapo íxupe inhakã rehegwarã. Ijgwaka ra'anga ojapo omoĩ hagwã inhakã-rehe hikwái. Omonde hese ao pytã va'e, mburuvixa omonde va'e. ³Upéi peteĩ teĩ ogwahẽ ou-vy hovagwy-py. Imboete ra'anga anga-vy ou hovagwy-py.

—Toiko are katu, toiko are katu, judeu ruvixagwasu, he'i onhembohory-vy Hesu-rehe. Ohovapete pete íxupe.

⁴Upe-ma ramo Pilatos osê jevy koty-gwi oho-vy he'i judeu kwéry-pe:

—Pejeapysaka katu xe nhe'ê-rehe. Anohê jevy-ta íxupe xe ha'e va'e hese peikwaa porã hagwã. Hesu rembiapo vaikwe ndajohúiry voi, he'i judeu kwéry-pe Hesu-rehe.

⁵He'i rire-ma osê jevy-ma ou-vy koty-gwi Hesu. Inhakã-rehe oĩ nhuatĩ-gwi ijegwaka ra'anga. Ao puku pytã va'e-py onhemonde-ma ou-vy. Osê-ma ramo:

—Pehexa katu íxupe. Ou-ma katu. Pema'ê katu hese, he'i Hesu-rehe Pilatos.

⁶Ohexa-ma ramo íxupe pa'i ruvixa kwéry polícia kwéry ave onhe'ê hatã-ma osapukái-vy:

—Ejuka katu íxupe. Kurusugwasu-rehe ejuka katu íxupe, he'i Hesu-rehe osapukái joa joa-vy hikwái.

—Nahembiapo vaíry vérami ko xe-vy, he'i. —Upéa-gwi peê perahase ramo katu, peraha katu íxupe pehupi hagwã imoĩ-vy kurusu-rehe omano hagwã, he'i judeu kwéry-pe.

⁷Upéi ha'e kwéry he'i: “Xe ko Nhandejáry ra'y” he'i mo'ã ójehe. Ha ore katu ore rembypy Moisés remimombe'ukwe tekoha-rupi joty oroiko va'e. Hesu ae nainhe'ê rendúí. Upéa-gwi iporã katu ejuka íxupe, he'i mo'ã mburuvixa-pe Hesu-rehe hikwái.

⁸“Hesu Nhandejáry ra'y” he'i-ma ramo, omongyhyjeve íxupe judeu kwéry nhe'ê. °Oike jevy koty-py oporandu Hesu-pe:

—Ki-gwi tipo ereju ra'e? he'i íxupe.

Ha Hesu okiriri íxugwi. Mba'eve nde'íry mburuvixa-pe. ¹⁰Upéa-rehe oporandu jevy íxupe:

—Ma'erã po neremombe'úi ra'e xe-vy? he'i. —Ejeapysaka katu xe nhe'ê-rehe, he'i. —Xe ko amanda va'e nde-rehe, he'i. —Apoi-ta para'e ndéhegwi. Orojuka uka-ta para'e kurusu-rehe, he'i íxupe Pilatos.

¹¹Upe ramo Hesu he'i:

—Nhandejáry nhe'ê-py mante eremanda xe-rehe ereiko-vy, he'i íxupe. —Ne rembiapo vai-ma xe-rehe. Ha judeu ruvixa nde-vy xe juka ukase va'e katu hembiapo vaivete-ma xe-rehe, he'i mburuvixa-pe Hesu.

¹²Upéa ohendu ramo opoise ise mo'ã íxugwi. Ha judeu kwéry onhe'ê hatã jevy-ma íxupe:

—Mburuvixagwasu César katu ndojohu porã onhemomburuvixa va'e-pe gwive. Upéa-gwi erepoi ramo íxugwi, ndojohu porã va'erã erejapose va'e Hesu-rehe, he'i Pilatos-pe hikwái.

¹³Upéa ohendu ramo, he'i ogwenohê jevy hagwã Hesu-pe koty-gwi. Osê rire-ma, ogwapy-ma Pilatos oĩ-vy mburuvixa ogwapy haty-py. Upe opu'ã oĩ va'e ita-gwi ojapo va'ekwe ári ogwapy. Ha hebreu nhe'ê-py katu ohenói Gabatá-py. ¹⁴Ha upéi katu haimete-ma larose. Oiko-tama páscoa aretegwasu. Upe-ma ramo he'i judeu kwéry-pe Pilatos:

—Pende ruvixagwasu ko ou-ma, he'i Hesu-rehe.

¹⁵Ha ha'e kwéry katu:

—Emboja katu, emboja katu imoĩ-vy kurusu-rehe omano hagwã, he'i joa onhe'ê hatã-vy hese.

—Pende ruvixagwasu ko peipota tipo xe ajuka íxupe, he'i oporandu-vy judeu kwéry-pe. Upe ramo he'i pa'i ruvixa kwéry:

—Mburuvixagwasu César anho voi ko ore ruvixa va'e, he'i mo'ã Pilatos-pe hikwái.

¹⁶Upe-ma ramo Pilatos ojapo ha'e kwéry hemimbota. He'i omboja hagwã Hesu-pe imoĩ-vy kurusugwasu-rehe.

Omboja Hesu-pe imoĩ-vy kurusugwasu-rehe

(Mt 27.32-44; Mc 15.21-32; Lc 23.26-43)

Upéi ogweraha-ma íxupe omboja hagwã-py hikwái. ¹⁷Ha upéi katu Hesu osê oho-vy. Onhemboja hagwã kurusu-rehe oĩ-vy hagwã-py oho. Kurusugwasu ogweraha ho'yrã ojave oho-vy. Akã rendaty-py oje'e ha-py ogweraha íxupe. Ha hebreu nhe'ê-py katu ohenói Gólgota-py.

¹⁸ Ha upéi katu ogwahê rire oho-vy upe-py, omboja íxupe imoĩ-vy kurusugwasu-rehe. Mokõi hembiaipo vai va'e katu ave ohupi yvate. Hesu yke-rehe joja omoĩ íxupe kurusugwasu-rehe. Imbyte-py oĩ Hesu. ¹⁹ Ha Pilatos katu ohai imombe'u hagwã:

—Emoĩ katu kurusu-rehe Hesu akã ári, he'i omanda-vy. —“Ko va'e Hesu Nazaré pygwa judeu kwéry ruvixagwasu voi” he'i hagwã hese, he'i omanda-vy Pilatos.

²⁰ Peteĩ nhe'ê ambue mbue-py ohai imoĩ-vy. Ohai hebreu nhe'ê-py, ohai latim nhe'ê-py. Grego nhe'ê-py ohai ave. Ha upéi katu heta judeu ou omonhe'ê ohai va'ekwe. Hi'agwĩ oĩ pe tetã-gwi Hesu rupi hagwe-py. ²¹ Upéa-gwi pa'i ruvixagwasu oje'ói Pilatos oiko ha-py:

—“Judeu ruvixagwasu” ani erehai teĩ. “Xe judeu ruvixa voi ko, he'i mo'ã ójehe” ehai ae katu, he'i íxupe judeu ruvixa kwéry.

²² Ha Pilatos nohendúiry joty inhe'ê:

—Upéixa ahai-ma kuri. Ndaipe'a mo'ávéri-ma xe ahai va'ekwe, he'i judeu ruvixa kwéry-pe.

²³ Ha irundy soldado katu omboja rire Hesu-pe imoĩ-vy kurusu-rehe, oipyhy ijaokwe omboja'o ja'o peteĩ teĩ ojóupe. Ha ikamisa pukukwe katu oipyhy ave. Onhembovvy e'ỹ va'e.

²⁴ Upéixa ramo he'i soldado:

—Ani eremondoro teĩ kamisa puku. Jahuga katu hese. Aipo ramo, ogana va'e togweraha katu, he'i ojóupe Hesu aokwe-rehe onhemogana-vy.

Yma va'ekwe he'i Nhandejáry kwatia nhe'ê:

“Xe aokwe omboja'o peteĩ teĩ ojóupe. Ohuga xe kamisa-rehe hikwái”*

he'i Hesu rehewarã omombe'u-vy. Upéa-gwi hembihaike-rami voi ãy ojapo Hesu aokwe-rehe.

²⁵ Ha upéi katu oĩ irundy kunha kurusu rovagwy-py. Oĩ Hesu sy. Upéi ikypy'ýry ave. Upéi Maria Madalena ave, Clopas rembireko Maria ndive. ²⁶ Upe ramo Hesu ohexa-ma osy-pe. Ijyke-rehe xe anhembo'y aĩ-vy. Xe hemimbo'e hembiaiyhu va'e. Xe rexa-ma ave. Ore rexa ramo, he'i osy-pe:

—Ne memby voi upe va'e, he'i osy-pe xe-rehe.

²⁷ Upéi he'i xe-vy:

—Nde sy voi upe va'e, he'i xe-vy osy-rehe.

Ha upe rire katu xe róga-py araha Hesu sy oiko hagwã xe ha-py.

Omano-ma Hesu

(Mt 27.45-56; Mc 15.33-41; Lc 23.44-49)

²⁸ Ha upéi katu Hesu: “Ajapo va'erã gwive ajapopa-ma voi” he'i ojéupe. Ha Nhandejáry kwatia nhe'ê kwaaha voi Hesu. He'i va'ekwe Nhandejáry kwatia nhe'ê, “Xe y'uhéi-mã” he'i Hesu rekorã omombe'u-vy. Upéa-gwi hembihaike-rami:

—Xe y'uhéi-ma, he'i ójehe.

²⁹ Upe-py oĩ uva rykwere hepy e'ỹ va'e rryu. Upéi bucha omoakỹ. Yvyra apy-rehe, hissopo héry va'e apy-rehe omoĩ imondo-vy íxupe. Oipyte uka ho'u uka-vy íxupe.* ³⁰ Ho'u rire-ma:

—Ajapo va'erã gwive, ajapopa-ma voi, he'i ójehe.

He'i rire, onhakã reity-ma omano-ma.

Oikutu kyse puku-py Hesu arokã-my

³¹ Vierende omano Hesu. Iko'ê-my, sábado, oiko-ta aretegwasu. Omboete eterei upe va'e arete judeu kwéry. Upéa-gwi oipota omano pya'e:

—Naiporãĩ oĩ arete-py omano hagwã-rami joty, he'i ojóupe judeu ruvixa kwéry.

Upéa-gwi oho oje'ói-vy mburuvixa Pilatos oiko ha-py:

—Ere katu omopê hagwã kurusu-rehe oĩ va'e retyma omano pya'e hagwã, he'i. —Ha upe rire katu eipe'a uka mani kurusu-gwi, he'i íxupe judeu ruvixa kwéry.

*

19:24 Sl 22.18

*

19:29 Sl 69.21

³² Upe ramo oho soldado omopë hetyma. Hesu yke-rehe ohupi va'ekwe-pe omopë hetyma. Upéi outro ijyke-rehe ohupi va'ekwe-pe omopë ave hetyma. ³³ Ha ogwahë ramo katu oho-vy Hesu oi ha-py:

—Omano-ma oi-vy, he'i hese soldado.

Upéa-gwi nomopëiry hetyma. ³⁴ Nomopëiry ramo jepe hetyma, oikutu joty kyse puku-py Hesu arokā-my. Upéi oikutu rire Hesu arokā-my osyry-ma hugwy y ndive.

³⁵ Xe ko hexahare voi. Amombe'u-ma ojehu va'ekwe perovia hagwā peë ave. Anhetegwa tee va'e amombe'uha peikwaa voi. Anhetegwa teeha xe aikwaa ave.

³⁶⁻³⁷ Ha upéi katu yma he'i va'ekwe Nhandejáry kwatia nhe'ë:

“Ikāgwe ni peteĩ nonhemopëi va'erā”

he'i. Ha upéi he'i jevy outro Nhandejáry kwatia nhe'ë:

“Kysepuku-py oikutu va'ekwe-rehe oma'ë va'erā hikwái”*

he'i va'ekwe Nhandejáry kwatia nhe'ë Hesu rekorā omombe'u-vy. Upéa-gwi hembihaike-rami katu ojapo-ma hese hikwái.

Omoĩ itakwa-py Hesu retekwe

(Mt 27.57-61; Mc 15.42-47; Lc 23.50-56)

³⁸ Ha upe rire katu Arimatéia tetã mygwa José héry va'e ogwahë oho-vy Pilatos oiko ha-py. Upe-py oho ojerure hagwā Hesu retekwe-rehe:

—Arahase amoĩ hagwā itakwa-py hetekwe, he'i Hesu-rehe oporandu-vy íxupe.

—Eraha katu hetekwe, he'i íxupe Pilatos.

Ha José katu Hesu nhe'ë renduha voi. Henduha jepe ikyhyje judeu ruvixa kwéry-gwi. Upéa-gwi teta-py nomoirüiry voi va'ekwe Hesu-pe. Áy katu José oho-ma ogweraha-vy Hesu retekwe. ³⁹ Hendive oho ave Nicodemos héry va'e. Upe va'e Hesu rexa-vy oho va'ekwe. Pyhare oho va'ekwe. Áy oho ha'e José ndive. Heta ogweraha hyakwā va'e babosa mirra ndive héry va'e. Quarenta e cinco kilo ogweraha. ⁴⁰ Mokõive oipyhy hetekwe. Omohyakwā rire ae ao, onhugwā hetekwe ao-py. Upéa ojapo va'e judeu kwéry omano va'ekwe-pe heko-rupi ojaty rekovia omoĩ hagwā hetekwe itakwa-py. ⁴¹ Hesu rupi hagwe-py oi yvotytygwasu. Upe-py oi itagwasu ikwa pyahu va'e. Ha'e-py nomoĩry vyteri hetekwe. ⁴² Hi'agwi voi oi upe yvotytygwasu. Ha sábadu, judeu kwéry opytu'uha áry katu oiko-tama ave. Upéa-gwi pya'e omoĩ hetekwe itakwa-py. Ha itagwasu-pe ave omboty.

20

“Oipe'a ra'e Nhandejáry Hesu retekwe-pe itakwa-gwi” he'i

(Mt 28.1-8; Mc 16.1-8; Lc 24.1-12)

¹ Ha upéi domingo voi ramo, pyharevete kwarahy hembipe rei vyteri ramo, pytũ para para vyteri jave oho. Oho ohexa hagwā Hesu retekwe Maria Madalena. Upe-py ogwahë oho-vy ramo, ohexa-ma itagwasu imbotyhare. ² Ojepe'a-ma oi-vy. Upéa ohexa-ma ramo, oripara jevy imombe'u ou-vy. Ogwahë ou-vy Pedro oiko ha-py. Xe Hesu remimbo'e inhirũ tee va'e aiko ha-py ave ou omombe'u:

—Oipe'a ra'e hikwái Nhandejáry Hesu retekwe-pe. Kipy po ogweraha omoĩ hagwā ra'e íxupe? he'i ore-vy ou-vy Hesu rehégwa omombe'u-vy.

³ Upe-ma ramo ore mokõive va'e oroho orohexa hagwā hetekwe rendagwe-py. Pedro ndive xe aha. ⁴ Ororipara oroho-vy. Ha xe hatãve aripara. Xe ranhe agwahë aha-vy upe-py. ⁵ Agwahë-ma ramo ajeavyvy hetekwe rendagwe ahovapyexa hagwā. Ijaokwe imorotĩ porã va'e ahexa inhugwā hagwe mate oi ramo. Ha ndaikéiry. ⁶ Xe rapykwéri ogwahë ou-vy Simão Pedro ave. Ou-ma oike-ma itakwa rye py-py. Ijaokwe imorotĩ va'e mante ave ohexa. Inhugwā hagwe mo'ã oi. ⁷ Upe hovaho'i hagwe noĩry ijaokwe imorotĩ va'e ndive. Upe va'e anho oi. ⁸ Upéi xe agwahë ranhe va'ekwe, aike ave va'ekwe itakwa rye py-py. Ahexa-ma ramo, arovia-ma. ⁹ Ha Nhandejáry kwatia nhe'ë, Hesu oikove jevy va'erã, he'i va'ekwe katu, ne'írã oroikwaa he'ise va'e. ¹⁰ Ha upéi katu oroho jevy ore róga-py.

* 19:36-37 Êx 12.46; Nm 9.12; Sl 34.20; Zc 12.10; Ap 1.7

Hesu ojekwaa uka jevy Maria Madalena-pe
(Mt 28.9-10; Mc 16.9-11)

¹¹Ha Maria Madalena katu ndoikéiry itakwa rye py-py. Ita yke-rehe opyta hasë oĩ-vy. Gwasë reheve ojeavyv ohovapyexa hagwã. ¹²Upéi ohexa-ma mokõi Nhandejáry rembigwái yváy pygwa va'e. Ao morotĩ va'e omonde ramo ohexa. Hesu rupagwe ári ogwapy oĩ-vy. Peteĩ inhakã rupagwe-py, outro ikupy rendagwe-py. Mokõive oporandu íxupe:

¹³—Ma'erã tipo ne rasë, he'i kunha-pe.

Kunha he'i íxupe:

—Ogweraha ra'e xe Járy retেকে, he'i íxupe kunha. —Kipy po omõi ra'e íxupe, xe ndaikwaáiry, he'i mokõive va'e-pe kunha.

¹⁴Upéa he'i rire, ojerova ramo ohexa Hesu-pe onhembo'y oĩ-vy ramo. Hesu teĩ nipo ra'e ohexa, ha kunha ndoikwaáiry íxupe.

¹⁵—Ma'erã tipo ne rasë ereĩ-vy? he'i. —Kiva'e-pe tipo ereheka ereiko-vy, kunha, he'i kunha-pe Hesu.

“Yvotyty-rehe onhangarekoha voi upéa” he'i mo'ã opy'apy-py kunha Hesu-rehe. Upéa-gwi he'i Hesu-pe:

—Ereraha ramo ra'e íxupe, eremoĩ ambue henda-koty emombe'u katu xe-vy, xe araha hagwã íxupe, he'i mo'ã Hesu-pe ndoikwaái-gwi.

¹⁶—Nde Maria, he'i íxupe Hesu.

Upe-ma ramo oikwaa-ma íxupe ojerova Hesu ha-koty:

—Nde Raboni, he'i íxupe onhe'ẽ-py hebreu nhe'ẽ-py.

Raboni he'ise xe mbo'eháry-pe.

¹⁷Ha upéi katu he'i íxupe Hesu:

—Ndajeupíry vyteri aha-vy xe Ru oiko ha-py, he'i. —Upéa-gwi anive xe kwavã teĩ. Tereho mani katu nde xe re'ýi oiko ha-py emombe'u xe nhe'ẽ: “Ajeupi-ta aha-vy xe Ru ha-py. Xe Ru ko ha'e kwéry Túvy ave. Xe Járy ijáry kwéry ave. Upe va'e ha-py ajeupi-ta aha-vy” he'i. —Ko va'e nhe'ẽ raha emombe'u katu íxupe kwéry, he'i kunha-pe Hesu.

¹⁸Upe-ma ramo Maria Madalena oho jevy omombe'u Hesu remimbo'e kwéry-pe:

—Ahexa-ma kuri Nhandejáry Hesu-pe, he'i gwemimbo'e kwéry-pe.

Upéi omombe'u íxupe Hesu nhe'égwe.

Hesu ojekwaa uka jevy gwemimbo'e kwéry-pe
(Lc 24.36-43)

¹⁹Upe áry-py domingo ka'aru ete ojogweroaty oĩ-vy koty-py Hesu remimbo'e kwéry. Ikyhyje voi judeu ruvixa-gwi hikwái. Upéa-gwi hatã omboty hikwái okë. Upe-ma ramo ogwahẽ-ma ou-vy Hesu. Ipa'ũ-my ojekwaa-ma oĩ-vy:

—Tapende py'agwapy katu xe-rehe, he'i-ma íxupe kwéry.

²⁰Upéa he'i rire, ohexa uka íxupe kwéry opo oikutu hagwe. Oarokã oikutu hagwe ohexa uka ave. Ojáry-pe ohexa ramo, ovy'a eterei-ma hikwái. ²¹Upe ramo he'i jevy íxupe kwéry:

—Tapende py'agwapy katu xe-rehe, he'i. —Xe Ru nhe'ẽ-py aju va'ekwe-rami, áy xe nhe'ẽ-py apomondo-ta ave pamba'apo apo hagwã-rupi, he'i gwemimbo'e kwéry-pe.

²²Upéa he'i rire, oipeju peju íxupe kwéry:

—Toike katu pende py'a-py Nhe'ẽ Marangatu tee va'e, he'i opytu-py oipejukwe-vy. ²³—Peje ramo, “Tomboyke katu ne rembiapo vaikwe Nhandejáry” peje ramo, omboyke va'erã Nhandejáry íxugwi hembiaapo vaikwe. Ha peje ramo katu, “Ani Nhandejáry omboyke ne rembiapo vaikwe” peje ramo, nomboykéi ave va'erã íxugwi hembiaapo vaikwe, he'i gwemimbo'e kwéry-pe Hesu.

Tomé rehegwa nhe'ẽ

²⁴Ogwahẽ ramo Hesu, ndoikóiry koty-py hemimbo'e héry va'e Tomé. Dídimopy ohenói íxupe ave. ²⁵Upe rire ogwahẽ ramo Tomé, omombe'u íxupe outro hemimbo'e kwéry:

—Orohexa-ma kuri Nhandejáry Hesu-pe, he'i Tomé-pe omombe'u-vy.

Upéi he'i íxupe kwéry Tomé:

—Xe ndaroviáiry, he'i Tomé. —Xe ahexa e'ý reheve ipo ikutu hagwe, ndarovia mo'ái, he'i. —Amoí e'ý reheve xe po inharokā-rehe ikutu hagwe-py, ndarovia mo'ái voi xe, he'i oirū kwéry-pe Tomé.

²⁶Peteí semana rire hemimbo'e kwéry ojogweroaty jevy-ma koty-py oĩ-vy. Hendive oĩ-ma Tomé. Onhemboty hatā hokē gwive. Onhemboty hatā ramo jepe, ogwahē-ma ou-vy Hesu ipa'ũ-my onhembo'y-ma oĩ-vy:

—Tapende py'agwapy katu xe-rehe, he'i íxupe kwéry.

²⁷Upe-ma ramo he'i Tomé-pe:

—Emoí a-py ne kwā erehexa hagwā xe po, he'i. —Eipysu katu nde po emoí katu ne kwā xe arokā-rehe xe kutu hagwe-py erekwaa hagwā, he'i. —Ani ne mba'e rerovia e'ý tei. Rerovia tee katu, he'i Tomé-pe Hesu.

²⁸—Xe Ruvixa voi ko nde ra'e, he'i. —Xe Járy voi ra'e, he'i íxupe Tomé.

²⁹Upéi Hesu he'i íxupe:

—Néi, he'i. —Xe rexa-gwi xe rerovia-ma, Tomé, he'i. —Ha gwí xe rexa e'ý reheve xe rerovia joty ramo, arovy'a voi íxupe. Oiko porā porā tee rei va'erā upéa, he'i Tomé-pe Hesu.

João omombe'u ma'erā pa omōi kwatia-rehe Hesu rehegwa nhe'ẽ

³⁰Ha Hesu katu heta hembiape porā porā voi opu'akaha-rupi oiko-vy. Heroviapyrā-rupi ojapo gwemimbo'e kwéry remiexagwā. Ha namoĩmbáiry ko va'e kwatia-py. Heta kwatia-rehe amoí e'ý va'e oĩ. ³¹Ha ko va'e katu kwatia-rehe amoí va'ekwe. Peẽ-my gwarā amoí-ma peje hagwā Hesu-rehe: “Cristo nhane remiha'arō va'e voi Hesu nipo ra'e. Nhandejáry ra'y tee voi nipo ra'e” peje hagwā Hesu-rehe amoí-ma. Aipota pejerovia-ma hese peiko-vy Hesu réry-py peiko meme hagwā Nhandejáry ndive.

21

Hesu ojehexa uka jevy sete gwemimbo'e-pe

¹Ha upe rire katu Hesu ojehexa uka jevy gwemimbo'e kwéry-pe. Tiberíades ygwasu rembe-rehe a-rami ojehexa uka. ²Upe-py ojogweroaty oĩ-vy Simão Pedro Tomé ndive. Didimo-py onhehenói ave Tomé. Hendive oĩ ave Caná da Galiléia pygwa Natanael. Omoirū ave íxupe Zebedeu ra'y. Outro mokōi Hesu remimbo'e omoirū ave íxupe. ³Upe ramo Simão Pedro he'i oirū-pe:

—Aha-ta ajopói pira, he'i oirū-pe.

—Ne ndive oroho-ta ave pirapói-vy, he'i Pedro-pe hikwái.

Upe ramo ohopa onhemboyrū kanóa-py oje'ói-vy. Pyhare-rupi oho ojopói pira mo'á ha nogwenohēiry mba'eve. ⁴Iko'ẽ-my hembipe rei vyteri jave kwarahy, ohexa-ma Hesu-pe oĩ-vy ramo y rembe-py ojekwaa oĩ-vy. Hesu ohexa ramo jepe, ndoikwaáiry íxupe. ⁵Upe ramo oporandu Hesu:

—Napenhēi tipo pira, xe ra'y? he'i íxupe kwéry.

—Mba'eve norogwenohēiry, he'i íxupe hikwái.

⁶—Aipo ramo, pemombo katu kyha kanóa akatúa-koty. Penohē va'erā pira, he'i íxupe kwéry Hesu.

Inhe'ẽ-py omombo ramo ogwenohē. Upéi ndikatuvéi-ma ogwenohē jevy kyha ipohýi-gwi. Ndikatúí omboyru kanóa-py. Heta eterei pira ojepyhy ra'e kyha-rehe. ⁷Upe-ma ramo xe Hesu irū tee va'e ha'e Pedro-pe:

—Nhandejáry Hesu voi upe va'e —ha'e amombe'u-vy.

Upéa ohendu ramo, omboi va'ekwe oao jo'a omonde jevy ho'a hagwā y-py. ⁸Ha outro hemimbo'e kwéry katu ogwahē ou-vy kanóa-py. Hi'agwí oĩ y rembe-gwi. Cem metro-rupi ogwahē hagwā. Upéa-gwí ou kanóa-py ombotyryry heru-vy kyha pira reheve. ⁹Osẽ rire kanóa-gwí ohexa tata. Tata ári omoka'ẽ-ta pira. Mbojape ohexa ave. ¹⁰Upéi he'i Hesu:

—Penohē va'ekwe-gwi pira, eruve nhamoka'ëve va'erā pira, he'i gwemimbo'e kwéry-pe.

¹¹ Upe ramo Simão Pedro onhemboyru jevy kanóa-py kyha otira hagwã heru-vy. Upéi ombotyryry heru-vy yvy ete-py. Pira omohynyhẽ voi kyha. Kyha py-py oĩ cento e cinqüenta e três pira tuvixagwe va'e. Heta jepe pira, nomondoróiry joty kyha.

¹² Ha upéi he'i Hesu:

—Peju katu jakaru, he'i íxupe kwéry.

Ha ha'e kwéry katu oikwaa Nhandejáry Hesuha voi upe va'e. Upéa-gwi noporandúi íxupe onhemombe'u hagwã. Ndaipy'agwasúi oporandu hagwã. Upéa-gwi noporandu jepéiry. ¹³ Ha upéi katu Hesu oho ome'ẽ me'ẽ va'erã oipyhy. Mbojape ome'ẽ íxupe kwéry. Upe rire ome'ẽ me'ẽ pira ka'ẽ ave íxupe kwéry.

¹⁴ Upéixa voi oikove jevy rire, mbohapyha-rehema ojehexa uka jevy gwemimbo'e kwéry-pe Hesu.

Pedro rehegwa nhe'ẽ

¹⁵ Okaru rire, oporandu Simão Pedro-pe Hesu:

—Xe rayhu tee tipo nde, João ra'y Simão? he'i. —Xe rayhu-ma voi ne irũ. Nde tipo xe rayhuve joty tipo nde? he'i Pedro-pe.

—Ha'e katu. Ereikwaa voi xe orohayhuha, xe Járy, he'i Hesu-pe.

—Aipo ramo, enhangareko katu xe re'ýi-rehe ereiko-vy. Ovexa-rehe onhangareko va'e-rami, enhangareko hese, he'i Pedro-pe.

¹⁶ Upéi oporandu jevy íxupe:

—Nde tipo xe rayhu, João ra'y Simão, he'i.

—Ha'e katu, he'i. —Ereikwaa voi xe orohayhuha, xe Járy, he'i Hesu-pe.

—Aipo ramo, enhangareko katu xe re'ýi kwéry-rehe. Ovexa rerekwa-rami eiko íxupe kwéry, he'i Pedro-pe.

¹⁷ Upéi mbohapyha-rehema oporandu jevy íxupe:

—Xe rayhu tipo nde, João ra'y Simão, he'i íxupe.

Upe-ma ramo ndovy'avéi Pedro. Mbohapyha-rehe oporandu íxupe-gwi ndovy'avéi-ma. He'i Hesu-pe:

—Opamba'e ereikwaa va'e, xe Járy. Xe orohayhuha ereikwaa ave, he'i Pedro.

—Aipo ramo, he'i —enhangareko katu hereko-vy xe re'ýi kwéry-rehe. Ovexa rerekwa-rami enhangareko hese, he'i. ¹⁸ —Ne mitã ramo katu, nde ku'a jopyha eremoĩ ndéjehe eremboty eregwata hagwã. Ere hose ha-koty ereho voi va'ekwe. Ha amombe'u-ta nde-vy anhetegwa tee va'e. Nde tuja ramo, ereipyo va'erã nde po nde pokwa hagwã. Upéi nde reraha va'erã ere hose e'ý ha-koty. Nde pokwaha-rehe ereho va'erã, he'i Pedro-pe Hesu.

¹⁹ Upéa he'i oikwaa uka hagwã Pedro-pe, mba'éixa po Pedro omano hagwã:

—Xe moirũ meme-gwi ojejuka uka ramo, omano ramo, ohexa uka va'erã enterove va'e-pe Nhandejáry rekoha porã, he'i Pedro omano-taha áry omombe'u-vy.

Ha upéi katu he'i Pedro-pe:

—Xe moirũ katu ereiko-vy, he'i íxupe Hesu.

Xe rehegwa nhe'ẽ

²⁰ Upe rire ojerova Pedro xe rexa gwapykwe-gwi, xe Hesu irũ tee va'e aju ramo. Kwehe arete-py orokaru ramo, ha'e va'ekwe Hesu-pe ojyke reheve aĩ-gwi: “Kiva'e tipo ne mombe'u-ta nde pyhyrã-pe” ha'e va'ekwe Hesu-pe. Áy xe agwata aju-vy Pedro rapykwerí-gwi. ²¹ Ha Pedro katu ojerova ramo xe-rehe xe rexa ramo, gwapykwerí aju ramo, oporandu xe-rehe Hesu-pe:

—Mbava'e tipo oiko-ta ou xe rapykwerí va'e-pe? he'i Hesu-pe xe-rehe.

²² —Xe aipota nomanói xe aju jevy peve ramo ra'e, namombe'úi arã nde-vy ra'e. Nde katu xe moirũ ereiko-vy, he'i Pedro-pe Hesu.

²³ Upéa-gwi Hesu remimbo'e kwéry he'i mo'ã ojóupe xe-rehe: “Nomano mo'ávéi-ma upe va'e”. Ha upéa nde'íry Hesu. He'i ae: “Xe aipota nomanói xe aju peve ramo ra'e, namombe'úi arã nde-vy ra'e” he'i hese Pedro-pe.

²⁴ Ko va'e Hesu rehegwa nhe'ẽ gwive katu xe remimombe'u voi. Xe rembihaikwe ave voi. Anhetegwa tee va'e amombe'uha jaikwaa voi.

Hesu rehegwa nhe'ẽ paha

²⁵ Heta Hesu rembiapo apo xe remimombe'u. Heta xe remimombe'u e'ỹ ave. Peteĩ teĩ omoĩ meme ramo Hesu rembiapo gwive, kwatia-rehe omoĩmba ramo, heta eterei arã oĩ kwatia. Ko yvy ári ndaiporivéi-ma arã vérami henagwã. Heta verei-gwi, ndajavéi-tama vérami xe-vy.

Hesu remimondo rembiapokwe atos dos apóstolos

Hesu ome'ê gwemimondo kwéry-pe hembiaporã

(Mt 28.16-18; Mc 16.14,19; Lc 24.36,50)

¹Are-ma xe Lucas amondo va'ekwe nde-vy, Teófilo, xe nhe'ê kwatia-rehe. Hesu rehegwa nhe'ê gwive amoĩ va'ekwe kwatia-rehe. Hesu ojapo va'ekwe gwive rehegwa nhe'ê amoĩ va'ekwe. Omombe'u va'ekwe gwive rehegwa nhe'ê amoĩ ave. ²Onhypyryũ ombo'e mbo'e ojererojeupi oho peve yváy-py rehegwa nhe'ê amoĩ ave. Ohenói va'ekwe gwemimondo va'e, gwembiporavõpyre-pe ome'ê hagwã hembiaporã. Ha Nhe'ê Marangatu tee va'e katu oikwaa uka porãve íxupe kwéry hembiaporã. Hesu ome'ê ranhe íxupe kwéry hembiaporã. Ome'ê rire katu ha'e ojererojeupi jevy oho-vy.

³Ko'ãy amondo jevy-ta xe nhe'ê nde-vy, Teófilo. Hesu omano rire ha'e onhemoingove jevy va'ekwe voi. Oikove jevy ramo, ojehexa uka porã porã va'ekwe voi oiko-vy gwemimondo kwéry-pe. Quarenta áry ojehexa uka uka jevy oiko-vy va'ekwe íxupe kwéry. Nhandejáry nhande ruvixarã rehegwa nhe'ê omombe'u oiko-vy. Ohexa ramo íxupe: “Erikove jevy-ma nipo ra'e” he'i íxupe hemimondo kwéry.

⁴Ijave kwéry opyta ramo Jerusalém-my:

—Ani pesê teĩ ko tetã-gwi, he'i. —Peyta katu pekwa-vy a-py, he'i Hesu íxupe kwéry. —Xe Ru nhe'ê amombe'u va'ekwe peẽ-my: “Ambou va'erã Nhe'ê Marangatu tee va'e” he'i va'ekwe xe-vy xe Ru.

⁵Upéa-gwĩ peha'arõ katu xe Ru remimbourã peẽ-my. Ha João Batista katu pene mongarai va'ekwe y-py. Ha ãy ae katu Nhandejáry omoĩ-tama kuri pende py'apy-py Nhe'ê Marangatu tee va'e. Pene mongarai jevy-ta vérami xe Ru, he'i íxupe kwéry Hesu.*

⁶Upéixa ramo Hesu ndive onhomoaty hemimondo kwéry:

—Eremosê-ta tipo imondo-vy Israel re'yí e'y, mbo'eháry, he'i íxupe hikwái. —Eremosê-ta tipo íxupe kwéry Israel kwéry ae omanda jevy hagwã ojóhehe, he'i oporandu-vy íxupe.

⁷Ha he'i Hesu:

—Nhandejáry omoĩ va'ekwe onhe'ê peteĩ áry-py omosê hagwã imondo-vy Israel re'yí e'y kwéry-pe. Nhandejáry nhe'ê-py ogwahê va'erã hi'áry. Ha ndoikwaa ukái peẽ-my araka'e pa omosê-ta íxupe kwéry. ⁸Ha pene rembiaporã katu amombe'u-ta peẽ-my. Nhandejáry ombogwejy-ta peẽ-my Nhe'ê Marangatu tee va'e oiko hagwã pende py'apy-py. Ombogwejy-ta ne mbopu'aka tee hagwã. Ne mbopu'aka tee rire, ereho va'erã eremombe'u mbe'u opa-rupi xe aikove jevymaha rehegwa nhe'ê. Xe mombe'u mbe'u va'erã Jerusalém tetã-my okwa va'e-pe. Judéia yvy-rupi oiko va'e-pe gwive xe mombe'u mbe'u va'erã, he'i. —Samaria yvy-rupi oiko va'e-pe gwive xe mombe'u mbe'u va'erã ave. Yvy apy gwive xe rehegwa nhe'ê ereraha va'erã xe mombe'u mbe'u-vy, he'i íxupe kwéry Hesu.

⁹Upéa omombe'u rire, oho. Ha'e kwéry hesa-rupi ojereroyvate jevy-ma oho-vy áry-rehe. Yvateve teve oho. Arai kupe-rupima oho jevy, ndohexavéi-ma íxupe hikwái.

¹⁰Hesu rapykwere-rehe joty oma'ê oi-vy hikwái. Upe jave onhembo'y oĩ ramo ijyke-rehe mokõi ijao morotĩ va'e. Kwimba'e nipo upe va'e ra'e. ¹¹He'i Hesu remimondo kwéry-pe,

—Ore rapixa kwéry, Galiléia pygwa va'e, ma'erã tipo pende rovayva yva yvate-koty peĩ-vy, he'i. —Ko va'e Hesu, a-rami jevy ogwejy va'erã ou-vy. Pehexa-ma íxupe kuri ojereroyvate ramo oho-vy pendéhegwĩ. Ojereroyvate hagwe-rami jevy ogwejy va'erã ou-vy, he'i Hesu remimondo kwéry-pe.

Matias omoirũ Hesu remimondo kwéry-pe opyta hagwã doze jevy

* 1:1 Lc 1.1-4 * 1:5 Mt 3.11; Mc 1.8; Lc 3.16; Jo 1.33; At 11.16

¹² Upe ramo hemimondo kwéry oje'oiipa jevy gwetakwe reheve. Oliveiras vyvaty-gwi ogwejy oje'oiipa hagwā Jerusalém tetā-my. Namombyry etéi opyta upe-gwi. Hi'agwī voi opyta. Upéa-gwī ogwahē pya'e oje'ói-vy Jerusalém tetā-my. ¹³ Upe-py oike rire ojeupi okoty yvate-py opyta haty-py. Oikepa upe-py hemimondo kwéry, Pedro, João, Tiago, André ndive. Oike ave Filipe, Tomé ndive. Oike ave Bartolomeu, Mateus ndive. Oike ave Tiago, Alfeu ra'y va'e, Simão Zelote va'e, Judas, Tiago ra'y va'e ndive oike. ¹⁴ Ha'e kwéry meme oikepa upe-py. Gweta kwéry reheve peteixa omondo mondo Nhandejáry-pe onhe'ê. Oração apo-vy hetea'e voi. Nainhate'ýiry voi. Hendive kwéry onhomboty kunhagwe. Hesu sy héry Maria omoirū ave íxupe kwéry. Tyvýry omoirū ave íxupe kwéry.

¹⁵ Oração ojapo meme hikwái. Ha peteí áry-py heta ojogweroaty jave, cento e vinte-rupi oí ramo upe-py, Pedro opu'ã omombe'u hagwā. Entéro va'e rovagwy-gwi opu'ã. Upéi he'i íxupe kwéry:

¹⁶ —Amombe'u-ta peē-my, xe re'ýi kwéry. Yma voi Nhe'ê Marangatu tee va'e ome'ê va'ekwe myamyri Davi-pe inhe'ērā omombe'u hagwā Judas amyri rekorā, omotenonde hagwā oiko hagwā. Anhetegwa voi ra'e. Upéa-gwi yma omombe'u hagwe-rami, āy oikopa voi kuri, he'i Pedro. ¹⁷ —Judas amyri katu Hesu remimbo'ekwe, nhande javegwa voi. Hembaporā ome'ê íxupe va'ekwe Hesu. Nhande-vy ome'êha-rami ome'ê ave íxupe va'ekwe. ¹⁸ Upéa oho va'ekwe omombe'u Hesu pyhyharā-pe. Kipy oime omombe'u ipyhyharā-pe. Ha upe rire katu ipyhy-vy Hesu-pe ogweraha-ma. Ojapo vai voi. Hesu momb'uhare repyke ogweraha Judas ojogwa hagwā vvy. Upe rire yvate-gwi ho'a upe-py vvy-py. Osoro ramo hye, ho'apa hyekwe po'ikwe vvy-py omano. ¹⁹ Omosarambi herakwā heraha-vy enterove Jerusalém tetā-rupi oiko va'e-pe. Omano va'ekwe ha-py ha'e ae onhe'ê-py ohenói Aceldama. Upéa he'ise, Tugwy reheve vvy va'e oí ha-py.* ²⁰ Ha Judas rehegwa omoí uka va'ekwe Nhandejáry kwatia-rehe. Upe kwatia nhambohéry Salmo. A-rami hesegwarā omotenonde va'ekwe:

“Topyta nandi hekwegwe. Ani oiko teí avave upe-py. Hekoviare ae tojapo hembiapokwe.”*
Upéixa voi omoí uka va'ekwe kwatia-rehe Nhandejáry, he'i Pedro imombe'u-vy.

²¹ Upéi he'i jevy íxupe kwéry Pedro:

—Upéa-rehe ae tanhane moirū hekoviare japyta jevy hagwā doze, he'i. —Jaiporavo katu Hesu nhe'ê renduha va'e voi, nhane ndive oiko va'ety. ²² Hesu ndive oiko va'ekwe, João oporomongarai joty ramo. Ojererovate peve Hesu ndive oiko meme va'e. Upeixagwa nhande jaipota nhane moirū omombe'u hagwā nhane ndive Hesu oikove jevymaha, he'i íxupe kwéry Pedro.

²³ Upéa he'i rire mokōi oiporavo hikwái. Omonhembo'y ha'e kwéry gwovái imoí-vy. Oiporavo mokōi kwimba'e. Peteí héry va'e José Justo. Héry joapy Barsabás. Oiporavo ave Matias. ²⁴ Upe ramo ombojeupi onhe'ê Nhandejáry-pe hikwái:

—Nde ko opamba'e ereikwaa va'e, ore Járy. Ore py'a-py ndaipóri okanhy va'e ndéhegwi. Kiva'e po ne rembiporavo ehaxa uka ore-vy oroikwaa hagwā ore irurā, he'i. ²⁵ —Ha Judas katu ne remimondokwe ave. Ha oheja va'ekwe gwembaporāgwe. Oheja oho hagwā anháy ndive oiko, he'i Nhandejáry-pe hikwái.

²⁶ Upéixa ramo mokōi téry omoí hyru-py. Omboveve peteí ho'a hagwā. Ho'a ramo peteí, ehaxa ojohu héry:

—Matias ra'e, he'i ojóupe.

Upéa-gwi omoirū íxupe kwéry opyta hagwā doze jevy.

2

Nhe'ê Marangatu tee va'e ipy'a omohynhê joa Hesu nhe'ê renduha-pe gwive
(At 4.31; 8.15; 10.44; 19.2)

* 1:19 Mt 27.6-8 * 1:20 Sl 69.25; 109.8

¹ Oiko-ma areteguasu héry va'e Pentecostes. Upéa áry-py Hesu nhe'ê renduha gwive peteĩ henda-py ojogweroaty okwa-vy.* ² Upe-ma ramo áry gwigwa ogwejy ou-vy. Yvytugwasu-rami ou: “Tyryryry” he'i ou-vy. Oike koty-py ogwapy okwa-vy ha-py. Ojohupa koty. ³ Peteĩ teĩ va'e akã ári ohexa tata rendy po'i ramigwa. ⁴ Upe-ma ramo ipy'a omohynhê joa íxupe kwéry Nhe'ê Marangatu tee va'e. Omohynhêmba rire nhe'ê ambue-py onhe'ê-ma hikwái. Omonhe'ê-ma íxupe kwéry Nhe'ê Marangatu tee va'e. Upéa-gwi nhe'ê ambue-py onhe'ê peteĩ teĩ hikwái.

⁵ Upe ramo heta judeu kwéry oĩ Jerusalém tetã-my. Opa opa-rupigwi ou va'ekwe oĩ upe-py. Nhandejáry-pe omboete hagwã ou va'ekwe. ⁶ Yvytugwasu ramigwa ohendu ramo ojogweroatypa hikwái:

—Xe nhe'ê-py voi onhe'ê aipo va'e. Xe nhe'ê voi aipo va'e, he'i peteĩ teĩ henduha. —Mba'éixa po onhe'ê xe nhe'ê-py? Mba'éixa po oikwaa hagwã? oporandu randu-vy ojóupe hikwái. ⁷ Upéa-gwi opondera joa hese hikwái:

—Ma'erã tipó gwí-rami? Galiléia pygwa meme gwí va'e ra'e, onhe'ê okwa-vy va'e, he'i.

⁸ —Mba'éixa oikwaa nhane nhe'ê? Peteĩ teĩ nhane nhe'ê-py onhe'ê hikwái ra'e, he'i ojóupe opondera-vy hese. ⁹ —Nhande jaju va'ekwe a-py opa-rupigwi jaju va'ekwe. Nhande ko Pártia yvy pygwa, Média yvy pygwa, Elão yvy pygwa, Mesopotâmia yvy pygwa, Judéia yvy pygwa, Capadócia yvy pygwa, Ponto yvy pygwa, Ásia yvy pygwa, ¹⁰ Frigia yvy pygwa, Panfilia yvy pygwa, Egito yvy pygwa. Cirene de Líbia yvy pygwa ave. Nhande ko Roma tetã mygwa, ¹¹ judeu va'e, judeu reko-rupi jaikose va'e ave. Nhande Creta yvy pygwa, Arábia yvy pygwa ave. Opa-rupigwi voi jaju va'ekwe nhande kwéry. Ha peteĩ teĩ nhane nhe'ê-py katu onhe'ê ramo, nhahendu-ma. Nhandejáry rembiapo porã porã ipu'aka reheve omombe'u ramo, nhahendu, he'i judeu kwéry opa-rupigwi ou va'ekwe.

¹² Upéixa ramo opondera ndera Hesu nhe'ê renduha va'e-rehe gwive. Ha nainhe'ê jojái judeu kwéry:

—Mbava'e po oiko-ta? Mbava'e po oiko-ta? oĩ he'i va'e ojóupe.

¹³ —Oka'u randai upe va'e, oĩ he'i va'e mo'ã opuka-vy hese.

Pedro omombe'u judeu kwéry-pe Nhandejáry rehegwa nhe'ê porã

¹⁴ Upéixa ramo Pedro opu'ã onhembo'y oĩ-vy. Onze inhirũ ijave opu'ã. Hatã onhe'ê enterove ohendu hagwã:

—Pejeapysaka katu pehendu porã hagwã xe nhe'ê, xe re'ýi kwéry, Jerusalém-my oiko va'e gwive ave. Upeixagwa ore nhe'ê va'e voi. ¹⁵ Ndoroka'úiry teĩ, he'i íxupe kwéry. —“Oka'u” ere mo'ã kuri ore-rehe. Ndayvate etéi vyteri kwarahy. A-rami ha-py ndajaka'uha órai vyteri, he'i íxupe kwéry. —Avave voi ndoka'úiry kóa óra. ¹⁶ Ha ãy ojehu va'e katu amombe'u-ta peẽ-my. Aipo va'e rehegwa yma omoĩ va'ekwe kwatia-rehe. Nhandejáry nhe'ê-py omombe'u va'ety héry va'e Joel omoĩ va'ekwe. Yma omohenonde va'ekwe ãy oiko hagwã:

¹⁷ “He'i Nhandejáry: Enterove va'e pegwarã ambogwejy-ta ime'ê-vy Nhe'ê Marangatu tee va'e. Haimete opa-tama ko vvy oiko-ta, he'i. Xe nhe'ê-py nde ra'y kwéry xe mombe'u va'erã, nde rajy kwéry xe mombe'u ave va'erã. Peẽ karia'y kwéry va'e, peteĩ va'e upéte ajehexa uka-ta. Xe rehegwa ohexa-ta ikéra-py peẽ tuja kwéry va'e. ¹⁸ Xe rembigwái kwéry-pe kwimba'e va'e, kunha va'e ave ambogwejy-ta ime'ê-vy Nhe'ê Marangatu tee va'e. Xe nhe'ê-py xe mombe'u va'erã. ¹⁹ Hexapyrã-rupi xe rembiapo-ta áry-rehe. Yvy-py ave xe rembiapo-ta enterove opondera hagwã ahexa uka-ta, he'i. Ambojekwaa-ta ko vvy-rehe tugwy. Tata ambojekwaa-ta ave. Yvytu-rupi oho jave tatatĩ ahexa uka-ta. ²⁰ Ha kwarahy katu onhepytũ-ta. Hugwy-ta jasy. Upe rire ae agwejy jevy-ta aju-vy ko vvy-py, he'i Nhandejáry. Xe pu'akaha reheve aju va'erã upe áry-py. Ndaipóri avave xe rexa e'ý va'erã. Entéro va'e oĩ va'e gwive ko vvy ári xe rexa-ta aju ramo, he'i. ²¹ Upéixa ramo opa-rupi xe réry renoiha gwive onheresende-ta. Aresende-ta íxupe, he'i Nhandejáry.”*

* 2:1 Lv 23.15-21; Dt 16.9-11 * 2:21 Jl 2.28-32

Upéixa voi Nhandejáry nhe'ê kwatia-rehe oĩ va'e, he'i Pedro omombe'u-vy.

²² Upe rire he'i jevy íxupe kwéry:

—Pejeapysaka porã katu ko xe nhe'ê-rehe, xe re'ýi kwéry. Amombe'u-ta peẽ-my Hesu rehegwa nhe'ê. Hesu Nazaré pygwa va'e ko Nhandejáry rembiporavopyre voi, hemimbojekwaa ave. Hexapyrã-rupi hembiaipo porã hagwã he'i va'ekwe íxupe Nhandejáry. Ojapo uka va'ekwe íxupe hembiaporã. Nhane rembiexa e'ý ave ojapo uka va'ekwe íxupe. Upéixa ojapo uka va'ekwe íxupe pene pa'ũ-my. Enterove hexapyrã-rupi hembiaipo ojapo uka. He'i hese kente kwéry: “Hesu ko Nhandejáry rembiporavo nipo ra'e” he'i heko rexa-vy. Upéa peẽ peikwaa voi.

²³ —Ha peẽ katu pehupi uka va'ekwe kurusugwasu-rehe imoĩ-vy pejuka hagwã Hesu-pe. Iporayhu e'ý va'e po-py pejuka uka va'ekwe íxupe. Ha Nhandejáry omohenonde voi va'ekwe Hesu rekorã. Ojehu va'erã oikwaa voi va'ekwe. Hembiaiyhu ramo jepe, oipota voi omano. Upéa-gwi oheja omoĩ íxupe kurusugwasu-rehe. ²⁴ Ha ojejuka rire, omoingove jevy íxupe Nhandejáry. Ha'e ae katu omano ete jepe ndikatúí omano are oĩ-vy onhemoĩ asy reheve. Ndaipu'akái hese manoha. Upéa-gwi pya'e omoingove jevy íxupe Nhandejáry. ²⁵ Yma ete myamyri Davi omohenonde va'ekwe Hesu rekorã hese. Heseogarã omoĩ va'ekwe kwatia-rehe kóa he'i-vy:

“Ahexa Nhandejáry-pe xe yke-rehe meme oĩ ramo. Xe akatúa-koty meme oĩ xe mbopy'a ryrýi e'ý hagwã. ²⁶ Upéa-gwi avy'a xe py'agwapy-gwi. Avy'a etereiha amombe'u. Ndaxe rete kyhyje mo'ávêi-ma aiko-vy. Naxe mytu'e'ý mo'ávêi-ma. ²⁷ Amano ramo, ndereheja mo'airy xe nhe'êgwẽ oiko hagwã onhemondo haty-py. Ndereheja mo'airy ine nde ra'y marangatu va'e retekwe. ²⁸ Erehexa uka voi xe-vy tape porã amano e'ý hagwã. Xe mbovy'a eterei-ta ne ndive aime meme ramo.”*

Upéixa voi omoĩ va'ekwe kwatia-rehe myamyri Davi, he'i Pedro omombe'u-vy.

²⁹ Upéi he'i jevy íxupe kwéry:

—Pejeapysaka porã katu ko xe nhe'ê-rehe, xe re'ýi kwéry. Nhane ramói Davi katu omano va'ekwe. Hetekwe omoĩ va'ekwe itakwa-py. Ha ãy ete peve oĩ ijyta.

³⁰ —Nhandejáry nhe'ê-py omombe'u va'ekwe oiko-vy. Ko va'e jaikwaa voi. Yma ete he'i va'ekwe Davi-pe Nhandejáry: “Amombe'u-ta nde-vy hupigwa va'e. Ndaxe apu mo'ãi nde-vy” he'i. “Petei ne remiarirõ omoingove-ta mburuvixarã nde rekovia ramo” he'i íxupe Nhandejáry. Ohendu ramo: “Hupigwa va'e voi Nhandejáry nhe'ê” he'i va'ekwe Davi.*

³¹ —Ogwerovia-gwi Hesu rekorã omotenonde va'ekwe: “Amano ramo, ndereheja mo'airy ine xe retekwe” he'i ramo, omotenonde va'ekwe Hesu rekorã. Hesu Cristo oikove jevymaha va'e rehegwa nhe'ê omombe'u va'ekwe. Hesu rekorã omohenonde va'ekwe Davi, he'i Pedro imombe'u-vy.

³² Upéi he'i jevy íxupe kwéry:

—Pehendu katu. Ko va'e Hesu, omoingove jevy kuri íxupe Nhandejáry. Ore kwéry katu hexahare. Orohexa voi oikove jevy rire íxupe. ³³ Onhemoiingove jevy rire, onhemomba'egwasu ete-ma Nhandejáry yke-rehe. Are-ma he'i va'ekwe Hesu-pe Túvy: “Ambogwejy uka-ta nde-vy Nhe'ê Marangatu tee va'e” he'i íxupe Nhandejáry, he'i Pedro imombe'u-vy.

Upéi he'i jevy judeu kwéry-pe:

—Áy ae ombogwejy-ma kuri Nhe'ê Marangatu tee va'e-pe. Ha peẽ katu pehexa-ma. Hemimbogwejy va'e pehendu-ma ave. Pene rembiexa gwive, pene remiendu gwive ave Nhandejáry remimbogwejy voi, he'i. ³⁴ —Ha myamyri Davi katu ndojereroyvatéi voi va'ekwe yváy-py. A-rami ae he'i va'ekwe Davi:

“Nhandejáry he'i xe Jary-pe: Egwapy katu xe yke-rehe. ³⁵ Xe orombopu'aka-ta ne a'e'ýha-rehe. Orombopu'akapa peve eregwapy-ta ereĩ-vy xe akatúa koty, he'i.”*

Upéixa Davi omombe'u va'ekwe Hesu rekorã, he'i Pedro imombe'u-vy.

³⁶ Upéi he'i jevy judeu kwéry-pe:

* 2:28 Sl 16.8-11 * 2:30 Sl 89.3-4; 132.11 * 2:35 Sl 110.1

—Davi he'i va'ekwe gwive anhetegwa voi. Toikwaapa katu Israel remiariröre judeu kwéry va'e. Upe va'e Hesu pehupi uka va'ekwe kurusugwasu-rehe pejuka uka hagwã, omomba'egwasu ete-ma joty íxupe Nhandejáry. Omomba'egwasu joty íxupe, nhane ruxivarã omoingo-vy. “Xe rembiporavo va'e joty voi katu” he'i Hesu-rehe Nhandejáry, he'i Pedro judeu kwéry-pe Nhandejáry nhe'ë omombe'u-vy.

³⁷Upéa nhe'ë ohendu ramo ojepy'ajopy joa hikwái:

—Mbava'e po orojapo-ta ãy, ore re'í kwéry? he'i Pedro-pe. Outro Hesu remimondo va'e kwéry-pe oporandu ave gwembiaporã-rehe.

Upe ramo he'i íxupe kwéry Pedro:

³⁸—Perova katu pende rekoha, he'i. —Penhemongarai peteĩ teĩ Hesu Cristo réry-py, omboye hagwã pendéhegwi pene rembiapo vai va'ekwe. Upe rire ae ombogwey-ta ime'ë-vy peë-my Nhe'ë Marangatu tee va'e. ³⁹Yma Nhandejáry he'i va'ekwe: “Ambogwey-ta ime'ë-vy peë-my pende ra'y kwéry-pe ave. Mombyry rupigwa-pe gwive ave ambogwey-ta Nhe'ë marangatu tee va'e. Entéro xe remienói-pe gwive ou hagwã xe ha-py ambogwey-ta ime'ë-vy” he'i va'ekwe Nhandejáry, he'i Pedro imombe'u-vy.

⁴⁰Upéi onhemonhe'ëve éve íxupe kwéry:

—Tekoha-rami e'ý pende rekoha. Perova katu pende rekoha, he'i. —Ani pemoirũ teĩ pende rapixa hekoha vai va'e, he'iri iri judeu kwéry-pe Pedro.

Oĩ hetave tave omombe'u va'e.

⁴¹Upe ramo inhe'ë renduha va'e onhemongarai-ma. Upe va'e áry-py heta-ma oĩ inhe'ë renduha. Mbohapy mil-rupi oĩ. Ha Pedro kwéry-pe omoirũ-ma hikwái. ⁴²Hesu remimondo kwéry ndive oiko meme ohendu hagwã inhe'ë. Onhemoirũ meme. Hendive mante oiko. Onhondive okaru. Onhondive omondo mondo Nhandejáry-pe onhe'ë. ⁴³Upe-py oĩ va'e gwive opondera hese:

—Mbava'e tipo ko va'e? Mbava'e tipo ko va'e? he'i ojóupe.

Ha hemimondo kwéry heta hembiaपो porã hexapyrã-rupi. Heta ojapo nhane rembiexa e'ý. Upéa-gwi enterove va'e opondera hese.

Hesu reroviaha gwive onhondive oiko

(At 4.32-35)

⁴⁴Ha Hesu reroviaha gwive onhondive oiko: “Kóva ko va'e xe mba'e” peteĩ teĩ nde'ivéi-ma ojóupe. ⁴⁵Ogweroko va'e ovente ome'ë hagwã hepykwe. Peteĩ teĩ va'e-pe ome'ë hemikotevê. ⁴⁶Ko'ëmba ëmba oho meme oje'ói-vy Nhandejáry róga kakwaa-py. Peteĩ teĩ va'e róga-py omboja'o ja'o ojóupe onhondive okaru hagwã. Ovy'a joa okaru-vy. Naima'e rakate'ýiry. ⁴⁷Nhandejáry-pe omboete ete oiko-vy va'e. Upéixa ramo ogwerovy'a joa íxupe kwéry kente kwéry. Ha'e kwéry hetave tave oho-vy. Ogwerovia rovia va'e omoirũ íxupe kwéry. Nhandejáry nhe'ë-py ogwerovia.

3

Ogwata e'ý va'e ogwata jevy-ma

¹Peteĩ áry-py ka'arugwasu-ma ramo, Pedro João ndive, Hesu remimondo va'e, ogwata oho-vy. Nhandejáry róga kakwaa-py oho. Upéa óra-py oração jajapo va'e upe-py. ²Ha óga kakwaa renonde-py oĩ ogwata e'ý va'e. Imitã gwive ãy peve ndogwatái. Ogweraha meme omoĩ íxupe upe-py okégwasu renonde-py, héry okëndusu porã. Oike va'e-pe gwive ojerure hagwã omoĩ upe-py. ³Ha upéi katu oho upe-py Pedro João ndive. Oho oike hagwã upe-py. Ha ogwata e'ý va'e katu ohexa íxupe. Oike ramo Pedro João ndive, ojerure íxupe imba'erã-rehe. ⁴Ha'e kwéry, mokóive va'e, ohexa katu íxupe. Ogwata e'ý va'e-pe ohexa katu:

—Ema'ë katu ore-rehe, he'i íxupe.

⁵Upe ramo oma'ë mokóive va'e-rehe: “Omba'e me'ë-tama xe-vy” he'i mo'ã ojóupe.

⁶—Ndaxe pirapiréi ame'ë hagwã nde-vy. Ndaxe platavéi, he'i íxupe Pedro. —Ko va'e areko va'e ame'ë-ta nde-vy. Epu'ã katu egwata Hesu Cristo Nazaré pygwa réry-py. Epu'ã katu ogwata, he'i íxupe Pedro.

⁷Upe rire ijakatúa-rehe oipopyhy imopu'ã-vy íxupe. Upe-ma ramo ipynhu'ã ipy reheve imbaraete-ma voi íxupe. ⁸Opo voi opu'ã-ma. Ogwata-ma. Ogwata reheve-ma voi oike óga kakwaa-py. Onhondive oike. Opo opo omboete eterei-vy Nhandejáry-pe. ⁹Enterove ohexa íxupe ogwata-ma ramo, omboete-ma ramo Nhandejáry-pe:

¹⁰—Imba'e jerure va'evy ko upe va'e, he'i ohexa-vy íxupe. —Okëndusu porã renonde-py ogwapy va'evy ko upe va'e, he'i. —Mbava'e po ojehu upe va'e-pe? he'i oporandu randu-vy ojóupe hikwái.

Ohexa ramo ogwata-ma ramo, opondera eterei hese,

—Mba'éixa po ombogwata rei hajy jeapa va'e-pe, he'i opondera-vy hese.

Pedro omombe'u judeu kwéry-pe Nhandejáry rehegwa nhe'ẽ

¹¹Ha upe ogwata e'ý tuja va'e ãy katu ogwata-ma. Omoirũ-ma Pedro João ndive. Mokõive va'e-pe oipyyhy jovái ramo, oriparapa ou-vy upe-py oĩ va'e gwive ohexa hagwã íxupe. Opondera eterei hese hikwái. Oupa Nhandejáry róga kakwaa mopekwa pekwãpyre-py hikwái. Upéa imopekwãpyre ohenói Salomão. Upe-py oupa hikwái. ¹²Ohexa ramo, onhe'ẽ íxupe kwéry Pedro:

—Ma'erã tipo pepondera hese, xe re'ýi kwéry? he'i Israel remiarirõre judeu kwéry-pe. —Ma'erã tipo ore rexa katu katu pekwa-vy? oporandu íxupe kwéry. —Ore nhe'ẽ-py katu norombogwatáry íxupe. Noromopu'áiry imbogwata-vy íxupe ore rekoha porã-gwi: “Pedro ombogwata” peje mo'ã hese. Upéa-gwi ore rexa katu katu pekwa-vy, he'i íxupe kwéry.

¹³—Hesu nhe'ẽ-py ae voi ogwata. Ha'e Nhandejáry remimomba'egwasu voi. Nhandejáry Abraão Járy, Isaque Járy, Jacó Járy, nhane ramói kwéry Járy ave. Áy omomba'egwasu voi gwembigwái Hesu-pe. Ha peẽ katu pembojevyy asy voi va'ekwe: “Iporã ojevuka” peje va'ekwe hese mburuvixagwasu Pilatos-pe. Ha mburuvixa opoise jevy mo'ã íxugwi. ¹⁴Upe ramo pembojevyy íxupe. Ha'e heko marangatu ramo jepe, ojevavy e'ý ramo jepe ave, pembojevyy asy joty voi íxupe. Pejerure mburuvixa-pe opoi hagwã imondo-vy peteĩ oporojuka va'ekwe-gwi. ¹⁵Ha nhane moingove va'ety katu pejuka. Ha Nhandejáry omopu'ã jevy íxupe. Oikove jevy ramo, ore kwéry hexahare. ¹⁶Ko va'e kwimba'e peẽ pehexa va'e, peikwaa va'e ave, ogwata e'ý tuja va'e, ãy katu Hesu réry-py imbaraete jevy. Hesu-rehe ojerovia-gwi okwerapa-ma voi. Upéa rexaha peẽ, he'i íxupe kwéry.

¹⁷—Peikwaa e'ý reheve pene rembiapo vai va'ekwe, peẽ, xe re'ýi kwéry. Oikwaa e'ý reheve pende ruvixa kwéry rembiapo vai va'ekwe ave. Upéa aikwaa voi xe, he'i Pedro imombe'u-vy.

¹⁸Upéi he'i jevy judeu kwéry-pe:

—Yma ete Hesu rekorã omõi va'ekwe kwatia-rehe Nhandejáry nhe'ẽ-py omombe'u va'ety gwive: “Nhandejáry rembiporavo va'e oiko asy va'erã” he'i va'ekwe, imohenonde-vy hekorã. Áy katu oiko-ma voi Nhandejáry nhe'ẽ-py, he'i. ¹⁹⁻²⁰—Upéa-gwi pemboasy katu pene rembiapo vaikwe. Perova katu pende rekoha peiko hagwã Nhandejáry reko-rupi, omboyke hagwã pendéhegwi pene rembiapo vaikwe, pene mbopy'agwapy jevy hagwã, ombou hagwã ime'ẽ-vy peẽ-my hembiporavo va'e Hesu Cristo. ²¹Ha'e oiko va'erã Nhandejáry ndive yváy-py. Upe-py Hesu Cristo oiko va'erã entéro Nhandejáry nhe'ẽ-py omombe'u va'ety imarangatu va'e he'i va'ekwe gwive oiko hagwã: “Nhandejáry omoatyrõmba ranhe va'erã voi” he'i va'ekwe. “Omoatyrõmba rire ae, ombou jevy va'erã Hesu-pe” he'i va'ekwe, he'i Pedro imombe'u-vy.

²²Upéi he'i jevy judeu kwéry-pe:

—Ha myamyri Moisés omombe'u va'ekwe Hesu rekorã:

“Xe ramigwa omoingo va'erã Nhandejáry inhe'ẽ-py omombe'u va'erã. Pene pa'ũ-gwi omoingo va'erã peteĩ va'e omombe'u va'erã Nhandejáry nhe'ẽ-py. Xe moingo

hagwe-rami omoingo va'erã. Pehendupa ete va'erã hemimombe'urã gwive peẽ-my.* ²³ Entéro íxupe ohendu e'ỹ va'e gwive, omboyke va'erã Nhandejáry gwe'í kwéry-gwi, opa hagwã-pyma imondo-vy"*
he'i va'ekwe Moisés, he'i Pedro omombe'u-vy.

²⁴ Upéi he'i jevy Pedro:

—Upéixa ave Nhandejáry nhe'ẽ-py omombe'u va'ety gwive omombe'u va'ekwe Hesu rekorã. Samuel amyri omombe'u va'ekwe. Upéi Samuel amyri nhe'ẽgwẽ omombe'u mbe'u joty äy peve. Peteixa omombe'u va'ekwe. Ogwerojoja joa onhe'ẽ äy oiko va'erã momba'u-vy, Hesu rekorã momba'u-vy. ²⁵ Upe va'e Nhandejáry nhe'ẽ-py omombe'u va'ety pende re'í kwéry va'e voi. Upéa-gwi inhe'ẽ peẽ-my gwarã voi ave. Yma ete onhe'ẽ va'ekwe Nhandejáry myamyri pene ramói kwéry-pe:

“Peteĩ ne remiarirõ joapyri pyri-rehe ha-py ahovasa va'erã enterove ko yvy ári oĩ va'e-pe gwive”*

he'i va'ekwe Abraão amyri-pe, Hesu rekorã momba'u-vy. Ohendu ramo upe inhe'ẽ, omoporã. Abraão pegwarã voi inhe'ẽ. Ha Abraão pene ramói voi. Upéa-gwi upe inhe'ẽ peẽ-my gwarã voi ave, he'i imombe'u-vy Pedro.

²⁶ Upéi he'ive Pedro:

—Ha ko'ánga katu oiporavo Nhandejáry gwembigwairã Hesu-pe. Omoingove jevy-ma rire íxupe, peẽ-my ranhe ombou pende rovasa hagwã, omboyke hagwã peteĩ teĩ pendéhegi pene rembiapo vai va'ekwe, he'i judeu kwéry-pe Pedro.

4

Pedro João ndive onhemõ preso

¹ Ha upéi katu Pedro João ndive onhe'ẽ oĩ-vy Nhandejáry róga py-py, óga kakwaa va'e py-py. Ne'írã omombe'upa vyteri ramo, ogwahẽ ou-vy pa'i ruvixa kwéry. Ogwahẽ ave polícia ruvixa. Upe va'e polícia onhangareko va'e Nhandejáry róga kakwaa-rehe. Ogwahẽ ave saduceu kwéry. ² Mokõive va'e nhe'ẽ ogwerooxy: “Hesu oikove jevy-gwi, nhande kwéry jaikove jevy va'erã voi ave” he'i ra'e omombe'u-vy kente kwéry-pe gwive Pedro João ndive. Upéa nhe'ẽ ombopoxy saduceu kwéry-pe.

³ Upéa-gwi mokõive va'e-pe oipyhy hikwái oapresa hagwã íxupe. Ka'aru ete-ma. Ko'ẽmba peve oapresa imoĩ-vy. ⁴ Ha heta voi oĩ inhe'ẽ reroviaha. Cinco mil kwimba'e va'e-rupi oĩ inhe'ẽ renduha.

⁵ Ko'ẽmba-ma ojogweroaty Jerusalém-my judeu ruvixa kwéry. Ojogweroaty ave gwí judeu kwéry remimboete. Judeu rekombo'ehaty kwéry ojogweroatypa ave. ⁶ Hendive kwéry oĩ pa'i ruvixagwasu héry va'e Anás. He'í oĩ ave, héry va'e Caifás, João, Alexandre. He'í gwive oĩ ave. ⁷ Upe ramo ohenói uka onhemõ preso va'ekwe ou hagwã. Ou ramo gwovagwy-py omonhembo'y imoĩ-vy íxupe kwéry. Upéi omonhe'ẽ íxupe:

—Kiva'e nhe'ẽ-py tipo pejapo koixagwa ra'e? Kiva'e réry-py pejapo koixagwa ra'e? he'i íxupe kwéry oporandu randu-vy.

⁸ Upe-ma ramo ipy'a omohynhẽmba íxupe onhe'ẽ hagwã Nhe'ẽ Marangatu tee va'e. Upéi omombe'u judeu ruvixa kwéry-pe Pedro:

⁹ —Äy katu xe monhe'ẽ voi ogwata e'ỹ va'e-rehe. Okwera porãmaha-rehe xe monhe'ẽ: “Mba'éixa tipo okwera?” ere kuri xe-vy ereporandu-vy. ¹⁰ Néi, amombe'u-ta peẽ-my peikwaa hagwã, peẽ kwéry mburuvixa kwéry va'e. Entéro Israel remiarirõre judeu ruvixa kwéry-pe amombe'u-ta ave. Ko va'e kwimba'e, Hesu Cristo Nazaré pygwa réry-py voíte opu'ã okwera porã. Ha peẽ katu pehupi va'ekwe Hesu-pe imoĩ-vy kurusugwasu-rehe ijuka-vy. Ha pene rembiupikwe-pe katu omoingove jevy-ma voi Nhandejáry. Ha'e héry-py voi onhembo'y jevy-ma ko va'e kwimba'e, ogwata e'ỹ tuja va'e. Pende rovagwy-py opu'ã-ma oĩ-vy. ¹¹ Yma omoĩ va'ekwe kwatia-rehe he'i-vy:

* 3:22 Dt 18.15-16 * 3:23 Dt 18.19 * 3:25 Gn 22.18

“Ndovaléi, he'i ogapoha ita-rehe. Ha upe ita katu ojeporu ojepyta-hoha ramo. Óga jepyta-hoha voi ita”^{*}
he'i va'ekwe, he'i Pedro omombe'u-vy.

Upéi he'i jevy Pedro:

—“Ita” he'i ramo, Hesu rekorã omombe'u. “Ogapoha” he'i ramo, pene rekorã omombe'u va'ekwe. ¹²Áy katu ko yvy-rupi ndaipóri ha'e héry ramigwa. Ambue va'e réry nomoĩry nhande-vy Nhandejáry nhane resende hagwã. Hesu réry mante ae nhahenói ramo, nhane resende va'erã, he'i judeu ruvixa kwéry-pe Pedro.

¹³Upe ramo mburuvixa kwéry ohendu joa inhe'ẽ. Onhembopy'agwasu reheve mokõive va'e remimombe'u ohendu joa hikwái. He'i ojóupe:

—Ndoikéi ramo jepe escola-py, oikwaa porã voi onhe'ẽrã. Imbo'eháry ndoikói ramo jepe, hi'arandu porã voi, he'i ojóupe hese kwéry. Oikwaa porã onhe'ẽrã-gwi, opondera hese hikwái: —Hesu ndivegwa voíte ra'e upe va'e, he'i ojóupe hese hikwái.

¹⁴Upéi oma'ẽ upe ogwata e'y tuja va'e-rehe Pedro yke-rehe onhemb'o'y oĩ-vy ramo. Okwera porã-gwi nonhe'ẽ mbojevvy mo'ái íxupe hikwái. Mba'eve nde'íry íxupe. ¹⁵Upéixa ramo, ombojevvy imondo-vy opa'ũ-gwi hikwái. ¹⁶Osẽ rire he'i ojóupe:

—Mbava'e tipo jajapo-ta hese? he'i oporandu randu-vy ojóupe hikwái. —Hexapyrã-rupi voi hembia-po porã, he'i hese. —A pygwa, Jerusalém-my oiko va'e gwive oikwaa-pa voi. Upéa-gwi ndikatúí nhande apu hese. ¹⁷Ha ndajapotavéi herakwã oho mombyry-rupi: “Anive katu erenhe'ëve teĩ Hesu réry-py ereiko-vy. Upéixa erejapo ramo orogwerekó asy arã” ja'e katu mokõive va'e-pe, he'i ojóupe judeu ruvixa kwéry.

¹⁸Upéi ohenói jevy oike hagwã. Oike rire, he'i íxupe:

—Anive katu erenhe'ëve teĩ ereiko-vy Hesu réry-py. Ani ereporombo'eve teĩ heko-rupi, he'i onhe'ẽ poxy-vy íxupe onhemonhe'ẽ-vy.

¹⁹Ohendu ramo inhe'ẽ, he'i mburuvixa kwéry-pe Pedro João ndive:

—Iporã tipo orohendu pene nhe'ẽ orohendu e'y hagwã Nhandejáry nhe'ẽ? he'i. —Aipo ramo mbava'e tipo he'i-ta Nhandejáry orohendu ramo pene nhe'ẽ? Pemombe'u katu ore-vy, he'i íxupe. ²⁰—Ore rembiexagwe, ore remiendukwe oromombe'u meme va'erã. Norokirirĩ mo'áiry voi, he'i mburuvixa kwéry-pe.

²¹Upe rire he'i íxupe:

—Anive eremombe'u Hesu réry-py. Upéixa erejapo ramo orogwerekó asy arã, he'iri iri onhe'ẽ poxy-vy íxupe hikwái.

Upéi katu opoi íxugwi oho hagwã:

—Tereho katu, he'i íxupe ombohassa asyse mo'ã rire íxupe.

Nombohassa asy jepéiry íxupe. Ha upe pygwa onhombóaty va'e gwive omboete okwa-vy va'e Nhandejáry-pe. Ojehu va'ekwe-rehe omboete. Upéa-gwi mburuvixa kwéry omosẽ rei imondo-vy. ²²Ha ogwata e'y tuja va'e katu hexapyrã-rupi okwera va'e ituja-ma va'e voi. Quarenta-gwi ogwerekove va'e ro'y. Upéa-gwi kente kwéry omboete tee voi Nhandejáry-pe.

Hesu rerovíaha gwive peteixa omondo Nhandejáry-pe onhe'ẽ

²³Upe-ma ramo Pedro João ndive oho jevy gwe'yí kwéry ha-py. Pa'i ruvixa he'i va'ekwe omombe'u. Judeu ruvixa he'i va'ekwe omombe'u ave. ²⁴Ohendu ramo, peteixa omondo mondo joa hikwái Nhandejáry-pe onhe'ẽ:

—Nde ko, ore Járý, nde pu'aka va'e voi enterove va'e-rehe, he'i omboete-vy. —Nde áry vvy ygwasu ave apoha. Hesegwa gwive ijapoha voi nde, he'i omboete-vy.^{*}

²⁵—Yma ete nhane ramói Davi amyri-pe ne rembigwái-pe ereme'ẽ va'ekwe inhe'ẽrã. Ombo'e va'ekwe íxupe onhe'ẽ hagwã Nhe'ẽ Marangatu tee va'e:

“He'i Nhandejáry: Mba'e-gwi po judeu re'yí e'y kwéry ipoxypa hikwái? Ma'erã po he'i mo'ã xe-rehe: Nhande kwéry nhande pu'aka va'e voi Nhandejáry-rehe, he'i. ²⁶Ha

* 4:11 Sl 118.22 * 4:24 Gn 1.1–2.22; Êx 20.11; Sl 146.6

vyvypóry ruvixagwasu kwéry ojogweroatypa hikwái. Onhesyrũ syrũ okwa-vy. Ou orairõ xe-vy, xe rembiporavo-pe ave, he'i Nhandejáry.*

Yma upéixa he'i va'ekwe Davi. ²⁷Ha ko'ánga katu a-py voi ojogweroaty-ma mburuvixagwasu orairõ hagwã ne rembigwái marangatu-pe, ne rembiporavo Hesu-pe. Upéa mburuvixa héry Herodes, upéa mburuvixagwasu héry Põncio Pilatos ave, Israel remiarirõre judeu kwéry, judeu re'ýi e'ý kwéry ave ojogweroatypa orairõ hagwã ne rembiporavo Hesu-pe.* ²⁸Ne nhe'ẽ-rupi ojapo hagwã hese yma ere va'ekwe gwive ojapo va'erã. ²⁹Áy katu onhe'ẽ poxy hikwái. Ehexa katu ipoxyha, ore Járy. Ore ne rembigwái va'e. Ore mbopy'agwasu katu ore kyhyje e'ý hagwã ne nhe'ẽ mombe'u-vy. ³⁰Ehexa uka katu nde pu'akaha erembogwera hagwã hasy va'e-pe. Mba'asy-rehe nde pu'aka va'e. Ne rembigwái marangatu Hesu réry-py ejapo uka katu nhane rembiexa e'ý. Ehexa uka katu ne rembiapo porã. Hexapyrã-rupi ejapo uka katu, he'i joa hikwái.

³¹Upéixa omondo mondo Nhandejáry-pe onhe'ẽ. Upe-ma ramo ojogweroaty haty-py oryryi-ma. Ipy'a omohynyhẽmba-ma íxupe kwéry Nhe'ẽ Marangatu tee va'e. Upéixa ramo okyhyje e'ý reheve peteĩ teĩ omombe'u Nhandejáry nhe'ẽ.

Peteĩ teĩ va'e-pe ome'ẽ me'ẽ hemikotevẽ

³²Upe ramo Hesu reroviaha gwive ogwerojoja okyre'ý oiko-vy hikwái: “Kóa xe mba'e, kóa xe mba'e” he'i va'e ndoikói. “Nhané mba'e meme voi ko'ã va'e” he'i omba'e kwéry-rehe ojóupe.

³³Ha upe doze Hesu remimondo va'e heroviapyrã-rupi omombe'u mbe'u oiko-vy Hesu oikove jevymaha rehegwa nhe'ẽ. Nhandejáry ipytygwõ-vy íxupe omombaraete omombe'u hagwã. Upéa-gwi ohendu va'e gwive inhe'ẽ ojohu porã voi. ³⁴Ogwerohory joa hikwái. Ha ndaiporivéi-ma ipa'ũ kwéry-py oikotevẽ va'e. Heta ijyvy va'e, heta óga ogwereco va'e ave ovende oiko-vy. ³⁵Upéi ovende va'ekwe repykwe ogweru, ome'ẽ hagwã Hesu remimondo kwéry-pe, omboja'o ja'o va'erã-pe. Upéixa ramo omboja'o ja'o ime'ẽ me'ẽ-vy oikotevẽ va'e-pe, peteĩ teĩ va'e-pe ome'ẽ hagwã hemikotevẽ. ³⁶Upe ramo oĩ Hesu nhe'ẽ renduha héry va'e Josê. Ha Hesu remimondo kwéry ombohéry jo'a Barnabé. Barnabé réry he'ise: “Nhané mongyre'ý va'ety”. Barnabé Levita va'e, Chipre vyv pygwa va'e ave. ³⁷Ha'e oho peteĩ ovyv ovende. Ogweru hepykwe Hesu remimondo kwéry-pe ome'ẽ hagwã.

5

Ananias rehegwa nhe'ẽ

¹Oĩ ave kwimba'e héry va'e Ananias, hambireko héry Safira. Barnabé rekoha-rami teĩ oiko va'e. ²Ha'e oho ovende ave ovyv. Ha hepykwe ndogwerahapái ime'ẽ-vy Hesu remimondo kwéry-pe. Omohemby joty ojóupe gwarã ndogwerahapaséiry. Ogweraha va'erãte ogweraha. Ha hambireko oikwaa porã upéa. ³Upéa-rehe Pedro he'i Ananias-pe:

—Ma'erã anháy ruvixa Satanás nde rekome'ẽ nde apu hagwã Nhe'ẽ Marangatu tee va'e-pe? he'i. —Ma'erã nde rekome'ẽ ndererupáiry hagwã, Ananias? he'i oporandu-vy íxupe.

⁴—Kwehe ne'irã erevende vyteri ramo ne mba'e vyteri. Upéa yvy ne mba'e voi ra'e. Ha upéi erevende rire, hepykwe ne mba'e ete vyteri voi. Ereme'ese ramo, ereme'ẽmba arã voi ra'e. Nereme'éséi ramo, nereme'ẽi arã ave ra'e. Upéixa iporã arã ra'e nde-vy. Ha ko'ánga katu nde apu ereiko-vy. Ma'erã nde apu? he'i íxupe. —Ma'erã nde apu hagwã erenhemongeta ereiko-vy nde py'a-py? Teko rei-pe mante nande apú. Nhandejáry-pe voi nde apu ereiko-vy, he'i íxupe Pedro.

⁵Ohendu-ma ramo inhe'ẽ, ho'a omano-ma. Ha henduhare gwive onhemondyipama hikwái. ⁶Upe rire ou karia'y ojaho'i ho'i heraha-vy hetekwe. Ogwenohẽ koty-gwi ogweraha ojaty hagwã.

⁷Ndahi'are etéiry ogwahẽ hambireko oike koty-py. Iména-pe ojehu va'ekwe ndoikwaáiry. ⁸Ha Pedro katu oporandu íxupe:

* 4:26 Sl 2.1-2 * 4:27 Lc 23.7-11; Mt 27.1-2; Mc 15.1; Lc 23.1; Jo 18.28-29

—Ko va'e-rehe anho tipo ereme'ẽ ra'e nde yvy? he'i íxupe.

—Ha'e voi, he'i. —Ko va'e-rehema ngatu orome'ẽ ore yvy, he'i Pedro-pe ijapu-vy.

⁹—Ma'erã tipo erenhombo'e mbo'e ne ména ndive nde apu hagwã Nhe'ẽ Marangatu tee va'e-pe, he'i íxupe. —Nde apu ramo, nande apúi xe-vy. Nhe'ẽ Marangatu tee va'e-pe ae nde apu, he'i íxupe. —Ma'erã tipo erenhembopy'agwasu teĩ nde apu hagwã íxupe? Ma'erã ere mo'ã kuri, “Nhandejáry nopenái arã xe apuha-rehe?” he'i. —Ejeapysaka katu ogwata ou-vy va'e-rehe. Ne ména atyhare ogwahẽ jevy-ma ou-vy, he'i íxupe. —Nde reraha-ta nde ave, he'i íxupe Pedro.

¹⁰Upe-ma ramo Pedro rovagwy-rupi ho'a omano ete reheve-ma ave hambirekokwe. Ha karia'y ogwahẽ-vy oike. Oike ramo otopa-ma ave he'õgwe. Ogweraha he'õgwe ijaty-vy. Ombojoyvy imoĩ-vy vykwa-py iména retekwe ndive. ¹¹Upe-ma ramo onhemondýi joama Hesu reroviaha gwive. Herakwã renduhare gwive onhemondyipa-ma hikwái.

Hesu remimondo ombogwera hasy va'e-pe

¹²Ha hemimondo kwéry heta hembiaipo porã porã. Upe tetã mygwa pa'ũ-my hexapyrã-rupi hembiaipo, heroviapyrã-rupi hembiaipo ave. Nhandejáry róga mopekwa pekwãpyre-py opyta joa hikwái. Upe va'e imoekwãpyre ohenói Salomão. ¹³Ha Hesu-rehe ojerovia e'ỹ va'e gwive ndaipy'agwasúi imoirũ-vy íxupe kwéry. Omoirũ e'ỹ ramo jepe, omboete tee joty íxupe. ¹⁴Upe ramo onhembohetave tave oho-vy Hesu reroviaha kwéry. Onhemboheta kwimba'e. Kunha va'e ave onhembohetave tave oho-vy hikwái. ¹⁵Upéixa ramo hasy va'e ogwenohẽ óga-gwi omoĩ tape yke-rehe. Hasy va'e ogwenohẽ hupa reheve. Hupa reheve ogwenohẽ. Pedro ohasa hagwã-rupi omoĩ, hi'ãygwe rei jepe ho'a hagwã hese hasy va'e-rehe. ¹⁶Ogwahẽ ou-vy ave Jerusalém jerekwe-rehe okwa va'e. Ojereru hasy va'e. Anháy rerekoha va'e gwive ogweru íxupe. Ojereru va'e gwive okwera-ma voi.

Judeu ruvixa kwéry ombohasa asy Hesu remimondo kwéry-pe

¹⁷Ha Hesu remimondo kwéry enterove kente kwéry remimboete. Upéa-gwi ndajia'éiry eterei hese kwéry pa'i ruvixagwasu ijavegwa kwéry ave:

—Ma'erã kente kwéry nhane mboyke ojererova hagwã Hesu remimondo kwéry-rehe. Nanhane mboetevéiry, he'i ojóupe. Ndajia'evéi ete voi hese.

¹⁸Upéa-gwi pa'i ruvixagwasu hendivegwa kwéry, saduceu kwéry va'e ave oho oipyhy íxupe kwéry oapresa hagwã. Hembiaipo vai va'e rendaty-py omoĩ íxupe. ¹⁹Ha upéi katu pyhare pyte-ma ramo yvãgy-gwi ogwey ou-vy Nhandejáry rembigwái. Oipe'a okẽ ogwenohẽ hagwã. ²⁰Ogwenohẽ rire:

—Tereho katu, he'i íxupe. —Tereho enhembo'y Nhandejáry róga kakwaa gwy-py erenhe'ẽ hagwã ohendu va'erã-pe gwive, he'i íxupe. —Ko va'e teko porã pyahu rehegwa nhe'ẽ emombe'upa katu, he'i íxupe Nhandejáry rembigwái.

²¹Ohendu ramo inhe'ẽ oje'ói. Ko'ẽmba-ma jave Nhandejáry koty-py oike omombe'u hagwã Nhandejáry nhe'ẽ.

Upe jave pa'i ruvixagwasu hendivegwa ave ojogweroaty ou-vy. Ojoavisapa ojogweroaty hagwã Israel remiarirõre judeu kwéry ruvixa. Entéro judeu kwéry ruvixa va'e gwive ombojogweroatypa. Ogwahẽ-ma henda-py. Upéi omondo hembiapresakwe ogweru hagwã. ²²Upéixa ramo oho polícia kwéry heru-vy mo'ã. Ogwahẽ ramo preso onhemoi haty-py, ndojohuvéi-ma íxupe. Oho-ma ra'e. Ha upéi ou jevy imombe'u-vy:

²³—Orotopa onhembotypa typa ramo okẽ. Onhangareko va'e oĩ okẽ-my. Ha oroipe'a ramo okẽ, ndorotopavéi-ma preso oĩ va'e-pe. Ndorojohuvéi-ma koty-py. Osẽ-ma ra'e, he'i mburuvixa kwéry-pe imombe'u-vy.

²⁴Ohendu ramo inhe'ẽ:

—Mba'e-rami po osẽ oho-vy ra'e? Mbava'e po oiko-ta ãy, ndajaikwaáiry, he'i ojóupe pa'i ruvixa kwéry, polícia ruvixa ave.

²⁵Upéixa ramo ou imombe'u-vy:

—Upe pene remimoĩgwe preso katu onhembo'y oĩ-vy Nhandejáry róga gwy-py. Oporombo'e mbo'e oĩ-vy, he'i mburuvixa kwéry-pe.

²⁶Ohendu ramo inhe'ẽ oho heru-vy polícia kwéry huvixa ndive. Ha ndoipyhy poxýry íxupe kwéry. Enterovéa resa-py oipyhy porã rei íxupe heraha-vy. Ikyhyje-gwi kente kwéry-gwi oipyhy porã rei íxupe:

—Poxý reheve jaipyhy ramo íxupe, nhande api va'erã ita-py, he'i ojúpe polícia kwéry.

²⁷Ogweru rire omoĩ hovagwy-py. Mburuvixa rovagwy-py omoĩ omonhe'ẽ hagwã. Ha pa'i ruvixagwasu katu he'i imonhe'ẽ-vy:

²⁸—Ore oro'eri eri kuri nde-vy: “Anive erenhe'ẽ kuri Hesu réry-py” oro'e. Ha oro'e ramo jepe, nderejapói voi kuri ore nhe'ẽ, he'i íxupe. —Opa-rupi oho ne nhe'ẽ. Jerusalém pygwa gwive ohendu hagwã eremosarambi kuri ne nhe'ẽ imombe'u-vy. Upéixa ramo ereipota enterove va'e he'i ore-rehe: “Gwĩ va'e ojuka kuri Hesu-pe. Hepy-vy jajuka katu íxupe kwéry” ereipota he'i ore-rehe, he'i imonhe'ẽ-vy pa'i ruvixagwasu.

²⁹Ha upéi katu he'i íxupe Pedro Hesu remimondo kwéry ndive:

—Nhandejáry nhe'ẽ ndaijojái ramo teko rei nhe'ẽ ndive, iporãve jajapo Nhandejáry nhe'ẽ, he'i. ³⁰—Nhandejáry, nhane ramoigwasu Járy omoingove jevy va'ekwe Hesu-pe. Yvyra-rehe ne rembijukakwe ombotekove jevy va'ekwe. ³¹Upéi omomba'egwasu ete-ma voi íxupe. Oyke-rehe imoĩ-vy omomba'egwasu. Omoĩ íxupe nhane ruvixarã. Nhane resendeharã ave omoĩ. Israel remiarirõre judeu kwéry oheja ramo gwekoha vai, ha'e omboyke-ta íxugwi hembiaipo vaikwe. ³²Ko'ã va'e ore oromombe'u voi orohexa-gwi. Ko'ã va'e Nhe'ẽ Marangatu tee va'e remimombe'u ave. Ha'e katu inhe'ẽ renduha-pe Nhandejáry remime'ẽgwe, he'i íxupe kwéry Pedro.

³³Ohendu ramo Pedro nhe'ẽ, ipoxy eterei voi hese. Ojukase voi íxupe hikwái: “Jajuka katu íxupe, jajuka katu íxupe” he'i joa hese hikwái.

³⁴Ha peteĩ oĩ ndaipoxýi va'e. Opu'ã-ma onhembo'y. He'i omosẽ hagwã Hesu remimondo kwéry-pe pono ojuka:

—Emosẽ sapy'a ete imondo-vy oka-py, he'i.

Héry Gamaliel, fariseu va'e, judeu ruvixa va'e, Moisés amyri he'i va'ekwe-py imbo'eha. Omoete joa íxupe.

³⁵Ha'e he'i mburuvixa kwéry-pe:

—Xáke, xe rapixa kwéry, he'i, —Ma'erã pene rembiapo vai-ta Hesu remimondo kwéry-rehe? ³⁶Are-ma ojekwaa va'ekwe kwimba'e héry va'e Teudas. Onhembotuvixase ra'anga rei oiko-vy va'e. Quatrocentos oiko imoirũha íxupe. Upéi ojuka íxupe. Ojuka rire ohasãimba íxugwi inhirũ gwéry. Nonhemboatyvéi-ma. ³⁷Upe rire hapykwerigwa ojekwaa va'ekwe Galiléia pygwa, kwimba'e héry va'e Judas. Yma mburuvixagwasu nhe'ẽ-py kente kwéry omoĩ moĩ va'ekwe héry kwatia-rehe. Omoĩ jave ojekwaa va'ekwe Judas. Oiko va'ekwe imoirũháry. Upéi soldado kwéry ojuka íxupe Judas-pe. Ojuka rire, opa isarambipa íxugwi inhirũ gwéry. ³⁸Upéa-gwi ha'e-ta peẽ-my: Ani erepenave hese Hesu remimondo kwéry-rehe. Eheja katu toiko ha'e oikoseha-rami, he'i íxupe. —Teko rei omombe'u ramo hembiaporã, nosẽ porã mo'ãi, opa rei arã. ³⁹Ha Nhandejáry ae omombe'u ramo hembiaporã, napende pu'aka mo'ãi hese kwéry Nhandejáry nhe'ẽ pokatu-gwi, he'i íxupe kwéry. —Peẽ pemboyke ramo ha'e kwéry inhe'ẽ, Nhandejáry-pe pemboyke-ta para'e ave, he'i íxupe kwéry Gamaliel. Teudas-pe Judas-pe ave ojehu va'ekwe omombe'u íxupe kwéry pono ojuka Hesu remimondo kwéry-pe.

⁴⁰Ha upéi katu ohendu inhe'ẽ hikwái. Gamaliel nhe'ẽ ohendu-gwi, ndojukasevéi Hesu remimondo kwéry-pe. Upe ramo omoingepa jevy gwemimosẽgwe-pe koty-py. Ndaipoxy etevéi-ma. Oinupã nupã rei-ma íxupe kwéry. Ojuka hagwã-rami noinupãvéiry. Upéi oinupã rire, he'iri iri íxupe onhemonhe'ẽ-vy:

—Anive ereiporu Hesu rehégwa nhe'ẽ. Hesu réry-py anive erenhe'ẽ, he'i hemimondo kwéry-pe.

⁴¹Upe rire opoi íxugwi imondo-vy. Ha upéi katu ojoatýra-gwi osẽ oho-vy. Oinupã ramo jepe íxupe, ndojohu vaýry voi. Ogwerovy'a joty osẽ-vy hikwái:

—Hesu rereko asy hagwe-rami nhande rereko asy ave. Hesu-pe omboete e'ŷ hagwe-rami, nhande-vy nanhane mboetéi ave, he'i ojóupe.

Upéixa ramo Hesu reko-py oiko-gwi, ovy'a joty osê-vy hikwái.

⁴² Iko'ê ko'êmba Nhandejáry nhe'ê omombe'u meme oiko-vy va'e Nhandejáry róga kakwaa-py. Óga óga-rupi omombe'u oiko-vy va'e ave:

—Hesu ko Nhandejáry remimboupyrã va'ekwe voi, he'i omombe'u-vy.

6

Oiporavo sete kwimba'e-pe Hesu remimondo pytygwôharã

¹ Upe ramo onhembohetave tave oho-vy Hesu rehegwa nhe'ê renduha. Ha iko'ê ko'êmba ome'ê me'ê oiko-vy tembirekokwe-pe hemi'urã. Ha grego nhe'ê-py onhe'ê va'e ima'eandu-gwi he'i ojóupe:

—Nhande-vy mixi ome'ê. Upéa-pe, hebreu nhe'ê-py onhe'ê va'e-pe katu hetave ome'ê, he'i. —Ome'ê joavy avypa ime'ê-vy, he'i ojóupe ndojohu porã-gwi.

² Upe-ma ramo gwí doze hemimondo kwéry va'e ohenói uka ojogweroatypa hagwã Hesu nhe'ê renduha gwive. He'i íxupe kwéry:

—Gwí ome'ê me'ê va'e tembirekokwe-pe hemi'urã, ome'ê joavy avypa nipo ra'e ime'ê-vy, he'i. —Ha ore katu oromboja'o ja'o ramo ime'ê-vy hemi'urã, ndikatuvéi-ma arã oromombe'u Nhandejáry nhe'ê. Naiporã va'erã kóixa. ³ Upéa-gwi, ore re'ŷi kwéry, peiporavo katu sete kwimba'e. Ore nhe'ê-py onhangareko hagwã ome'ê va'e-rehe peiporavo nome'ê joavy avyvêi hagwã. Nhe'ê Marangatu tee va'e ipy'a omohynhê va'e íxupe, hi'arandu porã va'e, nhane mandu'a porã hese va'e, upéa rehegwa peiporavo katu. ⁴ Ha ore katu oromondo meme-ta Nhandejáry-pe ore nhe'ê. Hesu rehegwa nhe'ê oromombe'u meme-ta. Gwí va'e apo-vy nore ate'ŷiry. Ndaijái outro tembiapo ore-vy orojapo va'erã, he'i íxupe kwéry Hesu remimondo.

⁵ Ha ojohu porã joa inhe'ê ijaty va'e gwive. Upe ramo oiporavo peteí kwimba'e-pe hikwái, Hesu-rehe ojerovia tee va'e, Nhe'ê Marangatu tee va'e ipy'a omohynhê va'e íxupe, héry va'e Estêvão. Upéi oiporavove ave seis kwimba'e, héry va'e Filipe, Prócoro, Nicanor, Timão, Pármenas, Nicolau ave. Nicolau Antioquia pygwa judeu e'ŷ va'e upe va'e. Ne'írã vyeri ojerovia ramo Hesu-rehe, judeu kwéry reko-rupi oiko va'ekwe. ⁶ Upéa sete va'e oiporavo onhangareko hagwã ome'ê va'e-rehe. Oiporavo rire, ogweru henda-py Hesu remimondo renda-py. Upéi hemimondo ombojeupi Nhandejáry-pe onhe'ê, inhakã akã-rehe omoí oyo, inhe'ê-py ome'ê me'ê porã hagwã tembirekokwe-pe hemi'urã.

⁷ Mombyryve ryve ogweraha imombe'u-vy Nhandejáry nhe'ê. Onhembohetave tave oho-vy Hesu nhe'ê renduha, Jerusalém tetã mygwa. Ha pa'i kwéry, Hesu nhe'ê apoha, heta eterei oi.

Judeu ruvixa kwéry ndaija'ei Estêvão-rehe

⁸ Ha Estêvão katu, imbaraete inhe'ê, opa va'e rembiayhu. Kente kwéry pa'ũ-my hembiaapo porã hexapyrã-rupi. ⁹ Oí ave hese ija'e'ŷ va'e, judeu porahéi haty-gwi ou va'e. Upe-py ojeporahéi haty-py oí Cireneu tetã mygwa, oí Alexandria tetã mygwa, oí Cilícia yvy pygwa, oí Ásia yvy pygwa ave. Upe-py ojogweroaty va'e gwive héry Liberto kwéry. Upéi ogwahê ou-vy Estêvão renda-py onhe'ê mbojevvy hagwã íxupe hikwái. ¹⁰ Ha ndikatúí onhe'ê mbojevvy íxupe arandu rehegwa omombe'u-gwi, Nhe'ê Marangatu tee va'e oipy'a mohynhê-gwi íxupe.

¹¹ Upéi oho jevy nhemi ha-py opaga hagwã ijapu japu va'erã-pe Estêvão-rehe. Ome'ê íxupe inhe'erã. Upe ramo:

—Orohendu voi Estêvão-pe onhe'ê vai vai ramo Moisés-rehe. Nhandejáry-rehe onhe'ê vai vai ramo orohendu ave, he'i mo'ã hese enterove va'e-pe.

¹² Upéixa he'i ramo, ombopoxy enterove va'e-pe gwive. Judeu ruvixa kwéry, judeu rekombo'ehaty-pe ave ombopoxy. Upéa-gwi oupa jevy henda-py oipyhy hagwã íxupe. Mburuvixa kwéry ojogweroaty haty-py oipyhy heraha-vy. ¹³ Ha gwí ijapu hese va'erã-pe ohenói ogwahê hagwã. Ogwahê ramo, he'i ijapu apu-vy hese:

—Upe va'e onhe'ê vai vai meme va'e voi ko va'e Nhandejáry róga kakwaa marangatu-rehe. Moisés amyri remimombe'ukwe jajapo va'erã-rehe onhe'ê vai. ¹⁴“Upe Hesu Nazaré pygwa omohãimba-ta ko va'e Nhandejáry róga kakwaa. Ohekoviarõ-ta nhande reko Moisés remimombe'ukwe” he'i Estêvão, he'i omombe'u ijapu va'e. —Ore henduháry voi, he'i mo'ã hese ijapu-vy.

¹⁵Ha ojogweroaty va'e gwive ohexa katu katu íxupe. Oma'ê Estêvão rova-rehe oma'ê:

—Hendypa voi hova ra'e, he'i ojóupe. —Ojogwa ete Nhandejáry rembigwái rova-pe, he'i ojóupe judeu ruvixa kwéry.

7

Estêvão omombe'u judeu ruvixa kwéry-pe Abraão rehegwa nhe'ê

¹Ha pa'i ruvixagwasu katu ohendu ijapu va'e nhe'ê. Ohendu ramo oporandu Estêvão-pe:

—Upéixa voi pa? he'i íxupe.

²Upe ramo Estêvão onhe'ê judeu ruvixa kwéry-pe:

—Xe re'yí kwéry, xe ruvixa kwéry ave, pejeapysaka porã katu xe nhe'ê-rehe. Yma ete ojehexa uka va'ekwe nhane ramoigwasu myamyri Abraão-pe. Nhandejáry onhemomba'egwasu ete va'e ojehexa uka va'ekwe íxupe. Mesopotâmia yvy-py gwetã tee-my joty oiko ramo, ojehexa uka-ma voi va'ekwe íxupe. Ndováí joty Harã tetã-my. ³He'i Abraão-pe Nhandejáry: “Eva katu ne retã-gwi” he'i. “Ehejapa nde re'yí kwéry eho-vy. Tereho nde-vy ahexa uka va'erã nde yvyrã hagwã-py tereho” he'i íxupe Nhandejáry. ⁴Upe-ma ramo Nhandejáry nhe'ê-py osê gwetã-gwi oho-vy. Caldeu yvy-gwi oho. Tetã ambue-py ae oiko jevy hagwã osê oho-vy. Harã tetã-my ogwahê ramo, oiko va'ekwe upe-py. Hi'are rire omano túvy. Upéi túvy omano rire ome'ê ogwata puku jevy. “Tereho katu nde yvyrã-py” he'i ogweroava uka-vy ta'yry-pe Nhandejáry. Upéixa voi ogweru va'ekwe íxupe ko'a-py. Áy peiko ha-py ogweru íxupe. ⁵Ha ogweru rire ae, nome'êséi voi íxupe ijyvyrã, ni hóga renagwã jepe nome'êséiry íxupe. Ni miximi nome'êséi voi. Ndata'yryramo jepe, he'i íxupe Nhandejáry: “Áy name'êséi vyteri nde-vy nde yvyrã. Ha ne remiarirõ kwéry pegwarã katu ame'ê va'erã ko yvy ijyvyrã” he'i íxupe Nhandejáry.

⁶—Upe rire a-rami he'i Nhandejáry: “Ne remiarirõ kwéry katu yvy ambue-py oiko va'erã, gwe'yí e'y ha-py oiko-ta va'erã. Upe va'e yvy pygwa omomba'apo eterei va'erã voi íxupe kwéry. Hi'are eterei va'erã voi ombohasa asy. Quatrocentos ro'y omingo asy va'erã íxupe kwéry. ⁷Upe rire ae ahepy va'erã íxupe kwéry. Imingo asyhare-pe areko asy va'erã ave. Ahepy rire, yvy akéno-gwi osêmba va'erã oje'ói-vy ne remiarirõ kwéry. Xe mboete hagwã a-py osêmba va'erã” he'i Abraão-pe Nhandejáry. ⁸Ha upéi katu he'i jevy íxupe Nhandejáry: “Eipirekyti uka mixi katu kwimba'e gwive. Upéa erejapo ramo, erepyta va'erã xe re'yí tee va'erã voi” he'i Abraão-pe. Upe rire oiko-ma ta'yry. Isaquerã oiko-ma. Upe rire, oito áry rire mixi oikyti ipire, gwa'yry pire. Ha Isaque okakwaa rire, omenda. Upe rire, Isaque omenda rire, ta'yry-ma oiko-ma Jacorã. Upéi okakwaa ave Jacó. Ta'yry-ma ave Jacó. Oiko-ma doze ta'yry nhane ramoigwasu va'e, tetã ambue mbue-py oiko va'erã, he'i Estêvão omombe'u-vy.*

Estêvão omombe'u myamyri José rehegwa nhe'ê

⁹Upéi Estêvão omombe'u jevy judeu ruvixa kwéry-pe:

—Ha Jacó ra'y kwéry doze oi va'e. Oi tyvry hery va'e José, túvy rembiayhu tee va'e José. Upéa-gwi ndaija'éiry va'ekwe hese tyke'y kwéry. Ndaiaja'ei-gwi hese, tembigwairã ovende va'ekwe gwyvry ojereraha hagwã Egito yvy-py. Ha Nhandejáry omoirũ joty íxupe, ndohejai íxupe ha'e anho. ¹⁰Ohasa asy reheve oresende sende íxupe. Ome'ê ave íxupe inharandurã. Upéa-gwi ohayhu íxupe mburuvixagwasu, hery va'e Faraó, Egito yvy pygwa ruvixa va'e. Ohayhu-gwi íxupe, omonhangareko uka íxupe mburuvixa. Egito yvy-py oi va'e-rehe gwive, hóga-py oi va'e-rehe gwive ave omonhangareko uka.

* 7:8 Gn 11; 12; 17

¹¹—Ha upéi katu ndoikovéi hi'upy Egito yvy-py gwive. Canaã yvy-py gwive ave opa hi'upy. Upéa-gwi upe pygwa kwéry oiko asy eterei hikwái. Ha nhane ramoigwasu kwéry katu ndotopavéi gwemi'urá. ¹²Ha nhane ramoigwasu ru ohendu oimeha trigo rope. Egito-py oimeha ohendu. Upéi omondo gwa'yry kwéry tembi'u-rehe. Nhane ramoigwasu omondo. ¹³Upe rire omondo jevy tembi'u-rehe ogweru hagwã. Ogwahê jevy ramo upe-py tyvúry oĩ ha-py, ojekwaa uka gwyke'yry-pe: “Nde ko ore ryvy nipo ra'e” he'i gwyvúry-pe hikwái. Ha mburuvixa oikwaa-ma José ryke'y rekoha, he'yí rekoha ave. ¹⁴Upéi José ohenói uka ou hagwã túvy. He'yí kwéry ohenói uka ave. He'yí kwéry reta va'e setenta e cinco voĩ oĩ. ¹⁵Ha upéi ova ou-vy Egito-py túvy gwe'yí ndive. Upe-py omano túvy. Omano ave he'yí kwéry, nhane ramoigwasu va'e. ¹⁶Upe rire ogweraha jevy Siquém tetã-my hetekwe. Omõ hagwã vvykwa py-py ogweraha. Upéa vvykwa Abraão rembijogware, Emor ra'y kwéry ovende va'ekwe íxupe plata-rehe.

¹⁷—Ha upéi katu oiko-tama voi Nhandejáry he'i va'ekwe, Abraão-pe he'i va'ekwe. Ipokatu-ta inhe'ê. Oiko-ta he'i va'ekwe ha ndoikói vyteri. Upe ramo nhane ramoigwasu kwéry katu onhembohetave tave hikwái. ¹⁸Upe rire oiko hekoviare mburuvixagwasu pyahu Egito pygwa kwéry ruvixa ramo. Ha mburuvixa pyahu katu nohenduvéi-ma nhane ramoigwasu rerakwã, José rerakwã. ¹⁹Upéixa ramo mburuvixa ogwereco asy nhande re'yí kwéry myamyri-pe. Ipy'a vai reheve ogwereco: “Anive erehupi oiko ramo mitã. Omano hagwã-py eheja” he'i íxupe kwéry mburuvixa omanda-vy, he'i Estêvão omombe'u-vy.*

Estêvão omombe'u myamyri Moisés rehegwa nhe'ê

²⁰Upéi Estêvão omombe'u jevy judeu ruvixa kwéry-pe:

—Upe ramo, mburuvixa ogwereco asy ramo va'ekwe nhande re'yí kwéry, oiko-ma va'ekwe Moisés Nhandejáry rembierohory voi. Iporã ete voi oiko-vy. Mbohapy jasy ombouvixa íxupe isy. Túvy róga-py ombouvixa. ²¹Upe rire mburuvixa nhe'ê-py oheja rei ha'e anho omemby. Ha mburuvixa rajy katu ohupi heraha-vy ombouvixa hagwã: “Ajohu-ma xe membyrã araha-ta xe” he'i hese. Upéi ogweraha íxupe. ²²Arandu-py ombo'e íxupe. Egito pygwa arandu-py ombo'e hereko-vy. Hi'arandu porã-ma Moisés onhe'ê-vy. Hemiapo porã-ma ave inharandu-gwi. ²³Okakwaa rire, omboty rire quarenta ro'y, imandu'a gwe'yí kwéry-rehe: “Aha-ta aipohu xe re'yí kwéry, Israel amyri remiarirõre kwéry” he'i ojúpe Moisés.

²⁴—Upéi oho gwe'yí kwéry ha-py. Upe-py ohexa peteĩ gwe'yí. Oinupã-ma íxupe Egito pygwa: “Xe re'yí upéa onhenupã va'e” he'i Moisés ojúpe. Upéa-gwi oresende íxupe. Ha Egito pygwa oinupã va'e-pe, ojuka voi gwe'yí repy-vy: ²⁵“Nhandejáry nhe'ê-py aresende-ta íxupe” he'i ojúpe ra'e. Upéa-gwi: “Xe hepyhare, xe kwaa-ta” he'i mo'ã Moisés ójehe. Ha avave joty íxupe ndoikwaáry. ²⁶Ko'êmba ramo ojehexa uka jevy Moisés gwe'yí kwéry-pe. Ohexa mokõi gwe'yí onhorairõ ramo. Ndoipotái onhorairõve: “Ma'erã po pejogwereco asy, xe re'yí?” he'i. “Peê ko ojoe'yí voi” he'i. “Ma'erã po penhorairõ?” he'i mokõive va'e-pe.

²⁷—Ha gwapixa-pe ogwereco asy va'e ombojevvy Moisés-pe imondo-vy: “Kiva'e po ne moingo ore-vy ore ruvixarã” he'i. “Kiva'e po he'i nde-vy ore reko johu hagwã?” ²⁸Nde para'e xe jukase. Upe Egito pygwa-pe erejuka hagwe-rami ave xe jukase” he'i Moisés-pe. ²⁹Ohendu-ma ramo inhe'ê: “Xe ajapo va'ekwe oikwaa-ma ra'e” he'i ojúpe Moisés. Upéa-gwi okanhy-ma oho-vy. Tetã ambue-py oho oiko hagwã. Midiã yvy-py oiko. Upe-py mokõi-ma ta'yry.

³⁰—Hi'are voi oiko upe-py Moisés. Quarenta ro'y rire ojehexa uka íxupe Nhandejáry rembigwái yváy gwigwa. Ojehexa uka íxupe tekwaty e'y-my oiko ramo yvyaty gwy-py héry va'e Sinai. Upe-py ohexa vyvra'i rete-rehe tata rendy. Hendy pa'ũ-my ojehexa uka íxupe Nhandejáry rembigwái. ³¹Opu'ã ramo hese tata, ndopáry. Ohexa ramo, opondera hese Moisés. Onhemoagwí íxugwi ohexa porãve hagwã. Onhemoagwí jave ohendu-ma Nhandejáry nhe'ê: ³²“Ne ramoijusu Járy voi xe” he'i íxupe. “Xe ko Abraão Járy, Isaque Járy,

* 7:19 Gn 39-50; Êx 1.1-11

Jacó Járý. Xe ijáry meme” he'i Moisés-pe Nhandejáry. Ohendu ramo inhe'ê, onhemondýi ndaipy'agwasúí oma'ê-vy.

³³—Upéi he'i íxupe Nhandejáry: “Upe erenhembo'y ha-py imarangatu voi yvy. Upéa-gwi eipe'a katu nde py-gwi nde pyryru xe mboete-vy” he'i íxupe. ³⁴“Xe re'ýi kwéry Egito-py oiko va'e, ohasa asy va'e. Ogweroko asy ramo ahexa voi. Ipyahê joa oí-vy ramo ahendu. Upéa-gwi agwejy-ma aju-vy aresende hagwã íxupe kwéry” he'i íxupe. “Upe ramo tereho katu” he'i. “Egito yvy-py oromondo-ta” he'i Moisés-pe Nhandejáry.

³⁵—Upe Moisés he'ýi kwéry ombojevý va'ekwe íxupe. Yma oho ramo gwe'ýi kwéry ha-py, ombojevý íxupe va'ekwe: “Kiva'e po ne moingo ore-vy ore ruvixarã. Kiva'e po he'i araka'e nde-vy ore reko johu hagwã ore rembiapokwe-rehe” he'i araka'e Moisés-pe. Upe rire ae Nhandejáry omondo jevý íxupe upe he'ýi kwéry remimbojevýkwe. Mburuvixarã, heresendeharã ave omondo. Hembigwái nhe'ê-py omondo íxupe. Upe tata rendy-rami yvyra'i rete-rehe ojehexa uka íxupe va'ekwe nhe'ê-py omondo-vy íxupe. Upe-ma ramo Moisés oho Egito-py. ³⁶Upe-py hembiaipo porã hexapyrã-rupi. Upéi ogwenohê heraha-vy upe-gwi gwe'ýi kwéry. Ogwahê oje'ói-vy ygwasu-py, héry Y pytã. Oja'o y yvytu jave tape ojekwaa hagwã. Upéi quarenta ro'y hexapyrã-rupi Moisés hembiaipo porã oiko-vy. Tekwatý e'ý-my hembiaipo porã porã, he'i Estêvão omombe'u-vy.

Upéi Estêvão omombe'u jevý judeu ruvixa kwéry-pe:

³⁷—He'i va'ekwe Moisés Israel kwéry-pe: “Pene pa'ũ-gwi oipe'a va'erã Nhandejáry hi'arandu va'e. Inhe'ê-py omombe'u va'ety oipe'a va'erã. Xe pe'a hagwe-rami oipe'a va'erã” he'i íxupe kwéry Moisés. ³⁸Ha upéi katu ha'e omoirũ irũ gwe'ýi kwéry-pe. Ojogweroaty ha-py, tekwatý e'ý-my omoirũ íxupe kwéry, nhane ramoigwasu-pe. Upéi ojeupi oho-vy vyatyrysu ári, héry Sinai va'e ári. Onhomongeta hagwã Nhandejáry rembigwái yváy gwigwa ndive oho. Ohendu hagwã inhe'ê ojeupi. Nhane moingove va'e nhe'ê ohendu Nhandejáry rembigwái-gwi ome'ê hagwã nhande-vy.

³⁹—Ha nhane ramoigwasu kwéry katu nohenduséi voi Moisés nhe'ê. Omboyke imondo-vy. Ohose-vy ohexanga'u Egito yvy hikwái. ⁴⁰Upéa-rehe he'i Moisés ryke'y-pe hikwái. Héry va'e Arão: “Ejapo katu ore-vy tupã ra'anga ore renonderã oho hagwã” he'i. “Nde ryvy katu okanhy ra'e oréhegwi. Upe ore reru va'ekwe Egito yvy-gwi okanhy ra'e. Ndoorikwaavéi ki-koty po oho” he'i Moisés ryke'y Arão-pe.

⁴¹—Upéi ojapo gwemimboete ra'anga angarã hikwái. Vaka ra'y ra'anga-rami ojapo tupã ra'anga. Ojapo rire omoka'ê mymba ijukapy tupã ra'anga ramigwa imboete-vy. Gwembiaipokwe ogweroxy'a hikwái: “Iporã poku” he'i mo'ã herovy'a-vy. ⁴²Ha upéi Nhandejáry ojere íxugwi kwéry. Oheja íxupe kwéry anho. Omondo íxupe kwéry tape porã e'ý-rupi omboete hagwã kwarahy-pe, jasy, jasytata-pe gwive hekovia. A-rami ohai va'ekwe Nhandejáry nhe'ê-py omombe'u va'ety:

“Tekwatý e'ý-my ereiko ramo, xe re'ýi kwéry, nereme'êi xe-vy mymba ijukapyre.

Quarenta ro'y eremoka'ê ka'ê ereiko-vy xe mboete-vy mo'ã. ⁴³Xe mboete e'ý-vy katu eremoka'ê. Ha tupã ambue ra'anga héry Moloque eremboete voi ereiko-vy. Hyru ao gwigwa óga erehupi meme heraha-vy. Erehupi ave jasytata ra'anga erejapo va'ekwe. Tupã ambue mboete-vy héry va'e Renfã erehupi heraha-vy jasytata ra'anga. Upéa ra'anga gwive erejapo va'ekwe imboete-vy erehupi heraha-vy. Naxe mboetevéi-ma. Upéa-gwi orogweroxa-ta orogweroxa-vy mombyry. Pende yvy-gwi orogweroxa-ta. Tetã ambue kupe-py, Babilônia kupe-py jevý orogweroxa-ta”*

he'i va'ekwe Nhandejáry nhe'ê-py, he'i Estêvão imombe'u-vy.

⁴⁴Upéi he'i jevý judeu ruvixa kwéry-pe:

—Ha nhane ramoigwasu kwéry katu oiko va'ekwe tekwatý e'ý-my. Upe-py oiko jave oí hendive kwéry upe ao gwigwa óga. Upe óga ohexa ramo: “Nhandejáry kwaaha” he'i. Oikwaa-ma Nhandejáryha: “Nhandejáry nhane ndive oime” he'i ohexa ramo. Upe ao

* 7:43 Am 5.25-27

gwigwa óga Nhandejáry ohexa uka ranhe va'ekwe íxupe. Moisés-pe ha'anga rei ohexa uka. Ohexa uka rire: “Ejapo katu ha'e ramigwa” he'i íxupe. Upéi ojapo.*

⁴⁵—Ha upéi katu opyta are upe ao gwigwa óga. Hemiarirō kwéry-pe opyta. Ha upéi ohupi jevy heraha-vy. Gwetārā ambue reka-vy oje'ói hikwái. Huvixa ndive, Josué ndive oho. Ogwahê ramo outro tetā-my, omosê imondo-vy upe-py oĩ va'e, gwetārā-my oiko va'e. Henonde-gwi Nhandejáry omosê rire, gwekwagwā-pyma ogwahê. Omosê va'ekwe yvy-py opyta hikwái. Upe-py opyta upe Nhandejáry róga ao gwigwa. Opyta oiko peve mburuvixa ramo héry va'e Davi, he'i Estêvão omombe'u-vy.**

“Nhandejáry teko rei rembiapokwe-py ndoikói” he'i Estêvão imombe'u-vy

⁴⁶Upéi omombe'u jevy judeu ruvixa kwéry-pe:

—Ha Nhandejáry ogwerovy'a va'ekwe myamyri Davi-pe. Upéixa ramo Davi ojerure Nhandejáry-pe: “Iporā tipo ajapo nde-vy nde rogarā” he'i Nhandejáry Jacó Jary-pe.* ⁴⁷Ha nome'ei ojapo hagwā. Ha ta'ýry katu ojapo, héry Salomão. Nhandejáry rogarā ojapo.*

⁴⁸Ha Nhandejáry katu, Tupágwasu va'e, teko rei rembiapokwe-py ndoikói. A-rami ohai va'ekwe Nhandejáry nhe'ẽ-py omombe'u va'ety:

⁴⁹“He'i Nhandejáry: Yváy-py xe gwapy haty oĩ. Yvy xe pyrū haty, he'i. Mba'eixagwa óga erejapo-ta xe-vy? Kipy eremoi-ta xe pytu'u haty? Xe-vy gwarā ndikatúĩ erejapo. ⁵⁰Entero mba'e ae xe rembiapokwe. Áry yvy ave xe ajapo voi va'ekwe, he'i Nhandejáry.”*

Upéixa ohai va'ekwe Nhandejáry nhe'ẽ-py omombe'u va'ety, he'i Estêvão imombe'u-vy.

⁵¹Upe rire he'i jevy mburuvixa kwéry-pe:

—Pene akā hatā voi peiko-vy peẽ, he'i. —Pehendusere'ỹ va'e Nhandejáry nhe'ẽ. Napene akā porāi voi. Pembojevuy meme peiko-vy Nhe'ẽ Marangatu tee va'e. Myamyri pene ramoigwasu kwéry rembiapokwe-rami pene rembiapo ave.* ⁵²Hembiapo vai va'ekwe pene ramoigwasu kwéry. Nhandejáry nhe'ẽ-py omombe'u va'ety peteĩ teĩ va'e-pe omõingo asypa va'ekwe hikwái. Ndaipóri ojerereko asy e'ỹ va'ekwe. Gwĩ, “Ou-ta Nhandejáry rembigwái imarangatu va'e” he'i va'ekwe-pe ojuka ave hikwái. Nhandejáry nhe'ẽ-py omombe'u va'ekwe-pe ojuka va'ekwe. Ha ko'anga katu upe yma gware remimombe'u Nhandejáry rembigwái Hesu ou ramo jepe, pemombe'u nhemi joty kuri hese ija'eŷha-pe. Pemombe'u rire, pejuka uka íxupe. ⁵³Nhandejáry rembigwái yváy gwigwa ome'ẽ va'ekwe peẽ-my pende rekorā. Ha ndapejapói voíte inhe'ẽ, he'i judeu ruvixa kwéry-pe Estêvão.

⁵⁴Upéa nhe'ẽ ohendu rire gwi mburuvixa kwéry ipoxy hikwái. Onhemohãmbiri jagwarami opoxy-vy Estêvão-rehe.

⁵⁵Ha'e-ma ngatu Nhe'ẽ Marangatu tee va'e ipy'a omohynhẽ-gwi íxupe, oma'ẽ áry-rehe. Ohexa hendy ete va'e Nhandejáry oĩ ha-py. Hesu-pe ohexa yváy-py. Nhandejáry yke-rehe onhembo'y ramo oĩ-vy ohexa. Hendy reheve onhemomba'egwasu ramo ohexa íxupe:

⁵⁶—Pema'ẽ katu, he'i. —Ojepe'a ramo áry ahexa voíte. Ahexa Nhande Ryke'y tee va'e-pe. Nhandejáry yke-rehe onhembo'y oĩ-vy ramo ahexa íxupe, he'i mburuvixa kwéry-pe.

⁵⁷Ha ha'e kwéry katu osapukái hatā opoxy-vy. Omboty oapysa ohendusere'ỹ-gwi. Onhemoi hagwā hese oriparapa ogwa'ẽ ou-vy hikwái. ⁵⁸Upe rire ogwenohẽ imondo-vy tetā-gwi. Ita-py ojapi japi hagwā íxupe ojuka hagwā ogwenohẽ hikwái. Ha ijukaharā oao jo'a omboi. Omboi rire oheja karia'y-pe onhangareko hagwā hese. Upéa karia'y héry va'e Saulo. Ha upéi katu ojapi japi ita-py omano peve. ⁵⁹Ha ojapi jave íxupe hikwái, ha'e omondo onhe'ẽ Nhandejáry-pe:

—Togwahê katu nde ha-py, xe Jary Hesu, xe nhe'ẽgwe, he'i.

⁶⁰Upe rire onhesũ gwetypy'ã-rehe oĩ-vy hatā onhe'ẽ:

—A-rami xe-rehe hembiapo vai rire, ani erembohasa asy uka teĩ hembiapo vaikwe-rehe, ore Jary. Eiporiahuvereco katu íxupe kwéry, he'i. Upe va'e he'ipa-vy, omano-ma.

* 7:44 Êx 25.9-40 * 7:45 Êx 2.2-32.6; Nm 14.33; Dt 18.15-18; 5.1-33; Js 3.14-17 * 7:45 Js 3.14-17 * 7:46 2 Sm 7.1-16; 1 Cr 17.1-14 * 7:47 1 Rs 6.1-38; 2 Cr 3.1-17 * 7:50 Is 66.1-2 * 7:51 Is 63.10

8

¹Ojuka ramo íxupe hikwái, ojohu porã Saulo onhembysaraiha: “Iporã voi pejuka íxupe” he'i.

Ohasa asy voi Hesu reroviaha va'e gwive

Upe áry-py mburuvixa kwéry ombohasa asyseye voi hereko-vy Hesu reroviaha va'e-pe gwive. Jerusalém-my oĩ va'e-pe gwive ogwereco asy eterei. Upéa-gwi osarambipa oje'ói-vy Judéia yvy-rupi. Samaria yvy-rupi ave osarambipa oje'ói-vy. Ndohopa etéiry. Opyta joty Jerusalém-my Hesu remimondo. Oje'ói e'ỹ va'e doze joty oĩ. ²Ha gwí Nhandejáry-pe omboete oiko-vy va'e ogweraha ijaty-vy Estêvão retekwe. Hetekwe ogweraha. Omboasy eterei íxupe. Ojahe'o hatã ohapirõ pirõ-vy íxupe. ³Ha Saulo katu ogwereco asy asy Hesu reroviaha gwive. Onhembosarái hese kwéry. Oike ike koty akéno-rupi. Ogwenohê vai kwimba'e-pe, kunha-pe ave oapresa uka hagwã. Omoatã heraha-vy omoĩ uka hagwã preso. ⁴Upéa-gwi oje'oipa osarambi-vy. Nhandejáry nhe'ẽ omombe'u joty oje'ói-vy hikwái.

Filipe oho omombe'u-vy Cristo rehegwa nhe'ẽ

⁵Ha Filipe katu oho tetã ambue-py héry va'e Samaria-py. Cristo rehegwa nhe'ẽ oho omombe'u hagwã: “Hesu ko Cristo, Nhandejáry remimbou voi” he'i omombe'u-vy. ⁶Ha upe pygwa ojogweroatypa hendu-vy hikwái. Ijoja hendu-vy. Filipe rembiapo porã hexapyrã-rupi heroviapyrã-rupi ave ohexa ramo hikwái, ohendu ramo inhe'ẽ porã, ojeapysaka porã porã joa inhe'ẽ-rehe hikwái. ⁷Heta oĩ upe-py anháy rerekoha. Anháy rerekoha-gwi omosê mosê imondo-vy. Osê jave hatã osapukái. Heta oĩ hajy jeapa va'e, heta oĩ ogwata e'ỹ va'e. Okwera-pa ma ogwata porã-ma. ⁸Upéixa ramo gwí tetã mygwa ovy'a joa-ma voi hikwái.

⁹Ha upe-py oĩ kwimba'e héry va'e Simão, anháy arandu-rupi hi'arandu va'e. Pedro-rami teĩ héry va'e. Hexapyrã-rupi mo'ã hembiaipo oiko-vy ramo, omopondera uka ójehe entéro Samaria pygwa kwéry-pe gwive. “Opamba'e-rehe xe pu'akave xe” he'i mo'ã ójehe. ¹⁰Upéa-gwi ohendupa inhe'ẽ hikwái. Mburuvixa kwéry ohendupa íxupe. Heko'ive va'e kwéry ohendu ave íxupe. Upe-py oĩ va'e gwive ohendupa íxupe:

—Nhandejáry ko omombaraeteve ra'e íxupe, he'i joa mo'ã hese.

¹¹Are-ma hembiaipo mo'ã oiko-vy ramo hexapyrã-rupi, omopondera ukapa ójehe. Upéa-rehe ojeapysaka porã joa hese.

¹²Ha upéi katu Filipe ou omombe'u. Nhandejáry rehegwa nhe'ẽ porã ou omombe'u-vy: “Nhandejáry nhande ruvixarã voi. Pemoirũ katu íxupe” he'i omombe'u-vy. Hesu Cristo réry rehegwa nhe'ẽ omombe'u ave. Ohendu ramo ogwerovia-ma hemimombe'u hikwái onhemongarai uka ave. Kwimba'e kwéry kunhagwe ave onhemongarai uka.

¹³Ha Simão katu ogwerovia ave hemimombe'u. Onhemongarai uka ave. Onhemongarai uka rire, omoirũ-ma Filipe-pe. Ohexa heta hembiaipo porã ramo hexapyrã-rupi. Tuvixa mba'egwasu ohexa. Ohexa ramo, opondera hembiaipo-rehe.

Pedro João ave ogwahẽ ou-vy Samaria tetã-my

¹⁴Oho omombe'u: “Samaria pygwa gwive ohendupa Nhandejáry nhe'ẽ” he'i imombe'uháry oho-vy Jerusalém tetã-my. Ha Hesu remimondo upe-py oĩ va'e ohendu ramo, ombou mokõi imborepara-vy. Pedro João ave ombou. ¹⁵Mokõive ogwahẽ ou-vy Samaria tetã-my. Ogwahẽ rire omondo onhe'ẽ Nhandejáry-pe ombogwey hagwã Nhe'ẽ Marangatu tee va'e ipy'apy-py kwéry. ¹⁶Ne'írã ogwey ou-vy Nhe'ẽ Marangatu tee va'e Samaria pygwa-pe. Hesu Cristo réry-py ae onhemongarai uka hikwái. ¹⁷Ha upéi katu upe mokõi hemimondo omoĩ opo inhakã akã ári ogwey-ma hagwã Nhe'ẽ Marangatu tee va'e. Ogwey-ma ou-vy opyta hagwã Samaria pygwa py'apy-py.

¹⁸Ha Simão katu ohexa Nhe'ẽ Marangatu tee va'e ogwey ou-vy ramo, omoĩ ramo mokõi hemimondo opo inhakã akã ári. Ohexa ramo, ome'ẽse pirapire íxupe mokõive va'e-pe:

¹⁹—Xe mbopu'aka katu xe-vy ave ambogwey hagwã Nhe'ẽ Marangatu tee va'e, amoĩ ramo xe po xe rapixa akã akã ári, he'i mokõive va'e-pe.

²⁰ Ha Pedro katu he'i:

—Ndaipotái nde pirapire, he'i. —“Nhandejáry xe mbopu'aka-ta ame'ê ramo pirapire” ere mo'ã kuri, he'i íxupe. —Eheja. Tove terenehundi. Tonnehundi nde pirapire ave.

²¹ Nde ko nane akã porãiry. Nane akã porã-gwi, ndikatúi erejapo Nhandejáry rembiapo. Nhandejáry rembiapo e'ỹ-rami ae nde ne rembiapo va'e, he'i íxupe. ²²—Erova katu nde py'a vaiha. Emondo ne nhe'ê Nhandejáry-pe ikatu hagwãixa omboyke ndéhegwi nde py'a vaiha, he'i íxupe. ²³—Ahexa voi nde py'a vaiha. Háí vai va'e-rami nde py'a vaiha. Ndikatúi erejere tape vai-gwi, he'i íxupe Pedro.

²⁴—Emondo katu Nhandejáry-pe ne nhe'ê pono ojehu xe-vy upe ere va'ekwe, he'i íxupe Simão ikyhyje-gwi.

²⁵ Upéixa ramo, Pedro João ndive omombe'u Nhandejáry nhe'ê. Hesu rembiapokwe ohexa va'ekwe omombe'u ave. Upe rire ojeyv oho-vy Jerusalém tetã-my. Samaria pygwa-pe tetã mirí mirí rupigwa-pe omombe'u. Hesu rehegwa nhe'ê porã omombe'u oho-vy.

Filipe omongarai mburuvixa-pe

²⁶ Ha Filipe katu oime oiko-vy Samaria tetã-my. Ha upéi katu ojekwaa ou-vy Nhandejáry rembigwái yváy gwigwa:

—Ekwa tereho, peteí arapopy-koty jevy ekwa, he'i. —Tereho katu eregwahê hagwã tapegwasu-py, Jerusalém-gwi Gaza-py oho va'e-py, he'i Filipe-pe. Nhu-rupi oho va'e upe va'e tape.

²⁷ Ohendu ramo inhe'ê, opu'ã ogwata oho-vy. Ogwata jave: “Mburuvixa nipo ra'e kúí ou-ma ra'e tapegwasu-rupi” he'i ojéupe. Upéa mburuvixa Etiópia pygwa, eunuco va'e omenda e'ỹ va'e. Ha'e Candace rembigwái. Ha Candace katu mburuvixagwasu kunha va'e. Etiópia pygwa-rehe gwive omanda oiko-vy. Heta mba'e ogwereco va'e. Ha upéa hembigwái onhangareko va'e imba'e reta-rehe. Ha'e ou va'ekwe Jerusalém tetã-my Nhandejáry-pe imboete-vy. Áy katu oho jevy-ma. ²⁸ Omba'e ndururu-py oho jevy. Kavaju ogweroripara heraha-vy íxupe. Ohokwe-vy ogwapy ha-py omonhe'ê oho-vy kwatia nhe'ê marangatu va'e. Isaías remimoigwe kwatia-rehe, Nhandejáry nhe'ê-py omombe'u va'ekwe omonhe'ê.

²⁹ Ha upéi katu he'i Filipe-pe Nhe'ê Marangatu tee va'e:

—Ekwa katu imba'e ndururu-py eremoirũ hagwã ereho-vy, he'i íxupe.

³⁰ Ha upéi onha oho-vy ogwahê hagwã ha'e-py. Ogwahê ramo, ohendu-ma omonhe'ê ramo kwatia nhe'ê, Isaías omõí va'ekwe kwatia-rehe:

—Ereikwaa tipo mbava'e-pe po he'i ko va'e nhe'ê kwatia-rehe oí va'e, he'i oporandu-vy mburuvixa-pe. ³¹ Ha mburuvixa katu he'i íxupe:

—Mbava'e-pe po he'i ko va'e nhe'ê, he'i. —Xe-vy omombe'u e'ỹ reheve xe ndaikwái, he'i.

Upe-ma ramo:

—Ejeupi egwapy katu xe yke-rehe, he'i Filipe-pe.

³² A-rami joty omonhe'ê heraha-vy upéa mburuvixa:

“Íjuka hagwã-my heraha-vy nonhe'êi joty ovexa. Onhapĩ-tama ramo ovexa ra'y ragwe nonhe'êi joty ave. Upéixa voi ogwereco asy ramo Nhandejáry rembigwái-pe, nonhe'êi ete voi. Okirirĩ ete voi oiko-vy. Ovexa hasê e'ỹ va'e-rami ave Nhandejáry rembigwái nahasẽiry voi. ³³ Ogwereco asy ramo íxupe, onhembysarái ramo hese, ndaipóri hepyha. Ojapose va'e mante ojapo hese hikwái. Ko yvy-gwi omokanhngatu íxupe. Ndaipóri omombe'u va'erã he'ýi kwéry rehegwa.”*

Upéixa voi Isaías remimoigwe kwatia-rehe Hesu rehegwa nhe'ê.

³⁴ Ha upéi katu he'i íxupe upe mburuvixa:

—Kiva'e-rehe po omombe'u araka'e Isaías? he'i. —Ojehegwa para'e omombe'u, hapixa rehegwa para'e omombe'u, he'i. —Emombe'u katu xe-vy, he'i Filipe-pe.

* 8:33 Is 53.7-8

³⁵ Upe-ma ramo omombe'u mburuvixa-pe. Oikwaa uka ranhe íxupe ovexa rehegwa nhe'ê ramigwa. Hesu rehegwa nhe'ê porã omombe'u ave. ³⁶ Upéi mokõive oje'ói-ma tape-rupi hikwái. Ogwahê-ma y-py ramo:

—Y ko ra'e, he'i íxupe mburuvixa, —Iporã tipo xe mongarai ko'ã, he'i íxupe mburuvixa.

³⁷—Nde ko erejerovia tee-ma ramo ae Hesu-rehe, iporã-ma va'erã enhemongarai uka, he'i mburuvixa-pe.

—Ajerovia tee-ma voi ko xe, he'i joty. —Hesu Cristo katu Nhandejáry ra'y tee va'e voi. Upéa arovia voi, he'i íxupe.

³⁸ Upéi mburuvixa he'i omombyta haggwã omba'e ndururu. Ogwejy mokõive imba'e ndururu-gwi. Ogwejy oĩ-vy y-py. Omongarai íxupe mburuvixa-pe. ³⁹ Upe-ma ramo ogwerokanhy-ma heraha-vy Filipe-pe Nhe'ê Marangatu tee va'e. Ha mburuvixa katu oma'ê jevy mo'ã hese, ha ndohexáiry-ma. Oho-ma ra'e. Upe-ma ramo oho jevy-ma mburuvixa tape-rupi. Ovy'a eterei oho-vy. ⁴⁰ Ha Filipe ojererokanhy rire ojehexa uka jevy outro tetã-my héry va'e Azoto-py. Ohasa hasa ohokwe-vyte omombe'u mbe'u Hesu rehegwa oho-vy. Tetã ambue mbue-py omombe'u mbe'u oho-vy. Cesaréia tetã-my ogwahê-ma ramo, opyta upe-py.

9

Saulo ogwerova gwekoha

(At 22.3,6-16; 26.9,12-18)

¹ Ha Saulo katu ipy'agwasu voi joty. Ipoxy eterei joty Hesu nhe'ê renduha kwéry-rehe: “Ajuka-ta íxupe kwéry” he'iri iri opy'a-py. Upéa-gwi oho pa'i ruvixagwasu renda-py ojerure haggwã kwatia nhe'ê-rehe:

²—Emoĩ katu ne nhe'ê kwatia-rehe xe araha haggwã Damasco tetã-my. Judeu kwéry oporahéi haty haty-rupi arahase, he'i. —Upe-py atopa ramo Hesu rape pyhyha, ajohu va'e gwive kwimba'e kunha va'e gwive aru-ta ko'a-py. Ne nhe'ê-rupi aru-ta. Nde kwatia nhe'ê-rupi aru-ta ijokwaha reheve, he'i pa'i ruvixagwasu-pe.

³ Upéi ogwata oho-vy. Ogwata ramo hi'agwĩ opyta íxugwi Damasco tetã. Ogwahê pota-ma jave, upe-ma ramo sapy'a hendy mbaraete eterei íxupe. Áry-gwi omohendy ijerekwe-rehe. ⁴ Omondýi-gwi ho'a-ma oho-vy jvy-py. Ohendu onhe'ê va'e íxupe. Héry ohenói ramo:

—Saulo, Saulo, he'i henói-vy. —Ma'erã po xe rereko asy? he'i íxupe oporandu-vy.

⁵—Kiva'e tipo nde erenhe'ê va'e xe-vy, xe Járy, he'i íxupe Saulo.

—Xe voi Hesu ne rembiereko asy voi xe, he'i íxupe. ⁶—Ha epu'ã katu upe tetã-my tereho. Upe-py omombe'u-ta nde-vy ne rembiaporã, he'i íxupe Hesu.

⁷ Ha hendivegwa opyta okirirĩmba ete ikyhyje-gwi. Inhe'ê rei ohendu ha avave-pe ndohexáiry. Upéa-gwi opyta okirirĩmba ete hikwái. ⁸ Upéi ha'e onhembo'y jevy-ma oipe'a gwesa osareko jevy-ma ha mba'eve ndohexáiry. Upéa-gwi ojepopyhy uka ojereraha ukavvy Damasco-py. ⁹ Mbohapy áry mba'eve ndohexáiry. Mbohapy áry ndokarúi ave oiko-vy. Mbohapy áry ndoy'úi ave oiko-vy.

¹⁰ Upe-py oĩ Hesu nhe'ê renduha héry va'e Ananias. Ikepe'y ojehexa uka ixupéte Nhandejáry Hesu:

—Ananias, he'i Hesu ohenói-vy íxupe.

—Mbava'e tipo ere-ta xe-vy? he'i Ananias Nhandejáry Hesu-pe. ¹¹ He'i íxupe Hesu:

—Ekwa tereho ko tetã mbyte-rupi oho va'e tape-rupi, tape karê e'y héry va'e-rupi. Eheka katu Tarso pygwa héry va'e Saulo. Judas róga-py ehaka íxupe. Upe-py oiko va'e. Áy voi ko ombojeupi xe-vy onhe'ê oiko-vy. ¹² Ikéry pygwa vérami nde rexa kuri. He'i nde-rehe: “Ahexa-ma kwimba'e héry va'e Ananias. Oike ramo xe koty-py, omoĩ ramo opo xe-rehe xe resapyso jevy haggwã ahexa” he'i kuri nde-rehe Saulo ikéra-py, he'i Ananias-pe Nhandejáry Hesu imombe'u-vy.

¹³ Ha upéi katu he'i Ananias Nhandejáry Hesu-pe:

—Ha ore rereko asy va'ety niko upéa, xe Járy, he'i íxupe. —Ahendu hendu herakwā aiko-vy. Heta-ma ogwereco asy nde re'yí kwéry-pe, Jerusalém-my oiko va'e-pe. ¹⁴Áy ogwahē Saulo ou-vy ko'a-py. Pa'i ruvixa kwéry nhe'ê-rupi ou. Nde réry renoiha gwive onhapytí hagwā ou, he'i Hesu-pe.

¹⁵Ha Hesu katu he'i íxupe:

—Ekwa katu tereho joty henda-py, he'i. —Saulo ko xe rembiporavo xe mombe'u mbe'u hagwā judeu e'y va'e kwéry-pe, huvixagwasu-pe ave. Israel remiariröre judeu kwéry-pe ave xe mombe'u hagwā aiporavo-ma íxupe. ¹⁶Tereho ere íxupe “Heta erehasa asy-ta xhegwi. Nde ko xe mombe'u-tagwi nde rereko asy-ta” ere íxupe, he'i Ananias-pe Nhandejáry Hesu.

¹⁷Upe ramo oho oike Judas róga gwy-py Saulo oí ha-py. Opo omoí hese:

—Aju-ma ngatu áy, xe ryvy, Saulo, he'i íxupe. —Áy katu xe mbou Nhandejáry Hesu, upe ojehexa uka va'ekwe kuri nde-vy ereju jave tape-rupi. Orombohesapyso jevy hagwā xe mbou kuri áy, he'i. —Nde py'a omohynhē hagwā Nhe'ê Marangatu tee va'e xe mbou ave, he'i íxupe Ananias.

¹⁸Upe-ma ramo ho'a hesa-gwi pira pekwe ramigwa. Hesapyso jevy-ma Saulo. Upe rire onhembo'y onhemongarai uka hagwā. ¹⁹Okaru-ma. Okaru ramo, omombaraete jevy-ma íxupe tembi'u.

Ha Saulo katu ndahi'aréiry oiko Hesu nhe'ê renduha upe tetā-my oiko va'e ndive.

Saulo omombe'u Hesu rehegwa

²⁰Upe-ma ramo omombe'u judeu oporahéi haty haty-rupi. Hesu rehegwa omombe'u:

—Hesu ko Nhandejáry ra'y tee voi, he'i omombe'u-vy.

²¹Henduha gwive opondera hese. Mbava'e po ojehu íxupe ha'e kwéry ndoikwaáiry:

—Upe va'e voi ogwereco asy va'ekwe Hesu réry renoiha-pe gwive. Jerusalém-my oiko va'e ogwereco asy va'ekwe, he'i ojúupe. —Áy kuri upe va'e ou a-py. Gwí Hesu réry renoiha-pe oipyhy hagwā mo'á heraha-vy ou. Ou kuri onhapytí reheve ogweraha hagwā pa'i ruvixa kwéry renda-py. Ma'erā po ndogwerahái íxupe kwéry, he'i ojúupe.

²²Upéa-gwi opondera hese hikwái. Ha ha'e katu ipy'agwasuve suve oho-vy. Omon-girirímba judeu kwéry upe pygwa-pe: “Hesu ko Cristo, Nhandejáry remimbou tee voi” he'i oikwaa uka-vy íxupe kwéry.

²³Are-ma omombe'u oiko-vy. Upe rire judeu kwéry onhombo'e mbo'e hese ijuka hagwā.

—Jajuka katu Saulo-pe, he'i ojúupe. ²⁴Áry ramo oha'arō oí-vy. Pyhare ave oha'arō oí-vy upe tetā rokē. Osē jave ojuka hagwā mo'á íxupe oha'arō arō voi oí-vy. Onhombo'e mbo'e ramo hese hikwái oí omomrandu va'e Saulo-pe. ²⁵Upe ramo peteí pyhare oresende íxupe inhe'ê renduha. Koty-gwi ohupi ombogwey hagwā okupe-koty. Hi'ári-gwi ombogwey íxupe. Yvate-gwi ombogwey yvy-py. Ajakagwasu-py ombogwey íxupe.*

Saulo ogwahē oho-vy Jerusalém tetā-my

²⁶Ha upéi katu Saulo oho jevy Jerusalém tetā-my. Ogwahē rire omoirüse mo'á Hesu nhe'ê renduha-pe gwive. Ha ikyhyje joa íxugwi hikwái: “Saulo ko ndaha'éí Hesu nhe'ê renduha va'e” he'i mo'á hese herovia e'yha.

²⁷Upe ramo Hesu nhe'ê renduha va'e héry va'e Barnabé oho ogweru oheja oike Hesu remimondo renda-py. Ogwerovia uka íxupe kwéry Saulo rehegwa nhe'ê. He'i Barnabé:

—Saulo ko ohexa ra'e Nhandejáry Hesu-pe tape-rupi, he'i omombe'u-vy. —Onhe'ê ra'e íxupe Nhandejáry Hesu. Upe rire Saulo ogwahē Damasco tetā-my. Upe-py ipy'agwasu omombe'u-vy Hesu réry-py, he'i hese omombe'u-vy.

²⁸Upéixa ramo Saulo omoirü-ma Hesu nhe'ê renduha-pe. Hendive ogwata oiko-vy Jerusalém tetā-rupi. Ipy'agwasu omombe'u-vy Nhandejáry Hesu réry-py. ²⁹Omombe'u ramo gwí judeu kwéry-pe, grego-py onhe'ê va'e-pe, onhe'ê mbojevye jevy oiko-vy inhe'ê. Ojukase mo'á íxupe oiko-vy. ³⁰Upéa ohendu ramo, iresende-vy ogwerova íxupe he'yí kwéry. Cesaréia tetā-my ogwerova íxupe:

* 9:25 At 11.32-33

—Iporāve ereho Tarso tetā-my nde re'ýi renda-py, he'i íxupe hikwái.

³¹ Ha Hesu reroviaha gwive ipy'agwapy oiko-vy. Judéia yvy rupigwa gwive, Galiléia yvy rupigwa gwive, Samaria yvy rupigwa gwive ave oiko porā meme-ma, ndoiko asyvéi-ma. Hi'aranduve nduve oiko-vy herovia-vy. Omboete meme oiko-vy Nhandejáry Hesu-pe. Ha Nhe'ê Marangatu tee va'e oipytygwô mbaraete íxupe kwéry. Upéa-gwi onhembohetave tave oho-vy hikwái.

Pedro ogwahê oho-vy Lida tetā-my

³² Ha Pedro katu ogwata oho-vy. Opa-rupi oho. Tetā tetā-rupi Hesu reroviaha gwive pohu-vy oho. Lida tetā mygwa-pe ave oho oipohu-vy. ³³ Upe-py oho otopa hasy va'e héry va'e Enéias. Ha Enéias onheni mante oiko-vy va'e. Hajy jeapa va'e voi. Hajy jeapa-gwi oito ro'y-ma onheni oi-vy gwupa-py. ³⁴ Ha upéi katu he'i hasy va'e-pe:

—Āy voi katu Hesu Cristo ne mbogwera-tama, Enéias. Epu'ã katu, he'i íxupe. — Emboapu'a nde rupa ereraha hagdã, he'i hasy va'ekwe-pe. Upe-ma ramo pya'e opu'ã okwera-ma.

³⁵ Ha Lida pygwa gwive, Saronã pygwa gwive ave ojeroviapa-ma Nhandejáry Hesu-rehe. Ohexa-ma nga'u íxupe ogwata ramo. Upéa-gwi ogwerovapa gwekoha Hesu-rehe. Ha naimombyryi oi ojôhugwi outro tetā héry va'e Jope.

³⁶ Upe-py oiko ave Hesu nhe'ê renduha kunha va'e héry va'e Tabita. Ha grego nhe'ê-py héry va'e Dorcas. Upéa hembiaipo porā meme-ma voi oiko-vy. Iporiahu va'e-pe ome'ê va'erã ojapo oiko-vy. ³⁷ Upe ramo hasy omano reheve-ma. Ombojahu hetekwe omoi koty yvate-py. ³⁸ Upéi onhemombe'u Pedro oimeha:

—Pedro ko oime Lida-py, he'i hese.

Ha Lida hi'agwi oi Jope-gwi. Upéa-gwi Pedro piári omondo mokoi kente. Oho omombe'u íxupe omano va'ekwe. Ojapura pura íxupe ou pya'e hagdã:

—Ejapura pura katu eju-vy, he'i íxupe.

³⁹ Upéa-gwi opu'ã ou-vy hendive. Ogwahê rire ou-vy, ogwerojeupi heraha-vy íxupe koty yvate-py. Upe-py tembirekokwe gwive onhembo'y Dorcas retekwe yke-rehe ohapirô-vy. Ohexa uka Pedro-pe hembiaipokwe, oiko joty ramogware onhendive. Hembiaipokwe kamisa ao ro'y pygwa ave ohexa uka íxupe.

⁴⁰ Ha Pedro katu omosêmba imondo-vy íxupe kwéry. Ha upéi ha'e gwety'ã-rehe onhesi omondo onhe'ê Nhandejáry-pe. Upe rire ojerova oma'ê hetekwe-rehe:

—Epu'ã katu, Tabita, he'i.

Omanoha-gwi upe kunha oipe'a gwesa ohexa íxupe. Ohexa ramo ovy-ma oi-vy.

⁴¹ Upéi oipopyhy imopu'ã-vy kunha-pe. Upe rire ohenói omoingepa jevy hagdã koty-py gwí Hesu reroviaha. Tembirekokwe omoingepa jevy ave. Oike jevy rire ohexa uka íxupe kwéry oikove jevyha:

—Nugwi oikove jevy-ma, he'i.

⁴² Ha Jope pygwa gwive ohendu herakwã. Heta-ma ojerovia Nhandejáry Hesu-rehe. ⁴³ Ha Pedro opyta upe-py. Simão róga-py opyta. Upe Simão vakapi-gwi ojapo opaixagwa. Ha Pedro katu are opyta hendive oiko-vy hoga-py.

10

Pedro omombe'u judeu e'ý kwéry-pe Hesu rehegwa nhe'ê

(At 11.5-17)

¹ Oi va'ekwe Cesaréia tetā-my capitão héry va'e Cornélio judeu e'ý va'e. Cem soldado ruvixa va'e. Gwi va'e soldado kwéry Itália yvy pygwa. ² Upe va'e capitão Nhandejáry remimbota ojapose pose va'e voi. Nhandejáry-pe omboete va'e hoga pygwa ndive omboete. He'ýi e'ý remikotevê ome'ê me'ê va'e. Omondo mondo va'e Nhandejáry-pe onhe'ê. ³ Ha upéi katu petei áry ka'arugwasu-ma ramo, íxupe mante ojehexa uka jahexa e'ý va'e. Ojehexa uka íxupe Nhandejáry rembigwái yváy gwigwa va'e. Oike ramo ou-vy koty-py ohexa:

—Cornélio, he'i íxupe.

⁴ Onhemondýi voi. Upéa-gwi ohexa katu katu íxupe:

—Ma'erã po ereju a-py, xe Járy? he'i oporandu-vy Nhandejáry rembigwái-pe.

Upéi he'i íxupe Nhandejáry rembigwái:

—Nhandejáry ko imandu'a porã va'e nde-rehe. Ne nhe'ẽ eremondo-gwi íxupe, nane ma'e rakate'ýi-gwi ave imandu'a porã nde-rehe, he'i íxupe. —Nde johu porã Nhandejáry. ⁵ Áy katu emondo ne rembigwái Simão piári. Pedro-py ohenói va'e ave. Emondo Jope tetã-my. ⁶ Upe-py oiko Simão héry va'e ndive. Upe Simão vakapi-rehe omba'apo. Simão róga oí ygwasu rembe-rehe, he'i íxupe Nhandejáry rembigwái.

⁷ Upe rire ojeupi jevy oho-vy yvate-koty Nhandejáry rembigwái yváy gwigwa. Upe ramo upe capitão heta hembigwái va'e, mokõi va'e-pe ohenói ou haggwã. Peteĩ soldado Nhandejáry-pe omboete va'e ohenói ave. ⁸ Upéi omombe'upa ete mbohapygwa-pe gwembiexagwe. Upe rire mbohapyve va'e-pe omondo Jope tetã-my. Pedro piári omondo. Upéi ogwata oho-vy. ⁹ Iko'ẽ-my omoagwĩ-ma Jope ojeupe oho-vy ha ne'írá ogwahẽ oho-vy upe-py.

Upe-ma ramo ogwahẽ e'ý jave, áry pyte-rupi, ojeupi-ma yvate Pedro. Hóga apotaha apesýi va'e ári ojeupi oĩ-vy onhomongeta haggwã Nhandejáry ndive. ¹⁰ Ivare'a okaruse-ma. Gwemi'urã ra'arõ-vy íxupe mante ojehexa uka jahexa e'ý va'e. ¹¹ Ohexa ojekwaa pya'e yváy-gwi. Ohexa ogwejy tupa arigwa ramigwa. Tuvixa va'e voi. Irundy joapy joja reheve oipyhy joja imbogwejy-vy. Yvate-gwĩ yvy-py ombogwejy. ¹² Hye py-py oĩ opaixagwa mymba gwive, opaixagwa mbói gwive ave, gwyerehe osyryry va'e gwive, opaixagwa gwya gwive ave. ¹³ Upe-ma ramo ohendu íxupe onhe'ẽ va'e:

—Epu'ã katu, Pedro. Ejuka ere'u va'erã, he'i íxupe.

¹⁴ —Ndajuka mo'áiry, xe Járy, he'i. —Nda'u mo'áiry. Áy peve ne'írá vyteri ha'u so'o vai. Hi'upy e'ý nda'úi vyteri voi yma gware nhe'ẽgwe-rupi aiko-gwi, he'i Nhandejáry-pe. ¹⁵ Upe rire ohendu jevy íxupe onhe'ẽ va'e:

—Nhandejáry he'i-ma ramo, “Iporã ja'u”, “Hi'upy e'ý” ani ere teĩ, he'i íxupe.

¹⁶ Mbohapy vése ohexa hemimbogwejy. Mbohapy vése ohendu íxupe onhe'ẽ va'e. Upe rire ogwerojeupi jevy áry-rehe heraha-vy.

¹⁷ Ha Pedro omondo oiko-vy gwesa gwembiexagwe-rehe. “Ma'erã po ahexa ra'e upéa” he'i ojeupe. Upe ramo capitão remimbou ko ogwahẽ-ma ou-vy.

—Kipy tipo oime Simão róga? aje'i-ma oporandu ra'e.

¹⁸ Áy onhembo'y oĩ-vy okẽ rovái. Oporandu hese:

—Oiko tipo a-py upe Simão héry va'e Pedro? he'i onhe'ẽ hatã-vy.

¹⁹ Ha Pedro omondo joty oiko-vy gwesa gwembiexagwe-rehe. Upe ramo ogwahẽ-ma ou-vy capitão remimbou. Ogwahẽ-ma ramo, he'i íxupe Pedro-pe Nhe'ẽ Marangatu tee va'e:

—Mbohapyve ko'áiy ogwahẽ-ma ou-vy nde reka-vy. ²⁰ Ekwa katu egwejy, he'i íxupe. —Ani ne ate'ý teĩ, he'i íxupe. —Tereho katu hendive. Gwĩ mbohapy ou va'e xe remimbou voi, he'i íxupe Nhe'ẽ Marangatu tee va'e.

²¹ Upéi ogwejy ou-vy:

—Xe ko ne rembieka, he'i. —Mbava'e-rehe tipo ereju ra'e? he'i mbohapyve ou va'e-pe.

²² —Ore ko capitão Cornélio remimbou, he'i íxupe. —Ha'e heko porã ete va'e. Nhandejáry-pe omboete oiko-vy va'e. Judeu kwéry gwive imandu'a porã hese. Kwehe he'i íxupe nde-rehe Nhandejáry rembigwái imarangatu va'e yváy gwigwa: “Ere kuri Pedro-pe tou nde róga-py erehendu haggwã hemimombe'urã” he'i Nhandejáry rembigwái, he'i íxupe omombe'u-vy.

Ha Pedro katu:

²³ —Néi, he'i. —Peike katu peju-vy. Iporã peke a-py, he'i mbohapyve va'e-pe.

Iko'ẽ-my osẽ oho-vy oho-ma hendive. Oĩ oho va'e Pedro ndive Jope pygwa Hesu reroviaha. Omoirũ íxupe oho-vy. ²⁴ Upéi iko'ẽ-my jevy ae katu ogwahẽ-ma oje'ói-vy hikwái Cesaréia tetã-my. Ha capitão oha'arõ oĩ-vy íxupe kwéry. Oha'arõ ave capitão ndive hemienói. He'ýi kwéry hembiahyu va'e ave oha'arõ hendive. ²⁵ Ha Pedro oike-tama ramo

capitão rōga-py ohogwaitī ou-vy íxupe capitão. Ojeity imboete-vy vvy-rupi. ²⁶Ha Pedro omonhembo'y jevy íxupe:

—Epu'ã katu, he'i. —Xe ko ne ramigwa voi. Xe ndaha'úi Nhandejáry. Teko rei ave xe, he'i Pedro capitão-pe.

²⁷Upéixa onhomongeta-vy hendive oike koty-py. Upe-py oike ramo, heta-ma oĩ ojogweroaty va'e. ²⁸Upe ramo he'i íxupe kwéry imombe'u-vy:

—Judeu kwéry ko yma gware nhe'égwe-rupi oiko ramo, ndoipotái omoirũ judeu e'ỹ kwéry-pe. Ndoipotái ni oipohu íxupe. Ko va'e peikwaa voi peẽ, he'i. —Áy ae katu he'i xe-vy oikwaa uka-vy Nhandejáry: “Oĩ nhamoirũ e'ỹ va'e, oĩ jaipohu e'ỹ va'e ave, ani ere teĩ” he'i xe-vy. ²⁹Upéa-gwi erembou ramo xe piári, naxe ate'ỹiry aju-vy. Mbava'e-rehe tipo erembou xe piári ra'e? he'i íxupe kwéry Pedro.

³⁰Upéi he'i íxupe capitão:

—Kwehe ojapo-ma mbohapy áry ka'arugwasu-ma ramo a-rami, amondo xe nhe'ẽ Nhandejáry-pe aiko-vy. Amondo jave xe nhe'ẽ, ojehexa uka xe-vyte. Xe-vyte ojehexa uka sapy'a ijao rendypa va'e. Onhembo'y oĩ-vy xe rovái. ³¹He'i xe-vy: “Nhandejáry ohenduma ra'e ne nhe'ẽ, capitão Cornélio. Nane ma'e rakate'ỹi va'evy-gwi imandu'a porã nde-rehe” he'i xe-vy. ³²“Áy katu emondo Jope tetã-my Simão piári, héry va'e ave Pedro. Oĩ pe vakapi-rehe omba'apo va'ety rōga-py. Héry ave Simão upe va'e. Ygwasu rembe-rehe oiko va'e” he'i xe-vy ojehexa uka va'ekwe. ³³Upéa-gwi naxe ate'ỹiry amondo-vy nde piári. Ha nde nane ate'ỹiry voi oromomandu ramo. Ereju voi. Ha áy katu ore kwéry oronhombheta ko'a-py. Nhandejáry resa-py ne nhe'ẽ rendu-vy oroha'arõ. Nhandejáry nde-vy he'i va'ekwe, emombe'u katu ore-vy. Orohenduse voi, he'i íxupe capitão Cornélio.

³⁴⁻³⁵Ha upéi Pedro he'i íxupe kwéry omombe'u-vy:

—Nhandejáry ko nhande rayhu va'e. Enterovéa-pe vvyvýpory gwive kente kwéry peteĩxa ohayhu va'e. Nipo anhei ete voi katu ra'e, he'i. —Íxupe omboete va'e-pe gwive ojohu porã Nhandejáry. Nombojevíy oĩ-vy. Ojohu porã ave tape porã pyhyha gwive. “Ore kwéry anho mante judeu kwéry va'e Nhandejáry rembiayhu” oro'e mo'ã na ndaupéixairy ra'e. Yvypory va'e gwive Nhandejáry rembiayhu. ³⁶Are-ma va'ekwe Nhandejáry ombou va'ekwe ore-vy Israel kwéry va'e-pe onhe'ẽ porã: “Hesu Cristo ko pene mbopy'agwapy va'erã, pende kwéry Jary ave” he'i Nhandejáry omombe'u-vy, he'i Pedro imombe'u-vy.

Upéi he'i jevy íxupe kwéry:

³⁷—Ha João Batista katu omombe'u ranhe oiko-vy Nhandejáry nhe'ẽ oporomongarai ave. Upe rire Hesu onhepyrũ omombe'u. Galiléia vvy-rupi oho omombe'u. Upe rire Judéia vvy-rupi gwive oho omombe'u oiko-vy Nhandejáry nhe'ẽ. Upe va'e peikwaa voi, he'i ³⁸—Upe Nazaré pygwa Hesu rehegwa nhe'ẽ ave peikwaa voi ave. Nhandejáry nhe'ẽ-py oipy'apyhy mbaraete íxupe Nhe'ẽ Marangatu tee va'e. Ha upéi katu opa-rupi oho oiko-vy Hesu. Hemiapo porã porã meme. Oipytygwõ mbaraete íxupe Nhandejáry. Upéa-gwi anháy rerekoha gwive ombogwera. ³⁹Ha ore ko Hesu rembiapo apo rexahare. Upéa-gwi judeu kwéry vvy-py tetã mirĩ mirĩ-rupi, Jerusalém tetã-my ave ojapo oiko-vy va'ekwe oromombe'u oroiko-vy. Ha gwĩ judeu kwéry katu ojuka íxupe va'ekwe. Kurusugwasu-rehe ohupi va'ekwe ojuka-vy. ⁴⁰Ha Nhandejáry omopu'ã jevy íxupe. Mbohapy áry rire, omoingove jevy-ma íxupe. Ombojekwaa jevy íxupe ave. ⁴¹Ha enterovéa niko ndohexáiry. Ore ae orohexa va'ekwe. Are-ma va'ekwe ore poravo Nhandejáry hexaharã. Upéa-gwi oikove jevy rire, ore-vyte ojehexa uka. Orokaru hendive. Oro'y'u ave hendive. ⁴²Upéi he'i ore-vy Hesu: “Pemombe'u katu entéro va'e-pe xe rehegwa nhe'ẽ porã. Peje katu íxupe kwéry: Omói voi ra'e Nhandejáry gwa'ýry Hesu ogwereco hagwã hembiapokwe pokwe-rami oikove va'e gwive omano va'ekwe-pe gwive ave, peje katu xe mombe'u-vy. Ha hembiaapo porã va'e katu Hesu omogwahẽ va'erã oha-py ha hembiaapo vai va'e katu omboyke va'erã imondo-vy, peje íxupe kwéry” he'i ore-vy Hesu, he'i Pedro imombe'u-vy.

Upéi he'i jevy íxupe kwéry:

⁴³—Ha Nhandejáry nhe'ẽ-py omombe'u va'ety gwive omombe'u va'ekwe Hesu re-hegwarã nhe'ẽ: “Ojekwaa va'erã ou-vy” he'i. “Ha ojerovia hese va'e gwive omboyke

va'erā íxugwi hembiaipo vaikwe Nhandejáry. Hesu-rehe, Hesu réry-rehe ojerovia va'e-gwi omboyke va'erā hembiaipo vai va'ekwe" he'i va'ekwe hese hikwái, he'i íxupe kwéry Pedro omombe'u-vy.

⁴⁴Onhe'ě jave, ogwahě ou-vy Nhe'ě Marangatu tee va'e. Omohynyhēmba ipy'a upe pygwa kwéry-pe ogwejy-vy. Entéro ohendu va'e-pe gwive inhe'ě, ogwereco. ⁴⁵⁻⁴⁶Upéa rexa-vy opondera hese kwéry gwí judeu va'e, Hesu reroviaha Jope-gwi ou va'ekwe Pedro ndive. Ohendu nhe'ě ambue-py oikwaa e'ỹ reheve onhe'ě ramo judeu e'ỹ va'e, Nhandejáry-pe ombotuvixa mba'e ramo, ohendu inhe'ě ave. Upéa-gwi he'i ojóupe:

—Ma'erā ogwahě íxupe Nhe'ě Marangatu tee va'e? he'i opondera-vy hese. —Nugwí judeu e'ỹ kwéry-pe ave hexakwaa rei nipo ra'e Nhandejáry inhe'ěrā-my. Ome'ě rei nipo ra'e íxupe Nhe'ě Marangatu tee va'e oiko hagwā ipy'a-py kwéry, he'i ojóupe opondera-vy hese.

Upe-ma ramo he'i Pedro gwe'íy kwéry-pe:

⁴⁷—Áy katu omohynyhēmba-ma ipy'a kwéry judeu e'ỹ va'e-pe Nhe'ě Marangatu tee va'e, nhande py'a omohynyhēmba va'ekwe-rami, he'i. —Upéixa ramo nhamongarai íxupe. “Nhamongarai e'ỹ teí íxupe kwéry” ani ja'e teí íxupe kwéry, he'i gwe'íy kwéry-pe Pedro.

⁴⁸Upéixa ramo Pedro he'i omongarai hagwā Hesu Cristo réry-py. Ha upéi katu he'i íxupe judeu e'ỹ va'e:

—Nderepyta mo'ái tipo ra'e ore ndive. Epyta katu kuri ore ndive, he'i íxupe.

11

Pedro omombe'u Cornélio rehegwa nhe'ě

(At 10.9-48)

¹Ha upéi katu Cornélio kwéry rerakwā osarambi oho-vy. Ha Hesu remimondo, Judéia vvy rupigwa oí va'e gwive ave Hesu reroviaha va'e, ohendu herakwā:

—Judeu e'ỹ kwéry ko ohendu ra'e Nhandejáry nhe'ě nhande kwéry-rami, he'i ojóupe imombe'u-vy.

²Upéixa ramo Pedro ogwata ou-vy Jerusalém tetā-my. Upe-py ogwahě ramo, onhe'ě poxy íxupe upe pygwa judeu va'e:

³—Judeu e'ỹ kwéry ko ndojapói va'e Moisés amyri he'i va'ekwe gwive. Tojapo katu, he'i. —Gwí judeu e'ỹ va'e katu onhekytí uka e'ỹ va'e voi. Nanhande reko ramíry oiko. Upéa-gwi ma'erā ereho ereiko ra'e hendive? Ma'erā po erekaru ra'e hendive? he'i oporandu poxy-vy íxupe.

⁴Ha Pedro katu ojeapysaka porā ranhe inhe'ě-rehe. Upe rire ae omombe'upa íxupe kwéry. Ojehu va'ekwe gwive omombe'u:

⁵—Kweheve kuri aime Jope tetā-my. Nhandejáry ndive anhomongeta jave ojehexa uka xe-vy. Xe-vyte ojehexa uka, he'i. —Ahexa ombogwejy ramo tupa arígwa ramígwa tuvixa va'e. Irundy joapy joja reheve oipyhy joja imbogwejy-vy. Yvate-gwi ombogwejy. Opyta oí-vy xe yke-rehe. ⁶Ama'ě hese. Ipy-rehe ama'ě aí-vy. Upe-py ahexa mymba gwive, ka'agwy rupigwa mymba gwive ave. Gwye-rehe osyryry va'e gwive, gwya gwive ave ahexa. ⁷Upéi ahendu xe-vy onhe'ě va'e: “Ekwa katu, Pedro. Ejuka ere'u va'erā” he'i xe-vy. ⁸“Nda'u mo'ái, xe Járy” ha'e íxupe. “Áy peve ne'írā vyteri ha'u so'o vai. Yma gware nhe'ěgwepupi nda'úi hi'upy e'ỹ” ha'e íxupe. ⁹He'i jevy xe-vy yváy-gwi onhe'ě va'e: “Nhandejáry ko he'i-ma ramo, Iporā ja'u, Hi'upy e'ỹ, ani ere teí” he'i xe-vy. ¹⁰Mbohapy vése ahendu xe-vy onhe'ě va'e. Upe rire ogwerojeupi jevy yváy-koty heraha-vy, he'i Pedro omombe'u-vy.

¹¹—Upe-ma ramo katu ogwahě ou-vy mbohapyve va'e, Cesaréia-gwi xe piári ombou va'ekwe. Xe aime ha-py ogwahě ou-vy. ¹²Upéi he'i xe-vy Nhe'ě Marangatu tee va'e: “Ani ne ate'ỹ teí ereho hagwā” he'i. “Tereho katu hendive” he'i xe-vy. Upe-ma ramo xe aha-ma. Ko va'e xe jave oho va'e ave, seis Hesu renduha va'e. Orogwahě ramo upe-py oroikepa oroho-vy capitão Cornélio róga-py. ¹³He'i ore-vy: “Ahexa kuri Nhandejáry rembigwái yváy gwigwa. A-py xe róga-py onhembo'y oí-vy ramo ahexa voi. Upéi he'i

xe-vy Nhandejáry rembigwái: Emondo katu Jope-py Simão piári héry va'e ave Pedro.
¹⁴ Upe va'e omombe'u-ta nde-vy nhe'ê porã. Upéa nhe'ê ererovia ramo, ne resende-ta Nhandejáry. Nde re'ýi kwéry ave oresende-ta, he'i xe-vy Nhandejáry rembigwái" he'i ore-vy omombe'u-vy. Upe ramo anhe'ê capitão Cornélio-pe hendivegwa-pe ave anhe'ê. ¹⁵ Ne'írã vyteri anhe'ê heta, omohynhêmba-ma ipy'a kwéry ogwejy-vy Nhe'ê Marangatu tee va'e. Yma-ma nhande py'a omohynhêmba va'ekwe-rami voi omohynhê ipy'a íxupe. ¹⁶ Upe ramo xe mandu'a Nhandejáry Hesu he'i va'ekwe-rehe: "João ko y-py oporomongarai va'ety. Ha ndaha'úi y pygwa va'e-rami pene mongarai va'erã Nhandejáry. Nhe'ê Marangatu tee va'e ae pende py'a omohynhêmba va'erã ne mongarai-vy" he'i va'ekwe nhande-vy Hesu, he'i Pedro omombe'u-vy.

¹⁷ —Upéa ramo Nhandejáry ome'ê-ma voi ra'e judeu e'ý kwéry-pe Nhe'ê Marangatu tee va'e. Yma jajerovia-ma ramo Nhandejáry Hesu Cristo-rehe nhande-vy ome'ê va'ekwe-rami, ko'ây íxupe kwéry háma ave ome'ê. Upéa-rehe, "Aníke erejapo upéa" xe nda'e mo'ái voi Nhandejáry-pe, he'i íxupe kwéry Pedro omombe'u-vy.

¹⁸ Ohendu rire inhe'ê, nainhe'ê poxyvéi-ma. Omomba'egwasu-ma Nhandejáry-pe:

—Nipo anhei ete voi katu ra'e: "Perova katu pende rekoha, peipyhy katu tape porã" he'i judeu e'ý kwéry-pe ra'e. Nhande-vy he'i hagwe-rami, he'i voi nhande re'ýi e'ý-pe ave ra'e Nhandejáry, he'i ojóupe hikwái.

Judeu e'ý va'e-pe omombe'u Hesu rehegwa nhe'ê

¹⁹ Ko'anga katu Hesu reroviaha gwive ndoikovéiry peteí henda-py. Osarambipa va'ekwe oje'ói-vy hikwái. Ha mburuvixa kwéry katu ojuka va'ekwe Hesu reroviaha héry va'e Estêvão-pe. Ojuka rire, ipy'agwasuve suve ogwereco asy hagwã Hesu reroviaha-pe gwive. Ojerereko asy-gwi opa isarambipa oje'ói-vy. Oí oho va'ekwe Fenícia yvy-py peve, Chipre ykõi meve ave, Antioquia tetã meve ave. Upe va'e nomombe'u jojái Nhandejáry nhe'ê. Judeu kwéry anho-pe mante omombe'u mbe'u. Judeu e'ý va'e-pe ae nomombe'úi Nhandejáry nhe'ê.

²⁰ Oí ave Chipre pygwa, Cirene pygwa ave. Gwí va'e oho va'ekwe Antioquia tetã-my, Nhandejáry nhe'ê omombe'u-vy. Ogwerojoja imombe'u-vy íxupe kwéry. Judeu e'ý va'e grego va'e-pe ave, omombe'u va'ekwe Nhandejáry Hesu rehegwa nhe'ê porã. ²¹ Ha Nhandejáry oipytygwõ mbaraete íxupe kwéry omombe'u hagwã. Upéa-gwi ohendu ramo inhe'ê, heta-ma ojerovia-ma Hesu-rehe. Ogwerova-ma gwekoha hese.

²² Ha upéi katu ohendu-ma herakwã Hesu reroviaha Jerusalém pygwa va'e. Upéa-rehe ipa'ũ-gwi kwéry omondo kwimba'e héry va'e Barnabé. Antioquia-py omondo. ²³ Upe-py ogwahê ramo, ohexa voi Nhandejáry rembihovasa. Ohexa ramo ovy'a:

—Peipyhy katu tape porã, he'i íxupe kwéry. —Upe va'e-rupi meme tapeho. Peteíxa peraha pene renonde-rupi pene arandu. Anive teí peva Nhandejáry Hesu rape-gwi, he'i íxupe kwéry Barnabé.

²⁴ Hekoha porã va'e Barnabé. Nhe'ê Marangatu tee va'e ipy'a omohynhêmba íxupe va'e, ojerovia tee va'e Hesu-rehe. Upéa-rupi onhembohetave tave oho-vy Nhandejáry Hesu reroviaha.

²⁵ Ha upéi katu Barnabé oho Tarso tetã-my. Saulo reka-vy oho. ²⁶ Otopa ramo ogweru. Peteí ro'y opyta upe-py Antioquia-py. Omboheta hagwã Hesu reroviaha-pe opyta. Ombo'e mbo'e oiko-vy mokõi va'e. Heta voi hemimbo'e. Upe pygwa ombohéry ranhe va'e Hesu nhe'ê renduha-pe: "Cristo kwéry va'e" he'i ombohéry-vy.

²⁷ Upe-py ombo'e mbo'e jave ogwahê ou-vy Nhandejáry nhe'ê-py omombe'u va'ety Jerusalém-gwi ou va'ekwe. ²⁸ Ogwahê rire onhembo'y-ma héry va'e Ágabo:

—Yvy apy gwive-rehe opa va'erã tembi'u, he'i. —Ohasa asy eterei va'erã yvypóry gwive, he'i henonderã omombe'u-vy.

Upéa oikwaa, Nhe'ê Marangatu tee va'e ome'ê íxupe-gwi inhe'êrã. Ha upéa áry-py ndojehúiry. Cláudio oiko ramo mburuvixagwasu ramo ae, ojehu-ma he'i va'ekwe.

²⁹ Upéa-rehe Ágabo nhe'ê rendu-vy, Hesu nhe'ê renduha he'i ojóupe:

—Nhamboaty aty katu plata jaraha uka hagwã, he'i, —nhaipytygwõ hagwã nhande re'ýi kwéry, Judéia yvy rupigwa va'e. Jareko rekomi va'ete nham'e, he'i ojéupe.

³⁰ Upe rire ogweraha uka Barnabé-pe Saulo ndive plata ome'ê hagwã Hesu reroviaha rerekwa-pe.

12

Mburuvixagwasu Herodes omoĩ preso Pedro-pe

¹ Upe ramo mburuvixagwasu héry va'e Herodes ogwereco asy-ma Hesu reroviaha-pe.

² Ogwereco asy héry va'e Tiago-pe. Upéa João ryke'y va'e. Ojuka uka kysepuku hã jovái va'e-py. ³ Upéa ohexa ramo, ovy'a joa-ma judeu kwéry. Upéa-gwi mburuvixagwasu ipy'agwasuve suve oho-vy. He'i omoĩ hagwã preso Pedro-pe ave. Aretewasu-py omoĩ preso íxupe. Upe va'e áry-py mbojape onhembovu e'ý va'ekwe ho'u judeu kwéry. ⁴ Ha upéi oipyhy rire, omoĩ íxupe preso. Omonhangareko uka hese dezesseis soldado-pe. Irundy rundy omonhangareko uka oĩ-vy hese. Ha mburuvixagwasu he'i opy'a-py: “Aretewasu opa rire, anohê-ta judeu kwéry ohexa hagwã íxupe ajuka hagwã íxupe anohê-ta” he'i mo'ã hese.

⁵ Upéixa ramo opyta preso Pedro. Ha Hesu reroviaha kwéry nainhate'ýiry omondo meme hagwã Nhandejáry-pe onhe'ê hese.

⁶ Ha mburuvixagwasu he'i: “Ko'ê ramo anohê-ta enterove va'e ohexa hagwã íxupe” he'i mo'ã ojéupe. Pyhare ramo oke oĩ-vy Pedro, mokõi soldado pa'ügwe-rupi oke. Ojepokwa oĩ-vy mokõi isã-rehe. Oĩ soldado ave okê ra'arõha. ⁷ Upe-ma ramo pya'e ojehexa uka onhembo'y-vy Nhandejáry rembigwái yváy gwigwa. Hendy ramo koty-py, omohembipepa. Omokanáí íxupe ijati'y-rehe omombáy hagwã. Opáy jave he'i íxupe:

—Epu'ã pya'e ereho hagwã, he'i íxupe.

Upéixa he'i-ma ramo, pya'e ojerapa rei isã íxugwi. Ho'a rei ipoapy-gwi isã.

⁸ Upe rire he'i íxupe Nhandejáry rembigwái:

—Emonde katu nde ku'a jopyha. Emoĩ ave nde pyryru nde py-rehe, he'i íxupe.

Omonde-ma. Omoĩ-ma opyryru opy-rehe. Upéi he'i jevy íxupe:

—Emonde katu nde ao ro'y-py eremonde va'ety ereho hagwã xe rupive, he'i Pedro-pe.

⁹ Upe-ma ramo Pedro osê koty-gwi oho hagwã hupive. Mbava'e po ojehu ra'e, ha'e ndoikwaáiry: “Xe páy-py pa ahexa ra'e Nhandejáry rembigwái. Xe kéra-py pa ahexa ra'e” he'i ojéupe, ndoikwaáiry-gwi. ¹⁰ Upéi mokõi okê-rupi osê ha ndohexái íxupe soldado okê ra'arõha. Upe rire ogwahê oho-vy okê pahagwe-py, kwarepoti-gwi ojejapo va'ekwe. Upe-py oime tape tetã-my oho va'e. Upéa okê onhembotypa voi. Ha ogwahê ramo ha'e-py ojepe'a rei íxupe oho-vy. Upe rire osêmba oho-vy. Henonde-rupi oho tape-rupi oje'óí-vy. Upe-ma ramo pya'e onhemo'ã-ma íxugwi Nhandejáry rembigwái. ¹¹ Onhemo'ã-ma rire oikwaa-ma osêha. He'i ojéupe: “Nipo anhei ete voi katu ra'e” he'i. “Ndojehexa uka reíry voi ra'e xe-vy. Ombou nipo ra'e Nhandejáry gwembigwái xe renohê-vy. Áy katu ndaipu'akavéi-ta xe-rehe mburuvixagwasu” he'i. “Gwí judeu kwéry naxe rexa mo'ãi xe juka ramo hikwái. Xe resende nipo ra'e Nhandejáry” he'i ojéupe.

¹² Inharandu porã rire, oho gwe'ýi kwéry róga-py, Maria róga-py oho. Upéa Maria João Marcos sy va'e. Upe-py aje'i-ma kuri heta ojogweroaty ombojeupi upi hagwã Nhandejáry-pe onhe'ê. ¹³ Ha upéi katu ogwahê oho-vy ramo, ombota mbota okê-rehe. Ohendu ramo, ou ohexa tembigwái héry va'e Rode kunha va'e. ¹⁴ Inhe'ê ohendu ramo, oikwaa-ma: “Ou-ma ra'e Pedro” he'i ojéupe. Ovy'a eterei. Ovy'a eterei-gwi hesarái-vy ndoipe'ái okê. Oripapa jevy koty-py oho-vy omombe'u hagwã:

—Pedro ko okê rovái onhembo'y-ma oĩ-vy, he'i omombe'u-vy.

¹⁵ Ha ndogweroviái voi he'ýi kwéry:

—Nde tavy, he'i hembigwái-pe hikwái.

—Anhetegwa tegwa tee va'e, he'iri iri íxupe kwéry. Ha ndogwerovia etéi voi:

—Ndaha'úi Pedro, he'i. —Nhandejáry rembigwái hese onhangareko va'e ra'e ae. Oheko a'ã rei ra'e Pedro-pe, he'i rei hembigwái-pe.

¹⁶ Onhomongeta hikwái jave koty-py, ombota mbota jevy-ma oiko-vy. Ipaha-py oho onhokendavo okê ohexa-ma íxupe. Ohexa ramo: “Mba'éixa ereju ra'e” he'i Pedro-rehe opondera-vy.

—Ereju-ma ra'e. Eregwahẽ-ma nipo ra'e, he'i íxupe.

¹⁷ Upéi omopu'ã opo omongiririmba koty pygwa-pe gwive he'i hagwã:

—Aje'i-ma kuri xe renohẽ Nhandejáry rembigwái preso aĩ ha-gwi, he'i Pedro omombe'u-vy. —Emombe'u katu xe rerakwã Hesu reroviaha-pe gwive, huvixa Tiago-pe emombe'u ave, he'i íxupe kwéry Pedro.

Upe rire ndopytái upe-py osê oho-vy.

¹⁸ Ko'ẽmba ramo ojapura eterei soldado kwéry hese:

—Okany-ma nipo ra'e Pedro, he'i joa hikwái. —Mamo-ngoty po oho Pedro? he'i ojóupe. ¹⁹ —Eheka heka katu íxupe, he'i soldado-pe mburuvixagwasu.

Ha ndotopái íxupe. Upe-ma ramo mburuvixagwasu ohenói soldado-pe okê ra'arõha-pe ou hagwã hovagwy-py. Omonhe'ẽ íxupe oporandu-vy:

—Mba'éixa tipo Pedro pemokany uka hagwã ra'e? he'i.

—Ndoroikwaái ore, he'i.

Ndoikwaái-gwi Pedro okany hagwe, he'i ojuka hagwã okê ra'arohare-pe. Upe rire mburuvixagwasu Herodes osê oho-vy Judéia yvy-gwi. Opyta are Cesaréia tetã-my.

Mburuvixagwasu Herodes omano

²⁰ Ha upéi katu Herodes ipoxy eterei-ma Tiro tetã mygwa-pe. Sidom tetã mygwa-pe ave ipoxy. He'i ojóupe upe pygwa:

—Ipoxy-ma ra'e nhande-vy mburuvixagwasu. ãy katu nombou mo'avéi nhande-vy nhane remi'urã. Mba'eve novendevéi arã nhande-vy, he'i ojóupe.

Upéa-gwi onhomono'õ no'õ ou-vy Herodes renda-py hikwái. Ou ranhe hembigwái renda-py. Hembigwái héry va'e Blasto. Herodes róga kakwaa-rehe onhangareko va'e. Upéi he'i: —Oroipota ereraha ore nhe'ẽ eremombe'u hagwã mburuvixa-pe, he'i hembigwái-pe.

Upe rire ohopa mburuvixa renda-py. Ojerure íxupe omoporã hagwã inhe'ẽ kwéry ndaipoxyvéiry hagwã ójehe kwéry.

²¹ Ha upéi katu ogwahẽ-ma ou-vy mburuvixa onhemonhe'ẽ hagwã áry ijatýra va'e-pe. Upe pygwa kwéry va'e-pe onhemonhe'ẽ. Omonde ao porã va'e. Mburuvixa remimonde va'e omonde. Onhe'ẽ hagwã-ma mburuvixa gwapy haty-rehe ogwapy. Upe ramo onhe'ẽ-ma. ²² Onhe'ẽ ramo íxupe kwéry:

—Ndaha'éi teko rei onhe'ẽ va'e. Tupã ae onhe'ẽ, he'i hese onhe'ẽ hatã-vy hikwái.

²³ Ha mburuvixa katu ohendu rei. Omotupã ramo íxupe hikwái, ojohu porã voi: “Xe ko ndaha'éi tupã” nde'íry. Onhemotupã ra'anga anga rei voi. Nhandejáry tee-pe ae nomboetéiry. Upéa-gwi pya'e omoĩ mba'erasy hese Nhandejáry rembigwái yváy gwigwa. Heta mba'erasy ho'u-ma hyekwe. Ho'u-gwi omano.

²⁴ Ha Hesu reroviaha onhembohetave tave joty oho-vy. ²⁵ Ha Barnabé Saulo ndive oheja Jerusalém-my upe plata ombojehe'a he'a va'ekwe heru-vy. Hembieru oheja upe-py. Oheja rire oho jevy-ma. João Marcos ogweraha ave ondive.

13

Barnabé Saulo ndive osê oho-vy omombe'u hagwã Nhandejáry nhe'ẽ

¹ Oĩ va'ekwe Antioquia tetã-my Hesu reroviaha onhomoaty aty va'e. Ipa'ũ-my oĩ ave Nhandejáry nhe'ẽ-py omombe'u va'ety, imbo'eháry ave. Oĩ Barnabé, oĩ Simeão héry va'e Kamba ave. Upéi Cirene pygwa héry va'e Lúcio. Upéi Manaém mburuvixagwasu Herodes tyvyranga. Upéi Saulo ave. Entéro imbo'e mbo'eha kwéry. ² Ha upéi ojogweroaty hikwái Nhandejáry mboete-vy. Ohasa ave okaru e'ý reheve hikwái. Upe-ma ramo he'i íxupe kwéry Nhe'ẽ Marangatu tee va'e:

—Eipe'a katu xe-vy Barnabé Saulo ndive, he'i. —Upéa xe rembiporavo ojapo hagwã xe remimbota. Eipe'a katu ojapo va'erã xe aipota va'e, he'i Nhe'ẽ Marangatu tee va'e.

³ Upe rire ohasa rire hikwái okaru e'ỹ reheve, omondo rire Nhandejáry-pe onhe'ê hikwái, omoĩ inhakã ári opo imondo-vy gwekovía.

⁴ Upéixa ramo osê oho-vy. Nhe'ê Marangatu tee va'e omondo ha-rupi oho. Oho ygwasu rembe'y-py, Selêucia tetã-my oho. Ogwahê ramo upe-py kanoagwasu-py ogwejy onhemboyrú oho-vy. Oho kanóa-py ogwahê ykôigwasu-py héry va'e Chipre. ⁵ Upe-py ogwahê rire, ogwahê tetã-my. Tetã héry va'e Salamina. Upe-py judeu kwéry porahéi haty haty-rupi omombe'u meme Nhandejáry nhe'ê. Omoirũ íxupe oiko-vy karia'y héry va'e João Marcos oipytygwô hagwã íxupe.

Oje'opa-ma Elimas resa

⁶ Ha upéi katu ohasa oho-vy Chipre ykôirupi. Yvy-rupi oho. Ykôi apy peve oho. Pafos tetã-my ogwahê oho-vy. Upe-py otopa anháy arandu-py hi'arandu va'e, judeu va'e héry va'e Barjesus: “Xe ko Nhandejáry nhe'ê-py amombe'u tee va'ety” he'i rei ójehe. Ha Nhandejáry nhe'ê mombe'uha ra'anga anga rei va'e voi upe va'e. Mburuvixa irũ voi upe va'e. ⁷ Ha mburuvixa ykôi járy va'e, hi'arandu va'e voi, héry va'e Sérgio Paulo. Nhandejáry nhe'ê ohenduse va'e. Upéa-gwi Barnabé-pe Saulo ndive ohenói ou hagwã omombe'u hagwã Nhandejáry nhe'ê. ⁸ Ha upe va'e anháy arandu-py ojapo va'e, ombojevise mo'ã imondo-vy inhe'ê. Elimas-py ave ombohéry va'e íxupe grego nhe'ê-py. He'i Elimas mburuvixa-pe:

—Hesu rehegwa nhe'ê-rehe ko ani erejeapysaka teĩ. Ani ererovia teĩ Hesu-pe, he'i mo'ã mburuvixa-pe.

⁹ Upe-ma ramo Nhe'ê Marangatu tee va'e omohynyhẽmba-ma ipy'a íxupe Saulo-pe. Paulo-py ave ombohéry va'e íxupe. ãy peteĩ opyta heryrã. Saulo-py ndaheryvéry. Upéi ohexa katu Elimas-pe Paulo:

¹⁰ —Anháy rerekoha ko nde, he'i íxupe. —Hekoha porã va'e gwive erembojevise jevy meme va'e imondo-vy. Nde apu ereiko-vy va'e. Nde py'a vai va'e ereiko-vy. Tape porã-rupi oho va'e erejoko. Tape vai-rupi ae eremondose mo'ã íxupe kwéry. ¹¹ Ma'erã erejapo upéixa? Ánga ete-ma katu Nhandejáry ne mbohasa asy-ta he'i íxupe. Nande resapysovéi-ma arã. Kwarahy rendy nderehexavéi-ma arã. Are'i voi upéixa ereiko va'erã, he'i Elimas-pe Paulo.

Upe-ma ramo oje'opa-ma hesa. Omohatatimba-ma hesa. Pytũmba rei íxupe. Ogwata oheka-vy ipopyhyharã. ¹² Ha mburuvixa he'i: “Anhei nipo ra'e” he'i. Ogwerovia tee voi, ohexa ramo ojehu va'ekwe. Nhandejáry rehegwa nhe'ê-rehe opondera eterei-ma oiko-vy.

Paulo omombe'u Nhandejáry nhe'ê Antioquia pygwa-pe

¹³ Ha upéi katu Paulo inhirũ gwéry ave osê Pafos-gwi oje'ói-vy. Oike jevy kanoagwasu-py oje'ói jevy. Oho kanóa-py ogwahê Perge tetã-my. Perge Panfília vvy-py oĩ. Upe-py João Marcos oheja íxupe kwéry. Ojevise ou-vy. Jerusalém tetã-my ou. ¹⁴ Ha'e kwéry ae ohasa oje'ói-vy. Ogwahê outro tetã héry va'e Antioquia-py. Pisídia vvy rembe'y-rehe oĩ. Upe-py pytu'uha áry-py oho judeu porahéi haty-py. Oike ogwapy. ¹⁵ Upéi upe pygwa hatã okwatia omone'ê oĩ-vy ramo, enterove ojeapysaka inhe'ê-rehe. Moisés amyri remimombe'ukwe, Nhandejáry nhe'ê-py omombe'u va'ety remimombe'ukwe ave omone'ê nhe'ê. Omonhe'ẽmba rire, omanha Barnabé ndive Paulo-rehe gwĩ ojeparahéi haty pygwa ruxiva. Oma'ẽ ramo hese, onhe'ê ogweruruka íxupe. He'i:

—Erenhemonhe'ẽse ramo, enhemonhe'ẽ katu ore kwéry-pe, ore re'ýi, he'i Barnabé ndive Paulo-pe.

¹⁶ Upe ramo Paulo onhembo'y-ma. Omokiriri hagwã omopu'ã opo ojeapysaka porã hagwã inhe'ê-rehe. Upéi he'i judeu kwéry-pe:

—Pejeapysaka joa katu, xe re'ýi kwéry, Israel remiarirõre kwéry. Xe re'ýi e'ỹ va'e gwive ave Nhandejáry pemboete va'e, pejeapysaka porã katu pehendu porã hagwã xe nhe'ê.

¹⁷ —Nhandejáry ko, nhande re'ýi Járy oiporavo va'ekwe nhane ramói amyri-pe. Entéro yvypóry oĩ va'e gwive ojoavite-gwi oipe'a va'ekwe nhane ramói amyri-pe. Upe rire oiko ovvy e'ỹ-my nhane ramói kwéry. Egito vvy-py oiko hikwái. Upe-py onhembo'e'ýi eterei,

ohovasa íxupe-gwi Nhandejáry. Upe rire ogwenohê heraha-vy íxupe kwéry upe yvy-gwi. Upe pygwa ndoipotái mo'ã ogweraha. Ha Nhandejáry oresendepa joty heraha-vy. Imbaraete voi Nhandejáry.* ¹⁸Ha upéi katu quarenta ro'y onhangareko hese kwéry heraha-vy tekваты e'y-rupi. Nohenduséi ramo jepe inhe'ê, onhangareko porã joty hese kwéry.* ¹⁹Gwa'yry-rami joty ogwereco íxupe kwéry. Ogwahê ramo oyvyrã héry va'e Canaã-py, upe pygwa heta-ma oí. Hetãe tãe va'e. Sete ijyvye vye va'e. Gwía kwéry-pe ohundipa Nhandejáry. Nhane ramói kwéry-pe ae ogweroike jevy hekovía. Ome'ê ijyvyrã íxupe kwéry, omano ramo hikwái opyta hagdã ta'yre-pe.*

²⁰—Upe rire quatrocentos e cinqüenta ro'y-rupi Nhandejáry ombopyahu ahu nhane ramói kwéry ruvixa. Heta ombopyahu rire omoingo jevy inhe'ê-py omombe'u va'ety-pe héry va'e Samuel.* ²¹Upe rire ndoipotavéi gwuvixarã yma gware ramigwa hikwái. Mburuvixagwasu ete ramigwa ae oipota. Upéa-gwi Nhandejáry ome'ê íxupe kwéry huvixagwasu eterã héry va'e Saul. Túvy ko héry va'e Quis. Tamoigwasu ko héry va'e Benjamim. Upe ramo oiko-ma Saul mburuvixa ramo. Quarenta ro'y rire ae omosê íxupe Nhandejáry.* ²²Mburuvixagwasu ramo oikoha-gwi omosê imondo-vy. Opyta hekovía Davi huvixagwasurã. Nhandejáry nhe'ê-py opyta. Mburuvixa Davi-rehe Nhandejáry onhe'ê va'ekwe a-rami: “Ko va'e kwimba'e Jessé ra'y héry va'e Davi xe arovy'a íxupe va'e. Xe remimbota gwive ojapopa va'erã” he'i va'ekwe hese, he'i Paulo imombe'u-vy.*

²³Upéi he'i jevy judeu kwéry-pe:

—Áy katu ogwahê-ma ou-vy Hesu, Davi amyri remiarirõre va'e, Israel remiarirõre voi. Hesu ko Nhandejáry remimbou nhande-vy. Nhane resende hagdã ou, he'i. —Upe he'i hagdã-rami ombou. ²⁴Ha Hesu ne'írã vyteri onhepyrũ omombe'u mbe'u. Upe ramo oí héry va'e João Batista. Onhemonhe'ê oiko-vy nhande kwéry va'e-pe: “Peheja katu pene rembiapo vaikwe. Penhemongarai uka katu” he'i nhande-vy João onhemonhe'ê-vy.

²⁵—Upéi mixi vyteri oí hembiaporã. Onhemonhe'ê apy-ma. Upe ramo he'i nhande kwéry-pe: “Ha'e ko Cristo, nhane remiha'arõ va'e, ere mo'ã kuri xe-rehe. Xe ndaha'ei voi upe Cristo” he'i. “Nhane remiha'arõ arõ va'e ndaha'ei xe. Xe rapykwerigwa ae ou-ta kuri. Heko porãve va'e xéhegwi. Upéa-gwi amboete-gwi íxupe xe atí voi amoirũ hagdã íxupe. Ni hembigwái ramo jepe aiko” he'i Hesu-rehe João Batista, he'i Paulo imombe'u-vy.

²⁶Upéi he'i jevy judeu kwéry-pe:

—Áy katu amombe'u-ta peê-my, xe re'yí kwéry, Abraão remiarirõre kwéry. Nhandejáry-pe pemboete peiko-vy va'e, xe re'yí kwéry e'y va'e-pe, amombe'u-ta ave. Ombou ra'e nhande-vy Nhandejáry ko va'e nhe'ê. Nhane resendeha rehegwa nhe'ê ombou. ²⁷Ha Jerusalém-my oiko va'e gwive huvixa kwéry ave ndoikwaái íxupe. Oha'arõ arõ ramo jepe Hesu-pe hikwái, ndoikwaái íxupe ogwahê ramo. Ndoikwaái ave Nhandejáry nhe'ê-py omombe'u va'ety he'i va'ekwe. Upe va'e omonhe'ê meme ojeporahéi haty haty-rupi. Pytu'u tu'uha áry-py omonhe'ê ha ndoikwaáiry voi hikwái. Upéi ogwahê-ma Hesu-rehe yma gware remimombe'ukwe-py. Hesu rehegwarã omoí kwatia-rehe va'ekwe-py ogwahê-ma: “Iporã katu jajuka Hesu-pe” he'i jave hese mburuvixa kwéry, ogwahê-ma voi yma gware remimombe'ukwe-py. ²⁸Ha upéi katu ndikatúí omboja hese ivai va'e. Hembiaapo vai e'y reheve ojerure joty voi mburuvixa-pe héry va'e Pilatos ojuka hagdã íxupe. ²⁹Upéixa ogwahêmba-ma voi yma gware remimombe'ukwe-py. He'i va'ekwe gwive ojapopa-ma voi hese. Ohupi uka kurusugwasu-rehe imoi-vy ojuka hagdã íxupe. Upe rire, omano rire, ombogwey kurusugwasu-gwi tetekwe omoí hetekwe rendaty-py itakwagwasu-py opyta hagdã mo'ã. ³⁰Ha Nhandejáry katu omoingove jevy íxupe. ³¹Are-ma ojehexa uka uka oiko-vy oirũgwe, Galiléia-gwi Jerusalém peve hendive ou va'ekwe-pe. Áy katu upe va'e hexahare va'e omombe'u mbe'u Hesu rekoha nhande kwéry-pe.

* 13:17 Êx 12.51 * 13:18 Nm 14.34; Dt 1.31 * 13:19 Dt 7.1; Js 14.1 * 13:20 Jz 2.16; 1 Sm 3.20 * 13:21 1 Sm 8.5; 10.21 * 13:22 1 Sm 16.12; Sl 89.20

³²—Upéixa ramo ore ave oroju kuri ko'a-py oromombe'u hagwā peẽ-my nhe'ẽ porã. Hesu ko Nhandejáry remimoingove jevy va'e. Yma ete voi Nhandejáry omombe'u va'ekwe nhane ramoigwasu amyri kwéry-pe gwembiaporã. ³³Áy katu ogwahẽmba-ma hemimombe'ukwe-py. Áygwa-pe hemiarirõ kwéry-pe ojabopa-ma. He'i va'ekwe gwive ojabopa áy. Yma Nhandejáry remimoigwe va'ekwe kwatia-rehe héry va'e Salmo inúmero mokõi va'e. A-rami hemimoigwe:

“Nde ko xe ra'y tee voi. Ko'áy katu amombe'u-ta enterovéa-pe: Ko va'e xe ra'y tee voi”* he'i va'ekwe Nhandejáry Hesu oikove jevytamaha va'erã-rehe. ³⁴Upe rire Nhandejáry omoĩ uka jevy va'ekwe hese kwatia-rehe onhe'ẽ. A-rami hemimoigwe:

“Orohovasa va'erã ime'ẽ-vy nde-vy gwĩ iporã marangatu va'e gwive ha'e tee va'ekwe ame'ẽ va'erã va'ekwe Davi-pe”

he'i Nhandejáry. Omotenonde Hesu-rehe omoingove jevytaha, hetekwe ine e'ýtaha ave.*

³⁵Upéi Davi omoĩ jevy va'ekwe hese kwatia-rehe onhe'ẽ. A-rami hemimoigwe:

“Ndereheja mo'ái teĩ ijyta-py nde ra'y imarangatu va'e ine hagwā hetekwe”*

he'i omoĩ-vy kwatia-rehe inhe'ẽ. Kwatia héry va'e Salmo. Upéixa voi Davi he'i va'ekwe Hesu-rehe, Nhandejáry omoingove jevy-tagwi íxupe pono ine hetekwe, he'i Paulo imombe'u-vy.

³⁶Upéi he'i jevy judeu kwéry-pe:

—Ha myamyri Davi katu ojabo oiko-vy va'ekwe Nhandejáry remimbota oikove reheve. Upe rire, ojabopa rire omano va'ekwe. He'yí kwéry retekwe pa'ũ-my omoĩ va'ekwe itakwagwasu-py. Upéi inemba Davi retekwe. Ojeroaigwepa-ma. ³⁷Áy katu nainembáiry voi Hesu retekwe. Nhandejáry ae omoingove jevy-ma íxupe. Upéa-gwi nainemba jepéiry hetekwe. Oikove jevy-ma voi Hesu.

³⁸⁻³⁹—Upéixa ramo amombe'u-ta peẽ-my, xe re'yí kwéry, peikwaa porã hagwā. Hesu ko omano rire oikove jevy-gwi, Nhandejáry omboyke-ma pendéhegwi pene rembiapo vaikwe. Pejerovia tee ramo hese, Hesu-rehe, napene mbohasa asy mo'áiry. Pende reja rei-ta. Ha pejerovia e'y ramo katu hese, pepyta va'erã pende py'a ky'a reheve joty. Gwĩa Moisés he'i va'ekwe erehendu ramo jepe, nane mbopy'a potĩ mo'ái voíte. Nde py'a ky'a joty va'erã, he'i Paulo imombe'u-vy.

Upéi he'i jevy judeu kwéry-pe:

⁴⁰⁻⁴¹—Yma ete omoĩ va'ekwe kwatia-rehe onhe'ẽ Nhandejáry nhe'ẽ-py omombe'u va'ety. A-rami hemimoigwe:

“Pejeapysaka katu peẽ Nhandejáry nhe'ẽ-rehe, penhembohory peiko-vy va'e. Peiko reheve xe rembiapo porã-ta. Pene rembiexapyrã-rupi ajapo-ta. Ha peẽ katu ndaperoviái arã voi. Onhemombe'u ramo jepe, ndaperovia mo'ái voíte. Upéa-gwi pepondera rei va'erã peiko-vy Nhandejáry rembiapo-rehe perovia e'y-vy. Upe rire pemanomba va'erã”*

he'i Nhandejáry nhe'ẽ-py omombe'u va'ety. Upéixa voi omoĩ va'ekwe kwatia-rehe onhe'ẽ. Áy katu xáke. Ani pepyrũ Nhandejáry nhe'ẽ-rehe. Ho'a arã pende-rehe myamyri he'i va'ekwe, he'i Paulo imombe'u-vy judeu kwéry-pe.

“Ore katu orojere-ta pendéhegwi” he'i judeu kwéry-pe Paulo

⁴²Omombe'upa rire, osẽ oho-vy Paulo Barnabé ndive. Osẽ jave ojerure íxupe ou jevy hagwā:

—Áy pytu'uha óra oiko jevy ramo, eju jevy katu, he'i. —Emombe'u mbe'uve katu ore-vy ko'ã va'e rehegwa nhe'ẽ, he'i íxupe.

⁴³Ha upéi katu osẽmba oje'ói-vy ojeperahéi haty-gwi. Heta-ma oĩ imoirũháry. Heta judeu omoirũ va'e íxupe. Heta judeu reko-rupi oiko va'e omoirũ va'e ave. Upe va'e-pe he'i onhemonhe'ẽ-vy:

* 13:33 Sl 2.7 * 13:34 Is 55.3 * 13:35 Sl 16.10 * 13:40-41 Hc 1.5

—Pende rexakwaa rei-ma kuri Nhandejáry. Tape porã-rupi ereho meme ramo, pende rexakwaa porãve rei-ta vyteri. Upéa-gwi anive ereva teĩ tape porã-gwi, he'i íxupe kwéry.

⁴⁴Upéi ogwahê jevy ramo pytu'uha áry, ouparãgwe voi hikwái. Ojogweroatyparãgwe voi upe tetã mygwa gwive ohendu hagwã Nhandejáry nhe'ê. ⁴⁵Ha judeu kwéry katu ohexa ramo ojogweroatypa ramo, upéa mokõigwa-rehe ndaija'evéi-ma: “Ijapu Paulo” he'i hese. Onhe'ê vai rei hese hikwái.

⁴⁶Ha Paulo Barnabé ndive ndaikyhyjéi voi onhe'ê-vy. Nokirirĩry voi. Ipy'agwasu voi he'i-vy:

—“Emombe'u ranhe katu judeu kwéry-pe xe nhe'ê” he'i kuri ore-vy Nhandejáry. Ha peê katu Nhandejáry nhe'ê pehenduse e'ỹ va'e. Pembojevvy va'e voi. Nhandejáry ndive ndapeikoséi nipo ra'e opa e'ỹ reheve. Aipo ramo peikoseha-rami katu peiko katu, he'i íxupe kwéry. —Ore katu orojere-ta pendéhegwi. Nhande re'ýi e'ỹ ha-py oroho-ta Nhandejáry nhe'ê oromombe'u hagwã.

⁴⁷—Upe va'e orojapo va'erã, he'i kuri ore-vy Nhandejáry: “Nde ko xe rembiporavo eremo'arandu hagwã judeu e'ỹ-pe pytũ mygwa-rami rei oiko va'e-pe, arakatu pygwa-rami ae oiko hagwã. Ko vvy apy gwive oiko va'e gwive, emo'arandu katu onheresende hagwã” he'i kuri ore-vy Nhandejáry. Upéixa omoĩ uka va'ekwe kwatia-rehe onhe'ê Nhandejáry, he'i judeu kwéry-pe Paulo imombe'u-vy.*

⁴⁸Ohendu ramo inhe'ê ovy'a eterei judeu e'ỹ kwéry:

—Iporã ete voi Nhandejáry nhe'ê, he'i omomba'egwasu-vy íxupe.

Gwĩa ojave opa e'ỹ reheve gwarã voi Nhandejáry oiporavo va'ekwe ogwerovia-ma inhe'ê.

⁴⁹Hesu reroviaha ramo oiko-ma. Opa-rupi ohasa Nhandejáry nhe'ê. Entéro upe vvy pygwa gwive ohendupa inhe'ê.

⁵⁰Ha judeu kwéry katu ndojohu porãi upéa nhe'ê. Upéa-gwi onhe'ê apo eterei mokõi va'e-pe hikwái. Ombopoxy-ma hese hereko-vy gwĩ onhembotuvixa mba'e va'e-pe, Nhandejáry-pe omboete va'e, onhembotuvixa kunha va'e. Upe tetã mygwa ruvixa kwéry-pe ave ombopoxy: “Pemosê katu imondo-vy Paulo Barnabé ndive” he'i onhe'ê apo-vy hese. Ndoipotavéi ojerovia hese. Ogwerovia apu-gwi omosê imondo-vy íxupe kwéry gwetã-gwi hikwái.

⁵¹Ha Hesu remimondo mokõi va'e katu ombovava opy ho'apa hagwã vvy ipy-gwi. Upéixa omombe'u enterovéa-pe mburuvixa rembiapo vaikwe. ⁵²Upe rire oho ete. Ha upe pygwa Hesu nhe'ê renduha va'e ovy'a eterei. Omohynyhẽmba oiko-vy ipy'apy íxupe kwéry Nhe'ê Marangatu tee va'e.

14

Paulo Barnabé ndive oho Icônio tetã-my

¹Ha upéi katu Paulo Barnabé ndive oho outro tetã-my. Icônio-py ogwahê oho-vy. Upe-py ojehu jevy íxupe Antioquia tetã-my ojehu va'ekwe. Ogwahê rire oike judeu porahéi haty-py. Nhandejáry nhe'ê omombe'u hagwã oike. Ohendu ramo inhe'ê heta eterei ogwerovia va'e. Omombe'u tee rei voi ra'e. Oĩ judeu ogwerovia va'e, oĩ judeu e'ỹ va'e ogwerovia va'e ave. ²Ha judeu ogwerovia e'ỹ va'e katu ombopoxy judeu e'ỹ-pe inhe'ê apo-vy Hesu reroviaha-rehe. Onhe'ê vai rei Cristo kwéry-rehe. Upéa-gwi upe pygwa ndaija'evéi-ma Cristo kwéry-rehe. ³Ha Hesu remimondo mokõi va'e are joty opyty upe-py oiko-vy. Ipy'agwasu reheve omombe'u Nhandejáry nhe'ê oiko-vy. Nhandejáry-rehe ojerovia-gwi ndaikyhyjéiry voi: “Nhandejáry ko nhande rexakwaa rei va'e” he'i ikyhyje e'ỹ reheve. Ha Nhandejáry oipytygwõ voi íxupe. Nhandejáry nhe'ê-py hembiaapo porã hexapyrã-rupi. Inhe'ê-py nhane rembiexa e'ỹ va'e ojapo. Upéa-gwi:

—Anhetegwa nipo ra'e inhe'ê, he'i upe pygwa.

⁴Ha upe tetã mygwa napeteixairy ipy'a kwéry. Ipy'a ambue mbue voi hikwái. Oĩ judeu-py omoirũ va'e, oĩ Hesu remimondo-pe omoirũ va'e ave. Napeteixairy omoirũ va'e. ⁵Upéi ogwereco asy-ta mo'ã Hesu remimondo-pe judeu e'ỹ kwéry. Judeu kwéry huvixa kwéry

* 13:47 Is 42.6; 49.6

ndive ogwereco asy-ta mo'ã íxupe ave. Ojapi-ta mo'ã íxupe ita-py ojuka hagwã. ⁶Upe-ma ramo oikwaa-ma ojehegwa. Osêmba oho-vy. Outro tetã-my okanhy oho-vy íxugwi. Licaônia yvy-py oho. Upe-py Lистра tetã-my, Derbe tetã-my ave oho. Tetã jerekwe-rupi oho ave. ⁷Upe-py omombe'u mbe'u oho-vy Hesu rehegwa nhe'ê porã.

Paulo ombogwera ogwata e'ỹ va'e-pe

⁸Ha upéi katu ogwahê oho-vy Lистра tetã-my. Upe-py oĩ kwimba'e ogwapy oĩ-vy va'e, ndogwatái va'e. Imitã gwive voi ndogwatái va'e. Ogwata e'ỹ tuja va'e voi. ⁹Onhe'ê ramo Paulo, ojeapysaka inhe'ê-rehe. Upe jave oma'ê porã ogwata e'ỹ va'e-rehe: “Ko va'e ojerovia porã-ma Nhandejáry-rehe okwera hagwã” he'i ojúupe. ¹⁰Upe ramo:

—Enhembo'y katu, he'i íxupe onhe'ê hatã-vy.

Inhe'ê-py opo voi. Opu'ã-ma, ogwata-ma voi.

¹¹Ha upe pygwa ohexa joa ramo Paulo rembiapo:

—Ogwejy-ma ra'e tupã, he'i. —Heko-py ndoúii. Nhande rete-rami rei ae ogwejy ou-vy, he'i mo'ã onhe'ê hatã-vy. Upe tetã mygwa nhe'ê-py onhe'ê va'e.

¹²Ha Barnabé-pe ombohéry hikwái Júpiter-py. Ha Paulo-pe katu ombohéry Mercúriopy. Upéixa ombohéry Paulo-pe heta inhe'ê ogwereco-gwi. ¹³Ha upéi katu ogwahê ou-vy tupã héry va'e Júpiter rembigwái, ipa'í va'e. Upe tetã renonde-py oĩ Júpiter róga kakwaa va'e. Upe-gwi ogweru vaka. Tetã rokê-my ogweru. Onhemboyvotyva reheve ogweru. Omoka'ê-ta mo'ã hereko-vy omboete hagwã Barnabé ndive Paulo-pe ave. Upe pygwa ndive omoka'ê-ta mo'ã imboete-vy:

—Upe va'e, mokõive va'e tupã, he'i mo'ã hese.

¹⁴Upe va'e ohendu ramo, Hesu remimondo, mokõi va'e, onhemondýi. Omondoro ndoropa okamisa py'a. Kente mbyte-rupi oripara oho-vy. Onhe'ê hatã oje'ói-vy:

¹⁵—Ani pejapo teĩ upéixa, ore rapixa kwéry, he'i Paulo íxupe kwéry. —Ore ko ndaha'úi teĩ tupã. Teko rei ae ore, he'i. —Peê ramigwa katu ave ore, he'i Paulo Barnabé ndive onhe'ê hatã-vy íxupe kwéry. —A-rami pejapo ramo, pejapo rei-ta. Ha oromombe'u-ta pee-my nhe'ê porã heru-vy. Pene rembiapo rei va'ekwe rekovia, perova katu pende rekoha Nhandejáry-rehe, he'i íxupe kwéry. —Nhandejáry ko oikove va'e. Ha'e áry apohare, yvy apohare ave, ygwasu apohare ave. Entéro mba'e apohare voi ko Nhandejáry, he'i íxupe kwéry. ¹⁶—Entéro myamyri yma gware-pe gwive oheja oiko rei araka'e Nhandejáry. Áry porukwe-py rei oiko araka'e. ¹⁷Ha nhande kwéry-pe katu hembiape porã porã-ma oikovy. Omongy nhande-vy, ombohi'a porã hi'óra-py. Nhane mohygywatamba Nhandejáry. Nhane mbopy'a rory ave. Upéixa voi Nhandejáry ohexa uka va'ekwe nhande kwéry-pe nhande rayhuha, he'i omombe'u-vy Paulo.

¹⁸Upéixa onhe'ê ramo jepe, omoka'ése joty imboete-vy íxupe hikwái. Hasy-py ojoko íxupe kwéry.

¹⁹Ha upéi katu ogwahê ou-vy judeu kwéry. Antioquia pygwa ou, Icônio pygwa ou ave. Oguhê rire, onhe'ê apo Paulo-pe hikwái. Ombopoxy uka upe pygwa hese. Upe ramo ojapi japi ita-py íxupe hereko-vy ojuka hagwã mo'ã. Upéi: “Omano-ma” he'i mo'ã hese hikwái. Upéixa-gwi ombotyryry heraha-vy íxupe. Tetã pa'ũ-gwi ogwenohê heraha-vy. ²⁰Upéi ogwahêmba Hesu nhe'ê renduha ogweroajere íxupe. Oma'ê ma'ê ójehe jave, opu'ã jevy-ma. Oike jevy upéa tetã-my. Iko'ê-my ohasave oho-vy outro tetã-my. Barnabé ndive oho. Derbe-py ogwahê oho-vy. ²¹Upéa tetã mygwa-pe omombe'u Hesu rehegwa nhe'ê porã. Ohendu-gwi inhe'ê, heta-ma oiko Hesu rehegwa nhe'ê renduharã.

Paulo Barnabé ndive ojevyy jevy ou-vy gwekwa-py

Upe rire ojevyy jevy ou-vy Paulo Barnabé ndive. Oguhê jevy Lистра tetã-my. Icônio tetã-my ogwahê jevy ave. Antioquia Pisidia yvy jave oĩ va'e-py ogwahê jevy ave ou-vy. ²²Upe tetã tetã-rupi onhemonhe'ê jevy Hesu rehegwa nhe'ê renduha-pe:

—Peiko meme katu tape porã-rupi. Ani pejere teĩ Hesu rekoha-gwi. Nhandejáry nhande ruvixa oiko haty-py nhagwahê peve, heta jajerereco asy va'erã. Nhagwahê-ma rire ae ndajahasa asy mo'ávêi-ma, he'i Paulo Barnabé ndive onhemonhe'ê-vy.

²³ Upéi Hesu reroviaha onhomboaty aty ha-rupi oiporavo onhopa'ũ-gwi. Herekwarã kwarã oiporavo onhangareko haggwã hese kwéry. Okaru e'y reheve, heta ombojeupi Nhandejáry-pe onhe'ẽ. Upe rire he'i íxupe kwéry:

—Áy Nhandejáry-rehe pejerovia va'e. Tonhangareko katu Nhandejáry peteĩ teĩ va'e-rehe pende-rehe kwéry, he'i íxupe kwéry Paulo Barnabé ndive.

²⁴ Ha upéi katu ohasa jevy ou-vy Pisidia yvy-rupi. Ogwahẽ ou-vy Panfilia yvy-py. ²⁵ Nhandejáry nhe'ẽ omombe'u rire Perge tetã-my, ou jevy-ma Atália tetã-my. ²⁶ Upe-py ogwey jevy onhemboyrũ kanoagwasu-py ou haggwã. Y-rupima ou. Antioquia tetã-my jevy ogwahẽ ou-vy. Hemimondo mokõi va'e ogwahẽ jevy-ma ou-vy. Are-ma he'i va'ekwe íxupe upe pygwa oho haggwã: “Nhandejáry ko nhande rovasa va'e nhande rexakwa reivy. Tande rovasa katu ne rembiaporã erejapo porã haggwã” he'i va'ekwe íxupe imondo-vy. Áy ojapopa rire ogwahẽ jevy-ma ou-vy.

²⁷ Upe-py ogwahẽ ramo, ombojogweroatypa Hesu reroviaha gwive. Omboaty omombe'upa haggwã gwembiapokwe. Nhandejáry oipytygwõha íxupe omombe'u:

—Áy ogwerovia-ma judeu e'y kwéry ave Nhandejáry nhe'ẽ. Ogwerovia uka-gwi íxupe Nhandejáry, ogwerovia-ma, he'i omombe'u-vy.

²⁸ Upe-py are-ma opyta. Hesu nhe'ẽ renduha ndive opyta.

15

“Naiporãi nhanhemonhe'ẽ hatã hatã judeu e'y kwéry-pe” he'i Hesu reroviaha rerekwa

¹ Ha upéi katu ogwahẽ ou-vy, Judéia yvy-gwi ou va'e. Ombo'e mbo'e oiko-vy Hesu reroviaha-pe:

—Iporã katu erenhempirekytĩ uka upe Moisés amyri he'i hagwe-rupi. Nerenhempirekytĩ ukái ramo, nane resende mo'ãi Nhandejáry, he'i mo'ã imbo'e-vy.

² Ohendu ramo inhe'ẽ Paulo Barnabé ndive:

—Ndaha'éiry upéixa, he'i.

—Upéixa voĩnte nhande reko, he'i Paulo-pe onhe'ẽ mbojevy jevy-vy.

—Ndaupéixairy, he'iri iri onhonhe'ẽ mbojevy jevy-vy.

Omombe'u joavy avy-gwi, he'i ojóupe:

—Nhamondo katu Paulo Barnabé ndive. A pygwa ave nhamondo Jerusalém tetã-my jaikwa porãve haggwã, he'i. —Upe-py oĩ Hesu remimondo, Hesu reroviaha rerekwa ave. Nhamondo katu upe-py, “Iporã-ta pa judeu e'y kwéry onhempirekytĩ uka, tapa naiporãi” oporandu haggwã, he'i.

³ Upéa-gwi omondo íxupe Hesu reroviaha upe-py oĩ va'e. Upéi oho. Ohasa oho-vy Fenícia yvy-rupi, Samaria yvy-rupi ave:

—Gwĩ judeu e'y kwéry ko ogwerovia-ma gwekoha Nhandejáry-rehe, he'i omombe'u mbe'u oiko-vy.

Upéa omombe'u ramo, ombovy'a eterei entéro Hesu reroviaha gwive. ⁴ Ogwahẽ ramo Jerusalém-my ogwerohory íxupe Hesu reroviaha, herekwa kwéry ave, Hesu remimondo ave. Nhandejáry ojapo uka uka íxupe va'ekwe omombe'upa íxupe kwéry.

⁵ Ha oĩ ave Hesu reroviaha, fariseu kwéry moirũhaty. Mokõi va'e reko-rupi oikose va'e. Ohendu ramo Paulo nhe'ẽ, onhembo'y-ma inhe'ẽ mbojevy haggwã:

—Tonhempirekytĩ uka voi katu judeu e'y kwéry. Tohendu katu ave myamyri Moisés he'i va'ekwe nhande rekorã, he'i mo'ã imombe'u-vy.

⁶ Upéixa-gwi ojogweroaty onhomongeta-vy Hesu remimondo, Hesu reroviaha rerekwa ave. Ojogweroaty ojohu haggwã mbava'e tipo Nhandejáry oipota jajapo jaiko porã haggwã.

⁷ Heta omombe'u joavy avy rire, opu'ã-ma oĩ-vy Pedro. He'i Hesu reroviaha kwéry-pe omombe'u-vy:

—Are-ma voi xe poravo va'ekwe pene pa'ũ-gwi Nhandejáry, xe re'yí kwéry. Xe poravo va'ekwe amombe'u haggwã Hesu rehegwa nhe'ẽ porã. Xe nhe'ẽ ohendu ramo, judeu e'y kwéry ogwerovia haggwã hikwái, xe poravo. ⁸ Ha Nhandejáry nhande py'a pygwa va'e rexaha voi. Judeu e'y kwéry ogwerovia tee ramo, ojohu porã. Upéa-gwi nhande py'a

omohinyhēmba hagwe-rami ipy'a omohinyhēmba ave íxupe kwéry. Ome'ē íxupe kwéry ave Nhe'ē Marangatu tee va'e ipy'apyhyharā íxupe. ⁹Peteixa ogwereco va'ekwe enterove va'e gwive imopotĩ-vy. Nhande py'a mopotĩ hagwe-rami, omopotĩ ave judeu e'y kwéry py'a ogwerovia-gwi íxupe.

¹⁰—Ma'erā peje íxupe kwéry ojapo hagwā Nhandejáry remimbota e'y? Ma'erā pembopoxy-ta teĩ Nhandejáry-pe? Judeu reko-rupi jaiko ramo, ipohýi va'e oatúa-rehe ogwerahaha-rami jaiko. Upe va'e reko-rupi ndikatúu jaiko. Nhane ramói amyri ave ndikatúu oiko araka'e upéa reko-rupi. Áy katu ma'erā penhemonhe'ē hatā hatā íxupe kwéry oiko hagwā judeu reko-rupi? Ani pejapo teĩ upéixa. Judeu reko-rupi anho ngatu rei peiko meme ramo jepe, napene resende mo'ai joty Nhandejáry. ¹¹Jajerovia-ma ramo ae Nhandejáry Hesu-rehe, nhane resende-ta. Nhane resendese-gwi, nhane resende-ta. Nhane resende-ha-rami ave, oresende-ta judeu e'y va'e-pe, he'i Hesu reroviaha kwéry-pe Pedro imombe'u-vy.

¹²Onhe'ē rire okirirĩmba hikwái. Upéi Paulo, Barnabé ndive omombe'upa Nhandejáry ojapo uka uka va'ekwe íxupe. Omombe'u hexapyrā-rupi ojapo uka va'ekwe. Judeu e'y remiexarā ojapo uka va'ekwe omombe'upa:

—Nhandejáry rembiapo porā-rehe oponderapa joa hikwái ojohu porā-vy, he'i omombe'u-vy.

Omombe'u jave, ndoikwaái onhe'ē mbojevvy hagwā. ¹³Omombe'upa rire, onhe'ē-ma Hesu reroviaha rerekwa héry va'e Tiago:

—Pejeapsaka porā xe-rehe, xe re'yí kwéry. ¹⁴Simão Pedro ko omombe'upa kuri nhande-vy judeu e'y kwéry rehewga nhe'ē: “Yma Nhandejáry ndohovasái va'ekwe íxupe kwéry, judeu kwéry-rami. Upe rire ae ohovasa va'ekwe íxupe kwéry. Oipe'a va'ekwe onhopa'ũ-gwi hese ojerovia va'e gwe'yirā” he'i nhande-vy Pedro omombe'u-vy. ¹⁵Yma ete Nhandejáry nhe'ē-py omombe'u va'ety omoi va'ekwe kwatia-rehe onhe'ē. Yma hemimoigwe-rami kwatia-rehe áy katu onhe'ē Pedro. Iloja inhe'ē. No'ã-rami hemimoigwe:

¹⁶“Heta mba'e ojehu va'ekwe myamyri Davi ra'yre-pe. Heta mba'e ojehu ramo íxupe, ndopytavéi mburuvixa ramo. Upéi he'i Nhandejáry: Ánga ete-ma ae aheja jevvy-ta Davi remiarirõre-pe mburuvixagwasurā. ¹⁷Aheja jevvy-ta xe reka reka hagwā entéro yvypõry kente kwéry gwive. Xe reka-ta xe moirũ hagwā. Judeu e'y kwéry, xe re'yirā gwive xe reka-ta gwuvixarā, he'i. ¹⁸Yma gwive áy peve aikwaa uka peemy ko va'e nhe'ē, he'i Nhandejáry”*

he'i Tiago imombe'u-vy. Upéi omombe'u jevvy upe Hesu reroviaha rerekwa:

—Upéixa hemimoigwe kwatia-rehe. Upéixa voi judeu e'y kwéry katu Nhandejáry re'yí ave. ¹⁹Upéa-gwi ha'e-ta peẽ-my: Xe-vy naiporái nhandemonhe'ē hatā hatā judeu e'y kwéry-pe. Ogwerova ramo gwekoha Nhandejáry-rehe naiporái nhamoakārasy íxupe kwéry. “Entéro Moisés he'i va'ekwe gwive ejapo katu” naiporái ja'e íxupe. ²⁰Nhamondo katu íxupe kwéry nhande kwatia nhe'ē no'ã-rami: “Ani penhemongy'a teĩ pe'u-vy upe tembi'u tupā ra'anga rovagwy-py onhemoi va'e hemi'urā. Pemenda e'y reheve, ani ae peiko rei onhondive. Ani pe'u teĩ ijuka-vy ohumbiri va'ekwe. Ani pe'u teĩ so'o rugwykwe.” Ko va'e nhe'ē mante nhamondo íxupe kwéry. Ko va'e nhe'ē ojapo va'e judeu kwéry. ²¹Yma gwive áy peve oiko enterove tetā-my meme myamyri Moisés he'i va'ekwe mombe'uha. Pytu'u tu'uha áry-py meme omonhe'ē nhe'ē he'i va'ekwe. Judeu kwéry porahéi haty haty-rupi omonhe'ē. Oĩ joty judeu reko-py oiko va'e. Upéa-gwi naiporái nhambopoxy rei íxupe kwéry, he'i onhemonhe'ē-vy Tiago.

Upéixa onhonhe'ē mbojevvy jevvy rire, onhonhe'ē mbohory jevvy oiko-vy.

Hesu reroviaha rerekwa kwéry omondo onhe'ē kwatia-rehe entéro Hesu reroviaha-pe gwive

* 15:18 Am 9.11-12 * 15:20 Êx 34.15-17; Lv 18.6-23; 17.10-16

²² Ohendu ramo inhe'ë, ogwerovy'a hikwái. Upéa-gwi he'i Hesu remimondo, Hesu reroviaha gwive ave, herekwa kwéry ave:

—Nthane pa'ũ-gwi jaiporavo katu nhane remimondorã. Antioquia tetã-my nhamondo katu. Paulo Barnabé ave nhamondo katu inhirũrã, he'i ojóupe hikwái.

Ko va'e nhe'ë ojoho porã hikwái. Upéa-gwi mokóï omondo. Judas ombohéry va'e Barsabás Silas ndive omondo. Ko mokóï Hesu reroviaha rerekwa va'e.

²³ Upe oho jave voi ogweraha uka ipo-py íxupe kwéry kwatia nhe'ë. No'ã-rami he'i hembieraha va'e kwatia nhe'ë. “Ore kwéry, Hesu remimondo va'e, Hesu reroviaha rerekwa va'e, pende re'ýi ave oromondo-ta ore nhe'ë peẽ-my, Hesu reroviaha va'e, judeu e'ý va'e, Antioquia tetã mygwa va'e, Síria vvy pygwa va'e, Cilícia vvy pygwa va'e ave. Peẽ kwéry va'e-pe oromondo-ta ore kwatia nhe'ë. Mba'ëixa tipo peiko? Peiko porã pa?”

²⁴ “Pene moakãrasy jeko ra'e ko'a gwigwa. Omombe'u ambue ramo peẽ-my pene moakãrasy. Oromombe'u uka e'ý reheve, omombe'u. ²⁵ Upéa-gwi orojogweroaty rire oro'e: Iporã katu jaiporavo nhane remimondorã, oro'e. Hendive oho-ta Barnabé Paulo ave, nhane rembiayhu va'e, naimytu'e'ý etéiry ójehe va'e. ²⁶ Hapixa kwéry ojukase ramo jepe íxupe, ha'e ojapo joty va'e Nhandejáry Hesu Cristo remimbota, oro'e kuri orejúupe Barnabé ndive Paulo-rehe. ²⁷ Upéa-gwi oromondo-ta Judas Silas ndive omombe'u hagwã ore remimoigwe kwatia-rehe, peikwaapa porã hagwã omombe'u va'e. ²⁸ Ha oro'e, Íxupe kwéry katu naiporãiry nhanhemonhe'ë hatã hatã, oro'e kuri orejúupe pende-rehe kwéry. Tekoha porã ae nhamombe'u va'erã kwatia nhe'ë-rupi íxupe kwéry, oro'e kuri pende-rehe kwéry. Koixagwa nhe'ë ojoho porã ave Nhe'ë Marangatu tee va'e. ²⁹ Upéa-gwi ani penhemongy'a teĩ pe'u-vy tembi'u tupã ra'anga rovagwy-py onhemoĩ va'ekwe. Ani pe'u teĩ so'o hugwy reheve. Ani pe'u teĩ ijuka-vy ohumbiri va'ekwe. Pemenda e'ý reheve, ani ae peiko rei onhondive. Upéa ndapejapóï ramo peiko porã va'erã. Nhandejáry tapende rovasa katu. Opa-ma oronhe'ëmba.”

Upéixa voi omoĩ kwatia-rehe onhe'ë omondo va'erã.

Hesu reroviaha gwive ogwerovy'a kwatia nhe'ë

³⁰ Ha upéi katu hemimondo osẽ oho-vy. Antioquia tetã-my ogwahẽ oho-vy. Upe-py ogwahẽ ramo, ombojogweroaty pa Hesu reroviaha gwive. Omboaty ome'ë hagwã Hesu reroviaha-pe upéa kwatia nhe'ë. ³¹ Omonhe'ëmba rire, upe pygwa ogwerovy'a eterei inhe'ë hikwái:

—Onhemonhe'ë porã nipo ra'e, he'i ojóupe.

³² Upéi Judas Silas ndive Nhandejáry nhe'ë-py omombe'u va'ety, heta-ma onhe'ë onhemonhe'ë-vy:

—Eiko memẽ katu tape porã-rupi, he'i Hesu reroviaha-pe.

³³ Upe-py are-ma opyta. Upe rire:

—Oroho jevy-tama ore mbouhare ha-py, he'i Hesu reroviaha-pe.

—Néi, tapeho porã katu Nhandejáry ndive, he'i íxupe.

³⁴ Ha Silas katu ndohóiry. Opyta joty upe-py. ³⁵ Ha Paulo Barnabé ndive opyta upe-py ombo'e mbo'e-vy. Nhandejáry nhe'ë omombe'u oĩ-vy. Heta-ma omoirũ íxupe ave Nhandejáry nhe'ë omombe'u-vy.

Paulo oiporavo Silas-pe omoirũ hagwã íxupe

Heta omombe'u Nhandejáry nhe'ë Paulo Barnabé ndive oiko-vy. ³⁶ Upe rire he'i Barnabé-pe Paulo:

—Jaha jahexa jevy Nhandejáry nhe'ë nhamombe'u mbe'u hagwe-rupi. Tetã tetã-rupi jaha, he'i. —Jaha jaikwaa hagwã mba'ëixa pa oiko Hesu reroviaha, he'i íxupe Paulo.

³⁷ —Jaraha katu nhane ndive João Marcos, he'i íxupe Barnabé.

³⁸ —Naiporãï jaraha íxupe, he'i. —Nhande reja-ma va'ekwe oho-vy upe va'e. Panfília vvy-py nhande reja va'ekwe oho-vy. Nanhane moirũvéiry, jaha ramo nhamombe'u Nhandejáry nhe'ë. Naiporãvéi-ma jaraha íxupe, he'i íxupe Paulo.*

* 15:38 At 13.13

³⁹Upéixa ramo mokõive va'e onhonhe'ẽ mbojevvy jevvy hikwái. Ndaijoja etéiry voi inhe'ẽ kwéry. Upéa-gwi ojoheja-ma. Barnabé oho, Marcos rerahaha ramo oho. Onhemboyru kanoagwasu-py oho hagwá Chipre ykõi-my. ⁴⁰Ha Paulo katu oiporavo Silas-pe omoirũ hagwá íxupe:

—Nhandejáry ko nhande rexakwaa rei va'e. Tande rovasa katu, he'i íxupe imondo-vy Hesu roviaha.

⁴¹Upe rire osẽ oho-vy. Síria vvy-rupi, Cilícia vvy-rupi ave oho onhemonhe'ẽ-vy:

—Ani erejere teĩ Hesu rekoha-gwi, he'i Hesu roviaha-pe onhomboaty aty ha-rupi.

16

Heta oinupã rire, omõĩ preso Paulo-pe Silas ndive

¹Upéixa ramo Paulo Silas ndive ogwahẽ oho-vy Derbe tetã-my. Listra tetã-my ogwahẽ ave oho-vy. Upe-py oiko Hesu rehegwa nhe'ẽ renduha, héry va'e Timóteo. Isy judeu va'e voi, Hesu roviaha va'e. Ha túvy katu ndaha'úi judeu va'e. Grego kwéry va'e ae ha'e. ²“Timóteo ko hekoha porã va'e” he'i hese upe pygwa Hesu roviaha va'e. Imandu'a porã hese. ³Upéa-gwi Paulo oipota omoirũ íxupe. Ha heta oĩ upe-py judeu kwéry: “Timóteo ru ndaha'úi judeu va'e. Grego kwéry va'e ae ha'e” he'i hese hikwái.

Upéa-gwi Paulo oho ojapo judeu remimbota. Ogweraha oipirekytĩ hagwá íxupe judeu kwéry-rami. Hekoha-rami ojapo íxupe pono ipoxy hikwái.

⁴Upéi omoirũ íxupe, oho upe tetã tetã-rupi. Hesu roviaha onhomboaty aty harupi oho. Omombe'u mbe'u oho-vy hembia porã. Hesu remimondo he'i va'ekwe, Hesu roviaha rerekwa va'e, Jerusalém pygwa va'e he'i va'ekwe ave, ombojoja rire inhe'ẽ hikwái, kwatia-rehe omõĩ va'ekwe, omombe'u. ⁵Hembia porã omombe'u. Upéixa-gwi ojerovia porãve ráve Nhandejáry Hesu-rehe hikwái. Onhembohetave tave oho-vy Hesu roviaha kwéry.

⁶Ha upéi katu Paulo inhirũ ndive ohasa hasa oiko-vy Frígia vvy-rupi. Galácia vvy-rupi ave ohasa. Ogwahẽ ramo Ásia vvy-py nomombe'u ukái íxupe: “Ani eremombe'u teĩ Ásia pygwa-pe Nhandejáry nhe'ẽ ani eremombe'u” he'i íxupe Nhe'ẽ Marangatu tee va'e.

⁷Upéi ogwahẽ ramo Mísia vvy rovái, oho-ta mo'ã Bitínia vvy-py. Ha ndohejái oho Hesu Nhe'ẽ Marangatu. ⁸Upéixa ramo Mísia vvy yke-rehe ohasa rei oho-vy. Ohasa rire ogwahẽ oho-vy Trôade tetã-my. ⁹Ha upéi katu pyhare ojehexa uka sapy'a Paulo-pe. Ixupéte ojehexa uka Macedônia pygwa. Onhembo'y ramo ohexa. Onhe'ẽ ramo ohendu:

—Eju katu y rovái. Eju katu. Xe vvy héry va'e Macedônia-py eju katu ore pytygwõ hagwá, he'i ojapura-vy.

¹⁰Ojehexa uka rire-ma orohasase oroho-vy Macedônia vvy-py. Upe-py Trôade tetã-my xe Lucas amoirũ-ma íxupe. Ha upéi katu:

—Nhandejáry ko nhane renói kuri nhamombe'u hagwá Macedônia pygwa-pe, Hesu rehegwa nhe'ẽ porã, oro'e ojõupe.

¹¹Upéa-gwi oronhemboyru kanoagwasu-py y-rupi oroho hagwá. Oroheja Trôade tetã oroho-vy. Oroho pya'e a'e Samotrácia ykõi-my. Iko'ẽ-my orohasa jevvy vvy yke-rehe. Orohasa orogwahẽ Neápolis tetã-my. Upe-py vvy ete-py orosẽ kanóa-gwi. ¹²Upe-gwi vvy-rupi oroho jevvy orogwahẽ Filipos tetã-my, Macedônia vvy-py oĩ va'e-py orogwahẽ. Ha Filipos tetã tuvixa. Ndaipóri upe tetã jerekwe-rehe íxugwi tuvixave va'e. Yma Roma pygwa onhemomba'e hese va'ekwe. Ha upéi katu orogwahẽ ramo upe-py, are oropyta. ¹³Upéi pytu'uha áry-py orosẽ tetã rokẽ-rupi. Ysry rembe-py oroho: “Upe-py oime ra'e jajapo oração haty” oro'e orejẽupe. Upéa-gwi oroho upe-py orogwapy. Oronhe'ẽ kunha kwéry-pe, ojogweroaty okwa va'e-pe.

¹⁴Ore nhe'ẽ ohendu va'e apyte-py oĩ kunha héry va'e Lídia, Tiatira tetã mygwa. Upe kunha aorã pytã porã va'e vendeha. Nhandejáry-pe omboeteha ave. Ha upéi katu Paulo onhe'ẽ ramo, Nhandejáry oikwaa uka íxupe Paulo nhe'ẽ ohendu porã hagwá. ¹⁵Ohendu rire, oromongarai íxupe. Hóga pygwa oromongarai ave. Upe jave:

—Peju katu peiko xe róga-py. Peikwaa ramo xe ajerovia teeha Nhandejáry-rehe, peju katu, he'iri iri ore-vy. Upe-ma ramo oroho. Oipota hagwe-rami oroho.

¹⁶Upéi ore oroho jave jajapo oração haty-py, ore rogwaiti hembigwái kunhataĩ. Upe kunhataĩ anháy rerekoha. Upe anháy arandu-rupi oikwaa-ma oikotaha. Oikwaa va'e oikwaa uka imombe'u-vy. Omombe'u ramo, heta ome'ẽ ijáry-pe ohendu va'e. Ogana porã ijáry. ¹⁷Upe kunhataĩ oho Paulo rapykwéri. Ore rapykwéri oho ave. Hatã onhe'ẽ oho-vy:

—Kóa kwimba'e Tupãgwasu rembigwái omombe'u va'e peẽ-my tape porã Nhandejáry pene resende hagwã, he'i omombe'u-vy. ¹⁸Ko'ẽmba ẽmba oho va'e ore rupive. Upéa-gwi ipoxy íxupe Paulo. Ojeapa hese. He'i anháy-pe:

—Ekwa katu íxugwi. Hesu Cristo réry-py esẽ katu íxugwi, he'i anháy-pe.

Upe-ma ramo anháy osẽ-ma oho-vy íxugwi.

¹⁹Ha ijáry katu ohexa ramo, he'i:

—Upe kunhataĩ ko ndoikwaa uka mo'ávéei-ma oiko-ta va'e nhande-vy, he'i. —Nome'ẽ mo'ávéei-ma nhande-vy hemimombe'u repy.

Upéa-gwi oipyhy Paulo-pe Silas ndive oipyhy heraha-vy. Ipotĩ ha-my ogweraha íxupe. Ombotyryry heraha-vy. Ogweraha mburuvixa oĩ ha-py. ²⁰Ogweraha rire polícia ruvixa renonde-py, he'i:

—Ko va'e kwimba'e ko judeu va'e, he'i. —Ko tetã mygwa kwéry-pe ombopoxy va'e, he'i hese. ²¹—Teko ambue omombe'u mbe'u va'e. Ha nhande katu ndaha'éei judeu va'e. Romano kwéry va'e ae nhande, he'i. —Upéa-gwi teko ambue va'e nhe'ẽ nanhahendu mo'ái, he'i mburuvixa-pe hikwái.

²²Ha ojogweroaty va'e gwive ohendu ramo inhe'ẽ, ipoxy íxupe. Oinupãse ave. Ha upéi mburuvixa kwéry oipe'a uka íxugwi ijao oinupã uka hagwã vyvry-py. ²³Heta oinupã rire, omoĩ preso:

—Onhangareko porã katu hese pono okanhy, he'i preso-rehe onhangareko va'e-pe.

²⁴Ohendu rire inhe'ẽ, omoĩ koty mbyte-py omoĩ. Omoĩ vyvry pa'ũ-my ipy pono ogwata.

²⁵Haimete-ma ramo pyhare pyte Paulo Silas ndive omondo oiko-vy Nhandejáry-pe onhe'ẽ. Oporahéi oiko-vy ave. Ha ijypy-rupi oĩ va'e gwive preso va'e, ohendu oporahéi ramo.

²⁶Upe-ma ramo hi'apỹ apỹ eterei yvy. Oku'e óga rokyta. Pya'e ojepe'a okẽ oĩ va'e gwive. Upéixa-gwi ojei ramo inhapytiha, nonhenhapytívéiry preso oĩ va'e gwive. ²⁷Upe-ma ramo opáy preso-rehe onhangareko va'e. Ohexa okẽ ojepe'a ramo. Ohexa ramo,

—Onhemoi preso va'e osẽmba ra'e, he'i mo'ã.

Upéa-gwi ohekýi kyse ojekutu hagwã mo'ã. ²⁸Ha Paulo onhe'ẽ hatã íxupe:

—Ani erejyuka teĩ. Ore kwéry oroĩ vyteri a-py, he'i íxupe.

²⁹—Perúke tataandy, he'i preso-rehe onhangareko va'e.

Oripara oho-vy oike hagwã koty-py. Ipy'a ryrýi ramo ojeity ha'e kwéry hovagwy-py imboete-vy. ³⁰Upéi ogwenohẽ heru-vy koty-gwi:

—Mba'éixa xe aiko-ta, mbo'eháry, Nhandejáry xe resende hagwã, he'i íxupe oporandu-vy preso-rehe onhangareko va'e.

³¹—Ejerovia katu Nhandejáry Hesu-rehe. Ne resende-ta. Oresende-ta nde róga pygwa ave, he'i preso-rehe onhangareko va'e-pe hikwái.

³²Upéi omombe'u íxupe, preso-rehe onhangareko va'e-pe Nhandejáry rehegwa nhe'ẽ. Hóga pygwa-pe omombe'u ave. ³³Upéixa ramo ogweraha ombojahu preso onhemoi va'ekwe-pe. Oipire joka hagwe-gwi oipe'a hugwy. Upe-ma ramo omongarai íxupe preso-rehe onhangareko va'e-pe, hóga pygwa-pe omongarai ave. ³⁴Upe rire upe onhemongarai va'e ogwenogwahẽ heru-vy gwóga-py omongaru íxupe kwéry. Nhandejáry-rehe ojerovia-gwi ovy'a eterei-ma. Hóga pygwa ovy'a ave. ³⁵Ko'ẽmba ramo mburuvixa kwéry ombou polícia he'i hagwã: “Tove toho upéa kwimba'e” he'i Paulo-rehe, Silas-rehe ave. ³⁶Upéi omombe'u Paulo-pe inhe'ẽgwewe preso-rehe onhangareko va'e:

—“Tove toho upéa kwimba'e” ombou he'i hagwã mburuvixa kwéry. Upéa-gwi esẽ, he'i. —Tereho katu. Nande rereko asy mo'ávéeiry avave ãy, he'i íxupe.

³⁷Ha Paulo katu:

—Ndaha mo'ái, he'i. —Ore ko romano va'e. Nanhainupái romano va'e nhamonhe'ê e'ÿ reheve, he'i. —Ha ore nupã kuri enterovéa rovagwy-py hikwái. Ore monhe'ê e'ÿ reheve, ore-vy oporandu e'ÿ reheve ore nupã nupã kuri, he'i. Upe rire ore moanha ore mondo koty mbyte-py ore moí hagwã preso. Áy katu ore mosê nhemise ore mondo-vy. Ha ndaha mo'ái. Tou katu mburuvixa ore renohê hagwã, he'i polícia kwéry-pe.

³⁸Upéi Paulo nhe'ê omombe'u mburuvixa-pe. Ohendu ramo inhe'ê, icyhyje íxugwi:

—Paulo ko romano va'e nipo ra'e, he'i ojóupe hese.

Upéa-gwi icyhyje voi. ³⁹Upéixa-gwi ou iha-py mburuvixa:

—Ore oroporonupã uka-gwi oronhemboasy, he'i íxupe.

Upéi ogwenohê heraha-vy preso oí ha-gwi:

—Iporã katu ereho a-gwi ko tetã-gwi, he'i íxupe mburuvixa.

⁴⁰Upéa-gwi osê oho-vy onhemói preso ha-gwi. Oho Lídia róga-py. Upe-py ohexa Hesu reroviaha. Ohexa ramo onhemonhe'ê íxupe kwéry:

—Peiko meme katu tape porã-rupi, he'i Hesu reroviaha-pe.

Upe rire osê oho-vy upe-gwi hikwái.

17

Paulo Silas ndive oho Tessalônica tetã-my

¹Ha upéi tetã tetã-rupi ohasa oho-vy Paulo Silas ndive. Ohasa Anfípolis tetã-rupi, Apolônia tetã-rupi ohasa ave hikwái. Ohasa rire, ogwahê oho-vy Tessalônica tetã-my. Upe-py oí judeu oporahéi haty. ²Tetã tetã-my ogwahê-vy oike ike judeu oporahéi haty haty-rupi. Upéixa ramo ogwahê-ma ramo Tessalônica tetã-my, oike ojeporahéi haty-py. Upe-py mbohapy pytu'uha áry-py onhombo'e mbo'e oikwaa uka porã-vy Nhandejáry rehegwa nhe'ê kwatia-rehe oí va'e. ³He'i íxupe kwéry:

—Yma va'ekwe Nhandejáry omoí uka kwatia-rehe Hesu rehegwarã: “Cristo, Nhandejáry rembiporavo va'e ojerereko asy va'erã. Omano rire, oikove jevy va'erã” he'i kwatia nhe'ê-rupi. Yma Nhandejáry he'i hese va'ekwe-gwi ojehu íxupe. Omano hagwã-ma ou va'ekwe. Ha ko'ánga ha'e-ta peê-my: Ko Hesu xe remimombe'u va'e Cristo voi, Nhandejáry rembiporavo va'e voi, nhane remiha'arõ va'e ave, he'i íxupe kwéry Paulo.

⁴Oí ohendu va'e inhe'ê. Omoirũ mokõive va'e-pe. Heta eterei grego va'e, Nhandejáry mboeteha omoirũ ave íxupe. Heta kunha onhemboete va'e omoirũ ave íxupe. ⁵Ha judeu kwéry katu ndaija'ái mokõive-rehe. Silas-rehe, Paulo-rehe ave ndaija'ái hikwái. Oho ojogweroaty oporombopoxy-vy heta ndovaléi va'e. Hekoha vai va'e kwéry, tape-rehe oiko rei va'e kwéry ndive oporombopoxy poxy. Oje'ói ija'e'ÿha reraha-vy. Opoxy reheve ogwerahapa upe tetã mygwa Jasom róga-py. Ogwenohése mo'ã upe Hesu reroviaha róga-gwi mokõive va'e. ⁶Ha ndotopái Paulo-pe upe-py. Ndotopái-gwi ombotyryry heraha-vy Jasom-pe hikwái. Hesu reroviaha upe-py oí va'e ogweraha ave. Mburuvixa kwéry renonde-py ogweraha. Ogwahê rire, omombe'u hesegwa hikwái:

—Ko va'e kwimba'e opa-rupi onhemonhe'ê nhe'ê oiko-vy va'e enterove va'e ndaijoja porãvéi hagwã. Ou ra'e a-py ave onhemonhe'ê-vy. ⁷Ogwahê ramo, omogwahê ra'e íxupe kwéry Jasom. Ko kwimba'e nohendúu va'e voi nhande ruvixagwasu nhe'ê. No'ã-rami he'i: “César katu ndaha'ái nhande ruvixagwasu tee. Hesu ae nhande ruvixagwasu tee” he'i Paulo kwéry, he'i mo'ã omombe'u-vy.

⁸Ohendu ramo inhe'ê, onhemondýi-ma mburuvixa kwéry. Kente kwéry upe tetã-my oí va'e onhemondýi ave. Oipota Paulo oho upe-gwi hikwái. ⁹Upéixa ramo Jasom-pe indive kwéry-pe ave oheja uka plata hikwái. Oirũ kwéry rekovía oheja plata mburuvixa-pe, Paulo-gwi opoi hagwã imondo-vy. Oheja rire:

—Toho katu, he'i íxupe mburuvixa.

Opoi íxugwi oho hagwã.

¹⁰Upe-ma ramo Hesu reroviaha kwéry omondo Paulo-pe Silas ndive. Pytũ ramo omondo. Outro tetã-my pya'e omondo. Upéixa ramo oho Beréia tetã-my. Ogwahê ramo upe-py oike judeu oporahéi haty-py. ¹¹Ha upe pygwa, Beréia pygwa va'e hi'arandu porã

va'e. Ha gwĩ judeu kwéry Tessalônica pygwa va'e nahi'arandu porãi. Ha Beréia pygwa katu hi'aranduve va'e voi. Ha upéi nainhate'ỹi ohendu hagwã Paulo nhe'ẽ. Ohenduse voi hikwái:

—Anhetegwa para'e, tapa ndaha'éiry anhetegwa, he'i ojóupe.

Upéa-gwi omonhe'éri éri Nhandejáry nhe'ẽ oĩ va'ekwe kwatia-rehe. Peteĩ teĩ áry-py omonhe'ẽ oikwaa hagwã. Oikwaa rire:

—Anhetegwa voi ra'e Paulo nhe'ẽ, he'i ojóupe. ¹²Upéa-gwi heta oĩ ogwerovia va'e. Ogwerovia ave heta kunha, grego va'e, nhamboete va'e, imandu'a porã hese va'e. ¹³Heta kwimba'e ogwerovia ave. Ha gwĩ judeu kwéry Tessalônica pygwa va'e ohendu ramo herakwã osé ogwa'ẽ-vy. Beréia tetã-my ogwahẽ ou-vy. Upe-py ombopoxy ojogweroaty va'e-pe:

—Ou-ma Paulo nhane moakãrasy-vy, he'i mo'ã. —Pereko asy katu íxupe, he'i oporombopoxy-vy.

¹⁴Upe-ma ramo Hesu reroviaha omondo pya'e íxupe. Ygwasu-koty omondo. Ha Silas Timóteo ndive ndohói. Opyta upe-py. ¹⁵Ha Paulo irũ ogweraha íxupe. Atenas tetã-my ogweraha íxupe. Ogwahẽ ramo upe-py:

—Pya'e tou xe ha-py Silas Timóteo ndive, he'i oirũ-pe.

Inhe'ẽ ohendu rire, oho jevy. Ojevny-ma oje'ói-vy.

Ipy'a reraha oiko-vy Paulo Atenas tetã-my

¹⁶Ha upéi Paulo oha'arõ oiko-vy oirũ ou hagwã. Oha'arõ jave heta eterei ohexa tupã ra'anga. Upe pygwa Atenas pygwa va'e gwive nombotéiry va'e Nhandejáry-pe. Tupã ra'anga anga rei ae omboete va'e hikwái. Upéa ohexa ramo, ipy'areraha oiko-vy Paulo.

¹⁷Upéa-gwi oike judeu oporahéi haty-py onhombo'e mbo'e hagwã oikwaa uka porã-vy judeu kwéry. Judeu e'ỹ va'e-pe Nhandejáry mboeteha va'e ave onhemonhe'ẽ onhombo'e mbo'e-vy. Ko'ẽmba ẽmba onhombo'e ave ipotĩ ha-my praça-py ojogweroaty haty-py oĩ va'e ndive. ¹⁸Ha upe-py ohogwaitĩ íxupe hi'arandu va'e. Gwĩ Epicuro remimombe'u renduha, gwĩ Estóico remimombe'u renduha ave ohogwaitĩ íxupe:

—Upéa ko onhe'ẽ eterei va'e. Mbava'e po omombe'use, oĩ he'i va'e hese.

—Oiméne omombe'u tupã pyahu rehegwa, oĩ he'i va'e mo'ã hese. Ohendu hikwái Paulo omombe'u ramo Hesu rehegwa. Oikove jevymaha rehegwa ave ohendu hikwái. Ohendu ramo:

—Paulo ko omombe'u para'e tupã pyahu rehegwa, oĩ he'i va'e hese.

¹⁹Upe ramo ogwerojeupi heraha-vy íxupe vyaty-rehe, héry va'e Areópago. Mburuvixa kwéry ojogweroaty haty-py ogwerojeupi heraha-vy. Upéi he'i íxupe:

—Mba'e pyahu-py ore mbo'e ramo ndoroikwaái, he'i.

²⁰—Ha oroikwaase. Oroikwaa e'ỹ va'e ne remimombe'u. Upéa-gwi emombe'u katu ore-vy erese va'e, he'i íxupe gwĩ hi'arandu va'e.

²¹Ha Atenas pygwa gwive, outro tetã gwigwa upe-py oiko va'e ave, mba'eve ndojapói va'e. Imba'e pyahu ohendu-ma ramo, omombe'u mbe'u va'e ojóupe. Mba'evete ndojapói.

Paulo omombe'u Nhandejáry nhe'ẽ Atenas tetã mygwa-pe

²²Upéixa ramo Paulo onhembo'y oĩ-vy Areópago vyaty ári. Atenas tetã mygwa mbyte-py opu'ã oĩ-vy. Onhe'ẽ hagwã onhembo'y:

—Pejeapysaka katu, xe rapixa kwéry, xe nhe'ẽ-rehe. Peẽ ko pemboete eterei va'e ra'e tupã kwéry, he'i Atenas tetã mygwa-pe.

²³—Ahexa kuri ahasa-vy pene remimboete. Tupã ra'anga apyka ahexa ave ha ndaipóri tupã ra'anga. Apyka anho rei oĩ. Nandi rei oĩ. Tupã ra'anga rekovia, ahexa imombe'uha rei: “A-py nhamboete tupã jaikwaa e'ỹ va'e” he'i ita-rehe ohai va'e. Ha ko'anga katu amombe'u-ta, kiva'e tupã po upe va'e, xe amombe'u-ta peẽ-my. Pemboete va'e peikwaa e'ỹ reheve, amombe'u-ta peẽ-my.

²⁴—Upe va'e Nhandejáry voi. Ha'e ko vvy apohare, ko vvy-py oĩ va'e gwive apohare ave. Ha'e vyáy Járy, vvy Járy ave. Teko rei ojapo va'ekwe-py ndoikóiry va'e. ²⁵Nhane moingopa

va'e ae, nhane mopytuhêhare. Opamba'e ome'ê va'ety nhande-vy. Upéa-gwi ndikatúi nhaiptytgwô íxupe. Mba'eve-rehe noikotêvéiry nhandéhegwi.*

²⁶—Yma ete va'ekwe ojapo va'ekwe peteĩ kwimba'e ypy-pe. Íxupe ranhe ojapo va'ekwe. Upe kwimba'e-gwi enterove va'e onhepyrũ hagwã. Ojapo oiko hagwã íxugwi entéro yvypy oĩ va'e gwive oiko hagwã he'ýi he'ýi e'ý ave. Oiko e'ý jave yvypóry, Nhandejáry omõ va'ekwe peteĩ áry peteĩ teĩ oiko hagwã. Nhandejáry omombe'uha áry-py oiko va'ekwe. Upéi peteĩ teĩ-pe omombe'u va'ekwe hekwagwã kwéry. ²⁷ Oipota va'ekwe jaheka heka íxupe jaikwaa hagwã íxupe, jaiko hagwã hendive. Ha mombry oiko e'ý va'e nhandéhegwi. Peteĩ teĩ va'e-gwi ae hi'agwĩ oiko. ²⁸ Nhandejáry e'ý ramo ndikatúi jaiko, ndikatúi jagwata, nanhande rekoháiry voi. No'ã-rami he'i araka'e pende re'ýi ikwaaháry va'e. Kwatia-rehe omõ araka'e: “Nhande ko Nhandejáry re'ýi voi” he'i araka'e.

²⁹—Upéa-gwi naiporã ja'e: “Nhandejáry ko tupã ra'anga ramigwa, ouro-gwi jajapo va'e”. Naiporã ja'e upéixa hese. Nhandejáry ndaha'êi teko rei rembiapokwe, nhane rembiapokwe. “Kóixa Nhandejáry” he'i mo'ã teko rei tupã ra'anga apo-vy. ³⁰⁻³¹ Ha ndaha'êiry voi upéixa. Yma jaikwaa e'ý jave íxupe, Nhandejáry nhande reja rei va'ekwe. Nanhane mbohasa asýiry jajejavy ramo. Ha ko'anga katu omõ-ma peteĩ áry. Nhande kwéry nhandembo'y hagwã Nhandejáry renonde-py peteĩ áry omõ. Omõ-ma ave kwimba'e héry va'e Hesu-pe nhane monhe'ê hagwã. Hesu ko anhetegwa mante omombe'u va'e. Oikwaa va'e nhane rembiapo vaikwe. Nhane rembiapo vai e'ý ramo oikwaa ave. Upéa-gwi omõ-ma íxupe Nhandejáry nhande rereko hagwã nhane rembiapo apokwe-rehe. Upéa peikwaa hagwã omombe'u nhande kwéry-pe Hesu oikove jevymaha. Omano rire Hesu omoingove jevy íxupe va'ekwe Nhandejáry. Upéixa ramo, omoingove jevy-gwi íxupe, nhande kwéry jaikwaa upe áry-py nhane monhembo'ytaha gwenonde-py. Upéa-gwi ko'anga he'i nhande-vy: “Perova katu pende rekoha” he'i Nhandejáry, he'i Paulo omombe'u-vy.

Oĩ omoirũ va'e Paulo-pe

³² Jaikove jevyha rehégwa nhe'ê ohendu ramo hikwái, oĩ onhembohory va'e hese. Oĩ ohendu va'e ave. Ndogwerojojái hendu-vy:

—Ko'ê ramo, ko'ê mbue ramo eremombe'u jevy ramo ko va'e nhe'ê, orohendu jevy-ta, he'i.

³³⁻³⁴ Upéa ramo ha'e osê imbyte kwéry-gwi. Ha oĩ omoirũ va'e íxupe. Ogwerovia inhe'ê Dionísio, mburuvixa va'e. Upe va'e inhomboatyhaty outro mburuvixa ndive Areópago vyvyyatý ári. Ogwerovia ave kunha héry va'e Dâmaris. Oĩ ambue va'e ave ogwerovia va'e.

18

Paulo ogwahê oho-vy Corinto tetã-my

¹ Upe rire Paulo osê oho-vy Atenas tetã-gwi. Corinto tetã-my ogwahê oho-vy. ² Upe-py otopa judeu héry va'e Áqüila, Ponto vvy gwígwa. Kwehe ambue ou va'ekwe Itália yvvy-gwi. Omosê-gwi íxupe, ou. Roma pygwa ruvixagwasu héry va'e Cláudio omosê va'ekwe judeu va'e gwive. Roma tetã-gwi omosê. Omosê ramo, ou upe tetã-gwi Áqüila hambireko ave, héry va'e Priscila. Ha upéi katu Paulo oho ohexa mokõive va'e-pe opyta hõga-py.

³ Upe kwimba'e héry va'e Áqüila hambireko ave ao gwígwa óga apoha ave. Upéa-gwi hendive opyta ijave omba'apo. ⁴ Pytu'u tu'uha áry-py oike judeu oporahéi haty-py. Oike rire omombe'u mbe'u íxupe kwéry oikwaa uka porãve ráve hagwã judeu-pe. Judeu reko-rupí oikose va'e-pe ave oikwaa uka porãve omombe'u-vy:

—Anhetegwa voi ko va'e nhe'ê, he'iri iri íxupe kwéry.

⁵ Ha upéi ogwahê ou-vy Silas Timóteo ndive. Macedônia-gwi ou. Ogwahê ramo hikwái, Paulo ndopytu'úiry voi omombe'u-vy. Omombe'u meme ete voi Nhandejáry nhe'ê:

—Hesu ko Cristo voi, Nhandejáry rembiporavopyre voi, nhane remiha'arõ va'e voi. Upéa xe aikwaa voi, he'i judeu kwéry-pe.

* 17:25 Is 42.5

⁶ Ha gwĩ judeu kwéry katu onhe'ẽ mbojevy jevy íxupe. Onhe'ẽ rei rei hese. Upe ramo Paulo omotygwõ tygwõ oao oikwaa uka-vy íxupe kwéry hekoha vaiha. He'i íxupe kwéry:

—Aipota mo'ã kuri perova pende rekoha. Amombe'u-ma peẽ-my pende py'a ky'aha. Ha napehendúí voi xe nhe'ẽ. Upéa-gwi pendejéhegwi voi pemano va'erã. Áy aha-ta pendéhegwi. Judeu e'ý va'e-pe ae aha-ta Nhandejáry nhe'ẽ amombe'u-vy, he'i judeu kwéry-pe.

⁷ Ha upéi upe-gwi osẽ oho-vy. Oike óga-py ijáry héry va'e Tício Justo, Nhandejáry mboeteha. Judeu oporahéi haty ypy-py oĩ hóga. ⁸ Ha upéi ojeporahéi va'e ruvixa héry va'e Crispo ojerovia-ma voi Nhandejáry Hesu-rehe. Hóga pygwa ojerovia-ma ave. Ohendu ramo Paulo nhe'ẽ, heta upe tetã mygwa ogwerovia-ma. Onhemongarai uka ave íxupe. ⁹⁻¹⁰ Ha upéi pyhare ramo Paulo ohendu Nhandejáry Hesu nhe'ẽ. Ikepe'ý ohendu:

—Heta oĩ ko tetã mygwa xe roervia va'erã. Upéa-gwi aníke erekyhyje. Erekirirí e'ý reheve ere katu íxupe kwéry. Ndou mo'ái avave nde rereko asy-vy. Ne ndive xe aiko voi. Upéa-gwi emombe'u katu xe nhe'ẽ eiko-vy, he'i íxupe Nhandejáry Hesu.

¹¹ Upéixa ramo opyta upe-py peteĩ ro'y. Peteĩ ro'y rire seis jasy jevy opyta. Ombo'e mbo'e Nhandejáry nhe'ẽ omombe'u-vy hendive kwéry opyta ramo.

¹² Ha upéi katu oiko mburuvixa ramo héry va'e Gálio, Acaia vvy pygwa-rehe omanda va'erã. Oiko jave, judeu kwéry onhombó'e mbo'e Paulo-pe oipyhy hagwã hikwái. Upéi oipyhy heraha-vy mburuvixa renonde-py omoĩ hagwã íxupe. ¹³ Ogwahẽ rire, inhe'ẽgwe omombe'u:

—“Ani pemboete teĩ Nhandejáry-pe nhane ramóí kwéry he'i hagwe-rami. Ani pejapo teĩ Moisés amyri remimombe'ukwe” he'i Paulo. Orohendu-ma omombe'u ramo upéa, he'i mo'ã Paulo-rehe omombe'u-vy hikwái.

¹⁴ Ha ha'e katu omombe'use mo'ã mburuvixa-pe anhetegwa va'e. Ne'írã onhepyrũ onhe'ẽ ramo, he'i judeu kwéry-pe mburuvixa:

—Xe ko nahenduséi, judeu kwéry, pene nhe'ẽ. Paulo ojevavy ramo ae, hembiaipo vai eterei ramo, ahendu arã pene nhe'ẽ. ¹⁵ Ha Paulo katu nahembiaipo vaíry ra'e. Ha peẽ katu hemimombe'ukwe-rehe rei pende poxy. Pende re'ýi he'i va'ekwe katu, pende re'ýi réry, pende re'ýi rekorã-rehe nomombe'u poráiry voi ra'e Paulo. Ambue va'e réry ae omombe'u. Upéa-gwi nipo ra'e pende poxy ra'e hese. Xe nahendu mo'ái pene nhe'ẽ. Anive peru xe-vy a ramigwa nhe'ẽ. Iporã para'e pende re'ýi he'i va'ekwe, tapa naiporã. Ndaikwaáiry xe. Upéa nhe'ẽ peẽ-my gwarã. Aipo ramo peẽ katu pepena ae katu hese peiko-vy. Xe katu napena mo'ái voi pende re'ýi he'i va'ekwe-rehe, he'i íxupe kwéry mburuvixa.

¹⁶ Upéi henonde-gwi omosẽ imondo-vy íxupe kwéry ombopoxy-vy. ¹⁷ Upe ramo onhembopoxy va'e oipyhy judeu ruvixa-pe. Gwĩ judeu oporahéi haty va'e ruvixa héry va'e Sóstenes-pe oipyhy. Oinupã nupã íxupe hikwái. Mburuvixa renonde-py oinupã íxupe. Ha mburuvixa katu ohexa katu rei oĩ-vy íxupe. Nopenái hese onhenupã va'e-rehe.

¹⁸ Upe rire Paulo hi'are-ma opyta-vy upe-py.

Paulo ogwahẽ jevy Antioquia tetã-my

Opyta are rire, he'i Hesu reroviaha-pe:

—Aha jevy-tama xe, he'i.

Hendive oho ave Priscila iména ave. Ogwahẽ ramo Cencreía tetã-my, oakãmoperõ uka Paulo. Oity ukapa ho'ávy judeu reko poru-vy. He'i va'ekwe-rami Nhandejáry-pe oakãmoperõ uka. Upe rire onhemboyru kanoagwasu-py oho hagwã y-rupi, Síria vvy-koty.

¹⁹ Upéi ogwahẽ oho-vy Éfeso tetã-my. Upe-py oheja oirũ-pe. Oheja rire Paulo oíke judeu oporahéi haty-py. Omombe'u mbe'u oikwaa uka porãve ráve hagwã.

²⁰ —Epyta areve ore ndive, he'i íxupe hikwái.

—Ndapyta mo'ái, he'i íxupe kwéry.

²¹ Upéi:

—Aha jevy-tama xe, he'i. —Nhandejáry oipota ramo xe aju jevy a-py, aju jevy va'erã, he'i Éfeso tetã mygwa-pe.

Upéi onhemboyruru jevy kanoagwasu-py oho jevy upe-gwi y-rupi.

²²Ogwahê oho-vy Cesaréia tetã-my. Y rembe-py omboja kanoagwasu osê hagwã vvy ete-py oho-vy. Oho Jerusalém tetã-my. Upe-py ogwahê ramo Hesu reroviaha ha-py ojogwerovy'a. Upe-gwi osê jevy oho-vy. Ogwahê Antioquia tetã-my. ²³Upe-py opyta are oiko-vy. Upe rire osê jevy oho-vy. Ohasa hasa oho-vy Galácia vvy-rupi, Frígia vvy-rupi ave. Hesu nhe'ê renduha ojogweroaty haty haty-rupi onhemonhe'ê nhe'ê íxupe kwéry ojerovia porãve rãve hagwã.

Apolo rehegwa nhe'ê

²⁴Ha upéi katu peteĩ judeu héry va'e Apolo, Alexandria gwigwa ogwahê ou-vy Éfeso tetã-my. Ha'e inhe'ê porã porã va'e voi. Nhandejáry kwatia nhe'ê kwaa porãha voi ha'e. ²⁵Nainhate'ỹi omombe'u hagwã Hesu rehegwa nhe'ê. Omombe'u porã voi. Ndojavýry imombe'u-vy. Anhetegwa meme voi he'i. Omombe'u porã íxupe ra'e Nhandejáry Hesu rape ha nomombe'úi íxupe Hesu reroviaha onhemongarai va'ekwe. João omongarai va'ekwe rerakwã ohendu mante. ²⁶Ha upéi katu oike judeu oporahéi haty-py onhe'ê hagwã. Ikyhyje e'ỹ reheve onhe'ê. Ha Priscila iména ndive, ohendu ramo inhe'ê, ogwenohê heraha-vy atýra-gwi íxupe. Upéi íxupe anho omombe'u oikwaa porãve rãve hagwã Nhandejáry Hesu rape.

²⁷Ha upéi katu ohose y rovái. Acaia vvy-py ohose y-rupi. Ohose ramo:

—Iporã katu ereho, he'i íxupe Hesu reroviaha.

Upéixa ramo ome'ê íxupe kwatia nhe'ê ogweraha hagwã, amo etegwa Hesu reroviaha va'e omonhe'ê rire, omogwahê hagwã íxupe. Upéi osê oho-vy. Ohasa oho-vy. Upéi ogwahê oho-vy Acaia vvy-py. Ogwahê ramo, omoirũ-ma upe pygwa, Hesu reroviaha va'e-pe. Nhandejáry ohexakwaa rei-gwi íxupe kwéry, ojerovia-ma ra'e hese upe pygwa. Upéa-gwi Apolo ogwerovia uka porãve rãve upe pygwa Hesu reroviaha va'e-pe gwive.

²⁸Ha gwí judeu kwéry-pe katu ha'e onhe'ê mbojevý jevy atýra-py ohendu hagwã:

—Hesu ko Cristo voi, Nhandejáry rembiporavopyre voi, he'i. —Nthane remiha'arõ arõ va'e ogwahê-ma ra'e, he'i.

Upéa ohexa uka íxupe kwéry. Nhandejáry kwatia nhe'ê-rupi oikwaa uka íxupe kwéry.

19

Paulo ogwahê oho-vy Éfeso tetã-my

¹Ha Apolo katu opyta Corinto tetã-my. Oime jave upe-py, ohasa hasa Paulo. Yvyaty aty pa'ũ-rupi, tetã mirĩ-rupi, ohasa oho-vy. Upe rire ogwahê oho-vy Éfeso tetã-my. Upe-py oĩ Hesu nhe'ê renduha. ²Ogwahê ramo, otopa íxupe kwéry. Upéi oporandu íxupe kwéry Paulo:

—Peroviamaha áry-py, upéa áry-py ogwahê-ma tipo peẽ-my Nhe'ê Marangatu tee va'e? he'i íxupe kwéry.

Ha'e kwéry he'i:

—Nogwahêi vyteri, he'i. —Gwí Nhe'ê Marangatu tee va'e rehegwa nhe'ê norohendú vyteri voi, he'i íxupe hikwái.

³—Kiva'e réry-py penhemongarai uka va'ekwe, he'i jevy oporandu-vy íxupe kwéry.

—Oronhemongarai va'ekwe João Batista oporomongarai hagwe-rami, he'i íxupe hikwái.

⁴Upe ramo he'i íxupe kwéry Paulo:

—Ha João Batista katu, ogwerova rova gwekoha va'e-pe omongarai. Omongarai jave, he'i va'ekwe henda-py ou va'ekwe-pe: “Xe ranhe ko aju tenonde-rupi. Ha xe rapykwerigwa katu ou-ta ave. Ou ramo, pejerovia katu hese” he'i íxupe kwéry João Batista, he'i. —Hapykwerigwa ko Hesu voi, he'i Paulo imombe'u-vy.

⁵Ohendu ramo inhe'ê, onhemongarai uka-ma Nhandejáry Hesu réry-py. ⁶Upéi omoi inhakã akã ári opo. Omoi-ma ramo, omohynyhẽmba ipy'a kwéry Nhe'ê Marangatu tee va'e. Omohynyhẽmba-gwi, onhe'ê nhe'ê ambue-py hikwái. Nhandejáry rehegwa omombe'u ave. Ha'e oikwaa e'ỹ va'e oikwaa uka imombe'u-vy íxupe. ⁷Upe ramo doze kwimba'e-rupi ipy'a rynyhẽmba Nhe'ê Marangatu tee va'e-gwi. ⁸Ha upéi katu Paulo

oike judeu oporahéi haty-py. Mbohapy jasy-rupi onhemonhe'ë nhe'ë oiko-vy. Notĩry omombe'u hagwā Nhandejáry rehegwa nhe'ë: “Pemoirũ katu Hesu Nhandejáry nhande ruvixarã-pe” he'i omombe'u mbe'u-vy oikwaa uka porãve rãve hagwā.

⁹Ha upe-py oĩ nohenduséi va'e. Gwĩ ogwerovia e'ỹ va'e, onhe'ë rei rei va'e Nhandejáry Hesu-rehe enterovéa rovagwy-py. Upéixa ramo Paulo osê oho-vy. Kente kwéry pa'ũ-gwi osê oho-vy. Ogweraha ojave Hesu nhe'ë renduha. Oike oho-vy imbo'eháry nhe'ërendu haty-py. Imbo'eháry héry va'e Tirano. Ha upéi oike rire upe-py, peteĩ teĩ áry-py omombe'u mbe'u oikwaa uka porãve rãve hagwā Nhandejáry rehegwa nhe'ë.

¹⁰Mokõi ro'y omombe'u oiko-vy upe-py. Upéixa-gwi ohendupa Nhandejáry Hesu rehegwa nhe'ë hikwái. Ásia yvy pygwa gwive, judeu va'e, judeu e'ỹ va'e ave ohendupa inhe'ë. ¹¹Ha Nhandejáry ojapo uka íxupe hexapyrã-rupi, heroviapyrã-rupi ave ojapo uka. Upéixa ramo jahexa e'ỹ va'e ohexa hikwái. ¹²Ou Paulo renda-py. Ogweraha íxugwi inhakã jokwaha oiporu va'ekwe. Hambeo oiporu va'ekwe oipe'a ave íxugwi heraha-vy. Hasy va'e ha-py ogweraha. Omboja ramo hese okwera-ma hasy va'e. Osê-ma anháy oho-vy íxugwi kwéry.

¹³Upe-py oĩ ave judeu ogwata oiko-vy va'e. He'i onhemombe'u-vy: “Ore oromosê kwaa va'e imondo-vy anháy” he'i rei onhemombe'u-vy. Ha upéi katu Hesu réry oiporu rei omosê hagwā mo'ã anháy rerekoha-gwi:

—Esê katu Hesu réry-py. Upe Paulo remimombe'u va'e réry-py esê katu, he'i mo'ã anháy rerekoha-pe.

¹⁴Upéixa voi hembiaipo sete kwimba'e, Ceva ra'y kwéry. Ha Ceva judeu va'e, pa'i ruvixa va'e ave. Ta'y kwéry oiporu rei va'e Hesu réry imosê-vy.

¹⁵Ha anháy katu he'i íxupe kwéry:

—Hesu ko aikwaa xe. Paulo ave aikwaa. Ha peẽ katu ndapokwaáiry voi, he'i íxupe kwéry anháy.

¹⁶Upe-ma ramo upe anháy rerekoha opo hese. Ipu'aka hese kwéry oinupã nupã-vy. Upéa-gwi osê oho-vy hóga-gwi. Opi-vy oripara oho-vy. Onhemaxukapa ave oho-vy hikwái.

¹⁷Ha upéi katu opa tetã-rupi oho herakwã. Gwĩ Éfeso pygwa gwive, judeu va'e, judeu e'ỹ va'e ave ohendupa herakwã. Ohendu ramo ikyhyje eterei voi. Ipy'amirĩmba upe-py oĩ va'e gwive. Ha Nhandejáry Hesu réry katu: “Iporãmba ete voi” he'i imboete-vy hikwái.

¹⁸Upéixa ramo ogwahê ou-vy heta ogwerovia va'e. Hembiaipo vaikwe ne'írã ogwerovia reheve ojapo va'ekwe omombe'u atýra-py. ¹⁹Yma oiko va'ekwe imoháy va'e. Oiko ave va'ekwe onhembo'e va'e omobhasy hagwā gwapixa-pe. Oiko ave va'ekwe omoheonde vai va'e ojéupe. Upéa rehegwa kwatia nhe'ë ha'e kwéry hembiporukwe ogweru gweru omboaty aty hagwā. Omboaty ramo ohapypa pono oiporu jevy ivai va'e. Enterovéa rovagwy-py ohapy voi. Upéi mbovy repy po oĩ upéa kwatia oipapa oikwaa hagwā. Oipapa rire:

—Heta eterei ra'e. Cinquenta mil moeda tuvixa va'e repy ra'e, he'i.

²⁰Upéixa ramo opa-rupi oho Nhandejáry nhe'ë imbaraeteve teve oho-vy.

²¹Upe rire Paulo he'i ojéupe: “Ahasa hasa-ta Macedônia yvy-rupi. Hesu reroviaha va'e rexa-vy aha-ta” he'i. “Acaia yvy-rupi ave ahasa-ta agwahê hagwā Jerusalém tetã-my. Upe-py naxe are mo'ái. Upe rire aha-ta Roma tetã-my. Xe kyre'ỹ eterei aha hagwā upe-py” he'i ojéupe.

²²Upéi gwenonderã omondo mokõi oirũ. Timóteo Erasto ndive omondo. Macedônia yvy-py omondo íxupe. Ha'e katu opyta joty Ásia yvy-py.

Ojogweroaty Éfeso tetã mygwa onhombopoxy-vy

²³Upe ramo Éfeso tetã mygwa ipoxy voi Nhandejáry Hesu nhe'ë rendusere'ỹ-vy. Peteĩ henda-py ojogweroaty onhombopoxy-vy hikwái. ²⁴Oĩ kwimba'e héry va'e Demétrio. Prata-gwi opaixagwa apoha. Ha'e ranhe ipoxy. Upe tetã-my oĩ óga kakwaa. Upe óga gwy-py onhemboete tupã ra'anga héry va'e Diana. Ha'e ramigwa teĩ óga ra'anga ojapo Demétrio. Diana róga ramigwa teĩ óga ra'anga mixĩ va'e ojapo ovende va'erã. Upéa-rehe

ogana porā oiko-vy. Ipytygwōhárý ogana porā ave. ²⁵ Upe va'e ombojogweroaty oha-py. Ha'e-rami omba'apo va'e ohenói ave ogwahê haggwā oha-py. Upéi he'i íxupe kwéry:

—Xe irū gwéry, he'i, —kóixa nhane rembiapo ramo, nhavende ramo, nhagana porā voi. Mba'éixa nhagana peê peikwaa voi, he'i.

²⁶ —Ha upe Paulo no'ā-rami he'i va'e: “Gwī tupā ra'anga erejapo va'e ndaha'éí tupā” he'i. Upéa-gwi Paulo nhe'ê-rupi ndogweroaviavéi tupā ra'anga-pe. Inhe'ê-rupi heta-ma oī ogwerovia e'ý va'e. Oī a pygwa, mombyry rupigwa ave ndogweroaviavéri va'e. Ásia yvy-rupi heta-ma ogwerovia e'ý va'e oī. Ha upe va'e katu pehexa-ma, pehenduma ave, he'i. ²⁷ —Naiporāi upéa. Ivai voi. Oiméne nogwahêvéi-ma ijogwaharā. Nogwahêvéi ramo, nanhagana porā mo'ávéri-ma arā, he'i. —Oiméne nogwahêvéi-ma óga kakwaa-py imboete-vy. Upéa gwy-py oī Diana ra'anga, nhane remimboete va'e. Tuvixa mba'e voi Diana, he'i. —Ha Ásia pygwa gwive, opa rupigwa gwive ave omboete ete íxupe va'e. Ha nogwahêvéi ramo katu íha-py, nomboete mo'ávéri-ma íxupe hikwái. Nomomba'egwasu mo'ávéri-ma. Naimandu'avéi arā hese, he'i íxupe kwéry Demétrio.

²⁸ Inhe'ê ohendu ramo, ipoxypa hikwái Paulo-rehe. Nogana porā mo'ávéri-gwi ipoxypa Diana-rehe hakate'ý-vy.

—Tuvixa mba'e Diana, nhande kwéry Éfeso pygwa va'e járy, he'i onhe'ê hatā hatā-vy.

²⁹ Ha upe tetā mygwa ndaipy'agwapyvéi-ma. Osēmba ohendu-vy oripara oho-vy ojogweroaty heta heta haty-py. Omoatā heraha-vy mokōi Macedônia pygwa héry va'e Gaio Aristarco ave. Paulo ogwata ramo, omoirū va'e íxupe. Upe mokōi oipyhy heraha-vy hikwái. ³⁰ Ha upéi katu Paulo osē-ta mo'ā ijayvu va'e kwéry pa'ū-my onhe'ê haggwā. Ha Hesu nhe'ê renduha ndohejái osē. ³¹ Oī Ásia pygwa ruvixa va'e Paulo-pe ohayhu va'e. Ndohejái ave osē. Ombou íxupe onhe'ê ani haggwā osē tei: “Ani erenhembopy'agwasu tei eresē haggwā” he'i uka íxupe.

³² Ha upe pygwa oikwaa e'ý reheve mba'eve ijayvu yvu rei voi okwa-vy ojogweroaty heta heta haty-py.

—Ma'erā po jaju rei a-py ndajaikwái, heta oī he'i va'e ojóupe. ³³ Omombe'u joavy avypa rei hikwái. Ha judeu kwéry ogwenohē heraha-vy kwimba'e-pe héry va'e Alexandre. Kente kwéry pa'ū-gwi ogwenohē íxupe. Omoanha anha gwenonde-rupi onhe'ê haggwā íxupe kwéry. Ombovava íxupe kwéry opo. Omongirirĩmbase mo'ā. Onhe'ese mo'ā ani haggwā omboja rei judeu kwéry-rehe hikwái: “Ore ko judeu kwéry va'e ndaha'éí Paulo rehegwa” he'ise mo'ā. ³⁴ Ha ohexa ramo íxupe hikwái:

—Upe va'e ndaha'éí nhande re'ýi, he'i. —Judeu kwéry va'e rehegwa voi upe va'e, he'i hikwái.

Nokirirĩséi voi. Are are eterei ijayvu okwa-vy. Ára pyte-py ka'arugwasu peve onhe'ê hatā hatā. Peteixa onhe'ê hatā okwa-vy:

—Tuvixa mba'e Diana, nhande kwéry Éfeso pygwa va'e járy, he'i.

³⁵ Ha upéi katu mburuvixa Éfeso pygwa ruvixa va'e opu'ā-ma omongirirĩ haggwā ijayvu va'e kwéry-pe. Omongirirĩmba rire, onhemonhe'ê íxupe kwéry:

—Xe rapixa kwéry, Éfeso pygwa va'e, he'i. —Nhande kwéry ko Diana róga kakwaa-rehe nhangareko va'e. Tuvixa mba'e Diana, nhande kwéry Éfeso pygwa járy voi, he'i. —Yvate-gwi ho'a araka'e ha'anga ita-gwi ijapopyre. Upe ita marangatu-rehe nhangareko va'e ave. Ndaipóri avave oikwaa e'ý va'e nhande nhangarekoha.

³⁶ Upéixa ja'e ramo, enterove oikwaa anhetegwaha, he'i. —Ndaipóri “Nde apu” he'i va'erā nhande-vy. Upéa-gwi pekirirĩ katu. Peikwaa porā e'ý reheve, ani mba'eve pejapo tei, he'i íxupe kwéry.

³⁷ —Ko va'e kwimba'e ndoikéiry va'e jepe Diana róga-py imba'e marangatu omonda-vy, nonhe'ê rei reíry va'e jepe Diana-rehe nhande kwéry járy-rehe, peru joty ko'a-py. Ma'erā tipu peru rei joty íxupe? he'i.

³⁸—Ha'e-ta peẽ-my: Oime mburuvixa nhane monhe'êhаты va'e. Nhane monhe'ê va'e oikwaa hagwã nhane rembiapokwe. “Iporã para'e, tapa naiporãi” he'i nhane monhe'ê-vy. Upéixa ramo oĩ ramo omombe'use va'e Paulo-rehe hembiaipo vai va'ekwe, toho katu imombe'u-vy mburuvixa renda-py. Toho katu imombe'u-vy Demétrio, ha'e-rami omba'apo va'e ave. Oime ave mburuvixagwasu imbaraeeteve va'e. Peteĩ teĩ tomombe'u íxupe hese hembiaipo vai va'ekwe. ³⁹Neremombe'uséi ramo mburuvixa-pe, emombe'u katu kente kwéry-pe. Mburuvixa nhe'ê-py ombojogweroatypa rire-ma, emombe'u katu íxupe kwéry kuri. ⁴⁰Oiméne mburuvixa kwéry he'i va'erã nhande-vy: “Ma'erã po pende ayvu rei etería? Ma'erã penhombopoxy rei ave?” Upéixa he'i ramo nhande-vy, ndaipóri nhane remimombe'urã. Nhande-poxy rei voi kuri, he'i íxupe kwéry mburuvixa.

⁴¹Upéa he'i rire:

—Tapeho jevy katu, he'i íxupe kwéry.

20

Paulo ojapura oho-vy ogwahẽ pya'e hagwã Jerusalém-my

¹Upe ramo gwĩ ijayvu va'e kwéry osarambipa jevy ohopa gwóga gwóga-rupi hikwái. Upe rire Paulo ohenói uka íxupe ogwahẽmba jevy hagwã gwóga-py. Hesu nhe'ê renduha va'e kwéry gwive ohenói. Ogwahẽ ramo:

—Peiko meme katu Hesu rape-rupi, he'i íxupe kwéry.

Upe rire:

—Aha jevy-tama xe, he'i.

Upéi oho jevy Macedônia vvy-py. ²Ohasa hasa amo ete rupigwa-rupi. Hesu reroviaha va'e oĩ ha-rupi onhemonhe'ê nhe'ê imombaraete-vy. Upe rire ogwahẽ oho-vy Grécia vvy-py. ³Upe-py mbohapy jasy opyta. Ha upéi katu onhemboyru-ta mo'ã kanoagwasu-py ogwejy hagwã y-rupi oho-vy Síria vvy-koty. Ha ohendu ramo ojukaseha íxupe judeu kwéry, nonhemboyru jepéiry.

—Aha jevy-ta Macedônia vvy-rupi, he'i. ⁴Upéi oho. Omoirũ íxupe Beréia pygwa héry va'e Sópatro, Pirro ra'y oho hagwã Ásia vvy-py. Omoirũ íxupe ave Tessalônica pygwa héry va'e Aristarco Secundo ndive. Omoirũ ave íxupe Derbe-py oiko va'e héry va'e Gaio. Omoirũ ave íxupe Timóteo. Ásia vvy pygwa héry va'e Tíquico Trófimo ndive omoirũ ave íxupe. Upe va'e kwéry omoirũ íxupe. Ogwahẽ oho-vy Filipos tetã-my. Upe-py opyta xe ndive Paulo xe rekwa-py opyta. ⁵Ha inhirũ kwéry katu ohasa meme oho-vy. Ore renonderã oho Trôade tetã-my. ⁶Upe-py opyta ore ra'arõ-vy. Ha ore katu oropyta Filipos tetã-my. Oiko-ma areteguasú. Upe areteguasú-py ja'u meme va'e mbojape ovu e'ỹ va'e. Areteguasú opa rire mante oroho jevy. Upe-gwĩ yguasú rembe-py orogwahẽ ramo, oronhemboyru kanoagwasú-py oroho hagwã y-rupi. Upéi cinco áry jave orogwahẽ oroho-vy Trôade tetã-my. Upe-py peteĩ semana oropyta.

⁷Domingo-py orojogweroaty onhondive orokaru hagwã. Orokaru jave ore mandu'a Hesu-rehe omano va'ekwe-rehe. Ha Paulo omondo mondo gwesa ko'ê ramogwarã-rehe, gwaperã-rehe. Upéa-gwi onhemonhe'ê ijaty va'e-pe. Pyhare mbyte peve onhemonhe'ê nhe'ê oiko-vy. ⁸Koty joapy apy-py orojogweroaty haty-py heta oĩ tataendy. ⁹Upe-py oĩ karia'y héry va'e Êutico. Ogwapy oĩ-vy okê'i-my. Gwenda-py oke-ma oĩ-vy gwapehýi ramo. Paulo nhe'ê omonge íxupe, onhe'ê joty oĩ-vy ramo. Upéixa-gwi oke oke oĩ ha-gwĩ ho'a oho-vy. Yvate-gwĩ mbohapy koty oĩ ha-gwĩ ho'a. Ogwejy hese ohupi he'ôgwe reraha-vy hikwái.

—Omano ete-ma voi nipo ra'e, he'i mo'ã hese hikwái.

¹⁰Ha upéi katu ogwejy ave Paulo henda-py ojeayvy upe karia'y-rehe oikwavã he'ôgwe-pe:

—Ani penhemondýi teĩ. Nomano etéi ko ra'e. Oikove joty ko ra'e, he'i íxupe kwéry. Oikove jevy voi.

¹¹ Upe rire ojeupi jevy oho-vy. Omboja'o ja'o ojúpe onhondive okaru. Okaru rire omongeta jevy íxupe kwéry. Ko'êmba peve ombo'e mbo'e. Ko'êmba-ma ramo oho jevy-ma. ¹² Ha upe pygwa ogweraha hóga-py upe karia'y onhemoingove jevy va'ekwe-pe. Oikove jevy-gwi, ov'y'a eterei voi hikwái.

Paulo oho y-rupi. Ogwahê oho-vy Mileto tetã-my

¹³ Ha upéi katu:

—Aha-ta yvy-rupi, Assôs tetã-my aha-ta, he'i. —Upe-py anhemboyru-ta xe kanoagwasu-py, he'i ha'e ore-vy.

Upéa-gwi xe Lucas Paulo irũ ave oroho henonderã. Oronhemboyru kanoagwasu-py oroho hagwã y-rupi. Henonderã oroho. Assôs tetã-my oroho y-rupi. ¹⁴ Orogwahê ramo upe-py, Paulo oĩ-ma upe-py ra'e. Orogweroike kanoagwasu-py oromboyru íxupe. Upe-gwi oroho Mitilene tetã-my. ¹⁵ Upe-gwi orosê jevy y-rupi oroho-vy. Iko'ê-my orohasa Quios ykõi yke-rehe. Iko'ê-my jevy orogwahê Samos ykõi-my. Iko'ê-my jevy orogwahê oroho Mileto tetã-my. ¹⁶ Ndorohói Éfeso tetã-my orohasa rei oroho-vy. Paulo are ndopytaséi Ásia yvy-py. Upéa-gwi orohasa meme oroho-vy. Ojapura oho-vy ogwahê pya'e hagwã Jerusalém tetã-my, aretegwasu áry-py ogwahê hagwã oho-vy. Upéa aretegwasu héry va'e Pentecostes.

Paulo onhemonhe'ê Éfeso tetã mygwa, Hesu reroviaha rerekwa-pe

¹⁷ Ha upéi katu orogwahê oroho-vy Mileto tetã-my. Orogwahê ramo upe-py, Paulo omomarandu uka Éfeso pygwa-pe ou hagwã ore ha-py. Upe Hesu nhe'ê renduha rerekwa-pe ohenói uka ou hagwã. ¹⁸ Ogwahê ou-vy ramo, gwemienioigwe-pe he'i onhemonhe'ê-vy:

—Peê katu xe reko rexapa-ma va'e. Xe agwahê gwive xe asêha peve Ásia yvy-gwi ndajapo nhemiry mba'eve. Mba'éixa po aiko va'ekwe pene pa'ũ-rupi peikwaa voi peê. ¹⁹ Ha Nhandejáry Hesu remimbota ajapo meme va'ekwe aiko-vy. Onhe'ê rei rei ramo jepe xe-rehe aiko kiriri joty va'ekwe. Nanhembotuvixa mba'éiry voi joty. Hi'arandu e'ỹ va'e ahekomboasy eterei ahapirõ-vy. Ha gwí judeu kwéry xe jukase mo'ã ramo jepe, xe mbohasa asy ramo jepe va'ekwe, xe ajapo meme joty va'ekwe Nhandejáry Hesu remimbota anhemonhe'ê-vy. ²⁰ Ha xe mbohasa asy jepe va'ekwe naxe py'amiriry joty va'ekwe Nhandejáry nhe'ê amombe'u-vy. Mba'e porã gwive amombe'u peê-my. Anhemonhe'ê peê-my enterove va'e ohendu hagwã. Peteĩ teĩ pende róga-rupi anhemonhe'ê ave. ²¹ Judeu kwéry-pe, judeu e'ỹ va'e-pe ave anhemonhe'ê aiko-vy: “Perova katu pende rekoha. Peiko katu Nhandejáry reko-rupi. Pejeroivia katu Nhandejáry Hesu-rehe. Anhetegwa voi ko nhe'ê” ha'e va'ekwe peê-my. Mba'éixa po va'ekwe pene pa'ũ-my xe rekoha peikwaa voi peê, he'i.

²² —Ha ko'ánga katu aha-ta Jerusalém tetã-my. Ndahaitaha-gwi ae aha-ta. Nhe'ê Marangatu tee va'e ae xe reraha-ta, he'i. —Mbava'e po ojehu-ta xe-vy upe-py xe ndaikwaáiry. ²³ Ahasa asy va'erã ae aikwaa. Ha Nhe'ê Marangatu tee va'e katu oikwaa uka va'e xe-vy xe moĩ ukataha preso, xe rereko asytaha ave. Peteĩ teĩ tetã-my oikwaa uka xe-vy. ²⁴ Ha naxe rakate'ỹiry voi xéjehe. Xéjehe anho rei ndaiko pukuséi. Xe rembiaporã Nhandejáry remime'ê ae ajapopase aiko-vy. Amombe'use joty Nhandejáry Hesu rehegwa nhe'ê. Mba'éixa nhande rexakwaa rei nhande-vy Nhandejáry, amombe'u joty va'erã aiko-vy, he'i. —Xe rembiaporã xe ajapopa peve, xe aikose. Ajapopa rire, tamano jepe xe, he'i.

²⁵ —Are-ma xe aiko va'ekwe pene pa'ũ-rupi Nhandejáry nhe'ê amombe'u-vy. Nhandejáry nhande ruvixarã rehegwa nhe'ê amombe'u mbe'u peê-my. Ha ko'ánga katu ndaxe rexa mo'ávairy ko yvy-rupi. Upéa xe aikwaa voi. ²⁶⁻²⁷ Ha Nhandejáry remimbota rehegwa nhe'ê gwive amombe'upa va'ekwe. Peê-my gwarã va'e amombe'upa. Mba'eva nanhomiry imombe'u-vy pendéhegwi. Amombe'upa voi. Napehenduséi ramo jepe, amombe'u joty va'ekwe peê-my. Upéa-gwi pemano ramo pende py'a ky'a reheve, pendejehewi rei pemano va'erã. Ndaxe reroviái-gwi, eremano-ta. “Nomombe'úiry ra'e xe-vy Paulo” ndaipóri he'i va'erã xe-rehe. ²⁸ Upéa-gwi penhangareko porã katu pendéjehe ani hagwã pejere teĩ peê Nhandejáry rape-gwi. Penhangareko porã katu ave Hesu reroviaha va'e-rehe gwive. Pemombaraeteve teve peho-vy íxupe. Nhe'ê Marangatu tee va'e ko

omonhangareko uka va'e peẽ-my hese kwéry. Ha'e kwéry Nhandejáry Hesu re'í tee-ma voi. Hekovia omano ramo gwugwy reheve, opyta he'yirã Hesu-pe hikwái, he'i.

²⁹—Áy aha-tama xe. Aha rire, ogwahẽ va'erã ijapu va'e ou-vy pende ha-py. Oguhẽtaha aikwaa voi xe. Oguhẽ va'erã pende rerova hagwã. Ou jagwareta ogweraha hagwã oveda. Upéixa ete voi ijapu va'e ou va'erã pene pa'ũ-my, pende rerova hagwã Hesu rape-gwi ou va'erã. ³⁰Ha pene pa'ũ-gwi katu ojekwaa va'erã inhe'ẽ rei rei va'e omoingo hagwã gweko-rupi Hesu nhe'ẽ renduha. ³¹Upéa-rehe pesareko reko katu peiko-vy ani hagwã pene mbotavy rei. Pene mandu'a meme katu xe rekokwe-rehe. Mbohapy ro'y-ma anhemonhe'ẽ nhe'ẽ aiko-vy va'ekwe peẽ-my. Pytũ ramo, áry ramo ave anhemonhe'ẽ. Peteĩ teĩ va'e-pe anhemonhe'ẽ. Oroiporiahuvereko-gwi xe rasẽ anhemonhe'ẽ-vy va'ekwe, he'i.

³²—Ha ko'anga katu tonhangareko porã katu Nhandejáry pende-rehe. Inhe'ẽ rendu-vy peiko meme katu. Iporã ete inhe'ẽ, pende rexakwaa rei va'erã he'i va'e. Inhe'ẽ rendu-vy peiko ramo, pene mombaraeteve teve va'erã voi Nhandejáry. Pende reraha va'erã ave oha-py. Ojepy'a mopoti va'e gwive oĩ ha-py pende reraha va'erã peẽ-my ave, he'i.

³³—Ha xe katu namondo reíry xe rapixa mba'e-rehe rei xe resa. Ipirapire-rehe, ijao-rehe ave namondo reíry xe resa. ³⁴Ko xe po-rehe amba'apo. Aipota va'e-rehe xe amba'apo. Xe irũ oipota va'e-rehe amba'apo ave. Pene rembiereko-rehe katu ndajeruréiry. Xe amba'apoha peikwaa voi. ³⁵Iporã katu nhamba'apo nhaipytygwõ hagwã gwĩ ogwereco e'ỹ va'e-pe. Upéixa ete voi xe amba'apo va'ekwe xe amba'apo hagwe-rami peẽ pamba'apo hagwã ave. Iporã katu nhane mandu'a Nhandejáry Hesu nhe'ẽ-rehe: “Nhande-vy ome'ẽ ramo, javy'a va'e. Ha nhame'ẽ ramo katu nhande rapixa-pe, javy'a eteve voi” he'i va'ekwe Hesu, he'i omombe'u-vy Paulo.

Upéixa voi he'i Éfeso pygwa-pe onhemonhe'ẽ-vy.

³⁶Onhe'ẽ rire, onhesũ gwetypy'ã-rehe. Hendive kwéry ombojeupi Nhandejáry-pe onhe'ẽ. ³⁷Upéi ohapirõ íxupe hikwái, oho-ta ramo. Oikwavã kwavã íxupe hereko-vy. Ohovapyte ave íxupe: ³⁸“Ndaxe rexa mo'ãvéi-ma” he'i-gwi, ohapirõ eterei íxupe hikwái. Omboasy eterei ohoha. Upe ramo omboyru íxupe heraha-vy kanoagwasu-py.

21

Paulo ogwahẽ oho-vy Tiro tetã-my

¹Ha upéi katu:

—Oroho jevy-tama, oro'e íxupe kwéry, Éfeso pygwa-pe.

Upéi oronhemboyru kanoagwasu-py y-rupi oroho hagwã. Pya'e oroho ykõi-my orogwahẽ hagwã, ykõi héry va'e Cós-py. Iko'ẽ-my oroho ramo orogwahẽ jevy oroho-vy ykõi ambue héry va'e Rodes-py. Upe-gwi oroho jevy yvy ete-py, Pátara tetã-my.

²Upe-py orogwahẽ ramo, orotopa outro kanoagwasu. Oho va'erã voi Fenícia yvy-py orotopa. Orohekoviariõ ore ryrũ oroho jevy-ma. ³Oroho jave ojekwaa ykõi renda héry va'e Chipre. Ore asu-koty opyta ha orohasa meme joty oroho-vy, orogwahẽ hagwã oroho-vy Síria yvy-py. Tiro tetã-my orogwahẽ. Yvy ete-rehema oroho. Upe-py ogwenohẽmba gwembierahakwe. ⁴Ogwenohẽmba jave, oroheka upe tetã-rupi Hesu nhe'ẽ renduha va'e-pe. Orotopa ramo, oropyta sapy'a hendive kwéry. Peteĩ semana oropyta: “Ani ereho teĩ Jerusalém-my” he'i Paulo-pe. Oiko asyamaha ohendu uka íxupe kwéry Nhe'ẽ Marangatu tee va'e. Upéa-gwi omombe'u íxupe ani hagwã oho. ⁵Peteĩ semana rire, oroho jevy joty-ma. Ha Hesu nhe'ẽ renduha gwive ore reraha hagwã osẽmba upe tetã-gwi. Hembireko kwéry reheve, mitãgwe reheve osẽmba ore reraha hagwã. Orogwahẽ ramo ygwasu rembep-py, ore kwéry oronhesũ ore retypy'ã-rehe. Orombojeupi Nhandejáry-pe ore nhe'ẽ. ⁶Upe rire:

—Oroho jevy-ma, oro'e íxupe kwéry.

—Tapeho katu Nhandejáry ndive, he'i ore-vy.

Ha upe rire ha'e kwéry oje'ói jevy-ma gwóga-py hikwái.

Paulo ogwahẽ oho-vy Cesaréia tetã-my

Upéi ore oronhemboyru jevy-ma kanoagwasu-py. ⁷ Oroho jevy-ma orogwahê jevy oroho-vy Ptolemaida tetã-my. Upe-py oroho orohexa Hesu reroviaha. Peteĩ áry-py oropyta hendive. ⁸ Iko'ê-my oroho jevy-ma. Orogwahê jevy-ma oroho-vy Cesaréia tetã-my. Upe-py orogwahê oroho-vy héry Filipe va'e róga-py. Oropyta hendive. Filipe ko Hesu rehégwa nhe'ê porã mombe'uhaty. Ha'e seis kwimba'e Jerusalém pygwa ndive oiko va'ekwe Hesu remimondo nhe'ê-py tembi'u me'êha ramo. Ome'ê me'ê va'ekwe Hesu reroviaha-pe hemi'urã. ⁹ Áy irundy tajýry va'e, omenda e'ý va'e. Nhandejáry nhe'ê-py omombe'u va'ety voi. ¹⁰ Upe-py oropyta jave, ogwahê ou-vy Nhandejáry nhe'ê-py omombe'u va'ety, Judéia vyv gwigwa, héry va'e Ágabo. ¹¹ Ogwahê ramo ore ha-py, Paulo xumbe oipyhy. Upe rire Paulo xumbe-py ojepokwa, ojepykwa ave. Upe rire omombe'u ore-vy Nhe'ê Marangatu tee va'e nhe'ê:

—A-rami oipokwa-ta hereko-vy ko xumbe járy-pe. Judeu kwéry, Jerusalém pygwa va'e oipokwa-ta hereko-vy íxupe, he'i. —Oipokwa rire, judeu e'ý va'e po-py ome'ê-ta, he'i ore-vy omombe'u-vy.

¹² Inhe'ê orohendu ramo, oro'eri eri íxupe:

—Ani ani ereho teĩ Jerusalém tetã-my, oro'e Paulo-pe. Ha upe-py oĩ va'e ave he'iri iri íxupe ani hagwã oho.

¹³ Ha'e katu he'i ore-vy:

—Ma'erã peje upéixa xe-vy? Aha-ta joty xe. Ma'erã tipo xe rapirõ? Pene rasê ramo, naxe py'a ratávêi-ma va'erã. Xe rasêse-ma ave xe ave. Ndaxe pu'akavêi-ma va'erã xéjehe. Xe py'a-py pekwa va'e voi. Upe Jerusalém pygwa kwéry xe pokwase ramo, xe pykwase ramo ave, taxe jokwa katu, he'i. —Upe-py Nhandejáry Hesu ahayhu-gwi xe jukase ramo, taxe juka katu ave, he'i. —Ojapose va'e, tojapo katu xe-rehe, he'i ore-vy.

¹⁴ Upéixa ramo, ndikatúí orojoko íxupe. Noronhe'êngivêi-ma íxupe:

—Tereho katu. Ejapo katu Nhandejáry remimbota eiko-vy, oro'e rei-ma íxupe.

Paulo ogwahê oho-vy Jerusalém tetã-my

¹⁵ Upe rire oromboaty aty ore ma'etirõ oronhembosako'i oroho hagwã. Upéi oroho-ma Jerusalém tetã-my. ¹⁶ Oroho-ma jave, ore moirũ-ma ave ore-vy Cesaréia pygwa, Hesu nhe'ê renduha kwéry. Orogwahê oroho-vy Jerusalém-my. Ore moirũ ave peteĩ Hesu reroviaha héry va'e Menasom. Ha'e are etereive-ma ojerovia va'e. Chipre pygwa va'e. Ha'e gwógapy ore renogwahê ore reraha-vy oropyta hagwã upe-py hendive. ¹⁷ Upe-py orogwahê oroho-vy ramo, ore rerovy'a Hesu reroviaha kwéry ore rexa ramo.

¹⁸ Ha iko'ê-my Paulo ndive oroho herekwa héry va'e Tiago va'e renda-py. Upe-py orogwahê jave ra'e ojogweroaty ra'e Hesu reroviaha rerekwa kwéry. ¹⁹ Ha Paulo katu oporandu íxupe kwéry oiko porãha-rehe. Upéi omombe'u íxupe kwéry. Peteĩ teĩ omombe'u gwembapokwe judeu e'ý va'e pa'ũ-my ojapo va'ekwe. Nhandejáry nhe'ê-py ojapo japo va'ekwe gwive omombe'upa. ²⁰ Inhe'ê ohendu ramo, omomba'egwasu Nhandejáry-pe hikwái. Upéi he'i íxupe Hesu reroviaha rerekwa va'e:

—Ore ko orojohu porã voi mombyry-gwi ne rembiapokwe. Ha a pygwa katu judeu kwéry va'e, ojerovia va'e, nde rapykwe pygwa ndojohu porã. Ojohu porã e'ýha ereikwaa voi, ore ryvy. Heta eterei judeu ojerovia va'e oĩ. Moisés he'i va'ekwe nhane rekorã ojapose joty voi hikwái. Ikyre'ýha ereikwaa voi. ²¹ Ha oĩ he'i va'e nde-rehe: “Upe Paulo he'i judeu kwéry-pe, judeu e'ý va'e pa'ũ-my oiko va'e-pe: Anive pejapo Moisés he'i va'ekwe. Anive peipirekytĩ pene mitã kwimba'e-pe. Anive pehendú pene ramói he'i va'ekwe, he'i voi ko Paulo” he'i íxupe mo'ã nde-rehe, he'i íxupe omombe'u-vy.

²² —Ha ko'ánga katu ojogweroaty-ta judeu ojerovia va'e gwive. Ohendu ramo eregwahêha, ojogweroaty-ta voi. ²³ Upéixa-gwi iporã katu erejapo a-rami, he'i íxupe. Irundy kwimba'e oĩ ore jave. Judeu reko-rupi oiko va'e. Oho-tama Nhandejáry róga kakwaa-py onhemopotĩ uka hagwã Moisés he'i va'ekwe-rami. Upéi onheapiperõ uka-ta hemimombe'ukwe-rupi omboete hagwã Nhandejáry-pe. ²⁴ Ha ko'ánga katu emoirũ íxupe. Ha'e-rami enhemopotĩ ave ijave ereiko-vy. Eme'ê katu íxupe pirapire onheapiperõ hagwã.

Upéixa erejapo ramo, gwĩ judeu kwéry nde rexa-ta. Nde rexa ramo he'i-ta: “Ijapu nipo ra'e Paulo-rehe onhe'ẽ va'e” he'i-ta nde-rehe. “Ha'e katu judeu kwéry reko-rupi oiko ave. Ojapo voi nhande-vy Moisés he'i va'ekwe” he'i-ta nde-rehe hikwái, he'i íxupe omombe'u-vy.

²⁵—Ha judeu e'ỹ va'e ojerovia va'e katu, are-ma voi oromondo va'ekwe íxupe kwéry ore kwatia nhe'ẽ: “Ani penhemongy'a teĩ pe'u-vy tembi'u tupã ra'anga rovagwy-py onhemoi va'ekwe. Ani peiko rei teĩ kunha kwimba'e ndive. Ani pe'u teĩ ijuka-vy ohumbiri va'ekwe. Ani pe'u teĩ so'o hugwy reheve.” Kóá nhe'ẽ oromondo va'ekwe íxupe kwéry, he'i íxupe Hesu reroviaha rerekwa va'e omombe'u-vy.

²⁶Ha upéi katu Paulo oho. Upe irundy kwimba'e jave oho. Iko'ẽ-my ojapo myamyri Moisés he'i va'ekwe. Onhemopotĩ oiko-vy óga kakwaa-py hikwái. Upéi Nhandejáry róga kakwaa-py oike jevy omombe'u hagwã mbovy áry po ohasa-ta onhemopotĩ porãmba peve. Upéi he'i pa'i-pe: —Oronhemopotĩmba rire, peteĩ teĩ orome'ẽ-ta nde-vy ne rembijukapyrã, he'i íxupe omombe'u-vy.

Coronel oipyhy Paulo-pe

²⁷Paulo onhemopotĩ hagwe peteĩ semana ojapo. Ndopái vyteri ramo, gwĩ judeu kwéry, Ásia gwigwa va'e ohexa íxupe Nhandejáry róga kakwaa-py. Ohexa ramo ombopoxypa kente kwéry oipyhy hagwã íxupe:

²⁸—Nhande re'ýi kwéry, Israel remiarirõre kwéry, ore pytygwõ katu, he'i onhe'ẽ hatã-vy judeu kwéry. —Ko va'e kwimba'e ko nhane moakãrasy va'e. Opa va'e rupigwa-pe he'i va'e nhane rendu e'ỹ hagwã. Inhe'ẽ rei rei va'e nhande kwéry-rehe. Moisés he'i va'ekwe nhane rekorã-rehe onhe'ẽ rei rei. Inhe'ẽ rei rei ave Nhandejáry róga kakwaa-rehe. Ha ko'anga katu judeu e'ỹ va'e-pe ogwenogwahẽ-ma Nhandejáry róga-py. Ogwenogwahẽ-vy omongy'a koty marangatu kuri, he'i mo'ã hese onhe'ẽ hatã-vy.

²⁹Ohexa ra'e hikwái Éfeso gwigwa héry va'e Trófimo, judeu e'ỹ va'e. Paulo ndive ohexa ogwata ramo upe tetã-rupi. Ohexa ramo: “Ogwenogwahẽ nipo ra'e Nhandejáry róga-py” he'i mo'ã hese. Upéa-gwi: “Omongy'a koty marangatu” he'i mo'ã hese hikwái.

³⁰Inhe'ẽ ohendu ramo, ipoxypa hikwái. Upe tetã mygwa gwive ojogweroaty aty hikwái oipyhy hagwã Paulo-pe ombotyryry-vy. Koty-gwi ogwenohẽ heraha-vy. Upe-ma ramo omboty-ma Nhandejáry róga rokẽ. Hapykwere okẽ omboty-ma. ³¹Ojukase mo'ã íxupe hikwái. Ojukase jave, coronel-pe ogwahẽ ipoxyha rerakwã:

—Ipoxy okwa-vy Jerusalém pygwa gwive, he'i omombe'u-vy.

³²Upe-ma ramo oripara ogwey ou-vy. Ojave ogweru soldado kwéry, capitão ave. Ohexa ramo coronel-pe soldado-pe ave hikwái, noinupãvéiry-ma íxupe. ³³Upe rire coronel ogwahẽ ou-vy oipyhy Paulo-pe. He'i oipokwa hagwã íxupe mokõi ipo-rehe. Upéi oporandu upe-py oĩ va'e kwéry-pe:

—Kiva'e tipo kóá? Mba'éixa tipo héry? Mbava'e tipo ojapo ko va'e? he'i upe pygwa-pe.

³⁴Ha omombe'u joavy avypa hikwái. Upéa-gwi ndoikwaáiry voi soldado ruvixa. Ijavyu eterei voi hikwái. Upéa-gwi nohendú mba'eve. Upéixa ramo he'i ogweraha hagwã koty-py, soldado kwéry renda-py. ³⁵Ogwahẽ ramo ijeupi haty-py, ogwerojeupi íxupe heraha-vy ani hagwã ojuka íxupe, Paulo-pe ipoxy va'e:

³⁶—Peraha katu pejuka. Peraha katu pejuka, he'i onhe'ẽ hatã hatã-vy Paulo-rehe gwĩ hupive kwéry ogwa'ẽ va'e.

³⁷Ha upéi katu nogwenogwahẽ vyteri íxupe koty-py. Oĩ joty ijeupi haty-py:

—Amombe'use voi nde-vy peteĩ mba'e, he'i Paulo coronel-pe.

Onhe'ẽ ramo, ohexa katu íxupe. He'i íxupe:

—Erenhe'ẽ kwaa nipo ra'e grego nhe'ẽ-py, he'i. ³⁸—Aipo ramo ndaha'éi nipo nde ra'e upe Egito gwigwa erembopoxy va'ekwe kente kwéry-pe. Ndererahái nipo tekваты e'ỹ-my irundy mil kwimba'e oporojuka va'ekwe, he'i Paulo-pe coronel.

³⁹Upéi he'i coronel-pe:

—Ndaha'éiry xe upe va'e, he'i. —Xe ae judeu kwéry va'e, Tarso tetã mygwa xe, he'i. —Tarso tetãgwasu voi. Cilícia yvy-py oĩ va'e. Æy anhe'ëse voi hendive kwéry, eheja katu tanhe'ë hendive kwéry, he'i coronel-pe.

⁴⁰—Aipo ramo, enhe'ë katu, he'i íxupe coronel.

Upéixa ramo onhembo'y oĩ-vy ijeupi haty-rehe. Ombovava opo íxupe kwéry omokiriri hagwã. Okiririmba rire-ma onhe'ë íxupe kwéry. Hebreu nhe'ë-py onhe'ë íxupe kwéry.

22

“Anhe'ë-ta xéjehe” he'i Paulo Judeu kwéry-pe

¹Ha Paulo he'i judeu kwéry-pe:

—Xe ryvy kwéry, xe ru kwéry ave, pehendú katu xe rehegwa nhe'ë. Anhe'ë-ta xéjehe, he'i.

²Ohendu ramo inhe'ë hikwái:

—Nhande nhe'ë-py onhe'ë ra'e, he'i ojóupe hikwái.

Upéa-rehe ni peteĩ jepe nonhe'ëiry. Okiririmbaete voi ojeapysaka-vy hese.

³Ha ha'e katu he'i íxupe kwéry:

—Xe voi judeu kwéry va'e, Tarso tetã mygwa. Upe tetã Cilícia yvy pygwa. Ha ko'a-py xe mbo'e mbo'e oiko-vy va'ekwe. Xe mbo'eháry héry Gamaliel. Nhande ru kwéry he'i va'ekwe gwive, upéa ahendu porãmba va'ekwe voi, he'i. —Aikwaapa porã peve xe aiko va'ekwe. Ko'ëmba ëmba ajapose voi Nhandejáry remimbota gwive. Æy pejaposeha-rami voi Nhandejáry remimbota, ajapose mo'ã voi va'ekwe xe ave. Peteĩ teĩ áry-py ajapo aiko-vy, he'i íxupe kwéry.

⁴—Yma va'ekwe areko asy aiko-vy Hesu rape pyhyha ajuka uka hagwã. Aha va'ekwe aipokwa-vy amoĩ uka hagwã preso. Kunha kwimba'e ave amoĩ uka va'ekwe preso, he'i.

⁵—Anhetegwa voi xe amombe'u xe rembiapokwe. Ndaxe apúi ramo, oikwaa voi pa'i ruvixagwasu. Judeu ruvixa kwéry gwive oikwaa ave. Gwĩ mburuvixa kwéry ome'ë xe-vy va'ekwe kwatia nhe'ë xe araha hagwã nhande ryvy kwéry, Damasco tetã-my oiko va'e-pe. Upéixa ramo ndaxe ae reiry aha. Pa'i ruvixagwasu nhe'ë-rupi ae aha amoingo asy hagwã Hesu reroviaha-pe. Ha upéi katu aha Damasco tetã-my. Upe-py aipyhy-ta mo'ã aipokwa hagwã heru-vy. Ko'a-py aru jevy-ta mo'ã ambohasa asy uka hagwã.

⁶—Upéi laróse-rupima agwata jave aha-vy, namombyry etevéi-ma xe agwahë hagwã upe-py. Upe-ma ramo ho'a-ma xe-rehe hendy mbaraete va'e. Yvate-gwi hendy va'e. ⁷Ha'a-ma aha-vy yvy-py. Ahendu-ma he'i va'e xe-vy: “Saulo, Saulo” he'i xe-vy xe renói ramo. “Ma'erã tipo xe mbohasa asy?” he'i xe-vy. ⁸“Kiva'e tipo nde, xe Járy” ha'e íxupe. “Xe ko Hesu Nazaré pygwa. Xe-vy voi xe mbohasa asy” he'i xe-vy, he'i omombe'u-vy.

⁹—Ha xe ndivegwa hendy mbaraete ramo ohexa ha xe-vy onhe'ë va'e nhe'ë katu nohendúiry. ¹⁰“Mbava'e tipo xe ajapo-ta ãy, xe Járy” aporandu íxupe. “Epu'ã katu tereho Damasco tetã-my. Upe-py omombe'u-ta nde-vy opaixagwa ne rembiaporã, Nhandejáry remimbota” he'i xe-vy Hesu. ¹¹Ha xe nama'ëvéi-ma. Xe resaka eterei-gwi nama'ëvéi-ma. Upéa-gwi xe popyhy rei-ma xe reraha-vy xe ndivegwa. Upe rire orogwahë ore oroho hapu.

¹²—Ha upéi katu ogwahë ou-vy xe ha-py kwimba'e héry va'e Ananias. Moisés he'i va'ekwe apoha va'e: “Upe va'e hekoha porã va'e” he'i hese upe-py oiko va'e judeu va'e gwive. Imandu'a porã hese. ¹³Ha upéi katu ogwahë ramo ou-vy, onhembo'y xe ypy-py oĩ-vy: “Ema'ë jevy mani katu, xe ryvy Saulo” he'i xe-vy. Upe-ma ramo xe resa jevy-ma ahexa-ma íxupe.

¹⁴—Ha he'i xe-vy: “Nhandejáry ko, nhande ramoigwasu kwéry Járy va'e, nde poravo araka'e ereikwaa hagwã hemimbota. Erehexa hagwã upe hekoha porã va'e Hesu-pe nde poravo araka'e” he'i xe-vy. “Ha ko'ánga katu erehexa-ma íxupe kuri. Æy kuri erenhomongeta hagwã hendive nde poravo araka'e. Æy katu erenhomongeta-ma kuri hendive” he'i xe-vy. ¹⁵“Upéixa ramo eremombe'u mbe'u-ta kente kwéry va'e-pe gwive

Hesu rehegwa nhe'ë. Ne rembiexakwe, ne remiendukwe ave eremombe'u-ta imosarambi-vy. ¹⁶ Äy voi epu'ä mani katu enhemongarai uka Nhandejáry Hesu réry renói-vy", he'i xe-vy. "Ere katu: Xe ajerovia-ma Nhandejáry Hesu-rehe, ere katu. Upéixa ramo omopotí-ta nde py'a iky'a va'e Nhandejáry" he'i xe-vy Ananias.*

¹⁷ —Upe rire aha jevy Jerusalém teta-my aike Nhandejáry róga kakwaa-py. Upe-py ambojeupi Nhandejáry-pe xe nhe'ë äi-vy. Upe jave, ojehexa uka xe-vy Nhandejáry Hesu. Xe-vy anhóte ojehexa uka. ¹⁸ Ahexa íxupe xe-vy onhe'ë ramo: "Tereho katu ejapura pura ekwa-vy, ko tetä-gwi ereho-vy. Xe rehegwa eremombe'u ramo jepe nohendu mo'äiry voi" he'i xe-vy Hesu. ¹⁹ Upe ramo ha'e íxupe: "Ojeporahéi haty haty-rupi aike ike va'ekwe, Xe Járy. Xe amoí uka va'ekwe preso nde-rehe ojerovia va'e. ²⁰ Ainupä uka va'ekwe ave. Ojukajave hikwái nde rehegwa momba'uhare héry va'e Estêvão, ijave ave xe aime va'ekwe. Hembiapokwe ajohu porä va'ekwe. Ijukaharä ao-rehe xe anhangareko hese va'ekwe. Upe va'e xe rembiapokwe gwive oikwaapa judeu kwéry. Xe kwaapa voi, xe Járy" ha'e íxupe.*

²¹ —Ha he'i joty xe-vy Nhandejáry Hesu: "Tereho katu. Oromondo-ta mombyry judeu e'ÿ va'e oiko ha-py oromondo-ta nde-vy" he'i xe-vy Hesu, he'i íxupe kwéry omombe'u-vy Paulo.

Coronel he'i ombopi hagwä Paulo-pe

²² Ha ha'e kwéry ohendu porä meme inhe'ë. Ha, "Aha-ta judeu e'ÿ va'e oiko ha-py" he'i-ma ramo katu, ojohu vai. Upe va'e nhe'ë ombopoxypa íxupe kwéry. Hatä hatä voi onhe'ë: —Upéa kwimba'e pejuka katu. Iporäve ndoikovéiry nhane pa'ü rupi, he'i Paulo-rehe.

²³ Onhe'ë hatä jave, oipe'a ojéhegwi ao ombovava hagwä. Ojara yvy ku'i opo-py omombo hagwä yvate-koty. Omotimbo yvy ku'i opoxy-gwi. ²⁴ Upéixa ramo coronel he'i ogweroike hagwä Paulo-pe koty-py:

—Embopi mbopi íxupe eremombe'ë hagwä, he'i. —Omombe'u ramo jaikwaa hagwä, Mbava'e po ojapo ra'e, mbava'e-gwi ijayvupa hese ra'e ipoxy-vy hikwái. Embopi íxupe omombe'u hagwä gwembiapokwe, he'i soldado-pe.

²⁵ Upéi ou oipokwa-vy íxupe okyta-rehe imoí-vy. Upéa-gwi Paulo he'i capitão-pe ijyke-rehe onhembo'y oí-vy ramo:

—Xe mbopi rei-ta. Xe ko romano kwéry va'e. Ne'írá xe monhe'ë, ne'írá ereikwaa vyteri xe rembiapokwe. Nanhambopíry va'e romano kwéry-pe nhamonhe'ë e'ÿ reheve, he'i. —Upéixa ramo ivai va'erä xe mbopi rei ramo, he'i capitão-pe.

²⁶ Ohendu ramo inhe'ë oho omombe'u coronel-pe:

—Ma'erä tipo erembopi uka-ta ko kwimba'e? Ha'e katu romano kwéry va'e voi. Xáke, erembopi ramo, ne rembiapo vai-ta, he'i coronel-pe.

²⁷ Upe ramo ou coronel. Paulo renda-py ou oporandu-vy íxupe:

—Nde tipo romano kwéry va'e. Emombe'u katu xe-vy, he'i oporandu-vy íxupe.

—Xe voi, he'i coronel-pe.

²⁸ Upéi he'i íxupe:

—Heta va'ekwe xe ame'ë pírapire apyta hagwä romano ramo, he'i Paulo-pe.

Upe ramo he'i coronel-pe:

—Romano kwéry va'e teí xe. Ndapagáiry. Name'ëi mba'eve. Xe ru katu romano kwéry va'e. Ha'e hesegwa teí ave xe. Name'ëi mba'eve, he'i coronel-pe.

²⁹ Upe-ma ramo opa osëmba oje'ói-vy imbopiharägwé mo'ä ikyhyje-gwi. Ikyhyje ave coronel. "Paulo romano kwéry va'e ae nipo ra'e" he'i ojéupe hikwái. Onhe'ë-py rei oipokwa-gwi, ikyhyje. ³⁰ Iko'ë-my he'i coronel: "Mbava'e-gwi tipo ipoxy Paulo-rehe judeu kwéry?" he'i ojéupe. Upéa-gwi he'i ojogweroaty hagwä iha-py pa'i ruvixa kwéry, judeu ruvixa kwéry gwive ave. He'i ave opoi hagwä Paulo-gwi. Upéi ogwergewejy heraha-vy. Hovagwy-py kwéry omonhembo'y íxupe imoí-vy.

* 22:16 At 9.1-19; 26.12-18; Fp 3.4-6

* 22:20 At 7.58

23

Paulo onhe'ê judeu ruvixa kwéry-pe

¹Upe ramo Paulo ohexa katu katu ojogweroaty va'e-pe, judeu ruvixa gwive. He'i íxupe kwéry:

—Yma gwive ko'ánga ete peve, xe re'í kwéry, aiko meme Nhandejáry ndive. Ajapose meme va'e Nhandejáry remimbota. Upéa oikwaa Nhandejáry. Xe apu ramo, ha'e oikwaa, he'i. —Hesa-gwi nokanhíi mba'eve. Oikwapa voi, he'i íxupe kwéry Paulo.

²Ha upéa nhe'ê ohendu-ma ramo ogweropoxy pa'i ruvixagwasu héry va'e Ananias. He'i Paulo yke rehegwa-pe ojurupete haggwã íxupe. ³Ha ha'e he'i pa'i ruvixagwasu-pe:

—Nde rova-py ipotí. Nde py'apy-py katu iky'a. Nde rereko asy-ta ave Nhandejáry, he'i íxupe. —Eregwapy ereí-vy xe monhe'ê haggwã. Moisés he'i va'ekwe-rami xe monhe'ê haggwã ereiko. Ma'erã xe nupã uka xe monhe'ê e'ý reheve? he'i. —Upéixa nde'íry va'ekwe Moisés nhande-vy va'ekwe, he'i pa'i ruvixagwasu-pe.

⁴Upe ramo ijyke-rehe onhembo'y oí va'e:

—Ani erenhe'ê vai teí pa'i ruvixagwasu, Nhandejáry rembigwái va'e-rehe, he'i íxupe hikwái.

⁵Ha'e katu he'i:

—Néi, he'i. —Naiporái teí nhanhe'ê vai teí pa'i ruvixagwasu-rehe. “Ani erenhe'ê vai teí nde re'í ruvixa-rehe.” Upéixa omoí va'ekwe kwatia-rehe Nhandejáry nhe'ê, he'i omombe'u-vy. —Ha ndaikwaáiry voi xe íxupe, xe re'í kwéry. Pa'i ruvixagwasu oí ramo ndaikwaáiry xe íxupe, he'i upe-py oí va'e-pe.*

⁶Upe rire oma'ê katu katu judeu ruvixa kwéry-rehe. Oma'ê ramo, ohexa jopara katu. Oí saduceu va'e, oí fariseu va'e ave. Ohexa ramo ambue mbue, onhe'ê hatã:

—Xe re'í kwéry, xe ko fariseu kwéry va'e, fariseu ra'y ave. “Omano va'ekwe gwive oikove jevy va'erã” xe ha'e va'e amombe'u-vy. Upéa nhe'ê-gwi xe reru a-py xe monhe'ê, he'i huvixa kwéry-pe.

⁷Upéa he'i-ma ramo, onhonhe'ê mbojevvy jevypa hikwái, ndogwerojójáiry onhonhe'ê.

⁸Ha saduceu kwéry he'i va'e no'ã-rami: “Ndoikove jevyí va'erã omano va'ekwe. Nhamano rire, nhane nhe'ê ndoikovéi-ma va'erã” he'i mo'ã. “Ndoikói va'e Nhandejáry rembigwái yváy pygwa” he'i mo'ã ave.

Ha fariseu kwéry katu ndogweroviáiry inhe'ê: “Oí voi Nhandejáry rembigwái yváy pygwa. Oikove jevy-ma va'erã ave omano va'ekwe. Oikove jevy-ma va'erã voi ko nhane nhe'êgwe” he'i va'e.

⁹Upéixa ramo ijayvu eterei. Upe rire onhembo'y-ma gwí judeu rekombo'ehaty va'e, fariseu va'e. Onhe'ê hese:

—Nahembiapo vaíry nipo ra'e. “Orojohu porã hembiapokwe. Nhe'ête ohendu para'e. Nhandejáry rembigwái nhe'ê ohendu para'e. Koixagwa nhe'ê Paulo ohendu ramo, ndikatúí nhapyrú Nhandejáry nhe'ê-rehe” he'i judeu ruvixa kwéry-pe.

¹⁰Upéixa ramo onhonhe'ê mbojevvy jevy hikwái. Hatãve táve onhe'ê. Ipoxyve xyve voi hikwái. Ha coronel katu oma'ê ma'ê rei hese kwéry: “Ojuka-tama Paulo-pe hereko-vy hikwái” he'i ojúpe coronel ikyhyje-vy. Upéa-gwi he'i soldado-pe ogwejy haggwã oipe'a heru-vy ojóhugwi kwéry:

—Eru ne renda-py, he'i.

Upéi oho ogweru íxupe.

Nhandejáry Hesu ojehexa uka Paulo-pe

¹¹Ha upéi katu pyhare Nhandejáry Hesu onhembo'y ijyke-rehe. Ikéra-py onhembo'y oí-vy ijyke-rehe:

—Ani erekyhyje teí, he'i. —Enhembopy'agwasu katu. A-py xe mombe'u mbe'uha-rami, xe mombe'u va'erã ave Roma tetã-my, he'i íxupe Nhandejáry Hesu.

Judeu kwéry onhomb'o'e mbo'e Paulo-rehe ojuka haggwã

* 23:5 Êx 22.28

¹²Ko'êmba-ma ramo ojogweroaty judeu kwéry:

—Jajuka Paulo, he'i onhombo'e mbo'e okwa-vy hese. Omoporā porā onhonhe'ê hikwái: —Ndajakaru mo'ávêi, ndajay'u mo'ávêi ave. Jajuka rire ae Paulo-pe, jakaru jevy va'erā, jay'u jevy va'erā, he'i hikwái ojúupe. —Tanhane mbohasa asy Nhandejáry jajuka e'ý mboyye jakaru ramo, he'i omoporā porā-vy ojúupe onhonhe'ê. ¹³⁻¹⁴Upéa he'i va'e quarenta-gwi oive vyteri. Upéi oho pa'i ruvixa kwéry renda-py, judeu ruvixa renda-py ave. Oho omombe'u-vy:

—“Ndikatu mo'ávêi orokaru Paulo orojuka e'ý mboyye” oro'e kuri aje'i Nhandejáry-pe. Ore apu ramo oikwaa arā Nhandejáry, he'i. ¹⁵—Áy katu pemondo mani coronel-pe pene nhe'ê mombe'u uka-vy. Tomondo ave onhe'ê judeu ruvixa kwéry gwive: “Togwey katu Paulo tou-vy ore renda-py. Oromonhe'êse íxupe orohendu hagwā inhe'ê, oroikwaa porāve hagwā hembiapokwe” peje mo'á íxupe imbotavy-vy, he'i. —Ogwahê e'ý mbove Paulo, oroha'arō-ta íxupe orojuka hagwā, he'i mburuvixa kwéry-pe.

¹⁶Ha Paulo reindy memby kwimba'e katu ohendupa hesegwa nhe'ê. Oha'arō oī-vy va'e nhe'ê ohendu. Upéa-gwi oho omombe'u. Paulo renda-py oike omombe'u hagwā íxupe.

¹⁷Ha Paulo katu he'i capitão-pe:

—Ko va'e eraha katu coronel-pe. Oī hemimombe'urā, he'i capitão-pe.

¹⁸Upéixa ramo ogweraha íxupe coronel renda-py. Ogwahê ramo henda-py, he'i coronel-pe:

—Upe onhemōi va'e preso héry va'e Paulo xe renói-ma kuri: “Eraha katu ko karia'y coronel renda-py. Oī hemimombe'urā” he'i xe-vy imombe'u-vy, he'i coronel-pe.

¹⁹Ohendu ramo inhe'ê, oipopyhy-ma heraha-vy upe karia'y-pe. Ogwenohê ha'e anho heraha-vy. Oporandu íxupe ha'e anho ha-py:

—Mbava'e tipo eremombe'use? he'i íxupe.

²⁰Ha Paulo reindy memby omombe'u coronel-pe judeu nhe'êgwe:

—He'i kuri judeu kwéry: “Ja'e-ta coronel-pe: Togwey katu ko'ê ramo Paulo tou-vy. Togwey orojogweroaty haty-py. Oromonhe'êse íxupe orohendu hagwā inhe'ê oroikwaa porāve hagwā hembiapokwe, ja'e-ta coronel-pe” he'i judeu kwéry. ²¹Ha nde ani erejapo teĩ kuri inhe'ê. Ijapu voi hikwái. Áy ohapera'arō arō-ta íxupe okwa-vy ojuka hagwā. Heta oī oha'arōháry quarenta-gwi oive vyteri. “Ndorokaru mo'ávêi, ndoroy'u mo'ávêi ave Paulo orojuka e'ý mboyye” he'i kuri Nhandejáry-pe. Ánga ete-ma voi oha'arō íxupe ne nhe'ê-rupi ogwey ramo, ojuka hagwā íxupe. Ogwey-ma ramo, oha'arōmba-ma ijukaharā, he'i coronel-pe imombe'u-vy.

²²Ohendu ramo inhe'ê:

—Ani avave-pe eremombe'u mbe'u teĩ xe aikwaaha, he'i. —Xe aikwaa ramo hembiaporā, ani xe mombe'u mbe'u. Tereho katu, he'i íxupe coronel.

²³Upe-ma ramo mokōi capitão-me ohenói ou hagwā. Ou ramo, he'i íxupe upe coronel omanda-vy:

—Pyhare pytūmba-ma ramo, emonhembosako'i uka katu duzentos soldado, setenta kavaju arigwa reheve, he'i. —Eromoangkōi uka mani katu oje'ói hagwā mombyry Cesaréia tetā-my, he'i. —Outro soldado mba'e jukaha hu'y puku joa ogwereco va'e duzentos oī va'e, emonhembosako'i uka ave. ²⁴Eiporu uka katu ave Paulo renagwā, he'i. —Eraha íxupe ojehu e'ý reheve mba'eve íxupe. Mburuvixagwasu héry va'e Félix renda-py eraha íxupe, he'i capitão-pe coronel.

Coronel omoĩ kwatia-rehe onhe'ê

²⁵Upéi coronel ogweraha uka ave kwatia-rehe onhe'ê mburuvixagwasu-pe. ²⁶No'ā-rami omoĩ kwatia-rehe: “Xe Cláudio Lísias amondo-ta xe nhe'ê nde-vy xe ruvixa Félix. Enterovete va'e ne mboete va'e. Mba'éixa tipo ereiko? Ne resāi ave pa ereiko-vy? ²⁷Ko'ánga oromondo-ta ko kwimba'e héry va'e Paulo. Kwehe aresende íxupe ijukaharāgwe-gwi. Judeu kwéry oipyhy rire íxupe, ojuka-tama ra'e ogwereco íxupe. Upe jave xe agwahê soldado kwéry ndive aresende íxupe. Ha'e romano kwéry. Ha aikwaa-ramo íxupe romano gwigwa voi aresende íxupe heraha-vy. ²⁸Upéi araha jevy íxupe judeu

ruvixa kwéry ojogweroaty haty-py. Upe-py aporandu hembiaapo vaikwe-rehe: Mbava'e tipo ojapo ra'e ko kwimba'e Paulo? ha'e aporandu-vy. ²⁹Ha mba'eve nomombe'úi xe-vy. Mba'eve ndojapóiry ra'e. Ipoxy rei ra'e judeu kwéry hese. Paulo nohendúí ramo judeu he'i va'e, ipoxy hese hikwái. Judeu reko-rupi mate ndogwatái ra'e Paulo. Upéa-rehe rei ndaikatúí amói preso, ndaikatúí ave ajuka uka íxupe. ³⁰Preso oí vyteri jave ogwahê xe-vy imombe'uháry: Oí judeu Paulo ra'arôha, he'i xe-vy. Áy voi oha'arô ojuka hagwā íxupe, he'i kuri xe-vy omombe'u-vy. Aipo ramo ha'e xejéupe: Amondo-ta mburuvixagwasu ha-py Paulo, ha'e. Upéi ha'e judeu kwéry-pe: Tapeho katu mburuvixagwasu renda-py. Pemombe'u íxupe Paulo rembiapokwe. Paulo ko hembiaapo vai, peje hese. Upéa-gwi tapeho katu pemombe'u, ha'e íxupe kwéry." Upéixa voi coronel omoí kwatia-rehe onhe'ê.

Paulo ogwahê oho-vy Cesaréia tetã-my

³¹Upéixa ramo soldado kwéry ojapo inhe'ê. Coronel he'i va'ekwe ojapo. Ogweraha oho-vy Paulo-pe. Pyhare ogweraha íxupe Antipátride tetã-my. ³²Ko'êmba-ma ramo, oheja íxupe soldado yvy rupigwa. Oheja-ma ramo, ou jevy íxugwi henda-py. Ha kavaju arigwa katu oho mombryve joty hendive hikwái. ³³Ogwenogwahê heraha-vy Cesaréia tetã-my. Upe-py ogwahê ramo oho-vy, ome'ê kwatia nhe'ê mburuvixagwasu-pe:

—Ko va'e Paulo, he'i mburuvixa-pe hexa uka-vy.

³⁴Omonhe'ê rire kwatia nhe'ê:

—Kiva'e yvy pygwa tipo nde? he'i Paulo-pe oporandu-vy.

—Cilícia yvy pygwa xe, he'i Paulo.

³⁵Ohendu ramo inhe'ê:

—Néi, he'i. —Ne rembiapokwe mombe'uharā ogwahê ramo, oromonhe'ê-ta ave ahendu hagwā ndejehewigwa nhe'ê, he'i íxupe.

Upe rire he'i soldado-pe:

—Enhangareko katu hese Herodes róga kakwaa-py, he'i.

24

Judeu kwéry omombe'u Paulo rembiapokwe

¹Cinco áry rire ogwahê ou-vy Cesaréia tetã-my pa'i ruvixagwasu héry va'e Ananias. In-dive ou ave ndahetái judeu ruvixa. Ogwahê ave ou-vy onhe'ê kwaa va'e héry va'e Tértulo. Ogwahê ramo omombe'u mburuvixagwasu-pe héry va'e Félix, Paulo rembiapokwe. ^{2,3}Upéi mburuvixagwasu he'i ogweru hagwā Paulo. Ou ramo, onhembo'y Tértulo omombe'u hagwā Paulo rembiapokwe:

—Ore ko oromomba'egwasu ete voi nde-vy, Félix. Orotima porā nde-vy erejapo japo va'ekwe-rehe ore-vy. Nde ereĩ-gwi ore jojapa enterove va'e oroiko-vy. Ore kwéry-rehe erenhangareko porā porā. Upéa-gwi ore kwéry oroiko porāve rāve. Upéa-rehe orotima porā nde-vy.

⁴—Noromoakārasyséi-gwi nanhe'ê hetaséiry. Ndahetái ramo jepe xe nhe'ê, xe mboete joty katu. Ejeapysaka katu xe nhe'ê-rehe. ⁵Upéa kwimba'e héry va'e Paulo ndorojohu porái íxupe. Upe va'e ko nhane moakārasy va'e. Judeu kwéry-pe opa-rupi oiko va'e-pe gwive ombopoxy poxy va'evy voi upéa, he'i. —Hesu Nazaré pygwa nhe'ê renduha ruvixa upe va'e, he'i. ⁶—Kweheve omongy'a-ta mo'ā Nhandejáry róga kakwaa koty marangatu omongy'a-ta mo'ā. Ha orojoko íxupe oroipyhy-vy. Orogwereko-ta mo'ā íxupe judeu kwéry he'i hagwe-rami. ⁷Upe-ma ramo ogwahê ou-vy coronel héry va'e Lísias. Ore moanha anha ramo, hatā eterei oipe'a íxupe oréhegwi heraha-vy. ⁸Upéi he'i ore-vy: “Paulo rembiapokwe omombe'use va'e toho katu mburuvixagwasu renda-py” he'i ore-vy. Ore remimombe'u va'e hese anhetegwa voi. Nde eremonhe'ê ramo ave íxupe, ereikwaa ave va'erā anhete va'e, he'i mburuvixagwasu-pe Tértulo.

⁹—Upéixa voi, he'i joa judeu kwéry, omoporā-vy onhonhe'ê. —Anhetegwa voi Paulo-rehe hemimombe'ukwe, he'i joa hese.

Paulo omombe'u mburuvixagwasu-pe ojehegwigwa nhe'ê

¹⁰Ha upéi katu mburuvixagwasu opo-py omombe'u íxupe onhe'ê hagwã. Upe-ma ramo, Paulo he'i mburuvixagwasu-pe:

—Judeu kwéry onhonhe'ê mbojevy jevy okwa-vy ramo, are-ma erembohory íxupe kwéry. Upéa-gwi iporã amombe'u-ta nde-vy xe rembiapokwe. Xejehewigwa nhe'ê amombe'u-ta nde-vy.

¹¹—Ojapo doze áry mante xe aha hagwe Jerusalém tetã-my, he'i. —Upe-py aha amboete-vy Nhandejáry-pe. Oĩ xe rexahare. Ereikwaa porãse ramo, omombe'u va'erã nde-vy xe rexa ramo. ¹²Avave-pe nanhe'ê mbojevy jevýiry. Xe rexa e'ý reheve xe mombe'u rei. Nambopoxýiry xe rapixa kwéry-pe. Xe rexa e'ý reheve xe mombe'u rei judeu kwéry. Naxe rembiapo váiry aiko-vy Nhandejáry róga kakwaa-py. Ojeporahéi haty haty-rupi, upe tetã-rupi ave naxe rembiapo váiry aiko-vy. ¹³Áy katu ndaipóri a-py xe rexahare eremombe'ê hagwã ereikwaa porãve hagwã hemimombe'u kwéry. ¹⁴Ha peteĩ va'e hemimombe'u ndaijapúí va'e. “Hesu rape Paulo oipyhy voi” he'i xe-rehe, he'i omombe'u-vy. —Xe ko amboete aiko-vy va'e voíte Nhandejáry-pe, ore ramói Járy va'e. Ha judeu kwéry he'i mo'ã xe-rehe: “Hesu rape oipyhy ramo Paulo, ndoikovéi Nhandejáry reko-rupi. Ojere-ma íxugwi” he'i mo'ã xe-rehe hikwái, he'i omombe'u-vy. —Ha ndaha'etí upéixa. Amboete aiko-vy va'e Nhandejáry-pe. Hesu nhe'ê ahendu ramo, amboete aiko-vy Nhandejáry-pe. Ha'e kwéry-rami ave xe arovia Moisés ohai va'ekwe kwatia-rehe gwive. Nhandejáry nhe'ê-py omombe'u va'ety ohai va'ekwe kwatia-rehe ave arovia voi. ¹⁵Ha'e kwéry-rami ajerovia Nhandejáry-rehe. Upe omoingove jevy va'erã-rehe ajerovia. Entéro omano va'ekwe gwive omoingove jevy va'erã. Hekoha porã va'e gwive, hekoha vai va'e gwive ave opu'ã jevy va'erã. Upéa nhe'ê xe arovia. ¹⁶Upéa nhe'ê ha'e kwéry ogwerovia ave. Xe rekoha oikwaa porã Nhandejáry. Hesa-gwi nokanhýi mba'eve. Teko rei-rupi aiko ramo xe rexa ave. Upéa-gwi ndajevavyséiry. Xe py'a potĩ porãse meme voi aiko-vy, he'i.

¹⁷—Are-ma aha va'ekwe mombyry. Áy ae aju jevy ramo. Xe re'ýi kwéry-pe agwahê aju-vy. Aru aju-vy iporiahu va'e kwéry-pe amboja'o ja'o va'erã ime'ê-vy pirapire. Nhandejáry-pe xe remime'erã aru aju-vy ave. ¹⁸Upéa ame'ê jave, Nhandejáry róga kakwaa-py xe topa hikwái. Anhemopotĩ Moisés remimombe'ukwe-rupi aĩ-vy ramo xe topa. Xe topa ramo, ndaipóri ijaty va'e. Onhombopoxy va'e ndoikói ave. ¹⁹Ásia pygwa judeu va'e mante xe topa va'ekwe. Ma'erã ndoúí ne renda-py xe mombe'u hagwã? “Paulo hembiaipo vai voi oiko-vy” he'i hagwã xe-rehe, ndoúiry nde ha-py. Ma'erã ndoúí xe mombe'u porã hagwã nde-vy? ²⁰Ha ndoúí va'e rekovia ou va'e, taxe mombe'u katu. A-py ou va'e taxe mombe'u kuri, he'i. —Kwehe xe monhembo'y xe monhe'ê uka-vy. Judeu ruvixa kwéry rovagwy-py xe monhe'ê kuri. Upéixa ramo xe rembiapo vai ramo, taxe mombe'u katu. ²¹Anhembo'y jave hovagwy-py kwéry, mba'eve ndajapóiry. A-rami ae voi anhe'ê hatã kuri: “Etería peê xe monhe'ê voi. Xe arovia voi jaikove jevymaha rehegwa nhe'ê. Omano va'ekwe oikove jevy va'erã va'e rehegwa nhe'ê xe arovia voi. Upéa-gwi xe monhe'ê etería” ha'e xe monhe'êhary-pe, he'i mburuvixagwasu-pe Paulo onhemombe'u-vy.

Mburuvixagwasu oheja preso Paulo-pe

²²Ha mburuvixagwasu katu ohendu ramo inhe'ê, hembiaipokwe-rehe mba'eve nde'íry íxupe. Hesu rape pyhyháry rekoha oikwaa porã va'e. Upéi he'i:

—Áy nda'e mo'áiry ne rembiapokwe-rehe. Kóa ndaha'etí etería gwarã, he'i. —Ko'ê ramogwarã jaheja-ta nhane nhe'êrã. Oguhê ou-vy ramo ae coronel Lísias ha'e-ta ne rembiapokwe-rehe, he'i íxupe mburuvixagwasu.

²³Upéi he'i capitão-me:

—Emoĩ katu íxupe preso. Ani erereko asy teĩ íxupe, he'i. —Oguhê ramo hemikotevê reruha, ani erejoko teĩ. “Eguhê katu” ere íxupe, he'i omanda-vy.

²⁴Ndahetái áry rire, ogwahê jevy ou-vy mburuvixagwasu héry va'e Félix hambireko ndive. Hambireko judeu kwéry va'e héry Drusila. Oguhê rire:

—Eru xe ha-py tamonhe'ê Paulo aikwaa porã hagwã inhe'ê, he'i.

Upéi ou ogwahē ha'e-py. Omombe'u Hesu rehegwa nhe'ē. Hesu Cristo-rehe jajeroviaha va'e rehegwa omombe'u:

²⁵—Nhandejáry ko hekoha porā va'e, he'i. —Nthane mbotavy e'ŷy va'e. Hekoharupi oipota jaiko. Oipota nhande pu'aka nhandéjehe. Ivai va'erā erejapo-ta ramo, ani ne mandu'a ne rembiapo vairā-rehe. Ne rembiapo porāha-rehe ae katu ne mandu'a. Ombo papa ramo, Nhandejáry ombojogweroaty va'erā oha-py kente kwéry gwive omombe'u hagwā petēi tei-pe hembiapokwe. Hembiaapo porā para'e, hembiaapo vai para'e. Gwī hembiaapo vai va'e ombohasa asy va'erā íxupe Nhandejáry, he'i onhemonhe'ē-vy mburuvixagwasu-pe.

Ohendu ramo inhe'ē, onhemondýi tee-ma:

—Áy tereho katu, he'i. —Ko'ē ramo, ko'ē mbue ramo ija ramo, orombovia uka-ta ereju jevy hagwā nhandomongeta hagwā, he'i íxupe mburuvixagwasu.

²⁶Ha ipy'a-py katu oipota Paulo ome'ē gwepy opoi hagwā íxugwi. Upéa-gwi ogwerruruka ruka onhomongeta jevy hagwā. ²⁷Ha upéi katu mokōi ro'y rire onhehekoviārō mburuvixagwasu. Oguhē mburuvixagwasu pyahu héry va'e Pórcio Festo. Ha Félix osē oho. Oho ramo, oheja preso Paulo-pe. Judeu kwéry-pe ombovy'ase voi. Oipota-gwi imandu'a porā hese, ohejave joty íxupe preso.

25

"Aipota xe monhe'ē mburuvixagwasu César" he'i Paulo

¹Ha upéi katu Festo mburuvixagwasu pyahu va'e, ogwahē ou-vy Cesaréia tetā-my. Upe-py oiko mburuvixagwasu ramo. Mbohapy áry rire upe-gwi oho. Oguhē oho-vy Jerusalém tetā-my. ²Upe-py ogwahē ramo ou henda-py pa'i ruvixa kwéry judeu ruvixa kwéry ave. Omombe'u íxupe Paulo rehegwa nhe'ē. Upéi he'i íxupe hikwái:

³—Oroipota eterei ou Paulo ko'a-py. Ne nhe'ē-rupi tou katu Paulo ore mbovy'a hagwā, he'i mburuvixagwasu-pe.

Ha ojukase mo'ā Paulo-pe judeu kwéry: "Ou ramo ko'a-py, nhaha'arō nhemi katu Paulo tape-rehe jajuka hagwā" he'i ojóupe ra'e hese hikwái.

⁴Ha mburuvixagwasu ndojohu porāi inhe'ē:

—Paulo onhemōi preso oī-vy Cesaréia-py. Aha-ta upe-py, he'i. —Ko'ē mbue ramo xe aha-ta upe-py, he'i. ⁵—Upéixa ramo toho ave xe ndive pende ruvixa kwéry. Oī ramo Paulo rembiapo vaikwe, tomombe'u katu xe-vy upe-py, he'i judeu kwéry-pe.

⁶Upéi opyta indive kwéry petēi semana, mokōi semanarāgwe-rupi. Upe rire oho jevy Cesaréia tetā-my. Iko'ē-my oho ojogweroaty haty-py. Mburuvixa gwapy haty-py ogwapy. He'i ogweru hagwā Paulo-pe. ⁷Ou ramo, onhembo'y ijere-rehe judeu kwéry Jerusalém-gwi ou va'ekwe. Omombe'u hagwā hembiapokwe onhembo'y. Heta oī hembiaapo vaikwe mombe'uha ha hexahare katu ndogweruí. ⁸Omonbe'upa rire hesegwa, Paulo omombe'u ave ojehegwigwa:

—Judeu kwéry reko-rupi aiko joty. Nhandejáry róga kakwaa namongy'ái joty. Mburuvixagwasu César nhe'ē-rupi aiko joty ave, he'i ojehegwa omombe'u-vy.

⁹Ha upéi katu oporandu íxupe mburuvixagwasu Festo:

—Nderehoséi tipo Jerusalém-my xe oromonhe'ē hagwā. Upe-py oromonhe'ē-ta nde-rehe he'i va'ekwe-rehe, he'i íxupe.

Upe va'e he'i ombovy'a hagwā mo'ā judeu kwéry-pe.

¹⁰Ha Paulo katu he'i:

—Ndaha mo'ái, he'i. —Iporā katu xe monhe'ē a-py. A-py César rembigwái omonhe'ē haty-py. Iporā katu xe monhe'ē a-py voi ave, he'i. —Ha judeu kwéry-pe naxe rembiapo vaíry. Upéa ereikwaa voi. ¹¹Hembiaapo vai va'e jajuka va'e. Upéixa ramo xe rembiapo vai ramo, iporā ave hembiaapo vai va'e-rami xe juka, he'i. —Ha xe rembiapo vai e'ŷy ramo katu, avave ndikatúí xe me'ē judeu kwéry-pe, he'i. —Aipota xe monhe'ē mburuvixagwasu César, he'i mburuvixa Festo-pe.

¹² Upe ramo mburuvixa onhomongeta oirũ ndive oikwaa hagwã hembiaporã. Oikwaa ramo, he'i:

—“Aipota xe monhe'ẽ mburuvixagwasu César” ere kuri xe-vy. Néi, oromondo-ta César renda-py, he'i íxupe mburuvixa.

Mburuvixagwasu Agripa ohenduse Paulo nhe'ẽ

¹³ Upe rire ndahetái áry rire outro mburuvixagwasu héry va'e Agripa ogwahẽ ou-vy Cesaréia tetã-my. Indive ou ave heindyry héry va'e Berenice. Ou ohexa mburuvixa Festo-pe. Ogwahẽ ramo va'e-pe ohexa. ¹⁴ Upe-py opyta are. Upéa-gwi omombe'u íxupe Paulo rehegwa nhe'ẽ:

—A-py oĩ kwimba'e ojeheja va'ekwe preso, he'i. —Osẽ ramo Félix oheja íxupe va'ekwe preso. ¹⁵ Xe aime ramo Jerusalém-my ou xe renda-py pa'i ruvixa kwéry, judeu ruvixa kwéry ave. Ou omombe'u hesegwa: “Ejuka katu íxupe” he'i xe-vy.

¹⁶ —Upe ramo ha'e judeu kwéry-pe: “Ore katu romano kwéry va'e a-rami ndorojapóiry va'e voi. Onhombováke e'ỹ reheve hembiapokwe mombe'uha ndive, avave-pe ndorog-werekói va'e katu ore orojuka hagwã-rami voi. Oromonhe'ẽ e'ỹ reheve, omombe'u e'ỹ reheve ojehegwa nhe'ẽ, ndorojukáiry. Oroikwaa porã hembiapokwe rire ae, hembiaapo vai tee rei ramo ae, orojuka va'erã” ha'e judeu kwéry-pe, he'i omombe'u-vy.

¹⁷ —Ha upéi katu ko'a-py onhomboaty hikwái. Upéa-gwi ko'ẽmba-ma ramo pya'e agwapy mburuvixa gwapy haty-py. Preso onhemoingo va'e ha'e-ma ogweru hagwã. ¹⁸ Xe nhe'ẽ-py ou. Upéi onhembo'y hikwái hembiapokwe mombe'uharã: “Paulo ko hembiaapo vai eterei ra'e” he'i mo'ã hese. Ha ha'e katu nahembiaapo vaíry ra'e. ¹⁹ Ha gwí judeu kwéry ndojohu porái ra'e inhe'ẽ: “Paulo ko omombe'u ramo nhane ramói nhe'ẽgwe, nomombe'u porái myamyrí Moisés omombe'u hagwe-rami” he'i hese. Ha Paulo ohendu ramo inhe'ẽ: “Ndaha'éiry upéixa” he'i hese hikwái. Ha ha'e kwéry ndojohu porái ra'e ave Hesu rehegwa nhe'ẽ hikwái. “Hesu ko omano va'ekwe” he'i judeu kwéry. Ha Paulo katu he'i: “Hesu oikove jevy-ma” he'i. Upéixa onhonhe'ẽ mbojevvy jevy ramo, ndikatuvéi ombohory onhonhe'ẽ.

²⁰ —Upéixa onhe'ẽ ramo hikwái, ndaikwaavéi-ma xe nhe'ërã ha'e va'erã íxupe kwéry. Upéa-gwi: “Nderehoséi Jerusalém-my?” ha'e aporandu-vy íxupe. “Upe-py hemimombe'ukwe-rehe aporandu-ta nde-vy” ha'e íxupe. ²¹ “Ndahaséi” he'i xe-vy. “Ndaha mo'ái upe-py” he'i. “A-py apyta-ta vyteri preso. Enhangareko katu xe-rehe a-py. Mburuvixagwasu héry va'e César ndive anhe'ẽse. Aipota xe monhe'ẽ César. Aha'arõ-ta íxupe xe monhe'ẽ hagwã” he'i xe-vy. Upéixa ramo aha'arõ herahaharã araha uka hagwã César renda-py: “Epyta vyteri preso” ha'e íxupe. “Ogwahẽ ramo nde rerahaharã, oromondo-ta” ha'e íxupe, he'i Agripa-pe mburuvixa Festo.

²² Ha upéi katu Agripa ohenduse Paulo nhe'ẽ:

—Ahenduse inhe'ẽ, he'i Festo-pe.

—Néi, ko'ẽ ramo erehendu-ta, he'i íxupe.

Mburuvixagwasu Festo he'i ogwenogwahẽ hagwã heru-vy Paulo

²³ Ha upéi katu ko'ẽmba-ma ramo ogwahẽ jevy ou-vy Agripa heindyry ndive. Hemi-monde porã reheve, gwembigwái kwéry pa'ũ-my ogwahẽ ou-vy. Oike ojogweroaty haty va'e koty-py coronel kwéry ndive. Upe tetã mygwa ruvixa ndive ave oike. Upe ramo Festo he'i ogwenogwahẽ hagwã heru-vy Paulo. Inhe'ẽ-py ogwahẽ ou-vy. ²⁴ Upe-ma ramo he'i Festo mburuvixa Agripa-pe:

—Erepara katu ko ou va'e-rehe, he'i. —Peẽ pegwahẽ ramo va'e pehexa katu ave. Ko kwimba'e-rehe judeu kwéry ou meme va'e xe-vy inhe'ẽgwe apo-vy. Ojerure rure va'e xe-vy ajuka hagwã íxupe. “Naiporái oikove joty” he'i xe-vy hatã hatã onhe'ẽ-vy enterováe judeu kwéry va'e gwíve, Jerusalém pygwa, a pygwa ave.

²⁵ —Ha ndikatúiry xe ajuka rei íxupe. Ndajohúí hembiaapo vaikwe. Ndajohúiry-gwi hembiaapo vaikwe, ndikatúí ajuka rei íxupe, he'i. —Upéixa ramo: “Xe aipota xe monhe'ẽ mburuvixagwasu César” he'i ramo xe-vy, “Néi, oromondo-ta” ha'e íxupe, he'i omombe'u-vy. ²⁶⁻²⁷ —Ha ndaipóri xe amói va'erã kwatia-rehe hembiapokwe. Ndajohúiry voi hembiaapo

vaikwe. “Naiporāi nhamondo César renda-py preso oĩ va'e nhamoĩ e'ỹ reheve kwatia-rehe hembiaipo vaikwe” ha'e xejeupe. Upéa-gwi aruruka kuri nde rovagwy-py, Agripa. Pene renonde-py ave aruruka nhamonhe'ẽ ranhe hagwã íxupe, he'i. —Upe rire, nhaporandu rire ae, jareko-ma va'erã kwatia-rehe nhamoĩ va'erã, he'i íxupe kwéry Festo.

26

“Amombe'u-ta xejehegwigwa nhe'ẽ” he'i Paulo Agripa-pe

¹Ha upéi katu he'i Paulo-pe mburuvixagwasu héry va'e Agripa:

—Áy eremombe'use ramo, emombe'u katu ore-vy ndejehegwigwa nhe'ẽ, he'i íxupe.

Aipo he'i-ma ramo, omopu'ã Paulo opo íxupe omboete-vy omombe'u hagwã. No'ã-rami he'i ha'e omombe'u-vy:

²—Xe avy'a aiko-vy, xe ruvixa Agripa. Heta omombe'u mbe'u mo'ã xe rehegwa nhe'ẽ judeu kwéry. Xe renohẽ vaise mo'ã xe-rehe ijapu-gwi. Ha etería nde xe monhe'ẽ-ta. Amombe'u-ta xejehegwigwa nhe'ẽ, he'i. —Xe monhe'ẽ ramo, ereikwaa porã-ta xe-rehe ijapu reiha. Upéa-gwi xe avy'a. ³Ha nde ereikwaa porã katu judeu kwéry rekoha gwive. Ndogweroviái oronhonhe'ẽha ereikwaa porã ave. Upe va'e nhe'ẽ ereikwaa porã-gwi xe avy'a. Ajerure nde-vy erejeapysaka porã hagwã xe nhe'ẽ-rehe, he'i mburuvixagwasu-pe.

⁴—Xe mitã ramogware áy peve xe rekokwe oikwaa porãmba judeu kwéry gwive. Ni peteĩ ndoikwaa e'jiry. Xe mitã ramo aiko va'ekwe xe re'ýi kwéry pa'ũ-rupi. Upe-py Jerusalém-my aiko ave va'ekwe. ⁵Nhandejáry he'i va'ekwe gwive ahendu porãmba va'ekwe voi. Ndaipóri mba'e okanhy va'e xéhegwi. Fariseu kwéry ohendu porãve va'e outro judeu kwéry-gwi. Fariseu-rami aiko va'ekwe. Ahendupa porã ete. Are gware-ma voi oikwaa judeu kwéry xe rekokwe. “Upéixa voi Paulo rekoha” he'ise ramo, he'i arã xe-rehe.

⁶—Yma ete-ma ore ramói kwéry-pe he'i va'ekwe Nhandejáry: “Oikove jevy va'erã omano va'ekwe gwive” he'i. Upéa he'i va'ekwe arovia voi aiko-vy. ⁷Ogwerovia ave ore re'ýi kwéry gwive peteĩ teĩ tetã-rupi oiko va'e, doze tetã-rupi oiko va'e. Áry ramo, pyhare ave omboete Nhandejáry-pe hikwái. Oha'arõ arõ imboete-vy omoingove jevy hagwã Nhandejáry he'ýi kwéry omano va'ekwe. Xe aha'arõ ave oikove jevy hagwã. Upéixa ramo jepe: “Hembiaipo vai voi Paulo” he'i joty mo'ã xe-rehe gwí judeu kwéry. Ma'erã he'i joty upéixa xe-rehe hikwái? he'i mburuvixagwasu-pe.

⁸—“Nhandejáry nomoingove kwaái omano va'ekwe” ma'erã peje Nhandejáry-rehe upéixa? he'i upe pygwa-pe.

⁹Upéi he'i jevy mburuvixagwasu-pe:

—Yma va'ekwe heta xe ambohassa asy Hesu Nazaré pygwa réry-py oiko va'e-pe. Heta nipo areko asy ra'e íxupe kwéry. Iporã mo'ã xejeupe, he'i. ¹⁰—Jerusalém tetã mygwa ambohassa asy voi va'ekwe. Pa'i ruvixa kwéry nhe'ẽ-py heta amoĩ preso va'ekwe gwí Hesu re'ýi kwéry-pe. Upe rire ojuka-ta ramo, arovy'a va'ekwe. Ajohu porã-gwi: “Tojuka katu” ha'e va'ekwe. ¹¹Areko asy asy va'ekwe íxupe kwéry. Ojeporahéi haty haty-rupi amoingo asy va'ekwe íxupe kwéry. Xe pu'aka hese areko asy-vy ojererova hagwã mo'ã Hesu-gwi. Xe poxy eterei voi. Xe poxy-gwi aha va'ekwe ipiári. Mombyry outro tetã-my aha va'ekwe, he'i.

¹²—Upéixa ramo agwata aha-vy Damasco tetã-my. Aha pa'i ruvixa réry-py. Inhe'ẽ-rupi aha. ¹³Áry mbyte-py oĩ jave kwarahy, xe ruvixa, agwata aha-vy. Agwata ramo tape-rupi, ahexa-ma áry-gwi hendy va'e, kwarahy rendy ramigwa. Hendy mbaraeteve va'e kwarahy-gwi. Hendy xe-rehe, xendive ogwata va'e-rehe ave hendy. ¹⁴Oro'apa-ma oroho-vy yvy-py. Upe-ma ramo ahendu onhe'ẽ va'e. Hebreu nhe'ẽ-py onhe'ẽ: “Saulo, Saulo” he'i, “Ma'erã xe mbohassa asy?” he'i onhe'ẽ-py. “Gwéi opy voi ramo, ogwerokwa ojekutu ave. Gwéi-rami erereko asy nde rekove. Ma'erã po nde erereko asy nde rekove? Nde poxy ramo xe-rehe, nde rekove ae erereko asy” he'i xe-vy onhe'ẽ va'e, he'i omombe'u-vy.

¹⁵—“Kiva'e nde, xe Járy” aporandu íxupe. “Xe ko Hesu” he'i xe-vy. “Xe ko nde a'e'ýha ave xe. Xe rereko asy va'e ave nde. ¹⁶Ha epu'ã katu, enhembo'y jevy. Ánga ete

ajehexa uka-ma nde-vy oromoĩ hagwã xe pytygwõharã. Aipota eremombe'u mbe'u xe-rehe erehexa va'e. Ajehexa uka jevy ramo nde-vy, erehexa va'erã aipota eremombe'u mbe'u. ¹⁷ Ororesende-ta heru-vy judeu kwéry-gwi. Ipo-gwi kwéry oroipe'a-ta heru-vy. Judeu e'ỹ va'e ave ororesende-ta ave íxugwi kwéry. Oromondo-ta judeu e'ỹ va'e kwéry-pe. ¹⁸ Oromondo-ta xe rehegwa nhe'ẽ eremombe'u mbe'u hagwã hi'arandu porã hagwã. Pytũ-my rei oiko va'e-pe oromondo-ta arakatu-py eremoingo hagwã. Oromondo-ta ereipe'a hagwã heru-vy anháy ruvixa Satanás-gwi, Nhandejáry ndive oiko porã-ma hagwã. Oromondo-ta ave xe-rehe ojerovia hagwã, omboyke hagwã Nhandejáry íxugwi kwéry hembiaipo vaikwe, ipy'a omopotĩ hagwã, xe irũ gwéry-pe omoirũ-ma hagwã oromondo-ta" he'i xe-vy Hesu ojehexa uka-vy, he'i omombe'u-vy.*

¹⁹—Upéa nhe'ẽ xe ahendu voi, xe ruvixa Agripa, he'i Paulo íxupe. —Xe moĩ inhe'ẽ mombe'uha ramo, ahendu voi inhe'ẽ. ²⁰ Amombe'u ranhe Damasco tetã mygwa-pe Nhandejáry nhe'ẽ. Upe rire ae amombe'u mbe'u Jerusalém tetã mygwa-pe. Judéia yvy rupigwa-pe gwive ave amombe'u mbe'u imosarambi-vy Nhandejáry nhe'ẽ. Amombe'u ave judeu e'ỹ va'e-pe: “Perova katu pende rekoha. Pejere katu Nhandejáry ha-koty ojehexa porã hagwã pene rembiapo porãha” ha'e imombe'u-vy judeu e'ỹ va'e-pe.*

²¹—Ha judeu kwéry katu xe juka-ta mo'ã ramo, xe pyhy. Xe aime ramo Nhandejáry róga kakwaa-py, xe pyhy. Judeu e'ỹ va'e-pe amombe'u-gwi, xe pyhy hikwái. ²² Are-ma ãy ete peve xe pytygwõ tygwõ Nhandejáry. Upéa-gwi ko'a-py anhemo'ỹ imombe'u-vy. Mburuvixa-pe, mburuvixa e'ỹ va'e-pe gwive amombe'u mbe'u. Moisés he'i va'ekwe oiko hagwã xe amombe'u va'e. Nhandejáry nhe'ẽ-py omombe'u va'ety he'i va'ekwe oiko hagwã xe amombe'u va'e ave. Nanhe'ẽ pyahúiry amombe'u. Yma gware nhe'ẽ mante amombe'u. ²³ Yma gware nhe'ẽ no'ã-rami: “Ohasa asy va'erã Cristo, Nhandejáry rembiporavo va'e. Upe rire ha'e katu ranhe oikove jevy va'erã. Upéa-gwi ha'e ranhe omombe'u va'erã arandu judeu kwéry-pe, judeu e'ỹ va'e-pe ave oikwaa hagwã omano va'ekwe oikove jevymaha” he'i. Upéa voi he'i va'ekwe yma gware nhe'ẽ, he'i mburuvixagwasu-pe Paulo imombe'u-vy.*

²⁴ Upéixa voi omombe'u ojehegwa nhe'ẽ. Omombe'u jave upéixa, Festo onhe'ẽ hatã íxupe:

—Nde tavy ra'e, Paulo, he'i. —Heta eterei eremonhe'ẽ-gwi kwatia, nde tavy-ma ra'e, he'i mo'ã íxupe.

²⁵ Ha'e katu he'i:

—Naháni, naxe tavýi voi katu, xe ruvixa Festo, he'i joty Paulo. —Anhetegwa meme amombe'u.

²⁶ Upéi he'i jevy mburuvixagwasu Agripa-pe:

—Ko va'e rehegwa Hesu rehegwa ereikwaa porã voi, xe ruvixa Agripa. Oiko ramo, nokanhýry ndéhegwi ni peteĩ ra'e. Erehendupa voi ra'e, he'i. —Nanhemýry-py oiko va'ekwe. Ereikwaapa voi nipo ra'e. Upéa-gwi natýry voi, he'i. —Anhembopy'agwasu anhe'ẽ hagwã nde-vy, xe ruvixa. ²⁷ Ma'erã ndereroviái Nhandejáry nhe'ẽ kwatia-rehe oĩ va'e? Ererovia nipo ra'e. Aikwaa voi ereroviaha, he'i mburuvixagwasu-pe.

²⁸ Upe-ma ramo he'i íxupe:

—Ereipota pya'e xe aiko Hesu reroviaha ramo. Ha ndaiko pya'e mo'ái, he'i.

²⁹ Upe ramo he'i mburuvixagwasu-pe:

—Áy erepytase ramo Hesu reroviaha va'e ramo, iporã. Are rire erepytase ramo, iporã ave va'erã. Tane mbojerovia katu ójehe Nhandejáry xe-rami ave, he'i. —Etería xe rendu va'e gwive tombojeroviapa katu ójehe Nhandejáry. Aipota erejerovia xe-rami ha ndaipotái erepyta ipokwaha reheve opyta va'e-rami, he'i Paulo mburuvixagwasu-pe.

“Naiporãĩ nhamoĩ preso” he'i Paulo-rehe

³⁰ Upe ramo mburuvixagwasu opu'ã onhembo'y. Opu'ã ave heindýry. Opu'ã ave Festo.

³¹ Indive ogwapy va'e opu'ã ave. Oho ha'e anho oĩ ha-py onhomongeta-vy:

* 26:18 At 9.1-19; 22.6-16 * 26:20 At 9.20-22,28-29 * 26:23 Is 42.6; 49.6

—Ko kwimba'e nahembiapo vaíry va'e nipo ra'e. Naiporái nhamoí preso, naiporái jajuka ave íxupe, he'i ojúpe.

³²Upéi mburuvixagwasu he'i Festo-pe:

—“Aipota xe monhe'ê César” he'i kuri nde-vy Paulo. Upe va'e nde'íry ramo ra'e, jaheja ará íxupe toho ra'e. Japoi jevy ará ra'e íxugwi, he'i Festo-pe mburuvixagwasu.

27

Paulo oho y-rupi ogwahê hagdã Roma tetã-my hikwái

¹Upe rire he'i mburuvixa kwéry:

—Jaha nhamondo íxupe Itália vyv-py, he'i Paulo-rehe.

Upe-ma ramo ome'ê capitão-pe héry va'e Júlio mburuvixagwasu rembigwái va'e, onhangareko hagdã hese. Oí va'e preso va'e ave oho hendive. Xe Lucas aha ave hendive. ²Upéixa ramo onnhemboyru oroho-vy kanoagwasu-py. Adramítio tetã mygwa-py onnhemboyru oroho-vy. Upe kanóa oho-tama Ásia vyv tetã retã-rupi. Ore moirũ ave Tessalônica tetã mygwa, héry va'e Aristarco, Macedônia vyv pygwa va'e. Ha upéi katu oroho-ma y-rupi. Ndorohói y mbyte-rupi. Hembe'y-rupi ae orohasa oroho-vy. ³Iko'ê-my orogwahê oroho-vy Sidon tetã-my. Orogwahê rire, he'i Paulo-pe ore capitão:

—Tereho katu erehexa hagdã ne irügwe-pe. Tome'ê nde-vy ne remi'urá, he'i íxupe ore capitão ogwereko porã hagdã.

Upéa-gwi oho ohexa oirügwe-pe.

⁴Upe rire orohasa jevy oroho-vy y-rupi. Henonde-gwi ou ramo yvytu, ojejapi japi kanoagwasu-rehe y. Upéa-gwi orogweroajere ykõi yvytu ete e'ý ha-rupi oroho. Upe va'e ykõi héry Chipre. ⁵Upe rire orohasa meme oroho-vy Cilícia vyv, Panfilia vyv ave orohasa. Upe rire orogwahê oroho-vy Mirra tetã-my, Lícia vyv pygwa. ⁶Upe-py ore capitão otopa kanoagwasu mombry oho va'ety, Alexandria tetã mygwa, Itália vyv-py oho va'erã. Upéixa ramo ore rerova upéa kanóa-py. Orosêmba ore rryru-gwi orova hagdã upéa kanóa-py.

⁷Upe rire oroho jevy y-rupi. Ndaheta áry jepéi mbegwe oroho. Hasy-py orogwahê Cnido rováí. Norogwahê jepéi. Ndohejáí orohove yvytu. Upéa-gwi ykõi orogweroajere oroho-vy. Yvytu ete e'ý ha-rupi oroho. Upe va'e ykõi héry Creta. Salmona ppy-rupi orohasa. ⁸Hasy-py hembe'y rehe oroho. Mbegwe mbegwe oroho orogwahê tetã-my héry Kanóa Opyta Porã Haty-py. Upe-gwi hi'agwí-ma oí tetã héry va'e Laséia.

⁹Upéixa ramo ore are-ma orogwahê hagdã upe-py. Nome'êi orohove hagdã. Judeu kwéry areteguasu ohasa-ma. Upéa jasy-rehe ama yvytu reheve. Upéa-gwi ore mytu'e'ý orohove hagdã. He'i Paulo:

¹⁰—Anive ereho teí, xe irũ. Erehove joty ramo, ojehu va'erã nhande-vy mba'e. Onhehundi va'erã voi randai kanóa. Hye py pygwa ave onhehundipa-ta randai ave. Nhanheapymi-ta randai ko nhande ave, he'i Paulo capitão-pe hendivegwa-pe ave.

¹¹Ha ore capitão katu nohendúí inhe'ê. “Jahave katu” he'i ramo kanóa ombogwataha kanóa járy ave, ohendu upe mokõi va'e nhe'ê. ¹²Ha Paulo nhe'ê katu nohendúí. Ha he'i hetave ohoseve va'e:

—A-py nome'êi japyta are, he'i. —Ama yvytu reheve eterei, he'i. —Jaha vyteve y-rupi ikatu hagdãixa jatopa yvytu e'ý ha-py, japyta are hagdã upe-py, ro'y jave japyta hagdã. Oiméne nhagwahê-tama Fenice tetã-my, kanóa opyta porã haty-py, Creta vyv pygwa. Upe-py ojapyraha yvytu. Ndo'ái hese. Kwarahy resê gwigwa ndo'ái yvytu, he'i hetave ohoseve va'e.

¹³Ha upéi katu yryete-gwi ou va'e yvytu. Yvytu porã ha-rupi rei nahatã etéi yvytu. Mbegwe nunga yvytu oí:

—Ome'ê-ma jaha vyteri, he'i ojúpe hikwái.

Upéixa ramo omboyru jevy heraha-vy inhapytiha kanóa-py oroho jevy hagdã y-rupi. Hembe'y-rehe ete orohasa oroho-vy. ¹⁴Ykõi rembe'y-rehe ete oroho. Ndoroho mombryí vyteri. Upe-ma ramo ou yvytugwasu. Kanóa-rehe ojejapi. Yvy ete-gwi ou va'e yvytu.

Upe vyvutugwasu héry Nordeste. ¹⁵ Ha kanóa ndogwatavéi-ma henonde-gwi ou-gwi vyvutu. Upéa-gwi orogwerova vyvutu rupive oho hagwā kanóa. ¹⁶ Oripara ore ryru ykōi'i yke-rehe. Upe-py ojapyraha vyvutu ore ári-rupi. Ykōi héry Clauda. Orohasa jave kanoagwasu ári orohupi kanoa'i. Hasy-py orohupi. ¹⁷ Upéi gwī imbogwataha kwéry omoī igwy-rupi ojokwa hagwā. Pono ojepe'a vyvura, kanóa rehegwa, omoī. Ikyhyje ave itaypa-gwi. Ikyhyje ojeka ramogwarā ikanóa itaypa-rupi. Itaypa héry Sirte. Upéa-gwi ombogwejpá lóna. Lóna kanóa rerahaha oipe'a kanóa ári-gwi. ¹⁸ Yvyvutugwasu ramo omoap̄y ap̄y kanóa-pe. Upéa-gwi iko'ě-my omombo y-py omboyru va'ekwe ivevuive hagwā kanóa. Ko'ě ko'ěmba omombo. Omombo ranhe y-py omboyru va'ekwe. ¹⁹ Iko'ě-my oipyhy opo-py omombo jevy hagwā y-py kanoagwasu rehegwa. ²⁰ Ou ramo marány vyvutugwasu reheve, ndopái vyvutugwasu. Are ndojekwaa voíry kwarahy jasytata ave. Upéixa ramo:

—Ndaiporivéi-ma nhane resendeharā, he'i joa ojóupe.

²¹ Are-ma ndokaruvéi ave. Upe-ma ramo oho Paulo kanóa pygwa oī ha-py. He'i íxupe kwéry:

—Ma'erā nerekendúí ra'e xe nhe'ě, xe irū kwéry? he'i. —Ma'erā peju joty kwehe ra'e Creta ykōi-gwi? Ndepejúí ramo ndojehúiry arā nhande-vy mba'e, he'i. —Nanhamombo reíry arā ra'e nhamboyru va'ekwe, he'i íxupe kwéry. ²² Aỹ penhembopy'agwapy joa katu. Ojere-ta kanoagwasu. Ha nhande kwéry katu ni peteí nanhanheapymi mo'áiry, he'i. ²³ Ko pyhare xe yke-rehe onhembo'y-ma kuri Tupā Nhandejáry rembigwái. Tupā Nhandejáry xe Járy voi. ²⁴ Amboete íxupe va'ety. “Ani ne mytu'e'ỹ, Paulo” he'i xe-vy. “Nerenheapymi mo'ái. Eregwahē-ta vvy ete-py erenhembo'y hagwā César rovagwy-py. Ha ne ndive oho va'e gwive katu aresendepa-ta ave” he'i kuri xe-vy, he'i omombe'u-vy.

²⁵ —Upéixa ramo penhembopy'agwapy katu peē, xe irū kwéry, he'i Paulo. —Ha'e he'i ha-rami oiko-ta. ²⁶ Xe arovía oikotaha he'i ha-rami. Ha omoanha-ta kanoagwasu nhande reheve vyvutugwasu. Peteí ykōi-koty omoanha-ta imondo-vy, he'i kanóa pygwa-pe gwive Paulo.

²⁷ Ha upéi katu oho rei kanóa. Ojererosyry uka oiko-vy y-pe. Ygwasu héry Ádria. Mokōi semana rire, pyhare mbyte-py, ojererosyry uka ramo:

—Nhogwahē-tama para'e vvy ete-py, he'i ojóupe imbogwataha kwéry. ²⁸ Upéa-gwi oikutu y rye py imbogwejy-vy oikwaa hagwā hypyha: Trinta e sete metro nipo ra'e, he'i oikwaa ramo. Oho vyteve. Otantea jevy hypyha: Vinte e oito metro nipo ra'e, he'i oikwaa jevy ramo.

²⁹ —Jaha vyteve ramo, oiméne ojejapi-ta ita-rehe kanóa, he'i ojóupe hikwái.

Upéa-gwi kanóa reví-gwi omombo y-py imbogwejy-vy irundy kanóa mombytaha. Oha'arō oiko-vy ko'ě. Ojapura ko'ěmba voi hagwā.

³⁰ Ha upéi katu imbogwataha kwéry okanhyse mo'ā kanoagwasu-gwi. Ombogwejy kanoa'i y-py:

—Oromombo-ta itī-gwi kanóa mombytaha, he'i mo'ā. ³¹ Okanhyse-vy ae ra'e. Upe-ma ramo Paulo he'i ore capitão-pe, soldado kwéry-pe ave:

—Ko va'e ndopytái ramo kanoagwasu-py, nanhane resende mo'áiry, he'i. —Nhamanomba-ta para'e, he'i capitão-pe. ³² Ohendu ramo inhe'ě, soldado kwéry omondohóy ikytí-vy opoi hagwā oho-vy y-rehe, ogwersyry hagwā heraha-vy kanoa'i-pe y. ³³ Hembipe jave ko'ě, he'i íxupe kwéry Paulo:

—Pekaru mani katu. Mokōi semana ne mytu'e'ỹ reheve ereiko ra'e, mba'eve ere'u e'ỹ reheve. ³⁴ Pekaru mani katu, pekaru mani katu, he'i. —Pekaru ramo, pene mbaraete jevy-ta. Ani erejapura teí, he'i. —Ni peteí va'e-pe ndojehu mo'ái mba'eve nhande-vy, he'i íxupe kwéry Paulo.

³⁵ He'i rire oipyhy mbojape omboete Nhandejáry-pe. Enterove pa'ū-my otima porā. Ombopóy-ma hí'u-vy. ³⁶ Ohexa okaru ramo ipy'agwapy-ma hikwái. Ipy'agwapyra rire, okaru ave. ³⁷ Ha ore kwéry, kanóa pygwa gwive ko duzentos e setenta e seis. ³⁸ Okaru porā rire, omombo y-py gwembyre kwéry trigo omboveví porāve hagwā kanoagwasu.

³⁹Ko'ëmba-ma ramo ndoikwaái yvy. Ohexa hembey-py yugwa porã. Upe-py ndaipoxýi y. Hembey-rehe oĩ yvyku'i morotĩ:

—Jaha katu upe-py. Nhatantea. Jaha-ta para'e upe-py, he'i ojõupe hikwái.

⁴⁰Upéa-rehe nomboyruvéi inhapytĩha. Oheja y-py oho-vy. Upéi ojora isã kanóa mbogwata porãha ojokwa va'ekwe. Upéi itĩ arigwa lóna omoĩ jevy yvyra-rehe kanóa tĩ ári yvytu omoanha hagwã heraha-vy yvy ete-py. ⁴¹Ha ogweraha itaypa-rupi kanóa-pe yvytugwasu. Ndaysyry jójái-gwi itakuruvi ári oho opyta kanóa tĩ. Ndogwatavéi. Ha kanóa revy-rehe katu ojejapi japi y. Upéixa ramo ojoka voi kanóa-pe y.

He'i soldado kwéry:

⁴²—Preso oĩ va'e gwive ranhe jajukapa, he'i. —Pono o'yta okanhy oje'ói-vy, he'i. —Okanhy e'y reheve jajuka mani, he'i ojõupe soldado kwéry.

⁴³Ha ore capitão ndohejái ojuka. Oresendese íxupe, Paulo-pe. Upéa-gwi ndohejái ojuka. He'i ore capitão:

—Pepo ranhe katu y-py. He'yta ranhe katu eresẽ hagwã yvy ete-py, he'i o'yta kwaa va'e-pe.

⁴⁴Ha o'yta kwaa e'y va'e-pe katu he'i:

—Tapeho katu, he'i. —Ejepyhy katu yvyra ojeka va'ekwe-rehe ereho-vy eresẽ hagwã. Kanóa ojeka va'ekwe pehẽgwe-rehe ejepyhy ereho-vy, he'i íxupe kwéry.

Ha upéixa ramo osẽ va'ekwe gwive yvy ete-py onheresendepa-ma voi hikwái.

28

Paulo ogwahẽ oho-vy Malta ykõi-my

¹Oronheresendepa rire, omombe'u ore-vy ykõi réry. Malta héry. ²Upéi oky-ma. Ama ramo ho'ysã eterei. Ha upe pygwa ore rereko porã-vy ou ohatapy ore-vy:

—Pegwahẽ katu. Orohatapy-ta peẽ-my, he'i ore-vy.

³Íxupe kwéry gwarã oho jape'a-rehe Paulo. Omboaty heru-vy omoĩ hagwã tata-py. Ijape'a pa'ũ-my ou mbói. Omoĩ tata-py. “Syryry” he'i osẽ-vy mbói. Opo-ma ipo apy-rehe mbói. Osagwygywu oĩ-vy ipo-rehe mbói. ⁴Ha upe pygwa ohexa ramo, he'i ojõupe:

—Upe va'e kwimba'e oporojuka nipo araka'e, he'i hese. —Ygwasu-gwi onheresende kuri. Ha mbói-gwi katu nonheresendevéi-ma. Tupã ojuka uka-tama mbói-py, he'i hese. —Hembiapo vai-gwi ndohejáiry oikove puku íxupe, he'i mo'ã hese hikwái.

⁵Ha'e ae katu ojéhegwi ombovava rei heity-vy mbói tata-py. Mba'eve ndojehúiry íxupe.

⁶Ha ha'e kwéry katu ohexa katu katu íxupe: “Irirupa-ta ipo” he'i mo'ã ojõupe. “Ho'a-tama hetekwe” he'i mo'ã ojõupe. Ohexa katu katu are rire íxupe:

—Mba'eve teĩ ndojehúĩ ra'e íxupe. Ndaipu'akái hese ra'e mbói rãĩ. Tupã voi ra'e upéa, he'i jevy mo'ã hese.

⁷Pepete oĩ ykõi mygwa ruvixa yvy. Huvixa héry Públio. Upe va'e ore rereko porã ore mogwahẽ-vy. Mbohapy áry ore mongaru porã ojave. ⁸Ha mburuvixa ru oime hasy. Nopu'ávái voi. Gwupa-py voi oĩ. Gwe rasy-gwi heteraku. Ha Paulo oho ohexa hasy va'e ha-py. Omondo mondo Nhandejáry-pe onhe'ẽ okwera hagwã. Upéi omoĩ hete ári opo ombogwera hasy va'e-pe. ⁹Upéi ojekwaa-ma herakwã. Upéa-gwi ykõi mygwa, hasy va'e gwive ou iha-py. Ha ha'e ombogwerapa-ma. ¹⁰⁻¹¹Heta ore mboete ore rexakwaa kwaa rei-vy hikwái. Oroikotevẽ-ma ramo ome'ẽ me'ẽ ore-vy.

Paulo ogwahẽ oho-vy Roma tetã-my

Mbohapy jasy rire orohopa jevy-ta y-rupi. Oroho jevy-tama ramo, omboyru kanoagwasu ohekoviã va'ekwe-py ore rembiporurã va'e gwive. Upe kanoagwasu opyta va'ekwe upe-py ho'a ramo ro'y. Ro'ypa rire, ykõi-my orogwahẽ va'ekwe gwive orohopa jevy. Upe kanóa Alexandria tetã mygwa. Hi'ári oĩ mokõi ta'anga, tyv'yry mokõi va'e. Oroike jevy oroho-vy kanoagwasu-py.

¹²Orogwahẽ oroho-vy outro tetã-my héry va'e Siracusa. Upe-py oropyta mbohapy áry. Upe rire oroho jevy y-rupi. ¹³Yry akwã akwã-rupi oroho. Orogwahẽ oroho-vy Régio tetã-my. Peteĩ áry-py ndajerekwái yvytu. Iko'ẽ-my ore rapykwe-gwi ae ou yvytu. Ou-ma

ramo yvytu katu oroho jevy-ma y-rupi. Iko'ë-my orogwahê oroho-vy outro tetã-my héry Potéoli. Upe-py orosêmba kanóa-gwi orogwata oroho-vy yvy ete-rupi. ¹⁴Upe-py orojotopa Hesu nhe'ê renduha ndive.

—Pepyta ranhe a-py, he'i ore-vy.

Upéixa ramo peteĩ semana oroiko upe-py. Upe rire oroho jevy. Orogwata oroho-vy Roma tetã-koty.

¹⁵ Ha Hesu nhe'ê renduha Roma pygwa va'e ohendu-ma ramo ore rerakwã, ou ore rogwaitĩ. Ou voi ore rape ra'arôha ore rogwaitĩ-vy. Oĩ ou va'e ore rape ra'arôha Praça de Ápio-py. Oĩ ave ou va'e Três Vendas peve. Orohogwaitĩ-ma ore rape ra'arôha-pe. Ha Paulo ohexa ramo:

—Atima porã nde-vy, xe Járý, he'i imboete-vy. Ipy'agwapy jevy-ma.

¹⁶ Upe rire oroike oroho-vy Roma tetãgwasu-py. Upe-py preso rerekoha e'ÿ-rami ogwerek Paulo-pe ore capitão. Oiko hóga pygwa-rami. Peteĩ soldado mante oiko hendive.

¹⁷ Mbohapy áry rire, ombovia uka upe pygwa judeu ruvixa va'e onhomoaty hagwã hese. Onhomoaty rire he'i íxupe kwéry:

—Naxe rembiapo vaíry va'ekwe, xe re'ÿi kwéry, he'i Paulo. —Ndajapo vaíry va'ekwe nhande re'ÿi kwéry-rehe. Judeu amyri reko-rupi aiko meme va'ekwe. Ndajapo vaíry jepe xe moĩ rei preso joty. Jerusalém tetã-my xe moĩ preso. Upe rire xe me'ê va'ekwe romano kwéry-pe. ¹⁸ Ha romano kwéry xe monhe'ê rire hikwái: “Ndaipóri hembiaapo vaikwe” he'i xe-rehe. “Upéixa ramo naiporãi jajuka íxupe. Japoi íxugwi toho” he'i xe-rehe hikwái. ¹⁹ Ha judeu kwéry katu ndojohu porãi upe va'e nhe'ê: “Ani erepoi íxugwi. Ejuka ranhe katu” he'i va'ekwe xe-rehe. Upéixa he'i-ma ramo, ha'e-ma xe mburuvixa-pe: “Aipota xe monhe'ê mburuvixagwasu César” ha'e mburuvixa-pe, he'i omombe'u-vy. —Ha namombe'u mo'ãi mburuvixagwasu-pe judeu kwéry hembiaapo vaikwe. Xejehegwa mante amombe'u-ta, he'i.

²⁰ —Ha ko'anga katu amombe'u-ta peẽ-my Nhandejáry nhe'ê. Yma va'ekwe nhane ramói kwéry-pe he'i va'ekwe Nhandejáry. “Oikove jevy va'erã omano va'ekwe gwive” he'i va'ekwe, he'i. —Upéa he'i va'ekwe ogweroivia va'ekwe hikwái. Ha xe arovia ave. Upéa nhe'ê arovia-gwi, xe pokwaha-rehe xe rereko. Upéa-gwi xe apombovia uka kuri anhomongeta hagwã pene ndive, he'i ou va'ekwe-pe.

²¹ Upe rire he'i íxupe ou va'e:

—Nogwahêi vyteri ore-vy nde rehegwa kwatia nhe'ê. Judéia yvy-gwi ndouĩ vyteri. Nhande re'ÿi kwéry ko'a-py ou va'e nane mombe'úiry. Nomombe'u vaíry nde rehegwa.

²² Ha gwĩ opa-rupi oiko va'e onhe'ê vai vai Hesu nhe'ê-rehe. Upéa oroikwaa. Upéa-gwi orohenduse voi ndehewigwa, he'i. —Mba'eixagwa ne nhe'ê pa orohenduse ndéhegwi, he'i íxupe judeu kwéry. ²³ Ha upéi katu omopeteĩ áry ou jevy hagwã hikwái.

Upe áry-py ou jevy henda-py. Hóga-py ou heta eterei. Pyharevete ka'aru ete peve oikwaa uka íxupe kwéry Hesu rehegwa nhe'ê. He'i íxupe kwéry:

—Anhetegwa voi Nhandejáry nhande ruvixarã rehegwa nhe'ê. Anhetegwa voi Hesu rehegwa nhe'ê, he'i ogweroivia uka etese-vy. —Hesu renonde rupigwa ndajapúĩ voi. Upéixa he'i va'ekwe myamyri Moisés, Nhandejáry nhe'ê-py omombe'u va'ety kwéry ave, he'i omombe'u-vy ou va'ekwe-pe.

²⁴ Ohendu ramo inhe'ê, oĩ ogweroivia va'e, oĩ ndogweroiviái va'e ave. ²⁵ Upéixa ramo oje'oipa jevy-ma hikwái. Onhonhe'ê mbojevý jevy oje'ói-vy. Oje'ói e'ÿ mboyye omombe'u íxupe kwéry Nhandejáry nhe'ê-py omombe'u va'ety he'i va'ekwe. Héry va'e Isaías.

—Ndojavýi nipo ra'e onhe'ê Nhe'ê Marangatu tee va'e ome'ê-vy Isaías-pe inhe'êrã. Pene ramói amyri kwéry pegwarã ome'ê íxupe. Anhetegwa voi ra'e onhe'ê omombe'u. A-rami he'i va'ekwe Isaías:

²⁶ “Tereho katu judeu kwéry renda-py. A-rami emombe'u ko va'e nhe'ê: Erehendu-ta voi ha erehendu va'e ndopytáiry va'erã nde apysa-py. Erehexa-ta voi ha erehexa va'e ndereikwáairy va'erã. Aipo-rami ere kuri íxupe kwéry. ²⁷ Nainhakã porávêi-ma

judeu kwéry. Ohendu e'ỹ va'e-rami ohendu. Ohexa e'ỹ va'e-rami ave, ohexa. Upéa-gwi ndohexaséi voi, nohenduséi voi. Ndopytáiry ipy'a-py hemiendukwe hi'arandu porã hagwã. Ndogwerovaséi gweko Nhandejáry omopotĩ hagwã ipy'a iky'a va'e"* he'i va'ekwe Isaías judeu kwéry-rehe, he'i Paulo imombe'u-vy.²⁸—Pejeapysaka porã katu ko va'e nhe'ẽ-rehe. Are-ma ne'írã joty omosarambi ranhe. Kwehe nomosarambíry judeu e'ỹ va'e-pe. Judeu kwéry-pe mante omosarambi. ãy ae omosarambi-ta Nhandejáry íxupe kwéry judeu e'ỹ va'e-pe nhane resendeharã rehegwa nhe'ẽ. Ohendu va'erã voíte hikwái, he'i ou va'ekwe-pe Paulo.

²⁹ Ohendu ramo inhe'ẽ, oje'oipa judeu kwéry. Onhonhe'ẽ mbojevvy jevvy oje'ói-vy.³⁰ Ha ha'e katu opyta upe-py. Oiko mokõi ro'y opaga-vy ójehe. Oiporu hagwe-py joty oiko. Ou va'e-pe gwive omogwahẽ meme: “Nhagwahẽ katu jagwapy” he'i meme.

³¹ Omombe'u mbe'u Nhandejáry nhande ruvixarã rehegwa nhe'ẽ. Hesu Cristo rehegwa nhe'ẽ-py oporombo'e mbo'e. Ndaipóri ojoko va'erã íxupe. Notĩry imombe'u-vy.

* 28:27 Is 6.9-10

Roma tetã mygwa pegwarã

epistola de Paulo aos romanos

¹(v1,7) Nhandejáry rembiayhu peiko va'e, hemienói he'yirã, Roma tetã-my peiko va'e. Xe Paulo amondo-ta peẽ-my xe nhe'ẽ. Tapende rovasa katu Nhandejáry, Nhande Ru va'e pende rexakwaa rei-vy. Tapende rexakwaa katu Nhandejáry Hesu Cristo ave. Tapene mbopy'agwapy katu ave. Xe Paulo Hesu Cristo rembigwái voi. Ha Nhandejáry xe renói va'ekwe gwemimondorã. Inhe'ẽ porã mombe'uharã xe poravo va'ekwe. ²⁻⁴Yma va'ekwe Nhandejáry omombe'u nhe'ẽ porã. Hesu ne'írã ojekwaa ramo va'ekwe, hesegwa nhe'ẽ porã omombe'u-ma. Inhe'ẽ-py omombe'u va'ety-pe omombe'u. Ohai uka íxupe kwéry kwatia marangatu-rehe omoí hagwã inhe'ẽ porã. Kwatia nhe'ẽ-py omombe'u Nhandejáry ra'y rekorã. Ha'e Nhandejáry Hesu Cristo voi. Upéi ogwejy ou-vy ko yvy-rehe oiko-ma hagwã kwimba'e ramo. Myamyri Davi remiarirõ voi upéa. Ha upéa ojejuka rire oikove jevy va'erã voi, ojekwaa hagwã hese Nhandejáry ra'y teeha hese, inhe'ẽ marangatu-gwi enterove va'e-rehe ipu'akaha ojehexa uka hagwã hese. ⁵Ha'e katu xe rexakwaa rei va'ekwe. Xe moí va'ekwe gwemimondorã xe arovia uka hagwã inhe'ẽ entéro tetã tetã mygwa kente kwéry-pe. Ha'e oipota gwéry-py enterove va'e omboete íxupe. ⁶Ha peẽ ave Roma-py peiko va'e, Nhandejáry pende pe'a Hesu Cristo re'yirã. ⁷(-)

Paulo otima porã Nhandejáry-pe Roma tetã mygwa-rehe

⁸Ko'ánga atima porã ranhe-ta Nhandejáry-pe pende-rehe kwéry. Hesu Cristo réry-py atima porã-ta. Nhandejáry perovia tee-magwi peiko-vy, pene rerakwã porã opa-rupi oho. Upéa-gwi atima porã Nhandejáry-pe. ⁹⁻¹⁰Oração ajapo jave, xe mandu'a meme pende-rehe. Oikwaa Nhandejáry xe mandu'a ndu'aha pende-rehe. Oikwaa xe apu e'yha voi xe. Xe py'a ete gwive amba'apo va'e íxupe, ta'yry Hesu Cristo rehegwa nhe'ẽ porã amombe'u-vy. Are-ma ahase mo'ã pende ha-py. Ajerure rure Nhandejáry-pe áy aha hagwã apopohu. Xe aha va'erã ha'e oipotaha áry-py aha va'erã. ¹¹Apohehexe eterei amombe'u hagwã peẽ-my Nhe'ẽ Marangatu tee va'e remime'ẽgwe rehegwa nhe'ẽ pejehesa rerova e'y hagwã Hesu-gwi, perovia porãve ráve hagwã íxupe. ¹²Upéixa ramo nhandehopytygwõ va'erã. Xe arovia teeha xe-rehe pehexa kwaa ramo, perovy'a va'erã. Ha perovia teeha pende-rehe ahexa kwaa ramo katu, arovy'a ave va'erã.

¹³Ahase rei aiko-vy, xe re'yí kwéry, apopohu-vy. Ha xe jokoha katu ndohējáiry aha. Nhande kwéry e'y va'e, judeu e'y va'e outro tetã tetã-rupi oiko va'e-pe namombe'u reíry hagwe-rami, peẽ aipota katu pehendú ave nhe'ẽ porã. ¹⁴Xe areko amombe'u va'erã voi. Tekotevẽ amombe'u voi Hesu Cristo rehegwa nhe'ẽ porã enterovéa-pe. Aha-ta katu amombe'u karai-pe, karai e'y-pe ave. Aha-ta katu amombe'u imbo'epyre va'e-pe, imbo'epyre e'y va'e-pe ave. ¹⁵Upéixa ramo amombe'uséte voi peẽ-my hesegwa nhe'ẽ porã Roma-py peiko va'e-pe.

Nainhe'ẽ reíry va'e Nhandejáry. Nhane resende kwaa voi

¹⁶Xe natíry Hesu rehegwa nhe'ẽ porã amombe'u-vy. Xe arovia voi inhe'ẽ. Xe natíry voi hesegwa amombe'u hagwã. Nainhe'ẽ reíry va'e Nhandejáry. Onhe'ẽ roroviahá gwive oresende kwaa va'erã íxupe Nhandejáry. Nhande kwéry, judeu va'e-pe oresendese ranhe. Upéi oresendese ave nhande kwéry e'y va'e-pe, judeu e'y va'e-pe. Upéa-gwi xe natíry voi, nhe'ẽ porã mombe'u-vy.* ¹⁷Upéa nhande ramo, oikwaa uka nhande-vy Nhandejáry mba'éixa pa nhane mopoti. Jarovia-ma ramo íxupe, omopotí nhande py'a. Nhane rembiapo porã-rehe rei nhande mopoti. Jarovia-gwi íxupe ae nhane mopoti.

“Ogwerovia-gwi íxupe, Nhandejáry remimopotí oikove va'erã Nhandejáry ndive.”*
Upéixa voi he'i Nhandejáry kwatia nhe'ẽ.

* 1:16 2 Tm 1.8-9 * 1:17 Hc 2.4

Ndoikóiry ko yvy-rupi ipy'a ky'a e'ý va'e

¹⁸Ha upéi katu Nhandejáry oikwaa uka-ma oiko-vy gwembiaporã. Ogwereco asy va'erã gwí ojúpe omboete e'ý va'e-pe gwive. Hembiaipo vai va'e-pe gwive ogwereco asy va'erã. Hembiaipo vai meme-gwi, Nhandejáry ndohejái ojekwaa hese anhetegwa va'e rekoha. ¹⁹Ha Nhandejáry rekoha opa-rupi ojekwaa porã yvypóry-pe. Oikwaa uka íxupe kwéry gwekoha porã. Ha ndoikwaaséi-gwi íxupe ogwereco asy joty va'erã íxupe kwéry. ²⁰Yma va'ekwe omoingo ko yvy Nhandejáry. Ha upe rire katu Nhandejáry rexa e'ý ramo jepe, gwí yma gware ohexa kwaa joty hese hekoha: “Opa e'ý reheve ipu'akaha va'e nipo ra'e” he'i hese. “Heko marangatu va'e voi nipo ra'e” he'i Nhandejáry-rehe hikwái. Nhandejáry rembiapokwe rexa-vy ohexa kwaa porã tee voi hese. Oikwaa tei jepe, ndojapóiry heko-rupi. Upéa-gwi ndikatúiry he'i “Xe ndaikwaáiry íxupe. Xe ndaheko kwaáiry vyteri íxupe. Ndaheko kwaái-gwi, ajapose va'e rei-ma xe ajapo” ndikatúiry he'i. Ohexa kwaa voi hekoha. Oikwaa tei jepe ndojapóiry heko-rupi. ²¹Nhandejáry-pe oikwaa ramo jepe: “Nde ko Nhandejáry voi ra'e” nde'íry joty íxupe. Nomboeteséi íxupe, notima porã íxupe. Nomboeteséi-gwi íxupe, onhembotavy-ma oiko-vy hikwái. Opy'apy-py onhe'ẽ rei rei oiko-vy. Nahi'arandú-gwi pytú-my rei oiko va'e-rami oiko hikwái. ²²“Ore ore arandu voi” he'i mo'ã ójehe kwéry. Ha nahi'arandúiry voi hikwái. ²³Nomboeteséi-ma Nhandejáry omano e'ý va'e-pe. Hekovia omboete ta'anga anga Nhandejáry e'ý va'e-pe rei. Omboete e'ý va'erãgwe-pe katu omboete hikwái. Teko rei-pe ae omonhandejáry imboete-vy. Omboete gwyra ra'anga-pe, víxu ra'anga-pe ave. Gwe-rehe oiko va'e ra'anga-pe ave omboete hikwái.

²⁴Nahi'aranduvéi-magwi, ta-pe porã e'ý-rupi Nhandejáry oheja íxupe kwéry oho: “Tojapo katu oiko-vy ha'e ae gwembiapo” he'i hese kwéry. “Gweko ky'a-rupi ae toiko katu” he'i hese. Oheja íxupe kwéry oho onhomongy'a hagwã-rupi, otí kwaa e'ý reheve ae oiko hagwã. ²⁵Ombohekovia anhetegwa va'e Nhandejáry rehegwa. Ijapo va'e-pe katu ogwerovia. Nomboeteséi-ma nhane moingohare-pe. Hekovia ombotuvixa mba'e Nhandejáry rembiapokwe imboete-vy. Íxupe ae katu nomboete teéiry. Ha'e ae katu tonhembote opa e'ý reheve. Amém.

²⁶Nomboetéi-gwi íxupe, oheja íxupe kwéry Nhandejáry tape vai-rupi oho hagwã. “Toiko otí kwaa e'ý reheve” he'i hese kwéry. Upéixa kunha notívéi-ma. Ohasa verei-ma oiko-vy tekoha. Teko ky'a-rupi oiko. ²⁷Ha kwimba'e ave ohasa verei-ma ave oiko-vy tekoha. Nonhenotí kwaavéi-ma oiko-vy. Upéa-gwi omoingo íxupe kwéry tape vai-rupi Nhandejáry hembiaipo apokwe-rehe hereko-vy.

²⁸Upéixa ramo anhetegwa va'e Nhandejáry rehegwa ndoikwaasevéi. Upéa-gwi omoakã vai íxupe kwéry Nhandejáry. Upéixa ramo ivai ramo jepe, ojohu porã joty hikwái: “Tohasa katu tekoha” he'i hese. Omohembiaipo vai joty íxupe kwéry. ²⁹Upéa-gwi opaixagwa ojapo. Hembiaipo vai, opamba'e rei oipota ojúpe gwarã, ipy'a vai. Gwapixa oiko porãha ave ndojohu porã. Ha ha'e kwéry oporojuka, onhorairõ, oporombotavy ave. Gwapixa-pe ndohayhú. Onhe'ẽ rei rei oiko-vy ojóehe. ³⁰Onhogwenohẽ vai vai rei ave. Ndaija'éiry Nhandejáry-rehe. Nonhombotéiry-gwi onhe'égwasu gwasu rei ojóehe. Onhembotuvixaseve mo'ã hikwái. “Xe tuvixa mba'e, xe tuvixa mba'e” he'i mo'ã oiko-vy ojóehe. Ha imandu'a ndu'a gwembiapo vairã-rehe ojapo vaive ive hagwã. Gwu nhe'ẽ-rehe opryú. Osy nhe'ẽ-rehe ave opryú. ³¹Hi'arandu e'ý va'e, hese ndojeroviái va'e. Gwe'ýi-pe ndohayhú, ndojohayhú va'e. He'i hagwe-rami ndojapói va'e. Ndoporoporiahuverekóiry ave. ³²Upeixagwa apoha “Momyry amondo va'erã íxupe xejéhegwi” he'i Nhandejáry kwatia nhe'ẽ. Ogwereco va'erã hembiaipo vaikwe-rami. Omano hagwã-py oho va'erã. Upéa oikwaa ramo jepe, ojaposéte katu oiko-vy. Ha outro kwéry katu upeixagwa ojapo va'e ogwerohory joty hembiaipo. “Iporã” he'i mo'ã joty hembiaipo vai rexa-vy.

¹Ma'erā po, xe re'yí, “Ne rembiapo vai-ma” peje rei pende rapixa-rehe? Nde rapixa rembiapo nderejohu porāi ramo jepe, ha'e-rami ave nde. Upéixa ramo ojekwaa nde-rehe nde rekoha vai. Upéa-gwi nhande kwéry ramo jepe, nhande kwéry e'y ramo jepe, “Xe ko xe py'a potí aiko-vy” ndikatúí ere ndéjehe.* ²Upeixagwa apoha-pe ogwereco va'erā Nhandejáry hembiaapo apokwe-rehe imoingo asy-vy. Oheko kwaapa voi Nhandejáry. ³Nde rapixa rembiapo nderejohu porāi va'e, ne rembiapo hembiaapo ramigwa voi ave. Ma'erā po, xe re'yí, “Nhandejáry ndaxe mbohasa asy mo'ai xe rembiapo apokwe-rehe” ere rei ndéjehe? ⁴Nrepenái para'e Nhandejáry rekoha-rehe. Ha'e nhande poriahuvereco reko va'e. Nanhane mbohasa asy pya'ei va'e nhane rembiapo vaikwe-rehe. Ipoxy rei rei e'y va'e ha'e. Hekoha porā-gwi, nrepenái para'e hese. Ha Nhandejáry oipota ererova nde rekoha. Upéa-gwi nde poriahuvereco reko oiko-vy ererova hagwā hese nde rekoha. Upe va'e peikwaa teí voi peiko-vy.* ⁵⁻⁶Ha peē katu pende apysa e'y va'e-rami joty peiko. Penhembopy'a ratā-gwi, napehenduséí voi inhe'ē. Pepyurū inhe'ē-rehe. Upéa-gwi Nhandejáry ojehexa uka jevyha áry-py, ogwereco asy va'erā yvypóry-pe. Hembiaapo apokwe-rami ojapo va'erā hese. Inhe'ē-rehe pepyrū-gwi, pene moingo asyve syve va'erā. Upe áry-py ojohu tee va'erā enterovéa-rehe hembiaapo apokwe.* ⁷Oí hembiaapo porā meme va'e. Oipota ojúpe omomba'egwasu Nhandejáry. Oipota ojúpe omboete. Onhemoingove ukase Nhandejáry-pe. Upe va'e-pe omoingove va'erā ondiva Nhandejáry opa e'y reheve. ⁸Ha hembiaapo porā e'y va'e katu ójehe anhóte oiko. Tekoharupi ndoikoséi-gwi, ojeheko rero va' va'e-rehe. Upe va'e-pe ogwereco asy va'erā voi Nhandejáry. ⁹Hembiaapo vai va'e-pe gwive omoingo asy va'erā Nhandejáry. Ombohasa asy ranhe va'erā nhande kwéry judeu va'e-pe. Upéi nhande kwéry e'y va'e judeu e'y va'e-pe ave omoingo asy va'erā. ¹⁰Ha hembiaapo porā va'e-pe gwive omomba'egwasu va'erā Nhandejáry. Omboete va'erā íxupe kwéry. Ombopy'agwapy va'erā ave. Ohovasa ranhe va'erā nhande kwéry va'e-pe. Upéi nhande kwéry e'y va'e-pe ave ohovasa va'erā. ¹¹Enterove va'e-pe peteixa ogwereco Nhandejáry. Judeu kwéry, judeu e'y kwéry ave hembiaapo apokwe-rehe peteixa ogwereco.*

¹²Ha nhande kwéry e'y va'e katu ndoikói myamyri Moisés remimombe'ukwe-rupi. Hemimombe'ukwe tekoha porā-rupi ndoikóiry. Ha'e ae gweko-rupi joty oiko. Moisés remimombe'ukwe-rupi ndoikói-gwi ojevavy. Ojevavy-gwi, oheja íxupe Nhandejáry. Ha nhande kwéry katu jaikose mo'ā Moisés remimombe'ukwe-rupi. Upe tekoha porā omombe'u va'ekwe nhande-vy teko porā-rupi jaiko hagwā. Ha jajejavy joty jaiko-vy ramo, Moisés nhe'égwe-rupi ndajajókoi ramo, ndojohu porāi nhane rembiapo Nhandejáry. ¹³Upe tekoha porā ohendu rei va'e-pe, “Nde py'a potí-ma nde” nde'íry va'erā íxupe Nhandejáry. Ohendu tee va'e-pe ae katu, “Nde py'a potí-ma nde” he'i va'erā íxupe Nhandejáry. ¹⁴Upe tekoha porā-rupi ndoikói nhande kwéry e'y va'e. Moisés nhe'égwe ndoikwaái voi. Ha oikwaa e'y ramo jepe, Nhandejáry remimbota-rupi joty oiko. Ojéhegwi rei vérami oikwaa hemimbota. ¹⁵Nhandejáry remimbota ojapo-gwi, oí vérami joty he'i va'e íxupe ipy'apy-py, oikwaa uka va'e íxupe. Hembiaapo porā ramo, oí vérami joty he'i va'e íxupe, “Iporā erejapo upe va'e” he'i va'e. Ha hembiaapo vai ramo katu, oí vérami joty íxupe, “Ne rembiapo vai-ma” he'i vérami joty voi ave íxupe. Ojéhegwi rei vérami oikwaa ra'e Nhandejáry remimbota.

¹⁶Upéixa ete oiko va'erā. Nhandejáry ojehexa uka jevyha áry-py oiko va'erā. Xe remimombe'ukwe-rami oiko va'erā. Upe áry-py enterovéa-pe omonhe'ē va'erā Nhandejáry hembiaapo apokwe-rehe. Inhe'ē-py Cristo omombe'u va'erā íxupe kwéry ipy'a-py onhemi oí va'e. “Iporā” he'i va'erā para'e, “Ivai” he'i va'erā para'e petéi teí-pe.

Moisés remimombe'ukwe tekoha porā-rupi ndajajoko porā teíry nhande kwéry

¹⁷Ha ko'ánga katu amondo-ta xe nhe'ē peē-my, xe re'yí kwéry. Nhande kwéry va'e-pema amonda-ta xe nhe'ē. “Xe ko judeu kwéry va'e” peje pendéjehe. Tekoha porā

* 2:1 Mt 7:1-2; Lc 6:37; Mt 6:14 * 2:4 Êx 34.6-7; 1 Pe 3:20 * 2:5-6 Sl 62.12; Mt 16.27; 1 Co 3.8; Ap 22.12 * 2:11 Dt 10.17; At 10.34-35

Moisés remimombe'ukwe perovia va'e. "Nhandejáry ko ore Jaryve voi" peje pendéjehe gwí nhande kwéry e'ý va'e-pe penhemboete uka reise-vy. "Ndaha'éiry pende Járy tee" peje íxupe onhomba'ejáry-rehe pepondera-vy. ¹⁸Nhandejáry remimbota peikwaa va'e voi. Upe tekoha porā-py pene mbo'e va'ekwe peikwaa porā hagwā jajapo va'erā, jajapo e'ý va'erā ave. ¹⁹"Xe ko gwaperā oikwaa e'ý va'e-pe ahexa uka va'e voi" peje rei pendéjehe. "Xe ko pytū-my rei oiko va'e-pe ahesape va'e voi" peje pendéjehe. ²⁰"Xe ko hi'arandu e'ý va'e-pe amo'arandu va'e. Oikwaa e'ý va'e-pe ahekombo'e va'e" peje pendéjehe. "Upe tekoha porā-rupi aiko-gwi, xe arandupa voi xe. Anhetegwa va'e gwive aikwaapa xe" peje rei mo'ā pendéjehe. ²¹Kente mbo'eháry voi nde. Ma'erā po ndapejéi ojóupe "Aníke eremonda tei" peje hagwā pende rapixa-pe penhemonhe'ē-vy. Aipo ramo, ma'erā nde voi gwí-rami ne monda? ²²"Aníke peiko tei nde rapixa rembireko ndive penhomongy'a-vy" peje penhemonhe'ē-vy. Aipo ramo, ma'erā nde voi ereiko nde rapixa rembireko ndive. Tupā kwéry ra'anga pejohu vai voi. "Aníke peike tei ha'e kwéry oí ha-py" peje ojóupe. Aipo ramo, ma'erā nde voi ereho upe-py pemonda hagwā. ²³"Nhandejáry remimombe'u ukakwe nhande rekoharā voi ore rekoha" peje mo'ā pendéjehe peponderase-vy ojóehe. Penhemboeteseve mo'ā. Aipo ramo ma'erā pemoti Nhandejáry-pe hemimombe'ukwe pejapo e'ý-vy?

²⁴"Nhandejáry rekoha vérami mo'ā pereko-gwi, xe re'ýi kwéry, nhande kwéry e'ý va'e nomboetéi Nhandejáry-pe. Onhe'ē rei rei hese"* he'i Nhandejáry kwatia nhe'ē.

²⁵Gwí Moisés remimombe'ukwe tekoha porā va'e gwive rendu-vy, peē kwéry penhepirekytí uka va'ekwe. Ha upe tekoha-rupi peiko e'ý ramo katu penhepirekytí uka rei araka'e. Penhepirekytí uka hagwe ndovaléi peē-my. ²⁶Ha nhande kwéry e'ý va'e, judeu e'ý va'e katu onhepirekytí uka e'ý va'e voi. Ha upe tekoha-rupi oiko-ma ramo, "Xe re'ýi e'ý ramo jepe, onhepirekytí uka e'ý ramo jepe, xe re'ýi tee-rami joty oiko" he'i va'erā Nhandejáry nhande kwéry e'ý va'e-rehe. ²⁷Aipo ramo, "Gwí nhande kwéry e'ý va'e hekoha porāve pendéhegwi" he'i va'erā Nhandejáry peē-my. Ha peē katu upe tekoha porā-rupi ndapeikói voi. Upe tekoha pende rehegwa nhe'ē kwatia-rehe onhemoi va'ekwe. Penhepirekytí uka va'ekwe. Ha upe tekoha-rupi katu ndapeiko teíry voi. Ha nhande kwéry e'ý va'e katu onhepirekytí uka e'ý ramo jepe, upe tekoha-rupi joty voi oiko. Upéa-gwi "Judeu kwéry e'ý va'e hekoha porāve pendéhegwi" he'i va'erā peē-my Nhandejáry. ²⁸Aipo ramo, entéro judeu kwéry he'i va'e, oipirekytí va'e gwive, ndaha'éiry ha'e tee meme. Judeu kwéry oipirekytí-gwi mante ndoikóiry judeu tee ramo. ²⁹Ndaha'éiry upéixa. Ha judeu tee va'e katu ipy'a poti va'e, Nhandejáry remimopotí ipy'a. "Xe re'ýi tee voi nde" he'i íxupe va'e Nhandejáry. "Upe tekoha porā kwatia-rehe nhe'ē nhamonhe'ē-gwi, jaiko judeu tee ramo" ja'e mo'ā nhandéjehe. Nhe'ē Marangatu tee va'e oí-ma ramo ae nhande py'a-py, jaiko judeu tee ramo. "Xe pirekytí-gwi, aiko judeu tee va'e-rami" ja'e mo'ā nhandéjehe. Ndaha'éí upéa-gwi. Nhande py'a poti-gwi ae jaiko Nhandejáry re'ýi ramo judeu tee va'e-rami. Judeu tee va'e katu nomboetéi íxupe teko rei. Nhandejáry ae omboete íxupe.*

3

¹Upéixa ramo, "Nhande pe'a rei araka'e nhande kwéry e'ý va'e pa'ü-gwi" oí he'i va'e mo'ā upéixa. "Nhanhepirekytí rei araka'e" oí upéixa he'i va'e mo'ā. "Judeu kwéry va'e tei nhande kwéry" oí upéixa he'i va'e mo'ā. ²Nahániry. Nhande pe'a reíry va'ekwe Nhandejáry. Nanhhepirekytí uka reíry va'ekwe. Áy amombe'u ranhe-ta peē-my mba'éixa Nhandejáry nhande rovása va'ekwe. Nhande kwéry-pete omonhangareko uka nhe'ē porā-rehe omombe'u hagwā. ³Ha oí va'ekwe nhande kwéry judeu va'e ndojapói inhe'égwe-rupi: Aipo ramo he'i va'ekwe ndojapóiry voi para'e Nhandejáry, he'i va'e oí. ⁴Ndaha'éiry upéixa. Ndaijapu mo'ai Nhandejáry. Onhe'ē-gwi ova e'ý va'e voi ko

* 2:24 Is 52.5 * 2:29 Fp 3.3

ha'e. Enterovéa va'e teko rei va'e ijapu ramo jepe, ojapo va'erā katu onhe'ēgwe-rupi Nhandejáry. Ndikatúiry ha'e ijapu ójehe. Upéa-rehe he'i Nhandejáry kwatia nhe'ē:

“Erenhe'ē jave, ojekwaa-ta katu nde-rehe nde apu e'ýha. Ne monhe'ē uka ramo, Ojevavy e'ý va'e voi, he'i va'erā katu nde-rehe. Mba'eve ndojapóiry, he'i joty va'erā nde-rehe.”*

Upéixa he'i voi Nhandejáry-rehe Nhandejáry kwatia nhe'ē.

⁵ Oĩ he'i va'e mo'ā: “Nhane rembiapo vai ramo, ojekwaa porāve Nhandejáry-rehe ijapu e'ýha” he'i mo'ā. “Upéixa ramo, nhane rembiapo vaikwe repy-rehe nhane moingo asy ramo, ndaha'éi hembiaapo porā va'e Nhandejáry” oĩ onhe'ē va'e mo'ā Nhandejáry rekoha-rehe. Upéixa he'i mo'ā teko rei, ijapu rei-vy hese. ⁶ Ha ndaha'éiry voi upéixa. Ha Nhandejáry katu ndaheko porāi ramo ra'e, ndikatúi ogwereco arā ra'e enterovéa-pe hembiaapo apokwe-rehe. Ha hekoha porā meme va'e voi ha'e. Ijapu e'ý va'e voi ha'e.

⁷ Oĩ he'i va'e mo'ā: “Xe nhe'ēgwe-rupi ndajapói ramo, ojekwaa porāve rāve Nhandejáry-rehe hekoha apu e'ýha. Ha'e anho mante tuvixa mba'e, he'i va'erā Nhandejáry-rehe omboeteve-vy. Onhemboete ukave Nhandejáry. Onhemboete ukave-gwi, Mbava'e-rehe po xe moingo asy rei va'erā. Mbava'e-rehe po xe rereko rei va'erā xe rembiapokwe repy-rehe?” oĩ he'i va'e mo'ā. ⁸ “Jajapo vai katu onhemomba'egwasuwe haggwā Nhandejáry” he'i mo'ā. “Upe va'e Paulo nhe'ēgwe voi” he'i mo'ā xe-rehe. Xe renohē vai uka rei xe-rehe onhe'ē rei rei-vy. Upéixa xe-rehe ijapu-gwi, iporā katu Nhandejáry omoingo asy íxupe hembiaapo vai va'ekwe repy-rehe.

Ndoikói ojevavy e'ý va'e

(Rm 3.23; Gl 3.22)

⁹ Upe ramo, “Nhane kwéry rekoha ojohu porāve para'e Nhandejáry nhande kwéry e'ý rekoha-gwi” oĩ he'i va'e. Nahániry. Enterovéa-rehe peteíxa ojohu hese. Xe ha'e hagwe-rami, nhande judeu kwéry va'e, judeu kwéry e'ý va'e ave nanhande pu'akavéi-ma nhandéjehe jajevavy-vy. Ipu'akave nhande kwéry-rehe mba'evai nhane mohembiaapo vai uka haggwā. ¹⁰ Upéixa he'i Nhandejáry kwatia nhe'ē:

“Ndaipóri ni peteí va'e ojevavy e'ý va'e. ¹¹ Hi'arandu va'e ndoikóiry. Nhandejáry-pe omoirúse va'e ndoikói ave. ¹² Enterovéa tekoha vai-rupi rei-ma oiko ramo, omboyke-ma Nhandejáry-pe oho-vy. Ndoikovéi-ma ni peteí va'e hembiaapo porā va'e.” ¹³ Hetekwe ojevavy e'ý va'e ivai ine ramo. Nanhagwahéséiry ha'e-py. Upéixa ete ijuru vai vai-gwi, nanhamoirúséi íxupe. Oporombotavy tavy onhe'ē vai-vy. Onhe'ē-py oporomomytu'e'ý rei nhande jukase-vy. Mbói nhande su'u-ta va'e-rami, ivai nhande-vy.* ¹⁴ Naiporāi voi inhe'ē. Tomano mani, he'i nhande-rehe. Onhe'ēgwasu gwasu vai rei ojóehe.* ¹⁵ Pya'e a'e voi oiko ojapo vai haggwā gwapixarehe. Ndojejokóiry voi íxupe ojuka haggwā-rehe. ¹⁶ Oho ha-rupi ojohu va'e-pe ogwereco asy asy, hese ndajja'éi-gwi. ¹⁷ Tape porā-rupi ndohóiry. Gwapixa kwéry-pe nombopy'agwapy kwaáiry. Ogwereco asyséte.* ¹⁸ Nomboetéi voi Nhandejáry-pe oiko-vy-gwi, upeixa hembiaapo.”*

Upéixa he'i Nhandejáry kwatia nhe'ē. ¹⁹ Entéro Nhandejáry kwatia nhe'ē gwive gwí Moisés nhe'ēgwe-rupi oikose va'e pegwara. Upéa jaikwaa voi. Nhandejáry remimombe'ukwe-gwi hembiaaporā enterove oikwaa. Upéa-gwi Nhandejáry ojohu va'erā enterovéa-rehe hembiaapokwe. Hovagwy-py oĩ va'e ndojohúí va'erā onhe'ērā. ²⁰ Gwí Moisés nhe'ēgwe renduha-pe, “Nde py'a potí-ma nde” nde'íry joty Nhandejáry. Ndojapopái-gwi inhe'ēgwe nomopotíry joty íxupe Nhandejáry. Upéa nhe'ē jajapose ramo mo'ā, oikwaa uka nhande-vy nhane rembiapo vaikwe.*

“Kiva'e-pe Nhandejáry, Nde py'a potí-ma nde, he'i?” oĩ oporandu va'e

(Gl 2.15-16; 3.11; Fp 3.9)

* 3:4 Sl 51.4 * 3:12 Sl 14.1-3; 53.1-3 * 3:13 Sl 5.9; 140.3 * 3:14 Sl 10.7 * 3:17 Is 59.7-8 * 3:18 Sl 36.1

* 3:20 Sl 143.2; Gl 2.16

²¹ Yma va'ekwe Nhandejáry kwatia nhe'ë omombe'u nhande-vy va'ekwe Nhandejáry rembiaporã. Ha ko'anga katu oikwaa uka-ma nhande-vy mbava'e-rehe "Nde py'a potĩ-ma nde" he'i nhande-vy. Nhande nhandemopotĩ uka reise ramo upe tekoha porã-rupi rei jaiko-vy, nanhane mopotĩry voi Nhandejáry. ²² Hesu Cristo-rehe jajerovia-gwi ae, "Nde py'a potĩ-ma" he'i nhande-vy. Entéro Hesu Cristo reroviaha-pe gwive, nhande kwéry va'e, nhande kwéry e'ÿ va'e ave, peteixa ogwereco Nhandejáry. Peteixa ójehe ojerovia va'e-pe omopotĩ. ²³ Ndoikói ojevavy e'ÿ va'e. Enterove ojevavy. Nhandejáry-rami ndoikóiry. Ha'e-rami oikose jepe, ha'e-rami ndikatúi oiko hikwái. ²⁴ Ha jajejavy ramo jepe, nhande rexakwaa rei-ma oiko-vy Nhandejáry. "Ne resende-ma nde Hesu Cristo. Héry-py nde py'a potĩ-ma nde" he'i nhande-vy Nhandejáry. ²⁵ Omoingo va'ekwe íxupe nhane resendeharã. Nhande-rehe ojejuka-gwi, omboykese va'ekwe nhandéhegwi nhane rembiapo vaikwe. Hesu Cristo-rehe jajerovia-ma ramo ae, omboyke va'erã nhandéhegwi nhane rembiapo vaikwe nhande rereko poxy e'ÿ reheve. Upéa ojapo Nhandejáry ojekwaa hagwã hese hekoha apu e'ÿha. Yma araka'e kente kwéry hembiaapo vai ramo jepe, oha'arõ joty íxupe. Ndogwereco asy pya'éiry. ²⁶ Ha ko'anga katu ojohupa oiko-vy enterovéa-rehe hembiaapo vai va'ekwe, ojekwaa hagwã hese hekoha apu e'ÿha, hekoha porã teeha ojekwaa hagwã hese. Upéixa voi ojekwaa voi hese hekoha potíha. Mbava'e-rehe Hesu reroviaha va'e-pe gwive omopotĩ ojekwaa-ma ave hese.

²⁷ Ha ko'anga katu ndikatuvéi-ma nhapondera ojóhe: "Tekoha-rupi aiko-gwi aiko porãve ndéhegwi" ndaja'evéi-ma ojóupe, tekoha-rupi rei jaiko ramo. "Ne potĩ-ma nde" nde'íry nhande-vy Nhandejáry tekoha-rupi jaiko-gwi. Jarovia-ma ramo Hesu Cristo-pe ae, aipo he'i nhande-rehe. ²⁸ "Jarovia-ma íxupe. Upéa-gwi nhane mopotĩ nipo ra'e" ja'e nhandéjehe. "Nhande nhandemopotĩ uka reise ramo upe tekoha porã-rupi rei jaiko-vy, nanhane mopotĩry voi Nhandejáry" ja'e nhandéjehe. ²⁹ Nhandejáry ndaha'éí judeu kwéry Járy mate. Ha'e ae enterove va'e Járy. Ha'e judeu kwéry Járy, judeu e'ÿ Járy ave. ³⁰ Enterove va'e-pe nhande rereko peteixa Nhandejáry. Nhane mopotĩ nhande kwéry va'e-pe jajerovia-gwi hese. Ogwerovia-gwi íxupe, omopotĩ ave nhande kwéry e'ÿ va'e-pe. ³¹ Upe ramo oĩ he'i va'e mo'ã: "Hesu Cristo-pe jarovia-gwi, ndajaikovéi-ma Moisés remimombe'ukwe tekoha porã-rupi" he'i mo'ã ójehe kwéry. Upéixa ave he'i mo'ã nhande-rehe kwéry. Ha upe tekoha porã-rupi ae katu jaiko joty.*

4

Nhandejáry reroviaha Abraão amyri rehegwa nhe'ë

(Gl 3.6-18; Tg 2.23)

¹ Ko'anga amombe'u-ta peë-my myamyri nhane ramoigwasu Abraão rehegwa nhe'ë. Mba'éixa araka'e ipy'a onhemopotĩ va'ekwe amombe'u-ta. ² Hembiaapo porã-gwi onhemopotĩ ramo ra'e, "Xejehegwi rei anhemopotĩ-ma" he'i arã araka'e ójehe. Ha Nhandejáry rovagwy-py katu ndikatúiry he'i upéixa. ³ Ha Nhandejáry kwatia nhe'ë he'i: "Ogwerovia-ma va'ekwe Nhandejáry-pe Abraão. Upéa-gwi Nde py'a potĩ-ma nde, he'i íxupe va'ekwe Nhandejáry.*"

Upéixa he'i Nhandejáry kwatia nhe'ë. Upéa-gwi, "Xejehegwi rei anhemopotĩ-ma" ndikatúiry he'i. Ogwerovia-gwi íxupe ae omopotĩ-ma araka'e íxupe ipy'a. ⁴ Omba'apo va'e-pe hembiapokwe repy nham'e'ë íxupe. Nanham'e'ë reíry íxupe. Hemigana ae nham'e'ë íxupe. Ha hembiaapo porã-rehe rei nomopotĩry Abraão-pe Nhandejáry. Ha teko rei katu gwembiaapo porã-rehe rei onhemopotĩ ukase mo'ã Nhandejáry-pe. ⁵ Ha Nhandejáry reroviaha katu nonhemopotĩ ukaséiry gwembiaapo porã-rehe rei. Ndoipotái Nhandejáry nhamba'apo nhandemopotĩ hagwã-rehe. Ha ipy'a ky'a va'e-pe, onhe'ë reroviaha-pe katu, "Ne potĩ-ma nde" he'i íxupe Nhandejáry. Onhe'ë reroviaha-pe ojohu porã-gwi, omopotĩ-ma íxupe Nhandejáry gweko irürã. ⁶ Upéixa voi he'i araka'e myamyri Davi gwí Nhandejáry remimbovy'a-rehe:

* 3:31 Gl 2.15-21 * 4:3 Gn 15.6

“Nhandejáry remimopotĩ ovy'a oiko-vy. Nonhemopotĩry ojehegwĩnte hembiaipo porã-gwi. Nhandejáry ae omopotĩ íxupe”

he'i araka'e Nhandejáry remimopotĩ-rehe.

⁷“Hembiaipo vai va'ekwe-rehe ndogwerekói íxupe Nhandejáry. Upe va'e-rehe ovy'a eterei oiko-vy. Hembiaipo vaikwe omboyke íxugwi va'e-rehe ovy'a oiko-vy. ⁸Hembiaipo vai va'ekwe-rehe naimandu'avéi-ma Nhandejáry. Omboyke-ma voi íxugwi. Upe va'e-rehe ovy'a ete voi oiko-vy.”*

Upéixa he'i Nhandejáry kwatia nhe'ẽ Davi amyri remimombe'ukwe. ⁹Gwĩ yma gware reko-rupi ojepirekytĩ va'ekwe, judeu kwéry ovy'aha anho para'e omombe'u Davi upéixa. Nahániry. Gwĩ ojepirekytĩ e'ỹ va'ekwe, judeu e'ỹ kwéry ovy'aha ave omombe'u upéixa. Amombe'u kuri peẽ-my Nhandejáry kwatia nhe'ẽ:

“Ogwerovia-gwĩ íxupe Abraão amyri: Nde py'a potĩ-ma nde, he'i íxupe va'ekwe Nhandejáry”*

Upéixa he'i Nhandejáry kwatia nhe'ẽ. ¹⁰Araka'e po Nhandejáry he'i upéixa? Abraão ojepirekytĩ rire-ma para'e he'i araka'e íxupe Nhandejáry. Nahániry. Upéa he'i ramo íxupe, ndojepirekytĩry vyteri va'ekwe. ¹¹Onhemopotĩ rire-ma ojepirekytĩ va'ekwe. Ha ojepirekytĩ e'ỹ ramo ogwerovia rei-gwĩ Nhandejáry-pe, omopotĩ-ma va'ekwe íxupe. Ha upe rire katu Nhandejáry oipirekytĩ uka íxupe ojekwaa hagwã hese ogwerovia-gwĩ Nhandejáry-pe. Omopotĩ-ma araka'e íxupe. “Ogwerovia-gwĩ Nhandejáry-pe omboheko poti-ma íxupe” he'i arã Abraão-rehe. Upéixa-gwĩ Nhandejáry reroviaha va'e gwive, “Myamyri Abraão nhane ramoigwasu voi ra'e” he'i hese hikwái. Ojepirekytĩ e'ỹ ramo jepe, Nhandejáry omopotĩ joty íxupe va'ekwe.* ¹²Ha gwĩ ojepirekytĩ va'e judeu kwéry va'e gwive katu túvy kwéry-rami ave voi ra'e Abraão. Ojepirekytĩ ramo jepe, oiko ave Abraão reko-rupi hikwái. Ha'e ojepirekytĩ e'ỹ ramo vyteri Nhandejáry-pe ogwerovia-ma voi araka'e oiko-vy. Ha'e ogwerovia hagwe-rami ay ogwerovia-ma ave Nhandejáry-pe oiko-vy hikwái. Abraão reko-rupima oiko ave hikwái. Upéixa-gwĩ túvy kwéry-rami voi ave Abraão.

Nhandejáry he'i tee va'ekwe Abraão-pe gwembiaporã mombe'u-vy

¹³He'i tee araka'e Nhandejáry: “Norombotavy mo'ái xe rembiaporã-rehe” he'i. “Ko yvy ame'ẽ va'erã nde-vy ne ma'erã” he'i. “Ne remiarirõ kwéry onhemomba'e ave va'erã hese” he'i tee Abraão amyri-pe gwembiaporã-rehe.*

Upéixa he'i tee ramo íxupe Nhandejáry, Moisés amyri remimombe'ukwe tekoha porã-rupi anho ndoikói araka'e Abraão onhemopotĩ hagwã mo'ái. Upe tekoha-rupi rei-vyete oiko ramo, nde'íry íxupe. Ogwerovia-gwĩ íxupe ae araka'e, Nhandejáry omopotĩ-gwĩ íxupe ae araka'e, he'i tee araka'e íxupe upéixa. ¹⁴Nhandejáry reroviaha e'ỹ reheve Moisés remimombe'ukwe tekoha-rupi rei-vyete oiko va'e-pe, “Penhemomba'e va'erã ko yvy-rehe” he'i ramo Nhandejáry ra'e, jarovia rei arã ra'e íxupe. Onhe'ẽ rei arã araka'e Abraão amyri-pe.* ¹⁵Ha upe tekoha-rupi oiko va'e gwive, upe tekoha-rupi ndoikovéi-ma ramo, upe tekoha ohasa-ma ramo, ogwereco asy va'erã íxupe Nhandejáry. Ha upe tekoha kwaa e'ỹ va'e-pe katu ja'e rei arã: “Petekoha rasa-ma peiko-vy. Peiko katu upe tekoha-rupi” ja'e rei arã íxupe.*

¹⁶⁻¹⁷Upe ramo ogwerovia-magwĩ íxupe omombe'u araka'e Abraão amyri-pe hekoharã he'i tee-vy araka'e íxupe. Hemiarirõ kwéry-pe gwive ave he'i tee araka'e Nhandejáry. Ohexakwaase rei íxupe kwéry. Entéro heroviaha-pe ohovasa va'erã. Gwĩ Moisés amyri remimombe'ukwe tekoha-rupi oiko va'e-pe, upe tekoha kwaa e'ỹ va'e-pe ave ohovasa va'erã. Abraão ogwerovia hagwe-rami ave ogwerovia-gwĩ, ohovasa va'erã ohexakwaa rei-vy hemiarirõ joapyri pyri-pe gwive. Upéa-rehe he'i Nhandejáry kwatia nhe'ẽ.*

“Heta tetã tetã-rupi oiko va'e, Nhane ramói, he'i va'erã nde-rehe. Erejerovia hagwe-rami ave, ojerovia-ma va'erã xe-rehe, he'i Abraão-pe Nhandejáry.”*

* 4:8 Sl 32.1-2 * 4:9 Gn 15,6 * 4:11 Gn 17,10 * 4:13 Gn 17.4-6; 18.18; 22.17-18 * 4:14 Gl 3.18 * 4:15 Rm 7.7,10-25 * 4:16-17 Gl 3.16,29 * 4:16-17 Gn 17,5

Upéixa he'i Nhandejáry kwatia nhe'ê. Upéa-gwi nhande ramói-rami ave voi ra'e Abraão. Nhandejáry rekoha apu e'y va'e-gwi, hese ojerovia-gwi, omoangeri ngeri inhe'êgwe Abraão. Ha Nhandejáry, Abraão ojerovia hese va'e katu, omano va'ekwe-pe omoingove jevy va'e voi. Gwĩ oiko e'y va'e-pe mba'eve-gwi omoingo joty onhe'ê-rupi. ¹⁸ Ha Abraão katu: "Oiko-ta nde ra'y" he'i ojúpe ramo, ogwerovia-ma Nhandejáry-pe. Ituja ramo jepe oha'arõ arõ ojúpe omombe'u va'ekwe Nhandejáry. Upéa-gwi onhembobeta-ma onhemboe'yí-vy hemiarirõ tetã tetã-rupi oiko va'e. Upéixa voi oiko va'ekwe Nhandejáry kwatia nhe'ê he'i hagwe-rami:

"Upéixa onhemboe'yí e'yí va'erã ne remiarirõ kwéry"*

he'i araka'e Nhandejáry kwatia nhe'ê Abraão-rehe. ¹⁹ Ha'e omboty-tama cem ángo. Ituja eterei ramo jepe ndogwerovia ku'a ku'ái ojúpe he'i va'ekwe Nhandejáry. Gwete-rehe imandu'a oiko-vy. Haimete-ma ndaipu'akavéi gwete-rehe. Omano hagwã-ramima oiko. Ójehe ndaipu'akavéi-ma. Igwaigwĩ-ma hambireko Sara. Naimembýi va'e voi ha'e oiko-vy. Ogwenogwaigwĩ-ma omemby e'yha. Upéa-rehe imandu'a jave, ndogwerovia ku'a ku'áiry joty ojúpe he'i va'ekwe Nhandejáry. "Áy ndahexa mo'ávéi-ma xe ra'yra" nde'íry joty ójehe. Ogwerovia tee joty.* ²⁰ "Mba'éixa po oiko-ta xe ra'y?" nde'íry joty. Ojúpe he'i va'ekwe Nhandejáry ndogwerovia ku'a ku'ái joty. Ogwerovia tee-gwi, ojerovia teeve eve joty hese. "Nde ko nde tuvixa mba'e va'e voi" he'i Nhandejáry-pe omboete-vy. ²¹ "Nhandejáry he'i tee ramo, ojapo nhande-vy" he'i. "He'i hagwe-ramima ojapo va'e voi nhande-vy. Ojapo kwaa voi xe-vy gwarã. Hekoha apu e'yha aikwaa voi xe" he'i Nhandejáry-rehe ogwerovia tee-vy. ²² Upéixa-gwi ogwerovia tee-gwi, "Ha'e ipy'a potĩ-ma" he'i hese Nhandejáry. ²³ Upéa Nhandejáry kwatia nhe'ê he'i ranhe Abraão-rehe. ²⁴ Ha upe rirã katu he'i-ma nhande-rehe ave. Nhandejáry Hesu moingove jevyha-rehe jajerovia-ma ramo "Nde py'a potĩ-ma nde" he'i ave va'erã nhande-vy Nhandejáry. Upéixa voi upéa Nhandejáry kwatia nhe'ê he'i-ma nhande-rehe ave.* ²⁵ Nhandejáry nhe'ê-py ojejuka va'ekwe Hesu. Jajevy-gwi omano. Upéi omoingove jevy va'ekwe íxupe, nhande py'a potĩ reheve onhemoirũ uka hagwã nhande-vy.

5

Nhande py'a omopotĩ-ma Nhandejáry

¹ Upe ramo Nhandejáry-pe jarovia-magwi, nhande py'a potĩ reheve jaiko. Nanhande rereko asyvéi-ma va'erã Nhandejáry. Nhande mbojoja va'e ojúpe Nhandejáry Hesu Cristo. Heko-rupi mante jaiko. ² Hese jajerovia-gwi, Cristo nhande reru va'e, nhande rovasa nhande rexakwaa rei-vy hagwã-py nhande reru. Ha ko'ánga Nhandejáry reko irũ ramoma jaiko. Ojehexa uka ramo Nhandejáry reko porã teeha, onhembotuvixa mba'e ramo ave, jaiko va'erã katu heko-rupi. Upéa jaikwaa voi. Upéa-rehe javy'a ete voi jaiko-vy.* ³ Gwĩ nhande rereko asyha-pe ae nanhanheme'êi. Nhande rereko asy jave, javy'a joty nhande, nhande mbaraeveve teve joty jaiko-vy, jajehesa rerova e'y hagwã Nhandejáry-gwi. Upéa jaikwaa-gwi, javy'a joty jaiko-vy. ⁴ Jajehesa rerova e'y ramo íxugwi, "Xe rerovia tee nipo ra'e" he'i arã nhande-rehe Nhandejáry nhande johu porã-vy. ⁵ Nhande johu porã-gwi, jaikwaa voi jaiko porã hagwã Nhandejáry ndive. "Nhandejáry ndive jaiko porã va'erã" ndaja'e reíry voi nhandéjehe. Ha Nhe'ê Marangatu tee va'e, nhande-vy Nhandejáry remime'êgwe, oikwaa uka nhande-vy Nhandejáry nhande rayhu tee reiha nhande py'a ete gwive jajohayhu hagwã. Upéixa-gwi, "Nhandejáry ndive jaiko porã va'erã" ndaja'e reíry voi nhandéjehe.*

⁶ Nhandéjehe nanhande pu'akái vyteri ramo, nhande rekoha vai ramo, upe jave Cristo ojejuka-ma va'ekwe nhande-rehe. Nhandejáry omboypy hagwe-py omano.* ⁷ Ojevay e'y va'e-rehe hase peve voi nhamano va'e, nhande rekove-rehe nhane rakate'y-gwi. Ha

* 4:18 Gn 15.5 * 4:19 Gn 17.17; Hb 11.12 * 4:24 Rm 15.4; 1 Co 9.10; 10.11 * 5:2 Mt 5.11-12 * 5:5 Tg 1.2-3,12; 1 Pe 1.5-7; 4.13 * 5:6 1 Tm 1.15; 1 Pe 3.18

nhande poriahuvereko reko va'e-rehe katu, "Naxe rakate'yiry xe rekove-rehe. Hese amano hagwā-rami aĩ" oĩ para'e upéixa he'i hese. "Hese amano hagwā-rami joty" he'i para'e hese. ⁸ Ha Nhandejáry katu oikwaa uka-ma va'ekwe oiko-vy nhande rayhu tee reiharā oikwaa uka-ma va'ekwe nhande-vy. Jajevavy vyteri jaiko-vy ramo, Cristo nahakate'yiry gwekove-rehe. Nhande rekovia omano va'ekwe nhande-rehe. ⁹ Nhande rekovia gwugwy avyite-py ojejuka-gwi va'ekwe, áy ipotĩ-ma Nhandejáry-pe nhande py'a. Upéa-gwi Cristo nhane resende va'erā voi. Ogwahẽ va'erā Nhandejáry áry enterove-pe ohekojohupa hagwā, hembiaipo vaikwe-rehe ogwereco asy hagwā íxupe kwéry. Upeha áry-py nhane resende va'erā katu Cristo. Nanhane mondói va'erā nhane mbohasa asy hagwā-py. ¹⁰ Yma va'ekwe nanhande a'éiry va'ekwe Nhandejáry-rehe. Ha Ta'yry nhande-rehe omano-gwi gweko irurā nhane moingo va'ekwe Nhandejáry. Áy Nhandejáry nhamoirũ-ma jaiko-vy. Ha Cristo nomanovéi hagwā-ma oikove jevy-gwi, nhane resende sende meme va'erā katu oiko-vy. ¹¹ Areko joty amombe'uve va'erā peẽ-my. Áy Nhandejáry Hesu Cristo nhane moingo-ma Nhandejáry irũ ramo nhande rereko asy e'y reheve. Upéa-gwi nhane mbovy'a vy'a oiko-vy Nhandejáry.

Adão amyri rembiapokwe ndaha'ei Cristo rembiapo-rami

(1 Co 15.21-22)

¹² Yma va'ekwe ojevavy-ma nhande ppy héry va'e Adão. Ha'e ojevavy ranhe-gwi, ombojevavy va'ekwe yma gware yvypory kwéry-pe. Ojevavy-gwi mombyrupa oiko Nhandejáry-gwi omano hagwā-rami voi hikwái. Upéa-gwi ojevavy-ma va'ekwe entéro yvypory gwive. Upéa-gwi mombyrupa oiko Nhandejáry-gwi omano hagwā-rami voi oiko hikwái.* ¹³ Ne'irā omombe'u va'ekwe Nhandejáry yvypory kwéry-pe tekoha porārā. Áry porukwe-rupi rei oiko hikwái. Ha'e kwéry hekorā ne'irā omombe'u ramo jepe, ojevavy joty oiko-vy hikwái. Ha gweko hagwā oikwaa e'y va'e oiko ha-py, "Amoingo asy va'erā íxupe" nde'iry Nhandejáry. Hembiaipo vai va'ekwe-rehe ne'irā imandu'a hese Nhandejáry. ¹⁴ Ha hembiaipokwe-rehe ne'irā imandu'a ramo jepe Nhandejáry, ojevavy joty oiko-vy va'ekwe hikwái. Adão amyri rire Moisés amyri oiko peve, Nhandejáry nomombe'úi íxupe ha'e kwéry hekorā. Tekoha porā ndoikwaái-gwi, "Nohendúi voi xe remimombe'ukwe" nde'iry hese Nhandejáry. Ha ndoikói-gwi Nhandejáry reko-rupi, ojevavy joty oiko-vy va'ekwe. Ójehe ndaipu'akavéi-ma. Mombyrupa oiko Nhandejáry-gwi omano va'erā-rami rei hikwái. Ha Adão katu nohendúi-ma va'ekwe ojúpe he'i va'ekwe Nhandejáry. Ha he'yi kwéry-pe katu nomombe'úi Nhandejáry hekorā kwéry. Upéa-gwi Adão ojevavy hagwe-ramima ha'e kwéry ndojejavýry. Ha'e-rami ojevavy e'y ramo jepe, mombyrupa oiko araka'e Nhandejáry-gwi. Omano va'erā-rami rei oiko hikwái.

Adão rehegwa nhe'ẽ he'i Cristo ou va'erā-rehe. ¹⁵ Ha Cristo rembiapo ndaha'ei Adão rembiapokwe-rami. Nhande ppy Adão gwĩ ojevavy va'e gwive ppy voi. Ha Cristo katu enterovéa-pe omopotĩ hagwā oikwaa. Ojevavy-ma va'ekwe Adão. Ha Nhandejáry katu nhande rovasa va'ekwe nhande rexakwaa rei-vy. Adão ojevavy-magwi, mombyrupa oiko araka'e Nhandejáry-gwi hikwái. Omano va'erā-rami rei oiko yma gware yvypory kwéry. Ha Nhandejáry katu nhande rexakwaa porā rei voi va'ekwe. Nhande kwéry gwive nhande rovasa vasa va'ekwe peteĩ héry va'e Cristo, ha'e ramigwa ndoikóiry va'e. Upéa-gwi opamba'e-py nhande rexakwaa porāve ráve katu Nhandejáry. ¹⁶ Ha ndaha'ei Adão rembiapokwe-rami Nhandejáry rembiapo. Nhande ppy Adão ojevavy rire-ma, "Ha'e onhembopy'a ky'a-ma" he'i hese Nhandejáry. Upéixa he'i ave nhande-rehe Nhandejáry. Ha nhande kwéry katu heta jajevavy jovy rire-ma jepe "Nde py'a potĩ-ma nde" he'i joty nhande-vy nhande rexakwaa rei-vy. ¹⁷ Oĩ peteĩ va'e nhande ppy ojevavy va'ekwe. Peteĩ jepe ojevavy ramo, ndaipu'akavéi-ma ójehe enterovéa. Omano va'erā-rami rei hikwái. Ha outro peteĩ va'e, Hesu Cristo jaroviahá ppy va'e rembiapo iporā eteve voi. Nhandejáry rembiexakwaa rei va'e gwive, "Nde py'a potĩ-ma nde" he'i íxupe va'e gwive, upeixagwa Nhandejáry rekoha-rupita ae oiko, peteĩ oiko va'e Cristo omoingove íxupe-gwi.

* 5:12 Gn 2.17; 3.6,19

¹⁸ Upéixa ramo peteĩ va'e ojevavy-gwi icy'a-ma nhande py'a. Ha upe rire katu peteĩ va'e ojevavy e'ỹ-gwi, “Nde py'a potĩ-ma nde” he'i nhande kwéry-pe Nhandejáry nhane moingove-vy. ¹⁹ Nhandejáry nhe'ẽ peteĩ va'e nhande ppy nohendúí va'ekwe. Upéa-gwi nhande kwéry gwive jajejavy va'ekwe. Ha upe rire katu peteĩ va'e ohendu va'ekwe ojéupe he'i va'ekwe Nhandejáry. Upéa-gwi, “Nde py'a potĩ-ma nde” he'i va'erã heta heta va'e-pe Nhandejáry.

²⁰ Upe ramo omombe'u va'ekwe Nhandejáry nhande rekoha porãrã rehegwa nhe'ẽ. Upéixa teko rei ndoikóí ramo upe tekoha porã-rupi, Nhandejáry oipota ojekwaapave hese upe tekoha-rupi oikose e'ỹ etereiha. Ha teko rei ivaive ive va'e ojapo-ma ramo, upe jave nhande rexakwaa porãve rãve joty Nhandejáry nhande rovasa-vy. ²¹ Yma va'ekwe jajejavy-gwi, ipu'aka nhande-rehe tekoha vai. Nanhande pu'akavéi-ma nhandéjehe. Nhamano va'erã va'e-rami jaiko rei va'ekwe jajejavy-gwi. Ha upe rire katu nhande rovasa-ma va'ekwe nhande rexakwaa rei-vy ndaipu'akavéi-ma hagwã nhande-rehe tekoha vai. Nhandejáry Hesu Cristo omano-gwi nhande-rehe, nhane mopotĩ-ma va'ekwe Nhandejáry. Nhande py'a potĩ-gwi, nhane moingove opa e'ỹ reheve jaiko hagwã he'ýi tee ramo.

6

Cristo-pe peteĩxa nhamoirũ ramo, jaiko voi nhande
(2 Co 5.17; Gl 2.20; 5.24)

¹ Oĩ he'i va'e mo'ã oiko-vy: “Jajejavy ramo jepe, nhande poriahuvereko reko joty arã Nhandejáry” he'i mo'ã. “Aipo ramo, iporã jajejavyve, nhande poriahuverekove hagwã” he'i mo'ã. ² Ndaha'úi upéa-rehe. Nhande-rehe ndaipu'akavéi-ma ae tekoha vai. Mba'e vai-rupi ndajaikovéi-ma nhande. Nhamano va'e-rami jaiko íxupe. Omano va'ekwe-rami jaiko mba'evai-pe. Upéixa-gwi ndikatuvéi-ma jajejavy jaiko-vy. ³ Nghanhemongarai ramo va'ekwe, jajehexa uka va'ekwe Cristo Hesu-pe peteĩxa nhamoirũmaha íxupe. Ha'e omano va'ekwe. Peteĩxa nhamoirũ-ma ramo íxupe, omano va'ekwe-rami ave jaiko-ma indive. Upéa peikwaa voi. ⁴ Nhane mongarai ramo va'ekwe, peteĩxa nhamoirũmaha íxupe jahexa uka va'ekwe. Ha'e omano va'ekwe. Peteĩxa nhamoirũ-ma ramo íxupe, omano va'ekwe-rami ave jaiko hendive. Ndajajejavyvéi-ma voi. Upéi Cristo-pe omoingove jevy ramo Nhande Ru, ojekwaa voi hese heko mbaraeteha. Cristo oikove jevy hagwe-rami oipota nhande ave nhande rekoha pyahu jaiko-vy. Oipota nhambopyahu nhande reko jaiko-vy.*

⁵ Cristo omano va'ekwe. Peteĩxa nhamoirũ-ma ramo íxupe va'ekwe, omano va'ekwe vérami jaiko indive. Upéixa ete ha'e vérami nhane moingove jevy ramo, peteĩxa nhamoirũ va'erã íxupe. ⁶ Nhandejáry rembiaporã jaikwaa voi. Kurusugwasu-rehe omano ramo va'ekwe Cristo, hendive nhande reko tujakwe ave omano va'ekwe. Oipe'ase nhandéhegwi nhande rekoha vaikwe nhande jajapose va'e rei ndajajapovéi-ma hagwã, ndaipu'akavéi-ma hagwã nhande-rehe tekoha vai. ⁷ Nhamano ramo ndaipu'akavéi-ma nhande-rehe tekoha vai. Upéa jaikwaa voi. ⁸ “Cristo ndive omano va'ekwe-rami jaiko-ma ramo, indive gwarã nipo ra'e nhande” ja'e nhandéjehe jarovia-vy íxupe. ⁹ Cristo omano rire oikove jevymaha jaikwaa voi. Nomanovéi-ma va'erã. Ójehe ipu'aka-magwi, nomano hagwãvéi-ma voi ha'e oiko-vy. ¹⁰ Ojevuka-ma ramo, omano va'ekwe nhande-rehe ndaipu'akavéi-ma hagwã tekoha vai nhande-rehe. Peteĩgwe mante omano va'ekwe. Ha upe rire katu nomano manovéi-ma va'ekwe oiko-vy. Ko'ánga katu oikove jevy-gwi Nhandejáry pegwarã-ma voi ha'e oiko. ¹¹ Upéixa ete iporã katu: “Ndaipu'akavéi-ma xe-rehe tekoha vai. Amano va'ekwe-rami aí joty. Cristo Hesu-pe peteĩxa amoirũ-gwi, áy Nhandejáry pegwarã-ma voi aiko” ja'e nhandéjehe. Nanhanheme'ěvéi-ma tekoha vai-pe.*

¹² Anive penheme'ě tekoha vai-pe ipu'aka hagwã pende py'a-rehe, pejapose va'e rei pejapo hagwã. ¹³ Naiporãí katu penheme'ě íxupe. Pende rete poru-ma ramo, ojapo vai uka va'erã peẽ-my. Hekovia Nhandejáry-pe ae katu penheme'ě. Pemano va'ekwe-rami pene moingove jevy va'ekwe. Upéa-gwi peheja katu Nhandejáry po-py pende py'a gwive pende

* 6:4 Cl 2.12 * 6:11 2 Co 5.15; Gl 2.19-20

rete gwive pende rete poru hagwā pene moembiapo porā uka hagwā.* ¹⁴ Naiporāi katu pende-rehe ipu'aka tekoha vai. Yma va'ekwe Moisés remimombe'ukwe tekoha porā-rupi peikose mo'ā. Pendejéhegwi peiko va'ekwe. Ha ko'ánga katu Nhandejáry pende rovasa vasa va'e-rupi peiko. Pende rexakwaa kwaa rei-gwi peiko porā voi. Upéa-gwi naiporāi katu pende-rehe ipu'aka tekoha vai.

Peiko-ma Nhandejáry rembigwái ramo pejejavy e'y hagwā

¹⁵ Oĩ he'i va'e mo'ā oiko-vy: "Iporā para'e jajejavy" he'i. "Yma Moisés remimombe'ukwe tekoha-rupi mo'ā jaikose va'ekwe nhandemopotĩ hagwā mo'ā. Ha ko'ánga katu Nhandejáry rembiporiahuvereco ramo jaiko-gwi, nhane potĩ-ma jaiko-vy. Upéa-gwi jajejavy ramo jepe, nanhane moingo asy mo'ái para'e Nhandejáry" he'i mo'ā oiko-vy hikwái. Ndaha'etí voi upéixa. ¹⁶ Erenheme'ẽ ramo ijokwaiha-pe inhe'ẽ rendu ramo, nde ruvixa ramo oiko arā nde-vy. Hembigwái ramo ereiko va'erā íxupe. Mba'e vai-pe erenheme'ẽ ramo, eremano va'erā. Aipo ramo mombyry erepyta arā Nhandejáry-gwi. Ha Nhandejáry po-py katu erenheme'ẽ ramo, inhe'ẽ erehendu ramo, "Nde py'a potĩ-ta nde" he'i va'erā nde-vy. Upéa peikwaa voi.

¹⁷ Ha atima porā katu Nhandejáry-pe pende-rehe. Yma mba'e vai ipu'aka araka'e pende-rehe. Ha upe rire katu pehendu-ma va'ekwe peẽ-my hemimombe'ukwe heko-rupi peiko hagwā. Pende py'a gwive pehendu-ma va'ekwe inhe'ẽ. ¹⁸ Pende-rehe ndaipu'akavéi-ma mba'e vai. Peiko-ma Nhandejáry rembigwái ramo pejejavyve e'y hagwā.* ¹⁹ Napene arandupáry vyteri. Upéixa-gwi apomo'arandu-ta tembigwái rehegwa nhe'ẽ-rami. Yma penheme'ẽmba va'ekwe pende py'a gwive mba'e vai-pe hembigwairā penhemongy'a hagwā pejapo vaive ive hagwā. Ha ko'ánga iporā katu penheme'ẽmba Nhandejáry-pe hembigwairā pejejavyve e'y hagwā, peiko marangatu hagwā peiko-vy.

²⁰ Yma araka'e peiko mba'evai rembigwái ramo peiko. "Pejapo katu Nhandejáry remimbota" nde'íry araka'e peẽ-my nde rerekwa. ²¹ Áy katu petĩ pene rembiapokwe-gwi. Yma pene rembiapo vai jave, pene rembiapokwe ndovaléi araka'e. Napende rovasái voi araka'e Nhandejáry. Upéixa pejapo ramo, mombyry rei pemano arā Nhandejáry-gwi. ²² Ha ko'ánga katu pende-rehe ndaipu'akavéi-ma mba'e vai, Nhandejáry rembigwái ramo peiko-magwi. Penheme'ẽ-ma íxupe peiko marangatu hagwā hendive peikove opa e'y reheve hagwā. Upéixa íxupe penheme'ẽ ramo, entéro ne rembiapo ovale voi. ²³ Ha jajejavy ramo nhande rembiapo apokwe-rami nhande rereko arā. Mombyry rei nhamano arā Nhandejáry-gwi. Ha Nhandejáry Cristo Hesu-pe peteixa nhamoirũ ramo, ondive nhane moingove meme va'erā voi Nhandejáry nhande rexakwaa rei-vy.*

7

Omenda va'e rehegwa nhe'ẽ

¹ Peẽ xe re'yí kwéry, tekoha rehegwa nhe'ẽ kwaaha voi. Upéixa-gwi peẽ-my amombe'utama va'e peikwaa voi. Tekoha rehegwa nhe'ẽ jaikove va'e pegwarā. Ndaha'etí nhamano va'ekwe pegwarā tekoha. ² Upéixa voi kunha ime va'e tekoha-rupi oiko jave, oikove vyteri ramo iména, ndikatúí oheja oho-vy. Ha omano ramo katu ndaipu'akavéi hese imenakwe. ³ Upéixa ramo iména oikove vyteri ramo, outro kwimba'e ndive oiko ramo, "Teko ky'arupi oiko" ja'e arā hese. Ha iména omano ramo katu ndaipu'akavéi hese. Omenda pyahu jevy ramo outro kwimba'e-rehe, tekoha-rupi joty oiko va'erā. Omano va'ekwe rereko asyhaty e'y upéa. Ndoikovéi omano va'ekwe pogwy-py, ojei-ma íxugwi. Ndaixupe gwarāi inhe'ẽ. ⁴ Upéixa ete pende rekoha, xe re'yí kwéry. Cristo omano va'ekwe. Cristo-pe peteixa pemoirũ-gwi, omano va'ekwe-rami ave peiko va'ekwe. Yma va'ekwe he'i va'ekwe Moisés: "Nderejapopái ramo upe tekoha porā nhe'ẽ gwive, eremano arā mombyry Nhandejáry-gwi ereiko hagwā" he'i va'ekwe Moisés Nhandejáry nhe'ẽ ohai-vy. Áy jajerovia-magwi Cristo-rehe, upéa nhe'ẽ ndaha'evéi nhande-vy gwarā. Ha'e kuri peẽ-my: Imenakwe

* 6:13 Cl 3.5; 2 Co 5.14-15 * 6:18 Gl 5.1 * 6:23 Gl 6.7-8

nomandavéi-ma gwembirekokwe-rehe. Ndoikovéi-ma omano va'ekwe pogwy-py, ojei-ma íxugwi. Upéixa ete Hesu Cristo-pe nhamoirũ-gwi, omano va'ekwe-rami jaiko-gwi, ndaha'éi nhande-vy gwarã Moisés rembihaikwe. Ha Cristo omano rire, omoingove jevy íxupe Nhandejáry. Upéa-gwi áy peiko-ma he'íy ramo yva'a porã va'e-rami, pene rembiapo porã porã hagwã íxupe. ⁵Yma jajapose va'e rei jajapo va'ekwe. Upe-ma ramo, “Ani erejapo teĩ upéa” he'i ramo Moisés remimombe'ukwe nhande rekoharã, ivaive ive va'e joty jajapose va'ekwe. Yvyra hi'upy e'ÿ vaive va'e-rami nhane rembiapo vai vai jaiko-vy va'ekwe. Nhane rembiapo vai vyteri ramo ra'e, mombyry Nhandejáry-gwi jaiko arã ra'e. Nhamano hagwãixa jaiko va'ekwe. ⁶Upéa yma gware tekoha porã nhe'ẽ ipokatu joty. Ha peteixa nhamoirũ-ma ramo Cristo-pe, áy upéa kwatia nhe'ẽ ndaha'evéi nhande-vy gwarã. Áy omano va'ekwe-rami jaiko íxupe. Ndaipokatuvéi-ma nhande-rehe upéa yma gware nhe'ẽ. Nhe'ẽ Marangatu tee va'e reko-rupi ae nhamba'apo Nhandejáry-pe jaiko-vy.

Upe tekoha porã nhe'ẽ amonhe'e ramo, aikwaa-ma xe rekoha vai
(Rm 3.20)

⁷Oĩ he'i va'erã para'e: “Naiporã ra'e Moisés amyri remimombe'ukwe tekoha” he'i mo'ã. Ndaha'éiry upéixa. Upe tekoha rehegwa nhe'ẽ ahendu-ma ramo, xe rembiapo vaikwe aikwaa-ma voi. “Aníke peipota teĩ pende rapixa mba'e” nde'íry ramo ra'e upe tekoha rehegwa nhe'ẽ, ndaikwaái arã ra'e xe rekoha vai. ⁸“Ani ne mba'e jerure rure teĩ” he'i Moisés amyri rembihaikwe tekoha porã mombe'u-vy. Upéa nhe'ẽ amonhe'ẽ ramo jepe, ajevavy joty. Aipota eterei xe rapixa mba'e. Upéa-gwi ajevavyve vyve aiko-vy. Upe tekoha ndaikwaái ramo ra'e, ndaikwaái arã ra'e xe rekoha vai. Naxe mbojevaví arã ra'e. ⁹Yma upe tekoha rehegwa nhe'ẽ kwaa e'ÿ-vy aiko va'ekwe. Ha upe rire katu: “Ani erejapo teĩ upeixagwa” he'i pykatu upe tekoha rehegwa nhe'ẽ, ajaposeve seve joty. ¹⁰Upéi mombyry aiko va'ekwe Nhandejáry-gwi amano va'ekwe-rami. Upe tekoha porã-rupi meme mo'ã oipota va'ekwe xe aiko hendive Nhandejáry. Ha xe katu mombyry-ma aha va'ekwe aiko-vy Nhandejáry-gwi. Aiko teĩ. Omano va'ekwe-rami aiko va'ekwe íxugwi. ¹¹Upe tekoha nhe'ẽ amonhe'ẽ ramo jepe “Aníke erejapo teĩ upeixagwa” he'i pykatu, xe ajaposeve seve joty. Upe tekoha-rupi aikose mo'ã ramo jepe, anhembotavy-ma joty. Upe tekoha nhe'ẽ xe mbojevavyve joty. Ajevavyseve joty. Upéixa ramo ajevavy javy-gwi, omano va'ekwe-rami aiko va'ekwe.

¹²Upéixa ramo Nhandejáry rekoha marangatu voi upe tekoha. Nhande rekorã rehegwa nhe'ẽ, Nhandejáry rekoha marangatu voi ave. Nhandejáry remimbota omombe'u upéa nhe'ẽ. Nhane mo'arandu porã, nhane moingo tape porã-rupi ave. ¹³Oĩ he'i va'erã para'e: “Upe tekoha Nhandejáry rembijohu porã va'e xe mbojevavy ra'e. Xe jukaharã vérami” he'i mo'ã. Ndaha'éiry upéixa. “Ani erejapo teĩ upeixagwa” he'i va'e-rehe xe mandu'a ramo, ajevavyseve joty aiko-vy. Omano va'ekwe-rami aiko. Upéixa ramo ojekwaa xe-rehe xe rekoha vaiha. Jajevavy e'ÿ hagwã pe tekoha he'i-gwi, ojekwaa porãve nhande-rehe nhande rekoha vaiha. “Ivai eterei voi” ja'e nhandéjehe.

“Aikose e'ÿha-rupi aiko joty” he'i Paulo

¹⁴Nhane nhe'ẽ marangatu pegwarã voi Moisés remimombe'ukwe tekoha porã. Ha ndaxe reko marangatu meméiry. Xe-rehe ipu'aka joty tekoha vai va'e. ¹⁵Xe aikose harupi ndaikói. Ndajaposéi va'e ajapo joty. Upéixa-gwi xe ndaikwaavéi-ma voi xe rekoha. ¹⁶Xe remimbota e'ÿ-rupi aiko ramo, upe tekoha-rupi aikose ramo mo'ã, “Anhetegwa voi ra'e” ha'e joty upe tekoha-rehe. ¹⁷Upéixa-gwi xejéhegwi ndajapo vaíry. Xe py'a-py oĩ va'e, mba'e vai xe mbojevavy ukaha ae ojapo uka xe-vy. ¹⁸Xejéhegwi ndajapo porã kwaái. Ajapose va'e rei ajapo. Ajapose ramo mo'ã iporã va'e, ndajapóiry joty. ¹⁹Xe remimbota-rupi ndaikói joty. Iporã va'e ndajapói. Hekovia ajapo ae ivai va'e joty. Ndajapo mo'ái ramo jepe, ajapo joty. ²⁰Xe remimbota e'ÿ-rupi joty aiko. Ajapo vai ramo vyteri, xejéhegwi katu ndajapo vaíry joty. Xe aiko porãse mo'ã. Oĩ ave xe mbojevavy ukaseha, pe tekoha vai va'e, xe py'a-py oĩ va'e. Xe-rehe ipu'aka joty.

* 7:7 Êx 20.17; Dt 5.21

²¹ Upéixa-gwi xe-vy ojehu va'ekwe äy aikwaa-ma. Ajapo porãse ramo mo'ã, nome'ëi xe-vy ajapo porã hagwã. Ivai va'e mante ajapo joty aiko-vy. ²² Xe ae xejehegwi'te arovy'a Nhandejáry remimombe'u ukakwe nhande rekohtarã. ²³ Ha xe py'a-py oí ave pe tekoha vai va'e vyteri. Ha xe remimbota, xe ajohu porã va'e, ndaijojái pe tekoha vai va'e ndive. Ndaijojái ramo, ndaxe pu'akavéi-ma xéjehe xe mbojevavy uka-gwi pe tekoha vai va'e.* ²⁴ Upéixa ramo, xe py'a-py ijoja e'ÿ-gwi, xe poriahu ete voi, ndavy'avéi-ma. Kiva'e-pa xe resendehtarã. Omano-tama va'e-rami aiko pe tekoha vai va'e-gwi. ²⁵ Xe resende-ta katu Nhandejáry. Upéa-rehe atima porã íxupe. Xe resende-ta ave Nhandejáry Hesu Cristo.

Upéixa amombe'u jevy-ta peë-my xe rekoha. Xe katu Nhandejáry rembigwái ramo jepe, xe rekoha ku'a ku'a joty. Xe py'a rekoha-rupi aiko ramo, upe jave Nhandejáry remimombe'ukwe-rupi aiko. Ha pe tekoha vai nhe'ë-rupi aiko ramo, ndaxe pu'akái xéjehe. Ojapo vai ukase joty xe-vy.*

8

*Nhe'ë Marangatu tee va'e nhande py'a-py oiko ramo, jaiko porã voi
(Gl 5.16-18)*

¹ Upe ramo Cristo Hesu-pe peteixa nhamoirũ va'e gwive, "Ojevavy-ma" äy nde'i mo'ãi nhande-rehe Nhandejáry. ² Nhe'ë Marangatu tee va'e reko-rupi jaiko ramo, nhane moingove. Jaikove meme voi Cristo Hesu-pe peteixa nhamoirũ va'e. Upéixa ete xe jukaharã jepe, ndaipu'akavéi-ma xe-rehe tekoha vai. Ndaikovéi igwy-py, asë-ma íxugwi. Hi'arive-ma xe aiko. Cristo nhane moingove-gwi, "Ojevavy-ma" nde'i mo'ávéi nhande-rehe Nhandejáry. ³ Yma jajapose va'e rei jajapo va'ekwe. Upéa-gwi Moisés remimombe'ukwe tekoha-rupi ndajaikóiry va'ekwe. Nhande rekoha vai imbaraeteve va'ekwe nhande-rehe. Ha Nhandejáry katu ipu'akave-ma nhande-rehe. Oikwaa uka ranhe nhande-vy nhande rekoha tujakwe. "Pejevavy-ma" he'i nhande-vy. Upe ramo nhande-rehe ombou va'ekwe gwa'ry. Nhande reko-rami ave ha'e hekoha. Nhande rekoha-rami ave ou va'ekwe oipe'a hagwã nhandéhegwi nhane rembiapo vaikwe. ⁴ Upéixa upe tekoha porã-rupi gwive Nhandejáry oipota jaiko. Äy ndajajapovéi-ma jajapose rei va'e. Nhe'ë Marangatu tee va'e reko-rupi ae jaiko. Upéixa ramo upe tekoha, Iporã katu pejapo upéa, he'i va'e gwive oipota voi nhahendu. ⁵ Ha nhande jajapose rei va'e jajapo va'e mate nanhande pu'akái nhandéjehe. Jajapose va'e rei-rehe mate nhane mandu'a jaiko-vy jajapo hagwã-rehe. Ha nhande Nhe'ë Marangatu tee va'e reko-rupi jaiko va'e katu nhande pu'aka nhandéjehe. Nhe'ë Marangatu tee va'e remimbota-rehe nhane mandu'a jaiko-vy va'e nhande pu'aka voi nhandéjehe.* ⁶ Erejapose va'e anho-rehe rei ne mandu'a meme ramo, mombyry ereiko arã Nhandejáry-gwi. Omano va'ekwe-rami rei ereiko va'erã. Ha Nhe'ë Marangatu tee va'e remimbota anho-rehe ne mandu'a meme ramo katu, ereikove arã nde py'agwapy reheve ereikove va'erã. ⁷ Upéixa erejapose va'e anho-rehe rei ne mandu'a ereiko-vy ramo, Nhandejáry nhe'ë-rehe erepyrũ meme ereiko-vy. Nhandejáry remimombe'u ukakwe nhande rekohtarã-rupi ndereikói voi. Ereikose teí. Nande pu'akáiry ereiko hagwã. ⁸ Erejapose va'e anho rei erejapo ramo, Nhandejáry remimbota apo e'ÿha voi nde. Nerembovy'ái voi íxupe.

⁹ Ha ko'ánga pejapose va'e anho rei ndapejapovéi-ma. Oiko ramo pende py'a-py Nhe'ë Marangatu tee va'e, heko-rupima peiko. Ha ndoikóiry ramo ra'e katu pende py'a-py Cristo nhe'ë marangatu, Cristo re'ýi ramo ndapeikói ave arã ra'e. ¹⁰ Cristo pene moirũ ramo, pene moingove va'erã Nhe'ë Marangatu tee va'e. Pejjevavy-gwi pemano va'erã. Omano va'erã voi pende rete. Ha omano ramo jepe, peikove jevy joty va'erã. Pende py'a potí-gwi, Cristo nhane moingove jevy va'erã Nhandejáry ndive opa e'ÿ reheve jaiko hagwã. ¹¹ Ha Nhandejáry katu omoingove jevy va'ekwe Hesu-pe. Omano rire omoingove jevy va'ekwe íxupe. Hemimoingove jevy voi Cristo. Upéa-gwi pende py'a-py oiko ramo Nhandejáry Nhe'ë Marangatu, pene moingove jevy va'erã ave. Omano va'erã pende rete. Ha omano

* 7:23 Gl 5.17 * 7:25 Gl 5.16-26 * 8:5 Gl 5.19-25

ramo jepe pende retekwe, omoingove jevy va'erã peẽ-my pende rete. Pene ndive oiko-gwi inhe'ẽ Marangatu pene moingove jevy va'erã voi Nhandejáry ndive peiko meme hagdã.

¹²Upéixa-gwi, xe re'yí kwéry, iporã katu jaiko Nhe'ẽ Marangatu tee va'e reko-rupi. Ha nhande reko tujakwe-rupi rei katu ndikatúiry jaiko. ¹³Pende reko tujakwe remimbota-rupi peiko ramo, mombyry peiko arã Nhandejáry-gwi. Omano va'ekwe-rami rei peiko arã. Ha Nhe'ẽ Marangatu tee va'e remimbota-rupi peiko ramo katu, anive peiko teĩ pende reko tujakwe-rupi. Ereheja-ma va'erã nde rekoha tujakwe. Ani penheme'ëve teĩ pende reko tujakwe-pe. Yma gware pende reko-rupi ani peikove teĩ. Upéixa ramo peikove va'erã Nhandejáry ndive. ¹⁴Nhandejáry Nhe'ẽ Marangatu tee va'e-rupi jaiko-ma ramo, Nhandejáry ra'y ramo-ma jaiko voi. ¹⁵Peẽ-my Nhandejáry remime'ëgwẽ Nhe'ẽ Marangatu tee va'e voi. Ha'e ndouí voi pene mopy'amirĩ hagdã, ndouí ave pende jokwái hagdã. Napene mytu'e'yvéi-ma hagdã pendéjehe ae ou. Áy katu Nhe'ẽ Marangatu tee va'e oiko-gwi pende py'a-py, Nhandejáry ra'y ramo-ma peiko. Nhandemopeteĩ teĩ, “Xe Ru” ja'e-vy. Jarovy'a ja'e-vy Nhandejáry-pe. ¹⁶Nhande py'a-py, “Nhandejáry ra'y voi xe” peteĩ teĩ ja'e nhandéjehe nhandemombe'u-vy. Upéixa ave he'i nhande py'a-py Nhe'ẽ Marangatu tee va'e. ¹⁷Nhande ta'yry-gwi, gwe'yí pegwarã iporã va'e ome'ẽ ave va'erã nhande-vy. Cristo re'yí pegwarã iporã va'e ome'ẽ ave va'erã nhande-vy. Cristo rereko asy hagwe-rami, nhande rereko asy ave va'erã. Ha upe rire katu Cristo-rehe heko porã teeha ojekwaa ramo, hekoha-ramima nhandehheko viarõ va'erã.**

Nhandejáry nhane mopoti rire, nhane moingo va'ekwe gweko porã tee-rupi, ha'e-rami nhane momba'egwasu hagdã

¹⁸Áy jahasa asy voi jaiko-vy. Ha ojehexa uka ramo hese Nhandejáry reko porã teeha, nhande rereko asy hagwe-rehe nandane mandu'avéi-ma va'erã. Nhande momba'egwasu porãve ráve va'erã. ¹⁹Áy entéro Nhandejáry rembiapokwe gwive ojapura oha'arõ-vy Nhandejáry ra'y kwéry ojekwaa hagdã. “Araka'e po ou-ta ojehexa uka-vy” he'i ojapura-vy hese. ²⁰Yma entéro Nhandejáry rembiapokwe gwive oiko teĩ araka'e. Omano hagdãixa oiko araka'e hikwái. Ojéhegwi rei ndoikóiry araka'e. Nhandejáry nhe'ẽ-py teĩ oiko araka'e. Nhandejáry remimbota-rupi oiko upéixa. ²¹“Ha ndojehu meméi va'erã íxupe kwéry upéixa” he'i ojúepe Nhandejáry. “Áy entéro va'e ndaipu'akái ójehe. Upéa-gwi enterovéa-pe amoatyrõmba va'erã itujave jave e'y hagdã, omano mano e'y hagdã, xe ra'y kwéry ndive ipu'aka jevy hagdã ójehe, Cristo Hesu ndive onhemomba'egwasu hagdã hikwái” he'i ojúepe Nhandejáry. ²²Ko'ángã ete peve entéro Nhandejáry rembiapokwe va'e gwive hasy va'e-rami hasẽ. Ne'írá onhemoaatyrõ enterove va'e. Upéa-gwi hasẽ. Kunha imemby-tama va'e-rami ave hasẽ. Upéa jaikwaa voi. ²³Na Nhandejáry rembiapokwe anhóiry hasẽ. Nhande ave, nhane rasẽ. Nhande py'a-py oiko Nhe'ẽ Marangatu tee va'e. Nhandejáry remime'ëgwẽ ranhe peẽ-my ha'e. Upéa-gwi nhande py'a-py nhane rasẽ nhande Nhandejáry ra'arõ-vy. Ha upe rire katu gwa'yry tee-rami nhande rereko va'erã, nhane resendepa va'erã. Nhande rete gwive nhane resende va'erã. ²⁴“Jajerovia ppyha áry gwive nhane resende-ma va'ekwe. Ha upe rire katu ou jevy ramo, nhande rete gwive-ma nhane resendepa ete-ma va'erã” ja'e nhandéjehe jarovia-vy. Nhaha'arõ va'e jahexa ramo, ogwahẽ-ma ramo, nandaha'arõvéi-ma. Jahexa va'e nandaha'arõi joty jaiko-vy. ²⁵Ha jahexa e'y vyteri va'e katu nhaha'arõ ramo, “Ndoiko mo'ái para'e” ndaja'ei joty hese. Nandaha'arõ ku'a ku'ái jaiko-vy va'e. Nhaha'arõ tee ae jaiko-vy va'e. Upéixa Cristo ou jevytaha áry-rehe nhaha'arõ tee voi nhandemoaatyrõmba hagdã.

²⁶Ha Nhe'ẽ Marangatu tee va'e nhane pytygwõharã voi ave. Nandane mbaraetéi ramo nhane pytygwõ-vy ou. Nhandejéhegwi rei ndajajapo porã kwaáiry oraçãõ. Ha Nhe'ẽ Marangatu tee va'e ae katu nhande réry-py ojerure Nhandejáry-pe nhande-rehe. Nhande nhe'ẽ e'y-my hasẽ va'e-rami onhe'ẽ ojerure asy-vy.* ²⁷Ha Nhandejáry-gwi ndaipóri okanhy va'e. Nhande py'apygwa jepe oikwaapa voi ha'e. Upéa-gwi Nhe'ẽ Marangatu

* 8:17 Gl 4.1-7

* 8:17 Gl 3.29; 4.6-7; 2 Tm 2.11-12

* 8:26 Jo 14.16

tee va'e he'ise va'e oikwaapa voi. Ha Nhe'ê Marangatu tee va'e ojerure asy Nhandejáry-pe he'yí kwéry-rehe. Héry-py ojerure rure hese. Nhandejáry remimbota-rupi ojerure hese. Upéa-gwi he'ise va'e oikwaapa voi. ²⁸ Nhande, Nhandejáry oipota pota ojúpe nhamoirũ va'e, hemienói voi. Nhandejáry-pe jahayhu ramo, opamba'e oiko va'erã nhande-vy nhande rereko porã hagwã. Mba'e ojehu ramo nhande-vy, omba'apo porã joty nhande-rehe Nhandejáry. Upe va'e jaikwaa voi. ²⁹ Yma va'ekwe nhande-rehe he'i va'ekwe Nhandejáry: “Xe rembiporavorã voi aipe'a va'erã íxupe xe ra'y Hesu reko-rupi oiko hagwã” he'i. “Xe ra'y Hesu aipota oiko tyke'yurusu ramo, tyvúry reta va'e-rami oiko hagwã Hesu” he'i va'ekwe nhande-rehe Nhandejáry. ³⁰ Ha upe rire katu, nhande pe'a rire, nhane renói va'ekwe ave. Upéi nhane renói rire, “Ha'e ipy'a potĩ-ma” he'i va'ekwe nhande-rehe. Upéi nhane mopotĩ rire, nhane moingo va'ekwe gweko porã tee-rupi, ha'e gweko-rami nhane momba'egwasu hagwã.

Cristo po pyte pygwa voi nhande. Ndaipóri ipo pyte-gwi nhande pe'a va'erã

³¹ Nhande rovasa vasa-gwi Nhandejáry, amombe'u-ta peẽ-my hekoha porã. Ha'e nhane pytygwõ tygwõ-gwi, ndaipóri nhande-rehe ipu'aka va'erã. ³² Peteĩ oiko va'e gwa'yry-rehe jepe nahakate'yiry va'ekwe. Nhande kwéry rekovia ijukaharã-pe ome'ê va'ekwe nhande-rehe. Gwa'yry-rehe nahakate'yiry-gwi ome'ê va'ekwe nhande-rehe ijukaharã-pe, opamba'e-py nhande rexakwaa rei va'erã voi katu. ³³ Nhandejáry rembiporavo va'e-rehe, “Ojejavvy-ma ra'e” he'i va'erã ndoikói va'erã. “Ha'e ipy'a potĩ-ma” he'i hese Nhandejáry. ³⁴ Upéa-gwi, “Ha'e ipy'a ky'a-ma” he'i va'erã hese ndaipóri. Nhande-rehe ha-py omano va'ekwe Hesu Cristo. Omano rire katu ha'e onhemoingove jevy-ma va'ekwe. Ha ko'ánga nhande réry-py ojerure Nhandejáry-pe nhande-rehe ijyke-rehe oiko-vy. ³⁵ Cristo po pyte-gwi ndaipóri nhande pe'a va'erã. Jahasa asy ramo jepe, jajepy'apy jaiko-vy ramo jepe, nhande rereko asy ramo jepe, nhande vare'a ramo jepe, nhande ao e'y ramo jepe, nhane mongyhyje ramo jepe, nhande juka ramo jepe, Cristo po pyte-gwi nanhande pe'ái va'erã voi. ³⁶ Upéixa he'i Nhandejáry kwatia nhe'ê: “Nde réry-py oroiko va'e. Upéa-gwi ore jukase meme va'e-rami oroiko. Ore rereko asy voi. Ovexa ijukapyrã-rami ore rereko”*

he'i Nhandejáry kwatia nhe'ê.

³⁷ Mba'e ojehu ramo jepe, nanhane mytu'e'yiry joty nhandéjehe. Cristo nhande rayhu-magwi, nanhanheme'ê mo'ái nhande jukase va'e-pe. Cristo rembiayhu voi nhande. Ndaipu'akavéi-ma voíte nhande-rehe nhande rereko asyharã. Nhande py'agwasu joty jaiko-vy. ³⁸ Hembiaiyhu voi nhande. Upéa-gwi ipo pyte-gwi ndaipóri nhande pe'a va'erã. Nhamano va'erã para'e, jaikove va'erã para'e. Ipo pyte pygwa meme joty nhande. Oĩ yváy pygwa, Nhandejáry rembigwái va'e para'e, mburuvixa va'e para'e, imbaraeteve va'e para'e. Upeixagwa jepe ndikatúiry nhande pe'a ipo pyte-gwi. Ndaipóri Nhandejáry jokoharã nhande rayhu e'y hagwã. Áy ojehu va'e gwive, ko'ê mbue ramo ojehu va'erã gwive ndaipóri ipo pyte-gwi nhande pe'a va'erã. ³⁹ Ipo pyte-gwi nanhande pe'ái va'erã yvate rupigwa, yvygwy rupigwa ave. Áry-rupi oiko va'e, okwa rei va'e ave, aragwy-rupi oiko va'e gwive nanhande pe'ái va'erã voíte íxugwi. Ndaipóri Nhandejáry ojokoharã nhande rayhu e'y hagwã. Nanhande rayhu ku'a ku'a réry va'e. Ndoiopí réry nhandéhegwi. Nhandejáry po pyte pygwa-ramoma jaiko va'erã voi Nhandejáry Hesu Cristo nhande rayhu-gwi. Ndaipóri voíte íxugwi nhande pe'aharã.

9

Nhandejáry rembiporavokwe gwe'yirã rehegwa nhe'ê

¹ Amombe'u-ta peẽ-my anhetegwa va'e. Cristo irũ voi xe. Upéa-gwi naxe apu mo'ái voi xe. Ha Nhe'ê Marangatu tee va'e xe mbo'e-gwi, xe py'a-py oĩ he'i va'e xe-vy “Anhetegwa va'e” he'i va'e xe-vy. Upéa-gwi aikwaa voi xe apu e'yha. ²⁻³ Amombe'u-ta peẽ-my xe vy'are'y. Xe ndavy'veiha amombe'u-ta peẽ-my. Xe mbopy'a rasy meme xe

* 8:36 Sl 44.22

re'ýi kwéry Israel re'ýi va'e. Ha'e kwéry xe rugwy re'ýi voi. Aipota eterei mo'ã ha'e kwéry ogwerovia ave. Hekovia jepe tamano xe, ha'e-ta para'e Nhandejáry-pe. Tove taiko Nhandejáry ojuka va'erã-rami xe ave. Xe kente kwéry-rehe ha-py tove jepe taxe mondo Cristo ojéhegwi mombyry, ha'e-ta para'e Nhandejáry-pe. ⁴Ha'e kwéry katu Nhandejáry rembiporavokwe gwe'yirã. Gwa'yryrã ave oiporavo va'ekwe. Ohexa uka uka va'ekwe íxupe kwéry Nhandejáry gwekoha tee. Ha'e tuvixa mba'e ohexa uka va'ekwe gwekoha. “Xe reko-rupi peiko ramo, xe orohovasa meme va'erã” he'iri iri íxupe kwéry va'ekwe Nhandejáry. Ohendu ramo, ojohu porã onhonhe'ẽ. Hekorã omombe'u va'ekwe íxupe Nhandejáry. Íxupe kwéry anho omombe'u mba'éixa pa va'erã ojapo omboete haggwã ojéupe. Íxupe kwéry anho: “Peẽ-my katu orohovasa va'erã voi” he'iri iri Nhandejáry. ⁵Yma myamyri Jacó ra'y kwéry-rehe imandu'a porã meme. Ha'e kwéry judeu kwéry rembypy. Ha Cristo katu nhande-rami oiko ramo kuri, ha'e kwéry rugwy re'ýi ave. Isy judeu kwéry va'e voi. Ha'e ko Nhandejáry voi. Enterove va'e ruvixa voi. Ndaipóri ha'e ramigwa. Ha'e ko tuvixa mba'e opa e'ý reheve oiko va'e voi. Amém.

⁶Oĩ he'i va'e mo'ã: “Nhandejáry he'i hagwe-rami ndojapóiry” he'i mo'ã. Ndahá'éiry upéa-gwi. Israel re'ýi judeu kwéry Nhandejáry rembiporavokwe va'e voi. Ha hese ojerovia va'e ndahetáiry oĩ. Upéa-gwi entéro judeu kwéry va'e-pe ndoiporavói va'ekwe Nhandejáry gwe'yirã. ⁷Ha Abraão remiarirõ kwéry katu, oĩ Nhandejáry ra'y, oĩ Nhandejáry ra'y e'ý ave. “Nde ra'y Isaque ra'y kwéry ne remiarirõ kwéry tee voi” he'i va'ekwe Abraão amyrĩ-pe Nhandejáry. ⁸Upéixa ramo entéro Abraão remiarirõ kwéry ndaha'éi Nhandejáry ra'y ave. “Upe va'e xe ra'y voi” he'i hese va'e katu, Nhandejáry ra'y kwéry voi. Ndoiporavopái. ⁹Nhandejáry he'i va'ekwe a-rami: “Anhetegwa amombe'u-ta nde-vy. Outro ro'y-py hí'áry-py aju jevy-ta” he'i. “Ne rembireko Sara héry va'e imemby-ta” he'i Abraão-pe. Upéixa voi, “Upe va'e xe ra'y voi” he'i hese va'e, Nhandejáry re'ýi voi. ^{*}

¹⁰Áy amombe'u-ta peẽ-my outro nhe'ẽ peikwaa haggwã mba'éixa Nhandejáry oiporavo gwe'yirã. Mokõi mitã rehewaga nhe'ẽ amombe'u-ta. Isy héry Rebeca. Mokõi omembyrã-gwi hyegwasu. Ha nhane rembypy Isaque mokõi mitã va'e ru voi. ¹¹⁻¹²Mokõi mitã ne'írã oiko ramo, peteĩ-pe oiporavo Nhandejáry, outro-pe ndoiporavói. Gwembiporavose-pe ae oiporavo Nhandejáry. Upéa-gwi he'i va'ekwe isyrã-pe: “Tyvýry rembigwairã voi tyke'yry” he'i. Ne'írã hembiaipo porã, ne'írã hembiaipo vai ave, ne'írã vyteri oiko ave. Upe-ma ramo: “Tyvýry rembigwairã voi tyke'yry” he'i isyrã-pe. Upéixa ramo, mba'ëve ojapo e'ý reheve, mba'ëve oikwaa e'ý reheve, oiporavo araka'e tyvýry-pe Nhandejáry. ^{*} ¹³Upéixa voi he'i Nhandejáry kwatia nhe'ẽ:

“Ha Jacó katu xe rembiayhu va'e. Ha tyke'yry katu xe rembiayhu e'ý va'e” ^{*} he'i Nhandejáry kwatia nhe'ẽ.

¹⁴Upéixa ramo oĩ he'i va'e mo'ã: “Ndaheko porã Nhandejáry. Peteĩ va'e-rami ndogwerekóiry. Peteĩ ohayhu outro ndohayhúi” he'i mo'ã. Ha ndaupéixairy. ¹⁵Moisés-pe Nhandejáry remimombe'ukwe amombe'u-ta:

“Xe rembiporiahuverekose aéte aiporiahuvereco va'erã. Xe rembireko porãse aéte areko porã va'erã” ^{*}

he'i va'ekwe Moisés-pe Nhandejáry. ¹⁶Upéixa ramo, ndaipóri nhane rembiaporã-rehe nhande poriahuvereco arã. Nhande ae jajehovasa ukase mo'ã ramo jepe, nanhande rovasái joty upéa-gwi. Ha'e ae nhande poriahuverekose va'e-pe gwive nhande poriahuvereko. ¹⁷Upe va'e peikwaa haggwã he'i Nhandejáry kwatia nhe'ẽ mburuvixa Faraó-pe:

“Xe oromoingo va'ekwe mburuvixagwasu ramo ojekwaa kwaa haggwã opa-rupi xe pu'akaha. Yvy apy gwive xe réry ojekwaa haggwã oromoingo va'ekwe. Xe nhe'ẽ rendu e'ý ramo jepe, xe mbojevý ramo jepe, ndéhegwi ojehexa uka va'ekwe xe pu'akaha” ^{*}

^{*} 9:7 Gn 21.12; Hb 11.18 ^{*} 9:9 Gn 18.10 ^{*} 9:10 Gn 25.21 ^{*} 9:11-12 Gn 25.23 ^{*} 9:13 Ml 1.2-3 ^{*} 9:15 Êx 33.19 ^{*} 9:17 Êx 9.16

he'i Nhandejáry kwatia nhe'ẽ.

¹⁸Upéixa ramo, gwembiporiahuverekose va'e-pe gwive oiporiahuverekoko Nhandejáry. Ha gwĩ gwerovia e'ỹha onhembopy'a ratáse va'e gwive, omoingo íxupe Nhandejáry íjapypsa e'ỹ va'e-rami.

Oĩ Nhandejáry rembiereko asyrã, oĩ ave hembiporiahuverekorã

¹⁹Upéixa-gwi oĩ pene pa'ũ-mey he'i va'e mo'ã: "Xe mbopy'a ratã ramo Nhandejáry, ma'erã po xe monhe'ẽ va'erã? Ma'erã po, Erejeyavy-ma, he'i va'erã xe-vy?" he'i mo'ã. "Kiva'e po ojoko-ta oipota va'e. Avave ndikatúí ojoko Nhandejáry ojapose va'e" he'i mo'ã Nhandejáry-rehe. ²⁰Naiporãí upéa. Nde ndaha'etí Nhandejáry. Nde, teko rei voi. "Nde ae erenhemonhe'ẽse joty xe-vy" ma'erã ere Nhandejáry-pe? Amombe'u-ta peẽ-my peteĩ nhe'ẽ. Oĩ tuju gwigwa nha'ẽ. "Ma'erã tipo a-rami xe apo nde?" naiporãí he'i oapoharepe.* ²¹Ha tuju-gwi mba'e ryrú apohaty ojaposeha-rami ojapo. Peteĩ tuju-gwi ojapo mokõí mba'e ryrurã. Peteĩ katu sapy'a rei oiporu va'erã ojapo. Ojehexase hagwã-rami ojapo porã voi. Outro katu pya'e a'e oiporu va'erã ojapo. Upe va'e imombopyrã ojeka rire.

²²Upéixa voi nhande rereko Nhandejáry. Oikwaa ukase va'ekwe nhande rereko asyha. Opu'akaha oikwaa ukase ave. Gwĩ gwembiereko asyrã oha'arõ joty. Ndaipoxy pya'etí. Áy ndogwerekoko poxýry vyteri hekoha vai va'e-pe. Oha'arõ joty oiko-vy. ²³Ha gwekoha porã ete voi katu hexa ukase va'ekwe ave. Nhande kwéry hembiporiahuverekoko va'e nhande rexakwaa rei-ma voi. Gweko-rami ete-ma jaiko hagwã nhande poravo-ma. ²⁴Nhandejáry remimbovia voi nhande kwéry. Ndaha'etí judeu kwéry anho. Judeu kwéry e'ỹ ave Nhandejáry remimbovia. ²⁵Ha Nhandejáry kwatia nhe'ẽ ohai va'ekwe héry va'e Oséias he'i a-rami:

"Ha xe re'ýi e'ỹ-pe, Xe re'ýi, ha'e joty va'erã. Xe rembiayhu e'ỹ va'e-pe, Xe rembiayhu, ha'e joty va'erã.* ²⁶Peẽ ko xe re'ýi e'ỹ voi, Nhandejáry he'i hagwe-py, upe-py ete ohenói va'erã íxupe kwéry gwa'ýry Nhandejáry nhane moingovehaty."*

Upéixa voi he'i Nhandejáry kwatia nhe'ẽ oikwaa uka-vy nhande-vy mba'éixa Nhandejáry oiporavo gwe'yirã, judeu kwéry va'e, judeu kwéry e'ỹ va'e ave.

²⁷Ha upéi he'i jeyv Nhandejáry kwatia nhe'ẽ ohai va'ekwe héry va'e Isaías. Nhane mbotee tee he'i-vy a-rami:

"Ygwasu apy e'ỹ rembe'y-rehe heta eterei oĩ yvy ku'itĩ. Yvy ku'itĩgwasu-rami onhembohetave tave rei ramo Israel kwéry, hembiepyrã ndahetáiry joty va'erã.

²⁸Nhandejáry ha'e he'i hagwe-ramima pya'e ojapo-ta yvy apy gwive oĩ va'e-rehe. Noha'arõ mo'ávéi-ma. Enterove va'e rembiapokwe-rami ojapo-tama hese kwéry"* he'i Isaías Israel kwéry-rehe omombe'u-vy.

²⁹Upéixa ete omombe'u jeyv va'ekwe Isaías judeu kwéry oikotaha. He'i va'ekwe a-rami: "Entéro mba'e-rehe ipu'akave va'e Nhandejáry. Ndoptytái ramo ra'e inhe'ẽ-py nhane remiarirõ kwéry, japa va'erã ra'e. Myamyri Sodomá pygwa-rami japyta va'erã ra'e.

Myamyri Gomorra pygwa-rami nhamanomba va'erã ra'e".*

Upéixa voi omombe'u va'ekwe Isaías kwatia-rehe nhande-vy oikwaa uka-vy ndahetái judeu kwéry onheresende va'e.

"Aipota nga'u Nhandejáry oresende xe rugwy re'ýi kwéry-pe" he'i Paulo

³⁰"Ha mba'éixa po ojapo Nhandejáry?" oĩ he'i va'e onhomongeta opy'a ndive. Amombe'u-ta nde-vy ereikwaa hagwã. Ha nhande kwéry e'ỹ va'e katu ndoikói araka'e Nhandejáry reko-rupi, "Ipy'a poti-ma" he'i hese hagwã-rami ndoikóiry araka'e. Ha upéi katu Nhandejáry-rehe ojerovia-ma ramo, ombopy'a poti-ma va'ekwe íxupe. ³¹Ha nhande kwéry va'e, Israel remiarirõre va'e, judeu va'e katu Nhandejáry rembiporavo va'e voi, oikose mo'ã va'ekwe Nhandejáry reko-rupi. "Ipy'a poti-ma" he'i hagwã mo'ã hese va'ekwe oiko. Ha nombopy'a potiry joty íxupe. ³²"Ma'erã po nombopy'a potiry íxupe" oĩ onhomongeta va'e opy'a ndive. Ojerovia e'ỹ reheve ojapose mo'ã Nhandejáry nhe'ẽ.

* 9:20 Is 45.9 * 9:25 Os 2.23 * 9:26 Os 1.10 * 9:28 Is 10.22-23 * 9:29 Is 1.9

Upéa-gwi, “Ipy'a potĩ-ma” nde'íry hese kwéry. Ogwerovia e'y-gwi ita-rehe onhepysanga sanga va'e-rami oiko va'ekwe. ³³Upéixa ete voi he'i Nhandejáry kwatia nhe'ê: “Pejeapysaka katu. Sião tetã-my, judeu kwéry pa'ũ-my amoĩ-ta onhepysanga hagwã voi heity hagwã voi amoĩ-ta henonde. Onhepysanga va'e-rami amoingo asy va'erã íxupe. Heityharã omoĩ henonde va'e-rami, amoingo va'erã íxupe. Ha hese ojerovia va'e gwive, ndojerovia reíry va'erã hese. Nomotĩry va'erã ogweroviaha-pe.”*
Upéixa he'i Nhandejáry kwatia nhe'ê heroviaha-rehe herovia e'yha-rehe ave.

10

¹Ha'e-ta peẽ-my, xe re'yi kwéry, Hesu-rehe pejerovia va'e. Aipota nga'u Nhandejáry oresende xe rugwy re'lyi kwéry-pe, Israel remiarirõre kwéry-pe. Xe py'a gwive aipota nga'u oresende. Amboete ete Nhandejáry-pe hese kwéry oraçãõ apo-vy. ²Nhandejáry-pe omboetese eterei ave mo'ã hikwái. Xe hexahare-gwi xe aikwaa omboeteha. Ha ndoikwaa teí-gwi Nhandejáry rekoha, omboete va'e-rami mo'ã oiko. ³Ha Nhandejáry katu ojerovia hese va'e-pe, “Nde py'a potĩ-ma” he'i íxupe. Ha Nhandejáry reko kwaa e'yha onhemopotise mo'ã ha'e ae gweko-rupi oiko va'e. Upéixa ndoikói voi Nhandejáry reko-rupi onhemopotise hagwã. Heko-pe nonheme'êi voi va'ekwe heko-rupi oiko hagwã. ⁴Ha ko'anga katu ojekwaa ou-vy Cristo. Upéa-gwi ijapy-ma voi Moisés amyri remimombe'ukwe judeu kwéry ha'e kwéry hekoha. ãy ogweroviaha gwive: “Ha'e kwéry ipy'a potĩ-ma” he'i hese Nhandejáry.

Nhandejáry réry renoiha gwive oresende-ta íxupe kwéry Nhandejáry

⁵“Gwĩ onhemopotĩ uka hagwã mo'ã upe tekoha-rupi oiko va'e gwive, Nhandejáry he'i va'e gwive ojaopapa ramo omopotĩ va'erã íxupe Nhandejáry”*
he'i omombe'u-vy Moisés amyri kwatia-rehe.

⁶Ha gwĩ onhemopotĩ uka hagwã ojerovia-ma voi oiko-vy va'e hese, Nhandejáry kwatia nhe'ê a-rami he'i hese:

“Kiva'e po ojeupi-ta yváy-py, ani upéixa erenhomongeta teĩ nde py'a ndive.”*

Upéixa ere ramo, nde ko erembogweyise va'e mo'ã yváy-gwi Cristo. Ani ere teĩ upéa.

⁷“Kiva'e po ogwey-ta ko yvygy-py, ani upéixa erenhomongeta teĩ nde py'a ndive.”

Upéixa ere ramo, nde eremoingoseve jevy va'erã Cristo-pe omano rire. Ani ere teĩ upéa.

⁸Ha Nhandejáry kwatia nhe'ê he'i a-rami:

“Ha Nhandejáry remimombe'u noĩry mombyry ndéhegwi. Hi'agwĩ ae oĩ ndéhegwi. Upéa ereikwaa voi. Upéa eremombe'u-ta ramo, oĩ-ma Nhandejáry nhe'êrã nde juru-py. Ererovia-ma ramo, oĩ-ma ave nde py'a-py”

he'i Nhandejáry kwatia nhe'ê. Upeixagwa nhe'ê ore remimombe'u voi ave. Perovia hagwã oromombe'u peẽ-my. ⁹“Hesu Nhandejáry voi” ere eremombe'u-vy ramo, “Nhandejáry omoingove jevy íxupe nipo ra'e” erenhomongeta ramo nde py'a ndive, ne resende-ta voi Nhandejáry. ¹⁰Nhande py'a gwive jajerovia-ma ramo hese, nhane mopotĩ-ma va'erã. “Hesu Nhandejáry voi” ja'e ramo nhamombe'u-vy, nhane resende-ma va'erã Nhandejáry.

¹¹He'i ave Nhandejáry kwatia nhe'ê:

“Ha hese ojerovia va'e gwive, ndogwerovia reíry va'erã. Nomotĩry va'erã ogweroviaha-pe.”*

he'i Nhandejáry kwatia nhe'ê.

¹²Ha judeu va'e, judeu e'y va'e ave katu enterove ogwereco peteixa Nhandejáry. Upéa-gwi peteĩ va'e pegwarã anho e'y va'e voi Nhandejáry kwatia nhe'ê he'i va'e. Nhandejáry ko enterove va'e Járy voi. Gwenõiha gwive ohovasa porã va'e íxupe ohexakwaa rei-vy.

¹³Upéixa ete he'i Nhandejáry kwatia nhe'ê:

“Nhandejáry réry renoiha gwive oresende-ta íxupe kwéry Nhandejáry”*

he'i Nhandejáry kwatia nhe'ê.

* 9:33 Is 28.16 * 10:5 Lv 18.5 * 10:6 Dt 30.12-14 * 10:11 Is 28.16 * 10:13 Jl 2.32

¹⁴ Mba'éixa po ojerure-ta Nhandejáry-pe ne'írã vyteri ojerovia ramo hese reheve. Mba'éixa po ojerovia-ta hese ne'írã ohendu reheve Nhandejáry remimombe'u. Mba'éixa po ohendu-ta ndaipóri ramo imombe'uharã. ¹⁵ Mba'éixa po omombe'u-ta íxupe, omondo e'ỹ reheve imombe'uharã:

“Jarovy'a Nhandejáry nhe'ẽ porã mombe'uharã ogwahẽ ou-vy ramo. Ogwahẽ ou-vy ramo jarohory voi íxupe jarovy'a-vy”*

he'i Nhandejáry kwatia nhe'ẽ.

¹⁶ Ha nohendu jojái inhe'ẽ porã. Upéixa voi omombe'u Isaías kwatia-rehe:

“Kiva'e-pe rei po anhe'ẽ kuri. Avave nohenduséiry nhane remimombe'u. Anhe'ẽ ramo íxupe, íxupe kwéry e'ỹ vérami anhe'ẽ”*

he'i va'ekwe Isaías Nhandejáry kwatia-rehe.

¹⁷ Upéixa-gwi Cristo rehegwa nhe'ẽ nhamombe'u ramo, nhahendu Nhandejáry remimombe'u. Hemimombe'u nhahendu ramo, jarovia-ma voi íxupe.

¹⁸ Oĩ he'i va'e mo'ã: “Nanhahendúí va'ekwe Nhandejáry remimombe'u” he'i mo'ã. Ha ijapu voi. Oĩ nhahendu va'e:

“Omombe'u mbe'u ojóupe hikwái. Inhe'ëgwẽ opa-rupi oho. Yvy apy gwive ohupity inhe'ëgwẽ”*

he'i Nhandejáry remimombe'u-rehe Nhandejáry kwatia nhe'ẽ.

¹⁹ Oĩ he'i jevy va'e mo'ã: “Ndoikwaái voi Israel remiarirõre judeu kwéry Nhandejáry remimombe'u” he'i mo'ã hese. “Oikwaa” he'i ranhe hese Moisés. Upéi he'i judeu kwéry-rehe:

“Teko rei-pe ahovasa-ma ramo, oromohakate'ỹ uka va'erã xéjehe. Orombopoxy uka va'erã, inharandu e'ỹ ete va'e-pe ahovasa-ma ramo, he'i Nhandejáry”.*

Upéixa he'i va'ekwe Moisés kwatia-rehe oĩ va'e.

²⁰ Upéi Isaías omoĩ jevy va'ekwe kwatia-rehe onhe'ẽ. Ipy'agwasuve imombe'u-vy judeu kwéry-pe:

“Xe reka e'ỹ va'e xe johu voi. Xe-rehe oporandu e'ỹ va'e-pe ajehexa uka íxupe”

he'i va'ekwe nhande kwéry e'ỹ va'e-rehe.

²¹ Ha Israel remiarirõre judeu kwéry rehegwa nhe'ẽ omombe'u va'ekwe a-rami:

“Ko'ẽmba ramo meme ome'ẽ opo va'e-rami, xe aha'arõ íxupe, xe nhe'ẽ renduse e'ỹha-pe.

Xe nhe'ẽ mbojevya-pe ave aha'arõ, he'i Nhandejáry judeu kwéry-rehe”*

he'i Nhandejáry kwatia nhe'ẽ Isaías ohai va'ekwe.

11

Ohovasa va'ekwe ohexakwaa rei-vy Israel re'ýi kwéry-pe Nhandejáry

¹ Ha'e-ta peẽ-my: Judeu kwéry Nhandejáry re'ýi katu ndaha'éiry hemimboyke. Gwe'ýi e'ỹ ramo, ojapo e'ỹ va'e. Gwe'ýi ramo meme ogwereco. Xe ave Israel rugwy re'ýi kwéry va'e. Myamyri Abraão katu xe rembypy voi. Myamyri Benjamim remiarirõ kwéry va'e voi katu xe. ² Yma ete va'ekwe oiporavo va'ekwe Israel rugwy re'ýi kwéry va'e gwe'yirã. Áy katu nhande kwéry, Israel re'ýi kwéry va'e, Nhandejáry remimboyke e'ỹ va'e voi. Nhande rereko joty gwe'ýi ramo. Yma va'ekwe myamyri Elias ombotee va'ekwe oiko-vy Nhandejáry-pe ohendu hagdã íxupe. He'i Nhandejáry-pe:

³ “Ha gwĩ ne nhe'ẽ-py omombe'u va'ety-pe katu ojuka-ma voi hikwái, he'i. Ne mboete haty apyka ramigwa ita-gwi ijapopyre altar héry va'e, omohaimba-ma voi oity-vy hikwái, he'i. Ha xe katu xe anho rei aiko, he'i. Xe jukase voi okwa-vy,*

he'i ójehe Nhandejáry-pe. ⁴ Upéi he'i íxupe Nhandejáry:

* 10:15 Is 52.7 * 10:16 Is 53.1 * 10:18 Sl 19.4 * 10:19 Dt 32.21 * 10:21 Is 65.1-2 * 11:1 Fp 3.5

* 11:3 1 Rs 19.10,14

Nane anho reíry erepyta, he'i íxupe. Oí joty sete mil kwimba'e. Nomboetéi vyteri tupã ra'anga-pe héry va'e Baal. Upéa kwéry xe ndahejái ojehesa rerova outro-rehe. Xe rakate'yha voi upéa, he'i Elias-pe Nhandejáry.*

Upéixa voi he'i va'ekwe Nhandejáry kwatia nhe'ê. Peikwaa-ma voi upéa nhe'ê. Peikwaa ramo jepe, amombe'u jevy-ta joty nde-vy. ⁵Yma Nhandejáry ojapo hagwe-ramima, ãy ojapo-ma ave. Enterove va'e-pe ndoiporavói va'e. Nhande poriahuvereco-gwi oí hembiporavo va'e. Ndahetáiry joty. ⁶Hembiapo-rehe rei ndoiporavói íxupe. Oiporiahuvereco-gwi ae oiporavo íxupe araka'e. Hembiapo-rehe rei oiporavo ramo ra'e, ndoiporiahuvereco teevéi arã ra'e íxupe Nhandejáry. Hembiapo porã va'e-pe oiporavo arã ra'e.

⁷Mba'eixagwa nhe'ê-pa xe amombe'u-ta. Israel re'yí kwéry katu ndohupityí va'ekwe gwembieka onhemopotí uka hagwã. Ha Nhandejáry rembiporavo katu ndahetáiry oheka ojohu-ma. Nhandejáry ogwerovy'a-ma íxupe. Ha outro kwéry katu heta oí va'e Nhandejáry gwenói ramo, nohenduséi-ma. Ijapysa e'y va'e-rami oiko-ma hikwái. ⁸Upéixa he'i va'ekwe Nhandejáry kwatia nhe'ê:

“Ha gwí ohenduse e'y va'e katu Nhandejáry omoingo araka'e íxupe kwéry ijapysa e'y va'e-rami. Ko'anga ete peve ndikaturvéi-ma mba'e oikwaa, ndikaturvéi-ma mba'e ohendu. Hesa pyso e'y va'e-rami oiko. Ndaijapysái va'e-rami ave oiko hikwái”*

he'i Nhandejáry kwatia nhe'ê.

⁹Oí ave Nhandejáry kwatia nhe'ê Davi amyri ohai va'ekwe:

“Karugwasu-py ou ramo, tonhembotavy toipyhy íxupe. Monde gwy-py ho'va va'e-rami, tove to'a katu. Tove toiko onhepysanga va'e-rami ave. Tomoingo asy íxupe kwéry Nhandejáry. ¹⁰Tove tonhemboty katu hesa ohexa e'y hagwã. Tojeayvy rei oiko-vy oiko asy-gwi”*

he'i Nhandejáry kwatia nhe'ê.

¹¹Ha'e-ta peẽ-my: He'yí tee judeu kwéry va'e onhepysanga sanga va'e-rami rei oiko va'ekwe ojejavý-gwi. Ho'a tee va'erã-rami teĩ oiko. Ha he'yí kwéry ndo'a teéiry. Ojejavý-gwi Nhandejáry nhe'ê nohenduséi-gwi, ãy hekovia gwí he'yí e'y va'e oikwaa-ma voi Nhandejáry-pe. Hesendeharã oikwaa-ma. Upéa-gwi ójehe omohakate'y uka hagwã-pyma oheja gwe'yí tee Nhandejáry. ¹²Ojejavý javy rire he'yí tee, ohovasa vasa va'ekwe outro gwe'yí e'y va'e Nhandejáry ohexakwaa rei-vy. Gwe'yí tee-pe nomogwahêi íxupe gwarã. Upéa-gwi outro-pe ohovasa vasa va'ekwe Nhandejáry. Gwe'yí e'y va'e-pe ohexakwaa kwaa rei. Ha gwe'yí tee omogwahêmba jevy joty va'erã ojeúpe. Omogwahêmba rire nhande kwéry-pe nhande rovasa porãve ráve va'erã voi Nhandejáry.

Gwe'yí e'y-pe oresende Nhandejáry

¹³Áy ha'e-ta peẽ-my, judeu e'y va'e, he'yí e'y va'e kwéry-pe. Hesu remimondo voi xe ojehegwa amombe'u hagwã peẽ-my. Upéa-gwi tuvixa mba'e xe-vy xe rembiapo. ¹⁴Heta xe rembiapo pene pa'ũ-my amohakate'y uka hagwã mo'ã xejehegwí xe rugwy re'yí tee va'e kwéry-pe. Ohexa ramo outro kwéry ojeroviaha: “Hesu nipo ra'e Nhandejáry ave” upéixa xe apota xe rugwy re'yí he'i. Upéa-gwi ikatu arã oí va'erã xe jave oresende hagwã íxupe. ¹⁵Ha he'yí tee onhemboyke íxugwi va'ekwe. Upe-ma ramo outro kwéry-pe oírũ tee-ramima ogwereco Nhandejáry. He'yí tee-rami Nhandejáry-pe hikwái. Ogwerujoja íxupe gwekoha hikwái. Ha gwe'yí tee katu omogwahê jevy-ma ramo íxupe kwéry ojeúpe, iporã tee rei va'erã voi nhande-vy. Onhemoingove uka jevy va'e-rami oiko porã jevy va'erã hikwái.

Ha Nhandejáry re'yí tee, judeu kwéry va'e hembiporavo meme joty

¹⁶Nhambopóy ramo mbojape Nhandejáry pegwarã, hembí'u re'yí Nhandejáry mba'e joty. Yvyra máta rapo Nhandejáry mba'e ramo, hakãgwe gwíve imba'e meme. Upéixa he'i Nhandejáry kwatia nhe'ê gwe'yí tee ojeúpe omogwahê jevytaha omombe'u-vy.

¹⁷Amombe'u-ta ave peẽ-my oliveira máta rehegwa nhe'ê. Oí va'ekwe oliveira máta imbo'a

* 11:4 1 Rs 19.18 * 11:8 Is 29.10 * 11:10 Sl 69.22-23

porā ukapyre. Upéi ojepe'a va'ekwe hakā. Upéi hakāgwe rendagwe-py omōi outro rakāgwe. Oliveira máta opu'ā rei va'e rakāgwe omōi hese. Yvyra máta opu'ā rei va'ekwe-rami voi pende rekoha, peē judeu kwéry e'ỹ va'e. Opu'ā rei va'e rakāgwe onhemōi imbo'a porā ukapyre rakā rendagwe-py. Upéixa peiko porā āy. Ohovasa porā hagwe-rami Nhandejáry gwe'ýi tee judeu kwéry-pe, ohexakwaa kwaa rei-vy, āy pende rovasa porā-ma ave. Hapo e'ỹ reheve ndahete'yvéi-ma hakā. Hapo-gwi ae ou hokyrā. Upéixa voi nhande kwéry judeu kwéry va'e-gwima peiko porā-ma āy. ¹⁸ Upéixa ani penhembohory teĩ hese, Nhandejáry re'ýi tee-rehe. Yvyra rakāgwe-rami ojepe'a va'ekwe ha'e kwéry. Ani penhemomba'egwasu teĩ peē peiko-vy. Mba'eixagwa tipo peē. Yvyra máta rakāgwe-rami rei peē. Hakā-gwi ndouí haporā. Hapo-gwi ae ou hokyrā. Upéa-gwi ani penhembohory teĩ hese kwéry.

¹⁹ Pene pa'ũ-my oĩ para'e he'i va'erā: “Ore moĩ hagwā-ma hendagwe-py ojepe'a va'ekwe ha'e hakā” he'i va'erā. ²⁰ Ha'e voi. Ojepe'a va'ekwe upéa-gwi. Ha'e kwéry ndogweroiviá-gwi ojepe'a va'ekwe. Ha peē katu pepyta peiko-vy hendagwe-py perovia-gwi. Upéa-gwi ani penhemomba'egwasu teĩ peē. Ani pejeapo teĩ hakā teeve ramo. Peiko arandu ae katu. ²¹ Ha he'ýi tee judeu kwéry va'e ha'e hakā-rami voi ha omopē va'ekwe ojéhegwi. Ma'erā, “Nanhande pe'a mo'ái Nhandejáry” peje pendéjehe. Upeixagwa ani peje teĩ. Peiko arandu ae katu.

²² Pejeapysaka porā katu xe nhe'ẽ-rehe. Nhande rovasa porā ramo jepe, nhande mbohosa asy joty ave Nhandejáry. Gwí ojevavy va'ekwe-pe ogwereco asy voi. Ha peē katu pende rereko porā voi. Pemoirũ irũ íxupe ramo, pende rereko porā va'erā. Ha pemoirũ e'ỹ ramo katu íxupe, gwakā ojéhegwi oipe'a va'ekwe-rami pende pe'a jevy va'erā. ²³ Ha'e kwéry katu ogwerova ramo gwekoha ogwerovia jevy hagwā íxupe, ha'e hendagwe-py omōi jevy va'erā íxupe Nhandejáry. Hakā roky-rami jevy oĩ hagwā. Omōi jevy kwaa va'e voi Nhandejáry íxupe kwéry. ²⁴ Ha peē he'ýi e'ỹ va'e katu yvyra máta opu'ā rei va'e rakā-rami. Ojepe'a va'ekwe hakā. Upéi heko e'ỹ-rupi onhemōi outro rakā rendagwe-py. Ha he'ýi tee judeu kwéry va'e katu imbo'a porā ukapyre-rami voi. Ndaheko ras'iry Nhandejáry-pe omōi jevy íxupe ha'ekwe-py. Ha ha'e hagwe-py onhemōi jevy va'ekwe katu ha'e heko-rupima oiko jevy voi. Upéixa ramo ndaheko ras'yi Nhandejáry-pe omogwahẽ jevy hagwā íxupe kwéry ójehe.

Enterove va'e-pe ohayhu Nhandejáry

²⁵ Aipota peikwaa porā xe ha'e-ta va'e, xe re'ýi kwéry. Oĩ Nhandejáry anhetegwa nhe'ẽ. Ore-vyete Nhandejáry remimbojekwaa uka ojekwaa kuri. Upéa nhe'ẽ aipota peikwaa porā. Peikwaa porā ramo, “Nhandejéhegwi nhande aranduve voi nhande” ndapejéi va'erā pendéjehe. Ore-vy ohexa uka kuri Nhandejáry onhe'ẽ a-rami: “Ndoiko meméi va'erā heta xe re'ýi kwéry xe nhe'ẽ rendu e'ỹ-vy. Ijapysa e'ỹ va'e-rami ndoiko meméiry va'erā. Ha xe re'ýi e'ỹ va'e, judeu e'ỹ va'e katu xe aipota ou va'e gwive amogwahẽmba ranhe va'erā xejeúpe. Ha upe rire katu ndoikovéi va'erā xe re'ýi, judeu kwéry va'e ijapysa e'ỹ va'e-rami. ²⁶ Ha Israel re'ýi kwéry, xe re'ýi tee va'e, peteĩ teĩ xe aipota ogwahẽ ou-vy va'e gwive aresendepa va'erā” he'i Nhandejáry gwembiaporā rexa uka-vy. Upéixa voi he'i Nhandejáry kwatia nhe'ẽ:

“Jerusalém tetā-gwi ou va'erā nhande resendeharā. Ha Jacó remiarirō joapyri pyri kwéry-gwi katu amboyke va'erā hembiaipo vaikwe gwive.* ²⁷ Ha upe rire katu amboyke rire hembiaipo vaikwe, Nhandejáry he'i ete hagwe-rami, ojapo-ma voi hese kwéry, he'i va'erā xe-rehe, he'i Nhandejáry ójehe”.*

Upéixa voi he'i Nhandejáry kwatia nhe'ẽ.

²⁸ Ha he'ýi tee, judeu kwéry va'e katu Hesu rehegwa nhe'ẽ porā nohenduséi-gwi, ogwereco íxupe kwéry Nhandejáry gwembiayhu e'ỹ ramo. Ha upéixa ojapo ramo gwe'ýi kwéry-rehe, iporā joty peē, he'ýi e'ỹ va'e-pe. Āy gwembiayhu e'ỹ-rami jepe ogwereco ramo, ohayhu joty íxupe kwéry. Ha'e kwéry hembiporavo joty. “Ahovasa va'erā íxupe”

* 11:26 Is 59.20-21 * 11:27 Jr 31.33-34

he'i ete va'ekwe ore rembypy-pe gwe'yirā-rehe. Upéa-gwi ohayhu joty íxupe oiko-vy. ²⁹ Nhandejáry rembiporavo hembihovasa vasa meme voi judeu kwéry. "Aiporavo va'ekwe xe re'yí-pe. Ahovasa porā va'erā íxupe" nde'i reíry Nhandejáry gwemienói-rehe. Ogwerova rova e'y va'e onhe'ē Nhandejáry. ³⁰ Ha peē he'yí e'y va'e katu napehendúí araka'e Nhandejáry nhe'ē. Ha ko'ánga katu he'yí tee nohenduséi-gwi inhe'ē, pende rayhuma Nhandejáry pende poriahuvereko-vy. ³¹ Upéixa ay pende rayhu jave Nhandejáry, ha'e kwéry nohendusevéi-ma inhe'ē. Upéa-gwi nohenduséi-gwi inhe'ē, iporiahu Nhandejáry-pe. "Aiporiahuvereko-ta joty íxupe kwéry" he'i joty hese kwéry. ³² Nhandejáry nhe'ē ojapo meme va'e ndaipóri. Upéa-gwi ko vvy apy-rehe oiko va'e-pe gwive ogwereco inhe'ē renduse e'y va'e-rami. Preso onhemoí va'e-rami ogwereco enterovéa-pe. Upéixa ojapo hese kwéry peteí teí oiporiahuvereko hagwā joty íxupe kwéry.

Paulo omomba'egwasu Nhandejáry-pe

³³ Ha Nhandejáry katu hekoaha porāve tee rei va'e voi katu. Ha'e heko-rami oiko va'e ndoikóiry. Ha'e hí'arandu tee va'e. Opamba'e oheko kwaave va'e. Heta ipy'apóry jaikwaa e'y ete va'e. Mbava'e-gwi nipo he'i ko va'e, Ma'erā nipo he'i upéa, avave ndoikwaái. Mba'e-gwi nipo ojapo ko va'e, ma'erā nipo ojapo upéa, teko rei va'e ndoikwaái voi ipy'a. Imbarateve va'e voi ha'e. ³⁴ Ha Nhandejáry kwatia nhe'ē he'i a-rami:

"Nhandejáry imandu'a ramo, ndoikwaáiry voi avave. Ndaipóri ombo'e va'erā íxupe hembiaporā-rehe.* ³⁵ Avave nome'ēi mba'eve Nhandejáry-pe ha'e hemime'ēgwe rekovia ome'ē jevy hagwā. Avave-pe ndorevéi".*

Upéixa he'i Nhandejáry kwatia nhe'ē.

³⁶ Ha entéro mba'e moingohaty voi ha'e. Ha'e entéro nhangarekoha voi. Ha'e ojúepe gwarā ave omoingo va'ekwe entéro mba'e. Tonhemomba'e tuvixa meme ete katu. Opa e'y reheve tonhemboete ete. Upéa aipota voi. Amém.

12

Nhandejáry reroviaha onheme'ē íxupe hembigwairā

(1 Co 6.20; 1 Ts 4.1)

¹ Nhande poriahuvereko-ma oiko-vy Nhandejáry, xe re'yí kwéry. Upéa-gwi aipota eterei penheme'ē pende py'a gwive íxupe imba'erā. Peiko jave imba'e voi peē. Penheme'ē katu íxupe hembigwairā pende rerothory porā hagwā. Penheme'ē tee ramo íxupe, napemboete ra'anga anga rei mo'ái íxupe. Pemboete tee va'erā íxupe. ² Teko rei rekoha-rami ani peiko teí peē. Peheja katu Nhandejáry tapene moatyrōmba pene akā porā hagwā ogwerova hagwā pende rekoha pende py'a gwive. Upe-ma ramo Nhandejáry remimbota peikwaa va'erā. Mbava'e tipo oipota Nhandejáry? Oipota iporā va'e. Ojúepe ombovy'aharā oipota. Imarā e'y va'e, ndaipóri ha'eixagwa iporāve va'e oipota.

³ Nhandejáry rembihovasa voi xe. Xe rexakwaa rei voi. Upéa-gwi inhe'ē-py aporandu-ta peē kwéry-pe: Ani erenhemomba'egwasu teí nde. Ani erejeapo tuvixave va'e ramo mo'ā. Ani nde rapixa reko-rupi ereiko teí. Nde ae nde reko-rupi voi eiko. Peē-my ogwerovia uka hagwe-rami Nhandejáry, peiko. Ani penhemomba'egwasu teí peē peiko-vy. ⁴ Heta nhande rete-rehe oí va'e. Hekoha ambue ambue jepe ijoja joty oiko-vy. ⁵ Upéixa ete nhande reta. Nhande reta jepe, Cristo nhamoirū-gwi peteixa joty jaiko. Nhande rekoha ambue mbue ramo jepe, nhande joja joty. Nhande rete ijojaha-rami joty jaiko. ⁶ Peteí teí va'e-pe nhande rovasa-gwi Nhandejáry nhande rexakwaa rei-vy, nhandehopytygwō rei katu. Ome'ē me'ē nhande-vy nhande rekoha ambue mbuerā. Peteí teí va'e-pe hemime'ēgwe ēgwe-py nhandehopytygwō tygwō rei ojúepe. Nhande reko me'ē ramo onhe'ē-py omba'e kwaa uka ramo nhande-vy nhamombe'u hagwā, nhane kyre'yre'y katu imombe'u-vy. Jarovia porāháixa jarosapuka pukái katu inhe'ē jaiko-vy. ⁷ Nhande reko me'ē ramo nhaipytygwō hagwā nhande rapixa-pe, iporā katu nhaipytygwō voi íxupe. Nhande reko me'ē ramo nhambo'e hagwā nhande rapixa-pe, iporā katu nhambo'e ave íxupe. ⁸ Nhande reko

* 11:34 Is 40.13 * 11:35 Jó 41.11

me'ē ramo nhamokyre'y' hagwā nhande rapixa-pe, iporā katu nhamokyre'y' voi íxupe. Nhame'ē-taramo nhane mba'e, iporā katu nhane rakate'y' e'y' reheve nhame'ē. Nhande, Hesu reroviaha rerekwa va'e, nhande hangareko porā katu nhande re'y' kwéry-rehe. Nhande rapixa-pe jaiporiahuvereko-ta ramo, nhane kyre'y' ramo nhaipytygwō íxupe.*

⁹ Ani pejoyhayhu ra'anga anga rei teĩ. Pejoyhayhu tee katu. Ivai va'e pemboyke katu pendéhegi. Ha iporā va'e-gwi katu ani pepoi teĩ. Eraha ne renonde-rupi joty. Pesegi porā joty katu. ¹⁰ Pejoyhayhu katu pejoygerovy'a rei-vy pende ryvy-rami pejoygeroko hagwā. Ani pene ate'y' penhomboete-vy.* ¹¹ Ipituva va'e-rami ani peiko teĩ. Pemba'apo mbaraete ae katu peiko-vy. Pene kyre'y' pende py'a ete gwive pejapo Nhandejáry nhe'ē. ¹² Peha'arō tee Nhandejáry pende reraha hagwā. Upéa-gwi pevy'a meme joty peiko-vy. Peiko asy ramo jepe ani pejapura. Ani pejapo ku'a ku'a rei oração. Pembojeupi meme katu Nhandejáry-pe pene nhe'ē. ¹³ Ha Hesu reroviaha katu pende ryvy-rami. Iporiahu va'e-pe ehaxakwaa katu ereme'ē-vy. Ani pene rakate'y' pene mba'e-rehe peme'ē hagwā íxupe. Ehaxakwaa joty íxupe. Ne mba'e eiporu uka meme joty íxupe. Ogwahê ou-vy ramo pende ha-py peikwaa e'y' va'e pemogwahê katu íxupe pene ndive opyta hagwā.

¹⁴ Peoporandu Nhandejáry-pe ohovasa hagwā pende rereko asyha-pe. “Ehovasa katu íxupe” peje. “Ehundi mani íxupe” ani peje teĩ Nhandejáry-pe hese.* ¹⁵ Ovy'a ramo nde rapixa evy'a joty indive. Ha hasê ramo katu ne rasê joty ave hendive. ¹⁶ Peteixa pejoygeroko. Pende joja katu peiko-vy onhondive. Ani penhemomba'egwasu rei teĩ. Nomomba'e gwasú va'e-pe pemoirũ joty. Ani, “Xe aranduve ko” peje rei pendéjehe.*

¹⁷ Aníke pejapo vai peẽ-my ojapo vai va'e-pe. Pejapo porā meme. Ani, “Hembiapo vai-ma” he'i pende-rehe hagwā-rami peiko.* ¹⁸ Ani katu pene a'e'y' ojóhe. Ikatu ramo, pejoygeroko rei enterovéa ndive. ¹⁹ Ani erejepy teĩ nde rapixa-rehe. Nhandejáry ae nde repy arã! Ombohasa asy va'erã íxupe.

“Xe ae orohepy va'erã. Nde-rehe hembiapo vaikwe-rehe xe ae orohepy va'erã, he'i Nhandejáry.” Upéixa he'i Nhandejáry kwatia nhe'ē.*

²⁰ Pende rereko asyha-pe pereco porā joty:

“Ivare'a ramo pemongaru joty íxupe. Ijy'uhéi ramo, pembo'y'u joty íxupe. Upéixa pereco ramo íxupe, pemotĩ va'erã íxupe. Pereco porā ramo íxupe, pejehexa uka porā joty va'erã íxupe onhemotĩ hagwā”.*

Upéixa he'i Nhandejáry kwatia nhe'ē.

²¹ Ani peheja ivai va'e ipu'akave pende-rehe. Pejapo katu iporā va'e penheme'ē e'y' hagwā ivai va'e-pe, pende pu'akave hagwā ivai va'e-rehe.

13

Iporā katu jajapo nhande ruvixa nhe'ē

(Mt 22.21; Mc 12.17; Lc 20.25; Tt 3.1; 1 Pe 2.13-17)

¹ Enterove tojapo nhande ruvixa nhe'ē. Ojéhegi rei ndoikói nhande ruvixarã. Nhandejáry nhe'ē-py ae nhande ruvixa ramo oiko. Oiko ramo nhande ruvixa ramo, Nhandejáry remimoingo upe va'e. ² Nhande ruvixa nhe'ē ojapo e'y' va'e gwive, Nhandejáry nhe'ē ndojapói ave va'erã. Upéa ojapo e'y' va'e-pe gwive ombohasa asy uka va'erã Nhandejáry. ³ Hembiapo porā va'e gwive ndaikyhyjéiry voi katu nhane ruvixa-gwi. Ha hembiapo vai va'e katu ikyhyje. Nhande ruvixa-gwi pende kyhyje e'y' reheve peiko porãse tipo? Pejapo porā. Upéa-rehe pende rerohory va'erã. ⁴ Nhandejáry rembigwái voi nhande ruvixa. Pende-rehe omba'apo va'e voi. Ha ne rembiapo vai ramo katu, pene mytu'e'y' pendéjehe. Ndogwereco asy uka reíry nhande ruvixa-pe Nhandejáry. Nhandejáry rembigwái voi nhande ruvixa. Inhe'ē-py hembiapo vai va'e-pe gwive ogwereco poxy va'erã. ⁵ Upéa-gwi aníke erehasa tekoha nhande ruvixa nhe'ē rendu e'y'-vy. Pehasa ramo tekoha pende rereko

* 12:8 1 Co 12.7-31, Ef 4.11-12,16; 1 Pe 4.10-11 * 12:10 Hb 13.1; 1 Pe 1.22 * 12:14 Lc 6.28 * 12:16 Pv 3.7

* 12:17 1 Pe 3.9 * 12:19 Dt 32.35 * 12:20 Pv 25.21-22; Mt 5.44; Lc 6.27-28

poxy arã. “Pehendu katu” he'i ave nde py'a-py onhe'ê va'e. Upéa-gwi pejapo katu nhande ruvixa nhe'ê.

⁶ Nhande ruvixa kwéry Nhandejáry remimomba'apo voi. Nainhate'ýi omba'apo-vy. Upéa-gwi imposto okovra ramo, eme'ê íxupe ojerure va'e. ⁷ Peme'êmba porã katu pereve va'e-pe. Oime raê va'e imposto okovra va'e, taxa okovra va'e peme'ê katu ave íxupe. Nhamboete va'erã gwive pemboete katu. Peteĩ teĩ va'e-pe pemomba'egwasúke pemboete-vy.*

Jajogwereco porã jaiko-vy
(Mt 22.39-40; Gl 5.14; 1 Jo 3.11)

⁸ Pereve va'e gwive pepaga mani katu íxupe. Iporã “Jajohayhu voi” peje katu pendéjehe. Ha ha'e-ta ave peê-my, Pejohayhu porãve ráve katu peiko-vy. Ne'írã pejohayhu porã tee rei. Gwapixa rayhuha oiko Moisés amyri remimombe'ukwe tekoha-rupi. ⁹ Upe tekoha a-rami he'i:

“Ani peiko onhoembireko ndive onhome ndive ave. Ani peporojuka. Ani pemonda. Ani pene mba'e pota pota rei teĩ peiko-vy”.

Upéixa voi upe tekoha.

Oĩ ave tuvixave va'e. Ha upe tekoha he'i va'e gwive peteĩ nhe'ê-py ogwenohêmba:

“Ehayhu katu nde rapixa-pe nde rekove erehayhuha-rami”

he'i. Upe va'e nhe'ê-py omombe'upa Moisés amyri he'ise va'ekwe. ¹⁰ Gwapixa rayhuha ndojapo vaíry hese. Upéa-gwi jajohayhu ramo, upe tekoha tee va'e gwive-rupi jaiko.*

¹¹ Áy peikwaa voi ogwahêmba ou-vy pende óra, oke va'ekwe opáy jevy-ma va'e-rami peiko hagwã. Upéa-gwi peiko katu tekoha-rupi. Hesu-rehe jajerovia ppy hagwe are-ma voi. Áy hi'agwive-ma oĩ nhandéhegwi nhane resendeharã áry. Upéa-gwi ogwahê-ma ou-vy pende óra anive peiko hagwã oke va'e-rami. Oke va'e-rami peikove teĩ. Áy tapeiko porã katu. Opáy porã va'e-rami jevy katu tapeiko. ¹² Pytũ-rupi oiko va'e-rami peê. Ha ko'ángã katu pyhare-rupi rei ereiko va'ekwe nde-vy opa-tama. Ko'ê ou va'e-rami nde-vy ereiko porã-tama. Upéa-rehe anive peiko pytũ-my oiko va'e reko-rupi. Arakatu-py oiko va'e reko-rupi ae peiko. Pono pende reity gweko-rupi anháy, nhande rete jokoha jaiporu vérami peiporu porã katu pene arandu arakatu pygwa peiko porã hagwã. ¹³ Arakatu pygwa-rami jaiko. Ani nhanhemotĩ hagwã-rami jaiko teĩ. Anive peka'u teĩ. Ani ave pemoirũ oka'u va'e-pe. Peiko ae katu arakatu pygwa-rami. Pejohu va'e rei-pe ani ave pemoirũ teĩ. Ani otĩ kwaa e'ý va'e-rami peiko teĩ. Arakatu pygwa-rami ae katu peiko. Ani ave pejeteta teĩ. Ani ave pejohu vai teĩ pende rapixa oiko porãha. ¹⁴ Ha pemoirũ katu peteixa Nhandejáry Hesu Cristo. Penhembojáry katu hese peiko hagwã hekoha-rupi. Anive peiko pendéjhegwi anho rei pejapose va'e rei-ma pejapo hagwã.

14

Ani “Tekoha-rupi ndoikóiry” peje mo'ã Hesu reroviaha va'e-rehe
(Mt 7.1-2; Rm 2.1-3; 15.7; 1 Co 10.25-33)

¹ Oĩ pene pa'ũ-my ne'írã ogwerovia tee va'e. Perohory joty íxupe pemogwahê-vy. Ha pemogwahê rire íxupe katu, ani pembovyte teĩ íxupe penhombo'e vai-vy. Ani “Ndatekoháiry nde rekoha. A-rami ae tekoha” peje rei teĩ íxupe. ² Ogwerovia porã va'e, ojohu va'e ho'u. Ha ogwerovia miximi va'e katu ndo'u katúu so'o. ³ Ha ojohu va'e ho'u va'e, tonhe'ê rei e'ý katu ndo'u katúu va'e-rehe. Ha so'o ho'u katu e'ý va'e katu, Ani “Ndikatúu ere'u so'o” he'i teĩ gwapixa-pe, ojohu va'e ho'u va'e-pe. Hemiapo ojohu porã ave Nhandejáry. Upéa-gwi, Ani “Tekoha e'ý-rupi ereiko” he'i hese. ⁴ Ndikatuíry ere rei nde rapixa rembigwái-rehe, “Upéa ndoikói tekoha-rupi”. Ani eremombe'u teĩ hembiapo. Ijáry ae omombe'u va'erã íxupe hembiapo-rehe. Ojohu porã para'e, ojohu vai para'e. Ijáry ae omombe'u va'erã íxupe. Ha Nhandejáry katu ojohu porã voi hembiapo. Upéa-gwi ojohu porã va'erã hese Nhandejáry. Cristo rape-gwi ndovái va'erã.

* 13:7 Mt 22.21; Mc 12.17; Lc 20.25; Tt 3.1; 1 Pe 2.13-17

* 13:10 Êx 20.13-17; Dt 5.17-21; Lv 19.18; Mt 22.39-40; Gl

5.14; 1 Jo 3.11

⁵Ha arete rehegwa katu pemombe'u joavy avy. “Oĩ nhamboeteve va'e áry” oĩ he'i va'e. “Áry meme peteĩxa” oĩ he'i va'e. Ani, “Mba'eixagwa po tekoha” ere teĩ ndejeúpe. “A-rami voi xe rekoha” peteĩ teĩ he'i ae ojeúpe. Peteĩ teĩ toikwaa porã ha'e ae gwekoha hapixa rembiapo ojohu vai e'ỹ reheve. Ojokoha ojohu vai e'ỹ reheve, peteĩ teĩ jotapo ipy'a oipotaha-rupi. ⁶Pejeapysaka porã katu xe nhe'ẽ-rehe. “Etería arete tuvixave va'e” oĩ he'i va'e, Nhandejáry-pe omboeteha-rami omboete ave arete-pe. Ha so'o ho'u va'e katu Nhandejáry-pe omboeteha-rami ho'u ave so'o. So'o ho'uha-rehe otima porã ave Nhandejáry-pe. Ha so'o ho'u e'ỹ va'e katu Nhandejáry omboeteha-rami, ndo'úi ave so'o. Ndo'úi ramo jepe, otima porã joty Nhandejáry-pe. ⁷Nhandéjehe anho rei ndajaikóiry. Nhandéjehe anho rei nanhamanói ave. ⁸Jaiko jave Nhandejáry mba'e voi nhande. Ha nhamano rire Nhandejáry mba'e teerã voi jaha arã. Upéixa ramo jaikove ramo jepe, nhamano ramo jepe imba'e tee voi nhande. ⁹Upéa-rehe omano-ma va'ekwe Cristo. Upéi oikove jevy-ma va'ekwe nhande jaiko va'e jaryrã nhamano va'ekwe jaryrã ave. ¹⁰Upéixa ramo, nde ko ma'erã tipo nde erejohu vai Hesu reroviaha va'e rembiapo? Ma'erã tipo erenhe'ẽ mbojevvy nde rapixa-pe, nde reko-rupi ndoikói-gwi. Nde katu ma'erã erenhe'ẽ rei ereiko-vy nde rapixa-rehe? Ha nhande kwéry katu nghanhembo'y-ma va'erã nhaĩ-vy Nhandejáry rovagwy-py omombe'u haggwã nhande-vy nhane rembiapokwe. Iporã para'e, naiporã para'e he'i va'erã nhande-vy.* ¹¹A-rami he'i Nhandejáry kwatia nhe'ẽ: “Ha'e ete-ma peẽ-my. Xe rekoha apu e'ỹ va'e xe. Xe rovagwy-py enterove onhesũ va'erã peteĩxa. Peteĩxa ogwerosapukái va'erã xe Nhandejáry voiha”.*
Upéixa he'i Nhandejáry kwatia nhe'ẽ.

¹²Upéa-gwi peteĩ teĩ nghanhemombe'u va'erã Nhandejáry-pe nhane rembiapo apokwe-rehe.

Anike erembojevvy uka nde rapixa-pe

(1 Co 8.9-13)

¹³Ja'u ramo so'o, ndaja'u katúi ramo so'o ave, peteĩxa. Upéixa ramo, Anive “Tekoha e'ỹ-rupi ereiko” ja'e nhande rapixa-pe. Anive nghanhombo'e vai hese. Ja'e ae katu nhande re'ýi-rehe “Xe re'ýi-pe ambojevvy uka ramo, hesa-py ndaiko mo'ãi xe rekoharupi. Ndajapo mo'ãi xe ajaposeha-rami. Nambojevvy ukaséi íxupe” ja'e nhandejeúpe. ¹⁴Tekoha xe aikwaa porã voi Cristo xe mo'arandu-gwi. Oĩ he'i va'e mo'ã “Kóá ja'u va'erã, upéa ja'u e'ỹ va'erã” he'i mo'ã. Ha upe va'e-rehe “Ja'u e'ỹ va'erã” nde'íry Nhandejáry. Ha “Ja'u e'ỹ va'erã nipo ra'e upéa” he'i va'e katu ndoikwaáiry tekoha. Ha'e ae gwekoharupi oiko. Upéixa ho'u ramo gwembi'u e'ỹ, “Ajevvy-ma” he'i va'erã ójehe. ¹⁵Ha, “Ne rembi'u e'ỹ katu iporã ja'u” ere ramo nde rapixa-pe, nerembovy'avéi-ma va'erã íxupe. Nderehayhuvéi-ma va'erã hereko-vy. Nde rapixa-rehe omano-ma va'ekwe Cristo. Tuvixa mba'e nde rapixa Cristo-pe upéa-gwi. Upéa-gwi ani pe'u teĩ hembu'u e'ỹ nde rapixa resapy. Erembojevvy uka arã íxupe. Ojehesa rerova arã Cristo-gwi. ¹⁶Peiko arandu katu. Ani ojohu vai teĩ pene remimoporã. ¹⁷Nhande ruvixa ramo oiko ramo Nhandejáry, “Kóá nhane rembi'u, upéa nhane rembi'u e'ỹ” nde'íry nhande-vy. He'i ae nhande-vy: “Pene potĩ-ma” he'i. “Tekoha-rupi peiko. Pejevvy e'ỹ reheve peiko” he'i. “Pende joja porã katu onhondive” he'i. “Tapene mbovy'a katu Nhe'ẽ Marangatu tee va'e” he'i ae nhande-vy. ¹⁸Upéixa Cristo rembigwái va'e ombovy'a ave Nhandejáry-pe. Imandu'a porã ave hese teko rei.

¹⁹Upéixa-gwi nhane renonde-rupi meme jaraha katu nhande joja haggwã. Nghanhombarae katu jaiko porã haggwã. ²⁰Anike erembyai teĩ Nhandejáry remimoingo hembu'u e'ỹ ere'u-gwi nhande rapixa resapy. Hi'upy gwive iporã ja'u ramo jepe, naiporã joty nhambojevvy uka nhande rapixa-pe. Hembu'u e'ỹ ja'u-vy nhambojevvy uka ramo ave íxupe, naiporã katu ojehesa rerova va'erã Cristo-gwi. ²¹Hembu'u e'ỹ ere'u-vy erembojevvy uka ramo ave nde rapixa-pe, anive ere'u so'o, anive ere'u uva rykwere ave. Oime raẽ va'e-py erembojevvy uka va'erã íxupe, anive erejapo teĩ. ²²Upéixa-gwi ne rembijohu

* 14:10 2 Co 5.10 * 14:11 Is 45.23

porā ani eremombe'u teĩ avave-pe. Nhandejáry anhóte toikwaa. Ha gwembijohu porā ojapo va'e katu, "Iporā para'e xe rembiapo, naiporāi para'e xe rembiapo" he'i rei ramo ójehe, ndovy'áiry. Ndogwerovy'apái gwembiaipo. Ha ojerovia tee ramo ójehe, ogwerovy'a gwembiaipo. ²³Ha ndojeroviapáiry va'e ho'u va'erā-rehe katu gwembi'u e'ỹ ho'u ramo, gwembijohu vai ho'u joty ramo, ndojohu porāi íxupe Nhandejáry. Jajerovia ku'a ku'a nhandejeheha ndojohu porāi voi Nhandejáry. Ha'e-ta peẽ-my. Nhande rembiaporā-rehe ndajajeroviapáiry ramo, jajejavy joty voi jajapo-vy.

15

Ani nhandéjehe anho rei jaiko. Nhande rapixa-pe nhambovy'a ave
(1 Co 10.24; Fp 2.3-5; 2 Tm 3.15-17)

¹Ha nhande nhandéjehe jajeroviapa va'e katu ani jajere teĩ gwĩ ogwerovia mixĩ mixĩ va'e kwéry-gwi. Túvy-rami ae jareko íxupe. Ani nhambovy'are'ỹ íxupe nhandéjehe anho rei jaiko-vy. ²Nhande kwéry nhambovy'a ae katu nhande rapixa-pe oiko porāve hagwā ogwerovia porāve hagwā. ³Ha Cristo katu ha'e jepe ójehe anho rei ndoikói va'ekwe. Hekovia ohasa asy va'ekwe. Upéixa he'i hese Nhandejáry kwatia nhe'ẽ:

"Nde-rehe onhe'ẽ rei rei hagwe-rami, ãy onhe'ẽ rei rei-ma xe-rehe ave".*

Upéixa he'i Nhandejáry kwatia nhe'ẽ Cristo-rehe.

⁴Yma va'ekwe entéro Nhandejáry kwatia nhe'ẽ gwive ohai va'ekwe nhande renonderā nhande mbo'e hagwā. Upe va'e nhe'ẽ-py gwive nhande mbo'e jajapura e'ỹ hagwā, nhande kyre'ỹ hagwā pono jajehesa rerova íxugwi, nhaha'arō tee hagwā Nhandejáry-pe, jaiko meme hagwā hendive nhande reraha hagwā. ⁵⁻⁶Ojéhegwi nanhande rerova ukái va'e Nhandejáry. Nhande mbopy'agwasu ae ojéupe, nhande mokyre'ỹ ave ojéupe. Tapene moingo Cristo reko-rupi penhe'ẽ joavy avy e'ỹ hagwā ojéupe, pende joja hagwā, peteixa pemomba'egwasu joa hagwā íxupe ojojurupya penhe'ẽ-vy. Ha'e ko Nhandejáry Hesu Cristo Ru voi.

Hesu Cristo rehegwa nhe'ẽ porā nhande kwéry e'ỹ pegwarā nhe'ẽ ave

⁷Upéixa-gwi pende rerohory hagwe-rami Cristo, peẽ ave pejogwerohory porā katu ojóupe, Nhandejáry-pe pemomba'egwasu hagwā. ⁸Are-ma oiko va'ekwe Cristo judeu kwéry pytygwōharā, "He'i hagwe-rupima ojapo" ja'e hagwā Nhandejáry-rehe. "Jahexama katu ãy nhande rembypy-pe hemimombe'ukwe" ja'e hagwā hese. ⁹Cristo oiko-ma va'ekwe nhande kwéry e'ỹ va'e ave, judeu e'ỹ va'e, omomba'egwasu hagwā Nhandejáry-pe, "Nhande reko poriahuvereko-ma" he'i hagwā hese. Upéixa he'i Nhandejáry kwatia nhe'ẽ:

"Upéa-gwi nhande kwéry e'ỹ pa'ũ-my atima porā-ta nde-vy. Nde réry-pe amomba'egwasu-ta aporahéi-vy nde-vy."*

Upéixa he'i Nhandejáry kwatia nhe'ẽ Nhandejáry-pe omboeteha-rehe Cristo.

¹⁰"He'íy e'ỹ tovy'a katu Nhandejáry re'íy ndive"*

he'i jevy Nhandejáry kwatia nhe'ẽ judeu kwéry e'ỹ va'e-rehe.

¹¹"Entéro nhande kwéry e'ỹ va'e gwive tomomba'egwasu Nhandejáry-pe. Judeu kwéry e'ỹ va'e gwive peteixa tomboete ave íxupe"*

he'i jevy Nhandejáry kwatia nhe'ẽ judeu kwéry e'ỹ-rehe.

¹²"Ojekwaa va'erā ou-vy myamyri Jessé remiarirō joapyri pyrirā. Omoingo va'erā íxupe nhande kwéry e'ỹ ruvixarā. Oha'arō tee va'erā íxupe hikwái."*

Upéixa he'i Cristo-rehe Nhandejáry kwatia nhe'ẽ Isaías rembihaikwe.

¹³Ha Nhandejáry onheha'arō tee uka va'e nhande-vy voi. Perovia-gwi íxupe, tapene mbovy'a vy'apa katu. Tapene mbopy'agwapy gwapypa katu ave. Upéixa-gwi pene mombaraete ete-gwi Nhe'ẽ Marangatu tee va'e peha'arō teeve eve va'erā Nhandejáry-pe.

* 15:3 Sl 69.9 * 15:9 2 Sm 22.50; Sl 18.49 * 15:10 Dt 32.43 * 15:11 Sl 117.1 * 15:12 Is 11.10

Amondo-vy peē-my xe kwatia nhe'ē, ha'ese va'e gwive atī e'ŷ reheve ha'epa ete-ma voi peē-my

¹⁴Ha xe katu, xe re'ŷi kwéry, pende rekoha porāha aikwaa porā voi xe. Pene arandu porāha xe aikwaa voi. Penhomo'arandu porā kwaa voi. Pende rekoha kwaaha voi xe. ¹⁵⁻¹⁶Ha oī Nhandejáry nhe'ē aipota pende resarái e'ŷ va'e íxugwi. Upéa rehegwa amombe'upa-ma peē-my. Natīry amombe'u-vy. Are-ma xe rexakwaa rei-ma va'ekwe Nhandejáry. Xe moī-ma va'ekwe Hesu Cristo rembigwairā amba'apo hagwā judeu kwéry e'ŷ va'e-rehe. Upéa-gwi natīry Nhandejáry rehegwa nhe'ē amombe'upa-vy peē-my. Ha pa'i kwéry katu ome'ē me'ē Nhandejáry-pe oipota va'e ombovy'a hagwā íxupe. Upéixa pa'i-rami xe ave ambovy'ase Nhandejáry-pe. Upéa-gwi amombe'u mbe'u Nhandejáry gwigwa nhe'ē porā. Aipota Nhe'ē Marangatu tee va'e omomarangatu judeu kwéry e'ŷ va'e-pe. Aipota Nhandejáry ogwerovy'a íxupe kwéry, aipota omogwahē íxupe kwéry oha-py. ¹⁷Cristo Hesu xe rereko ha-py amba'apo-gwi Nhandejáry-pe, xe rembiapo ambotuvixa mba'e. ¹⁸Outrope Cristo rembiapo uka namombe'u mo'ái. Xe-vy hembiaapo uka mante amombe'u-ta, natīry amombe'u-vy. Cristo rekovia ahendu uka-ma va'ekwe judeu kwéry e'ŷ va'e-pe Nhandejáry nhe'ē. Amombe'u ramo, xe rembiapo porā ramo ave, ahendu uka íxupe kwéry inhe'ē. ¹⁹Xe mombaraete-ma va'ekwe Nhe'ē Marangatu tee va'e hexapyrā-rupi xe rembiapo porā hagwā xe ajapo hagwā jahexa e'ŷ va'e. Upéixa-gwi Cristo rehegwa nhe'ē porā arosapukaipa. Jerusalém tetā-my amombe'upa va'ekwe. Upe-gwi arojere jere aha-vy va'ekwe. Ilíría vvy peve aha va'ekwe amombe'u-vy. Opa-rupi amombe'upa va'ekwe nhe'ē porā. ²⁰Peteixa xe ajapose. Cristo réry rendu e'ŷha-rupi arosapukaise nhe'ē porā imombe'u-vy. Cristo réry rendu ha-rupi ndarosapukaiséi. Outro kwéry hembiaopo ranhe ha-rupi ndahaséry xe ave xe rembiapo hagwā upe-rupi. Ndashaséry outro nhe'ē rapykwéri anhe'ē-vy. Nambojo'aséi outro rembiapokwe ári xe rembiapo. ²¹Upéixa voi he'i Nhandejáry kwatia nhe'ē:

“Gwí ohendu e'ŷ va'e hesegwa nhe'ē ohexa kwaa va'erā hese hekoha. Gwí herakwā rendu e'ŷ va'e oikwaa va'erā íxupe”^{*}
he'i Nhandejáry-rehe.

“Ahase Roma tetā-my” he'i Paulo kwatia-rehe

²²Are-ma ahase rei aiko-vy pene renda-py. Outro tetā tetā-rupi nhe'ē porā amombe'u-vy aiko. Upéa-gwi ndahái pende ha-py.^{*} ²³Ha ko'ánga katu xe aiko ha-rupi opa-ma xe rembiaporā. Heta ro'ŷy-ma ojapo orohexase hagwe. ²⁴Áy katu ikatu ramo, orohexa-ta. Aha ramo Espanha vvy-koty nde ha-rupi ahasa-ta aha-vy pende ha-py. Ha ndaxe are mo'ái pene ndive apyta-vy. Ha upe rire katu, xe mbovy'a rire, aipota xe pytygwō ahave hagwā mombyryve Espanha vvy-py. ²⁵Áy ete katu aha ranhe-ta Jerusalém tetā-my Nhandejáry re'ŷi pegwarā araha va'erā. ²⁶⁻²⁷Ha Hesu reroviaha gwive Macedônia vvy-rupi, Grécía vvy-rupi ave onhomboaty aty va'e he'i kuri Nhandejáry re'ŷi-rehe Jerusalém pygwa-rehe. Ha'e ae onhe'ē-py he'i: “Nhamono'ō jaraha uka va'erā nhamē'ē va'erā upe-py iporiahu va'e pegwarā” he'i Nhandejáry re'ŷi-rehe.^{*} “Nhamboaty jaraha uka va'erā” he'i ojéhegwi rei. Ha ha'e-ta peē-my: Oreveha ome'ē gwí iporiahu va'e-pe. Nhande-vy ime'ēpyre nhamē'ē jevy ave va'ekwe judeu kwéry e'ŷ va'e-pe hi'arandurā. Upéixa-gwi nhamē'ē va'ekwe rekovia iporā ome'ē jevy nhande-vy nhane remikotevē.^{*} ²⁸Ha upe rire katu ajapopa rire ame'ēmba rire íxupe omono'ō va'ekwe, Espanha vvy-koty aha-ta. Tape ku'a-gwi agwahē arā nde ha-py. ²⁹Pende ha-py agwahē aha-vy ramo, apohovasa uka porā va'erā Cristo-pe. Cristo remime'ērā gwive ame'ēmba va'erā peē-my. Anhetegwa voi amombe'u peē-my.

³⁰Áy xe re'ŷi kwéry, Nhandejáry Hesu Cristo-rehe jajerovia-gwi, nhane mbojohayhu uka-gwi Nhe'ē Marangatu, aporandu-ta peē-my: Ani pene ate'ŷ teí oraçãõ apo-vy xe-rehe. Xe ndive katu pembojeupi upi pene nhe'ē Nhandejáry-pe. ³¹Peje Nhandejáry-pe: “Eresende katu Paulo-pe Judéia pygwa po-gwi heroviaha e'ŷ va'e-gwi eresende íxupe”

* 15:21 Is 52.15 * 15:22 Rm 1.13 * 15:26-27 1 Co 16.1-4 * 15:26-27 1 Co 9.11

peje. “Ani omotĩ teĩ Paulo-pe ome'ẽ-ta va'e-rehe Nhandejáry re'ýi Jerusalém pygwa-pe” peje Nhandejáry-pe xe-rehe oração apo-vy. ³²Upéixa ramo Nhandejáry xe mogwahẽ-ta ramo, xe py'a rory-gwi rei agwahẽ-ma va'erã pende ha-py. Xa avy'a-ma va'erã atongea-ma va'erã apytu'u-vy pende ha-py. ³³Nhane mbopy'agwapy va'e voi Nhandejáry. Tapene moirũ oiko-vy. Amém.

16

Paulo omombe'u Hesu reroviaha Roma pygwa-rehe omandu'a porãha

¹Amombe'u-ta peẽ-my nhande re'ýi Febe héry va'e rehegwa nhe'ẽ. Hekoha porã pe kunha. Hesu reroviaha Cencreia tetã-my onhomboaty va'e pytygwõha voi pe kunha. ²Ha'e Cristo irũ voi. Upéa-gwi pemogwahẽ katu íxupe. Nhande kwéry jarovia va'e nhanhomogwahẽ porã katu. Upéa-gwi pemogwahẽ porã katu íxupe ave. Heta õi hemipytygwõ. Ha xe-vy xe pytygwõ ave. Upéa-gwi, pendéhegwi ha'e oikotevẽ ramo, peme'ẽ katu íxupe.

³Amombe'u-ta xe mandu'a porãha ave Priscila-pe Áqüila ndive. Xe ndive omba'apo Hesu Cristo-pe. ⁴Xe-rehe ha-py nahakate'ýiry va'ekwe gwekove-rehe. Xe-rehe ha-py ojejuka hagwã-rami joty oiko va'ekwe. Xe rayhu tee hagwe-rehe, xe atima porã íxupe. Naxe anhoíry atima porã íxupe. Entéro Hesu reroviaha gwive judeu kwéry e'ý va'e, onhomboaty aty ha-rupi, otima porã ave íxupe. ⁵Ha'e uka-ta ave xe mandu'a porãha Hesu reroviaha-pe gwive upe mokõi va'e róga-py onhomboaty va'e. Ha'e uka-ta ave xe mandu'a porãha Epêneto-pe. Ha'e xe rembiayhu voi. Ásia yvy-py ha'e anho ranhe ojerovia ppy-ma va'ekwe Cristo-rehe. ⁶Ha'e uka-ta ave Maria-pe xe mandu'a porãha. Heta omba'apo pende-rehe. ⁷Amombe'u uka-ta ave Andrônico-pe Júnias ndive. Ha'e xe rugwy re'ýi tee voi. Preso aĩ ramo xe moirũ-ma va'ekwe upe-py. Hesu remimondo upéa. Enterove mandu'a porãha. Voive ogwerovia-ma va'ekwe Cristo-pe xe renonde-py. Hapykwéri-ma xe ajerovia va'ekwe Hesu-rehe.

⁸Ha'e uka-ta ave Ampliato-pe. Xe rembiayhu voi. Cristo irũ va'e. ⁹Ha'e uka-ta ave Urbano-pe. Cristo-pe oromba'apo ramo ore irũ voi. Xe rembiayhu Estáquis-pe ave ha'e uka-ta xe mandu'a porãha. ¹⁰Ha'e uka-ta ave Apeles-pe. “Cristo-rehe ojerovia tee-ma nipo ra'e” he'i hese imandu'a porã-vy. Aristóbulo róga pygwa-pe ave ha'e uka-ta. ¹¹Ha'e uka-ta ave Herodião-pe. Ha'e xe rugwy re'ýi tee voi. Hesu reroviaha Narciso róga pygwa-pe ha'e uka-ta ave.

¹²Amondo-ta ave xe mandu'a porãha Trifena-pe Trifosa ndive. Pe kunha omba'apo Cristo-pe. Pérside-pe amondo-ta ave. Pe kunha ave heta omba'apo Cristo-pe. ¹³Amondo-ta Rufo-pe xe mandu'a porãha. Cristo-pe omba'apo ramo imandu'a porã hese. Isy-pe ave amondo-ta. Omemby-rami hembiereko ave xe. ¹⁴Amondo-ta Asíncrito-pe, Flegonte-pe ave xe mandu'aha. Amondo-ta ave Hermes-pe, Pátrobas ndive Hermas-pe ave. Indive kwéry Hesu reroviaha-pe gwive ha'e uka-ta. ¹⁵Ha'e uka-ta Filólogo-pe Júlia ndive. Heindýry ndive Nereu-pe, Olimpás-pe ave, indive kwéry Nhandejáry re'ýi õi va'e-pe gwive ha'e uka-ta xe mandu'a porãha.

¹⁶Pejohayhu-gwi, penhokwavã kwavã katu peiko-vy onhondive. Entéro Cristo reroviaha gwive onhomboaty aty ha-rupi omondo-ta peẽ-my omandu'a porãha.

“Ani pene mitã arandu teĩ. Peiko arandúke” he'i Paulo

(Mt 7.15-20; Ef 5.6-7; Cl 2.8; 1 Jo 4.1-6)

¹⁷Õi onhe'ẽ rei rei va'erã nhande joja e'ý hagwã. Nhande rerovase Cristo-gwi. Aporandu randu-ta peẽ-my, xe re'ýi kwéry: Perepara kena hese hekoha rexa-vy. Peiko arandu kena. Ani pemoirũ teĩ íxupe. Orombo'e hagwe-rami, napene mbo'úi va'erã. Pende rerovase-vy omombe'u a'ã a'ã va'erã peẽ-my Cristo nhe'ẽ. ¹⁸Upéa rehegwa apoha Nhandejáry Hesu Cristo-pe noipytygwõry. Ójehe anho rei omba'apo oiko va'e. Cristo pytygwõha e'ý voi gwã. Ojapose va'e rei-ma ojapo. Onhe'ẽ porã va'e vérami rei-ma oiko-vy. Onhe'ẽ-py oporombotavy. Inhe'ẽ reroviaha-pe, mitã arandu-rami itavy rei rei va'e-pe ave ombotavy. Ndohexa kwaái ha nohendu kwaáiry. Upéa-gwi ogwerovia mo'ã. ¹⁹Pende-rehe ae enterove

imandu'a porã: “Ogwerovia tee voi íxupe, Cristo-gwi ojehesa rerova e'ÿ va'e” he'i pende-rehe. Upéa-gwi avy'a pende-rehe. Aipota pene arandu. Pejapo porã kwaa katu. Ani erejapo vai kwaa teĩ. ²⁰Ha Nhandejáry nhane mbopy'agwapy voi ani hagwã nhande joja e'ÿ teĩ onhondive. Ndahi'are mo'ãi, pene pytygwõ-ta kuri. Mbóí ijukapyre-rehe nhapyrũharãmima, pene mbopu'aka uka-ta kuri anháy ruvixa Satanás-rehe.

Tapende rovasa katu Nhandejáry Hesu pende rexakwaa rei-vy

²¹Ha Timóteo katu xe rembiapoha irũ va'e omondo-ta peẽ-my omandu'aha. Omondo-ta ave xe rugwy re'ÿi Lúcio, Jasão, Sosípatro ave.

²²Ha xe Tércio, Paulo nhe'ẽ raiha, Hesu reroviaha va'e ave, amondo-ta ave peẽ-my xe mandu'aha.

²³Omondo-ta ave omandu'aha Gaio. Hóga-py aime. A-py ave ojogweroaty haty Hesu reroviaha. Omondo-ta ave omandu'aha Erasto, ko tetã mygwa ome'ẽ va'ekwe pirapire nhongatuha. Quarto, nhande re'ÿi omondo-ta ave omandu'aha. ²⁴Tapende rovasa vasa Nhandejáry Hesu Cristo pende rexakwaa rei-vy. Amém.

Ipaha-ma omboete Nhandejáry-pe Paulo

²⁵Nhamomba'egwasúke Nhandejáry-pe. Hesu rehegwa nhe'ẽ porã xe remimombe'u pehendú ramo, pene moingo kwaa Nhandejáry tape porã-rupi pejehesa rerova e'ÿ reheve. Yma gwembiaporã nhongatu araka'e avave-pe nomombe'úi araka'e gwembiaporã. Ha upe rire katu nhande-vy omombe'u oikwaa uka-vy gweminhongatugwe. Anhetegwa va'e omombe'u va'e. Upéa rehegwa nhe'ẽ pehendú ramo, pene moingo kwaa Nhandejáry tape porã-rupi pejehesa rerova e'ÿ reheve. ²⁶Ha ko'ánga katu heminhongatu omombe'u atýra-py Nhandejáry nhe'ẽ omombe'uhaty kwatia-rehe oikwaa uka-vy nhande-vy. Ha Nhandejáry opa e'ÿ va'e ha'e ae ave oikwaa uka. Nhandejáry nhe'ẽ-py ojekwaa-ma entéro tetã tetã mygwa-pe gwive, hembaporã enterove va'e ogwerovia ramo ojapo hagwã inhe'ẽ.

²⁷Nhande rexakwaa porã rei va'ekwe Hesu Cristo. Upéa-gwi tomomba'egwasu meme katu Nhandejáry-pe. Ha'eixagwa hi'aranduve va'e ndoikóiry. Upéa-gwi tomboete katu íxupe opa e'ÿ reheve. Amém.

Paulo remimombe'ukwe
Corinto tetã mygwa pegwarã 1
primeira epístola de Paulo aos coríntios

Paulo ohai kwatia nhe'ê Corinto tetã mygwa kwéry-pe

^{1,3}Hesu Cristo reroviaha, Nhandejáry remienói gwe'yí kweryã, gwemimomarangaturã, Corinto tetã-my peiko va'e, opa-rupi Hesu Cristo réry renoiha gwive va'e ave. Xe, Paulo amondo uka-ta peê-my xe nhe'ê. Xe, nhande re'yí Sóstenes ndive, oromondo uka-ta ore nhe'ê peê-my gwarã. Kwatia-rehe oromoimba-ta ore nhe'ê peê-my. Tapende rovasa katu Nhandejáry Nhande Ru va'e pende rexakwaa rei hagwã, pene mbopy'agwapy hagwã. Tapende rexakwaa katu Nhandejáry Hesu Cristo ave. Xe, Paulo, Hesu Cristo remimondo voi xe. Nhandejáry xe renói va'ekwe aiko hagwã hemimondorã. Hemimbota-rupi aiko Hesu Cristo remimondorã.

⁴Ha xe mandu'a meme pende-rehe anhomongeta jave Nhandejáry ndive. “Atima porã nde-vy” ha'e Nhandejáry-pe. “Erehovasa porã-ma Corinto pygwa kwéry-pe. Upéa-rehe atima porã nde-vy” ha'e Nhandejáry-pe pende-rehe.

Hesu reroviaha va'e-rehe Nhandejáry onhangareko porã

⁵Peê peteĩ teĩ pejerovia-ma Hesu Cristo-rehe. Upéa-gwi onhangareko porã porã pende-rehe Nhandejáry. Peiko-ma peteĩxa Hesu Cristo ndive. Indive meme-ma peiko. Upéa-gwi ome'ê meme-ma peê-my opa pene remikotevê. Pene mbopy'a kyre'y. Peteĩ teĩ-pe pene arandurã ome'ê-ma peê-my, pene nhe'ê ngatu porãrã ave ome'ê peê-my pemombe'u porã hagwã anhetegwa nhe'ê, Nhandejáry Hesu Cristo rehegwa nhe'ê pemombe'u porãve rãve hagwã.

⁶Peikwaa porã-ma Cristo rehegwa nhe'ê. Pejerovia-ma hese-gwi inhe'ê-rupi peiko-ma ra'e. ⁷Upéa-gwi Nhandejáry Nhe'ê Marangatu tee va'e ome'ê-ma peê-my entéro mba'e ha'e ogwereco ome'ê hagwã nhande-vy. Perekopa-ma ra'e hemime'égwe kwéry. Ha upe jave peha'arõ Nhandejáry Hesu Cristo ou jevy hagwã óra. ⁸Upe va'e áry-py peha'arõ jave pene mombaraete meme va'erã Nhandejáry. Upéa-gwi Hesu Cristo ogwahê-ma ramo ojehexa uka-vy “Nde py'a potĩ-ma” he'i va'erã peteĩ teĩ-pe peê-my.

⁹He'i hagwe meme Nhandejáry ojapo. Onhe'ê-gwi ova e'y va'e voi Nhandejáry. Ha'e pene renói va'ekwe peiko hagwã peteĩ heko porã-rupi ta'yry Hesu Cristo ndive. Nhandejáry tee voi Hesu Cristo.

Peteĩxa tapeiko

(Rm 15.5; Ef 4.3)

¹⁰⁻¹¹Tapehendu porã mani xe nhe'ê, xe re'yí kwéry Hesu reroviaha va'e kwéry. Pene rerakwã vai nipo ra'e. Ogwahê-ma xe-vy pene pemombe'uha. Pejoavy avy-ma nipo ra'e onhondive. Cloe re'yí kwéry omombe'u kuri xe-vy: “Corinto tetã-my oiko va'e kwéry Hesu reroviaha va'e ndoiko porãiry onhondive”. Aipo he'i kuri pene rerakwã mombe'u-vy. Pene rerakwã ahendu-gwi ajerure-ta peê-my pejohayhu rei hagwã peiko porã meme hagwã onhondive. Nhandejáry Hesu Cristo réry-py ajerure peê-my anive hagwã penhonhe'ê mbojevny jevy. Taperojaja kena onhondive pene nhe'ê. Peteĩxa pereko porã kena pende reko porã onhondive. Penhomongeta ramo ojojurupya kena peĩ. Peteĩ-rupi meme pereko kena pene nhe'ê porã.

¹²Amombe'u jevy-ta peê-my pene rerakwã ahendu kuri. Penhe'ê rei ra'e pene mbo'eha kwéry-rehe. Gwĩ onhe'ê rei va'e xe-rehe he'i “Ore orohenduse Paulo remimombe'u mante” he'i. Gwĩ outro “Ore orohenduse Apolo remimombe'u mante” he'i Apolo-rehe. Gwĩ outro “Ore orohenduse Pedro remimombe'u mante” he'i Pedro-rehe. Gwĩ outro “Ore orohenduse Cristo remimombe'u mante” he'i Cristo-rehe. Upéixa penhonhe'ê mbojevny jevy rei ra'e ore-rehe. ¹³Naiporãĩ voi upe pene nhe'ê pene mbo'eha kwéry-rehe. Pemopeteĩ katu pene nhe'ê peiko porã hagwã.

Okurusu-rehe omano va'e ndaha'etí xe. Hesu Cristo mate omano okurusu-rehe nhande resende hagwã. Ndaha'etí xe réry-py araka'e penhemongarai uka. Hesu Cristo réry-py ae araka'e penhemongarai uka. Anive inhe'ê mombe'uha-rehe aipo-rami peje. Niporã penhe'ê ore-rehe. ¹⁴⁻¹⁵ "Paulo xe mongarai va'ekwe ajerovia hagwã hese." Ani upéixa peje xe-rehe. Ndahetái xe remimongarai va'e oĩ pene pa'ũ-my. Upéa-rehe avy'a ndaikatúú avave he'i "Xe Paulo rehegwa". Crispo-pe amongarai va'ekwe, Gaio-pe ave amongarai va'ekwe. ¹⁶ Xe mandu'a ave Estéfnas-rehe. Amongarai va'ekwe íxupe, hóga pygwa ndive. Upe rire ndaipóri para'e ambue amongarai va'ekwe. Naxe mandu'avéíry mbovy nipo amongarai va'ekwe. ¹⁷ Ndaha'etí aporomongarai hagwã xe mondo va'ekwe Hesu Cristo. "Inharandu eterei va'e dhe'ê xe rehegwa dhe'ê ani ereiporu rei teĩ xe mombe'u-vy" he'i xe-vy. "Iporãve kóixa ere arã xe-rehe: Hesu Cristo omano okurusugwasu-rehe nhane resende hagwã. Upéixa ere-ta xe mombe'u-vy enterove-pe" he'i xe-vy. "Ha inharandu eterei va'e dhe'ê ereiporu ramo ne rendu va'e kwéry naimandu'avéí arã ne dhe'êgwe-rehe. He'i joty arã nde-rehe, ha'e inharanduve voi, he'i arã nde-rehe, ha xe rehegwa dhe'ê-rehe naimandu'avéí arã." Upéixa he'i xe mondo-vy Hesu Cristo.

Paulo omombe'u ma'erã-gwi Hesu omano va'ekwe

¹⁸ Nhandu-ma ramo Hesu Cristo rehegwa dhe'ê, ja'e nhande py'apy-py: "Hesu Cristo omano xe resende hagwã. Nhandejáry omboyke-ma xéhegwi xe rembiapo vaikwe. Ta'yry Hesu Cristo ombou-ma omano hagwã xe resende hagwã." Aipo niko hese jajerovia va'e ja'e. Ipu'aka vou nhande-vy Hesu rehegwa dhe'ê.

Oĩ ae heta Hesu rehegwa dhe'ê nohendu kwaái va'e. Umi ohasa asy va'e renda-py oho va'erã. Ohendu-ma ramo Hesu Cristo rehegwa dhe'ê, ndopo he'i: "Ma'erã-gwi omano? Omano rei nipo ra'e. Ndoikovéí voi" he'i mo'ã va'erã Hesu Cristo-rehe. ¹⁹ Nhandejáry ohai uka va'ekwe:

"Inhakã porã-gwi inharandu va'e, nahi'arandu teéí voi. Amokanhy-ta íxugwi hi'arandukwe. Ha vvy arigwa-rehe oikwaa porã va'e, nahi'arandu teéí vyteri.

Hembigwaakwe ambohesarái-ta íxupe. Ndovaléí arã íxupe."*

Upéixa he'i Nhandejáry.

²⁰ Nhane arandu mbyky nhande kwéry. Ndaha'etí Nhandejáry-rami. Nhandejáry arandu ipukuve nhane arandu-gwi. Ha nhane arandu mbyky-rehe ndajeheko arupityí Nhandejáry-pe. Ko'a pygwa hekomombe'uhaty ndikatúú omombe'u Nhandejáry-pe ha'e oikwaave hagwã mo'ã. Ndaipóri Nhandejáry yke-rehe hi'aranduve va'e. Inharandu mbyky va'e meme mate oĩ. Ndaipóri ave Nhandejáry renonde-py dhe'ê oiporu porã va'e.*

²¹ Ha'e anho mate voi inharandu tee va'e. Hi'arandu tee-gwi ndohejáí ko vvy arigwa arandu anho ogwereco va'e ohekoarupity hagwã íxupe. Ha'e ojekwaa ukase mate onhe'ê mombe'uha renduhaty kwéry-pe. Omombe'u uka ramo, itavy va'e dhe'ê-rami ramo jepe, heroviaha kwéry-pe mate oresende va'erã Nhandejáry.

²²⁻²³ Ha ore ae katu oromombe'u meme inhe'ê. Oĩ umi ohendu va'e ogwerovia va'e ave íxupe. Oĩ ave umi ndogweroviái va'e inhe'ê. "Itavy voi" he'i mo'ã ore-rehe.

Upéixa voi judeu kwéry ndogweroviaséí voi íxupe. "Yváy-gwi hexapyrã-rupi eremba'apo ramo arovia-ma voi" he'i rei. Ha umi judeu e'y kwéry ave ndogweroviaséí ave. Ho'arandurã oikwaa seve seve hikwái.

Ha ore katu, Hesu rehegwa dhe'ê mate oromombe'u. "Hesu Cristo omano va'ekwe kurusugwasu-rehe nhane rembiapo vaikwe omboyke hagwã nhandéhegwi" ore oro'e meme oromombe'u-vy.

Ohendu-ma ramo judeu kwéry umi ndogweroviái va'e he'i ore-vy: "Penhemonhandejáry rei Hesu Cristo-rehe. Ndovaléí ne dhe'ê" he'i mo'ã ore-vy.

Ha ohendu-ma ramo judeu e'y va'e umi ndogweroviái va'e he'i rei ave ore-vy: "Peẽ ko ndapeikwaáiry voi mba'eve" he'i rei ave ore-vy.

* 1:19 Is 29.14 * 1:20 Is 44.25

²⁴ Nhandejáry rembiporavo va'e ae ohendu kwaa inhe'ê. Judeu kwéry gwigwa oĩ gwĩ oiporavo va'e. Judeu e'ỹ va'e kwéry gwigwa ave oĩ gwĩ oiporavo va'e. Hembiporavo va'e ohendu ramo ogwerovia. "Anhetegwa voi nipo ra'e" he'i ogwerovia-vy. Ha upéixa, Cristo reko-rupi Nhandejáry ohexa uka gwembiporavo va'e kwéry-pe ha'e huvixaha voi. Ha'e oaranduha ave ohexa uka Hesu Cristo reko-rupi. Ha'e opu'akaha ave ohexa uka Hesu Cristo reko-rupi hese ojerovia va'e-pe.

²⁵ Ha ogwerovia e'ỹ va'e aipo he'i rei hese: "Ko'ánga ikangy Nhandejáry" onhe'ê rei hese. Ha'e ae imbarateve yvypóry kwéry-gwi. Ipu'aka tee va'e voi ko Nhandejáry. Ha ogwerovia e'ỹ va'e ae onhe'ê rei hese. "Nhandejáry ndoikwaái" aipo he'i onhe'ê rei-vy hese. Oikwaave ha'e yvypóry kwéry-gwi. Oikwaa paete va'e voi Nhandejáry.

²⁶ Tapene mandu'a porã kena xe re'ỹi kwéry, Hesu roviaha va'e kwéry, pende rekohakwe-rehe, Nhandejáry pene renói hagwe-rehe. Ndahetái pene pa'ũ mygwa-pe omomba'egwasu araka'e yvypóry kwéry. Ndahetái-rehe he'i araka'e "Inharandu porã upe va'e." Ndahetái-rehe ave he'i araka'e "Oiporu kwaa porã omba'e reta reta upe va'e." Ndahetái ave oĩ yvypóry ruvixa re'ỹi pene pa'ũ-my. "Iporã voi" nonhe'ẽiry pende-rehe hikwaí Nhandejáry pene renói e'ỹ mbooyve. ²⁷ Ha upéixa meme Nhandejáry rembiporavo kwéry. Ha'e oiporavo araka'e inharandu e'ỹ va'e-pe gwe'ỹi kwéryrã araka'e. Ha upéa-rehe ombohehogwypve va'erã inharanduve va'e-pe. Oiporavo ave araka'e ikangy va'e-pe gwe'ỹi kwéryrã. Ha upéa-rehe otĩ va'erã opyta-vy imbarate va'e. ²⁸ Oiporavo ave yvypóry nopenái-rehe va'e-pe gwe'ỹi kwéryrã. Oiporavo ave onhe'ê rei rei-rehe va'e-pe gwe'ỹi kweryrã ave. Oiporavo ave iporiahu va'e-pe gwe'ỹi kweryrã. "Ndovaléi voi upe va'e" he'i meme kente kwéry Nhandejáry rembiporavo va'ekwe-rehe. Ha upéixa-gwi oiporavo íxupe kwéry gwe'ỹi kweryrã omotĩ hagwã onhemoaranduve va'e kwéry-pe. Upéixa oikwaa uka enterovéa-pe avave ojéhegwi rei ndovaléi voi. ²⁹ Ndaikatúí avave onhemomba'egwasu Nhandejáry renonde-py.*

³⁰ Ha peẽ katu, Nhandejáry pene mopeteĩ araka'e Hesu Cristo ndive. Ha'e oiko jepe-ma nhane arandu me'êha. Hesu Cristo-rehe nhane mopotimba Nhandejáry. Hesu-rehe nhane resende voi ko Nhandejáry. Ijavegwa voi nhande. Upéa-gwi nhane momarangatu. ³¹ Nanhande py'agwasuvéiry nhandejéhegwi Nhandejáry yke-rehe nhaĩ-vy. Upéa-rehe he'i:

"Oime ramo onhemomba'egwasuse va'e, tonhemomba'egwasu Nhandejáry Hesu Cristo-rehe"*
he'i Nhandejáry nhe'ê kwatia-rehe oĩ va'e.

2

Hesu omano ramogware rehegwa nhe'ê

¹⁵ "Hesu Cristo rehegwa nhe'ê anho mante amombe'u-ta íxupe kwéry" ha'e va'ekwe xejeúpe pende-rehe. "Mba'eve-rehe namombe'u mo'ãiry upe-py" ha'e ave. "Nhande-rehe ha-py Hesu Cristo omano va'ekwe okurusugwasu-rehe. Hese-gwa nhe'ê meme mante xe amombe'use íxupe kwéry." Aipo ha'e-vy xejeúpe agwahẽ va'ekwe pene renda-py.

Ha pene ndive aime jave anhemomirĩve va'ekwe pejeroviave hagwã Hesu Cristo-rehe. Aime ramo upe-py anhemokangy ajepy'apy-vy pende-rehe. Napombojerovia ukaséi xe arandu-rupi rei. Hesu Cristo anho-rehe mate apombojerovia ukase. Upéixa-gwi ndaiporúí ko'áygwa arandu nhe'ê amombe'u hagwã Hesu rehegwa nhe'ê peẽ-my.

Ha hesegwa nhe'ê amombe'u jave Nhandejáry Nhe'ê Marangatu tee va'e oiko ave xe ndive. Ohexa uka peẽ-my opu'akaha. Ha upéixa ipu'akaha-rupi peteĩ teĩ pejerovia-ma Hesu Cristo-rehe. Ndaha'úi ko'áry rupigwa arandu-rupi erejerovia hese. Nhandejáry Nhe'ê Marangatu tee va'e pu'akaha-rupi erejerovia-ma hese.

*Nhandejáry ojekwaa uka va'erã nhande-vy Nhe'ê Marangatu tee va'e-rupi
(Jo 14.26; 16.13)*

* 1:29 Gl 6.14 * 1:31 Jr 9.24

⁶⁻⁹ Ha Nhe'ê Marangatu tee va'e reko-rupi oiko porã va'e-pe ambo'e ramo ae aiporu arã hi'arandu tee va'e nhe'ê. Upéa ndaha'úi ko'äygya arandu. Ndaiporu mo'ái peemy upéa arandu. Ndaiporu mo'ái ave mburuvixa arandukwe. Ha'e kwéry opa-tama. Hi'arandu reheve opa va'erã. Ha ndovaléi arã ko'äygya-pe mburuvixa-pe ave hi'arandu hagwe. Ha'e kwéry ndoikwaái ave Nhandejáry arandu. Oikwaa e'ÿ-gwi ohupi uka va'ekwe kurusugwasu-rehe imoi-vy ojuka Hesu-pe. Ha'eixagwa ndaipóri. Ipu'aka marangatu tee va'e voi Hesu.

Ha xe katu Nhandejáry arandu-rupi amombe'u aiko-vy.

Yma araka'e Nhandejáry onhongatu araka'e hi'arandu. Nomombe'úi gwembiaporã avave-pe. Áy ae katu gwembiporavo-pe omombe'u oaranduha Nhandejáry. Ko yvy nhapyrũ e'ÿ mbooye Nhandejáry oikwaa ukase araka'e nhande-vy.

“Kurusu-rehe omano-ta xe ra'y. Hese ojerovia va'e-pe aresenda-ta xe. Xe ra'y Hesu-rami opyta hagwã ipotí. Upe xe rembiporavorã-me aikwaa uka-ta xe arandu.”

Upéixa he'i araka'e Nhandejáry gwemimombe'urã-rehe. Upéa-rehe omoi uka ave va'ekwe kwatia-rehe ko nhe'ê:

“Avave ndohexái va'ekwe, nohendúi va'ekwe, mba'e ndojepy'a mongetái vyteri joty ave Nhandejáry rembiapo porã íxupe ohayhu va'e kwéry pegwarã.”*

¹⁰ Upe Nhandejáry oarandu onhongatu va'ekwe ko'äy nhande jaikwaa-ma. Nhandejáry Nhe'ê Marangatu tee va'e oikwaa uka-ma nhande-vy. Ha'e oikwaapa-ma Nhandejáry py'apy ete-py oí va'e jepe ave Nhe'ê Marangatu tee va'e oikwaapa-ma joty.

¹¹ Nhande yvypóry, nhande py'apy pygwa avave ndoikwaáiry. Nhande ae peteí teí jaikwaa mba'e-rehe nhande py'apy-py nhanhemongeta. Avave ndoikwaáiry. Upéixa ave Nhandejáry. Avave ndoikwaái mba'e oí ipy'apy ete-py. Nhe'ê Marangatu tee va'e mante oikwaa. ¹² Ha Nhandejáry ome'ê-ma nhande-vy Nhe'ê Marangatu tee va'e opyta hagwã nhande py'apy-py. Ha'e katu oikwaa uka nhande-vy mba'eixagwa pa gwemime'égwe. Ndaha'úi teko rei nhe'ê ko'äygya ome'ê nhande-vy. Nhe'ê Marangatu tee va'e katu Nhandejáry ome'ê-ma nhande-vy nhane mbo'e hagwã.

¹³⁻¹⁵ Ore ae rei orejéhegwi ore arandu noromombe'úiry. Nhe'ê Marangatu tee va'e ore mbo'e va'ekwe mante oromombe'u jevy. Oromombe'u ramo oí ohendu kwaa va'e. Oí ave ohendu kwaa e'ÿ va'e. Ohendu kwaa va'e ogwereco-ma Nhe'ê Marangatu tee va'e opy'apy-py. Ha'e oikwaa uka íxupe hi'arandurã ohendu porã hagwã, oikwaa hagwã ave anhetegwa nhe'ê. “Iporã voi kóã” he'i hagwã. “Mixi mate ovale upéa” he'i ave hagwã. “Niporã voi upéa” he'i ave hagwã ipy'apy-py Nhe'ê Marangatu tee va'e omoarandu va'erã íxupe.

Nhandejáry rehegwa nhe'ê nohendú kwaái va'e katu ndogwerekói joty Nhe'ê Marangatu tee va'e opy'apy-py. Ndogwerekói ave hemime'égwe kwéry. Ndaixupe gwarãi, ndoikwaái ave mba'eixagwa pa upe va'e. Upéixa-gwi Nhe'ê Marangatu tee va'e ogwereco e'ÿ va'e ndohekojohu kwaáiry Hesu reroviaha rembiapo-rehe. Nhe'ê Marangatu tee va'e ogwereco va'e ae ohekojohu kwaa opaixagwa.

¹⁶ A-rami he'i Nhandejáry kwatia nhe'ê:

“Avave ndoikwaáiry Nhandejáry py'a-py oí va'e. Ndaipóri ombo'e va'erã íxupe mba'eve-rehe.”*

Upéixa he'i kwatia-rehe. Ha nhande katu, Nhe'ê Marangatu tee va'e oime-ma nhande py'apy-py. Oiko-ma Cristo py'a nhande py'apy-py.

3

“Nhandejáry remimbota erejapo ku'a ku'a-gwi nerehendú kwaái inhe'ê” he'i Paulo onhemonhe'ê-vy

(Hb 5.11-13)

¹ Nhandejáry arandu nhe'ê aiporuse mo'ã va'ekwe pene ndive, xe re'ÿi kwéry. Ha ndaikatúi. Napehendu kwaái vyteri inharandu ete va'e. Nhe'ê Marangatu tee va'e ndogwerekói va'e-rami peiko. Erejapose va'e rei erejapo. Nerehendú kwaái vyteri

* 2:6-9 Is 64.4 * 2:16 Is 40.13

inharandu tee va'e nhe'ê. ² Are-ma erejerovia Cristo-rehe ereiko-vy ha mitã okambu ramo va'e vérami ereiko vyteri. Ndereikwaáiry vyteri Nhe'ê Marangatu tee va'e nhe'ê. Upéixagwi ndikatúí amombe'u porã va'ekwe peê-my Nhandejáry nhe'ê. Nhandejáry remimbota erejapo ku'a ku'a-gwi nerehendu kwaáiry inhe'ê. Ndaikatúí amombe'u vyteri peê-my heta hesegwa nhe'ê. ³ Pejapose va'e rei pejapo meme vyteri. Pene rakate'y eterei peê-my gwarã-rehe, ha pende rapixa oiko porãha-rehe pevy'are'y. Pende a'e e'y ojõehe. Pejoja'o ja'o rei peiko-vy. Upéixa peiko-gwi oroikwaa nde rekoha vai. Erejapose va'e rei erejapogwi. ⁴ Ha pene mbo'eha kwéry-rehe ndaperojóáiry pene nhe'ê. Oí xe-rehe onhe'ê rei va'e "Paulo nhe'ê mante ahenduse" he'i rei. Oí ave Apolo-rehe onhe'ê rei va'e. "Xe Apolo nhe'ê mante ahenduse" he'i rei jevy. Upéixa penhe'ê rei-gwi pejapose va'e rei pejapo peiko-vy.

⁵⁻⁶ Ore remimombe'u-rupí ae pejerovia-ma Nhandejáry-rehe. Inhe'ê oromombe'u va'ekwe peê-my. Xe, Paulo, Apolo ave, oroiko Nhandejáry rembigwái ramo. Áy aiporuta kokwe rehegwa nhe'ê ne moarandu hagwã mba'eixa pa oroiko.

Nhandejáry kokwe járy-rami onhangareko okokwe-rehe. Omohe'õ gwemity onhoty va'ekwe. Peê peiko ikokwe-rami. Ore oroiko hembigwái ramo. Ikokwe-py vérami ore oromba'apo oromombe'u peê-my Hesu Cristo rehegwa nhe'ê. Temity onhenhoty va'ekwe-rami ave amombe'u va'ekwe Hesu Cristo rehegwa nhe'ê peê-my. Temitygwe omohe'õ va'ekwe-rami ave Apolo omombe'u araka'e Hesu Cristo rehegwa nhe'ê peê-my. Ha Tupã Nhandejáry katu omongakwaa temitygwe. Upeixagwa ave peê. Nhandejáry ae katu pene moarandu araka'e pejerovia hagwã Hesu Cristo-rehe.

⁷ Upéixa-rupí jaikwaa-ma onhoty va'e ndaha'êi mba'ëve. Omohe'õ va'e ave ndaha'êi mba'ëve. Tupã Nhandejáry mante omoingo kwaa va'e. ⁸ Onhoty va'e, omohe'õ va'e ndive oiko peteixa. Hembigwái meme. Hepyra-rehe mate omba'apo. Ha peteí teí-pe ome'ê arã hembiape repykwe. Omba'apo porã va'e-pe hetave ome'ê arã hembiape repykwe. Ha omba'apo ate'y va'e-pe mixími mate ome'ê arã hembiape repykwe. ⁹ Ore niko "Xe irú" oro'e ojõehe. Nhandejáry rembigwái meme ko ore. Ha peê peiko ikokwe-rami. Hóga-rami ave peiko íxupe. Ha'e nhande rereko porã. ¹⁰⁻¹¹ Óga omopu'ã va'erã rehegwa nhe'ê aiporuta apohekombo'e hagwã peê-my, peikwaa hagwã mba'eixagwa pa nhande.

Óga omopu'ã kwaa va'e onhepyrú hembiape. Upéixa ijekoha hagwã okyta. Ha'erami anhepyrú va'ekwe Nhandejáry rogarã amombe'u ramo peê-my Hesu Cristo rehegwa nhe'ê. Amombe'u ramo va'ekwe pejerovia-ma hese. Nhandejáry xe moarandu-gwi apombojerovia uka va'ekwe Hesu Cristo-rehe. Óga jepytahoha-rami Hesu Cristo opyta. Ha'e mate Nhandejáry omoí uka va'ekwe nhande resendeharã. Outro-rehe jajerovia ramo nanhane resende mo'ái. Hesu Cristo mate nhane resende tee va'erã.

Okyta omoí rire outro kwéry omopu'ãmba. ¹² Mbava'e oiporu-ta omoí hagwã óga omopu'ã va'e oiporavo. Oí opa e'y va'erã oiporu meme óga omopu'ã-vy. Oí ouro ramigwa oiporu va'e. Oí prata ramigwa oiporu va'e. Oí ita hepy va'e oiporu va'e. Opa e'y va'e meme oiporu óga porãrã omopu'ã hagwã.

Oí ave pya'e ogweru va'e oiporu va'e. Pya'e opa jevy va'e oiporu meme óga omopu'ã-vy. Oí yvyra oiporu va'e. Oí ave hogwe píru va'e oiporu va'e. Oí ave kapi'i oiporu va'e. Pya'e opa jevy va'e meme oiporu óga hi'are e'y va'e omopu'ã-vy.

¹³ Tatagwasu ou ramo ojekwaa arã óga omopu'ã va'e rembiapokwe. Ohapy va'erã para'e tpa ndohapyí va'erã para'e gwoga ojapo va'ekwe araka'e. Upéixa ave Hesu ou jevyha áry-py ojekwaa arã peteí teí-pe mba'eixagwa voi pa ojapo araka'e gwembiapokwe.

¹⁴ Tata ombogwe rire upe óga ohapy e'y va'e ndokái-gwi opyta va'erã ijáry-pe. Upéixa ave entéro Hesu Cristo remimbota ojapo porã porã va'e. Nhandejáry ome'ê-ta íxupe hembiapokwe repy. ¹⁵ Ha ombogwe rire tata, ndaiporivéi-ma ramo ógakwe, okaipa-ma ramo hembiapokwe, ijáry mba'ëve ndogwerekovéi-ma va'erã. Upéixa ave Hesu Cristo remimbota ojapo ku'a ku'a va'e. Tata-rupí ohasa va'e-rami okanhymba va'erã íxugwi hembiape repyrãgwe. Íxupe mate oresende va'erã.

¹⁶ Pene mandu'a kena pende reko-rehe. Peê, Hesu reroviaha kwéry reko-rehe pene mandu'a kena. Oiko-ma pende py'apy-py Nhe'ê Marangatu tee va'e. Upéixagwi

he'i pende-rehe “Nhandejáry róga upe va'e” he'i. Imarangatu voi Nhandejáry róga. Upéixa-gwi Nhandejáry róga pende rekoha-rehe tapenhangareko porā katu pendéjehe. ¹⁷ Nhandejáry ombohasa asy arā gwóga omongy'a va'e-pe, gwóga ohundi va'e-pe. Ha peē peiko-ma Nhandejáry róga-rami. Ha Nhandejáry róga ipoti marangatu va'e voi.*

Nhane arandu mbyky eterei ramogware

¹⁸⁻¹⁹ Ani teĩ enhembotavy ndejéupe. Ani enhembotuvixa rei teĩ. Oĩ ramo pene pa'ũ-my he'i va'e “Xe xe arandu voi, aikwaa porā opaixagwa”, gwĩ-rami oiko va'e-ma onhemoarandu tee ra'anga rei oiko-vy. Teko rei reko-rupi anho hi'arandu. Upéixa-gwi omomba'egwasu rei oaranduha. Iporāve íxupe nopenái oaranduha-rehe oheka haggwā Nhandejáry remime'égwe arandu. Teko rei arandu mate ogwereko va'e-rehe “Nahi'arandu porāi” he'i Nhandejáry. Yma omoĩ araka'e kwatia-rehe he'i-vy:

“Teko rei arandu ogwereko-gwima onhemomba'egwasu eterei mo'ā onhembotavy rei.

Oarandu-rehe ojerovia eterei-gwi hi'arandu omokanhy arā íxugwi Nhandejáry.”*

²⁰ He'i ave araka'e kwatia-rehe:

“Nhandejáry oikwaa inharandu va'e ipy'apyete pygwa. Omomba'egwasu rei oarandu, he'i hese.”*

²¹⁻²³ Upéixa-gwi ani penhemomba'egwasu teĩ avave-rehe. Oiko-ma opamba'e nhane pytygwō haggwā. Ani teĩ penhemomba'egwasu mba'ave kente kwéry rembiapokwe-rehe. Nhandejáry onhangareko porā haggwā nhande-rehe ojapo araka'e opamba'e nhane pytygwōharā. Héry-py aiko-ma xe ave pene pytygwōharā voi ave niko xe. Apolo ave, Pedro ave oiko-ma ave pene pytygwōharā. Onhangareko porā meme pende-rehe Nhandejáry. Peikove va'erā para'e pemano va'erā para'e ha'e onhangareko porā ave pende-rehe. Pende reko renonderā-py ave onhangareko porā ave pende-rehe. Ha'e omoingo opaixagwa pende reko porārā-rehe. Ha Cristo pende rereko opogwy-py. Ha Nhandejáry ogwereko jevy Cristo-pe opogwy-py.

4

Nhandejáry rembigwái porā nosē mo'ái inhe'ē-gwi

¹ Pene mandu'a ramo ore-rehe, peje ae katu kuri: “Ha'e Cristo rembigwái. Omombe'u va'ekwe nhande-vy Nhandejáry nhe'ē. Cristo rehegwa nhe'ē Nhandejáry reminhongatukwe ojekwaa-ma nhande-vy. Upéa omombe'u-vy oiko tembigwái ramo” peje ae katu kuri ore-rehe. Cristo rembigwái voi ore. ² Ha tembigwái katu tekotevē oiko ojáry nhe'ē-py. Tembigwái porā ramo nosē mo'ái inhe'ē-gwi. Oiko meme gwerekoha ojohu porā haggwā hembiapokwe-rehe. Ijáry anho mante ojohu kwaa hese. ³⁻⁴ Upéixa-gwi oĩ ramo kente “Ma'erā ojapo upéixa? Niporāi para'e” he'i va'e xe rembiapokwe-rehe, ndajepy'apy mo'ái upe va'e-rehe. Peē, “Ma'erā Paulo ojapo upéixa? Hembiape porā e'ỹ para'e” peje ramo, mburuvixa kente rembiapokwe-rehe omonhe'ē va'ety jepe aipo-rami oikwaase ramo xe-rehe, ndajepy'apy mo'áiry. Kente kwéry ndaxe johu kwaái arā. Xe-ma, xe py'apy-py ahendu kwaa jepe, ndaikwaái joty arā xe py'a ete pygwa. Ndaikwaa teéiry xe rembiapo-rehe “Iporā tee” “Naiporāi para'e” ha'e haggwā hese. Nhandejáry anho mante ojohu kwaa xe py'apy ete pygwa-rehe xe reko rehegwarā. Hese anho mante xe mandu'a va'erā. ⁵ Upéixa ramo ani peporandu rei avave rembiapokwe-rehe pejohu haggwā hembiape vaikwe. Nhandejáry ogwey jevy e'ỹ peve ani peporandu rei upe va'e-rehe. Ha'e mante ou-vy ombojekwaa va'erā nhande py'a ete-py oĩ va'e gwive, nhande py'a pota va'e gwive, nanhane mandu'avéi va'e gwive, pytũ gwy-py nhande rembiapo nhandomi va'ekwe gwive, nhande py'a-py onhemi oĩ va'e gwive ombojekwaa-ma va'erā Nhandejáry. Upe áry-py enterovéa-pe omombe'u arā hekokwe-rehe hembiapokwe-rehe. Cristo reko-rupi oiko porā va'ekwe-pe he'i arā Nhandejáry: “Ereiko porā xe renonde-py” he'i arā upe va'e-pe.

* 3:17 1 Co 6.19; 2 Co 6.16 * 3:18-19 Jó 5.13 * 3:20 Sl 94.11

Eiko katu Nhandejáry nhe'ẽ-rupi

⁶ Ahai kuri xéjehe, Apolo-rehe ave. Upéa ajapo, xe re'yí kwéry, pene pytygwõ haggwã. Tapene mandu'a katu ko xe nhe'ẽ-rehe anive haggwã pene mbo'eháry-rehe penhe'ẽ rei. Ha'ese nde-vy, Ani erehasa Nhandejáry nhe'ẽ. Eiko meme katu inhe'ẽ-rupi. Upe ohai uka va'ekwe nhe'ẽ-rupi eiko katu. Inhe'ẽ-rupi peiko ramo napenhembotuvixavéiry avave-pe. Ani peje avave-rehe "Iporáve ko va'e xe-vy". Ani ave peje outro-rehe "Ndovaléi upe va'e". Ani pembojoavy teĩ pene nhe'ẽ íxupe. Naiporái voi upéa pende rekoha. Pembojoja katu peteixa pene nhe'ẽ. ⁷ Nhande kwéry jaiko Nhandejáry renonde-py. Hemimoingokwe meme nhande. Ha peẽ, penhembotuvixa rei meme pene mba'e-rehe, pende rekoha-rehe. Ma'erã-gwi tipo? Niporái voi upéixa. Nhandejáry remime'égwe meme pereko. Ma'erã-gwi penhembotuvixa rei hemime'égwe-rehe? Anive teĩ upéixa peiko.

⁸ "Nhandejáry nhe'ẽ mombe'uha-rehe nanhaikotevêi-ma nhande" peje rei ojóupe. "Jaikwaapa-ma hesegwa jaiko porã haggwã" peje rei. "Nhandejáry remime'ẽ heta heta voi jareko-ma" peje rei ave. "Nanhaikotevêvêi-ma Paulo-rehe" peje rei-ma peẽ. "Nanhaikotevêvêi-ma" peje rei-ma ave Apolo-rehe. "Nhandejáry nhande Ruvixagwasu ndive nhande jaiko-ma mburuvixagwasu ramo" peje rei ave. Ma'erã-gwi tipo upéixa penhembotuvixa? Ore, pene mbo'eha jepe, ne'írã vyteri oroiko mburuvixa ramo indive. Peiko-ma ramo ra'e mburuvixagwasu ramo, ore ave oroiko-ma arã ra'e. Upéixa ramo ra'e ore orovy'a voi arã ra'e.

⁹ Pende rekoha niporái reheve penhembotuvixase mo'ã: "Cristo réry-py oroiko-gwi oroiko porãve enterovéa-gwi" peje rei jave pendéjehe, ore katu oroiko asy Cristo réry-py oroiko-gwi. Ore rereko asy meme Hesu reroviaha e'y va'e kwéry. Nhandejáry remimbota-rupi para'e ore mbohasa asy ha'e kwéry. Nhandejáry ore moingo enterovéa rekogwypyve. Enterovéa oma'ẽ ma'ẽ ore-rehe. "Mbava'e nipo ojehu arã íxupe kwéry?" he'i-vy ohexase va'e oma'ẽ ma'ẽ ore-rehe. Kente kwéry oma'ẽ ore-rehe ore rexa haggwã. Yváy gwigwa Nhandejáry rembigwái kwéry ave oma'ẽ ore-rehe. Heko vai eterei va'e ojuka haggwã hexaharã omboaty hikwái. Upéixa ave randai oroiko enterove ohexase mbava'e nipo ojehu arã ore-vy. ¹⁰ "Cristo-rehe orojerovia-gwi ore arandu porã" peje rei jave "Itavy voi" he'i meme ore-rehe. "Nahi'aranduvéi-gwi ogwerova gwekoha Cristo-rehe. Itavy voi" he'i ore-rehe. "Naimbaraetéi" he'i ave ore-rehe ore rereko asy-vy. Ha peẽ katu "Ore mombaraete porã Nhandejáry opamba'e-rehe" peje rei pendéjehe. ¹¹ Ore ae yma ete gwive orohasa asy voi. Ore vare'a meme. Ore y'uhéi ave. Ituja-ma ave ore ao. Ore nupã nupã oroiko-vy. Orova rova va'e ore. Ore róga e'y va'e voi ore. ¹² Ore mokane'õ ne'õ ore rembi'urã-rehe. Onhe'ẽ rei rei ore-rehe ore joko-vy. "Tapenderovasa katu Nhandejáry" oro'e jepe ore joko va'e-pe. Ore mbohasa asy ramo jepe ore orokiriri oroiko-vy.* ¹³ Ore rogwaití va'e onhe'ẽ vai vai rei ramo ore-vy, nhe'ẽ porã jepe oroiporu oronhomongeta haggwã hendive. Hesu reroviaha e'y va'e ndajia'etí ore-rehe. Ore rereko mba'e rembyre ky'akwe ramo. Ore rereko mba'e yty ramo upe va'e kwéry. Ha peẽ katu pene mbotuvixase rei. Niporái voi upe pende rekoha.

Túvy-rami Paulo onhemonhe'ẽ

¹⁴ Kóa ahai-ma peẽ-my peẽ xe ra'y kwéry ramigwa-gwi. Anhemonhe'ẽ-ta peẽ-my. Xe a'e voi pende-rehe. Upéixa-gwi napomotiséiry. Anhemonhe'ese peẽ-my peiko porãve haggwã.

¹⁵ Pehendu arã para'e heta eta Cristo rape rexa ukaha va'e pene mbo'eha kwéry. Oime joty peẽ-my peteĩ anho pende ru ramigwa pene mbo'eha. Xe apyta peẽ-my pende ru-rami pene mbo'eha. Yma va'ekwe amombe'u-ma ramo peẽ-my Hesu Cristo rehegwa nhe'ẽ pejerovia nipo Hesu-rehe ra'e. Upéixa-gwi apyta pende ru-rami peẽ-my. Ha pende ru-rami anhemonhe'ẽ-ta peẽ-my. ¹⁶ Tekoha porã-rupi, xe-rami, tapeiko.* ¹⁷ Pende rekoha porãrã haggwã amondo kuri Timóteo oiko haggwã pene pa'ũ-my. Ha'e opyta xe-vy xe ra'y vérami Nhandejáry Hesu Cristo reko-rupi oiko porã-gwi. Ahayhu voi íxupe. Ogwahê-ma ramo pene renda-py omombe'u va'erã peẽ-my xe rekoha-rehe mba'éia pa aiko Hesu

* 4:12 At 18.3 * 4:16 1 Co 11.1; Fp 3.17

Cristo reko-rupi. No'ã he'i arã xe-rehe: “Anhetegwa voi omombe'u meme Paulo” he'i arã xe-rehe. “Opa-rupi oho-vy Paulo omombe'u meme Hesu Cristo rehegwa nhe'ê” he'i arã xe-rehe.

¹⁸Anive penhembotuvixa teĩ. “A-py ete ndou mo'ãi Paulo” peje rei. ¹⁹Aha'arõ mixĩ aha hagwã pene renda-py. Hi'agwĩ-ma agwahẽ hagwã pende ha-py. Nhandejáry oipota ha'áry agwahẽ-ta upe-py. Ndaxe aréi-ta.

Ogwahẽ-ma a-py onhembotuvixa va'e rerakwã. Agwahẽ-ma ramo pende ha-py ahexa va'erã teko rei-rupi oiko para'e terã Nhandejáry omombaraete íxupe para'e. ²⁰Oiko-ma ramo Nhandejáry nhande ruvixa ndaha'éiry va'erã nhande juru-rupi rei nhanhe'ê jaiko-vy. Nhandejáry ae nhane mombaraete va'erã gwekoha-rupi nhande ave jaiko hagwã.

²¹Ndaxe rexaséi-ry para'e. Ma'erã tipo? Petĩ tipo xéhegwi? Peiporavo katu mba'éixa katu anhe'ê-ta pene ndive. Ndaperova mo'ãi ramo pende rekoha anhemonhe'ê pohýi va'erã peẽ-my. Ha perova ramo pende rekoha agwahẽ va'erã pende ha-py xe reko kirirĩ reheve apohayhu-vy. Peiporavo katu mba'éixa katu anhe'ê-ta. Perova katu pende rekoha.

5

Hembiapovai eterei kwimba'e ramogware

(2 Co 2.5-11)

¹Ahendu kuri pende rerakwã vai. “Teko vai-gwi onhomongy'a rei peteĩ Corinto pygwa” he'i. “Hesu reroviaha va'e jepe omenda ambue mbue joty oiko-vy gwu rembirekokwe-rehe” he'i omombe'u-vy. Ivai eterei voi upéa. Nhandejáry-rehe ojerovia e'ý va'e kwéry jepe upéixa ndojapo mo'ãi.* ²Ha peẽ katu, ma'erã-gwi penhembotuvixa ra'anga rei? Iporãve penhemboasy pende rapixa rekoha vai-rehe. Tapemboyke pene pa'ũ-gwi upe hembiapo vai eterei va'e anive ojogweroaty hagwã Hesu reroviaha kwéry ndive, anive hagwã pemoirũ íxupe.

³Hesu Cristo réry-py ha'e peẽ-my “Pemosẽ katu upe va'e pene pa'ũ-gwi. Hembiapo vai eterei. Ndikatuvéi opyta Hesu rerovia va'e kwéry pa'ũ-my” ha'e-ma hese ko'a-gwi. ⁴Hesu réry-rupi pejogweroaty ramo upe-py, Hesu oiko pene ndive, ipu'akaha reheve oiko pene ndive. Xe ave amondo xe resa pejogweroaty ha-py peime ramo upe-py. ⁵Pemosẽ katu imondo-vy upe hembiapo vai ete va'e pene pa'ũ-gwi. “Satanás anhaygwasu nde rerekoseha-rami tande rereko” peje katu íxupe. “Ha'e nde rete ogweroasy va'erã para'e terã nde juka va'erã para'e ne rembiapo vai eterei-rehe” peje pemondo-vy. Hekove onheresende hagwã upe Hesu Cristo ou jevyha áry-py.

⁶Ha peẽ katu niporã voi penhembotuvixaseha. Mba'e tipo? Napene mandu'ái tipo nhande re'ýi kwéry he'i va'ekwe-rehe? “Miximi ramo jepe mbojape mbovuha, pya'e joty ojehe'apa hese.” Upe mbojape mbovuha-rami oiko hembiapo vai va'e pene pa'ũ-my. Upéixa ramo pene rembiapo vai ave va'erã. Tapenhemopotĩ katu. Tapemopotĩ katu pende rekoha. Upeixa ramo aretegwasu mbojape pyahu imbovuha e'ýpyre-rami peiko arã. Ndaipóri arã nde py'a-py ne mongy'aharã. Pende rekoha porã reheve mate peiko va'erã. Hesu-rehe pejerovia-magwi pende rekoha pyahu-ma. Yma aretegwasu ppy páscoa-py ovexa ra'y omanoha-rami Hesu omano-ma okurusu-rehe. Nhane rekovia omano nhane hembiapo vaikwe omboyke hagwã nhandéhegwi.* ⁸Upéixa ramo nhane hembiapo vaikwe e'ý reheve tekotevẽ nhane mandu'a hese. Nhande py'a porã reheve mante ja'u va'erã mbojape'i uva rykwere ndive nhane mandu'a hagwã Hesu-rehe. Upéixa-gwi ani pene mandu'a teĩ Hesu-rehe pende poxy reheve pende rapixa-rehe. Ani ave pende py'a vai teĩ ojóhehe. Anhetegwa nhe'ê mate pereko ave. Tapende py'a potĩ rei katu peiko-vy.*

⁹Kwatia-rehe ahai va'ekwe xe remimondo peẽ-my. Upe-py amombe'u peẽ-my ani hagwã pemoirũ teko vai-rupi oiko va'e-pe. ¹⁰Ndaha'úi Hesu rerovia e'ýha va'e kwéry-rehe ahai va'ekwe. Hesu reroviaha va'ekwe-rehe ae ahai va'ekwe anive pemoirũ íxupe. Hesu-rehe ndojeroviái va'e kwéry pa'ũ-rupi oĩ opáixa rei oiko va'e. Oĩ teko vai-rupi oiko va'e. Oĩ

* 5:1 Dt 22.30 * 5:6-7 Êx 12.19 * 5:8 Êx 13.7; Dt 16.3

ave imba'e reta reta ojéupe gwarā oipotave tave eterei va'e kwéry, oĩ ave oporomonda rei va'e, tupā ra'anga anga-rehe ojerovia va'e kwéry ave. Ndaha'úi upe va'e kwéry-rehe ha'e va'ekwe ani hagwā peiko indive. Hesu rerovia e'ýha va'e pa'ũ-gwi pesése ramo tekotevê pesê ko vvy-gwi. ¹¹Hesu reroviaha-rehe Hesu re'ýi-rehe ae ahai va'ekwe teko vai-rupi oiko ramo ani eremoirũ íxupe. Oĩ ramo pene pa'ũ-my hembiape vai va'e, ani teĩ pemoirũ íxupe. Oĩ para'e teko vai-rupi oiko va'e. Anive teĩ pemoirũ íxupe. Oĩ para'e imba'e reta reta oipota eterei va'e. Oĩ para'e tupā ra'anga-pe omboete vyteri va'e. Oĩ para'e onhe'ê vai va'e gwapixa-pe ojoko va'e ave. Oĩ para'e oka'u va'e ave. Oĩ para'e omonda va'e ave. Anive teĩ pemoirũ íxupe kwéry. Anive ave pekaru teĩ indive.*

¹²⁻¹³Namonhe'ê mo'ái Hesu reroviaha e'ý va'e-pe hembiape vaikwe-rehe. Niporái voi upéa jajapo ramo. Nhandejáry ae ojohu arā hese. Ha'e ae oikwaa “Ne rembiapo vai eterei” he'i hagwā nhande-vy. Iporā voi katu nhande yke-rehe oĩ va'e-pe nhamonhe'ê ramo. Hesu reroviaha va'e, nhane ndive ojogweroaty ramo omboete hagwā Nhandejáry-pe va'e-pe, iporā ja'e ramo “Niporái voi upe ne rembiapo vaikwe. Anive teĩ erejapo” ja'e nhamonhe'ê-vy. Kwatia-rehe Nhandejáry omoĩ uka va'ekwe he'i-vy: “Emosê katu pene pa'ũ-gwi hembiape vai va'ekwe”. Iporā jajapo upéa Nhandejáry nhe'ê.

6

Pene vy'are'ýha-rehe ani pejohu uka Hesu reroviaha e'ý va'e-pe

¹⁻²Nhande kwéry Hesu reroviaha va'e. Upéa-rehe Hesu re'ýi kwéry jaiko-ma. Ojoe'ýi meme nhande. Tekotevê jajohayhupa rei jaiko-vy. Ha peê katu ndapejohayhúiry peiko-vy. Oĩ ramo pene pa'ũ mygwa ojoavy gwapixa ndive va'e peraha íxupe mburuvixa kente rembiapokwe-rehe oporandu va'ety-pe pemombe'u hagwā hembiape vaikwe. Mburuvixa renda-py peraha íxupe. Niporái voi upéa pejapo. Hesu reroviaha e'ý va'e-pe anive pemombe'u teĩ pene rembiapo vaikwe. Hesu reroviaha va'e-pe ae peporandu ojohu hagwā pende-rehe “Iporā para'e, ivai para'e” he'i hagwā pende johu-vy. Nhandejáry pegwa voi ko nhande. Jaikwaa uka va'erā Hesu rerovia e'ýha va'e-pe hembiape porā va'ekwe para'e tapa hembiape vai va'ekwe para'e. Upéixa ramo ndahasýiry va'erā nhande re'ýi Hesu reroviaha va'e-pe jaikwaa uka hagwā ojevavyha. ³Ko vvy opa-ma ramo jaikwaa uka va'erā Nhandejáry rembigwái vvy pygwa-pe hembiape porā para'e tapa hembiape vai para'e. Tapene mandu'a porā kena upéa-rehe. Nhandejáry rembigwái-pe jepe jaikwaa uka va'erā. Upéixa ramo ndahasyive arā nhande re'ýi Hesu reroviaha va'e-pe jaikwaa uka hagwā.

⁴Oĩ ramo ojoavy gwapixa ndive va'e, ani peho pemombe'u pene pa'ũ-my oĩ e'ý va'e-pe nde rapixa-pe erehepy hagwā. Ani peho Hesu rerovia e'ýha-pe. ⁵Petĩ katu pemombe'u hagwā. Anive teĩ pejapo upéa. Oĩ ra'e pene pa'ũ mygwa inharandu porā va'e. Oikwaa porā hembiape-rehe ohepy hagwā. Iporāve upéa-pe pemombe'u pene vy'are'ýha. Ne vy'are'ý ramo nde rapixa-rehe emombe'u Hesu reroviaha va'e-pe. ⁶Peê ae, peho Hesu rerovia e'ý ha-py oikwaa hagwā Hesu reroviaha va'e rembiapo vaikwe. Niporái voi upéa. ⁷Ndapeiko porái, xe re'ýi kwéry Hesu reroviaha kwéry. Peho jave pemombe'u hagwā mburuvixa kente rembiapokwe-rehe oporandu va'ety-pe nde rapixa Hesu reroviaha va'e rembiapokwe-rehe, peiko teko rei-rupi. Niporái voi. Iporāve pekiriri peiko-vy. Ani ne mandu'ave teĩ hembiape hagwe-rehe nde-rehe. Ani ave ne mandu'ave ne mba'e monda hagwe-rehe. ⁸Ha'e-rami ave peê. Peê penhomonda peiko-vy. Ha Hesu re'ýi-rehe pene rembiapo vai. Naiporái voi pende rekoha.

⁹Pehendu porā-ma para'e nhande rekorā-rehe. Oiko-ma ramo Nhandejáry nhande ruvixa ramo, hembiape vai va'ekwe kwéry ndoikói arā hendive. Anike penhembotavy teĩ upéa-rehe. Teko vai-rupi oiko va'e ndoikói arā Nhandejáry ndive. Tupā ra'anga-pe omboete va'e ave, omenda menda rei rei va'e ave, onhemotĩ e'ý gwapixa-pe va'e ave, ¹⁰omonda va'e ave, imba'e reta reta ojéupe gwarā oipota eterei va'e ave, oka'u va'e ave, onhe'ê vai vai gwapixa-rehe oiko-vy va'e ave, oporosakea va'e ave ndoikói arā Nhandejáry

* 5:11 2 Ts 3.6

nhande ruvixa ndive. ¹¹Ha peẽ katu oĩ pene pa'ũ-my upeixagware. Nhandejáry omboyke-ma ae pendéhegwi pene rembiapo vaikwe Nhandejáry Hesu Cristo-rehe pejerovia-magwi. Pene mbopy'a potĩ-ma pene momarangatu-ma ave. He'i ave pende-rehe "Ipy'a potĩ-ma." Upéa ojapo Nhandejáry Hesu Cristo rery-rupi peiko-gwi. Pejerovia-ma Hesu Cristo-rehe. Upéixa-gwi ome'ẽ-ma peẽ-my Nhe'ẽ Marangatu tee va'e.

Nhande rete Nhandejáry mba'e

(Rm 13.13-14; Ef 5.3)

¹²Nhande Hesu Cristo re'ýi tee va'e. Upéixa-gwi ndaipóri ikatu e'ý va'e nhande-vy. Oĩ ae heta mba'e nhane pytygwõ e'ý va'e. Ha upe nhane pytygwõ e'ý va'e pogwy-py xe, Paulo, ndaiko mo'ãi.*

¹³Oĩ ave gwĩ oiko rei va'e he'i va'e: "Tembi'u nhande rye pegwarã voi" he'i mo'ã. "Nhande rye oiko voi tembi'u pegwarã" he'i mo'ã ave. Tapene mandu'a joty opa-ma ramo ko yvy, tye, tembi'u ave opa va'erã. Ndaha'úi teko vai-rupi jaiko hagwã Nhandejáry nhane moingo araka'e. Nhe'ẽ Marangatu tee va'e oiko hagwã nhande py'apy ete-py nhane moingo araka'e.

¹⁴Ha Hesu Cristo omano ete rire Nhandejáry omoingove jevy va'ekwe íxupe. Upéixa ave nhamano ete rire nhane moingove jevy va'erã Nhandejáry. Ipu'akaha-rupi nhane moingove jevy va'erã.

¹⁵Ndapeikwaáry tipo mba'eixagwa nhande rete? Hesu-rehe jajerovia-gwi nhande rete kwéry oiko-ma Hesu rete mbojojaha ramo. Niporãí voi jaípe'a ramo Hesu rete rehegwa oiko hagwã teko vai-rupi kunha ndive. Ani upéixa pejapo teĩ. ¹⁶Pereko jave kunha ikwimba'ese va'e-pe, nde rete, hete ndive oiko ave peteĩ. Oĩ kwatia-rehe Nhandejáry nhe'ẽ:

"Mokõi oiko va'e peteĩ mate oiko va'erã. Ndoikovéi va'erã mokõi. Peteĩ va'e-rami ha'e oiko-ma."¹⁷*

Ani upéixa-gwi pereko teĩ kunha ikwimba'ese va'e-pe.

¹⁷Jaiko ramo Hesu Cristo reko-rupi, peteĩxa jaiko-ma indive. Nhande py'apy peteĩxa ipy'apy ndive. Nhe'ẽ Marangatu tee va'e oĩ nhande py'apy-py. ¹⁸Ani teĩ peikove teko vai-rupi. Upéixa pejapo ramo pembyai pende rete. Heta nhane rembiapo vai ndaha'úi nhande rete-rehe. Teko vai-rupi jaiko ramo ae nhambyai nhande rete. Ivai eterei upéa. ¹⁹⁻²⁰Nhande rete oiko-ma Nhandejáry róga ramo. Ha'e ome'ẽ va'ekwe nhande-vy Nhe'ẽ Marangatu tee va'e. Oiko-ma nhande py'apy-py. Upe-ma ramo nhande rete oiko-ma Nhandejáry róga ramo. Nhandéjehe anho ndoikovéi-ma nhande rete. Hesu rete ramo-ma oiko. Ha'e omano nhane mopotĩ hagwã nhane rembiapo vai-gwi. Tupã Nhandejáry oiko-ma nhande ruvixa. Ha'e omboyke-ma nhandéhegwi nhane rembiapo vaikwe teko porã-rupi jaiko hagwã. Upéa-gwi tapembotuvixa kena Nhandejáry-pe. Tapeiko teko porã-rupi nde reko rexa va'e omboete hagwã Nhandejáry-pe.*

7

Iporã arã tipo nhamenda ramo?

¹Pene nhe'ẽ pemondo va'ekwe kwatia-rehe xe-vy. Upe kwatia nhe'ẽ-rehe peporandu va'ekwe xe-vy "Iporã arã tipo nhamenda ramo?" peporandu xe-vy. Áy katu amombe'u-ta upéa-rehe peẽ-my.

Kwimba'e omenda e'ý ramo oiko porã. ²Oĩ jepe omenda e'ý va'e teko vai-rupi rei oiko joty. Ani upéixa rei rei ereiko teĩ. Emenda katu. Peẽ, kwimba'e pene rembireko tee ae pereko katu. Ha peẽ kunha kwéry pene ména tee ae pereko. ³⁻⁴Kwimba'e, ne rembireko pejogwerekose ramo pejogwerekota-hendive. Kunha, ne ména pejogwerekose ramo pejogwerekota-hendive. Nde rete ndaha'úi ne mba'e ete. Tembireko ndaha'úi gwete járy, iména mba'e. Upéixa ave iména ndaha'úi ave gwete járy, hambireko mba'e tee. ⁵Nderejogwerekoséi ramo ani erejoko teĩ íxugwi. Ani erejoko joko ojúupe teĩ. Ere

* 6:12 1 Co 10.23 * 6:16 Gn 2.24 * 6:19-20 1 Co 3.16; 2 Co 6.16

ramo ojúpe “Iporāve ndajajogwerekóiry nhaha'arō nhambojeupi upi hagwā nhane nhe'ē Nhandejáry-pe.” Aipo ere ramo ndapejogwerekói hagwā, ani nde are teĩ penhoha'arō-vy. Are eterei ramo anhaygwasu Satanás ne momba'e avy va'erā nde reity-vy. Iporāve pejogwereco tee jevy ne ména tee ndive jevy, ne rembireko tee ndive jevy.

⁶ Ko nhe'ē xe remimombe'u ndaha'úi amanda hagwā pende-rehe. Iporāve peiko ko'árami ha'e-ta ae peẽ-my.

⁷ Amenda e'ỹ va'e voi ko xe. Avave nomendái ramo, “Iporā” ha'e arā ra'e hese. Nhandejáry oipytygwō gwĩ omenda e'ỹ va'e-pe ani hagwā ojevavy. Gwĩ ambue kwéry ndikatúu oiko omenda e'ỹ reheve. Ojevavyse. Ani hagwā ojevavy ha'e kwéry tomenda. Nhandejáry remimbota-rupi omenda. Nhandejáry nhe'ẽ-py oĩ omenda va'e, oĩ ave omenda e'ỹ va'e. Ome'ẽ peteĩ teĩ-pe hekoharā. Ombopu'aka ave íxupe pono ojevavy. ⁸ Iporāve neremendái ha'ese omenda e'ỹ va'e-pe. Xe-rami erepyta. Ha tembirekokwepe katu ha'ese Iporāve neremenda jevyí. ⁹ Eremendase eterei ramo, emenda katu. Iporāve eremenda. Naiporái voi nde reko vai-rupi rei ereiko.

¹⁰⁻¹¹ Ha omenda va'e-pe ha'e-ta: Ani teĩ erepoi ojógwi. Kwimba'e katu, ani teĩ erepoi ne rembireko-gwĩ. Ani ave eremoĩ kwatia-rehe erepoi ete hagwā ne rembireko-gwĩ. Ha kunha katu, ani ereheja teĩ ne ména. Íxupe ereheja ramo jepe, ani teĩ eremenda ambue-rehe. Eiko omenda e'ỹ va'e-rami. Iporāve ereiko porā jevy ne menakwe ndive. Nhandejáry réry-py kóa amanda peẽ-my. Ndaha'úi xéhegwi rei nhe'ẽ. Namombe'u reíry peẽ-my. Héry-py ha'e upéixa.*

¹² Áy katu ha'e-ta xe ae xe arandu-gwĩ. Nahániry. Ndaha'úi xe ha'e rei va'e. Nhandejáry manda-rupi ae amombe'u kóa peẽ-my, peẽ Hesu reroviaha va'e kwéry-pe. Iporā voi pejapo ko va'e. Ne rembireko Hesu reroviaha e'ỹ jepe, ani ereheja teĩ íxupe. Oikose vyteri ramo ne ndive, ani erepoi íxugwi. ¹³ Nde, ne ména Hesu reroviaha e'ỹ jepe, ani ereheja rei teĩ íxupe. Oikose ramo ne ndive, ani joty erepoi íxugwi. ¹⁴ Ereiko jave ne ména ndive, Nhandejáry ohovasa va'erā íxupe. Hesu-rehe ojerovia e'ỹ va'e jepe Nhandejáry ohovasa joty arā íxupe. Hese ojerovia va'e ndive oiko-gwĩ gwembireko tee ndive oiko-gwĩ ohovasa arā ave íxupe.

Upéixa ave kwimba'e kwéry. Nderepoíry ramo ne rembireko-gwĩ Nhandejáry ohovasa arā íxupe. Hese ojerovia e'ỹ va'e-pe jepe Nhandejáry ohovasa joty arā íxupe. Hesu reroviaha ndive oiko-gwĩ, oména tee ndive oiko-gwĩ, ohovasa ave íxupe. Ani hagwā nde ra'y kwéry, nde rajy kwéry, ne memy kwéry oiko Hesu reroviaha e'ỹ ra'y-rami ohovasa arā íxupe. Hesu reroviaha ndive oiko va'e-pe Nhandejáry ohovasa ave arā íxupe.

¹⁵ Hesu reroviaha e'ỹ va'e opoise ramo jepe ndéhegwi eheja katu toho. Ndéhegwi opoita ramo jepe ne ména, ne rembireko tekoha porā-py jepe ereiko. Ani erenhemyasy eterei. Nhandejáry katu nhande poravo nhande py'agwapy hagwā ojóehe. ¹⁶ Ndereikwaái, kunha, mba'exa-rami ne ména erembojerovia hagwā Hesu-rehe onheresende hagwā. Nderekwaái ave, kwimba'e, mba'exa-rami ne rembireko erembojerovia hagwā ave Hesu-rehe onheresende hagwā.

¹⁷ Nhandejáry-pe omboete va'erā-pe meme anhemonhe'ẽ peẽ-my. Nhandejáry remimbota-rupi ejapo katu ne rembiapo. Ha'e nhane mombaraete nhamba'apo hagwā. Hemiapo ambue mbue peteĩ teĩ pejapose va'e pejapo katu. Nhandejáry-rehe erejerovia-ma ramo eremba'apo joty va'ekwe. Ani erepoi ne rembiapo porákwe-gwĩ. Upe eremba'apo hagwe-rami eremba'apo joty. Upéixa ha'e xe Hesu reroviaha kwéry-pe peteĩ teĩ tetā-rupi oĩ va'e-pe. ¹⁸ Nde judeu ra'y-gwĩ ne pirekytĩ rire ne renói ramo Nhandejáry, ani ereipe'ase ne kytĩ hagwe. Nde rete ereheja judeu rete-rami. Ha judeu e'ỹ-rami nane pirekytĩ vyteri ramo ne renói ramo Nhandejáry, ani ereheja ne pirekytĩ uka teĩ. ¹⁹ Ipirekytĩ uka va'e, ipirekytĩ uka e'ỹ va'e peteixa oiko Nhandejáry renonde-py. Ndaha'úi nhane pirekytĩ-rehe Nhandejáry opena. Hemimbota-rupi jaiko mate oipota. ²⁰ Ne renói hagwe-rami pyta katu. Eremba'apo joty ereiko-vy va'ekwe erejerovia-ma ramo Hesu-rehe. Upe eremba'apo hagwe-rami emba'apo katu. ²¹ Nde, ne rembiapo repy e'ỹ-rehe

* 7:10-11 Mt 5.31-32; 19.1-9; Mc 10.2-12; Lc 16.18

nde jokwaiha pogwy-py ereiko va'e, erejerovia ramo Hesu Cristo-rehe ereiko joty nde jokwaiha pogwy-py. Ani erejapura eterei erepoi hagwā íxugwi. Ome'ê ramo erejei nde rerekoha-gwi eheja porā íxupe nde rerekohare-pe. ²²Nde jokwaiha pogwy-py ereiko vyteri va'e ojejokwái e'ý va'e-rami ereiko-ma nde py'apy ete-py. Nde jokwái teeha Nhandejáry voi. Ha nde ndejehénte eremba'apo va'e, ereiko jave ne renói ramo Nhandejáry, erepyta va'erā Cristo rembigwái ramo. ²³Nhande repy-vy Cristo omano va'ekwe. Upéixa-gwi anive erejerovia teĩ teko rei-rehe. Anive erembopu'aka teĩ ndéjehe. ²⁴Ne renói ramo eremba'apo hagwe-rami ereiko joty Cristo rekoha-rupi, xe re'ýi kwéry, Hesu reroviaha va'e kwéry. Nhandejáry ne pytygwō va'erā ereiko hagwā upéixa.

Omenda e'ý va'e-pe, tembirekokwe va'e-pe ave hekoharā omombe'u Paulo

²⁵Ha kwatia-rehe peporandu va'ekwe xe-vy “Mbava'e tipo oro'e-ta kunhataĩ omenda e'ý va'e kwéry-pe oromanda-vy?” peporandu-ma xe-vy. Nhandejáry naxe mombe'úi vyteri upéa-rehe. Ha'e xe poriahuvereko meme xe arandurā ome'ê-vy. Upéixa-gwi iporā peiko ramo ko xe nhe'ê-rupi. ²⁶Áy katu nhande, Hesu reroviaha va'e, jahasa asy asy jaiko-vy. Upéa-gwi ha'e-ta xe, iporāve neremendái ramo. Erepyta nde rekoha áygwa-rupi. ²⁷Oĩ ramo ne rembireko ani erepoi teĩ íxugwi. Neremendái vyteri ramo ani ereheka ne rembirekorā. ²⁸Eremenda ramo jepe, iporā. Upéixa ramo nderejevávýry. Kunhataĩ omenda ramo jepe iporā ave. Upéixa ramo ndojejevávýry.

Omenda va'e ojapura eterei gwemikotevê-rehe. Ko'a pygwa-rehe imandu'a ndu'a. Ha xe-vy iporāve erejapura e'ý reheve ereiko ramo. ²⁹⁻³¹Xe re'ýi kwéry, niporāi nhane mandu'a eterei ramo ko yvy arigwa-rehe. Hi'agwĩ para'e Hesu ou jevy hagwā áry. Ko áygwa ohasa-tama oho-vy. Upéixa-gwi iporāve peẽ pemenda va'e kwéry tapeiko omenda e'ý va'e reko-rami. Peẽ pejaha'o va'e kwéry tapeiko ovy'a va'e reko-rami. Peẽ pevy'a va'e kwéry, tapeiko imytu'e'ý va'e reko-rami. Peẽ pene mba'erā pejogwa va'e ojogwa e'ý va'e reko-rami peẽ tapeiko. Peẽ pene mba'e reta reta va'e mba'eve ndogwerekói va'e-rami joty tapeiko. ³²Xe-vy iporāve ndojapurái va'e-rami jaiko hagwā nanhane mandu'ái eterei ko yvy arigwa-rehe rei, jajapurave'ý hagwā.

Omenda e'ý va'e imandu'a ndu'a Nhandejáry-rehe hemimbota-rupi oiko hagwā.

³³Kwimba'e omenda va'e ae imandu'a ndu'a ko'áygwa-rehe, ombovy'ase gwembireko-pe. ³⁴Upéa-gwi mokõi va'e remimbota-rehe imandu'a meme. Nhandejáry nhe'ê ohenduse jave gwembireko nhe'ê ohenduse ave.

Kunha ave, kunhataĩ, tembirekokwe ave, naiménairy-gwi imandu'a ndu'a Nhandejáry anho-rehe íxupe gwarā mate oiko hagwā. Kunha omenda va'e ae imandu'a ndu'a mokõi va'e-rehe. Nhandejáry-rehe imandu'a jave, imandu'a ave oména-pe ombovy'a hagwā-rehe.

³⁵Upéa ha'e-ta peẽ-my pene pytygwō hagwā Nhandejáry reko tee-rupi peiko hagwā. Nda'ese mo'áiry nde-vy, Ani eremenda teĩ. Nda'e mo'ái upéixa peẽ-my. Eiko katu Nhandejáry remimbota-rupi. Inhe'ê rendu-vy eregwata. Tapene mandu'a ndu'a meme katu hese, upéa ha'ese peẽ-my.

³⁶Oĩ ramo pene pa'ũ-my túvy tajýry omenda e'ý va'e, ha'e-ta ko nhe'ê peẽ-my: Ere para'e nde rajy-rehe “Namomenda mo'ái xe rajy. Omenda e'ý-rehe opyta arā imandu'a meme hagwā Nhandejáry-rehe”. Ha áy katu nderevy'avéi para'e ne nhe'égwe-rehe. “Kunhataĩ rei-tama. Tekotevê amomenda xe rajy-pe.” “Mba'e tipo ajapo-ta?” ere tipo ra'e. “Amomenda-ta para'e, namomenda mo'ái para'e” ere tipo ra'e. Upéixa erenhemongeta ramo nde py'apy-py, ani erejapurave upéa-rehe. Erejapo nde-vy iporāve va'e. Emomenda katu nde rajy. Upéa ndaha'etí hembiaapo vai. ³⁷Erejapo nde-vy iporāve va'e. Erekwaa nde py'apy ete nhe'ê. Nde-vy iporāve nomendái ramo nde rajy, natekotevêi omenda ramo, ejapo katu upéixa. Neremomenda mo'ái íxupe. Erejapo porā. Opyta-ta kunhataĩ omenda e'ý va'e. ³⁸Upe gwajýry omomenda va'e hembiaapo porā. Ha upe gwajýry nomomendái va'e hembiaapo porāve.

³⁹Áy katu anhemonhe'ê-ta kunha omenda va'e-pe. Oikove vyteri ramo ne ména epyta indive. Ani erepoi teĩ íxugwi. Eiko porā rei katu. Ereheja ramo íxupe niporāi voi. Omano

rire jepe ne menakwe ipogwy-py ndereikovéi va'erã. Eremenda jevy arã. Hesu reroviaha va'e-rehe mate iporã eremenda. ⁴⁰ Ha neremendavéi ramo iporã ave. Xe-vy iporãve nomendavéiry. Ovy'ave arã para'e nomenda jevýi va'e omenda jevy va'e-gwi.

Pejeapysaka porã ko xe nhe'ẽ-rehe. Nhe'ẽ Marangatu tee va'e xe py'a mohynyhẽ-ma xe moarandu hagwã. Upéa-gwi pependu porã katu kóa xe nhe'ẽ.

8

Tupã ra'anga rovagwy-py gware so'o rehegwa nhe'ẽ

¹“Iporã para'e naiporãi para'e ja'u ramo tupã ra'anga rovagwy-py gware so'o?” Upéixa peporandu va'ekwe xe-vy. Áy upéa-rehe amombe'u-ta peẽ-my.

Pejohayhu porã rei katu. Pene mandu'a katu pejohayhu hagwã-rehe penhopytygwõ hagwã rei-rehe ave. Ani erejapo teĩ penhopytygwõ e'ý va'e. “Nthane arandu-ma. Anhetegwa jaikwaa-ma tupã-rehe” peje pendejéupe. Niporãi upéixa penhemomba'egwasu ani hagwã penhopytygwõ peiko-vy. “Nthane arandu-ma” ja'e ramo nhandéjehe nhandemomba'egwasu uka rei. Nanhaiptygwõ mo'ái avave-pe. Upéixa naiporãiry. Ha jajohayhu rei ramo ae nhandopytygwõ porã va'erã. ²Oĩ nipo ra'e pene pa'ũ-my onhembotuvixase rei va'e mo'ã. “Xe aranduve ko xe” he'i mo'ã ójehe. “Napopytygwõ mo'ãiry xe” he'i rei ójehe. Hi'aranduse mo'ã va'e. Ne'írã oikwaa porã. Ja'e ramo nhandéjehe “Xe aikwapa” nthane aranduseve mo'ã nhandejéupe. Ndajaikwaa porã vyteri. ³Tupã Nhandejáry-pe jahayhu tee ramo, ha'e nhande kwaa porã voi. He'ýi tee ramo jaiko.

⁴Áy katu amombe'u-ta peẽ-my tupã ra'anga rovagwy-py gware-rehe. Jaikwaa-ma tupã ra'anga ndaha'úi Tupã tee. Anhetegwa e'ý nipo ra'e. Oiko e'ý va'e voi. Tupã tee peteĩ anho Nhandejáry mate. Upéa jaikwaa-ma. ⁵Oĩ tupã kwéry áry-rehe oiko va'e he'i mo'ã ave. Ijapu rei voi upéa-rehe. Ndoikwaái mba'eve tupã tee-rehe. Upéixa-gwi omombe'u rei rei tupã-rehe. ⁶Nhandejáry ae peteĩ anho mate Tupã. Nhande Ru tee va'e upe va'e. Ha'e ohekokwaa va'e-rupi ae oiko entéro mba'e. Íxupe gwarã nhande ave jaiko. Ha'e ojeupe gwarã voi opamba'e omoingo va'ekwe. Peteĩ anho mate Nhandejáry Hesu Cristo. Ha'e omoingo va'ekwe opamba'e. Nthane moingo ave ha'e.

⁷Oĩ ave Hesu-rehe gwĩ ojerovia mixi va'e ave. Tupã kwéry oiko e'ý va'e-rehe ojerovia araka'e. Ha ne'írã oikwaa porã Tupã Nhandejáry peteĩ anho mate oikoha. Tupã ra'anga rovagwy-py gware so'o ho'u meme araka'e íxupe omboete-vy. Ha áy katu, ho'u-ma ramo, imandu'a va'erã vyteri tupã ra'anga ogwerovia hagwe-rehe. Imboete ha-py vérami ho'u joty arã. Upéa-rehe ojevavy rei arã nahi'arandúi-gwi. Nhandejáry rehegwa ndoikwaa porãiry. Ipy'a porãse mo'ã omongy'aharã rei ho'u. “Peteĩ anho mate Tupã Nhandejáry” nde'ikwaái vyteri hese.

⁸Peteĩ anho katu Tupã Nhandejáry. Ndaha'úi nhande rembi'u ja'u va'e-rehe ja'u e'ý va'e-rehe jaiko porã hendive. ⁹Upéa jaikwaa-ma. Oĩ ave nipo ra'e upéa oikwaa e'ý va'e pene pa'ũ-my. Ani pende rapixa-pe pembojevavy teĩ. Ha'e ne'írã ogwerovia porã. Ha'e he'i ramo “Ndikatúi ha'u tupã ra'anga rovagwy-py oĩ va'ekwe” he'i ramo, pemoirũ katu íxupe. ¹⁰⁻¹¹“Xe, aikwaa-ma, ndaipóri tupã ambue. Tupã ra'anga oiko e'ý va'e voi aikwaa-ma xe” peje. Ha upéa peje jave peho tupã ra'anga omboete va'e renda-py, pekaru rei upe-py. “Ndaha'úi tupã” peje jave pekaru henonde-py. Ha Hesu-rehe ne'írã oikwaa porã va'e pende rexa-ma ramo no'ã-rami he'i arã opy'apy-py: “Iporã nipo ra'e nhamboete tupã ra'anga-pe ave” he'i arã avei. “Upe Hesu-rehe ojerovia tee va'e okaru ko'a-py tupã ra'anga nipo omboete ra'e. Xe ave amboete-ta íxupe” he'i rei arã ra'e. Ha upéa-rehe pembojevavy arã pende rapixa-pe. Upe va'e ndoikwaa porã vyteri tupã rehegwa nhe'ẽ. Upéa-gwi ndikatúi ho'u tupã ra'anga rovagwy-py omoĩ va'ekwe. Ha pende rexa-gwi ho'u ave va'erã ojevavy-vy. Upéixa-gwi pembojevavy arã íxupe. Hesu omano va'ekwe ipy'a omopotĩ hagwã. Ha áy katu pembojevavy jevy íxupe ojevya'a mongy'a jevy-vy. Naiporãi voi upéa. ¹²Upéixa pende rekoha-rupi pembojevavy ramo pende rapixa kwéry, Cristo-rehe ndojeroviapa gwasúiry va'e, peẽ ave pejevavy. Upéa-rehe pene rembiapo vai voi Hesu-pe.

¹³ Xe katu upéixa naxe rembiapo vaiséiry xe rapixa-rehe. No'ã-rami he'i ramo tupã ra'anga rovagwy-py omoĩ ramogware-rehe “Ja'u e'ỹ va'e kóa. Nhanhemongy'a arã ja'u ramo.” Aipo he'i ramo xe-vy xe rapixa, xe ave nda'u mo'ãi ani hagwã ambojejavý rei íxupe. Aipytygwõse íxupe. Ahayhu rei íxupe. Upéixa-gwi nda'u mo'ãi ho'u e'ỹ va'e.*

9

Hesu remimondo rekoha rehegwa nhe'ẽ

¹ Xe ko Nhandejáry Hesu remimondo va'e voi. Upéa-gwi avave yvypóry nomombe'úiry xe rekorã xe-vy. Hesu remimondo voi ko xe. Ahexa-ma va'ekwe íxupe. Ahexa rire amombe'u-ma peẽ-my hesegwa nhe'ẽ. Upéixa-gwi voi pejerovia-ma Hesu Cristo-rehe. Upéa-gwi peikwaa-ma voi xe-rehe xe ko Hesu remimondo va'e voi. ²Oĩ para'e xe-rehe he'i rei va'e “Ndaha'úi Hesu remimondo va'e Paulo”. Oĩ ramo upéixa he'i rei va'e, ndaha'úi nipo pende Corinto pygwa kwéry ra'e. Peẽ niko ndaikatúi peje upéixa. Peikwaa porã-ma xe rekoha. Hesu remimondo va'e voi ko xe. Oĩ-ma heta he'i pende-rehe “Corinto pygwa kwéry ojerovia-ma nipo Hesu Cristo-rehe ra'e. Paulo nhe'ẽ ohendu-gwi nipo ra'e oiko-ma Hesu rape-rupi. Hesu remimondo va'e nipo ra'e Paulo” pende rexa va'ekwe he'i xe-rehe.

³ Ha xe-rehe onhe'ẽ rei va'e-pe ha'ese voi xe “Hesu Cristo remimondo va'e voi ko xe” ha'ese íxupe kwéry. ⁴Upéa-gwi “Iporã voi xe remimbo'e kwéry ome'ẽ xe-vy xe remikotevẽ akaru hagwã hay'u ave hagwã. Iporã voi ome'ẽ xe-vy xe remi'urã xe remimbo'e repy rekovia” ha'ese íxupe kwéry. ⁵Ha'ese ave “Kwimba'e ambue, Hesu remimondo va'e, ogweraha meme gwembireko ondive, Hesu reroviaha va'e hambireko. Hesu ryvy kwéry ogweraha meme ave gwembireko. Pedro ave ogweraha gwembireko hendive. Ovale ave xe ajapo ha'e ramigwa” ha'ese ave. ⁶Hesu remimondo ambue kwéry opoi-ma gwembiapokwe-gwi ombo'e mbo'e hagwã Hesu rehegwa nhe'ẽ. Aipo ramo, ma'erã-gwi peje ore-rehe “Iporãve omba'apo Barnabé, Paulo ave opo-rupi.” Naiporã voi upéa pene nhe'ẽ. Ore ave Hesu remimondo va'e.

⁷Pene mandu'a katu soldado kwéry-rehe. Ndojogwái gwemi'urã, ndojogwái ave oaoã. Hepyã-rehe oiko soldado ramo. Pene mandu'a ave onhotỹ va'e-rehe. Ndojogwái gwemi'urã. Okokwe-gwi ho'u hi'akwe. Gwembiapokwe-rehe ae ha'e okaru. Pene mandu'a ave hymba va'e omongakwaa va'ekwe-rehe. Gwemimbokakwaa repy okamby'u porã upe va'e. Ha'e ramigwa ave ore. Iporã ave orohekombó'e ramo ore remikotevẽ-rehe. Ore rembiapo repy-vy oroiko va'erã upéixa. ⁸Ko xe nhe'ẽ ndaha'úi xejéhegwi reíte. Ymagware myamyri Moisés ave omombe'u ave araka'e gwembiapo repy-rehe okaru va'e rekoha rehegwa nhe'ẽ ave. ⁹Yma araka'e Moisés ohai Nhandejáry nhe'ẽ kwatia-rehe. He'i ohai-vy:

“Ereiporu ramo ne rymba erejykýi ramo nde trigo ra'yi, ani erejuru jokwa íxupe. Eheja katu to'u omba'apo jave.”*

Nhande rehegwa nhe'ẽ voi upe va'e. Ndaha'úi hymba anho-rehe opena araka'e Nhandejáry ohai uka hagwã onhe'ẽ. ¹⁰Nhande-rehe ave ha'e opena araka'e ohai uka-vy. Nhane rembiapo-rehe jakaru hagwã omombe'u upéa araka'e Nhandejáry. Onhemity' va'e omba'apo kokwe-py gwemitygwe ha'arõ-vy. “Anhemity'-ta ha'u hagwã xe remitygwe” he'i ojúepe onhemity'-vy. Onhembiso va'e he'i ave omba'apo-vy “Ajoso-ta xe remi'urã” he'i ojúepe onhembiso jave. Enterove omba'apo hepyã ra'aro-vy.

¹¹ Ore ave, orombo'e mbo'e oroiko-vy peikwaa hagwã Nhandejáry nhe'ẽ. Inhe'ẽ pehendu-gwi peiko porã-ma hendive. Pende rovasa-ma Nhandejáry ore remimbo'e-gwi. Iporã voi upéa. Ore remimbo'e rekoviarã iporã ave peme'ẽ ore-vy ore remikotevẽ. Iporã voi peje ramo pendejúpe “Paulo Barnabé ave omombe'u va'ekwe Nhandejáry nhe'ẽ xe-vy. Upéixa-gwi ame'ẽ-ta íxupe hemikotevẽ”.* ¹²Ambue kwéry-pe pehexakwaa peme'ẽ hagwã íxupe imba'erã hemikotevẽ. Iporã upéa. Ha ore tipo? Íxugwi oromombe'uve peẽ-my Nhandejáry nhe'ẽ. Hetave ore remimombe'u pehendu-ma. Iporãve ore-vy ore rexakwaa

* 8:13 Rm 14.13-23 * 9:9 Dt 25.4 * 9:11 Rm 15.27

ave peme'ê hagwã ore remikotevê. Upe jave jepe ore orojerure e'y-vy oroiko pende hapye orohekomb'e-vy. Upéixa oroiko ani hagwã avave onhe'ê rei ore-rehe. Orohasa asy voi upe-py orombo'e oroiko-vy ramo. Ore rembiapo repy-rehe orojogwa va'ekwe ore remikotevê. “Xe mba'erã aipota ereme'ê xe-vy gwarã” nda'e mo'ãi avave-pe. Upéa-gwi ndakatúí avave he'i xe-rehe “Nahenduséi Paulo nhe'ê. Omba'erã-rehe mate ombo'e Nhandejáry nhe'ê Paulo” ndikatúí ave xe-rehe.

¹³ Pene mandu'a katu Nhandejáry róga kakwaa-py omba'apo va'e-rehe. Ome'ê meme íxupe kwéry hemi'urã hembiaipo repy-rehe. Nhandejáry-pe hymba ohapy va'e ndohapypáiry. Oheja gwemi'urã.* ¹⁴ Upéixa ave Nhandejáry he'i va'ekwe “Hesu Cristo rehegwa nhe'ê porã omombe'u mbe'u va'e-pe pembohekovia porã katu hemikotevê peme'ê-vy”.*

¹⁵ Upéixa ramo xe remimombe'ukwe-rehe jepe pereve heta-ma xe-vy. Xe ae katu ndaipotáí xe remimombe'u repyke. Ndaha'êi hepy-rehe amombe'u Nhandejáry nhe'ê. Ndahaíry ave ko kwatia peme'ê hagwã xe-vy xe mba'erã. Xe remimombe'u repyrã-rehe napena mo'ãi pono avave he'i xe-rehe “Omba'erã oipota eterei-gwi nipo Paulo omombe'u ra'e Nhandejáry nhe'ê ore-vy”. Xe-vy iporãve joty amano upéa-gwi. ¹⁶ Nhandejáry katu xe mondo va'ekwe. He'i xe-vy “Tereho Hesu Cristo rehegwa nhe'ê porã eremombe'u hagwã. Emoherakwã hesegwa nhe'ê” he'i va'ekwe xe-vy. Hemimondo-rupi aiko ramo, Hesu Cristo rehegwa amombe'u. Ndikatuíry anhemomba'egwasu amombe'u va'e-rehe. Amombe'u mbe'u inhe'ê imondo-vy. Ha namombe'úiry ramo ra'e amosarambi-vy inhe'ê xe vy'are'y eterei arã ra'e. ¹⁷ Xe remimombe'use amombe'u-gwi avy'a. Xe remimombe'u repy rekoviarõha oiko xe mbovy'aha. Ha xe mbovy'a rei hagwã-rehe namombe'úi ramo jepe hesegwa nhe'ê amombe'u joty va'erã. Ndaha'êi xejéhegwi rei amombe'u. Nhandejáry ae katu he'i va'ekwe xe-vy “Emombe'u katu Hesu Cristo rehegwa nhe'ê”. Upéa-gwi apombo'e. Apombo'e va'e-rehe xe avy'a. ¹⁸ Xe remimombe'u repy ndaipotáíry. “Eme'ê xe-vy xe remimombe'u repy” nda'e mo'ãi avave-pe. Amombe'u jave Nhandejáry nhe'ê avy'a eterei. Upéa-rehe ha'e xejéupe “Nhandejáry xe mbovy'a-ma. Inhe'ê amombe'u-gwi xe mbovy'a-ma. Xe remimombe'u repyke ombohekovia-ma xe-vy Nhandejáry.”

¹⁹ Xe ko ajejokwái e'y va'e voi. Xe-vy ae katu nomombe'úiry voi avave ko yvy pygwa mba'éixa po amombe'u va'erã Nhandejáry nhe'ê. Inharandu-rupi amombe'u inhe'ê. Ndaipóri jepe xe jokwaiha anheme'ê-ma joty xe enterovea rembigwairã ramo hetave ojerovia hagwã Hesu Cristo-rehe. ²⁰ Upéixa ramo aiko ymagware myamyri Moisés remimombe'ukwe-rupi ha Hesu Cristo remimombe'ukwe-rupi ave.

Aime jave judeu kwéry apyte-py anhemoingo ha'e kwéry-rami ave. Ndaikói jepe myamyri Moisés remimombe'ukwe-rupi, hemimombe'ukwe-rupi oiko va'e apyte-py aime jave heko-ramia aiko, ha'e kwéry ohenduse hagwã Hesu Cristo rehegwa nhe'ê ojerovia hagwã hese. ²¹ Aime jave judeu e'y apyte-py anhemoi ha'e kwéry-rami ave xe. Ndaikói myamyri Moisés remimombe'ukwe-rupi ani hagwã ajoko íxupe kwéry Hesu Cristo-gwi. Ijapyte-py aiko voi Nhandejáry remimombe'ukwe-rupi, Hesu Cristo remimbota ajapo-vy ha'e kwéry ohenduse hagwã Hesu Cristo rehegwa nhe'ê ojerovia hagwã hese. ²² Aime ramo Hesu Cristo-rehe ojerovia kangy vyteri va'e apyte-py anhemoi hemimbota-rehe. Aipytygwõse íxupe kwéry ojerovia ete hagwã Hesu-rehe. Upéixa anhemoi meme xe ndive oiko va'e yke-rehe amombe'u mbe'u hagwã Hesu Cristo rehegwa nhe'ê enterove va'e-pe. Upéixa ikatu oí va'erã hetave onheresende va'erã. ²³ Upeixagwa ambo'e ramo inhe'ê, aiko porã arã hendive xe rovasa meme hagwã Nhandejáry.*

²⁴⁻²⁷ Peikwaa-ma nipo ra'e oripara va'e-rehe. Heta heta oí oripara va'e kwéry. Enterove hatã jepe oripara, petei mate ogwahê henonde-rupi. Upe va'e-pe mate ome'ê arã imba'erã. Oripara va'ety hembiaipo kwaa voi. Oripara para hatãve tãve oho-vy. Ndopoi mo'ãi tape oripara oho ha-gwi. Ohupityse imba'erã. Ojegwakarã yvyra rogwe gwigwa oganase-vy. Upéa petei áry-rupi iporã. Upe rire ipirupa-ma.

* 9:13 Dt 18.1

* 9:14 Mt 10.10; Lc 10.7; 1 Tm 5.17-18

* 9:23 1 Co 10.32-33

Oripa va'ety va'e vérami tajaiko jahupity hagwā nhande rekoha porārā. Upéa ndaha'éi peteĩ áry-py opa va'erā. Opa e'ỹ va'e gwive iporā va'erā jaiko ramo Nhandejáry ndive.

Ha ohuga ramo ojosokea va'e peteĩ va'e ndo'ái. Ohuga kwaave va'e ndo'áiry.

Upe hembiaipo kwaave va'e-rami aikose ave xe. Nhandejáry rape pokwaaha ramo aikose pono mba'eve xe mbojejavu. Ndaxe rembiapo vaiséiry. Anhemonhe'ẽ nhe'ẽ ambue kwéry-pe “Egwata porā Hesu rape-rupi” ha'e anhemonhe'ẽ-vy. Naiporāi voi arā xe-vy ajevavy ramo upéixa anhemonhe'ẽ rire. Xe atĩ eterei xe rembiapo vairā ajapo hagwā. Upéa-gwi tembiamo vai ajoko xejéhegwi aiko porā hagwā Hesu renonde-py. Xe rembiapo vaise ajoko xejéhegwi ani hagwā Hesu he'i xe-vy “Ne rembiapo vaikwe-rehe xe ndavy'ái ne ndive. Ani ereju xe renda-py” pono he'i xe-vy Hesu.*

10

Ani jajapo nhane ramoigwasu rembiapo vaikwe ramigwa

¹ Xe re'ýi kwéry, Hesu reroviaha va'e kwéry, tapene mandu'a kena, myamyri nhane ramoigwasu kwéry-rehe. Yma araka'e ha'e kwéry ojerovia nhane ramoigwasu Moisés-rehe. Hendive tekваты e'ỹ-rupi oiko va'ekwe hikwái araka'e. Upe-py oje'ói jave peteĩ araigwegwasu oho henonderā-rupi kwéry haperā rexa uka-vy íxupe kwéry. Ygwasu Pytā pa'ũ-rupi ave ohasapa oje'ói-vy hikwái. Inhakỹ e'ỹ reheve voi ohasapa hikwái y pa'ũ-rupi oje'ói-vy.* ² Ha oĩ jave íxupe kwéry upe araigwegwasu, ha'e kwéry ohasa jave ygwasu mbyte-rupi onhemopeteĩ Moisés ndive. “Oroiko-ta ne nhe'ẽ-rupi” he'i ra'e Moisés-pe hikwái.

³ Ha tekваты e'ỹ-rupi oiko jave araka'e enterove ho'u meme tembi'u yváy-gwi ombou va'e.* ⁴ Hoy'u ave yváy gwigwa y hikwái. Nhandejáry réry-py Moisés oinupā peteĩ ita íxugwi osẽ hagwā y íxupe kwéry. Upe ita omombe'use Cristo-rehe. Upéa-rehe ja'e “Cristo omoirũ íxupe kwéry araka'e”. Nhandejáry ohovasa meme íxupe kwéry.* ⁵ Ohovasa ramo jepe ndahetái oĩ ombovy'a va'e araka'e Nhandejáry-pe. Hetave tave oĩ ombovy'are'ỹ va'e Nhandejáry-pe. Hembiamo vaikwe-rehe omano va'ekwe araka'e ha'e kwéry. Tekваты e'ỹ-gwi nosẽ mo'ái araka'e hikwái. Nhandejáry ndovy'ái hendive kwéry. Upéixa-gwi nomogwahẽi íxupe kwéry ijyvyrā-my.*

⁶ Upéa Nhandejáry ojapo araka'e nhane moarandu hagwā, nhane ramoigwasu amyri-rami ani hagwā jaiko. “Xe rembiapo vairā ajapose va'e ndajapo mo'ái” ja'e hagwā nhane mandu'a ramo hembiamo vaikwe-rehe. Nhande katu, niporāi jajapo ha'e kwéry-rami.*

⁷ Oĩ araka'e umi ipa'ũ mygwa omboete araka'e Nhandejáry e'ỹ va'e-pe, tupā ra'anga anga ojapo va'ekwe-pe. Upéa-rehe Nhandejáry ndovy'ái. Ohai uka araka'e kwatia-rehe:

“Okaru ogwapy-vy tupā ra'anga renonde-py. Oka'hu ave upe-py. Okotyhu ave upe-py.

Ojeroky ave tupā ra'anga renonde-py.”*

Ha nhande ave niporāi jajerovia ramo Nhandejáry e'ỹ va'e-rehe. Ndovy'ái arā Nhandejáry upéa jajapo ramo.

⁸ Oĩ ave araka'e gwĩ ipa'ũ mygwa teko ky'a-rupi okwa va'e. Ani ha'e-rami ereiko teĩ. Hembiamo vai eterei-rehe omano vinte e três mil kente peteĩ áry-py. Upéixa oiko-gwi Nhandejáry ombohasa asy íxupe kwéry omano hagwā hikwái. Ani ha'e-rami ereiko teĩ.*

⁹ Oĩ ave araka'e gwĩ ipa'ũ mygwa he'i rei va'e “Nhandejáry oheja rei arā xe rembiapo vaikwe” he'i rei va'e ojehe. Ani teĩ erejapo ha'e-rami. Upéixa ojapo va'e-pe araka'e mbóí oisu'u. Nhandejáry-pe ombovyte vyte-gwi omano va'ekwe hikwái. Mbóí oisu'u-gwi omano.*

* 9:24-27 Fp 3.14; 2 Tm 4.7; Hb 12.1-2 * 10:1 Êx 13.21-22; 14.22-29 * 10:3 Êx 16.35 * 10:4 Êx 17.6; Nm 20.11
* 10:5 Nm 14.29-30 * 10:6 Nm 11.4 * 10:7 Êx 32.6 * 10:8 Nm 25.1-18 * 10:9 Nm 21.5-6

¹⁰ Oĩ ave araka'e gwĩ ipa'ũ mygwa Nhandejáry-pe onhe'ẽ vai gwekoha-rehe. “Ndavy'ái kóa ndive” he'i. “Kóa nipoarĩ xe-vy” he'i. “Mba'e ambue aipota” he'i ave. “Ma'erã-gwi nome'ẽi xe-vy xe mba'erã iporãve va'e?” he'i ave. Upéixa ndovy'ái Nhandejáry remime'ẽgwe-rehe. Nhandejáry indive ndovy'ái-gwi omondo ijukaharã íxupe kwéry ohundipa hagwã. Ani erejapo teĩ ha'e kwéry-rami. Ani erenhe'ẽ vai teĩ Nhandejáry-pe nde rekoha-rehe.*

¹¹ Nhandejáry ombohasa asy va'ekwe myamyri nhane ramoigwasu kwéry-pe hendive oiko va'e omoarandu hagwã. “Hembiapo vai-rehe nipo ogwereco asy ra'e Nhandejáry” he'i hagwã ójehe ombohasa asy íxupe kwéry. Ha upéa-rehe nhane moarandu ave Nhandejáry. Kwatia-rehe ohai uka va'ekwe nhande-vy gwarã nhane renonde nhane mbo'e hagwã. Jaikwaa-ma ramo mba'éixa pa ojohu vai nhane ramói amyri kwéry, gwĩ hembiapo vai va'e jaikwaa-ma arã ave “Ani erejapo teĩ upéixa” omombe'use nhande-vy. Hi'agwi-ma vvy opa hagwã óra. Upéa-rehe nipoarĩ voi jaiko upe myamyri hembiapo vai va'e kwéry-rami.

¹² Ani ere teĩ nde rekorã-rehe “Xe naxe rembiapo vaíry va'e xe. Xe mbaraete-gwi ndajejavýi” anike ere teĩ. Tekotevẽ jajerure Nhandejáry-pe nhane pytygwõ hagwã anive hagwã jajapo vai. ¹³ Nhane mbojejavyse va'e oiko nhande yke-rehe nhane mbotavy hagwã. Enterovéa-pe oity ukase. Nhandejáry ae katu onhe'ẽ-gwi ova e'ỹ va'e, onhe'ẽ-gwi ova e'ỹ va'e voi Nhandejáry. He'i hagwe-rami ojapo va'e voi. “Oropytygwõ-ta” he'i nhande-vy. “Ou ramo ne mbojejavyseha omombaraete-ta, oromo'arandu-ta ave ereikwaa hagwã mba'éixa pa ereiko hagwã ani hagwã ipu'aka nde-rehe” he'i nhande-vy.*

¹⁴ Xe re'ýi kwéry Hesu reroviaha va'e ani eremotupã ra'anga Nhandejáry e'ỹ va'e-pe. ¹⁵ Peẽ pekakwaa-ma nipo ra'e, pene arandu-ma nipo ra'e. Tapejeapysaka porã katu xe nhe'ẽ-rehe. Tapenhemongeta pende py'a-py xe nhe'ẽgwe-rehe “Anhetegwa nhe'ẽ para'e, teko rei nhe'ẽ para'e” peje katu peporandu-vy pende py'a-py. Anhetegwa voi xe nhe'ẽ. Tapejeapysaka porã katu ko xe nhe'ẽrã-rehe. ¹⁶ Hesu mano hagwe-rehe nhane mandu'a ramo Nhandejáry renonde-py ha'e nhande rovasa-ma ave. Jay'u jave nhane momandu'a uka Hesu rugwykwe-rehe. Nhaime-ma Hesu ndive peteixa. Mbojape nhambopóy ja'u va'erã. Ja'u jave nhane momandu'a uka Hesu retekwe-rehe. Nhaime-ma Hesu ndive peteixa.* ¹⁷ Peteĩ mbojape-gwi enterove ho'u. Nhande reta reta va'e jaiko peteixa peteĩ va'e-rehe nhane mandu'a-gwi.

¹⁸ Tapene mandu'a ave Israel re'ýi judeu kwéry reko-rehe. Pa'i kwéry ohapy meme hemime'ẽrã Nhandejáry-pe. Nhandejáry omboete haty-py ohapy. Ha ohapy e'ỹ va'e ho'u pa'i kwéry. Ho'u jave imandu'a “Xe katu Nhandejáry re'ýi voi ko xe” he'i ojeupe.*

¹⁹ Kóa-rehe amombe'u peikwaa porãve hagwã. Tembi'u-rehe, Nhandejáry e'ỹ va'e-rehe ave amombe'u-ta peẽ-my. Tupã ra'anga oiko e'ỹ va'e voi. Jaikwaa-ma voi ha'e kwéry ndoikoiryha. Anhetegwa ave ko xe nhe'ẽ. ²⁰ Gwĩ tupã ra'anga-rehe ojerovia va'e omoĩ rei so'o hovagwy-py. “Xe járy rovagwy-py amoĩ hemi'urã” he'i rei hese. Oiko e'ỹ va'e-rehe he'i upéa. Ha ha'e ko xe, omoĩ ramo so'o tupã ra'anga rovagwy-py, ome'ẽ upe so'o anháy kwéry-pe. Anháy réry-py omoĩ upe-py. Ani eremoirũ teĩ anháy-pe.* ²¹ Nhane mandu'a hagwã Hesu omano hagwe-rehe ja'u uva rykwere Nhandejáry renonde-py. “Nhande katu Nhandejáry re'ýi tee voi” ja'e nhane mandu'a-vy hese. Upéa-gwi naiporãi jay'u anháy pegwarãgwe. Nhandejáry renonde-py ja'u mbojape nhane mandu'a hagwã Hesu retekwe-rehe. “Nhande katu Nhandejáry re'ýi tee” ja'e nhane mandu'a-vy hese. Upéa-gwi naiporãi ja'u ave so'o anháy pegwarãgwe. Anháy réry-py ome'ẽ va'ekwe naiporãi ja'u nhande. ²² Hakate'ỹ voi nhande-rehe Nhandejáry. Ani erembovy'are'ỹ teĩ íxupe. Na pene mbaraeteve íxugwi. Ani erembovy'are'ỹ teĩ íxupe.*

* 10:10 Nm 16.41,49 * 10:13 2 Pe 2.9 * 10:16 Mt 26.27-28; Mc 14.22-24; Lc 22.19-20 * 10:18 Lv 7.6 * 10:20 Dt 32.17 * 10:22 Dt 32.21

Cristo reroviahā va'e tekotevẽ ojohayhu
(Rm 15.1-3; Fp 2.4)

²³Nhande Hesu Cristo re'yī tee va'e nhande. Upéa-gwi ndaipóri ikatu e'ȳ va'e nhande-vy. Heta mba'e oĩ jepe nanhane pytygwōi va'e. Ndaha'ei nhande moporā hagwā-rehe jajapo upe va'e.* ²⁴Ani peteĩ teĩ pendejeupe gwarā mate pepena teĩ. “Mba'e tipo iporāve ambue kwéry-pe” tere ndejeupe erejapose va'e-rehe. Pejohayhu-rupi erepena ambue kwéry-rehe.

²⁵⁻²⁶“Tupā Nhandejáry ko yvy járy voi. Upéixa-gwi entéro oiko ve'e gwive járy ave” he'i Nhandejáry nhe'ẽ kwatia-rehe oĩ va'e. Upéixa-gwi ndoikói ikatu e'ȳ va'e jakaru hagwā. Ome'ẽ pejogwa hagwā so'o pene remi'urā. Erejogwa mboyve natekotevẽi ereporandu upe so'o-rehe. “Tupā ra'anga rovagwy-py gware tipo ko so'o? Ha'u ramo upe so'o ajevavy para'e?” ani ereporandu nde py'a-py. He'u rei katu. Nhandejáry remimoingokwe voi upe so'o.*

²⁷Nhandejáry-rehe ojerovia e'ȳ va'e ne renói ramo indive erekaru hagwā, iporā. Ere hose ramo, tereho katu. Ne remi'urā ome'ẽ ramo he'u rei joty. Ani ereporandu ne rembi'u me'ẽ ha-pe “Ko va'e tipo tupā ra'anga rovagwy-py gware?” Ani upéixa ere. ²⁸⁻³⁰Oĩ ramo imombe'uha “Ko va'e so'o tupā ra'anga rovagwy-py gware” he'i ramo, ani ere'u pono erembovy'are'ȳ íxupe peteixa pevy'a hagwā. Jaikwaa upe so'o ikatu porā ere'u va'erā jepe ndere'u mo'ái joty. Upe Nhandejáry-rehe ojerovia miri va'e he'i ra'e “Niporāi nhande Nhandejáry-rehe jajerovia va'e ja'u ramo so'o tupā ra'anga-pe gware.” Upe so'o ndere'úi ramo “Iporā” he'i arā nde-rehe. Ha erejehou porā ave arā. Pevy'a arā onhondive. Gwī ndovy'ái va'e he'i arā “Xe-vy iporā ha'u. Ma'erā-gwi he'i apena hagwā xe rapixa-rehe? Akaru e'ȳ mboyve amboete Nhandejáry-pe. Atima íxupe xe remi'urā-rehe. Xe ndaikwaái ma'erā he'i xe-vy pono ha'u upe so'o” he'i arā ndory'áiry. ³¹Ha'e-ta voi peẽmy teko porā-rupi katu peiko. Penhopytygwō katu. Pekarū ramo, pey'u ramo, tapeiko porā. Tembiapo porā mate pejapo penhopytygwō-vy. Upéixa iporā ramo pende rekoha pemomba'egwasu arā Nhandejáry-pe. “Iporā voi Tupā Nhandejáry” he'i arā nde rekoha rexa va'e. ³²Judeu kwéry renonde-py judeu e'ȳ renonde-py ave, Tupā Nhandejáry-rehe ojerovia va'e renonde-py ave tapeiko porā katu ani hagwā avave he'i nde causa-gwi “Xe ndajeroviaséi Hesu Cristo-rehe.”

³³Xe rekoha-rami katu peẽ peiko katu. Xe aiko meme teko porā-rupi ambojerovia hagwā enterove va'e-pe Hesu-rehe. Xéjehe anho rei ndajekóiry. “Mba'e tipo iporāve ambue kwéry-pe?” ha'e xéjeupe ajapose va'e-rehe. Upéa ajapo ha'e kwéry ojerovia hagwā Hesu-rehe onheresende-vy.*

11

¹Cristo reko-rupi aiko. Upéa-gwi iporā peiko ramo xe reko-rupi.*

Mba'eixagwa pa kunhagwe rekoha Nhandejáry-pe ojeporahéi haty-py

²Pene mandu'a meme nipo xe-rehe ra'e. Xe remimombe'u-rupi nipo peiko meme va'e ra'e. Xe mbovy'a voi upe va'e. ³Oĩve xe nhe'ẽ amombe'uve va'erā peẽmy. Pejeapysaka porā katu peikwaa porāve hagwā Hesu rehegwa nhe'ẽ. Cristo pogwy-py oiko kwimba'e. Ha kunha oiko jevy kwimba'e pogwy-py. Ha Cristo katu oiko joty Nhandejáry pogwy-py. ⁴⁻⁵Pene mandu'a katu upéa-rehe peiko porā hagwā Nhandejáry-pe omboete ojogweroaty haty-py. Peẽ, Nhandejáry nhe'ẽ-py omombe'u va'ety, peẽ Nhandejáry-pe ombojeupi onhe'ẽ va'e ave pejogweroaty ramo Nhandejáry-pe pemboete hagwā tapeiko porā katu.

Niporāi voi kwimba'e inhakā rehegwa reheve oime upe-py. Upéixa oime ramo nomboete teéiry Cristo-pe. Niporāi ave kunha inhakā rehegwa e'ȳ reheve oime upe-py. Upéixa inhakā rehegwa nomondéi ramo nomboete teéiry oména-pe. Onhemoakāperō uka va'e ramigwa omotí arā oména-pe. ⁶Ha nomondeséi ramo inhakā rehegwa, peje íxupe “Eikyti

* 10:23 1 Co 6.12 * 10:25-26 Sl 24.1 * 10:33 1 Co 9.19-23; Fp 2.4 * 11:1 1 Co 4.16; Fp 3.17

uka ne akā ragwe”. Ha otĩ eterei-gwi noikytĩsúi inhakā ragwe ramo nonhemoakāperō ukasúi ramo ave, tomonde oakā rehegwa.

⁷Kwimba'e katu Tupā Nhandejáry omoingo va'ekwe ha'e ramigwarā. Inhe'ẽ-rupi oiko hagwā omoingo va'ekwe. Ohexa uka mba'eixagwa Nhandejáry remimoingo porā ipu'aka marangatu tee-gwi kwimba'e-pe ojapo va'ekwe. Upéixa-gwi niporāi voi oime ramo oakā rehegwa reheve Nhandejáry-pe omboete haty-py. Ha kunha katu ohexa uka mba'éixa pa Nhandejáry rembiapo porāgwe ojapo-ma ramo kwimba'e kágwe-gwi kunha ppyrā.*

⁸Kwimba'e ppy omoingose ramo, Nhandejáry ndojapo mo'ái kunha-gwi kwimba'e ppyrā. Kwimba'e ppy-gwi ae jepe oipe'a va'ekwe upe kunha ppyrā. ⁹Kwimba'e ppyrā nomoingói ave va'ekwe kunha ppy-rehe ha-py. Kunha ppyrā ae ojapo va'ekwe kwimba'e ppy-rehe ha-py.* ¹⁰Upéa-rehe onhombaoaty ramo Hesu reroviaha va'e kwéry, kunha kwéry omonde oakā rehegwa va'e. Upéa omonde jave ohexa uka arā omboete teha oména-pe. Nhandejáry rembigwái yváy pygwa va'e kwéry ave oikwaa hagwā omboete oména-pe oiko-vy.

¹¹Hesu reko-rupi jaiko-ma ramo nhane akā-gwi rei ndikatúí jajapo. Kunha kwéry oikotevê kwimba'e kwéry-rehe ha kwimba'e kwéry oikotevê kunha kwéry-rehe ave. ¹²Yma va'ekwe Nhandejáry ojapo kunha kwimba'e kágwe-gwi. Áy katu kwimba'e oiko kunha-gwi. Ha Nhandejáry katu omoingo enterovéte. ¹³Pene mandu'a katu Nhandejáry-pe ombojeupi ramo onhe'ẽ va'e-rehe. Kunha oakā nandi reheve ombojeupi ramo onhe'ẽ pene pa'ũ-my ndapejohu poráiry. ¹⁴Nhane akā gwigwa rei arandu oikwaa uka kwimba'e rekoha nhande-vy. Inhakā ragwe puku rei ramo naiporāi voi nhande-vy. Otĩ arā oiko hagwā nhane pa'ũ-my. ¹⁵Kunha ae katu, inhakā ragwe puku va'e iporā voi nhande-vy. Nhandejáry ome'ẽ íxupe omói porā rei hagwā. ¹⁶Upéa-rehe ha'ese jevy peẽ-my niporāi voi kunha oakā nandi reheve ombojeupi onhe'ẽ Nhandejáry-pe nhane pa'ũ-my.

Ha oĩ-ma ramo pene pa'ũ mygwa onhonhe'ẽ mbojevvy jevyve va'e, kó mate ha'e-ta íxupe. Opa-rupi Nhandejáry-pe omboete hagwā ojogweroaty va'e hekoha upéixa.

Mba'eixagwa pa nhane mandu'a Hesu omano hagwe-rehe?

¹⁷Avy'are'ỹ katu pende rekoha-rehe. Pejogweroaty ramo ojeporahéi haty-py napende rekoha poráiry ra'e upe-py. Upéixa-gwi ndavy'áiry.

Jajogweroaty ramo Nhandejáry réry-py tekotevê nhanhopytygwō enterove oiko porāve hagwā Nhandejáry rape-rupi. Ha peẽ katu, napenhopytygwōiry ra'e. Ndapeikói nipo ra'e tape porā-rupi. ¹⁸Pejogweroaty ramo Hesu réry-py ndapeiko porāi nipo ra'e onhondive. “Ojogweroaty ramo Corinto pygwa kwéry Hesu reroviaha va'e ndogwerojojái onhe'ẽ. Ndoikói peteixa upe va'e kwéry.” Aipo pene rerakwā ahendu kuri. Haimete kuri arovia. Upéixa peiko vai nipo ra'e. ¹⁹Oĩ va'erā pene pa'ũ-my ambue mbue ndive ndogwerojojasúi va'e. Upéixa peteixa ndapejogwerekói ramo ae ojekwaa arā voi ra'e kiva'e pa oiko tekoha porā-my. ²⁰Pejogweroaty Nhandejáry réry-py pekaru hagwā ramo ndaha'evéi-ma Hesu Cristo omano hagwe-rehe pene mandu'a hagwā nipo ra'e. Pekarui rei hagwā nipo ra'e. ²¹Peteĩ teĩ nipo ra'e pekaru upe-py. Onhemotenonde va'e kwéry heta voi ho'u. Nonhoha'aróiry. Hapykwéri ou va'e tembyre mate ho'u. Upéixa pekaru-gwi oĩ vyteri ivare'a va'e, oĩ jave hygwātá va'e, oĩ ave oka'u va'e. ²²Niporāi voi upe pende rekoha. Pekaruse ramo pende róga tee-py pekaru. Anive peraha heta pene remi'urā Hesu reroviaha va'e ojogweroaty haty-py pe'u va'erā. Anive upéixa pemotĩ iporiahu va'e-pe. Ndavy'ái upe pende rekoha vaikwe-rehe. Anive teĩ upéixa pende rekoha vai pejogweroaty porahéi haty-py.

²³Apombo'e va'ekwe mba'éixa pa jajapo-ta Hesu omano hagwe-rehe nhane mandu'a hagwā. Nhandejáry oikwaa uka va'ekwe xe-vy onhe'ẽ porā. Ha upe inhe'égwe porā-rehe apombo'e jevy va'ekwe. Áy apombo'e jevy-ta upe inhe'e porā-rehe jevy. Nhandejáry oikwaa uka va'ekwe xe-vy nhane mandu'a hagwā Hesu omano hagwe-rehe. Upe apombo'e jevy-ta. Hesu omano e'ỹ mbovyve, inhirügwerā omombe'u nhemi-tama jave ipyhy

* 11:7 Gn 1.26 * 11:9 Gn 2.18-23

ukaharā-pe, a-rami ojapo Hesu. Pyhare ramo Hesu oipyhy mbojape, ²⁴ otima Nhandejáry-pe, ha upe rire ombopo mbopóy ome'ê-vy gwemimbo'e kwéry-pe. “Ko mbojape-rehe ha'e-ta xe rete tee va'e” he'i. “Pende-rehe ha-py anheme'ê va'erā ajejúka uka va'erā pene resende hagwā” he'i. “Kóá ere'u ramo ne mandu'a kena xe-rehe” he'i. ²⁵ Upéixa ave okaru rire oipyhy uva rykwere ryru. “Ko uva rykwere-rupi Tupā Nhandejáry oikwaa uka arā vyypóry-pe xe manoha rehegwa nhe'ê” he'i. “Kente kwéry-rehe ha-py onheresende hagwā osyry va'erā xe rugwy. Pe'u jave pene mandu'a kena xe-rehe” he'i. “Omano xe resende hagwā, peje pene mandu'a-vy xe-rehe” he'i va'ekwe Hesu gwemimbo'e kwéry-pe.* ²⁶ Ha upéixa-gwi ja'u ramo upe mbojape, upe uva rykwere ave, jahexa uka enterove-pe Hesu omanoha. Upéa tekotevê jajapo Hesu ou jevytaha ra'arō-vy.* ²⁷ Upéa-gwi nhande reko porā e'ý reheve ja'u ramo pe mbojape pe uva rykwere ave, Nhandejáry-pe nipurāi voi. Nhande reko porā e'ý reheve ja'u ramo upe uva rykwere mbojape ave jajuka uka rei vérami Cristo-pe. Naipurāi voi upéa. ²⁸ Upéa-rehe tanhanhemongeta nhandejéupe nhande reko ete-rehe. “Iporā tipo xe reko Nhandejáry rovagwy-py?” tanhaporandu nhandéjehe. “Aiko porā para'e terā aiko ku'a ku'a para'e Nhandejáry reko-rupi?” Upéixa ramo iporā nhaporandu randu nhandejéupe ja'u hagwā. ²⁹ Ho'u rei va'e onhembohassa asy uka ojóehe. Naimandu'ái Hesu omano hagwe rehe-gwi ho'u rei. Ha upéa-rehe Nhandejáry ombohassa asy va'erā íxupe. ³⁰ Heta pene pa'ũ-my oĩ va'e ho'u rei nipo araka'e. Upéa-rehe ra'e oime heta ikangy va'e, hasy va'e ave. Ha upe va'e-rehe ave heta omano va'ekwe. ³¹ Ja'u-tama ramo mbojape nhane mandu'a hagwā Hesu mano hagwe-rehe tanhaporandu katu nhandéjehe nhande rekoha-rehe, nhane rembiapokwe-rehe. “Iporā para'e niporāi para'e Nhandejáry rovagwy-py xe rekoha?” nhaporandu katu nhande py'apy-py nhandejéupe nhamboyke uka hagwā nhane rembiapo porā e'ýkwe nhandejéhgwi “Ipy'a potĩ-ma” he'i hagwā Nhandejáry nhande-rehe. Nanhane mbohassa asyvéi-ma hagwā. ³² Ha nanhaporandúí ramo upéixa nhande py'apy pygwa-rehe nhane moingo porā jevy hagwā Nhandejáry rape-rupi, ha'e ae “Ipy'a ky'a reheve ho'u Hesu-rehe oporomomandu'aha” he'i arā nhande-rehe. Ha upéa-rehe katu nhane mbohassa asy arā nhandemboassy kwaa hagwā nhane rembiapo vaikwe-rehe ani hagwā nhande ave ko'ágwa hekoha vai va'e hese ojerovia e'ý va'e ndive nhande ave jaha ombohassa asy happy. ³³ Upéa-rehe, xe re'ýi kwéry, Hesu reroviaha va'e kwéry, penhoha'arō katu pe'u ramo Hesu mandu'aha rembí'u. ³⁴ Ani peju pene rygwýatā hagwā-rami. Ivare'a va'e tokaru katu gwóga-py pono Nhandejáry pene mbohassa asy hagwā.

Oĩve pene remiporandukwe kwatia-rehe pemoĩ va'ekwe. Āy katu namombe'u mo'ái upe va'e-rehe. Agwahê ramo pende ha-py amombe'u arā peẽ-my upéa-rehe.

12

Nhe'ê Marangatu tee va'e remime'êgwe nhande-vy gwarā

(Rm 12.6-8; 1 Pe 4.10-11)

¹ “Mba'e tipo Nhe'ê Marangatu tee va'e ome'ê nhande-vy, nhande Hesu reroviaha va'e-pe?” peporandu va'ekwe kwatia-rehe. Upéa-rehe apombo'e-ta, xe re'ýi kwéry.

Peteĩ teĩ-pe ome'ê gwemime'êgwe.

² Tapene mandu'a porā peiko hagwe-rehe. Yma pejerovia e'ý reheve Hesu-rehe, heta tupā ra'anga-rehe pejerovia ra'e. Ta'anga rei upe va'e. Nonhe'êi, ojehexa uka e'ý va'e, hekove e'ý va'e. Pene mbotavy tavy voi araka'e. ³ Upéixa-gwi amombe'u-ta peẽ-my mba'eixagwa pa peikwaa-ta anhetegwa nhe'ê. “Hesu Tupā tee” he'i va'e anhetegwa he'i. Nhe'ê Marangatu tee va'e oĩ ipy'apy-py. Upéixa-gwi onhe'ê porā Hesu-rehe. Ha Hesu-rehe “Tomano katu” he'i va'e ndogwerekóí Nhe'ê Marangatu tee va'e opy'apy-py. Upéixa-gwi onhe'ê rei rei Hesu-rehe.

⁴ Nhe'ê Marangatu tee va'e peteĩ anho mate. Hemime'êgwe nhande-vy gwarā jepe heta.

⁵ Nhande rerekwa tee va'e Tupā Nhandejáry. Ha'e omombe'u peteĩ teĩ-pe hembiaapo ambue

* 11:25 Jr 31.31-34; Êx 24.6-8

* 11:26 Mt 26.26-28; Mc 14.22-24; Lc 22.19-20

mbuerā nhande-vy gwarā. ⁶Heta nhane rembiaporā jajapo kwaa va'e. Peteĩ teĩ va'e-pe ae katu Nhandejáry nhane moarandu nhamba'apo hagwā hembigwairā. ⁷Nhe'ẽ Marangatu tee va'e nhande rexakwaa rei, peteĩ teĩ va'e-pe ome'ẽ me'ẽ gwemime'ẽ. Hemime'ẽrā ome'ẽ nhande-vy nhandehopytygwō rei hagwā. ⁸Upéixa oĩ Nhandejáry omoarandu va'e kwéry. Arandu dhe'ẽ oiporu va'erā. Nhe'ẽ Marangatu tee va'e remime'ẽgwe-rupi arandu dhe'ẽ oiporu va'erā. Ha ambue va'e kwéry-pe oikwaa uka onhe'ẽ rei mo'ã hagwā nhande-vy oikwaa vérami voi nhande py'apóry. Nhe'ẽ Marangatu tee va'e oikwaa ukaharupi voi ha'e onhe'ẽ rei mo'ã anhetegwa voi upe-va'e. ⁹Ha ambue kwéry-pe Nhe'ẽ Marangatu tee va'e oikwaa uka ogwerovia tee hagwā Hesu-rehe. Ha ambue kwéry-pe ome'ẽ ombogwera hagwā hasy va'e-pe. Nhe'ẽ Marangatu tee va'e remime'ẽgwe-rupi ombogwera íxupe kwéry. ¹⁰Ha ambue kwéry-pe ome'ẽ hexapyrā-rupi omba'apo hagwā. Nhe'ẽ Marangatu tee va'e remime'ẽgwe-rupi nhande-vy ikatu e'y va'e hexapyrā-rupi ojapo. Ha ambue kwéry-pe Nhe'ẽ Marangatu tee va'e oikwaa uka oiko hagwā Nhandejáry dhe'ẽ momba'uhaty ramo. Hembigwaa e'y'gwe oikwaa uka íxupe onhe'ẽ hagwā. Ha ambue kwéry-pe omo'arandu Nhe'ẽ Marangatu tee va'e ojohu hagwā kiva'e dhe'ẽ-py po omombe'u ambue kwéry, Nhe'ẽ Marangatu tee va'e remimo'arandu tipo ambue va'e remimo'arandu tipo ojohu kwaa hagwā. Ha ambue kwéry-pe omonhe'ẽ Nhe'ẽ Marangatu tee va'e. Upéa-gwi dhe'ẽ ambue mbue-py oiporu kwaa e'y reheve onhe'ẽ. Ha ambue kwéry-pe omo'arandu Nhe'ẽ Marangatu tee va'e omombe'u jevy hagwā upe dhe'ẽ ambue. Nhe'ẽ Marangatu tee va'e remime'ẽgwe-rupi ohendu upe dhe'ẽ ambue omombe'u jevy hagwā onhe'ẽ-py. Oiporu kwaa e'y reheve jepe omombe'u jevy onhe'ẽ-py. ¹¹Nhe'ẽ Marangatu tee va'e peteĩ anho tee. Hemime'ẽgwe nhande-vy gwarā ae katu heta. Ome'ese-gwi ome'ẽ peteĩ teĩ-pe gwemime'ẽrā.

Cristo reroviaha va'e kwéry ndive ha'e peteĩ oiko

(Rm 12.4-5; Ef 1.22-23; 4.15-16)

¹²Nhande rete katu peteĩ mate, heta ae hesegwa oĩ va'e. Ha nhande rete rehegwa, heta oĩ ramo jepe ave, peteĩ anho joty oĩ hete. Upéixa ave Cristo gweroviaha kwéry ndive oiko peteĩ mante. ¹³Oĩ-ma heta Hesu reroviaha va'e. Opaixagwa va'e ojerovia-ma hese. Oĩ judeu va'e, oĩ ave judeu e'y va'e. Oĩ onhemomba'apo va'e. Oĩ ave ojejokwái e'y va'e. Heta-ma voi ojerovia-ma Cristo-rehe. Ha peteixa nhane mongarai va'ekwe. Peteixa onhemoingo nhande py'apy-py Nhe'ẽ Marangatu tee va'e. Nhande reta reta-gwi ha'e nhane moingo peteixa mate ondive. ¹⁴Upéixa ave nhande rete rehegwa heta oĩ. Ndaha'úi peteĩ anho mate hesegwa oĩ. Oĩ nhande po, oĩ nhande py, oĩ nhande jyva, oĩ ave nhane kwā. Upe va'e nhande rete rehegwa voi. Peteĩ teĩ nhane rembiporu nhande rete-rehe oĩ va'e.

Upéixa ave nhande, Hesu reroviaha va'e kwéry. Peteĩ teĩ nhane rembiapo jajapo. Heta voi nhamba'apo va'e. Peteĩ réry-rupi ae nhamba'apo. Hesu réry-py mate voi jaiko peteixa.

¹⁵Ha nhande rete rehegwa katu onhe'ẽ kwaa ramo ra'e onhe'ẽ rei arā mo'ã ra'e nhande rete-pe. Onhe'ẽ rei arā nhande py “Xe ndaha'úi po-gwi ndaikói tete-rehe” he'i arā mo'ã. Oiko joty nhande rete rehegwa ramo. ¹⁶Ha nhande apysa katu onhe'ẽ rei ramo ra'e nhande rete-pe: “Xe, ndaha'úi tesa, upéa-gwi ndaikói tete rehegwa ramo” onhe'ẽ rei arā ra'e. Ha onhe'ẽ ramo jepe oiko joty nhande rete rehegwa ramo. ¹⁷Nhande resa anho noĩry. Upéixa ramo ra'e nanhahendú arā ra'e. Ha nhande apysa anho noĩry ave. Upéixa ramo ra'e nanhahetú arā ra'e mba'eve. Peteĩ anho noĩry nhande rete rehegwa. ¹⁸Yma araka'e Nhandejáry omoĩ nhande rete rehegwarā voi araka'e. Peteĩ teĩ omoĩ meme nhande rete-rehe. Gwemimbota-rupi omoĩ nhande rete rehegwarā araka'e. ¹⁹Peteĩ ramigwa meme nomoĩ ukái Nhandejáry. Upéixa ramo ra'e nanhahete retéiry arā ra'e. ²⁰Nhande rete rehegwa heta oĩ. Heta oĩ ramo jepe peteĩ joty nhande rete.

Upéixa ave nhande. Jaiko peteixa Hesu-rehe jajerovia-gwi. Peteĩ reko-rupi jaikopa.

²¹Ndaipóri nhande rete-py oĩ rei va'e. Nhaikotev' entéro nhande rete rehegwa-rehe. Jaiporu íxupe kwéry. Nhande resa-rupi jahexa. Nhande po-rupi nhamba'apo. Nhande py-rehe jagwata. Onhopytygwō nhande rete rehegwa. Upéixa ave Hesu Cristo reroviaha va'e gwive nhandehopytygwō va'erā jaiko-vy.

²² Nhandejáry katu nhane moingo va'ekwe. Nhande rete omoingo va'ekwe. Nhande rete-rehe oĩ jaiporuve va'e nhaikotevê tee va'e. Upéa ndoikói ramo ra'e nhamano rei arã ra'e. ²³ Nhande rete-rehe oĩ ave nhane rembihexa uka rei rei e'y va'e. Upéa-rehe nhande-gareko porã. Oĩ ave nhandotĩ va'e nhande-gareko porãve va'e-rehe. ²⁴ Oĩ ave nanhandotĩry va'e iporãve nhande-vy. Nhandepenáiry hese. Upéixa oiko nhande-vy nhande rete. Nhandejáry katu omoingopa va'ekwe. Ha'e omomba'egwasuve upe nhandotĩ va'e-pe. ²⁵ Upéixa-gwi ndaipóri iporãve va'e ojóhugwi. Onhopytygwō va'erã meme omoingo Nhandejáry nhande rete-rehe. ²⁶ Hasy ramo peteĩ nhande rete-rehe oĩ va'e nhahendu kwaa nhande rete-rehe. Okwera jevy ramo iporãmba nhande rete-py. Nhamboete ramo nhande rete rehegwa, nhande rete tee nhamboete ave.

²⁷ Upéixa jaiko-ma nhande, Hesu reroviahá va'e kwéry. Cristo rete ramigwa nhande. Upéixa-gwi jaiko peteĩ teĩ hete rehegwa-rami. ²⁸ Nhandejáry remimbota-rupi katu nhande-pytygwō jaiko-vy. Oĩ va'e nhane pa'ũ-gwi oiporavo araka'e gwembigwairã. Ha'e kwéry oiko nhande-vy nhande pytygwōharã. Tenonde va'e oiporavo gwemimondorã. Upe rire oiporavo onhe'ẽ-py omombe'u va'erã. Upe rire oiporavo oporombo'e va'erã onhe'ẽ omombe'u mbe'uharã. Oiporavo ave hexapyrã-rupi omba'apo va'erã. Oiporavo ave hasy va'e-pe ombogwera va'erã. Oiporavo ave oporopytygwō va'erã. Oiporavo ave Hesu reroviahá nhande-garekharã. Oiporavo ave nhe'ẽ ambue mbue-py oiporavo kwaa e'y reheve onhe'ẽ va'erã.*

²⁹ Ndoiporavói oime raẽ va'e-pe oiko hagwã gwemimondo ramo. Ndoiporavói ave opavave oiko hagwã onhe'ẽ mombe'uhaty ramo kente hembigwaa e'y gwe omombe'u hagwã. Ndoiporavói ave opavave oiko hagwã oporombo'e va'erã. Ndaha'etí enterove va'e omba'apo hexapyrã-rupi. ³⁰ Ndaha'etí enterove va'e ombogwera hasy va'e-pe hemime'ẽgwe-rupi. Ndaha'etí enterove va'e nhe'ẽ ambue oiporavo kwaa e'y reheve onhe'ẽ va'erã. Ndaha'etí enterove va'e gwemihendukwe nhe'ẽ ambue ohendu kwaa e'y reheve va'e omombe'u jevy onhe'ẽ-py.

³¹ Peẽ katu pejerure katu Nhandejáry-pe ome'ẽ hagwã peẽ-my gwemime'ẽrã iporãve rãve va'e. Xe ae ahexa uka-ta peẽ-my pene rekorã iporãve va'e.

13

Jajohayhu-rupi nhambovy'a Nhandejáry-pe

¹ Tajajohayhu rei katu jaiko-vy. Ndaha'etí nhane nhe'ẽ-rehe nhambovy'a Nhandejáry-pe. Jajohayhu rei-rehe ae nhambovy'a íxupe. Nhande'ẽ ramo opa nhe'ẽ, ko vvy pygwa ambue mbue va'e nhe'ẽ, Nhandejáry rembigwái yváy pygwa va'e nhe'ẽ ave nhande'ẽ ramo jajohayhu e'y reheve, nanhambovy'ái arã Nhandejáry-pe. No'ã ra'e he'i arã nhane nhe'ẽ-rehe: "Mba'e ombopu rei va'e-rami voi" he'i arã ndajajohayhú-gwi.

² Ndaha'etí ave nhane arandu-rehe nhambovy'a Nhandejáry-pe. Jajohayhu rei ramo ae nhambovy'a íxupe. Inhe'ẽ-py nhamombe'u jevy ramo ha'e omba'e kwaa ukaha nhande-vy, Nhandejáry reminhongatukwe jaikwaa-ma ramo, opaixagwa-rehe jaikwaa porã ramo ndajajohayhú reheve, ndovaléi arã nhande-vy nhane arandu. Nanhambovy'ái arã Nhandejáry-pe. Hesu-rehe jajerovia tee-gwi héry-py nhambova uka vyatygwasu-pe jajohayhu e'y reheve, ndovaléi arã nhande-vy. Nanhambovy'ái arã Nhandejáry-pe.

³ Ndaha'etí ave nhane rakate'y e'y mba'e-rehe jaiko-vy nhambovy'a Nhandejáry-pe. Jajohayhu ramo ae nhambovy'a íxupe. Nhande'ẽmba ramo nhane mba'e iporiahu va'e pegwarã jajohayhu e'y reheve, ndovaléi arã nhande-vy nhane rakate'y e'yha. Nanhambovy'ái arã Nhandejáry-pe. Hesu Cristo-rehe jajerovia-gwi kente kwéry nhane mbohasa asy ete ramo jepe, nhande rete rapy ramo jepe jajohayhu e'y reheve, ndovaléi joty arã nhande-vy upéixa jahasa asy ramo. Nanhambovy'ái arã Nhandejáry-pe upéa-rupi. Jajohayhu ramo ae nhambovy'a va'erã íxupe.

⁴ Jajohayhu ramo jaiporiahuvereco rei nhande rapixa-pe, nhande py'a porã íxupe. Jajohayhu ramo nhande'arõ kwaa. Nhande py'a porã nhande rapixa ndive. Nhande

* 12:28 Ef 4.11

a'e e'yiry nhande rapixa rembiapo porã-rehe. Nanhanhemomba'egwasúiry. Nanhanhemoete reíry. ⁵Jajohayhu ramo ndajaike hatã hatãiry. Nanhane rakate'y e'y rei mba'eve-rehe nhane mba'erã nhande-vy gwarã mate ndajahékáiry. Nhande rapixa reko porãrã-rehe ave nhane mandu'a. Nanhane rova asy kwaáiry nhande rapixa ndive. Nanhane mandu'ái tembiapo porã e'ygye-rehe nharoyrõ-vy. ⁶Nhande py'a rory ae ojõhe. Anhetegwa-rehe mate nhambovy'a. Nhande rapixa rekoha porã e'y-rehe nhane mbovy'are'y, nhane mboasy. ⁷Jajohayhu ramo nhaha'arõ joty. Nhande mbovy'a e'y va'e ndive jajogwereco kirirĩ joty. Nhande py'agwapy reheve nhaha'arõ Nhandejáry rembiapo porãrã nhande-vy gwarã-rehe. "Nhandejáry ipokatu va'e voi nhande rexakwaa nhane poriahuvereko ave" ja'e meme nhande py'apy-py nhaha'arõ-vy.*

⁸Mborayhu opa e'y va'e. Oiko-ma ramo Nhandejáry nhande ruvixa, yváy-py nhaimema ramo avave nomombe'uvéi va'erã inhe'ë-py ha'e omba'e kwaa ukaha nhande-vy, avave nonhe'ëvíe va'erã nhe'ë oiporu kwaa e'y reheve. Ko'a-py arandu ndoiporuvéi va'erã ave. ⁹Jaikwaapa va'erã. Áy ndajai kwaapái voi mba'eve-rehe. Nhandejáry nhe'ë-py nhamombe'u hagwã mba'e ha'e oikwaa uka nhande-vy ndajai kwaapáiry. ¹⁰Oiko ramo Nhandejáry nhande ruvixa, nhagwahê ramo ae henda-py jaikwaapa va'erã opamba'e, enterove va'e-rehe ave. Ndaiporivéi-ma va'erã oikwaa ku'a ku'a va'e. Ndaipóri va'erã oikwaa e'y va'e mba'eve-rehe. Jaikwaapa va'erã.

¹¹Yma xe mitã ramo, mitãixa aiko va'ekwe, mitãixa anhe'ë va'ekwe. Xe py'apy-py anhemongeta ramo, mitãixa ave aiko. Opáixa aiko va'ekwe xe mitã ramo. Áy ae katu akakwaapa-ma. Ndaiko mo'ávéei-ma mitã reko-rami.

¹²Ha upéixa ave ko yvy-py jaiko ramo jaikwaa mirĩ mirĩ Nhandejáry rekoha. Espéko tuja-py jahexaha-rami nhande rova ko'ây nhane arandu Nhandejáry-rehe. Ndaikwaa porã. Ha'e ae oikwaapa nhande rehegwa. Jaiko ramo ndive, yváy-py nhaimema jajohexa va'erã, jaikwaapa va'erã ave hesegwa ave. Ha'e nhande kwaaháixa jaikwaa arã íxupe. ¹³Ha ko'ánga mbohapy jajapo va'e opa e'y reheve ovale va'erã nhande-vy. Hesu-rehe jajerovia, nhaha'arõ Nhandejáry-pe he'i hagwe-rami ojapopa hagwã, jajohayhu rei ave jaiko-vy. Upe mbohapy jajapo va'e-rehe Nhandejáry ovy'a-ma voi oiko-vy. Ha jajohayhu rei ramo nhambovy'ave arã Nhandejáry-pe.

14

Mba'éixa pa jaiporu va'erã Nhe'ë Marangatu tee va'e remime'ëgwe

¹Tapejohayhu katu peiko-vy. Pejerure katu Nhandejáry-pe ome'ë hagwã peë-my Nhe'ë Marangatu tee va'e hemime'ërá iporãve ráve va'e. No'ã-rami pejerure íxupe: "Eme'ë xe-vy ne remime'ërá nde re'yí pegwarã. Aipota eterei ne nhe'ë-py amombe'u jevy nde eremba'e kwaa uka xe-vy."

²Oiporu kwaa e'y va'e onhe'ë va'e onhomongeta Nhandejáry ndive mante. Nonhe'ëi ko yvy rehegwa ndive. Nohendu kwaái inhe'ë. Nhe'ë Marangatu tee va'e reko-rupi onhe'ë oiporu kwaa e'y va'e. Anhetegwa he'i. Hapixa kwéry ae nohendu kwaáiry inhe'ë.

³Nhandejáry nhe'ë-py omombe'u va'e ae katu onhe'ë enterovéa ohendu hagwã. Nhande pytygwõ jaroviave hagwã Hesu-pe, nhande reko porãrã omombe'u nhande-vy, nhane mbovy'agwapy Hesu rape-rupi jaiko porã hagwã. ⁴Ha upe oiporu kwaa e'y va'e onhe'ë va'e ae onhepytygwõ ojéupe. Nhandejáry nhe'ë-py omombe'u va'e ae oipytygwõ Hesu reroviaha kwéry-pe.

⁵Nhandejáry tane mbopu'aka erenhe'ë hagwã ereiporu kwaa e'y va'e. Upéixa erenhe'ë ramo xe mbovy'a arã. Nhandejáry tane mbopu'aka ave eremombe'u mbe'u hagwã inhe'ë. Upéa eremombe'u ramo avy'ave arã. Oiporu kwaa e'y va'e onhe'ë nhe'ë va'e ojapo porã. Nhandejáry rembiapo-rupi onhe'ë. Nhandejáry nhe'ë-py omombe'u va'e ha'e oikwaa uka va'e ojapo porãve íxugwi henduha-pe oipytygwõ-gwi. Ha ndaipóri ramo imombe'u jevyha hendu háry nhe'ë-py noipytygwõi arã Hesu reroviaha kwéry-pe upe oiporu kwaa e'y nhe'ë-py onhe'ë va'e.

* 13:7 Gl 5.22

⁶ Agwahê-tama upe-py, xe re'íy kwéry. Agwahê rire anhemonhe'ê ramo ereiporu kwaa e'y'ê-py napopytygwōi arā. Napehendu kwaái-gwi napopytygwōi arā. Jaiporu kwaa nhe'ê-py ae amombe'u ramo Nhandejáry rehegwa nhe'ê peê-my apopytygwō arā. Nhandejáry nhe'ê jaikwaa e'y' va'ekwe ha'e oikwaa uka xe-vy amombe'u jevy ramo peê-my apopytygwō ave arā. Arandu nhe'ê amombe'u ramo peê-my apopytygwō ave arā. Nhandejáry nhe'ê-py amombe'u ramo peê-my apopytygwō ave arā. Anhe'ê ramo ae jaiporu kwaa e'y' va'e xejéupe mate anhepytygwō arā.

⁷ Nhande rekove va'e nhande'ê voi. Nhambopu va'e kwéry hekove e'y' va'e ipu ave. Upéixa mimby onhe'ê, harpa ipu ave. Nombopu kwaái va'e ae ombopu rei ramo niporāi arā nhande-vy. Nanhahendu kwaái arā. ⁸ Ha upéixa ave capitão rembigwái nomonhe'ê porāi ramo gwemimbywasu, soldado kwéry nohendu kwaái va'erā. Nohendu kwaái-gwi ndoikwaái arā ave onhorairō haggwā óra.

⁹ Upéixa ave pende kwéry. Erenhe'ê ramo ereiporu kwaa e'y' va'e avave nohendu kwaái arā. Nhandejáry mate ohendu kwaa va'erā. A pygwa erenhe'ê e'y' va'e-rami oiko va'erā ne renduha kwéry. ¹⁰ Oí heta eta nhe'ê ko yvy pygwa onhe'ê va'e. Nhe'ê ambue mbue kente kwéry oiporu. Upe nhe'ê oiporu va'e ohendu kwaa ave onhe'ê. ¹¹ Ha oiporu e'y' va'e nohendu kwaái. Nhande ramo nhe'ê ambue, nanhahendu kwaái voi. “Nhande re'yí e'y' nipo ra'e” ja'e ojóhehe. “Nanhahendu kwaái ete inhe'ê” ja'e ojóhehe.

¹² Ha peê katu, aikwaa-ma ra'e pende rekoha. Pejerure rure ra'e peiko-vy Nhandejáry-pe Nhe'ê Marangatu tee va'e remime'ērā peipota eterei-gwi ra'e. Upéa-rehe ha'e-ta peê-my, tapejerure katu hemime'ērā iporāve va'e ome'ê haggwā peê-my peipytygwō porā haggwā Hesu roroviahá va'e kwéry-pe.

¹³ Upéixa ave nde, nhe'ê ereiporu kwaa e'y' erenhe'ê va'e, ejerure katu Nhandejáry-pe eremombe'u jevy haggwā upe ne nhe'êgwe ne renduha nhe'ê-py ave eremombe'u haggwā.

¹⁴ Xe ambojeupi upi xe nhe'ê Nhandejáry-pe. Aiporu kwaa e'y' nhe'ê-py ambojeupi jave xe nhe'ê xe py'apy-py mate aikwaa Nhandejáry ndive anhomongetaha, xe arandu reheve nanhe'ëiry. Ndaikwaái xe upe anhe'ê va'e. ¹⁵ “Mbava'e tipo ajapo-ta upéixa ramo?” aporandu xejéupe. Tanhomongeta Nhandejáry ndive xe py'apy ete anho reheve, tanhomongeta ave xe arandu reheve ave. Taporahéi Nhandejáry-pe. Xe py'apy ete anho reheve taporahéi íxupe nhe'ê aiporu kwaa e'y' reheve. Taporahéi ave íxupe xe arandu reheve ave nhe'ê aiporu kwaa reheve. ¹⁶ Eremomba'egwasu ramo Nhandejáry-pe nde py'apy ete reheve nhe'ê ereiporu kwaa e'y' reheve erenhe'ê ramo nohendu kwaái va'e nomoi porā petei kwaái va'erā onhe'ê ne nhe'ê ndive. No'ā-rami ndikatúí arā he'i: “Upéixa voi xe ave atimase ave nde-vy oromomba'egwasu haggwā” nde'íry va'erā Nhandejáry-pe. Nohendu kwaái-gwi nomopeteiry onhe'ê ne ndive. ¹⁷ Nhe'ê ereiporu kwaa e'y' py erenhe'ê ramo eremomba'egwasu porā Nhandejáry-pe. Nde rapixa-pe ae nderepytygwōiry, ne ndive ojogweroaty va'e kwéry-pe nderepytygwōi arā. Nohendu kwaáiry upe va'e nhe'ê-gwi ne ndive nomomba'egwasu joái arā Nhandejáry-pe.

¹⁸ Xe katu aiporu kwaa e'y' va'e-py anhe'ê nhe'ê voi. Hetave tave pendéhegwi anhe'ê upéixa. Upéa-rehe atima porā Nhandejáry-pe. ¹⁹ Upéixa anhe'ê ramo jepe Hesu roroviahá va'e kwéry ojeporahéi haty-py ohendu kwaa nhe'ê aiporuse joty amombe'u haggwā íxupe Nhandejáry nhe'ê. Anhe'ê mbuku ramo aiporu kwaa e'y' va'e nhe'ê-py nohendu kwaái arā xe nhe'ê. Iporāve anhe'ê mixíve ohendu kwaa nhe'ê-py oikwaa porā haggwā xe remimombe'ukwe.

²⁰ Xe re'yí kwéry, ani peiko mitā reko-rami penhemongeta ramo pende py'apy-py. Pekakwaapa-ma. Pene arandupa-ma. Arandu porā-rupi peiko katu. Hemiapoi vai ndojapo kwaái mitā-rami, peê ave, ani erejapo vai kwaa tei. Pejapo porā kwaa ae katu.

²¹ Yma omoi araka'e Nhandejáry nhe'ê kwatia-rehe judeu kwéry rehegwa. “Amombe'u-ta ko tetā mygwa-pe, he'i Nhandejáry. He'yí e'y' va'e ave ambou-ta omombe'u haggwā íxupe kwéry. Nhe'ê ambue-py omombe'u-ta. Ha nohendu mo'ái va'erā nohenduséi-gwi. Na xe renduséiry ha'e kwéry, he'i Nhandejáry.”*

* 14:21 Is 28.11-12

²² Upéixa-gwi nhanhe'ê ramo jaiporu kwaa e'y' nye'ê-py heroviaha e'y' va'e oikwaa hagwā Nhandejáry pu'aka-rupi nhanhe'ê. Ndaha'úi ohendu hagwā nhane nye'ê Hesu reroviaha va'e. Nhamombe'u ramo ae Nhandejáry nye'ê-py ha'e omba'e kwaa ukaha nhande-vy, heroviaha kwéry oikwaa porāve hagwā joty nhamombe'u upéa. Ndaha'úi heroviaha e'y' va'e pegwarā. ²³ Tapene mandu'a porā kena Hesu reroviaha kwéry ojogweroaty ramo-rehe. Penhe'êmba joa ramo peiporu kwaa e'y' va'e ambue mbue-py, mbava'e tipo he'i arā pende-rehe umi upeixagwa nohendukwāi va'e? Umi Hesu-rehe ojerovia va'e, umi Hesu-rehe ndojeroviái va'e? Mbava'e tipo he'i va'erā pende-rehe? "Itavy nipo ra'e" he'i va'erā para'e pende-rehe. ²⁴⁻²⁵ Ha Nhandejáry nye'ê-py peteī teī omombe'u ramo mba'e ha'e oikwaa uka íxupe, ou ramo nye'ê ambue-rehe ndoikwāi va'e, umi Hesu-rehe ojerovia va'e, umi Hesu-rehe ndojeroviái va'e, ohendu kwaa arā pene remimombe'u. Ipy'a ete-py onhami oī va'e gwise Nhandejáry ombojekwaa arā para'e íxupe. "Xe py'apy pygwa oikwaa nipo Nhandejáry ra'e. Ne'írā aikwaa porā hesegwa nye'ê" he'i va'erā para'e pene rendu-vy. Upe he'i-vy onhesū arā para'e omomba'egwasu hagwā Nhandejáry-pe "Nhandejáry oiko nipo ko pene pa'ū-my ra'e" he'i arā para'e ojogweroaty va'e kwéry-pe.

Mba'éixa pa jaiko jajogweroaty ramo Nhandejáry réry-py

²⁶ Amombe'u-ta peē-my, xe re'yí kwéry, mba'éixa peiko hagwā pejogweroaty ramo Nhandejáry réry-py. Tapenhopytygwō kena peiko porāve hagwā Nhandejáry reko-rupi. Oī va'erā porahéi ogwereco va'e oporahéi va'erā omboete hagwā Nhandejáry-pe. Oī va'erā ombo'e va'e, oī va'erā mba'e Nhandejáry oikwaa uka íxupe, gwembigwaa e'y'gwe omombe'u va'e. Oī va'erā oiporu kwaa e'y' reheve onhe'ê va'e. Oī va'erā omombe'u kwaa va'e upe oiporu kwaa e'y' va'e nye'ê-py pehendu hagwe omombe'u jevy va'erā. Upéixa pejogweroaty ramo penhopytygwō kena peiko-vy. ²⁷⁻²⁸ Oī ramo oiporu kwaa e'y' va'e nye'ê-py onhe'ése va'e, tonhe'ê mokōi mate, terā mbohapy. Peteī teī tonhe'ê. Ha peteī onhe'ê rire peha'arō omombe'u kwaa va'e omombe'u jevy hagwā upéa nye'ê. Omombe'u rire ae tonhe'ê ambue va'e oiporu kwaa e'y' va'e nye'ê-py. Ha ndaipóri ramo omombe'u kwaa va'e, nde, erenhe'ése va'e ekiriri eiko-vy pejogweroaty haty-py. Nde py'apy-py mate erenhe'ê, Nhandejáry ndive mate erenhe'ê upe nye'ê ambue-py. ²⁹ Oī ramo mba'e Nhandejáry oikwaa uka íxupe omombe'use va'e, tomombe'u mokōi va'e mate, terā mbohapy. Peteī teī tonhe'ê. Omombe'u jave tapejeapysaka porā tapeporandu randu pende py'apy-py hemimombe'ukwe-rehe: "Anhetegwa para'e terā nainhetegwái para'e" peporandu pehendu jave. Tapejeapysaka porā anhetegwa nye'ê-rehe mate perovia hagwā. ³⁰ Nhandejáry oikwaa uka ramo onhe'ê ambue va'e-pe tokiriri henonde va'e gwapixa omombe'u hagwā. ³¹ Heta va'e-pe Nhandejáry oikwaa uka va'erā onhe'ê-py omombe'u hagwā. Upéixa ramo peteī teī tomombe'u enterove ohendu hagwā. Upéixa penhopytygwō va'erā penhomokyre'y' va'erā peikwaa porāve hagwā Nhandejáry rehegwa nye'ê. ³² Nhandejáry nye'ê-py omombe'u va'ety oha'arō kwaa va'e. Onhe'ése ramo onhe'ê, nonhe'éséi ramo, nonhe'ei ave. Oha'arō kwaa. ³³ Nhandejáry nhane renói jaiko porā hagwā. Réry-py jajogweroaty ramo upéixa oipota ave. Ndaha'úi jajogweroaty nhanhe'êmba rei hagwā héry-py. Jaiko porā hagwā nhane renói va'ekwe.

³⁴ Hesu reroviaha va'e ojogweroaty ramo tokiriri katu kunha kwéry. Aní penhe'êmba rei teī. Opa tetā-rupi oiko upéixa. Upéixa voi ave Moisés amyri remimombe'ukwe judeu kwéry rekoharā. Niporāi kunha onhemonhe'ê ojogweroaty haty-py. ³⁵ Oikwaase va'e toporandu oména-pe. Gwóga-py ae oporandu íxupe. Niporāi oporandu ojogweroaty haty-py ijayvu hagwā.

³⁶ Ndapevy'ái para'e ko xe remimombe'ukwe-rehe. Ndaha'úi pendehegwigwa oiko Nhandejáry nye'ê. Ixugwigwa voi oiko. Ndaha'úi ave peē-my gwarā mate omombe'u uka onhe'ê. Opa-rupi oiko va'e kwéry pegwarā ave Nhandejáry nye'ê. ³⁷ Oī ramo hi'arandu porā va'e, Nhe'ê Marangatu tee va'e nye'ê-rupi oiko meme va'e pene pa'ū-my no'ā-rami he'i arā xe-rehe: "Nhandejáry nye'ê tee voi omombe'u Paulo. Nhandejáry réry-py voi ohai araka'e ko kwatia jaiko hagwā Nhandejáry remimbota-rupi" he'i arā xe-rehe. Oī ave

Nhandejáry nhe'ê-py omombe'u va'ety upe-py upéixa ave he'i arã xe-rehe, ko kwatia-rehe ave.

³⁸ Oĩ ramo gwĩ a-rami he'i va'e "Xe-vy nĩporãĩ upe Paulo nhe'ê. Ndaha'etí para'e Nhandejáry nhe'ê tee" upéixa he'i ramo xe nhe'ê-rehe ani teĩ pejerovia hese. Ani ave pepena teĩ hese.

³⁹ Xe re'yí kwéry, Hesu reroviaha va'e kwéry, tapejerure katu Nhandejáry-pe hemime'êrã peẽ-my gwarã-rehe pemombe'u hagwã inhe'ê-py mba'e ha'e oikwaa uka peẽ-my. Ha ani teĩ peje avave-pe pejoko-vy "Ani erenhe'ê ereiporu kwaa e'y va'e nhe'ê-py". Upéixa ani teĩ peje ojóupe. ⁴⁰ Pejogweroaty ramo Nhandejáry réry-py, peiko porã heko-rupi. Ani teĩ pende ayvu rei rei upe-py.

15

Cristo oikove jevy va'ekwe

^{1,2} Tapene mandu'a katu, xe re'yí kwéry, Hesu reroviaha va'e, Hesu Cristo rehegwa nhe'ê porã amombe'u va'ekwe-rehe. Pehendu-ma va'ekwe, pejerovia-ma Hesu-rehe. Pene mbopy'a potĩ-ma araka'e. Hesu Cristo rehegwa nhe'ê perovia-magwi omboyke-ma pendéhegwi pene rembiapo vaikwe Nhandejáry. Pejerovia rei ramo napene resendéi arã araka'e. Áy peve ndapeikóĩ arã ra'e inhe'ê-py.

³ Ko nhe'ê Nhandejáry omombe'u va'ekwe xe-vy, amombe'u jevy va'ekwe peẽ-my ha ãy katu amombe'u jevy-ta peẽ-my. Amombe'u ranhe-ma va'ekwe Cristo rehegwa nhe'ê porã. Ha'e omano va'ekwe omboyke hagwã nhandéhegwi nhane rembiapo vaikwe. Yma araka'e Nhandejáry omotenonde Hesu rehegwa nhe'ê kwatia-rehe oĩ va'e. Omombe'u hagwéixa Hesu omano.* ⁴ Omano rire omóĩ itakwa-py hetekwe. Ita-gwi ojo'o va'ekwe-py omóĩ rire hetekwe omboty itakwa rokẽ. Upéi mokóĩ pyhare rire omopu'ã jevy íxupe Nhandejáry omoingove jevy íxupe. Tenonde-rupi inhe'ê kwatia-rehe oĩ va'e oiko hagwã omoingove jevy íxupe Nhandejáry.* ⁵ Ha oikove jevy-ma ramo ojehexa uka jevy Pedro-pe. Upe rire ojehexa uka jevy doze gwemimondo kwéry-pe. ⁶ Upe rire katu ojehexa uka jevy gweroviaha va'e kwéry-pe. Quinhentos onhomboty jave ojehexa uka jevy íxupe kwéry. Áy peve heta vyteri oĩ hexahare. Ha heta ave hexahare omano-ma va'e ave.

⁷ Ha upe quinhentos-pe ojehexa uka jevy rire, ojehexa uka jevy Tiago-pe. Upéi gwemimondo kwéry onhomboty-ma jave ojehexa uka jevy íxupe kwéry. ⁸ Ha ipaha ete-py ojehexa uka jevy xe-vy ave. Are oikove jevy rire ojehexa uka jevy xe-vy. Upéa-gwi mitã ohasa hi'áry oiko hagwã va'e-rami xe anhemboypahu. ⁹ Upéixa-gwi ave Hesu remimondo ambue kwéry imba'egwasuve voi xéhegwi. Yma va'ekwe xe areko asy asy Hesu Nhandejáry reroviaha va'e kwéry-pe. Upéa-rehe ãy peve apyta atĩ. "Xe ave Hesu remimondo va'e" ha'e ramo xe mandu'a jevy xe rekokwe-rehe ha xe motĩ jevy. ¹⁰ Nhandejáry ae xe poriahuvereko ha xe rexakwaa rei-ma. Héry-py xe aiko Hesu remimondo ramo. Ha ndareíry xe poriahuvereko Nhandejáry. Hemimondo tee voi ko xe. Amba'apo hetave tave enterovéa-gwi. Hemimondo va'e ambue kwéry-gwi amba'apove xe. Ndaha'éiry xe ae rei xejéhegwi xe mbaraete amba'apo-vy. Cristo xe mombaete xe momba'apo hagwã. Upéixa-gwi xe rapixa kwéry-gwi xe amba'apove. ¹¹ Hesu Cristo rehegwa nhe'ê porã mate amombe'u mbe'u peẽ-my va'ekwe. Hesu remimondo va'e kwéry ave hesegwa nhe'ê mate omombe'u araka'e ave peẽ-my. Upéixa voi ore, Hesu remimondo va'e kwéry hesegwa nhe'ê tee mate oromombe'u. Ha peẽ katu Hesu-rehe pejerovia araka'e. Ore remimombe'u-rupi pejerovia hese.

Cristo oikove jevy-gwi kente kwéry oikove jevy ave va'erã

¹² "Cristo omano ete rire Nhandejáry omoingove jevy íxupe" oro'e meme oromombe'u-uy. Upe oro'e jave oĩ umi pene pa'ũ mygwa outro nhe'ê omombe'u rei. He'i "Ndoikove jevyĩ omano hagwe rire" he'i rei. Anhetegwa e'y omombe'u peẽ-my.

* 15:3 Is 53.5-12 * 15:4 Sl 16.8-10; Os 6.2

¹³⁻¹⁵ Tapene mandu'a porã katu. “Omano va'ekwe ndoikove jevýi” peje rei ramo “Ndoikove jevýi nipo ra'e Hesu” peje va'erã mo'ã Hesu-rehe. Ha pemombe'u joavy avypa hesegwa nhe'ë. Hesu Cristo ko oikove jevy-ma voi katu. Pende tavy-ma voi. Peje ramo ra'e “Ndoikove jevýi nipo ra'e Hesu” pende tavy voi. “Nhandejáry omoingove jevy-ma Cristo-pe” oromombe'u meme katu peë-my. Omano va'ekwe oikove jevy e'ý ramo ra'e, Cristo ndoikove jevýi-ma va'ekwe ra'e. Upéixa ramo ra'e Nhandejáry nomoingove jevýi-ma va'ekwe íxupe ra'e. Ha ore remimombe'u Cristo rehegwa nhe'ë anhetegwa e'ý ra'e. Nhandejáry-rehe oro'e rei rei ra'e ore apu ra'e hese. Ore ko ndore apúí va'e voi. Anhetegwa nhe'ë voi oromombe'u peë-my Hesu rehegwa nhe'ë. Nhandejáry ko omoingove jevy joty-ma íxupe. Anhetegwa voi upéa.

¹⁶⁻¹⁸ Omano va'ekwe ndoikove jevýi ramo ra'e Cristo ave ndoikove jevýi va'ekwe ave ra'e. Ha ha'e-ta peë-my Cristo ndoikove jevýi ramo ra'e pejerovia rei araka'e Hesu-rehe ra'e. Peiko vyteri ra'e pene rembiapo vai reheve, pende py'a ky'a vyteri ra'e peiko-vy. Ha upe Hesu reroviaha kwéry omano araka'e va'e onhehundipa-ma ave ra'e. ¹⁹ Ko vvy-py mate ovale ramo ra'e nhande-vy Hesu-rehe jajeroviaha, javy'are'ýve va'erã ra'e enterovéa-gwi. Ndoikove jevýi ramo ra'e Cristo, nhamano ramo oikove jevy e'ý-gwi ra'e, nanhande poriahuverekói arã voi ra'e Cristo. Upéixa ramo ra'e ko vvy-py mate javy'a arã jaiko-vy ra'e. Nhande tavy tee-ma arã ra'e jaiko-vy. Nhande vy'are'ý eterei-gwi ra'e avave nanhande poriahuvereko kwaái arã ra'e.

²⁰ Oikove jevy-ma joty Hesu. Anhetegwa voi hesegwa nhe'ë. Nhandejáry omoingove jevy va'ekwe íxupe. Nhane renonde va'e voi oiko-ma Hesu Cristo. Nhandejáry omoingove jevy va'ekwe íxupe. Ha upéa-rehe oikwaa uka nhande rekorã nhande-vy. Hesu reroviaha va'e omano va'ekwe omoingove jevy-ta ave Nhandejáry.*

²¹ Enterove ko vvy pygwa omano-ta peteí kwimba'e rembiapo vaikwe-rupi. Upéixa ave enterove oikove jevy-ta peteí kwimba'e rembiapo porãkwe-rupi.

²² Nhande ko vvy arigwa myamyri Adão remiariröre kwéry voi nhande. Upéa-gwi ha'éixa nhamano jevy va'erã. Upéixa ave Cristo-rami jaikove jevy va'erã. Hese jajerovia-gwi nhane moingove jevy-ta Nhandejáry. ²³ Peteí teí omoingove jevy-ta Nhandejáry ipy'a potí va'e kwéry-pe. Tenonde-rupi omoingove va'ekwe Hesu Cristo-pe. Hesu ogweij jevy ou-vy ramo omoingove jevy-ta gweroviaha kwéry-pe. ²⁴⁻²⁵ Upéi katu Hesu-rehe ndaíja'ei va'ekwe mbaraetkwe Nhandejáry oipe'apa jevy-ta íxugwi kwéry. Ndaipu'akavéi-ma va'erã teko vai rehegwa járy, pytümbóry járy ave, vvy arigwa járy ave, áry járy ave, ko mundo járy ave, mburuvixa kwéry ave. Ndaipu'akavéi-ma upéixa ramo ha'e kwéry. Mba'eve-rehe ndaipu'akavéi-ma va'erã hikwái. Oimbaraetepe'apa-ma va'erã íxugwi kwéry. Avave ndoikovéi-ma va'erã ipogwy-py. Hesu nhe'ë-py mate oiko va'erã hikwái. Ha upéi katu Hesu omoi mbaete va'erã Nhandejáry pogwy-py. Mburuvixa tee ramo-ma oiko va'erã Nhandejáry. “Nde ae Tupã Nhandejáry tee” enterove he'i va'erã íxupe. “Ne nhe'ë-rupi mate oroiko-ta” he'i va'erã ave íxupe. Ha upe mbovyve Nhandejáry omoi ranhe va'erã opaixagwa Hesu pogwy-py, ipu'aka-rupi omanda hagwã hese kwéry. Hese ija'e'ý va'ekwe gwive jepe, íxupe ohayhu e'ý va'ekwe jepe ipogwy-py joty oiko va'erã. Inhe'ë-py joty voi oiko va'erã.*

²⁶ Ha nhande katu, vvy arigwa kwéry jakyhyje hyje jaiko-vy nhemano-gwi. Nhande jukaharã-gwi jakyhyje voi. Nhandejáry mburuvixa tee ramo oí ramo opa-tama nhandéhegwi nhemano. Hesu oiko ramo mburuvixa ramo avave nomano mo'ávéi-ma va'erã. ²⁷ Upéa-rehe Nhandejáry nhe'ë kwatia-rehe oí va'e he'i:

“Hesu pogwy-py Nhandejáry omoi-ma opaixagwa ko vvy pygwa, yváy pygwa, vvy arigwa ave, pytügwy pygwa járy gwive opyta Hesu pogwy-py. Nhandejáry oipe'a-ta ipu'akakwe íxugwi kwéry enterove oiko hagwã Hesu nhe'ë-py”*

he'i Nhandejáry nhe'ë kwatia-rehe. Tupã Nhandejáry ae katu nonhemoingói arã Hesu pogwy-py. ²⁸ Tupã Nhandejáry omoingo-ma rire enterove Hesu pogwy-py, Hesu nhe'ë-py

* 15:20 2 Co 4.14 * 15:24-25 Sl 110.1 * 15:27 Sl 8.6

oiko-ma rire enterovéa, Hesu onhemoingo jevy va'erã Tupã Nhandejáry pogwy-py. Tupã Nhandejáry omoĩ ranhe-ta enterove Hesu pogwy-py. Upe rire Hesu he'i arã gwu-pe “Xe aiko-ta nde pogwy-py. Eremoĩ-ma enterove xe pogwy-py. Ha xe katu anhemoi jevy nde pogwy-py”. Upe-ma ramo Tupã Nhandejáry oiko va'erã mburuvixa ete ramo. Inhe'ẽ tee-rupi ipu'aka tee-rupi oiko va'erã enterove. Tupã Nhandejáry tee mburuvixa-ma va'erã. Opa e'ỹ va'erã Tupã Nhandejáry mburuvixa teeha.

²⁹ Gwĩ pene pa'ũ mygwa onhemongarai uka gwe'ýi omano va'ekwe rekovia. Upe jave oĩ ave pene pa'ũ-my “Omano va'ekwe nomoingove mo'ãi Nhandejáry” he'i rei va'e. Ma'erã napembojojáry pende reko pene nhe'ẽ-rehe? Ndoikove jevýi ramo ra'e omano va'ekwe onhemongarai uka rei arã araka'e omano va'ekwe rekovia.

³⁰⁻³¹ Ha ore katu, orohasa asy meme katu. “Hesu oikove jevy-ma” oromombe'u-gwi ore mbohasa asy hikwái. Ndoikove jevýi ramo ra'e omano va'ekwe, ahasa asy rei arã ra'e aikovy. Omano va'ekwe omoingove jevy joty Nhandejáry. Upéixa-gwi ndahasa asy reíry aikovy. Cada ko'ẽ ko'ẽ xe mbohasa asy. “Xe juka-tama” ha'e jave xe py'agwapy-ma, avy'a vyteri. Xe re'ýi kwéry, Hesu reroviaha va'e, pejerovia-gwi xe remimombe'ukwe-rehe xe mandu'a ramo pende-rehe xe avy'a voi. Peteixa jajerovia Nhandejáry Hesu Cristo-rehe upéa xe mbovy'a joty ahasa asy jave. ³² Ha ko'a-py ave Éfeso tetã-my haimete-ma xe juka va'ekwe hikwái. Mymba poxy nhande jukaharã-gwi nhane renohẽ va'e-rami aiko ko'a-py. Xe ndive onhe'ẽ poxy poxy va'e pa'ũ-my aiko ramo “Xe juka-tama” ha'e mo'ã jevy xéjehe. Tekoha rei-rupi aiko ramo ra'e upéixa, xe tavy rei arã ra'e. Hesu oikoveha-rupi ae aiko katu. Omano va'ekwe ndoikove jevýi ramo ra'e iporãve arã ra'e jaiko ramo ra'e teko rei nhe'ẽ-rupi. “Ko'ẽ ramo nhamano-ta para'e. Jakaru katu, jaka'u katu” he'i rei Hesu reroviaha e'ýha. Ha omano va'ekwe ndoikove jevýi ramo ra'e anhetegwa ra'e inhe'ẽ.*

³³ Ani pejevavy teĩ. Ani ereheja avave pene mbotavy rei teĩ. “Hapixa tavy ndive oiko va'e oipe'a gwapixa rekoha ha'e ave” jaikwaa meme. Ani penhembotavy rei teĩ. ³⁴ Taperova katu pende rekoha. Anive pene rembiapo vai reheve peiko teĩ. Oĩ pene pa'ũ mygwa Nhandejáry reko kwaa e'ỹ va'e. Pemombe'u e'ỹ va'e íxupe. Ma'erã-gwi napetĩry upéa-rehe? Pende rekoha porã ramo pembojerovia va'erã Hesu-rehe pene pa'ũ mygwa kwéry-pe. Taperova katu pende rekoha.

Mba'eixagwa pa oikove jevy va'e rekorã?

(Rm 8.10-11; Fp 3.21)

³⁵ Gwĩ pene pa'ũ mygwa a-rami oporandu va'erã “Mba'éixa oikove jevy-ta? Mba'eixagwa oiko va'erã heterã omoingove jevy ramo?” oporandu va'erã. ³⁶ Upéixa peporandu ramo, napene arandu porã, xe re'ýi kwéry. Mba'e ra'ýi nghanoty. Ndaha'úi mba'e ra'ýi jevy jahexa va'erã. Ojeka ranhe arã henhói hagwã. ³⁷ Tuvixa va'e nanhanhotý mo'áiry. Mba'e ra'ýi meme nghanoty. Ha ndaha'úi peteixa mba'e ra'ýi. Oĩ trigo ra'ýi. Oĩ kumanda ra'ýi. Ha'ýi ambue mbue va'e nghanoty. ³⁸ Nhandejáry ae katu omohenhói kwaa mba'e ra'ýi-gwi temitýrã henhói hagwã. Hemimbota-rupi peteĩ teĩ-pe ome'ẽ imáta teerã.

³⁹ Ndupeteixai ave to'õ. Oĩ nhande ro'õ. Oĩ ave mymba ro'õ, gwyrã ro'õ, pira ro'õ. Opamba'e ro'õ oĩ. ⁴⁰ Upéixa ave ndaha'úi peteixa oiko va'e oikove va'e ndive. Oĩ yváy pygwa va'e. Oĩ ave ko yvy arigwa va'e ave.

⁴¹ Ndupeteixairy ave hembipe va'e kwéry. Oĩ kwarahy resakã. Oĩ jasy rembipe. Oĩ ave jasytata rembipe. Peteĩ teĩ jasytata rendy oiko ambue mbue onhoendy-gwi. ⁴²⁻⁴³ Upéixa ave Nhandejáry omoingove va'erã omano va'ekwe-pe. Nhamano ramo nhane retekwe inemba va'erã voi. Nhane moingove jevy-ma ramo nhande reterã ine e'ỹ va'erã. Jahexase e'ỹ va'e voi nhande retekwe, nghanoty va'e íxupe. Ndovaleví va'e. Hu'ũmba-ma nhande retekwe. “Ivai eterei” ja'e-ma hese. Jaikove jevy-ma ramo iporã va'erã nhande reterã. Nhandejáry opu'akaha reheve nhane moingove-gwi iporã porã va'erã nhande reterã. ⁴⁴ Yvy pygwa voi nhande retekwe. Nghanoty íxupe. Oikove jevy-ma ramo yváy pygwa oiko jepe nhande reterã. Nhaime jave ko yvy-py, nhande rete yvy arigwa voi. Nhane moingove jevy-ma

* 15:32 Is 22.13

ramo Nhandejáry, Nhe'ê Marangatu tee va'e omoingo-ta nhande-vy nhande reterã yváy pygwarã.

⁴⁵Nhandejáry kwatia nhe'ê ko'a-rami he'i:

“Nhandejáry ojapo va'ekwe kwimba'e pyyrã. Hekove va'e kwimba'e ppy. Héry va'e Adão.”*

Ko'âygwa kwimba'e héry va'e Hesu ndaha'éí Adão-rami. Imarangatu ete va'e. Omoí uka kwaa va'e opamba'e. Ou va'ekwe kwimba'e reko oiporu-vy. Yváy pygwa voi Hesu. ⁴⁶Upe mokõi kwimba'eixagwa ave nhande. Oiko ranhe nhande rete ko yvy arigwa. Upe rire ae katu oiko arã nhande reterã yváy pygwarã. ⁴⁷Ha kwimba'e ppy ko yvy ári gware voi. Yvy ku'i-gwi Nhandejáry ojapo íxupe araka'e. Ko'âygwa kwimba'e ae, Hesu yváy pygwa voi. ⁴⁸Ha'e-ta ave peê-my entéro ko yvy arigwa va'e kwimba'e ppy oiko hagwe-rami. Hete yvy ku'i rei. Hesu roviaha Hesu-rami voi oiko va'erã. Yváy pygwarã meme. Hesu rete-rami yváy pygwa meme heterã.

⁴⁹Ko'ây nhande rete kwimba'e ppy rete-rami. Yvy ku'i gwigwa ave nhande rete. Upéixa ave nhane moingove jevy ramo Hesu rete-rami nhande reterã oiko va'erã. Yváy pygwa voi jaiko va'erã.

⁵⁰Pene mandu'a porã kena ko xe remimombe'u-rehe, xe re'yí kwéry, Hesu roviaha va'e kwéry. Tupã Nhandejáry renda-py nhande ruvixa va'e oí ha-py nogwahê mo'ái ine va'erã. Upéixa-gwi nhande rete ko yvy arigwa, nhande ro'o, nhande rugvy gwive nogwahê mo'ái henda-py. Ine e'y va'e mate ogwahê va'erã upe-py. Onhembopyahu jevy-ta nhande-vy nhande rete.

⁵¹Pejeapysaka porã katu xe nhe'ê-rehe. Nhandejáry reminhongatukwe-rehe apombo'e-ta kuri. Nhande, Hesu roviaha kwéry Nhandejáry ohekoviãro jevy va'erã nhande rete kwéry. Oí arã Hesu roviaha va'e ndohupitýi va'erã jepe omanoha. Hete ohekoviãro va'erã ave íxupe kwéry. ⁵²Sapy'a ete, nhande rekoviãro-ta. Tesa pirí-rami ndahi'are mo'áiry. Hemimbygwasu paha omonhe'ê jave nhande rekoviãro-ta Nhandejáry. Omonhe'ê-ta hemimbygwasu. Ha upéi katu entéro Hesu roviaha omano va'ekwe gwive oikove jevy va'erã. Omoingove jevy-ta Nhandejáry íxupe kwéry. Omoingove jevy-gwi Hesu roviaha rete gwive ine e'y va'erã. Ha upe jave jaikove vyteri ramo, nhande rete rekoviãro-ta. Nanhamanovéi-ma va'erã. Ine e'y-ma va'erã nhande reterã.

⁵³Upéixa voi tekotevê ohekoviãro ko nhande rete ine va'erã. Nhande reterã yváy pygwa ine e'y va'erã ome'ê-ta nhande-vy Nhandejáry. Ko nhande reko yvy arigwa ohekoviãro-ta ave nhande-vy. Yváy pygwa reko nhande rekorã opa e'y va'e ome'ê-ta nhande-vy Nhandejáry.*

⁵⁴“Nhande rete ine va'erã oiko-ma arã ine e'y va'erã, ha nhande reko yvy arigwa oiko-ma arã yváy pygwarã. Upe jave oiko va'erã Nhandejáry kwatia nhe'ê he'i va'ekwe: Tupã Nhandejáry oiko-ma ramo nhande ruvixa enterove omanove e'y va'erã. Ojoko-ta nhandéhegwi nhane manoharãgwe. Nanhane mbohasa asyvéi va'erã nhane manoharãgwe.”*

⁵⁵“Nhande jopí va'e-rami oiko nhande-vy nhemano. Nhandejáry ae nhane moingove jevy va'erã. Upe ramo opa va'erã nhandéhegwi nhemano.”*

⁵⁶Áy ae katu nhane rembiapo vaikwe-rehe nhemano oiko nhande-vy. Nhandejáry nhe'ê Moisés remimombe'ukwe nhahendu-gwi jaikwaa upe va'e. ⁵⁷Nhandejáry ae omboyke-ma nhandéhegwi nhane rembiapo vaikwe. Nhane mombaraete pono jakyhyje nhemano-gwi. Tanhatima porã porã katu íxupe. Hesu Cristo oiko-ma nhane resendeha-gwi nhane mbopu'aka nhane mombaraete-gwi heko porã-rupi jaiko porã hagwã.

⁵⁸Ha'e-ta jevy peê-my xe re'yí kwéry, Hesu roviaha va'e kwéry, xe rembiayhu va'e kwéry, tapeiko porã katu. Pepyta katu Hesu rape-rupi. Ani pejere tape porã-gwi. Tapende kyre'y Nhandejáry rembiapo apo-vy. Ani pene ate'y Nhandejáry rembiapo pejapo hagwã.

* 15:45 Gn 2.7

* 15:53 1 Co 15.24-26

* 15:54 Is 25.8

* 15:55 Os 13.14

Opa hembiape pejapo va'e gwive ndaha'úi pejapo rei va'e. Íxupe gwarã ae pejapo. Upéa nipo peikwaa porã ra'e.**

16

Pemono'o plata peipytygwõ hagwã Hesu reroviaha va'e kwéry, judeu vvy rupigwa kwéry (2 Co 8.1-5)

¹Ha kwatia-rehe pehai va'ekwe xe-vy no'ã peje xe-vy: “Ore ave oroipytygwõse Hesu reroviaha va'e kwéry, Judéa vvy rupigwa kwéry. Upéa-rehe oromono'õse ore plata hesegwarã” peje xe-vy kwatia-rehe. Iporã, pemono'õ katu. Galácia vvy pygwa, Hesu reroviaha va'e-pe amombe'u va'ekwe omono'õ kwaa hagwã oplata. Upéixa ave pejapo. ²Domingo meme, pemono'õ plata. Heta ogwereco va'e tomono'õ heta. Ha mixí ogwereco va'e mixí mate tomono'õ. Upéixa pejapo pono aju-ma ramo peheka heka pene remime'érã. ³Agwahê rire amondo-ta pene remime'égwe kwéry Jerusalém tetã-my. Peiporavo pene pa'ũ mygwa ogweraha hagwã. Ahai-ta ave ikwatarã ondive ogweraha hagwã. ⁴Ha pejohu porã ramo, xe ave aha arã pene remime'érã heraha-vy. Xe ndive oho arã pene rembiporavokwe.

Mbava'e tipo ojapo-ta Paulo

⁵Ahasa-ta aha-vy Macedônia vvy-rupi. Upe rire ae apyta-ta pene ndive. ⁶Xe arese pene ndive. Ikatu ramo apyta va'erã arapyahu ahasa hagwã pene ndive. Upe rire xe pytygwõ va'erã ahasave hagwã mamó ahasa ha-py mombyryve aha hagwã. ⁷Nagwahê mo'ãi vyteri pende ha-py pya'e aha hagwã. Ajukwe-vy katu xe are-ta pende ha-py. Upéa-gwi aha'arõ-ta ko'a-py, Éfeso tetã-my. Aretegwasu pentecostes ahasase ko'a-py. ⁸Áy ae katu aha'arõ-ta ko'a-py, Úfeso tetã-my. Aretegwasu pentecostes ahasase ko'a-py. ⁹Oĩ heta ko'a pygwa Nhandejáry nhe'ê ohenduse va'e. Amombe'u mbe'u íxupe kwéry aiko-vy. Aikwaa uka porãve ráve íxupe Nhandejáry Hesu rehegwa nhe'ê. Oĩ ave heta xe-rehe ija'e'ỹ va'e, “Hesu nhe'ê pene mbotavy va'erã” he'i ipoxy-vy xe remimombe'u-rehe hikwái.

“Pemogwahê porã kena Timóteo, Apolo ave” he'i Paulo

¹⁰Xe ramigwa Timóteo ave omombe'u mbe'u Hesu rehegwa nhe'ê. Upéixa-gwi ogwahê-ma ramo pende ha-py Timóteo, pepytygwõ katu íxupe. Pembovy'a íxupe opyta porã hagwã pene ndive. ¹¹“Ipyahu eterei-gwi nahendu mo'ãi inhe'ê” ani peje teĩ hese. Ani pepyrũ teĩ inhe'ê-rehe. Pepytygwõ íxupe ave pembopy'agwapy íxupe ogwahê jevy porã hagwã ko xe ha-py. Ahexa nga'ũ íxupe. Nhande re'yi kwéry ndive ou va'erã. Aha'arõ aiko-vy íxupe kwéry ko'a-py. ¹²Ha nhande ryke'y ramigwa Apolo ave. Ajerure meme íxupe oho hagwã pende ha-py. “Tereho katu Corinto tetã-my, Hesu reroviaha va'e kwéry erehexa hagwã. Tereho nhande rvyv kwéry ndive” ha'e meme íxupe. Ha “Ko'ây ndikatúĩ aha upe-py” he'i xe-vy. Ome'êha óra-py oho-ta pende ha-py.

Kwátia nhe'êpaharã ohai Paulo

¹³Penhangareko katu pendéjehe pono pene mbojere Cristo rape-gwi. Pejepyhy katu Nhandejáry-rehe. Tapenhembopy'agwasu katu. Tapenhemombaraeteve katu peiko porã hagwã Hesu reko-rupi. ¹⁴Tapejohayhu porã rei katu peiko-vy.

¹⁵Ha Estéfanas, Grécia pygwa peikwaa ave para'e. Hesu-rehe ha'e ojerovia rire ae, hetã mygwa kwéry ave ojerovia ave. Hóga pygwa ave peikwaa para'e. Hesu reroviaha va'e kwéry-pe oipytygwõ tygwõ oiko-vy hikwái. ¹⁶Pehendu kena Estéfanas nhe'ê, xe re'yi kwéry, Hesu reroviaha va'e kwéry. Indive oĩ va'e nhe'ê ave pehendu katu. Ha'e kwéry omombe'u porã Hesu rehegwa nhe'ê. Tapeiko ave inhe'ê-py.

¹⁷Ogwahê-ma xe renda-py Estéfanas. Ogwahê-ma ave Fortunato, Acaico ave ogwahê-ma. Upe mbohapy va'e rexa-vy avy'a eterei. Ha'e kwéry xe pytygwõ porã ko'a-py. Peẽ peime mombyry eterei xéhegwi xe pytygwõ hagwã. Ha'e kwéry pende rekovia oĩ ko'a-py

* 15:58 1 Ts 4.13-18 * 15:58 Gl 6.9

xe pytygwõ va'e. ¹⁸ Xe mbovy'a xe mokyre'y eterei aiko porãve hagwã Nhandejáry rape-rupi. Peẽ ave pene mokyre'y ave araka'e ha'e kwéry peiko porãve hagwã Hesu rape-rupi. Pehexakwaa rei katu íxupe kwéry hemikotevẽ-rehe. Tapejeapysaka katu ave inhe'ẽ-rehe.

¹⁹ Hesu reroviaha va'e kwéry Ásia pygwa imandu'a va'ety omondo uka pende ha-py. Áqüila, hambireko Priscila ave imandu'a va'ety omondo uka-ta ave pende ha-py. Áqüila róga-py ojogweroaty va'e Hesu reroviaha imandu'a va'ety omondo uka-ta ave pende ha-py. Hesu réry-py omondo uka peẽ-my. ²⁰ Hesu reroviaha ko'a-py oĩ va'e ave omondo uka-ta peẽ-my imandu'a va'ety. Penhoanhukwavã kwavã rei katu pehexa uka hagwã pene mandu'aha Hesu reroviaha va'e-rehe. ²¹ Áy xe ave xe mandu'a va'ety amondo-ta ave pende ha-py. Xe voi ajapo xe réry xe po-rupi.

²² Oĩ ramo Nhandejáry Hesu Cristo-pe ndohayhúí va'e tombohasa asy katu íxupe mombyry ojéhegwi omondo-vy Nhandejáry. Ha Hesu-pe ae xe ha'e "Eju kena, xe Járy."

²³ Nhandejáry Hesu Cristo tapende rovã porã katu pende rexakwaa rei-vy. ²⁴ Apohayhu voi Hesu Cristo réry-py. Amém. Opa xe nhe'ẽ.

Paulo remimombe'ukwe
Corínto tetã mygwa pegwarã 2
segunda epistola de Paulo aos coríntios

¹ Xe Paulo Hesu Cristo remimondo va'e. Nhandejáry remimbota-rupi aiko-ma hemimondo ramo. Xe nhande re'yí Timóteo ndive oromondo-ta kwatia-rehe ore nhe'ê peê-my gwarã. Peê Corinto tetã mygwa Nhandejáry nhe'ê-rupi penhomboaty aty va'e pegwarã orohai peê-my. Hesu-rehe ojerovia va'e gwive opa Grécia vvy rupigwa pegwarã orohai ave peê-my. ² Tapende rovasa porã katu Nhandejáry Nhande Ru tee va'e. Tapene mbopy'agwapy porã ave pende rexakwaa rei-vy. Hesegwa voi nhande. Nhandejáry Hesu Cristo rehegwa voi ave nhande.

Paulo ombotuvixa mba'e imboete-vy Tupã Nhandejáry-pe

³ Tupã Nhandejáry Hesu Cristo Ru-pe tanhambotuvixa mba'e voi katu. Nhande Rugwasu voi ha'e. Nhande poriahuvereko voi va'e ha'e. Nhande rexakwaa rei va'e voi ha'e. Nhande mbopy'agwapy va'e voi ha'e.

⁴ Jahasa asy asy ramo jepe nhane mbopy'agwapy ave va'e voi ha'e. Ha nhane mbopy'agwapy meme-gwi nhande ave jaikwaa nhande rapixa-pe ohasa asy va'e-pe nhambopy'agwapy jevy hagwã. “Xe upéixa voi ave ahasa asy va'ekwe” ja'e arã nhande rapixape ohasa asy ramo imbopy'agwapy jevy hagwã íxupe. “Upe jave voi va'ekwe Nhandejáry xe mbopy'agwapy-ma va'ekwe. Xe mbopy'agwapy hagwe-rami ne mbopy'agwapy ave va'erã Nhandejáry” ja'e arã íxupe imbopy'agwapy-vy. ⁵ Cristo oiko hagwe-ramima ore ave oroiko-ma. Ohasa asy asy hagwe-rami ave orohasa asy ko'ánga ore oroiko-vy. Upe jave ore mbopy'agwapy joty Cristo. Ore mbopy'agwapy hagwe-rami ave oronhombopy'agwapy ave oroiko-vy. ⁶ Ore mbohasa asy ore momytu'e'y hagwã mo'ã. Nhandejáry ae ore pytygwõ meme ore py'a mombaraete jevy hagwã. Upéixa oroiko ramo peikwaa va'erã penhombopy'agwapy hagwã. Ore-rami pehasa asy ramo penhombopy'agwasu kwaa arã. “Paulo-rami ahasa asy ra'e” peje arã pendejúpe pendejehe. “Upe jave Nhandejáry oipytygwõ íxupe ra'e, ombopy'agwapy-ma ave íxupe ra'e. Nhandejáry aipo ramo xe pytygwõ arã xe mbopy'agwasu hagwã ave” peje arã. “Aha'arõ-ta xe resende hagwã Nhandejáry” peje kwaa va'erã penhombopy'agwapy-vy. ⁷ Aikwaa-ma voi ra'e pejeroviaha Hesu-rehe. Oroiko hagwe-rami upéixa ave peê peiko arã. Hesu-pe ogwerovia e'y va'e pene mbohasa asy ave va'erã. Upe jave pejeroviave arã Hesu-rehe ha pene mbopy'agwapy va'erã Nhandejáry. Upe pende reko porã-rehe orojerovia-ma.

⁸ Xe re'yí kwéry, Hesu roviaha va'e kwéry, amombe'u porãse peê-my, mba'e ojehu va'ekwe ore-vy. Ásia vvy-py oroiko ramo ojehu va'ekwe ore-vy. Oroiko asyha ipohýi eterei va'ekwe ore-vy. Haimete va'ekwe ndore pu'akavéi oréjehe. “Nas'éví-ma va'erã ko'a-gwi” ha'e mo'ã va'ekwe. “Amano-tama xe” ha'e mo'ã va'ekwe xéjehe. ⁹ Orojejúka uka hagwã-ramima oroiko va'ekwe Nhandejáry-rehe anho mante orojerovia hagwã. Omano va'ekwe gwive omoingove jevy va'e voi Nhandejáry Hesu Cristo. Ore orejehewi rei nore mbaraetéry. Ha'e anho mate ore mombaraeteha. ¹⁰ Ha'e ore resende ore pytygwõ-vy va'ekwe. Ndohejái va'ekwe oromano. Ahasa asy jevy ramo jepe, Hesu ndohejái voi va'erã amano hagwã ha'e va'erã xéjeupe. Xe resendehaty voi Hesu. Xe ajerovia tee-ma hese. ¹¹ Peê ave pembojeupi kuri pene nhe'ê ore-rehe Nhandejáry-pe ore pytygwõ hagwã. Upéixa ramo heta va'e ombojeupi ramo onhe'ê Nhandejáry-pe ohendu va'erã ore rovasa hagwã. Upe va'e-rehe onhangareko porã va'erã ore-rehe. Ore rovasa rire petima porã kuri Nhandejáry-pe. Upéixa ramo he'i va'erã “Heta voi nipo ra'e xe mboeteha” he'i va'erã Nhandejáry.

Paulo omombe'u mbava'e-gwi po hi'are oho hagwã Corinto tetã-my

¹² Ko va'e xe mbovy'a voi. Xe py'apy gwive aikwaa xe reko porãha. Hesu reroviaha e'y mbyte-py, pende apyte-py, mombyrykwe-py, hi'ägwikwe-py ave peteixa voi xe aiko Nhandejáry nhe'ê marangatu-rupi. Ndaha'êi yypóry arandukwe-rupi aiko upéixa. Nhandejáry ae xe rexakwaa rei-magwi xe mo'arandu-vy, upéixa aiko. Íxupe amboete-vy apogwereco porãse. ¹³ Ndaha'êi apombotavy hagwã xe nhe'ê amoí kwatia-rehe. Amombe'u porã hagwã ae peê-my amoí kwatia-rehe pemonhe'ê hagwã. Xe ko peteixa voi xe nhe'ê. Aipota peikwaa porã voi xe rehegwa nhe'ê. ¹⁴ Ore rekoha rehegwa peikwaa ku'a ku'a rei joty. Apombojerovia ukaseve-gwi aipota peikwaa xe rehegwa nhe'ê. Nhandejáry Hesu noi jevy hagwã áry-py, avy'a arã pende-rehe. Upe áry-py peê ave aipota pevy'a ave arã ore-rehe.

¹⁵⁻¹⁶ “Ovy'a arã xe rexa-vy” ha'e mo'ã-ma xe pende-rehe. Macedônia rape-rehe aha ramo agwahêse ranhe mo'ã pende ha-py. “Upéi agwahê jevy-ta ajukwe-vy iha-py” ha'e xejúpe. “Upéixa ramo imokõiha agwahê jevy va'erã ambovy'ave hagwã íxupe kwéry” ha'e mo'ã va'ekwe pende-rehe. “Xe pytygwõ hagwã ahave hagwã mombyryve Judéia vvy-py aha hagwã” ha'e mo'ã ave va'ekwe pende-rehe. ¹⁷ Ajapose va'ekwe ndajapói vyteri-gwi pene nhe'ê rei rei ra'e xe-rehe. “Nonhemongeta porãiry nipo ra'e opy'a ndive” peje mo'ã araka'e xe-rehe. “Ojéhewi rei nipo ojapo araka'e” peje mo'ã araka'e xe-rehe. “Teko rei reko-rupi voi nipo ra'e oiko Paulo” peje mo'ã xe-rehe. “Ajapo-ta he'i mo'ã ójehe Paulo, upéi ndojapói he'i hagwe-rami” peje mo'ã araka'e xe-rehe. ¹⁸ Heroviapyrã voi xe remimombe'u. Nhandejáry onhe'ê-gwi ova e'y teháixa peteĩ-rupi voi xe remimombe'u. ¹⁹ Ore katu, Silvano, Timóteo, xe ave, ore oromombe'u mbe'u peê-my va'ekwe Hesu Cristo rehegwa nhe'ê. Ha'e Tupã Nhandejáry ra'y tee voi. Petéixa voi inhe'ê. Anhetegwa meme voi hemimombe'u. He'i hagwe-rami oiko meme-ta voi. ²⁰ Tupã Nhandejáry omombe'u mbe'u va'ekwe gwemime'erã kwéry-rehe. “Aphovasa va'erã. Nde re'yí kwéry gwive ave ahovasa va'erã” he'i voi meme va'ekwe Nhandejáry nhane ramoigwasu kwéry-pe. Hesu Cristo-rehe jajerovia tee ramo, Nhandejáry he'i hagwe-rami nhande rovasa voi va'erã. Ha'e he'i va'ekwe gwive ojapopa-ma va'erã Cristo. Upéa-rehe ja'e “Amém. Upéixa ete toiko” ja'e nhamomba'egwasu-vy Nhandejáry-pe.

²¹ Nhandejáry voi ore mombaraete, peê-my ave pene mombaraete pono jajere eterei Cristo-gwi. Nhande poravo va'ekwe gwe'yirã. ²² Omoí-ma nhande-vy Nhe'ê Marangatu tee va'e nhande py'apy pygwarã kwéry. Oime-magwi nhande py'apy-py jaikwaa-ma, nhande rereko-ma gwe'yirã Nhandejáry. Hemime'erã-rehe nhaha'arõ kwaa-ma ave.*

²³ Mbava'e-gwi po ndahái va'ekwe pende ha-py. Nhandejáry oikwaa porã voi. Pono pombovy'are'y rei ndaháiry. Nhandejáry oikwaa xe apu e'y va'e voi xe. ²⁴ Ndaha'éiry voi pende-rehe amanda hagwã ahase pende ha-py. Perovia hagwã ae agwahêse upe-py. Aikwaa porã-nhe Hesu-rehe pejerovia porãmaha. Upéixa apopytygwõse ae pevy'a hagwã. Kwehe ae aha ramo ra'e pende ha-py, orombovy'are'y arã ra'e. Upéa-gwi ndahái va'ekwe pende ha-py.

2

¹ Upéa-rehe ha'e xejúpe: “Ndaha mo'ãvéi-ma xe vy'are'y reheve pono ambovy'are'y rei íxupe kwéry” ha'e xejúpe pende-rehe. ² Apombovy'are'y ramo kiva'e po xe mbovy'a jevy arã. Peê mate xe mbovy'a jevy va'erã apombovy'are'y rire. ³ Upéixa-gwi ahai va'ekwe peê-my kwatia ani hagwã agwahê ramo pende ha-py xe mbovy'are'y jevy. Aipota xe rerohory voi xe agwahê ramo pende ha-py. Ajerovia-ma voi xe pende-rehe kwéry. Xe avy'a ramo peê ave pevy'a arã. ⁴ Ahai ramo va'ekwe upéa kwatia peê-my gwarã xe anhemboasy eterei ajahe'o ahai-vy avy'are'y-gwi. Ndaha'êi pene mbovy'are'y hagwã ahai va'ekwe peê-my kwatia-rehe. Xe apohayhu etereiha aikwaa ukase peê-my.

*Mba'eixa jareko hembiaipo vai va'e imytu'e'y va'e ójehe
(Lc 17.3; Gl 6.1)*

* 1:22 Rm 8.14-15; Ef 1.13-14

⁵Gwĩ nhane mbovy'are'ỹ va'e oĩ ra'e pene pa'ũ-my. Pono xe nhe'ẽ asy eterei peẽ-my ha'e-ta: Xe naxe anhoĩry avy'are'ỹ va'ekwe hese. Peẽ ave nipo pereko ave nhembyasy ra'e xe-rami ave. ⁶Ko'ánga ha'e-ta peẽ-my: Ha'eve-ma. Anive pereko asy íxupe hembiaapo vaikwe-rehe. ⁷Peiporiahuverekó rei ae katu kuri íxupe. Pemohembiaapo porã uka ae katu íxupe. Pembohory hory joty íxupe. Ani pemomytu'e'ỹ teĩ íxupe pono ojeahéi rei ójehe. ⁸Upéa pejapo hagwã ajerure peẽ-my pene rembihayhu-rami joty pereko hagwã íxupe. Anive pemomandu'a teĩ íxupe hembiaapo vaikwe-rehe. ⁹Ndaha'éi ae upéa-rehe mante ahai va'ekwe peẽ-my upéa kwatia. Aikwaase va'ekwe ave pende rekorã-rehe. Pejapopa-ta para'e ndapejapo mo'ái para'e xe nhe'ẽ, xe remimombe'u gwive peẽ-my, xe ndaikwaáiry joty va'ekwe. Upéa-rehe ahai va'ekwe peẽ-my aikwaase-gwi. ¹⁰Peiporiahuverekó ramo íxupe aiporiahuverekó ave arã xe nive hagwã nhane mandu'a hembiaapo vaikwe-rehe. Oĩ-ma ramo va'ekwe xe aiporiahuverekó hagwã, Hesu Cristo réry-py aiporiahuverekó-ma voi íxupe. Nhandejáry Hesu Cristo oikwaa voi xe apohayhuha enterovéa-pe. ¹¹Aiporiahuverekó-ma íxupe nhande joja jevy hagwã ani hagwã anhaygwasu Satanás ipu'aka nhande-rehe. Jaikwaa-ma voi nhane mbotavy va'e anhaygwasu.

Otopase mo'ã oĩru Tito-pe Paulo

¹²Agwahẽ-ma ramo va'ekwe Trõade tetã-my amombe'u mbe'use mo'ã va'ekwe Hesu rehegwa nhe'ẽ upe pygwa kwéry-pe. Xe renduharã Nhandejáry omoĩ porã-ma jepe ndaxe py'agwapýi joty xe are hagwã upe-py. ¹³Ndaxe py'agwapýiry ndatopái-gwi xe irũ Tito-pe. "Ma'erã po nogwahẽi a-py" ha'e xejéupe hese. "Aha-ta Macedônia yvy-py. Upe-py para'e atopa va'erã Tito-pe" ha'e xe renduharãgwe-pe. Upéi aha jevy mombyryve Tito piari.

Cristo nhane mombaaraete meme

¹⁴⁻¹⁵Atima porã-ta Nhandejáry-pe. Ha'e nhane moingo-ma peteixa Cristo ndive. Opa-rupi nhane moirũ nhande reraha-vy. Nhande mombaaraete jaiko porã meme hagwã. "Ipu'aka voi ra'e Nhandejáry ra'e" he'i hagwã nhande rexaháry. Opa-rupi omohyakwã porã va'e-rami omoherakwã uka porã nhande-vy nhande rexaháry oikwaa porã hagwã Cristo rehegwa. Upéixa ramo nhane rerakwã oiko va'erã hyakwã porã va'e-rami Nhandejáry Hesu Ru-pe. Cristo nhane mbohekoha porã. Upéi nhande rekoha pyahu rerakwã mombyry-rupi oho va'erã enterove oikwaa hagwã hesegwa nhe'ẽ. Nhandejáry ndive oiko va'erã, Nhandejáry ndive oiko e'ỹ va'erã ave oikwaa arã Hesu Cristo rehegwa nhe'ẽ. ¹⁶Ohenduse e'ỹ va'e ojere arã Cristo-gwi. Nhande jegwaru va'e nanhahetũseiha-rami, nohenduséi va'erã Nhandejáry rerakwã. Oikwaa Nhandejáry omondo hagwã mombyry ojéhegwi. Upéa-rehe ndogwerovy'áiry inhe'ẽ. Ha gwĩ Hesu-rehe ojerovia va'e, hyakwã porã jarovy'aha-rami, ohenduse va'erã Nhandejáry rerakwã. Ogwerovy'a va'erã inhe'ẽ. Onhemboheko pyahuve huve va'erã oho-vy. Kiva'e po omoherakwã porã kwaa Cristo rehegwa nhe'ẽ? Ojéhegwi rei ndoikóiry voi omoherakwã porã kwaa va'e Cristo nhe'ẽ. ¹⁷Nhandejáry réry-py omombe'u va'e mate omoherakwã porã kwaa va'erã. Ore niko Nhandejáry remimondo va'e voi ore. Anhete teegwa voi ore remimombe'u. Oĩ ojeupe gwarã-rehe ombojopara rei gwemimombe'u Nhandejáry nhe'ẽ mo'ã. Ore ae katu ndaha'éi upeixagwa inhe'ẽ va'e. Ore ore py'a porã reheve ae Cristo réry-py ore oroiko va'e. Hesegwa nhe'ẽ tee voi ore oromombe'u va'ekwe oroiko-vy.

3

Iporãve ráve Hesu rehegwa nhe'ẽ Moisés amyri remimombe'ukwe-gwi

¹Oĩ nipo ra'e gwĩ va'e ogwahẽ ramo pende ha-py perovia hagwã íxupe ogweraha kwatia opo-py ojekwaa hagwã hese. Ore ae katu natekotevẽiry voi orogweru kwatia. Peikwaa voi peẽ ore rehegwa. Ha ore rehegwa peikwaa porã ramo jepe oĩ joty nipo ra'e ore-rehe onhe'ẽ rei va'e ra'e. "Kwatia nhe'ẽ-rehe Paulo ogwerovia ukase mo'ã ójehe" he'i rei voi ra'e xe-rehe. Anive upéixa erenhe'ẽ rei xe-rehe. ²Ore rembihayhu voi ko peẽ. Kwatia rekovia peẽ peiko. Ore nhe'ẽ renduhaty kwéry peẽ. Pende rekoha pyahu porã rexaha

oikwaa va'erā ore rekoha. “Aipo ramo Nhandejáry réry-py voi nipo ra'e omombe'u inhe'ê Paulo kwéry” he'i va'erā voi ore-rehe pende rexaha kwéry. ³Ojehai va'ekwe-rami voi omói pende py'a-py onhe'ê. Pende py'a potí porā-ma enterovéa-pe peê. Kwatia-rehe jahai ramo tinta-py, pya'e opa va'erā. Hierro-py ojo'o ramo ita-rehe ohai-vy, upe ave pya'e opa va'erā. Nde py'a-py oī-ma ramo katu Nhandejáry nhe'ê, nde rekoha pyahu ndopái va'erā. Cristo rehegwa nhe'ê amombe'u peê-my va'ekwe-gwi Nhe'ê Marangatu tee va'e pene mo'arandu-ma va'ekwe. Upe Tupā Nhandejáry oikove va'e pene mo'arandugwi pejerovia-ma va'ekwe hese. Pende rekoha pyahu opa e'ỹ va'e omombe'u va'erā nde rexaha-pe ore reko porāha.*

⁴Ndaha'éiry voi-ma xejehegwi rei aipo ha'e peê-my. Cristo rembiapo apo oroikwaa porā-gwi ae aipo ha'e peê-my. ⁵Ndaha'éiry orejéhegwi rei ore ore mbaraete oromombe'u mbe'u hagwā Hesu rehegwa nhe'ê ore renduháry ogwerovia hagwā Hesu-rehe. Ndaha'éí ave ore ae rei orejéhegwi rei ore arandu-gwi oromombe'u mbe'u hesegwa nhe'ê. Nhandejáry ae voi ore mombaraeteha-rupi oromombe'u mbe'u hesegwa nhe'ê. ⁶Ha'e ae ore mo'arandu-ma va'ekwe ore mombaraete-ma va'ekwe inhe'ê mombe'uharā ore oroiko hagwā íxupe. Hesu Cristo rehegwa nhe'ê mombe'uharā ore moingo-ma va'ekwe. Nhane rembypy Moisés amyri remimombe'ukwe rehegwa katu ore noromombe'úi va'e ore. Nhe'ê Marangatu tee va'e ae ore mo'arandu Hesu Cristo rehegwa oromombe'u mbe'u hagwā. “Moisés amyri remimombe'ukwe ndojapói va'e nogwahê mo'ái Nhandejáry renda-py” noromombe'uvéi. Iporāve ore remimombe'u. “Nhe'ê Marangatu tee va'e pende py'apyhy ete-ma ramo pejerovia va'erā Hesu Cristo-rehe. Peiko meme va'erā Nhandejáry ndive” oro'e meme oromombe'u-vy.*

⁷Nhandejáry ohai uka va'ekwe Moisés amyri-pe hemimombe'urā tekoha porā jareko hagwā. Ita-rehe ojo'o ohai-vy va'ekwe. Upéi Moisés ogweraha upe ita Israel re'íy kwéry-pe. Ohexa uka-ma ramo íxupe kwéry tekoha rehegwa nhe'ê Nhandejáry nhe'ê ita-rehe oī va'e, Moisés rova ohesakapa íxupe kwéry. Upéa-gwi ndikatúí omanha va'ekwe Moisés rova-rehe hikwái. Ogwe hagwā-ramima jepe hendy mbaraete vérami joty íxupe kwéry ohesaka-vy. Upéa-rupi Nhandejáry ohexa uka va'ekwe nhande-vy omba'egwasu marangatuha ombou jave nhande-vy tekoha porā rehegwa nhe'ê ita-rehe oī va'e. Ha ave ndojapopáiry hemimombe'ukwe. Upe tekoha tuja-rupi ndajaiko meméiry voi. Upéixa-gwi nhane mogwahê ukase mo'ā Nhandejáry oī ha-py Moisés remimombe'ukwe tekoha.* ⁸Ko'áy katu Nhandejáry ombou uka Nhe'ê Marangatu tee va'e nhane mo'arandu hagwā nhane moagwí uka hagwā ojéhegwi nhande rekoverā opa e'ỹ va'e ome'ê-vy nhande-vy. Aipo ramo upéa-rupi Nhe'ê Marangatu tee va'e rembiapo-rupi onhemomba'egwasuve va'erā voi Nhandejáry. ⁹Iporā teí voi-ma Moisés amyri remimombe'ukwe. Nhande reko porā va'erāha ohexa uka teí va'ekwe nhande-vy. Ndajajapo porāi-gwi ae omopotí ukase mo'ā nhande py'a. Iporāve íxugwí Hesu Cristo rehegwa nhe'ê. Nhande py'a omopotí va'e ohexa porā uka nhande-vy. Omboyke nhandéhegwi nhande py'a vaikwe. Iporā ete voi hesegwa nhe'ê. ¹⁰Upéa-rehe nhande jaikwaa porāve Nhandejáry ipu'akaha. Upéixa ramo Hesu rehegwa nhe'ê yke-rehe oī ramo Moisés remimombe'ukwe tekoha, iporāve ráve vérami teí íxugwí. ¹¹Upe nhe'ê tuja omomba'egwasu porā voi jepe “Ijapy rei va'erā kóa nhe'ê peê-my” he'i va'ekwe Nhandejáry nhande-vy. Ha “Hesu Cristo rehegwa nhe'ê katu ndopái va'erā peê-my” he'i ae hesegwa nhe'ê porā-rehe omomba'egwasuve-vy.

Nhe'ê Marangatu tee va'e oī ha-py mba'eve ndaipu'akavéi-ma va'erā nhande-rehe

¹²Upéixa-gwi ore oronhembopy'agwasu oromombe'u mbe'u hagwā Nhandejáry Hesu Cristo rehegwa nhe'ê. “Nhandejáry ndive jaiko va'erā voi. Cristo-rehe ha-py omboyke nhandéhegwi nhane rembiapo vaikwe” oro'e orejúpe. Oroha'arō tee voi arā ndive oroiko hagwā. ¹³Ndoropapói Moisés amyri ojapo hagwe-rami. Ha'e omonde va'ekwe oakā rehegwa ojhovaomi-vy. Ndoipotái-gwi he'íy kwéry, Israel remiarirōre oikwaa nahandyveimaha hova.* ¹⁴Ha'e kwéry ndoikwái va'ekwe mba'e po he'ise upe va'e.

* 3:3 Êx 24.12 * 3:6 Jr 31.31-34 * 3:7 Êx 34.29 * 3:13 Êx 34.32

Nhandu kyha-py ojeavoaha-rami voi oĩ va'ekwe inhakã-rehe ojopia va'e. Ohendu teĩ. Ko'ây peve nhandu kyha-py ojeavoapa va'e-rami voi joty okwa hikwái. Oarandu porã-rehe ndoikwaáiry vyteri hikwái. Oikwaa jokupepa rei. Yma gware Nhandejáry nhe'ẽ omonhe'ẽ ramo ohendu teĩ. Ha ohendu e'ỹ va'e-rami joty voi oiko hikwái. Ndoikwaái mba'e pa he'ise. Peteixa oiko-ma ramo Hesu Cristo ndive rire ae oikwaa-ma va'erã. ¹⁵ Ây peve Moisés amyri remimombe'ukwe omonhe'ẽ jave oĩ ipy'a jeavoaha va'e. Ndoikwaa porãí anhetegwa va'e-gwi ipy'a jeavoaha vyteri hikwái. ¹⁶ Hesu Cristo-rehe ojerovia ramo ae katu ojepe'a paete arã íxugwi ipy'a jeavoaha vérami oĩ va'e. ¹⁷ Upe kwatia-py "Nhandejáry" he'i ramo, "Nhe'ẽ Marangatu tee va'e" he'ise. Ha Nhe'ẽ Marangatu tee va'e oĩ ha-py mba'eve ndaipu'akavéi-ma va'erã nhande-rehe. Nhane mo'arandu meme arã jaiko meme hagwã inhe'ẽ-py.

¹⁸ Cristo-rehe jajerovia-magwi peteĩ teĩ nhande rova avoaha e'ỹ va'e-ramima jaiko. Ndaiporivéi-ma nhande-vy nhandu kyha ramigwa nhande py'a jeavoaha. Espéko-py jajehexaha-rami Nhandejáry mba'egwasuha ipu'akaha ave ohexa uka nhande-rehe. Ojehexa jave, nhande reko ojehe'ave ave oho-vy Cristo-rehe. Hekoha-ramima jaiko porãve rãve jaha-vy. Nhandejáry Nhe'ẽ Marangatu tee va'e rembiapo voi upe nhande reko pyahu-ma.*

4

Hetea'e reheve Paulo omombe'u Hesu Cristo rehegwa nhe'ẽ

¹ Nhandejáry ore poriahuvereko-magwi Hesu rehegwa nhe'ẽ mombe'uha ramo ore moingo-ma va'ekwe. Upéa-gwi ore retea'e reheve oromombe'u Hesu Cristo rehegwa nhe'ẽ. ² Nore rembiapo vaíry. Norogwenotíry ore rembiapokwe. Nhandejáry nhe'ẽ ra'anga noromombe'u mo'ái. Norombojopara reíry va'ekwe imombe'u-vy inhe'ẽgwe. Oporombotavy e'ỹ va'e voi ore. Nhandejáry oikwaa voi ore rekoha. Nokanhíy mba'eve íxugwi. Anhetegwa mante ore remimombe'u va'e voi. Upéixa orojekwaa uka enterove va'e-upe. ³ Hesu Cristo rehegwa nhe'ẽ enterove ohendu hagwã oromombe'u mbe'u oroiko-vy. Ohenduse e'ỹ va'e-gwi mate onhemi rei oiko-vy ore remimombe'u. Ipy'a jeavoaha va'e-rami voi oiko gwí Nhandejáry-gwi mombyry oikose va'e kwéry. Ohasa asy hagwã-py oho va'erã hikwái. ⁴ Anhaygwasu-pe ae ogwereco gweko járy ramo hikwái. Ha'e omopytũmba íxupe kwéry pono ojerovia Hesu-rehe. Omohesakãmba porã mo'ã íxupe kwéry Cristo rehegwa nhe'ẽ. Nhane remimomba'egwasu va'e voi Cristo. Ha'e hekoha peteixa Nhandejáry rekoha ndive. ⁵ Ha ore katu hesegwa nhe'ẽ meme ore remimombe'u. Noromombe'úi ore orejéhegwi rei. Hesu Cristo Nhandejáry voiha mante ore remimombe'u. Ore niko oroiko pene rembigwái-rami rei Hesu Cristo nhande rayhuha-gwi. ⁶ "Tahembipe" he'i va'ekwe Nhandejáry. Pytũ rei va'ekwe omohembipe hagwe-rami, ây omohembipe ave Nhandejáry nhande py'apy-py nhane mo'arandu hagwã ójehe. Hesu Cristo-rehe hekoha porã tee jahexakwaa ramo jaikwaa-ma ave Nhandejáry imba'egwasuha.*

Nhandejáry mate oĩ Paulo mombaraeteha

⁷ Upéixa voi hyru vyjygywe gwigwa-py omoĩ iporãve va'e. Upéixa ete ave mba'e ryru-rami rei ore oroiko. Nhandejáry omoĩ va'ekwe ore py'apy-py onhe'ẽ marangatu porã ete va'e. Upéa-rehe oroikwaa-ma voi Hesu Cristo Nhandejáry tee voiha. Ipu'aka teeveha oroikwaa-ma voi. Ore mo'arandu porã enterove oikwaa hagwã. Ndaha'éiry voi orejéhegwi rei ore mbaraeteha. Nhandejáry ore mombaraeteha va'e ae ojekwaa hagwã ore reko-rehe. ⁸ Ore-vy katu, gwí Hesu rehegwa nhe'ẽ nohenduséi va'e ore jopyve pyve va'ekwe ore moingo asy-vy. Ore rereko asy vai ramo jepe oronherenohẽ jevy joty íxugwi. Ndororejpy'apýiry voi oroiko-vy oréjehe. Ore py'a rorova va'e oĩ ramo jepe ore-vy ndorojepy'a rorova ukáiry joty íxupe. Akóí joty voi ore orojerovia Hesu-rehe. ⁹ Oĩ heta voi ore-rehe ija'e'ỹ va'e ore rereko asy va'e. Nhandejáry ae ore pytygwõ voi. Ore-rehe ija'e'ỹ va'e ore

* 3:18 Rm 8.29; 1 Jo 3.2-3 * 4:6 Gn 1.3

reity jepe teĩ oropu'ã jevy joty oroho-vy orojerovia-gwi Nhandejáry-rehe. ¹⁰ Ore jukase meme ore-rehe ija'e'ỹ va'e. Hesu rereko hagwe-rami ave ore rerekose mo'ã. Hesu ae ore mombarete. Upéa-gwi ore rexaháry ohexa kwaa ore-rehe he'i hagwã “Hesu nipo oikove tee va'e voi ra'e” he'i hagwã. ¹¹ Oroikove peve gwive ore mbohasa asy meme ore jukase-vy oroiiko-gwi Hesu rembigwái ramo. Upéixa oroiiko jave ojehexa uka ore reko-rehe Hesu oikove jevymaha. “Hesu voi nipo ra'e oipytygwõ Paulo kwéry-pe. Hesu voi nipo ra'e oikove jevy-ma” he'i hagwã ore rexaháry. ¹² Hesegwa nhe'ẽ oromombe'u-gwi oromano va'erã-ramima ore oroiiko. Ha peẽ ae katu inhe'ẽ oromombe'u-gwi pene moingove porã-ma Hesu.

¹³ Yma va'ekwe hese ojerovia va'e ohai Nhandejáry nhe'ẽ kwatia-rehe “Arovia-gwi amombe'u” he'i. Ore ave, orogwerovia-gwi oromombe'u mbe'u ave Nhandejáry rehegwa nhe'ẽ.* ¹⁴ Omano rire Hesu Cristo, Nhandejáry omoingove jevy íxupe. Oroikwaa-ma ave nhamano rire Nhandejáry nhane moingove jevy va'erã Hesu ndive. Pene ndive ore reraha va'erã gwenda-py. ¹⁵ Orohasa asy pende-rehe ha-py oroiikwaa uka hagwã peẽ-my Hesu Cristo rehegwa nhe'ẽ pende retave tave hagwã pejerovia-vy Hesu-rehe. Upéixa ramo oĩ arã hetave tave ojerovia va'e Hesu-rehe. “Atima xe Járy” he'i meme arã hikwái. Hetave tave oĩ va'erã omomba'egwasu va'e Nhandejáry-pe.

Nhande rereko asy ramo jepe nhamondo mondo nhande resa yváy-py oĩ va'e-rehe (Rm 8.17-18)

¹⁶ Upéixa-gwi ndore py'a rerahái oroiiko asy ramo jepe. Ore rete-pe ore mokãgwe rasyapa jepe, ore py'a katu onhemoatyrõve rõve oho-vy. ¹⁷ Ore-rehe ija'e'ỹ va'e ore rereko asy tee jepe ndorojohu vaíry joty ore. “Ndahi'are etéiry” oro'e joty orejéupe. Yváy-py ore momba'egwasu porãve rãve va'erã ore rereko porã-vy opa e'ỹ reheve. ¹⁸ Upéixa-gwi ndaha'éi niko jahexa va'e-rehe oromondo ore resa oroiiko-vy. Jahexa e'ỹ va'e-rehe ae oromondo mondo ore resa. Jahexa va'e ndahi'aréi va'erã. Jahexa e'ỹ va'e katu opa e'ỹ va'erã.

5

Nhandejáry ndive jaiko va'erã-rehe javy'a ha'arõ-vy

¹ Ko nhande rete nhande tapýi rei voi. Ho'a rei arã nhamano ramo. Jaikwaa-ma niko ho'a-ma ramo, ombohokovia arã nhande-vy yváy-py Nhandejáry Hesu Cristo renda-py. Ndaha'éi nhane rembiaporã upe nhande róga teerã. Nhandejáry rembiapo ae ijapopyre opa e'ỹ va'e ome'ẽ arã nhande-vy nhande rete pyahurã jevy. ² Ore ao pyahupy oronhemondese etereiha-ramima oroiiko-ma ore. Ore rete pyahurã oroioporuse eterei ore. Ndaha'éi ore py'a kane'õ-gwi, iporãve va'e orohexaséi-gwi ae. ³ Nhane nhe'ẽ reko katukwe ombohete jevy ave va'erã yváy-py. Ndoiko reivéi-ma va'erã nhane nhe'ẽgwe upe-py. Nhandemonde va'erã-rami nhande rete pyahupa-ma va'erã upe-py. ⁴ Nhande tapýi rei vérami jaiporu va'e nhande rete rasyapa rei nhahendu. Ha ore katu haimete noroha'arõ kwaáiry ore rete resakã-rehe. Ndaha'éi teĩ jepe oromanose-gwi. Oronhemondese eterei-ma ae ore rete pyahurã-py. Iporã eterei ore-vy omano e'ỹ va'erã. ⁵ Nhandejáry voi ojapo va'ekwe nhande reterã. Omoingo-ma nhande py'apy-py Nhe'ẽ Marangatu tee va'e. Pe Nhe'ẽ Marangatu tee va'e ome'ẽ ranhe va'ekwe nhande-vy Nhandejáry yváy pygwarã-rehe nhaha'arõ kwaa hagwã.

⁶ Upéa-rehe ore mbarate reheve oroiiko ko'a-py. Nhande rete jaiporu ramo ae mombyry jaiko joty Nhandejáry renda-gwi. Indive jaiko va'erã-rehe javy'a ha'arõ-vy. ⁷ Ndaha'éiry jahexa va'e-rehe orovy'a. Orogwerovia-gwi ae orovy'a ha'arõ-vy orogwahẽ hagwã íxupe. ⁸ Ore py'agwapy porã oroiiko-vy. Ndorokyhyjéi oromano hagwã-rehe. Ore-vy iporãve ore retekwe oroheja Nhandejáry róga pygwa ramo oroiiko hagwã. ⁹ Upéa-rehe orombovy'ase eterei Nhandejáry-pe hemimbota orojapo-vy. Ore rete-py oroime reheve, oroime e'ỹ ramo ave, íxupe mate orombovy'ase oroiiko-vy.

* 4:13 Sl 116.10

¹⁰Nhande kwéry enterove gwive jajeheka uka-ma va'erã Hesu Cristo-pe. Imburuvix-agwasu ramo nhaĩ-ma va'erã hovagwy-py. Nhande rete jaiporu aja ramo iporã para'e naiporã para'e nhane rembiapo oikwaa uka va'erã petei teĩ-pe. Ome'ẽ va'erã nhande-vy petei teĩ-pe nhane rembiapokwe repy.

Hesu remimbota mante ojapose Paulo rehegwa nhe'ẽ

¹¹Upe va'e oroikwaa-gwi, Cristo rovagwy-py nhane monhembo'ytaha oroikwaa-gwi, orojapo japo inhe'ẽ oroiko-vy. Oromombe'u anhetegwa nhe'ẽ enterovéa-pe, hetave tave va'e orombojerovia tee uka hagwã hese. Ore rekoha ore py'a gwive oikwapa voi Nhandejáry. Ha peẽ ave aipota peikwaa pende py'a gwive ore ore rekoha porãha. Anhetegwa mate voi ore remimombe'u. ¹²Upéa ha'e ramo ndaha'ei anhemboete-gwi rei. "Xe reko porã" nda'eĩry xe anhembotuvixa mba'e hagwã. Aipota peikwaa xe rekoha pejoko kwaa hagwã ore-rehe onhe'ẽ rei rei va'e. Ha'e kwéry onhembotuvixase rei nipo ra'e peẽ-my. Hekoha porã vérami ojeheka uka porãse rei peẽ-my. Nopenáiry voi nipo ra'e opy'apygwa-rehe ra'e. Ore ae anhei tee-rupi mante oroiko.

¹³Ndopo ha'e-gwi "Itavy rei-ma Paulo" peje arã para'e xe-rehe. Aipo ramo itavy va'e-rami jepe xe taiko, Nhandejáry-pe katu xe amomba'egwasu aiko-vy. "Hi'arandu voi Paulo" peje arã para'e xe-rehe. Aipo ramo pejerovia porãve rãve hagwã Hesu-rehe, xe ae taiko xe arandu ramo.

¹⁴Hesu xe rayhu eterei-gwi ndajaposéi xe ae xe remimbota. Hemimbota ae mante ajapose. Xe rete'a'e reheve ajapose Hesu remimbota. Aikwaa-ma petei va'e omano va'ekwe enterove rekovía. Upéixa-gwi enterove opyta-ma omano va'ekwe-rami.

¹⁵Hesu omano va'ekwe nhande-rehe ha-py. Ndaha'ei nhandéjehe anho rei jaiko hagwã omano va'ekwe. Hese mante jaiko hagwã yma omano va'ekwe ha'e nhande-rehe ha-py. Omano ete rire oikove jevy va'ekwe hese ha-py ae ãy jaiko porã hagwã ponove jajapose va'e rei jajapo.

¹⁶Upéa-gwi ko'ãnga gwive xe akã gwigwa rei nanhe'ẽ reisevéi avave-rehe. Yma va'ekwe xe akã-gwi rei anhe'ẽ va'ekwe Hesu-rehe. ãy katu xe nanhe'ẽ reiveĩ-ma arã upéixa hese. Ahexa kwaa-ma hese hekoha-rehe.

¹⁷Upéixa-gwi jajerovia-ma ramo Hesu-rehe nhane mbohekoha pyahupa-ma peteĩxa ondive gwarã voi. Nhande rekoha tujakwe jahejapa-ma. ãy katu nhandehypyrũ-ma nhande rekoha pyahu reheve jajapo meme hagwã inhe'ẽ.

*Nhandejáry nhane mbojerovia ukase Cristo-rehe
(Rm 5.10; Ef 6.20; Cl 1.20)*

¹⁸Nhande rekovía Cristo omano va'ekwe. Upéa-rupi Nhandejáry ombopyahu-ma va'ekwe nhande py'a nhande-vy. Yma va'ekwe nanhande a'ei Nhandejáry-rehe. Nhande a'e e'ỹha ramo jepe jareko va'ekwe íxupe, ha'e ae joty nhane mboheko pyahu va'ekwe jaiko hagwã he'ỹi ramo jaroja hagwã íxupe nhande rekoha. Nhande rembiaporã ome'ẽ-ma ave nhande-vy enterove-pe nhambojerovia uka hagwã hese he'ỹi kwéry ramo oiko hagwã ogwerojoja hagwã íxupe gwekoha hikwái. ¹⁹"Nhande rekovía Cristo omano va'ekwe nhande repy-vy. Omboyke voi va'ekwe nhandéhegwi nhane rembiapo vaikwe. Upéixa-gwi Nhandejáry naimandu'avéi nhane rembiapo vaikwe-rehe. Hese ojerovia va'e Nhandejáry ogwereco gwe'ỹi tee ramo. Oa'e e'ỹha ramo rei ndogwerekovéiry." A-rami voi ore mbo'e uka va'ekwe ore remimombe'urã ome'ẽ-vy ore-vy. Oipota enterove va'e oikwaa upe va'e.

²⁰Upéixa-gwi Cristo réry-py apomo'arandu peẽ-my. Nhandejáry ore mbou uka va'ekwe peẽ-my oromombe'u hagwã inhe'ẽ. Cristo réry-py, hekovía, orojerure meme peẽ-my apombojerovia tee ukase Cristo-rehe. Penhemoĩ uka katu Nhandejáry-pe he'ỹi ramo pejeheko mbojoja-vy. ²¹Ojevavy e'ỹ va'e tee jepe Cristo, nhane rembiapo vaikwe omoĩmba joty va'ekwe hese Nhandejáry. Nhande rekovía ojuka va'ekwe íxupe. Upéa-rupi nhane mopotise Nhandejáry hekoha porã-ramima jaiko hagwã, Cristo ndive peteĩxa jaiko hagwã.

6

¹ Ore katu Nhandejáry rembigwái ramo oroiko hembiaapo orojapo-vy. Upéixa-gwi ore orojerure peẽ-my ani hagwã pende resarái Nhandejáry-gwi. Ha'e pende rexakwaa rei araka'e pende rovasa-vy. Pende rovasa rire ani pejere teĩ íxugwi. Perova tee katu pende rekoha hekoha-rupi. ² Nhandejáry kwatia-rehe oĩ va'e nhe'ẽ kóixa he'i:

“Orohendu-ma va'ekwe aporohovasaseha óra-py orohendu-ma va'ekwe oroipytygwõ hagwã. Orolesendeseha óra-py oroipytygwõ-ma va'ekwe”*
he'i Nhandejáry kwatia-rehe oĩ va'e. Áy nhande rexakwaa reiha óra voi, nhane resende hagwã óra voi ko'ánga.

Gweco-rehe Paulo ojehexa uka Nhandejáry rembigwaiha

³ Enterovéa-pe orombojervia ukase oroiko-vy Hesu-rehe. Ore reko porã meme voi ore “Paulo-rehe ha-py rei ndajeroviaséi Hesu-rehe” pono he'i ore-rehe. ⁴ Ore ae katu ore reko jejavy e'ỹ-rupi orojehexa ukase ore Nhandejáry rembigwái teeha. Upéa-rehe ore rereko asy ramo jepe Hesu-rehe ija'e'ỹ va'e kwéry, noronhe'ëi joty voi ore. Oroikotevẽ eterei ramo jepe, ndorojerure ruréi joty oroiko-vy. Oronhemboasy ramo jepe, norogweronhe'ëi joty ore ore nhemboasyha orokirirĩ rei oroiko-vy. ⁵ Ore nupã nupã va'ekwe, ore moĩ moĩ va'ekwe preso. Ore-rehe ipoxypa-gwi ojogweroaty aty va'ekwe ore-rehe. Ore kane'o teĩ-ma ore rembiapo eterei-gwi. Oroke e'ỹ reheve, ore rembi'u e'ỹ reheve ave oroiko oromba'apo apo oroiko-vy. Upéixa jepe ore reko orokirirĩ rei joty ore orojehexa uka porã hagwã Nhandejáry rembigwái voiha ramo ore. ⁶ Ore reko potĩ va'e voi ore. Oroikwaa porã Hesu rehegwa nhe'ẽ oromombe'u mbe'u jevy hagwã. Ore re'ýi e'ỹ va'e-pe gwive túvy-rami orogwereco enterove va'e-pe. Oroporohayhu va'e voi ave ore. Upéixa ore reko porã-rehe orojehexa uka ore Nhandejáry rembigwaiha. Nhe'ẽ Marangatu tee va'e ore py'apyhy paite-ma. Oromombe'u jave Nhandejáry rehegwa nhe'ẽ Inhe'ẽ Marangatu tee va'e omo'arandu-ma henduháry-pe.

⁷ Anhete voi ore nhe'ẽ. Nhandejáry remimbo'u'aka voi ore. Heko porã tee-rupi oroiko-gwi oromokirirĩ uka ore-rehe ija'e'ỹ va'e-pe. Ore reko porãrã ome'ẽ me'ẽ ore-vy Nhandejáry. Hembigwái voi ko ore.

⁸ Oĩ ore mboete ore momba'egwasu va'e. Oĩ ave ore momba'e rei rei va'e. Oĩ ore moherakwã vaise mo'ã va'e. Oĩ ave ore moherakwã porã porã va'e. Oĩ ave “Íjapu eterei Paulo oirũ ndive” he'i rei va'e ave ore-rehe. Ore ae katu anhei teegwa voi ore remimombe'u. ⁹ Ndahexa pytýiry-rami po ore. Heta-ma jepe ore kwaa porãha ore. Oromano mano hagwã-rami jepe oroĩ ramo, áy peve joty oroiko. Ore rereko asy meme va'ekwe, ndore jukáiry joty. ¹⁰ Ore mbovy'are'ỹ ramo jepe, orovy'a meme joty oroiko-vy. Ore poriahu ete jepe, orombohekoha porã joty heta va'e-pe oromo'arandu-vy íxupe kwéry Hesu rehegwa nhe'ẽ-py. Ore renduha kwéry oiko porã katu Hesu rehegwa nhe'ẽ rendu-vy. Mba'eve ndorogwerekói ramo jepe, ore niko opamba'e orogwereco va'e voi Nhandejáry renonde-py.

¹¹⁻¹³ Xe py'apy gwive anhemombe'u kuri peẽ-my, peẽ Corinto tetã mygwa kwéry-pe. Mba'eve nanhomĩ nhomĩry pendéhegwi. Ndapeikói jepe xe reko-rami. Xe apohayhu voi joty. Peẽ ae naxe rayhúiry. Gwa'y kwéry-pe túvy ojerureha-rami xe ave ajerure peẽ-my xe apogwerekoha-rami xe rereko hagwã ave peẽ.

Ndikatúi Hesu roreviaha omoirũ rei herovia e'ýha-pe

(1 Co 10.20-21; 1 Jo 1.6)

¹⁴ Ani eremoirũ eterei teĩ ereiko-vy Hesu rorevia e'ýha-pe pono pene mbojehe'a jevy ójehe. Peteixa ani pembojehe'a teĩ pende rekoha hekoha kwéry-rehe. Mba'éixa po ojopohu pohu-ta hekoha porã va'e hekoha vai va'eha-rupi? Pytũ hesakã va'e jaikwaa voi, ndojehe'áiry voi ojójehe. Upéixa ave ndikatúi Hesu roreviaha omoirũ meme herovia e'ýha-pe. Ani eremoirũ eterei teĩ Hesu-rehe ojerovia e'ý va'e-pe. ¹⁵ Mba'éixa po oiko porã va'erã anhaygwasu Cristo ndive? Ndikatúi voi. Ndahe'éiry hesegwa-gwi. Upéixa ave ndikatúi

* 6:2 An 49.8

Hesu reroviaha omoirū meme herovia e'ŷha-pe. Ani eremoirū irū teŷ Hesu-rehe ojerovia e'ŷ va'e-pe.

¹⁶Mba'éixa po opyta-ta Nhandejáry róga-py tupā ra'anga rei? Naiporā vóiry oiko upepy. Nhande, Hesu Cristo-rehe jajerovia va'e kwéry, jaiko-ma Nhandejáry róga tee ramo. Ha'e Tupā tee. Hekove porā tee va'e voi Nhandejáry. Ha opyta nhande py'apy-py, nhande koty-py oiko. Ha'e he'i va'ekwe:

“Xe aiko-ta ipy'apy-py. Ijapyte-rupi agwata-ta. Aiko-ta íxupe kwéry heko járy ramo. Ha'e kwéry oiko-ta xe re'ŷi kwéry ramo.*

¹⁷Upéixa-gwi ani erepena anho ngatu rei ivai va'e-rehe. Ndikatúí erereko ne irū teerami xe-rehe ojerovia e'ŷ va'e kwéry-pe. Erenhemomombyry ae arā mba'e ky'agwi. Upéixa erejapo ramo oromogwahẽ porā va'erā xe ha-py.*

¹⁸Aiko arā nde ru ramo. Nde ave ereiko arā xe ra'y ramo, xe rajy ramo ave”* he'i va'ekwe Nhandejáry ipu'aka tee va'e.

7

¹Upe nhe'ẽ jaikwaa-gwi xe rembiayhu kwéry, tanhanhemopotĩ kena opa ivai va'e-gwi. Nhande rete-py ivai va'e-gwi, nhande py'apy-py ivai va'e-gwi tanhanhemopotĩ katu jaiko porā hagwā Nhandejáry-pe, ha'e he'i hagwā peteĩ teŷ nhande-rehe: “Onhemomarangatu xe mboete-vy. Opy'apy gwive onhemopotĩ xe-rehe ojerovia ete-gwi” he'i hagwā nhande-rehe Nhandejáry.

“Xe rembiayhu va'e voi peẽ” he'i Paulo Corinto pygwa kwéry-pe

²Ha xe ko ajerure-ta peẽ-my ore rayhu hagwā-rehe. Pende py'a gwive pehendu hagwā xe nhe'ẽ. Xe py'a gwive xe rembiayhu va'e voi peẽ. Naxe rembiapo vaíry avave-pe xe. Oĩ onhembohekoha vai va'e. Xe ae avave-pe nambohekoha vaíry. Xe ko nambotavýiry voi avave-pe. ³Upéixa ha'e ramo jepe, “Pene rembiapo vai ko” nda'etí joty va'erā peẽ-my. Ha'e jevy-ta joty peẽ-my “Peẽ ko xe py'a gwive xe rembiayhu va'e voi peẽ. Jaiko gwive onhondive nhamano peve onhondive xe py'a ete gwive apohayhu. Xe re'ŷi ramigwa voi peẽ.” ⁴Ajerovia porā pende-rehe. Apomoherakwā porā opa-rupi. Xe py'agwapy jevy-ma pende-rehe. Opamba'e ahasa asy ramo jepe pende reko arovy'a joty.

Tito omoirū jevy-ma Paulo-pe

⁵Macedônia yvy-py orogwahẽ ramo va'ekwe ndikatúí oropytu'u porā. Ndore py'agwapyí voi va'ekwe oropytu'u e'ŷ-vy. Ore jerekwe-rupi ore mbohasa asy va'ekwe-gwi ore py'a kyhyje va'ekwe voi oroiko-vy. ⁶Nhandejáry ae katu ore mbopy'agwapy jevy-ma. Ojepy'apy va'e-pe ombopy'agwapy kwaa voi Nhandejáry. Ha ore mbopy'agwapy-ma. Tito ogwahẽ ore-vy-gwi ore mbopy'agwapy jevy-ma Nhandejáry. ⁷Ndaha'éiry igwahẽha-rehe rei ore py'agwapy. Omombe'u kuri xe-vy pende rekoha: “Corinto pygwa kwéry nde rexa nga'u voi kuri. Ojepy'apy nipo ra'e nde-rehe” he'i pende-rehe. “Ha'e kwéry omboasy gwembiapokwe ra'e” he'i. “Nde ereipota va'e ojapose voi” he'i xe-vy pende reko mombe'u-vy. Upéa ahendu ramo xe mbovy'a jevy-ma.

⁸Perovy'are'ŷ voi ra'e xe nhe'ẽ araha uka va'ekwe peẽ-my kwatia-rehe. Upéa-rehe “Ma'erā po ra'e araha uka íxupe kwéry upe kwatia?” nda'etí ramo jepe, haimete aiporami ha'e va'ekwe pende vy'are'ŷha rerakwā rendu-vy. “Corinto pygwa ndovy'avéi ne rembihaikwe-rehe” omombe'u jevy-ma ramo xe-vy, ndahi'aréi upéixa peiko ramo jepe, haimete-ma anhemboasy peẽ-my ahai hagwe-rehe. ⁹Áy ae avy'a jevy. Ndaha'etí pevy'are'ŷ hagwe-rehe avy'a. “Iporā jarova nhande rekoha” peje ra'e-gwi ae xe mbovy'a jevy peẽ. Nhandejáry pene mbovy'are'ŷ uka va'ekwe pene mo'arandu hagwā. Pevy'a e'ŷ-rupi ojapo porā pende-rehe Nhandejáry. Upéa-rehe ndorojapo vaíry va'ekwe joty pende-rehe.

¹⁰Nhandejáry nhane mbovy'are'ŷ uka jarova hagwā nhande rekoha nhane rembiapo vaikwe omboyke hagwā nhandéhegwi. Teko rei reko rupi oiko va'e ae ndaha'etí upéixa.

* 6:16 Lv 26.12; Ez 37.27 * 6:17 Is 52.11 * 6:18 2 Sm 7.14; 1 Cr 17.13

Ivy'are'yí ramo jepe nonhemohi'agwĩry Nhandejáry-gwi. Onhemomombyryve ryve joty íxugwi.

¹¹ Pemondo porã katu pende resa pende rekokwe-rehe pene mandu'a porã hagwã mba'éixa pa Nhandejáry pende rovasa pene mbovy'are'yí-gwi. Pene vy'are'yíha-gwi pene mboetea'e nipo ra'e pejapo hagwã hemimbota. Pene mokyre'yí ra'e pende reko porãha pehexa uka hagwã xe-vy ra'e. Hemiapo vai va'ekwe-pe pereko asy nipo ra'e. Peẽ pekyhyje nipo ra'e. Xe rexa nga'u voi nipo ra'e. Pene rakate'yí ave nipo ra'e xe-rehe. Pya'e pereko asy nipo upe mba'e vai apohare-pe ra'e. Upéixa peiko-gwi, ojekwaa pende-rehe xe nhe'ẽ pehenduha. Ndapeikói voi ra'e upe va'e reko-rupi.

¹² Araha uka-ma ramo va'ekwe peẽ-my upe kwatia nhe'ẽ ndaha'éiry hemiapo vai va'ekwe-rehe mate ahai va'ekwe peẽ-my. Ndaha'éiry ave hese hemiapo vai va'ekwe-rehe ave. Pende rehegwa voi upe va'e kwatia. Aipota eterei voi pene momandu'a xe-rehe Nhandejáry “Nhane rembihayhu voi Paulo” peje hagwã xe-rehe. Upéa-rehe voi ahai va'ekwe peẽ-my upéa kwatia.

¹³ Upéixa ramo aikwaa-ma xe rayhu teeha voi ra'e. Upéa-rehe xe py'agwapy jevy-ma áy arovy'a jevy-ma. Tito ave xe mbovy'a-ma ave. Ha'e ovy'a eterei-gwi xe avy'a ave. “Corinto pygwa xe mogwahẽ porã kuri” he'i Tito pende rekoha omombe'u-vy xe-vy. “Omoroy'sã jevy-ma xe py'apy-py” he'i ave Tito pende-rehe. Upéixa-gwi avy'a jevy xe ave. ¹⁴ Yma va'ekwe apomoherkwã porã va'ekwe Tito-pe. “Ne mogwahẽ porã arã Corinto pygwa kwéry” ha'e va'ekwe íxupe pende-rehe. “Oromondo-gwi ohendu arã ne nhe'ẽ” ha'e ave pende-rehe. Ha nanhemotĩry xe ha'e hagwe-rehe. Anhetegwa meme mate ha'e peẽ-my. Upéixa ave apomoherkwã porã ramo va'ekwe Tito-pe anhete tee voi upe xe nhe'ẽ. ¹⁵ Ha'e pende rayhuve huve ra'e imandu'a ramo pende-rehe. “Xe mogwahẽ porã kuri. Xe nhe'ẽ ohendu porã” he'i pende-rehe. Pene kyre'yí nipo ra'e hemimombe'u pejapovy. Xe remimondo va'e-gwi para'e penhemoĩ nipo ra'e ipogwy-py xe mboete-vy nipo ra'e. Upéixa araka'e perohory íxupe imogwahẽ-vy. ¹⁶ Xe katu avy'a pende-rehe. Ajerovia pende reko-rehe xe.

8

Nhame'ẽ katu opamba'e nhane rakate'yí e'yí reheve

(At 11.29; Rm 15.25-27; 2 Co 9.7-8)

¹ Xe re'yí kwéry, Hesu reroviaha kwéry, amombe'use peẽ-my mba'éixa pa Nhandejáry oheko mbo'e Macedônia pygwa-pe, ójehe ojerovia va'e-pe. Oheko mbo'e íxupe kwéry ohexakwaa porã rei hagwã gwapixa kwéry-pe. ² Ha'e kwéry ohasa asy eterei ramo jepe ovy'a joty. Iporiahu ramo jepe ha'e kwéry ome'ẽ heta voi iporiahuve va'e-pe. Ndahetái jepe ogwerekó nahakate'yíry gwemime'ẽrã-rehe. ³⁻⁵ “Ore ave orome'ẽse Judéia pygwa kwéry Hesu reroviaha va'e kwéry-pe. Orome'ẽ-ta nde-vy ore pirapire ereraha hagwã íxupe kwéry ipirapirerã” he'i va'ekwe ore-vy. Oikotevẽ jepe ohexakwaa rei joty gwapixape. “Hetave tave orogweraha ukase nde-vy íxupe kwéry, iporiahu va'e kwéry pegwarã” he'i ore-vy. “Ndaha'éiry eremanda-gwi ore-vy orome'ẽ. Ore ae voi orome'ẽse-gwi orome'ẽ” he'i va'ekwe ome'ẽ-vy. Ore ae oro'e: “Iporiahu-gwi ra'e ndahetái opirapire ogweraha uka va'erã” oro'e rei va'ekwe hese kwéry. Heta voi ore-vy ogweraha uka opirapire. Onheme'ẽ ete ranhe ra'e Nhandejáry-pe. Upéi ojapose eterei voi ra'e inhe'ẽ. Xe nhe'ẽ ave ojapose voi ave ra'e.

⁶ Upéixa ha'e kwéry ojapo ramo xe mandu'a jevy pende-rehe peẽ Corinto tetã mygwa kwéry-rehe. Upe jave anhomongeta Tito ndive. “Ereime ramo araka'e Corinto tetã-my eremombe'u íxupe para'e pirapire omboaty hagwã iporiahu va'e-pe ome'ẽ hagwã. Upéixagwi iporã ereho jevy Corinto tetã-my” ha'e kuri Tito-pe. “Ereime jave araka'e onhypyrũ-ma ra'e omboaty hagwã gwemime'ẽ me'ẽrã. Aipo ramo tereho jevy teremokyre'yí jevy íxupe kwéry heta heta omono'õ hagwã gwemime'ẽrã. Upéixa ramo ha'e kwéry ohexa uka va'erã Hesu re'yí ojohayhuha gwembiapo porã ojapo-vy” ha'e ave íxupe oho hagwã pende ha-py.

⁷ Peẽ pende rekoha porãve rãve ra'e ambue kwéry reko-gwi. Pejerovia teeve ra'e Nhandejáry Hesu-rehe. Hesegwa nhe'ẽ pemombe'u porãve ra'e, peikwaa porãve ave ra'e. Ambue kwéry-gwi pene kyre'ỹve ra'e ambue kwéry-pe peipytygwõ-vy. Ore rayhuve ave voi ra'e. Aipo ramo ha'e-ta peẽ-my "Enterove va'e reko pehasave-gwi tapeme'ëve katu pende pirapire iporiahu va'e kwéry pegwarã. Oporohayhu va'e rembiapo voi upe va'e".

⁸ Namandáiry peẽ-my peme'ẽ hagwã pende pirapire íxupe kwéry. Amombe'u ramo peẽ-my Macedônia pygwa kyre'ỹha aipota ojekwaa ave pende-rehe pejoyhayhuha. Heta voi pende pirapire peme'ẽ ramo "Corinto pygwa ore rayhu voi ra'e" he'i va'erã pende-rehe.

⁹ Pene mandu'a katu Nhandejáry Hesu Cristo nhande rayhuha-rehe. Yma va'ekwe opamba'e ogwerekó yváy-py. Ha upéi ogwey ou-vy ko yvy-rehe jave katu iporiahu-ma opyta-vy. Upéixa onhemboheko poriahu va'ekwe pende-rehe ha-py pende rovása porã porã hagwã.*

¹⁰ Amombe'u-tama peẽ-my pene remime'ërã-rehe. "Nhamboaty-ta iporiahu va'e pegwarã" peje araka'e. Ojapo-ma peteĩ ro'y aipo peje hagwe. Yma tenonderã penhyprũ-ma peme'ẽ. Pevy'a reheve pehayhu eterei-gwi peme'ẽse íxupe kwéry araka'e. "Nhame'ẽ-ta jaiporiahuverekó-gwi íxupe kwéry" peje araka'e penhyprũ-vy araka'e hese kwéry.

¹¹ Ko'ãnga katu iporã pejapopa upe pene rembiapo porã. Ani peha'arõve peme'ẽ me'ẽ va'erã-rehe. Peteĩ teĩ pereko va'e-gwi pemono'õ peme'ẽ va'erã íxupe kwéry. Pevy'a reheve pene kyre'ỹ reheve pende aja-rupi peme'ẽ iporiahu va'e kwéry-pe. ¹² Anhete voi ome'ẽse va'e ogwerekó háixa ome'ẽ ramo ombovy'a arã Nhandejáry-pe. Ndahetái ramo jepe Nhandejáry-pe ombovy'a joty ome'ẽ-vy. Ha'e ndojeruréry jareko e'ỹ va'e-rehe.

¹³⁻¹⁴ Nda'éiry peẽ-my peme'ẽ me'ẽ hagwã íxupe kwéry peikotevẽ jevy hagwã. Áy heta pene mba'e. Iporiahu joty ha'e kwéry. Aipo ramo iporã pemboja'o ime'ẽ-vy íxupe kwéry. Ogwahẽ ramo ndaperekoiha óra pende rexakwaa jevy va'erã ave ha'e kwéry peẽ-my. Upéixa ramo ha'e-rami ave meme penhopytygwõ arã onhondive avave ndoikói hagwã iporiahu va'e-rami. Ndoikói ave arã imba'e retave va'e-rami ojõhugwi. Pejogwerekó rei arã peteixa penhopytygwõ-vy. ¹⁵ Nhandejáry nhe'ẽ kwatia-rehe oĩ va'e he'i:

"Hetave omono'õ va'e nahembýi joty íxupe.

Mixi jepe omono'õ va'e omohygyatã joty íxupe"*
he'i Nhandejáry kwatia nhe'ẽ peteixa ogwerekó íxupe kwéry-gwi.

Tito, oirũ kwéry ndive oho oipytygwõ hagwã Corinto tetã mygwa Hesu reroviaha kwéry-pe

¹⁶⁻¹⁷ Ore-rami ave pene pytygwõse ave Tito. Ikyre'ỹ xe nhe'ẽ rendu-vy oho hagwã. Pende rereko opy'apy-py. Nhandejáry voi omoĩ ipy'a-py ohose hagwã pene pytygwõ-vy. Upéa-rehe atima porã Nhandejáry-pe hese. ¹⁸ Indive oromondo ave peteĩ nhande re'ýi va'e. Opa rupigwa Hesu réry-py onhomboaty va'e kwéry remimboete upe xe remimondo. Omombe'u porã kwaa Hesu rehegwa nhe'ẽ. Upéixa-gwi omboete íxupe henduha kwéry. ¹⁹ Ha'e Hesu reroviaha va'e, ha Hesu reroviaha kwéry oiporavo va'ekwe íxupe ore irũrã ore ndive ogweraha hagwã pirapire Judéia tetã-my gwarã. Jahexakwaa rei ramo upe pygwa kwéry oikwaa arã jahayhuha íxupe kwéry. "Hesu-rehe ojerovia va'e onhopytygwõ voi ra'e okwa-vy" he'i arã nhande-rehe hikwái nhande rexaháry. "Nhandejáry nipo omboheko pyahu ra'e íxupe kwéry" he'i ave arã omomba'egwasu-vy Nhandejáry-pe nhande rexaháry kwéry.

²⁰ Heta voi pirapire orogweraha va'erã. Pono onhe'ẽ rei xe-rehe, heta oho va'e ndive orogweraha va'erã pirapire. Upéixa ramo "Oiporu rei nipo ra'e ojúepe gwarã oipe'a" ndikatúí he'i va'erã ore-rehe.

²¹ Nhandejáry oikwaa ore rekoha porã tee voi. Entéro va'e renonde-py ave ore rekoha porã ore rembiapo ave oroipota ojekwaa porã ore-rehe.* ²² Upéixa-gwi peteĩ jevy oho-ta Tito ndive inhirurã ave imbohapyha ramo oromondo-ta. Aheko rexa meme va'ekwe íxupe.

* 8:9 Fp 2.4-8 * 8:15 Êx 16.18 * 8:21 Pv 3.4

Hesu reroviaha va'e ha'e. Ikyre'ȳ voi ha'e onhopytygwō hagwā. Ha ko'ánga ojerovia-ma ave pende-rehe pene pytygwōse ave peme'ē porā hagwā pende pirapire iporiahu va'e kwéry-pe. Upéixa-gwi oromondo-ta imbohapyha ramo pende ha-py.

²³Tito xe irū voi. Xe ndive omba'apo va'e voi pene pytygwō-vy. Oho-ta xe rekovía. Oho ave arā gwī Cristo-pe omomba'egwasu gwasu va'e. Hesu réry-py onhomboaty aty va'e rembigwái ramo ha'e kwéry hekovia oho va'erā upe inhirirā kwéry. ²⁴Upéixa-gwi pemogwahē porā katu íxupe kwéry igwahē ihovy-ramo. Hesu réry-py onhomboaty aty va'e-kwéry opa rupigwa oikwaa hagwā pende reko porāha. “Omogwahē ohayhu porā reheve Hesu reroviaha va'e Corinto pygwa” he'i va'erā pende-rehe. Upéa-rupi ojekwaa porā va'erā pende rekoha. “Ndaha'e ae réry omoherkwā porā-ma va'ekwe Corinto pygwa rekoha-rehe” he'i va'erā xe-rehe.

9

Paulo omombe'u mba'eixagwa omboaty gwemime'ērā Hesu reroviaha kwéry pegwarā

¹Judéia yvy pygwa Hesu reroviaha va'e kwéry iporiahu va'e kwéry pegwarā-rehe natekotev̄év̄éi ahaive peē-my kwatia-rehe nhane remime'ērā-rehe. ²Aikwaa-ma voi xe peipytygwōse voi íxupe kwéry. “Ojapo-ma peteī ro'y Grécia yvy pygwa onhypyrū va'ekwe omboaty-vy gwemime'ērā. Oipytygwō-ta nhande re'yí Judéia yvy pygwa kwéry-pe. Upéixa-gwi omono'ō gwemime'ērā íxupe kwéry” ha'e va'ekwe pende reko-rehe amombe'u-vy va'ekwe Macedônia yvy pygwa kwéry-pe. Upéa-rehe heta upe pygwa onhemokyre'ȳ ave pejapoha-rami ha'e kwéry ave ojapo hagwā.

³“Omboaty aty voi opirapire Corinto pygwa kwéry ogweraha uka hagwā ore-vy Judéia yvy pygwa kwéry pegwarā” ha'e meme pende-rehe. Aipo ramo pemboaty e'ȳ ramo, xe mboapu rei arā. Pono upéixa xe mboapu, amondo-tama xe renonde-rupi nhane irū pene mongyre'ȳharā.

⁴Xe ndive ogwahē ramo Macedônia pygwa pende ha-py nhatī va'erā napemboatyí joty ramo iporiahu va'e pegwarā. Apomoherkwā porā rire katu anhemotī arā xe. Peē ave penhemotive arā pejapo e'ȳ va'ekwe-gwi orojerovia rei-gwi pende-rehe.

⁵Upéixa-gwi amondo xe renonderā-rupi nhane irū kwéry pene pytygwō hagwā pemboaty-vy pene remime'ērā. Peje hagwe-rami pejapo hagwā amotenonde-ta íxupe agwahē e'ȳ ngatu pemboaty hagwā pende pirapire iporiahu va'e kwéry pegwarā. Upéixa ramo pende rexaháry “Ome'ése voi ra'e” he'i arā pende-rehe. “Ndaha'etí Paulo ojerure-gwi ome'ē. Ome'ése eterei-gwi ome'ē ra'e” he'i arā pende-rehe kwéry.

⁶Pene mandu'a katu kokwe járy-rehe. Ojaty mixī va'e mixī ave omono'ō. Ojaty heta va'e, heta voi ave omono'ō. Upéixa ave nhane rembiapo porā. ⁷Kokwe járy-rehe pene mandu'a jave, peme'ése éve va'e peteī teī tapeme'ē íxupe kwéry. Ani ereme'ē nde py'a vy'a e'ȳ reheve. Nereme'éséi ramo ani ereme'ē. Nde py'a ovy'a ete reheve ae ereme'ē va'erā ereme'ése va'e. Nhandejáry ohayhu voi ipy'a kyre'ȳ reheve omba'e me'ē me'ē va'e-pe.

⁸Ha'e meme-ma ome'ē opa iporā va'e nde-vy. Ne remikotev̄ē-gwi hetave tave ome'ē me'ē va'erā nde-vy. Ne remimbota-gwi ave hetave tave ome'ē meme va'erā nde-vy. Ne ryvyatā eterei va'eha-rami heta voi erereko va'erā ne rembiapo porārā erejapo hagwā.

⁹Nhandejáry nhe'ē kwatia-rehe oī va'e he'i:

“Ipy'a porā voi omba'e me'ē meme hagwā iporiahu va'e-pe” he'i. “Hembiapo porā opa e'ȳ va'erā”*

he'i Nhandejáry nhe'ē.

¹⁰Temitȳ ra'yí ambue mbue va'e ome'ē va'ekwe nhande-vy Nhandejáry, omohenhóí hetave tave ave hagwā nhande-vy nhane remi'urā. Upéixa hetave tave omba'e me'ē meme va'erā peē-my Nhandejáry. Upéixa ave heta pende rexakwaa reiha-rami ave, oipota peē peme'ëve éve peiko-vy iporiahu va'e kwéry-pe. Upéixa ave peē, peme'ē me'ē ramo pehexakwaa rei-vy iporiahu va'e kwéry-pe, hetave tave Nhandejáry ome'ē va'erā peē-my pene remime'ēgw̄e rekovía.*

* 9:9 Sl 112.9 * 9:10 Is 55.10

¹¹ Pende-rehe onhangareko porã voi Nhandejáry. Ha'e pende rexakwaa rei-gwi heta voi pereko va'erã pene remime'erã jevy. "Atima porã nde-vy" he'i arã iporiahu va'ekwe pene remime'ëgwe-rehe ovy'a-gwi. "Heta voi ore remikotevê repyrã ogweruruka Paulo-pe" he'i arã ave. "Corinto pygwa kwéry ogweruruka ore-vy" he'i va'erã Nhandejáry-pe omboete-vy.

¹²⁻¹³ Iporiahu va'e Hesu reroviaha va'e-pe peme'ë ramo hemikotevê ha'e kwéry otima porã va'erã omboete-vy Nhandejáry-pe. Peipytygwõ jave íxupe kwéry pemboete uka ave va'erã íxupe kwéry Nhandejáry. "Atima porã xe Járy" he'i va'erã Nhandejáry-pe hikwái. "Erembopy'a porã nipo ra'e Corinto pygwa kwéry-pe" he'i va'erã. "Upéixa-gwi ome'ë kuri ore-vy ore pirapirerã" he'i va'erã pende reko porã-rehe. "Ambue kwéry-pe ave ra'e ohexakwaa rei ave nipo ra'e Hesu-rehe ojerovia-gwi ra'e. Erembopy'a porã íxupe kwéry nipo ra'e" he'i va'erã Nhandejáry-pe omboete-vy. ¹⁴ Upéa-rehe ombojeupi meme ave arã onhe'ë Nhandejáry-pe hikwái. Pende rayhu-gwi ojerure rure arã íxupe pende rovasa hagwã. "Ehovasa katu íxupe kwéry ne rembihayhu ave" he'i va'erã pende-rehe. "Erehexakwaa rei araka'e íxupe kwéry. Upéa-rehe ra'e ha'e kwéry ave ore rexakwaa rei ave" omombe'u va'erã gwexakwaa hagwe Nhandejáry nhande rayhuha-pe.

¹⁵ Nhamboete tee anhetegwa-rupi voi Nhandejáry. Nhatima porã voi íxupe. Avave ohayhu e'yha-rami nhande rayhu eterei Nhandejáry. Nhande rayhu tee-gwi nhande rexakwaa rei va'ekwe ome'ë-vy va'ekwe gwa'yry nhane resendehtarã.

10

"Xe katu Nhandejáry remimondo va'e voi" he'i Paulo

¹ Ha xe katu, xe Paulo Hesu remimondo va'e xe. Cristo nhande rayhu-gwi nhande ru-rami nhande rereko opy'a porã reheve. Xe ave, Cristo-rami ave apogwerekose xe ra'y-rami, xe raji-rami ave. Aime ramo va'ekwe pene ndive apogwerekoko kirirĩ meme. Mombyry aime ramo, upéixa joty apogwerekose mo'ã. Xe py'agwasu reheve ae aiporu ko kwatia nhe'ë ipohýi va'e peẽ-my gwarã.

² Nanhemonhe'ësí jepe peẽ-my, tekotevê ramo ae anhembopy'agwasu tee va'erã anhemonhe'ë pohýi hagwã ahovaiti-vy xe-rehe onhe'ë rei rei va'e kwéry-pe. "Teko reirupi oiko va'e-rami Paulo kwéry. Oakã-gwi rei ojapo va'e Paulo" he'i rei rei ra'e ore-rehe ore moherakwã vai rei-vy peẽ-my.

³⁻⁵ Ko vvy-rupi oroiko jepe, ndoroikóiry voi vvy rupigwa reko-rupi. Mba'e vai-gwi orojejoko hagwã teko rei rembiporu ndoroiporúiry. Soldado kwéry rembiporu ave ndoroiporúiry. Nhandejáry pu'akaha reheve ae ore oroiko. Ha'e ome'ë ore-vy ore arandurã opu'akaha ave orojejoko joko kwaa hagwã, orejéhegwi opa ivai vai va'e-gwi orojejoko hagwã. Gwĩ Nhandejáry-rehe ijapu va'e-pe gwive, gwĩ onhembotuvixaseve va'e-pe, gwĩ Nhandejáry nhe'ë nohenduséi va'e-pe gwive oromokirirĩ katu íxupe inhe'ë mbojevvy Nhandejáry-pe oroikwaa-gwi. Opa ore py'a ndive oronhemongeta va'e oromoí ave Cristo pogwy-py. Ipogwy-py opyta ramo, iporãmba va'erã voi.

⁶ Upéixa oroiko-gwi oroiporu Nhandejáry pu'aka apombohekoha porã hagwã penhemoi tee hagwã Hesu Cristo pogwy-py. Ipogwy-py penhemoi tee rire, inhe'ë napehenduséi ramo vyteri, apogwerekoko asy joty arã.*

⁷ Hova pygwa rei jahexa ipy'apygwa jaikwaa e'y reheve. Ani pejerovia tee teĩ ojehexa va'e anho-rehe. Ndajaikwaái voi ojopy'apóry. Oĩ ae ra'e pene pa'ũ-my: "Cristo réry-py ae xe aikove Paulo-gwi" he'i mo'ã va'e ójehe. "Paulo kwéry-gwi amombe'u porãve Hesu nhe'ë-py" he'i mo'ã va'e ójehe peẽ-my. Xe katu, xe Paulo, ha'e-ta upe va'e-pe: Terejepy'amongeta jevy katu. Nde-rami ore ave oroiko Cristo réry-py, ha'e-ta íxupe.

⁸ Ojehexa va'e peikwaase ra'e. Aipo ramo nanhembotuvixaséi jepe xejehegwa amombe'u-ve-ta joty peẽ-my. Ha'e va'ekwe peẽ-my: "Nhandejáry ore poravo va'ekwe

* 10:6 2 Co 6.7; Ef 6.10-13

oromombe'u hagwā peē-my Hesu Cristo rehegwa nhe'ē". Āy katu aipo ha'e jevy-ta peē-my xe reko amombe'u-vy. Xe katu Nhandejáry remimondo va'e voi. Héry-py aiko peē-my inhe'ē mombe'u-vy. Ndaha'éi pende reity uka rei hagwā xe poravo va'ekwe. Pene pytygwō hagwā peikwaa porāve hagwā inhe'ē xe poravo va'ekwe xe mondo-vy.

⁹Ndaipotái peje xe-rehe, "Paulo ombou nhande-vy kwatia nhe'ē nhane mongyhyje hagwā". Niporái upéixa peje xe-rehe.

¹⁰Xe-rehe ija'e'y va'e he'i rei araka'e xe rekoha-rehe. "Ani pepena Paulo nhe'ē-rehe" he'i rei araka'e. "Onhemonhe'ē hatā hatā nhande-vy okwatia ohai-vy. Nhane ndive oime ramo ae ipy'amirī va'erā. Nonhe'ē kwaái arā" he'i rei xe rekoha oikwaa e'y va'e.

¹¹Upe he'i va'ekwe toikwaa katu: Mombyry aime ramo pendéhegwi araha uka arā xe kwatia nhe'ē. Upe xe kwatia nhe'ē-rami joty agwahē ramo pende ha-py apogwero arā.

¹²Gwekoha porā ete mo'ā-rehe onhembotuvixa uka rei va'e kwéry ojéhegwi rei onhemombe'u porāse mo'ā va'e. Ndaxe py'agwasu mo'airy ijyke-rehe anhemoi hagwā anhemboete-vy. Ha'e kwéry onhembotavy voi. Onhemboheko porā ra'anga anga rei okwa-vy. Gwapixa reko-rupi rei oiko "Heko-rami ave xe reko porā" he'i mo'ā. Hekoha porā tee va'e reko-rehe ha'e kwéry nopenáiry hikwái. Ha'e kwéry ae ho'arandu-rupi hikwái. Nhandejáry rekoha-rupi e'y okwa hikwái. Onhembotavy rei okwa-vy.

Hesu rehegwa nhe'ē nohendúiry vyteri va'e-pe oho-ta omombe'u Paulo

¹³"Nhandejáry ore mbou oromombe'u hagwā inhe'ē" oro'e ramo ndaha'éi onhembotuvixase rei-vy. Anhetegwa voi ore nhe'ē. Ha'e ore mondo e'y ha-py ndorohói ave. Nhandejáry réry-py voi orogwahē va'ekwe pende ha-py. Héry-py voi oromombe'u mbe'u va'ekwe peē-my inhe'ē.

¹⁴Ore mondo e'y ha-py ndorohói voi ore. Ha'e ore mondo va'ekwe peiko ha-py. Upéixa-gwi hemimbota-rupi Hesu Cristo rehegwa nhe'ē mombe'u-vy orogwahē va'ekwe upe-py. Ore ranhe voi va'ekwe oromombe'u hesegwa peē-my. ¹⁵Oĩ ave ambue kwéry hesegwa nhe'ē omombe'u mbe'u va'e. Hemiapokwe-rehe ore noronhembotuvixa mo'ái. "Xe remimombe'ukwe ohendu-gwi ojerovia-ma Hesu-rehe" ndoro'e mo'ái hemiendukwe kwéry-rehe. Ore ae Hesu rehegwa nhe'ē ne'írā vyteri ohendu va'e ha-py meme oroho. Upéa orojapo-gwi peē ave pehendú oréhegwi hesegwa nhe'ē. Ha upéa-rehe oroha'arō pejerovia porāve ráve hagwā-rehe. Upéa-rehe oroho jevy va'erā pende ha-py hetave tave hagwā Nhandejáry nhe'ē oromombe'u hagwā peē-my. Nhandejáry ore mondo ha-py ae mate ore oroho va'erā.

¹⁶Peē-my oromombe'u heta rire oroho jevy-ta mombyryve. Mombyryve ryve tetā ambue mbue-py ore orohose jevy. Hesu rehegwa nhe'ē porā nohendú vyteri va'e ha-py oroho jevy-ta oromombe'u hagwā hesegwa nhe'ē. Upéixa ramo ndikatúí avave he'i ore-rehe "Hesu rehegwa nhe'ē oikwaa va'e-pe omombe'u jevy Paulo heta gwenduhare-rehe rei onhemomba'egwasu hagwā" ndikatúí he'i ore-rehe hikwái.

¹⁷Nhandejáry nhe'ē kwatia-rehe oĩ va'e he'i:

"Oime ramo onhemomba'egwasuse va'e, tonhemomba'egwasu Nhandejáry Hesu Cristo-rehe"*

he'i Nhandejáry nhe'ē kwatia-rehe oĩ va'e.

¹⁸Nhanhemboete ramo, nhane rembiapo-rehe nhanhemomba'egwasu ramo, nhane akā-gwi rei ae nhanhemboete rei jaiko-vy. Ha "Hekoha porā-ma voi" he'i ramo katu nhande-rehe Nhandejáry, nhande rekoha porā-ma voi.

11

Paulo ndaha'éi gwī Nhandejáry nhe'ē omombe'u ra'anga va'e kwéry-rami

¹Itavy va'e-rami voi para'e aiko peē-my anhemonhe'ē eterei-gwi. Ndapotoryvaséi jepe aipota peikwaa porāve xe reko-rehe. ²Ajepy'apy voi pende-rehe kwéry. Nhandejáry hakate'y nhande-rehe ha-rami ave xe rakate'y voi pende-rehe kwéry. Pende ru-rami ave

* 10:17 Jr 9.24

ajepy'apy pende-rehe. Túvy gwajýry kunhataĩ ime e'ý va'e-rehe hakate'ý-vy, oipe'a íxupe gwarã imerã. Upéixa ramo ha'e ae omerã gwembialhyhu-pe anho ohayhu hagwã. Upéixa ave xe apogwereco xe rajy-rami. Pene rembiayhurã aipe'a-ma peẽ-my héry va'e Cristo. Aipota eterei peha'arõ íxupe pende ky'a e'ý reheve. Upéa-gwi xe rakate'ý pende-rehe.

³Pejerovia porã va'ekwe Cristo-rehe. Pende py'apyhy-ma Cristo. Pende py'apy gwive pegwata-ma va'ekwe indive. Áy ae ajepy'apy pende-rehe Cristo-gwi pene mbojere jeyvise va'e-rehe. Oĩ-ma pene mbotavayse va'e, pene monhomongeta rei va'e pende py'apy-py ogwero va'uka-vy pende resa Nhandejáry-gwi. Upéixa-gwi ajepy'apy-ma pende-rehe. Ouse va'erã pende resa rerova ukase jevy va'e pene mbotavayse va'erã. Ani penhembotavy uka íxupe. Ani Eva amyri-rami penhembotavy uka teĩ íxupe. Eva oikwaa teĩ jepe va'ekwe. Onhembotavy uka joty va'ekwe onhemombói ou-vy va'e-pe. Gweko-rupima oity va'ekwe Eva-pe anhaywasu. Ani penhembotavy uka avave-pe. Ani pejehesa rerova Hesu-gwi hese.* ⁴Amombe'u porã-ma va'ekwe peẽ-my Hesu rehegwa nhe'ẽ tee. Ha'e anho voi nhane resende teeharã. Nhe'ẽ Marangatu tee va'e-rehe amombe'u porã-ma ave va'ekwe peẽ-my. Upe anhete nhe'ẽ pehendú va'ekwe jepe, perohory joty gwĩ arandu rehegwa nhe'ẽ ra'anga omombe'u va'e kwéry-pe. Ogwahẽ ramo pende ha-py, pehenduse voi hemimombe'u. Ha'e kwéry katu pene mbotavy jevy va'erã voi. Hesu aikwaa e'ý va'e rehegwa nhe'ẽ omombe'u ramo peẽ-my pejeapysaka teese voi hese. Nhe'ẽ Marangatu tee e'ý va'e aikwaa e'ý va'e rehegwa nhe'ẽ omombe'u ramo peẽ-my pejeapysaka teese ave hese. Pende rerovase jevy Cristo tee-gwi. Ha peẽ katu pembovy'ase íxupe kwéry. Niporã voi upe pende rekoha.* ⁵“Ore katu Hesu remimbo'e hemimondo tee va'e” he'i mo'ã ójehe peẽ-my. “Ore ramigwa ndaipóri oikwaa va'e” he'i mo'ã ave peẽ-my onhembotuvixase-vy. Xe ae katu nda'éiry upeixagwa. Nanhembotuvixaséi ramo jepe ndaha'éí hekoha porãve va'e xéhegwi ha'e kwéry. Ha peẽ katu Hesu rembigwái e'ý-rehe pejeroviasave.

⁶“Inhe'ẽ ngatu porãve va'e-rami nomombe'úi nhande-vy Paulo” peje para'e xe-rehe. Naxe nhe'ẽ ngatu kwaái ramo jepe ndajapýi voi xe remimombe'urã. Aikwaa porãve ráve xe nhe'erã. Anhetegwa mate voi xe remimombe'u. Hesu Cristo rehegwa aikwaa porã tee voi xe. Upéa ahexa uka meme va'ekwe peẽ-my. Hesu rehegwa nhe'ẽ amosarambi va'ekwe amombe'u-vy peẽ-my.

⁷Ndaxe reko johu porãí voi nipo araka'e. Hepy e'ý reheve voi amombe'u va'ekwe peẽ-my Nhandejáry nhe'ẽ. “Hembigwaa tee ramo ra'e hepy-rehe mante ra'e oporomo'arandu arã ra'e” peje rei nipo ra'e xe-rehe ndaxe reko johu porãí-vy. Apohexakwaa rei-gwĩ ae aiko va'ekwe pene pa'ũ-rupi amombe'u mbe'u peẽ-my Hesu Cristo rehegwa nhe'ẽ. Upéa-rehe anhemomirive va'ekwe peẽ-my pejeroviave hagwã Hesu Cristo-rehe peiko porã hagwã indive. Upe xe rembiapo porãkwe-rehe “Hembiapo vai” peje rei joty xe-rehe ra'e. Ndapejohu porãiry nipo ra'e xe reko.

⁸Amombe'u jave va'ekwe peẽ-my Hesu rehegwa nhe'ẽ, tetã ambue-gwi Hesu reroviaha ombou va'ekwe xe-vy xe mba'e repyrã. Mombyry jepe aiko ramo íxugwi kwéry íxupe amba'apo va'e-rami xe rereko ha'e kwéry. Upéixa oroiko va'ekwe pehendú porã hagwã Hesu rehegwa nhe'ẽ. ⁹Pene pa'ũ-rupi aime ramo va'ekwe xe mba'e repyrã ndarekói jepe pendéhegwígwa-rehe ndajeruréi joty va'ekwe peẽ-my. Upéixa aikotevẽ jepe aĩ-vy va'ekwe jave ou-ma Macedônia yvy-gwi Hesu reroviaha va'ekwe. Ome'ẽmba xe-vy xe remikotevẽ repyrã. Peẽ-my ndajeruréiry voi va'ekwe xe remikotevẽ. Mba'eve-rehe voi katu ndajerure mo'ái ave peẽ-my pono peẽ-my ipohýi xe remikotevẽ repyrã-rehe. ¹⁰Acaia yvy jerekwe-rupi aiko ramo hepyrã nda'éiry joty aiko-vy Hesu rehegwa nhe'ẽ mombe'u-vy. Anhete voi upe xe nhe'ẽ. Hesu-rehe ajerovia-gwĩ naxe nhe'ẽ apuí va'e voi xe. ¹¹“Ma'erã-gwĩ gwemimombe'u repyrã-rehe noporandúiry” peje araka'e peporanduvy araka'e xe-rehe. “Nanhande rayhúi-gwĩ para'e nopenái nhande-rehe oporandu hagwã nhande-vy opirapirerã-rehe” peje nipo araka'e xe-rehe. Ma'erã-gwĩ upéixa peje araka'e xe-rehe? Xe katu apohayhu voi. Tupã Nhandejáry oikwaa voi xe apohayhuha.

* 11:3 Gn 3.4-13 * 11:4 Mt 7.15; Rm 16.17; Gl 1.8; Ef 5.6-7; Cl 2.8; 2 Pe 2.1-2; 1 Jo 4.1

¹² Oĩ gwĩ “Paulo reko-rami ave xe reko porã” he'i ra'anga rei va'e ójehe. Xe katu hepyrã e'ỹ-rehe amombe'u Hesu rehegwa nhe'ẽ. Ha'e kwéry ae katu hepyrã-rehe mante omombe'u ra'anga anga rei oiko-vy. Upéixa-gwi “Paulo reko-rami ave xe reko” he'i mo'ã ójehe. Ha'e gwekoha ombojojase mo'ã oiko-vy xe rekoha-rehe ha xe katu xe remimombe'ukwe repy-rehe ndajerurúi peẽ-my. ¹³ Nhandejáry remimondo tee-rami ojehexa ukase mo'ã hikwái. Onhemboheko porã ra'anga mo'ã oiko-vy. “Cristo réry-py oromombe'u inhe'ẽ” he'i rei rei ójehe ijapu-vy. Oporombotavy va'e voi ha'e kwéry oiko-vy.

¹⁴ Upéixa voi anhaygwasu Satanás ave oiko. Oporoheko a'ã kwaa ou-vy. Nhandejáry rembigwái yváy pygwa tee ramo mo'ã ojehexa uka ou-vy. Onhembohesakã a'ã anhaygwasu. “Nhandejáry rembigwái tee voi nipo xe mo'arandu ra'e” nhane mbo'e ukase voi ójehe. ¹⁵ Ha'e-rami ave inharandu-rupi oiko va'e oporoheko a'ã kwaa voi. Heko porã va'e-rami ojehexa uka nhande-vy. Nhane mbotavyses-gwi omombe'u ra'anga anga rei Nhandejáry nhe'ẽ nhande-vy. Opa-ma ramo ko yvy hembiaapo apokwe-rehe ombohasa asy va'erã íxupe kwéry Nhandejáry.

¹⁶ Xe Paulo ha'e jevy-ta peẽ-my. Ani xe rereko teĩ itavy rei va'e-rami. Oĩ ramo jepe “Itavy rei ko Paulo” he'i va'e xe-rehe, tojeapysaka katu xe nhe'ẽ-rehe. Gwĩ Nhandejáry nhe'ẽ omombe'u ra'anga va'e kwéry onhembotuvixa hagwe-rami, xe ave anhembotuvixata peẽ-my. Itavy va'e-rami jevy anhemombe'u-ta peẽ-my. ¹⁷ Nhandejáry nde'íry jepe xe-vy aipo ha'e haggwã peẽ-my anhemombe'u-ta itavy va'e-rami. Upéixa anhemombe'u jepe xe reko porã-rehe mate joty aikwaa uka va'erã kuri peẽ-my. ¹⁸ Oĩ heta va'e ojehegwi rei onhembotuvixa ukase peẽ-my. Xe ave anhemboetese va'e-rami aiko-ta kuri ave peẽ-my.

¹⁹ “Nhane arandu porã ra'e” peje rei pendéjehe. Pene arandu porã ramo ma'erã po pemogwahẽ porã upe oakã-gwi rei inharandu va'e pene mbotavyha kwéry? ²⁰ Penderehe omanda rei va'e-rehe pejerovia tee ra'e. Gwembigwái ramo pende rereko rei ramo jepe pemboete joty ra'e íxupe. Pene rembiporu oipe'a rei pendéhegwi ramo jepe, pene mboporiahu ramo jepe pemboete joty ra'e íxupe. Pene mbotavy ramo jepe, pene momiri ramo jepe onhembotuvixa ete-vy peẽ-my, pende rova pete ramo jepe pemboete joty ra'e íxupe. “Xe arandu voi” peje rei joty pendéjehe.

²¹ “Ndaipy'agwasú Paulo” peje ra'e xe-rehe. Peje porã voi. Néi. Ndaxe py'agwasú apogwereco asy haggwã. Gwĩ onhembotuvixa rei va'e ipy'agwasu he'i haggwã “Kóxa aikogwi xe reko porã”. Upe va'e reko porã-gwi xe ae xe reko porãve katu. Xe ave, xe Paulo, itavy va'e reko vérami aiporu-ta peẽ-my. Anhembopy'agwasu xe reko porãha amombe'u haggwã peẽ-my.

²² “Xe rugvy re'íyí voi hebreu kwéry. Hebreu tee va'e voi ko xe” he'i ójehe upe Hesu remimondo ra'anga va'e kwéry pene mboa'e'ỹ uka haggwã rei xe-rehe. Xe katu hebreu tee ave xe. “Myamyri Israel remiarirõ Nhandejáry rembiporavokwe voi ko xe” upéixa ave ha'e kwéry he'i ave ójehe. Upéixa ave xe. “Abraão amyri xe ramoigwasu tee voi” he'i ave ójehe onhemomba'egwasu rei-vy. Xe ave, xe ramoigwasu tee Abraão amyri ave xe.

²³ “Ore Hesu rembigwái” he'i onhemombe'u mo'ã penhemboa'e'ỹ uka haggwã xe-rehe. Xe hembigwái porãve voi íxugwi kwéry. Amba'apo porãve íxugwi kwéry xe. Itavy va'e vérami tanhemombe'u jevy peẽ-my xejehegwigwa. Hesu-rehe ija'e'ỹ va'e ogwereco asy meme Hesu nhe'ẽ momba'uhaty kwéry-pe. Upéixa-gwi xe-vy ave xe rereko asy. Xe rereko asyve syve upe pene mbo'e a'ã a'ã rei va'e kwéry-gwi. Xe moĩ moĩ va'ekwe preso. Hetave xe moĩ preso íxugwi kwéry. Ha hetave va'ekwe xe nupã ave. Xe nupã nupã meme voi va'ekwe. Haimete mete xe juka ave va'ekwe. Ahasa asyve voi íxugwi kwéry.

²⁴ Hesu rehegwa nhe'ẽ amombe'u mbe'u-gwi va'ekwe xe nupã uka vakapi ojepogwã va'ekwe-py. Cinco vérese xe nupã uka upéixa judeu kwéry mburuvixa va'e. Xe nupã jave, xe nupã jevy jevy. Trinta e nove vése peve xe nupã jevy jevy voi va'ekwe. ²⁵ Mbohapykwe jevy xe nupã va'ekwe yvyra-py Roma yvy pygwa kwéry. Oĩ ave ojogweroaty voi va'ekwe xe-rehe xe api api-vy ita-py. Mbohapykwe onheapymĩ pymĩ va'ekwe xe ryrú kanoagwasu ygwasu mbyte-rupi ahasa mo'ã ramo. Ygwasu mbyte-py rei ajepjyhy rei va'ekwe aĩ-vy. Xe

ryru kanoagwasu ho'ypy-ma ramo ygwasu mbyte-py rei apyta va'ekwe aĩ-vy. Peteĩ ary pyhare peve aĩ va'ekwe upe-py amano hagwã mo'ã.* ²⁶ Hesu rehegwa nhe'ẽ amombe'u hagwã agwata puku puku meme voi aiko-vy. Upéixa-gwi heta-ma xe jukaharãgwe-gwi aha jepe jepe aiko-vy. Ysry-rupi agwata jave haimete xe juka va'ekwe. Mondaha oiko va'e haimete ave xe juka va'ekwe. Xe ra'arõ porã va'ekwe xe re'yi kwéry judeu kwéry xe juka hagwã mo'ã. Judeu kwéry e'y va'e gwive xe jukase mo'ã. Tetã-rupi agwata ramo, tekваты e'y-rupi ahasa ramo, yugwarusu rovái-rehe ahasa ramo heta jevy ahasa asy haimete amano hagwã mo'ã. Hesu rerovia ra'angaha xe rereko asy meme. Áy peve xe rereko asy. Hesu rehegwa nhe'ẽ amombe'u-gwi xe rereko asy meme joty voi.* ²⁷ Tetã tetã-rupi amombe'u hagwã Hesu rehegwa nhe'ẽ aha meme. Aha jave amba'apo aha-vy. Xe rembiapo eterei-gwi xe mokane'õ ne'õ. Heta ndakéiry. Heta ave xe vare'a va'ekwe aha-vy. Xe y'uhéi jepe va'ekwe aha joty. Akaru e'y e'y reheve aha ave va'ekwe. Peteĩmi ao reheve aha va'ekwe.*

²⁸ Hesu reroviaha kwéry opa rupigwa-rehe ajepy'apy aiko-vy va'ekwe, áy peve. “Oiko porã para'e tapa ndoiko porã Hesu ndive” ha'e voi aiko-vy. ²⁹ Oĩ ramo oiko porã hagwã-rehe ikangy va'e ijyke-rehe aĩse aipytygwõ hagwã íxupe. Oĩ ramo íxupe oity ramo gweko-rupi hekoha vai va'e, avy'are'y-ma voi hese ajepy'apy-vy.

³⁰ Nanhembotuvixaséi teĩ jepe, tekotevẽ ramo, anhembotuvixa va'erã peẽ-my. Xe mbaraete tee e'y rehegwa mate ae tanhemombe'u peẽ-my anhembotuvixa-vy. ³¹ Ndxaxe apúĩ peẽ-my. Nhandejáry Hesu Cristo Ru, upe onhemboete opa e'y reheve va'e, oikwaa nda xe apúĩ va'e voi ko xe.

³²⁻³³ Aime ramo va'ekwe Damasco tetã-my xe pyhy ukase mo'ã va'ekwe mburuvixa. Aretas mburuvixave réry-py oiko pe mburuvixa upe-py. Tetã jere jokoha-rupi omõĩ heta soldado xe pyhy uka hagwã mo'ã. Xe irũ kwéry xe resende joty. Ajakagwasu-py xe moĩ xe monhemi-vy. Okẽ'i-rupi xe mosẽ va'ekwe. Xe mbogwejy xe reraha-vy xe pyhyharãgwe-gwi, aha jepe joty íxugwi kwéry. Upéixa-gwi Damasco tetã mygwa mburuvixagwasu xe pyhy uka mo'ã va'ekwe.*

12

Nhandejáry ojehexa uka va'ekwe Paulo-pe ikéry-py e'y va'ekwe

¹ Naiporãĩ nanhembotuvixase rei ramo jepe, tanhemombe'u xe reko porã-rehe peẽ-my. Jahexa e'y va'e xe kéry-py e'y ahexa va'ekwe. Upéa-rehe amombe'u-ta peẽ-my. Xe-vy voi va'ekwe ojehexa uka porã Nhandejáry ohendu uka porã ave xe-vy onhe'ẽ va'ekwe. Upe xe voi aikwaa va'e-rehe amombe'u-ta peẽ-my peikwaa porãve hagwã peẽ.

² Yma va'ekwe Cristo-rehe ajerovia rire xe reko nandi jepe Nhandejáry xe rorojeupi rei xe reraha-vy gwenda-py. Yváy mbohapyha peve gwenda iporã ete va'e-py xe renogwahẽ va'ekwe xe reraha-vy. Ojapo-ma quatorze ro'y xe reraha hagwe. Ndaikwaái xe rete reheve para'e xe rete e'y reheve para'e xe reraha-ma va'ekwe oha-py. Nhandejáry ae katu oikwaa. ³ Aikwaa joty xe reraha hagwe. Xe rorojeupi va'ekwe xe reraha-vy. Xe reko nandi reheve tapa xe rete e'y reheve ndaikwaa porãĩ. Nhandejáry ae oikwaa. ⁴ Upe-py yváy-py ahendu nhe'ẽ porã eterei. Ndikatuĩry nhande yvy pygwa nhamombe'u jevy upéa nhe'ẽ. Iporã eterei-gwi nhande ndajaiporu kwaái upéa nhe'ẽ.

⁵ Upe xe reko iporã eterei hagwe-rehe anhemomba'egwasuse ramo ra'e iporã arã ra'e. Xe reko porã-rehe ajehexa ukase porã ramo ra'e anhemomba'egwasu va'erã ra'e peẽ-my. Xéjehe katu nanhembomba'egwasuséiry. Xe mbaraete e'y rehegwa nhe'ẽ mante aikwaa uka va'erã peẽ-my.

⁶ “Cristo reko-rupi aiko porã” ha'e ramo ra'e hupigwa-rupi voi amombe'u arã ra'e jepe xéjehe, naxe arandu porãĩ arã ra'e joty upéixa anhemomba'egwasu ramo ra'e. Iporãve

* 11:25 At 16.22; 14.19

* 11:26 At 9.23; 14.5

* 11:27 1 Co 4.11-13; 2 Co 4.8-10; 6.4-5

* 11:32-33 At 9.23-25

namombe'úiry peẽ-my. Xe reko peikwaa-ma voi. Xe remimombe'u peikwaa-ma ave. Ko'anga xe rereko porãve hagwã ndajekwaa ukaséi peẽ-my. Iporãve akiriri tee aiko-vy.

⁷ “Iporã eterei va'e avave ndohexái va'e xe ae ahexa-ma” nipurái amombe'u anhemomba'egwasu-vy. Upéa-gwi Nhandejáry omoí va'ekwe xe-rehe ju ramigwa xe mbohassa asy hagwã. Nhande rete kutu kutuha vérami, anhaygwasu rembigwái ramigwa Nhandejáry ombou xe-vy. Pono anhemomba'egwasu upéa omoí xe-rehe. “Ko xe mbohassa asyha eipe'a emboyke xéhegwi” ha'e va'ekwe Nhandejáry-pe ajerure-vy. Mbohapy jevy ajerure va'ekwe oipe'apa hagwã mo'ã xéhegwi. ⁹Ha ndoipe'a mo'ái voi va'ekwe xéhegwi. “Oroporiahuvereco reko-ta, oromombaraete meme va'erã ereikotevẽ jave” he'i va'ekwe xe-vy. “Naimbaraetéi va'e-pe amombaraete porã tee joty” he'i va'ekwe xe-vy. Xe mombaete hagwã he'i ramo xe-vy xe mbovy'a. Áy peve naxe mbaraetéi ramo jave avy'a. Aipota Cristo pu'aka ojehexa uka xe-rehe xe mombaete jevy hagwã. ¹⁰Naxe mbaraetéi ramo jepe avy'a joty aiko-vy. Xe-rehe ija'e'ý va'e onhe'e'ei rei rei ramo jepe xe-rehe, aikotevẽ eterei ramo jepe, Hesu-rehe ojerovia e'ý va'e xe rereko asy ramo jepe, Cristo rape-rupi aiko-gwi anhemboasy ramo jepe, avy'a joty aiko xe. Naxe mbaraetéi jave Nhandejáry ae xe mombaete jevy.

Corinto tetã mygwa Hesu-rehe ojerovia va'e-rehe Paulo ojepy'apy

¹¹Itavy va'e vérami voi anhemomba'egwasu kuri ahai-vy. Pende-rehe ha-py voi itavy va'e vérami anhe'ẽ porã porã xéjehe. Peẽ napepenáiry xe-rehe. Nhandejáry remimondo a'ã a'ã-rehe mate pepena peiko-vy. Mbava'e-py tipo ha'e kwéry hembiape porãve xéhegwi? Mba'eve-py. Xe xe rembiape porãve meme íxugwi kwéry. Xe reko miri jave jepe, xe xe rekoha porã teeve íxugwi kwéry.

¹²Aime jave va'ekwe pene pa'ũ-my ohexa uka peẽ-my opu'aka teeha Nhandejáry. Hemimbo'e hemimondo tee aiko-gwi amombe'u jave va'ekwe inhe'ẽ ha'e ojehexa uka va'ekwe hexapyrã-rupi peẽ-my. Gwembiape porã ojapo Nhandejáry. Nhane rembiexa e'ý va'e ojapo meme ave hesegwa nhe'ẽ amombe'u jave va'ekwe peẽ-my. Xe hemimbou tee ajekwaa meme-ma va'ekwe pene pa'ũ-my. ¹³Tetã tetã-rupi Hesu réry-py onhomboaty aty va'e-pe areko va'ekwe-rami apogwereco ave va'ekwe. Petei mba'emi mate ndajapói ndapogwerekói peteixa tetã ambue pygwa ndive. Upe pygwa kwéry ome'ẽ meme va'ekwe xe-vy áy peve xe remikotevẽ. Ha peẽ katu mba'eve napeme'ëiry xe-vy. Ndajeruréi va'ekwe peẽ-my xe remikotevẽ-rehe. Upéa-rehe “Hembiape vai nhande-vy Paulo” peje rei nipo ra'e xe-rehe. Aipo ramo ajerure kuri peẽ-my xe poriahuvereco rei hagwã. Peẽ-my pende rereko asy va'e-rami apogwereco-ma ramo ra'e, xe poriahuvereco rei va'e-rami joty taxe moingo mani, ha'e-ta peẽ-my.

¹⁴Mokõi jevy aha va'ekwe pende ha-py apopohu-vy. Ko'ã ahase jevy pende ha-py. Aiko hagwe-rami aiko hagwã pende ha-rupi jevy. Naporandu mo'ái peẽ-my xe rekotevẽ-rehe. Nda'ha'úi pene mba'e-rehe apena-gwi ahase pende ha-rupi. Aipota ae peẽ xe rerovia nhande joja porã hagwã onhondive. Mitãygwe nome'ëi omongakwaahare-pe mba'eve hemikotevẽ. Túvy ae ome'ẽ me'ẽ hemikotevẽ gwa'y kwéry-pe gwajy kwéry-pe ave. Ha xe katu pende ru-rami aiko peẽ-my. Apombojerovia va'ekwe Hesu-rehe. Xe ra'y kwéry, xe rajy kwéry-rami peiko xe-vy.

¹⁵Upéa-rehe xe py'a gwive apopytygwõse aiko-vy. Opa xe mba'e kwéry ame'ẽ va'erã pende-rehe ha-py. Amano hagwã-rami aí arã ave peiko porã tee hagwã Cristo reko-rupi. Ha peẽ nipo naxe rayhu porã voi ra'e apohayhu eterei-gwi.

¹⁶“Upéixa voi Paulo” peje para'e. “Gwemikotevẽ-rehe ndajeruréi jepe nhane mbotavy rei nipo ra'e” peje mo'ã nipo ra'e xe-rehe.

¹⁷Mba'eixagwa pa xe apombotavy va'e? Xe irũ amondo ramo pende ha-py apombotavy tipó? Nahániry. Xe apombotavy e'ý va'e voi xe.

¹⁸Ajerure rure va'ekwe Tito-pe oho hagwã va'ekwe pende ha-py. Petei nhande re'ýi Cristo-rehe ojerovia va'e ave amondo ave Tito ndive oho hagwã va'ekwe pende ha-py. Pene mbotavy para'e Tito? Napene mbotavíi mba'eve-rehe upe xe remimondo kwéry. Peteixa oroiko indive. Peteixa ore py'a. Ore reko porã tee va'e voi ore. Oporombotavy

e'ŷ va'e voi ore. ¹⁹“Ojehexa uka porāse jevy nhande-vy Paulo” are-ma peje rei araka'e xe-rehe. Ndahá'eí upéa-rehe anhemonhe'ê peê-my. Nhandejáry oikwaa Cristo réry-py ae anhemonhe'ê peê-my. Peê xe rembihayhu kwéry voi. Apopytygwôha ramo xe aiko peê-my.

²⁰Ajepy'apy voi pende-rehe. Agwahê ramo pende ha-py ndajohu porāi arā voi para'e pende rekoha, Nhandejáry rape-rehe ndapeiko porāi-gwi. Ha peê ave ndapejohu porāi arā para'e ave xe rekoha, apogwereco asy va'e-rami, apogwereco ramo. Upe va'e-rehe ajepy'apy pende-rehe. Oĩ para'e pene pa'ũ-my onhonhe'ê mbojevny jevy oiko va'e. Oĩ ave para'e gwapixa oiko porāha ndojohu porāi va'e ave. Oĩ ave para'e onhemoyrô rei rei va'e ojôupe. Oĩ ave para'e ojôupe gwarā anho rei oipota va'e. Oĩ ave para'e ndoiko porāi va'e gwapixa ndive. Oĩ ave para'e onhe'ê rei va'e gwapixa-rehe. Oĩ ave para'e onhembotuvixase rei va'e. Peteixa voi nipo ra'e ndapeikovéi ra'e pende rapixa kwéry ndive. Pende reko porā e'ŷ ajohu ramo pende-rehe amboasy va'erā pende rekoha. Anhemonhe'ê pohíy arā peê-my. Pende rekoha vai-rehe anhemonhe'ê ramo pemboasy ave arā.

²¹Ajepy'apy pende rekoha-rehe, xe re'ŷi kwéry. Agwahê ramo pende ha-py anhemboasy va'erā para'e pende reko vaikwe-rehe. Nhandejáry xe motí arā voi pene pa'ũ-my aime jave napehendu porāi-gwi xe remimombe'ukwe perova hagwā pende rekoha vaikwe peiko porā hagwā indive. Gwĩ onhemboasy e'ŷ va'e gwembiapo vaikwe-rehe xe monhemboasy arā ave. Oĩ nipo heta pene pa'ũ mygwa gwembiapo vaikwe-rehe onhemboasy e'ŷ va'e ra'e. Teko vai-rupi oiko jepe, menda'ŷ-rehe ojogwereco jepe, inhakā vai jepe, nonhemboasyry joty okwa-vy. Nogwenotíry joty gwekoha-gwi ndogwerováí gwekoha vaikwe. Upéa-rehe atĩ va'erā Nhandejáry-gwi pendehegwi ave atĩ va'erā, pehendu rei-gwi xe remimombe'ukwe.

13

Agwahê ramo pende ha-py apomonhe'ê va'erā pene rembiapo vaikwe-rehe

¹Agwahê-tama pende ha-py. Mokôĩ jevy agwahê va'ekwe upe-py. Aha jevy ramo amombohappy-ma va'erā xe ho hagwe pende ha-py. Agwahê ramo upe-py apomonhe'ê va'erā pene rembiapo vaikwe-rehe. “Hembiapo vai-ma upe va'e” omombe'u ramo xe-vy mokôĩ, mbohappy-ma imombe'uháry arovia-ma va'erā areko asy-ma hagwā upe hembiapo vai va'e-pe. ²Aime jave upe-py mokôilha hatā-ma voi va'ekwe xe anhemonhe'ê va'ekwe hembiapo vai va'ety-pe, ambue kwéry-pe ave anhemonhe'ê va'ekwe. Ko'ánga katu momyry aime ramo jepe ha'e jevy-ta xe: Ndaiporiahuvereco mo'áiry avave-pe ajohu ramo hembiapo vaikwe hese kwéry, areko asy-ta voi íxupe kwéry.

³Oĩ ra'e gwĩ “Tojehexa uka porā katu nhande-vy Cristo Paulo omombe'u ramo” he'i rei ra'e xe-rehe. Pehexase para'e Cristo pu'akaha anhemonhe'ê ramo peê-my. Agwahê jevy ramo peikwaa voi arā “Paulo Cristo remimondo va'e voi” peje hagwā xe-rehe. Ohexa uka marangatu ete voi Cristo pene pa'ũ-my imbaraeteha.

⁴Ha'e ae yma va'ekwe okurusugwasu-rehe omano ramo ndaipu'akáĩ vérami ójehe. Áy ae katu Nhandejáry pu'akaha-rupi oikove jevy-ma. Ore ave Cristo ndive peteixa oroikogwi heko-rami oroiko. Ore rete kangy hete-rami ave. Nhandejáry pu'akaha-rupi ae ore mombaraete jevy, Cristo reko-rami ave oroikove hagwā.

⁵Peê katu, peteĩ teĩ penhemongeta katu pende py'apy-py peikwaa porā hagwā pende jeroviaha-rehe. “Ajerovia rei para'e ajerovia porā-ma para'e Hesu Cristo-rehe” peje ae katu pendejehe penhemongeta-vy pende py'a ndive. Peê ae peikwaa pende py'apóry. Pejerovia tee ramo Hesu-rehe, inhe'ê marangatu onhemoi pende py'apy-py pende py'apóry kwaaha pejerovia teemaha hese peikwaa hagwā. Ha ndapejerovia teéi ramo hese nomoíry. Penhemongeta katu pende py'apy-py peikwaa porā hagwā pende jeroviaha-rehe. ⁶Aipota voi peikwaa porā ore rekoha ore-rehe peje hagwā “Oĩ ave nipo ra'e Paulo py'apy-py ipy'apóry kwaaha ave” peje hagwā xe-rehe. Aipota voi peikwaa porā upe va'e.

⁷ Orombojeupi ore nhe'ê Nhandejáry-pe pende reko porãrã-rehe: “Enhangareko porã Corinto pygwa kwéry-rehe ponove ojevavy” oro'e pende reko porãrã-rehe orojerure-vy Nhandejáry-pe. Upéixa ajerure ramo íxupe ndaha'éíry xe rereko porã hagwã-rehe. Pende reko porãrã-rehe ae xe ajerure. Ndaha'éí ave he'i hagwã pende rexaháry: “Paulo renduhare oikwaa porã nipo Cristo rape rehegwa nhe'ê. Omombe'u porã nipo ra'e Paulo” nde'i ukaséi avave-pe. Pende reko porãrã Cristo reko-rami hagwã-rehe mate ajerure Nhandejáry-pe pende-rehe. Oĩ ramo jepe ore momba'e rei rei va'e, xe ae katu aipota pende reko porã meme ae joty peiko-vy.

⁸ Anhetegwa va'e meme amombe'u-ta. Ajehexa uka porãse-vy rei, ndikatúí xe apu. Anhetegwa va'e ndikatúí xe amboyke.

⁹ Upéa-gwi pene mbaraete ramo Hesu-rehe pejerovia tee-gwi orovy'a-ma va'erã pende-rehe kwéry. Nore mbaraetéi ramo jepe orovy'a arã joty pende-rehe. Orojerure rure Nhandejáry-pe pene mbaraeteve teve hagwã peiko hagwã heko tee-rupi.

¹⁰ Upe va'e-rehe ahai peê-my kwatia. Agwahê e'ý mboyve anhemonhe'ê teese peê-my arova uka hagwã pende reko peê-my. Upéixa ramo ndapogwereco asýi va'erã pende ha-py aime jave. Nhandejáry réry-py inhe'ê mombe'uha ramo aiko peê-my. Ndaha'éí anhemonhe'ê asyse-gwi rei aiko upéixa peê-my. Pene pytygwō hagwã peikwaa porãve hagwã inhe'ê aiko peê-my inhe'ê mombe'u-vy.

Paulo omondo omandu'aha

¹¹ Opa-tama xe nhe'ê ahaise va'e. Mixíve mate ahai-ta peê-my xe re'ýi kwéry. Tapeiko katu Cristo reko tee-rupi. Tapehendu porã katu xe remimombe'ukwe. Tapeiko peteíxa onhondive. Pende py'agwapy reheve tapeiko onhondive. Upéixa peiko ramo Nhandejáry oĩ arã pene ndive. Ha'e nhande rayhuha, nhane mbopy'agwapy va'e voi ave.

¹² Pejotopa ramo, penhoanhuvã nhuvã pejoyhayhupa rei-vy.

Hesu reroviaha ko'a pygwa omandu'aha omondo uka-ta kwatia peê-my.

¹³⁻¹⁴ Nhandejáry Hesu Cristo tapende rovava porã katu pende rexakwaa rei-vy. Tapene mandu'a meme katu Tupã Nhandejáry pende rayhuha-rehe. Tapene moirũ irũ katu Nhe'ê Marangatu tee va'e.

Paulo remimombe'ukwe Galácia vvy pygwa pegwarã epístola de Paulo aos gálatas

Paulo omondo Galácia vvy pygwa-pe onhe'ẽ. Kwatia-rehe omondo

^{1,2}Hesu reroviaha Galácia vvy-py oiko va'e onhomboty aty ha-rupi. Xe Paulo amondo-ta peẽ-my xe nhe'ẽ. Xe katu Hesu Cristo remimondo va'e. Ndaikói va'ekwe Hesu Cristo remimondo ramo teko rei nhe'ẽ-py. Ndoikói xe moingo va'ekwe Hesu Cristo remimondo ramo. Hesu Cristo ae xe moingo va'ekwe gwemimondorã. Xe moingo va'ekwe Nhandejáry ave Nhande ru gwemimondorã. Gwa'yry Hesu Cristo omano rire, túvy omoingove jevy va'ekwe íxupe. Ha ko'ánga xe re'yí kwéry, Hesu reroviaha va'e, entéro xe ndive oiko va'e gwive omondo-ta peẽ-my omandu'aha. ³Tapende rovasa katu Nhandejáry Nhande Ru va'e pende rexakwaa rei-vy. Tapende rexakwaa rei katu Nhandejáry Hesu Cristo ave. Tapene mbopy'agwapy ave.

⁴Ha Hesu Cristo onheme'ẽ va'ekwe ijukaharã-pe. Ojejuka uka rei va'ekwe omboyke hagwã nhandéhegwi nhane rembiapo vaikwe, nhane resende hagwã, ndajaikovéi-ma hagwã áygya hekoha vai va'e reko-rupi. Nhandejáry Nhande Ru va'e remimbota-rupi ojapo upéa. ⁵Upéa-gwi hembiaapo porã-gwi, tonhemomba'egwasu meme ete katu Nhandejáry opa e'y reheve. Aipota upéa. Amém.

Cristo rehegwa nhe'ẽ porã peteixa

(Mt 7.15; Rm 16.17; 2 Co 11.2-4; Ef 5.6; Cl 2.8; 1 Ts 2.4; 2 Pe 2.1-3; 1 Jo 4.1)

⁶Pene renói va'ekwe Nhandejáry pemoirũ hagwã íxupe, Cristo pende rexakwaa rei hagwã. Ha ko'ánga katu oĩ he'i va'e pende-rehe: “Sapy'a ojerovia-ma Nhandejáry-rehe. Ha ko'ánga katu pya'e oheja jevy-tama Nhandejáry-pe. Ojehesa rerova-tama outro kwéry-rehe, Cristo rehegwa nhe'ẽ porã omombe'u ambue va'e-rehe” he'i pende-rehe.

Upéa ahendu ramo, xe mondýi voi.

⁷Upe va'e peẽ-my omombe'u ambue va'e: “Cristo rehegwa nhe'ẽ porã voi ore remimombe'u” he'i mo'ã omombe'u-vy. Ha ndaha'ei inhe'ẽ tee omombe'u va'e peẽ-my. Omombe'u joavy avy peẽ-my pene akã ombotarova rei-vy. Inhe'ẽ porã tee va'e ohekoviaröse mo'ã peẽ-my. ⁸Ha pejeapysaka katu xe nhe'ẽ-rehe. Cristo rehegwa nhe'ẽ porã peteixa. Oromombe'u va'ekwe peẽ-my Cristo rehegwa nhe'ẽ porã. Ha ko'ánga katu: “Íjapu ra'e ore remimombe'ukwe” oro'e jevy ramo peẽ-my, ivai arã. Oromombe'u ambue ramo peẽ-my, tore mondo katu ojéhegwi Nhandejáry ore mbohasa asy hagwã-py. Nhandejáry rembigwái yváy pygwa ave omombe'u ambue ramo peẽ-my, ivai arã. Omombe'u ambue ramo peẽ-my, tomondo katu íxupe ojéhegwi Nhandejáry ombohasa asy hagwã-py. ⁹Oro'e hagwe-rami, ko'ánga ha'e jevy-ta peẽ-my. Oime ramo Cristo rehegwa nhe'ẽ porã pehendú e'y hagwe-rami omombe'u va'e, tomondo katu íxupe ojéhegwi Nhandejáry ombohasa asy hagwã-py. ¹⁰Upéixa anhe'ẽ pohýi ramo, ma'erã he'i xe-rehe: “Paulo he'i upéa oipota hapixa kwéry omboete íxupe-gwi” he'i mo'ã xe-rehe. Ha anhetegwa va'e katu nomombe'úi. Anhemboete ukase ae Nhandejáry-pe. “Teko rei remimbota-rupi oiko Paulo” he'i mo'ã xe-rehe. Nomombe'u porã xe rehegwa. Teko rei remimbota-rupi aiko vyteri ramo ra'e, ndaikói arã Cristo remimbota-rupi ra'e. Ndaikói arã ra'e a-rami Cristo rembigwái ramo.

Paulo oiko-ma Hesu Cristo remimondo ramo

(1 Ts 2.4)

¹¹Xe re'yí kwéry ha'e-ta peẽ-my. Cristo rehegwa nhe'ẽ porã, xe remimombe'u va'e, ndaha'ei voi teko rei akã gwigwa rei. Aipota peikwaa upéa. ¹²Cristo rehegwa nhe'ẽ porã ndoikóiry xe-vy omombe'u va'ekwe. Inhe'ẽ-py xe mbo'e va'ekwe ndoikóiry. Hesu Cristo

ae oikwaa uka xe-vy va'ekwe onhe'ê porã omombe'u va'ekwe xe-vy. Upéa-gwi xe nhe'ê ndaha'êi teko rei akã gwigwa rei amombe'u.

¹³ Ha peê peikwaa voi xe rekokwe. Judeu kwéry xe rugwy re'yí voi. Xe rekokwe judeu reko-rupi aiko ramo va'ekwe peikwaa voi. Xe ko areko asy va'ekwe aiko-vy Hesu reroviaha kwéry-pe, Nhandejáry rembiporavo va'e-pe. Xe poxy-vy voi areko asy va'ekwe íxupe kwéry. Ajukase mo'ã va'ekwe aiko-vy íxupe kwéry.* ¹⁴ Ha ore rembypy ore ramói kwéry remimombe'ukwe gwive, ore rekoha, upéa ahendu porãmbaseve seve va'ekwe. Upéa-gwi heta xe re'yí rugwy kwéry, xe jave ikaria'y va'e ohendu porã ramo ore ru he'i va'ekwe gwive, xe katu ahendu porãve voi. Judeu reko-rupi aikose voi va'ekwe.

¹⁵ Ha Nhandejáry katu omoí va'ekwe xe-vy xe rembiaporã xe reko e'y ramo. Ha upéi katu xe renói va'ekwe xe rexakwaa rei-vy amoirũ hagwã íxupe. ¹⁶ Hemimbota-rupi ohexa uka va'ekwe xe-vy gwa'yry amombe'u hagwã ta'yry rehegwa nhe'ê judeu e'y pa'ũ-rupi. Upe-ma ramo nanhomb'e mbo'êi xe rapixa kwéry ndive.* ¹⁷ Ndahái va'ekwe Jerusalém tetã-my anhomb'e hagwã Hesu remimondo va'e ndive. Upe-py Pedro oirũ ndive Hesu remimondo ramo oiko-ma xe renonderã. Ha ndahái joty va'ekwe anhomb'e hagwã hendive kwéry. Ha upéi katu aha pya'e ae íxugwi kwéry yvy akéno-py. Arábia yvy-py aha va'ekwe. Upe-gwi aju jevy ramo aha Damasco tetã-my. Upéa-gwi xe nhe'ê ndaha'êi teko rei akã gwigwa rei amombe'u.

¹⁸ Upe rire mbohapy ro'y rire aha Jerusalém-my. Pedro pohu-vy aha. Upe-py apyta. Quinze áry apyta hendive. ¹⁹ Ha outro kwéry Hesu remimondo va'e, avave-pe ndahexái. Tiago Nhandejáry Hesu ryvy mante ahexa.

²⁰ Ko va'e kwatia-rehe amoí va'e anhetegwa voi. Nhandejáry resa-py amoí anhetegwa voi. Ndaxe apúí voi.

²¹ Ha upéi katu asê Jerusalém-gwi. Aha Síria yvy-rupi. Cilícia yvy-rupi aha ave. ²² Ha Judéia yvy-rupi katu Hesu reroviaha onhomb'oaty aty va'e ndaxe rexái voi. ²³ Ndaxe rexái ramo jepe, ohendu xe rerakwã: “Nhande kwéry Hesu reroviaha va'e gwive, Paulo nhane moingo asy va'ekwe jajehesa rerova e'y hagwã mo'ã Hesu-gwi, jarovia e'y hagwã mo'ã Hesu rehegwa nhe'ê porã. Ha ko'anga katu ha'e ae Hesu rehegwa nhe'ê porã tee omombe'u oiko-vy” he'i xe mombe'u-vy hikwái. ²⁴ Upéixa ramo xe rerakwã rendu-vy omomba'egwasu Nhandejáry-pe hikwái.

2

Paulo oho Hesu reroviaha ruvixa ha-py

¹ Upe rire, quatorze ro'y rire aha jevy va'ekwe Jerusalém tetã-my. Barnabé ndive aha va'ekwe. Ha Tito katu oho ave xe ndive.* ² Ha Nhandejáry xe-vyte oikwaa uka ra'e xe raperã. Upéa-gwi aha va'ekwe Jerusalém tetã-my. Orogwahê-ma ramo upe-py, aha Hesu reroviaha ruvixa ha-py. Ha'e kwéry anho ha-py aha amombe'u-vy. Hesu rehegwa nhe'ê xe remimombe'u judeu e'y kwéry pegwarã, amombe'upa porã íxupe kwéry aikwaa uka-vy: “Ndopo-rami amombe'u judeu e'y kwéry-pe” ha'e Hesu reroviaha ruvixa-pe. Ndaipotái he'i xe remimombe'u-rehe, xe remimombe'urã-rehe ave: “Ndaha'êi Hesu rehegwa nhe'ê tee va'e Paulo remimombe'u” ndaipotáiry he'i mo'ã xe-rehe upéa.

³ Oime ave xe ndive Tito xe ndive ou va'ekwe. Upéa ndaha'êi judeu kwéry va'e ore kwéry-rami. Grego va'e ae ha'e. Ha: “Iporã ereiko ore reko-rupi judeu kwéry reko-rupi. Iporã erenhepirekytí uka ore kwéry-rami” nde'yry joty íxupe.

⁴ Ha ndaipóri va'ekwe ore pa'ũ-rupi upe va'e he'i va'erã. Oike nhemi voi ra'e ore pa'ũ-my upéa he'i va'e. Upéa he'i va'e ndaha'êi Hesu reroviaha tee va'e. Omombe'u ra'anga anga rei va'e ae Hesu rehegwa nhe'ê porombotavysse-vy. Oike nhemi voi ra'e ore rekoha rexa hagwã-rehe: “Hesu Cristo-rehe pejerovia-magwi, ma'erã ndapeikovéi-ma judeu kwéry reko-rupi?” he'ise ore-vy. “Judeu kwéry reko Nhandejáry rekoha voi” he'i ore-vy. “Ipokatu joty voi judeu kwéry nhe'ê nhande-vy. Ndaijapyry, anhetegwa joty”

* 1:13 At 8.3; 26.9-11 * 1:16 At 9.3-6 * 2:1 At 15

he'i. "Naiporāi peheja judeu kwéry rekoha peiko hagwā Hesu reko-rupi. Iporā katu Hesu reroviaha ohendu joty entéro yma gware Moisés remimombe'ukwe onhemopotí hagwā" he'i mo'ā ore-vy.

⁵Upe-ma ramo pya'e oronhe'ē joko upéa he'i va'e-pe: "Iporā para'e ne nhe'ē" ndoro'ēi voi íxupe kwéry. Oroipota pehendu meme Cristo rehegwa nhe'ē tee va'e penhemopotí tee hagwā. Onhe'ē ambue va'e peē-my ndoroipotáiry.

⁶Ha Hesu reroviaha ruvixa va'e imandu'a porā hese va'e, ohendu xe nhe'ē. Ohendu-ma rire nonhemonhe'ēi xe-vy: "A-rami ko erejapo va'erā. Upéixa ani erejapo tei" nde'íry xe-vy. Upe va'e huvixa oí hese imandu'a porā va'e. Oí omomba'egwasu va'e íxupe. Ha namomba'egwasuvéi íxupe ambue va'e kwéry-gwi. Nhandejáry-pe peteixa nhande rekoha.* ⁷⁻⁸Ha upe va'e huvixa nonhemonhe'ēi voi xe-vy. Okiriri rei ae oiko-vy. Mba'eve nde'íry xe-vy. He'i xe rembiapo-rehe: "Yma ome'ē va'ekwe Pedro-pe Nhandejáry hembiaporā. Judeu kwéry-pe mante oipota omombe'u Hesu Cristo rehegwa nhe'ē porā" he'i. "Ha ko'ánga katu Pedro-pe ome'ē hagwe-rami hembiaporā, ome'ē-ma ave kuri Paulo-pe nipo ra'e. Judeu e'y kwéry-pe mante ae oipota omombe'u upe nhe'ē porā tee" he'i xe-rehe ojúpe. "Yma omombaraete va'ekwe Pedro-pe Nhandejáry imondo-vy judeu kwéry-pe Hesu remimondo ramo" he'i. "Ha ko'ánga katu Pedro-pe omombaraete hagwe-rami, omombaraete-ma nipo ra'e Paulo-pe ave imondo-vy judeu e'y kwéry-pe Hesu remimondo ramo" he'i xe-rehe ojúpe. ⁹Upe ramo Hesu reroviaha ruvixa va'e he'i xe-vy xe mongeta-vy. Upe va'e nhande ru-rami, nhande jekoha voi. Héry va'e Tiago, héry va'e Pedro ave, héry va'e João ave. Upe va'e he'i xe-vy: "Ne mondo hagwā nde poravo nipo ra'e Nhandejáry. Nde poravo ne mondo hagwā nhande kwéry e'y va'e ha-py" he'i xe-vy. "Ore moirū katu" he'i xe-vy Barnabé-pe ave. Upéi xe popyhy. Barnabé-pe oipopyhy ave. Oronhomoirū-ma. He'i ore-vy: "Jarojoja katu nhane nhe'ē jaha hagwā" he'i. "Ore oroho va'erā nhande kwéry-pe nhe'ē mombe'u-vy. Ha peē katu peho va'erā nhande kwéry e'y-pe Hesu Cristo rehegwa nhe'ē porā pemombe'u-vy" he'i ore-vy Hesu reroviaha ruvixa va'e. ¹⁰Upéixa ramo nonhemonhe'ēi voi ore-vy. Petei mba'e mante omombe'u ore-vy: "A-py oí iporiahu va'e ore pa'ū-my. Ani nde resarái hese kwéry-gwi" he'i ore-vy. "Upe iporiahu va'e-pe ame'ese meme va'e hemikotevē" ha'e íxupe kwéry.

Paulo ndojohu porāi Pedro rembiapo

¹¹Ha upéi katu Pedro ou Antioquia tetā-my. Ogwahē ramo upe-py, nahembiaapo porāi. Upéa-gwi ha'e íxupe: "Naiporāi ne rembiapo" ha'e íxupe. ¹²Pedro ogwahē ramo upe-py, okaru oí-vy Hesu reroviaha judeu e'y va'e ndive. Ha upéi katu ogwahē ou-vy gwí Hesu reroviaha Tiago remimbou judeu kwéry va'e. Upe-ma ramo ndokarusevéi-ma Pedro judeu e'y va'e ndive. Judeu kwéry va'e ndive mante okaruse. Ndoipotái Tiago remimbou judeu va'e he'i íxupe: "Ne'írā oiko ramo judeu e'y va'e judeu reko-rupi, naiporāi jakaru onhondive" he'i upéa ndoipotái. Pono he'i upéa, ndokaruvéi-ma onhondive Pedro. Onhomboja'o ja'o-ma okaru hagwā. Ikyhyje-gwi inhe'ērā-gwi onhondive ndokarusevéi-ma. ¹³Ha nahembiaapo porāi voi Pedro. "Iporā jakaru onhondive" he'i ramo jepe, ha'e ae katu ndokaruséiry onhondive. Okaru va'e-pe ombotavy. Upéa-gwi upe-py oí va'e judeu kwéry va'e, Pedro reko-ramima ave oiko. Ndokaruvéi-ma judeu e'y va'e ndive. Upe ramo Barnabé jepe oipe'a-ma hekoha. Ojoeko rupipa-ma ho'a hikwái.

¹⁴Upe-ma ramo ahexa hekoha: "Ndohovéi-ma nipo ra'e tape porā-rupi. Cristo rehegwa nhe'ē porā tee va'e nohendu porāvéi-ma nipo ra'e" ha'e xe jéupe. Upéa-gwi ha'e Pedro-upe. Atýra-py ha'e íxupe: "Nde ko judeu kwéry va'e. Nde judeu jepe, judeu e'y reko-rupi ereiko ave. Ndereikovéi-ma voi judeu reko-rupi anho. Upéixa ramo, ma'erā po eremoingose judeu reko-rupi judeu e'y va'e-pe" ha'e íxupe. "Nde ko ndereikovéi-ma voi judeu reko-rupi" xe ha'e Pedro-pe.

Hesu Cristo-rehe jajerovia-ma ramo, "Nde py'a potí-ma" he'i va'erā nhande-vy Nhandejáry (Mt 16.24; Rm 3.21-31; 6.6-7)

* 2:6 Dt 10.17

¹⁵⁻¹⁶ Ore ramói kwéry ko judeu kwéry voi. Moisés amyri remimombe'ukwe tekoha kwaaha voi ore. Ndoorikói voi judeu e'ý rekoha-rupi. Ha ore arandu ramo jepe, Moisés amyri he'i va'ekwe orojapo ramo jepe, “Nde py'a potí-ma” nde'íry joty va'erã ore-vy Nhandejáry. Hesu Cristo-rehe orojerovia-ma ramo ae, “Nde py'a potí-ma” he'i va'erã ore-vy. Upéixa ramo ore orojerovia-ma va'ekwe Hesu Cristo-rehe, “Pende py'a potí-ma” he'i hagwã ore-vy Nhandejáry.

Jajerovia-ma ramo hese, nhande py'a omopotí-ma va'erã. Ha nhande nhanhemopotí uka reise ramo Moisés amyri remimombe'ukwe gwive rei nhahendu-vy, nanhane mopotíry va'erã joty. Upéa he'i voi Nhandejáry nhe'ê:

“Gwí Moisés amyri remimombe'ukwe gwive jajapo ramo jepe, Ipy'a potí-ma, nde'íry va'erã joty nhande-rehe Nhandejáry”

he'i.

Upéixa he'i Nhandejáry nhe'ê kwatia-rehe omoí va'ekwe. ¹⁷ Pejeapysaka katu xe nhe'ê-rehe. Orojerovia-ma ramo Hesu Cristo-rehe, “Ipy'a potí-ma” oroipota va'ekwe Nhandejáry he'i ore-rehe. Upe ramo oronhemopotí hagwã mo'ã, ndorojapovéi-ma va'ekwe Moisés remimombe'ukwe gwive. Judeu rekoha-rupi ndorokovéi-ma va'ekwe. Judeu e'ý va'e-ramima oroiko. Upe tekoha kwa e'ý va'e-ramima oroiko va'ekwe. Upéixa ramo oí ore-rehe he'i va'erã mo'ã: “Hesu Cristo-rehe ojerovia-gwi, ndojapovéi yma gware reko. Ojeyavy nipo ra'e. Hesu Cristo para'e ombojeyavy va'e íxupe” he'i va'erã mo'ã ore-rehe. Ha nomombe'u porã ojúpe. Hesu Cristo ko ndaha'úi voi ore mbojeyavyharã. ¹⁸ Xe ko anhemopotí ukase-vy mo'ã ndajapovéi-ma va'ekwe Moisés remimombe'ukwe. Aikose joty Hesu reko-rupi. Ha ko'ánga katu xe ha'e ramo: “Ajapo jevy-ta Moisés he'i va'ekwe gwive Nhandejáry he'i hagwã xe-vy, nde py'a potí-ma”. Upe va'e ha'e ramo, ndaikovéi-ma va'erã Hesu reko-rupi. Ajejavy tee-ma va'erã. ¹⁹ Yma ajapose ramo jepe Moisés remimombe'ukwe tekoha, ndajapopái joty. Xe py'a ky'a joty. He'i va'ekwe upe tekoha nhe'ê:

“Peteí teí upe tekoha nhe'ê gwive nderejapopái ramo, nde py'a ky'a reheve joty eremano va'erã”

he'i. Ha ko'ánga katu amano va'ekwe-rami amoirũ-ma Cristo-pe. Upéa-gwi ndaipokatuvéi-ma xe-rehe upéa yma gware nhe'ê. Xe-vy yma gware nhe'ê ijapy-ma. Ndaha'evéi-ma xe-vy gwarã. Ndaikovéi-ma upe tekoha anho-rupi. Nhandejáry nhe'ê ahendu porã hagwã upe va'e tekoha nhe'ê anho nahenduvéi-ma. Ha Cristo katu omano va'ekwe kususugwasu-rehe. Upéi peteíxa amoirũ-gwi íxupe, amano va'ekwe-rami aiko hendive áy. ²⁰ Upéixa xe aiko. Xe ae xe arandu-rupi rei katu ndaikovéi-ma. Cristo xe moingove va'ekwe-rupi ae aiko. Xe py'a-py oí inhe'ê. Ha'e xe rayhu-gwi xe-rehe ijukaharã-pe onheme'ê va'ekwe. Ajerovia-gwi hese, Nhandejáry ra'y-rehe, aiko porã ko'ánga ko yvy-rupi. ²¹ Upéixa ramo xe mopotíse ramo Nhandejáry, “Xe ndaipotáí voi xe-vy hemime'êse” nda'e mo'áiry íxupe. “Upe tekoha-rupi anho jaiko rei ramo, nhanhemopotí porã-ma va'erã” ndaja'éiry arã nhandéjehe. Ja'e ae ramo nhandéjehe, “Upe tekoha-rupi anho jaiko rei ramo, nhanhemopotí porã-ma va'erã” ja'e ramo, omano rei arã ra'e Cristo.

3

Gwí Moisés remimombe'ukwe tekoha renduha onhemopotí ukase rei mo'ã
(Rm 4.1-3; Gl 2.16; 5.2-4; Fp 3.9)

¹ Pejeapysaka katu xe nhe'ê-rehe, xe re'úi kwéry, Galácia pygwa va'e. Peê pene arandu e'ý va'e. Kiva'e po pene mbotavy ra'e? Oromombe'u porã va'ekwe peê-my Hesu Cristo kususugwasu-rehe omano hagwe. Upéa-gwi peê-my oromombe'u va'e pehexa vérami. Pehexa vérami Hesu ojejuka ramo nhande rovasa hagwã. Ha ko'ánga kiva'e po pene mbotavy ra'e pehendu e'ý hagwã anhetegwa va'e. ² Pemombe'u katu xe-vy Nhe'ê Marangatu tee va'e omboumaha peê-my. Moisés remimombe'ukwe-rupi peikose mo'ã jave, Nhandejáry ombou tipo peê-my araka'e Nhe'ê Marangatu tee va'e-pe? Nomboúi voi araka'e peê-my. Perovia-magwi ae Hesu Cristo rehegwa nhe'ê porã ombou-ma va'ekwe

peë-my. ³ Pende tavy voi nipo ra'e. Ha Nhe'ë Marangatu tee va'e katu pende py'apy-py oiko rire, tape porã-rupima peho peiko-vy. Ha ko'anga katu peë ae pene arandu-rupi napende reko agwyje mo'avéi-ma. Moisés amyri remimombe'ukwe tekoha-rupi peikose ramo mo'ã, napegwahë mo'ai Nhandejáry oiko ha-py. Nhe'ë Marangatu tee va'e e'y reheve napegwahë mo'ai upe-py. Napende reko agwyje mo'avéi-ma. Upéa-gwi pende tavy voi peiko-vy. ⁴ Upe tekoha-rupi peikose ramo mo'ã penhemopotĩ hagwã mo'ã, oiko rei arã pende py'a-py Nhe'ë Marangatu tee va'e ra'e, pejerovia rei arã Hesu-rehe ra'e. ⁵ Ha Nhandejáry katu pene rexakwaa rei va'ekwe ime'ë-vy Nhe'ë Marangatu tee va'e. Ojapo porã uka peë-my va'ekwe jahexa e'y va'e. Hexapyrã-rupi nahembiapo porã pene pa'ũ-my upe tekoha-rupi anho peikose ramo mo'ã. Perovia-magwi ae Hesu Cristo rehegwa nhe'ë porã, hembiapo porã peë-my va'ekwe. ⁶ Upéixa voi he'i Nhandejáry nhe'ë kwatia-rehe hemimoigwe:

“Ha Abraão katu ogwerovia-ma Nhandejáry-pe. Upéa-gwi Ipy'a potĩ-ma, he'i hese Nhandejáry.”*

Upéixa he'i Nhandejáry nhe'ë.

⁷ Upéixa ete Abraão amyri reko-rupi jaiko äy nhande jarovia va'e. Ikente e'y ramo jepe, Abraão rekoha-rupi joty peiko ramo, ta'yry-rami joty pepyta. “Ta'yry tee voi peë. Judeu e'y ramo jepe, ta'yry tee voi peë” he'i Nhandejáry nhande-rehe. Aipota peikwaa upéa. ⁸ Yma ete va'ekwe opy'a-py he'i Nhandejáry judeu kwéry e'y-rehe: “Ojerovia-ma ramo xe ra'y-rehe, xe remimondorã-rehe, Pende py'a potĩ-ma, ha'e va'erã íxupe” he'i Nhandejáry. Upéixa voi he'i Nhandejáry kwatia nhe'ë. Ha upéi katu he'i va'ekwe Abraão-pe Nhandejáry:

“Entéro ko vvy-py oĩ va'e-pe gwive ahovasa va'erã. Xe reroviaha gwive hikwái nde xe rerovia hagwe-rami ahovasa va'erã íxupe kwéry”*

he'i Abraão-pe Nhandejáry. Upéixa ohexa uka va'ekwe Abraão-pe gwembiaporã. Hesu Cristo renonderã ave omombe'u íxupe va'ekwe. Upéixa voi he'i Nhandejáry nhe'ë. Ha upéi katu Abraão ogwerovia-ma va'ekwe Nhandejáry-pe. Upéa-gwi ohovasa íxupe Nhandejáry. ⁹ Upéixa ramo äygwa entéro heroviaha gwive, Abraão rovasa hagwe-rami, ohovasa va'erã íxupe kwéry ave.

¹⁰ Ha Moisés remimombe'ukwe tekoha-rupi rei oikose mo'ã va'e-pe gwive ndohovasa mo'ai Nhandejáry. A-rami he'i Nhandejáry nhe'ë:

“Ohendu e'y va'e entéro Moisés omoĩ va'ekwe gwive kwatia-rehe, mombyry omondo va'erã íxupe ojéhegwi Nhandejáry”*

he'i. Upéa-gwi entéro he'i va'e gwive: “Pende py'a potĩ-ma, he'i va'erã nhande-rehe Nhandejáry upe tekoha-rupi anho rei jaiko ramo” he'i mo'ã. Upe va'e-pe katu mombyry omondo va'erã Nhandejáry ojéhegwi.

¹¹ He'i ave Nhandejáry nhe'ë:

“Xe rerovia-gwi, nde py'a potĩ-ma, he'i hese va'e Nhandejáry, upe va'e Nhandejáry ndive oiko va'erã”*

he'i. Upéa-gwi gwĩ upe tekoha-rupi anho rei oikose va'e: “Nde py'a potĩ-ma” nde'íry nipo hese ra'e Nhandejáry. ¹² Gwĩ upe tekoha-rupi anho rei oikose va'e nde'íry: “Jarovia katu Nhandejáry-pe nhane resende hagwã” nde'íry voi. Oipota mo'ã Nhandejáry oresende íxupe, Moisés he'i va'ekwe gwive ohendupase-gwi mo'ã. Ha upéa nde'íry Nhandejáry nhe'ë. He'i ae:

“Upe peteĩ teĩ Moisés he'i va'ekwe gwive rendupa ete va'e katu oiko va'erã Nhandejáry ndive”*

he'i. Ha ojevavy e'y va'e ndoikói voi gwembiapo-rehe anho onhemopotĩ hagwã.

¹³⁻¹⁴ He'i jevy Nhandejáry nhe'ë:

* 3:6 Gn 15.6 * 3:8 Gn 12.3 * 3:10 Dt 27.26 * 3:11 Hc 2.4 * 3:12 Lv 18.5

“Jahexa ramo vyvra-rehe ojejuka va'ekwe, ndaija'úi voi nipo hese ra'e Nhandejáry. Upe va'e Nhandejáry remimbojevvy va'e voi, ja'e omano va'ekwe-rehe”^{*} he'i Nhandejáry nhe'ê hekoha vai va'e-rehe, vyvra-rehe ojejuka va'e. Yma nhande ave jaiko vai va'ekwe. Entéro Moisés he'i va'ekwe gwive jajapose ramo mo'ã, Nhandejáry remimbojevvy va'ekwe-rami jaiko va'ekwe. Upéa-gwi Cristo nhane resende va'ekwe ani hagwã: “Moisés amyri he'i va'ekwe gwive rendupa e'y va'e voi upe va'e” he'i nhande-rehe. “Upe va'e Nhandejáry remimbojevvy va'e voi upe va'e” nde'íry hagwã nhande-rehe, nhane resende va'ekwe Cristo. Ha'e katu Nhandejáry remimbojevvykwe-rami omano va'ekwe kurusu-rehe. Nhande rekovia omano. Nhande kwéry e'y-pe jepe ohovasa hagwã omano va'ekwe. Abraão rovasa hagwe-rami ohovasase ave judeu e'y va'e-pe, Cristo reroviaha-pe gwive. Nhande-rehe omano va'ekwe ou hagwã nhande-vy Nhe'ê Marangatu tee va'e. “Ou va'erã” nde'i reíry va'ekwe hese Nhandejáry.

He'i tee va'ekwe nokambia mo'ái voi Nhandejáry

¹⁵ Ko'ánga xe re'yí kwéry, Hesu roviaha va'e, aikwaa uka-ta peë-my arandu rehegwa nhe'ê, yvypóry rehegwa nhe'ê-rami. Nhamoporã ramo nhane nhe'ê ojúupe, nhamói va'e kwatia-rehe nhane nhe'ê nhande apu e'y hagwã ojúupe. Upe rire nhamoporã va'ekwe ndikatúí nhakambia jevvy. Nhamoporãmba rire ndikatúí nhamoive va'e kwatia-rehe nhakambia hagwã mo'ã nhamoporã va'ekwe. ¹⁶ Upéixa ete okambia e'y va'erã omoí va'ekwe Nhandejáry. Nde'i reíry va'ekwe Abraão amyri-pe. He'i tee va'ekwe, nokambia mo'áiry. Ha Nhandejáry katu he'i tee va'ekwe Abraão amyri-pe: “Xe orohovasa va'erã” he'i. “Ne remiarirõ joapyri pyri-pe” he'i. “Ahovasa va'erã” nde'i reíry Abraão-pe, omoí porã-vy íxupe onhe'ê. Hemiarirõ kwéry-pe nde'íry. Petéi hemiarirõ-pe mante “Orohovasa va'erã” he'i ae. Cristo-pe he'i voi.^{*} ¹⁷ Ha ãy katu pejeapysaka katu xe nhe'ê-rehe. Omoporã va'ekwe katu okambia e'y va'e Nhandejáry. Yma ete va'ekwe Nhandejáry omoporã-ma ramo onhe'ê Abraão amyri-pe: “Naxe apu mo'ái” he'i, “Ahovasa va'erã íxupe” he'i Abraão amyri-pe. Yma ete voi he'i va'ekwe upéa. Ha upe rire katu, heta eterei ro'y rire, quatrocentos e trinta ro'y rire, ore ramói kwéry Moisés remimombe'ukwe-rupi oiko va'ekwe. Upéa-gwi: “Okambia nipo ra'e Nhandejáry gwembiaaporã. Ijapu nipo Abraão-pe ra'e. Ojapo va'erã he'i va'ekwe, ndojapo mo'áiry” oí he'i va'e mo'ã. Ha omombe'u mo'ã upéa. Hemikambia e'y va'erã voi Nhandejáry rembiaporã. Ndaijapúí va'e voi ko Nhandejáry.^{*} ¹⁸ Ha'e katu: “Ha Moisés amyri remimombe'ukwe-rupi ereiko-gwi, ame'ê va'erã nde-vy nde-vy gwarã” nde'íry voi nhande-vy. Upéa-rehe yma he'i va'ekwe Abraão amyri-pe: “Ame'ê rei va'erã nde-vy nde-vy gwarã. Xe orohexa kwaa rei va'erã” nde'i reíry va'ekwe íxupe Nhandejáry. Ha “Moisés amyri nhe'ê gwive katu erejapopa-gwi, ame'ê va'erã nde-vy nde-vy gwarã” nde'íry voi íxupe. “Ame'ê rei va'erã” he'i ae íxupe Nhandejáry.

Ko'ánga amombe'u-ta peë-my Moisés amyri he'i hagwe rehegwa nhe'ê
(Rm 3.20; 5.20-21)

¹⁹⁻²⁰ Oí he'i va'e mo'ã: “Nome'ei ramo nhande-vy Nhandejáry nhande-vy gwarã Moisés amyri nhe'ê nhahendu ramo ra'e, nhane ramói kwéry oiko rei arã voi ra'e Moisés remimombe'ukwe tekoha-rupi oiko rire” oí he'i va'e mo'ã. Ha ndaha'úi upéixa.

Yma araka'e Nhandejáry oipota nhane ramói kwéry upe tekoha-rupi oiko. Oipota he'i ójehe tekoha e'y-rupi oiko ramo: “Ndajaikovéi-ma voi upe tekoha porã-rupi. Jajevvy eterei-ma nipo ra'e jaiko-vy” he'i ójehe. Oipota Nhandejáry nhane ramói kwéry upe tekoha-rupi oiko Cristo peve. Upéi Cristo oiko va'ekwe ko yvy-py. Ha'e-ma Abraão remiarirõ voi. Hesegwa nhe'ê Nhandejáry nde'i reíry va'ekwe Abraão amyri-pe. Cristo oiko rire, Nhandejáry ndoipotavéiry oiko upe tekoha-rupi onhemopotí hagwã mo'ã hikwái. Cristo oiko rire, ijapy-ma voi upe tekoha. Ha Nhandejáry katu nombo'e ranhéi voi va'ekwe upe tekoha-py ore ramói kwéry-pe. Ombo'e ppy araka'e yváv pygwa-pe ranhe.

* 3:13-14 Dt 21.23 * 3:16 Gn 12.7 * 3:17 Êx 12.40

Upéi upe yváy pygwa ombo'e Moisés amyrí-pe. Upéi Moisés ombo'e va'ekwe ore ramói kwéry-pe. Ha Abraão amyrí-pe katu nomombe'úi upéixa. Ndaipóri va'ekwe ohendu uka va'e. Ha'e ae ohendu va'ekwe Nhandejáry nhe'ê. Ha Nhandejáry katu nde'íry yváy pygwa-pe. Outro yvypóry-pe nde'íry. Íxupe anhóte ae he'i: "Xe orohovasa va'erã" he'i Abraão-pe araka'e.

²¹⁻²² Ha oĩ he'i va'e mo'ã katu: "Nhandejáry omoingo va'ekwe nhane ramói kwéry-pe Moisés he'i hagwe-rami. Aipo ramo naimbaraetevéi-ma Abraão-rehe he'i tee íxupe va'ekwe. Ndaipokatuvéi-ma hese he'i íxupe va'ekwe. Ogwerova rova para'e gwemimombe'u Nhandejáry" he'i mo'ã hese. Ndaha'éiry upeixagwa. Ogwerova rova e'ý va'e gwemimombe'u. Pejeapysaka katu xe nhe'ê-rehe. Nhandejáry nde'íry nhande-vy: "Moisés remimombe'ukwe-rupi peiko-gwi, pende py'a potĩ-ma" nde'íry voi. Upéa-gwi hendive nhane moingove meme hagwã, nanhane moingóiry upe tekoha-rupi. Upéa-rehe oipota nhande jarovia he'i va'ekwe nhandehemopotĩ uka tee hagwã. "Cristo reroviaha gwive arende va'erã tekoha vai-gwi" he'i Nhandejáry. He'i ave Nhandejáry kwatia nhe'ê: "Upe tekoha vai, he'i, entéro ko vyv-rupi jaiko va'e-rehe gwive ipu'aka nhane moemiapo vai hagwã"

he'i Nhandejáry kwatia nhe'ê. Upéa-rehe oipota jarovia he'i va'ekwe jajejavy va'e gwive.

Moisés remimombe'ukwe-rupi

nhande-rehe onhangareko va'e-rami jaiko va'ekwe,

Cristo ojekwaa peve

²³ Yma va'ekwe jaiko Moisés remimombe'ukwe tekoha-rupi. Jajapose va'e rei ndajapóiry va'ekwe. Upe yma gware rekoha-rupi jaiko vyteri ramo, nhande-rehe onhangareko va'e-rami jaiko va'ekwe. Ha upe rire katu Nhandejáry oikwaa uka nhande-vy jarovia-gwi jaikoveha. ²⁴ Upéixa ramo, yma Moisés remimombe'ukwe-rupi jaiko rei ramo, tekoha porã-py nhane mbo'e va'e-rami jaiko va'ekwe. Nhande reko-rehe onhangareko va'e-rami jaiko va'ekwe. Upéixa jaiko va'ekwe Cristo ojekwaa peve he'i hagwã nhande-vy: "Pende py'a potĩ-ma Cristo-rehe pejerovia-gwi" he'i hagwã Nhandejáry nhande-vy. ²⁵ Ha ko'anga katu jajerovia jaiko-vy Cristo-rehe. Moisés nhe'êgwe-rupi anho nhandehemopotĩ hagwã mo'ã ndajaikovéiry va'e. Upe tekoha-rupi, nhande-rehe onhangareko rei va'e-rami, ndajaikovéiry.

Peteixa pemoirũ-gwi Cristo-pe, peiko Abraão remiarirõ-rami

(Jo 1.12-13; Ef 1.5)

²⁶ Ha ko'anga katu Cristo Hesu-rehe pejerovia-gwi, peiko-ma Nhandejáry re'ýi ramo. Pemoirũ-ma Peteixa íxupe. ²⁷ Peteixa pemoirũ hagwã íxupe, pene mongarai va'ekwe. Pemoirũ-gwi íxupe peiko ãy ha'e-rami. ²⁸ Upéixa ramo enterove va'e-pe Nhandejáry ogwerekoseha-rami ogwerekoseha-rami ogwerekoseha-rami ogwerekoseha-rami ogwerekoseha-rami. Oĩ judeu kwéry va'e. Oĩ judeu kwéry e'ý va'e ave. Oĩ onhemomba'apo va'e ogwerekoseha-rami ogwerekoseha-rami ogwerekoseha-rami ogwerekoseha-rami. Oĩ omba'apo va'e ojeheente ave. Oĩ kwimba'e, oĩ kunha ave. Ha Nhandejáry katu nhande kwéry-pe nhande rereko Peteixa. Peteixa pemoirũ-magwi Cristo Hesu, peiko ãy Peteixa onhondive. ²⁹ Cristo-pe pemoirũ-gwi, peiko ãy Abraão remiarirõ-rami. Upéa-gwi, perovia-gwi, peẽ-my ave ome'ê va'erã Nhandejáry Abraão remiarirõ pegwarã.

4

Nhane mitã-rami jaiko va'ekwe

(Rm 8.14-17)

¹ Ko'anga amombe'u jevy-ta peẽ-my arandu rehegwa nhe'ê mitã rehegwa nhe'ê-rami. Nhande ra'ý nhane mba'e jaryrã voi. Íxupe gwarã nhande'ê va'erã íxupe. Ha imitã vyteri ramo katu nanhame'êi va'e íxupe íxupe gwarã. Mixi vyteri jave nhane rembigwái rei ramo oiko. ² Imitã ramo oĩ hese onhangareko va'e. Oĩ ave ima'erã-rehe onhangareko va'e. Ha ogwahẽ-ma ramo ima'erã ome'ê íxupeha áry, túvy omboypy íxupe áry hagwe-py ogwahẽ-ma ramo, nhande'ê va'e íxupe íxupe gwarã. ³ Upéixa ete nhande ave nhane mitã-rami

jaiko va'ekwe. Nhandejáry kwaa e'ÿha voi nhande. Ipu'aka va'ekwe nhande-rehe ko yvy járy kwéry, Nhandejáry e'ÿ va'e, gwí onhembojáry rei va'e ko yvy-rehe. ⁴⁵ Ha upéi katu ogwahê ramo Hesu áry ojekwaa hagwã, ombou va'ekwe Nhandejáry nhande-vy. Gwa'ýry ombou va'ekwe. Isyrã-pe ombou va'ekwe íxupe. Judeu rekoha-rupi oiko hagwã nhane pa'û-rupi ombou. Upéixa omoingo íxupe judeu rekoha-rupi. Gwí onhemopotí ukase-vy mo'ã judeu rekoha-rupi rei oiko va'e katu, hesendeharã voi katu ha'e. Ou e'ÿ mboyyve upe tekoha nhe'ê ipokatu joty nhande-rehe. Ha ko'ánga katu ipogwy-py ndajaikovéi hagwã ha'e nhane resende va'ekwe Nhandejáry ra'y ramo jaiko hagwã.

⁶ Upéixa ramo Nhandejáry ra'y ramo jaiko. Ha Nhandejáry katu ombou va'ekwe Hesu Nhe'ê Marangatu oiko hagwã nhande py'apy-py. Upéa-gwí Nhandejáry re'ÿi ramo jaiko: "Jaiko-ma voi Nhandejáry ra'y ramo" ja'e nhandejéupe. "Xe Ru" ja'e nhahenói-vy íxupe, nhane monhe'ê-gwí Nhe'ê Marangatu tee va'e. ⁷ Upéa-gwí ndereikovéi-ma ójehe ipu'aka e'ÿ va'e-rami. Ne mbo'e-gwí Nhe'ê Marangatu tee va'e, nde pu'aka ndéjehe. Nhandejáry ra'y ramo ae ereiko-ma. Nhandejáry ra'y kwéry ramo ereiko-gwí, gwa'ýry pegwarã nde-vy ome'ê va'erã ave.

Paulo ojapura Galácia vvy pygwa-rehe

(2 Co 11.3-4; 1 Pe 1.14)

⁸ Yma araka'e ndapeikwaái voi Nhandejáry-pe. Upéa-gwí Nhandejáry e'ÿ va'e ae pereko araka'e pende reko járy ramo. ⁹ Ha ko'ánga katu: "Peikwaa-ma Nhandejáry-pe" ja'e. "Pende kwaa-ma Nhandejáry" ja'e katu ave. Áy pende kwaa-ma voi Nhandejáry. Ma'erã pejehesa rerovase jevy ko yvy járy kwéry héry va'e-rehe? Gwí va'e nomandái va'e pende-rehe. Omanda rei va'e pende-rehe. Upéa-gwí ma'erã pejehesa rerovase jevy rei hese? Ma'erã po peipota omanda jevy mo'ã pende-rehe hikwái? ¹⁰ Ha peê ae pene remimboetese ae pemboete. Ko'ánga peje a-rami: "Oí áry nhane remimboete va'e, oí jasy nhamboete va'e, oí arete nhamboete va'e, oí ro'ly nhamboete va'e" peje rei. Upéa rehegwa-rehe pepena eterei. Ma'erã po pepena hese? Penhemopotí ukase mo'ã para'e. Pepena ramo, pejehesa rerova ukase para'e Nhandejáry-gwí. Upéa pejapo ramo, ndapeikovéi-ma Nhandejáry remimbota-rupi. Peipota para'e omanda jevy pende-rehe ko yvy járy kwéry. ¹¹ Upéa-gwí xe ajapura pende-rehe. Amombe'u rei voi nipo ra'e peê-my Hesu Cristo rehegwa nhe'ê porã.

¹² Xe re'ÿi kwéry, xe ndaikovéi judeu reko-rupi va'ekwe nde reko-rupi aiko hagwã. Ko'ánga xe ndaipotái peiko jevy xe rekokwe-rupi. Ndapejapo vaíry xe-vy va'ekwe. Xe rereko porã katu ae va'ekwe. ¹³⁻¹⁴ Xe rasy va'ekwe. Xe rasy-gwí apyta pene pa'û-my. Upéa-gwí xe ranhe amombe'u peê-my va'ekwe Hesu rehegwa nhe'ê porã. Upéa peikwaa voi. Xe rasy voi. Xe rete rasy ndapejohu porã. Xe rasy ramo jepe: "Omombe'u ra'anga anga rei Paulo" ndapejéi xe-rehe. Naxe mbojeví va'ekwe. Xe rerohory katu va'ekwe agwahê ramo. Nhandejáry rembigwái, yváy pygwa va'e-rami xe rerohory katu. Cristo Hesu pemboeteha-rami ave xe mboete. Napenhembohorýry xe-rehe. ¹⁵ Pene pa'û-my xe aime ramo: "Iporã porã nhande-vy" peje va'ekwe. Pevy'a eterei voi va'ekwe xe-rehe. Pene pa'û-my xe aime ramo, pende resa jepe peme'êse va'ekwe xe-vy xe resarã. Pende pu'aka hagwãixa mo'ã xe-vy peme'êse va'ekwe. Xe remikotevê gwive peme'êse xe-vy. Upéixa ahendu voi va'ekwe xe rayhu teeha. Upéa-gwí amombe'u peê-my pende rekoharã. ¹⁶ Ha áy katu ma'erã ndapevy'avéi-ma? Anhetegwa va'e mante amombe'u peê-my va'ekwe. Upe ramo, ma'erã peje xe-rehe: "Paulo ndaija'evéi-ma nhande-rehe".

¹⁷ Ha gwí Hesu rehegwa nhe'ê porã omombe'u ambue va'e katu pene mboete ra'anga anga rei va'e. Ndoipotavéi peê xe moirü. Oipota pene mandu'a porã hese. Onhemboete ukase peê-my. ¹⁸ Ha naiporã pende rekombo'e rei xe moirü e'ÿ hagwã. Iporã ae nhandomboete meme onhondive jaiko porã meme hagwã. Pene pa'û-my xe aime ramo, iporã nhandomboete. Xe aime e'ÿ ramo jepe, iporã nhandomboete meme joty. ¹⁹⁻²⁰ Amombe'u-ta peê-my, xe re'ÿi kwéry, pete'ÿi nhe'ê. Kunha imemby-tama ramo, ohenduma gwasy oiko hagwã mitã'i. Upéixa voi xe ave ahasa asy kunha-rami. Ajapura kunha-rami. Aipota eterei Cristo rekoha-rupi peiko porãve rãve hagwã, peteixa pemoirü hagwã

íxupe. Ko'ánga ajapura pende-rehe. Pene pa'ũ-my áy aimese mo'ã. Áy anhomongetase mo'ã pene ndive. Ajapura verei pende-rehe. Mba'éixa po agwahẽ-ta apombo'e haggwã?*

Mokõi kunha rehegwa nhe'ẽ héry va'e Agar, Sara ave

²¹ Ha peẽ katu penhemopotĩ haggwã mo'ã Moisés he'i va'ekwe-rupi peikose jevy-ma. Pemombe'u katu xe-vy. Ma'erã po ndapeikwaái voi he'ise va'ekwe. ²² Yma omoĩ va'ekwe kwatia-rehe a-rami:

“Ha Abraão katu mokõi oiko ta'ýry. Tyke'ýry Abraão rembigwái memby. Ha tyvýry katu Abraão rembireko tee memby. Hembigwái e'ý va'e memby voi”*

he'i. ²³ Tyke'ýry hembigwái memby va'e oiko túvy oipota ha-rupi oiko. Ha tyvýry katu Nhandejáry he'i hagwe-rami voi oiko. Hemimbota-rupi oiko. ²⁴⁻²⁵ Upe mokõi kunha, Abraão ra'y sy va'e, héry va'e Agar, Sara ave. Upe mokõi kunha rehegwa nhe'ẽ-rami oikwaa uka nhande-vy Nhandejáry jaikoha. Nhande rekoha oikwaa uka ta'ýry-rami jaiko ramo. Tembigwái-rami jaiko ramo ave oikwaa uka nhande rekoha. Nhande tembigwái-rami jaiko va'e jaiko Agar nhande sy voi va'e-rami. Ha imemby kwéry katu ndaipu'akái ójehe. Tembigwái-rami voi oiko. Upe kunha héry va'e Agar he'ise Sinai yvyaty-pe. Upe yvyaty oĩ Arábia yvy-py. Upe-py ore ramói ohendu ypy va'ekwe Moisés remimombe'ukwe. Upéi ndaipu'akái ójehe. Tembigwái-rami oiko híkwái. Upe kunha Agar héry he'ise ave áygya-pe, Jerusalém tetã mygwa-pe. Ha'e isy kwéry ramigwa. Upe tetã mygwa imemby ramigwa. Ndaipu'akái ójehe. Onhemopotĩ ukase mo'ã Moisés remimombe'ukwe-rupi oiko-gwi. Upéa-gwi iky'a joty ipy'a. ²⁶ Ha upe kunha ambue va'e héry va'e Sara he'ise nhande-vy. Jerusalém yvategwa pegwarã-pe he'i. Hesu roviaha isy ramigwa oiko Sara. Nhande kwéry imemby ramigwa voi. Upe yvate gwarã-rehe ndaipu'akáiry tekoha vai.

²⁷ Upe mokõi kunha rehegwa nhe'ẽ jaikwaa porã haggwã omoĩ va'ekwe kwatia-rehe Nhandejáry. A-rami omoĩ va'ekwe:

“Nde ko ne memby e'ý va'e, evy'a katu eiko-vy. Ne'írã vyteri erehendu mba'asy ne memby haggwã jave, evy'a katu. Esapukái ave katu erevy'a-gwi. Iména va'e remiarirõ heta va'erã. Ha iména rembieja, oména ndive oiko jevy ramo, hetave tave va'erã hemiarirõ”.*

Upéixa voi he'i Nhandejáry nhe'ẽ.

²⁸ Ha Sara memby, héry va'e Isaque, oiko-ma va'ekwe Nhandejáry he'i hagwe-rupi. Ha ko'ánga, xe re'ýi kwéry, nhande ave jaiko ha'e-rami. Nhandejáry he'i hagwe-rupi jaiko.

²⁹ Yma va'ekwe tyke'ýry, túvy oipota ha-rupi oiko va'ekwe, omoingo asy va'ekwe gwyvýry-pe Nhandejáry nhe'ẽ marangatu-rupi oiko va'ekwe. Yma ko'ánga ete peve ojehu ko'ã va'e. Omoingo asy joty Nhandejáry nhe'ẽ marangatu-rupi oiko va'e-pe. ³⁰ Pejeapysaka katu Nhandejáry nhe'ẽ-rehe kwatia-rehe omoĩ va'e-rehe:

“He'i Sara oména-pe, Emosẽ katu ne rembigwái kunha va'e. Imemby reheve emondo. Ne rembireko tee voi xe. Xe memby pegwarã katu ani ereme'ẽ ne rembigwái memby-pe, he'i Abraão-pe hembireko”.*

Upéixa he'i Nhandejáry nhe'ẽ.

³¹ Upéixa ramo xe ha'e-ta peẽ-my, xe re'ýi kwéry. Nhande kwéry Hesu roviaha va'e katu ndaha'úi tembigwái memby-rami. Nhane rembypy nhande sy-rami oiko va'e ndaha'úi tembigwái-rami. Tembigwái e'ý va'e voi.

5

Ani pejehesa rerova katu Hesu reko-gwi

¹ Jaiko porã haggwã nhane resende va'ekwe Cristo. Nhasẽ haggwã judeu reko-gwi nhane resende va'ekwe. Peiko meme katu Hesu reko-rupi. Ani pejehesa rerova jevy katu judeu reko-rupi pene moingose ramo jepe.

* 4:19-20 Cl 2.8-23

* 4:22 Gn 16.15; 21.2

* 4:27 Is 54.1

* 4:30 Gn 21.9-10

²⁻³Pejeapysaka katu xe nhe'ê-rehe. Xe Paulo ha'e-ta peẽ-my. Judeu kwéry-rami ani penhepirekytĩ uka teĩ, “Nde py'a potĩ-ma” he'i hagwã mo'ã Nhandejáry pende-rehe. Pende-rehe Cristo nopenavéi-ma arã ra'e. Ha'e jevy-ta peẽ-my. Anike penhepirekytĩ uka teĩ judeu kwéry-rami: “Ko'ánga pehendu katu entéro Moisés he'i hagwe gwive jajapo hagwã. Inhe'ê imbaraeete voi joty peẽ-my” he'i arã peẽ-my. Upéixa ramo Cristo ndoikovéi arã peẽ-my pene resendeharã. ⁴Ani peiko teĩ judeu rekoha-rupi “Nde py'a potĩ-ma” he'i hagwã mo'ã Nhandejáry. Napemoirüvéi-ma arã Cristo-pe. Peheja-ma arã Nhandejáry-pe nhande rexakwaa reihaty-pe. ⁵Upe va'e jajapo e'ỹ va'e. Jajerovia tee ae Nhandejáry-rehe. Nhaha'arõ íxupe “Nde py'a potĩ-ma” he'i hagwã nhande-vy. Nhe'ê Marangatu tee va'e oiko-gwi nhande py'apy-py, Cristo-rehe jajerovia tee-gwi, nhaha'arõ arõ katu íxupe. ⁶Oĩ judeu kwéry va'e, oĩ judeu kwéry e'ỹ va'e ave. Ha Cristo-pe nhamoirü ramo peteixa katu, enterove va'e-pe peteixa jareko: “Jarovia-gwi jajohayhu porãve rãve katu” ja'e meme katu ojõupe.

⁷⁻⁸Ha peẽ katu peho kuri tape porã-rupi. Kiva'e po pene moingo tape porã e'ỹ-rupi ijapu va'e peẽ-my pehendu hagwã. Upe va'e tape-rupi napene moingói kuri Nhandejáry. Nhandejáry ae pene renói va'ekwe pemoirü hagwã íxupe: “Peho katu upe va'e tape-rupi” nde'fry kuri peẽ-my. ⁹Pejeapysaka katu xe nhe'ê-rehe. Nhande kwéry ja'e: “Mixĩmi hagwĩno jepe ramo, pya'e onhomoagwĩnomba-ma” ja'e. Upe ramo xáke. Peho-ma ramo tape vai-rupi, pende reko vaipa-ma va'erã. ¹⁰Ha pende-rehe xe ajerovia vyteri. Nhandejáry Hesu-rehe jajerovia-gwi “Iporã jajere Hesu rape-gwi” ndapejéi va'erã. Upéa ha'e ramo, ndaxe aptũ voi. Ha oĩ peẽ-my omombe'u joavy avy va'e pene moakã tarova hagwã rei. Upe va'e, oime raẽ va'e oĩ va'e, ogwereco asy va'erã íxupe Nhandejáry.

¹¹⁻¹²Ha'e-ta peẽ-my xe re'ỹi kwéry. Xe ko namombe'uvéi judeu reko-rupi jaikoha. Judeu kwéry-rami iporã nhandepirekytĩ uka, nda'evéi voi xe. Ha gwĩ pene moakã tarova rei va'e xe-rehe ijapu voi: “Paulo omombe'u joty judeu reko-rupi jaikoha nhandemopotĩ hagwã” he'i mo'ã xe-rehe. Ha ijapu voi. Oipota va'e amombe'u vyteri ramo xe ra'e, naxe rereko asýi arã ra'e. Ha xe rereko asy joty. Hemimbota amombe'u vyteri ramo xe: “Naiporã jajerovia Hesu Cristo-rehe anho, kususugwasu-rehe ojejuka va'ekwe-rehe. Jajerovia-ma ramo hese, iporã judeu reko-rupi joty jaiko nhandemopotĩ hagwã” xe ha'e joty ramo ra'e, naxe rereko asýi arã ra'e hikwái. Ha xe rereko asy joty katu. Gwĩ pene moakã tarova va'e aipota nopenavéi pende-rehe. Aipota ójehe ae tojapo vai onhekytĩ-vy.

¹³Xe re'ỹi kwéry, peiko porã hagwã pene renói va'ekwe Nhandejáry. Pendéjehe pende pu'aka hagwã pene renói va'ekwe. Oipota pejepe'a gwĩ judeu reko-rupi pene moingose va'e po-gwi. Ha'e kwéry oipota mo'ã pehendu entéro Moisés he'i hagwe gwive. Ha ko'ánga katu ani peje teĩ pendejũpe: “Áy ndajaikovéi-ma upe tekoha-rupi. Upéa-gwi iporã jajapo jajapose va'e rei” ani peje upéa. Peje ae “Iporã jajohayhu katu jaiko-vy” peje ae ojõupe. “Nhandhopytygwõ porã katu” peje katu ojõupe.

¹⁴Ha upe tekoha katu, entéro Moisés amyri he'i hagwe gwive peteĩ nhe'ê-py ogwenohẽmba: “Ehayhu katu nde rapixa-pe, nde rekove erehayhuha-rami ave” he'i. Upe va'e nhe'ê-py omombe'upa Moisés amyri he'ise va'ekwe. Jahayhu ramo nhande rapixa-pe, entéro Moisés amyri he'i va'ekwe gwive jajapo voi.* ¹⁵Ha vixu kwéry katu onhorairõmba ramo, ojosu'upa ramo, ojojuka-ma hikwái. Upéixa ete ani penhe'ê vai tei ojõehe. Ani penhe'ê rei rei ojõehe. Ndapeiko porãvéi arã onhondive. Vixu-rami rei peiko ramo, ndapejohayhuvéi-ma va'erã.

Nhe'ê Marangatu tee va'e oiko e'ỹ reheve pende py'apy-py, pejapose va'e rei pejapo va'erã

(Rm 7.7-25; 8.5-6)

¹⁶⁻¹⁷Ha jajapose va'e rei katu ndaha'ei Nhe'ê Marangatu tee va'e remimbota. Ha'e ndojohu porã voi jajapose va'e rei. Ha'e katu oiko e'ỹ reheve pende py'apy-py, pejapose va'e rei mante pejapo va'erã. Upéa-gwi ha'e-ta peẽ-my: Tapene py'apyhy pyhy katu Nhe'ê

* 5:14 Lv 19.18; Mt 22.39; Jo 13.34-35; 15.12; 1 Pe 1.22; 1 Jo 3.11; 4.7-8

Marangatu tee va'e. Toiko porāve rāve katu pende py'apy-py, peho meme hagwā tape porā-rupi. Ndapejapové arā pejapose va'e rei. ¹⁸ Ha Nhe'ē Marangatu tee va'e katu pene moingo ramo tape porā-rupi, ndikatuvéi-ma pene moingo judeu reko-rupi penhemopotí hagwā mo'ā.

¹⁹ Ha jajapose va'e rei mante jajapo ramo, ojekwaa voi nhande-rehe. Teko ky'a-py rei jaiko va'e. Jajohu va'e rei ndive jaiko. Nhande rekoha ky'a. Nhatí kwaa e'ý va'e. ²⁰ Nhamboete va'e Nhandejáry e'ý va'e-pe. Mohāy-py nhandhopohano va'e. Nanhande a'éi va'e ojóehe. Jajoteta. Nhane rakate'ý va'e. Opaixagwa jaipota rei nhandejéupe gwarā. Nhande poxy poxy rei va'e. Nhandhemomba'egwasuse mo'ā va'e. Ndajarojojái nhane nhe'ē. Ndajajogwerekovéi-ma peteíxa. ²¹ Nhande py'a vai va'e voi ojóehe. Jaka'u va'e. Jaka'u hagwā nhandhomoirū-ma. Upéixa ete jaiko. Jajapose va'e rei-ma jajapo. Upéixa ramo ha'e jevy-ta peé-my xe ha'e hagwe-rami. Upeixagwa jajapo jaiko-vy ramo, nanhamoirū mo'ái Nhandejáry-pe ojekwaa ramo nhande ruxixarā.

²² Ha Nhe'ē Marangatu tee va'e katu oiko jave nhande py'apy-py, jaiko porā voi. Hi'a porā porā va'e-rami nhande rekoha porā va'e. Jajohayhu va'e. Javy'a porā va'e voi jaiko-vy. Nhande py'agwapy va'e jaiko-vy. Jajogwereco kirirí va'e. Jajogwereco porā va'e. Nandhane ma'e rakate'ýi va'e ojóupe. Nhande ko nhande-rehe ojerovia va'e voi. ²³ Ndajajotetái va'e. Jajapose va'e mante katu ndajajapói voi. Upéixa jaiko ramo "Ani peiko tei upéixa" nde'íry va'erā nhande-vy onhemonhe'ē va'e. Tekoha-rupi ae jaiko. ²⁴ Yma va'ekwe jajapose va'e rei mante jajapo va'ekwe. Opaixagwa jaipota va'ekwe mo'ā. Ha ko'ánga katu nhande Cristo Hesu re'ýi va'e, ndajajapovéi-ma jajapose va'e rei mante. Ha "Cristo katu omano jave kurusu-rehe, ndive omano ave xe reko tujakwe" ja'e nhandéjehe. "Hendive omano ave xe reko vaikwe omboyke hagwā xéhegwí xe rekoha vai xe ajapose va'e rei" ja'e nhandéjehe. ²⁵⁻²⁶ Ko'ánga Nhe'ē Marangatu tee va'e ndive jaiko. Upéa-gwi tanhane moingo meme katu tape porā-rupi. Ndikatuvéi-ma jaiko nhandembotuvixase mba'e va'e-rami. Ndikatuvéi-ma jajoteta. Ndikatuvéi-ma nhande py'a vai va'e ojóehe.

6

Penhopytygwō katu peiko-vy

(At 20.35; 1 Co 15.58; Tt 3.14; Hb 13.16)

¹ Xe re'ýi kwéry, oime ramo pene pa'ū-my ojejavy va'e, ojekwaa ramo hembiaapo vaikwe, penhemonhe'ē katu íxupe: "Anive ereho tape porā e'ý-rupi. Tereho ae katu tape porā-rupi" peje íxupe. Pene pa'ū-my hi'arandu porā va'e, Nhe'ē Marangatu tee va'e nhe'ē-rupi oiko meme va'e, tonhemonhe'ē porā rei katu ojejavy va'ekwe-pe. Túvy-rami tonhe'ē porā katu íxupe. Ha tonhangareko porā katu ójehe pono ha'e-rami ave ojejavy. ² Penhopytygwō katu peiko-vy. Upéixa peiko va'erā Cristo rekoha-rupi. ³ Pene pa'ū-my oí ramo onhemomba'egwasu ukase mo'ā va'e: "Xe ko xe tuvixave va'e xe. Naipytygwō mo'ái xe rapixa kwéry-pe" he'i rei voi ójehe. Ijapu rei ójehe. Upéa-gwi penhopytygwō katu peiko-vy. ⁴⁻⁵ Iporā voi jajapo peteí tei nhane rembiapo. Upéa-gwi nhane rembiapo-rehete nhapena va'erā. Jajapo katu peteí tei nhane rembiapo nhapondera e'ý reheve ojóehe, nhandhembohory e'ý reheve nhande rapixa-rehe. Upéixa iporā ramo nhane rembiapo, ovy'a-ma va'erā nhane rembiapokwe-rehe Nhandejáry.

⁶ Ha Cristo nhe'ē-py omb'o'e íxupe va'e katu, ani hakate'ý tei ogwereco va'e-rehe omb'o'eháry-pe. Tome'ē me'ē omb'o'eháry-pe hemikotevē. ⁷⁻⁸ Pejeapysaka katu xe nhe'ē-rehe: "Jajaty ja'u va'erā" ja'e. Upéixa ete ereho-ma ramo tape vai-rupi, erehasa asy arā ereiko-vy. Upéa-gwi: "Ambotavy-ta Nhandejáry-pe" ani ere tei ndejéupe. Imbotavypyre'ý voi ko ha'e. Ereho ramo tape vai-rupi, erehasa asy va'erā ereiko-vy. Nerenhotý porái ramo, okakwaa arā nde kokwe-py hi'upy e'ý va'e. Upéixa ete jajapose va'e rei jajapo ramo, jaha vai arā, nhandehundi rei va'erā. Ha erenhotý porā ramo katu, ere'u va'erā erejaty va'ekwe. Upéixa ete Nhe'ē Marangatu tee va'e oiko tee ramo nde py'a-py, ereiko porā porā va'erā. Nhandejáry ndive ereiko va'erā opa e'ý reheve. ⁹ Upéixa ramo anike ere: "Xe kwerái-ma xe rembiapo porā porā ramo" ani ere upéa. Nhande rembiapo porā meme ramo

nhande kaigwe e'ỹ reheve, nhande-vy gwarã ome'ětaha áry-py ome'ẽ va'erã nhande-vy Nhandejáry. ¹⁰ Upéa-gwi nhande pu'aka hagwã-rami jareko porã rei enterovéa-pe. Ha Nhandejáry reroviaha gwive katu jareko porãve ráve katu íxupe kwéry.

Cristo mba'e kurusu-rehe apena xe aiko-vy

¹¹ Pehexa katu. Ko'ánga xe amoĩ-ta kwatia-rehe xe nhe'ẽ. Xe po-rupi amoĩ-ta. Tuvixa vixa amoĩ kwatia-rehe imonhe'ẽ hagwã. ¹² Ha gwĩ omombe'u ambue va'e Hesu Cristo rehegwa nhe'ẽ porã katu oipota judeu kwéry imandu'a porã hese. Upéa-gwi he'i peẽ-my: “Judeu reko-rupi peiko joty katu, penhepirekytĩ uka-vy” he'i peẽ-my omanda-vy. Oipota peiko judeu reko-rupi. He'i ramo ra'e: “Cristo-rehe, kurusu-rehe ojejuka va'ekwe-rehe, hese anho mante jajerovia-ma ramo, omopotĩ va'erã nhande py'a Nhandejáry judeu reko-rupi jaiko e'ỹ reheve” he'i ramo ra'e, omoingo asy arã ra'e íxupe judeu kwéry. Upéa-gwi he'i peẽ-my: “Penhepirekytĩ uka katu” he'i peẽ-my omanda-vy. ¹³ Ha nonhe'ẽ porã hikwái. Gwĩ judeu reko-rupi oikose va'e mo'ã nohendúĩ entéro Moisés he'i hagwe gwive. Ma'erã oipota penhepirekytĩ uka? Ma'erã oipota peiko judeu reko-rupi? Oipota voi imandu'a porã hese judeu kwéry. Onhemboete ukase mo'ã judeu reko-rupi peiko-gwĩ. ¹⁴ Ha xe katu napenáĩ voi judeu remimbota-rehe. Hemimbota ndajapói va'e imandu'a porã hagwã mo'ã xe-rehe. Cristo rehegwa nhe'ẽ, ikurusugwasu rehegwa nhe'ẽ ave, upéa nhe'ẽ amomba'egwasu voi amombe'u meme-vy. Cristo upe kurusugwasu-rehe omano-gwi, napenavéi-ma äygywa nhe'ẽ-rehe. Omano va'ekwe-rami ndarohoryvéi-ma íxupe, äygywa-pe. Ha äygywa katu ndaxe rerooryvéi-ma ave. Omano va'ekwe-rami ndaxe rerooryvéi-ma ave. Ikurusugwasu-rehe apena aiko-vy va'e mante xe mopotĩ va'erã. ¹⁵ Ha judeu kwéry va'e, judeu e'ỹ va'e ave, ogwereco peteĩ va'e-rami íxupe Nhandejáry. Tape pyahu porã-rupi jaiko hagwã, nhane moatyrõmba va'e, nhane mohekoviarõ pyahu va'e Nhandejáry voi. Upéa-gwi judeu rekoha-rehe napenavéi-ma. Cristo mba'e kurusugwasu-rehe ae apena xe aiko-vy. ¹⁶ Upe va'e tape pyahu porã-rupi peho va'e-pe gwive, tapene mbopy'agwapy katu Nhandejáry. Tapene poriahuvereko katu ave. Entéro gwe'ýi gwive tohovasa porã katu Nhandejáry.

¹⁷ Xe ko Hesu remimondo tee va'e. Hemimondo tee ramo aiko-gwi, xe mbohasa asy va'ekwe. Ha ko'ánga katu xe rete-rupi ojekwaapa voi xe pire joka joka hagwe. Pehexapama voi xe-rehe. Xe mbopere pere va'e-rami ojekwaa voi xe-rehe oho-vy enterove oikwaa hagwã Hesu rembigwái ramo xe aikoha. Upéa-gwi xe-rehe ijapu ramo avave ndaipotáĩ xe moakã tarova.

¹⁸ Tapende rovasa porã porã katu Nhandejáry Hesu Cristo pende rexakwaa rei-vy, xe re'ýi kwéry. Pende py'a gwive tapende rovasa. Amém.

Paulo remimombe'ukwe
Éfeso tetã mygwa pegwarã
epístola de Paulo aos efésios

Paulo omondo Éfeso tetã mygwa-pe onhe'ë kwatia-rehe

¹Xe Paulo Nhandejáry oipotaha-rami aiko Hesu Cristo remimondo ramo. Áy amondo-ta peë-my xe nhe'ë kwatia-rehe. Peë Nhandejáry re'yí kwéry Éfeso tetã-my peiko va'e. Hesu Cristo-pe pehendú-gwi, peteíxa pemoirũ-ma íxupe peiko-vy. ²Tapene rexakwaa rei katu Nhandejáry Nhande Ru va'e. Tapene mbopy'agwapy katu ave. Tapende rovasa porã katu Nhandejáry Hesu Cristo ave.

Cristo irũ-gwi nhande, nhande rovasa porã porã jaiko porã hagwã

(Rm 8.29; 2 Co 1.21-22; 1 Pe 1.2-3)

³Tonhemomba'egwasu katu Nhandejáry, Nhandejáry Hesu Cristo Ru va'e. Cristo irũ-gwi nhande, Nhandejáry yváy pygwa va'e re'yí nhande. Upéa-gwi nhande rovasa porã porã va'ekwe yváy pygwa-rami jaiko porã hagwã. ⁴⁻⁶Nhande apo e'yí ngatu, nhande kwaa-ma voi. Ne'írã vyteri ko yvy oiko jave, nhande pe'a-ma voi araka'e gwe'yirá nhande reko marangatu hagwã, nhande reko jejavy e'yí reheve gvesa-py. Hesu Cristo irũ voi nhande. Nhande rayhu-gwi, "Oiko va'erã xe ra'y ramo, xe raji ramo ave" he'i araka'e nhande-rehe ojúepe ae nhane mogwahë ukase-vy. "Upéixa xe rembiapo va'erã" he'i araka'e nhane renonderã mombe'u-vy. Nhande kwéry gwa'yry Hesu Cristo gwembiayhu irũrã-gwi, nhande rexakwaa porã eterei araka'e opamba'e ome'ë rei-vy nhande-vy. Upéa-rehe tojehexa porã ete katu Nhandejáry. Tomboete ete katu íxupe. ⁷⁻⁹Ta'yry Hesu gwugwy avyte-py omano-gwi, nhane resende-ma va'ekwe nhande repy-vy. Omboyke-ma nhandéhegwi nhane rembiapo vaikwe. Tuvixa mba'e Nhandejáry. Tuvixa ete nhande rexakwaa porã rei va'ekwe nhane mo'arandu-vy, oikwaa uka-vy nhande-vy ave. Outro kwéry-pe nomombe'úi araka'e ojapo va'erã. Ha nhande-vy katu oikwaa uka-ma voi va'ekwe. Yma araka'e, "Xe ra'y Cristo ojavopa va'erã xe remimbota gwive" he'i ojúepe araka'e.* ¹⁰Hi'óra-py ojapo-ma va'erã. Hemimoingo gwive ombojoja va'erã. Yváy pygwa gwive, yvy pygwa gwive ave ombojojapa va'erã. Cristo irũrã ojavopa va'erã. "Enterove va'e ruvixarã amoingo va'erã Cristo" he'i araka'e gwa'yry-rehe. ¹¹Nhandejáry nhe'ë-py hemimbota-rupi opamba'e oiko. Ne'írã vyteri ko yvy oiko jave, he'i araka'e ojúepe ojapo va'erã. Upéa-gwi nhande poravo araka'e gwe'yirá. Nhande poravo peteíxa nhamoirũ hagwã ta'yry. ¹²Ore kwéry katu orojerovia ypy va'ekwe Cristo-rehe. Upéa-gwi toromomba'e gwasu katu Nhandejáry-pe. "Iporãete va'e hekoha" toro'e hese. ¹³Ore-vy oiko hagwe-rami, ojehu ave peë-my. Pehendu ramo pe anhetegwa nhe'ë, Hesu Cristo pene resendeharã rehegwa nhe'ë porã pehendú ramo, pejerovia-ma va'ekwe Cristo-rehe. Upéi Nhandejáry ombou va'ekwe peë-my Nhe'ë Marangatu tee va'e upe he'i va'ekwe "Ame'ë va'erã". "Xe mba'e voi upe va'e, xe reminhongatu voi upe va'e" he'i pende-rehe, Nhe'ë Marangatu tee va'e ome'ë-vy. ¹⁴Nhe'ë Marangatu tee va'e ome'ë ranhe-gwi nhande-vy, jaikwaa porã nhande-vy gwarã. Entéro he'i va'ekwe gwive, "Ame'ë va'erã xe re'yí kwéry-pe" ome'ë va'erã nhande-vy Nhandejáry, nhane resendepa-vy ojúepe gwarã. "Tuvixa mba'e Nhandejáry rekoha, iporã ete voi" ja'e hese nhamboete-vy.

Paulo omondo Nhandejáry-pe onhe'ë Hesu roviaha-rehe

(Ef 4.15-16; Cl 1.9-10; Hb 13.20-21)

¹⁵⁻¹⁶Upéixa ramo, atima porã Nhandejáry-pe pende-rehe. Ahendu kuri pene rerakwã. "Ojerovia oiko-vy Nhandejáry Hesu-rehe. Nhandejáry re'yí gwive hembaiyhu" he'i pene mombe'u-vy. Upéa-gwi atima tima Nhandejáry-pe aiko-vy pende-rehe. Oração ajapo

* 1:7-9 Cl 1.14

jave, xe mandu'a pende-rehe. ¹⁷ Ajerure Nhandejáry Hesu Cristo Ru-pe. Nhande Ru tuvixa mba'e hekoha va'e-pe ajerure pende-rehe. Aipota ha'e ome'ê peê-my Nhe'ê Marangatu tee va'e pene arandu porã haggwã, ojekwaa porã haggwã peê-my Nhandejáry, peikwaa porãve haggwã íxupe. ¹⁸ Aipota pende resape pende py'a-py peikwaa porã haggwã peê-my gwarã iporã va'e. Upéa-rehe pene renói va'ekwe. Upe va'e-pe pendejeupe gwarã peha'arõ peiko-vy perovia ku'a ku'a e'y reheve. Aipota peikwaa porã Nhandejáry tuvixa ete nhande rovasa porãha. “Xe re'yí-pe gwive ahovasa va'erã” he'i hagwe-rami pende rovasa va'erã. ¹⁹⁻²⁰ Aipota peikwaa ave Nhandejáry opamba'e-rehe ipu'akaveha. Jajerovia ramo hese, nhane mbopu'aka. Oha'e-rami ave nhane mombaraete. Ha'e ipu'aka va'ekwe omano va'ekwe-rehe. Cristo-pe omopu'ã jevy va'ekwe. Upéi ombotuvixa íxupe yváy-py. Oakatúa-koty ombogwapy oyke-rehe. Cristo-pe omopu'ã hagwe-rami, nhane mombaraete ave nhande pu'akave haggwã.* ²¹ Áy Cristo oiko upe-py enterove va'e ruvixa ramo. Ipu'akave yváy pygwa-rehe gwive. Mburuvixa-rehe gwive ipu'aka. Oĩ ramo omanda va'e, oĩ ramo ipu'aka va'e, oĩ ramo yvy járy ave, ipu'akave hese kwéry. Ko yvy-rehe ndaipóri tuvixave va'e réry. Opamba'e-rehe ipu'akave Cristo. Heko apy rei e'y reheve oiko va'erã. ²² Ipogwy-py entéro mba'e omoĩ va'ekwe Nhandejáry. Hesu-rehe ojerovia va'e-pe gwive onhomboaty aty ha-rupi, enterove jaryrã omoĩ va'ekwe.* ²³ Nhande akã omoaranduha-rami nhande rete, upéixa Cristo omoarandu entéro gweroviahá gwive. Hete-rami oiko hese ojerovia va'e. Hese e'y reheve ndoiko porã porãiry. Nhande akã omoaranduha-rami nhande rete, upéixa Cristo omoarandu entéro gweroviahá gwive. Hese e'y reheve ndoiko porã porãiry. Omohynhẽmba ramo ae katu, oiko porãmba-ma hikwái. Entéro mba'e omohynhẽmba onhe'ẽ-py.

2

Ne rembiapo porã-rehe rei nane resendéiry voi

(Rm 3.24; 5.6-11; Cl 3.5-7; Tt 3.3-7)

¹ Ha peê katu omano va'ekwe-rami, ijapysape va'e-rami peiko araka'e. Pejajavy-gwi, pene rembiapo vai-gwi ave, ójehe ipu'aka e'y va'e-rami peiko araka'e. ² Áygwa reko rei-rupi peiko araka'e. Yvy járy áry-rehe rei oiko va'e ruvixa nhe'ẽ-py peiko araka'e. Nhandejáry nhe'ẽ renduse e'yha-rehe ipu'aka va'e nhe'ẽ-py peiko araka'e. ³ Upéixa ave nhande kwéry jaiko va'ekwe. Teko rei reko-rupi jaiko va'ekwe. Jajapose va'e rei jajapo va'ekwe. Yvypóry kwéry ojerereko asy va'erã-rami ave, nhande kwéry jaiko va'ekwe Nhandejáry-pe. ⁴ Ha Nhandejáry katu oporoporiahuvareko verei va'e voi, nhande rayhu tee rei va'e voi. ⁵ Jajajavy meme-gwi, omano va'ekwe-rami jaiko va'ekwe. Upe-ma ramo nhane moingove jevy va'ekwe. Cristo nhamoirũ-magwi, nhane moingove jevy va'ekwe. Ne resende rei va'ekwe. Ne rembiapo porã-rehe rei nane resendéi va'ekwe. ⁶ Cristo nhamoirũ-magwi ae, Cristo ndive nhande moingove jevy vérami va'ekwe. Cristo yke-rehe nhane mbogwapy-ma vérami yváy pygwa-rami jaiko haggwã. Jagwapy-ma vérami ave nhaime-vy ijyke-rehe. ⁷ Upéa ojapo ohendu haggwã ave herakwã kente kwéry ndoikói vyteri va'e, oiko e'y va'e, “Gwa'yry Hesu-pe ohayhu eterei-gwi, nhande rayhu tee rei va'ekwe. Nhande rovasa porã porã va'ekwe nhande rexakwaa rei-vy” he'i haggwã hese. ⁸ Pejerovia-magwi Cristo-rehe, pene resende va'ekwe pende rexakwaa rei-vy. Pendejehewi napenheresendéi va'ekwe. Pende rexakwaa rei-gwi pene resende rei va'ekwe. ⁹ Pene rembiapo porã-rehe rei, napene resendéi voi. Pene rembiapo porã-rehe rei pene resende ramo ra'e, “Xe rembiapo porã-gwi rei, xe resende va'ekwe Nhandejáry” peje rei arã ra'e. ¹⁰ Nhande apoha Nhandejáry. Hesu Cristo-pe nhamoirũ-ma ramo, nhane moingove porã va'ekwe nhane rembiapo porã porã haggwã, yma jaiko e'y ngatu he'i hagwe-ramima jajapo haggwã.

Nhande kwéry nhamoirũ ramo Cristo-pe, peteixa jaiko onhondive
(Gl 3.28)

* 1:19-20 Sl 110.1 * 1:22 Sl 8.6

¹¹ Upéixa ramo pene mandu'a katu pende rekokwe-rehe. Yma ore kwéry e'y va'e peë, judeu e'y va'e peë. Ore kwéry oronhepirekytí va'e. Ha peë katu, "Onhepirekytí e'y va'e" he'i pende-rehe judeu kwéry pene mboete e'y-vy. Upéixa Nhandejáry nhe'ê-py ogwerekogwete, upéixa ojapo ójehe judeu kwéry. Áy pene mandu'a katu pende rekokwe-rehe, pene mboete e'y jave. ¹² Upe jave Cristo e'y reheve peiko araka'e. Yvy akéno-py oiko va'e-rami peiko araka'e. Nhandejáry rembiporavo e'y gwe'yirá e'y araka'e peë. Peë-my "Xe rendu ramo, apohovasa va'erã" nde'íry araka'e Nhandejáry. Gwe'yí-pe he'i tee va'ekwe, nde'i reíry va'ekwe, upéa nde'íry araka'e peë-my. "Ndaipóri nhande-vy iporã va'erã" he'i va'e-rami ojóupe, peiko araka'e. Nhandejáry oiko e'y va'e-rami peiko araka'e áry porukwepupi peiko-vy. ¹³ Áy katu Cristo Hesu-pe pemoirũ-gwi, ndapeikovéi-ma mombyry íxugwi. Gwugwy avyte-py omano-gwi pende-rehe, Cristo irũ ramo-ma peiko. Penhemoagwĩ-ma íxugwi peiko-vy. ¹⁴ Judeu kwéry, judeu e'y va'e-pe ave, onhondive imbojoja-vy ou Cristo va'ekwe, peteixa ogwerekoghawã onhondive. Upéixa nhande kwéry nhamoirũ ramo íxupe, peteixa jaiko arã onhondive. Ojejuka uka ramo, peteixa ombojoja va'ekwe judeu, judeu e'y va'e ndive. Ijokoha oipe'a va'e-ramima, ombojoja anive hawã ija'e'y ojóehe, oiko porã hawã onhondive. ¹⁵ Judeu rekoha-rehe, Moisés amyri remimombe'ukwe-rehe ave, "Ijapy-ma" he'i hese. "Ndaipokatuvéi-ma, naimbaraetuvéi-ma" he'i. Omopeteise judeu judeu e'y va'e ndive. Oipota omoirũ ojóupe peteixa ombojehe'a hawã íxupe kwéry, onhemboheko pyahu va'e-rami oiko hawã. Upéixa ombojoja porã judeu judeu e'y va'e ndive. ¹⁶ Kurusugwasu-rehe omano va'ekwe Cristo, omoingo porã hawã íxupe kwéry ani hawã ojóehe ija'e'y tei. Omano-gwi kurusugwasu-rehe, Nhandejáry re'yí ramo nhane moingo. Ombojoja ojóehe ija'e'y va'ekwe-pe onhemboeko pyahu va'e-rami oiko hawã peteixa. ¹⁷ Upéixa ramo ogwahẽ ou-vy va'ekwe Cristo nhe'ẽ porã omombe'u-vy. Peë-my mombyry íxugwi peiko va'e-pe, "Pombojoja katu pende reko xe reko-rehe pende py'agwapy hawã" he'i. Ore-vy agwĩ íxugwi oroiko va'e-pe, upéixa ave he'i.* ¹⁸ Nhande kwéry, judeu va'e, judeu e'y va'e ave, nhandejéhegwi rei ndaha'ei peteixa. Ha Cristo omano-gwi nhande-rehe katu, upéa-gwi ae peteixa nhande rereko Nhe'ẽ Marangatu tee va'e. Nhane nhe'ẽ peteixa ogweraha Nhandejáry-pe. ¹⁹ Upéa-gwi peë kwéry judeu e'y va'e ndaha'evéi-ma ore kwéry e'y va'e. Ndapeikovéi-ma ha'e ovyv e'y-py oiko va'e-rami. Áy Nhandejáry re'yí irũ ramo peiko-ma. Áy peteí óga pygwa-rami peiko. Nhandejáry róga pygwa peë.

²⁰ Pejeapysaka katu xe nhe'ẽ-rehe. Amombe'u-ta Nhandejáry re'yí rekoha ogagwasu rehegwa nhe'ẽ-rami. Nhandejáry re'yí gwive Nhandejáry róga-rami oiko. Yma gware Nhandejáry nhe'ẽ-py omombe'u va'ety-pe Hesu remimondo va'e kwéry-pe ave he'i Nhandejáry róga nhepyrũha. Óga renagwã he'i Hesu remimondo-pe. Peë-my he'i hambiporurã omopu'ã hawã óga. Ha Cristo-pe katu he'i okytagwasu. ²¹ Opamba'e jekoka voi ha'e. Íxugwi tuvixave xave oho-vy Nhandejáry renagwã, imarangatu va'e voi ha'e. ²² Ha peë kwéry ave Cristo pemoirũ-gwi, peiko va'erã Nhandejáry re'yí gwive ndive. Hesepe ombojoja omoi-vy va'e-rami ogagwasu apo-vy, pene mbojoja ave va'erã peteixa Nhandejáry re'yí ndive pene mbojehe'a-vy. Hendive kwéry oiko va'erã Nhandejáry. Nhe'ẽ Marangatu tee va'e-rupi oiko va'erã.*

3

Yma oikoe koe va'ekwe áy peteixa-ma onhomoaty
(Cl 1.24-29)

¹ Upe va'e-rehe ajapo-ta oração Nhandejáry-pe pende-rehe. Xe Paulo Cristo-rehe ha-py anhemoi ave va'e preso. Peë ore kwéry e'y-rehe ha-py, anhemoi va'e preso. Anhemoi ramo jepe, ajapo-ta joty oração Nhandejáry-pe pende-rehe. ² Pehendu nipo ra'e xe rerakwã. Nhandejáry omombe'u va'ekwe xe-vy xe rembiaporã pende-rehe xe rexakwaa rei-vy. ³ Xe-vyete oikwaa uka Nhandejáry ojapo va'erã. Xe-vyete ohexa uka va'ekwe.

* 2:17 Is 57.19 * 2:22 Cl 1.15-23

Hembiaporã-rehe ndahetái xe nhe'ê ahai kuri ko kwatia-rehe. ⁴Pemonhe'ê ramo xe ahai va'ekwe, peikwaa va'erã xe Cristo rembiaporã oikwaa-ma va'e. ⁵Yma araka'e avave-pe nomombe'úi ojapo va'erã Nhandejáry. Ha ko'ánga katu gwe'yí ete-pete oikwaa uka. Gwemimonde va'e-pe, onhe'ê-py omombe'u va'ety-pe ave oikwaa uka. Nhe'ê Marangatu tee va'e-rupi oikwaa uka ore-vy. ⁶Mbava'e tipo he'i ojapo va'erã? A-rami he'i: "Nhe'ê porã renduha gwive ahovasa va'erã" he'i Nhandejáry. "Yma judeu pegwarã mante ãy ambojoja-ta judeu e'y-pe ave ime'ê-vy" he'i. Judeu kwéry-pe, "Aporesende va'erã" he'i tee va'ekwe, nde'i reíry voi. Upe he'i va'ekwe, he'i ave judeu e'y va'e-pe judeu pegwarã gwive ãy ombojoja ime'ê-vy judeu e'y-pe ave. Cristo-pe omoirũ-ma ramo nhe'ê porã rendu-vy, ombojoja ime'ê-vy judeu e'y-pe ave. Cristo-pe omoirũ irũ-gwi, oikoe koe va'e peteí va'e rete-rami oiko-ma ãy. Judeu judeu e'y ndive oiko-ma onhondive. ⁷Upéa nhe'ê porã amombe'u hagwã Nhandejáry rembigwái ramo aiko-ma. Hembigwái ramo xe moingo-ma xe rexakwaa rei-vy, Hesu rehegwa nhe'ê porã amosarambi hagwã. Xe mombaraeteharupi amombe'u mbe'u aiko-vy. ⁸Xe nanhembotuvixái. Anhembohekomirive va'e aiko-vy. Oime raẽ va'e Nhandejáry re'yí gwive heko porãve xéhegwi. Ha xe-vy katu omombe'u xe rembiaporã va'ekwe Nhandejáry xe rexakwaa rei-vy, araha hagwã amombe'u-vy judeu e'y va'e kw'ery-pe Hesu rehegwa nhe'ê porã, "Tuvixa mba'e Cristo. Ha'eixagwa ndaipóri. Ndikatúi jahexa kwaa porã tee hekoha hese. Oĩ meme nhande-vy oikwaa uka porãve hagwã." Upeixagwa oipota xe amombe'u. ⁹Oipota xe amo'arandu entéro va'e-pe amombe'u-vy mba'éixa ojekwaa-ta Nhandejáry rembiaporã. Ha Nhandejáry katu opamba'e apoha voi. Opamba'e reko járy voi ha'e. Upéixa araka'e nomombe'úi araka'e avave-pe. Yma gwive ãy peve nomombe'úi avave-pe gwembiaporã. ¹⁰Áy katu Nhandejáry oikwaa uka-ma gwí yváy pygwa omanda va'e kwéry-pe. Ipu'aka va'e kwéry-pe oikwaa uka-ma ave gwembiapo. Entéro Hesu reroviaha gwive, yma oikoe koe va'ekwe ãy peteíxa-ma onhombotaty aty okwa-vy ohexa ramo, oikwaa-ma Nhandejáry arandu, ombojojapa ramo. Mba'eixagwa xagwa pa hembiapo porã va'erã oikwaa-ma va'erã. ¹¹Ne'íra oiko ramo vyteri araka'e ko vvy, yma gwive he'i hagwe-ramima, ãy kóa ojapo-ma Nhandejáry. Nhandejáry Hesu Cristo rembiapo voi. ¹²Íxupe nhamoirũ-gwi, hese jajerovia-gwi, Nhandejáry ndive nghanhomongetase ramo, ndaiporivéi nhande jokoharã. Nhatí e'y reheve ae nghanhemoagwí íxugwi. Nhatí e'y reheve nhande rete nghanogwahẽ-ma íxupe oração apo-vy. ¹³Upéa-rehe ani pevy'are'y xe-rehe. Pende-rehe ha-py ajerereko asy ramo jepe, pende rovasa porã joty va'erã Nhandejáry.

Aipota peikwaa Cristo heko porayhu tee rei va'e-pe

¹⁴Upéa-gwi anhesũ xe retypy'ã-rehe Nhandejáry renonde-py oração apo-vy. ¹⁵Nhandejáry Nhande Ru voi. Ha'e Nhande Ru tee-gwi, "Nhande re'yí" ja'e yváy pygwa-rehe yvypóry-rehe ave. ¹⁶Ha'e hekoha porã tee rei va'e. Upéa-gwi ajerure íxupe pene mombaraete hagwã, Nhe'ê Marangatu tee va'e oiko hagwã pende py'apy-py. ¹⁷Hese pejerovia-gwi, aipota Cristo oiko pende py'apy-py. "Hope porã ramo, hapo porã ave" ja'e. "Óga porã ramo, okyta porã ave" ja'e. Upéixa ete Cristo oiko-gwi pende py'a-py, peiko porã va'erã pejoyhayhu-vy. ¹⁸Ajerure meme Nhandejáry-pe he'yí gwive ndive pene mombaraete hagwã. Aipota pene mo'arandu porã peikwaa hagwã Cristo, heko porayhu tee rei va'e-pe. Enterove va'e voi hembiayhu. Oporohayhu ku'a ku'a e'y va'e voi ha'e. Oporohayhu meme va'e. Ohayhu okanhy va'e. Mombyrygwa hembiayhu. Yváy pygwa gwive ohayhu. Yvygwy pygwa jepe ave ohayhu. Ndaipóri voi hembiayhu e'y va'e. ¹⁹Cristo reko porayhu kwaapa va'e ndoikói ramo jepe, heko porayhu ndajakwaa porã etéi vyteri ramo jepe, aipota peikwaa porãve rãve joty pende rayhu tee vereiha. Aipota pemboatyve tyve Nhandejáry remime'ê me'ê pendejeupe. Ha'e hekoha tee-rehe aipota pene mohynyhẽ nyhëve katu hemime'égwe rereko-vy. ²⁰Ha'e ko jajerureha-rami íxupe ome'ê nhande-vy nhande rovasa porã kwaa-vy. Oĩ jajerure e'y hese va'e, oĩ nhane mandu'a e'y hese va'e. Ha'e katu hetave tave kwaa voi ome'ê joty nhande-vy,

* 3:12 Hb 4.16; 10.19-22 * 3:16 Rm 5.5

nhane mombaraete oiko-vygui. ²¹ Tonhemomba'egwasu meme katu Hesu reroviahia onhombotat atyha-rupi. Cristo oikoha-rupi tonhemboete ete voi opa e'ÿ-rehe. Amém.*

4

Nhane akā-rami oiko Cristo

(Rm 12.6-8; 1 Co 1.10; 12.8-11; Cl 3.12-15; 1 Pe 3.8; 4.10-11)

¹ Nhandejáry Hesu Cristo rembigwái ramo xe aiko-gwí, xe moí kuri preso. Upéa-gwí anhemonhe'ê-ta peê-my. Pene mboheko marangatu hagwā pene renói va'ekwe Nhandejáry. Pende reko marangatu e'ÿ ramo, pemotí arā íxupe. ² “Xe katu xe tuvixave” ani peje rei ojúpe peiko-vy. Penhembohekomiríve ae joty peiko-vy. Pejogwerekó porā katu kirirí po-py. Ani peropoxy pya'e a'e teí ojoekoha. Pejoporihuverekó rei katu pejoyhayhu-vy. Ani pejoteta teí. ³ Penhangareko porā pendéjehe peteíxa peiko hagwā onhondive. Nhe'ê Marangatu tee va'e pene mbo'eha-rami peiko hagwā pende joja porāve ráve hagwā. ⁴ Cristo rete-rehe oí va'e-rami peteíxa peiko. Peteíxa oiko nhande py'a-py Nhe'ê Marangatu tee va'e. Peteíxa nhande pe'a va'ekwe gwe'yirā. Peteíxa nhande kwéry nhaha'arō Hesu ogwahê jevytaha áry. ⁵ Peteíxa nhande kwéry Járy va'e voi Nhandejáry. Peteíxa jajeroivia hese. Peteíxa nhane mongarai va'ekwe. ⁶ Nhande kwéry va'e Járy, nhande kwéry va'e Ru ave Nhandejáry voi. Ha'e anho peteí oiko va'e. Ha'eixagwa ndaipóri. Nhande kwéry Ruvixa va'e. Nhane moingoha. Nhane mombaraeteha imomba'apo uka-vy. Nhande py'a-py oiko va'e Nhandejáry voi. ⁷ Nhande kwéry peteí teí va'e-pe nhande reko me'ê me'ê. Ojoha'e ha'e ramigwa e'ÿ-py nhande reko me'ê Cristo. Peteí teí nhande rexakwaa rei-gwí, nhande reko me'ê me'ê nhande-vy. ⁸ Upéixa he'i Nhandejáry kwatia nhe'ê Cristo-rehe:

“Yváy-py ojeupi oho-vy. Oho jave, ogweraha omó hagwā preso anháy nhe'ê-py okwa va'e-pe. Ha kente kwéry-pe heta gwemime'ê ome'ê me'ê”*

he'i Nhandejáry kwatia nhe'ê Cristo-rehe. ⁹ “Ojeupi” he'i ramo, mbava'e-pe he'i, oí oporandu va'e. A-rami he'i omombe'u-vy. Ogwejy ranhe va'ekwe Cristo ko yvy-py yváy-gwí. Ha upéi katu ojeupi jevy va'ekwe oho-vy. ¹⁰ Upéixa upe ogwejy va'ekwe, upe ojeupi jevy va'ekwe oho-vy peteíxa. Ojeupi va'ekwe Cristo yvate áry paha-py oho-vy oparupi omohynhê hagwā ojéhegwí. ¹¹ Ha'e katu nhande rekorā ome'ê me'ê va'e. Peteí teí nhande-vy ome'ê me'ê nhande rekorā. Peteí va'e-pe oheko me'ê gwemimondorā ramo. Outro-pe oheko me'ê inhe'ê-py mba'e kwaa ukaharā. Outro-pe oheko me'ê Hesu rehegwa nhe'ê porā mombe'uharā. Outro-pe oheko me'ê heroviahia nhangarekoharā. ¹² Oipota nhande kwéry heroviahia va'e nhandehopytygwō kwaa. Oipota nhandehomombaraete nhandehopytygwō-vy, Cristo rete-rehe oí va'e-rami jaiko hagwā. ¹³ Oipota peteíxa jarovia porāve ráve Nhandejáry ra'y-pe. Jaikwaa porāve ráve íxupe oipota nhande agwyje porā hagwā. Kakwaa va'e reko-rami oipota jaiko. Mitā reko-rami ndoipotáiry jaiko. Cristo reko jejavy e'ÿ porā-rupi oipota jaiko jaheko arupitypa hagwā íxupe. ¹⁴ Upe ramo ndajaikovéi-ma mitā reko-rami. Ojererova rova va'e-rami ndajaikovéi-ma. Kanóa-rami y-pe ojererosyry uka oho-vy va'e-rami, ndajaikovéi-ma nhande resa rerova uka hagwā mo'ā. Upe ramo nanhahenduvéi-ma va'erā ijapu va'e nhe'ê, nahendu e'ÿ va'erā-py nhane mbo'ese va'e nhe'ê nanhahenduvéi-ma. Nhane mbotavysse nhande resa rerova hagwā mo'ā. Tape ijapu rei va'e-rupi oipota mo'ā jaha va'e. ¹⁵ Ani nahendu teí aipo va'e nhe'ê. Anhetegwa va'e ae nhamombe'u mbe'u ojúpe jajohayhu-vy. Aipo ramo, okakwaa va'e-rami peteíxa nhamoirū porāve ráve va'erā Hesu Cristo-pe. Nhane akā-rami oiko Cristo. ¹⁶ Nhane akā katu nhande rete mo'aranduha voi, imbojojapa porāha voi. Nhane mo'arandu-gwi ojepota potapa ojóhe onhomombaraete-vy nhande rete. Heko heko-rupi peteí teí oiko ramo, okakwaa porā nhande rete. Upéixa nhande kwéry Hesu-rehe jajeroivia va'e gwive nhande mbaraeteve teve jajohayhu-vy. Cristo nhande

* 3:21 Jd 24-25 * 4:8 Sl 68.18

mo'arandu-gwi, nhanhomombaraete ete jaiko-vy, nhande reko agwyjeve jeve va'erā jaha-vy. Nhanhomombaraeteve teve va'erā jaha-vy.*

*Iporā perova pende rekoha tujakwe pene mboheko pyahu jevy hagwā
(Cl 3.5-14)*

¹⁷ Upéixa ramo anhemonhe'ē-ta peē-my Nhandejáry réry-py ha'e-vy: Anive peiko rei teĩ judeu e'ỹ va'e-rami. Ha'e kwéry tekoha e'ỹ-rupi rei oiko. Ojúepe he'i va'e rei ha'e ojapo, oikwaa va'e rei ojapo. Ani ereiko ha'e-rami. ¹⁸ Inhakā hatā-gwi mba'eve ndoikwaái. Tekoha-rupi ndoikói-gwi ndoikwaái gwekoha. Upéa-gwi pytū-my rei oiko va'e-rami ndoikwaáiry hikwái gwaperā. Upéa-gwi mombyry oiko Nhandejáry-gwi. ¹⁹ Notĩ kwaavéiry-ma hikwái. Tekoha vai-rupima voi ivaive ive-ma oho-vy. Upeixagwa ojapo rire, ojaposeve seve-ma hikwái.

²⁰ Ha Cristo rekoha omombe'u jave peē-my, upeixagwa nhe'ē nomombe'úi va'ekwe peē-my. ²¹ Anhetegwa va'e ae oikwaa uka va'ekwe peē-my Hesu rehegwa. Hemimombe'u peē-my pehendu va'ekwe. ²² He'i va'ekwe peē-my pende rekoha tujakwe-rehe: “Perova katu pende rekoha. Pejapose va'e rei pejapo-gwi, omano va'erā-rami peiko va'ekwe. Ivaive ive oho-vy pende reko tujakwe. ²³ Āy iporā katu penhemoatyrōmba pene akā porā jevy hagwā. ²⁴ Iporā perova pende rekoha tujakwe pene mboheko pyahu jevy hagwā Nhandejáry. Pende reko me'ē va'erā Nhandejáry ha'e heko-rupima peiko hagwā, pende reko jejavy e'ỹ reheve pende reko marangatu tee hagwā” he'i va'ekwe peē-my.**

²⁵ Upéa-rehe perova katu pende reko apukwe. Nhande kwéry akā-rami oiko Cristo. Peteĩ hete vérami jaiko íxupe. Upéixa-gwi peteĩxa nhande jojaha-rami jaiko. Nhandéjehe anho rei ndajaikovéi-ma. Upéa-gwi anive pende apu pende rapixa-pe. Anhetegwa ae pemombe'u ojóupe.* ²⁶ Nde poxy ramo jepe, ani erejevavy hagwā-rami ereiko. Ani pyhare peve nde poxy. Epoi mani nde reko poxy-gwi.* ²⁷ Nde poxy jave, ereheja-ma ipu'aka nde-rehe anháy ruvixa. Upéa-gwi ani erenheme'ē íxupe nde-rehe ipu'aka hagwā-rami. ²⁸ Taimonda e'ỹve katu oiko-vy imonda va'e. Tomba'apo ae katu ojóupe gwarā-rehe oiko-vy. Opo-rupi togana oiko-vy ome'ē hagwā gwapixa remikotevẽ. ²⁹ Ani penhe'ē rei rei ojóehe. Penhe'ē porā ae katu ojóupe penhombopy'agwapy jevy hagwā. Pende rapixa pemo'arandu hagwā-rami pemombe'u íxupe. Upéixa ramo ae ogwerovy'a arā pene nhe'ē henduháry.

³⁰ He'i va'ekwe pende-rehe Nhe'ē Marangatu tee va'e: “Xe mba'e” he'i, “Xe reminhon-gatu” he'i pende-rehe. “Cristo ogwahêha óra peve pende reraha hagwā, anhangarekota pende-rehe aiko-vy” he'i pende-rehe. Upéa-gwi ani peme'ē íxupe vy'are'ỹ. Pejapo vai ramo katu, pembovy'are'ỹ arā íxupe. ³¹ Anive pende a'e e'ỹ teĩ ojóehe. Pejohayhu rei katu. Anive pende poxy pya'e rei ojóupe. Pehexa uka katu pende reko kirirĩ ae katu pende rapixa-pe. Anive pejogwereco poxy teĩ. Pejogwereco rayhu ae katu. Penhonhe'ē mbojevvy jevy-vy, anive penhe'ē hatā ojóupe. Pejogwereco kirirĩ ae katu. Anive penhe'ē vai rei ojóehe. Penhe'ē porā ae katu ojóupe. Anive pejohayhu e'ỹ teĩ. Pejohayhu ae katu peiko-vy. Upe tekoha tujakwe-gwi pepoi katu. ³² Pende py'a porā katu ae ojóehe. Pejoporihuvereco katu. Nde-rehe hembiaipo vai va'e-pe, ani nde poxy íxupe. Pejoporihuvereco rei joty íxupe, Cristo-rehe ha-py Nhandejáry pende porihuvereco rei hagwe-rami.

5

Peē Nhandejáry ra'y-gwi, tapeiko heko-rupi

¹ Peē Nhandejáry ra'y voi. Hembiaiyhu va'e voi peē. Upéa-gwi tapeiko heko-rupi. Peheko ra'ā íxupe. ² Ha Cristo pende rayhu-gwi va'ekwe, nahakate'ỹi gwekove-rehe. Ojejúka uka rei va'ekwe ae. Ijukaharā-pe onheme'ē-ma ramo, gwu remimbota ojapo-ma ramo,

* 4:16 Cl 2.19 * 4:24 Rm 12.2 * 4:24 Gn 1.26 * 4:25 Zc 8.16 * 4:26 Sl 4.4

ogwero'vy'a íxupe Nhandejáry. Nhande rayhu hagwe-rami, pejohayhu yhu tee rei katu peiko-vy.*

³ Peë Nhandejáry re'yí heko marangatu va'e voi. Toiko e'y pene pa'ü-my tekoha vai-rupi oiko va'e. Heko ky'a va'e toiko e'y katu. Ojapose va'e rei ojapo va'e toiko e'y katu pene pa'ü-my. ⁴ Otí kwaa e'y va'e nhe'ë ani perovy'a teĩ. Ani penhe'ë rei, ani penhe'ë vai ojóehe penhembohory-vy. Hekovía petima porã ae katu Nhandejáry-pe. ⁵ Oĩ ramo tekoha vai-rupi oiko va'e, heko ky'a rei va'e, ojapose va'e rei ojapo va'e. Upéa Nhandejáry e'y-pe omboete voi. Heko ramigwa íxupe gwarã ndaipóri. Nhandejáry ndive Cristo oiko ha-py nhane ruvixarã ndaipóri íxupe gwarã.*

⁶ Ani pene mbotavy teĩ avave: “Upeixagwa apoha oiko va'erã Nhandejáry ndive” he'i rei va'erã peë-my. Upeixagwa apoha-pe ogwereco asy va'erã Nhandejáry onhe'ë renduse e'y-gwi. ⁷ Upéa-gwi heko ky'a va'e-pe ani pemoirũ teĩ peiko-vy. ⁸⁻⁹ Yma pytũ-my rei oiko va'e-rami peiko araka'e. Áy katu Nhandejáry-pe pemoirũ-magwi peteixa, arakatu-py oiko va'e-rami peiko-ma, osê-ma ipotĩ ha-my va'e-rami peiko-ma. Ipotĩ ha-my osê va'e-rami oiko va'e, opaixagwa iporã va'erã ojapo. Heko jejavy e'y oiko-vy. Heko apu e'y va'e oiko-vy. Upéa-gwi arakatu pygwa-rami peiko katu. Anive peiko pytũ pygwa-rami.* ¹⁰ Peheka katu pejohu hagwã Nhandejáry remimbota. ¹¹ Ani pemoirũ gwĩ hekoha vai nhemi va'e-pe. Peho ae katu tape porã-rupi. Ohesape va'e-rami peiko, ojekwaa porãve hekoha vai hese. ¹² Nhemi ha-py ha'e kwéry hembia'po ky'aha nhamombe'u mbe'u ramo katu ojóupe, nhane motĩ voi hembia'pokwe. ¹³ Okanhy va'e oho ramo gwesapeharã-py, jaikwaa-ma hese hekoha. Ojekwaa porã rire, osê-ma ipotĩ ha-my. Arakatu-pyma oho. ¹⁴ Upéa-gwi gwĩ oke va'e-rami va'e-pe, ja'e:

“Epáy katu. Ani erepyta gwĩ omano va'ekwe-rami. Evy katu. Ombovy jevy va'e-rami eiko.

Tape porã-rupima eiko. Nde resape arã Cristo” ja'e.

¹⁵ Penhangareko porã katu pendéjehe peiko porã hagwã. Hi'arandu e'y va'e-rami ani peiko. Ne arandu katu ereiko-vy. ¹⁶ Áygwa hekoha vai voi. Upéa-gwi pene rembia'po porã meme katu. Mamo peime ha-rupi, pejapo porã katu.* ¹⁷ Ani oikwaa e'y va'e-rami peiko teĩ. Nhandejáry remimbota oikwaa va'e ramo ae peiko. ¹⁸ Ani peka'u teĩ. Ipu'aka arã tekoha vai pende-rehe. Tapende py'a mohynhẽ ae katu Nhe'ë Marangatu tee va'e. ¹⁹ Peparatorahéi katu ojóupe gwarã. Nhandejáry nhe'ë héry va'e Salmo-py eporahéi. Eporahéi hino-py. Mborahéi-py eporahéi ave. Pende py'a gwíve peporahéi Nhandejáry-pe. ²⁰ Nhandejáry Hesu Cristo réry-py petima porã meme opamba'e-rehe. Opamba'e Nhandejáry Nhande Ru remime'ë-rehe petima porã katu íxupe.*

Nhane ména nhane rembireko rehegwa nhe'ë

(1 Pe 3.1-7; 1 Co 7)

²¹ Peë kwéry-pe ha'e-ta. Pehendu katu onhonhe'ë kwéry Cristo-pe pemboete-gwi. Enterove tainhe'ëngendu katu. ²² Ko'ánga anhe'ë-ta pene rembireko kwéry-pe. Pehendu katu pene ména nhe'ë kwéry. Nhandejáry nhe'ë pehenduha-rami ave, pehendu pene ména nhe'ë. ²³ Entéro Hesu reroviaha gwíve huvixagwasu Hesu. Nhande kwéry Hesu rete-rami. Nhane akã-rami ha'e. Nhane arandu-rami ha'e ave. Hete-ramigwi, nhane resendehaty ave. Upéixa nhane rembireko kwéry ruvixa nhande kwimba'e. ²⁴ Hesu nhe'ë nhahenduha-rami, tohendu katu nhane nhe'ë gwíve nhane rembireko kwéry. ²⁵ Ko'ánga pene ména kwéry-pe peha-ma anhe'ë-ta. Pehayhu tee katu pene rembireko kwéry-pe. Ha Cristo katu, nhande kwéry, he'yí va'e-pe, hese jajero'via va'e-pe, nhande rayhu tee va'ekwe. Ojejuka uka rei va'ekwe nhande-rehe. Ojukaharã-pe onheme'ë va'ekwe. Cristo nhande rayhuha-rami pehayhu pene rembireko kwéry-pe. ²⁶ Ha'e oipota nhande reko ipotĩ, oipota nhande rete marangatu.* ²⁷ Onhemoirũ ukase nhande-vy. Nhande py'a hesakã va'e-rami oipota. Nhande py'a potĩ porã oipota imarã e'y reheve. Ipisýi

* 5:2 Êx 29.18 * 5:5 Tg 4.4; 1 Jo 2.15-16 * 5:8-9 Jo 8.12; 12.35-36; 1 Ts 5.5-6; 1 Jo 1.5-7 * 5:16 Cl 4.5 * 5:20 Cl 3.16-17 * 5:26 Cl 3.18-4.1

porā va'e-rami oipota. Ikuru kuru e'ŷ va'e-rami oipota nhande py'a ipotī marangatu porā, ivai e'ŷ reheve. Upéixa nhande rayhu tee Hesu nhande rekove-rehe hakate'ŷ-gwi.²⁸ Upéixa ete voi tohayhu gwembireko kwéry-pe. Gwete ohayhuha-rami ave tohayhu gwembireko kwéry-pe. Nhande rembireko-pe jahayhu ramo, jahayhu nhande rekove-pe ave.²⁹ Gwekove rayhuha e'ŷ ndoikói. Enterove ohayhu gwekove. Nhane rakate'ŷ katu nhande rete-rehe, nhanhangareko porā katu hese. Cristo nhande-rehe onhangarekoha-rami voi nhanhangareko nhande rete-rehe.³⁰ Nhande kwéry hese jajerovia va'e Cristo rete-rami. Gwete-ramigwi, onhangareko nhande-rehe. Upéixa ete nhane rembireko nhande rete-rami. Nhandéjehe nhanhangarekoha-rami ave, petēi tei nhanhangareko nhane rembireko-rehe.³¹ Upéa-rehe he'i Nhandejáry nhe'ē:

“Kwimba'e oheja gwu-pe, osy-pe oheja ave, petēixa oiko hagwā gwembireko ndive. Omenda rire, mokōi-rami e'ŷ oiko. Petēixa oho onhondive. Onho'arandu-py meme oho”*

he'i Nhandejáry kwatia nhe'ē.³² Jahexa ramo omenda va'ekwe petēixa oiko ramo onhondive, Nhandejáry oikwaa ukave ukave nhande-vy nhande rekorā. Omenda va'e reko jahexa ramo mba'éixa nhande heroviaha va'e jaiko-ta Cristo reko irūrā oikwaa uka nhande-vy.³³ Aipo ramo petēi tei peē-my amombe'u-ta pehendu porā hagwā. Uka rekove pehayhuha-rami ave, pehayhu pene rembireko kwéry-pe. Ha'e-ta ave peē kunhagwe-pe, pemboete hagwā pene ména kwéry-pe.

6

Nhane mitā nhande ru nhande sy rehegwa nhe'ē

(Cl 3.20-21)

¹ Āy ne mitā va'e anhemonhe'ē-ta peē-my. Peē Hesu reroviaha va'e voi. Upéa-gwi iporā katu pehendu meme pende ru, pende sy nhe'ē.²⁻³ Nhandejáry remimombe'ukwe a-rami: “Pemboete pende ru pende sy ave peiko porā hagwā. Peiko pukuve arā ko yvy-rehe”* he'i. Upéixa voi hemimanda ypy nhande-vy gwarā mombe'u-vy.

⁴ Āy túvy kwéry-pe anhemonhe'ē-ta. Ani pehekoteta tei nde ra'y kwéry-pe, nde rajy kwéry-pe pembopoxy-vy. Pemongakwaa porā ae katu. Nhandejáry onhemonhe'ēha-rami nhande-vy nhane mbo'ēha-rami ave, penhemonhe'ē katu íxupe pembo'e-vy.

Nhande nhandemomba'apo rei va'e, nhande nhaporomomba'apo va'e rehegwa nhe'ē

(Cl 3.22; 1 Tm 6.1-2; Tt 2.9-10; 1 Pe 2.18)

⁵ Āy penhemomba'apo rei va'e anhemonhe'ē peē-my. Pehendu meme katu nde járy yvy pygwa nhe'ē. Cristo pehenduha-rami, pemboete nde járy nhe'ē nde py'a gwive. ⁶ Oī oipota va'e ijáry imandu'a porā hese. Ijáry resa-py ohendu voi inhe'ē. Ndoikovéi ramo katu, nohenduvéi-ma inhe'ē. Ani peiko upe va'e reko-rupi. Pehendu ae katu inhe'ē. Cristo rembigwái-rami pehendu joty inhe'ē. “Cristo-pe ae katu xe amba'apo” peje joty pendejúpe. Nde py'a gwive pehendu joty inhe'ē Nhandejáry remimbota apo-vy. ⁷ Nde py'a gwive emba'apo. Nhandejáry-pe vérami eremba'apo. “Amba'apo teko rei anho-pete” ani ere ndejúpe. ⁸ Nde ne momba'apo rei va'e nde rerekoseha-rami rei nde rereko. Nde ereporomomba'apo va'e ave. Pene rembiapo porā porākwe-rami Nhandejáry pende rereko joty va'erā. Upéa peikwaa voi. ⁹ Oī pene pa'ū-my oporomomba'apo va'e. Nde ereporomomba'apo va'e anhemonhe'ē-ta nde-vy. Ereko porā katu ne rembigwái-pe. Ani erereko poxy-py íxupe. Oime ko Nhandejáry yváy-py. Nde járy ijáry ave. Enterove va'e-pe ogwereco petēixa. Upéa-gwi ereko porā katu ne rembigwái-pe.*

Tapene mombaraete katu Nhandejáry, anháy ruvixa nhe'ē oike e'ŷ hagwā nhande-rehe

(1 Ts 5.8; 1 Pe 5.8-9)

¹⁰ Ko'ánga ojoaky kwéry amombe'uve-ta peikwaa porā hagwā pene rembiaporā. Penhemombaraete ete katu Nhandejáry-pe pemoirū-vy petēixa. Ha'e tuvixa mba'e, pene

* 5:31 Gn 2.24 * 6:2-3 Êx 20.12; Dt 5.16 * 6:9 Cl 4.1; Dt 10.17

mbopu'akaha voi. ¹¹ Tapene mombaraete katu Nhandejáry. Soldado omondeha-rami gwete-rehe hatã va'e, upéixa pemonde ave pende rete gwive jokoha ramigwa, anháy ruvixa nhe'ê oike e'y hagwã pende py'a-py pono ho'arandu-py pende reity gweko-rupi. ¹² Teko rei ndive anho mante nanhanhorairõ váiry jajoityse-vy. anháy ruvixa ndive ae katu nhandhorairõ pono jajeity uka íxupe. Oĩ ave áry pygwa jepe Nhandejáry e'y va'e, hekoha vaive va'e nhandhorairõ va'e ndive. Oĩ anháy ruvixa kwéry arygwy rupigwa nhande-rehe omandase va'e, nhande-rehe ipu'akase va'e jajoko va'e íxupe. Oĩ entéro pytũ-my rei oiko va'e-rami oiko va'e ruvixa ¹³ Upéa-gwi Nhandejáry gwigwa-py ae pejavo katu pende rete pono oike anháy nhe'ê pende py'apy-py pono pende reity gweko-rupi, ipu'akaseha áry-py ou-vy pende-rehe. Pemonde ranhe-rami katu, napende reityíry arã. Opu'ã oĩ-vy va'e-rami joty ndape'ái arã. Are penhorairõ rire, are pejoko joko rire peiko-vy, ndape'ái joty arã. ¹⁴ Pejoko katu anháy-pe. Ani erejeity uka íxupe. Pemonde ranhe katu nde ku'a kwaha. Nhande ku'a kwaha, nhande reko apu e'y va'e-rehe ae he'i nhande-vy. Upéi pemonde pene kamisa ramigwa hatã va'e. Nhande kamisa hatã va'e, nhande rekoha jejavy e'y va'e-rehe ae he'i nhande-vy.* ¹⁵ Upéi pemonde pende py rehegwa pende py syry e'y hagwã. Nhande py rehegwa, Hesu rehegwa nhe'ê porã nhane mbopy'agwapy va'e, nhamombe'u va'erã-rehe ae he'i nhande-vy.* ¹⁶ Upe rire, pereko pende rete jokoha ramo pono pende rapy vérami anháy ruvixa pende api ramo, pembogwe hagwã ae hemimombo. Nhande rete jokoha, Hesu-rehe jajeroviaha-rehe ae he'i nhande-vy. ¹⁷ Upéi emonde ne akã ryrũ hatã va'e. Nhane akã ryrũ, nhane resendeharã-rehe ae he'i nhande-vy. Upéi eipyhy katu nde kysepuku haimbe jovái va'e, Nhe'ê Marangatu tee va'e remime'êgwe. Kysepuku, Nhandejáry kwatia nhe'ê marangatu-rehe ae he'i nhande-vy. Upe va'e kysepuku ramigwa-py pejoko katu anháy-pe, Nhandejáry nhe'ê-py pembojevvy íxupe.* ¹⁸ Pemondo mondo katu pene nhe'ê Nhandejáry-pe pene mbo'eha-rami Nhe'ê Marangatu tee va'e. Opaixagwa pene nhe'ê pembojeupi upi pejerure-vy Nhandejáry-pe. Ani ne ate'y teĩ. Pene kyre'y ae oração apo-vy entéro Nhandejáry re'yí-rehe gwive pemondo mondo Nhandejáry-pe pene nhe'ê. ¹⁹ Xe-rehe ave pejapo oração anhe'ê jave ou rei hagwã xe juru-py xe nhe'êrã, atĩ e'y reheve amoherakwã Hesu rehegwa nhe'ê porã hembixea uka ramo va'e. ²⁰ Upe va'e-rehe apyta preso. Ajepokwa ramo jepe xe sã-rehe aĩ-vy, amombe'u joty inhe'ê. Hesu Cristo réry-py amombe'u mbe'u inhe'ê. Ejapo oração xe-rehe atĩ e'y reheve amombe'u joty hagwã, Cristo ombou gwekovia onhe'ê mombe'u hagwã va'e-rami joty amombe'u hagwã.

Tíquico oho-ta pende ha-py xe mombe'u-vy

²¹ A-py oiko xe ndive nhande re'yí va'e, nhane rembiayhu va'e Tíquico héry va'e. Ha'e Nhandejáry rembigwái va'e, hese jajerovia va'e. Ha'e oho-ta pende ha-py xe mombe'u-vy, xe-vy ojehu va'ekwe gwive oikwaa ukapa-vy. Mba'éixa pa xe aiko va'e oikwaa ukapa va'erã peẽ-my. ²² Upéa-rehe xe remimondo va'e amondo-ta omombe'u hagwã peikwaapa hagwã ore rekoha. Amondo-ta pene mbopy'agwapy hagwã pono pene mytu'e'y hagwã xe-rehe. ²³ Tapene mbopy'agwapy katu Nhandejáry Nhande Ru, Nhandejáry Hesu Cristo ave. Tapene mbojohayhu. Tapene mbojerovia uka porãve ójehe. Peẽ kwéry Nhandejáry re'yí va'e peẽ. Tapende rovasa katu. ²⁴ Pende reko porayhu reheve pene mbyai e'y reheve, pehayhu tee meme voi Nhandejáry Hesu Cristo-pe peiko-vy. Tapende rexakwaa rei katu Nhandejáry.

* 6:14 Is 11.5; 59.17

* 6:15 Is 52.7

* 6:17 Is 59.17

Paulo remimombe'ukwe
Filipos tetã mygwa pegwarã
epístola de Paulo aos filipenses

Paulo omondo Filipos tetã mygwa-pe onhe'ẽ kwatia-rehe

¹ Xe Paulo Timóteo ndive, Hesu Cristo rembigwái va'e voi, oromondo-ta peẽ-my ore nhe'ẽ kwatia-rehe. Peẽ Nhandejáry re'yí Filipos tetã-my peiko va'e kwéry, Cristo-pe peteíxa pemoirũ va'e voi. Oromondo-ta ore nhe'ẽ peẽ-my gwarã. Penhombotaty aty ha-rupi peẽ Hesu reroviaha nhangarekoha va'e, ipytywõha va'e ave oromondo-ta ave peẽ-my ore nhe'ẽ. ² Tapende rexakwaa rei katu Nhandejáry, Nhande Ru. Tapene mbopy'agwapy katu. Tapende rovasa katu Nhandejáry Hesu Cristo.

Paulo ojapo oraçãõ

(Ef 1.15-16; Cl 1.9-10; 1 Ts 5.23; 2 Ts 2.16)

³ Xe mandu'a pende-rehe jave, atima porã meme Nhandejáry-pe pende-rehe kwéry. ^{4,5} Yma gwive pehendũ ypy va'ekwe ãy peve peẽ xe pytygwõ tygwõ amosarambi porã hagwã Hesu rehegwa nhe'ẽ porã. Upéa-gwi avy'a meme aiko-vy pende-rehe. Ajapo jave oraçãõ ajerure rure pende-rehe Nhandejáry-pe, atima ave íxupe pende-rehe. ⁶ Apogwerovia voi pende rekoha-rehe. Are-ma onhepyrũ Nhandejáry pene mboheko porã hagwã. ãy gwarã peve pendéhegwi ndopoi reíry voi. Pene mboheko porãve ráve pene moingo-vy. Ha Hesu ou jevytaha áry-py katu pende reko moatyro tee-ta katu ojúepe gwarã. Upéa-gwi ajerovia pende-rehe. ⁷ Peẽ xe po pyte pygwa, xe apohayhu voi. Upéa-gwi iporã katu xe ajerovia pende-rehe. Ome'ẽ va'ekwe xe-vy Nhandejáry xe rembiaporã xe rexakwaa rei-vy. Ha peẽ kwéry xe pytygwõ va'e. Preso anhemõ jave xe pytygwõ joty. Hesu rehegwa nhe'ẽ porã aikwaa uka jave gwí xe remimombe'u ombojevysse va'e-pe, xe pytygwõ joty. Hesu rehegwa nhe'ẽ porã, “Anhetegwa va'e voi inhe'ẽ” ha'e jave amombe'u-vy, xe pytygwõ ave. ⁸ Peẽ xe rembiexa nga'u voi. Cristo pende rayhuhá-rami, apohayhu ave. Anhete ha-py voi apohayhu. Xe apu e'yha oikwaa voi Nhandejáry. ⁹⁻¹⁰ Ajapo oraçãõ pende-rehe. Aipota pejoyhayhu porãve ráve voi peiko-vy, pene aranduve hagwã, pejapo va'erã, pejapo e'y va'erã peikwaa porã hagwã, tape iporãve va'e-rupi peho hagwã. Cristo ou jevytaha áry-py, aipota pende reko potí, “Erejevavy-ma” pono he'i pende-rehe kwéry. ¹¹ Aipota Hesu Cristo pene mboheko porã porã, pende reko porã ku'a ku'a e'y hagwã, ojekwaa porã hagwã Nhandejáry rekoha, entéro ohexa kwaa hagwã hese hekoha, “Ha'e tuvixa mba'e” he'i hagwã hese.

Cristo-rehe anho mante aiko

(Ef 6.20)

¹² ãy xe re'yí kwéry, aipota xe rehegwa peikwaa. Heta mba'e xe-vy ojehu ramo jepe, osarambive mbive joty oho-vy xe remimombe'ukwe Hesu rehegwa nhe'ẽ porã. ¹³ Cristo-rehe ha-py xe xe moíha preso opa-rupi ojekwaa. Ojehexa uka porã entéro soldado mburuvixagwasu nhangarekoha-pe. ¹⁴ Ajepokwa-gwi jepe, heta eterei nhande re'yí Hesu-rehe ojerovia va'e, notivéi-ma. Ipy'agwasuve-ma Nhandejáry nhe'ẽ mombe'u-vy ójehe imytu'e'y e'y reheve. ¹⁵ Oí xe-rehe ndaija'ei-gwi omombe'u va'e. Onhemboete ukase-vy omombe'u Cristo rehegwa. Oí ave ipy'a porã reheve omombe'u va'e. ¹⁶ He'i xe-rehe, “Nhandejáry remimbota-rupi Paulo-pe omoí preso. Oikwaa uka porã ete hagwã gwí hemimombe'u ombojevysse va'e-pe, oí joty preso” he'i xe-rehe. Upéa-gwi omombe'u Cristo rehegwa nhe'ẽ. Xe rayhu-gwi omombe'u. ¹⁷ Ha upe onhembotuvixa ukase va'e katu, xe moakárasyse mo'ã. Cristo rehegwa mombe'u-vy ojehexa uka porãseve mo'ã oiko-vy. Ójehe rei oiko. Xe xe moí jave preso, xe moakárasyse voi mo'ã. ¹⁸ Xe mbopoxyse mo'ã ha ndaxe poxy mo'ái joty. Onhemboete ukase-vy omombe'u ramo jepe, Cristo rehegwa joty omombe'u. Oí ipy'a porã reheve omombe'u va'e ave. Upéixa entéro omombe'u Cristo

rehegwa. Upéa-rehe avy'a joty aiko-vy. Ndaipóri xe mbovy'are'ỹ va'e. Avy'a joty va'erā aiko-vy. ¹⁹ Heta mba'e xe-vy ojehu ramo jepe, xe arovy'a joty, iporā va'erā joty xe-vy. Xe-rehe oração pejapo ramo, iporā va'erā joty xe-vy. Xe-rehe pene mandu'a va'e-rehe ajerovia tee joty pende-rehe. Hesu Cristo nhe'ẽ marangatu-rehe xe pytygwōharā-rehe ajerovia joty. Upéa-gwi xe-vy ojehu va'erā, iporā joty xe-vy. Naxe mbovy'amirĩry va'erā. ²⁰ Xe kyre'ỹ aha'arō-vy xe-vy ojehu va'erā. Xéjehe ajerovia voi xe motĩ e'ỹ hagwā, xe py'agwasuve hagwā ae katu Cristo-pe amomba'egwasu-vy. Amano-ta para'e. Mba'e ojehu ramo xe rete-pe ambotuvixaseve joty katu Cristo-pe. ²¹ Xéjehe anho rei ndaikóiry. Cristo-rehe anho mante aiko. Amano ramo ae, iporāve-ma va'erā xe-vy. ²² Ha xe aiko pukuve ramo katu ko yvy-py, ndaiko reĩry va'erā, xe rembiapo porā vyteri va'erā. Upéixa xe ndaikwaái xe renonderā. ²³⁻²⁴ Ajeupise aha-vy amoirũ hagwā Cristo-pe. Iporāve-ma voi arā xe-vy. Ha xe apytave ramo katu ko yvy-py, iporāve arā peẽ-my. Pene remikotevẽ voi xe-rehe. Kiva'e xe rembiaporā po ajapo-ta, ndaikwaáiry. Ndaikwaavéiry xe renonderā. ²⁵ Ha peẽ katu peikotevẽ vyteri xe-rehe. Pene remikotevẽ xe-rehe aikwaa-gwi xe apytave-ta ko yvy-py ha-rehe ajerovia. Pene ndive apyta va'erā perovia porāve ráve hagwā nhe'ẽ porā, perovy'ave ave hagwā íxupe oho-vy. ²⁶ Pene ndive aiko jevy ramo, xe rerovy'agwasu ave va'erā peiko-vy. “Hesu Cristo hembiaipo porā voi Paulo-rehe” peje va'erā xe-rehe imomba'egwasu-vy.

*Oĩ nhe'ẽ porā ombojevseye va'e. Penhe'ẽ joko íxugwi
(Hb 12.3-4; Tg 5.7-11)*

²⁷ Aikove-ta para'e, amano-ta para'e. Xe ndaikwaái. Mba'e ojehu ramo xe-vy, ani pemotĩ teĩ Cristo-pe inhe'ẽ rendu e'ỹ-vy peiko-vy. Upéixa ramo, agwahẽ aha-vy ramo pende ha-py para'e, pene rerakwā ahendu rei ramo para'e, ajerovia va'erā pende-rehe. Pene mongyhyjese va'e-pe napenheme'ẽ mo'ái. Peteixa pene mbaraete va'erā. Peteixa pembojevvy va'erā gwĩ nhe'ẽ porā rendu e'ỹseha-pe gwive. ²⁸ Penhemongyhyje e'ỹ reheve penhe'ẽ joko va'erā pende-rehe ija'e'ỹ va'e-pe. Ha'e kwéry pende rexa ramo pende py'agwapy reheve, pene mytu'e'ỹ e'ỹ reheve, “Ore, Nhandejáry remihundurā voi ra'e” he'i va'erā ójehe kwéry. “Peẽ Nhandejáry remiresenderā voi ra'e” he'i va'erā peẽ-my. Nhandejáry ha'e katu pene mbopu'aka va'erā. ²⁹ Pende rexakwaa rei va'ekwe Nhandejáry pende poravo-vy. Pende poravo va'ekwe pejerovia-ma hagwā Cristo-rehe. Oipota ave Cristo-rehe ha-py pejerereko asy peiko-vy. ³⁰ Áy nhande kwéry peteixa nhande-rehe ija'e'ỹ va'e-pe nhanhe'ẽ joko joko va'erā nhandéhegwĩ. Are xe rexa va'ekwe anhe'ẽ joko joko aĩ-vy ramo xejéhegwi xe-rehe ija'e'ỹ va'e-pe. Upéixa xe anhe'ẽ joko joty aiko-vy. Áy katu pehendu-ma ra'e xe rerakwā.*

2

Cristo-ramima peiko katu

(Jo 13.12-17; 2 Co 8.9; Ef 1.20-22; 4.1-3)

¹ Peteixa pemoirũ-magwi Cristo-pe, hemimombaraete voi peẽ. Pende rayhu-gwi, hemimbopy'agwapy voi peẽ. Pende py'a-py kwéry oiko-gwi Nhe'ẽ Marangatu tee va'e, peẽ kwéry ojoe'ỹi. Pejoporiahuvereko rei katu. Pende py'a porā rei katu ojóupe peiko-vy. ² Upéa-gwi peteĩ akā-rami tapeiko katu onhondive. Peteixa tapejohayhu peiko-vy. Peteixa tapeipyhy pende raperā. Onho'arandu-rami meme tapene arandu. Upéixa ramo xe mbovy'agwasu va'erā. ³ Ani pende seve rei-gwi pene rembiapo teĩ peiko-vy. Ani penhembotuvixaseve rei teĩ peiko-vy. Penhemboete ukase-vy rei ani peiko. Penhembohekomirĩve ae katu peiko-vy. Ani penhembotuvixave pende rapixa-gwi. “Xéhegwĩ heko porāve” peje ae pende rapixa kwéry-rehe imboete-vy. ⁴ Ani pendéjehe anho rei peiko meme teĩ. Pende rapixa-rehe ave peiko. Pene mandu'a meme hese. ⁵ Ójehe opena e'ỹ va'e-rami oiko Cristo. Ha'e-ramima peiko katu. ⁶ Ne'írā oiko vyteri jave ko yvy, Cristo oiko-ma voi araka'e. Nhandejáry-ramima oiko araka'e. Nhandejáry voi ha'e

* 1:30 At 16.19-40

araka'e. Upéixa oiko ramo jepe, nahakate'yí gweko-rehe Nhandejáry reko-rami e'y ou hagwā ko vvy-py oiko araka'e. ⁷Nhande resaka va'erā ohejapa rei va'ekwe ou-vy. Nandi ete ou va'ekwe. Oma'etirō ohejapa va'e-rami, ohejapa rei va'ekwe ou-vy. Imboetepyrā-rami e'y ou va'ekwe. Tembígwái-rami rei ou va'ekwe. Nhande-rami ojehexa uka ou-vy. Nhandejáry reko-rami oiko rire nhande rete poru ou-vy. ⁸Onhembohekogwypve ou-vy. Nhandejáry nhe'ē renduha voi. Ndojeheko rayhúí voi ojejúka uka hagwā, kurusugwasu-rehe omano hagwā. ⁹Upéa-gwi Nhandejáry ombotuvixa jevy va'ekwe íxupe. Ogwerojeupi jevy íxupe heraha-vy yváy-py. Ndaipóri onhembotuvixave va'e íxugwi. Ndaipóri tuvixave va'e íxugwi. Ha'e anho mante tuvixave va'e. Ombotuvixa voi íxupe héry. Ndaipóri imbaraeteve va'e héry-gwi. Ha'e anho mante héry tuvixave va'e oiko. ¹⁰Hesu réry-py oipota enterove va'e onhesū íxupe gwetypy'ā-rehe. Oipota onhesū íxupe yváy pygwa gwive, yvypóry gwive, vvy pypía anháy gwive ave. Entéro yvygwy-py oí va'e gwive ave héry omboete-vy onhesū va'erā. ¹¹Oipota entérove omombe'u átyra-py Hesu Cristo Nhandejáry voiha, Nhandejáry Nhande Ru-pe omomba'egwasu-vy.*

Jasytata nhande-vy ohesape vérami peiko va'erā

¹²⁻¹³Upéa-gwi xe rembiayhu va'e, pehendu katu xe nhe'ē. Pene ndive xe aime ramo, pehendu meme va'ekwe xe nhe'ē. Xe nhe'ē rendu hagwe-rami āy peve gwarā aipota voi xe nhe'ē pehendu, pene ndive naiméi-ma ramo. Pende py'a-py omōi Nhandejáry pene mokyre'yharā pejapo hagwā gwemimbota peiko-vy. Upéa-gwi, penhangareko porā katu pendéjehe, pejerereko poxy e'y hagwā-rami peiko-vy. Ndojapo vaiséi-gwi icyhyje va'e-rami peiko katu. Pene resendeha remimbota pene kyre'y'í voi pejapo-vy peheko aruopy hagwā íxupe. ¹⁴Pene rembiaporā pejapo katu. Pejohu vai e'y reheve, penhonhe'ē momejvy e'y reheve pejapo katu. ¹⁵Aipota pende reko jejavy e'y reheve, aipota pende reko potí, Nhandejáry ra'y-rami peiko hagwā pejejavý e'y-vy. Áygwa tape porā-gwi ojere va'e, hekoha vai voi. Ipa'tū-gwi ohesape va'e-rami peiko-ma va'erā. Jasytata nhande-vy ohesape va'e vérami peiko va'erā pehexa uka hagwā haperā íxupe kwéry. ¹⁶Nhane moingove va'e nhe'ē porā-py pemo'arandu va'erā íxupe. Upéa pejapo ramo, Hesu Cristo ou jevytaha áry-py, naxe motíry va'erā peē kwéry. Avy'a ae va'erā pende-rehe kwéry. "Ogwerovia tee-ma voi" ha'e va'erā pende-rehe apomboete-vy. "Paulo nomosarambí reíry inhe'ē mome'u-vy omokyre'y'í-vy. Nahembiapo porā reíry voi" he'i va'erā xe-rehe. ¹⁷Xe júka-tama para'e. Amano ramo pende-rehe ha-py, Nhandejáry xe roeroy'a va'erā. Ha peē katu pejerovia tee Nhandejáry-rehe peiko-vy. Pejerovia ramo, penheme'ē tee kuri íxupe. Penheme'ē-gwi íxupe, pende roeroy'a. Áy nhande kwéry nhandeme'ē-gwi íxupe, nhande roeroy'a ave va'erā Nhandejáry. ¹⁸Ajejúka-ta va'e-rami aí ramo jepe, avy'a joty xe. Nhandombovy'a joty katu. Upéixa ramo aipota pevy'a xe-rehe. Nhandombohory katu ave.

Timóteo Epafrodito ndive rehegwa nhe'ē

¹⁹Ko'ē ramo, ko'ē mbue ramo, amondose pende ha-py Timóteo-pe. Oipota ramo oho Nhandejáry Hesu, amondo va'erā íxupe. Ha upe rire katu ou jevy ramo pende ha-gwi pene mome'u-vy, xe mbovy'a arā. ²⁰Ha'e pende-rehe opena tee va'e voi. Mba'éixa peiko ojapura pende-rehe. Xe ndive ndaipóri ha'eixagwa. ²¹Outro kwéry ójehe anho mante opena oiko-vy. Hesu-rehe nopenái oiko-vy. ²²Ha Timóteo katu omba'apo oiko-vy xe ndive. Gwu ndive omba'apo ta'yry va'e-rami, oiko omba'apo-vy xe ndive. Peteíxa oromba'apo nhe'ē porā oromosarambí-vy. "Hekoha porā nipo ra'e" he'i hese. Enterove ohexa kwaa hekoha-rehe. ²³Upéa-rehe xe-vy ojehu va'erā aikwaa-ma ramo, amondose Timóteo. ²⁴Nhandejáry-rehe ajerovia pende ha-py aha jevy hagwā. Ajerovia hese xe are e'y hagwā preso apyta ha-gwi xe renohé hagwā pya'e. ²⁵Ha Epafrodito katu xe reko irū jepe, amondo jevy-ta joty pende ha-py. Ogwahē-ma oho jevyha áry. Ha'e nhande re'yí, xe ndive omba'apo va'e, xe ndive onhe'ē joko joko va'e ore-rehe ija'e'y va'e-pe. Pene remimboukve ave. Xe remikotevé xe-vy ome'ē hagwā pembou íxupe va'ekwe.

* 2:7 Hb 2.17 * 2:9 Hb 2.9 * 2:11 Is 45.23 * 2:15 Dt 32.5

²⁶ Pende kwéry-pe pende rexa nga'u oiko-vy. Hasy ete va'ekwe Epafrodito. Herakwā pehendu ramo, pejepy'apy-ma ra'e hese. Upéi pevy'are'y-gwi ha'e ave pende reko-rami ndovy'avéima. ²⁷ Hasy ete va'ekwe voi. Omano hagwā-rami oĩ va'ekwe. Ha Nhandejáry katu oiporiahuvereco-ma va'ekwe íxupe imbogwera-vy. Xe poriahuvereco-ma ave. Heta oĩ xe mbovy'are'y va'e. Omano ramo ra'e, xe mbovy'are'yve arā voi ra'e. ²⁸ Upéa-rehe xe kyre'y amondo hagwā íxupe. Pehexa jevy ramo íxupe, pene mbovy'a jevy-ma va'erā. Pene mbovy'a jevy ramo, xe ahasa asy ramo jepe, avy'ave va'erā. Pene mbovy'aharami, xe mbovy'a ave va'erā. ²⁹ Ha'e Nhandejáry irū-gwi, nhande ojoe'yí voi. Upéa-gwi perohory katu íxupe pemogwahē-vy. Ha'eixagwa gwive pemboete. ³⁰ Ha'e nahakate'yiry gwekove-rehe. Haimete ojejuka Cristo-pe omba'apo-gwi xe pytygwō-vy. Napeimēi ramo, ndikatúiry xe pytygwō peē. Ha'e ae katu pende rekovia xe pytygwō oiko-vy xe ndive.

3

Cristo reko aikwaa porāseve-gwi, xe rembiereko-rehe napenavéi-ma

¹ Ko'ánga ojoapykwéri ha'e jevy-ta peē-my, xe re'yí kwéry. Penhombovy'a katu. Tapene mbovy'a katu Nhandejáry. Áy ndahasýi xe-vy amoĩ jevy hagwā kwatia-rehe amoĩ va'ekwe-rami. Upéa nhe'ē-rehe pene mandu'a meme ramo, ndapevái arā tape porā-gwi. ² Xáke oĩ oporohekombo'e vai va'e, jagwa ipoxy va'e reko-rupi oiko va'e, gwemimbo'e va'e-pe oipirekytĩ ukase va'e. Nohendu kwaái Nhandejáry nhe'ē hikwái. Xáke íxugwi kwéry. ³ Ha nhande kwéry ae katu Hesu-rehe jajerovia va'e. Yma gware onhepirekytĩ oiko-vy Nhandejáry re'yí ramo oiko hagwā. Ha áy katu nanhanhepirekytívéi-ma he'yí tee ramo jaiko hagwā nhande. Nhande py'a-py oiko-gwi Nhe'ē Marangatu tee va'e ae nhamboete tee Nhandejáry jaiko-vy. Nhande resende hagwā mo'ā, nhande rembiapo porā rei-rehe ndajajeroviavéi-ma. Hesu Cristo-rehe anho mante jajerovia jaiko-vy. Nhande he'yí tee voi. Yma onhepirekytĩ hagwe-rami nhande rereko áy. ⁴ Are-ma ajerovia-ma mo'ā va'ekwe xe reko porā mo'ā-rehe. Áy oĩ ramo gweko porā-rehe anho ojerovia mo'ā va'e, ndaha'ei arā xe rekokwe-rami voi oiko. Xe rekokwe iporāve va'ekwe ha'e kwéry heko-gwi. ⁵ Xe rekokwe a-rami: Ohasa rire petei semana xe aiko hagwe áry rire, xe pirekytĩ judeu reko-rupi xe rereko-vy. Israel amyrĩ remiarirō joapyri pyri va'e xe. Xe ramói jete amyrĩ Benjamim. Xe ru xe sy ndive ojoehegwa hebreu va'e, Nhandejáry rembiporavokwe voi. Upéa-gwi hebreu tee va'e xe. Judeu kwéry rekoha gwive ajapopa va'ekwe xe. Gwĩ fariseu kwéry ohendu porāve va'e pe tekoha outro judeu kwéry-gwi. Xe ae katu fariseu kwéry va'e voi va'ekwe. Judeu rekoha ojapose nga'u fariseu kwéry. ⁶ Ha xe ae katu ajaposeve seve va'ekwe. Hesu reroviaha onhombotay tyha-rupi ndaipotái ova judeu rekoha-gwi. Upéa-gwi xe areko asy voi va'ekwe aiko-vy Hesu reroviaha kwéry-pe. “Nhandejáry remimbota ajapo” ha'e mo'ā xejeupe va'ekwe. Judeu rekoha-rupima aiko va'ekwe. “Paulo ojapo ku'a ku'a Moisés amyrĩ remimombe'ukwe” nde'íry xe-rehe va'ekwe. Imandu'a porā va'ekwe ae xe-rehe judeu kwéry. ⁷ Upe xe rekokwe fariseu rembierovy'a va'ekwe-gwi, apoi-ma upe tekoha-gwi. “Ndovaleví-ma” ha'e hese, Cristo rekoha aikwaa porā-magwi. Ambotuvixave Cristo reko kwaa ukaha-pe. ⁸ Upéa-gwi Cristo-rehe ha-py mba'eve ete-rehe napenái. Cristo xe Járy reko aikwaa porāseve seve íxupe amoirū-vy. Cristo-rehe ha-py opa xe rembiereko gwive ahejapa-ma voi. Yty nhamombo va'ekwe-rami rei areko íxupe, Cristo reko irū-rupi aiko porāve hagwā. ⁹ Peteixa amoirūse íxupe. Ndaipotái he'i xe-rehe “Paulo ojapopa Moisés amyrĩ remimombe'ukwe. Upéa-gwi heko-rehe rei heko jejavy e'y va'e mo'ā” ndaipotái he'i xe-rehe. Aipota ae he'i xe-rehe, “Cristo-rehe ojerovia-magwi ae katu, onhemopotĩ-ma Paulo” he'i xe-rehe. “Ipy'a potĩ-ma” aipota Nhandejáry he'i xe-rehe. ¹⁰ Cristo reko aikwaa porāseve seve. Ha'e onhembotekove jevy va'ekwe ipu'akaha reheve. Peteixa ha'e-rami aikose ave. Aipota xe mbopu'aka ave. Ha'e ohasa asy va'ekwe. Ha'e oiko asy hagwe-rami aikose ave. Ha'e omano va'ekwe. Peteixa ha'e heko-rupi tee-ma aiko hagwā, omano va'ekwe-rami, ijukapyrā-rami ave xe aikose. ¹¹ Íxupe peteixa amoirū teese voi aiko-vy, amano rire anhemoingove jevy hagwā ave. Upéixa nhande mbotekove jevyha áry-py agwahē ete-ma arā aha-vy.

Oripara hatã meme va'e-rami aiko
(1 Co 15.46-49; 2 Co 5.1-5; Jd 12-13)

¹² Cristo reko-rupi tee-ma aiko, nda'éiry xéjehe. Ne'írã vyteri aheko arupity íxupe. Ogwahêse ha-py pya'eve oripara va'e-rami, aiko joty. Ne'írã joty agwahê aha-vy upe-py. Yma va'ekwe xe johu Hesu Cristo. Xe mbopu'aka uka voi va'ekwe, aheko arupity hagwã íxupe. ¹³ Xe re'yí kwéry, aheko arupity-ma, nda'éiry joty xéjehe. Oripara hatã va'e ikyre'y'ê eterei ogwahê hagwã ogwahêse ha-py. Upéixa ete xe ave xe kyre'y'ê agwahê hagwã-rehe. Peteíxa xe renonde-py amoí xe raperã. Xe rapykwere-rehe ndajeapavéi-ma, napenavéi-ma. Xe resarái-ma íxugwi. Ha xe agwahê hagwã-rehe ae xe resa amoí. Pya'e agwahêse-vy ajapura voi aha-vy. ¹⁴ Upéixa ndopi ndopiáiry va'e-rami, ogwahêse ha-py oripara oho-vy va'e-rami aiko. Ogwahê ranhe hagwã oho pya'ese va'e-rami aiko. Aipota xe-vy gwarã ome'ê voi xe-vy yváy-py aiko hagwã. Upe-py aha hagwã xe renói va'ekwe Nhandejáry. Amoirũ hagwã Hesu Cristo-pe xe renói va'ekwe. ¹⁵ Upéixa ha'e-ta peẽ-my iporã katu nhambojoja nhane nhe'ê nhande nhane arandu va'e. Oí ramo "Ndaha'êi upéixa" peje va'e, oikwaa uka porã va'erã peẽ-my Nhandejáry. ¹⁶ Yma gwive äy peve peteí nhande raperã jaipyhy-ma. Peteíxa joty jaha upe va'e-rupi. Nhane arandu-ma. Upe nhane arandu-py joty jaiko. ¹⁷ Xe re'yí kwéry, xe reko ra'ã katu pende joja-vy. Ore oroikwaa uka va'ekwe peẽ-my peiko porã hagwã. Gwí ore reko-rupi oiko va'e katu pemaña porã joty hese peheko ra'ã ave hagwã ave íxupe. ¹⁸ Xe ha'e ha'e hagwe-rami ha'e jevy-ta peẽ-my ajahe'o-vy. Oí pene pa'ũ-my ojapose va'e rei ojapo va'e. Cristo kurusugwasu-rehe omano va'ekwe remimbota ojapo e'y'ê va'e, ha'e jevy-ta hekoha kwéry-rehe amboasy-vy. ¹⁹ Mombyry Nhandejáry-gwí onhemondo va'erã. Gwyvyatã hagwã-rehe anho rei oiko va'e-rami, ojúepe gwarã rei oipota va'e-rehe anho rei oiko va'e. Notívéi-ma oiko-vy. "Nhande rekoha porã va'e nhande" he'i mo'ã joty ójehe onhemombe'u-vy mo'ã ko yvy pygwa anho rei-rehe oiko va'e. ²⁰ Ha nhande Hesu rape-rupi jaiko va'e kwéry-pe oí va'erã yváy-py nhande rekoha teerã. Upe-gwi nhaha'arõ nhande resende teeharã ou va'erã. Nhane kyre'y'ê reheve nhaha'arõ jaiko-vy ou va'erã Nhandejáry Hesu Cristo. ²¹ Ha'e entéro mba'e-rehe ipu'akave voi. Ha'e gwete hesakãha-rami ave ohekoviarõ arã nhande rete iporiahu va'e. Ha'e ipu'akaha-rupi voi ohekoviarõ arã nhande rete.

4

¹ Upéa-rehe, xe re'yí kwéry, peipyhy katu Nhandejáry rape peva e'y'ê reheve. Peẽ xe rembiayhu va'e voi. Xe rembiexa nga'u voi peẽ. Xe mbovy'a va'e. Pejere e'y'ê reheve pegwahê-ma ramo peho-vy Nhandejáry renda-py apogwerovy'a va'erã. Pende-rehe avy'a tee va'erã voi.

Penhombovy'a katu
(Cl 3.15)

² Äy mokõí kunha-pe anhemonhe'ê-ta. Anhemonhe'ê-ta Evódia-pe. Síntique-pe anhemonhe'ê-ta ave. Peẽ ojoe'yí voi Nhandejáry-pe pemoirũ-gwí. Penhombojoja katu ojóehe peiko-vy. ³ Äy ha'e-ta xe irũ-pe. Enhemonhe'ê katu pe mokõí kunha-pe peteíxa oiko hagwã onhondive. Xe ndive oiko ramo, xe pytygwõ va'ekwe voi upe mokõí kunha. Xe ndive onhe'ê joko joko gwí nhe'ê porã ohenduse e'y'ê va'e-pe. Xe pytygwõ ave Clemente xe irũ gwive ave. Héry kwéry oí ra'e yváy pygwa kwatia-rehe. Tekove ijapyre'y'ê reheve oiko hagwã omoí ra'e Nhandejáry. ⁴ Peẽ Nhandejáry irũ-gwí, penhombovy'a meme katu peiko-vy. Ha'e jevy-ta peẽ-my, Penhombovy'a katu. ⁵ Pejogwereco porã katu pende poxy e'y'ê reheve ojóupe. Tojekwaa porã katu pende py'a porãha opa-rupi oho-vy. Ndahi'are mo'ãi Nhandejáry ogwahê jevy hagwã óra. ⁶ Ani pejapura teí mba'eve-rehe. Opamba'e-rehe ae katu pejapo japo oração. Pejerrure katu Nhandejáry-pe pene remikotevê-rehe. Peoporandu ramo íxupe, petima porã meme íxupe. ⁷ Nhane mbopy'agwapy va'erã Nhandejáry. Peẽ-my ojehu va'e-rehe peikwaa e'y'ê ramo jepe, pene mbopy'agwapy joty arã Nhandejáry. Peteíxa pemoirũ-gwí íxupe, pendéhegwí ivai va'e ojoko va'e-rami, pende py'a ombogwapy va'erã peẽ-my. Pene akã omombaraete ave va'erã. ⁸ Ojoapykwéri ha'e jevy-ta peẽ-my, xe re'yí

kwéry. Pene mandu'a meme katu iporã porã va'e-rehe. Mamo iporã porã va'e petopa harupi, mamo imandu'a porã hese va'e petopa harupi, perovy'a joty. Oĩ anhetegwa va'e, oĩ nhamoporã va'e, oĩ ojapo joavy e'ỹ va'e, oĩ ipotĩ va'e, oĩ jajohu porã va'e, oĩ nhamboete va'e. Upeixagwa-rehe pene mandu'a meme katu perovy'a ete hagwã. ⁹ Xepombo'e hagwe-rami peiko. Pemboypy hagwe-rami ave pejapo katu. Peẽ-my ha'e hagwe-rami pejapo. Xereko rexa hagwe-rami, peiko katu. Upéixa ramo pene ndive oiko va'erã Nhandejáry nhane mbopy'agwapy va'ety.

Nhandejáry xe mombaraete ramo, mba'eve ndaipu'akáiry xe-rehe

¹⁰ Are rire pene mandu'a jevy-ma xe-rehe xe remikotevẽ mbou-vy. Upéa-gwi avy'a eterei Nhandejáry xe mbovy'a-gwi. Arovy'a pene remimbou-rehe. Are-ma voi pene mandu'a rei va'ekwe xe-rehe peiko-vy. Perurukase mo'ã xe-vy xe remikotevẽ ha ndikatúiry peruruka va'ekwe xe-vy. ¹¹ Pene rembieruruka-rehe naikotevẽ etéiry. Heta xe areko ramo, ndahetái xe areko ramo, aipokwaa-ma xe rekoha xéjehe anho ajeko-vy. ¹² Xe remikotevẽ ndarekói ramo, xe poriahu ramo, aipokwaa-ma xe rekoha. Heta xe areko ramo, aipokwaa joty ave. Mba'e ojehu ramo jepe xe-vy, avy'a joty xe. Akaru porã ramo para'e, xe vare'a ramo para'e, avy'a joty xe. Heta xe areko ramo para'e, xe poriahu ramo para'e, arovy'a vy'a joty xe rekoha. Aipokwaa-ma voi xe reko. ¹³ Nhandejáry xe mombaraete ramo, opamba'e-rehe xe pu'aka. Mba'eve-pe nanheme'ei. Mba'eve ndaipu'akáiry xe-rehe. ¹⁴ Mba'eve-rehe naikotevẽi ramo jepe, iporã joty xe pytygwõ. Xe ajerereko asy jave, iporã xe mbovy'a. ¹⁵ Are-ma amombe'u mbe'u va'ekwe nhe'ẽ porã aiko-vy Macedônia yvy-rupi va'ekwe. Upéi ahasave hagwã aha-vy asẽ ramo upe va'e yvy-gwi, naxe pytygwõiry va'ekwe avave. Peẽ anho mante xe pytygwõ xe remikotevẽ-rehe. Peẽ-my ame'ẽ va'ekwe-rami jevy xe pytygwõ va'ekwe. ¹⁶ Upéi Tessalônica tetã-my mombyry pendéhegwi aime ramo jepe, peruruka va'ekwe xe-vy xe remikotevẽ. Ha upe rire katu peruruka jevy va'ekwe. ¹⁷ Ome'ẽ ojéupe oipota eterei va'e-rami ndaikóiry. Aipota ae hetave tave peẽ-my gwarã Nhandejáry remihekoviãrã. ¹⁸ Oreveha-rehe opagapa rire ome'ëve va'e-rami, peme'ẽmba voi xe-vy. Epafrodito ogweru kuri xe-vy pene remime'ẽgwe xe-vy pene rembieruruka. Áy katu xe remikotevẽ gwive arekopa-ma. Nhandejáry-pe omohyakwã porã-vy ome'ẽ va'e-rami, hemimbota íxupe ome'ẽ va'e-rami, ogwerovy'a Nhandejáry xe-vy pene remime'ẽgwe.* ¹⁹ Ha Nhandejáry, xe Járy katu ohekoviãrõ va'erã ime'ẽ rei-vy peẽ-my entéro pene remikotevẽ gwive. Cristo Hesu-pe pemoirũ-gwi, gweko katurã ndive ome'ẽ va'erã. Ndaijapy reíry Nhandejáry remime'ẽ. ²⁰ Tomomba'egwasu meme katu Nhandejáry Nhande Ru-pe opa e'ỹ reheve.

Paulo omondo omandu'aha

²¹ Peteĩ teĩ Nhandejáry re'ýi gwive Hesu Cristo reko irũ va'e-pe emombe'u mbe'u xe mandu'aha. Nhande re'ýi, xe ndive oĩ va'e omondo uka-ta peẽ-my omandu'aha ave. ²² Entéro Nhandejáry re'ýi gwive a-py oiko va'e omondo uka-ta ave omandu'aha. Ha mburuvixagwasu César róga pygwa katu ikyre'ỹve voi omandu'aha omondo uka hagwã. ²³ Tapende rexakwaa rei katu Nhandejáry Hesu Cristo pende py'apy-py oĩ va'erã-rehe.

* 4:18 2 Co 11.9

Paulo remimombe'ukwe Colossos tetã mygwa pegwarã epístola de Paulo aos colossenses

Paulo omondo Colossos tetã mygwa-pe onhe'ẽ kwatia-rehe

¹ Xe Paulo Hesu Cristo remimondo va'e. Nhandejáry remimbota-rupi xe pota gwemimondorã. Xe, nhande ryvy Timóteo ndive, oromondo-ta kwatia-rehe ore nhe'ẽ peẽ-my gwarã. ² Peẽ Colossos tetã mygwa va'e, Nhandejáry javegwa va'e voi peẽ. Pejerovia-ma peiko-vy ra'e Hesu Cristo-rehe. Pejererova tee-ma ra'e hese he'yirã. Nhandejáry Nhande Ru tee va'e voi. Tapende rovasáke kuri pende rexakwaa rei-vy. Tapene mbopy'agwapýke kuri.

*Paulo Timóteo ndive ojapo oração Colossos tetã mygwa-rehe
(Ef 1.15-23; 3.14-19; 1 Ts 5.23-24)*

³ Orojapo ramo oração pende-rehe, ore mandu'a ramo pende-rehe, orovy'a eterei. Pende-rehe voi orotima porã porã Nhandejáry-pe. Nhandejáry Hesu Cristo Ru-pe orotima pende-rehe. “Ojerovia tee-ma Hesu Cristo-rehe” he'i pene mombe'u-vy. “Nhandejáry re'ýi kwéry gwive ojohayhu hikwái” he'i pene mombe'u-vy. Upéa-gwi orotima porã Nhandejáry-pe pende-rehe. ⁵ Are-ma omombe'u va'ekwe peẽ-my anhetegwa nhe'ẽ, Hesu Cristo rehegwa nhe'ẽ. Omombe'u-ma ramo peẽ-my, perovia-ma inhe'ẽ. Perovia-gwi inhe'ẽ, peha'arõ tee Hesu ou jevy ramo nhande reraha hagwã. Yváy-py pene renonderã peha'arõ. Upe va'e ra'arõ-vy, pejerovia tee Hesu-rehe pejoyhayhu ave. ⁶ Inhe'ẽ porã oho opa-rupi osarambi. Mamo jaha ha-py nhahendu nhe'ẽ porã. Hetave tave oĩ hembiaapo porã va'e. Hetave tave oĩ ogwerovia va'e. Upéixa ramo ogwenogwahẽ-ma ramo heraha-vy peẽ-my nhe'ẽ porã, pehendu-ma ave, pene rembiapo porã-ma ave. He'i va'ekwe imombe'u-vy peẽ-my: “Nhandejáry pende rovasa-ma kuri oiko-vy. Pende rexakwaa rei-ma ave” he'i imombe'u-vy peẽ-my Hesu rehegwa nhe'ẽ. Inhe'ẽ pehendu ramo: “Anhetegwa tee nipo ra'e. Jaikwaapa-ma nipo inhe'ẽ ra'e” peje araka'e. ⁷ Ha Epafras katu pene mbóeháry voi. Ha'e ore irũ. Nhane rembiayhu ave. Cristo rembigwái ha'e. Cristo nhe'ẽ omombe'u va'e peẽ-my. Ojavy e'ý va'e mombe'uha peẽ-my. Ore rekovía oho va'ety pende happy. ⁸ Ha upéi katu upe ore irũ ogwahẽ jevy-ma ou-vy. He'i omombe'u-vy: “Upe pygwa ojohayhupa hikwái. Ombovy'apa íxupe kwéry Nhandejáry Nhe'ẽ Marangatu tee va'e-rupi ojohayhupa hagwã” he'i imombe'u-vy ore-vy pende-rehe kwéry. ⁹ Orohendu-ma ramo pejerovia porã teha, orovy'a-ma. Orojapo-ma ave oração pende-rehe. Ndore resaráry voi orojapo meme hagwã oração. Orojerure meme Nhandejáry-pe peikwaa porãve ráve hagwã entéro hemimbota gwive. Ome'ẽ hagwã peẽ-my pene arandurã meme orojerure íxupe ave. Ha Nhe'ẽ Marangatu tee va'e oikwaa uka va'e peẽ-my hemimbota va'e gwive. ¹⁰ Upéixa ramo peiko va'erã Nhandejáry remimbota-rupi. Heko-rupi peiko va'erã ave ani hagwã pemoti íxupe. Pende reko porã va'erã, opaixagwa pene rembiapo porã porã meme va'erã. Peẽ peikwaa porãve ráve va'erã peho-vy Nhandejáry-pe. ¹¹ Nhandejáry ko onhemomba'egwasu opave'ý va'e. Imbaraete va'e voi. Tapene mombaeteve teve. Upéixa ramo, peiko asy ramo jepe, akói joty pevy'a va'erã. ¹² Nhandejáry Nhande Ru pende poravo va'ekwe ome'ẽ hagwã peẽ-my onhongatu va'ekwe. Arakatu-py oiko va'e pegwarã, Nhandejáry javegwa va'e pegwarã ave, ome'ẽ va'erã peẽ-my ave. Upéa-rehe petima porã katu Nhandejáry-pe pende py'a gwive. ¹³ Yma pytũ-my rei jaiko va'ekwe. Ha Nhandejáry katu nhane resende va'ekwe anháy ruvixa Satanás po-gwi. Nhane renogwahẽ nhande reraha-vy va'ekwe nhamoirũ hagwã ta'ýry, hembiahyu va'e, Hesu Cristo-pe, nhane ruvixarã. ¹⁴ Hesu Cristo katu onheme'ẽ va'ekwe nhande rekeve-rehe, jaiko rei hagwã japaga e'ý reheve. Ha'e omboyke va'e nhandéhegwi nhane rembiapo vaikwe.

*Nhandejáry Hesu Cristo ha'eixagwa ndaipóri
(Jo 1.1-3; Ef 2.11-22; Hb 1.2-14)*

¹⁵ Hesu Cristo ojehexa uka ramo nhande-vy ohexa uka nhande-vy mba'eixagwa po Nhandejáry reko. Nhandejáry ndaha'ái jahexa va'e. Hexapyre'ỹ va'e voi ha'e. Ha Hesu Cristo ohexa uka nhande-vy mba'eixagwa po heko. Ha'e Nhandejáry ra'y voi. Ta'yry tee voi. Ndoikói vyteri ramo mba'eve va'ekwe oiko-ma va'ekwe ha'e Túvy ndive. Ha'e entéro onhemoingo va'ekwe gwive va'e Járy. ¹⁶ Yma araka'e ojapo uka araka'e íxupe gwa'yry-pe Nhandejáry. Nhandejáry nhe'ẽ-py voi opamba'e ojapo araka'e. Ojapo áry rupigwa gwive, yváy pygwa gwive ave, yvy arigwa gwive ave. Inhe'ẽ-py opamba'e ojapo uka gwa'yry-pe. Ojapo araka'e jahexa va'erã gwive. Jahexa e'ỹ va'erã gwive ojapo ave araka'e. Ojapo araka'e Gwu rembigwairã yváy pygwa, jahexa e'ỹ va'e. Ojapo ave Gwu rembigwairã gwí anháy reko-rupi ho'a va'erã. Mburuvixarã ojapo. Ojapo ipu'aka va'erã. Ojapo omanda va'erã. Gwu nhe'ẽ-py hembiaapo va'erã ojapo. Entéro va'e Gwu rembigwairã ha'e ojapo. Opaixagwa ojapo uka araka'e íxupe Nhandejáry gwa'yry pegwarã. Upéa-gwi entéro onhemoingove va'ekwe gwive va'e Járy Hesu. ¹⁷ Yma araka'e ndoikói vyteri ramo mba'eve, oiko Cristo. Ha'e anho vyte oiko araka'e Nhandejáry ndive. Mba'eve ndoikói ha'e e'ỹ reheve. Ndo'a reíry entéro mba'e. Oheko kwaa va'e-rupi meme ae oiko enterová. ¹⁸ Ha'e jajerovia hese va'e gwive Járy. Nhane akã katu nhande rete mo'arandu ha voi. Nhane akã-rami oiko Cristo nhande-vy. Upéixa voi ha'e nhane mo'arandu entéro jajerovia hese va'e-pe gwive. Ha'e nhane moingove va'ety voi, nhane arandurã ome'ẽ nhande-vy. Omano rire-ma ha'e onhemoingove jevy ranhe va'ekwe onhyprũ hagwã nhane moingove jevyha enterove-pe. Onhemoingove jevy-gwi ha'e opyta opaixagwa jaryrã. ¹⁹ Nhandejáry oipota araka'e Hesu reko gweko-rupi voite. Heko ambue va'e ndoipotái. Oipota tuvixa mba'e ha'e-rami. Upéa-gwi ha'e jajerovia hese va'e gwive Járy. Opaixagwa va'e Járy ha'e. ²⁰ Nhandejáry oipota ave omoatyrõ ijoja hagwã íxupe opamba'e. Ha'e nhande repy-vyma voi omano. Ojejuka uka-gwi kurusugwasu-rehe, entéro mba'e omoatyrõmba va'ekwe Nhandejáry. Omoatyrõmba yvy arigwa gwive, áry rupigwa gwive ave, yváy pygwa gwive ave. Ijoja hagwã íxupe omoatyrõmba va'ekwe Nhandejáry.

²¹ Yma va'ekwe peiko va'ekwe mombyry Nhandejáry-gwi. Ndapejererová hese. Pende py'a vai peẽ peiko va'e gwive va'ekwe. Pene rembiaapo vai va'ekwe. Upéa-gwi napende a'ái Nhandejáry-rehe. ²² Ha ko'anga katu napende a'ái ramo jepe hese, pende rekoha kwéry ogwerova ójehe. Pende rekove-rehe ta'yry ojejuka uka-gwi, pene ndive jevy-ma oiko Nhandejáry. Ijavepa-ma peiko äy. Ha'e omano va'ekwe pene renogwahẽ hagwã peiko hagwã Nhandejáry ndive, pende py'a marangatu potĩ reheve, pejejavý e'ỹ reheve. Pejere e'ỹ reheve íxugwi, pene renogwahẽ va'erã pende reraha-vy. ²³ Äy peiko katu pejere e'ỹ reheve Hesu rape-gwi. Ijekoha tee va'e ndo'ái. Upéixa ramo perovia porã meme katu ndape'ái hagwã. Perovia-ma ramo Hesu rehegwa nhe'ẽ porã, Hesu rembieraharã peiko-ma va'erã peẽ. Ani pejererova ukave teĩ upe va'e nhe'ẽ pehendú va'ekwe-gwi. Upe va'e nhe'ẽ porã opa-rupi omombe'u va'ekwe enterová pegwarã. Upe va'e nhe'ẽ mombe'uha aiko-ma xe ave va'ekwe. Aiko-ma xe va'ekwe Hesu Cristo rehegwa nhe'ẽ porã mombe'uha.

*Paulo omombe'u oiko-vy entéro va'e-pe Cristo rehegwa nhe'ẽ
(Ef 3.1-13)*

²⁴ Pende-rehe ha-py ahasa asy. Ahasa asy ramo jepe, avy'a joty. He'i kuri xe-vy Hesu Cristo: "Xe-rehe ha-py xe nhe'ẽ-rupi ereiko-gwi ne mbohasa asy-ta. Ereipytygwõ-gwi xe reroviaha-pe gwive, ne mbohasa asy-ta. Nhande rete-rehe katu nhane rakate'ỹ. Upéixa voi xe rakate'ỹ ave xe reroviaha kwéry-rehe" he'i xe-vy Hesu. Upéixa ramo, ko'anga ahasa asy jevy-ta pendéhegwi. Ne'írá ahasa asypa vyteri. ²⁵ Ha Nhandejáry xe moingbo kuri hembigwái ramo heroviaha pytygwõ hagwã. Ome'ẽ kuri xe-vy xe rembiaporã amombe'u hagwã inhe'ẽ peẽ-my, apopytygwõ hagwã ave. He'i xe-vy amombe'u porã hagwã amombe'upa ete peve. ²⁶ He'i xe-vy amoherakwã hagwã inhe'ẽ. Ha ko va'e nhe'ẽ katu ni miximi jepe nomombe'úiry va'ekwe avave-pe. Yma va'ekwe äy peve

nomombe'úiry. Ojúupe voi onhongatu gwembiaporã Nhandejáry. Ko'ây katu oikwaa ukama gwe'yí kwéry-pe ojapo va'erã. ²⁷Yma araka'e Nhandejáry he'i ojúupe: "Áy anhongatu xe rembiaporã. Hi'áry ogwahê-ma ramo katu amombe'u-ta xe re'yí kwéry-pe. Enterove va'e rehegwa, judeu va'e, judeu e'y va'e-pe gwive amombe'u-ta" he'i. "Iporã porã-ta voi xe remimombe'u. Ndaha'éí enterovéa pegwarã. Xe re'yí kwéry pegwarã ae" he'i araka'e Nhandejáry. No'ã-rami Nhandejáry remimombe'u: "Cristo inhe'ê marangatu reheve oikota pende py'apy-py. Yma peê kwéry ndapeikói xe ndive va'ekwe. Ha ko'ánga katu peikoma xe ndive. Upéa-gwi Cristo onhembotuvixa mba'e teeha áry-py pene mbotuvixa mba'e ave va'erã" he'i-ma peê-my Nhandejáry. ²⁸Upéa-rehe oromombe'u oroiko-vy entéro va'e-pe Cristo rehegwa nhe'ê. Oronhemonhe'ê peteí teí va'e-pe. Orombo'e íxupe ave. Nhandejáry arandu randu-rupi orombo'e. Cristo ipy'a-py ogwereco va'e gwive, amba'apo hi'arandu porãve hagwã. ²⁹Amba'apo eterei hese kwéry. Cristo xe mombaraete-gwi amba'apo voi hese kwéry.

2

¹Ko'ây amombe'use peê-my xe rembiapo hatãha. Peê-my gwarã ajapoha amombe'use. Laodicéia tetã mygwa pegwarã ajapoha, xe rexa e'y va'e gwive pegwarã ajapoha ave amombe'use ave. ²Amba'apo hatã voi peê-my gwarã-rehe penhembopy'a mbaraete hagwã, pejahayhu hagwã pende joja hagwã ojúupe. Amba'apo hatã pende-rehe pene arandu tee hagwã, "Hupigwa meme voi" peje hagwã Nhandejáry nhe'ê-rehe. Upéixa ramo peikwaa porãmba voi va'erã Nhandejáry remimombe'use peê-my. Hemimombe'u Cristo rehegwa nhe'ê voi. ³Ha Cristo katu ha'e anho mante oikwaa uka va'e nhandevy. Nhandejáry arandu jaikwaa e'y va'e gwive oikwaa uka va'e voi nhandevy jaikwaa porãmba hagwã. Ha'e nhane mo'arandu Nhandejáry arandu porã porã ete-rupi jaikwaa porãmba hagwã. ⁴Upe ramo ha'e-ta peê-my: Ani pene mbotavy rei teí Cristo arandu e'y mombe'u-vy. Oí imandu'a porã va'e hemimombe'u-rehe. Ha nomombe'u porã. Omombe'u ra'anga anga rei ae oiko-vy. Ani pene mbotavy rei teí, ha'e peê-my. ⁵A-py xe aĩ ramo jepe, xe resa katu amondo meme joty pende ha-py. Xe mandu'a ramo mba'éixa pa peiko, xe avy'a. Peteixa perovia porã Cristo-pe. Peteixa ndapeváí tape porã-gwi. Upe va'e-rehe xe mandu'a ramo, avy'a eterei voi.

*Pemoirũ meme katu Cristo-pe
(Gl 4.8-20; Ef 2.1-10)*

⁶Ha peê peje kuri Hesu Cristo-pe: "Nde ko xe ruvixa" peje kuri íxupe. Upéa-gwi pemoirũ meme katu íxupe. Ani peheja teí. ⁷Ijekokaha tee va'e ndo'ái va'e. Upéixa voi Cristo-pe perovia porã ramo, pende jekokaharã voi ha'e. Ndape'a rei reíry arã. Pende jekokaharã voi ha'e. Upéixa ramo pemoirũ meme katu íxupe pene mombaraeteve teve hagwã pehovy, perovia porãve ráve hagwã íxupe. Orombo'e hagwe-rami, perovia katu íxupe. Petima porã porã katu ave Nhandejáry-pe peiko-vy. ⁸Xáke, oĩ ko pene mbotavyharã. Ani pene mbotavy teí. Cristo nhe'ê nomombe'úi va'e. Ha'e ae oarandu omombe'u arã. Omombe'u ra'anga anga rei va'erã peê-my. Oapuha rei-ma va'erã omombe'u peê-my. Teko rei nhe'êgwe omombe'u va'erã peê-my. Ko mundo járy Nhandejáry e'y va'e kwéry nhe'êgwe rei omombe'u. Hekoha-rupi katu ani pejererova teí. ⁹Ha Cristo katu heko Nhandejáry reko-rami. Ha'e ramigwa voi. Oheteporu ramo jepe, ha'e-rami joty oĩ. Ndaha'éí hekoha ambue va'e. Ha'e ramigwa joty voi. ¹⁰Opaixagwa mburuvixa va'e-rehe gwive ipu'aka va'e. Gwĩ yváy pygwa va'e-rehe, gwĩ vvy arigwa va'e-rehe ave ipu'aka va'e voi ha'e. Omanda va'e gwive Járy ha'e. Enterove va'e ipo pygwa meme oĩ. Ha peê katu peikoma ramo hendive, pene moingo-ma voi gwekoha-rupi. Pene remikotevê gwive ome'ê-ma peê-my. ¹¹Peê Nhandejáry javegwa voi. Yma va'ekwe judeu kwéry ha'e kwéry anho mante Nhandejáry re'yí. Cristo-pe pemoirũ-gwi, peiko-ma Nhandejáry javegwa ramo. Ndapeikói ramo jepe judeu kwéry reko-rupi, peiko-ma Nhandejáry javegwa ramo. Yma va'ekwe pejapo peiko-vy pejapose va'e. Pene rembiapo porã-ta mo'ã va'ekwe. Pene rembiapo vai joty peiko-vy. Pejapose va'ekwe pejapo joty ra'e. Ha ko'ánga katu Cristo

pene mombaete-ma voi pene rembiapo porā meme hagwā. ¹² Cristo va'ekwe omano rire, hetekwe renda-py omoī hetekwe. Upe rire, oikove jevy. Ha peē penhemongarai uka kuri Hesu Cristo réry-py. Penhemongarai rire-ma peiko-ma peteixa hendive. Āy katu peiko-ma Cristo ndive pmano va'ekwe vérami. Peikove jevy va'ekwe vérami peiko. Hesu omano rire va'ekwe, omoingove jevy íxupe Nhandejáry. Upe va'e nhe'ē pehendu ramo: “Imbaraete voi Nhandejáry” peje hese. Pejerovia-ma hese.* ¹³ Yma va'ekwe napeē-myi vérami va'ekwe onhe'ē. Heta pene rembiapo vai-gwi, napehendúiry voi va'ekwe. Nhandejáry he'i va'ekwe peikwaa e'ý va'ekwe. Napende járyi va'ekwe peē. Ha ko'ánga katu pene moingove-ma Cristo ndive peteixa peiko hagwā hendive. Nhane rembiapo vai va'ekwe gwive Nhandejáry omboykepa-ma nhandéhegwi. ¹⁴ Yma va'ekwe Nhandejáry omoī va'ekwe kwatia-rehe nhane rembiaporā. Upe va'e nhe'ē ndajajapói ramo va'ekwe jepe, nanhane moingo asýiry joty. Cristo omano-gwi pe kurusugwasu-rehe, nanhane moingo asy mo'ávéi-ma. Nhande reveha-rami omoī kurusu-rehe. Kurusu-rehe omano jave, omboykepa voi nhandéhegwi nhande reveha. Nanhane mbopaga ukáiry. ¹⁵ Ha'e omano ramo kurusu-rehe, omosē opaixagwa ko mundo járy kwéry, yváy pygwa, yvy arigwa ave yvy'ágwypóry, jaigwypóry ave. Gwí omanda va'e-pe gwive omosēmba. Hexapyrā-rupi voi ohexa uka enterovéa-pe opu'akaveha-gwi nomandavéi gwí mburuvixa kwéry. Opyta otimba ete hikwái entero mburuvixa gwive yváy pygwa, yvy arigwa ave, yvy'ágwypóry, jaigwypóry ave. Hekovia omanda mbaraeteve hese.

¹⁶ Upéa-gwi anive pehendu teī gwí peē-my he'i va'e: “Upe va'e hi'upy e'ý” he'i “Naiporāi pemboete e'ý arete. Naiporāi pemboete e'ý jasy ra'y áry pytu'uha áry ave” he'i peē-my. Upe va'e nhe'ē anive pehendu teī upe va'e nhe'ē. ¹⁷ Ha upe va'e nhe'ē gwive ndaha'ei Nhandejáry remimbota tee. Ndaha'ei āy pegwarā. Upe va'e nhe'ē ranhe ogwahē nhande-vy. Oguhē Cristo renonde rupigwa-rami. Imandu'aha ranhe ogwahē. Ha upe rire ae ogwahē ou-vy ha'e tee va'e ohexa uka hagwā nhande-vy anhetegwa va'e gwive. Upéa-gwi upe va'e nhe'ē ndaipokatuvéi-ma nhande-vy. ¹⁸ Ani pehendu teī peē-my he'i va'e: “Peē ko ndapeikói va'e tekoha-rupi. Iporāve ereiko xe rekoha-rupi” he'i mo'ā. “Xe py'amirí voi. Xe kyhyje Nhandejáry-gwi. Upéa-gwi nanhemopeteiry Nhandejáry-pe imboete-vy. Nhandejáry rembigwái kwéry-pe yváy pygwa va'e ae amboete ave” he'i mo'ā. Ani pehendu teī inhe'ē. Ixupéte ojehexa uka va'e omombe'u mbe'upa rei hikwái. Ikéra-py ohexa va'e omombe'u rei. Omombe'upa peē-my onhembotuvixa mba'ese-gwi mo'ā. Ha nonhembotuvixa mba'e teéiry. Ha'e ae oakā gwigwa omombe'u rei arā peē-my. Nhandejáry-pe oikwaa e'ý-gwi, Nhandejáry arandu katu nomombe'úi. ¹⁹ Upe va'e nomoirū teevéi-ma Hesu Cristo-pe. Upéa-gwi ha'e ae oarandu omombe'u. Cristo gwigwa arandu katu nomombe'úi. Nhane akā katu nhande rete mo'arandu va'e. Nhande rete omongakwaa va'e ave. Upéixa voi Cristo nhane mo'arandu va'e nhande rereko-vy. Nhande rete ojepota potapa ojóehe ombaraete hagwā. Upéixa ete voi Nhandejáry oipota nhande joja nanhopytygwō-vy nhane mbaraete hagwā.**

Pemoī katu pende resa yváy pygwa-rehe

(Gl 3.3-5)

²⁰⁻²¹ Ha Hesu Cristo katu omano va'ekwe kurusu-rehe. Peteixa pemoirū-gwi íxupe, peiko āy pmano va'ekwe-rami ave. Upéa-gwi ndaipu'akavéi pende-rehe ko mundo járy Nhandejáry e'ý va'e kwéry va'e, yváy pygwa. Upéixa ramo, ani vyteri pehendu teī gwí omanda rei va'e nhe'ē, Cristo ndive peiko e'ý va'e-rami. No'ā-rami he'i va'e ko mundo járy kwéry omanda-vy: “Oī ja'u va'e. Oī ja'u e'ý va'e ave. Ani erehupi teī ja'u e'ý va'e. Ani eremboja jepe ne apekū-rehe. Ani erepoko teī hese” he'i mo'ā. Ma'erā po pehendu upe va'e nhe'ē. Upéa rehegwa ja'u ramo, ndaiporivéi-ma, opa voi. Opa va'erā-rehe naiporāi nhamanda. ²² Upéa rehegwa nde'íry Nhandejáry va'ekwe. Teko rei nhe'ē ae upéa nhe'ē. Upéa-py rei nhane mbo'e va'ekwe teko rei. ²³ Gwí pende-rehe omanda va'e hi'arandu porā vérami mo'ā. Ha nahi'arandu porāi: “Iporā katu ereiko ore rekoha-rupi” he'i mo'ā.

* 2:12 Rm 6.3-4

* 2:19 Mt 7.15-20; 2 Co 11.1-4; Gl 1.8; Ef 5.6; 2 Pe 2.1-3

* 2:19 Ef 4.16

“Ore py'amirĩ voi. Ore kyhyje Nhandejáry-gwi. Upéa-gwi noromopeteĩry imboete-vy Nhandejáry-pe. Nhandejáry rembigwái kwéry-pe yváy pygwa va'e ae oromboete meme ave” he'i mo'ã. “Iporã ore rekoha-rupi peiko” he'i mo'ã peẽ-my. “Iporã katu jareko asy nhande rete nhamboeteve hagwã Nhandejáry-pe” he'i mo'ã peẽ-my. Ani pehendu teĩ inhe'ẽ. Pene mbo'e ramo jepe, nahi'arandu porãĩ joty voi pene mbo'eháry. Inhe'ẽ nhahendu ramo katu, ndaipóiry joty inhe'ẽ. Ijapu voi. Inhe'ẽ nhahendu ramo ndajaiko porãĩ arã joty. Nanhane mombaraeitéry va'e inhe'ẽ nhane rembiapo vai e'ỹ hagwã, jajapo porã meme hagwã. Nainhe'ẽ pokatúiry voi. Inhe'ẽ rei va'e hikwái. Ani erehendu teĩ inhe'ẽ.

3

¹Omano rire oikove jevy-ma Cristo va'ekwe. Peteixa memoirũ-gwi íxupe, peikove jevy-ma vérami peiko. Upéa-gwi pemoĩ katu pende resa yváy pygwa-rehe. Upe-py oĩ Cristo Nhandejáry yke-rehe ogwapy oĩ-vy. Nhandejáry ombopu'aka íxupe ha-py oĩ. ²Upe pygwa rehete pemondo meme katu pende resa. Ani pepena teĩ ko yvy pygwa-rehe peipota va'e-rehe. ³Áy peẽ peiko voi pmano va'ekwe-rami hendive. Napepenavéiry ko yvy pygwa-rehe. Peteixa memoirũ-gwi Cristo-pe, onhangareko va'e pene nhe'ẽ marangatu-rehe. Ha'e Nhandejáry ndive oĩ. Ha ko'ángã katu Nhandejáry ndive onhangareko va'e pene nhe'ẽ marangatu-rehe. ⁴Ha peẽ hendive peiko va'e. Ha'e pene nhe'ẽ marangatu-rehe onhangareko va'e voi. Ha'e ojehexa uka jevy ou-vy ramo, pende rexa uka va'erã hendive ave. Ha enterove va'e katu ombotuvixa mba'e íxupe va'erã. Pene mbotuvixa mba'e va'erã ave hendive.

Anive pejapo pejapo vai va'ekwe-rami
(Ef 4.17-25)

⁵Upéa-gwi xe anhemonhe'ẽ-ta peẽ-my. Anive pejapo vai teĩ. Anive pene mandu'a teĩ pene rembiapo vai va'erã-rehe. Anive penhemotĩ e'ỹ teĩ avave-pe. Teko rei reko-rupi ani pejogwereco teĩ. Ani pemondo pende resa pene rembiapo vairã-rehe. Ani peipota rei teĩ pende rapixa mba'e. Peipota va'e-rehete ani pepena eterei teĩ. Upéixa peiko ramo, Nhandejáry e'ỹ va'e pemboete peiko-vy. Naiporãĩ eremboete nde ereipota va'ête. ⁶Upéa rehegwa apoha gwive, Nhandejáry nhe'ẽ rendu e'ỹ va'e gwive, ogwereco asy va'erã íxupe kwéry Nhandejáry. ⁷Yma va'ekwe upéixa voi peiko va'ekwe. Upéa rehegwa pejapo japo peiko-vy va'ekwe. ⁸Ha ko'ángã katu anive pejapo pejapo vai va'ekwe-rami. Ani pende poxy teĩ. Ani ne mandu'a poxy teĩ nde rapixa-rehe. Ani erenhe'ẽ poxy íxupe. Ani nde py'a vai teĩ nde rapixa-rehe. Ani nde apu rei teĩ nde rapixa-rehe. Ani erenhe'ẽ rei rei hese. ⁹Perova-ma kuri pende rekoha vai peiko-vy napene rembiapo ndavéi-ma hagwã. Upéa-gwi ani pende apu ojóupe. ¹⁰Ko'ãny pene mboheko porã-gwi Nhandejáry, peẽ pende rekoha pyahu porã-ma voi. Oipota gweko rupive pive peiko peikwaa porãve ráve hagwã íxupe. ¹¹Nhande nhande rekoha pyahu porã-ma voi. Upéa-gwi nhandejéupe va'e gwive nhande jareko peteixa: “Ko va'e judeu e'ỹ va'e, upéa judeu kwéry va'e” ndaja'evéiry. “Ko va'e judeu reko-rupi oiko va'e. Upe va'e judeu reko e'ỹ-rupi oiko” ndaja'evéi-ma. “Ko va'e nhande re'yi e'ỹ va'e. Upéa nhande reko kwaa e'ỹ” ndaja'evéi-ma. “Ko va'e omba'apo va'e ijáry-pe mante. Upe va'e omba'apo va'e ojehénte” ndaja'evéi-ma. Ha Cristo katu nhande py'apy-py kwéry oiko va'e. Upéa-gwi nhande, nhande rekoha pyahu porã va'e, aỹgwa peteixa jareko nhandejéupe. ¹²Ha peẽ katu Nhandejáry re'yi. Pende rayhu va'ekwe. Pende poravo va'ekwe ojéupe gwarã. Upéa-gwi perova katu pende rekoha. Peiporiahuvereco katu pende rapixa-pe. Ani pene mba'e rakate'ỹ teĩ íxupe. Eme'e ae katu íxupe hemikotevẽ va'e. Ani penhembotuvixa mba'ese eterei. Ani pende poxy pya'e teĩ pende rapixa-pe. Perekó kirirĩ rei ae katu íxupe. ¹³Túvy-rami pejogwereco porã katu. Ipoxy ramo jepe nde rapixa, túvy-rami joty peiko katu íxupe. Ani perekó poxy íxupe. Pende poriahuvereco Nhandejáry. Upéa-gwi pejoporiahuvereco reko katu peiko-vy ave.

* 3:1 Sl 110.1 * 3:10 Gn 1.26 * 3:11 Ef 4.17-32

Ha nde rapixa katu nde rereko asy ramo jepe, eiporiahuvereko reko meme joty katu íxupe. ¹⁴Pejohayhu porã porã katu. Pejohayhu ramo, pende joja porã porã tee joa va'erã. ¹⁵Ha pene mbopy'agwapy va'e katu Cristo voi peiko hagwã pende py'agwapy reheve. Pende pe'a va'ekwe Nhandejáry peteixa peiko hagwã onhondive pende joja meme hagwã pende py'agwapy reheve. Upéixa ramo petima porã katu Nhandejáry-pe pemboete-vy.* ¹⁶Topyta meme katu nde py'apy-py Cristo nhe'ê porã gwive. Pehendu porã porã katu inhe'ê. Penhombo'e mbo'e katu arandu-rupi. Penhemonhe'ê ojóupe arandu-rupi. Peporahéi katu. Nhandejáry nhe'ê héry va'e Salmo-py eporahéi. Eporahéi mborahéi-py ave. Nhandejáry mboete-vy peporahéi katu. Petima porã katu íxupe pende py'a gwive. ¹⁷Ha ne rembiapo va'e gwive ejapo katu Nhandejáry Hesu réry-py. Ere va'e gwive, ere katu Hesu rekovía. Hesu réry-rupi petima porã katu Nhandejáry Nhande Ru va'e-pe.*

Opáixa pene rembiaporã pejapo katu nde py'a gwive
(Ef 5.21-6.9; 1 Pe 3.1)

¹⁸Áy peê kunha eremenda va'ekwe-pe anhemonhe'ê-ta. Pehendu katu peteí teí pene ména nhe'ê. Peê Hesu roviaha voi. Upéa-gwi iporã katu pehendu pene ména nhe'ê. ¹⁹Áy peê kwimba'e eremenda va'ekwe-pe anhemonhe'ê-ta. Ehayhu tee katu ne rembireko-pe. Ani erereko asy teí íxupe. ²⁰Áy peê mitã kwéry-pe anhemonhe'ê-ta. Peê Hesu roviaha va'e voi. Upéa-gwi pehendu meme katu pende ru, pende sy nhe'ê. Upéixa pejapo arã Nhandejáry remimbota. ²¹Áy peê mitã ru va'e-pe, mitã sy va'e-pe anhemonhe'ê-ta pono pemanda pohýi pende ra'y kwéry-pe, pende rajy kwéry-pe ave. Ani nde poxy reheve eremenda nde ra'y kwéry-pe. Upéixa ramo mba'eve ndojaposevéi arã hikwái. ²²Áy penhembomba'apo va'e anhemonhe'ê-ta peê-my. Pehendu meme katu ne mba'ejáry nhe'ê. Oí oipota va'e imba'ejáry imandu'a porã hese. Imba'ejáry resa-py omba'apo. Ndoikovéi ramo katu nomba'apói. Ani peiko upe va'e reko-rupi. Ndoikovéi ramo ne mba'ejáry, oí vérami joty ne ndive, emba'apo joty. Nde py'a gwive emba'apo katu eremboete-gwi Nhandejáry-pe. ²³Opáixa pene rembiaporã pejapo katu nde py'a gwive. Ne momba'apo ramo, ani ere: "Amba'apo teko rei-pete". Ere ae "Nhandejáry-pe ave amba'apo" ere. ²⁴Eremba'apo porã ramo, ome'ê va'erã nde-vy Nhandejáry ne rembiapokwe repy. Ne mandu'a katu upe va'erã-rehe. Nhandejáry re'yí pegwarã ome'ê va'erã nde-vy. Ndaha'éi teko rei nde Járy tee. Cristo ae katu nde Járy tee. ²⁵Entéro hembiaapo vai va'e-pe gwive Nhandejáry peteixa ogwereco va'erã. Ombohasa asy va'erã íxupe kwéry hembiaapo vai va'ekwe-gwi. Mburuvixa ramo jepe, hembigwái ramo jepe, peteixa ombohasa asy va'erã íxupe kwéry.

4

¹Oí pene pa'ü-my oporomomba'apo va'e. Nde eremomba'apo va'e anhemonhe'ê-ta nde-vy. Eme'ê katu ne rembigwái kwéry-pe hemikotevê kwéry. Ani ne mba'e rakate'y teí íxupe kwéry. Oime ko nde Járy ave yváy-py. Ne mandu'a katu nde Járy yváy pygwa-rehe.

Paulo onhemonhe'ê íxupe kwéry
(Lc 18.1-8; Ef 5.15-16; 6.18-20; 1 Ts 5.17; 1 Pe 3.15-17)

²Ani pejapo e'y teí oraçãõ. Ani ne mandu'a Nhandejáry rehegwa e'y-rehe, pejapo jave oraçãõ. Petima porã Nhandejáry-pe imboete-vy. ³Pejapo jave oraçãõ, pemondo katu pene nhe'ê Nhandejáry-pe ore-rehe ave omombe'u uka porã hagwã ore-vy. Oromombe'useve Nhandejáry nhe'ê. Hesu Cristo nhe'ê oromombe'useve ave. Cristo rehegwa ojehexa uka ramo va'e nhande-vy oromombe'use. Ko'ánga Cristo rehegwa nhe'ê amombe'u-ma aikovygwi, xe moí-ma kuri preso. ⁴Upéa-gwi pejapo katu oraçãõ xe-rehe xe aikwaa uka porãve hagwã inhe'ê amombe'u-vy. Amombe'u porã hagwã Nhandejáry oipotaha-rami amombe'u hagwã, pembojeupi katu Nhandejáry-pe pene nhe'ê xe-rehe. ⁵Ha gwí Hesu roviaha e'y va'e katu ereko arandu katu íxupe. Mamo eretopa ha-rupi, ereko reko

* 3:15 Ef 4.1-16 * 3:17 Ef 5.15-20

arandu katu íxupe.* ⁶ Pende poxy-pype ani penhe'ê teĩ íxupe. Penhe'ê porã ae katu enterove va'e pene nhe'ê ohenduse hagwãixa. Upéixa ramo peteĩ teĩ va'e oporandu ramo nde-vy, ohendu hagwãixa eremombe'u va'erã íxupe kwéry.

Paulo irũ he'i uka íxupe omandu'a porãha

⁷ ãy amondo-ta nde-vy xe irũ Tíquico héry va'e. Ogwahẽ ramo nde ha-py omombe'upa va'erã xe aikoha upéixa. Ha'e nhande ryvy voi jajohayhu va'e. Nhane pytygwõ va'e nhane mbotavy e'ỹ reheve. Nhandejáry rembiapo ojapo japo va'evy. Ore ndive oiko va'evy Nhandejáry rembiapo orojapo ramo. ⁸ Upe va'e amondo-ta kuri peẽ-my ore moherakwã porã hagwã pene mbopy'agwasu hagwã. ⁹ Indive oho-ta kuri nhande ryvy Onésimo nhane rembiayhu va'e, Hesu rape-gwi ojere e'ỹ va'e. Ha'e nde re'ýi voi, ne irũ va'e ave. A-py ojehu va'ekwe gwive omombe'u-ta peẽ-my. ¹⁰ Ha Aristarco katu xe ndive oĩ preso va'e he'i uka-ta peẽ-my omandu'a porãha. He'i uka-ta ave peẽ-my omandu'a porãha Barnabé ryvy Marco. Oho jevy ramo peẽ-my erohory katu íxupe Marco-pe. Amondo kuri hesegwa xe nhe'ê perohory hagwã íxupe. ¹¹ Ha Josué Justo katu he'i uka-ta peẽ-my omandu'a porãha. Upe mbohapygwa Aristarco, Marco, Josué Justo ave, judeu kwéry va'e, ha'e kwéry anho xe pytygwõ va'e. Outro kwéry Hesu-rehe ojerovia va'e, judeu kwéry va'e, naxe pytygwõiry. Ha upe mbohapygwa ae katu xe pytygwõ. Xe pytygwõ amombe'u hagwã nhande rivixa rehegwa nhe'ê. Xe mbopy'agwasu ave xe pytygwõ-gwi. ¹² Ha Epafras katu ne irũ va'e, Hesu Cristo rembigwái va'e ave, he'i uka-ta ave peẽ-my omandu'a porãha. Ha'e ojerure meme Nhandejáry-pe pende-rehe. Ojerure mbaraete tee íxupe pene mbopy'agwasu hagwã, onhembohetave tave peẽ-my pene rembigwaa, pepyta e'ỹ hagwã mitã reko-rami, pejapopa hagwã Nhandejáry remimbota gwive. ¹³ Ha'e omba'apo va'e voi. Ndopytavéi oração apo-vy. Pende-rehe meme ojapo oração. Laodicéia tetã mygwa-rehe, Hierápolis tetã mygwa-rehe ave ojapo meme oração. Xe resa-rupi ahexa va'ekwe amombe'u. ¹⁴ Ha Lucas katu nhane mbogwerahaty nhane rembiayhu va'e ave, he'i uka-ta ave omandu'a porãha. Demas ave he'i uka-ta omandu'a porãha. ¹⁵ Xe rekovía peraha katu xe mandu'a porãha xe ryvy kwéry-pe Laodicéia tetã mygwa-pe. Peraha katu kunha héry va'e Ninfa-pe ave. Hóga-py onhomboaty va'e Hesu reroviaha kwéry. Upe-py onhomboaty va'e-pe gwive, peraha katu xe mandu'a porãha. ¹⁶ Eremonhe'ẽmba rire ko kwatia nhe'ê atýra-py, embohasa outro po-py. Embohasa gwĩ Hesu reroviaha-pe Laodicéia tetã mygwa-pe. Emonhe'ê uka xe kwatia upe-py. Upe-gwĩ ombohasa-ta ave peẽ-my outro xe kwatia nhe'ê ave. Ogwahẽ ramo, pemonhe'ê katu ave pe outro xe kwatia nhe'ê. ¹⁷ Ha ere katu kuri xe ryvy Arquipo-pe: "Ne rembiaporã Nhandejáry remime'égwe. Hesu reroviaha-pe ereipytygwõ hagwã he'i nde-vy Nhandejáry. Upe va'e gwive ejapopa katu" ere íxupe. ¹⁸ ãy amondo-ta peẽ-my xe mandu'a porãha. Xe voi ajapo xe réry xe po-rupi. Pene mandu'a meme katu preso aimeha-rehe. Tapende rovasa katu Nhandejáry pende rexakwaa rei-vy. Opa xe nhe'ê.

* 4:5 Ef 5.16

Paulo remimombe'ukwe
Tessalônica tetã mygwa pegwarã 1
primeira epístola de Paulo aos tessalonicenses

Paulo inhirũ ave omondo Tessalônica tetã mygwa-pe onhe'ẽ kwatia-rehe

¹ Hesu reroviaha Tessalônica tetã-my oiko va'e kwéry. Ore Paulo, Silvano, Timóteo ave oromondo-ta peẽ-my ore nhe'ẽ. Kwatia-rehe oromondo-ta peẽ-my. Nhandejáry ko Nhande Ru. Peẽ katu ijave etegwa voi, Nhandejáry Hesu Cristo jave etegwa ave. Tapende rexakwaa rei katu Nhandejáry pende rovasa porã-vy. Tapene mbopy'agwapy ave.

Paulo otima porã Nhandejáry-pe Tessalônica tetã mygwa-rehe

^{2,3} Ha ore ore mandu'a meme va'e pende-rehe kwéry oronhomongeta jave Nhandejáry Nhande Ru ndive. Perovia tee va'e Nhandejáry-pe. Pehayhu tee va'e íxupe ave. Upéa-gwi pene kane'õ ramo jepe pene rembiapo porã porã joty. Napeha'arõ ku'a ku'ái va'e Nhandejáry Hesu Cristo-pe. Peha'arõ tee ae íxupe peiko-vy ou hagwã nhane resende hagwã. Gwĩa-rehe ore mandu'a ramo, orotima porã porã oroiko-vy Nhandejáry-pe pende-rehe. Nhandejáry ndive oronhomongeta jave ore mandu'a pende-rehe. ⁴ Ha peẽ katu, ore re'yí kwéry, Nhandejáry rembiporavo voi nipo ra'e. "Hembiayhu nipo ra'e ave" oro'e ro'e pende-rehe. Oroikwaa voi. Orohexa-gwi pende rekoha porã, oroikwaa voi. ⁵ Heta oronhomonhe'ẽ nhe'ẽ va'ekwe peẽ-my. Oronhomonhe'ẽ jave napenduru reiry va'ekwe. Perovia tee-ma voi va'ekwe. Ipu'aka Hesu rehegwa nhe'ẽ pende-rehe. Upéa-gwi perovia tee voi va'ekwe íxupe. "Anheĩ nipo ra'e kóá nhe'ẽ" peje va'ekwe, oikwaa uka peẽ-mygwi Nhe'ẽ Marangatu tee va'e. Upéixa ramo pende rekoha oroikwaa ramo, orotima porã Nhandejáry-pe. Ha ore rekoha peikwaa voi. Pehendu porã hagwã mba'e-rami orogwerekó va'ekwe oronhomonhe'ẽ-vy peẽ-my peikwaa voi. ⁶ Ha peẽ katu peikose va'ekwe ore reko-rupi. Nhandejáry Hesu reko-rupi peikose ave. Oronhomonhe'ẽ ramo pehenduru va'ekwe Hesu nhe'ẽ. Ha pende rapixa pene moingo asy voi. Pehendu-gwi Nhandejáry Hesu nhe'ẽ, pene moingo asy. Upéixa pende rereko asy ramo jepe, pene mbovy'a joty Nhe'ẽ Marangatu tee va'e.* ⁷ Pende rekoha porã ete voi. Upéa-gwi Macedônia vvy pygwa Acaia vvy pygwa ave, Hesu nhe'ẽ renduha va'e oikose pende reko-rupi. ⁸ Pendéhegwi onhemombe'u va'ekwe nhe'ẽ porã. Opa-rupi onhehenduru. Macedônia vvy-rupi, Acaia vvy-rupi ave ohenduru pene rerakwã. Nhandejáry perovia tee-gwi opa-rupi oho pene rerakwã porã. Upéa-gwi, ojekwaa-gwi opa-rupi, ore noromombe'úi pene rerakwã. ⁹ Oromombe'u rekovia íxupe kwéry, he'i ore-vy Hesu reroviaha omombe'u-vy: "Ohenduru porã nipo ra'e pene nhe'ẽ Tessalônica tetã mygwa kwéry" he'i. "Upéa-gwi nipo ra'e omboyke tupã ra'anga anga rei ogwerova-ma hagwã gweko Nhandejáry-rehe. Tupã tee oikove va'e rekoha-rupi oiko hagwã ogwerova-ma gwekoha" he'i ore-vy. ¹⁰ "Ha ko'ánga katu oha'arõ oiko-vy Nhandejáry ra'y Hesu-pe, hemimoingove jevy va'ekwe, ogwejy jevy hagwã yváy-gwi. Oha'arõ voi oiko-vy Hesu nhane resendeharã" he'i ore-vy pene momba'u-vy. Ha Nhandejáry omoingo asy-ta ramo entéro hekoha vai va'e kwéry gwive, imyту'e'y eterei ramo Nhandejáry-gwi híkwái, upe áry-py voi nhane resendeharã voi Hesu.

2

Mitã isy ogwerekoha va'e-rami Paulo ohayhu pe tetã mygwa-pe

^{1,2} Are-ma oroho va'ekwe Filipos tetã-my. Orogwahẽ ramo upe-py ore moingo asy voi. Upe pygwa kwéry ore rereko asy va'ekwe onhembosarái-vy ore-rehe. Upe va'e peikwaa voi, xe re'yí kwéry. Upe rire orohasa asy rire, oroho pende ha-py. Orohasa asy rire, ore mbopy'agwasu joty Nhandejáry oromombe'u hagwã peẽ-my hesegwa nhe'ẽ porã. Pende rapixa kwéry ore nhe'ẽ omboyke ramo jepe, oromombe'u joty nhe'ẽ porã. Ndoroho reíry

* 1:6 At 17.5-10

orohemonhe'ê-vy peê-my. Pehendu voi ore nhe'ê.* ³Oronhemonhe'ê ramo peê-my, ndaha'êi voi imombe'u jevypyre ore-vy. Ore ko anhetegwa voi oromombe'u va'ekwe peê-my. Ore reko ky'a e'y reheve oronhemonhe'ê va'ekwe. Ndaha'êiry voi orombotavuse-vy rei oronhemonhe'ê va'ekwe. Anhetegwa tee va'e meme voi oromombe'u oronhemonhe'ê-vy peê-my. ⁴Ha Nhandejáry katu ojohu porã-gwi ore reko ojerovia ore-rehe. Upe ramo he'i ore-vy oromombe'u hagwã Hesu rehegwa nhe'ê porã. Upéa-gwi mate orojapo hemimbota oronhemonhe'ê-vy. Teko rei remimbota katu ndorojapói. Nhandejáry remimbota ae mate orojapo. Nhande py'apy gwive oikwaa va'e Nhandejáry. Iporã para'e, ivai para'e? Upéa Nhandejáry oikwaa voi. Ndaipóri mba'eve onhemi va'e íxugwi. ⁵Aipo ramo noromboete reíry va'ekwe orombotavy hagwã. Upéa peikwaa voi. Noronhe'ê ra'anga anga reíry oroiptave-gwi orejúpe gwarã. Ore apu ramo oikwaa ave arã Nhandejáry. ⁶Ore Cristo remimondo voi. Ha noronhemboete reiséiry. Noronhemboete rei ukaséiry peê-my, Noronhemboete rei ukaséiry avave-pe. ⁷Upéa-rupi: “Jaha jajerure nhane ma'erã-rehe” ndoro'êi joty. Nhandejáry he'i ramo jepe nhande-vy: “Iporã xe remimondo okaru rei” he'i ramo, oromba'apo joty ore rembi'u repyrã-rehe. Ndojerure ruréiry joty ore remi'urã-rehe. Oroiko ramo pene pa'ũ-my, orogwereco porã porã rei peê-my. Mitã isy ogwerekoha va'e-rami orohayhu oroiko-vy peê-my. ⁸Orohayhu eterei-gwi oromombe'u va'ekwe peê-my Nhandejáry nhe'ê porã. Upe rire orome'êse ave peê-my ore rekove. Orohayhu eterei-gwi oroiko-vy, nore rakate'yíry ore rekove-rehe ime'ê-vy. Orome'êse voi ore rekove. Orejúpe katu ndoroikói. Peê-my gwarã mante ore oroiko. ⁹Ha ko'anga pene mandu'a va'e voi ore rembiapo hatã hagwe-rehe, ore re'yí kwéry. Ore mokane'ó ne'ó hagwe-rehe pene mandu'a va'e. Oromombe'u ramo nhe'ê porã, ndoroipotái va'ekwe peme'ê rei ore-vy ore remi'urã. Upéa-gwi ndoropytái oromba'apo e'y reheve va'ekwe. Áry-py pyhare ave oromba'apo oroiko-vy. ¹⁰Apogwereco porã va'ekwe peê-my, Hesu reroviaha va'e kwéry-pe. Ore reko marangatu oroiko-vy. Ndohejáry voi tape porã. Ore reko jejavy e'y reheve ore oroiko va'ekwe. Ha peê katu upéa rexahare voi. Ndore apúí voi. Ore apu ramo oikwaa arã Nhandejáry. ¹¹Oronhemonhe'ê peê-my túvy onhemonhe'êha-rami gwa'yry-pe. Nde rúixa peteí teí-pe oronhemonhe'ê: “Eiko katu Nhandejáry rekoha-rupi. He'i hagwe-rami eiko” oro'e ro'e peê-my. ¹²“Ha Nhandejáry katu ha'e pene mogwahê va'erã pende rúixa ramo oiko ha-py, hendy-rupi onhemomba'egwasu ete ha-py. Aníke pemboyke teí íxupe. Peipyhy katu tape porã pono pemonhemotí íxupe” oro'e va'ekwe peê-my.

Ohasa asy hagwe-rami Nhandejáry re'yí, ohasa asy ave pe tetã mygwa

¹³Upéixa ramo oromombe'u ramo nde-vy Nhandejáry nhe'ê, pehendu va'ekwe. Pehendu ramo: “Ko va'e nhe'ê Nhandejáry nhe'ê tee voi ra'e. Ndaha'êi teko rei nhe'ê. Nhandejáry nhe'ê tee ae voi ra'e” peje va'ekwe ojéupe. Peje porã voi. Kóá nhe'ê Nhandejáry nhe'ê tee voi. Kóá nhe'ê pene mo'arandu va'e perovia ramo. Kóá nhe'ê pene mbopy'apyhy pyhy va'e perovia-gwi. Upéa-gwi orotima porã porã pende-rehe Nhandejáry-pe. ¹⁴Perovia rire, ore re'yí kwéry, pehasa asy va'ekwe. Ohasa asy hagwe-rami Nhandejáry re'yí mamó ojogweroaty aty ha-rupi, pehasa asy ave. Ohasa asy hagwe-rami Judéia yvy rupigwa Hesu Cristo reroviaha kwéry, peê ave pehasa asy. Peha'ã-ma íxupe kwéry. Ha judeu kwéry ogwereco asy va'ekwe gwe'yí kwéry. Upéixa voi áy pene moingo asy ave pende re'yí kwéry. Upéixa peiko-ma heko-rupi, Hesu reroviaha reko-rupi, Judéia pygwa reko-rupi. ¹⁵Ha judeu kwéry katu hekoha vai va'e. Yma ojuka juka va'ekwe Nhandejáry nhe'ê-py omombe'u va'ety kwéry-pe. Ojuka rire, ojuka va'ekwe Nhandejáry Hesu-pe ojuka hikwái. Upe rire ore mosê kuri ore mondo-vy. Ha Nhandejáry ndojohu porã hembiaipo. Ndojapóiry hemimbota hikwái. Entéro kente kwéry-rehe gwíve ndajja'êiry hikwái. ¹⁶Ndoipotái oromombe'u Nhandejáry nhe'ê judeu e'y kwéry-pe. Nhandejáry oresende judeu e'y-pe ndoipotái voi hikwái. Ndoipotái teí jepe, ore oromombe'u joty. Upéixa ramo hembiaipo vaíve ive voi oho-vy. Ha áy katu Nhandejáry

*

2:1-2 At 16.12-24; 17.1-9; 2 Co 1.12

nhe'ê-py ogwahê-ma ombohasa asy hagwã áry. Angaete-ma Nhandejáry ombohasa asy-ta íxupe kwéry.

Paulo oho-ta mo'ã Tessalônica tetã-my

¹⁷ Orohexa nga'u eterei va'ekwe, ore re'íy kwéry. Sapy'a ete ndorohexái peê-my. Orohexa nga'u eterei-gwi tyre'ÿ-rami oroiko. Ndorohexavéi ramo jepe, oronhesamondo mondo rei joty oroiko-vy pende-rehe kwéry. Upéixa ramo orohexa nga'u eterei-gwi, orohexaseve seve pende rova. Orojapura ave. Orohexase-ma voi pende rova. ¹⁸ Upe-ma ramo oroho-ta mo'ã pende ha-py. Xe Paulo ahasé hase rei aiko-vy pende ha-py. Ha Satanás anháy ruvixa katu ore joko joko, ndohejáí oroho hagwã pende ha-py. Upéa-gwi orohose ramo teí jepe, ndorohói joty. ¹⁹ Ha ogwejy jevy ou-vy ramo Nhandejáry Hesu, ndaipóri voi ne ramigwa ore mbovy'a va'erã. Hesu yke-rehe nhaí ramo, upe-py apohexa ramo, orovy'a-ta. Pende-rehe kwéry voi ore orovy'a-ta. Upe-py oro'e-ta pende-rehe: “Nhane remimombe'u ndareíry” oro'e-ta pende-rehe. ²⁰ Pende-rehe ore oronhemomba'egwasu-ta. Pende-rehe kwéry orovy'a eterei-ta.

3

Timóteo ogwahê jevy. Herakwã porã ogweru

¹² Upe ramo heta orohexa nga'u va'ekwe. Ajapura voi aikwaa hagwã mba'éixa po peiko. Xe ajapura-gwi amondo kuri pende rexa-vy xe irũ Timóteo. Ha'e Nhandejáry dhe'ê apoha Hesu dhe'ê mombe'uhaty. Ha upéi xe anho apyta a-py Atenas tetã-my. Xe irũ e'ÿ reheve apyta. Naxe rakate'ÿi xe irũ-rehe: “Iporãve xe apyta xe anho” ha'e xejeupe. Ndapytaséi ha-gwi apyta joty xe anho, ajapura-gwi aikwaa hagwã mba'éixa po peiko. Upéa-gwi amondo kuri Timóteo onhemonhe'ê hagwã peê-my: “Perovia tee katu Hesu-pe. Peiko meme katu tape porã-rupi.” ³ Aníke pejere tape porã-gwi erehasa asy jave.” Upéa he'i hagwã peê-my amondo kuri íxupe. Nhande kwéry, Hesu reroviaha va'e jahasa asy va'erã voi. Upeixagwa nhande-vy gwarã voi. Upéa peikwaa voi. ⁴ Oroime ramo pene ndive va'ekwe oromombe'u va'ekwe nhane renonderã: “Jahasa asy-ta” oro'e va'ekwe peê-my. Ha ko'ánga katu oro'e hagwe-rami jahasa asy-ma jaiko-vy. Upéa peikwaa voi. ⁵ Upéa-rehe ajapura eterei-gwi, amondo kuri aikwaa hagwã perovia porã-ma para'e, perovia ku'a ku'a rei para'e. Pende reko mbo'e vai-ma para'e anháy ruvixa Satanás. Pende reko roveroma para'e Satanás. Upéa nhande reko mbo'e vaise va'ety voi. Pende reko roveroma para'e gwekoha-rupi ra'e. Aipo ramo oronhemonhe'ê rei voi arã araka'e peê-my. ⁶ Ha ko'áy ogwahê jevy-ma ou-vy pende ha-gwi. Ogwahê jevy-ma ou-vy ore ha-py Timóteo. Pene rerakwã porã ogweru imombe'u-vy ore-vy. He'i ore-vy pende-rehe: “Ogwerovia tee-ma hikwái Nhandejáry-pe. Ojohayhu tee hikwái. Nde-rehe imandu'a porã meme hikwái. Erehexa nga'uha-rami íxupe kwéry nde rexa nga'u ave hikwái” he'i ore-vy pende-rehe. ⁷ Upéa-rehe ore orohasa asy jave, orojepy'a jopy jave, orohendu-ma voi perovia tee ramo. Orohendu-ma ramo, ndapogwerokyhyjevéi-ma peê-my perovia tee-magwi. Ore mbopy'agwapy jevy-ma katu. ⁸ Eremboyke e'ÿ ramo Nhandejáry-pe, ereipyhy joty ramo tape porã, oroiko porã jevy ore ave. Ore pytuhê jevy-ma ore ave. ⁹ Ore mbovy'a-gwi Nhandejáry, orovy'a eterei pende-rehe. Upéa-gwi orotima porã Nhandejáry-pe. Orotima porãseve íxupe pende-rehe kwéry. Ha norotima porã kwaíí íxupe. Mba'e-rami tamo ra'e orotima porãve hagwã íxupe. ¹⁰ Oromondo mondo oroiko-vy Nhandejáry-pe ore dhe'ê. Pyhare áry-py ave ore kyre'ÿ voi orojerure rure-vy íxupe jajohexa jevy hagwã. Upéi katu jajohexa jevy ramo, nderejerovia porã teíí ramo Hesu-rehe, orombojerovia porã arã hese. Ndereho porã teíí ramo, orombo'e arã ereho porãve hagwã tape porã-rupi.

*Paulo ojapo oração
(Cl 1.9; 2 Ts 2.16-17)*

* 3:1-2 At 17.15 * 3:6 At 18.5

¹¹ Tohexa uka ore-vy tape porā Nhandejáry, Nhande Ru, orogwahē hagwā oroho-vy pende ha-py. Tore reraha katu ave pende ha-py Nhandejáry Hesu. ¹² Nhandejáry nhe'ē-rupi tapejohayhu porāve rāve katu. Enterovéa-pe pehayhu porāve katu. Ore orohayhu teeha-rami ave peē-my, pejohayhu katu. ¹³ Upéixa ramo pene mbopy'apyhy pyhy-ta Nhandejáry ndapejevavyvéi hagwā, ndapejeréi hagwā tape marangatu-gwi. Upéixa ramo, ogwejy jevy ou-vy ramo Nhandejáry Hesu imarangatu va'e kwéry ndive, penhembo'y va'erā Nhandejáry rovagwy-py peĩ-vy. Pejevavy e'ỹ reheve, pende py'a potĩ reheve, penhembo'y va'erā Nhande Ru rovagwy-py.

4

Oipota Nhandejáry heko marangatu

(Rm 13.13-14; Ef 5.3-8)

¹ Ko'ánga oromombe'u jevy-ta pende rekorā, ore re'íy kwéry. Oromombe'u va'ekwe pende rekorā. Mba'éixa po pejapo-ta Nhandejáry remimbota orombo'e va'ekwe. Ko'ánga pejapo voi Nhandejáry remimbota orombo'e hagwe-rami. Upéa-gwi oronhemonhe'ē jevy peē-my Nhandejáry Hesu réry-py: “Pejapo porāve rāve katu hemimbota” oro'e peē-my. Nhane moirū-gwi nhande-vy Hesu oronhemonhe'ē. ² Nhandejáry Hesu réry-py oronhemonhe'ē peē-my va'ekwe. Mba'e-py orombo'e va'ekwe peikwaa voi. ³ Oipota Nhandejáry pende reko marangatu. Ndoipotái teko ky'a-rupi peiko rei-vy. ⁴ Emenda katu petei teĩ pekwa va'e erereko kwaa hagwā ne rembireko erenhomongy'a e'ỹ reheve. Pejogwerekere enterovéa ne mboete hagwā. ⁵ Teko ky'a-rupi rei ani ereiko teĩ judeu e'ỹ va'e-rami. Gwĩ Nhandejáry-pe oikwaa e'ỹ va'e-rami ani ereiko teĩ. ⁶ Nhandejáry ndoipotái erejevavy. Ndoipotái erejapo vai nde rapixa-rehe. Ha erejapo vai ramo ae nde rapixa-rehe, ne rembiapo vaikwe-rehe ne mbohasa asy va'erā Nhandejáry nde rapixa repy-vy. Upéa-gwi oro'eri eri va'ekwe peē-my: “Anive erejapo upéa.” ⁷ Nhande poravo va'ekwe Nhandejáry jaiko hagwā teko ky'a e'ỹ reheve. Jaiko marangatu hagwā nhande poravo va'ekwe. Nanhande poravói voi va'ekwe teko ky'a-rupi jaiko hagwā. ⁸ Ko va'e nhe'ē ndaha'ei teko rei nhe'ē. Nhandejáry nhe'ē ae. Upéa-gwi ohendu e'ỹ va'e kente kwéry omboyke voíte Nhandejáry-pe. Nhandejáry ome'ē va'ety peē-my Nhe'ē Marangatu tee va'e. Upéa-gwi ndikatúí eremboyke íxupe.

Pejohayhuve huve katu, he'i Paulo

(Jo 13.34; 15.12; 1 Jo 3.11; 4.11; 1 Co 4.12; Ef 4.28-29; 2 Ts 3.6-12)

⁹⁻¹⁰ Oromombe'u va'ekwe peē-my pejohayhu hagwā. Ha ko'ánga upéixa jevy oromombe'u ramo, oromombe'u rei arā. Pene mbo'e va'ekwe Nhandejáry pejohayhu hagwā. Upéa-gwi Hesu nhe'ē reroviaha-pe gwive, Macedônia yvy-rupi oiko va'e, pehayhu voi pekwa-vy. Upéa-gwi natekotevéi avave ohai peē-my penhemonhe'ē-vy pejohayhu hagwā. Ko'āy ae katu “Pejohayhuve huve rei katu” oro'e ae-ta peē-my. ¹¹⁻¹² Ani pejotoryva teĩ. Ani ne mba'e avyky ereiko-vy ne akā hatā reheve. Ani erema'ē teĩ nde rapixa mba'e-rehe. Ne mba'e-rehe ae enhangareko katu. Oro'e jevy-ma oro'e hagwe-rami: “Emba'apo katu ne mboete hagwā Hesu rendu e'ỹha. Ani ereiko ipituvva va'e-rami. Emba'apo katu mba'evere-rehe ereikotev'ē e'ỹ hagwā. Anive teĩ ne mba'e jerure” oro'e meme peē-my.

Paulo omombe'u omano va'ekwe rehegwa

(Mt 24.30-31; 1 Co 15.51-58)

¹³ Ko'ánga, ore re'íy kwéry, oromombe'u-ta peikwaa hagwā omano va'ekwe rehegwa. Heta oĩ ohapirō va'e: “Áy ae ndajahexavéi-ma voíte omano va'ekwe. Opa ma ngatu” he'i mo'ā. Ndoipotái erehapirō gwĩ va'e-rami. ¹⁴ Ha Hesu katu omano rire, oikove jevy-ma. Upéa nhe'ē jarovia voi. Upéixa voi Hesu oikove jevy-gwi oimogove-ta Nhandejáry heru-vy. Hesu reroviaha omano va'ekwe-pe ogweru-ta Nhandejáry. Upéa-gwi ani pehapirō teĩ. ¹⁵⁻¹⁶ Kó'a nhe'ē Nhandejáry-gwi orohendu va'ekwe oromombe'u-ma peē-my. Hesu ogwejy jevy ou-vy ramo, entéro hese ojerovia va'e gwive ojeupi va'erā yváy-py. Omano va'ekwe ranhe oje'ói va'erā ojeupi-vy nhane renonde-rupi. Ha nhande

jaikove va'e, ko vvy-py japyta va'e, nhande rorojeupi arã hapykwéri. Ha Nhandejáry Hesu ogwejy-ta ou-vy yváy-gwi. Hatã onhe'ê-ta omanda-vy. Ha hembigwái yváy pygwa onhemomba'egwasu ete va'e nhane renói-ta. Nhane renói-vy omonhe'ê-ta Nhandejáry remimbygwasu. Nhandejáry mba'e tee va'e voi. Ha upéi katu oikove jevy ranhe-ta gwí omano va'ekwe, Hesu onhangareko hese va'e. ¹⁷Upe rire nhande jaikove va'e, nhamano e'ÿ va'e, nhande rorojeupi va'erã nhande reraha-vy arai-rupi. Onhemoingove va'ekwe ndive nhande rorojeupi va'erã. Upe-py áry-rupi nhande nhandhogwaiti va'erã jahavy Nhandejáry Hesu ndive jaiko hagwã. Upéixa ramo mante jaiko meme ete-ta voi Nhandejáry Hesu ndive. ¹⁸Upéa-gwi kóa nhe'ê pemombe'u mbe'u ojóupe napehaporóvéi hagwã, penhombopy'agwapyta hagwã.

5

Jaikwaa e'ÿ va'e óra-py ogwejy-ta ou-vy Nhandejáry Hesu
(Lc 12.39-40; 2 Pe 3.10)

¹Oromombe'u va'ekwe peê-my Nhandejáry Hesu áry rehegwa nhe'ê igwejy hagwã. Ore remimombe'ukwe peikwaa voi nga'u. Upéa-gwi, natekotevêi voi oromombe'u jevy peê-my kwatia-rehe, ore re'ÿi kwéry. Ko va'e ahai va'erã peê-my peikwaa porã para'e. ²Ogwahê va'erã Nhandejáry áry igwejy hagwã. Jaikwaa e'ÿha áry-py ae ogwahê va'erã nhande-vy Nhandejáry. Nhaimo'ã e'ÿ reheve ou imonda va'e pyhare. Upéixa ou va'erã Nhandejáry Hesu. Jaikwaa e'ÿ va'e óra-py ogwejy va'erã ou-vy Nhandejáry Hesu. Upéa peikwaa voi. ³Ha he'i va'erã kente kwéry: "Jaiko porã nhande. Ndojehu mo'ái mba'eve nhande-vy" he'i va'erã mo'ã yvypóry kente kwéry. Upe-ma ramo, "Jaiko porã meme-ta" he'i jave, pya'e omanomba-ta hikwái. Ndoikwaa mo'áiry omanotamaha, oikwaa e'ÿharami imembytamaha kunha. Onhenhandu e'ÿ reheve ohendu-ma gwasy. Upéixa voi kente kwéry ndoikwaa mo'áiry omanotamaha hikwái. Ndaipóri petei va'e voi onheresende va'erã. Onhehundipa va'erã voi.

Nhanhangareko porã katu nhandéjehe he'i Paulo
(Mt 24.42-44; Lc 21.34-36)

⁴Ha peê katu, ore re'ÿi kwéry, ndapeikóiry pytū-my oiko va'e-rami. Upéa-gwi peha'arõ katu peiko-vy pono ogwahê ou-vy upe áry imonda va'e-rami, pono peha'arõ e'ÿ jave ogwahê ou-vy peê-my. ⁵Pene arandu-ma va'e peê. Arakatu pygwa-rami peiko. Ndajaikóiry pytū mygwa-rami. Hi'arandu e'ÿ va'e-rami ndajaikói voíte. ⁶Upéa-gwi ani jaiko tei nhande opáy e'ÿ va'e-rami. Heta oĩ opáy e'ÿ va'e. Ani jaiko tei ha'e-rami. Japáy voi katu jaiko-vy. Nhanhangareko porã katu nhandéjehe. ⁷Pyhare oke okese va'e. Oka'use va'e pyhare oka'u. Upe pyharegwa-rami voi Hesu rerovia e'ÿha. ⁸Ha nhande katu arakatu pygwa nhande. Upéa-gwi nhanhangareko porã katu nhandéjehe. Jarovia porã ete katu. Jajohayhu porã rei katu ave. Jarovia porã ramo, jajohayhu porã ramo ave, nhamonde nhande py'a jokoha ramigwa pono nhande reity gweko-rupi anháy ruvixa Satanás. "Nhandejáry Hesu nhane resende-ta" ja'e meme katu. Upéa ja'e ramo nhamonde nhane akã jokoha ramigwa pono nhande reity gweko-rupi. ⁹Nanhande pe'áiry Nhandejáry nhande reropoxy hagwã nhande rereko asy ete-vy. Nhande pe'a ae jarovia hagwã Nhandejáry Hesu Cristope nhane resendeharã-pe. ¹⁰Ha'e omano va'ekwe nhande-rehe ha-py. Jaiko hagwã voi hendive omano ha'e. Nhamano va'e, nhamano e'ÿ va'e ave jaiko va'erã hendive. ¹¹Upéa-rehe penhomongyre'ÿ katu penhombopy'agwapy-vy. Penhomombaraete kwaa voi ojóupe. Áy penhemonhe'ê nhe'ê ojóupe perovia porãve ráve hagwã Nhandejáry Hesu-pe.

Paulo onhemonhe'ê Tessalônica tetã mygwa-pe
(1 Tm 5.17-19; Ef 4.1-3; Cl 1.10)

¹²Oroipota eterei pemboete Hesu reroviaha nhangarekoha-pe. Pene pa'ũ-my omba'apovy ndopytáiry va'e pemboete katu. Pende-rehe onhangareko oĩ-vy. Peê-my onhemonhe'ê oiko-vy. Pemboete katu íxupe kwéry, ore re'ÿi kwéry. Omonhangareko uka íxupe va'e pende-rehe Nhandejáry Hesu. ¹³Hembiapo porã-gwi pehayhu tee íxupe imboete-vy.

Pemomba'egwasu ete katu íxupe. Pende py'agwapy reheve peiko porã rei onhondive. Ani penhorairõ teĩ. ¹⁴Oro'e-ta peẽ-my, ore re'yí kwéry: “Penhemonhe'ẽ katu gwĩ ipituvã va'e-pe. Ha gwĩ ipy'amirĩ va'e-pe katu pemombaraete imbopy'agwapy-vy. Ha gwĩ ogwerovia porã e'y va'e-pe pembopy'a jekoha jevy katu. Eipytygwõ katu íxupe kwéry. Ani ereheja ha'e anho. Ne moakã rasy ramo hikwái, ani ereja'o ja'o teĩ íxupe. Eiporiahuverekõ rei ae katu íxupe” oro'e pene mongyre'y hagwã. ¹⁵Xáke ore re'yí. Hembiape vai ramo jepe nde-vy nde rapixa, ani joty nde poxy íxupe. Ani nde katu ne rembiapo vai hese. Eiporiahuverekõ rei ae katu íxupe. Peje meme katu ojóupe: “Jajohayhu rei katu jaiko-vy” peje ojóupe. “Enterovéa-pe ave jahayhu katu” peje. ¹⁶Pevy'a joa meme katu. Ereiko porã ramo, ereiko porã e'y ramo ave evy'a joty ereiko-vy. ¹⁷Pemondo mondo katu Nhandejáry-pe pene nhe'ẽ. ¹⁸Petima porã meme katu Nhandejáry-pe. Ereiko asy ramo jepe, etima porã joty íxupe. Ha Nhandejáry oipota erejapo upéa gwive. Hesu Cristo pende py'a-py oĩ-gwĩ, evy'a joty. Hasy reheve evy'a joty kuri eiko-vy. ¹⁹Ha Nhe'ẽ Marangatu tee va'e ani eremboyke teĩ. ²⁰“Nhandejáry nhe'ẽ-py xe remimombe'u” he'i va'e-rehe gwive, ani “Onhe'ẽ rei rei” ere teĩ. Ani erepyrũ teĩ inhe'ẽ-rehe. ²¹Pejeapysaka porã katu gwĩ omombe'u va'e nhe'ẽ-rehe peikwaa porã hagwã Nhandejáry nhe'ẽ para'e, teko rei nhe'ẽ para'e. Upéa, Nhandejáry nhe'ẽ va'e, pehendũ katu. Peipyhy mbaraete tape porã. ²²Tape vai-gwĩ ae esẽ. Oime raẽ va'e mba'evai-gwĩ epoi katu. ²³Nhandejáry ko nhane mbopy'agwapyha voi. Ha'e nga'u tapene mopotĩmba katu. Pende py'a tomoatyrõ porã porã katu. Tonhangareko porã katu Nhandejáry pene nhe'ẽ-rehe, pende py'a-rehe, pende rete-rehe ave penhemongy'a e'y hagwã. Pejejavy e'y reheve tonhangareko. Ogwejy jevy ou-vy peve Nhandejáry Hesu Cristo tonhangareko porã katu pende-rehe. ²⁴Nhandejáry ndaha'etí okambi kambía va'e onhe'ẽ. Ohekoviãrõ e'y va'e voi onhe'ẽ. Pende poravo rire, ojapo-ta voi pende-rehe he'i hagwe-rami. ²⁵Pembojeupi katu pene nhe'ẽ Nhandejáry-pe ore-rehe, ore re'yí kwéry. ²⁶Xe rekovía peikwavã kwavã katu Hesu reroviaha gwive. ²⁷Emonhe'ẽ katu kóa kwatia nhe'ẽ entéro Hesu reroviaha-pe gwive. Xe Paulo Nhandejáry nhe'ẽ-py ha'e-ta peẽ-my eremonhe'ẽ hagwã íxupe kwéry. Neremonhe'ẽi ramo Hesu renduha-pe gwive, oikwaa arã Nhandejáry, ojohu vai arã. ²⁸Tapende rexakwaa rei katu Nhandejáry Hesu Cristo pende rovãsa porã-vy.

Paulo remimombe'ukwe
Tessalônica tetã mygwa pegwarã 2
segunda epístola de Paulo aos tessalonicenses

Paulo inhirũ ave omondo jevy Tessalônica tetã mygwa-pe onhe'ẽ kwatia-rehe

¹ Hesu reroviaha Tessalônica tetã-my oiko va'e. Ore Paulo, Silvano, Timóteo ave oromondo-ta peẽ-my ore nhe'ẽ. Kwatia-rehe oromondo-ta. Peẽ katu Nhandejáry Nhande Ru tee va'e rehegwa, Nhandejáry Hesu Cristo re'ýi ave. ² Tapende rovasa katu pende rexakwaa rei-vy Nhandejáry Nhande Ru tee va'e. Tapende rexakwaa rei katu Nhandejáry Hesu Cristo ave. Tapene mbopy'agwapy katu ave.

Ojehexa uka jevy va'erã Nhandejáry Hesu

³ Ha peẽ katu, ore re'ýi kwéry, perovia porãve rãve katu peho-vy Nhandejáry-pe. Pejohayhu porãve rãve katu pekwa-vy ave. Pende rovasa porã-gwi orotima Nhandejáry-pe pende-rehe kwéry. Naiporãi orotima e'ý ramo Nhandejáry-pe. "Nhatima porã meme katu Nhandejáry-pe hese kwéry" oro'e ro'e pende-rehe kwéry. ⁴ Perovia porã-gwi, pejohayhu porã-gwi ave, heta oronhe'ẽ porã pende-rehe. Hesu reroviaha ojogweroaty haty haty-rupi gwive heta oronhe'ẽ porã meme pende-rehe oromboete-vy. "Hekoha porã porã voi" oro'e pende-rehe kwéry. "Ojerereko asy ramo jepe, ohasa asy ramo jepe, Nhandejáry rape-gwi katu ndojeréi voi. Ogwerovia joty kuri" oro'e pende-rehe oromboete-vy. ⁵ Áy peiko asy Nhandejáry ra'arõ-vy. Ha Nhandejáry oipota peiko asy ramo, perovia tee joty íxupe. Upe rire pegwahẽ ramo Nhandejáry oiko ha-py, pende ruvixa oiko ha-py pegwahẽ ramo, napemonhemotĩ motĩry va'erã íxupe perovia tee-gwi. Upéixa voi Nhandejáry ohexa uka-ta gwekoha porã. ⁶ Ojehexa uka jevy ramo Nhandejáry Hesu, nde repy va'erã voi Nhandejáry. Ne moingo asyhare-pe katu omoingo asy ave va'erã. Upéixa voi Nhandejáry ohexa uka va'erã gwekoha porã. ⁷ Erehasa asy rire, nane mbohassa asy ukavéi-ma va'erã. Ha ore-vy ave nore mbohassa asy ukavéi-ma va'erã. Áry-rehe ojehexa uka ramo Nhandejáry Hesu, nanhane mbohassa asy ukavéi va'erã. Nhandejáry Hesu ojehexa uka va'erã gwembigwái mbaraete va'e ndive. ⁸ Hendy mbaraete tee reheve ojehexa uka va'erã. Ogwahẽ ramo, ombohassa asy va'erã Nhandejáry kwaa e'ýha-pe. Hese gwa nhe'ẽ porã rendu e'ýha-pe ombohassa asy va'erã ave. ⁹ Omboyke va'erã mombyry imondo-vy ojéhegwi. Opa hagwã-pyma omondo va'erã inhe'ẽ rendu e'ýha gwive. Ndou mo'ávéi-ma Hesu rexa-vy. Opu'aka teha reheve mburuvixagwasu tee-rami ojehexa uka ramo, ndohexa mo'ávéi-ma íxupe hikwái. ¹⁰ Ha upe va'e áry-py ogwahẽ ramo Nhandejáry Hesu, omboete va'erã íxupe he'ýi kwéry. Ojerovia va'e gwive hese, "Nde tuvixa mba'e va'e voi nde" he'i va'erã Nhandejáry Hesu-pe imomba'egwasu-vy. Ha peẽ ave hese ojerovia va'e gwive pa'ũ-my peĩ va'erã. Ore remimombe'u perovia-gwi peĩ va'erã upepy, he'ýi kwéry pa'ũ-rupi. ¹¹ Upéa-rehe oromondo meme va'e Nhandejáry-pe ore nhe'ẽ. Pende-rehe oromondo. Pende pe'a va'ekwe Nhandejáry peiko hagwã heko-rupi. Upéa-gwi orojerure rure íxupe pene mombaete hagwã peiko hagwã heko-rupi onhemotĩ e'ý hagwã pendéhegwi. Ha pende rekoha porãse ko peẽ. Tapene mombaete katu pende rekoha porãve rãve hagwã, perovia porãve rãve hagwã, pene rembiapo porã porã meme hagwã. ¹² Pene rembiapo porã ohexa ramo, omomba'egwasu va'erã Nhandejáry Hesu-pe héry mboete-vy. "Hesu réry iporã ete" he'i va'erã. Pene mboete va'erã ave. Héry-py peĩ va'e tuvixa mba'e ko Nhandejáry-pe. Nhandejáry ko pende rovasa va'e voi. Pende rexakwaa rei va'e voi ave Nhandejáry Hesu Cristo. Upéa-gwi pene mboete va'erã. Nhandejáry-pe pemboete va'erã ave. Upéa-rehe tapende rovasa katu Nhandejáry.

2

Pe hekoha vaive eterei va'e ojekwaa ranhe va'erã

¹⁻² Āy oromombe'u-ta peē-my, xe re'ýi kwéry, kwatia-rehe Nhandejáry Hesu Cristo ou jevytaha rehegwa nhe'ē. Gwupive nhande rerahapa hagwā outaha rehegwa nhe'ē oromombe'u-ta. Oī pene pa'ū-my omombe'u va'e mo'ā peē-my. Ani penhemoakā rasy uka rei teī íxupe. “Ma'erā ereha'arō joty Hesu outaha áry? Ogwahē-ma voi” he'i mo'ā va'erā peē-my. Xe ndaipotáí voi perovia inhe'ē, ore re'ýi kwéry. Ani pene mbopy'a reraha rei, omombe'u-vay mo'ā peē-my upéa nhe'ē. Oī he'i va'e, “Nhe'ē Marangatu tee va'e ko omombe'u nhande-vy upéa nhe'ē” he'i mo'ā. Oī he'i va'e, “Kóixa voi Paulo remimombe'u” he'i mo'ā. Oī he'i va'e, “Upéa nhe'ē Paulo omoí va'ekwe kwatia-rehe” he'i mo'ā.* ³ Upéixa omombe'u ramo, ani pene mbotavy uka rei va'erā. Āy ete katu nogwahē mo'ái Nhandejáry áry igwey hagwā. Kente kwéry yvypóry va'e gwive ojere ranhe va'erā Nhandejáry rekoha-gwi. Ojekwaa ranhe va'erā pe hekoha vaive eterei va'e, anháy ruvixa Satanás rembieraharā. Upe rire ae katu ogwey va'erā ou-vy Nhandejáry Hesu. ⁴ Ha pe hekoha vaive eterei va'e voi ojekwaa ranhe va'erā. Opaixagwa tupā tee-pe, tupā ra'anga-pe ave ndoipotavéí omboeteve íxupe. Enterováa remimboete gwive ndoipotavéí omboeteve. “Xe-vy mante xe mboete katu. Anive eremboete teī tupāve” he'i va'erā. Oipota va'erā ojeupéte omboeteve. Oike va'erā Nhandejáry róga kakwaa-py ogwapy hagwā onhemonhandejáry ra'anga anga-vy. “Xe katu Nhandejáry” he'i mo'ā va'erā ójehe.*

⁵ Ma'erā po nde resaráí nde-vy amombe'u va'ekwe-gwi. Pene pa'ū-my xe aiko ramo amombe'upa porā-ma va'ekwe peē-my.* ⁶ Ha pe hekoha vaive eterei va'e katu ne'írā ojekwaa. Hi'áry-py ae ogwahē va'erā. Anga ete ndojekwaa mo'ái. Oī ijokoha. Mba'eixagwa po upe va'e peikwaa voi. Amombe'u va'ekwe-gwi peē peikwaa voi. Peikwaa-ma voi-gwi peē, namombe'u mo'ávéi-ma peē-my. ⁷ Āy nhemi nhemi ha-py hembiaipo vai. Oī ijokoha. Nombojekwaa ukái pe hekoha vai va'e. Upe rire oipe'a va'erā ijokoha Nhandejáry. ⁸ Oipe'a rire ae ojehexa uka porā va'erā ivai va'e. Upe va'e hekoha vai va'e ojekwaa ramo, imbaraete reheve ou va'erā Nhandejáry Hesu. Ojehexa uka porā arā ou-vy. Ouma ramo ojuka va'erā pe hekoha vai va'e-pe. Pytu-py ojuka va'erā íxupe.* ⁹ Upe va'e hekoha vai va'e ojekwaa va'erā anháy ruvixa Satanás nhe'ē-rupi. Nhandejáry Hesu ou e'ý mboyye, Nhandejáry rembiaipo porā oha'ā a'ā oiko-vy va'erā. Hembiaipo porā ra'anga anga rei va'erā oiko-vy. Opaixagwa nhane rembiexa e'ý va'e ojapo va'erā. Oipota, “Nhandejáry” he'i mo'ā hese kente kwéry. Omopondera uka uka va'erā ójehe iporombotavy-vy. ¹⁰ Nainheresendehái va'e-pe ombotavy va'erā. Opaixagwa ivai va'e ojapo va'erā ombotavy-vy. Upéa, Hesu-rehe ojerovia e'ý va'e, ohendu ramo anhetegwa nhe'ē, nohenduséi voi. “Iporā upéa nhe'ē. Nhahendu katu” nde'íry. Ndoipotái oresende íxupe Nhandejáry. Upéa-gwi noresende mo'ái íxupe kwéry Nhandejáry.* ¹¹ Nohenduséi-gwi nhe'ē porā, pytū-my oiko hagwā Nhandejáry remimondo voi. Ombojevay uka íxupe ijapu va'e ogwerovia hagwā. ¹² Upéixa ramo Nhandejáry ombohasa asy va'erā anhetegwa nhe'ē ogwerovia e'ý va'e-pe gwive. Entéro ojevayse va'e gwive, ombohasa asy va'erā íxupe imondo-vy anháy renda-py.

Pende pe'a ranhe va'ekwe Nhandejáry pene resende hagwā

¹³ Ha peē katu, ore re'ýi kwéry, Nhandejáry Hesu rembihayhu va'e voi. Pende pe'a ranhe va'ekwe kente kwéry pa'ū-gwi Nhandejáry pene resende hagwā. Omopotimba-ma ramo pende py'a Nhe'ē Marangatu tee va'e, perovia-ma ramo inhe'ē anhetegwa va'e, pene resende voi va'ekwe Nhandejáry. Upéa-gwi rotima porā porā meme Nhandejáry-pe pende-rehe. Naiporái voi rotima e'ý íxupe. ¹⁴ Pende poravo va'ekwe ojave gwarā peiko hagwā, perovia-ma ramo Hesu rehegwa nhe'ē porā, ore remimombe'ukwe peē-my. Pende poravo va'ekwe penhemomba'e hagwā peē-my gwarā, Nhandejáry Hesu Cristo ome'ē peē-my va'erā-rehe hendive peiko ramo. Iporāmba meme voi Nhandejáry Hesu onhemomba'egwasu ete ha-py. Upe-py peē pemoirū va'erā íxupe. ¹⁵ Upéa-gwi peē,

* 2:1-2 1Jo 2.18-19 * 2:4 Dn 11.36 * 2:5 Rm 1.21-25 * 2:8 Is 11.4 * 2:10 Mt 24.24

ore re'í kwéry, anike pejere teĩ Nhandejáry rekoha-gwi. Perovia tee meme katu upe va'e nhe'ê anhetegwa va'e. Ani katu pemboyke teĩ pendéhegwi ore remimombe'ukwe. Anhemonhe'ê va'ekwe peê-my pene pa'û-my aime ramo va'ekwe. Kwatia ahai va'ekwe peê-my ave. Upéa nhe'ê-rupi gwive peiko meme katu peê. ¹⁶ Ha Nhandejáry Hesu Cristo katu, Nhandejáry Nhande Ru tee va'e ave tapende rovasa porã katu. Ha'e nhande rayhu va'ekwe, nhande rexakwaa rei va'ekwe ave, nhande mbopy'agwasu meme voi va'ekwe. “Xe ra'arõ tee katu. Xe katu napombotavy mo'ãiry” he'i va'ekwe nhande-vy. ¹⁷ Tapene mbopy'agwasu katu Nhandejáry. Tapene mombaraete katu Nhandejáry pene mbopy'agwapy-vy iporã va'e gwive pejapo hagwã, nhe'ê porã porã va'e gwive pemombe'u hagwã.

3

Pejapo katu oração Nhandejáry-pe ore-rehe

¹ Ne'írã opa ore nhe'ê. Oromombe'u-ta vyteri, ore re'í kwéry. Áy orojerure-ta peê-my: “Pejapo katu oração Nhandejáry-pe ore-rehe, opa-rupi pya'e osarambi hagwã Nhandejáry Hesu rehegwa nhe'ê, enterove omboete hagwã inhe'ê”. Upéixa voi ogwahê va'ekwe peê-my inhe'ê. ² Ha inhe'ê renduha gwive ndogwerojojái herovia-vy. Oĩ tekoha-rupi e'ý oiko va'e, hekoha vai va'e ave. Upéa-rehe pejerure Nhandejáry-pe íxugwi ore resende hagwã. ³ Ha Nhandejáry Hesu katu nhande mbotavy e'ý va'e. He'i va'e gwive anhetegwa meme voi. Pene mombaraete va'erã. Upéa anháy ruvixa-gwi pene resende va'erã. ⁴ Ha'e katu ore mbojerovia va'e pende-rehe kwéry. Penhepyrũ porã heraha-vy. Ore remimombe'u peê-my ndapeheja reíry va'erã. Pejapo meme joty va'erã. Orojerovia-ma voi pende-rehe. Hendive peiko jave orojerovia-ma pende-rehe. ⁵ Tapene mbopy'apyhy katu Nhandejáry Hesu peikwaa porã hagwã Nhandejáry pende rayhuha, pejere e'ý hagwã íxugwi. Hesu Cristo ojere e'ý hagwe-rami joty, ani pejere.

Tomba'apo ogana hagwã ójehe (1 Ts 4.11-12; Ef 4.28-29)

⁶ Hesu reroviaha jepe oĩ ipituva va'e. Ndojaposéi mba'eve. Nohendúiry oro'e va'ekwe. Oromanda peê-my, ore re'í kwéry. Nhandejáry Hesu Cristo réry-py oromanda. Ani pemoirũ íxupe kwéry. ⁷⁻⁸ Ha oroiko ramo pene ndive va'ekwe ndore pituváiry va'ekwe ore. Iporã peiko ore oroiko hagwe-rami. Upe va'e peikwaa voi. Oropaga paga va'e ore remi'urã-rehe. Ndorokaru reíry. Ha oromba'apo hatã hatã ae katu oroiko-vy ore mbaraete reheve. Ore kane'õ ramo jepe oromba'apo joty. Áry pyhare ave oromba'apo oroiko-vy ponóike ipohýi eterei avave-pe ore remi'urã ome'ê ramo. ⁹ Upéixa ramo oromba'apo ore oroiko hagwe-rami peiko hagwã. “Xe nhe'ê mombe'uháry-pe iporã ereme'ê rei ho'u va'erã” he'i va'ekwe Nhandejáry. Ha ore ae katu oromba'apo joty orokaru hagwã, ore oroiko hagwe-rami ave peê peiko hagwã. ¹⁰ Oroiko ramo pene ndive va'ekwe, “Gwĩ omba'apose e'ý va'e gwive tokaru e'ý jepe” oro'e kuri peê-my. ¹¹ Onhemombe'u ore-vy: “Ipa'û-my oĩ omba'apo e'ý va'e, ipituva va'e. Oĩ omoakãrasy rei va'e gwapixa-pe” he'i pende-rehe. Upe va'e-pe oromondo-ta ore nhe'ê, “Toiko tekoha-rupi. Tomba'apo ogana hagwã ójehe” oro'e. ¹² Nhandejáry Hesu Cristo réry-py oronhemonhe'ê íxupe omba'apo hagwã. Tekoha-rupi oiko hagwã, gwembi'u repyrã-rehe omba'apo hagwã oromanda íxupe. ¹³ Ha peê katu, ore re'í kwéry, ani peje teĩ, “Xe kwerái-ma, naxe retea'evéi-ma xe rembiapo porã porã-gwi” ani peje teĩ. Ha peje ae, “Xe rapixa nopenái ramo jepe, ajapo porã porã-ta joty íxupe” peje ae. ¹⁴ Oĩ para'e pene pa'û-my ohendu e'ý va'erã xe nhe'ê, xe remimondo peê-my ko kwatia-rehe amoí va'e. Upe va'e ohendu e'ý va'e, ani teĩ pemoirũ íxupe. Peje Hesu reroviaha-pe: “Eheja ha'e anho ranhe toiko onhemotí hagwã” peje. ¹⁵ Ha nde a'e'ýha-rami ani erereko. Nde ryvy-rami ae ereko íxupe. Enhemonhe'ê porã katu íxupe ohendu hagwã xe nhe'ê. ¹⁶ Ha Nhandejáry Hesu nhande mbopy'agwapy va'e voi. Tapene mbopy'agwapy joa meme kena. Ojehu ramo jepe mba'e, tapene mbopy'agwapy porã joty. Toiko meme pene ndive kwéry Nhandejáry Hesu. ¹⁷ Áy xe tee-ma a-rami ahai: “Xe Paulo xe resã. Peê pene resã tipo ave?” ha'e-ta peê-my. Upéixa meme ahai amoí-vy kwatia tia-rehe xe réry pehexa

ramo, “Paulo nhe'ẽ tee voi nipo ra'e upe va'e” peje va'erã. ¹⁸ Tapende rexakwaa rei katu Nhandejáry Hesu Cristo pende rovasa porã-vy.

Paulo remimombe'ukwe Timóteo pegwarã 1

primeira epístola de Paulo a Timóteo

¹ Xe Paulo amondo-ta nde-vy Timóteo, xe nhe'ẽ. Xe Paulo Cristo Hesu remimondo va'e voi. Ha'e-ma nhane remiha'arõ va'e voi. Inhe'ẽ-py aha hemimondo ramo. Nhandejáry nhane resendeharã nhe'ẽ-py ave aiko-vy hemimondo ramo. ² Áy amondo-ta nde-vy, Timóteo, xe nhe'ẽ. Xe remimombe'ukwe-rupi ereiko-magwi, nde erejerovia-ma Hesu-rehe. Upéa-gwi nde xe ra'y ete ramigwa voi ereiko-ma nde xe-vy. Tande rexakwaa rei katu Nhandejáry Nhande Ru, Nhandejáry Cristo Hesu ave nde rovasa porã-vy. Toity katu gwesa nde-rehe nde poriahuvereko-vy. Tane mbopy'agwapy katu.

*Enhemonhe'ẽ katu gwĩ omombe'u joavy avypa va'e-pe
(Rm 16.17; 1 Tm 6.3-4; 2 Tm 2.23; Tt 1.10-16; 3.9)*

³ Macedônia yvy-py aha jave, amombe'u va'ekwe nde-vy ne rembiaporã. Áy amombe'u jevy-ta: Epyta katu Éfeso tetã-my, erenhemonhe'ẽ hagwã gwĩ oporombotavy rei okwa va'e-pe, “Anive eremombe'u joavy avy teĩ Cristo rehegwa nhe'ẽ” ere hagwã íxupe kwéry. ⁴ “Ani eremboyke teĩ nhe'ẽ porã. Inhe'ẽ rei rei va'e nhe'ẽ ani erehendu teĩ. Hembypykwe réry-rehe ani erepena meme teĩ. Ijapy e'y va'e upéa rehegwa nhe'ẽ. Upéa rehegwa nhe'ẽ-rehe erepenase ramo, nerehenduséi va'erã nhe'ẽ porã” ere katu upe oporombotavy rei va'e-pe. Upeixagwa nhe'ẽ-rehe opena ramo, onhonhe'ẽ mbojevvy jevy rei va'erã hese okwa-vy. Nhandejáry rembiapose ndojapói. Nhandejáry re'yí-rehe nonhangarekói ave. Niporã voi hekoha. Jarovia tee ramo ae katu Nhandejáry nhe'ẽ, jajapo arã hembiapose, nhanhangareko porã arã voi ave he'yí kwéry-rehe. ⁵ Aipo ramo enhemonhe'ẽ katu íxupe kwéry ojohayhu rei hagwã okwa-vy. Ha nhande py'a porã ramo ae katu oĩ vérami nhande py'a-py, “Ne rembiapo porã ra'e” he'i va'e nhande-vy. Upe jave jarovia tee ramo anhetegwa va'e katu, jajohayhu porã tee rei va'erã. Upéa-gwi enhemonhe'ẽ katu íxupe kwéry opena e'y hagwã nhe'ẽ rei-rehe hikwái. Ojohayhu rei hagwã ae okwa-vy. ⁶ Ha ha'e kwéry ndaipya porãiry, nahembiaapo porãiry, ndogwerovia teéiry. Upéa-gwi ojehesa rerova uka nhe'ẽ rei-rehe onhomb'e mbo'e rei okwa-vy. ⁷ Oporombo'ese mo'ã hikwái. “Orohekomb'e porã porã voi” he'i ójehe ramo jepe, “A-rami ae teko porã Nhandejáry remimbota” he'i ramo jepe, ndoikwaái joty he'i va'erã. Hi'arandu porã va'e-rami mo'ã oporombo'e oiko-vy. “Ore oroikwaa voi” he'i mo'ã ójehe ha gwemimombe'u porãrgwe katu ndoikwaáiry omombe'u va'erã.

Hekoha vai va'e-pe ae katu, “A-rami tekoha e'y-rupi ereiko” ja'e íxupe

⁸ Nhahekomb'e porã ramo, iporã voi nhande-vy Moisés amyri he'i va'ekwe nhane rekorã me'ẽ-vy va'ekwe. ⁹ Hekoha porã va'e-pe, “Ani erejapo vai teĩ” nde'íry. Ha heko vai va'e-pe ae katu, “Tekoha e'y voi ko ko'ã va'e” ja'e íxupe. Upéixa hekoha porã va'e nanhahekomb'o'éiry. Ha heko vai va'e ae katu nhahekomb'o'e porã tekoha porã-rupi ave oiko hagwã. Oĩ hekoha porã-rupi e'y oiko va'e, oĩ ohenduse e'y va'e ave. Oĩ Nhandejáry-pe omboete e'y va'e, oĩ ojevavy va'e ave. Oĩ ipy'a ky'a va'e, oĩ Nhandejáry-rehe opuka va'e ave. Oĩ oporojuka va'e, oĩ gwu ojuka va'e, oĩ osy ojuka va'e ave. ¹⁰ Oĩ oĩ kwaa e'y reheve gweko ky'a-rupi rei oiko va'e. Ohasa verei-ma tekoha. Oĩ oporovende va'e, oĩ ijapu va'e, oĩ, “Nhandejáry réry-py amombe'u-ta anhetegwa va'e” he'i ramo jepe ójehe, ijapu joty oiko-vy. Upéixa oiko va'e-pe nhahekomb'o'e porã tekoha porã-rupi oiko hagwã. Hesu Cristo rehegwa nhe'ẽ ombojevvyse va'e-pe gwive, nhahekomb'o'e mbo'e joty jaiko-vy. Entéro upéixa okwa va'e ndatekoháiry ave ogwereco. ¹¹ Upéa oikwaa uka nhande-vy Nhandejáry onhe'ẽ mombe'u-vy. Hesu Cristo rehegwa nhe'ẽ nahendu ramo, “Tuvixa mba'e nipo ra'e Nhandejáry. Hekoha porã ete va'e nipo ra'e. Nhande rovasa vasa va'e nipo ra'e” ja'e hese. Upéa nhe'ẽ porã, “Emombe'u katu, Paulo” he'i xe-vy va'ekwe Nhandejáry.

“Xe poriahuvereko eterei-ma va'ekwe” he'i ójehe Paulo otima porã-vy Hesu-pe

¹² Xe atima porã Nhandejáry Hesu Cristo-pe. Xe-rehe ojerovia-gwi ome'ê xe-vy xe rembiaporã aporopytygwō hagwã. Xe mombaraete ave ajapopa hagwã xe-vy hemimombe'u. ¹³ Yma anhe'ê rei rei hese aiko-vy va'ekwe. He'í-pe gwive areko asy va'ekwe. Xe seve seve aiko ramo va'ekwe, he'í-pe areko poxy va'ekwe areko asy-vy. Upéixa voi xe rekokwe va'ekwe. Upéixa jepe xe aiko va'ekwe, ome'ê joty va'ekwe xe-vy xe rembiaporã, xe poriahuvereko rei joty va'ekwe Cristo. Ndaroviái joty va'ekwe íxupe. Gwaperã oikwaa e'ý va'e-rami xe py'agwasu va'ekwe. Ndaikwaáiry vyteri íxupe jave ha'e katu oity joty gwesa xe-rehe. Upéa-gwi xe poriahuvereko joty va'ekwe xe-vy. ¹⁴ Xe rexakwaa porã rei va'ekwe xe rbovasa-vy Hesu Cristo. Áy katu peteíxa amoirũ-ma íxupe, xe mbojerovia uka ójehe, xe mbohekorayhu-ma ave. ¹⁵ Anhetegwa voi ko Hesu rehegwa nhe'ê jarovia ku'a ku'a e'ý hagwã. Ogwahẽ ou-vy va'ekwe Hesu Cristo ko vvy-py. Gwí heko jejavy va'e kwéry resende-vy ou va'ekwe. Ha xe katu xe reko jejavyve voi va'ekwe enterovéa-gwí. ¹⁶ Ha Hesu Cristo oity joty va'ekwe xe-rehe gwesa xe poriahuvereko-vy. Ohexa ukase nhande-vy gweko kiriríha. Xe ajejavy eterei ramo jepe, hekopytu'u joty oiko-vy xe-vy. Upéixa ohexa uka nhande kwéry-pe gweko kiriríha. Xe rekokwe rexaha, “Heko kirirí voi oiko-vy Paulo-pe Hesu Cristo” he'i va'erã xe-rehe. Oí xe renondegwa ogwerovia ave va'erã Cristo-pe ijapy e'ý reheve oiko hagwã Nhandejáry ndive. Xe rekokwe rerakwã rendu-vy, “Nhande-rehe oity voi gwesa Cristo Hesu nhande poriahuvereko-vy” he'i va'erã. ¹⁷ Tomboete katu Nhandejáry Nhande ruvixagwasu-pe. Opa e'ý reheve nhande ruvixa ramo oiko va'e. Opa e'ý reheve tomomba'egwasu íxupe. Ha'e omano e'ý va'e, jahexa e'ý va'e. Ha'e tuvixa mba'e, ha'eixagwa ndoikói va'e. Tonhemoete katu Nhandejáry-pe enterove va'e. Amém.

Soldado ojeity uka e'ý-vy íxupe onhemombaraete va'e reko-rami, eiko

¹⁸ Áy xe Paulo amombe'u-ta nde-vy ne rembiaporã: Enhemonhe'ê katu upe pygwa-pe. Xe ha'e hagwe-rami, enhemonhe'ê katu íxupe kwéry. Nde xe ra'y-rami ereiko va'e Timóteo. Ne mandu'a katu he'i va'ekwe-rehe Nhandejáry nhe'ê-py omombe'u va'ety ne mombe'u-vy. Topyta inhe'ê nde py'a-py ne mombaraeteve hagwã. Soldado ojeity uka e'ý-vy íxupe onhemombaraete va'e reko-rami, eiko enhemombaraete-vy íxupe. Tape porã-gwi ani ereva. Ijapu va'e nhe'ê embojevvy jevvy katu. ¹⁹ Upéixa ereiko jave, erovia porã porã katu ereiko-vy anhetegwa va'e. Nde py'a-py, “Iporã upéa” oí vérami joty nde-vy he'i va'e. Upe he'i va'e ae ejapo meme katu. Oí gwí he'i vérami íxupe ipy'a-py ndojapóséiry va'e. Ojapose va'e rei mate ojapo. Kanoa ojejapi va'e pya'e ojere ovapy-py oho y gwy-py. Upéixa ete voi ipy'a-py oí va'e nohendusevéi va'e pya'e ojere oho-vy Hesu rape-gwí onhehundi hagwã. ²⁰ Upeixagwa voi Himeneu, Alexandre ave, nohendusevéi ra'e. Sapy'a ame'ê kuri íxupe kwéry anháy ruvixagwasu Satanás po-py, Hesu reroviaha onhomboaty aty haty-gwí amosê-vy. Ponove onhe'ê nhe'êmba rei Nhandejáry-rehe amosê. “Nanhe'ê rei rei mo'avéi-ma hese” aipota he'i ójehe-gwi amosê-ma kuri íxupe kwéry. Aipota Nhandejáry ohekererova jevvy íxupe kwéry.

2

Enterove va'e-rehe tombojeupi Nhandejáry-pe onhe'ê
(Ef 6.18; Cl 4.2-4)

¹ Aipota eterei Cristo reroviaha ojapo oração. Tojapo oração ojéhe kwéry. Opaixagwa kente kwéry-rehe tojapo oração. Tojerure gwemikotevê-rehe, tojerure gwapixa pegwarã-rehe, totima porã Nhandejáry-pe ave. ² Ha mburuvixa kwéry-rehe entéro omanda va'e kwéry ndive-rehe tojapo ranhe katu oração jaiko porã hagwã nhande py'agwapy reheve, ojehu e'ý hagwã nhande-vy mba'eve, tekoha-rupi ae jaiko hagwã Nhandejáry mboete-vy. Upéa-rehe tojapo voi katu oração mburuvixagwasu kwéry-rehe omanda porã hagwã nhande-rehe. ³ Enterove va'e-rehe jajapo ramo oração ojohu porã voi Nhandejáry nhane resendehaty. ⁴ Oipota enterove onheresende. Oipota enterove oikwaa anhetegwa va'e. Upéa-gwí enterove va'e-rehe jajapo ramo oração, nhande rerovy'a tee voi Nhandejáry.

⁵Ha Nhandejáry Nhande Ru peteĩ ha'e anho oiko va'e. Ta'ýry Cristo Hesu, nhande-rami ou va'ekwe peteĩ ha'e anho oiko va'e ave. Ha'e anho nhane mbojoja va'e Nhandejáry ndive. ⁶Ha'e anho va'ekwe ho'áry-py ojejuka uka va'ekwe enterove va'e-rehe ha-py oresendepa hagwã. Ho'áry-py omano va'ekwe. Upéa jaikwaa ramo, "Aipo ramo Nhandejáry oipota enterove onheresende nipo ra'e" ja'e arã jaikwaa-vy. ⁷Upéa nhe'ẽ amombe'u hagwã xe mondo va'ekwe Nhandejáry. Ndaxe apúiry. Anhetegwa va'e ae amombe'u. Xe mondo va'ekwe judeu e'ỹ kwéry-pe arovia uka hagwã íxupe kwéry anhetegwa va'e nhe'ẽ.

Hesu reroviaha onhomboaty aty ramo, kwimba'e rekoha, kunha rekoha a-rami

⁸Upéixa aipota kwimba'e kwéry ojapo oraçãõ opa-rupi. Entéro ojogweroaty aty haty-rupi tojapo oraçãõ. Oĩ ramo ojevavy va'e, ani katu ojapo oraçãõ enterove resa-py. Opy'a potĩ reheve ae katu tojapo oraçãõ. Opoxy e'ỹ reheve, onhonhe'ẽ mbojevvy jevy e'ỹ reheve tojapo katu oraçãõ.

⁹Áy ahai-ta kunha kwéry-rehe. Aipota onhemonde ójehe imandu'a porã hagwã-rami. Ndaipotái nonhenotĩ kwaáiry. Ojehexa uka vai hagwã-rami oiko hagwã ndaipotáí. Aipota tekoha-rupi onhemonde oiko-vy. Topena e'ỹ katu ójehe onhemomorã e'ỹ hagwã-rehe. Ani katu oakã anho-rehe opena omborepara ukase-vy ójehe. Tomonde e'ỹ katu opaixagwa rei ójehe. Ouro pérola ave tomonde e'ỹ katu. Mba'e hepy hepy rei va'e ndaipotáí omonde ójehe ijaorã onhemboete ukase-vy mo'ã. ¹⁰Tahembiapo porã ae katu ojehexa uka porã hagwã. Gwĩ, "Oromboete Nhandejáry-pe oroiko-vy" he'i va'e ójehe, tahembiapo porã porã katu oiko-vy. ¹¹Tohendu katu kunha onhe'ẽ e'ỹ reheve. Gwĩ Hesu reroviaha-rehe onhangarekoha nhe'ẽ tohendu katu. ¹²Ndahejáí kunha kwimba'e-pe ohekombo'e. Tomanda e'ỹ kwimba'e-rehe kunha. Onhe'ẽ e'ỹ reheve tohendu ae katu inhe'ẽ. ¹³Yma va'ekwe kwimba'e ypy Adão onhemoingo ranhe va'ekwe. Ha upe rire katu onhemoingo ave va'ekwe hambirekorã Eva.* ¹⁴Ha kwimba'e ypy Adão katu nombotavýí va'ekwe íxupe anháy ruvixa Satanás. Ha hambireko katu onhembotavy uka rei va'ekwe. Upéi ohasama Nhandejáry nhe'ẽ. Upéa-gwi ndahejáí kunha kwimba'e-pe ohekombo'e.* ¹⁵Ha kunha katu onheresende-ma va'erã. Nhandejáry-rehe ojerovia oiko-vy ramo, ojohayhu oiko-vy ramo, Nhandejáry remimbota ojapo-ma oiko-vy ramo, tekoha-rupi oiko-ramo ave, onheresende-ma va'erã voi. Imemby hagwã ohasa asy ramo jepe, onheresende-ma va'erã.

3

Hesu reroviaha nhangarekoha mba'éixa pa oiko va'erã

(Tt 1.6-9)

¹"Gwĩ Hesu reroviaha nhangarekoha ramo oikose va'e, iporã va'e voi ha'e ojapose" ja'e. Upéa jaikwaa voi. ²Ha Hesu reroviaha nhangarekoha ramo oikose va'e ojata, toiko porã pono, "Ojevavy-ma ra'e" he'i hese. Peteĩ kwimba'e peteĩ kunha ndive mate toiko. Hesu reroviaha-pe tomogwahẽ porã, toporombo'e porã ave. Tojejoko kwaa taipu'aka ójehe, taimandu'a porã hese. Upéixa heroviaha nhangarekoha rekoha. ³Toka'u e'ỹ oiko-vy, toporonupã e'ỹ oiko-vy. Taheko kirirí ae oiko-vy, tonhorairõ e'ỹ ave oiko-vy. Toiko e'ỹ pirapire momba'egwasuha ramo. ⁴Tonhangareko porã gwóga pygwa-rehe. Tohendu voi katu inhe'ẽ ta'ýry tajáry omboete-vy íxupe. ⁵Gwóga pygwa-rehe nonhangareko kwaái ramo mba'éixa po onhangareko-ta Hesu reroviaha onhomboaty va'e-rehe? ⁶Ogwerovia ramo va'e toiko e'ỹ katu Hesu reroviaha nhangarekoha ramo. Onhembotuvixaseve mo'ã arã oiko-vy. Aipo ramo anhaygwasu-pe ogwereco asy hagwã-rami ave, ogwereco asy arã íxupe Nhandejáry. ⁷Hesu reroviaha nhangarekoha taimandu'a porã hese Hesu-rehe ojerovia e'ỹ va'e. Tape iporã e'ỹ va'e-rupi oho ramo, ojehexa uka vai ramo ae, onhe'ẽ vai-ta ave hese. Anháy nhuhá-py ho'a va'e-rami oiko, ipu'aka arã hese anhaygwasu gweko-rupima oity va'erã íxupe.

Hesu reroviaha pytygwõha reko a-rami

* 2:13 Gn 2.7,21-22 * 2:14 Gn 3.1-6

⁸ Upéixa voi heroviaha nhangarekoha rekoha. Ha ha'e kwéry hekoha-ramima ave oiko heroviaha pytygwôha. Tomboete íxupe. Gwĩ opy'a ky'a omo'ã kwaa va'e-rami toiko e'ỹ katu. Toka'u e'ỹ katu. Pirapire momba'egwasuha-rami rei toiko e'ỹ katu ave. ⁹ Togwerovia tee katu opy'a poti reheve Nhandejáry rembigwaa uka nhande-vy nhande rekorã. ¹⁰ Enterove va'e resa-py toiko ranhe ojekwaa porã hagwã hekoha. Upéi ojekwaa porã rire mante, toiko jepe Hesu reroviaha pytygwôha ramo. ¹¹ Upéixa toiko ave hambireko kwéry. Tomboete ave íxupe. Tonhe'ẽ rei rei e'ỹ gwapixa-rehe. Toka'u e'ỹ ave hambireko kwéry. Ojeroviapa hese va'e-rami ae katu toiko katu. ¹² Peteĩ kunha ndive oiko va'erã heroviaha pytygwôha. Tonhangareko porã gwa'yry-rehe gwajjry-rehe ave. Entéro gwóga pygwa-rehe tonhangareko porã katu. ¹³ Hemiapi porã ramo omboete va'erã íxupe. Nonhembohoryĩ arã hese. Imandu'a porã va'erã hese. Aipo ramo, otĩ e'ỹ reheve, ojehe onhombohory e'ỹ reheve omombe'u va'erã Cristo rehegwa nhe'ẽ.

Nhandejáry re'ýi rekoharã amombe'u-ta nde-vy

¹⁴ Pya'e agwahêse aha-vy nde ha-py. Agwahêse ramo jepe nde ha-py, amondo-ta joty xe nhe'ẽ kwatia-rehe. ¹⁵ Oĩ para'e xe jokoharã. Upéa-rehe ahai-ta nde-vy gwarã kwatia ereikwaa hagwã mba'éixa pa Nhandejáry re'ýi rekoha. Nhandejáry re'ýi ja'e entéro heroviaha onhomboty aty va'e kwéry-rehe. Nhandejáry oikove meme va'e, heroviaha kwéry imba'e ete voi. Ha'e kwéry onhangareko anhetegwa nhe'ẽ-rehe pono ijapu va'e omombe'u joavy avy. Oĩ ramo ijekoha, opyta porã óga. Ndo'a reíry, ndoity reíry. Upéixa ete ndoity reíry va'erã anhetegwa nhe'ẽ oĩ ramo hese onhangareko va'e. ¹⁶ Tuvixa mba'e voi nipo ra'e Nhandejáry rembiexa uka nhande-vy. Tekoha porã ohexa uka va'ekwe nhande-vy. Hesu rehegwa ohexa uka va'ekwe. Ha'e nhande-rami ojehexa uka va'ekwe. Nhande rete-rami ave hete. "Ipy'a poti-ma" he'i va'ekwe hese Nhe'ẽ Marangatu tee va'e, hekoha porãha rexa uka-vy. Nhandejáry rembigwái yváy pygwa oma'ẽ va'ekwe hese. Judeu e'ỹ va'e retã retã pa'ũ-rupi onhemombe'u mbe'u va'ekwe. Ko yvy-rupi ogwerovia-ma va'ekwe íxupe. Nhandejáry onhemomba'egwasu ha-py ogwerojeupi íxupe heraha-vy.*

4

Oporohekombo'e vai va'e ojekwaa va'erã

(Cl 2.16-17)

¹ Ko'a-rami Nhe'ẽ Marangatu tee va'e remimombe'u porã: "Hesu ogwahẽ jevyha áry renonde ojekwaa va'erã oporohekombo'e vai va'e. Oporombotavy va'e nhe'ẽ anháy remimombe'u ohendu va'erã. Anháy arandu-rupi oiko va'erã" he'i Nhe'ẽ Marangatu tee va'e. ² Oporombo'e joavy avy rei va'erã. Opy'a ky'a ombojekwaa e'ỹ ramo jepe, ijapu joty va'erã. Ipy'a ky'a ramo jepe, "Ndajapo vaíry" he'i rei joty va'erã ojúpe. Gwĩ imba'e raku-py ombopere va'e-rami ombopere opy'a. Gwasy ohendu e'ỹ va'e-rami oiko. Ndoikwaái gwekoha vai. ³ "Anive eremenda teĩ. Omenda e'ỹ va'e mante ojapo Nhandejáry remimbota" he'i mo'ã va'erã upe hekoha vai va'e. "Oĩ ja'u e'ỹ va'erã. Anive ere'u teĩ" he'i mo'ã va'erã anháy arandu-rupi oporombo'e rei-vy. "Ndaja'úi" he'i ramo jepe, Nhandejáry remimoingokwe joty nhande-vy gwarã. Nhandejáry oipota ojúpe otima porã Hesu reroviaha anhetegwa oikwaa va'e tembi'u hemimoingokwe-rehe. ⁴ Entéro Nhandejáry remimoingokwe iporã meme voi. Ndoikói ja'u e'ỹ va'erã. Nhatima porã ramo íxupe ja'u hagwã-rehe, ja'u joty va'erã. Ndaipóri voi ja'u e'ỹ va'erã. ⁵ Upéa Nhandejáry rembijohu porã. "Iporã ere'u" he'i nhande-vy. Jajapo oração hese ave. Upéa-gwi ndaipóri ja'u e'ỹ va'erã.

Erepara porã katu ndéjehe pono eremombe'u joavy avy

(2 Tm 1.13-14; Tt 2.7-8)

⁶ Orohekombo'e hagwe-rami ave ehekombo'e nde re'ýi kwéry-pe. Upéixa Hesu Cristo nhe'ẽ-py ereipytygwô va'erã íxupe kwéry. Upéixa hesegwa nhe'ẽ porã ererovia tee ramo, ne mbo'eháry nhe'ẽ erehendu ramo, ne mbaraeteve teve va'erã ereho-vy. ⁷ Ani erepena

*

3:16 Jo 1.14; Rm 16.25-26

teĩ onhe'ẽ rei va'e-rehe. Hi'arandu e'ỹ va'e nhe'ẽ emboyke katu. Imombe'uharãgwe embojevvy katu imondo-vy. Nde retea'e reheve ejapo katu Nhandejáry remimbota. ⁸Jaripara puku ramo, nhanhemombaraete-vy jaripara. Upéixa iporã nhande retepe jaripara. Ha nhande retea'e reheve Nhandejáry remimbota jajapo ramo ae katu, nhanhemombaraeteve voi jaiko-vy. Áy ko vvy-rupi jaiko ramo, “Nhandejáry ndive jaikove meme va'erã” ja'e. Ha upe rire katu nhagwahê ramo Nhandejáry oiko ha-py ave, jaiko meme va'erã Nhandejáry ndive. ⁹Upéa nhe'ẽ anhetegwa voi. Iporã jarovia íxupe. ¹⁰Upéa-rehe hatã hatã nhamba'apo Nhandejáry nhe'ẽ nhamombe'u-vy. Jajerovia-ma Nhandejáry oikove va'e-rehe jaiko-vy. Ha'e enterove va'e resendeharã. Hesu reroviaha-pe oresende voi. Upéa-gwi nhamba'apo hatã inhe'ẽ mombe'u-vy. ¹¹Upéa nhe'ẽ, “Pejapo katu” ere erehekomb'o'e porã-vy íxupe kwéry. ¹²Enhemoete uka katu íxupe, ani he'i hagwã nde-rehe, “Ikaria'y vyteri nipo ra'e Timóteo”. Nde ae eiko porã katu Hesu reroviaha rekorã rexa uka-vy. Enhe'ẽ porã katu. Tekoha-rupi eiko íxupe kwéry. Eporohayhu, ejerovia Nhandejáry-rehe, otĩ kwaa va'e-rami eiko. Ójehe ha'e ae omombe'u va'e-rami eiko. Ohexa kwaa ramo nde-rehe, ohendu va'erã ne remimombe'u. ¹³Agwahê va'erã aha-vy nde ha-py. Aha e'ỹ jave, emonhe'ẽ nhe'ẽ katu Nhandejáry kwatia nhe'ẽ onhomoaty va'e-pe. “Jajapo katu Nhandejáry nhe'ẽ” ere íxupe kwéry erehekomb'o'e porã-vy. ¹⁴Omombe'u va'ekwe nde-vy Nhandejáry ne rembiaporã nde rexakwaa rei-vy. Upe va'e apo-vy ne kyre'ỹ ae katu. Are-ma omotenonde va'ekwe nde-rehe ne rembiaporã-rehe Nhandejáry nhe'ẽ-py omombe'u va'ety. Omoĩ va'ekwe ne akã-rehe opo heroviaha rerekwa kwéry. Upe jave ne mombaraete voi va'ekwe Nhandejáry ne rembiapo porãrã-rehe. Upéa-gwi ne kyre'ỹ katu ne rembiaporã apo-vy. ¹⁵Ne renonde-py emoĩ meme katu ne rembiaporã omotenonde va'ekwe nde-vy. Enheme'ẽ íxupe upéa nhe'ẽ-rupi ereiko hagwã. Aipo ramo upéa nhe'ẽ-rupi ereiko porãve rãve ramo, ojekwaa porã va'erã nde rekoha porã. ¹⁶Erepara porã katu ndéjehe. Ne remimombe'urã-rehe enhangareko katu ave, pono eromombe'u joavy avy. Upéixa ereiko ramo enheresende va'erã. Ne nhe'ẽ-rupi onheresende va'erã ave ne renduháry.

5

Hesu reroviaha gwive nde re'ýi-rami ereko íxupe kwéry

¹Ani ereja'o teĩ ituja va'e-pe. Nde ru-rami ae katu ereko íxupe enhemonhe'ẽ-vy. Ipyahu va'e-pe nde ryyv-rami ae ereko íxupe. ²Ha igwaigwĩ va'e-pe nde sy-rami ae katu ereko íxupe. Ha kunha ipyahu va'e-pe katu ne reindy-rami ae ereko íxupe. Eremotĩ e'ỹ reheve ereko porã íxupe. Tekoha porã-rupi eiko íxupe kwéry.

Tembirekokwe he'ýi e'ỹ va'e rehegwa nhe'ẽ

³Áy amombe'u-ta nde-vy tembirekokwe kwéry he'ýi e'ỹ va'e rehegwa nhe'ẽ. Oĩ tembirekokwe tee, ijekoha e'ỹ va'e. Emboete íxupe hemikotevê me'ẽ-vy. Enhangareko katu hese imboete-vy. ⁴Oĩ ave tembirekokwe imemby va'e hemiarirõ va'e ave. Tome'ẽ ranhe katu osy-pe, tome'ẽ ranhe katu ojari-pe hemikotevê tekoha-rupi oiko-vy. Omongakwaa hagwe-rehe tombohekovia katu íxupe. Upéixa ojapo ramo, ogwerovy'a arã íxupe Nhandejáry. ⁵Ha upe tembirekokwe ijekoha e'ỹ va'e katu ojerovia Nhandejáry-rehe oiko-vy. Pyhare ojapo oração oiko-vy, áry ramo ojapo ave: “Xe pytygwõ katu, xe pytygwõ katu” he'i Nhandejáry-pe ojerure-vy. ⁶Ha tembirekokwe ojapose va'e rei ojapo va'e katu oikove vyteri ramo jepe omano-ma va'ekwe-rami oiko joty. ⁷Gwĩ va'e ramigwape ani onhembojekoha pende-rehe. “Peme'ẽ katu peteĩ teĩ pende sy-pe peteĩ teĩ pende jari-pe ave hemikotevê” ere tembirekokwe memby kwéry-pe, hemiarirõ kwéry-pe ave. Aipo ramo, “Gwe'ýi-pe nome'êséiry. Hakate'ỹ” nde'íry arã hese. ⁸Ha oĩ ramo gwe'ýi-pe nome'êséi va'e, ha'e ae gwõga pygwa-pe nome'êséi va'e ave, inhe'ẽ rendusere'ỹ va'e-rami oiko. Ogwerovia e'ỹ va'e-gwi ha'e ojapo vaive. ⁹Tembirekokwe iporiahu va'e réry erehai kwatia-rehe Hesu reroviaha-rehe ojeko hagwã. Entéro tembirekokwe réry gwive ani erehai kwatia-rehe. Gwĩ heroviaha-rehe ojeko va'erã gwive kwatia-rehe emoĩ héry. Ha

sessenta ro'y ogwereco va'e, nomenda mendái va'ekwe katu ha'e héry anho emoí kwatia-rehe. ¹⁰Hembiapo porā-gwi imandu'a porā hese va'e, omemby omongakwaa porā va'ekwe, gwóga-py gwe'ýi e'ý va'e omogwahê porā va'ekwe, Nhandejáry re'ýi-pe oipyhéi va'ekwe, ohasa asy va'e-pe oipytygwō va'ekwe, opamba'e hembiapo porā porā hagwā ikyre'ý va'ekwe, upe va'e réry gwive emoí kwatia-rehe Hesu-rehe ojerovia va'e-rehe ojeko hagwā. ¹¹⁻¹²Ha tembirekokwe ipyahu va'e réry katu ani eremoí teí kwatia-rehe. Omendasa ramo, pya'e jevy omenda va'erā. Omenda pyahu jevy ramo, Cristo-pe he'i hagwe-rami ndojapo mo'ávéi-ma va'erā. Íxupe ijapu-gwi nomboete mo'ávéi-ma íxupe. ¹³Heroviaha-rehe ojeko ramo, inhate'ý-ma oiko-vy, óga óga-rupi ojopohu oho-vy. Inhate'ý-gwi imara'ê rei ojóehe. Gwapixa-rehe onhe'ê rei oiko-vy. Niporāi ja'e va'e-rehe onhomongeta ngeta rei oiko-vy. Upéixa he'i va'e ndatekoháiry ogwereco. ¹⁴Upéa-gwi aipota tembirekokwe ipyahu va'e omenda pyahu jevy onhembóhóy jevy hagwā, imemby jevy hagwā. Aipota oiko porā meme pono nhande-rehe ija'e'ýha onhe'ê vai nhande-rehe. Nhande kwaa uka rei va'erā. ¹⁵Oí tembirekokwe ipyahu va'e ojehesa rerova va'ekwe anhaygwasu Satanás-rehe. Upéa-gwi aipota omenda jevy. ¹⁶Oí ramo kunha heroviaha va'e, hóga-py oí va'e tembirekokwe, ha'e ae tome'ê íxupe hemikotevê, ipohýi e'ý hagwā Hesu reroviaha onhomboaty va'e-pe. Aipo ramo Hesu reroviaha va'e oipytygwō va'erā tembirekokwe iporiahu tee ijekoha e'ý va'e-pe.

Heroviaha rerekwa rehegwa nhe'ê

¹⁷Oí heroviaha rerekwa hembiapo porā va'e. Onhatende porā heroviaha-rehe Nhandejáry nhe'ê omombe'u mbe'u-vy, oporombo'e mbo'e-vy ave. Nhamboete tee íxupe upéa-rehe. ^{*}Upéixa he'i Nhandejáry kwátia nhe'ê:

“Vaka trigo-rehe eremopyrū ramo, omoha'ýi hagwā ani erejoko katu ijuru. Eheja katu to'u”

he'i. Pono ovare'a reheve omba'apo, pono omba'apo rei omba'apo va'e, he'i upéixa. He'i ave,

“Omba'apo va'e-pe nname'ê íxupe imba'apo repy”^{*}

he'i Nhandejáry kwatia nhe'ê. Upéixa ave voi Nhandejáry reroviaha rerekwa omba'apo porā Nhandejáry rembiapo apo-vy heroviaha kwéry pa'ū-my. Hembiapokwe repy nname'ê porā ave íxupe, nhamboete tee-vy íxupe. ¹⁹Ha oí ramo heroviaha rerekwa-pe oity vaise va'e, ani erepena inhe'ê-rehe. Ha oí ramo mokōi, mbohapy hexaháry ae katu, erovia inhe'ê. ²⁰Oí ramo ojevavy va'e, enterove resa-py, “Anive pejevavy tei” ere íxupe atýra-py. Aipo ramo henduháry ndojejavyséi va'erā, omongyhyje uka va'erā íxupe kwéry. Otī-ma va'erā. ²¹Ha'e-ta nde-vy Nhandejáry resa-py, Cristo Hesu resa-py, Nhandejáry rembigwái yváy pygwa hembiporavo resa-py ave ha'e-ta nde-vy oromokyre'ý uka-vy. Ehendu katu xe nhe'ê. Ereikwaa porā e'ý ngatu, “Erejevavy-ma” ani ere tei heroviaha rerekwa-pe. Ani ereheja rei tei ojevavy va'ekwe ererovy'a-gwi íxupe. Enhemonhe'ê ae katu íxupe atýra-py, íxupe ere va'e gwive enterove ohendu hagwā. ²²Erepara porā ranhe heroviaha rerekwarā-rehe. “Eiko katu heroviaha rerekwa ramo” ani ere pya'e rei tei íxupe. Ani pya'e rei tei eremoí nde po hi'ári eremoingo-vy heroviaha rerekwa ramo. Emanha porā ranhe katu hese ereikwaa porā hagwā hekoha. Ojevavy oiko-vy va'e akā-rehe eremoí ramo nde po, “Ma'erā po Timóteo omoingo kuri ojevavy va'e-pe Hesu Cristo reroviaha rerekwa ramo? Ha'e ave ojevavy-ma nipo ra'e” he'i ave va'erā nde-rehe hikwái. Upéa-gwi ani pya'e rei eremoí tei nde po inhakā-rehe erehexa kwaa e'ý reheve.

²³Anive erey'u meme y rei. Nde rye hasy meme va'erā. He'u ave uva rykwere mixi va'e okwera hagwā nde rye.

²⁴Oí atýra-py ojevavy va'e. Ojekwaa porā hese hembiapo vaiha. Ne'írā vyteri omonhe'ê ramo, ojehexa-ma hese. Oí ave ojevavy nhemi va'e. Nombojekwaáiry voi ójehe hembiapo vai. Ha upe rire katu nhane monhesyrúha óra-py, ojekwaa porā-ma arā hese hembiapo vaikwe. ²⁵Upéixa ete oí atýra-py hembiapo porā va'e. Ojekwaa porā hese hekoha porā.

* 5:17 1 Ts 5.12-13

* 5:18 Dt 25.4; Mt 10.10; Lc 10.7

Oĩ ave hembiaapo porã nhemi va'e. Ha nonhomi meméi va'erã gwembiaapo porã. Ojekwaa porã va'erã ae hese hembiaapo porã porãkwe. Oĩ ojevavy nhemi va'e, oĩ hembiaapo porã nhemi va'e ave, Upéa-gwi ani pya'e rei eremoĩ teĩ nde po hese ereikwaa e'ỹ reheve, heroviaha rerekwa ramo eremoingo hagwã.

6

Heroviaha onhemomba'apo va'e rehegwa nhe'ẽ

¹Áy amombe'u-ta nde-vy onhemomba'apo va'e rehegwa nhe'ẽ. “Iporã katu amboete xe járy-pe” te'i ojúepe ojokwaiha pogwy-py oiko va'e. Nomboetéi ramo, Nhandejáry réry-rehe onhe'ẽ vai arã. Tomboete katu teko rei onhe'ẽ vai e'ỹ hagwã Nhandejáry réry-rehe. Nomboetéi ramo nhane remimombe'u-rehe onhe'ẽ rei arã. ²Oĩ ramo ijáry Hesu-rehe ojervia oiko-vy va'e, toamboete joty íxupe. Ojoe'yí-gwi ndaipotái amboete mixíve íxupe. Tomba'apo retea'e katu ojáry-pe. Heroviaha-pe omba'apo, Nhandejáry rembiayhu va'e-pe omba'apo. Tomba'apo retea'e katu upéa-gwi. Upéa nhe'ẽ-py eporombo'e. “Ejapo katu” ere íxupe.

Oĩ onhe'ẽ rei oiko-vy va'e

³Oĩ omombe'ue ue va'e, Nhandejáry Hesu Cristo rehegwa anhetegwa nhe'ẽ va'e rendusere'ýha, ohekombo'e va'e-pe nohendúí va'e. ⁴Upe va'e onhemboete ukase rei voi. Onhemboete ukase ramo jepe, mba'eve ndoikwaái joty. Onhe'ẽ rei oiko-vy. Hapixa nhe'ẽ rendusere'ý-vy oiko. Onhonhe'ẽ mbojevvy jevy rei-vy oiko. Ha henduháry katu ndaija'ái ojóehe, onhorairõ, gwapixa-rehe ijapu. “Ipy'a vai xe ndive” he'i mo'ã hese. ⁵Ipy'a vai-gwi, anhetegwa va'e-gwi ova. Onhonhe'ẽ mbojevvy jevy oiko-vy. “Tajapo katu Nhandejáry remimbota hetave tave xe ma'erã ome'ẽ hagwã xe-vy” he'i rei rei ójehe oiko-vy.

Oĩ nhande-vy gwarã nhane remikotevê, javy'a jaiko-vy

(Mt 19.23; Lc 12.15-21; Tg 5.1-6)

⁶Oĩ imba'e reta va'e jepe, ndogwerovy'ái mba'e reta. Oĩ Nhandejáry remimbota ojapo va'e, ndahetáiry ogwereco ramo jepe, ogwerovy'a joty. Upéixa imba'e reta va'e-gwi ovy'ave oiko-vy. ⁷Nhande sy-gwi jaiko ramo va'ekwe, mba'eve ndajarúiry nhandejéupe gwarã. Ha upe rire katu nhamano ramo, mba'eve ndajarahã mo'áiry jevy ko yvy-gwi. ⁸Upéa-gwi oĩ ramo nhande-vy gwarã tembi'u, oĩ ramo nhande-vy gwarã ao, javy'a jaiko-vy katu. Nhane remikotevê jareko-ma. ⁹⁻¹⁰Ha oĩ imba'e retase va'e. Ombo'e íxupe anháy gweko-rupi oity-vy. Onhuhã-py oity-ma va'e-rami ogwereco ave íxupe anháy. Nainharandúí-gwi ivai va'e ojéupe gwarã oipota. Pirapire oipota eterei ojéupe gwarã ramo, opaixagwa rei ojehu íxupe. Ndoiko porávéi-ma, onhehundi hagwã-pyma oiko. Oĩ pirapire mate omomba'egwasuve va'e. Anhetegwa va'e-gwi ojehesa rerova. Ova nhe'ẽ porã-gwi gwembiapokwe katu omboasy eterei.

Ne kyre'ý katu ererovia tee hagwã ereiko-vy

¹¹Upeixagwa ani erejapo teĩ, Timóteo. Nde Nhandejáry-pe erenheme'ẽ va'ekwe voi. Ne renonde-py emoĩ meme iporã va'e. Emboete tee Nhandejáry-pe ereiko-vy. Ejerovia hese ejohayhupa rei ereiko-vy. Nde rereko asy ramo jepe, eipyhy joty katu Hesu rape. Nde reko kirirí reheve ejogwereco. ¹²Oripara hatãse va'e ikyre'ý oripara hagwã. Upéixa ete ne kyre'ý katu ererovia tee hagwã ereiko-vy. Ogwahê pya'e hagwã ogwahêse hapu oripara hatã oho-vy oripara va'e. Upéixa ete ave nde ave ne kyre'ý katu eregwahê hagwã Nhandejáry oiko haty-py. Ome'ẽ va'erã nde-vy nde rekoerã. Upe va'e Nhandejáry remime'ërã voi nde-vy. Upéa-rehe ne renói va'ekwe onhemoirú uka-vy nde-vy. “Aroviama Nhandejáry Hesu Cristo-pe” atýra-py ere jave, ne renói-ma va'ekwe. Heta henduhare pa'ũ-my eromombe'u porã ramo, ne renói va'ekwe onhemoirú uka-vy nde-vy. ¹³Áy oromongyre'ý-ta Nhandejáry resa-py, Cristo Hesu resa-py ave oromongyre'ý-ta. Nhandejáry omoingove entéro va'e-pe. Ha Hesu Cristo ijukaharã mburuvixagwasu Pôncio Pilatos rovake-py jepe, omombe'u porã joty anhetegwa va'e. Hesa-py voi ha'e-ta nde-vy. ¹⁴Xe ha'e hagwe-rami nde-vy ejapo katu. Xe nhe'ẽ gwive ehendupa. Eiko tekoha-rupi nde-rehe

imandu'a porã hagwã. Nhandejáry Hesu Cristo ojehexa uka jevyha áry peve, ejapo upéa.
¹⁵Ojekwaa hagwã áry-py Nhandejáry ombojekwaa va'erã íxupe. Nhandejáry heko vy'a va'e. Ha'eixagwa ndoikóiry mburuvixagwasu. Entéro mburuvixagwasu gwive ruvixave voi ha'e. Ipu'aka va'e kwéry gwive, ha'e ipu'akave va'e voi hese kwéry. ¹⁶Ojéhegwi rei oikove opa e'ý reheve va'e. Ha'e oiko haty-py hendy mbaraete va'e voi. Upe-py nogwahëi va'erã teko rei. Avave ndohexáiry íxupe. Ohesa mbojevy-gwi, ndikatúí avave ohexa íxupe. Tonhemboete opa e'ý reheve enterove va'e-rehe taipu'aka meme katu oiko-vy. Amém.

Imba'e reta va'e ndikatúí ojerovia imba'e reta-rehe

¹⁷“Ani penhembotuvixave xave teĩ peiko-vy” ere ko yvy-py imba'e reta reta va'e kwéry-pe. “Aníke pejerovia rei teĩ pene mba'e reta-rehe. Ojepe'a arã para'e pendéhegwi. Nhandejáry-rehe ae pejerovia. Ha'e opamba'e ome'ë me'ë nhande-vy nhande rexakwaa rei-vy jarovy'a hagwã hemime'ë me'ë nhande-vy” ere ae joty íxupe. ¹⁸“Pene rembiapo porã porã katu. Heta perekoha-rami, ejapo porã katu. Ani pene rakate'ý teĩ pene mba'e-rehe. Pene kyre'ý ae katu peme'ë me'ë-vy ojóupe” ere katu íxupe kwéry. ¹⁹“Upéixa ramo ae oĩ va'erã peë-my gwarã hekoviara. Yváy-py penhongatu uka va'erã pendejúepe gwarã. Upearã-rehe ndapejerovia reíry va'erã. Peikove meme va'erã opa e'ý reheve. Pende rekoverã tee ome'ë va'erã peë-my Nhandejáry” ere imba'e reta va'e kwéry-pe.

“Ore arandu voi” he'i mo'ã va'e-pe ani eremoirũ

²⁰⁻²¹Enhangareko porã katu, Timóteo, ne rembiaporã-rehe, nde-vy Nhandejáry remimombe'ukwe-rehe. Ha onhe'ë rei va'e-pe ani eremoirũ teĩ. Emboyke katu íxupe. Oĩ onhombo'e mbo'e rei va'e. “Ore arandu voi ore ra'e” he'i mo'ã ójehe kwéry. Ha nahi'arandu porãí voi ra'e. Ojehesa rerova-ma oiko-vy nhe'ë porã-gwi hikwái. Upeixagwa-pe katu ani teĩ eremoirũ ereiko-vy. Ijapy-ma xe nhe'ë. Tapende rexakwaa rei katu Nhandejáry pende rovasa-vy.

Paulo remimombe'ukwe
Timóteo pegwarã 2
segunda epístola de Paulo a Timóteo

¹ Xe Paulo Cristo Hesu remimondo va'e. Nhandejáry remimbota-rupi inhe'ê-rupi aiko. Oipota xe amombe'u Cristo Hesu rehegwa nhe'ê. "Cristo irũ va'e gwive oikove meme va'erã xe ndive" nde'i reíry va'ekwe Nhandejáry. ² Áy amondo-ta nde-vy, Timóteo, xe nhe'ê. Nde xe ra'y-rami ereiko va'e, xe rembihayhu va'e voi nde. Tande rexakwaa rei katu Nhandejáry Nhande Ru, Nhandejáry Cristo Hesu ave nde rovasa porã-vy. Toity katu gwesa nde-rehe nde poriahuverekove-vy. Tane mbopy'agwapy katu.

Paulo otima porã Nhandejáry-pe Timóteo-rehe

³ Atima porã nde-rehe Nhandejáry-pe. Xe rembypy omboete íxupe hagwe-rami ave, ha'e xe remimboete voi ave. Xe py'a potĩ reheve amboete íxupe. Oĩ vérami xe py'a-py xe mombe'uha va'e-rami. Ndaipóri voi nipo ra'e xe rembiapo vaikwe xe py'apy pygwa omombe'u hagwã. Áry ramo pytũ ramo ave ajapo meme oração. Ajapo jave, xe mandu'a meme nde-rehe. ⁴ Nde jahe'o-rehe xe mandu'a nde-rehe. Upéa-gwi orohexa nga'u eterei xe avy'apa jevy hagwã. ⁵ Xe mandu'a nde-rehe. Yma va'ekwe nde jari Lóide, nde sy Eunice ndive ogwerovia tee-ma Cristo Hesu-pe. "Áy he'yi ogwerovia hagwe-rami ave Timóteo ogwerovia tee Cristo Hesu-pe oiko-vy" ha'e xejúpe nde-rehe. Upéa-rehe xe mandu'a ramo, atima porã Nhandejáry-pe nde-rehe.

Paulo oipota Timóteo ikyre'ỹ ojapo hagwã gwembiaporã

⁶ Ererovia tee-gwi, ha'e jevy-ta nde-vy: Ne kyre'ỹ katu erejapo hagwã ne rembiaporã. Amoĩ jave xe po ne akã-rehe, ome'ê va'ekwe nde-vy Nhandejáry ne rembiaporã ne mombaraete-vy. ⁷ Nomboúí va'ekwe Nhandejáry nhande-vy Nhe'ê Marangatu tee va'e nhane mongyhje-vy. Nhane mombaraete hagwã ae katu ome'ê va'ekwe nhande-vy. Jajohayhu hagwã, nhande pu'aka hagwã nhandéjehe ave ombou va'ekwe nhande-vy Nhe'ê Marangatu tee va'e.

Paulo oipota Timóteo ojerovia tee Nhandejáry-rehe ova e'ỹ reheve íxugwi

⁸ Nhane mombaraete-gwi ani erenotĩ teĩ Nhandejáry Hesu Cristo rehegwa nhe'ê eremombe'u-vy. Ha xe katu hese ha-py aĩ ramo jepe preso, ani joty xe renotĩ. Xe ndive ae katu ejerereko asy uka Hesu rehegwa nhe'ê ohenduse e'ỹ va'e-pe. Nhandejáry ne mombaraete jave nde rereko asyharã-gwi ani nde py'a mirĩ teĩ. ⁹ Ha Nhandejáry katu nhane resende va'ekwe. Nhande py'a potĩ reheve jaiko hagwã gwe'yi ramo nhane renói va'ekwe onhemoirũ uka-vy nhande-vy. Nhane rembiapo porã-rehe rei nanhane resendéi va'ekwe. "Ahexakwaa rei va'erã íxupe ahovasa-vy" he'i-gwi va'ekwe ojéupe nhane resende va'ekwe. Yma ete ne'írá vyteri oiko jave ko yvy va'ekwe he'i va'ekwe upéa nhande Cristo irũrã-rehe. ¹⁰ Áy ae ojekwaa-ma he'i va'ekwe. Ojehexa uka-ma ou-vy nhane resendeharã Cristo Hesu. Omano-gwi ndaipu'akavéi-ma nhande-rehe anháy nhande jukaharãgwe. Nhandu ramo hesegwa nhe'ê porã, opa e'ỹ reheve nhane moingove va'erã Nhandejáry ndive. ¹¹ Upéa nhe'ê porã mombe'uharã xe moĩ-ma va'ekwe. Hemimondorã xe moĩ-ma va'ekwe ave. Upéa nhe'ê-py aporombo'e hagwã xe moĩ-ma va'ekwe. ¹² Upéa-gwi xe rereko asy inhe'ê renduse e'ỹ va'e. Preso xe moĩ ramo jepe, nanotĩ mo'ái joty xe jokwaha. Cristo Hesu ajerovia hese va'e ahokokwaa voi xe. "Onhongatu porã va'erã ae katu nhe'ê porã xe-vy gwemime'êgwe. Ou jevyha áry peve onhongatu va'erã" ha'e xejúpe arovia ku'a ku'a e'ỹ reheve. ¹³ Anhetegwa nhe'ê nde-vy amombe'u hagwe-rami ave, emombe'u mbe'u katu. Cristo-pe peteixa eremoirũ-gwi, anive erava teĩ íxugwi. Ejerovia katu hese, ejohayhu ave. ¹⁴ Upe anhetegwa va'e nhe'ê ani ereheja teĩ avave omombe'u joavy avy jevy. Ojúpe ime'ëpyre onhongatu porã va'e-rami, enhangareko katu hese. Nhe'ê Marangatu tee va'e nhande py'a-py oiko va'e ne mombaraete va'erã.

¹⁵ Xe rerakwā erehendu ra'e. Gwī heroviaha Ásia vyv-py oiko va'e opa ojehesa rerovapa xéhegwi. Naxe moirūvéi-ma Figelo, Hermógenes ave. ¹⁶ Tohexakwaa porā rei Nhandejáry Hesu Cristo Onesíforo róga pygwa-pe. Xe preso aī ramo jepe, Onesíforo ou meme joty xe pohu-vy xe mbopy'agwapy hagwā va'ekwe. Ha'e nogwenotíry gwekoha xe pohu hagwā xe pokwaha-rehe aī ramo. Ogwahē joty xe rexa-vy. ¹⁷ Ogwahē ramo Roma tetā-my, ikyre'ỹ joty xe reka reka-vy, xe johu hagwā. ¹⁸ Nhandejáry ojehexa uka jevyha áry-vy, nhane rembiapo apokwe-rehe nhande rereko ramo, togwereco porā katu íxupe oiporiahuvereco-vy. Hembiaapo porāgwe rāgwe Éfeso tetā-my oiko jave xe pytygwō-vy ereikwaa porā voi.

2

Ani ereva teĩ Cristo Hesu rape-gwi. Soldado hekoha porā va'e reko-rami ae katu eiko

¹ Heta oĩ xéhegwi ojehesa rerova oiko-vy va'e. Upéa-gwi tane mombaraete katu Nhandejáry, xe ra'y Timóteo. Nde, xe ra'y-rami orogwereco va'e. Peteixa Cristo Hesu-pe eremoirū-magwi, tande rexakwaa rei katu nde py'a-py ne mombaraete hagwā erejehesa rerova e'ỹ hagwā. ² Xe remimombe'u nde-vy anhetegwa voi. Amombe'u jave heta oĩ henduha. "Anhetegwa voi ko Paulo nhe'ē" he'i xe remimombe'u rendu-vy. Upe anhetegwa nhe'ē omombe'u jevy uka hese ojerovia va'erā-pe. Ha upe rire katu ne remimombe'ukwe hemimombe'urā jevy. Upe va'e nhe'ē-py oporomo'arandu jevy va'erā oikwaa e'ỹ va'e-pe. ³ Ani ereva teĩ Cristo rape-gwi. Soldado hekoha porā va'e oiko asy ramo jepe ohendu joty gwuvixa nhe'ē. Upéixa ete ave nhande jaiko asy ramo jepe nhandembojere ukase va'e, ndajajeréi joty arā íxupe Nhandejáry-gwi. Soldado oikoharami nde ave eiko joty Hesu Cristo-pe. ⁴ Upe soldado oserví porā jave ombovy'ase ójehe omanda va'e gwuvixa-pe. Upéa-gwi gwekohakwe-rehe nopenavéiry. Gweko oheja gwuvixa nhe'ē-py meme oiko hagwā. Ombovy'ase gwuvixa-pe oiko-vy. Upe soldado oikoha-rami nde ave eiko katu, Cristo nhe'ē-py anho ereiko hagwā. ⁵ Oĩ ogwahēse hap-py oripara hatā va'e oho-vy. Ha ojehegwi rei oripara va'e-pe katu ogwahē ranhe ramo jepe, nome'ēi va'erā mba'eve. Imboriparaha nhe'ē-rupi oripara ramo ae katu ome'ē arā íxupe. Upéixa ete imboriparaha nhe'ē-rupi oripara hatā va'e reko-rupi eiko katu nde ave. Entéro Cristo nde-vy he'i va'ekwe gwive ejapo katu ombohekovia hagwā nde-vy. ⁶ Oĩ hetea'e va'e omoatyrō-vy gwemitygwe ojeupe gwarā-rehe. "To'u ranhe gwemitygwe ijagwyje va'e" ja'e joty hese. Upéixa ete nde retea'e eremba'apo hatā-vy Cristo-pe nde-vy hemimbohekoviārā-rehe. ⁷ Ne mandu'a meme katu ereiko-vy xe nhe'ē-rehe. Upe jave xe ha'ese va'e oikwaa ukapa arā nde-vy Nhandejáry. ⁸ Ani ereva teĩ Hesu rape-gwi. Ne mandu'a ae katu ereiko-vy Hesu Cristo-rehe. Ha'e onhemoingove jevy va'ekwe. Yma gware mburuvixagwasu Davi hembypy voi. Upéa rehegwa nhe'ē porā amombe'u mbe'u aiko-vy. ⁹ Ha oĩ upéa nhe'ē mbojevyyha xe rereko asy va'e. Hembiaapo vai va'e-rami xe moĩ preso xe pokwaha reheve. Ha xe joko ramo jepe, Nhandejáry nhe'ē ae katu ndojejokóiry. Oĩ joty imombe'uharā. Opa-rupi joty oho inhe'ē. Upéa-gwi eipyhy joty katu Hesu rape. ¹⁰ Upéa-gwi opaixagwa-gwi aiko asy ramo jepe, ndajere mo'ái joty Hesu-gwi. Nhandejáry rembiporavo-rehe ha-py aipyhy joty va'erā upe tape. Aipota ha'e kwéry ave omoirū peteixa Cristo Hesu-pe onheresende hagwā, oikove opa e'ỹ reheve hagwā Nhandejáry ndive yváy-py Nhandejáry onhemomba'egwasu ha-py, hendy resakā ha-py. ¹¹ Ko'a-rami ae oĩ nhe'ē jajerovia hese va'e: Omano va'ekwe Cristo. Peteixa nhamoirū ramo íxupe, omano va'ekwe-rami jaiko. Upéixa jaiko ramo, ha'e oikove jevy hagwe-rami ave hendive jaikove va'erā opa e'ỹ reheve. ¹² Ndajajeréi ramo íxugwi, nhamoirū va'erā íxupe enterove va'e-rehe omanda-vy onhembogwapy jave. "Xe ndaha'éi he'ýi" ja'e ramo hese nhatí-vy, "Peē ndaha'éi xe re'ýi" he'i ave va'erā nhande-vy. ¹³ Ndajaroviái ramo jepe, he'i hagwe-rami ojapo joty va'erā voi. "Ha'e hagwe-rami ndajapo mo'ái" nde'i mo'ái ójehe Nhandejáry. Upéa nhe'ē-rehe jajerovia-gwi, ani ereva teĩ Hesu rape-gwi. Eipyhy ae katu Hesu rape porā ereiko-vy.

Gwembiaapo renotíha e'ỹ-rami eiko eremba'apo-vy

¹⁴ “Ani nde resarái Paulo remimombe'ukwe-gwi. Ani eremokanhy inhe'ê” ere oporombo'eháry-pe. “Nhandejáry renonde-py va'e-rami ani erenhonhe'ê mbojevvy jevy teĩ. Oarandurãgwe ndoikwaavéi va'erã henduharã. Ojehesa rerova arã inhe'ê porã-gwi” ere íxupe kwéry. ¹⁵ Ne kyre'y ae katu, “Upéa xe rembijohu porã voi” he'i hagwã nde-rehe Nhandejáry. Gwembiapo renotíha e'y-rami eiko eremba'apo-vy. Tape rexa ukaha ova e'y va'e-rami, eiko eremombe'u porã porã-vy anhetegwa va'e nhe'ê. ¹⁶ Gwĩ onhe'ê rei va'e Nhandejáry mboete e'y-vy, ani erepena teĩ hese kwéry eremoirũ hagwã. Emboyke ae katu íxupe kwéry ndejéhegwi. Ha'e kwéry mombyryve ryve oho va'erã Nhandejáry-gwi. ¹⁷ Ivaive ive oho-vy hasy va'e, ojeporu ohetehu oho-vy, ja'e. Upéixa ete mba'asy-rami inhe'ê rei. Oiko vaive ive oho-vy upéa nhe'ê renduha. Indive kwéry oime Himeneu Fileto ndive. ¹⁸ Anhetegwa va'e nhe'ê nomombe'úi. Onhe'ê avy mante íxupe: “Nombotekove jevyí va'erã omano va'ekwe-pe” he'i mo'ã, ijapu. Upéa-gwi henduháry, “Mba'eixagwa nhe'ê po arovia-ta? Xe ndaikwaavéi-ma inhe'ê kwéry” he'i hemimombe'u kwéry joavy avy va'e-rehe. ¹⁹ Ha Nhandejáry nhe'ê katu anhetegwa va'e. Onhehekoviario arõ e'y va'e. Okytagwasu-rami voi Nhandejáry nhe'ê imbaraeete. Upe okyta omýi e'y va'e imbaraeete-gwi. Upe okyta-rami Nhandejáry nhe'ê imbaraeete va'e. Ko'a-rami ae ohai hese: Gwekoirũ oikwaa Nhandejáry,

he'i.

Xe Cristo re'yí voi, he'i ójehe va'e gwive, tomboyke ójehegwi mba'e vai, he'i ave. Omýi e'y va'e Nhandejáry rokyta imbaraeete voi. Oku'e ku'e rei e'y va'e. Upéixa okambia e'y va'e Nhandejáry nhe'ê, naikangyiry. Upéixa ndikatúí nhahekoviario Nhandejáry remimombe'u. Ndikatuí hendagwe-py nhamoĩ hekovia. Anhetegwa meme ae katu Nhandejáry remimombe'u. Enterove va'e jekoha ramo, jareko íxupe. ²⁰ Imba'e reta va'e róga-py heta oĩ jaiporu va'erã. Oĩ ouro gwigwa nha'ê, prata gwigwa nha'ê ave. Upéa nhane rembihayhu tee voi. Karugwasu jave ae jaiporu upe va'e. Ha oĩ ave yvyra gwigwa nha'ê, tuju gwigwa nha'ê ave. Upéa pya'e a'e ojeporu va'erã. Nhande rembihayhu ete e'y upe va'e. Ojeka ramo upe va'e imombopyrã voi. ²¹ Upéixa oĩ jaiporu va'erã jahayhu va'e. Upéa ijáry rembiporurã, heminhongatu, ha'e ae hambiporurã voi. Upéixa ete voi nhande, jaiko Nhandejáry-pe nhanhemoatyryõ porã-vy, ha'e ae hambiporurã. Nhanhemopotí-vy jaiko íxupe nhane rembiapo porã porã-vy. ²² Upéa-gwi ani ereiko rei teĩ. Oĩ karia'y va'e ojapose va'e rei ojapo. Ani ereiko teĩ upe karia'y reko-ha-rami. Ne kyre'y ae katu erejapo porã hagwã erejevvy e'y reheve. Erovia katu anhetegwa va'e nhe'ê, ejohayhu-vy. Upe Nhandejáry-pe ipy'a potí reheve oração ojapo va'e, peteixa eiko indive. Ipy'a potí va'e kwéry aipota ombojoja onhondive gwekoha.

Nhandejáry rembigwái rekoha

²³ Oikwaa seve seve rei va'e-rehe ani erepena teĩ. Hi'arandu e'y va'e voi-ma upe va'e. Mba'eve ndoikwaái. Emboyke ae katu ndejéhegwi inhe'ê rei va'e kwéry-pe. Onhe'ê rei ramo pya'e onhonhe'ê mbojevvy jevy arã. ²⁴ Ha Nhandejáry rembigwái va'e katu nonhonhe'ê mbojevvy jevyíry. Opoxy e'y reheve tonhomongeta porã katu entérovea ndive. Túvy-rami togwereco íxupe kwéry. Toporombo'e porã. Taheko kirirí ave oiko-vy. ²⁵ Taheko kirirí onhemonhe'ê porã-vy. Onhe'ê mbojevvy va'e-pe opoxy e'y reheve tonhemonhe'ê porã. Togwereco porã ikatu hagwãixa Nhandejáry oikwaa uka íxupe anhetegwa va'e ójehe imbohesa rerova uka-vy. ²⁶ Áy katu onuhã-my oity va'e-rami ogwereco íxupe anháy. Ipu'aka hese anháy ombotavy-vy. Ojapo uka íxupe gwemimbota. Upéa-gwi oipota hi'arandu porã jevy anháy po-gwi ojepe'a uka jevy-vy.

3

Paulo omombe'u ojehu va'erã

(1 Tm 4.1-2; Jd 18-19)

¹ Aipota ereikwaa ojehu va'erã Cristo ou jevyha áry ogwahê e'y ngatu. Ojekwaa va'erã heta hekoha vai va'e Cristo reko-rupi oiko va'e moakãrasyharã. ² Oporohayhu e'y-vy ha'e ae ojehayhu ukase mo'ã va'erã. Pirapire mante omomba'egwasu va'erã. Onhemboete

ukase mo'ã rei va'erã. Ha'e seve seve oiko-vy va'erã. Gwapixa-rehe onhe'ë rei rei va'erã. Gwu nhe'ë, osy nhe'ë omomba'e rei va'erã. Heko otima porã e'ÿ va'e gwapixape ojekwaa va'erã. Ojekwaa va'erã Nhandejáry mboete e'ÿharã. ³Heko porayhu e'ÿ va'erã, ojoporiahuvereco e'ÿ va'erã. Oapu-vy rei oiko va'erã gwapixa kwéry-rehe. Ójehe ndaipu'akái va'e. Heko poxy-vy rei oiko va'erã. Iporã va'erã gwive íxupe ndojohu poráiry. ⁴Gwapixa oikwaa uka rei va'erã ija'e'ÿha-pe. Ipy'agwasu va'erã. Onhemomba'egwasu ukase rei va'erã. Nhandejáry-pe ohayhu e'ÿ va'erã. Onhembyasaraiha omomba'egwasu va'erã Nhandejáry-pe omboyke-vy. ⁵“Xe heroviaha tee va'e” he'i mo'ã va'erã ójehe. Ha ipy'a-py katu noíry Nhandejáry remimoí imombaraete hagwã. Upeixagwa-pe gwive emboyke katu. Ani erepena teí hese kwéry. ⁶Áy oiko-ma voi ave upeixagwa hekoha vai va'e. “Xe aporombo'ehaty va'e” he'i mo'ã ójehe. “Xe aiko-ta voi nde róga gwy-py” he'i gwapixa-pe oporombotavy-vy. Omogwahê rire íxupe ombotavy oiko-vy hóga pygwa. Kunha hi'arandu e'ÿ va'e-pe ombotavy ohesa rerova uka-vy ójehe. Upeixagwa kunha ojevavy va'ety. Ojapose va'e rei-ma ojapo. ⁷Hi'aranduse teí. Inhe'ë porã rendu-vy, “Anhetegwa voi nipo ra'e” nde'íry hese. Hi'arandu va'erãgwe, inhe'ë rei ohendu-gwi. ⁸Yma va'ekwe oiko va'ekwe hi'arandu va'erãgwe héry va'e Janes, Jambres ave. Moisés amyri nhe'ë ombojevuse mo'ã va'ekwe. Yma onhonhe'ë mbojevvy jevvy hagwe-rami, áy ave upéixa oiko upe hekoha vai va'e kwéry. Onhe'ëmbojevvy jevvyse ave anhetegwa va'e emboyke jevvy hagwã. Hi'arandu va'erãgwe jepe, pytũ-my rei oiko va'e-rami joty oiko. Ndogwerovia teí-gwi, Nhandejáry remimboyke voi upe va'e. ⁹Py'a'e noporombotavyvéi-ma va'erã. Yma va'ekwe ojekwaa-ma myamyri rekoha vai. Ohexa kwaa va'ekwe hekoha-rehe. Upéixa ete áy ohexa kwaa ave va'erã hese hekoha-rehe. Oikwaa arã íxupe. Ha upe rire katu noporombotavyvéi-ma va'erã oiko-vy.

Paulo omombe'u Nhandejáry kwatia nhe'ë rehegwa nhe'ë
(Rm 15.4; Tt 1.9; Tg 1.21; 2 Pe 1.19-21)

¹⁰Ha nde ae katu xe reko kwaa-ma. Xe aporombo'e jave, xe moirũ-ma va'ekwe. Xe reko rexa-ma. Xe rembiapo porã xe renonde-py xe remimoí ereikwaa-ma. Ereikwaa voi Nhandejáry-rehe ajeroviaha. Xe reko kiririha ereikwaa-ma ave. Xe ajohayluha, xe ava e'ÿha ave ereikwaa-ma voi. ¹¹Xe aiko jave Antioquia tetã-my, Icônio tetã-my, Litra tetã-my ave, xe mbohasa asy voi va'ekwe xe rereko asy-vy. Xe rereko asy ramo jepe, ndajeréi joty va'ekwe Hesu rape-gwi. Xe rereko asy asy jave, xe resende sende joty va'ekwe Nhandejáry. Upéa xe-vy ojehu va'ekwe gwive ereikwaa voi.* ¹²Ha entéro ogwerovia tee va'e peteíxa omoirũse va'e katu Cristo Hesu-pe ojerereco asy va'erã. ¹³Ha hekoha vai va'e, “Hekoha porã nipo ra'e” oipota mo'ã he'i ójehe. Onhemboete ukase mo'ã. Upéa ivaive ive va'erã hekoha oho-vy. Oporombotavy rei va'erã oiko-vy. Ha'e ae onhembotavy va'erã ave oiko-vy. ¹⁴Ha nde ae katu erovia joty katu nde-vy hemimombe'ukwe. Hemimbojerovia uka nde-vy erovia katu inhe'ë. “Anhete teegwa nipo ra'e” ere va'ekwe hese. Are-ma hembiherovia uka nde-vy erovia joty inhe'ë. Ne mbo'eháry rekoporãha ereikwaa-ma voi ereiko-vy. ¹⁵Ne mitã ramogware áy peve ereikwaa-ma voi va'ekwe ereiko-vy Nhandejáry kwatia nhe'ë marangatu. Áy peve erehendu ereiko-vy. Upéa nhe'ë ne mo'arandu va'e voi erejerovia hagwã Nhandejáry Hesu Cristo-rehe ne resendeharã-rehe. Upeixagwa nhe'ë erovia joty ereiko-vy. ¹⁶Entéro Nhandejáry kwatia nhe'ë Nhandejáry rembihai ukakwe va'ekwe. Onhe'ë-rupi oikwaa uka ihaiharã-pe imo'arandu-vy. Upe va'e nhe'ë-py nghanombo'e. Upéa nhe'ë rendu-vy jaikwaa jajevyha. Upéa nhe'ë rendu-vy tape porã-rupi nhasê jaiko hagwã. Upéa nhe'ë rendu-vy tekoha-rupi jaiko va'erã nhande py'a poti reheve. ¹⁷Oipota Nhandejáry jaiko hembigwái ramo íxupe. Oipota nhande upe va'e nhe'ë nhane arandupa hagwã, nhane rembiapo porã porã hagwã íxupe jaiko-vy.

*

3:11 At 13.14-52; 14.1-20

Paulo oipota Timóteo gwetea'e reheve omombe'u Nhandejáry nhe'ê porã (Ef 5.15-16; 2 Pe 1.14)

¹Nhandejáry resa-py, Cristo Hesu resa-py ave amombe'u-ta nde-vy ne rembiaporã. Ha'e ae hovagwy-py onhembo'y-ma va'erã entéro omano va'ekwe oikove vyteri va'erã gwive ave. Petēi tēi hembiaapo apokwe-rami ogwereco va'erã íxupe kwéry. Ha'e ojekwaa jevy ou-vy va'erã ko vvy-py enterove oĩ va'e gwive ruvixarã. ²Upéa-gwi ha'e ae hesa-py amombe'u-ta nde-vy ne rembiaporã. Emombe'u katu nhe'ê porã. Nde retea'e reheve emombe'u katu. Ne nhe'ê renduse ramo, ne nhe'ê nohenduséi ramo jepe, emombe'u meme joty íxupe. Ojevavy va'e-pe eikwaa uka íxupe hembiaapokwe. Enhemonhe'ê katu íxupe emokyre'ỹ íxupe eremohembiaapo porã-vy. Ereporombo'e mbo'e jave, ani erenhe'ê asy tēi ne nhe'ê rendusere'ỹ va'e-pe. ³Ogwahẽ va'erã Nhandejáry nhe'ê rendusere'ỹha áry. Upe ramo nohendusevéi va'erã nhe'ê porã. Ojapose va'e rei ojapo va'erã. Heta omombe'u joavy avy va'erã omogwahẽ ojéupe. "Orohendu va'erãte ore-vy oroipota pemombe'u" he'i va'erã gwemimogwahẽ porã-pe. "Ore remihenduse e'ỹ ani pemombe'u tēi" he'i va'erã nhe'ê porã rendusere'ỹ-vy. ⁴Anhetegwa va'e nhe'ê nohenduséiry va'erã voi. Inhe'ê rei va'e-pe ae katu ohenduse va'erã hikwái. "Anhetegwa" he'i mo'ã va'erã hese. Upéa-gwi áy voi katu emombe'u nhe'ê porã. Ohendusere'ỹha áry ne'írã vyteri ogwahẽ jave, nde retea'e reheve emombe'u mbe'u joty íxupe kwéry. ⁵Inhe'ê rei va'e ha'e kwéry ohendu va'erã. Nde ae katu nde pu'aka meme katu ndéjehe. Nde rereko asy ramo jepe, ani ereva tēi joty Hesu rape-gwi. Emba'apo katu Nhandejáry-pe Hesu rehegwa nhe'ê porã eremosarambi hagwã. Ne rembiaporã gwive ejapopa katu ereiko-vy. ⁶Xe rekovia ejapo. Áy ijukapyrã-rami xe aime. Ogwahẽ-tama xe-vy xe mano hagwã áry. ⁷Oĩ oripara hatã va'e. Ikyre'ỹ oripara hagwã oho-vy ogwahẽse ha-py ogwahẽ hagwã. Upéixa ete yma gwive xe kyre'ỹ aiko-vy nhe'ê porã mombe'u-vy áy peve. Ha ko'ánga katu ogwahẽse ha-py ogwahẽ-ma va'e-rami oripara-vy, xe ajapo japo va'erã apy-py agwahẽ-ma. Cristo Hesu-rehe ajerovia tee-ma aiko-vy ajehesa rerova uka e'ỹ reheve. ⁸Oripara va'e ogwahẽ ranheve va'e-pe ombohekovia. Upéixa ete xe-vy ave ombohekovia va'erã. Hemimbota ajapopa-gwi, oĩ xe-vy imarangatu ete va'e ome'ê va'erã xe-vy Cristo. Enterove va'e ha'e hembierekorã hembiaapo apokwe-rehe. Upe áry-py naxe anhóiry hemimbohekoviarã. Entéro oha'arõ va'e-pe gwive ombohekovia va'erã íxupe.

Paulo omombe'u ojehegwigwa

⁹Ne kyre'ỹ reheve eiko katu pya'e eregwahẽ hagwã xe ha-py. ¹⁰⁻¹²Xe irũ kwéry xe rejapa-ma oje'ói-vy xe anho xe reja. Demas xe reja teko rei remimbojohu porã omomba'egwasuve-gwi. Tessalônia tetã-my oho xe reja-vy. Ha Crescente katu oho Galácia vvy-koty. Dalmácia vvy-koty oho Tito. Ha Tíquico amondo kuri íxupe Éfeso tetã-my. Lucas anho mante opyta xe ndive. Xe anho eterei. Upéa-gwi ne kyre'ỹ eregwahẽ hagwã xe ha-py. Ereju ramo, eju Marcos ndive. Amba'apo jave Nhandejáry-pe, ha'e xe ptytgwõ voi oiko-vy. ¹³Ereju ramo eru katu xe-vy xe ao jo'avvy Trôade tetã-my aheja va'ekwe, Carpo róga-py aheja va'ekwe. Eru ave xe-vy xe kwatia. Vaka pire-rehe oĩ va'e nhe'ê aipota eterei ereru. ¹⁴Oĩ Alexandre kwarepoti-rehe omba'apo va'ety. Ha'e ojapo vai xe-rehe. Hembiaapokwe-rami ogwereco va'erã íxupe Nhandejáry. ¹⁵Nhane nhe'ê ombojevvy jevy upe va'e. Ema'ê katu hese. Háke upe va'e kwimba'e. Ejoko katu íxupe. Ojapo vai va'erã nde-rehe ave. ¹⁶Mburuvixa xe rekoha-rehe oporandu ppy ramo xe-vy, "Nahembiaapo vaíry ra'e Paulo" he'i va'erã ndoúiry xe yke-rehe onhembo'y-vy. Xe rejapama xe anho oje'ói-vy hikwái. Ha'e kwéry hembiaapo vai e'ỹ va'ekwe-rami togwereco íxupe Nhandejáry. ¹⁷Ha xe ndive onhembo'y oĩ-vy va'e-rami, onhembo'y-ma oĩ-vy Nhandejáry xe yke-rehe xe mombaraete-vy xe monhe'ê hagwã. Upéa-gwi arosapukái voi imombe'u-vy judeu e'ỹ kwéry-pe. Entéro Hesu rehegwa nhe'ê gwive amombe'u. Heta tetã-gwi ou va'e hendu uka-vy amombe'u íxupe. Jagwarete juru-py aha vérami, xe repy jevy

va'ekwe Nhandejáry. Ijuru-gwi xe pe'a vérami xe resende va'ekwe. ¹⁸Áy jagwarete juru-py vérami aha jevy ramo, xe-rehe ojapo vai ramo, xe repy jevy joty arã Nhandejáry. Xe resende va'ekwe-gwi aikwaa voi íxupe. Xe resende jevy voi arã ave ãy. Mba'eva ojehe e'ÿ reheve xe-vy xe reraha va'erã voi yváy-py. Upe-py ha'e anho mburuvixa va'erã voi upe-py. Tanhamomba'egwasu meme va'erã íxupe opa e'ÿ reheve. Amém. ¹⁹Emombe'u katu Áqüüla-pe Priscila-pe ave xe mandu'aha hese. Onesíforo re'ÿi-pe ave emombe'u xe mandu'aha hese. ²⁰Erasto opyta Corinto tetã-my. Trófimo hasy-gwi aheja va'ekwe íxupe Mileto tetã-my. ²¹Ne kyre'ÿ katu eregwahê hagwã xe ha-py ro'y e'ÿ-py. Nhande re'ÿi Êubulo, Prudente, Lino, Cláudia ndive omombe'u uka nde-vy omandu'aha nde-rehe. Ambue kwéry, nhande re'ÿi va'e omombe'u uka ave. ²²Toiko Nhandejáry nde rekoirü ramo, Timóteo. Tapende rexakwaa porã rei Nhandejáry pende rovasa-vy.

Paulo remimombe'ukwe
Tito pegwarã
epístola de Paulo a Tito

Paulo omondo kwatia Tito pegwarã

¹⁻⁴Nde katu Tito, xe ra'y tee-rami, ereiko xe-vy. Hesu Cristo-rehe peteixa jajerovia-gwi ojoe'yí voi nhande. Xe Paulo amondo-ta nde-vy xe nhe'ẽ kwatia-rehe. Xe Nhandejáry rembigwái va'e, Hesu Cristo remimondo va'e ave. Aipota ojeroviave hese he'yirá Nhandejáry oiporavo va'ekwe gwive. Aipota oikwaa poráve anhetegwa va'e Nhandejáry re'yí rekorã. Nhandejáry nhane moingove meme va'e ondive. Upe va'e nhe'ẽ-rehe ajerovia voi. Upéa-gwi ajapo inhe'ẽ.

Yma va'ekwe, “Amoingove va'erã íxupe oiko hagwã xe ndive opa e'y reheve” he'i va'ekwe nhande-rehe Nhandejáry. Ha'e ijapu e'y reheve he'i upéixa. Nde'i reíry voi. Áy oikwaa uka-ma katu nhande-vy yma he'i va'ekwe nhane renonderã mombe'u-vy. Hi'óra-py oikwaa uka-ma nhande-vy. Ombou va'ekwe inhe'ẽ oikwaa uka-vy nhande-vy. Ko'ã nhe'ẽ, “Emombe'u katu, Paulo” he'i va'ekwe xe-vy Nhandejáry. Omombe'u uka va'ekwe xe-vy xe remimombe'urã Nhandejáry nhane resendehaty. Upéa-gwi ajapo joty inhe'ẽ.

Amondo-ta nde-vy Tito xe nhe'ẽ kwatia-rehe. Tande rexakwaa rei katu Nhandejáry Nhande Ru, Nhandejáry Hesu Cristo ave. Tane mbopy'agwapy ave katu.

Paulo oipota Tito omoingo Hesu reroviaha rerekwarã

(1 Tm 3.1-7)

⁵Aipota erejapo áy xe ajapo e'y va'ekwe. Upéa-rehe oroheja kuri Creta yvy y mbyte-py oí va'e-py. Emoingo tetã tetã-rupi Hesu reroviaha rerekwarã. Emoingo ingo katu íxupe xe nde-vy ha'e hagwe-rami. ⁶Heko porã va'e emoingo herekwarã. Imandu'a porã meme hese va'e emoingo herekwarã. Hembireko reta e'y va'e peteí voi hembireko va'e. Ta'y kwéry, tajýry kwéry ave ojerovia-ma ave Hesu Cristo-rehe va'e. Upeixagwa mante emoingo herekwarã. Oí gwembireko ndive e'y oiko va'e. Oí naimba'ereroviáiry va'e ta'yry. Oí ta'yry nohendúí va'e inhe'ẽ, ojapose va'e rei ojapo va'e. Oí heta imandu'a vai va'e ta'yry-rehe. Ani upeixagwa eremoingo teí Hesu reroviaha rerekwarã ramo. ⁷Ha herekwa Nhandejáry nhe'ẽ-py ae onhangareko Hesu reroviaha-rehe. Upéa-gwi imandu'a porã hese va'e ae katu emoingo herekwarã. Oí ha'e seve oiko va'e, ipoxy pya'e a'e va'e, oka'u va'e, oporonupã va'e, oipotave tave rei ojúpe gwarã pirapire va'e. Ani upeixagwa eremoingo teí Hesu reroviaha rerekwarã ramo. ⁸Onhomogwahê uka porã rei va'e-pe ae katu emoingo herekwarã. Oí ave gwí enterove va'e ndive ipy'a porã va'e, inhakã porã va'e, tekoha-rupi oiko va'e, Nhandejáry-pe omboete va'e, ójehe ipu'aka va'e. Upeixagwa heko porã va'e-pe ae katu emoingo herekwarã. ⁹Togwerovia porã anhetegwa va'e nhe'ẽ ojehesa rerova e'y reheve. Nhambo'e hagwe-rami, togwerovia joty omombe'u hagwã anhetegwa va'e Hesu reroviaha-pe omokyre'y hagwã. Onhe'ẽ mbojevy va'e-pe, “Neremombe'u porãí” he'i va'erã. Upeixagwa ogwerovia tee va'e emoingo katu herekwarã. ¹⁰Oí heta inhe'ëngendu e'y va'e. Onhe'ẽ rei oporombotavy-vy. Upéixa heta oí judeu reko-rupi oiko vyteri va'e, “Penhepirekytí uka katu” he'i va'e. ¹¹Upeixagwa-pe, “Anive erehekomb'o rei teí ereikovy” ere ae katu íxupe. Omokiriri hagwã inhe'ẽ rei rei va'e-pe emoingo katu Hesu reroviaha rerekwarã. Gwí oporombotavy va'e ohesa rerova uka oiko-vy ójehe hóga-py oí va'e gwive. Ohekombo'e rei-vy ohesa rerova uka ójehe. Oipota ójehe gwarã pirapire oporombotavy-vy. Upeixagwa-pe tomokiriri katu íxupe. ¹²He'i araka'e hese hi'arandu va'e Creta yvy pygwa:

“Ijapu meme Creta yvy pygwa” he'i. “Mymba poxy-rami oiko va'e. Ipituva ramo jepe, okaruse joty”

he'i araka'e oyvy pygwa-rehe Creta yvy pygwa-rehe. ¹³Anhetegwa voi upe hi'arandu va'e remimombe'ukwe. Upéa-gwi emandari ndari katu oporombo'e rei va'e-pe: “Anive

erembo'e vai rei teĩ" ere ae íxupe. "Togwerovia porã ae anhetegwa va'e nhe'ẽ porã" ere íxupe.

¹⁴ "Tapehendu e'ỹ katu judeu kwéry remimombe'u rei. Teko rei remimombe'u ave tapehendu e'ỹ katu. Anhetegwa nhe'ẽ porã ae katu pehendu" ere íxupe kwéry. ¹⁵ Oĩ ipy'a potĩ va'e. Ndaipóri imongy'aharã. Oĩ ave ipy'a ky'a va'e, Nhandejáry-rehe ojerovia e'ỹ va'e. Hemiapio porãse mo'ã oiko-vy, ha ojevavy joty oiko-vy, onhemongy'a rei joty oiko-vy. Ipy'a ky'a vaive ive oho-vy. Upéa-gwi, "Anive erehekomb'o'e rei teĩ" ere oporombo'e rei va'e-pe. Ha'e kwéry ipy'a vai. Hemiapio vai ramo jepe, notĩ kwaái joty okwa-vy. ¹⁶ "Oroheko kwaa-ma Nhandejáry-pe" he'i rei ójehe hikwái. Ha jahexa kwaa ramo katu hese, jaikwaa voi hekoha. "Ndohekokwaaíry nipo ra'e Nhandejáry-pe" ja'e hese. Nhandejáry rembijohu vai ojapo, nohenduséiry inhe'ẽ. Ha iporã va'e katu ndojaposéi voi. Upéa-gwi, "Anive erehekomb'o'e rei" ere íxupe.

2

Paulo oipota Tito ohékomb'o'e porã Hesu reroviaha-pe

¹ Ha nde ae katu ehékomb'o'e porã Hesu reroviaha kwéry-pe. "Pehendu katu anhetegwa nhe'ẽ tekoha-rupi peiko-vy" ere íxupe.

² Ha ituja va'e kwéry katu: "Ani peka'u teĩ peiko-vy" ere íxupe kwéry. "Penhemboete uka pende rapixa kwéry-pe. Ójehe ipu'aka va'e-rami peiko katu. Perovia porã katu anhetegwa nhe'ẽ. Pejohayhu tee katu peiko-vy. Pejerereko asy jave pekirirĩ joty katu peiko-vy" ere íxupe kwéry erenhemonhe'ẽ-vy.

³ Upéixa ave igwaigwĩ va'e kwéry-pe enhemonhe'ẽ katu: "Nhandejáry irũ reko-rupima peiko katu" ere íxupe. "Ani erenhe'ẽ rei rei teĩ nde rapixa-rehe. Ani ereka'u teĩ. Ereka'u ramo, ipu'aka va'erã opaixagwa rei nde-rehe. Ehékomb'o'e porã ae katu nde rapixa-pe" ere igwaigwĩ va'e kwéry-pe. ⁴ "Tekoha-rupi peiko pehekomb'o'e porã hagwã kunha omenda ramo va'e-pe. Kunha omenda ramo va'e tohayhu oména kwéry-pe. Tohayhu ave omemby kwéry-pe ave. ⁵ Toiko ójehe ipu'aka va'e-rami. Ojoeko-rupi porã toiko ome ndive hekopotĩ-vy. Topyta gwóga-py, tonhangareko omba'apo-vy. Taipy'a porã. Ome nhe'ẽ-rupi toiko. Tekoha-rupi toiko kunhagwe pono omonhe'ẽ vai uka Nhandejáry nhe'ẽ-rehe gwapixa kwéry" ere gwaigwĩ kwéry-pe.

⁶ Upéixa ete kwimba'e kwéry ipyahu va'e-pe ave enhemonhe'ẽ katu: "Ójehe ipu'aka va'e-rami, peiko katu" ere íxupe.

⁷ Ha nde ejehexa uka porã íxupe, nde reko-rami oiko hagwã kwimba'e kwéry ipyahu va'e. Erehekomb'o'e jave, ani erehekomb'o'e rei teĩ. Enhemboete uka katu íxupe kwéry.

⁸ Anhetegwa va'e emombe'u íxupe. Peteixa emombe'u porã meme katu. Aipo ramo ne nhe'ẽ ombojevvy va'erãgwe nane nhe'ẽ mbojevvy va'erã. Otĩ va'erã ne nhe'ẽ mbojevvy-ta mo'ã va'ekwe.

⁹ Ha onhemomba'apo uka va'e-pe enhemonhe'ẽ katu: "Pehendu meme katu nde járy nhe'ẽ" ere íxupe. "Oipota va'e gwive ejapo katu íxupe. Imbovy'a-vy ejapo íxupe. Ani erembohovái teĩ íxupe eremboete e'ỹ-vy. ¹⁰ Ani eremonda íxugwĩ. Ejehexa uka porã ae katu íxupe. Embojerovia uka katu íxupe ndéjehe. Aipo ramo peteixa peiko meme katu ojehexa uka porã hagwã Nhandejáry rekoha, ojohu porã hagwã pende rexaháry Nhandejáry nhane resendehaty rehegwa nhe'ẽ" ere íxupe.

¹¹ Nhandejáry nhande rexakwaa rihaty oikwaa uka-ma nhande-vy gwekoha nhande kwéry kente kwéry-pe nhane resende hagwã. Upéa-gwi, "Enterove va'e resa-py peiko porã katu Nhandejáry-pe pemboete-vy" ere upe pygwa-pe. ¹²⁻¹³ Upéixa nhande resendeha ramo oiko-gwi, "Anive erejapo xe aipota e'ỹ va'e, ani erejapo nde erejapose va'e rei" he'i nhande-vy Nhandejáry nhande poriahuverekohaty. Ko vvy-py jaiko jave, iporã ae nhande pu'aka nhandéjehe. Iporã jaiko nhande rekoha jajevavy e'ỹ reheve Nhandejáry mbovy'a-vy, nhaha'arõ-vy íxupe. Nhandejáry Hesu Cristo ou tee jevvy va'erã nhande rovasaharã. Nhane remiha'arõ ou tee jevvy va'erã. Ha'e tuvixa mba'e, nhane resendeharã voi ha'e. Hendy mbaraete reheve, opu'aka reheve ou jevvy va'erã. ¹⁴ Yma va'ekwe ojevvy

uka nhande-rehe ha-py omboyke hagnwā nhandéhegwi nhane rembiapo vaikwe, nhande py'a omopotī hagnwā gwe'ýi marangaturā, nhane mokyre'ý hagnwā jajapo porā hagnwā.¹⁵ Upeixagwa nhe'ê-py ehekomb'e mbo'e íxupe. Emokyre'ý upe pygwa-pe ojapo hagnwā upéa nhe'ê. Ha henduse e'ýha-pe katu enhemonhe'ê katu ojapo jevy hagnwā. Nhandejáry nhe'ê-py enhe'ê. “Ha'e ae onhe'ê-py rei onhemonhe'ê” ani ereheja he'i nde-rehe. Ani ereheja nde-rehe onhe'ê vai.

3

Paulo omombe'u Hesu reroviaha rekorā

¹ Aipota eremombe'u ko nhe'ê Hesu reroviaha-pe:

“Ani nde resarái mburuvixa kwéry-gwi. Gwī omanda va'e nhande-rehe, ani nde resarái” ere íxupe. “Pene mandu'a meme katu hese pehendú hagnwā inhe'ê” ere íxupe. “Pejapo katu inhe'ê. Pene kyre'ý katu iporā va'e apo-vy.*² Ani erenhe'ê rei rei teĩ avave-rehe. Ani penhorairō teĩ penhonhe'ê mbojevvy jevy-vy. Pende reko kirirī ae katu ojúpe. Pende py'a porā reheve ae katu ave pejogwereco” ere Hesu reroviaha-pe.³ Are va'ekwe nhande kwéry ave jaiko vai va'ekwe. Nhane arandu e'ý va'ekwe jaiko-vy. Inhe'ê rendu e'ý-vy ave jaiko va'ekwe. Inhe'ê rei va'ekwe nhane mbotavy. Nanhande pu'akái nhandéjehe va'ekwe opaixagwa ivai va'e teko rei ojapose va'e rei ojapo va'ekwe jajapo hagnwā. Nhande py'a pohýi va'ekwe jaiko-vy. Nhane mandu'a meme va'ekwe nhane rembiapo vairā-rehe. Nhande rapixa mba'e jaipota rei nga'u va'ekwe. Ndaija'éiry rei nhande-rehe nhande rapixa. Nanhande a'éiry ojóhe. ⁴ Ha Nhandejáry nhane resendeha ae katu, jajevvy ramo jepe ojehexa uka porā joty nhande-vy va'ekwe. Nhande poriahuverekoha voi, nhande rayhuha voi Nhandejáry.⁵ Ha'e nhane resende va'ekwe. Ndaha'éí nhane rembiapo poráke-rehe nhane resende va'ekwe. Nhande poriahuvereko-gwi ae nhane resende va'ekwe. Upéi oiko-ma nhande py'a-py Nhe'ê Marangatu tee va'e, nhandemopotī hagnwā, nhande reko tujakwe oipe'a hagnwā nhandéhegwi, nhandembopyahu jevy hagnwā jaiko-vy.*⁶ Nhande py'a omohynyhē hagnwā ombou va'ekwe nhande-vy Nhe'ê Marangatu tee va'e-pe ome'ê rei-vy. Hesu Cristo nhane resendeha nhande rayhu-gwi, ou va'ekwe Nhe'ê Marangatu tee va'e. Upéixa nhane resende va'ekwe.⁷ Nhane resende va'ekwe nhande-vy gwarā nhaha'arō va'e ome'ê hagnwā nhande-vy. “Ipy'a potī” he'i-gwi nhande-rehe nhande poriahuvereko-vy, oipota jaikove meme indive. Upéa-gwi, “Peiko porā katu” ere meme Hesu reroviaha-pe.

⁸ Anhetegwa voi ko nhe'ê ha'e va'e nde-vy. Iporā erejerovia ko nhe'ê-rehe. Upéa-gwi ani ne ate'ý teĩ erenhemonhe'ê-vy. Ne kyre'ý ae katu eremombe'u mbe'u-vy, Nhandejáry reroviaha imongyre'ý-vy imohembiapo porā hagnwā. Upéixa hembiapo porā ramo, iporā voi katu. Enterove rembijohu porā hembiapo. Upéa-gwi enhemonhe'ê nhe'ê katu ereikovy ereporombo'e-vy.*⁹ Oĩ onhonhe'ê-rehe rei onhonhe'ê mbojevvy jevy va'e. Ani erepena teĩ inhe'ê rei va'e-rehe. Heta ijypykwe pykwe réry-rehe ani erepena teĩ. Judeu rekoha regegwa nhe'ê-rehe, ani erenhonhe'ê mbojevvy jevy teĩ. Ani nde poxy erenhonhe'ê mbojevvy hese. Upeixagwa inhe'ê rei nanhane mombaraetéiry. Upéa-gwi ani erepena teĩ hese. Ani ne nhe'êngendu teĩ hese.¹⁰ Oĩ ramo ndaijojaséiry va'e Hesu reroviaha ndive, “Anive erejapo upéa” ere íxupe. Nane rendúí ramo, “Ani erejapo upéa” ere jevy íxupe. Mokóigwe ere íxupe. Upéi nane rendúí joty ramo, anive eremoirū íxupe.¹¹ Upeixagwa oheja ra'e Nhandejáry rape. Ojevvy va'ety rei oiko-vy. Ojekwaa porā hese, ojehexa porā ave hekoha vaiha. Upéa-gwi ani eremoirū teĩ íxupe kwéry.

Paulo omombe'u omandu'aha onhe'ê apy-vy

¹² Amondo-ta nde-vy Ártemas para'e, Tíquico para'e. Ogwahē ramo oho-vy nde ha-py, ne kyre'ý katu xe topa hagnwā ereho-vy Nicópolis tetā-my. “Upe-py apyta-ta aha-vy ro'ý jave” ha'e kuri xe py'apy-py xejéupe.¹³ Ha Zenas preso oheja va'e mosē ukaha katu Apolo ndive oho-tama ovyv-gwi. Oho-tama jave, ne kyre'ý katu ave ipytygwō-vy íxupe. Eme'ê

* 3:1 Rm 13:1; 1 Pe 2:13-14 * 3:5 Ef 2:8-10; 1 Pe 1:3 * 3:8 1 Tm 1:3-4; 2 Tm 2:14

íxupe hemikotevê oho mombyryve hagwã. ¹⁴Taikyre'ỹ ave entéro Hesu reroviaha gwive hembiaipo porã hagwã, gwapixa remikotevê me'ẽ-vy, oiko rei e'ỹ hagwã oporopytygwõ hagwã oiko-vy. ¹⁵Opa-ta xe nhe'ẽ. Entéro Hesu reroviaha a-py oiko va'e omombe'u uka-ta peẽ-my omandu'aha. Ore ave oromombe'u uka-ta ore mandu'aha pende-rehe. Entéro Hesu reroviaha ne ndive oiko va'e ore rayhu va'e, oromombe'u uka-ta ave íxupe ore mandu'aha. Peẽ kwéry-pe tapende rexakwaa rei katu Nhandejáry pende rovasa-vy. Amém.

Paulo remimombe'ukwe
Filemom pegwarã
epístola de Paulo a Filemom

¹ Xe, Paulo, Hesu rehegwa nhe'ê amombe'u meme-gwi ko'ây aime ko'a-py preso. Timóteo opyta xe ndive xe moirũ haggwã rei. Ko'ây araha uka-ta petei kwatia-py nhe'ê nde-vy gwarã. Nde, Filemom, ore irũ tee voi, ore rembihayhu va'e voi nde. Ore ramigwa ave nde eremombe'u mbe'u Hesu Cristo rehegwa nhe'ê ereiko-vy. Ko va'e nhe'ê ahai-ta nde-vy gwarã. ² Ne ndive oime va'e kwéry pegwarã ave. Oime nipo ra'e Hesu reroviahá kwéry ne ndivegwa. Oime ra'e Áfia ne ndive. Ha'e ojerovia tee-ma ave Hesu-rehegwi opyta-ma xe-vy xe reindy-rami. Oime ra'e Arquipo. Ha'e ore irũ oiko-vy omombe'u meme-gwi Hesu Cristo nhe'ê. Oime ave ra'e gwĩ nde ha-py onhombóaty aty meme va'e Hesu Cristo-pe omboete haggwã. Íxupe kwéry gwarã ave ahai-ta ko va'e kwatia.

³ Nhandejáry Tupã Nhande Ru katu tapende rexakwaa rei. Tapene mbopy'agwapy ave. Nhandejáry Hesu Cristo ave tapende rexakwaa rei. Tapene mbopy'agwapy ave.

Filemom oporohayhu ojerovia-gwi Hesu-rehe

⁴ Xe atimã meme voi Nhandejáry-pe nde-rehe Filemom. Nhandejáry-pe ajapo ramo oração, xe mandu'a meme va'e voi nde-rehe. Xe ahendu nhe'ê porã ne rerakwã. Nde, erehayhu tee voi Nhandejáry Hesu-rehe ojerovia va'e kwéry-pe. Xe ne rerakwã porã ahendu ramo avy'a voi. Upéixa avy'a aikwaa ramo nde erejerovia porã Nhandejáry Hesu Cristo-rehe. Ambojeupi ramo Nhandejáry-pe xe nhe'ê xe mandu'a meme voi nde-rehe. ⁶ Ajerure íxupe nhane pavê-gwi nhane mo'arandu porãve ráve haggwã Hesu Cristo remime'égwe-rehe. Ore, nde ave jajerovia Hesu Cristo-rehe. Peteixa nhaimé-gwi indive, Nhandejáry ohovasa vasa nhande-vy nhande rekove. Upe jeovasa Nhandejáry nhande-vy ome'ê va'ekwe jaikwaa porãve ráve haggwã ajerure íxupe.

⁷ Xe ryvy-rami voi xe-vy ereiko, Filemom. Xe aikwaa-ma ramo ne rerakwã porã xe mongyre'y-ma voi xe ave xe mbovy'a tee-vy eremongyre'y-gwi gwĩ Nhandejáry-rehe ojerovia va'e kwéry-pe. Upéa-gwi xe avy'a voi.

Paulo ojerure Filemom-pe omogwahê porã jevy haggwã gwembigwái Onésimo-pe

⁸ Xe, Paulo, Cristo nhe'ê aikwaa porã-gwi ome'ê arã ne rembiaporã amombe'u haggwã nde-vy. Ha xe katu nda'e mo'ái joty ne rembiapo porã-rehe. Erejerovia porã-gwi Nhandejáry-rehe, xe ndajepy'apýi voi nde-rehe. ⁹ Nhandejáry Hesu Cristo rembigwái voi xe. Inhe'ê amombe'u-gwi aime preso ko'ây. Aikwaa erejapo arã xe remimbota. Orohayhu eterei-gwi ae xe ndorójokwaiséiry voi.

¹⁰ Ajerurese mate nde-vy ne rembigwaikwe Onésimo-rehe. Ha'e-ma preso aime ramo amombe'u va'ekwe íxupe Nhandejáry Hesu Cristo nhe'ê. Áy ha'e ojerovia-ma ave Hesu Cristo-rehe. Upéa-gwi ko'ây xe ra'y-rami voi areko íxupe. ¹¹ Yma nipo araka'e ha'e natembigwái porã voi nipo araka'e nde-vy. Ko'ây katu xe pytygwõ porã voi oiko-vy. Xe-vy xe pytygwõ porãha-rami ave ha'e ne pytygwõ porã arã nde-vy. ¹² Amondo jevy-ta íxupe nde róga-py áy. Xe rembiayhu voi Onésimo. Ogwahê ramo nde róga-py ani ae ne mandu'a teĩ hembiaipo vaikwe-rehe. Xe-vy xe mogwahê porãha-rami ave emogwahê porã katu íxupe igwahê iho ramo.*

¹³ Ha'e jepe kuri xe xejeupe Onésimo oiko meme haggwã xe ndive. Upéixa ramo ae ne rembiaporãgwe ha'e ojapo va'erã xe ndive ko'a-py. Nhandejáry Hesu Cristo rehegwa nhe'ê amombe'u meme-gwi xe moĩ-ma a-py preso. Onésimo opyta ave preso-gwi xe moirũ a-py.

¹⁴ Aipota peve rei opyta xe ndive Onésimo. Nde ae xe rexakwaa ramo ereme'ê arã xe-vy. Aikwaa voi xe nde naxe nhe'ê mbojevýi arã ha upéa-gwi xe ndajerureséiry. Nde py'a gwive ae ereme'êse ramo ereme'ê arã xe-vy.

* 1:12 Cl 4.9

¹⁵ Xe ha'e-ta nde-vy: Ikatu arã ja'e Onésimo-rehe. Ha'e sapy'a ete osê araka'e nde róy-gwi. Ko'ây oike jevy nde róy-py oiko meme jevy hagwã ne ndive. ¹⁶ Ko'ây oho ramo nde róy-py ha'e, ndaha'evéi-ma tembigwái ramo anho mate oiko hagwã. Nhande-rami ave-ma oiko-gwi, ko'ây Hesu Cristo-rehe ojerovia-gwi, nhande ryvy mirĩ-ramima jahayhu tee arã íxupe. Xe ahayhu tee voi íxupe. Nde katu xéhegwi erehayhuve va'erã íxupe. Ne ndive oiko-gwi, Hesu-rehe ojerovia-gwi ave erehayhuve va'erã íxupe.

¹⁷ Xe-rehe ere ramo “Paulo xe irũ voi”, xe rerekoha-rami ave ereko Onésimo-pe. Xe-vy xe mogwahêha-rami joty emogwahê porã katu íxupe. ¹⁸ Sapy'a osê ramo araka'e oho-vy nde róy-gwi. Ojapo vai nipo araka'e nde-rehe. Oreve para'e nde-vy. Oreve ramo nde-vy, xe ae apaga arã nde-vy ireveha. ¹⁹ Xe Paulo, xe po-rupi ahai nde-vy amondo hagwã ko xe nhe'ê. Oreve ramo nde-vy Onésimo, apaga arã nde-vy ireveha. Xe natekotevêi oromomandu'a gwĩ va'e-rehe: nde erereve va'e-rami erepyta xe-vy. Xe-rehe ha-py ereiko-ma nde Hesu reroviaha ramo. ²⁰ Opa xe rembijerure erejapo ramo xe-vy, upéixa ramo xe mbovy'a va'erã. Aipota xe rembijerure erejapo xe-vy, Hesu Cristo-rehe erejerovia-magwi xe-ramima ave ereiko. Upéixa ramo xe mbovy'a arã, peteixa Hesu-rehe jajerovia-gwi.

²¹ Ko'a-rami ahai nde-vy xe nhe'ê. Aikwaa porã voi xe ne nhe'êngendu voi nde. Upéa-gwi xe rembijerure-gwi erejapove va'erã voi xe-vy. ²² Ko'ây katu ajerure ambue va'e-rehe nde-vy erembosako'i hagwã xe-vy nde róga-py aha ramo upe-py ake hagwã. Aikwaa voi pembojeupi meme ramo Nhandejáry-pe pene nhe'ê xe-rehe, voi asê jevy arã ko'a-gwi aha jevy hagwã pende ha-py.

Paulo, inhirũ kwéry ndive, omondo omandu'aha

²³ Epafras, Hesu-rehe ojerovia-gwi ha'e ave oĩ preso xe ndive ko'a-py. Ha'e ave omondo-ta nde-vy omarandu. ²⁴ Xe irũ kwéry, Marcos, Aristarco, ha Demas, Lucas, ha'e kwéry xe moirũ rei va'e voi. Ha'e kwéry ave omondo-ta nde-vy omarandu.

²⁵ Tapende rovasa porã porã katu Nhandejáry Hesu Cristo pende rexakwaa rei-vy. Pende py'a gwive tapende rovasa.

Hebreu kwéry pegwarã epístola aos hebreus

Tuvixave mba'e Cristo Nhandejáry ra'y Nhandejáry rembigwái kwéry-gwi

^{1,3}Nhandejáry omombe'u uka meme nhande-vy ojehegwa nhe'ê. Yma va'ekwe gwem-bigwái kwéry-pe omombe'u uka nhane mo'arandu hagwã. Ko'ây ae katu omombe'u gwa'yry tee-pe nhane mo'arandu hagwã ta'yry. Yma, yma va'ekwe heta eterei oiko inhe'ê-py omombe'u va'ety. Ha Nhandejáry omombe'u uka va'ekwe íxupe kwéry. Upéi ha'e kwéry omombe'u jevy nhane rembypy-pe inhe'ê. Nomombe'upáiry Nhandejáry nhe'ê. Íxupe omombe'u uka hagwe-rami ae, ha'e kwéry omombe'u jevy nhane rembypy-pe. Nhandejáry ohexa uka íxupe kwéry hembixagwe omombe'u jevy hagwã. Ohendu uka ave íxupe kwéry hemiendukwe ndukwe omombe'u jevy hagwã. Gwembigwái meme oiporu va'ekwe nhane mo'arandu hagwã. Ha ãy katu gwa'yry tee-pe omombe'u ukapa nhane mo'arandu hagwã. Áy ta'yry tee omombe'u va'ety ramo opyta. Gwu-gwi ohendu va'ekwe omombe'u. Ha'e Nhandejáry rembiporavo opamba'e jaryrã voi. Íxupe ae Nhandejáry ojapo uka ko yvy, áry, yguasu ave. Gwa'yry reko-rehe ombojekwaa-ma gweko porã teeha. Gwu rekoha-ramima voi ave oiko ta'yry. Heko ambue e'y va'e voi-ma ha'e. Onhe'ê-py entéro mba'e omoingo meme ta'yry. Imbaraete tee voi inhe'ê. Ha'e omopotí va'ekwe nhande py'a jajejavy rire. Ha upe rire katu oho jevy yváy-py ogwapy hagwã. Nhandejáry, upe Tupágwasu tee tuvixave va'e yke-rehe ijakatúa-koty ogwapy-ma oí-vy. ⁴“Xe rembigwái” nde'íry íxupe Nhandejáry. “Xe ra'y” he'i ae íxupe. Upéixa ramo ombotuvixave mba'e íxupe. Ha gwembigwái kwéry yváy pygwa-pe katu, nombotuvixa mba'e etéiry Nhandejáry. Upéa-gwi Nhandejáry rembigwái pa'ũ-my ndogwapýi voi ha'e. Nhandejáry yke-rehe ae ogwapy oí-vy. ⁵ Ha Nhandejáry gwembigwái kwéry-pe katu nde'íry:

“Nde ko xe ra'y tee voi”

nde'íry íxupe kwéry.

“Ko'ây katu amombe'u-ta enterovéa-pe. Ko va'e xe ra'y tee voiha”

nde'íry ave gwembigwái kwéry-rehe.

“Areko va'erã íxupe túvy-rami. Xe ra'y ramo oiko va'erã”*

nde'íry ave araka'e Nhandejáry gwembigwái kwéry-rehe. Upéa-gwi tuvixave mba'e Nhandejáry ra'y Nhandejáry rembigwái kwéry-gwi. ⁶Upéi he'i ave araka'e Nhandejáry:

“Tomboete katu íxupe entéro xe rembigwái gwive”*

he'i araka'e Nhandejáry gwa'yry-rehe ko yvy-py imbou-vy. ⁷Ha hembigwái kwéry-rehe katu he'i Nhandejáry kwatia nhe'ê a-rami:

“Hemimondo va'e, omondo íxupe Nhandejáry yvytu ramo. Tata rendy-rami rei voi hembigwái oiko”*

he'i Nhandejáry kwatia nhe'ê. ⁸Ha Nhandejáry ra'y-rehe katu he'i:

“Ore Járy, ereiko meme va'erã ore ruvixa ramo. Erepa e'y reheve ereiko meme va'erã” he'i. “Eremanda porã meme va'erã ore-rehe kwéry. Ore rembiapo apokwe-rehe ore rereko va'erã” he'i. ⁹“Hembiapo porã va'e erejohu porã íxupe. Ha hembiapo vai va'e katu nande a'éiry hese. Upéa-gwi Nhandejáry nde Járy nde poravo-ma. Ne mbovy'a verei hagwã ne irũ gwéry-gwi nde poravo-ma. Ne irũ ovy'a ramo jepe, nome'ëiry joty íxupe nde vy'aha-rami Nhandejáry”*

he'i Nhandejáry kwatia nhe'ê Nhandejáry ra'y-rehe. ¹⁰Upéi he'i jevy Nhandejáry kwatia nhe'ê:

* 1:5 Sl 2.7; 2 Sm 7.14 * 1:6 Dt 32.43 * 1:7 Sl 104.4 * 1:9 Sl 45.6-7

“Yma va'ekwe, ore Járy, erejapo va'ekwe ko yvy. Áry ave ne rembiapokwe voi.
¹¹⁻¹² Onhehundi va'erã ne rembiapokwe ha nde katu nerenhehundíry va'erã voi.
 Erepa e'ý reheve ereikove va'erã. Nhande ao osorove rove. Upéi nhamboyke íxupe.
 Upe rire nhahekoviarõ va'erã íxupe. Upéixa ete nhande ao tuja-rami ko yvy áry
 ndive itujave jave va'erã” he'i. “Upéi hekoviarõ-vy eremboyke-ma va'erã erejapo
 va'ekwe. Ha nde katu erenhehekoviarõ e'ý va'erã voi. Eremanotaha áry nogwahê
 mo'ávêi-ma va'erã nde-vy” he'i. “Ereikove meme va'erã”*

he'i Nhandejáry kwatia nhe'ê Nhandejáry ra'y Hesu-rehe.

¹³ Ha ndaha'úi gwembigwái kwéry-pe ha'e he'i:

“Egwapy katu xe yke-rehe, xe akatúa-koty. Xe orombopu'aka va'erã nde a'e'ýha-rehe.

Orombopu'aka peve eregwapy va'erã ereí-vy xe yke-rehe”*

he'i ramo Nhandejáry ndaha'úi hembigwái pegwarã. Gwa'ýry tee pegwarã nhe'ê ae upe
 va'e. ¹⁴ Ha Nhandejáry rembigwái yváy pygwa, jahexa e'ý va'e katu, hemimbou nhane
 pytygwõ haggwã voi ombou. Gwemiresende senderã-rehe ombou.*

2

Ndaipóri Cristo-rami nhane resendeharã

¹ Ndoikóiry Cristo-rami nhane resendeharã. Upéa-gwi ma'erã nrehendu poráiry nhe'ê
 porã nde-vy omombe'u va'ekwe. Iporã katu nahendu meme upe nhe'ê jajehesa rerova
 e'ý haggwã íxugwi, pono nhakanhy kanóa-rami y-rupi ojererosyry uka oho-vy va'e-rami.
² Yma araka'e yváy pygwa omombe'u araka'e nhane ramói amyri-pe. Nhandejáry nhe'ê
 omombe'u araka'e. Imbaraete he'i va'ekwe. Upéa-gwi inhe'ê-rehe opyrũ va'e gwive,
 inhe'ê renduse e'ýha va'e gwive, ogwereco asy va'ekwe íxupe Nhandejáry hembiapokwe-
 rehe. ³ Ha upe rire katu ojekwaa-ma oí-vy va'ekwe nhane resendeharã. Ha'eixagwa
 ndaipóri. Upéa-gwi nhapena e'ý ramo hese, ndoikói ni peteí nhane resendeharã. Heseve'ý
 ndaipóri nhane resende va'erã. Aipo ramo, mbava'e-rami po nhane resende va'erã.
 Nhanhehundipa-ma va'erã voi nhande kwéry. Ha Nhandejáry Hesu ha'e ae onhe'ê
 ojéhegwi omombe'u ranhe va'ekwe nhande-vy nhane resende haggwã. Ha henduhare he'i,
 “Anhetegwa tee voi” he'i va'ekwe nhande-vy inhe'ê-rehe. ⁴ Upe ramo Nhandejáry oikwaa
 uka ave nhande-vy inhe'ê anhetegwa voiha. Heroviapyrã-rupi hembiaipo porã va'ekwe.
 Jahexa e'ý va'e ohexa uka nhande-vy. Hexapyrã-rupi hembiaipo porã porã va'ekwe.
 Ha Nhe'ê Marangatu tee va'e katu peteí teí nhande reko rekorã ome'ê me'ê va'ekwe
 nhande-vy. Hemimbota-rupi ome'ê nhande-vy nhande reko rekorã jaikwaa haggwã inhe'ê
 anhetegwa voiha.

Nhande rekoha-rami oiko va'ekwe Hesu Cristo nhande rape járy ramo
 (Fp 2.5-9)

⁵ Áy oromombe'u-ta peẽ-my ko yvy rehegwa, Nhandejáry remimoatyrõmba va'erã. He'i
 ramo:

“Pende pu'aka va'erã xe amoatyrõmba va'erã-rehe”

ndaha'úi gwembigwái-pe he'i upéa. Kente kwéry-pe ae he'i va'ekwe:

“Nde pu'aka va'erã hese”

he'i va'ekwe yvy ipyahu va'erã-rehe. ⁶ Upéixa he'i Nhandejáry kwatia nhe'ê a-rami:

“Ore Járy, ore kwéry ndaha'úi ore tuvixave va'e. Ha ne mandu'a porã joty ore-rehe. Teko
 rei ramo jépe ore, erepena joty ore-rehe. ⁷ Sapy'a ete eremboeteve ne rembigwái
 kwéry yváy pygwa-pe. Ha upe rire katu ore momba'egwasu-ma va'ekwe, ore
 mbotuvixa mba'e ete voi va'ekwe. ⁸ Entéro mba'e jaryrã ore moingo-ma va'ekwe,
 he'i Nhandejáry-pe.”

Upéixa he'i Nhandejáry kwatia nhe'ê kente kwéry-rehe. Pejeapysaka katu upe Nhande-
 járy kwatia nhe'ê-rehe:

“Opamba'e jaryrã ore moingo-ma”

* 1:11-12 Sl 102.25-27 * 1:13 Sl 110.1 * 1:14 Ef 2.11-22; Cl 1.15-23

he'i voi Nhandejáry kwatia nhe'ê. Ha opamba'e katu entéro mba'e-pe gwive he'ise. Ha ko'anga katu ne'írã ojekwaa hexapyrã-rupi nhande entéro mba'e járy ramo jaikomaha. ⁹Ha upe nhande ramigwa Hesu katu, jahexa kwaa voi hese hekoha porã tee voiha. Sapy'a ete-ma Nhandejáry hakate'ýve gwembigwái yváy pygwa kwéry-rehe. Oipota ohasa asy Hesu nhande-rehe ha-py. Nhande rovasase voi Nhandejáry nhande rexakwaa rei-vy. Upéa-rehe ojejuka uka va'ekwe Hesu nhande-rehe ha-py. Nhande rekovia omano va'ekwe. Upéa-gwi áy omomba'egwasu jevy-ma íxupe Nhandejáry. “Nde ko tuvixave mba'e va'e voi” he'i Hesu-pe. Mburuvixagwasu-ramo ogwereco íxupe.* ¹⁰Iporã katu Nhandejáry ogwereco upéixa gwa'ýry. Entéro mba'e moingohaty voi Nhandejáry. Ojéupe gwarã omoingopa va'ekwe. Ogwenogwahése heru-vy ojéupe gwe'ýi kwéry hendive oiko porã hagwã heko tee-rupi. Upéa-gwi: “Iporã katu” he'i, “Erehasa asy nde eremboagwyje hagwã xe nhe'ê, ereiko hagwã kente kwéry resende teeha ramo, hape járy ramo ave, ereru hagwã xe-vy xe re'ýi kwéry-pe gwive” he'i Hesu-pe Nhandejáry. ¹¹Ha nhane mopoti va'e Hesu Ru, ha'e Nhandejáry voi. Nhane mopoti rirẽ nhande Ru ramo oiko ave Nhandejáry. Hesu Ru nhande Ru voi ave. Upéa-gwi Hesu Nhandejáry ra'y tee ramo jepe, “Xe ryvy kwéry, xe reindy kwéry” he'i joty va'erã nhande-rehe kwéry. Nanhamotiry nhande Ryke'y-pe. Nahakate'ýiry ójehe. “Xe ryvy kwéry, xe reindy kwéry” he'i ramo nhande-vy, ndojehekorenofiry nhandéhegwi. ¹²Upéixa he'i Hesu nhe'ê kwatia-rehe onhemoi va'ekwe: “Amombe'u-ta nde rehegwa xe ryvy kwéry-pe. Atýra-py aporahéi-ta oromboete-vy”* he'i ójehe Hesu Nhandejáry-pe. ¹³Upéi he'i jevy:

“Ajerovia-ma aĩ-vy va'erã hese”

he'i Nhandejáry-rehe Hesu. Upéi he'i jevy:

“Nhandejáry ra'y kwéry, gwĩ omohangareko uka xe-vy va'e katu amoirũ-ma xe”*

he'i va'ekwe ohai-vy Hesu nhe'ê kwatia-rehe. ¹⁴Ha nhande kwéry katu, Nhandejáry reko rupi e'ý jaiko. Nhandejáry reko e'ý nhande jareko. Teko rei voi nhande. Ha, “Xe ryvy” he'i joty nhande-vy Hesu. He'ýi kwéry voi nhande. Upéa-gwi ha'e katu oiko-ma ave nhande rugvy re'ýi ramo. Ojejuka ukase omosẽ hagwã anháy ruvixa pono anháy ipu'aka gwĩ omano va'erã-rehe, imongyhyje-vy íxupe kwéry. ¹⁵Oresendese katu gwĩ ójehe imytu'e'ý va'e-pe gwive. Imitã gwive ndaipu'akáiry ójehe ojei hagwã anháy ruvixa po-gwi. Upeixagwa kente-pe oresendese voi. ¹⁶Pejeapysaka katu xe nhe'ê-rehe. Gwĩ ójehe ipu'aka e'ý va'e-pe, Hesu oipytygwõ voi. Ndaha'úi yváy pygwa hemipytygwõ va'e. Nhande kwéry, Abraão remiarirõ joapyri pyri va'e-pe ae oipytygwõ. ¹⁷Nhane pytygwõse-gwi, nhande rekoha-ramima oiko va'ekwe. Nhande reko ra'ãmba voi va'ekwe. Jaikoha-ramima ha'e oiko ave voi va'ekwe. Nhande-vy ojehu va'e gwive, ojehu ave íxupe. Nhande-rami oiko. Tyvýry kwéry-rami, heindy kwéry-rami ha'e oiko-ma va'ekwe. Oikose va'ekwe nhande-vy gwarã pa'i ruvixagwasu-rami, nhande poriahuverekoharã. Hese jajerovia va'erã oiko va'ekwe pa'i ruvixagwasu-rami. Oipota-gwi Nhandejáry nhane renogwahẽ íxupe oiko va'ekwe pa'i ruvixagwasu-rami. Ha'e omboykese nhandéhegwi nhane rembiapo vai va'ekwe Nhandejáry ndive nhande joja hagwã jaiko-vy. ¹⁸Ha'e katu nhande-rami ojerereko asy va'ekwe ombojevavse mo'ã íxupe-gwi anháy ruvixa. Upéa-gwi áy ha'e nhane pytygwõ kwaa voi. Ha'e-rami ramo, nhane mbojevavy javyse jevy ramo anháy, ha'e nhane pytygwõ kwaa voi pono jajevavy.

3

Hesu onhemboeteve va'e Moisés amyrĩ-gwi

¹Áy, xe re'ýi kwéry, Nhandejáry re'ýi voi peẽ. Pende reko marangatu va'e. Hemienói voi peẽ yváy-py peiko hagwã. Pene arandu kena peikwaa hagwã Hesu rehegwa nhe'ê. Ha'e Nhandejáry remimbou pa'i ruvixagwasu-rami. Upéa rehegwa nhamombe'u jaiko-vy. ²Hembiaporã Nhandejáry remime'égwe ojapopa voi. Ndaipóri ojapo e'ý va'e. Ha'e-rami Moisés amyrĩ ave hembiapo gwive ojapopa, Nhandejáry re'ýi-rehe omba'apo-vy.* ³Ha,

* 2:9 Sl 8.4-6 * 2:12 Sl 22.22 * 2:13 Is 8.17-18 * 3:2 Nm 12.7

“Nthane moingovehare nhamboeteve voi hemimoingove-gwi” ja'e. Upéixa ramo, iporã katu nhamboete Moisés-pe. Ha Hesu katu iporã nhambotuvixa eteve íxupe. ⁴Ndoikói hemimoingove va'e omoingovehaty e'ý reheve. Ha enterove va'e moingovehaty va'e voi Nhandejáry. ⁵Ha Moisés Nhandejáry rembigwái ramo rei oiko va'ekwe. Ojapopa va'ekwe ha'e gwembiaporã Nhandejáry re'ýi-rehe omba'apo-vy. “Emombe'u katu atýrapy eremombe'u hagwã ha'e va'erã” he'i va'ekwe íxupe Nhandejáry. ⁶Ha Cristo katu ta'ýry tee voi. Ojapopa íxupe he'i va'ekwe Nhandejáry, Nhandejáry re'ýi kwéry-rehe onhangareko-vy. Nhandejáry re'ýi tee voi nhande kwéry ave. Nhande kyhyje e'ý ramo, Hesu ogwahê jevytaha javy'a meme ramo nhaha'arõ tee-vy, he'ýi tee voi nhande.

Aníke pejehesa rerova teĩ Cristo-gwi

⁷Pejeapysaka katu Nhandejáry kwatia nhe'ẽ-rehe, Nhe'ẽ Marangatu tee va'e he'i va'ekwe-rehe pejeapysaka. Yma he'i va'ekwe a-rami voi:

“Ko'áy Nhandejáry nhe'ẽ pependu ramo, ⁸ani ijapysa e'ý va'e-rami peiko teĩ. Yma va'ekwe pene ramoigwasu kwéry yma gware nohenduséry va'ekwe Nhandejáry nhe'ẽ. Tekwaty e'ý-my oiko jave, ombovyte vyte va'ekwe Nhandejáry-pe. Ani peiko teĩ ha'e kwéry heko-rupi”

he'i myamyri pene ramoigwasu kwéry-rehe.

⁹“Upe-py tekwaty e'ý-my xe mbovyte vyte va'ekwe pene ramói nhagwe va'ekwe: Nnahendu e'ý ramo jepe, ndogweropoxí arã nthane rembiapo Nhandejáry, he'i mo'ã xe-rehe hikwái” he'i. “Quarenta ro'y xe rembiapo porã porã rexahare voi pene ramói. Hexapyrã-rupi xe rembiapo porã ramo jepe, xe mbovyte vyte xe rendu e'ý-vy. ¹⁰Upéa-rehe ha'e xejeupe, Areko asy va'erã íxupe kwéry hembiapokwe-rehe. Xéhegwi ojehesa rerova meme oiko-vy. Ndosohéi tape porã-rupi. Tekoha porã-rehe, Tekoha porã, nde'íry. Aipo ramo, amoingo asy va'erã íxupe kwéry hembiaporehe. ¹¹Upéixa ramo ha'e ete-ma xejeupe, Ndoptyavéi-ma va'erã xe aime ha-py xe ndive opytu'u hagwã. Areko asy va'erã íxupe kwéry hembiaporehe, ha'e xejeupe, he'i Nhandejáry nthane ramói amyri kwéry-rehe.”*

Upéixa he'i Nhandejáry kwatia nhe'ẽ nthane ramoigwasu-rehe.* ¹²Upéixa ramo, xe re'ýi kwéry, “Xáke” peje katu pendéjehe. Ndaipotái pene pa'ũ-my hekoha vai va'e, herovia e'ýha pene pa'ũ-my ndaipotái. Upe va'e ojehesa rerova arã Nhandejáry hekove tee va'e-gwi. Nhande reko irũ-gwi ojehesa rerova va'erã. ¹³Aipota ae penhemonhe'ẽ nhe'ẽ meme ojúpe: “Ani peiko teĩ ijapysa e'ý va'e-rami. Ani pene mbotavy teĩ anháy pene mbojevavy uka hagwã” peje katu ojúpe. Ko'ẽ ko'ẽ penhemonhe'ẽ ojúpe peiko-vy. Onhe'ẽ vyteri jave nhande-vy Nhandejáry, “Áy voi” peje. “Áy voi pependu katu ko'áy omombe'u va'e” peje katu ojúpe. ¹⁴Áy Cristo re'ýi voi nhande. Are-ma jajerovia tee jaiko-vy hese. Ha ndajajerevéi ramo íxugwi nhamano peve, he'ýi teerã voi jaiko íxupe nhande. Ndajajehesa rerova ukái ramo íxugwi, jatopa peve íxupe, he'ýi teerã voi jaiko íxupe nhande. Upéa-gwi aníke penhemonhe'ẽ e'ý teĩ ojúpe. ¹⁵A-rami he'i Nhandejáry kwatia nhe'ẽ:

“Ko'áy, Nhandejáry nhe'ẽ pependu ramo, ani kena enhembohesae sae teĩ inhe'ẽ rendusere'ý-vy. Yma va'ekwe myamyri pene ramói nohenduséry va'ekwe Nhandejáry nhe'ẽ. Ani peẽ peiko teĩ heko kwéry-rupi”*

he'i Nhandejáry kwatia nhe'ẽ. ¹⁶Upéa kwatia nhe'ẽ-rehe pejeapysaka katu. Kiva'e po yma gware Nhandejáry nhe'ẽ renduse e'ýha, amombe'u-ta peẽ-my. Gwí Egito yvy-gwi Moisés rembierahakwe gwive voi. ¹⁷Upéi kiva'e rembiapo yma gware po Nhandejáry rembiereko asy quarenta ro'y va'e amombe'u-ta peẽ-my. Gwí ojevavy va'ekwe voi. Omano hagwe-py upe-py rei opyta va'ekwe hetekwe tekwaty e'ý-my. ¹⁸Upéi kiva'e-pe po, “Ndapeikovéi-ma va'erã xe aime ha-py xe ndive petongea hagwã” nde'i reíry, amombe'u-ta peẽ-my. Inhe'ẽ renduse e'ýha-pe he'i upéa. ¹⁹Upéixa ramo ma'erã po ndoikovéi-ma Nhandejáry ndive, jaikwaa-ma voi. Ndogweroviái-gwi íxupe ndoikóiry hendive.*

* 3:11 Nm 14.22-23; Jd 5

* 3:11 Sl 95.7-11

* 3:15 Sl 95.7-8

* 3:19 Nm 14.1-35

4

¹Upéa-gwi nhanhangareko porā katu nhandéjehe. Nhandu katu Nhandejáry nhe'ê: “Peiko va'erā xe aime ha-py xe ndive pepytu'u hagwā” he'i ete va'ekwe nhande-vy Nhandejáry. Upéa nhe'ê imbarae joty. Upéa-gwi xáke, ani erejere tei íxugwi. Nhanhangareko porā katu nhandéjehe jarovia tee hagwā. Nndoroipotái he'i para'e pende-rehe: “Kóa ndoikovéi-ma va'erā Nhandejáry ndive hendive opytu'u hagwā. Upéa ndoiko mo'avéi-ma va'erā hendive” upéa ndoroipotái he'i pende-rehe kwéry. ²Yma gware-pe omombe'u va'ekwe upe nhe'ê porā. Áy omombe'u hagwe-rami íxupe, omombe'u nhande-vy ave. Yma gware-pe omombe'u rei nipo ra'e. Ndogweroiái araka'e hemimombe'u. ³Ha nhande kwéry jarovia va'e katu jaiko-ma va'erā Nhandejáry ndive japytu'u hagwā hendive. Upéixa he'i Nhandejáry kwatia nhe'ê inhe'ê rendu e'yhare-rehe: “Ha'e ete-ma xejéupe. Ha'e kwéry ndopytái va'erā xe aime ha-py xe ndive otongea hagwā.

Areko asy va'erā íxupe, ha'e xejéupe.”*

Upéixa he'i Nhandejáry kwatia nhe'ê yma gware-rehe. Yma ete araka'e japytu'u hagwā ojapopa ramo jepe Nhandejáry, he'i joty upéa. Ojapo rire ko mundo, ojapopa-ma voi. Ndaiporivéi-ma ojapo va'erā. ⁴Oi Nhandejáry kwatia nhe'ê he'i va'e a-rami sete aryha-rehe:

“Sete aryha-py opytu'u-ma Nhandejáry omba'apoha-gwi”*

he'i Nhandejáry kwatia nhe'ê. ⁵Upéi he'i jevy Nhandejáry kwatia nhe'ê:

“Ha'e kwéry naxe moirūi va'erā voi xe ndive otongea hagwā”*

he'i onhe'ê rendu e'yhare-rehe. ⁶Upéixa gwí upe nhe'ê porā rendu ranhehare rei katu, nomoirūi-ma Nhandejáry-pe opytu'u hagwā hendive. Ndogweroiái-gwi araka'e nomoirūiry íxupe. Ha oi joty inhirurā, “Iporā pepytu'u Nhandejáry ndive” he'i va'erā íxupe oi joty. Upéa jaikwaa voi. ⁷Nhandejáry omoi jevy-ma nhande-vy japytu'uha óra. “Ko'ây” he'i-gwi Davi amyri Nhandejáry nhe'ê-py, jaikwaa voi. Upéa-gwi oi joty opytu'uharā. Ha Nhandejáry nhe'ê renduse e'yhare omano are rire katu, omombe'u va'ekwe nhande-vy Davi amyri Nhandejáry nhe'ê-py, kwatia-rehe omoi-vy onhe'ê:

“Ko'ây inhe'ê pehenduru ramo, ani ijapysa e'y va'e-rami peiko tei.”*

Upéixa he'i va'ekwe Davi Nhandejáry nhe'ê-py. Upéa nhe'ê amombe'u kuri peẽ-my. ⁸Áy oi he'i va'erā mo'á: “Josué amyri ko omombytu'u-ma va'ekwe nhane ramoigwasu kwéry-pe” he'i va'erā mo'á. Ha nomombytu'úiry íxupe kwéry va'ekwe. Josué omombytu'u ramo íxupe kwéry ra'e, “Amoi jevy-ta pepytu'u hagwā óra” nde'íry arā ra'e Nhandejáry.*

⁹Upéa-gwi oi joty nhande Nhandejáry re'yí pegwarā japytu'u hagwā ha'óra nhamoirūi hagwā Nhandejáry-pe japytu'u meme hagwā. ¹⁰Nhandejáry-pe nhamoirūi va'e gwive japytu'u hagwā nanhamba'apovéi-ma va'erā. Nhandejáry opytu'u hagwe-rami ave japytu'u-ma va'erā nhande. ¹¹Aníke nhande kaigwe tei. Nhamoirūi katu Nhandejáry-pe nhane kyre'y reheve, japytu'u hagwā hendive. Aníke nhande nhaheko ra'á tei ni petei yma gware inhe'ê renduse e'y va'e-pe. Ha'e kwéry heko-rupi jarovia e'y ramo katu, ndikatúí nhamoirūi Nhandejáry-pe japytu'u hagwā hendive. Nhanhehundi arā. ¹²Ha Nhandejáry nhe'ê tekove oikoha-rami oiko. Opa-rupi oho. Okanhy va'e gwive ombojekwaa uka. Ha kyse hāi joja va'e katu, nhande kutupa voi. Nhande kutu nhande rete gwive, nhande py'a gwive jepe nhande kutu ave. Upéixa upe kyse-rami Nhandejáry nhe'ê. Ombojekwaa ukave kave entéro nhande py'apy-py oi va'e gwive. Ndaipóri nhande py'a-py, nhande rete-rehe ave okanhy va'e íxugwi. Ojohupa nhande rete-rehe nhande py'a-rehe ave. Pya'e ohexa kwaa nhande-rehe nhande rekoha. Jajapose va'e ave oikwaapa voi. Ndikatuí mba'eva okanhy íxugwi. ¹³Hemimoingove gwive ojekwaapa Nhandejáry resa-py. Ha'e katu nhane monhe'ê uka va'erā gwovagwy-py, nhane monhe'ê uka va'erā petei tei nhande kwéry-pe. Upéa-gwi nhanhangareko porā katu nhandéjehe ani hagwā nhanduse e'y inhe'ê. Jarovia tee joty inhe'ê.

* 4:3 Sl 95.11 * 4:4 Gn 2.2 * 4:5 Sl 95.11 * 4:7 Sl 95.7-8 * 4:8 Dt 31.7; Js 22.4

Pa'i ruvixagwasu-rami voi Hesu

¹⁴ Ha Hesu katu Nhandejáry ra'y tee voi. Ha'e ohasa va'ekwe oho-vy yváy-py. Nhande-rehe koty imarangatu ete va'e-py oikaha-rami pa'i ruvixagwasu, oike ave yváy-py Hesu. Nhande-rehe oho upe-py pa'i ruvixagwasu-rami. Upéa-gwi ani pemombe'u e'ý teí atýrapy Hesu rehegwa nhe'ê. Perovia porã tee katu íxupe. ¹⁵ Ha'e onhangareko porã nhande-rehe pa'i ruvixagwasu-rami. Oiko ramo va'ekwe ko yvy-py, nhande-rami oiko va'ekwe. Nhande mbojevavyseha-rami ave, ombojevavyse mo'ã va'ekwe oiko-vy íxupe Satanás. Nhande-rami jepe oiko va'ekwe, ndojevavýi joty voi oiko-vy va'ekwe. Upéa-gwi hape-gwi nhande resa rerova ukase ramo, nhande poriahuvereko kwaa voi ha'e. Jahasa asy jave, nhande, ha'e imandu'a gwekokwe-rehe nhande poriahuvereko-vy. ¹⁶ Upéa-gwi nhamoirũ katu Hesu-pe. Ha'e ogwapy haty-py ogwapy oĩ-vy. Nhatĩ e'ý reheve nhamoirũ íxupe nhande rexakwaa reihaty-pe. Nhande poriahuvereko va'erã. Nhaikotevê ramo, ha'e nhane pytygwõ va'e voi.

5

¹ Ko'ánga amombe'u-ta peẽ-my pa'i ruvixagwasu rehegwa nhe'ê Hesu-pe pemoirũ hagwã petĩ e'ý reheve. Nhane pa'ũ-gwi ojeporavo pa'i ruvixagwasurã. Upéi nhamoĩ íxupe nhande rekovia omba'apo hagwã Nhandejáry-pe. Jaipota ome'ê Nhandejáry-pe hemimbota. Jaipota ome'ê íxupe ijukapyrã pono nhande rereko asy, hekovia omboyke hagwã nhandéhegwi nhane rembiapo vaikwe. ² Upe pa'i ruvixagwasu ko yvy pygwa nhande-rami ojevavy va'e. Ohekombo'ese íxupe ave anháy ohasa rerova uka hagwã ójehe. Nhande kwéry-rami oiko-gwi, oiporiahuvereko kwaa ojevavy va'e-pe. Hi'arandu e'ý va'e-pe ae ogwerekore porã. ³ Upéixa ramo ome'ê-ta ramo Nhandejáry-pe nhane rembiapo vaikwe-rehe ijukapyrã, tome'ê ranhe ave ójehe ójehe gwarã.

⁴ Ndoikói avave pa'i ruvixagwasu ramo ojéhegwi rei. Onhemboete ukase-gwi rei ndoikói. Ohenói ae íxupe Nhandejáry pa'i ruvixagwasu ramo oiko hagwã. Upéixa voi ohenói va'ekwe myamyri Arão pa'i ruvixagwasu oiko hagwã.*

⁵ Upéixa ete Cristo ave katu Nhandejáry remienói voi. Ndoikói pa'i ruvixagwasu-rami onhemboete ukase-gwi. Nhandejáry remimoingo ae voi ha'e. Upéixa he'i Cristo-rehe Nhandejáry kwatia nhe'ê:

“Nde ko xe ra'y tee voi. Ko'áy katu amombe'u-ta enterovéa-pe: Ko va'e xe ra'y tee voi”* he'i Nhandejáry kwatia nhe'ê. ⁶ Upéi he'i jevy Nhandejáry kwatia nhe'ê:

“Nde ko ereiko meme va'erã pa'i ruvixagwasu-rami. Myamyri Melquisedeque reko-rupi ereiko va'erã opa e'ý reheve”*

he'i Nhandejáry kwatia nhe'ê. Upéixa ramo onhe'ê-py mante ndoikóiry voi pa'i ruvixagwasu-rami. Nhandejáry remimoingo ae. ⁷ Oiko jave va'ekwe nhande-rami ko yvy ári, ojerure rure Nhandejáry-pe onhe'ê omondo mondo-vy. Hasê jave ojerure íxupe. Nomanoséi-gwi ojahe'o-vy ojerure ojéupe oresende kwaa va'e-pe. Oração ojapo ramo, ohendu inhe'ê Túvy. Gwu remimbota ojapose-gwi, ohendu voi gwa'yry nhe'ê ave Túvy. Nomanoséi jepe, ojapose joty Gwu-pe hemimbota. ⁸ Ta'yry jepe, ohasa asy oiko-vy. Ohasa asy jave Gwu reko rupive pive-ma oiko, Gwu remimbota gwive ojapopa ete-ma oiko-vy. ⁹ Ha upe rire katu Nhandejáry he'i va'ekwe íxupe onhemboagwyje rire, oiko-ma inhe'ê renduha gwive resendehearã. Nhane moingoveharã oiko, hendive jaiko meme ete hagwã. ¹⁰ Ha'e Nhandejáry remimoĩ pa'i ruvixagwasu-rami oiko hagwã, Melquisedeque reko-rupi oiko hagwã hemimoĩ voi.

Penhangareko katu pendéjehe pono pejehesa rerova uka
(1 Co 3.1-2; 14.20; Ef 4.14-15)

¹¹ Heta oĩ Melquisedeque rehegwa nhe'ê oromombe'u va'erã. Ha ko'ánga katu hasy xe-vy aikwaa uka hagwã peẽ-my Melquisedeque rehegwa nhe'ê, napene arandu porãvéiry-gwi. ¹²⁻¹⁴ Are-ma aikwaa uka uka mo'ã peẽ-my aiko-vy. Ma'erã ndapeikwaa araka'e. Ma'erã

* 5:4 Êx 28.1 * 5:5 Sl 2.7 * 5:6 Sl 110.4

ndapeikwaa ukáí araka'e pende re'yí kwéry-pe. Ha ko'ánga katu onhembo'e e'y va'e-rami peiko-ma joty. Peê, peikotevê jevy pene mbo'eharâ-rehe onhepyrû jevy pene mbo'e-vy Nhandejáry rehegwa nhe'ê-py. Nhane mitã'i ho'u va'e kamby. Kakwaa va'e remi'urã ndo'úi. Upéixa mitã'i reko-rupi oiko va'e, kamby ho'u va'e-rami voi oiko. Ndoikwaái vyteri tekoha porã, ivai para'e iporã para'e nde'íry oiko-vy voi ha'e. Ha okakwaa va'e katu kakwaa va'e rembi'u ho'u kwaa voi. Upéixa ete hi'arandu va'e kakwaa va'e rembi'u ho'u va'e-rami oiko. Areve-ma oiko-gwi arandu-rupi, inharandu porãve-ma oikwaa hagwã tekoha porã, iporã para'e, ivai para'e oikwaa porãmba voi ha'e. Ha peê katu kamby ho'u verei va'e vérami joty peiko. Mitã hi'arandu e'y va'e-rami joty peiko.*

6

¹²Upéa-gwi anive nhanhomb'o'e mbo'e gwí ojerovia ramo va'e pegwarã nhe'ê-rehe. Nhambo'e mbo'e hagwe-rami jevy nome'ëiry voi nhanhomb'o'e jevy. Penhomb'o'eve eve ae katu jaikwaa porãve rãve rei hagwã nhande-vy gwarã nhane arandu porãve hagwã. Ne'írã ogwerovia tee va'e-pe: "Pejerovia katu Nhandejáry-rehe" ja'e. "Perova katu pende rekoha tujakwe" ja'e íxupe kwéry. Jaikwaa uka íxupe nhanhemongaraiha. Inhakã ári nhande po nhamoíha jaikwaa uka ave íxupe. "Oikove jevy va'erã omano va'ekwe" ja'e ave íxupe. "Ojapo japo va'ekwe-rehe ogwereco va'erã enterovéa-pe Nhandejáry" ja'e ne'írã ogwerovia tee va'e-pe. ³Áy jaikwaa porãve rãve ae katu nhande-vy gwarã nhe'ê nhane arandu porãve hagwã nhande. Ha Nhandejáry nhane mo'aranduse ramo katu, nhahendu va'erã upéa nhe'ê. ⁴Pejeapysaka porã katu xe nhe'ê-rehe. Oí omo'arandu va'e íxupe mo'ã, arakatu-py oiko va'e-rami mo'ã oiko. Nhandejáry remime'ê ome'ê va'ekwe íxupe. Ipy'a-py Nhe'ê Marangatu tee va'e oiko-ma va'ekwe. Áygwa avave ohexa e'y va'e Cristo rembiapo porã rexahare voi. "Iporã porã nipo ra'e Nhandejáry nhe'ê" he'i ojohu porã-vy. Upéa rehegwa Cristo rape-gwi ova ramo, ndikatuvéi-ma jarova uka jevy íxupe hekoha. Ojere-ma ramo Nhandejáry ra'y-gwi, yma ogwereco hagwe-rami jevy ogwereco Cristo-pe. Okurusugwasu-rehe ojuka íxupe va'ekwe-rami oiko íxupe upe íxugwi ojere va'e. Ojapose va'e ojapo jevy Cristo-rehe. Atýra-py omotí íxupe onhembohory-vy hese. ⁷Áy amombe'u-ta peê-my arandu rehegwa nhe'ê temitý rehegwa nhe'ê-rami. Oime yvy. Upepy oky oky rire omohu'ũ porã íxupe. Upéi omohenhói porã temitý ijáry-pe. Upéa yvy Nhandejáry omoporãve rãve upe gwembiapokwe. ⁸Ha omohenhói e'y ramo katu ijáry-pe, okakwaa henhói-vy ramo jai nhuatí reheve, onhemitý rei ra'e. Ojaty hagwe-rehe rei opyta. "Anive erembohoky teí" he'i-ta para'e íxupe Nhandejáry. Ndoipotavéi henhói. "Tata-py ohapy va'erã" he'i-ta para'e íxupe Nhandejáry. ⁹Upéa nhe'ê amombe'u-ma peê-my penhangareko porã hagwã pendéjehe tape porã-gwi pejehesa rerova e'y hagwã. Ha xe re'yí kwéry, ahexa kwaa porã-ma pende-rehe pende rekoha porã: "Ndovaléi ojáry-pe" nda'e mo'ái joty pende-rehe. "Ohovasa porã-ma va'erã íxupe Nhandejáry" ha'e-ta ae joty pende-rehe. "Ohepy-vy oresende-ma va'erã íxupe" ha'e-ta xe pende-rehe. ¹⁰Hekoha porã voi Nhandejáry. Ndahesarái mo'ái voi pene rembiapo porã-gwi. Pehayhu íxupe peiko-vy. Pehayhu-gwi peipytygwõ va'ekwe heroviaha kwéry-rami. Ko'ánga ete peve peipytygwõ peiko-vy íxupe kwéry. Upe pene rembiapo-gwi ndahesaráiry va'erã Nhandejáry. ¹¹Aipotã peteí teí pene kyre'y peipyhy hagwã tape porã Hesu ou jevytaha áry peve. Ndapejeréi ramo íxugwi, pehexa va'erã pene remilha'arõ Hesu ou jevy ramo. ¹²Ndaipotái pene ate'y. Oí ogwerovia ku'a ku'a e'y va'e. Ojere e'y reheve ogwerovia tee oiko-vy. Ome'ê va'erã íxupe Nhandejáry, "Ame'ê va'erã peê-my" nde'i reíry va'ekwe. Upe va'e rehegwa tapehekora'ã katu íxupe. Upeixagwa reko-rupi ae tapeiko katu.

He'i ete hagwe-ramima ojapo voi Nhandejáry

¹³Yma va'ekwe Nhandejáry, "Orohovasa va'erã" nde'i reíry va'ekwe Abraão-pe. "Xe ha'e hagwe-ramima ajapo va'erã" he'i ete va'ekwe. Ha Nhandejáry-gwi ndaipóri tuvixave va'e. Upéa-gwi ha'e ae gwéry-py "Orohovasa va'erã" he'i ete va'ekwe Abraão-pe.

¹⁴"Nda'e reíry-ta nde-vy"

* 5:12-14 Gn 22.16-17

he'i.

“Orohovasa va'erā. Ne remiarirō joapyri pyri ambohe'ýi va'erā”

he'i ete Abraão-pe. ¹⁵Upéi oha'arō tee tee va'ekwe Nhandejáry nhe'ē. Oha'arō rire oiko va'ekwe íxupe Nhandejáry he'i hagwe-rami. ¹⁶Ha nhande kwéry katu, “Ajapo va'erā katu xe ha'e hagwe-rami” ja'e ramo, imbarateve va'e réry ae jaiporu. “Héry-py ajapo va'erā voi xe ha'e hagwe-rami” ja'e. Upéixa ja'e ramo, nanhamombe'u mbe'u reíry ojóupe. ¹⁷Upéixa ete, “Peē-my gwarā ame'ē va'erā peē-my” he'i ramo Nhandejáry, oikwaa uka porāseve nhande-vy okambia e'ýha onhe'ē. Upéa oikwaa uka porāve rāve haggwā nhande-vy, “Naxe nhe'ē reíry, imbarate voi xe nhe'ē. Xe réry-py xe ajapo va'erā xe ha'e hagwe-rami” he'i. ¹⁸Upéixa ramo Nhandejáry, “Xe ha'e hagwe-rami ajapo va'erā” he'i ramo “Xe réry-py ajapo va'erā” he'i ramo ave ha'e, ndajapúry voi. Inhe'ē apu e'ý va'e ha'e. Nhande mbopy'agwapy-ma Nhandejáry. Hesendeharā oí ha-py pya'e oripara haggwā ohovy ojapura va'ekwe-rami voi nhande. “He'i hagwe-rami ojapo va'erā” ja'e kwaa ojóupe nhamoirū-gwi íxupe. Upéixa ja'e omombaraete-gwi nhande py'a. ¹⁹⁻²⁰Inhe'ē nhaha'arō tee jave, imbarate voi nhande py'a nhande kyhyje e'ý reheve. Nhande py'amirī e'ý reheve nhaha'arō inhe'ē. Ndajajehesa rerova ukái inhe'ē-gwi. Ipokatu voi ha'e inhe'ē, ijapu e'ý va'e voi ha'e. Nonhekambiáiry voi inhe'ē. Ko vvy-py oí va'ekwe Nhandejáry koty py-py ao-py ijopiapyre. Tuvixa ijopiaha nhande jokoharā pono jaike rei koty imarangatu ete va'e onhegwahē e'ý ha-py. Áy katu nhagwahē va'erā jaha-vy Nhandejáry ae oiko ha-py. Ndaiporivéi-ma nhande jokoharā. Upe pete ogwahē ranhe va'ekwe Hesu ohovy nhande-rehe ha-py. Upe pete oho-ma oiko haggwā pa'i ruvixagwasu-rami. Melquisedeque reko-rupi oiko meme va'erā pa'i-rami nhande-rehe ha-py.

7

Melquisedeque amyri rehegwa nhe'ē

¹Áy amombe'u-ta peē-my Melquisedeque amyri rehegwa nhe'ē. Oiko araka'e Salém tetā ruvixagwasu ramo. Pa'i ramo oiko araka'e. Nhandejáry Tupāgwasu rembigwairā oiko araka'e. Ha'e ohogwaiti va'ekwe Abraão amyri-pe. Abraão ojuka ra'e gwí mburuvixagwasu ipoxy va'e-pe. Ha upéi katu ojuka rire upe mburuvixa ipoxy va'e-pe, ou jevy-ma gwóga-py. Upe-ma ramo gwóga-koty ou jevy-ma ramo, ou ohogwaiti íxupe va'ekwe Melquisedeque. Upéi he'i íxupe: “Nhandejáry tande rovasa” he'i Abraão-pe. ²Upe ramo Abraão omboja'o ja'o mburuvixa ijukapyre mba'ekwe gwive ome'ē haggwā Melquisedeque-pe íxupe gwarā. Décima parte ome'ē íxupe. Cada dez-gwi oipe'a petei ime'ē-vy íxupe nueve oheja haggwā ojéupe. Upéixa décima parte he'i va'e ome'ē íxupe. Upe íxupe ome'ē ranhe va'e héry ranhe voi Melquisedeque. Melquisedeque he'ise nhande ruvixagwasu hekoha porā va'e. Melquisedeque oiko araka'e Salém tetā ruvixagwasu ramo. Nhande ruvixagwasu nhane mbopy'agwapyhaty voi-pe he'ise upéa héry. ³Ndajaikwaái kiva'e po araka'e túvy isy ave. Kiva'e po araka'e hembypy nomombe'úi Nhandejáry kwatia nhe'ē. Ndajaikwaái ave mba'e óra po oiko araka'e, araka'e po omano ave ndajaikwaái voi. Ha'e oiko meme pa'i ramo, opa e'ý reheve oiko ha'e. Nhandejáry ra'y tee Cristo rekoha-rupi oiko voi. ⁴Pejeapysaka porā katu xe nhe'ē-rehe. Gwembieraha va'e omboja'o Abraão heraha-vy mburuvixa amyri mba'ekwe rehegwa ome'ē haggwā íxupe. Décima parte ome'ē íxupe gwarā. Nhandejáry pegwarā-ma ome'ē íxupe. Ha Abraão nhane rehbypy voi, ha'e tuvixa mba'e voi. Ha Melquisedeque-pe katu ome'ē joty íxupe gwarā hembieraha-gwi. Upéa-gwi Melquisedeque tuvixave va'e nipo ra'e íxugwi.

⁵Áy amombe'u-ta peē-my Levi amyri remiarirō joapyri pyri rehegwa nhe'ē. Ha'e kwéry ave Abraão amyri remiarirō joapyri pyri voi. Ha'e kwéry pa'i ramo oiko-ma va'ekwe. He'i va'ekwe gwe'ýi kwéry-pe: “Moisés amyri nhe'égwe pejapo katu. Peiko katu hemimombe'ukwe-rupi. Peme'ē katu ore-vy pene remimboja'okwe ore-vy gwarā” he'i gwe'ýi kwéry-pe. He'ýi Abraão remiarirō joapyri pyri ramo jepe, he'i joty gwe'ýi-pe upe nhe'ē. ⁶Ha Melquisedeque katu ndaha'ái upe pa'i kwéry re'ýi, ndaha'ái Levi remiarirō kwéry va'e. Ndaha'ái, “Xe orohovasa va'erā” he'i Nhandejáry íxupe va'e

Abraão-rami. Pa'i kwéry re'ýi ndaha'úi ramo jepe, Moisés amyri nhe'ê-py gwemimboja'o ome'ê íxupe va'e e'ý ramo jepe, ome'ê joty íxupe Abraão gwemimboja'o. Décima parte he'i va'e ime'ê-vy omboja'o joty íxupe. "Nhandejáry tande rovasa katu" he'i ave Abraão-pe. ⁷Ha "Nhandejáry tande rovasa" he'i va'e tuvixave va'e gwembihovasa-gwi. Gwembihovasa va'e-gwi tuvixave va'e ohovasa va'e. Upéa nhe'ê ndaipóri "Ijapu" he'i va'erã hese. Anhetegwa voi upéa nhe'ê. Upéa-gwi upe myamyri Melquisedeque tuvixave va'e voi Abraão amyri-gwi. ⁸Pejeapysaka porã jevy katu xe nhe'ê-rehe. Upe "Peme'ê katu ore-vy pene remimboja'o ore-vy gwarã" he'i va'ekwe, nhande-rami oiko va'ekwe omano va'erã voi. Ha upe mburuvixagwasu katu, Abraão ome'ê va'ekwe íxupe va'e hemimboja'okwe, upe va'e oikove voi. "Omano-ma va'ekwe" nde'íry hese Nhandejáry kwatia nhe'ê. ⁹⁻¹⁰Ha myamyri pa'i Levi-pe, hemiarirõ-pe ave katu ome'ê me'ê íxupe va'ekwe he'ýi gwemimboja'okwe. Ha Levi katu, upe mburuvixagwasu-pe ome'ê va'e-rami ave. Tamoigwasu Abraão ohogwaiti ramo upe mburuvixa Melquisedeque, ome'ê va'ekwe Melquisedeque-pe gwemimboja'okwe. Upéixa ramo ne'íra vyteri oiko ramo jepe, hemiarirõ Levi ome'ê joty mburuvixa-pe. "Tamói ome'ê ramo, ome'ê va'e-rami ave" ja'e Levi-rehe.*

¹¹Ha Nhandejáry omoingo va'ekwe Levi amyri hemiarirõ kwéry-pe ave pa'i kwéry ramo, judeu rembypy oiko porã hagwã ha'e gwekoha-rupi. Upe pa'i kwéry oipytygwõ tygwõ rei judeu rembypy-pe. Ha nonhemboagwyjéi va'ekwe Nhandejáry he'i va'ekwe íxupe. Moisés remimombe'ukwe tekoha-rupi rei oiko ramo, nomboagwyjéi va'ekwe Nhandejáry nhe'ê oiko-vy. Heroagwyjeharãgwe. Omboagwyje ramo ra'e, ndojekwaavéi arã ra'e pa'i ambue Melquisedeque rekoha-rupi oiko-vy ra'e. Oiko meme arã ra'e gwĩ pa'i kwéry Levi remiarirõ Arão amyri rekoha-rupi.* ¹²Ha gwĩ pa'i kwéry omba'apo rei va'ekwe judeu kwéry omboagwyje hagwã mo'ã Nhandejáry nhe'ê. Upéa-gwi Nhandejáry ohekoviariõse ramo pa'i rekoha, ohekoviariõ ave Moisés remimombe'ukwe tekoha. Ndaipokatuvéi-ma upe tekoha rehegwa nhe'ê pa'i ramo nhane moingo hagwã. Ijapy-ma voi nhande-vy upe tekoha. ¹³Ha Nhandejáry Hesu-rehe katu he'i: "Nde ko ereiko meme va'erã pa'i-rami" he'i Nhandejáry kwatia nhe'ê. Myamyri Levi ndaha'úi tamói, Hesu ramói. Hesu re'ýi nomba'apói Nhandejáry róga-py. Omoka'ê-vy Nhandejáry-pe nomba'apói he'ýive. ¹⁴Ha myamyri Judá katu Nhandejáry Hesu ramói voi. Judá remiarirõ joapyri pyri-pe "Peiko katu pa'i ramo" nde'íry Moisés amyri. Upéa-gwi Nhandejáry Hesu ndoikói gwĩ Levi amyri remiarirõ pa'i kwéry reko-rupi. Pa'i ambue-rami ae ha'e oiko-ma va'ekwe.

Hesu oiko va'ekwe petei pa'i ambue-rami. Melquisedeque rekokwe-rupi oiko va'ekwe

¹⁵Amombe'uve-ta peẽ-my peikwaa porãve hagwã pa'i ambue rehegwa nhe'ê. Ojehexa uka-ma va'ekwe petei Melquisedeque ramigwa. Pa'i ambue-rami ojehexa uka. ¹⁶Pa'i Levi remiarirõ e'ý voi ha'e. Upéa-gwi ndoikói outro pa'i kwéry-rami. Oiko ha'e ae pa'i ruvixagwasu-rami nomanovéi hagwã oikove jevy-gwi. ¹⁷Upéa-rehe he'i Nhandejáry kwatia nhe'ê:

"Nde ko ereiko meme va'erã pa'i-rami. Melquisedeque amyri rekovia ereiko va'erã" he'i íxupe. ¹⁸⁻¹⁹Ha ãy katu ndaipokatuvéi-ma yma gware remimombe'ukwe tekoha. Yma Moisés remimombe'ukwe-rupi oikose va'ekwe mo'ã. Nomboagwyjéi-ma va'ekwe Nhandejáry nhe'ê. Upéa-gwi oiko rei va'ekwe upe tekoha-rupi. Naimbaraetevéi yma gware he'i va'ekwe. Ha ko'ãnga katu iporãve nhande-vy gwarã nhande nhaha'arõ tee va'e-pe. Upe pa'i ambue Nhandejáry irũ ramo nhane moingo va'e-rehe ãy katu jajerovia voi. ²⁰Outro kwéry onhemoingo va'ekwe-rami nomoingói pa'i-rami Hesu-pe Nhandejáry: "Xe réry-py ha'e ete-ta peẽ-my. Peiko katu pa'i-rami" nde'íry outro kwéry-pe. ²¹Ha Hesu-pe katu he'i:

"Xe ae xe réry-py nda'e réry-ta nde-vy. Eiko katu pa'i-rami" he'i ete íxupe.

Upéixa he'i Nhandejáry kwatia nhe'ê:

* 7:9-10 Gn 14.17-20 * 7:11 Sl 110.4

“Xe ha'e hagwe-rami voi ajapo va'erã, he'i. Xe réry-pyma ajapo va'erã, he'i onhe'ẽ-vy. Nakambiáiry va'erã voi katu xe xe nhe'ẽ, he'i ójehe Nhandejáry. Ereiko meme va'erã pa'i-rami erepa e'y reheve” he'i Hesu-pe Nhandejáry.

Upéixa he'i Nhandejáry kwatia nhe'ẽ. ²² Yma va'ekwe, “Xe nhe'ẽ renduha-pe ahovasa va'erã” he'i ramo nhande-vy, nhamoporã voi va'ekwe onhonhe'ẽ va'ekwe. Ha ko'anga katu, iporãve voi nhande-vy inhe'ẽ. “Omano-gwi xe ra'y, orohovasa vasa-ma va'erã” he'i nhande-vy. Upéa nhe'ẽ iporãve nhande-vy. ²³ Gwĩ outro kwéry onhemoingo va'ekwe pa'i ramo. Upéi omano va'ekwe. Upéi hekovia onhemoingo jevy va'ekwe. Ohekoviarõ arõ meme va'ekwe oiko-vy. Upéa-gwi heta oĩ va'ekwe. ²⁴ Ha Hesu katu nomanovéi-ma. Upéa-gwi ha'e oiko meme va'erã pa'i ruvixagwasu-rami. Ohekoviarõ e'y va'erã voi íxupe Nhandejáry. ²⁵ Upéa-gwi héry-py Nhandejáry-gwi nhandemoagwã va'e gwive jaju-vy nhane resende kwaapa voi Hesu indive jaiko porã meme hagwã. Nhande-rehe ojerure rure va'erã Nhandejáry-pe oiko meme-vy. Nomanovéi-ma va'erã voi ha'e opa e'y reheve.

²⁶ Upéixa ramo, pa'i ruvixagwasu-rami oiko Hesu. Nhane rekotevêha tee voi ha'e. Ha'e ko heko marangatu tee va'e. Ojevavy e'y va'e voi ha'e, onhemongy'a e'y va'e voi ha'e. Ogwerojeupi-ma va'ekwe íxupe Nhandejáry yvate yváy-py oiko hagwã ondiva, “Ojevavy e'y va'e voi ko ha'e” he'i hagwã hese. ²⁷ Outro kwéry pa'i ruvixagwasu kwéry-rami e'y katu ha'e. Ha'e kwéry ome'ẽ me'ẽ Nhandejáry-pe ójehe ijukapyrã omboyke uka ranhe hagwã ojéhegwi gwembiapo vaikwe. Upéi gwe'yí kwéry-rehe ave ome'ẽ me'ẽ jevy Nhandejáry-pe ijukapyrã. Ha ha'e kwéry hembiapokwe ndaha'úi Hesu rembiapo-rami. Ha'e nonheme'ẽ py'í py'íry va'ekwe. Peteigwe mante onheme'ẽ-ma va'ekwe peteigwe ojejuka uka hagwã, Nhandejáry omboyke hagwã enterová-gwi hembiapokwe vaikwe. Peteigwe anho mante ha'e onheme'ẽ. Ha upe rire katu nonheme'ẽvéi-ma. ²⁸ Yma gwĩ outro kwéry onhemoingo va'ekwe pa'i ruvixagwasu ramo Moisés remimombe'ukwe-rupi. Pa'i ruvixagwasu ramo jepe, ojevavy joty va'ekwe. Ha upe rire katu:

“Xe ha'e hagwe-rami oromoingo va'erã pa'i-rami. Xe réry-py ereiko va'erã”

he'i gwa'yry-pe Nhandejáry.

Ha'e ojevavy e'y va'e. Áy oiko meme va'erã Nhandejáry ndive omboagwyjepa rire inhe'ẽ.

8

Nhande-vy onhemoingo va'ekwe Hesu pa'i ruvixagwasu-rami

(2 Co 3.6)

¹ Peẽ-my ha'ese va'e a-rami. Oĩ nhande-vy pa'i ruvixagwasu-rami onhemoingo va'ekwe. Melquisedeque rekovia onhemoingo va'ekwe. Áy ha'e ogwapy-ma oĩ-vy Nhandejáry Tupãgwasu tuvixave va'e ogwapy haty yke-rehe ijakatúa-koty.* ² Nhande rekovia omba'apo pa'i ruvixagwasu-rami. Nhandejáry ojapo uka íxupe va'e ojapo. Koty imarangatu ete onhegwahẽ e'y ha-py omba'apo. Upe-py ha'e omba'apo haty-py ndaha'úi ao gwigwa koty ramigwa tembiapokwe rei. Nhandejáry rembiapokwe voi upe koty oĩ va'e. Upe-py ha'e ojapo Nhandejáry he'i va'e gwive íxupe ojapo hagwã. ³ Gwĩ outro kwéry pa'i ruvixagwasu gwive onhemoingo va'ekwe ome'ẽ hagwã Nhandejáry-pe ime'ẽpyrã ijukapyrã ave. Upéixa ete Hesu ndoikói arã pa'i ruvixagwasu-rami ra'e, mba'eva ndogwerekói ramo ra'e Nhandejáry pegwarã ome'ẽ va'erã. ⁴ Ko yvy-py ha'e oiko vyteri ramo ra'e, ndoikói arã ra'e pa'i-rami. Upéixa nanhaikotevêi arã ra'e hese. A-py ko yvy-py heta oĩ pa'i ime'ẽpyrã Nhandejáry-pe ome'ẽ va'erã. Judeu rekoha-rupi ome'ẽ me'ẽ hikwái. ⁵ Yváy pygwa koty tee-py nomba'apói hikwái. Yvy-py ae omba'apo hikwái. Ao gwigwa koty-py omba'apo va'ekwe. Upe ao gwigwa koty ndaha'úi koty tee. Upe koty tee ra'anga mante voi upe yvy pygwa koty. Upéixa ave he'i myamyri Moisés rehewga nhe'ẽ. Yma va'ekwe upe ao gwigwa koty omopu'ã-ta ramo, oha'anga íxupe Nhandejáry: “Yvyaty ári nhaime ramo, ahexa uka kuri nde-vy ha'anga. Áy ejapo katu ha'e ramigwa ao gwigwa koty xe aha'anga hagwe-rami nde-vy”*

* 8:1 Sl 110.1 * 8:5 Êx 25.40

he'i íxupe va'ekwe Nhandejáry. ⁶Ha áy katu Hesu-pe nomomba'apo ukáí koty tee ra'angapy. Koty tee-py voi oike ha'e. Upéixa ave iporáve voi nhande-rehe Hesu rembiapo ha'e kwéry hembia-po-gwi. "Orohovasa poráve ráve va'erã" he'i ramo Nhandejáry nde'i reíry nhande-vy. Iporáve Hesu rembiapo yma gware rembiapo-gwi. Ha'e kwéry nanhane moingo teéíry va'ekwe Nhandejáry irürã. Hesu ae katu nhane moingo tee-ma Gwu irürã. ⁷Yma gware nhane moingo kwaa ramo ra'e Nhandejáry irürã, nanhaikotevê jevýí arã ra'e inhirürã nhane moingoharã ambue-rehe. ⁸Ha yma gware rembiapo katu ndojohu porãí Nhandejáry. Upéixa he'i Nhandejáry kwatia nhe'ê:

"Ogwahê va'erã ou-vy xe amombe'u jevytaha áry, he'i Nhandejáry. Israel re'ýi kwéry-pe amombe'u jevy va'erã hembia-po pyahurã. Judá re'ýi kwéry-pe ave amombe'u va'erã. Xe nhe'ê ojapo ramo katu, túvy-rami areko va'erã íxupe kwéry, he'i Nhandejáry. ⁹Yma va'ekwe amombe'u va'ekwe tamoigwasu kwéry-pe hembia-porã. Túvy ohupi heraha-vy va'e-rami gwa'ýry, anohê heraha-vy va'ekwe. Egito yvy-gwi anohê va'ekwe íxupe kwéry heraha-vy. Upe-ma ramo amombe'u va'ekwe íxupe kwéry hekorã kwéry. Ha ha'e kwéry katu ndojapóíry va'ekwe xe ha'e hagwe-rami. Upéa-gwi napenavéi rei-ma hese kwéry va'ekwe, he'i Nhandejáry. ¹⁰Ha ko'ángá ae katu xe namombe'u jevy jevy mo'ávéi-ma íxupe kwéry amombe'u hagwe-rami hekorã, he'i. Ha'e kwéry heko pyahurã íxupe amombe'u va'erã a-rami, he'i Nhandejáry. Amo'arandu va'erã íxupe, he'i. Amomandu'a meme hagwã íxupe xe rembihaikwe oí vérami arã ipy'apy-py. Upéixa-gwi ojapose va'erã xe nhe'ê, he'i. Ijaryrã voi xe. Xe re'ýírã voi ave ha'e kwéry. ¹¹Entéro va'e gwive xe kwaa va'erã. Mitã gwive ituja va'e gwive, igwaigwí va'e gwive ave xe kwaa va'erã voi. Upéa-gwi, Pembopyy katu Nhandejáry rekoha, ndaiporivéi he'i va'erã. Gwapixa mbo'eháry, gwe'ýí mbo'eháry ndaiporivéi-ma va'erã. ¹²Ojevavy rire, hembia-po vai rire, aiporiahuvereco va'erã íxupe. Naxe mandu'avéi-ma va'erã hembia-po vaikwe-rehe"

he'i Nhandejáry kwatia nhe'ê.* ¹³"Heko pyahurã amombe'u va'erã" he'i Nhandejáry. Upéixa ramo, ijapy-ma nipo ra'e upe tekoha yma he'i ojapo hagwã va'ekwe. Ha ijapy rei va'e-pe katu pya'e omokanhy va'erã Nhandejáry.

9

Yma gware pa'i kwéry hembia-po porã jepe pa'i ruvixagwasu-rami hembia-po porãve nhande-vy Hesu

¹Ha yma gware Moisés remimombe'ukwe-rupi omboete Nhandejáry-pe. Koty omboete haty tembiapokwe rei-py omboete íxupe. ²Omopu'ã va'ekwe lona gwigwa koty mokóí va'e. Jaiké ppy ha-py héry va'e koty marangatu. Upe-py oí va'ekwe tataendy'y. Oí va'ekwe ave apyka. Apyka ári omoí mbojape imomarangatupyre Nhandejáry-pe omboete-vy. ³Upéi koty imarangatu va'e kupe-py joty oí va'ekwe ao-py ijopiapyre tuvixa va'e. Ao tuvixa va'e-py ijopiapyre jahasa ramo ave, jaiké-ma koty imarangatu ete va'e-py, nhegwahê e'ý ha-py. ⁴Upe-py koty imarangatu ete va'e onhegwahê e'ý ha-py oí va'ekwe ouro-gwi ijapopyre apyka ramigwa "altar" he'i héry va'e. Hi'ári pa'i ohapy va'ekwe omotimbo hagwã Nhandejáry-pe hyakwã iporã va'e imohyakwã poráve hagwã. Upe-py oí ave va'ekwe yvyra-gwí ijapopyre mba'e rryu ouro-py ijapeugwãpyre, "arca do acordo" he'i héry va'e. Hye py-py onhemoí va'ekwe mba'e rryu mixí va'e ouro gwigwa ijapopyre. Ha'e hye py-py katu oí "maná" héry va'e. "Arca do acordo" rye py-py onhemoí va'ekwe ave Arão amyrí pykokakwe omoí. Upe yvyra ipiru va'ekwe. Nhandejáry nhe'ê-py ae hoky jevy-ma katu va'ekwe. Omoí va'ekwe ave "arca do acordo" rye py-py mokóí ita pehêgwé. Nhandejáry remimombe'ukwe omoí hese.* ⁵Upe imba'e rryu ári oí va'ekwe Nhandejáry rembigwái ra'anga ouro-gwi ijapopyre ipepo va'e héry va'e "querubim". Upe-py, "Nhandejáry kwaa ukaha" he'i "Jaikwaa-ma katu Nhandejaryha" he'i hese. Hi'ári oipyso va'ekwe opepo. Ipepogwy-py onhohê va'ekwe nhande-rehe ijukapyre rugwy. Ha upe rire katu Nhandejáry

* 8:12 Jr 31.31-34; Hb 10.16-17 * 9:4 Êx 16.33; Nm 17.8-10

omboyke va'ekwe nhandéhegwi nhane rembiapo vaikwe, nanhane mbohasa asyvéi-ma hagwā. Peteī teī upéa rehegwa nhe'ē namombe'u mo'āvéi āy. ⁶Upéixa ramo va'ekwe pa'i kwéry oike ike koty imarangatu va'e gwembiaporā ojapo hagwā. ⁷Ha ikupe-py koty imarangatu eteve va'e-py katu ndoikéiry voi pa'i kwéry. Pa'i ruvixagwasu anho mante oike upe-py. Ndaipóri outro oike va'e. Ha'e ndoike meméiry. Peteīgwéte oike peteī ro'y-py. Ha'e ndoike reiry. Ijukapyre rugwy reraha-vy mante ha'e oike upe-py Nhandejáry-pe ome'ē hagwā. Ojehegwa ome'ē, he'yí kwéry rehegwa ave ome'ē omboyke ukapa hagwā íxugwi hembiaapo vaikwe. Oikwaa e'y'ye reheve hembiaapo vaikwe gwive omboyke uka ave íxugwi. ^{8,9}Upéa-py nhane mbo'e Nhe'ē Marangatu tee va'e oikwaa uka hagwā nhande-vy yma gware he'ise va'e. Opu'ā joty jave upe lona gwigwa koty va'ekwe ndojepe'ái vyteri va'e'ekwe ijopiapyre upe koty imarangatu ete va'e-py jaiké hagwā. Upe lona gwigwa koty he'i yma gware-pe ojapo hagwā. Yma gware remimopu'ákwe āygwape gwive oikwaa uka hagwā ave mba'éixa jaiké-ta jaha-vy Nhandejáry ha-py. Upe koty omopu'ā va'ekwe jaikwaa porā hagwā Nhandejáry rembiapokwe āygwape gwara ave. Yma gware ome'ē me'ē Nhandejáry-pe hemime'ē me'ē ijukapyrā ave. Ha ome'ē rire katu nonhemopotimbáiry voi ipy'a. ¹⁰Yma gware rekoha-rupi oiko va'e hi'upy e'y'ye va'e-rehe opena eterei. Ojahuha-rehe, onhemopotíha-rehe opena. Upe tekoha nhande rete pegwarā mante iporā, ndaha'éi nhande py'a pegwarā. Anhetegwa-ma va'ekwe upe tekoha rehegwa nhe'ē. Omoatyrōmba peve enterovéa-pe Nhandejáry, ipokatu joty. Ha upéi katu ijapy-ma ave katu upe tekoha.*

¹¹Ha ko'ángá katu ojekwaa-ma ou-vy Cristo. Nhande rovasa porā-vy pa'i ruvixagwasu rekokwe oiporu. Nhande-vy pa'i ruvixagwasu-rami iporāve va'e Cristo. Koty tee-py ojapo oiko-vy gwembiaporā. Ko yvy-py tembiapokwe rei gwy-py nomba'apói. Yváy pygwa koty tee-py ae omba'apo oiko-vy. Koty tee yvy pygwa e'y'-rami, lona gwigwa e'y'-rami yváy-py koty. ¹²Upéixa Cristo oike-ma va'ekwe yváy pygwa koty imarangatu ete va'e-py. Peteīgwe oike va'ekwe ha upe rire katu noséiry oike jevy hagwā koty-py. Upe-py ndoikéi kavara rugwy, vaka ra'y rugwy ave reraha-vy ome'ē hagwā Nhandejáry-pe nhane rembiapo vaikwe-rehe. Ha'e ae gwugwy avyete-py oī rire, ojejuka uka-vy, gwugwy ogweraha va'e-rami oike koty-py oho-vy, nhane resende hagwā, jaiko meme hagwā Nhandejáry ndive. ¹³Ha yma gware katu ha'e ae gweko-rupi oiko-gwi, oipyhy pyhy va'ekwe kavara rugwy vaka rugwy ave. Upéi vaka ra'y ohapy rire, oipyhy tanimbu. Upéi gwí ou va'e onhemopotí hagwā omoí hembipyhy hete-rehe. Gwí hete onhemongy'a va'e-rehe omopotí hagwā omoí. Hembipyhykwe omoí hese.* ¹⁴Upe yma gware rekoha anhetegwa tee voi va'ekwe ha ko'ángá katu iporāve voi Cristo rembiapo. Mymba rugwy ndogwerahái koty-py. Gwugwy avyete-py ae omano Nhandejáry-pe gweko marane'y'ye me'ē-vy. Nhe'ē Marangatu tee va'e-rupi onheme'ē íxupe ijukapyre vérami. Upéa-gwí gwugwy-py omopotí nhande py'a nhandéhegwi oipe'a hagwā nhande reko tujakwe jaiko hagwā Nhandejáry hekove tee va'e rekoha-rupi. Upéa-gwí nhande rereko porā porā voi Cristo. Ha'e ojejuka uka-gwí nhande Nhandejáry remienói va'e jaiko. Nhande py'a-py gwive jajapose hemimbota Nhandejáry-pe.* ¹⁵Yma va'ekwe, “Ahovasa porā meme va'erā xe remienói-pe” nde'i reiry voi araka'e nhande-rehe. Áy Cristo nhe'ē-py, hese ha-py ave, he'i hagwe-rami ome'ē va'erā nhande-vy nhande-vy gwarā. Moisés amyri remimombe'ukwe-rupi jaiko ramo jepe, jajejavý joty va'ekwe jaiko-vy. Ndajajapopáiry joty va'ekwe yma he'i hagwe-rami. Ha āy katu nhande-rehe Cristo omano-gwí, oipe'a-ma nhandéhegwi nhande reko tujakwe. Nhande rembiapo vaikwe omboyke nhandéhegwi. Upéixa ramo Cristo-rehe ha-py ae nhande-vy gwarā opa e'y'ye va'erā ome'ē arā nhande-vy.* ¹⁶⁻¹⁷Jaikove vyteri ramo, nhamoí kwatia-rehe nhane nhe'ē. Kiva'e va'e-pe pa opyta-ta xe mba'e mba'ekwe ja'e jahai-vy kwatia-rehe. Upe kwatia nhe'ē ne'írā vyteri ovale nhande jaiko jave. Ha nhamano rire katu, ipokatu-ma va'erā voi. Upéa-gwí kwatia upeixagwa ndovaléi ndajajakwaaí ramo

* 9:10 Éx 25.8-26.35

* 9:13 Lv 16.15-16; Nm 19.9,17-19

* 9:14 1 Pe 1.18-19

* 9:15 Hb 8.6; 12.24

ihaihare omanoha. Jaikwaa tee-ma ramo ae, ovale voi. ¹⁸Upéa-gwi yma va'ekwe, “Xe nhe'ê renduha-pe gwive ahovasa va'erã” he'i va'ekwe Nhandejáry. He'i jave, ne'írã ipokatu va'ekwe. Ha upe rire katu vaka ra'y ojuka uka rire katu, ipokatu-ma va'ekwe nhandevy. Anhetegwa voiha jaikwaa-ma. ¹⁹Ha Moisés amyri katu omombe'u ypy va'ekwe yma gware-pe tekoha porã. Nhandejáry remimombe'ukwe gwive omombe'u. Upéi ogweru va'ekwe vaka ra'y rugwy y ndive. Upéi oipyhy yvyra'i hissopo héry va'e. Ovexa ragwekwe pytã va'e oipyhy ave. Upéi ha'e-py ombohayvi hugwy Nhandejáry kwatia nhe'ê-rehe. Kente kwéry-rehe ombohayvi ave. Mba'e rugwy ombohayvi hese. ²⁰Ombohayvi jave he'i upe pygwa-pe: “Nde'i reiry voi ko va'e nhe'ê. Hugwy-py ipokatu-ma peê-my, Nhandejáry remimombe'ukwe anhetegwa-ma voi” he'i Nhandejáry kwatia nhe'ê-rehe.* ²¹Hugwy hese ombohayvi hagwe-rami, ombohayvi jevy Moisés upe ao gwigwa kotyrehe. Nhandejáry mboete-vy nhane rembiporu-rehe gwive ombohayvi hugwy.* ²²Judeu reko Moisés remimombe'ukwe-rupi oiko va'e-pe haimete ndaipóri ijukapyre rugwy e'ý reheve onhemopotí va'e. Nomboykéi Nhandejáry nhandéhegwi nhane rembiapo vaikwe ijukapyre rugwy onhehê e'ý reheve. Nonhehëiry nomopotíry.

Cristo ojekua uka-gwi omboyke-ma nhandéhegwi nhane rembiapo vaikwe

²³Ijukapyre rugwy e'ý reheve nonhemopotíry va'ekwe upe ao gwigwa koty pygwa gwive. Yváy pygwa koty tee va'e ra'anga voi upe koty. Yváy pygwa koty tee ra'anga rei ramo jepe, nonhemopotíry hugwy e'ý reheve. Ha yváy pygwa onhemopotí iporãve va'e-py. ²⁴Ha Cristo katu ndoikéiry va'ekwe upe koty teko rei remimopu'akwe-py. Upe koty yváy pygwa koty tee ra'anga mante upe koty. Upe-py ndoikéiry voi va'ekwe ha'e. Oike ae oho-vy yváy-py ãy ojehexa uka hagwã Nhandejáry-pe nhande-rehe ha-py. Nhandejáry rovagwy-py oí nhande-rehe. ²⁵Yma gware pa'i ruvixagwasu oike ike koty imarangatu onhegwahê e'ý ha-py. Peteígwete peteí ro'y-py oike. Ijukapyre rugwy reraha-vy oike koty-py. Ha Cristo katu ndohóiry voi upe-py onheme'ê jevy jevy hagwã Nhandejáry-pe. ²⁶Onheme'ê jevy jevy ramo ra'e, ohasa asy jevy jevy arã ra'e. Yvy nhepyrũ gwive ko'anga ete peve omano mano joty arã ra'e oiko-vy. Heta ohasa asy asy hagwe rekovia, ãy ojekwaa-ma. Yma gware rekoha gwive ijapy rei-tama ramo va'ekwe, upe-ma ramo hi'óra-py ojehexa uka-ma va'ekwe omboyke hagwã nhandéhegwi nhane rembiapo vaikwe nhande-rehe ojekua ukavy. ²⁷Nhandejáry nhe'ê-py nhande kwéry nhamano hagwã áry-py nhamano va'erã. Ha upe rire katu nhande rereko va'erã Nhandejáry nhane rembiapo apokwe-rehe. ²⁸Upéixa ete peteígwete ojekua uka-ma va'ekwe nhande kwéry rembiapo vaikwe omboyke hagwã. Ha upe rire katu ndojehexa ukavéi-ma va'erã ha'e kwéry hembiao vaikwe-rehe omano hagwã. Ojúupe oha'arõ tee va'e-pe katu ojehexa uka jevy va'erã oresende hagwã.

10

¹Judeu rekoha Moisés remimombe'ukwe ndaha'úi Nhandejáry rekoha teerã-rami. Gwembiaporã renonderã oikwaa uka yma gware-pe Nhandejáry. Iporã ete va'erã rehegwa nhe'ê ne'írã vyteri omombe'upa porã íxupe. Oikwaa hagwe-rami omombe'u íxupe. Tenonderã oikwaa uka rei íxupe. Oha'anga rei ojúpe hagwe-rami ha'e kwéry hikwái. Ha'e kwéry ome'ê me'ê Nhandejáry-pe ijukapyrã ome'ê me'ê íxupe. Peteí ro'y rire, ome'ê jevy íxupe. Peteí ro'y ohasa rire ome'ê jevy íxupe. Upe Nhandejáry mboeteha judeu reko-rupi oiko va'e ndikatúiry onhemopotí tee. ²Onhemopotí tee ramo ra'e, “Xe py'a ky'a joty” nde'íry ramo ra'e, nome'êvéi arã Nhandejáry-pe ijukapyrã ra'e. ³Ha ome'ê me'ê joty Nhandejáry-pe ijukapyrã. Ha hexahare imandu'a ndu'a joty opy'a ky'aha-rehe hikwái. ⁴Vaka rugwy-py rei nhandehemopotí ukase ramo, “Xe py'a potí-ma” ndaja'éiry voi arã nhandéjehe kwéry. Kavara rugwy-py rei nhamboyke ukase mo'ã ramo nhane rembiapo vaikwe, nomboykéiry voi nhandéhegwi Nhandejáry. ⁵Upéa-rehe Cristo ko yvy-py ojehexa uka-tama ramo gwete omano va'erã reheve ou-vy, he'i va'ekwe Nhandejáry-pe a-rami he'i:

* 9:20 Êx 24.6-8 * 9:21 Lv 8.15

“Gwĩ nde-vy ijukapyrã ime'ëpyrã ave ndereipotavéi-ma. Ijukapyrã rekovia eremoĩ xe reterã. ⁶Ijukapyrã ome'ë ramo nde-vy pa'i kwéry hembiaapo vaikwe-rehe, hembihapykwe ome'ë ramo ave, ndererohoryvéi-ma hembiapokwe, hembihapykwe ave. ⁷Upe-ma ramo, ha'e nde-vy. Xe renonderã ahexa jepe, aju-ma, xe Járy. Aime-ma ne remimbota apo haggwã, ha'e joty. Xe rekorã-rehe nde kwatia nhe'ë he'iha-rami ajapo va'erã”*

he'i Nhandejáry kwatia nhe'ë Hesu nhe'ë mombe'u-vy. ⁸He'i ypy Nhandejáry kwatia nhe'ë:

“Ndereipotái gwĩ ijukapyre ime'ëpyre ave. Gwĩ hembihapykwe, hembiaapo vaikwe repy mo'ã ave ndererohoryry voi”

he'i. Hembihapykwe jepe ndogwerohoryry. Upe va'e Moisés remimombe'ukwe-rupi oiko va'e remime'ë voi. Nomopotĩ teéiry-gwĩ ndogwerovy'áiry. Yma gware rekoha jepe, ndogwerohoryĩ hembiaapo. ⁹Upéi he'i jevy:

“Aju-ma, xe Járy, aime-ma ne remimbota ajapo haggwã”

he'i Nhandejáry kwatia nhe'ë Hesu nhe'ë mombe'u-vy. Upéixa yma gware remime'ëgwe-rehe, “Ijapy-ma” he'i. “Ipy'a kwéry nomopotiry voi ra'e” he'i hese Nhandejáry. Hekovia omoĩ Cristo reko: “Pene mopotĩ haggwã ojejuka uka va'ekwe” he'i Nhandejáry nhande reko omombe'u-vy. ¹⁰Nhandejáry oipota va'ekwe gwive ojapopa voi Cristo. Gwete reheve peteigwe onheme'ëmba-ma íxupe. Omano haggwã onheme'ë íxupe. Upéa-gwĩ Nhandejáry-pe onheme'ë-gwĩ, nhane moingo-ma kuri gweko irũ teerã.

¹¹Yma gware pa'i kwéry opu'ã-ma oĩ-vy lona gwigwa koty-py Nhandejáry róga kakwaa-py ave. Pa'i upe-py ojapo japo gwembiaporã. Ijukapyrã ime'ëpyrã ave ome'ë me'ë. Ome'ë rire, ome'ë hagwe-rami ome'ë jevy. Ndaijapyí ome'ë-vy. Ome'ë me'ë ramo jepe, nonhemopotiry he'yí kwéry py'a. Nomboykéi íxugwĩ hembiaapo vaikwe. ¹²Ha Cristo katu nhane rembiapo vaikwe omboyke haggwã-rehe, peteigwe mante ojejuka uka va'ekwe. Nomano jevy jevyry. Nhane mopotĩ tee-gwĩ, jaiko meme va'erã Nhandejáry ndive japa e'y reheve. Onheme'ë rire Nhandejáry-pe, ogwapy-ma va'ekwe ijyke-rehe ijakatúa-koty oĩ-vy. Onhembotuvixave va'e ogwapy haty-pyma ogwapy oĩ-vy. ¹³Áy upe-py ogwapy oĩ-vy. Oha'arõ oĩ-vy Nhandejáry-pe. Ija'e'yha-rehe ombopu'aka-ta Nhandejáry íxupe. ¹⁴Peteigwe onheme'ë ramo, Nhandejáry reko irũrã-pe omopotimba ete-ma opa e'y reheve. ¹⁵“Upéa nhe'ë anhetegwa voi” he'i ave Nhe'ë Marangatu tee va'e.

He'i ypy va'ekwe:

¹⁶“Heko pyahurã íxupe amombe'u va'erã a-rami, he'i Nhandejáry. Xe rembihaikwe oĩ vérami arã ipy'apy-py. Amomandu'a meme haggwã íxupe xe remimombe'ukwe-rehe amo'arandu va'erã íxupe. Upéixa-gwĩ ojapose va'erã xe nhe'ë”

he'i Nhandejáry kwatia nhe'ë. ¹⁷Upéi he'i jevy:

“Naxe mandu'avéi-ma hembiapokwe-rehe oteko avy avy eterei rire. Hembiaapo vaikwe amokanhy ukapa-ma va'erã”*

he'i Nhandejáry kwatia nhe'ë. ¹⁸Upéixa-gwĩ nhane rembiapo vaikwe omboykepa rire, nanhaikotevévéi-ma nhande-rehe onheme'ë jevy va'erã-rehe.

Nhanhemo'agwĩ katu Nhandejáry-gwĩ nhamoirũ haggwã

(Ef 3.11-12; Hb 4.16; 6.4-6)

¹⁹Iporã katu, xe re'yí kwéry, nhagwahẽ jaha-vy Nhandejáry oiko haty-py. Hugwy reheve omano-gwĩ Hesu, upe koty marangatu ete onhegwahẽ e'y ha-py oiko va'e-rami jaiko voi nhande py'amirĩ e'y reheve. Ndaiporivéi-ma nhande jokoharã. ²⁰Hesu nhande rerahaha va'erã Nhandejáry-pe. Ha'e oiko meme nhande rape apo pyahu haggwã nhande-vy nhagwahẽ haggwã jaha-vy Nhandejáry renda-py. Upe ao-py ijopiaha tuvixa va'e ohasa oiko oiko-vy va'e-rami ave nhande reraha Nhandejáry-pe. Hesu rete-rehe voi he'i upe ao-py ijopiaha. Ojejuka uka-ma jave Hesu, ojepe'a va'ekwe upe ao-py ijopiahagwe. Nhande

* 10:7 Sl 40.6-8 * 10:17 Jr 31.33-34; Hb 8.10

jokoharā ndaiporivéi. ²¹ Nhande-vy gwarā oī pa'i ruvixagwasu-rami Nhandejáry róga-rehe onhangareko va'e. ²² Upéa-rehe nhandemo'agwī agwī katu Nhandejáry-gwi jahavy nhande reko apu e'ý reheve. Jajerovia ku'a ku'a e'ý reheve nhandemo'agwī katu íxugwi jahavy. Nanhande py'a ky'avéi-ma hagwā nhane mopotī. Y potī-my yma gware onhembojahu va'ekwe-ramima nhane mbohete resakā-ma va'ekwe ojéupe Nhandejáry. Upéa-gwi nhandemo'agwī katu jahavy Nhandejáry-pe. ²³ Atýra-py nhamombe'u jaiko-vy Nhandejáry he'i hagwe-rami ojapo va'erā. Jarovia porāve rāve katu upe nhe'ē, "Ojapo va'erā katu he'i hagwe-rami" ja'e Nhandejáry-rehe. Upéa-gwi, "Ojapo-ta para'e, tapa ndojapo mo'āi" ani ja'e tei hese. Nhamombe'u katu jarovia tee va'e. ²⁴ Ani jajoteta teta tei. Nhapena ae katu ojóehe jajohayhu rei hagwā nhandehopytygwō hagwā. ²⁵ Oī Hesu roviaha va'e ndohói voi ojogweroaty ramo herovia kwéry. Ani oho e'ý va'e reko-rupi jaiko tei. Nhandhombaraete katu nhande nhandhomoaty aty-vy. Ja'e ae katu ojóupe: "Nhandejáry Hesu ou jevytaha áry hi'agwī-ma nipo ra'e" ja'e joty ojóupe. Upéa-gwi nhandhombaraete katu nhandhomoaty atyve-vy jajehesa rerova uka e'ý hagwā. ²⁶ Oī nhande-vy ijukapyre Nhandejáry omboyke hagwā nhandéhegwi nhane rembiapo vaikwe. Ha nhande nhane mo'arandu rire, jajejavyse-gwi rei jajejavy jevy ramo katu, nhane arandu tei, jaikwaa tei anhetegwa. Ndoikovéi-ma nhande-vy ijukapyrā Nhandejáry omboyke hagwā mo'ā nhandéhegwi nhane rembiapo vaikwe. ²⁷ Upéixa jaiko ramo, ndajaiko porāvéi-ma. Nhande kyhyje ojehu va'erā nhande-vy jaikwaa-vy: "Xe ambojevvy-ma nipo ra'e Nhandejáry-pe. Upéa-gwi xe rereko-ma va'erā xe rembiapokwe-rehe" ja'e. "Tata ipoxy va'e-py xe hundi va'erā" ja'e arā nhandéjehe nhane renonderā jaikwaa-vy. ²⁸ Gwī Moisés amyri nhe'ē rendu e'ýha-rehe, "Tojéjapi katu ita-py tojéjuka" he'i hese yma gware. "Hembiapo vai-ma" he'i ramo hese mokōi, mbohapy hexahare, ndoiporiahuverekóiry íxupe, pya'e ojuka va'ekwe. ²⁹ Ha Nhandejáry ra'y Cristo nhe'ē-rehe opyrū va'e katu, mba'éixa po ogwereco va'erā āy Nhandejáry íxupe? Ombohassa asyve va'erā íxupe. Cristo rugwy-py onhemopotī rire jepe Nhandejáry re'ýirā oiko hagwā jepe, nomomba'evéi-ma Cristo rugwy. Omomba'e rei-ma Cristo-pe. "Omano rei" he'i mo'ā hese. Nhe'ē Marangatu tee va'e-pe ombojevvy voi. Hembiayhu jepe, ombojevvy íxupe hendusere'ý-vy. Mba'éixa po ogwereco va'erā íxupe Nhandejáry? Hembiapokwe-rehe ogwereco asyve syve va'erā íxupe Nhandejáry. ³⁰ Jaikwaa voi Nhandejáry rekoha:

"Xe ko enterovéa-pe ahepy va'erā"*

he'íha jaikwaa voi.

"Enterovéa-pe xe ae areko va'erā hembiapo apokwe-rehe"

he'íha jaikwaa voi ave.

"Nhandejáry ogweru va'erā gwovagwy-py gwe'ýi kwéry-pe omonhe'ē hagwā íxupe"

he'i ave Nhandejáry kwatia nhe'ē. ³¹ Nde pyhy ramo Nhandejáry hekove tee va'e, nde rereko asy-vy, ne mongyhyje eterei voi arā. Ivai eterei arā nde-vy. Nderejekapái arā íxugwi, nerekanhýi arā íxugwi. Upéa-rehe tanhanhangareko porā katu nhandéjehe.

³² Aipota pene mandu'a jevy pende rekokwe-rehe. Are-ma pende resape rire Nhandejáry pene mo'arandu-vy, pehasa asy va'ekwe. Ha pehasa asy ramo jepe, ndapeváiry joty va'ekwe Cristo rape-gwi. ³³ Oī pene pa'ū-my atýra-py onhe'ē rei rei va'ekwe hese. Entéro hexapyrāpyrā-rupi pende rereko asy va'ekwe. Oī pene pa'ū-my hembiereko asy va'e-pe omoirise va'e. Openda hese-gwi omoirū íxupe. ³⁴ Ha preso onhemōi va'e katu ohasa asy jave pemoirū íxupe. Pene mba'e kwéry osakea ramo heraha-vy, napemboasýi joty hembieraha. Ogwerahapa ramo jepe, pevy'a joty kuri. "Oī joty nhande-vy gwarā opa e'ý va'e" peje joty kuri pendejéupe. Peē-my gwarā peikwaa voi. Upéa-gwi pevy'a joty kuri peiko-vy. ³⁵ Pende py'amirī e'ý reheve Nhandejáry reko irū ramo peiko ramo, ome'ē va'erā peē-my pene rembiapo porā repyrā. Upéa-gwi ani penhembopy'amirī uka tei kuri. ³⁶ Aníke pejehesa rerova uka tei peiko-vy. Pejapo ae katu Nhandejáry remimbota he'i hagwe-rami ojapo hagwā pende-rehe. ³⁷ Upéixa he'i Nhandejáry kwatia nhe'ē:

* 10:30 Dt 32.36

“Ange hi'are e'y reheve ogwahẽ-tama ou-vy ou va'erã. Ndahi'are mo'ai voi. ³⁸Xe re'yí ipy'a poti va'e xe rorovia-gwi, oikove va'erã. Ha xéhegwi ojehesa rerova uka va'erã oĩ ramo katu, ndarohorói va'erã íxupe”*

he'i Nhandejáry kwatia nhe'ẽ. ³⁹Ha nhande kwéry katu ndaha'úi nhandehundi hagwã jaje-hesa rerova uka va'erã mombyry Nhandejáry-gwi jaiko hagwã. Jarovia-ma ae Nhandejáry-pe nhande py'a gwive nhane resende hagwã.

11

Iporã katu jarovia tee voi Nhandejáry-pe

¹Jarovia tee ramo, “Anhetegwa voi nhane remiha'arõ” ja'e. “Jahexa e'y ramo jepe, jaikwaa voi oikoha” ja'e jarovia tee-gwi íxupe. ²Yma gware nhane rembypy ogwerovia tee-gwi ojohu porã íxupe kwéry Nhandejáry. Imandu'a porã hese kwéry. ³Inhe'ẽ jarovia-gwi, ja'e “Onhe'ẽ-py rei ombojehu va'ekwe ojéupe ko yvy ha áry ave Nhandejáry” ja'e. Hexapyrã gwive ojapo-ma ramo va'ekwe, ndaipóri hambiporukwe. Upéa-gwi jaikwaa voi Nhandejáry ombojehu rei va'ekwe.*

⁴Oĩ va'ekwe yma gware nhane rembypy héry va'e Caim, tyvýry héry va'e Abel. Ha tyke'yry katu ime'ëpyrã ome'ẽ va'ekwe Nhandejáry-pe. Upéi tyvýry ome'ẽ va'ekwe íxupe ijukapyrã. Nhandejáry-pe ogwerovia tee-gwi ome'ẽ íxupe. Ha Nhandejáry ojohu porã tyvýry remime'ëgwe. Ha tyke'yry remime'ëgwe katu ndojohu porãry voi. Ha tyvýry-rehe katu he'i, “Xe rorovia tee-gwi, heko-rupi oiko ipy'a poti reheve” he'i tyvýry-rehe Nhandejáry. Enterove va'e imandu'a porã hese hikwái. Yma omano va'ekwe tyvýry Abel. Omano jepe, onhe'ẽ vérami joty oĩ-vy. Ogwerovia tee-gwi íxupe, nhane mandu'a meme herakwã-rehe.*

⁵Ha myamyri Enoque ave ogwerovia tee va'ekwe Nhandejáry-pe. Ogwerovia tee-gwi, nomanói va'ekwe Enoque. Imanoha rãgwe-py, Nhandejáry ogweraha rei íxupe. Upéa-gwi ndotopavéi-ma íxupe. Ne'írá vyteri ogwerojeupi íxupe heraha-vy ramo, ogwerohory íxupe Nhandejáry, he'i Nhandejáry kwatia nhe'ẽ.* ⁶Ogwerovia e'y reheve, avave-pe ndogwerohorói Nhandejáry. Nhamoirüse ramo Nhandejáry-pe, “Oĩ voi Nhandejáry” ja'e va'erã hese. “Ha'e nhande rovasa va'erã, jaheka tee ramo íxupe” ja'e ave hese. Upéa nhe'ẽ nhamombe'u e'y ramo, nanhamoirüiry va'erã voi íxupe. Tekotevẽ jarovia tee ae íxupe nhamoirü hagwã íxupe. Jarovia e'y ramo, nanhamoirüiry va'erã íxupe.

⁷Ha Noé amyri katu ogwerovia tee va'ekwe Nhandejáry-pe. Upéa-gwi ogwerovia tee-ma ojéupe omombe'u va'e. Ohexa e'y reheve jepe henonderã omombe'u-ma íxupe Nhandejáry. Upéixa-gwi ojapo va'ekwe kanoagwasu Nhandejáry nhe'ẽ rendu-vy. Ha upe rire katu ovu ramo y, onheresende-ma ha'e-py. Hóga pygwa gwive onheresende ave. Upéixa ha'e ogwerovia oiko-vygywi, ojekwaa porãve va'ekwe yvypóry-rehe ogwerovia e'yha. Ogwerovia-gwi, “Ipy'a poti-ma” he'i hese Nhandejáry.*

⁸Ha myamyri Abraão katu ogwerovia tee-gwi, ohendu va'ekwe Nhandejáry nhe'ẽ ohenói ramo íxupe. Ohendu-gwi ova oho-vy outro yvy-koty. “Ame'ẽ va'erã nde-vy nde yvyrã” he'i hagwe-py íxupe ova va'ekwe oho-vy. Gwetã oheja oho-vy ha ki-koty po oho-ta ndoikwaái oho hagwã. Nhandejáry omondose ha-py íxupe oho. ⁹Ogwerovia tee-gwi, ogwahẽ rire Nhandejáry omondo hagwe-py, upe yvy-rehe rei oiko. “Ame'ẽ va'erã nde-vy” nde'i reiry íxupe Nhandejáry. Upe he'i ojéupe hagwe-rupima oiko. Yvy oyvy e'y-rupi oiko va'e-rami oiko. Ao gwigwa óga gwy-rupi oiko. Hendive oiko ta'yry Isaque, hemiarirõ Jacó ave. Ta'yry-pe, hemiarirõ-pe ave, “Ame'ẽ va'erã nde-vy nde yvyrã” he'i va'ekwe íxupe Nhandejáry. He'i ojéupe hagwe-pyima ãy oiko hikwái.* ¹⁰Ha Abraão katu oha'arõ arõ oiko-vy va'ekwe oiko hagwã upe tetã tee yváy pygwa-py. Nhandejáry he'i hagwe-ramima oiko upe tetã. Ha'e ae hembiaipo voi. Upéa ra'arõ arõ-vy, ao gwigwa óga gwy-rupi oiko joty va'ekwe. ¹¹Ha hambireko Sara ogwerovia tee ave. Ogwerovia tee-gwi, omemby

* 10:38 Hc 2.3-4 * 11:3 Gn 1.1-31 * 11:4 Gn 4.3-10 * 11:5 Gn 5.21-24 * 11:7 Gn 6.13-22 * 11:9 Gn 12.1-8; Gn 35.27

e'yha ogwenogwaigwī-ma jepe, ituja-ma teī iména, ogwerovia joty oiko-vy Nhandejáry nhe'ê. Upéa-gwi oiko-ma va'ekwe imemby. Nhandejáry he'i va'ekwe ogwerovia-gwi, oiko-ma imemby.* ¹² Ituja eterei ramo jepe Abraão, omano va'erā-rami oiko ramo jepe, oiko joty va'ekwe ta'yry. Upéi heta heta hemiarirō joapyri pyri. Ha'e anho ramo jepe, heta eterei-ma hemiarirō onhemboe'yí oho-vy. Heta heta jasytata pyhare. Ygwasu rembe-rehe heta eterei oī vvy ku'itī ndajaipapapái va'e. Upéixa ete heta eterei onhemboe'yí ave Abraão remiarirō joapyri pyri.* ¹³ Omano ramo jepe Abraão, omano ramo jepe ta'yry, hemiarirō ogwerovia tee joty. Omano jave, ne'írā ome'êse va'e ome'ê íxupe. Ne'írā ome'ê íxupe he'i va'ekwe. Mombyry-gwi ohexa va'e-rami, ogwerovy'a Nhandejáry ojúpe ome'ê va'erā. “Ko vvy-rehe jaiko rei ovvy e'y-rupi oiko va'e-rami” he'i ojúpe hikwái. ¹⁴ Upéa he'i va'e, “Nhande vvy teerā jaheka jaiko-vy” he'i ojúpe hikwái. Upéixa-gwi hexahare oikwaa voi ome'ê-ta va'ekwe ijyvyrā íxupe kwéry. ¹⁵ Naimandu'avéi-ma vvykwe-rehe osê oho-vy va'ekwe-gwi. Imandu'a jevy ramo ra'e, ome'ê arā ra'e oho jevy hagwā ovvykwe-py. Ha naimandu'avéi-ma gwembiehare-rehe. ¹⁶ Gwendarā iporāve va'e ae katu ohexa nga'u hikwái. Yváy pygwa gwenagwā-py oho hagwā-rehe ikyre'y ete voi hikwái. Oī va'ekwe henagwā Nhandejáry rembiapo. Ogwerovia tee-gwi nomotíry va'ekwe oiko-vy Nhandejáry-pe. “Ha'e ko Nhande Ru tee voi” he'i ramo hese, anhetegwa voi. Upéixa-gwi nomotíry Nhandejáry-pe.

¹⁷ Ogwerovia tee-gwi, oipota Nhandejáry ojekwaa porāve Abraão amyri rekoha. Upéa-gwi oheko johu va'ekwe íxupe. Upéi Nhandejáry nhe'ê-py ojuka-ta mo'ā ime'ê-vy gwa'yry Isaque. Are-ma, “Oromboe'yí va'erā” he'i ramo jepe íxupe Nhandejáry, nahakate'yí joty va'ekwe gwa'yry peteimi oiko va'e-rehe.

¹⁸ “Oiko va'erā nde ra'y Isaque remiarirō joapyri pyri”

he'i ramo jepe íxupe Nhandejáry, ojuka-ta mo'ā joty ime'ê-vy gwa'yry. ¹⁹ “Xe ra'y ojejuka rire, omoingove kwaa jevy va'erā íxupe Nhandejáry” he'i joty ojúpe Abraão. Ha ojejuka e'y ramo jepe, onhemoingove jevy va'e vérami oiko jevy joty.*

²⁰ Ha upe rire katu okakwaa va'ekwe ta'yry Isaque. Upe ramo, ogwerovia tee-gwi, “Anhetegwa amombe'u-ta. Nde rovasa va'erā Nhandejáry” nde'i reíry gwa'yry-pe Jacó Esaú ndive. Oiko va'erā omombe'u íxupe.* ²¹ Ogwerovia tee-gwi, omano-ta ramo ta'yry Jacó, “Anhetegwa amombe'u-ta nde-vy. Nde rovasa va'erā Nhandejáry” he'i mokōi gwemiarirō José ra'y-pe, opykokaha-rehe ojeptaho opu'ā onhembo'y-vy omboete hagwā Nhandejáry-pe.*

²² Ogwerovia tee-gwi, omano-ta ramo Jacó ra'y José, “Xe re'yí Israel kwéry ova jevy va'erā oho-vy Egito vvy-gwi” he'i omombe'u-vy. “Peho ramo, peraha katu ave xe akāgwe peho-vy pemoingatu jevy hagwā pegwahē hagwā-py” he'i gwe'yí kwéry-pe ojapo uka-vy.*

²³ Ogwerovia tee-ma va'ekwe Nhandejáry-pe myamyri Moisés ru isy ave. Oiko-ma ramo ta'yry, “Mitā porā voi oiko” he'i hese Moisés-rehe. Ha mburuvixagwasu ojuka ukase mo'ā ramo íxupe, ndokyhyjéi joty túvy isy ave. Ogwerovia tee-gwi, ojuka e'y hagwā mbhapy jasy onhomi tee imoi-vy. Mburuvixa-gwi onhomi tee imoi-vy.*

²⁴ Ha Moisés katu ogwerovia tee va'ekwe Nhandejáry-pe. Upéa-gwi okakwaa rire, “Xe ae ndaikosevéiry mburuvixa Faraó rajy memby ramo” he'i ójehe.* ²⁵ “A-py aiko ramo, sapy'a ete mburuvixarā-rami aiko va'erā” he'i ójehe. “Upéixa aiko ramo, aiko teī arā ajererohory rei va'erā Nhandejáry nhe'ê rendu e'y-vy” he'i ójehe. “Ha xe katu ndaiko mo'āi upéixa” he'i. “Nhandejáry re'yí-pe ae-ma xe amoirū-ta” he'i. “Ojerereko asy ramo hikwái, hendive xe rereko asy va'erā ave” he'i ójehe Moisés. ²⁶ “Upéixa xe ajerereko asy ramo jepe, iporā ave xe-vy” he'i ójehe. Imandu'a meme ojúpe gwarā-rehe. Ojúpe Nhandejáry remime'ērā gwenonde-py ogwereko. Nhandejáry remime'ērā-rehe imandu'a. Upéa-gwi he'i, “A-py Egito-py heta opamba'e areko” he'i. “Ha xe rembiereko iporāve xe ahejapa, Nhandejáry

* 11:11 Gn 18.11-14; 21.2 * 11:12 Gn 15.5-6; 22.17 * 11:19 Gn 22.1-14; 21.12 * 11:20 Gn 27.27-29,39-40

* 11:21 Gn 47.31-48.22 * 11:22 Gn 50.24-25; Êx 13.19 * 11:23 Êx 2.2; 1.16,22 * 11:24 Êx 2.10-15

rembiporavo re'ýi reko-rupi xe aiko hagwã" he'i ójehe. "Hese onhe'ê rei reiha-rami, xe-rehe tonhe'ê rei rei ave" he'i Cristo ou va'erã-rehe. ²⁷Ogwerovia tee-gwi, ova oho-vy Egito yvy-gwi. Mburuvixagwasu remimbota e'ý-rupi oiko. Ipoxy ramo jepe, ndaikyhyjéi joty íxugwi. Nhandejáry jahexa e'ý va'e-pe ohexa va'e-rami joty oiko. Upéa-gwi ndojehesa rerova ukái joty íxugwi. Hape meme joty oipyhy oiko-vy.* ²⁸Ogwerovia tee-gwi, Egito-gwi ova-tama ramo, omóí ppy va'ekwe arete héry va'e páscoa, "Pembohayvi katu pene rokê ári ijukapyre rugwy" he'i gwe'ýi kwéry-pe. "Ani pembohayvi e'ý teí" he'i. "Ou arã ojuka-vy peteí teí otopa va'e mitã kwimba'e ypykwe gwive gwí Nhandejáry rembigwái yváy pygwa oporojuka va'ety he'i va'e. Tugwy ohexa oí ramo pene rokê-rehe, ohasa rei arã oho-vy ijukaharãgwe" he'i gwe'ýi kwéry-pe.* ²⁹Ogwerovia tee-gwi, Moisés re'ýi kwéry ohasa va'ekwe oho-vy ygwasu pytã oje'eha. Yvy ete-rupi ohasa oho-vy va'e-rami ohasa oho-vy hikwái. Upéi hapykwerigwa Egito pygwa ohasase mo'ã. Ohapykwe segi mo'ã ha ndohasáiry. Y mbyte-rupi oho jave, ojaho'i onhapykimba-ma íxupe kwéry y.*

³⁰⁻³¹Ogwerovia tee-gwi nhane rembypy Israel kwéry ogweroajere Jericó tetã oho-vy hikwái. Peteí semana ogweroajere oho-vy. Ha upe rire katu ho'apa ijokoha. Oikepa upe-py Israel kwéry ojuka hagwã Nhandejáry nhe'ê renduse e'ýha-pe. Ha ndojukapáiry upe tetã mygwa-pe.* Peteí kunha Raabe héry va'e, ikwimba'ese ramo jepe, ha'e ohendu joty Nhandejáry nhe'ê. Upéa-gwi onheresende joty. Ogwerovia tee-gwi, gwí soldado henonderupi ogwahê nhemi ou-vy ohexa va'ekwe-pe, "Pegwahê katu" he'i joty ra'e íxupe. Oimeha nomombe'úi joty ijukaharã mo'ã-pe.*

³²Heta amombe'u kuri gwí Nhandejáry reroviaha rehegwa nhe'ê. Áy namombe'upa mo'ái. Nome'ëiry xe amombe'upa Gideão rehegwa nhe'ê, Baraque rehegwa nhe'ê, Sansão rehegwa nhe'ê, Jefé rehegwa nhe'ê ave. Namombe'upa mo'ái Davi rehegwa nhe'ê, Samuel rehegwa nhe'ê ave. Gwí Nhandejáry nhe'ê-py omombe'u va'ety rehegwa nhe'ê nome'ëi xe amombe'u.* ³³Ogwerovia tee-gwi, onhorairõ va'ekwe outro tetã mygwa ndive. Onhorairõ rire, ipu'aka hese kwéry. Hembiaipo vai va'ekwe-pe ogwereco asy. Ha'e ae hembiaipo porã. "Arovia tee katu Nhandejáry remimombe'u" he'i tee-gwi, Nhandejáry ojapo hese he'i hagwe-rami. Jagwarete juru omboty pono oisu'u íxupe.* ³⁴Oí tata ipoxy va'e-rehe ipu'aka tata rendy mbogwe-vy va'e. Oí kyse-py okutuharã-gwi, onheresende joty va'e. Oí onhorairõ jave nonhembopy'amirí ukáiry va'e. Onhembopy'agwasu joty oiko-vy. Oí soldado kwéry outro yvy-gwi ou va'ekwe ndive onhorairõ ramo, omboripara joty, ipu'aka joty hese.*

³⁵Oí kunha hóga pygwa omano va'ekwe. Ogwerovia tee-gwi, onhemoingove jevy íxupe va'ekwe. Oí ave heta ojerereko asy eterei rire, ojejuka va'ekwe. Nhandejáry-gwi ojere ramo ra'e, ndojukái arã ra'e. Ha ndováiry joty íxugwi. "Ava e'ý rire, iporãve xe rekoha arã xe moingove jevy rire Nhandejáry" he'i ae joty ójehe.* ³⁶Oí onhembohory hese va'ekwe. Ombopi mbopi íxupe va'ekwe. Oí onhapytí íxupe va'ekwe. Oipokwa heraha-vy íxupe omóí hagwã preso va'ekwe.* ³⁷Oí ita-py ojapi íxupe va'ekwe. Oí serra-py onhekytí va'ekwe imbyte-rupi. Oí kyse-py ojejuka va'ekwe. Ombojehesa rerova ukase ramo jepe, ndováí joty Nhandejáry-gwi. Gwóga-py ndopytái. Opa-rupi oiko rei. Omonde ovexa ragwe, kavara pirekwe omonde ave oiko-vy. Iporiahu oiko-vy. Ipy'a jopy ojerereko asy ave oiko-vy.* ³⁸Upéa kente kwéry remimbojevvy voi. Omboeteve va'erãgwe-pe omomba'e rei va'ekwe hereko-vy. Tekwaty e'ý-rupi oiko, opyta e'ý va'e. Yvyaty-rehe ogwata oiko va'e. Hóga e'ý va'e. Opa-rupi rei oiko va'e. Ojohu ha-py rei oke va'e. Onhemi nhemi oiko-vy ita kwa-rupi. Yvy kwa-rupi oiko ave. Upéa kwéry omboeteve va'erãgwe-pe, omomba'e rei joty hereko-vy kente kwéry. ³⁹Upe va'e kwéry yma gware ogwerovia tee-gwi, imandu'a porã hese

* 11:27 Êx 2.14-15 * 11:28 Êx 12.12-13,21-30 * 11:29 Êx 14.21-31 * 11:30-31 Js 6.12-21 * 11:30-31 Js 6.22-25; 2.1-21 * 11:32 Jz 6.11-8.32; 4.6-5.31; 13.2-16.31; 11.1-12.7; 1 Sm 1.1-25.1 * 11:33 Dn 6.1-27 * 11:34 Dn 3.1-30 * 11:35 1 Rs 17.17-24; 2 Rs 4.25-37 * 11:36 1 Rs 22.26-27; 2 Cr 18.25-26; Jr 20.2; 37.15; 38.6 * 11:37 2 Cr 24.21

kwéry Nhandejáry. Imandu'a porã ramo jepe, ne'írá ojapopa joty hese kwéry he'i hagwe-rami. ⁴⁰Nhande kwéry äygywa nhane ra'arõ joty ojapo porãve hagwã nhande kwéry-rehe. Nhandejáry he'i va'ekwe yma gware-pe nomboagwyjéi va'ekwe. Ha ko'anga katu äygywa ojapo-gwi inhe'ë, omboagwyje-ma íxupe. “Äygywa rehegwa nhe'ë onhemboagwyje rire, aroagwyje-ta ave yma gware-pe ahovasa-vy” he'i ojúepe Nhandejáry. Upéa-gwi äygywa ra'arõ-vy ne'írá ojapopa yma gware-pe he'i hagwe-rami.

12

Nhandejáry Nhande Ru voi (Pv 13.24)

¹Yma gware heta eterei oí Nhandejáry-rehe ojerovia tee va'e. Äy nhande rexaha-rami oiko. Opa-rupi nhande jerekwe-rupi oí nhande rexaháry. Upéa-gwi jaiko katu ohose happy pya'e oripara oho-vy va'e vérami. Pya'e ogwahëse-gwi, ndopyta pytái oripara ohovy. Ha'e heko-rupi jaiko katu. Gwí oripara va'e omboi oao pya'eve oripara hagwã. Ha'e omboykeha-rami onhembopohyiharãgwe, upéixa ave nhande nhamboyke nhandéhegwi tekoha vai. Pya'e a'e ipu'akase nhande-rehe tekoha vai. Ani ipu'aka hagwã-rami teí jaiko. Jaiko porã meme katu jajehexa uka porã hagwã nhande rexaháry-pe. ²Ha Hesu katu nhane renonde-py jareko katu jajehesa rerova uka meme katu jaiko-vy Hesu-rehe. Ha'e ojerovia tee va'e Nhandejáry-rehe. Ogwerovia ku'a ku'a e'ý va'e voi ha'e. Hesu rekoharami jaiko. Ha'e ojejuka uka-tama ramo kurusu-rehe, ndováí joty va'ekwe Nhandejáry rape-gwi. “Amano rire, anhemoinbove jevy rire, avy'a eterei joty va'erã” he'i ójehe Hesu. Upéa-gwi nopenái ójehe hembiaipo vai va'ety-rami kurusu-rehe ojuka-tama ramo íxupe. Omotí eterei ramo íxupe, nahakate'ýi joty ójehe. Upéa-gwi äy katu ogwapy-ma oí-vy Nhandejáry akatúa-koty. Ogwapy haty yke-rehe ogwapy-ma oí-vy. ³Pene mandu'a kena Hesu ojerereko asy hagwe-rehe. Ndaija'éi hese hekoha vai va'e ha ndováí joty Nhandejáry rape-gwi. Pene mandu'a kena hese pono pevy'are'ý, pono pejehesa rerova uka íxugwi. ⁴Tekoha vai-pe pejoko joko ramo, ne'írá pende juka. Upéa-gwi ani kena pende-rehe ipu'aka tekoha vai. ⁵⁻⁶Ani pende resaráí Nhandejáry nhe'ë-gwi. Tajýry, ta'ýry-rami pene mbopy'agwapy va'e inhe'ë. He'i Nhandejáry kwatia nhe'ë:

“Nhandejáry onhemonhe'ë joty gwembiaiyhu kwéry va'e-pe. Xe ra'y, xe rajy, he'i íxupe va'e gwive, túvy-rami ogwerekó asy íxupe oheko rerova uka-vy. Upéa-gwi pehendú mani inhe'ë, peë-my onhemonhe'ë jave. Pende rayhu-gwi ae pende rereko asy pende reko rerova uka-vy. Pene mbohasa asy ramo, ani joty kuri pende py'amirí teí.”

Upéixa he'i Nhandejáry kwatia nhe'ë.*

⁷Pehasa asy ramo jepe, pende rereko Nhandejáry gwa'ýry-rami joty. Upéa-gwi ani pende py'amirí teí pejerereko asy ramo jepe. “Gwa'ýry-rami xe rereko Nhandejáry” peje ae pendéjehe kwéry. Ndoikói mitã túvy ombohasa asy e'ý íxupe va'e oheko rerova ukavy. ⁸Nane mbohasa asyí ramo ra'e, ta'ýry tee ramo ndereikói arã ra'e. Túvy e'ý va'e-rami ereiko arã ra'e. ⁹Nde ru vvy pygwa ne mbohasa asy ramo jepe, eremboete joty íxupe ereiko-vy. Upéixa nhande ru vvy pygwa-pe nhamboete voi. Aipo ramo Nhande Ru yváy pygwa-pe nhamboeteve katu. Ani pehendú e'ý teí íxupe. Penheme'ë katu ae íxupe peiko tee hagwã hendive. ¹⁰Ha nhande ru vvy pygwa nanhane mbohasa asy aréry oiko-vy. Nhane mbohasa asyse ramo, sapy'a nhane mbohasa asy. Ha Nhandejáry nhane renohé porã nhande rereko asy-vy, jaiko marangatu hagwã heko-rupi. ¹¹Jajerereko asy jave, ndajarovy'ái voi. “Aiko asy voi” ja'e mo'ã nhandéjehe. Ha upe rite katu Nhandejáry rembiereko asy nhande heko-rupi jaiko. Nhande py'agwapy reheve jaiko. Heko teerupima jaiko.

Nhande rekoha a-rami

* 12:5-6 Pv 3.11-12; Jo 5.17

¹²⁻¹³ Ani pene ate'ŷ teĩ pene mytu'e'ŷ-gwi. Penhemokyre'ŷ ae peho meme hagwā tape porā-rupi. Penhembopy'agwasu katu pendéjehe, peho meme hagwā tape porā-rupi. Upéixa ramo gwĩ ogwerovia ku'a ku'a va'e ndohói arā ogwata porā e'ŷ va'e-rami. Onhepysanga sanga va'e-rami, ndogwatavéi arā. Oho ramo tape vai-rupi, okaráu va'e-rami onhemaxuka va'erā. Peho porā ramo ae, ogwerovia tee-ma va'erā.

¹⁴ Ani pejeteta teĩ. Enterová-pe ae pereko porā pende joja porā hagwā. Peiko marangatu katu. Pende reko marangatu e'ŷ rehe ndapehexái arā Nhandejáry-pe. ¹⁵ Penhangareko porā pendéjehe ani hagwā oiko pene pa'ũ-my ojehesa rerova uka va'erā Nhandejáry nhande rexakwaa rei va'e-gwi. Toiko e'ŷ pene pa'ũ-rupi pono pende resa rerovapa ójehe. Upeixagwa-pe he'i temitý hái hi'a va'e. Upe temitý okakwaa, hi'a. Upéi heta oĩ hi'upy e'ŷ jepe, ho'u joty. Ho'u-gwi ndoiko porávéi-ma. Upéa-gwi ani oiko pene pa'ũ-my pende akwaa rerovase va'e gweko-rupi. ¹⁶ Penhangareko porā pendéjehe. Toiko e'ŷ katu pene pa'ũ-my myamyrĩ Esaú rekokwe-rami oiko va'e. Ha'e otĩ kwaa e'ŷ va'e Nhandejáry-rehe nopenáiry oiko-vy. Ha'e túvy ra'y ppykwe jepe, ovende joty va'ekwe ojéupe Nhandejáry remime'erā. Ho'u va'erā-rehe, ombovare'a e'ŷharā-rehe ovende joty va'ekwe.* ¹⁷ Ha upe rire katu, “Eme'ẽ mani katu xe-vy nde ra'y ppykwe pegwarā eme'ẽ xe-vy” he'i mo'ã gwu-pe. “Ndikatuvéi-ma ame'ẽ va'erā nde-vy xe ra'y ppykwe pegwarā ae” he'i joty íxupe túvy. Hasẽ voi upe-ma ramo. Ojahe'o-vy ojerure rure ojéupe gwarā-rehe mo'ã. Onhemboasy ramo jepe, ndikatúí ome'ẽ íxupe. Ndikatúí ohekoviārõ gwembiapokwe. Gwemime'ẽgwe oipe'ase jevy ramo jepe, ndikatuvéi-ma ome'ẽ jevy íxupe gwa'ýry ppykwe pegwarā. Ha peẽ katu ani ha'e-rami pemoi ko yvy rehegwa-rehe anho pende resa.*

¹⁸ Āy ndapeikovéi-ma yma gware Israel kwéry amyri rekokwe-rupi. Ha'e kwéry oho ramo Nhandejáry renda-py, ogwahẽ oho-vy va'ekwe upe vyvaty-py héry va'e Sinai-py. Japoko hese va'e ha-py ogwahẽ va'ekwe. Tata ipoxy ramo, ohexa. Upe-py pytũ rei-ma, pyhare va'e-rami. Upe-py oĩ marány yvytu. ¹⁹⁻²⁰ Upe-py ohendu mimbygwasu nhe'ẽ. Onhe'ẽ va'e ohendu ave.*

“Ko vyvatyrusu onhegwahẽ e'ŷ va'e-rehe opyrũ va'e gwive, mymba nhu pygwa jepe opyrũ va'e gwive hese, tojejapi hu'y-py. Ita-py omano peve tojejapi, he'i onhe'ẽ va'e ojapo uka-vy.”*

Upéa nhe'ẽ omondýi-ma va'ekwe yma gware Israel kwéry-pe. Upéa-gwi ojerure rure Moisés-pe omombe'u e'ŷve hagwā íxupe upe onhe'ẽ va'e. ²¹ Ha Moisés katu onhemondýi voi: “Xe py'a rýryi xe kyhyje-gwi” he'i ójehe upe vyvaty-rehe oĩ va'e rexa-vy.*

²² Ha Āy katu ndapeikovéi-ma yma gware reko-rupi. Heková peiko Āy ogwahẽ oho-vy va'e-rami yváy pygwa vyvaty-py héry va'e Sião-py. Nhandejáry hekove tee va'e retā-my ogwahẽ oho-vy va'e-rami peiko. Upe-py oĩ yváy pygwa Jerusalém tetã, upe-py oiko heta eterei Nhandejáry rembigwái ojepapa e'ŷ va'e. ²³ Upe-py yváy-py ojogweroaty oiko-vy jave, ovy'a Nhandejáry ra'y ppykwe. Petéi teĩ héry va'e gwive onhemoi kwatia-rehe va'ekwe vérami, “Xe re'ýi tee” he'i hese Nhandejáry. Āy katu pemoirũ-ma peiko-vy Nhandejáry-pe. Ha'e hembiaapo apokwe-rehe enterová-pe ogwereco va'erā. Pemoirũ-ma ave gwĩ omano va'ekwe-pe gwive, “Ogweroagwyje ete-ma onhe'ẽ onhemopotĩmba ete-ma” he'i hese va'e Nhandejáry. Upéa rehegwa-pe pemoirũ-ma. ²⁴ Āy katu pemoirũ-ma peiko-vy Hesu-pe. Ha'e ojejuka uka va'ekwe nhande-rehe. Upéa-gwi Nhandejáry oiko-ma pende Járy ramo. He'ýi tee ramo peiko-ma peẽ. Abel amyri gwugwy mbyte-py ojejuka va'ekwe. Omano rire, “Xe repy katu, xe repy katu” he'i va'e-rami. Ha Hesu katu gwugwy mbyte-py ojejuka uka ramo, “Xe repy katu” nde'íry va'ekwe “Eiporiahuvereco katu íxupe” he'i gwĩ hugwy-py onhemopotĩ va'erā-rehe.*

* 12:16 Gn 25.29-34 * 12:17 Gn 27.30-40 * 12:19-20 Êx 19.12-22; 20.18-21; Dt 4.11-12; 5.22-27 * 12:19-20 Êx 19.12-13 * 12:21 2 Co 3.7-13 * 12:24 Gn 4.10

²⁵ Penhangareko porā pendéjehe. Ani ijapysa e'ý va'e-rami peiko teĩ. Yma gware nohenduséi va'ekwe ko vvy-py gwĩ Nhandejáry nhe'ẽ omombe'u va'e. Upéa-gwi ndaiporivéi va'ekwe hesendeharā. Áy katu nhahenduse e'ý ramo yváy-gwi omombe'u va'e, ivaive arā nhande-vy. Ndoikói arā voite nhane resendeharā. ²⁶ Yma omomyí va'ekwe Nhandejáry nhe'ẽ vvy. Ha áy katu he'i Nhandejáry kwatia nhe'ẽ:

“Amomyí jevy va'erā vvy. Áry yvate jepe peteígwe jevy joty amomyí va'erā, he'i. Ha upe rire katu namomyivéi-ma va'erā íxupe, he'i Nhandejáry”^{*}

he'i Nhandejáry kwatia nhe'ẽ. ²⁷ “Peteígwe jevy joty amomyí va'erā” he'i ko vvy opa va'erā-rehe. Upéixa jaikwaa Nhandejáry rembiaporā. Gwĩ jahexa va'e hembiapokwe gwiwe omomyí va'erā oipe'a hagwā, opyta hagwā jahexa e'ý va'e meme, omýi e'ý va'e meme opyta va'erā.

²⁸⁻²⁹ Nomýiry va'erā Nhandejáry nhande ruvixa ndive jaiko hagwā-py. Upéa-gwi nhatima porā katu Nhandejáry-pe nhande-vy hemime'ērā-rehe. Tata vérami nhande rapy va'e Nhandejáry rekoha. Gwĩ inhe'ẽ renduse e'ýha ohapy va'e-rami hekoha. Hemimbota-rupi jaiko va'erā nhamboete hagwā íxupe. Nhande py'a porā reheve, nhande py'agwapy ete reheve nhamboete íxupe. Upéa-gwi nhatima porā katu íxupe. Jakyhyje íxugwí pono nhamonhemboasy. “Tuvixave va'e voi Nhandejáry” ja'e nhamboete-vy íxupe.^{*}

13

Nhandejáry remimbota a-rami (1 Pe 2.11-12)

¹ Ani pehayhu e'ý teĩ pende re'ýi kwéry-pe. Pehayhu meme katu Hesu reroviaha-pe gwive. Peẽ kwéry Cristo re'ýi voi. Upéa-gwi ani pejohayhu e'ý teĩ. Pejohayhu rei ae katu peiko-vy. ² Ogwahẽ ou-vy ramo pende róga-py Hesu reroviaha peikwaa e'ý va'e, ani pembojevvy rei teĩ íxupe imondo-vy. Ogwahẽ ramo jepe peikwaa e'ý va'e, emogwahẽ porā joty íxupe. Oĩ he'i va'ekwe: “Egwahẽ katu” he'i gwĩ ogwahẽ ou-vy oikwaa e'ý va'e-pe. Oikwaa e'ý ramo jepe, ogwerohory joty ra'e Nhandejáry rembigwái yváy pygwa-pe omogwahẽ uka-vy.^{*} ³ Ani pende resarái gwĩ preso onhemoi uka va'ekwe-gwi. Hendive preso penhemoi va'ekwe vérami pene mandu'a meme joty hese. Ani ave pende resarái gwĩ ojerereko asy va'e-gwi. Hendive pejerereko asy va'e-rami ave joty pene mandu'a hese.

“Naiporái ereiko kunha ndive” nde'íry Nhandejáry nhande-vy. Nhane momandu'a uka va'e Nhandejáry nhe'ẽ voi. Iporā katu nhamboete nhane rembireko, nhane ména ave. Ha gwĩ onhemotí e'ý va'e, hapixa rembireko ndive hapixa ména ndive oiko va'evy katu, ogwerekó asy va'erā íxupe Nhandejáry. Upéa-gwi nhane rembireko ndive anhóte jaiko katu. Nhane ména ndive jajohayhu rei jaiko-vy.

⁵ Pirapire hetave va'erā-rehe anhóte ani peiko meme teĩ. “Tuvixave-ta vérami xe-vy pirapire. Pirapire aipotave tave xe jéupe gwarā” ani peje teĩ pendejéupe. “Avy'a xe rembiereko-rehe” peje ae pendejéupe. He'i Nhandejáry kwatia nhe'ẽ:

“Ndapoheja mo'áiry voi. Apomoirú meme va'erā”^{*}

he'i Nhandejáry nhande-rehe. ⁶ Upéa-gwi ani katu jakyhyje teĩ. He'i Nhandejáry kwatia nhe'ẽ:

“Nhandejáry ko xe pytygwōharā voi. Ndaipu'aka mo'ái xe-rehe teko rei. Naxe kyhyje mo'ávéi-ma xe”^{*}

he'i. Upéa nhe'ẽ nhamombe'u katu nhandejehegwa pono ojekwaa nhande-rehe nhane kangya, nhande py'agwasu reheve ae jaiko hagwā.

⁷ Ani pende resarái pene mbo'e mbo'ehare-gwi. Nhandejáry nhe'ẽ peẽ-my omombe'u mbe'uhare-rehe pene mandu'a ndu'a joty kuri. Mba'éixa oiko va'ekwe, mba'éixa omano va'ekwe peikwaa voi. Nhandejáry-rehe ojeroviave ave oho-vy hikwái. Upéa-gwi peiko

* 12:26 Êx 19:18; Ag 2.6 * 12:28-29 Dt 4.24; 9.3; Is 33.14 * 13:2 Gn 18.1-8; 19.1-3 * 13:5 Dt 31.6-8; Js 1.5

* 13:6 Sl 118.6

katu hekokwe-rami. ⁸Omano ramo jepe hikwái, ojehekoviariõ e'ÿ va'e Hesu Cristo. Omano e'ÿ va'e. Kwehe oiko hagwe-ramima joty oiko äy peve. Opa e'ÿ reheve ndojehekoviariõvéi-ma va'erã. ⁹Upéa-gwi gwí nhe'ë ambue-py pene mbo'ese va'erã-rehe ani pejehesa rerova uka teĩ. Ani pejeapysaka teĩ inhe'ë-rehe. “Ore reko-rami pekaru ramo, omombaraete va'erã pende py'a Nhandejáry” he'i mo'ã ramo peë-my, ani pejeapysaka teĩ inhe'ë-rehe. Gwí henduhare nonhemombaraetéi joty. Onhemombaraeteve ae nhande py'a nhande rovasa vasa-gwi Nhandejáry. Nhande rexakwaa rei-py nhanhemombaraete. Upéixa iporã nhande-vy. Upéa-gwi ani pejeapysaka teĩ inhe'ë-rehe.

¹⁰Äy apomomandu'a-ta judeu reko rehegwa nhe'ë-rehe. Gwí pa'i kwéry oiko joty judeu reko-rupi Nhandejáry-pe ijukapyrã ome'ë-vy mo'ã. Omoirüse-vy mo'ã ho'u ijukapyre ha nomoirü joty Nhandejáry-pe. Upéixa ramo ndikatúí ha'e kwéry omoirü Cristo nhande-rehe ojejuka uka va'ekwe-pe. Ndaiporivéi-ma ho'u va'erã onhemombaraete hagwã. Äy gwí ijukapyre ho'u joty-vy onhemombaraetese va'e mo'ã, ndikatúí joty nhane ndive omoirü Cristo nhande-rehe ojejuka uka va'ekwe-pe. ¹¹Judeu kwéry va'e pa'i ruvixagwasu ogweroike heraha-vy ijukapyre rugwy. Koty imarangatu ete onhegwahë e'ÿ ha-py ogweroike. Upe-py ome'ë Nhandejáry-pe omboyke hagwã mo'ã judeu kwéry-gwi hembiaapo vaikwe. Hugwy ogweraha koty-py ha hetekwe katu ogwenohë heraha-vy tetã-gwi. Ohapy hagwã-py tetã jerekwe-rehe ogweraha.* ¹²Upéa-gwi tetã jerekwe-py ave ojejuka uka va'ekwe Hesu gwugwy avyte-py, omopotí hagwã nhande py'a jajejavy rire. ¹³⁻¹⁴Upéa-gwi nhamoirü katu Hesu-pe. Gwetã oheja oho-vy va'e-rami, jaha nhamoirü hagwã íxupe heko-rupi jaiko hagwã. Hese onhembohory hagwe-rami ave, onhembohory va'erã nhande-rehe. Ko yvy-py ndaipóri nhane renagwã opa e'ÿ va'erã. Nhamoĩ meme ae nhande resa yváy pygwa nhane renagwã opa e'ÿ va'erã-rehe. Upéa-gwi nhamoirü katu Hesu-pe. Gwetã oheja oho-vy va'e-rami jaiko Hesu moirüse-vy. ¹⁵Upéa-gwi nanhame'ëvíi-ma Nhandejáry-pe ijukapyrã. Hekovia Nhandejáry remimbota ae katu nhame'ë íxupe. Nhamboete meme katu Nhandejáry-pe ae, nhande-rehe ojejuka uka-gwi Hesu Cristo. Héry nhamomba'egwasu nhamombe'u-vy ramo, hemimbota nhame'ë íxupe. ¹⁶Pejapo porã meme katu pende rapixa-rehe. Ani pene rakate'ÿ teĩ pene mba'e-rehe. Hemikotevë peme'ë katu íxupe. Upéa pejapo ramo, pende rerohory va'erã Nhandejáry pene rembiaporehe. Yma gware reko-rupi ijukapyrã ome'ë joty va'e-pe ndojohu porãvéi-ma. Pene rembiapo porã-rehe ae pende rerohory va'erã.

¹⁷Hesu reroviaha rerekwa he'i va'e pejapo katu. Pehendu katu inhe'ë. Orepapa oiko-vy pende rekove-rehe peho porã hagwã-rehe. “Mba'éixa jarepara va'erã hekove-rehe xe monhe'ë va'erã Nhandejáry” he'i ojeupe pende-rehe. Upéa-gwi pehendu katu inhe'ë. Pehendu ramo, ovy'a va'erã pende-rehe onhangareko-vy. Ha pehenduse e'ÿ ramo katu, pembovy'are'ÿ va'erã íxupe, ndapeiko porãí va'erã. Ha ndovy'ái ramo pende rerekwa naporãí arã peë-my.

¹⁸Pembojeupi upi katu pene nhe'ë Nhandejáry-pe ore-rehe. Ore rembiapo porãse meme oroiko-vy. Ipotí ore py'a. Upéa-gwi ndoikói voi ore py'apy-py “Erejejavý-ma” he'i va'e vérami ore-vy. ¹⁹Aipota eterei pejapo oração xe-rehe pya'eve xe mogwahë hagwã pende ha-py Nhandejáry.

Onhe'ë paha

²⁰Omano rire Nhandejáry Hesu, omoingove jevy íxupe Nhandejáry nhande rerekwagwasurã. Gwugwy mbyte-py ojejuka uka-gwi Nhandejáry Hesu, he'ÿí meme voi nhande. Nhandejáry ruvixa tee voi ha'e. Omano rire omoingove jevy íxupe Nhandejáry nhande rerekwagwasurã. Nhandejáry nhane mbopy'agwapyhaty voi. ²¹Tapende rovasa porã porã katu hemimbota gwive pejapo hagwã. Hesu Cristo ojapo uka hagwã peë-my hembijohu porã tapende rovasa katu. Tonhemomba'egwasu meme katu opa e'ÿ reheve. Upéixa aipota. Amém.

Omondo uka omandu'aha

* 13:11 Lv 16:27

²² Xe re'íyí, naxe nhe'ě mbuku etéíry kwatia-rehe amoĩ va'ekwe. Upéa-gwi pene kyre'ỹ reheve pehendú katu, pende rekorā amombe'u ramo peě-my anhemonhe'ě-vy. ²³ Timóteo rehegwa nhe'ě amombe'u-ta peě-my. Preso onhemoĩ ha-gwi, osě jevy-ma oho-vy. Pya'e ogwahě ou-vy ramo xe ha-py araha-ta íxupe. Pende ha-py aha ramo, araha-ta íxupe ave.

²⁴ Amondo uka-ta xe mandu'aha Hesu reroviaha rerekwa-pe gwive. Hesu reroviaha-pe gwive amondo uka-ta ave xe mandu'aha. Nhande re'íyí Itália yvy pygwa omondo uka-ta ave peě-my omandu'aha. ²⁵ Tapende rovasa vasa katu Nhandejáry pende rexakwaa rei-vy.

Tiago remimombe'ukwe epístola de Tiago

¹ Xe Tiago Tupā Nhandejáry rembigwái. Nhandejáry Hesu Cristo rembigwái ave xe. Amondo uka-ta kwatia-rehe xe nhe'ê peẽ-my gwarã. Peẽ judeu kwéry Hesu reroviaha va'e opa-rupi judeu e'y kwéry pa'ü-my peiko va'e ahai-ta peẽ-my. Mba'éixa pa peiko, xe re'yí kwéry?

Jaiko asy ramo jepe, nhande reko vy'a reheve joty tajaiko katu

(Lc 6.22-23; Rm 5.3; 1 Pe 4.14)

²⁻⁴ Opaixagwa nhande mbovy'are'y va'e pende johu meme para'e. Upéixa jaiko ramo ndaha'úi jarova hagwã nhande rekoha Nhandejáry-gwi. Nhane mbojerovia tee hagwã-rehe ójehe oheja upe va'e ojehu nhande-vy. Upéixa-gwi jahasa asy ramo jepe nhande reko vy'a reheve tajaiko katu. Ha peẽ katu, xe re'yí kwéry, pende-rehe ndija'úi ramo Hesu-rehe ndojeroviái va'e, pende rereko asy ramo jepe, pende reko vy'a reheve joty tapeiko katu. Pende rasy ramo jepe, pende poriahu verei ramo jepe, pende reko vy'a reheve joty tapemondo katu pende resa Nhandejáry-rehe. Pehasa asy ramo jepe ani joty perova teĩ pende resa Nhandejáry-gwi, xe re'yí kwéry. Ndaha'úi nhane mbovy'are'y hagwã rei jahasa asy. Nhane mombaraete hagwã-rehe ae nhane mbojerovia tee hagwã-rehe ae ójehe Nhandejáry oheja nhane mbohasa asy va'erã ojehu nhande-vy. Upéixa jajerovia tee ramo jaiko arã inhe'ê-rupi jaipyhy porãve arã nhane arandurã. Hesu remimbota jajapo kwaa va'erã. Upéixa ramo he'i va'erã peteĩ teĩ nhande-rehe “Ipy'a ijagwyje-ma oiko-ma xe nhe'ê-rupi” he'i va'erã Hesu nhande-rehe.

⁵ “Xe arandu mbyky eterei. Ndajapo kwaái Nhandejáry remimbota.” Aipo ere para'e ndejeupe nde py'apy-py erenhemongeta-vy. Aipo ramo ejerure katu íxupe ne arandurã-rehe: “Ajerure nde-vy xe arandurã-rehe. Nde mante xe mo'arandu-ta”. Upéixa ere arã íxupe. Ha'e ohendu arã voi ne mo'arandu hagwã. Ipy'a porã eterei-gwi ha'e ome'ê meme va'e nhande-vy nhane remikotevê. Upéixa ramo nde a'o e'y reheve nde rexakwaa rei arã ne rembjerure ome'ê-vy. ⁶⁻⁸ Ereporandu jave Nhandejáry-pe “Ome'ê-ta xe-vy, tapa nome'ê mo'ái xe-vy” ani aipo ere teĩ. Ani upéixa erereko mokõi nhe'ê nde py'a-py. Inhe'ê mokõi va'e oiko yguasu vvytu omomyiha-rami. Ojere jere oiko-vy. Nhande, Hesu-rehe jajerovia va'e ndikatúi jaiko upéixa. Inhe'ê mokõi va'e-pe Nhandejáry nome'ê mo'ái hembjerure, ndojerovia teí-gwi hese.

Ani ne mba'e reta-rehe anho erevy'a

⁹⁻¹⁰ Peẽ ae pevy'a katu Hesu re'yí kwéry voi peẽ. Ojoha'e-rami meme pende rereko Nhandejáry pejerovia-gwi hese. Pevy'a katu. Ambue kwéry nde rereko asy ramo jepe, nane mba'e retái ramo jepe, evy'a katu eiko-vy. Nhandejáry nde rereko-ma gwa'yry-rami gwajýry-rami ave. Ha nde, Hesu re'yí jepe ne mba'e reta reta erereko vyteri va'e. Gwekogwypyve-rami nde rereko ramo jepe evy'a katu. Nhandejáry-rehe mate erevy'a va'erã. Yvoty pya'e ipoty piruha-rami voi ndahi'aréi va'erã imba'e reta reta rei va'e. ¹¹ Kwarahy osê ramo, kwarahy ojope-ma ramo, ipoty piru-ma yvoty. Ombopirupa-ma kwarahy. Upéixa ave omba'e reta-rehe anho rei oiko va'e oiko. Hetave ogwereco hagwã-rehe omba'apo jave, ipiru ete ho'a hagwã oho-vy. Upéixa-gwi ne mba'e reta reta jepe, nde rereko ramo gwekogwypyve Hesu-rehe ha-py evy'a joty eiko-vy. Peẽ, Hesu reroviaha kwéry, pevy'a meme katu peiko-vy.*

Jejavy rehegwa nhe'ê

¹² Oiko asy ramo jepe Hesu-gwi ojevy e'y joty va'e ovy'a voi joty oiko-vy. Nhandejáry rape-gwi ndojeréi joty-gwi ome'ê va'erã íxupe hekove opa e'y va'erã. “Xe rayhu va'e-pe ame'ê va'erã hekoverã opa e'y va'erã” he'i va'ekwe-gwi ome'ê va'erã íxupe.

* 1:11 Sl 102.4,11; Is 40.6-8

¹³ Erehasa asy rei ramo erenhemongeta ramo nde py'a ndive ereva hagwā erejevavy hagwā, ani ere teĩ “Xe mbojevavy ukase para'e Nhandejáry. Xe mbova ukase para'e Nhandejáry” ani peje teĩ. Ndaipóri voi Nhandejáry-gwi inharanduve va'e ombojevavy uka hagwā Nhandejáry-pe. Ha'e ave nhane mbojevavy e'y va'e voi. Avave-pe nombojevavy ukasei Nhandejáry. Nhandejáry heko porā va'e voi.

¹⁴ Nhandejéhegwi voi nhanhetantea nhande ae jajejavy hagwā. “Xe mbo'e vai-gwi, ajapo vai” oĩ he'i va'e mo'ã. Ndaha'ei upéixa. Nhandejéhegwi ae jajapo vai. Nhande py'a-py jajapose va'e ae-gwi, nanhembotavy. ¹⁵ Nhande pu'akavéi-ma nhandéjehe jajejoko kwaa hagwā. Jajejavy joty. Jajapose-gwi rei jajapo. Nhandejéhegwi nhanohê nhane rembiaporā jajapo va'erā. Upéixa-gwi nhane rembiapo vai nhandejéhegwi rei mante jajapo. Nhane rembiapo vai eterei ramo nhane mboyke arā ojéhegwi Nhandejáry.

¹⁶ Ani nenhembotavy xe re'yí kwéry, xe rembiayhu kwéry.

¹⁷ Nhandejáry-gwi ou mba'e porā. Opa mba'e iporā va'e imarāne'y va'e ome'ẽmba nhande-vy. Ha'e ojapo va'ekwe entéro tesapeha yváy pygwa. Kwarahy ojapo va'ekwe. Jasy ave, jasytata ave, jasytatagwasu ave ojapo va'ekwe. Hemimoingokwe va'e heko ambue mbue. Ha'e ae peteĩ tekoha ogwereco. Kwarahy okanhy va'e. Jasy oiko rei va'e. Nhandejáry ae katu tekoha peteĩ ogwereco. Iporā meme joty hekoha Nhandejáry.

¹⁸ Ojéhegwi voi gwemimbota-rupi nhande poravo va'ekwe gwe'yirā. Nhe'ẽ anhetegwa va'e jarovia. Upéa-rupi nhane moingo gwe'yí ramo entéro gwembiapokwe-gwi nhane moporāseve Nhandejáry.

¹⁹ Upe va'e peikwaa xe re'yí kwéry, xe rembiayhu kwéry. Upéixa-gwi ekirirĩ porā eikovy erejeapysaka porā hagwā nhe'ẽ-rehe. Ani erenhe'ẽ erepenza e'y reheve. Eha'arõ nde rapixa onhe'ẽ ranhe hagwā. Ani ave pende poxy pya'e a'e teĩ. ²⁰ Nhande poxy rei rei ramo ndajajokói Nhandejáry rekoha-rupi. Hemimbota ndajajapóry. ²¹ Upéixa ramo ani pende poxy rei rei ojúpe. Epoi kena nde poxy rei reiha-gwi.

Opa nde rekoha rei-gwi epoi ave. Anive ne mandu'a ne rembiapo vairā-rehe. Nhandejáry nhe'ẽ-rehe ae katu ne mandu'a. Ha'e omoi-ma onhe'ẽ nde py'apy-py. Erovia kena inhe'ẽ kuri erejehoko kirirĩ-vy. Inhe'ẽ-rupi ereiko ramo ne resendete va'erā Nhandejáry.

²² Pehendu kena inhe'ẽ. Oĩ inhe'ẽ ohendu rei va'e, ojapo e'y va'e, onhembotavy va'e. Ani upe va'e reko-rupi ereiko. Nhandejáry nhe'ẽ remimombe'u ejapo kena. Ndereroviái ramo inhe'ẽ erenhembotavy rei-ma arā ereiko-vy.

²³⁻²⁴ Jahexa nhane ra'anga epéco-py. Jajere rire ndajahexavéi-ma nhane aýgwe. Pya'e nanhane mandu'avéi-ma hese. Upéixa ave Nhandejáry nhe'ẽ ndogweroviái va'e. Ohendu ramo ohendu rei ha ojere oho ramo opa jevy-ma íxugwi.

²⁵ Anhetegwa tee va'e Nhandejáry nhe'ẽ. Nhane mo'arandu Nhandejáry reko-rupi jaiko hagwā ponove ipu'aka nhande-rehe tekoha vaiha. Nhahendu-ma ramo nanhongatuma ramo nhande py'apy-py Nhandejáry nhe'ẽ nokanhy mo'ávéi-ma va'erā nhandéhegwi. Hemimombe'ukwe-gwi ndajava java mo'ávéi va'erā. Nhane mandu'a porā meme va'erā Nhandejáry nhe'ẽ-rehe. Upéa-rehe opamba'e nhane rembiapo gwive ohovasa meme va'erā nhande-vy Nhandejáry.

²⁶ Nhande'ẽ rei rei ramo nhande rapixa-pe, ja'e rei arā nhandéjehe “Ajerovia-ma Hesu-rehe”. Upéixa ramo nanhembotavy rei mante va'erā jaiko-vy.*

²⁷ Áy amombe'u-ta nde-vy mba'éixa pa Nhandejáry Nhande Ru yváy pygwa oipota ójehe ojerovia va'e oiko. Ha'e nhane mo'arandu gwemimbota-rupi jaiko hagwā. Oipota nhaipytygwõ tyre'y oiko va'e-pe, ime omano va'ekwe va'e-pe ave nhaipytygwõ pono ohasa asy oiko-vy. Oipota ave japoi nhane rembiapo vaise hagwe-gwi. Upéixa nhande reko ramo, “Erejerovia tee-ma xe-rehe” he'i va'erā nhande-vy Nhandejáry.

2

Nhandejáry Hesu Cristo-rehe ojerovia va'e ndogwereco joavy avyí va'erā gwapixa-pe

* 1:26 Sl 34.13; Tg 3.2-12

¹ Tapejapysaka katu xe nhe'ẽ-rehe xe re'yi kwéry, Nhandejáry Hesu Cristo reroviaha kwéry. Peteixa jaiko-ma Nhandejáry ipu'aka marangatu tee va'e ndive. Upéixa-gwi peteixa tapejogwereco porã meme rei katu. Oĩ imba'e reta va'e-pe ogwereco porã va'e ha iporiahu va'e-pe katu ndogwereco porã peteixa. Upéixa ani teĩ pejogwereco joavy avy imboete-vy.

²⁻⁴ Peteixa ndapejogwereco reíry ramo ojogweroaty ha-py ou va'e-pe, niporã voi. Ijao porã va'e-pe, ikwãirũ hepyve reheve ou va'e-pe eremboeteve ramo ijao porã e'ỹ va'e-gwi, niporã voi nde rekoha. Upéixa ramo erereko joavy avy imboete-vy Hesu-rehe ojerovia va'e kwéry-pe. Ijao porã va'e-pe mante henagwã porãrã eremombe'u ramo, nerepenái jave iporiahu va'e-rehe, eremboete joavy avy íxupe kwéry. “Enhembo'y rei eĩ-vy” ere ramo iporiahu va'e-pe, “Yvy-py egwapy” ere ramo eremboete e'ỹ-vy íxupe, niporã voi upéixa erereko joavy avy ramo nde rapixa kwéry-pe. “Ipy'a porãha ojehexa voi ijao porã-rehe voi” ere ramo ijehexa rei omboete va'e-rupi ereiko. Nerenhemongeta porã voi nipo ra'e nde py'apy-py. Imboetepyrã-rupi nderekói. Ani upéixa nde reko joavy teĩ avave-pe.

⁵ Tapejapysaka porã kena xe nhe'ẽ-rehe, xe rembiayhu kwéry. Nhandejáry oiporavo meme iporiahu va'e kwéry-pe ojerovia porã hagwã ójehe. “Xe rayhu va'e-pe aiko arã huvixarã ramo” he'i. “Xe moirũ tee va'erã hikwái” he'i va'ekwe Nhandejáry. Ha'e he'i hagwe-rami ave ojapo meme. ⁶Upéa-rehe napene mandu'avéi para'e. Napemboetéi ramo iporiahu va'e kwéry-pe, Nhandejáry reko-rami e'ỹ peiko íxupe. Ma'erã tipo. Napene mandu'avéiry imba'e reta va'e rekoha-rehe. Ha'e kwéry pende rereko asy rei voi. Pende jokwái rei rei. Pende reraha rei ave mburuvixa renda-py ojapo hagwã pende-rehe ojapose va'e. ⁷Onhe'ẽ rei ave Nhandejáry Hesu Cristo-rehe. Inhe'ẽ reroviaha va'e-rehe onhe'ẽ vai ramo, Nhandejáry Hesu Cristo-rehe ae onhe'ẽ vai.

⁸ “Ne ndivegwa-pe ehayhu kena nde reko erehayhuha-rami ave”*

ohai uka va'ekwe Nhandejáry Nhande Ruvixa nhande rekorã-rehe. Erejapose ramo inhe'ẽ tekotevẽ erehayhu rei enterová-pe. ⁹Penhombote joavy avy ramo, pene rembiapo vai-ma voi. Upéa-rehe Nhandejáry nhe'ẽ erejapo e'ỹ ramo, ojekwaa-ma voi nde-rehe nde reko jejavyha.

¹⁰ Oĩ heta Nhandejáry nhe'ẽ Moisés amyri remimombe'ukwe nhande rekorã. Upe mixi jepe ndojapói va'e osẽ joty inhe'ẽ-gwi. Opyta osẽmba ete va'e-rami. “Osẽmba ete xe nhe'ẽ-gwi” he'i hese Nhandejáry. ¹¹Onhe'ẽ-py he'i va'ekwe “Ani eremenda menda reise teĩ ereiko-vy” he'i va'ekwe. “Ani ereporojuka teĩ” he'i ave va'ekwe onhe'ẽ-py. Aipo ramo Nhandejáry remimombe'ukwe rendu-gwi nomenda mendái teĩ oiko-vy va'e oporojuka ramo osẽ-ma hemimombe'ukwe-gwi. Hemiapo vai joty.*

¹²⁻¹³ Aipo ramo nhamondo kena nhande resa nhane renonderã-rehe. Ogwahẽ arã peteĩ áry Nhandejáry nhande rereko reko hagwã nhane rembiapo apokwe-rehe. Hesu remimbota-rupi e'ỹ joty jaiko ramo ndojohu porã arã nhande-rehe. Hemimbota-rupi ae jaiko ramo ojohu porã arã nhande-rehe. Upéa-rehe ha'e-ta peẽ-mi pende reko peheja kena ipogwy-py. Tapejoporihuvereco rei kena enterove va'e ndive. Ndajaiporiahuverekói ramo nhande-rehe ndija'ei va'e-pe, Nhandejáry ave nanhande poriahuverekói ave arã. Jaiporiahuvereco ramo enterová-pe Nhandejáry ave nhande poriahuvereco ave va'erã. Ovy'a va'erã nhande-rehe ojohu ramo nhane rembiapokwe.

Nhandejáry-rehe jajerovia teha rehewga nhe'ẽ

¹⁴ Ndajarovái ramo nhande rekoha “Ajerovia-ma Hesu-rehe” ja'e ramo, ja'e rei. Upéixa ramo ndovaléi-ma voi nhande jeroviaha mo'ã, xe re'yi kwéry.

¹⁵⁻¹⁶ Pene mandu'a kena iporiahu va'e-rehe. Nhane nhe'ẽ-py rei jahovasa ukase ramo, gweko-rupi joty oiko iporiahu va'e. Oĩ ramo nhane pa'ũ-my Hesu reroviaha iporiahu va'e pene nhe'ẽ rei-rupi napeipytygwõi va'erã íxupe. “Nhandejáry tande rovasa katu nde ao repyrã ereheka-vy” peje rei íxupe. “Nhandejáry tane mbopy'agwapy katu ne rembi'u repyrã ereheka hagwã” peje rei ave íxupe. Pene nhe'ẽ-py rei pehovasa ukase

* 2:8 Lv 19.18 * 2:11 Êx 20.13-14; Dt 5.17-18

mo'ã Nhandejáry-pe. Iporiahu joty va'erã voi. ¹⁷ Upéixa ave nhane rembiapo porã e'ý reheve “Ajerovia-ma Hesu-rehe” ja'e ramo, ja'e rei ójehe. Nhande reko tujakwe-rupi joty jaiko.

¹⁸ Oĩ para'e pene pa'ũ-my gwĩ xe remimombe'u ombojevuse va'e: “Ndaha'etí peteixa nhande reko nhande Nhandejáry ndive jaiko porã va'e kwéry” he'i rei va'erã. “Oĩ hese ojerovia tee va'e. Oĩ ave hembiapo porã rei va'e” he'i rei va'erã. “Mokõive ambovy'a va'erã Nhandejáry-pe” he'i rei va'erã nhande reko-rehe. “Xe, xe rembiapo porã-rehe ambovy'a Nhandejáry-pe. Nde ae, Ajerovia-ma Hesu-rehe ere-gwi nde ave erembovy'a íxupe. Ndaha'etí peteixa nhande reko nhambovy'a hagwã íxupe” he'i rei arã nhande reko-rehe.

Aipo peje ramo, aipo ramo tanhemonhe'ẽ xe peẽ-my. Mba'eixa-rami po ereiko arã Hesu reroviaha ramo ne rembiapo porã e'ý reheve? Mba'eixa-rami po ereikwaa arã nde ae nde jeroviaha? Xe ae xe rembiapo porã-rupi aikwaa uka enterove-pe Hesu-rehe ajeroviamaha. Iporã voi nhande reko nhambojoja nhane nhe'ẽ ndive.

¹⁹ “Peteĩ anho Tupã Nhandejáry” peje nipo ra'e. Upéa peje ramo anhetegwa voi ne nhe'ẽ. Upéa mante ere ramo ae ne'írã ererovia porã-ma íxupe. Anháy kwéry upéixa ave he'i hese. Onheresende e'ý hagwã jepe icyhyje-ma íxugwi.

²⁰ Pende tavy vyteri nipo ra'e. Napene mandu'avéi-ma nipo ra'e hekoha porã e'ý reheve oiko jave he'i ramo “Arovia-ma Hesu” ndovaléi voi ijeroviaha. Upéa nhe'ẽ pemokanhy-ma nipo ra'e pendejéhegwi.

²¹ Upéixa-gwi apomomandu'a jevy-ma Abraão amyri rekokwe rehegwa nhe'ẽ-rehe. Gwekoha porã reheve ojerovia va'ekwe Nhandejáry-rehe hemimbota ojapo-vy. Ome'ẽ hagwã Nhandejáry-pe ojuka-ta mo'ã va'ekwe gwa'yry Isaque-pe. Nhandejáry omboete-vy hemimbota ojapo-vy, ojuka-tama ramo Nhandejáry he'i “Ojerovia tee nipo ra'e xe-rehe. Xe remimbota ojapo hagwã nahakate'yi gwa'yry-rehe. Oiko xe nhe'ẽ-rupi. Ipy'a potĩ-ma Abraão” hei hese.* ²² Ojerovia tee hese oiko-vy-gwi Nhandejáry remimbota ete ojapo va'ekwe oiko-vy Abraão. Ohexa uka ijeroviaha gwembiapo porã-rupi. ²³ Upe rire Nhandejáry he'i kwatia-rehe onhe'ẽ-py: “Abraão ojerovia Nhandejáry-rehe. Ojerovia tee ójehe-gwi, Ipy'a potĩ-ma, he'i hese Nhandejáry.” “Xe irũ tee-ma voi Abraão” he'i ave hese.*

²⁴ Upéa-rehe nhane mandu'a ramo jaikwaa arã ave: Ojerovia rei hese va'e nombovy'ái Nhandejáry-pe. Ohexa porãse ave nhande rekoha nhande-rehe Nhandejáry “Ipy'a potĩ-ma” he'i hagwã nhande-rehe.

²⁵ Upéixa voi ave Raabe amyri Nhandejáry reroviaha-rupi hembiapo porã va'ekwe. Kunha ikwimba'ese va'e jepe upe hembiapo porã-rehe “Ipy'a potĩ” he'i joty va'ekwe hese Nhandejáry. Josué amyri remimondo va'e-pe Raabe omogwahẽ porã va'ekwe gwóga-py. Ojaho'i íxupe imonhemi hagwã. Tape ambue-rupi omondo ijukaharãgwe-gwi iresende-vy. Upe hembiapo porã-rehe Nhandejáry he'i hese “Ipy'a potĩ-ma” he'i hese.*

²⁶ “Hesu-pe arovia-ma” ja'e ramo nhane rembiapo porã e'ý reheve, hetekwe ndovaleveiha-rami ave ndovaléi nhande jeroviaha.

3

Nhande juru ipu'aka nhande-rehe

¹ “Xe ave, amombe'use Nhandejáry nhe'ẽ poromo'aranduha-rami” ere ramo, pe-pejapsaka kóa xe nhe'ẽ-rehe, xe re'yí kwéry. Ogwahẽ arã nhande óra nhane rembiapokwe-rehe nhane monhe'ẽ hagwã Nhandejáry. Ore oroporomo'arandu va'ekwe-pe ore rereko asyve va'erã Nhandejáry ore rembiapo vaikwe-rehe. Upéa-gwi ha'e-ta peẽ-my iporãve ndahetái pene pa'ũ mygwa oiko inhe'ẽ poromo'aranduhaty.

* 2:21 Gn 22.1-14 * 2:23 Gn 15.6 * 2:25 Js 2.1-21

²Nhande kwéry, enterove, nanhane arandúí voi. Jajejavy javy voíte jaiko-vy. Nhande juru nhane mbojejavy rei ave. Ha nanhanhe'ê reíry ramo mba'eve-rehe ndajajejavýí arã ra'e. Upéixa ramo ndajajejavýí arã ra'e, nhande pu'aka tee arã ra'e nhandéjehe.

³Pene mandu'a porã kena. Kavaju juru-py nhamoĩ imbogwataharã. Mixĩ jepe ogwerogwata porã ojáry-pe kavaju. Ijáry oipota ha-rupi oho joty kavaju.

⁴Kanoagwasu tuvixa vixa va'e-rehe pene mandu'a ave. Imbogwataha mixĩ jepe ogwerova joty kanoagwasu ijáry-pe. Imbogwataha-rehe imbogwatase ha-rupi, ogweraha joty ojáry-pe. Yvytu hatã vai-rupi jepe oho joty.

⁵Ha'e ramigwa voi nhande juru. Nhande rete rehegwa mixĩ voi nhande juru. Mixĩ ramo jepe ipu'aka tee joty heta mba'e-rehe.

Nhande mandu'a kena tata-rehe ave. Mixĩmi oĩ ramo hesa'imi ramo jepe ojepota joty. Henda-ma oho-vy. Nande pu'akavéi-ma hese. Ka'agwygwasu jepe ohapypa voi oho-vy. Tuvixa va'ekwe jepe ohapypa voi.

⁶Upéixa ete nhane nhe'ê ojepyso oho-vy. Tata-rami voi anháy rembiporu-rami nhande juru. Nhande'ê hetave ramo nhande reity vaive ive oho-vy nhande juru. Nhande rapypa va'erã nhande juru.

⁷Jaipota ramo nhande pu'aka opaixagwa mymba kwéry-rehe nhamománsó hagwã. Ka'agwy rupigwa mymba jepe, mymba oveve va'e jepe, osyryry va'e jepe, ygwasu rupigwa jepe nhande pu'aka voi hese.

⁸Nhande juru-rehe ae avave ndaipu'akái. Ndajajoko kwaíi nhande juru. Nanhande rereko kirirĩ kwaíi nhande juru. Nanhanhe'éséi ramo jepe nhande'ê voi joty. Jaiporu rei nhande juru. Mbóí nhande su'u va'e-rami nhande juru nhande mbohassa asy va'erã.

⁹Jaiporu nhande juru nhamboete hagwã Nhandejáry-pe. Ha upe rire katu nhande'ê vai nhande rapixa-rehe. Gweko-rami nhane moingo va'ekwe Nhandejáry. Aipo ramo, nhande'ê rei ramo nhande rapixa-rehe, Nhandejáry rekoha-rami hemimoingo va'ekwe-rehe nhande'ê rei ave. Upe va'e naiporãí voi.

¹⁰Upéixa ramo peteí nhande juru-gwi osê nhe'ê vai nhe'ê porã ave. Omboete joavy onhe'ê vai ndive. Niporãí upéixa nhande rekoha, xe re'yí kwéry.

¹¹Ygwa-gwi peteíxa osê y. Y he'ê va'e osê ramo ndikatúí osê y iro va'e íxugwi. Peteí ygwa-gwi peteíxa meme osê. Nhande juru ae ndaha'éiry upeixagwa. Osê jopara nhane nhe'ê.

¹²Figo máta-gwi noséiry azeitona oliveira'a. Uva máta-gwi ndajaipe'ái figo. Upéixa ave peteí ygwa-gwi nanhanohê mo'ái he'ê va'e, y iro va'e ndive. Upeixagwa e'y nhande juru. Naiporãí voi upéixa nhande reko, xe re'yí kwéry.

Arandu Nhandejáry remime'ê rehegwa nhe'ê

(1 Co 2.6-7)

¹³Tekotevê nhande reko porã reheve jaiko, xe re'yí kwéry. Oĩ ramo pene pa'ũ-my inharandu porã va'e ombojekwaa va'erã ójehe gwekoha porãha. Hexaha e'y jepe onhemboete e'y reheve jepe inharandu porã-gwi gweko kirirĩ reheve ojapo arã gwembiapo porãrã rei.

¹⁴Nhande py'a-py nhandejéupe gwarã mate jaipota meme ramo, nhande rapixa ogwerekó va'e-rehe nhapena rei rei ramo, nhandehemohemoyrô ramo, "Xe arandu porã-ma xe" ja'e rei mo'ã nhandéjehe. Ani upéixa teí nhande apu nhandéjehe, xe re'yí kwéry.

¹⁵Aipo ramo jaiko ramo, nhane arandu vérami mo'ã nhandejéupe. Nhandejáry nome'êi upeixagwa arandu nhande-vy. Nhane akã-gwi rei upe va'e. Teko rei-gwi ae upe va'e ave, anháy reko ae upe va'e.

¹⁶Nhande rapixa ogwerekó va'e-rehe nhapena rei rei ramo, nhandejéupe gwarã jaipota eterei ramo, ndajajohúí ramo, nanhande py'agwapyvéi va'erã. Jaikwaa e'y reheve nhande ayvupa rei arã ojéhe. Nhandehomohé'ê mbojevvy jevy rei va'erã. Nanhande reko jojái va'erã onhondive. Opáixagwa mba'e vai ave jajapo arã nhane pa'ũ-rupi.

¹⁷Nhandejáry remimombe'u-rupi ae nhane arandu ramo nanhane rembiapo vaivéi-ma va'erã. Nhande py'agwapy va'erã peteíxa onhondive. Nhande reko kirirĩ reheve

jaogwereco va'erā. Nanhanhe'ē asýi arā ojóupe. Jahexakwaa va'erā nhande rapixa-pe hemikotevê nhamē-ē-vy. Nanhane rakate'yí va'erā mba'eve-rehe. Nhande rembiapo porā porā rei va'erā ojóupe.

¹⁸ Nhande py'agwapy reheve jaiko ramo, ija'e'yí va'e ojóehe nhambojoja porā jevy va'erā imbopy'agwapy-vy onhondive. Temitygwe járy oha'arō ojaty va'ekwe hi'a hagwā. Upéixa ave nhaha'arō jaiko-vy nhande py'agwapy reheve Nhandejáry rekoha tee-rupi jaiko hagwā.

4

Yvypóry remimbota rehegwa nhe'ē

¹ Niporāi voi pende rekoha. Penhonhe'ē mbojevvy jevy nipo ra'e peiko-vy onhondive. A'e'yí rei nipo ra'e pereko ojóehe. Ma'erā-gwi upéixa peiko? Ndéjehe rei mante nipo erenhemongeta ngeta ra'e nde py'apy-py. Ne remimbota ndéjeupe gwarā-rehe mante nipo ne mandu'a ra'e. Upéixa-gwi peē ojoekoha-rehe napende a'éiry.

² Ne mba'e porārā ndererekói va'e-rehe mate nipo ne mandu'a meme ra'e. Nde reko porāverā mo'ā-rehe peiko rei-vy. Ndererekói-gwi ereporojukase mo'ā nipo ra'e ne rembijukakwe mba'ekwe erereko hagwā mo'ā ne ma'erā. Imba'e ndererekói-gwi nipo erenhe'ē mbojevvy jevy ne a'e'yí-vy nde rapixa-rehe ra'e. Ne remimbota nderehupityí nipo ra'e Nhandejáry-pe nderejeruréi-gwi ra'e.

³ Ne remimbotarā-rehe erejerure ramo Nhandejáry-pe, nome'ēi nde-vy nde-vy gwarā. Nome'ēi pono ne rembiapo vairā upe erejapose va'e ereiporu ramo. Ndaha'ēi Nhandejáry rekoha-rami ereiko hagwā ereipota upe ne rembijerure. Ne akā-gwi rei ereikotevê e'yí reheve ereipota upe va'e. Nde rory rei hagwā mo'ā ne mba'erā ereipota rei. Upéixa-gwi nome'ē mo'āi nde-vy ne rembijerurekwe.

⁴ Nhandejáry-gwi katu erejere jere rei nipo ra'e. Nane mandu'avéi-ma nipo ra'e kóarehe: Nhamoirū meme ramo teko rei va'e-pe nanhande a'ēi ave Nhandejáry-rehe. Upe va'e nhe'ē okanhy-ma para'e ndéhegwi. Upéixa-gwi eremoirūse meme ramo Nhandejáry-rehe ija'e'yí va'e, nde ave nande a'ēi va'erā Nhandejáry-rehe.

⁵ Nhandejáry nhe'ē ojehai va'ekwe nhande-vy nhahendu hagwā he'i va'ekwe nhande-vy:

“Nhandejáry omoī-ma nhande py'apy-py Nhe'ē Marangatu tee va'e. Hakate'yí voi nhande-rehe Nhe'ē Marangatu tee va'e. Ha'e oikwaa ukase va'e-rehe oipota nhande mandu'a meme nhandemongeta-vy, hemimbota anho mante jajapo hagwā.

Hakate'yí voi nhande-rehe Nhe'ē Marangatu tee va'e.”*

Upe va'e nhe'ē ojehai rei ra'e peē-my gwarāgwe voi nipo ra'e.

⁶ Hembiaapo porā meme nhande-vy Nhandejáry nhande pytygwō tygwō voi. Upéa-rehe oī ave inhe'ē kwatia-rehe ohai va'ekwe:

“Nhandejáry ombojevvy va'erā onhembotuvixamba'e ukase va'e. Onhembotuvixase e'yí oiko va'e-pe ae ohexakwaa porā rei Nhandejáry”*

he'i va'ekwe Nhandejáry ohai uka-vy.

⁷ Aipo ramo penhemōi katu Nhandejáry yke-rehe. “Ndaikoséi voi xe anhaygwasu nhe'ē-rupi” peje kena. Upéixa ere ramo opoi arā ndéhegwi anhaygwasu.

⁸ Enheme'ē katu Nhandejáry-pe ijyke rehegwarā. Ome'ē arā nde-vy ne arandurā. Ha'e ho'arandu-rupi nde rereko. Ha'e nde yke-rehe onhemōi va'erā. Epoi katu ne rembiapo vaiseha-gwi. Ha nde, nde rekoha porā ra'anga va'e erova katu nde rekoha. Enhemongeta ngeta Nhandejáry remimbota-rehe mate ponove erejere jere ereiko-vy íxugwi.

⁹ Nde reko vai eterei-gwi enhemboasy kena. Nde rekoha vaikwe-rehe ejahe'o ave. Anive ne rembiapo vai reheve erepuka puka teí ereiko-vy. Erejahe'o rei-vy hese eiko katu. Anive erevy'a teí ne rembiapo vaikwe-rehe. Erenhemboasy-vy eiko katu nde rekoha vaikwe-rehe.

* 4:5 Êx 20.1,5; 1 Co 6.19 * 4:6 Pv 3.34

¹⁰ Penhembohekogwypve Nhandejáry-pe “Xe pytygwō katu, xe Járy. Xe arandu e'ý ramo ndaxe pu'akáiry xéjehe. Ndaiko kwaái nde reko-rupi” peje kena Nhandejáry-pe pene moingo haggwā tekoha porā-rupi. Ha'e pene pytygwō va'erā pende rovasa porā va'erā.

Ani erenhe'ē rei rei nde rapixa-rehe

(Mt 7.1-5; Lc 6.37-38; Rm 2.1-3; 14.1-4,10; 1 Co 4.5)

¹¹ Ani penhe'ē rei rei ojóhe xe re'ýi kwéry. Nhande rapixa-rehe nhande'ē rei rei ramo nhande'ē rei ave Nhandejáry nhe'ē-rehe. Moisés amyri remimombe'ukwe judeu re'ýi rekoharā-rehe nhande'ē rei ave. Nhande rapixa jajohu vai ramo, “Ivai” ja'e hese anho mo'ā. Nhandejáry nhe'ē Moisés amyri rembihaikwe-rehe ave aipo ja'e ave. Upéixa ramo ndajakovéi Moisés amyri rembihaikwe pogwy-py. Nhande ae nhandemoi rei jajohu haggwā hembihaike-rehe.

¹² Nhandejáry petei va'e anho oiko omombe'u haggwā mba'eixagwa nhande reko jaiko porā haggwā ondive. Petei anho nhande reko johu kwaa va'e. Ha'e anho nhane resende kwaa va'e. Ha'e anho nhane hundi kwaa ave. Ndajáiry erejohu vai nde rapixa rembiapokwe. “Eresē-ma Nhandejáry remimombe'ukwe-gwi” ani ere tei íxupe.

Ko'ē ramogwarā-rehe ndajakwaái mba'eve

¹³ Pejeapysaka porā katu ko xe nhe'ē-rehe. “Jaha katu mombyry upe tetā ambue-py” peje nipo ra'e ojóupe. “Áy jaha” “Ko'ē ramo jaha” peje nipo ra'e ojóupe peiko-vy ra'e. “Nhamba'apo-ta upe-py. Nhande are-ta petei mba'e agwyje-rupi upe-py nhamba'apo-vy. Upe rire ae jaju jevy va'erā” peje nipo ra'e ojóupe. Upéixa pene nhe'ē ramo pejeapysaka katu ko xe nhe'ē-rehe.

¹⁴ Mbava'e tipo peikwaa peē ko'ē ramo ojehu va'erā. Mba'eve. Ndapeikwaáiry pende rekoverā-rehe. Hatafi otimbo va'e-rami voi nhande rekoha. Sapy'ami anho jahexa, okanhymba jevy-ma. Upéixa ave nhande reko. Nanhande are aréi ko yvy-py. Sapy'a nhamano jevy va'erā. Avave ndoikwaái nhande óra nhamano haggwā.

¹⁵ Upe va'e-rehe iporāve petei tei peje “Nhandejáry oipota ramo ajapo-ta upéixa” peje. ¹⁶ “Ko'ē ramo aha-ta upe-py” “Ko'ē ramo ajapo-ta upe va'e” ere nde rekorā-rehe erevy'a-vy. Upéixa ere ramo, “Xe remimbota-rupi aiko” ere nipo ra'e. “Nhandejáry remimbota-rupi aikose” nderáiry ndéjehe. Upéixa pene nhe'ē rei.

¹⁷ Nhandejáry nhe'ē nahendu rire hemimombe'u-rupi ae tekotevê jaiko. “Iporā” ja'e-ma ramo hese tekotevê jaiko inhe'ē-rupi. Hemimombe'u e'ý jajapo ramo “Ojere xe nhe'ē-gwi” he'i va'erā nhande-rehe. “Ojevavy-ma xe-vy” he'i va'erā nhande-rehe Nhandejáry.

5

Imba'e reta va'e pegwarā nhe'ē

(Lc 12.15-21; 1 Tm 6.7-10)

¹ Peē, pene mba'e reta reta va'e kwéry, pejeapysaka porā kena xe nhe'ē-rehe. Áy pene mba'e reta ramo jepe pehasa asy joty arā peē. Upéa-rehe penhemboasy mani pejahe'o kena.

² Pene mba'ekwe itujupa-ma va'erā. Pende ao porāgwe osoropa va'ekwe raso ho'u-ma va'erā. Ndahyvera porāvéi-ma pene mba'ekwe. ³ Pene mba'e hepy va'e pende ouro, pende plata ave havēmba-ma va'erā. Pereko rei-ma pene mba'e reta. Ndovalévai-ma pene mba'e. “Omba'e reta-rehe hakate'ý rei nipo ra'e. Ndovaléi voi” he'i arā pende-rehe pende rexaháry. “Omono'ō no'ō rei nipo omba'e reta gwekoha porārā mo'ā haggwā ra'e ojéupe gwarā. Hakate'ý te'ý rei nipo ra'e” he'i va'erā pene momba'u-vy. Pene rembiapo vai-gwi, tata-py okái va'e-rami erehasa asy va'erā. Pemono'ō rei peē-my gwarā. Nhandejáry ae ohexa tee voi. “Ivai eterei ne rembiapokwe” he'i va'erā peē-my.

⁴ Pende kokwe-py omba'apo va'e-pe ndapepaga poráiry. Pereko asy eterei pene rembigwái-pe. Upéa pene rembiapo vaikwe-rehe ha'e kwéry pene momba'u-ma Nhandejáry-pe. “Ore rerekoha ore mbohasa asy asy” he'i-ma Nhandejáry-pe pende-rehe. “Onhembigwái vai ore-rehe. Omono'ō ojéupe gwarā ha nome'ē mo'ái ore rembiapo repy

ore-vy” he'i pene mombe'u-vy Nhandejáry-pe. Ojeporiahuvereco uka Nhandejáry-pe pene rembigwái kwéry: “Ore repy katu ore mbohasa asyhare-pe. Embohasa asy jevy íxupe” he'i ave Nhandejáry-pe. Ha Nhandejáry yváy pygwa, nhande ruvixagwasu ipu'aka tee va'e ohendu-ma upe pene rembigwái nhe'ê. Oiporiahuvereco-ma íxupe kwéry.

⁵ Ko yvy ári peiko jave pevy'a pene mba'e-rehe. Pejapose va'e rei pejapo. Pejogwase va'e pejogwa ave. Opaixagwa rei pereko yvy arigwa peiko va'e. Pekaru porá porá penhemongyra rei peiko-vy. Heta rei pene rembi'u. Pejapose va'e rei pejapo. Upéa-rehe Nhandejáry pene mondo-ta pende rereko asy hagwā-py pene rembiapo vaikwe-rehe. Ma'e mymba vérami íjary omongaru va'e peê ave pene mongyra pende juka uka hagwā.

⁶ Hemiapo vai e'ý va'e-pe “Ne rembiapo vai eterei” peje rei va'ekwe. Pejuka rei va'ekwe ave hemiapo vai e'ý va'e-pe. Ndaipu'akái mba'eve ojapo hagwā pende-rehe jave pejuka íxupe.

Nhande kwerái e'ý reheve nhaha'arō Nhandejáry-pe jaiko-vy

⁷ Upe va'e-gwi, xe re'ýi kwéry, Hesu reroviaha, pende reko pyatā joty katu pekirirí-vy peiko pende rereko asy ramo jepe. Peiko marangatu katu pende rereko asyha-pe. Nhandejáry Hesu ou jevyha áry-rehe peha'arō katu. Ani pende kwerái tei ha'arō-vy. Kokwe-py nhandemity ramo nhaha'arō va'e-rami nhaha'arō katu Nhandejáry-pe. Nhaha'arō ama nhandemity hagwā. Oky rire katu jajaty henhói hagwā. Oky jevy ramo, nhaha'arō íxupe ombohi'a porá hagwā. Oky hagwā nhaha'arō kwaa joty.

⁸ Upéixa ave ani pende kwerái tei ha'arō-vy Nhandejáry Hesu ou jevy hagwā-rehe. Agwí-ma ou jevy hagwā óra. Upéa-rehe peha'arō porá kena peiko-vy.

⁹ Ani pejoheko mombe'u mbe'u tei, xe re'ýi kwéry. “Hekoha vai ko” ani peje tei pende rapixa-rehe. “Ne rembiapo vai va'e ko nde” ani ave peje rei tei íxupe ani hagwā Nhandejáry he'i nde-vy “Nde rekoha vai voi ko nde” he'i nde-vy. Agwí-ma ogwahē hagwā óra. Ha'e anho mate omombe'u kwaa nhane rembiapokwe-rehe.

¹⁰ Pene mandu'a kena myamyri rekokwe-rehe, Nhandejáry nhe'ê-py omombe'u va'etykwe rekokwe-rehe. Yma va'ekwe ha'e kwéry Nhandejáry pogwy-rupi omombe'u mbe'u va'ekwe inhe'ê. Inhe'ê-gwi ndojereséi-gwi ohasa asy ramo jepe, omombe'u mbe'u joty va'ekwe inhe'ê. Nonhe'êi joty ombohasa asyhare-pe. Upéixa nahemiapo váiry ha'e kwéry. Ha peê katu pehasa asy jave, pene mandu'a kena myamyri rekokwe-rehe. Ha'e-rami peiko porá kena, xe re'ýi kwéry. Ani pene rembiapo vai tei pene nhe'ê-rupi.

¹¹ Upe myamyri kwéry-rehe ja'e “Ovy'a voi Nhandejáry nhe'ê mombe'uhatygwe. Ohasa asy jepe omombe'u joty inhe'ê. Ogwerovia kwaa araka'e Nhandejáry-pe” ja'e hese. Pene mandu'a kena Jó amyri-rehe. Ha'e ojerovia voi va'ekwe Nhandejáry-rehe. Ohasa asy asy jepe, heko pyatā joty oiko-vy. Ojerovia tee joty va'ekwe Nhandejáry-rehe pono inhe'ê-gwi ojere gwemiapo vairá apo-vy. Pene mandu'a kena. Oiporiahuvereco joty ave Jó-pe Nhandejáry. Upéi ombopyahupa jevy íxupe imba'e retave hagwā. Upéixa voi Nhandejáry iporá porá voi nhande-vy. Oiporiahuvereco va'e Nhandejáry.*

¹² Pejeapsaka porá kena xe re'ýi kwéry. Ani ereiporu ambue va'e réry erembojerovia uka hagwā ne renduha-pe ne nhe'ê-rehe. Ani ereiporu yváy, yvy réry ave ne renduha kwéry ogwerovia hagwā ne nhe'ê. “Ajapo-ta” ere ramo, ejapo katu. Nderejaposéi ramo “Ndajapo mo'ái” ere katu. Ani nde apu rei tei. Anhetegwa mate pemombe'u katu. Upéixa nde reko pyatā ramo ne nhe'ê rei jepe ogwerovia arā ne renduha. Ha nane mbohasa asyí va'erā Nhandejáry.*

¹³ Pehasa asy ramo pemondo pene nhe'ê Nhandejáry-pe. Pevy'a ramo, peporahéi katu Nhandejáry-pe pemboete-vy.

¹⁴ Nde rasy ramo, erehenói uka katu Hesu reroviaha rerekwa-pe ou hagwā nde rexa. Ou rire, ojerove va'erā Nhandejáry-pe ne mbogwera hagwā. Omoí arā mixi nhandy ne akā-rehe a-rami he'i-vy: “Nhandejáry Hesu réry-py amoí-ta ne akā-rehe ko nhandy” he'i arā nde-vy.

* 5:11 Jó 1.21-22; 2.10; 42.10,12; Sl 103.8 * 5:12 Mt 5.34-37

¹⁵ Upéixa he'i ramo, ombogwera va'erã hasy va'e-pe Hesu ójehe ojerovia-gwi. Hesu omopu'ã jevy va'erã íxupe. Ha oĩ ramo hembiaapo vaikwe, omboyke va'erã íxugwi oresende hagwã.

¹⁶ Upéa-gwi iporã nhande Hesu reroviaha va'e nhanhemombe'u katu ojóupe jajejavy hagwe “Amboasy-ma xe rembiapo vaikwe” ja'e ojóupe nhanhemombe'u-vy. Nhandejáry-pe ave nhanhemombe'u nhane mboasyha. Tajajerure kena nhandéjehe nhane mbogwera hagwã Nhandejáry. Opy'a ete gwive ojerure va'e-pe ohexa uka opu'akaha Nhandejáry hembijerure ome'ẽ-vy.

¹⁷ Ymagware Nhandejáry nhe'ẽ-py omombe'u va'etykwe, Elias amyri oiko va'ekwe. Nhande-rami oiko va'ekwe voi Elias. Yma va'ekwe omondo mondo onhe'ẽ Nhandejáry-pe “Anive eromongy ore-vy” he'i ojerure-vy. Ha ndokyvúi va'ekwe íxupe kwéry. Hembijerurekwe ojapo va'ekwe íxupe Nhandejáry. Inhe'ẽ rendu-vy omongy po'o-ma íxupe. Are-ma voi oky po'o tee-ma. Mbohapy ro'y haimete jevy ogwahẽ outro ro'y-py ohasa va'ekwe oky e'ỹ reheve.

¹⁸ Upe rire ae-ma Elias amyri ombojeupi jevy onhe'ẽ Nhandejáry-pe oky jevy hagwã-rehe. “Xe Járy” he'i “emongy jevy katu ore-vy” he'i Tupã Nhandejáry-pe ojerure-vy. Inhe'ẽ ohendu-gwi Nhandejáry omongy jevy íxupe kwéry. Oky porã jevy-ma íxupe kwéry. Henhói porã jevy-ma va'ekwe temitygwe. Elias amyri rekokwe-rami peiko katu. Pende py'a ete gwive pembojeupi pene nhe'ẽ Nhandejáry-pe pene mbaraete-vy. Perovia íxupe pene rembijerure ra'arõ-vy.

¹⁹ Xe re'yi kwéry, Hesu reroviaha va'e, oĩ para'e pene pa'ũ-my Nhandejáry rape porã-gwi ojere jere va'e. Penhemonhe'ẽ katu íxupe kwéry ogwerova hagwã gwekoha onhembohekoha porã jevy hagwã.

²⁰ Pene mandu'a kena Nhandejáry rape-gwi ojere va'e-rehe. Jarojevy ramo íxupe hekoha porã hagwã-rupi jevy oiko hagwã, oheja hagwã gweko vaikwe oiko porã jevy hagwã Nhandejáry ndive, nharesende íxupe. Nhandejáry nomondói va'erã íxupe ohasa asy hagwã-py. Omboyke va'erã íxugwi hembiaapo vaikwe. Heta heta hembiaapo vaikwe jepe omboykepa joty va'erã íxugwi.

Pedro remimombe'ukwe 1 primeira epístola de Pedro

Pedro omondo kwatia nhe'ê Hesu Cristo reroviaha kwéry táva ambue mbue-py oyvy e'y-py oiko va'e pegwarã

¹ Xe Pedro Hesu Cristo remimondo va'e. Amondo uka-ta kwatia-rehe xe nhe'ê peẽ-my gwarã. Peẽ Nhandejáry reroviaha kwéry pende yvy e'y-py peho peiko-vy araka'e. Penhemosarambipa araka'e peho-vy pene retã-gwi. Nhandejáry reroviaha e'y va'e pa'ũ-rupi táva ambue mbue-rupi peiko va'e. Peẽ Ponto yvy-py peiko va'e, Galácia yvy-py peiko va'e ave, peẽ Capadócia yvy-py peiko va'e ave, Ásia yvy-py peiko va'e ave, yvy ambue Bitínia-py peiko va'e pegwarã ahai-ta.

² Nhandejáry pende poravo va'ekwe ojéupe gwarã. Yma va'ekwe “Upéa xe rembiporavorã” he'i va'ekwe pende-rehe kwéry Nhandejáry, Nhande Ru. Gwe'yirã voi pende poravo va'ekwe hekoha-rami peiko hagwã. Nhe'ê Marangatu tee va'e omopotimba-ma peteĩ teĩ va'e pende py'a Hesu Cristo remimbota pejapo meme hagwã Hesu omanoha-rupi pene resende hagwã.

Tapende rovasa katu pende rexakwaa porãve rãve rei hagwã Nhandejáry. Tapene mbopy'agwapy tee katu pende rovasa-vy.

Nhande rekove pyahurã ome'ê-ma nhande-vy nhande poriahuvereko-gwi Nhandejáry

³ Tanhamboete katu Nhandejáry-pe “Nde tuvixa” taja'e Hesu Cristo Ru-pe nhamboete-vy. Nhande poriahuvereko eterei Nhandejáry. Nhande rekove pyahurã ome'ê-ma nhande-vy nhande poriahuvereko-gwi. Ha'e omopu'ã jevy-ma va'ekwe Hesu Cristo-pe. Omano tee rire omoingove jevy joty va'ekwe íxupe. Upéa-gwi nhande rekove pyahu teerã-rehe nhaha'arõ jaiko-vy íxupe. “Oikove jevy-ma Nhandejáry Hesu Cristo. Upéa-gwi aikwama ou jevy-ta xe reraha hagwã, opa e'y reheve aiko hagwã hendive” ja'e voi Hesu Cristo ra'arõ arõ jaiko-vy. ⁴ Ha Nhandejáry katu “Anhongatu-ma peẽ-my gwarã yváy-py”, he'i voi va'ekwe nhande-vy. Upéixa-gwi nhaha'arõ arõ joty jaiko-vy íxupe. Opa e'y va'erã onhembyai e'y va'erã onhehundi e'y va'erã upe va'e onhongatu-ma va'ekwe Nhandejáry nhande-vy gwarã. ⁵ Mba'e vai-gwi onhangareko meme nhande-rehe Nhandejáry. Hese pejerovia tee-gwi opu'akaha-rupi onhangareko pende-rehe oiko-vy. Pende py'a potĩ tee hagwã pende rekove-rehe onhangareko. Hesu Cristo ogwejy jevy tee ha'óra ohexa uka-ta entéro va'e-pe pene nhangareko porã memeha pende py'a potĩ teeha ohexa uka-vy.

⁶ Upéa-rehe peẽ pevy'a voi katu. Pehasa asy ramo jepe, sapy'a penhemboasy ramo jepe, tapevy'a joty kuri. Penhemboasy óra ohasa va'erã. Hi'are e'y va'e, ko yvy rupigwa mate peẽ-my pene mbohasa asy arã.

⁷ Nhandejáry oipota pejerovia tee ójehe, ojekwaa hagwã pende rekoha-rehe pejerovia teeha hese. Upéa-gwi pehasa asy peiko-vy. Oĩ ouro hepy va'e. Imokanhymba reipyrã ramo jepe, nhamoĩ joty íxupe tata-py itantea-vy. Nhambohyku ojekwaa hagwã ouro ra'angakwe ouro tee-gwi.*

Upéixa voi peẽ kwéry. Tuvixa mba'eve Nhandejáry-pe peẽ kwéry ouro-gwi, hese pejerovia-gwi. Aipo ramo ouro nhatantea va'e vérami pehasa asy ojekwaa porãve hagwã pende-rehe pejerovia teeha. Upéixa ramo Hesu Cristo ojehexa uka jevy hagwã óra-py pene mboete va'erã. “Xe-rehe ojerovia tee va'e. Ohasa asy jepe va'ekwe, ojeroviave ave joty xe-rehe” he'i arã pende-rehe pene momba'egwasu-vy.

⁸ Peẽ katu ndapehexái vyteri Hesu Cristo-pe. Pehexa e'y ramo jepe peyahy joty voi íxupe. Ha ko'ây ndapehexái ramo jepe pejerovia tee joty ave hese. Upe va'e-rehe pevy'a voi. Peẽ-my peteĩ teĩ-pe yváy-gwi ou va'ekwe pende py'apy gwive pende vy'aha. Haimete

* 1:7 Rm 8.17-18; 2 Co 12.9; Tg 1.2-4; 1 Pe 4.12-13

nome'êi nhamombe'u hagnwã mba'eixagwa iporã pende py'a vy'aha. ⁹Peteĩ teĩ pejerovia-ma araka'e Hesu Cristo-rehe. Upéixa-gwi omopotĩ-ma peteĩ teĩ pende py'a. Upéa-rehe pevy'a tee joty peiko-vy.

¹⁰⁻¹¹ Yma ete myamyri Nhandejáry nhe'ê-py omombe'u va'ety kwéry omotenonde va'ekwe imombe'u-vy: “Nhandejáry pende rexakwa rei va'erã pene resende-vy. He'yirã peiko va'erã” he'i peteĩ teĩ omombe'u-vy va'ekwe pende rehegwa nhe'ê. Ha Cristo rehegwa nhe'ê omohenonde-ma ave va'ekwe. “Ogwereko asy va'erã upe va'e-pe” he'i va'ekwe Cristo-rehe. “Upe heta-ma ohasa asy va'e-pe Nhandejáry omomba'egwasu ete va'erã, oiko va'erã Nhande Ruvixa ramo” he'i ave va'ekwe Cristo rekorã omohenonde-vy. Ha Cristo Nhe'ê Marangatu tee va'e ipy'apy-py oiko va'e oikwaa uka va'ekwe íxupe kwéry aipo va'e nhe'ê omohenonde hagnwã imombe'u-vy.

Ha kiva'e rehegwa omombe'u uka íxupe ndoikwaa ukái vyteri íxupe kwéry. Nomombe'úi voi íxupe kwéry araka'e pa oiko va'erã. Oikwaase eterei-gwi ojerure rure Nhandejáry-pe: “Xe mo'arandu katu, xe Járý. Upe va'e ne nhe'ê amombe'u kuri araka'e pa oiko va'erã? Araka'e pa ogwahê va'erã ne remimbou? Mba'éixa pa ogwahê va'erã? Xe ave, ahexa-ta para'e íxupe? Xe mo'arandu katu, xe Járý. Aikwaa porãseve voi íxupe” he'i peteĩ teĩ va'e Nhandejáry-pe.

¹² Ha Nhandejáry oikwaa uka va'ekwe peteĩ teĩ-pe: “Ndaha'úi va'erã nde-vy gwarã ne remimombe'ukwe” he'i íxupe. “Áygwa ndohexái va'erã upe va'e ne remimombe'ukwe” he'i íxupe. “Ne remiariõ joapy rire mate ohexa va'erã ne remimombe'ukwe” he'i va'ekwe peteĩ teĩ-pe Nhandejáry.*

Ha peẽ katu, ãy peikwaa-ma. Pehendu-ma Cristo rehegwa nhe'ê. Ou-ma pende hapy Cristo-rehe omombe'u mbe'u va'e. Nhe'ê Marangatu tee va'e, yváy-gwi ou va'e pene mo'arandu-ma. Imbaraeteha-rupi pene mbo'eháry omombe'u peẽ-my anhete teegwa voi Cristo rehegwa nhe'ê. Ha upe nhande-vy iporã va'e Cristo rehegwa nhe'ê-rehe oikwaaase eterei mo'ã ave yváy pygwa, Nhandejáry rembigwái kwéry.

Nhandejáry nhande pe'a-ma va'ekwe nhande py'a potĩ reheve nhane rembiapo porãve rãve hagnwã jaha-vy

(1 Ts 2.10-12)

¹³ Upéa-rehe tapenhangareko reko porã katu peiko porã hagnwã. Ani pemondo teĩ pende resa Hesu Cristo rekoha e'y-rehe. Pejejoko katu pene kyre'y hagnwã Nhandejáry remimbota mate pejapo hagnwã. Hesu Cristo ojehexa uka jevy hagnwã óra ani pemokanhy teĩ pendejéhegwi. Nhande rovasa-vy voi ou va'erã ha'e. Upéa-rehe tapene mandu'a meme katu Nhandejáry nhe'ê-rupi peiko hagnwã. ¹⁴ Mitã inharandu porã gwu nhe'ê ohendu va'e-rami peẽ ave pehendu katu Nhandejáry nhe'ê. Anive pejapose va'e rei pejapo teĩ. Anive pene arandu e'y reheve, inhe'ê rendu e'y reheve rei pejapo teĩ pene rembiapose rei va'e.

¹⁵ Nhandejáry katu hembiaipo vai e'y va'e voi. Imarangatu tee va'e. Hembiaipo marangatu tee-ma voi oiko-vy. Pende pe'a-ma araka'e pejerovia hagnwã ójehe. Upéixa-gwi ha'e-rami voi ave katu tapeiko kena pende py'a potĩ reheve pene rembiapo porã meme hagnwã hendive. ¹⁶ Upéa-rehe Nhandejáry nhe'ê kwatia-rehe oĩ va'e he'i:

“Xe-ma xe reko marangatu tee va'e ko xe. Upéixa-gwi peẽ ave pende reko marangatu reheve tapeiko kena”*

he'i Nhandejáry kwatia nhe'ê.

¹⁷ “Xe Ru” peje ra'e íxupe pene nhe'ê pembojeupi ramo. Xáke, nhande kwaa voi va'e ha'e. Ndohejái refy hembiaipo ku'a ku'a va'e. Ndaha'úi oa'e e'yha-rehe anho ojapo va'e Nhande Ru yváy pygwa. Ombojoavy e'y va'e voi ha'e. Peteĩ teĩ nhande reko johu kwaa. Upéa-rehe nhane monhe'ê va'erã. Upe rire nhande reko hagwe-rehe omombe'u va'erã nhande-vy nhande rekorã. Upéixa-gwi ko yvy-rupi peikoha vapy peve ani pehasa teĩ inhe'ê.

¹⁸ Peikwaa voi pende rekohakwe kwéry. Nhane ramoigwasu amyri gwekohakwe rei oheja nhande-vy. Ha Nhandejáry nhande pe'a upéa tekoha-gwi nhande repy gwe'yirã

* 1:12 Mt 13.17; Lc 10.23-24 * 1:16 Lv 11.44-45; 19.2

ramo jaiko hagwā. Peē katu, pene mandu'a porā kena mbava'e po ome'ē nhande repy-vy. Ko vvy pygwa hepy va'e nome'ēi. Nome'ēi prata. Nome'ēi ave ouro nhande repy-vy. Upe va'e opa va'erā. Iporāve va'e ome'ē. ¹⁹Pende repy-vy Cristo omano va'ekwe. Pende rekove-rehe gwugwy-rupi omano va'ekwe pende repy-vy.

Yma va'ekwe nhande ru amyrī kwéry oiporavo ovexa ra'y iporāite va'e imarā e'y va'e ojuka hagwā Nhandejáry-pe ijáry rembiapo vaikwe repy-vy. Upe ovexa ra'y-rami ave Cristo omano va'ekwe. Imarā e'y va'e voi Cristo nhande-rehe ha-py omano va'ekwe.

²⁰Ha yma ete ko vvy nomoingói vyteri jave Nhandejáry oikwaa-ma va'ekwe Cristo omano-ma hagwā. Oiporavo va'ekwe íxupe ijuka uka hagwā. Ha upe rire katu, oiko arema rire ko vvy, haimete jevy ko vvy opa jevy hagwā óra, ogwahē-ma va'ekwe ou-vy Cristo. Ou-ma va'ekwe nhande rayhu nhande rovasa hagwā.*

²¹Cristo-rehe jajerovia-gwi jajerovia ave Tupā Nhandejáry-rehe. Omano va'ekwe pa'ũ-gwi ha'e omoingove jevy va'ekwe Cristo-pe. Omomba'egwasu ete ave íxupe. Upéixa-gwi jajerovia Tupā Nhandejáry-rehe nhaha'arō ave Cristo-pe nhande rovasa tee hagwā.

²²Perovia-ma araka'e nhe'ē anhete va'e. Nhandejáry nhe'ē-pyma peiko-ma pene mopoti tee-ma. Upéixa-gwi tapehayhu kena Cristo reroviaha kwéry-pe. Pende py'a gwive tapejohayhu rei katu pejogwerovy'a-vy.

²³Mitā oiko ramo tuvy, isy-pe ko vvy arigwa-pe, túvy-rami, isy-rami voi oiko íxupe. Upéixa ave Nhandejáry nhane mbopy'apyahu ramo jaiko-ma íxupe ta'yry ramo, tajyry ramo ave. Nhande Ru yváy pygwa opa e'y va'e. Inhe'ē opa e'y va'e-rupi pene mbopy'apyahu pende rekove pyahu reheve peiko-ma hagwā opa e'y reheve. ²⁴Upéa-rehe inhe'ē kwatia-rehe oĩ va'e he'i:

“Kente kwéry kapi'i ramigwa voi. Hemimomba'egwasu yvoty ramigwa. Kapi'i ipirupa.

Yvoty ipoty kúu-ma. Upéixa ave kente kwéry, hemimomba'egwasu gwive yvoty okúu va'e pirukwe-rami voi. Ndahi'aréi va'erā.

²⁵Ha Nhandejáry nhe'ē katu opa e'y va'e voi”*
he'i Nhandejáry nhe'ē kwatia-rehe oĩ va'e.

Ha peē katu pehendu-ma upe nhe'ē. Omombe'u-ma peē-my Cristo rehegwa nhe'ē.

2

Itagwasu óga pytahoha-rami oiko Hesu Cristo gwe'yí kwéry-pe imombaraete hagwā

¹Upéa-rehe tapejeko katu opamba'e ivai va'e-gwi. Anive pende py'a vai pende a'e e'y-vy ojóehe. Pejohayhu katu. Anive ave peporombotavy. Anhetegwa tee va'e mate pemombe'u va'erā. Anive ave pende juru mymýi rei ojóehe. Anive ave peipotapa rei teĩ. Ne mba'e erereko va'e-rehe anho katu evy'a. Anive ave penhe'ē vai ojóehe. Opa mba'e ivai va'e-gwi tapejeko kena.

^{2,3}Pejohu porā nipo ra'e Nhandejáry py'a porāha. Pende poriahuvereko meme-gwi pejohu porā-ma ra'e. Aipo ramo pene kyre'y katu peikwaa porāve rāve hagwā hesegwa nhe'ē. Mitā ikambuhéi va'e-rami peē ave peheka heka katu pene arandurā. Kamby porā tee-rehe okakwaa mitā. Peē ave Nhandejáry nhe'ē pehendu porā ramo pene arandu porāve rāve va'erā pende rekoha porā reheve peiko hagwā.*

Penhemoagwí katu Hesu Cristo-gwi. Ha'e pene moingove va'e. Pene moise pa'i ramo nde py'a poti marangatu reheve ereme'ē meme hagwā íxupe hemimbota imboete-vy. Yma gware pa'i reko-rupi ndereikói va'erā. Ijukapyre hemime'égwe rekovia, nde reko porā teeha reheve enheme'ē katu íxupe imboete-vy. Penhemoagwí katu Hesu Cristo-gwi pembovy'a hagwā Nhandejáry-pe imboete-vy. Heta oĩ íxupe omboete e'y va'e. “Ijapu” he'i mo'ā hese. Nhandejáry ae oiporavo va'ekwe íxupe omomba'egwasu tee hagwā. Pejogweroaty ramo hese pene mombaraete tee va'erā peiko porā hagwā.

Nhane mandu'a óga itagwigwa-rehe. Itagwasu omopu'ā óga pytahoha-ramo. Opa hagwā ete-ma hi'ári omoi mixive va'e ita. Upéixa ave Nhandejáry re'yí. Itagwasu óga

* 1:20 Hb 9.12-14 * 1:25 Is 40.6-9; Tg 1.11 * 2:2-5 Sl 34.8

pytahoha-rami oiko Hesu Cristo gwe'ýi kwéry-pe imombaraete hagwã. Penhemoagwĩ katu Hesu Cristo-gwi pene mombaraete hagwã.

⁶Upéa-rehe Nhandejáry nhe'ẽ kwatia-rehe oĩ va'e he'i Hesu Cristo-rehe: “Xe re'ýi kwéry ruvixará ambou-ta tetã Sião-py” he'i. “Itagwasu-rami, óga jepytahoha-rami imba'egwasu ete-ta. Ha'e katu aiporavo va'ekwe íxupe. Xe rakate'ý hese. Upe xe rembiporavo-rehe ojerovia va'e nonhemotĩry va'erã.”*

he'i Nhandejáry nhe'ẽ kwatia-rehe oĩ va'e.

⁷Ha peẽ katu pejerovia-ma araka'e Hesu Cristo-rehe. Pehayhu-ma araka'e íxupe. Pejohu porã tee íxupe. Oĩ jepe kente kwéry hese ndojeroviái va'e. Upe va'e-rehe Nhandejáry nhe'ẽ kwatia-rehe oĩ va'e he'i ave:

“Ndovaléi upe ita, he'i óga omopu'ã va'e imboyke-vy. Ha ojohu vai jepe, upe ita óga pytahoha ramo oiporu. Óga pytahoha voi upe ita”.*

he'i Nhandejáry nhe'ẽ kwatia-rehe oĩ va'e.

⁸“Ndovaléi voi pe ita he'i va'e onhepysanga hese. Oporoity va'e upe va'e ita”* he'i ave Nhandejáry nhe'ẽ kwatia-rehe oĩ va'e. Upéixa voi Hesu Cristo oiko va'erã kente kwéry-pe. Onhe'ẽ renduse e'ý va'e-pe oity uka-ta ogwereco asy-ta. Tenonde-rupi Nhandejáry hekorã oikwaa va'ekwe-rami, ha'e kwéry nahi'arandu porãiry áy okwa-vy.

⁹Peẽ ae katu Nhandejáry re'ýi tee ramo peiko-ma. Ha'e pende pe'a-ma va'ekwe ojéupe gwarã. Ondive gwarã voi pende pe'a-ma pende py'a potĩ reheve peiko hagwã. Ha'e mburuvixagwasu tee yváy-py ha pende pe'a-ma pende rereko hagwã pa'ĩ heko marangatu va'e ramo. Upéixa peiko heko porã teeha rehegwa nhe'ẽ pemosarambi rambi hagwã, íxupe pemboete meme hagwã. Yma va'ekwe pytũ-rupi oiko va'e-rami rei peiko va'ekwe. Ndapeikwaái va'ekwe mba'eve Nhandejáry-rehe. Ha'e ae pene mo'arandu-ma ójehe pene mbojerovia uka hagwã. Ko'ángã hesakã va'e-rupima peiko-ma pemombe'u mbe'u hagwã mba'éixa Nhandejáry ojapo porã meme peẽ-my.* ¹⁰Yma va'ekwe ndapeikói Nhandejáry re'ýi ramo. Ko'ángã katu he'ýi ramo-ma peiko. Yma va'ekwe ndapeikwaái Nhandejáry pende poriahuverekoseha. Ko'ángã ae peikwaa-ma. Pende poriahuvereko voi-ma peiko-ma hagwã he'ýi ramo.*

Upã Nhandejáry-rehe pejerovia-gwi pehendu katu mburuvixa ko yvy pygwa nhe'ẽ ave

¹¹Xe re'ýi kwéry pene mandu'a kena kóa-rehe: Yvy akéno-py oiko va'e-rami jaiko ko yvy pype. Nhandejáry re'ýi tee-gwi jaiko a-py sapy'a rei va'e-rami. Upéa-rehe anive pejapo pene rembiapose rei. Upéa nhamoĩ ramo nhane renonderã-py nhande py'a-py onhondive onhorairõseha-rami voi jaiko. Anive katu pemondo teĩ pende resa pene mbojevay ukase va'e-rehe rei. Nhandejáry remimbota-rehe mate pene mandu'a pejapo hagwã. ¹²Nhandejáry reroviaha e'ý va'e pa'ũ-my peime-ma. Ha'e kwéry onhe'ẽ vai vai para'e pende-rehe. Upe jave jepe tapeiko porã meme katu. Upéixa ramo pende-rehe ha-py pende rexaha kwéry omomba'egwasu va'erã Nhandejáry-pe upe ou jevyha áry-py.*

¹³Nhandejáry-rehe pejerovia-gwi pehendu katu mburuvixa ko yvy pygwa nhe'ẽ ave ipogwy-py peiko hagwã. Upéixa ramo pende reko porã-rehe pemboete arã Nhandejáry-pe. Heta oĩ mburuvixa kwéry ko yvy pype. Mburuvixagwasu oĩ omandapa va'e ko yvy arigwa-rehe. Tapejapo katu inhe'ẽ. ¹⁴Hembiporavokwe oĩ jevy mburuvixará mixĩve va'e. Tapejapo ave inhe'ẽ. Tetã tetã-my ombou uka íxupe kwéry oikwaa uka hagwã upe pygwa rembiapo-rehe. Hembiaipo vai va'e-pe katu ombohasa asy va'erã. Hembiaipo porã va'e-pe ogwereco porã va'erã. Mburuvixagwasu nhe'ẽ-py ou va'ekwe. Pejapo katu inhe'ẽ.

¹⁵Nhandejáry oipota pene rembiapo porã meme. Upéixa ramo inhe'ẽ-rupi ndoikoséi va'e kwéry ndojohúí arã pende-rehe onhe'ẽ rei hagwã.

¹⁶Peẽ katu peteĩ teĩ ndejehénte eremba'apo va'e. Upéixa jepe tapeiko porã katu. Ani pejapo vai teĩ. Tapenheme'ẽ Nhandejáry rembigwairã ae.

* 2:6 Is 28.16 * 2:7 Sl 118.22 * 2:8 Is 8.14-15 * 2:9 Êx 19.5-6; Dt 7.6; 14.2; Ap 1.6; 5.10 * 2:10 Os 1.10; 2.23; Rm 9.25 * 2:12 1 Ts 5.15

¹⁷ Peteixa pereko enterove-pe pemboete-vy. Hesu Cristo reroviaha-pe pehayhu katu. Nhandejáry-pe inhe'ë pejapo katu pemboete-vy. Mburuvixagwasu yvy pygwa va'e-pe pemboete ave.*

*Cristo rekoha eiporu katu
(Lc 6.22-23; Hb 12.2-3; 1 Pe 3.14)*

¹⁸ Peë tembigwái ramo peiko va'e tapeiko katu pene mba'ejáry nhe'ë-rupi. Tapemboete katu íxupe. Peteixa tapereko pene mba'ejáry. Oĩ pene mba'ejáry hekoha porãve va'e, heko kirirĩ reheve pende rereko va'e. Oĩ ave pene mba'ejáry pende rereko asy va'e. Peteixa katu tapereko íxupe kwéry. Pamba'apo porã meme katu íxupe. ¹⁹ Nhane mbohasa asy ramo jepe nhane mba'ejáry tanhamba'apo porã joty katu íxupe. Taja'e katu "Nhandejáry xe kwaa porã-ma. Íxupe amboete haggwã amba'apo porã-ta xe járy-pe" taja'e katu nhamba'apovy. Upéixa jajapo ramo Nhandejáry nhande rexakwaa rei va'erã, nhane rembiapo porã-rehe nhande rovosa va'erã. ²⁰ Ne rembiapo vai ramo ae nde járy-pe, ne rembiapo vai-rehe ne nupã va'erã nde rereko asy ave arã. "Xe rereko asy ramo jepe xe nupã ramo jepe xe ndajehepyí joty íxugwi. Kirirĩ-vy areko íxupe. Upéa-rehe xe py'a porã" ani upéixa renhembotavy teĩ. Ne rembiapo vai-rehe voi ne nupã kuri. Ne'írã voi nde py'a porã. Ne rembiapo vai eterei voi ereiko-vy. Iporãve ne rembiapo porã meme íxupe. Upéixa ereiko porã porã ramo jepe ne nupã ramo, nde rereko asy ramo, erovy'a joty. Ani erejehepy teĩ. Ekirirĩ katu íxugwi. Upéixa ereiko porã ramo erembovy'a va'erã Nhandejáry-pe. Ha'e nde rovosa joty va'erã nde rexakwaa rei-vy.

²¹ Pende rekoha porã haggwã pende pe'a va'ekwe gwe'yirã Nhandejáry. Cristo ave ohasa asy va'ekwe peë kwéry-rehe ha-py. Upe va'e-rehe ohexa uka peë-my mba'eixa pa peiko haggwã pehasa asy jave. Ha'e ohasa asy ramo jepe ndojehepyíry joty va'ekwe. Ha'e oiko hagwe-rami ave tapeiko katu.

²² Ndojejavýi voi va'ekwe Cristo. Ijapu e'ÿ va'e voi ha'e. Oporombotavy e'ÿ va'e voi Cristo. Upéixa oiko teĩ va'ekwe ha ombohasa asy joty va'ekwe íxupe.* ²³ Onhe'ë vai vai ramo jepe va'ekwe hese hekoha porã-gwi ha'e nonhe'ë vairý joty va'ekwe. Ogwereko asy ramo jepe va'ekwe íxupe "Ajehepy arã" nde'írý joty ombohasa asyhare-rehe. Nhandejáry po-py onhemoĩ "Nhandejáry nhande kwaa porã va'e. Nhande reko johu kwaa va'e. Aha'arõ ha'e xe repy haggwã" he'i Cristo ójehe.

²⁴ Okurusugwasu-rehe omano ramo va'ekwe Cristo ogweraha-ma ójehe nhane rembiapo vai. Nhande reko vaikwe-gwi nhane mopotĩ haggwã ha'e omano. Upéa ojapo va'ekwe omano va'ekwe vérami ndajajevyvéi-ma jaiko haggwã. Nhandejáry omoingove jevy va'ekwe vérami nhande kwéry jaiko haggwã nhande py'a potĩ reheve. Ha'e ojekutu va'ekwe nhane mbogwera haggwã.

²⁵ Peë peiko va'ekwe ovexa okanhy va'e-rami, pende raperã okanhy pendéhegwi va'e-rami. Nhandejáry ae ovexa rerekwa porã-rami pende reka reka-ma va'ekwe pende reru jevy haggwã oha-py. Ko'ángá peiko jevy-ma indive. Ha'e nhande py'a-rehe onhangareko va'e. Nhande rereko porãha ave ha'e.*

3

*Omenda va'e kwéry pegwarã nhe'ë
(1 Co 7; Ef 5.22-25; Cl 3.18-19)*

¹ Upéixa ave tembireko kwéry tapeiko katu peteĩ teĩ pene ména nhe'ë-rupi. Nhandejáry nhe'ë-rupi ndoikói ramo jepe, ejapo katu ne ména nhe'ë erembojerovia uka haggwã íxupe Nhandejáry-rehe. Neremombe'úi ramo jepe íxupe Nhandejáry nhe'ë, inhe'ë nohenduséi ramo jepe oikwaa va'erã nde reko porãha-rehe nde-rehe. Ojeroviase ave va'erã ha'e ave Nhandejáry-rehe. ² "Xe rebireko heko porã voi va'e. Nhandejáry-rehe ojerovia-magwi

* 2:17 Rm 13.1-7; Tt 3.1; Hb 13.17

* 2:22 Is 53.9; 2 Co 5.21

* 2:25 Is 53.5-6

nipo ogwereco-ma gwekoha porā ra'e" he'i arā nde-rehe nde reko kwaa-vy. "Xe aroviase ave Nhandejáry-pe" he'i va'erā ohexa kwaa-gwi nde rekoha porā-rehe.

³ Ha peē katu kunha kwéry, niporāi pejehexa uka porā rei pene nhemondeha-rehe pejekyvu porā-rehe rei, pende ao hepyve va'e-rehe rei, pende po'y porā-rehe rei ave niporāi pejehexa uka porā rei upéixa. ⁴ Iporāve pende py'agwapy reheve pehexa uka pende rekoha porā teeha opa e'y va'e. Nhandejáry-pe upéa ovale voi. ⁵ Yma gware kunhagwe amyri ipy'a potí va'e kwéry upéixa oiko va'ekwe. Nhandejáry-rehe ojerovia-gwi oiko va'ekwe oména nhe'ē-rupi. ⁶ Upéixa voi Sara amyri ojapo Abraão amyri nhe'ē. "Xe járy xe rerekoha" he'i oména-pe. Ipogwy-py voi oiko va'ekwe. Sara amyri rekokwe-rami āy pende reko porā katu. "Osy rekokwe-rami hekoha porā" he'i arā pende-rehe Sara membyre-rami voi peiko-gwi. Tapene rembiapo porā meme katu. Pende kyhyje e'y reheve tapende reko porā. Pende kyhyje e'y reheve pene ména nhe'ē tapejapo Nhandejáry-pe pemboete-vy.*

⁷ Peē katu kwimba'e kwéry, peteí teí pereko porā katu pene rembireko-pe. Kunha ko ikangyve kwimba'e-gwi. Ani pereko asy teí pene rembireko kwéry-pe. Peteí teí pemboete katu pene rembireko-pe. Ndaha'ei kwimba'e-pe anho ome'ē va'erā hekoverā Nhandejáry. Kunha pegwarā ave ome'ē hekoverā. Upéa-rehe nde sy eremboeteha-rami, terereko katu ne rembireko-pe Nhandejáry ojeapysaka haggwā ne nhe'ē-rehe. Upéixa ramo nerembojeupi réry arā ne nhe'ē íxupe.

*Jajoporiahuvereo rei katu jajohayhu porā-vy
(Rm 12.16-21; Fp 1.27-30; 1 Ts 5.14-15; 1 Pe 2.12)*

⁸ Xe ha'e-ta ave enterove-pe tapereko katu peteí py'a onhondive. Pejoporiahuvereo rei katu pejohayhu porā-vy. Outro kwéry-pe tapemboeteve katu pendejéhegwi. ⁹ Ojapo vai ramo jepe nde-vy ani erembojováí teí íxupe. Onhe'ē vai ramo nde-vy ani ave erembojováí íxupe. Tapembojeupi katu Nhandejáry-pe pene nhe'ē ohovasa porā haggwā upe va'e-pe. Upéixa erejapo haggwā Nhandejáry pende pe'a-ma gwe'yirā ramo. Upéixa erejapo ramo ha'e nde rovasa porā va'erā.

¹⁰ Upe va'e rehegwa oí Davi amyri porahéi-py kwatia-rehe oí va'e:

"Ko vvy-rehe ereiko jave nde reko porā reheve erevy'ase para'e ereiko-vy. Aipo ramo kóixa ae eiko: Ejoko ne nhe'ē hatā. Eipe'a ndejéhegwi ne nhe'ē vaiha. Ani teí ne nhe'ē rei rei ereiko-vy. Ani ave nde apu rei rei teí. ¹¹ Ejoko ave ndejéhegwi ne rembiapo vaiseha. Ne rembiapo porārā ae katu ejapo. Nde py'agwapy porā reheve eiko nde rapixa kwéry ndive. ¹² Nhandejáry ko orepara ipy'a porā va'e-rehe. Ojéupe ojerure ramo ohendu arā inhe'ē. Ipy'a vai va'e ae ombojeupi ramo onhe'ē Nhandejáry-pe nohendúí va'e-rami arā inhe'ē"* he'i Nhandejáry nhe'ē oí va'e.

¹³ Tapeiko porā katu. Peiko porā meme ramo ndaipóri arā para'e pene mbohasa asyve va'erā. ¹⁴ Ha sapy'a pende reko porāha-gwi pene mbohasa asy ramo, Nhandejáry pene mbovy'a jevy joty va'erā. Ani joty pende kyhyje avave-gwi. Pene mbohasa asyve ramo jepe ani joty pejepy'apy teí pendéjehe.

¹⁵ Penhembojáry katu Cristo-rehe, pende py'a gwive pejerovia tee katu hese. Peime meme katu pende jeroviaha-rehe pemombe'u haggwā: "Ma'erā-gwi erejerovia Cristo-rehe?" he'i va'e oporandu ramo nde-vy nde rapixa, nde reko kiriri reheve emombe'u porā íxupe.* ¹⁶ Mbegwe katu porā emombe'u íxupe imboete-vy. Nde py'a porā reheve emombe'u íxupe. Nde py'a potí-gwi ojekwaa arā nde-rehe nde rekoha porā. Cristo-rehe pejerovia-gwi peiko porā meme ramo onhemotí arā pendéhegwi pende-rehe onhe'ē vai vai rei va'ekwe.

¹⁷ Oí hembiapo vaikwe-rehe ohasa asy va'erā. Oí ave hembiapo porāgwe-rehe ohasa asy ave va'erā. Peē katu Nhandejáry remimbota ramo pehasa asy haggwā iporāve pene rembiapo porāgwe-rehe mate pehasa asy.

* 3:6 Gn 18.12 * 3:12 Sl 34.12-16 * 3:15 Is 8.12-13; Mt 5.10

¹⁸ Cristo ave ohasa asy va'ekwe. Hembaliapo apo porã jepe ohasa asy joty va'ekwe. Nhane rembiapo vai-rehe nhande repy eterei-gwi omano tee va'ekwe. Opy'a potĩ reheve gwĩ ipy'a ky'a va'e-rehe ojejuka uka va'ekwe. Nhande reraha hagwã Nhandejáry hapy upéixa ha'e oiko nhande-rehe va'ekwe. Omano rire opu'ã jevy oho-vy. Gwekove marangatu-rupi onhemoingove jevy va'ekwe.* ¹⁹ Preso oĩ va'e-rami va'e-py ogwahẽ oho-vy va'ekwe omano va'ekwe nhe'ẽgwe rendaty-py ojéhegwa nhe'ẽ omombe'u ogwahẽ oho-vy. ²⁰ Ha'e kwéry omano e'ỹ mbooyve ndoikói va'ekwe Nhandejáry nhe'ẽ-rupi. Yma va'ekwe Noé amyri ojapo jave va'ekwe okanoagwasu omombe'u íxupe kwéry Nhandejáry nhe'ẽ. Ha nohenduséiry voi hikwái. Hi'are voi Noé amyri ojapopa hagwã okanoagwasu. Ha Nhandejáry oha'arõ arõ joty inhe'ẽ nohenduséi va'e kwéry-pe. Nohenduséiry ramo jepe inhe'ẽ, nohundi pya'éiry joty íxupe kwéry. Oito mate oike va'ekwe kanoagwasu-py nonhehundíry. Kanoagwasu-py oikepa-ma va'ekwe Nhandejáry onhangareko joty hese. Y-gwi ogwerosende va'ekwe heraha-vy íxupe.* ²¹ Onheresende rei va'ekwe Noé amyri Nhandejáry nhe'ẽ roviaha-gwi. Nhane mongarai hagwã-rehe upéa omombe'u-ma nhande-vy. Nhane apymĩ y-py nhane mongarai-vy. Ndaha'éiry nhane mbojahu-vy. Ndoipe'áiry nhande ky'akwe nhandéhegwi. Nhane momandu'a mate Hesu Cristo-rehe nhane mongarai-vy. Hese jajerovia-gwi nhandemongarai uka jahexa uka hagwã nhande py'a omopotĩ-ma nhane resende-vy Nhandejáry. Oikove jevy-ma Hesu Cristo. Upéi omano va'ekwe pa'ũ-gwi Cristo omopu'ã jevy va'ekwe. ²² Upe rire ojeupi jevy oho-vy yváy-py. Nhandejáry akatúa-koty oĩ. Ipu'aka entéro va'e-rehe. Ipu'aka va'e gwive oiko ipogwy-py. Nhandejáry rembigwái kwéry oiko ipogwy-py. Entéro mburuvixa jahexa e'ỹ va'e gwive, ndoikoséi mo'ã va'e gwive, oiko joty ipogwy-py.

4

Penhemoirũ katu Cristo-rehe pejevayse hagwe pehejapa hagwã
(Ef 4.17-32; Cl 3.1-11)

¹ Pene mandu'a kena Cristo-rehe. Yvy-rupi oiko jave ombohasa asy ranhe va'ekwe íxupe imoingo-vy upe rire ojuka uka hagwã. Upéixa ramo peẽ ave tapenhembopy'agwasu kena pehasa asy hagwã. “Ipy'a porã reheve Cristo ohasa asy va'ekwe” tapeje katu. “Xe ave ahasa asy va'erã. Upe ramo ha'e-rami xe py'a porã reheve aikose.” Aipo-rami katu tapeje pendejúpe. Jahasa asy rire ndajajevaysevéri-ma Cristo nhamoirũ teese-gwi. ² Upéa-gwi äy peve anive pejapo pejapose rei va'e. Nhandejáry remimbota ae mate tapejapo.

³ Yma araka'e pene rembiapo vai meme araka'e Nhandejáry-rehe ojerovia e'ỹ va'e-rami. Teko rei-rupi peiko araka'e mba'e vai-pe pehayhu araka'e peiko-vy. Karugwasu-py, oka'u hagwã renda-py ave peho meme araka'e. Peka'u rei araka'e peiko-vy. Pende rekoha vai eterei-gwi Tupã Nhandejáry e'ỹ rei-pe pemboete meme peiko-vy ave araka'e. ⁴ Ha äy katu peẽ nipo napemoirüvéi-ma ra'e upéixa oiko va'e-pe. Pene irüvykwe ojohu vaipa-ma pende reko pyahu ra'e. Ndaipy'a horyvéi-ma voi ra'e pene ndive. Onhe'ẽ vai vai ave pende-rehe. Ndapeikovéi indive-gwi ndovy'avéi voi okwa-vy. ⁵ Ogwahẽ va'erã hi'óra onhemombe'u hagwã gwembiapokwe-rehe Nhandejáry-pe. Ha'e ojohu kwaa voi enterove rembiapokwe-rehe, oikove vyteri va'e rembiapokwe-rehe ave ojohu kwaa voi hese. Hembaliapo vai va'ekwe-pe ombohasa asy va'erã.

⁶ Upéa-rehe omano va'ekwe-pe ave omombe'u-ma Hesu Cristo rehegwa nhe'ẽ. Kente meme-gwi ojohu-ma íxupe kwéry omano hagwã. Nhandejáry ae oikove va'e. Ha'e kwéry oikove ave hagwã oikwaa ukapa-ma Hesu rehegwa nhe'ẽ íxupe kwéry. Omoingove jevy ave íxupe kwéry inhe'ẽgwe kwéry. Ha'e kwéry ave oiporu hagwã oikove va'e reko.

⁷ Ko vvy sapy'a opa-tama. Nhane arandu porã mani katu. Nhande py'agwapy reheve, nhande reko kiriri reheve ave nhaha'arõ katu jaiko-vy Nhandejáry-pe. Nhandhomongeta meme katu hendive. Nhamoi ae katu nhane renonde-py. ⁸ Ha tajajohayhu rei katu jaiko-vy. Jajohayhu porã ramo mba'eve vai ndajajohuí arã ojóhehe. Nhane rembihayhu ojapo

* 3:18 Rm 5.6-8; 2 Co 5.19-21 * 3:20 Gn 6.1-7.24

vai ramo jepe tajahayhu rei katu íxupe. ⁹Tanhamogwahẽ porã katu jahayhu-vy nhane mbohupa-pe. Ndaikatuí nhande juru mymỹi rei hexa-vy. Nhande py'a gwive ae nhande rory arã nhane mbohupa rexa-vy.

¹⁰Penhopytygwõ porã kena. Nhandejáry remimoarandu peẽ kwéry pende ae ae pejapo kwaa va'e pejapo hagwã. Penhopytygwõ jepe pende ae ae joty pene rembiapo pejapo. Nhandejáry rembigwái porã va'e-rami upéixa penhopytygwõ katu peiko-vy.

¹¹Peẽ, Nhandejáry pene moarandu-gwi pemosarambi kwaa inhe'ẽ va'e, tapemombe'u mbe'u porã katu inhe'ẽgwe. Peẽ, peporopytygwõ kwaa va'e, Nhandejáry pene mombaraete pehexa uka porã hagwã entéro va'e-pe kente pytygwõha voi peiko hagwã. Hesu Cristo nhe'ẽ-rupi nhande py'a rory ete-gwi opamba'e jajapo va'e tajajapo nhamboete ete hagwã Nhandejáry-pe. Ipu'aka tee, imomba'egwasuha ave opa e'y va'e. Nhande remimboete voi. Nhandejáry tee voi ha'e. Amém.*

*Ani joty nhatí teĩ jahasa asy ramo Cristo-rehe jajeroivia-gwi
(Mt 24.9; Jo 16.1-4; Fp 1.29; 2 Ts 1.4-5; 1 Pe 3.14; 1 Jo 3.13)*

¹²Ani nde kyhyje teĩ, xe rembihayhu kwéry. Nde rereko asy ramo jepe ani nde kyhyje teĩ. “Ma'erã-gwi” ndaja'ei nhandéjehe. Jaiko asy ramo jepe ojekwaa joty nhande rekoha. Tata-py nhamoĩ ramo nhane mba'e ndahyku reíry ramo, “Imbaraete voi ra'e tata-py” ja'e arã hese. Upéixa ete imbaraete ave nhande rekoha. Ani nde kyhyje teĩ.

¹³Pehasa asy ramo jepe taperovy'a katu. Hesu Cristo ohasa asy va'ekwe. Ha'e-rami peẽ ave pehasa asy peiko-vy. Upéixa ramo ha'e ojehexa uka ramo omba'egwasuha peẽ ave pevy'a va'erã. Upéa-rehe ãy peve erehasa asy ramo jepe, erovy'a katu.

¹⁴Cristo-rehe pejerovia-gwi inhe'ẽgwasu rei va'e ndojejokói va'erã onhe'ẽ rei-vy peẽmy. Upéixa ramo taperovy'a joty kuri hekoha. Oĩ pende py'apy-py Nhandejáry Nhe'ẽ Marangatu tee va'e opu'akaha reheve pene mombaraete pene mbovy'a hagwã.

¹⁵Ani pene rembiapo vai teĩ pene mbohasa asy uka hagwã. Petĩ kena pene rembiapo niporã va'e pejapo hagwã. Ani peporojuka teĩ. Ani pemonda teĩ. Pende reko porã e'y reheve ani ave peiko. Pejeko katu pene nhe'ẽ. Petĩ kena pehasa asy hagwã upéa pene rembiapo vaikwe-rehe.

¹⁶Hesu-rehe pejerovia-gwi ae pene mbohasa asy ramo ani joty kuri petĩ peiko-vy. Iporãve pemomba'egwasu Nhandejáry-pe. “Hesu Cristo re'yí voi ko xe. Natĩ mo'ãi ahasa asy ramo hese ha-py” peje katu kuri Hesu-pe pemboete-vy.

¹⁷Ogwahẽ-ma Nhandejáry áry ogwereco asy hagwã entierove-pe hembiapokwe-rehe. Onhyprũ-ma ojohu-vy gwe'yí kwéry-rehe ranhe. Túvy-rami nhande rereko asy nhane rembiapo vai-rehe. Ndoheja reíry nhane rembiapo vaikwe nhande-vy. ãy upéixa nhande rereko-ma. Ou va'erã hi'óra gwe'yí e'y rekokwe-rehe ogwereco hagwã. Hesu rehegwa nhe'ẽ porã nohenduséi hagwe-rehe ndoheja rei mo'ãi íxupe kwéry. Ombhasa asy ete-ta voi íxupe kwéry. ¹⁸Inhe'ẽ kwatia-rehe oĩ va'e he'i:

“Nhande reko porã ramo jepe hasy peve jahupity arã jaha-vy Nhandejáry oikoha. Ha hekoha vai va'e katu nogwahẽi arã voi oho-vy Nhandejáry oikoha-py”*

¹⁹Upéixa-gwi Nhandejáry remimbota-rupi pehasa asy ramo penheme'ẽ jevy katu íxupe peiko porã-vy. Gwemimombe'ukwe ojapo meme Nhandejáry nhane moingoha. Onhangareko porã pende-rehe ha'e oiko-vy. Pehasa asy jave, pene rembiapo porã reheve pemondo mondo katu pende resa hese.

5

Cristo reroviaha kwéry rerekwa pegwarã nhe'ẽ

¹Xe ko aiko-ma Cristo reroviaha kwéry rerekwa ramo. Xe ahexa voi va'ekwe ohasa asy ramo Cristo. Ha'e ojehexa uka ramo omba'egwasuha, xe amoirũ jevy va'erã íxupe. Heroviaha rerekwa ramo voi aiko-ma xe. Ha ahaise ko kwatia nhe'ẽ xe rapixa kwéry-pe,

* 4:11 Rm 12.6-8; 1 Co 12.8-10; Ef 4.7-12 * 4:18 Pv 11.31

Cristo reroviaha rerekwa kwéry-pe.* ² Hymba kwéry rerekwa porā-rami penhangareko porā katu Cristo reroviaha kwéry-rehe. Ani perovy'a e'ý reheve penhangareko hese kwéry. Pende py'a porā reheve pereko íxupe kwéry. Ani ave pene rembiapo repy-rehe pemondo teí pende resa. Pene kyre'ý rei katu peipytygwō hagwā pene reminhangareko kwéry-pe. Upéixa ramo Nhandejáry remimbota-rupi peiko va'erā. ³ Ani pemanda rei teí ave íxupe kwéry. Peiko porā meme katu pejapoha-rami ojapo jevy hagwā ha'e kwéry ave. ⁴ Nhande Rerekoha tee ou jevy ramo nhande rexakwaa rei-ma va'erā. Upe-ma ramo ome'ē-ta peē-my onhemomba'egwasu va'e pegwarā opa e'ý va'e. Upéa mate amombe'use Cristo reroviaha ruvixa kwéry-pe.

Pedro onhemonhe'ē Cristo reroviaha kwéry-pe

⁵ Peē ipyahuve va'e kwéry-pe ha'e-ta ko va'e. Nde ru-rami, nde sy-rami pehendu pendéhegwi itujave va'e nhe'ē.

Ha enterovéa-pe ha'e-ta ani penhembotuvixavese teí. Penhopytygwō ae arā penhembotuvixa e'ý-vy. Jaikwaa-ma Nhandejáry nhe'ē:

“Nhandejáry ombojevya va'erā onhembotuvixase va'e-pe. Ha onhemomirīve va'e-pe ae ohexakwaa rei va'erā Nhandejáry”

he'i Nhandejáry nhe'ē kwatia-rehe oí va'e.

⁶ Upéa-rehe penheme'ē Nhandejáry pogwy-py pene py'amirí reheve. Ha'e imbaraete ete nhane pytygwō hagwā. Hi'óra-py ha'e nhane mboete uka va'erā. ⁷ Pende py'apy-py pejepy'apyse ramo pembojeupi ae pene nhe'ē Nhandejáry-pe. Nhane mbopy'agwapy meme voi ha'e nhane pytygwō-vy. ⁸ Opáy va'e-rami ae katu peiko. Penhangareko porā porā katu pendéjehe. Nhande-rehe ija'e'ý va'e anhaygwasu nhande reity vaiseha voi. Jagwarete onhe'ē nhe'ē gwemi'urā ohekaha-rami voi anhaygwasu nhande reka. ⁹ Tapenhemombaraete ae katu anhaygwasu-pe pejoko hagwā pendéjehgwi. Cristo-rehe pejerovia-gwi pene mbaraete katu anháy-pe. Pene mandu'a ave nhande re'ýi kwéry, Cristo reroviaha kwéry-rehe. Opa ko yvy-rupi oiko va'e ha'e kwéry ave peē-rami ave ohasa asy.

¹⁰ Sapy'a ete mate pehasa asy va'erā. Nhandejáry ae pene moingo va'erā gweko-rupi. Ha'e nhande pe'a va'ekwe nhane moingo hagwā peteíxa Cristo Hesu ndive. Opa e'ý reheve enterove omomba'egwasu ramo Cristo Hesu-pe peteíxa nhamoíru arā íxupe. Upe va'e-rehe nhane mombaraete nhane mboheko porā ojéupe nhane mbojere e'ý-vy ojéhegwi. ¹¹ “Ha'e imburuvixagwasu ete va'e opa e'ý peve” ja'e hese nhamoí peteíxa nhe'ē.

Pedro omboapy-ta okwatia nhe'ē

¹² Silvano xe pytygwō ahai hagwā kuri ko kwatia. Ha'e nhande re'ýi. Ojerovia tee va'e Cristo-rehe. Ohai-ma xe nhe'ē peē-my gwarā. Ndaipukúí ko kwatia nhe'ē. Anhemonhe'ē hagwā peē-my pene kyre'ý hagwā amombe'u peē-my anhetegwa nhe'ē. Nhandejáry nhande rexakwaa rei rehegwa amombe'u peē-my. Tapene mbaraete katu pejere e'ý-vy inhe'ē-gwi.

¹³ Babilônia tetã mygwa Cristo reroviaha kwéry onhomboaty aty va'e omondo-ta omandu'aha peē-my. Peē-rami íxupe kwéry ave Nhandejáry oipe'a va'ekwe gwe'yirá. Marcos xe ra'y-rami oiko va'e omondo-ta ave peē-my omandu'aha.

¹⁴ Peē pejotopa ramo pejohayhu-gwi pejohovaetú katu Cristo réry-py. Hese pejerovia-gwi tapene mbopy'agwapy meme katu Nhandejáry pende rovasa-vy.

* 5:1 Mt 20.25-26; Mc 9.35; Lc 14.10-11; 18.9-14; Jo 13.12-15; Fp 2.3-8; Tg 4.6-7

Pedro remimombe'ukwe 2 segunda epístola de Pedro

Pedro omondo jevy kwatia nhe'ë mokõiha Hesu roroviaha kwéry táva ambue mbue-py ovyv e'y e'y-rupi okwa va'e pegwarã.

¹ Xe Simão Pedro Hesu Cristo rembigwái voi, hemimondo va'e voi xe. Ahai-ta kwatia-rehe xe nhe'ë peë-my gwarã. Hesu Cristo Nhandejáry voi. Ha'e nhande resendeha voi. Ha'e gweko marangatu ete-rupi nhane mbopy'a potĩ-ma. Ore va'ekwe orojerovia-ma hese. Ha peë ave pejerovia-ma voi ave araka'e hese. Peteĩ teĩ jajerovia-ma hese-gwi gweko potĩ tee-rupi nhane mbopy'a potĩ-ma.

² Tapende rexakwaa rei katu Nhandejáry. Tapene mbopy'agwapy katu ave. Tapeikwaa porãve rãve katu Tupã Nhandejáry-pe, Nhandejáry Hesu Cristo-pe ave. Upéa-gwi pende rexakwaa porãve rãve va'erã pene mbopy'agwapy tee hagwã.

Nhande rekoha porãrã nhamono'õ no'õ va'e rehegwa nhe'ë

³ Omba'egwasuha-rupi, opy'a porã teha-rupi nhande pe'a-ma va'ekwe Nhandejáry. Jajerovia-ma Hesu-rehe. Upéa-gwi ipu'aka-rupi opamba'e nhane remikotevê ome'ë nhande-vy jaiko porã hagwã heko marangatu-rupi. Ndaipóri mba'eve jareko e'y ha'erami ave jaiko porã hagwã. ⁴ “Xe remime'ëgwe porã-rupi pende reko porã va'erã teko rei-rupi ndapeikovéi-ma hagwã, pejapose va'e rei ndaipu'akavéi-ma hagwã pende-rehe” he'i va'ekwe Nhandejáry nhande-vy. He'i hagwe-rami ojapo va'erã jaheko arupity hagwã Cristo reko jejavy e'y porã-pe. ⁵ Upéa-gwi pemondo mondo meme katu pende resa pende reko porãrã-rehe.

Amombe'u-ta peë-my pemono'õ no'õ hagwã pende rekoha porãrã, Nhandejáry remime'ëgwe porã-rupi hemimbota-rami peiko hagwã. Pejerovia tee katu Hesu-rehe. Upe rire katu peiko katu pene rembiapo porãve rãve reheve. Upe pejapo kwaa rire Nhandejáry nhe'ë kwatia-rehe oĩ va'e peikwaa porãve rãve rei katu peikwaa porã tee rei hagwã hemimbota. ⁶ Upéi ha'e oipotaha-rami pene arandu porã-ma reheve peiko-ma ramo, penhemombaraete tee uka katu íxupe. Ou ramo jepe pende-rehe hembiapei vai va'e, ani joty kuri penhe'ë asy íxupe. Ndaikatúiry pembohovái íxupe. Hesu rape-rupi ae katu peiko. Ha hape-rupi pejere e'y va'e peiko-ma rire pemondo mondo meme katu hese pende resa. ⁷ Upéixa peiko kwaa-ma ramo perohory rei katu pende rapixa kwéry-pe peiko-vy, pejoyhayhupa rei katu Hesu roroviaha kwéry ndive pende re'yí tee-rami. ⁸ Upéixa ramo, pende rekoha porãve rãve va'erã peho-vy. Upéixa peiko ramo, ndapeiko reíry va'erã. Nhandejáry Hesu Cristo-pe peikwaa tee-gwi, pene rembiapo porãve rãve arã peho-vy.

⁹ Ha upéixa ndereikói ramo, neremono'õ no'õi ramo nde rekoha porãve rãverã, nane arandu porãi ereiko-vy. Hesa piruvã va'e-rami rei ereiko. Haimete voi nande resapysóiry ereiko-vy. Yma araka'e ne rembiapo vaikwe omboyke-ma araka'e ndéhegwi Nhandejáry. Upéa eremokanhy rei-ma araka'e ndejéhegwi. Nande reko porãve rãvéi-gwi “Xe mbopy'a porã-ma Nhandejáry” nderevéi nipo ra'e ndejéupe ereiko-vy. Ne arandurãgwe eremokanhyma-ma nipo ra'e.

¹⁰ Upéixa-gwi ha'e-ta peë-my, xe re'yí kwéry, Hesu roroviaha va'e, Nhandejáry nhande poravo va'ekwe nhande pe'a ave va'ekwe gwe'yirá. Gwe'yí kwéry tee-pe omboheko porã uka-ma Nhandejáry. Upéixa-gwi pende resa pemondo katu pende reko porãverã-rehe. “Nhandejáry xe pe'a-ma voi araka'e heko-rami ave xe aiko hagwã” peje hagwã katu pene mandu'a meme-vy hese. Upéixa peiko ramo ndapejeréi va'erã íxugwi. ¹¹ Nde rekoha porã meme-ma ramo “Eju katu xe renda-py” he'i arã nde-vy Nhandejáry Hesu Cristo. Ha'e nhande resende va'e. Opyta-ta mburuvixagwasu ramo opa e'y hagwã-rehe. Upe-ma ramo “Eju katu xe aiko ha-py” he'i arã ne renói-vy erejere e'y-gwi íxugwi. ¹² Upe

anhetegwa nhe'ë perovia-ma araka'e. Āy peve napemokanhýi pendejéhegwi. Ipogwy-py pene rembiapo porā meme peiko-vy. Upéa aikwaa jepe apomomandu'a ndu'a xe remimombe'ukwe-rehe ponove pende resarái íxugwi.

¹³ Upéa-rehe anhemonhe'ë jevy-ta peë-my. Tapeiko porā katu Nhandejáry nhe'ë apo-vy. Aikove kove reheve anhe'ë nhe'ë arā peë-my pono okanhy pendejéhegwi xe remimombe'u. Amboopy-tama peë-my nhe'ë. ¹⁴ Ndaiko puku mo'ávéi-ma pene ndive. Nhandejáry Hesu Cristo oikwaa uka-ma xe-vy amano hagwā. Ndaxe arevéi-tama pene ndive aiko-vy. ¹⁵ Upéixa-gwi amano e'ý ngatu pende reko porārā-rehe amombe'u-ma peë-my. Anive pemokanhy xe remimombe'ukwe. Amano ramo jepe pene mandu'a joty xe remimboopykwe-rehe.

“Nhandejáry ombotuvixa mba'e tee joty-ma ramo Hesu-pe ore orohexa-ma va'ekwe” he'i Pedro (Mt 17.1-5; Mc 9.2-9; Lc 9.28-36)

¹⁶ “Ipu'aka teeha reheve ogweji jevy-ta Nhandejáry Hesu Cristo” oromombe'u meme peë-my. Ndaha'éiry voi-ma ore ore akā-gwi rei oromombe'u. Anhetegwa voi ore nhe'ë. Ore katu orohexa-ma va'ekwe imba'egwasu teeha. ¹⁷ Oromoirū jave Hesu-pe Nhandejáry Nhande Ru yváy-gwi onhe'ë omboete tee joty íxupe ombotuvixa mba'e tee joty íxupe va'ekwe. Nhandejáry Tupāgwasu va'e ha'e anho onhembotuvixa mba'e tee va'e. Ha ombotuvixa mba'e tee joty Hesu-pe. Yváy-gwi he'i va'ekwe ore-vy: “Upe va'e xe ra'y tee voi” he'i. “Ahayhu tee voi íxupe. Xe mbovy'a tee voi va'e Hesu” he'i.

¹⁸ Yváy-gwi he'i va'ekwe onhe'ë ramo ore-vy. Hesu-pe oromoirū jave vyatyrysu ári Nhandejáry onheandu uka ore-vy yváy-gwi. Orohendu-ma upéa inhe'ë.

¹⁹ Upe va'e e'ý mboyye orogwerovia-ma va'ekwe Nhandejáry nhe'ë kwatia-rehe oí va'e. Imombe'uhaty myamyri kwéry remimombe'u voi araka'e. Orohendu-ma ramo Nhandejáry nhe'ë yváy-gwi ou ore-vy va'e ae “Anhetegwa voi ra'e Nhandejáry nhe'ë kwatia-rehe oí va'e” oro'e-ma hese. “Yma gware inhe'ë momba'uhaty inhe'ë tee voi omombe'u araka'e” oro'e joty orogwerovia tee-vy. Upéixa-gwi ha'e-ta peë-my: Iporā voi pene mandu'a ndu'a ramo Nhandejáry nhe'ë-py omombe'u mbe'u va'etygwe remimombe'ukwe-rehe perovia porāve hagwā. Inhe'ë tataendy-rami nhande resape pytūgwy-rupi jaiko va'e-pe. Tataendy-rami Nhandejáry nhe'ë pytū-rupi oiko va'e-rami jaiko jave, nhande resapeha voi ha'e. Iporā katu pemoi meme pene renonde-py upe nhe'ë. Pytū jave, ko'ë reruha jasytata-pe nhaha'arō. Ohesapeve va'erā nhaha'arō. Upéixa ko'ë reruha-pe oha'arō va'e-rami peë ave peha'arō katu Hesu-pe peiko-vy. Ou va'erā pende py'a resape-vy. Ani katu pemokanhy tei pende py'apy-gwi kwatia-rehe oí va'e Nhandejáry nhe'ë.

²⁰ Pehendu ramo pene mandu'a porā katu kóa-rehe: Ndaha'éí nhane akā-gwi rei nhahendu kwaa hagwā Nhandejáry nhe'ë kwatia-rehe oí va'e. ²¹ Ndaha'éí ave oakā-gwi rei omombe'u va'ekwe nhane renonderā rehegwa nhe'ë Nhandejáry nhe'ë-py omombe'u va'ety amyri kwéry. Nhandejáry Nhe'ë Marangatu tee va'e ae omoarandu íxupe kwéry. Ipogwy-py omombe'u inhe'ë.

2

“Tupā Nhandejáry nhe'ë amombe'u” he'i mo'ā ójehe va'e kwéry rehegwa nhe'ë (jd 3-16)

¹ Yma ete oiko ave va'ekwe myamyri pa'ū-my “Tupā Nhandejáry nhe'ë amombe'u” he'i mo'ā va'ekwe ójehe va'e kwéry. Āy katu ou jevy va'erā ha'e ramigwa. Ójéhegwi rei omombe'u va'erā Nhandejáry rekoha rehegwa nhe'ë ra'anga anga nhande-vy nhane mbotavayse-vy rei. Ani perovia tei kuri inhe'ë. Ndoikói Nhandejáry pogwy-py. Upéa-rehe pya'e onhehundipa va'erā hikwái. Omano hagwā jepe ndoikwaáiry. Pya'e Nhandejáry omondo-ta íxupe kwéry ohasa asy hagwā-py. Nhandejáry Hesu Cristo ojejúka uka okurusugwasu-rehe va'ekwe omboyke hagwā nhandéhegwi nhane rembiapo vaikwe. Inhe'ë ra'anga anga omombe'uhaty kwéry-rehe ave ojejúka uka va'ekwe Hesu. Upéa ha'e kwéry oikwaa jepe ndojeroviái joty hese. Ndoikói ipogwy-py. ² Oti kwaa e'ý reheve rei

oiko hikwái. Inhe'ê roroviahá kwéry oi'pe'a-ma va'erã ave íxugwi kwéry gwekoha vairã. Upe-ma ramo oĩ va'erã heko vai rexahare nohendusevéi-ma va'erã Nhandejáry nhe'ê tee. “Hekoha vai voi nipo ra'e Hesu Cristo-rehe ojerovia va'e ra'e” he'i arã omopavẽmba-vy íxupe kwéry. Hesu Cristo rehegwa nhe'ê tee nohenduséi arã hexahare. ³Pende plata oipota eterei-gwi ojéupe gwarã omombe'u va'erã gwĩ ijapu va'e. Ojéhegwi rei omombe'u va'erã Nhandejáry nhe'ê ra'anga anga rei, hetave tave iplatarã henduháry ome'ê hagwã íxupe inhe'ê porã ra'anga-rehe. Nhandejáry katu ipy'a vaiha hese yma-ma voi oikwaa. Osapymi e'ỹ va'e Nhandejáry. Nokanhýi íxugwi tekoha vai. Ohundipa hagwã voi íxupe kwéry ogwereco.

⁴Yma ete Nhandejáry ndoheja reíry voi va'ekwe gwĩ gwembigwái yváy pygwa hembia'po vai va'e. Hembia'po vaikwe-rehe oity íxupe kwéry imbohasa asy hagwã-py. Pytũ-my rei oiko-ma isã-rehe onhapytĩ-ma heroko-vy. Ha oha'arõ joty upe áry Nhandejáry renonde-py enterove va'e ombojogweroaty hagwã peteĩ teĩ-pe ogwereco hagwã hembia'pokwe pokwe-rehe.

⁵Yma gware hembia'po vaikwe va'e kwéry-pe ave ohundipa va'ekwe Nhandejáry. Hekoha vai rehe-ma voi ohundipa va'ekwe. Tuvixa omongy va'ekwe Nhandejáry. Ymbovu hagwã voi omongy va'ekwe. Ha ohundipa-ma íxupe kwéry. Noé amyrĩ-pe ae katu nohundíry va'ekwe. Noé amyrĩ onhemonhe'ê meme araka'e hekoha vai va'e kwéry-pe: “Perova katu pende rekoha” he'i porã voi araka'e myamyrĩ kwéry-pe araka'e. “Nhandejáry-rehe pepena katu” he'i onhemonhe'ê-vy íxupe kwéry. Upéa-rehe oresende íxupe Nhandejáry. Sete he'ýi kwéry reheve oresende íxupe kwéry. Inhe'ê rendu e'ýhare-pe katu ohundipa araka'e Nhandejáry.*

⁶Yma gware Sodoma tetã mygwa kwéry-pe ave ohundipa araka'e Nhandejáry, Gomorra tetã mygwa-pe ave. Upe mokõi tetã mygwa hóga kwéry reheve ohapypa ohundi-vy. Hembia'po vai eterei-rehe ohundipa íxupe kwéry. Upéa-rupi ohexa ukase nhande-vy mba'eixagwa ogwereco asy arã hekoha vai va'e-pe.*

⁷Yma va'ekwe oiko ipy'a porã va'e Ló amyrĩ. Íxupe anho oresende va'ekwe Nhandejáry hembia'po vai eterei va'e pa'ũ-gwi. Ipy'a porã reheve Ló ojepy'apy voi Sodoma pygwa kwéry rekoha vai vai-rehe, otĩ kwaa e'ý reheve okwa va'e-rehe ave. Upe pygwa rekoha kwéry ombovy'are'ỹ íxupe.* ⁸Hekoha porã jepe tekoha rei-rupi okwa va'e pa'ũ-my oiko araka'e Ló amyrĩ. Ivy'are'ỹ reheve Ló oiko hekoha vai va'e ndive. Ohexa hexa hembia'po vai. Ohendu hendu hembia'po vai, nhe'ê vai rendu-vy ave ndovy'avéi-ma hembia'po vai eterei oikwaa-ma. Upéa-rehe Nhandejáry mate oresende joty íxupe, Ló-pe. He'ýi kwéry ohundipa ramo jepe Ló anho mate oresende.

⁹Upéixa voi Nhandejáry. Áy ave ójehe ojerovia tee va'e-pe oresende va'erã. Ha'e kwéry ohasa asy ramo jepe onhangareko porã joty hese kwéry. Oresende va'erã ojéupe ohayhu va'e-pe. Hekoha vai va'e-pe ae katu ombohasa asy voi va'erã Nhandejáry. Henonde-py enterove ojogweroatyha áry-py omondo va'erã hekoha vai va'e kwéry-pe ombohasa asy hagwã-py. ¹⁰Upe áry-py ombohasa asyve va'erã gwĩ ivaive va'e-pe. Ojapose va'e ojapo teko vai-rupi oiko-vy va'ekwe-pe Nhandejáry pogwy-py ndoikoséi va'ekwe-pe ave ombohasa asy vaive va'erã.

Ha'e-ta voi katu peẽ-my heko vai mbo'eha kwéry otĩ e'ý reheve onhembopy'agwasu rei. Nohendúiry ave mburuvixa kwéry nhe'ê. Onhe'ê rei rei ave Nhandejáry rembigwái yváy pygwa-rehe. ¹¹Upe jave jepe Nhandejáry rembigwái yváy pygwa katu nomombe'u jevýi hesegwa nhe'ê Nhandejáry-pe. Okirirĩ porã opyta. Ohendu rei ojehegwa nhe'ê rei. Nhandejáry nhe'ê ra'anga momba'uhaty-gwi imbaraeteve voi hikwái. Ipu'akave ave íxugwi. Upe jave jepe, nonhembotuvixáiry onhe'ê rei hagwã hese kwéry. “Ijapu voi upe va'e” nde'íry Nhandejáry-pe. “Upe va'e kwéry ohekombo'e vai ne nhe'ê mo'ã omombe'u-vy” nde'íry omombe'u jevy hagwã Nhandejáry-pe.

* 2:5 Gn 6.1–7.24 * 2:6 Gn 19.24 * 2:7 Gn 19.16

¹²Nhandejáry nhe'ê ra'anga rei omombe'u va'e kwéry ae onhe'ê rei rei ambue kwéry-rehe. Gwembigwaa e'y-rehe onhembohory oiko-vy. Onhe'ê vai rei hese. Ojapose va'e rei ojapo ave. Mymba ka'agwy rupigwa rekoha-rami oiko upe va'e kwéry. Pene mandu'a kena mymba ka'agwy rupigwa-rehe. Teko rei-rupi oiko. Opamba'e apo-vy rei oiko mymba ka'agwy rupigwa. Nahi'arandú-gwi nghanhapytí va'erã, jajuka va'erã. Upéixa ete ave heko vai mbo'eha kwéry oiko. Mymba reko-rami rei ave oiko. Itavy voi. Itavy-rehe ohundita voi íxupe kwéry Nhandejáry. ¹³Ha'e kwéry onhombhasa asy uka oiko-vy ambue kwéry-pe. Upéa-rehe ha'e kwéry ave ohasa asy ave va'erã. Onhembopy'a vai hagwe-rehe ohasa asy va'erã oiko-vy. Áry-rupi rei ogwerohory gwembiapo ky'a gwekoha vai rexa uka-vy. Penhomboty ha-py jepe, Hesu-rehe pene mandu'a hagwã pe'u mbojape ramo jepe notívéi-ma. Onhembohory-vy rei Hesu-rehe jepe ho'u joty mbojape pene pa'ú-my. Notívéi-ma. Hesu reroviaha-rami mo'ã voi oiko pene pa'ú-my pene mbotavy-vy. ¹⁴Itavy rei rei kunha-rehe ombopopa reise voi kunha oiko-vy. Gwembiapo vairã nomokanhy mo'ãi ojéhegwi. Otantea tea gwí heko kangy rei va'e-pe ombotavy hagwã. Gwekotevê e'y va'e oipota eterei. Hetave tave ojéupe gwarã-rehe mante imandu'a ndu'a oiko-vy. Nhandejáry ae katu he'i-ma hese "Ambohasa asy-ta íxupe kwéry" he'i-ma voi hese.

¹⁵Ha'e kwéry omokanhy-ma ojéhegwi anhetegwa nhe'ê. Nhandejáry rape porã-gwi ojere-ma. Balaão amyri reko-rami voi heko. Beor amyri ra'y Balaão amyri. Oplatarã-rehe hembiaapo vai va'ekwe Balaão amyri. ¹⁶Nhandejáry ae ojoko uka íxugwi. Hymba mburika omonhe'ê uka íxupe ojoko hagwã hembiaapo vai va'e-gwi. "Ejapo katu Nhandejáry remimbota" he'i mburika ojáry-pe. Oiporu ojáry nhe'ê íxupe onhemonhe'ê-vy. Balaão amyri Nhandejáry nhe'ê-py omombe'u va'ety jepe inhe'ê-rupi ndoikói joty va'ekwe. Upe jave hymba mburika ae onhemonhe'ê íxupe. Balaão amyri-rami áygwa Nhandejáry nhe'ê ra'anga rei mombe'uhaty. Opirapirerã-rehe ae omombe'u heko vairã rei.*

¹⁷Yrypagwe ndovaleiha-rami Nhandejáry nhe'ê ra'anga rei mombe'uhaty ndovaléi ave. Araigwepa rei ndovaléi va'e-rami ave hikwái. Araigwepa rei ramo yvytu rei ohasa rei ohovy oky e'y hagwã. Upe araigwepa va'e-rami voi hikwái. Pytũ tee-py ohasa asy hagwã-py hikwái henagwã onhongatu-ma íxupe gwarã. ¹⁸Onhembotuvixa mo'ã Nhandejáry nhe'ê ra'anga anga omombe'u-vy. Hesu-rehe ojeroviase va'e-pe, Nhandejáry-rehe ne'írã oikwaa porã va'e-pe ave ha'e kwéry omombe'u a'ã a'ã oiko-vy. "Teko rei-rupi nanhatíry reheve jajapose va'e jajapo ramo mba'eve ndojapói arã nhande-vy Nhandejáry" he'i rei. "Nhane mbovy'ase voi" he'i rei hikwái. "Hemimbota ome'êse gwe'yí kwéry-pe Nhandejáry. Upéixa-gwi jajapose va'e iporã voi jajapo" omombe'u rei. Gweko ky'aha ae omoporãse mo'ã-gwi omombe'u joavy avy rei Nhandejáry rehegwa nhe'ê. Ombyai ukasevy ae gwenduhare-pe. Anhete teegwa ne'írã oikwaa va'e ombotavy hagwã pono oiko Hesu rape porã-rupi.

¹⁹"Avave pogwy-py voi ndajapytái va'erã voi. Nhande ae peteĩ teĩ nhande reko járy va'erã" he'i mo'ã omombe'u rei ijapu-vy. Ha'e kwéry ae ogwereco gwembiapo vaikwe gweko járy ramo. Ha'e-ta peê-my nhande reko járy pogwy-py nghanhemoĩ ramo ipu'aka voi nhande-rehe. "Xe ae xe reko járy voi" ja'e rei arã voi nhandéjehe. Nanhande pu'akavéi-ma va'erã voi nhandéjehe. ²⁰Ha'e kwéry ojerovia-ma araka'e Nhandejáry Hesu Cristo-rehe. Upéixa-gwi omboyke-ma íxugwi hembiaapo vaikwe. Nhandejáry ombopy'a porã-ma va'ekwe íxupe kwéry. Áygwa hekoha vai va'e pa'ú-gwi ogwenohê-ma va'ekwe íxupe kwéry Nhandejáry. Upe rire, ipy'a porã-ma rire, Nhandejáry remimbota oikwaa-ma jepe, ojere jevy joty hekoha vai-rupi oiko jevy hagwã. Hekoha vaive ive-ma oho. Hekoha vaikwe-gwi hekoha vaive ive rei oho-vy. ²¹Nhandejáry nhe'ê oikwaa e'y jave omano ramo ohasa asy va'erã. Hese ojerovia-ma va'e, Hesu Cristo rape oipyhy-ma va'ekwe oikwaa-ma rire Nhandejáry nhe'ê tee ojere jevy ramo ohasa asy asyve va'erã voi. ²²Anhete ja'e mymba-rehe "Jagwa ogwe'ê rire ogwe'êgwe ho'u jevy. Kure katu, erembojahu rire onhemboapajeréi jevyiky'a va'e-py". Upéixa ete voi upe Nhandejáry rape-gwi ojere jevy va'e. Gweko vaikwe-rupi jevy ho'a jevy arã onhemongy'a jevy hagwã oiko-vy.

*

3

Mba'éixa po oiko arã Hesu Cristo ou jevy hagwã óra-py

¹Yma va'ekwe amondo-ma peteĩ kwatia peẽ-my gwarã. Áy katu amoĩ jevy-ta xe nhe'ẽ kwatia-rehe peẽ-my gwarã. Xe rembihayhu kwéry, Hesu reroviaha, penhemongeta porã porã katu anhetegwa-rehe mate, mba'e porã tee-rehe. Pono Hesu Cristo rehegwa nhe'ẽ okanhy rei pendéhegwi ahai jevy-ta peẽ-my. Ha'e ogwejy jevytaha ou-vy peikwaa-ma voi ra'e pehendú va'ekwe-gwi. Áy amombe'u jevy-ta upéa rehegwa nhe'ẽ.

²Yma gware, Nhandejáry nhe'ẽ-py omombe'u va'ety amyri kwéry ohai va'ekwe Hesu ou jevy-ma hagwã-rehe. Upe myamyri heko marangatu va'e kwéry remimombe'ukwe-rehe iporã voi pene mandu'a ndu'a peiko-vy. Áy katu Nhandejáry Nhane Resendeha ombou jevy peẽ-my onhe'ẽ mombe'uha. Hesu Cristo remimondo kwéry ou-ma anhetegwa omombe'u-vy. Pehendu porã katu ore Hesu remimondo va'e nhe'ẽ pene mandu'a hagwã hese. ³Pejeapysaka porã xe nhe'ẽ-rehe. Hesu ogwahẽ-tama óra-py ou arã pende ha-py pene mbotavysa va'e rei. Gweko vai-rupi oiko va'e onhembohory va'erã Hesu ou jevy hagwã-rehe. ⁴"Aju jevy-ta, he'i ra'anga rei nipo ra'e Hesu" he'i arã onhembohory-vy Hesu-rehe. "Ndou mo'ávéi-ma Hesu" he'i arã peẽ-my. "Mamo tipo oĩ?" oporandu va'erã. "Omano-ma nhane ramói amyri kwéry Hesu reroviaha, ha ndoú joty" he'i rei arã peẽ-my. "Ko vvy oiko vyteri. Yma araka'e Nhandejáry omoingo vvy hi'ári gwarã ave omoingo araka'e. Onhepyrúha gwive oiko joty" he'i va'erã onhembohory-vy. Hesu ou jevy hagwã-rehe onhembohory va'erã.

⁵Omokanhy-ma nipo ojéhegwi ra'e gwĩ Nhandejáry rembiapokwe. Yma, yma ete onhe'ẽ rei-py Nhandejáry omoingo áry, vvy ave. Y rei-gwi jepe ojapo vvy. Y mbyte-gwi ombojekwaa uka va'ekwe vvy. ⁶Upe rire hi'are jevy rire ohundipa vvy. Nhandejáry omongy tuvixa ombovu hagwã y ohundipa hagwã-ma vvy-pe. ⁷Áy-gwa áry, vvy ave Nhandejáry nhe'ẽ-py voi oiko joty. Oĩ arã hi'óra ohundipa jevy hagwã. Tata-py omokanhy ngatu-ma va'erã áry, vvy reheve. Nhandejáry renonde-py enterove ojogweroaty va'erã ha'e ogwereco hagwã peteĩ teĩ-pe hembiapokwe pokwe-rehe. Upe áry-py hekoha vai va'e kwéry omondo va'erã imbohasa asy hagwã renda-py. Ohapy va'erã ave yváy vvy reheve. Upéa nhe'ẽ ojéhegwi rei para'e omokanhy hikwaí. Onhembohory rei hese.

⁸Xe rembihayhu kwéry, Hesu reroviaha, pejeapysaka katu ko xe nhe'ẽ-rehe. "Hi'are eterei Hesu. Inhate'y para'e ou jevy hagwã" ani peje teĩ Hesu-rehe. Ojepy'a mongeta ramo Nhandejáry ndaha'éiry nhanhemongetaha-rami. Nhande-vy áry pya'e ohasa. Ha Nhandejáry-pe katu are eterei vérami oĩ áry. Mil ro'y vérami ojehasa íxugwi. Ha, nhande-vy hi'are voi mil ro'y. Nhandejáry-pe ae nda aréi joty. Peteĩ áry vérami oiko íxupe. Pya'e voi ojehasa íxugwi. ⁹Upéa-rehe nhane mandu'a ramo "Nomokanhy'i onhe'ẽ Nhandejáry. Aju jevy-ta, he'i va'ekwe-rehe imandu'a ndu'a ho'áry-py ou hagwã" ja'e kwaa va'erã hese.

Oĩ he'i rei va'e: "Inhate'y eterei-gwi ra'e ndoú Hesu" he'i rei hese. Inhate'y e'y va'e voi Hesu. Ndogwereco asy pya'éiry kente kwéry-pe. Upéixa-gwi hi'are ou jevy hagwã. Avave-pe nohundiséi. Oha'arõ arõ hetave tave ójehe ojerovia hagwã. ¹⁰Avave ndoikwaáiry igwahẽ hagwã áry. Omonda va'e ogwahẽ hagwã óra-rami ou va'erã Hesu. Mba'e járy oha'arõ e'yha-py sapy'a ou omonda va'erã. Upéixa ave avave ndoikwaái ogwahẽ jevy hagwã Nhandejáry Hesu Cristo óra.

Ogwahẽ jevy jave áry opa-ma va'erã vvy. Hyapu-ma ave arã áry okái-vy. Hykupa va'erã vvy ave. Ohapya-ma va'erã. Ko vvy ári okwa va'e gwive kente kwéry e'y ngatu hykupa-ma va'erã.* ¹¹Upéixa okaipa va'erã hykupa va'erã áry, vvy ave. Ohundi-ma va'erã áry, vvy ave.

Upéa jaikwaa-gwi tajaiko porã katu nhande py'a marangatu ipotĩ reheve. Ani pene rembiapo vai teĩ ha'arõ-vy. Pende resa pemondo mondo katu Nhandejáry-rehe ipogwy-py peiko porã hagwã. ¹²Peha'arõ arõ katu ou hagwã Nhandejáry áry. Pene rembiapo porã pejapo meme hagwã-rehe pene mandu'a katu pya'eve ou hagwã hi'áry. Ou ramo pe áry,

* 3:10 Mt 24.43-44; Lc 21.25-27; 1 Ts 5.2-4; 2 Pe 3.7

áry ohundi-ma va'erā tata-py. Yvy ave ohundi-ma va'erā tata-py. Hykupa va'erā tata rendy-py.

¹³ “Áry ipyahu va'e amoingo-ta” he'i va'ekwe Nhandejáry. “Ahekoviarō-ta áry. Yvy ave ambopyahu-ta” he'i va'ekwe ave Nhandejáry. Inhe'ẽ-py nhamondo nhande resa áry ohekoviarō hagwā-rehe, yvy ohekoviarō hagwā-rehe ave. Upe-py ndaipóri va'erā ivai va'e. Imarangatu ete-ma va'erā upe pygwa. Nhaha'arō nhane py'a potĩ reheve upe-py jaiko hagwā. Upe áry-rehe nhaha'arō arō jaiko-vy.*

¹⁴ Upéa-rehe ha'e jevy-ta peẽ-my, xe rembihayhu kwéry, Hesu reroviaha va'e: Pende py'a potĩ potĩve hagwā peho katu. Ha'e ogwahẽ jevy ramo pene rembiapo vai e'ỹ reheve pende py'agwapy reheve pende topa hagwā Nhandejáry.

¹⁵ No'ã-rami tapeje katu pende py'a-py peha'arō-vy: “Nhande poriahuvereke reheve Nhandejáry onhangareko nhande-rehe. Nohundi ukaséiry avave-pe. Oipota enterove ojerovia ójehe. Upéa-rehe oha'arō arō oiko-vy hetave tave kente ojerovia hagwā ójehe.”

Upe va'e xe remimombe'u-rami Paulo remimombe'u ave. Nhande ryke'y-rami jahayhu Paulo-pe. Nhandejáry omo'arandu porā va'ekwe íxupe ojehegwa nhe'ẽ-rehe. Ko xe nhe'ẽ ramigwa Paulo ave ohai va'ekwe peẽ-my peha'arō porā hagwā Hesu-pe peiko-vy. ¹⁶ Kwatia ojapo meme-ma Paulo. Upe-py ohai meme Hesu ou jevytamaha-rehe. Oĩ inhe'ẽ jaikwaa porā va'e. Oĩ ave inhe'ẽ hasy peve jaikwaa porā joty va'e. Gwĩ Hesu reroviaha tape porā-gwi ojerese va'e inhe'ẽ oikwaa ku'a ku'a va'e ave nohendu kwaái Paulo remimombe'u hasy va'e. Ohendu porā hagwā-rami teĩ voi Paulo remimombe'ukwe, ha nohendu kwaa porāi joty. Upéixa ha'e kwéry ohendu ku'a ku'a meme Nhandejáry nhe'ẽ kwatia-rehe oĩ va'e. Ha ohendu ku'a ku'a va'ekwe omombe'u jevy ojóupe Nhandejáry nhe'ẽ ra'anga. Inhe'ẽ nohendu kwaái-gwi ha'e kwéry voi ojerereke asy uka hagwā-py onhemondo uka va'erā.

¹⁷ Xe rembihayhu kwéry anhemonhe'ẽ jevy peẽ-my. Peikwaa-ma Nhandejáry nhe'ẽ mombe'u a'ã va'e ou va'erā. Ani kena pehendu inhe'ẽ. Anhetegwa nhe'ẽ mate pehendu. Hesu-rehe pejerovia-ma va'ekwe. Anive anhetegwa e'ỹ nhe'ẽ perovia teĩ. Hesu katu omboyke-ma pendéhegwi peteĩ teĩ-gwi pene rembiapo vaikwe. Gweko vai reheve omombe'u ramo Hesu nhe'ẽ ra'anga ani joty kuri perovia inhe'ẽ. Xáke, pejejokóke omombe'u ku'a ku'a va'e-gwi. Pende py'a ndive penhemongeta porā joty inhe'ẽ-rehe pono penhembotavy. Pende rekoha porāha-gwi ani perova pende reko.

¹⁸ Nhandejáry Hesu Cristo nhande rexakwaa porā rei-ma. Tapeikwaa porāve ráve katu íxupe pende rexakwaa porāve ráve hagwā. Hesu Nhandejáry voi. Ha'e nhane Resendeha voi. Tonhemomba'egwasu katu Nhandejáry Hesu Cristo-pe. Ko'áy opa e'ỹ reheve tomomba'egwasu meme kena Hesu-pe.

* 3:13 Is 65.17; 66.22; Ap 21.1

João remimombe'ukwe 1 primeira epístola de João

Nhane moingoveha rehegwa nhe'ë

(Jn 1.1)

¹Hesu reroviaha peë. Xe João amondo-ta peë-my xe nhe'ë. Kwatia-rehe amoĩ-ta Hesu Cristo rehegwa nhe'ë. Ha'e ko opamba'e rereko kwaaha. Nhane moingoveha voi. Ko yvy nhapyrũ e'ỹ vyteri ramo oiko-ma va'ekwe. Upéi orohendu va'ekwe inhe'ë. Ore resa-rupi voi orohexa-ma va'ekwe íxupe. Oroma'ë-ma hese oroiko-vy. Ore po-rupima oroipyhy pyhy va'ekwe íxupe orogwereco-vy. ²Ojekwaa porã ramo, orohexa-ma va'ekwe. Upéa-gwi oronhe'ë hese oromombe'u-vy peë-my. Ha'e nhane moingove va'ety voi Nhandejáry ndive jaiko memete hagwã. Nhandejáry ndive oiko-ma va'ekwe. Upéi ojehexa uka-ma va'ekwe ore-vy. ³Oromombe'u ore rembiexagwe, ore remiendukwe oromombe'u ave peë-my jajogwereco hagwã peteixa. Ore ko oromoirũ peteixa Nhande Ru. Ta'ýry Hesu Cristo oromoirũ ave. Upéixa ete oroiota peteixa jajogwereco. ⁴Upe va'e nhe'ë oromoĩ ave kwatia-rehe javy'apa rei hagwã.

Nhandejáry nhande resapeha voi

⁵Oromombe'u jevy-ta peë-my ore-vy Cristo remimombe'ukwe. Nhandejáry nhande resapeha voi. Pytũ e'ỹ va'e ha'e.* ⁶Pytũ-my rei jaiko ramo, “Xe amoirũ íxupe peteixa” ja'e ramo mo'ã, nhande apu nhandéjehe. Ja'e va'e ndajajapóí voi.* ⁷Ha arakatu-py jaiko ramo katu, Nhandejáry rekoha-rami jaiko. Nhanhomoirũ-ma voi peteixa jaiko-vy. Nhande py'a omopotĩ-ma oiko-vy Nhandejáry ta'ýry Hesu gwugwy avyete-py omano-gwi. Nhane rembiapo vaikwe gwive omopotĩ nhandéhegwi.

⁸Ha “Xe ajejavy e'ỹ va'e” ja'e ramo katu, jajerovia mo'ã nhandéjehe. Anhetegwa e'ỹ va'e nhande. ⁹Ha nhamombe'u ramo katu Nhandejáry-pe nhane rembiapo vaikwe-rehe nhandemboasyha, oi-pe'a va'erã nhandéhegwi nhane rembiapo vaikwe. Omopotimba va'erã nhande py'a jajejavy rire. Inhe'ë ojavy e'ỹ va'e Nhandejáry. Hembiaapo porã meme va'e. Oporombotavy e'ỹ va'e. ¹⁰Ha “Anejavy e'ỹ va'e xe” ja'e ramo, “Ijapu-ma” ja'e ave Nhandejáry-rehe. Nhande py'apy-py ndoikóí voi inhe'ë.*

2

Hesu Cristo oĩ nhane pytygwõharã

(Jo 14.15,21; 1 Tm 2.5; Hb 4.14-16; 9.11-15; 1 Jo 5.3)

¹Ko va'e nhe'ë amondo-ta peë-my kwatia-rehe, xe ra'y kwéry, pejejavy e'ỹ hagwã peiko-vy. Ha jajejavy ramo katu, nhamombe'u ramo Nhande Ru-pe nhane rembiapo vaikwe-rehe nhandemboasyha, Hesu Cristo oĩ nhane pytygwõharã. Ha'e ojejavy e'ỹ va'e. ²Ha'e ojejuka va'ekwe-gwi omboyke nhandéhegwi Nhandejáry nhane rembiapo vai va'ekwe. Enterováa rembiapo vai va'ekwe ave omboyke. Nhande-rehe ha-py ojejuka-gwi nanhande rereko asy asyvéi-ma nhane rembiapo vaikwe-rehe. ³Nhandejáry remimanda nhahendu ramo, jaheko kwaa íxupe. “Jaheko kwaa ave íxupe” ja'e ramo, nanhande apuíry nhandéjehe. ⁴Ha “Xe aheko kwaa íxupe” oĩ he'i rei va'e ójehe. Ha Nhandejáry remimanda nohenduséi voi. Upe va'e Nhandejáry omanda va'e rendu e'ỹ va'e, ijapu ójehe. Opy'a-py ndogwerekóí anhetegwa nhe'ë. ⁵Ha inhe'ë renduha katu ohayhu tee voi Nhandejáry-pe. Upéixa voi, “Amoirũ íxupe peteixa” ja'e ramo, anhetegwa voi ja'e nhandéjehe. Nanhande apuiha jaikwaa nhandéjehe. ⁶“Peteixa xe amoirũ íxupe” he'i va'e gwive, toiko katu Hesu Cristo reko-rupi.

Ame'ë jevy-ta peë-my pene rembiaporã

* 1:5 Jo 1.4-5; 3.19-21; 8.12; 12.35-36

* 1:6 Ef 5.8; 1 Ts 5.5; 1 Jo 2.9-11

* 1:10 Lc 18.9-14

⁷ Amondo jevy-ta peẽ-my, xe rembiayhu va'e, pene rembiaporã. Ndaha'úi pene rembiapo pyahurã. Are-ma peiko-ma ramo Hesu reroviaha ramo, omombe'u va'ekwe peẽ-my pene rembiaporã. Ndaipyahúi voi xe amombe'u va'erã peẽ-my. ⁸ Ha ko'ánga katu amombe'u jevy-ta peẽ-my Cristo remimombe'u pyahu va'e. "Pejohayhu katu" he'i nhande-rehe va'ekwe. Upéixa ojekwaa ramo pende-rehe pejohayhuha, Cristo pende rayhuha pende-rehe ojekwaa ramo ave. "Anhetegwa ra'e Hesu remimombe'u" he'i arã pende-rehe. Upéixa pytũ-my rei oiko va'e-pe nhande resape tee va'e omo'arandu-ma imoingo-vy.

⁹ "Arakatu-py aiko" oĩ he'i rei ójehe va'e. Ha gwe'ýi-rehe ndaija'úi va'e gwive katu, ijapu ójehe. Ko'ánga ete peve pytũ-my rei joty oiko. ¹⁰ Ha ojohayhu porã rei va'e katu, arakatu-py tee meme-ma oiko. Ndaipóri ipysangaha imbojevay uka hagwã. ¹¹ Ha gwe'ýi-rehe ndaija'úi va'e katu pytũ rupigwa voi. Pytũ-my rei vyteri oiko va'e. Hesa pytũmy tũmby rei va'e. Pytũ va'e ojopía hesa. Upéa-gwi ki-koty rei po oho-ta ndoikwaái.*

¹² Ha'e-ta peẽ-my xe mitã kwéry, Hesu-rehe pejerovia va'e-pe. Cristo réry-py omboyke-ma Nhandejáry pene rembiapo vaikwe. Cristo-rehe omboyke-ma pendéhegwi. Upéa-gwi amondo-ta peẽ-my xe kwatia nhe'ẽ. ¹³ Xe ru kwéry, peikwaa voi upe va'e ko yvy nhepyrũ e'ỹ ngatu oiko-ma voi araka'e. Peikwaa voi íxupe. Upéa-gwi amondo-ta peẽ-my xe kwatia nhe'ẽ. Xe ryvy kwéry, pemosẽ-ma anháy ruvixa pemondo-vy. Ndapehejavéi-ma peiko-vy anháy ipu'aka pendéjehe. Upéa-gwi amondo-ta peẽ-my xe kwatia nhe'ẽ.

¹⁴ Xe ra'y kwéry, peheko kwaa-magwi Nhande Ru-pe, amondo-ta peẽ-my xe kwatia nhe'ẽ. Xe ru kwéry, peikwaa voi upe va'e ko yvy nhepyrũ e'ỹ ngatu oiko-ma voi araka'e. Peikwaa voi íxupe. Upéa-gwi amondo-ta peẽ-my xe kwatia nhe'ẽ. Xe ryvy kwéry, oiko pende py'apy-py Nhandejáry nhe'ẽ pene mbopy'a mbaraeteha. Ndapehejavéi-ma anháy ruvixa ipu'aka pendéjehe. Upéa-gwi amondo-ta peẽ-my xe kwatia nhe'ẽ.

¹⁵ Ani peipota teĩ teko rei remimbota. Ani pejererova teĩ hese, teko rei reko-rupi peiko hagwã. Pehayhu ramo Nhande Ru rembiayhu e'ỹ-pe, pene rembiayhu e'ỹ voi Nhande Ru. ¹⁶ Teko rei rekoha a-rami. Ojapo ojapose va'e rei-ma. Opaixagwa rei oipota ojéupe gwarã. Imba'e pota rei va'e. Oipota gwembiexa exa. Ojohu va'e rei oipota. Imba'e reta rei omboete oipota-gwi. Upéixa voi teko rei rekoha. Nhande Ru remimbota e'ỹ-rupi oiko va'e. ¹⁷ Ha teko rei rekoha katu opa va'erã. Hemimbota mbota opa va'erã ave. Ha Nhandejáry remimbota ojapo va'e katu opa e'ỹ reheve oiko va'erã.*

Cristo-rehe ija'e'ỹ va'ety voi

¹⁸ Ogwahẽ-ta ko yvy opa hagwã óra. Omombe'u va'ekwe peẽ-my gwĩ Cristo-rehe ija'e'ỹ va'ety voi outaha. Ha ko'ánga katu heta ojekwaa-ma gwĩ Cristo-rehe ija'e'ỹ va'ety. Upéa-gwi jaikwaa ogwahẽtaha ko yvy opa hagwã. ¹⁹ Gwĩ va'e ndaha'úi nhande javegwa tee. Upéa-gwi nhande pa'ũ-gwi osẽ nhande reja oho-vy. Nhande javegwa tee ramo ra'e, opyta joty arã ra'e nhande jave. Ha nhande reja-ma voi oho-vy. Upéa-gwi ojekwaa-ma voi hekoha. Áy jaikwaa-ma hese. "Gwĩ va'e kwéry ndaha'úi nhande javegwa tee nipo ra'e" ja'e-ma hese.

²⁰ Ha peẽ-my katu Cristo ombou va'ekwe peẽ-my ime'l'ẽ-vy Nhe'ẽ Marangatu tee va'e. Upéa-gwi anhetegwa kwaaha voi peẽ kwéry. ²¹ Anhetegwa kwaaha voi peẽ. Ndaha'íry anhetegwa kwaa e'ýha voi peẽ. Anhetegwa tee va'e voi ndaijapúi va'e voi. Upéa peikwaa. Upéa-gwi amondo-ta peẽ-my xe kwatia nhe'ẽ.

²² Oĩ ijapu va'e. Kiva'e pa amombe'u-ta peẽ-my. "Hesu ndaha'úi Cristo Nhandejáry remimbou va'e" he'i va'e mo'ã, ijapu. Ha'e Cristo-rehe ija'e'ỹ va'ety voi upéa. Onhe'ẽ mbojevay va'e Nhandejáry ra'y-pe. Onhe'ẽ mbojevay ramo íxupe, Nhande Ru-pe onhe'ẽ mbojevay ave. ²³ Ta'ýry-pe ombojevay va'e gwive ombojevay Nhande Ru-pe ave. Ha Ta'ýry ogwerohory va'e gwive, peteixa omoirũ Nhande Ru-pe ave.

²⁴ Toiko meme katu pende py'a-py peẽ-my hemimombe'ukwe, Hesu reroviaha ramo peiko-ma ramo va'ekwe. Upéa nhe'ẽ oiko ramo pende py'a-py, peteixa pemoirũ va'erã

* 2:11 Ef 5,8; 1 Jo 1,5-7 * 2:17 Tg 4,4

Ta'yry-pe Nhande Ru-pe ave. ²⁵Upéixa ramo Nhandejáry ndive jaikove va'erã Cristo he'i hagwe-rami. "Apomoingove va'erã opa e'y reheve peiko hagwã" he'i ete va'ekwe peẽ-my.

²⁶Ha gwí Cristo nhe'ẽ mbojevya katu pene mbotavyse mo'ã. Upéa-gwi hesegwa nhe'ẽ amondo-ta peẽ-my. ²⁷Ha peẽ-my katu Cristo ombou peẽ-my ime'ẽ-vy onhe'ẽ marangatu. Pende py'a-py oiko ramo inhe'ẽ marangatu, napeikotevêgwasúí va'erã pene mbo'eharã kwéry-rehe. Inhe'ẽ mante pene mbo'e va'erã. Opamba'e-py pene mbo'e va'erã. Anhetegwa voi hemimombe'u. Apu e'y voi omombe'u. Upéa-gwi pehendu katu Nhe'ẽ Marangatu tee va'e remimombe'u peteixa pemoirũ hagwã Cristo-pe.*

²⁸Upéixa ramo, xe ra'y kwéry, peteixa pemoirũ katu íxupe. Nhamoirũ ramo íxupe, ojehexa uka jevy ou-vy ramo, nanhanhemondýiry va'erã jahexa-vy íxupe. Nanhatĩry va'erã íxugwi ogwahẽ jevya áry-py. ²⁹Peikwaa Cristo ojevavy e'y va'e voiha. Upéa-gwi hembiaपो porã porã va'e gwive peikwaa Nhandejáry ra'y kwéry voiha.

3

Nhandejáry re'yí kwéry

(Jn 1.12; Rm 8.29)

¹Nhandejáry rembiexakwaa porã voi nhande. Nhande rayhu tee rei-ma oiko-vy. Upéa-gwi Nhandejáry ra'y kwéry-py nhane renói. Nhandejáry ra'y kwéry voi nhande. Ha teko rei katu ndohexa kwaáiry Cristo-rehe. Nhandejáry ra'yha ndohexa kwaáiry hese. Upéa-gwi ndohexa kwaáiry nhande-rehe ave ta'y kwéryha nhande. ²Áy katu, xe rembiayhu, Nhandejáry ra'y kwéry voi nhande. Ha upe rire katu ndojekwaái vyteri nhande rekorã. Ojehexa uka jevy ou-vy ramo, jahexa-gwi íxupe onhemomba'egwasu ramo, Hesu rekoharamima nhanhehekoviãrõ va'erã íxupe. Upéa peikwaa voi. ³"Cristo-pe ahexa va'erã hekoha-rami. Anhehekoviãrõ va'erã íxupe" he'i va'e gwive, onhemopotise tise oiko-vy. Cristo py'a potiha-ramima onhemopotí oiko-vy.

⁴Jajevavy ramo, Nhandejáry nhe'ẽ apo e'yha nhande. Upéa-gwi ojevavy va'e gwive ndoikovéi-ma voi Nhandejáry reko-rupi. Otekoaha rasa-ma va'e oiko-vy. ⁵Ojehexa uka ou-vy va'ekwe Cristo omboyke hagwã nhandéhegwi nhane rembiapo vaikwe. Ha'e ko ojevavy e'y va'e voi.* ⁶Upéixa ramo Cristo-pe peteixa omoirũ va'e gwive, ndaha'evéi-ma ojevavy va'ety. Ha ojevavy va'ety katu ohexa kwaa e'y va'e Nhandejáry-rehe. Ndoheko kwaái íxupe. Nomoirũry voi íxupe.

⁷Ani penhembotavy uka teĩ avave-pe, xe re'yí kwéry. Hembiaपो porã va'e gwive ojevavy e'y va'e voi. Cristo ojevavy e'yha-rami ndojevaví ave. ⁸Ha ojevavy va'e gwive katu anháy reko-rupi oiko. Ha anháy ruvixa ko vvy nhepyrũ gwive, ojevavy va'ekwe oiko-vy. Upéa-gwi ojevavy va'e oiko heko-rupi. Upéa-rehe ojehexa uka ou-vy va'ekwe Nhandejáry ra'y omokanhy ngatupa hagwã anháy rembiapokwe.

⁹Ha Nhandejáry ra'y kwéry katu oiko Nhandejáry reko-rupi. Ipy'a kwéry-py oiko inhe'ẽ. Upéa-gwi ojevavy e'y va'e voi oiko-vy. Túvy Nhandejáry voi. Upéa-gwi ndikatúi ojevavy oiko-vy. ¹⁰Upéixa ramo ojekwaa porã Nhandejáry ra'y kwéry. Anháy ruvixa ra'y kwéry ojekwaa porã ave. Ojevavy va'e gwive, Hesu roviaha-pe ndohayhúí va'e, ndaha'ei Nhandejáry re'yí kwéry-rami.

Pejohayhu katu peiko-vy

¹¹Are-ma Hesu roviaha ramo peiko-ma ramo, omombe'u va'ekwe peẽ-my pejohayhu hagwã. "Pejohayhu katu peiko-vy" he'i peẽ-my. ¹²Ha myamyrĩ Caim reko-rupi katu aníke peiko teĩ. Caim anháy reko-rupi oiko-gwi, ojuka va'ekwe gwyvryry-pe. Ma'erã po ojuka íxupe? Tyke'yry hembiaपो vai meme va'e. Ha tyvryry katu hembiaपो porã va'e. Upéa-gwi ojuka va'ekwe gwyvryry-pe.*

¹³Upéixa ramo, xe ryvy kwéry, ndajia'ei ramo pende-rehe teko rei, pendéjehe ani aipo peje "Ma'erã po ndajia'ei nhande-rehe" ani aipo peje pendéjehe. ¹⁴Yma va'ekwe jaiko rei va'ekwe Nhandejáry-gwi mombryry. Ha ãy katu jaikove meme-ma Nhandejáry ndive.

* 2:27 Jo 14.26; 16.13 * 3:5 Jo 1.29 * 3:12 Gn 4.8

Nhandejáry ndive jaikoha jaikwaa voi. Jahayhu voi nhande re'yí Hesu-rehe ojerovia va'e-pe. Jajohayhu-gwi peteíxa Nhandejáry ndive jaikoha jaikwaa voi "Nhandejáry ndive-ma voi jaiko" ja'e nhandéjehe. Ha gwe'yí-pe ohayhu e'y va'e katu, Nhandejáry-gwi mombyry joty oiko. ¹⁵ Ha gwe'yí-pe ohayhu e'y va'e katu, oporojuka va'e ojevavyha-rami ojevavy ave. Ha Nhandejáry ndive ndoiko mo'ái opa e'y reheve oporojuka va'e. Upéa peikwaa voi. ¹⁶ A-rami jaikwaa ohayhu teeha. Cristo nahakate'yíry gwekove-rehe. Nhande-rehe ojevuka uka va'ekwe. Ha'e-rami iporã nanhane rakate'yíry nhande rekove-rehe. Iporã nhaipytygwō nhande re'yí-pe nhamano ete peve, nhapena e'y reheve nhandéjehe. "Apa ete peve aporesende va'erã" peje katu pende re'yí kwéry-pe. ¹⁷ Ha imba'e reta va'e katu oí ohexa va'e gwe'yí remikotevê. Ha ndoiporiahuverekóiry íxupe. Ndohexakwaa reíry íxupe. Upéa, "Nhandejáry xe rembiayhu voi" he'i mo'ã ojúepe. Ndohayhúí voi Nhandejáry-pe. ¹⁸ Oí "Jajohayhu va'e" he'i mo'ã ójehe. Ha nonhopytygwóiry. Ojuru-py rei ojohayhu. Jajohayhu tee katu nhanhopytygwō-vy.

*Nhandejáry rovagwy-py nanhatíry va'erã jajapo ramo oração
(Jo 15.17)*

¹⁹ Upéixa voi "Hesu reroviaha tee voi nhande" ja'e nhandéjehe nhande apu e'y reheve nhandéjehe. Upéixa Nhandejáry rovagwy-py nanhatíry va'erã jajapo hagwā oração. ²⁰ Ha sapy'ante nde py'a-py "Erejevavy-ma" he'i vérami mo'ã, ani pepena teí hese. Ipu'akave joty Nhandejáry nhande py'a-py oí va'e nhe'ê-rehe. Ome'êve py'agwapy. Opamba'e oikwaa voi. Jajevavy e'yseha oikwaa ave. ²¹ Upéixa ramo peê xe rembiayhu va'e, nhande py'a-py mba'eva nde'íry vérami, Nhandejáry rovagwy-py nanhatíry va'erã jajapo hagwā oração. ²² Hemimanda nhahendu va'e, hemimbota jajapo va'e. Upéa-gwi oime raê va'e-rehe jajerure íxupe va'e ome'ê nhande-vy. ²³ A-rami he'i nhande-vy: "Perovia katu xe Ra'y Hesu Cristo réry-pe. Pejohayhu katu, Cristo peê-my he'i hagwe-rami" he'i nhande-vy omanda-vy. ²⁴ Nhandejáry remimanda ohendu va'e gwive peteíxa omoirū Nhandejáry-pe. Nhandejáry ave peteíxa omoirū íxupe. Ome'ê va'ekwe nhande-vy Nhandejáry onhe'ê marangatu tee va'e. Upéa-gwi inhe'ê marangatu tee va'e nhande py'a-py oiko-gwi jaikwaa Nhandejáry peteíxa nhane moirūha.

4

Oí "Nhe'ê Marangatu tee va'e-py amombe'u Nhandejáry nhe'ê" he'i va'e mo'ã

¹ Pejeapysaka katu xe nhe'ê-rehe, xe rembiayhu va'e.

"Nhe'ê Marangatu tee va'e xe monhe'ê uka" he'i va'e gwive, ani perovia pya'e teí íxupe. Eporandu ranhe katu hemimombe'u-rehe:

"Kiva'e nhe'ê-py ha'e omombe'u? Nhandejáry gwigwa nhe'ê para'e. Anháy remimombe'ukwe para'e omombe'u" ere hese. Heta anháy nhe'ê-py omombe'u va'ety oparupi osê oho-vy. Opa-rupi omosarambi onhe'ê oho-vy. Upéa-gwi eporandu randu ranhe katu íxupe hemimombe'u-rehe. Ani ererovia teí Nhandejáry nhe'êre'y. ² A-rami pehexa kwaa va'erã hese. "Hesu Cristo ojehexa uka-ma ou-vy va'ekwe nhande-rami" he'i va'e gwive, oiko ipy'a-py Nhandejáry gwigwa Nhe'ê Marangatu tee va'e. ³ Ha upéixa Hesu ojehexa uka va'ekwe ou-vy rehegwa nhe'ê nomombe'úí va'e gwive ndoikóiry ipy'a-py Nhandejáry gwigwa Nhe'ê Marangatu tee va'e. Upéixa he'i va'e Cristo-rehe ija'e'y va'ety voi. Peê-my omombe'u va'ekwe outaha. Ha ko'ánga katu ojehexa uka-ma oiko-vy gwí Cristo-rehe ija'e'y va'ety. Ani ererovia teí inhe'ê.

⁴ Ha peê katu, xe ra'y kwéry va'e, Nhandejáry re'yí voi. Ipu'akave Nhe'ê Marangatu tee va'e pende py'a-py oiko va'e. Teko rei py'a-py oí va'e-rehe ipu'akave voi. Upéa-gwi napenhobotavy ukái va'erã upeixagwa ijapu va'e-pe. ⁵ Teko rei rehegwa nhe'ê omombe'u. Teko rei reko-rupi oiko. Upéa-gwi teko rei ohendu ave inhe'ê. ⁶ Ha nhande kwéry katu Nhandejáry re'yí voi. Nhandejáry irū va'e gwive nhane nhe'ê renduha voi. Ha Nhandejáry re'yí e'y va'e nanhane rendúí oiko-vy. Upéixa jaikwaa kiva'e nhe'ê anhetegwa va'e. kiva'e onhe'ê-py nhane mbotavy va'e jaikwaa ave.

Heko porayhu tee rei va'e Nhandejáry

(Jo 3.16; Rm 5.6-8)

⁷Pejeapysaka katu xe nhe'ê-rehe peê, xe rembiayhu va'e. Nhane mbojohayhu uka va'e Nhandejáry voi. Upéa-gwi jajohayhu katu. Ojohayhu va'e gwive Nhandejáry ra'y kwéry voi. Oheko kwaa-ma voi íxupe. ⁸Heko porayhu tee rei va'e voi Nhandejáry. Upéa-gwi oporohayhu e'ý va'e ndoheko kwaáiry íxupe. ⁹Oikwaa uka va'ekwe nhandevy nhande rayhuha. Gwa'ýry ombou nhande rayhu-gwi. Ko yvy-py ombou va'ekwe íxupe, ha'eixagwa ndoikói va'e, petei voi oiko va'e. Ombou íxupe jajerovia ramo hese, jaikove meme hagwã hendive. ¹⁰Nhande rayhu teeha jaikwaa-ma a-rami. Nhande ranhe ndajahayhúi va'ekwe íxupe. Ndaupéixairy voi va'ekwe nhande. Ha'e ae ranhe nhande rayhu tee nhande-vy. Nhande rayhu-gwi ombou va'ekwe gwa'ýry omboyke hagwã nhandéhegwi nhane rembiapo vaikwe nhande rereko asy e'ý-vy.

¹¹Upéixa nhande rayhu tee-ma va'ekwe oiko-vy. Upéa-gwi jajohayhu katu, peê xe rembiayhu kwéry. ¹²Nhandejáry ko jahexa e'ý va'e. Ha jajohayhu ramo katu peteixa nhane moirũ Nhandejáry. Upéixa jajohayhu tee rei jaiko-vy.

¹³Ha Nhe'ê Marangatu tee va'e-py nhande rexakwaa rei va'ekwe Nhandejáry ime'ê-vy. Upéa-gwi jaikwaa voi peteixa nhamoirũha íxupe. Peteixa nhane moirũha jaikwaa ave. ¹⁴Ha ta'ýry-pe orohexa-ma va'ekwe oroiko-vy. Ore rapixa-pe oromombe'u va'ekwe hesegwa. “Ko yvy-py oiko va'e-pe gwive ombou va'ekwe Nhande Ru gwa'ýry hesendeharã” oro'e oromombe'u-vy. ¹⁵Ha “Nhandejáry ra'y voi Hesu” he'i va'e gwive, peteixa omoirũ íxupe Nhandejáry. Omoirũ peteixa Nhandejáry-pe ave. ¹⁶Nhandejáry nhande rayhu teeha jarovia-ma jaiko-vy. “Nhande rayhu porã tee rei nipo ra'e” ja'e hese. Ha Nhandejáry katu nhane mbojohayhu uka va'e voi. Ojohayhu va'e gwive oiko-vy, peteixa omoirũ va'e Nhandejáry-pe, omoirũ ave íxupe Nhandejáry. ¹⁷Upéixa jajohayhu porã tee rei voi jaiko-vy. Jajohayhu porã-gwi, ojehexa uka jevy ou-vy ramo Nhandejáry, nanhanhemondýi va'erã jahexa-vy. Hembiapokwe pokwe-rami enterovéape ohekojohuha áry-py, nanhatĩry va'erã jaha hagwã hovagwy-py. Ko'ánga Hesu reko-rupima jaiko ko yvy-py. Upéa-gwi upe áry-py jaha va'erã hovagwy-py nhatĩ e'ý reheve. ¹⁸Nhande rayhu-gwi, naiporãi jajepý'apy rei nhandéjehe. Jajohayhu tee rei ramo katu, nanhane mytu'e'ývéi-ma nhandéjehe. Ha nhane mytu'e'ý ramo katu, “Nhande moingo asy-ta Nhandejáry” ja'e nhandéjehe. Upéixa ramo jajepý'apy jave ndajajohayhu porã teéiry vyteri.

¹⁹Nhande rayhu ranhe va'ekwe-gwi Nhandejáry, jajohayhu ave nhande. ²⁰“Xe ahayhu Nhandejáry-pe” oĩ he'i va'e mo'ã. Ha ndaija'ei gwe'ýi-rehe. Upe va'e ijapu-ma ójehe. Ohexa ramo jepe, ndohayhu porã gwe'ýi-pe. Mba'éixa po ohayhu-ta Nhandejáry-pe? Nhandejáry-pe ndohexáiry. ²¹Hesu remimanda a-rami nhande-rehe: “Nhandejáry rayhuha tohayhu katu gwe'ýi ave” he'i Cristo nhande-rehe omanda-vy.

5

Ndaipu'akavéi-ma nhande-rehe teko rei

¹“Cristo Nhandejáry remimbou voi Hesu” he'i va'e gwive herovia-vy, Nhandejáry ra'y ramo ave oiko íxupe ra'e. Nhande rapixa-pe jahayhu ramo, ta'ýry ndive jahayhu ave. ²Upéixa voi Nhandejáry-pe jahayhu-gwi, hemimanda nhahendu-gwi ave, “Nhandejáry ra'y kwéry-pe ave jahayhu tee ra'e” ja'e nhandéjehe nhande apu e'ý reheve. ³Nhandejáry-pe jahayhu va'e, jajapo katu hemimanda. Ha hemimanda ndahasýry nhande-vy. Nomanda pohýiry nhande-vy. “Ndikatúi ajapo upéa” ndaja'ei íxupe. ⁴Nhandejáry ra'y kwéry va'e-rehe gwive ndaipu'akavéi-ma teko rei nhe'ê. Upéa-gwi ojapose katu Nhandejáry remimanda. Ndojohu pohýiry he'i va'e. Jarovia tee-ma ramo íxupe, ndaipu'akavéi-ma nhande-rehe teko rei nhe'ê. ⁵“Nhandejáry ra'y tee voi Hesu” he'i va'e herovia-vy, ndaipu'akavéi-ma teko rei nhe'ê hese. Ha'e anho mante ipu'akave teko rei nhe'ê-rehe.

Hesu Cristo rehegwa nhe'ê omombe'u va'e

(Jo 3.14-16,36; 5.31-38; 6.40; 11.25-26; 20.31)

⁶Ojehexa uka ou-vy va'ekwe Hesu Cristo voi. Ojehexa uka rire, y-pyma onhemongarai va'ekwe. Upéi gwugwy avyete-py omano va'ekwe. Upéixa ojehexa uka ou-vy va'ekwe. Ojehexa uka ou-vy ramo, y-py ojehexa uka ranhe rire, gwugwy avyete-py ave ojehexa uka. Upe va'e omombe'u katu Nhe'ê Marangatu tee va'e. Hekoha apu e'ÿ va'e voi ha'e. Upéagwi anhetegwa va'e voi hemimombe'u. ⁷Mbohapy Cristo rehegwa omombe'uha yváy-py oí va'e. Oí Nhande Rugwasu, oí Nhandejáry reko kwaa ukaha, oí Nhe'ê Marangatu tee va'e. Ha mbohapyháixa jepe peteí va'e joty. ⁸Ha mbohapy Cristo rehegwa oikwaa uka vvy arigwa-pe. Oí Nhe'ê Marangatu tee va'e. Oí y-py onhemongarai uka hagwe rehegwa nhe'ê. Oí ave gwugwy avyete-py omano hagwe rehegwa nhe'ê. Upéa mbohapy nhe'ê ijoja. Peteíxa he'i imombe'u-vy. "Hesu Cristo Nhandejáry remimbou voi" he'i nhandevy nhane mbo'e-vy va'ekwe. ⁹Nhande rapixa remimombe'u jarovia va'e. Ha Nhandejáry remimombe'u katu anhete teegwa va'e voi. Onhe'ê avy e'ÿ va'e. Ha mbohapy inhe'ê mombe'uha remimombe'u voi Nhandejáry remimombe'u voi. Gwa'ýry rehegwa nhe'ê omombe'u. ¹⁰Upéixa ramo, Nhandejáry ra'y-rehe ojerovia va'e gwive, anhetegwa voi hemimombe'u ha'e oikwaa opy'a-py. Ha herovia e'ÿha katu, Nhandejáry-pe omboapu voi. Nhandejáry ra'y rehegwa omombe'u ramo ndogwerováiry hikwái. ¹¹Nhandejáry remimombe'u a-rami: Nhane moingove va'ekwe Nhandejáry opa e'ÿ reheve jaiko hagwá hendive. Ta'ýry-rehe jajerovia-ma ramo, nhane moingove va'ekwe. ¹²Ta'ýry-pe omoirü va'e gwive oiko meme va'e Nhandejáry ndive. Ha ta'ýry-pe omoirü e'ÿ va'e gwive, ndoikói voi Nhandejáry ndive. Mombry rei oiko íxugwi.

Nhandejáry ndive peiko memeha peikwaa

(Jo 14.12-14)

¹³Nhandejáry réry-rehe pejerovia va'e. Aipota peikwaa Nhandejáry ndive opa e'ÿ-rehe peiko memeha. Upéa-rehe amondo-ta peê-my xe kwatia nhe'ê. ¹⁴Oime raê va'e-rehe jajerure ramo Nhandejáry-pe, hemimbota-nupi jajerure ramo, jaikwaa voi nhande renduha. Upéa-gwi nanhane kyhyjéi jajapo-vy oração. Hovagwy-py jepe ndajajeheko renotíry va'e. ¹⁵Jajerure javéte íxupe nhane rendu-ma voi. Nhane rendu-gwi nhane rembierure ome'ê va'erá nhande-vy. Upéa jaikwaa voi.

¹⁶Oí nhande re'ýi ojejavy va'e ha ojejavy va'ekwe-rehe nomondo mo'ái íxupe Nhandejáry ojéhegwi mombry. Upeixagwa erehexa ramo, ejerure katu hese Nhandejáry-pe ohexa uka hagwá íxupe hape porärä. Oí ave nhande rapixa ojejavyve va'e ha ojejavy va'ekwe-rehe omondo va'erá voi íxupe Nhandejáry ojéhegwi mombry. Ani joty erejerure hese, ha'e-ta peê-my. ¹⁷Entéro hembiaipo vai va'e gwive ojejavy voi. Ojejavy ramo jepe, oí joty ojejavy va'ekwe-rehe Nhandejáry remimondo e'ÿ ojéhegwi mombry.

¹⁸Nhandejáry ra'y ramo-ma oiko va'e, ndojejavýi oiko-vy onhangareko-gwi hese kwéry Cristo Nhandejáry ra'y tee va'e. Ndaipu'akái-gwi anhaygwasu hese, ndojejavýiry oiko-vy. Ndoheko johúiry voi íxupe anhaygwasu. Upéa jaikwaa voi.

¹⁹Nhandejáry javegwa voi nhande. Ha entéro teko rei va'e gwive katu anháy ruvixa ipu'aka hese kwéry. Upéa jaikwaa voi. ²⁰Jaikwaa ave ko va'e. Ojehexa uka-ma oiko-vy va'ekwe Nhandejáry ra'y. Nhane mo'arandu ou-vy va'ekwe jaheko kwaa hagwá Nhandejáry teha. Peteíxa nhamoirü Nhandejáry tee va'e-pe. Ta'ýry Hesu Cristo-pe peteíxa nhamoirü ave. Nhandejáry tee voi ha'e. Ondive nhane moingove va'e voi ha'e jaiko hagwá opa e'ÿ reheve indive.

²¹Penhangareko katu pendéjehe, xe ra'y kwéry. Tupã ra'anga anga rei-rehe ani katu pejehesa rerova teí. Heta teko rei omboete va'e. Upe va'e-rehe ani pejehesa rerova teí. Nhandejáry-pe anho nhamboete teeve katu.

João remimombe'ukwe 2 segunda epístola de João

¹Nde, xe reindy, Nhandejáry rembiporavo voi ne memby kwéry ndive, xe João amondo-ta peẽ-my xe kwatia nhe'ẽ. Hesu reroviaha-rehe anhangareko va'e xe. Ne memby kwéry xe rembiayhu tee va'e voi. Anhetegwa va'e nhe'ẽ jarovia-gwi, xe rembiayhu voi peẽ. Naxe anhóiry voi apohayhu va'e. Anhetegwa nhe'ẽ oikwaa va'e gwive pende rayhu porã oiko-vy. ²Anhetegwa va'e nhe'ẽ jarovia-gwi, jajohayhu porã jaiko-vy. Nhamoangeri ngeri inhe'ẽ. Ange vérami joty nhande-vy inhe'ẽ. Opyta meme va'erã nhande py'a-py.

³Tanhande rovasa katu Nhandejáry Nhande Ru. Tanhande rovasa katu ta'yry Hesu Cristo nhande rexakwaa rei-vy. Tanhande poriahuvereko katu. Tanhane mbopy'agwapy katu ave jajohayhu porã hagwã anhetegwa nhe'ẽ-rupi jaiko-vy.

Jajohayhu porã katu anhetegwa nhe'ẽ-rupi jaiko-vy

⁴Oĩ ne memby anhetegwa nhe'ẽ-rupi oiko va'e. Nhande Ru remimombe'ukwe-rupi oiko. Upéa xe aikwaa-ma ramo avy'a eterei-ma xe. ⁵Ha ko'ánga katu anhemonhe'ẽ-ta nde-vy, xe reindy, jajohayhu hagwã. Ipyahu e'y va'e voi kwatia-rehe nde-vy xe remimondo. Upéixa omanda va'ekwe nde-vy peiko hagwã, Hesu reroviaha ramo ereiko-ma ramo va'ekwe.* ⁶Ha "Jajohayhu voi jaiko-vy" ja'e ramo nhandéjehe katu, Nhandejáry nhe'ẽ renduha ramo iporã jaiko. Hesu reroviaha ramo peiko-ma ramo va'ekwe, omanda va'ekwe peẽ-my "Pejohayhu katu peẽ peiko-vy" he'i va'ekwe peẽ-my.

⁷Opa-rupi oho oporombotavy tavy rei va'e. Hesu Cristo kwimba'e ramo ojehexa ukaha nomombe'uí voi. Ijapu rei hese. Oporombotavy tavy rei oiko-vy va'e voi upe va'e. Cristo nhe'ẽ mbojevvyhaty voi.* ⁸Upéa-rehe penhangareko katu pendéjehe. Aipota peẽ-my ome'ẽ pene rembiapo porã repyrã. Pendéjehe penhangareko porã ramo, entéro peẽ-my gwarã gwive ome'ẽ va'erã peẽ-my.

⁹Cristo remimombe'u rendu e'yha gwive ojehesa rerova-ma Nhandejáry-gwi, nomoiruvéi-vy íxupe. Cristo remimombe'u renduhaty ojehesa rerova e'y reहेve, omoirũ Nhande Ru-pe. Ta'yry-pe omoirũ ave oiko-vy. ¹⁰Ha Cristo nhe'ẽ ra'anga anga rei omombe'uha katu pende ha-py ogwahẽ ou-vy ramo, ani katu pemogwahẽ kuri pende ha-py. "Tande rovasa katu Nhandejáry" ani ave peje teĩ íxupe. ¹¹Ereheja ramo ogwahẽ, peipytygwõ arã íxupe hembiaapo vai-rehe. Opyta va'erã upéixa ramo ne iru ramo.

Pende róga-rupi apopohuse

¹²⁻¹³Heta xe remimombe'use peẽ-my. Ha namombe'u uka mo'ái nde-vy tinta-py. Kwatia rekovia xe voi ahase apopohu hagwã jajováí hagwã nhaĩ-vy nhanhombovy'apa hagwã nhanhomongeta-vy. Omondo-ta nde-vy omandu'aha nde kypy'yry memby kwéry, Nhandejáry rembiporavo va'e.

* 1:5 Jo 13.34 * 1:7 1Jo 4.1-3

João remimombe'ukwe 3 terceira epístola de João

¹ Xe rembiayhu tee va'e Gaio. Xe João amondo-ta nde-vy xe kwatia nhe'ẽ. Hesu reroviaha-rehe anhangareko va'e xe. Xe rembiayhu tee voi nde.

² Ajapo oraçãõ nde-rehe ojehu e'y hagwã nde-vy mba'eve, ne resãĩ porã hagwã. Nde py'a gwive erevy'aha xe aikwaa. Ha'e-rami aipota ave nde rete resãĩ porã ereiko-vy. ³ Ogwahẽ ou-vy Hesu reroviaha va'e xe mbovy'a-vy, "Gaio Cristo nhe'ẽ rendu ku'a ku'a e'yha voi" he'i nde-rehe omombe'u-vy. Upéixa Cristo rekoha tee-rupi ereiko meme voi ra'e. ⁴ "Nde ra'y kwéry Cristo nhe'ẽ-rupi oiko" he'i ramo xe-vy, avy'a eterei voi xe. Upéixa ne mombe'u ramo, ndaipóri xe mbovy'ave va'erã.

João omomba'egwasu Gaio rembiapo

⁵ Ne rembiapo porã tee ereiko-vy, xe rembiayhu va'e. Hesu reroviaha-pe ereipytygwõ-vy ne rembiapo porã voi. Ogwahẽ va'e gwive nde ha-py nde eremogwahẽ porã meme voi. Ereikwaa va'e eremogwahẽ. Ereikwaa e'y ramo jepe eremogwahẽ porã joty. ⁶ Upéi gwĩ eremogwahẽ va'ekwe ogwahẽ jevy ou-vy ramo ko'a-py, Hesu reroviaha ojogweroaty va'e ha-py, omombe'u porã ne rerakwã erehexakwaa entéro va'e-pegwi. Ko'ay aipota ne remipytygwõ-pe ereme'ẽ oime raẽ va'e ogweraha hagwã mombryve oho porã jevy hagwã Nhandejáry-pe eremboete-vy. ⁷ Cristo remimbou upe va'e. Hesu rerovia e'yha-pe oho omombe'u inhe'ẽ. Ha ha'e noimba'e pe'ái íxupe kwéry, ndojeroviái-gwi Hesu-rehe. Aipo ramo aipota erereko porã hemimbou hemikotevẽ ereme'ẽ-vy eremotĩ e'y hagwã imbouhare-pe. ⁸ Nhande kwéry Hesu reroviaha va'e nhaipytygwõ katu Cristo remimbou. Anhetegwa nhe'ẽ-rehe omba'apo va'e, nhamoirũ katu íxupe nhaipytygwõ-vy.

Diótrefes rehegwa nhe'ẽ, Demétrio rehegwa nhe'ẽ ave

⁹ Heta e'y va'e xe kwatia nhe'ẽ amondo kuri nde re'yí Hesu reroviaha va'e-pe. Ha Diótrefes katu onhembotuvixase va'e mo'ã. Nohenduséi xe nhe'ẽ. ¹⁰ Upéa-gwi agwahẽ aha-vy ramo pende ha-py aikwaa ukapa arã hembiapokwe inhe'ẽ vaiha ave. Ha'e onhe'ẽ rei xe-rehe, xe renohẽ vai rei. Xe-rehe ijapu rire, ojapo vaiseve. Ha Hesu reroviaha va'e ogwahẽ oho-vy ramo iha-py, nomogwahẽséi voi. Omogwahẽse va'e ha-py ndohejáiry voi ave ogwahẽ. Ha omogwahẽse katu ete va'e-pe omosése Hesu reroviaha ojogweroaty va'e ha-gwi.

¹¹ Ani ereheko a'ã hekoha vai va'e-pe, xe irũ. Eheko a'ã hekoha porã va'e-pe katu. Hembiao porã va'e Nhandejáry reko irũ voi. Ha hembiao vai va'e katu ndohexa kwaáiry hese. Nhandejáry oiko e'y va'e-rami oiko ha'e.

¹² Ha Demétrio katu enterove imandu'a porã hese. Ohexa kwaa hese: "Hekoha porã tee voi" he'i hese. Hekoha porã teeha xe ave amombe'u. Ereikwaa xe remimombe'u apu e'y va'e voi.

Angeve ngeve-rupi apohexase

¹³ Heta xe nhe'ẽrã oĩ. Ha kwatia-rehe namondo mo'ái. Tinta-py namoĩ mo'ái kwatia-rehe. ¹⁴ Angeve ngeve-rupi apohexase voi. Aipo ramo nhanhomongeta va'erã nhande juru-rupi jajovái nhaĩ-vy.

¹⁵ Tapende mbopy'agwapy katu Nhandejáry. Pene irũ gwive a-py oiko va'e, omondo-ta peẽ-my omandu'aha. Ore irũ pene pa'ũ-my oiko va'e peteĩ teĩ va'e-pe emombe'u ore mandu'aha.

Judas remimombe'ukwe epístola de Judas

Judas omondo onhe'ë kwatia-rehe Nhandejáry rembiporavokwe pegwarã

¹ Xe Judas, Hesu Cristo rembigwái. Tiago ryvy xe. Ahai-ta kwatia-rehe xe nhe'ë peë-my gwarã. Peë Nhandejáry pegwa-ma. Nhandejáry, Nhande Ru pende pe'a-ma va'ekwe ojéupe gwarã. Pende rayhu voi ha'e. Onhangareko porã pende-rehe Hesu Cristo pegwarã. ² Tapende rovasa katu pende poriahuvareko reko hagwã Nhandejáry. Tapene mbopy'agwapy tee katu pende rovasa-vy. Tapende rayhu porãve rãve katu pende rovasa-vy Nhandejáry.

Penhemokyre'y katu pemonhe'ë mbojevuy hagwã gwí Hesu Cristo-rehe omombe'u a'ã a'ã rei va'e-pe

³ Xe rembiayhu kwéry are-ma ahaise peë-my. Nhandejáry omboyke-ma nhandéhegwi nhane rembiapo vaikwe nhane resende tee hagwã. Xéhegwi omboyke-ma voi va'ekwe xe rembiapo vaikwe. Ha omboyke-ma ave pendéhegwi araka'e pene rembiapo vaikwe. Upéa-rehe are-ma ahaise ramo jepe, ahai va'erãgwe aheja-ta. Xe tuvixa mba'eve va'e ahai-ta. Tekotevë apomo'arandu ambue va'e. Ko kwatia-rehe ahai ani hagwã pejere rei anhetegwa jarovia va'ekwe-gwí. Ko kwatia ahai pene mokyre'y hagwã, penhe'ë mbojevuy jevy hagwã anhetegwa e'y nhe'ë. Hesu Cristo rehegwa tee nhe'ë peipy'apyhy va'ekwe. Hesegwa anhetegwa e'y nhe'ë pejoko jevy katu.

⁴ Oime-ma pene pa'ũ-rupi gwí Nhandejáry-rehe ndojeroviái va'e. Porombotavy-vy rei oike nhemi pene pa'ũ-my. "Nhande rekorã Nhandejáry remimbota voi nipo ra'e" peje rei hagwã hemimombe'ukwe-rehe. Ojéhegwi rei omombe'u Nhandejáry remimbota mo'ã. "Nhandejáry nhande rexakwaa rei va'e voi. Opaixagwa jajapo ramo jepe ha'e nhande rexakwaa rei va'erã voi" he'i mo'ã. "Aipo ramo nanhatíví reheve tajaiko katu nhande rexakwaa reive ive hagwã" he'i mo'ã pene mbotavy rei-vy. Ndogweroviái Nhandejáry Hesu Cristo-pe. "Ha'e anho nhande ruvixa" nde'íry hikwái. Pejoko katu upe onhe'ë rei va'e kwéry-pe. Yma va'ekwe Nhandejáry nhe'ë kwatia-rehe oí va'e he'i hese: "Hembiapo vai va'erã ohasa asy hagwã-my oho va'erã" he'i va'ekwe hese kwéry.

Myamyri-pe Nhandejáry ogwereco asy ete va'ekwe ójehe ndojeroviái-gwi va'ekwe

⁵ Pene rembigwaa-rehe apomomandu'a jevy-ta. Yma va'ekwe Nhandejáry oipe'a myamyri Israel ra'y kwéry Egito yvy-gwí iresende-vy. Ogwerova heraha-vy. Upe rire ohundi tee íxupe kwéry ójehe ndojeroviái va'e kwéry-pe gwemiresendekwe-pe.*

⁶ Apomomandu'a jevy-ta gwí yváy pygwakwe-rehe, Nhandejáry rembigwaikwe-rehe. Yváy pygwa voi jepe gweko nypkwe-rupi ndopytaséi va'ekwe hikwái. Oheja rei gweko porã teekwe. Upéa-rehe Nhandejáry ombogwey uka-ma va'ekwe íxupe kwéry. Pytũ gwypy isã-rehe onhapytí pytí hereko-vy imbohassa asy-vy íxupe kwéry. Ohundi hagwã áry-rehe oha'arõ arõ joty okwa-vy. Nhandejáry renonde-py enterová omboaty hembiapokwe pokwe-rehe nhande rereko hagwã áry-py ohundipa va'erã íxupe kwéry Nhandejáry.

⁷ Apomomandu'a jevy-ta ave gwí tetãgwe ymagware-rehe. Sodoma tetãgwe, Gomorra tetãgwe-rehe ave, gwí tetã ijerekwe rehegwa ave-rehe pene mandu'a katu. Myamyri upe pygwa kwéry hembiapo vai tee va'ekwe hikwái. Nhandejáry rembigwaikwe-rami hembiapo vai hikwái. Teko rei-rupi opaixagwa ivaive ive va'e ojapo va'ekwe hikwái onhemotí e'y-vy. Upéa-rehe Nhandejáry ohundipa ete va'ekwe íxupe kwéry. Tatagwasupy voi omokanhymba va'ekwe íxupe kwéry. Upéixa ogwereco va'ekwe íxupe kwéry nhane mo'arandu hagwã. Upéa-rehe Nhandejáry oikwaa uka nhande-vy entéro hembiapo vai va'e-pe ha'e ombohassa asy arã tata ogwe e'y va'e-py omondo-vy.*

* 1:5 Êx 12.51; Nm 14.29-30 * 1:7 Gn 19.1-24

⁸ Aipo ramo jepe upe pene pa'ũ-my oĩ va'e upéa myamyri-rami heko rei-rupi ivaive ive oho-vy. “Nhande kéra-py vérami ahexa nhande rekorã” he'i. “Xe kéra-py ojehexa uka kuri xe-vy nhande rekorã” he'i okéra pygware omombe'u-vy onhembotavy rei-vy. Ha'e ae ojapose va'e rei ojapo hikwái. Gweko vaiha-rupi okwa-vy. Mburuvixa kwéry pogwyp-ny ndoikoséi ave hikwái. Onhembohory ave yváy pygwa-rehe okwa-vy. Nhandejáry rembigwái kwéry-pe ohexa uka gwova asyha onhe'ẽ rei rei-vy. ⁹ Nhandejáry rembigwái ruvixa Miguel ae ndaha'éi ha'eixagwa. Yváy pygwa tee jepe ojoko hagwã anhaygwasu-pe nonhe'ẽ asýi joty íxupe. Onhonhe'ẽ mbojevý jevy jepe araka'e anhaygwasu ndive nonhe'ẽ asýi joty íxupe. Onhemoakate'y joty mokõive Moisés amyri retekwe-rehe. Miguel ndohejái anhaygwasu ogweraha hetekwe. Onhonhe'ẽ mbojevý jepe nonhe'ẽ asýi joty anhaygwasu-pe. “Nde ko ne rembiapo vai” nde'íry joty íxupe. “Tande joko katu Tupã Nhandejáry” he'i ae joty íxupe ijoko-vy.*

¹⁰ Upe Nhandejáry nhe'ẽ omombe'u ra'anga anga rei va'e Miguel arandu-rami e'y voi inharandu. Gwembigwaa e'y-rehe onhe'ẽ vai vai rei. Mymba ka'agwy rupigwa-rami mante oikwaa gwete-rehe. Ha ha'e kwéry oikwaaha-rupi ae oiko-gwi ae onhehundipa rei va'erã. ¹¹ Ohasa asy va'erã. Caim amyri rapekwe-rupi ogwata Nhandejáry remimbota apo e'y-vy. Balaão amyri rapekwe-rupi jevy oiko. Opirapirerã-rehe rei ae omombe'u. Hemimombe'ukwe katu ndaha'éiry voi Nhandejáry rehegwa nhe'ẽ. Coré amyri rapekwe-rupi jevy oiko. Hemiapo vai oiko-vy. Yma araka'e Coré onhemoirũ uka heta va'e kwéry-pe ojoko uka hagwã mburuvixagwasu-pe, Nhandejáry remimoĩ va'e-pe. Coré rapekwe-rupi ohasa asy ave arã pene mbo'eha ra'anga kwéry.*

¹² Peẽ Nhandejáry roviaha pejojhayhu-gwi penhomboaty meme karugwasu haty-py. Upe jave Nhandejáry nhe'ẽ omombe'u ra'angaha ave ou. Ojapo vai rei hagwã ou. Ijayvupa rei okwa-vy. Notĩ kwaái. Ndaheko porã peẽ-my. Pende rerekoha ramo mo'ã oikose. Ha'e kwéry ae rei onhemohygyatã. Ita y gwy-py oĩ va'e-rami nhane kanóa ojoka-ta va'e-rami voi pene ra'arõ hikwái. Yvytu arai-pe omosarambipaha-rami voi ha'e kwéry naiporã voi peẽ-my. Yvyra hi'aha óra jepe ndahi'áiry va'e-rami, ha'e kwéry naiporã peẽ-my. Ndaheko porã voi peẽ-my. Yvyra yvygwy-gwi ohekýi va'e-rami hikwái. Omano tee-ma va'e-rami ave hikwái. ¹³ Ygwasu hatã omýi omboaty gwyjuikwe ohexa uka hagwã oky'akwe. Upéixa ave ha'e kwéry ohexa uka gwekoha ky'akwe hikwái. Gwembiapo vaise-vy ndogwapýi oiko-vy enterove-pe ohexa uka hagwã gweko ky'akwe. Gwendagwe-gwi oripara rei oho-vy jasytata pytũ ha-rupi rei okanhy kanhy oho-vy. Upéixa ave pene mbo'e ra'angaha. Hesu Cristo rape-gwi oripara rei oho-vy. Ndohesapéi avave-pe tape porã. Áy katu pytũ-my rei oiko. Nhandejáry ombohasa asy va'erã íxupe kwéry hembiapo vaikwe-rehe.

¹⁴ Yma gware Nhandejáry réry-py Enoque amyri omotenonde pende reko mbo'e vaiharã rekoharã-rehe. Adão amyri remiarirõ joapyri pyri remiarirõkwe jevy oiko va'ekwe Enoque amyri. Ha'e omotenonde pende reko mbo'e vaiharã rekoharã-rehe.

“Nhandejáry ou va'erã” he'i. “Heta gwembigwái imarangatu va'e yváy pygwa kwéry ndive ou va'erã” he'i.* ¹⁵ “Imonhe'ẽ uka-vy hembiapokwe-rehe ou va'erã Nhandejáry. Hemiapo vaikwe-rehe ombohasa asy va'erã ave” he'i. “Hekoha vai va'ekwe-rehe ombohasa asy va'erã. Ojéupe omboete e'y hagwe-rehe ombohasa asy ave va'erã. Ójehe onhe'ẽ pohýi hagwe-rehe Nhandejáry ombohasa asy ave va'erã íxupe kwéry”

he'i va'ekwe Enoque amyri kwatia-rehe ohai-vy. Upéa ohai ramo pende reko mbo'e vaiharã-rehe omotenonde-ma imombe'u-vy.

¹⁶ Mba'éixa po ra'e ha'e kwéry hekoha? Perepara porã katu hekoha-rehe. Onhe'ẽ rei rei oiko-vy ambue kwéry-rehe. Onhomymýi rei rei. Mba'eve-rehe voi ha'e ndovy'áiry. Gwembiapo vaise mante ojapose oiko-vy. Ha'e ae onhe'ẽ-rupi onhembotuvixase mo'ã

* 1:9 Dt 34.6; Zc 3.2 * 1:11 Gn 4.3-8; Nm 16.1-35 * 1:14 Gn 5.21-24

oiko-vy. Onhembojuruhe'ē ete íxupe kwéry oiko-vy ome'ē uka hagwā ojúpe gwarā. Upéixa voi pene mbo'e ra'anga va'e.*

Pende resa pemondo katu Nhandejáry Hesu Cristo ou jevy hagwā áry-rehe peha'arō porā hagwā íxupe

¹⁷Peē, xe rembiayhu kwéry, pene mandu'a katu Nhandejáry Hesu Cristo remimondo tee remimombe'ukwe-rehe. ¹⁸Kóixa he'i va'ekwe peē-my:

“Ogwahē-tama vvy opa hagwā áry. Upe jave ogwahē va'erā ou-vy gwí Nhandejáry reroviaha-rehe onhembohory va'e. Nomboetéi va'erā Nhandejáry-pe. Gweko vai-rupi ae oiko va'erā”

he'i va'ekwe pene mo'arandu-vy.

¹⁹Ha ko'anga katu perepara pene mbo'e ra'angaha reko-rehe. Gwemimombe'u ambue mbue-rupi omboheko joavypa Hesu Cristo reroviaha kwéry-pe. Teko rei-rupi inharandu. Ndogwerekói Nhe'ē Marangatu tee va'e inharandurā ome'ē hagwā.

²⁰Peē ae katu, xe rembiayhu kwéry, penhemo'aranduve nduve katu peiko-vy. Hesu Cristo heko marangatu tee va'e-rehe pejerovia-gwí peē ave pende reko marangatu hagwā katu peiko-vy. Oí pende py'a-py Nhe'ē Marangatu tee va'e. Ipu'aka-rupi pembojeupive pive katu Nhandejáry-pe pene nhe'ē. ²¹Nhandejáry nhande rayhuha-rehe pene mandu'a meme katu inhe'ē pejapo meme hagwā. Pende resa pemondo katu Nhandejáry Hesu Cristo-rehe. Ha'e nhande poriahuvereko va'e. Nhane mogwahē porā va'erā gwenda-py jaiko hagwā opa e'ý reheve onhondive. Nhande rekove opa e'ý va'erā-rehe peha'arō porā katu.

²²Gwí Hesu Cristo-rehe ojerovia ku'a ku'a va'e-pe, gwí ipy'a moköi-rupi oiko va'e-pe, pemo'arandu porā katu ojerovia porā hagwā hese. ²³Peresende uka katu íxupe kwéry, gwí tata-py ho'a-tama va'e-ramipe peresende uka ani hagwā Nhandejáry ombohasa asy tee íxupe kwéry tata ogwe e'ý va'e-py. Peiporiahuvereko rei katu gwí teko vai-rupi oiko va'e-pe, gwí notí kwaái va'e-pe. Oí ramo tetekwe ine va'e, ijao-rehe ave inegwe ohasapa. Xáke upéa-gwí. Ani erenhemongy'a uka teí íxupe. Pene mbohekoha vai va'erā. Tapende kyhyje katu íxugwi pemoirū hagwā íxupe. Hemiapio vai va'e-pe ae peiporiahuvereko rei íxupe peipytygwō-vy.

Judas omomba'egwasu Nhandejáry-pe imboete-vy

(1 Co 1.8; 10.13; Ef 3.20-21; 1 Tm 1.17)

²⁴Nhandejáry ipu'aka tee va'e. Onhangareko porā nhande-rehe ani hagwā jaiko jajevy reheve. Nhane mogwahē va'erā onhemomba'egwasu ete ha-py nhande py'a potí marangatu reheve. Javy'a ete va'erā indive jaiko ramo. ²⁵Nhandejáry mante Tupā tee. Ha'e anho nhane mopotí tee va'e nhane resendehaty. Nhandejáry Hesu Cristo omano va'ekwe omboyke hagwā nhandéhegwí nhane reko jejavy ky'akwe. Upéa-rehe tanhamomba'egwasu ete katu Nhandejáry-pe. Ha'e anho Tupāgwasu tee onhembotuvixa mba'e tee va'e. Ha'e anho nhande Ruvixa tee voi. Ipogwy-py enterove oiko va'e. Inhe'ē-py enterove toiko. Upéixa omomba'egwasu va'ekwe nhande ppy oiko e'ý mboyve. Omboete hagwe-rami áy peve joty tomomba'egwasu íxupe. Ha opa e'ý reheve upéixa-ma tomomba'egwasu ave Nhandejáry-pe. Amém.

* 1:16 2 Pe 2.1-18

Hesu Cristo rembiexa ukakwe apocalipse de João

¹ Yma va'ekwe Nhandejáry ohexa uka Hesu Cristo-pe mbava'e pa oiko-ta nhande-vy. Ndahi'aréi ko oiko va'erã nhande-vy oiko-ta. Omombe'u íxupe omombe'u jevy hagwã ójehe ojerovia va'e kwéry-pe.

Upéi Hesu Cristo ombou gwembigwái yváy pygwa va'e ohexa uka jevy hagwã João-pe ikéra-py vérami. Upéi okéra-py vérami ohexa va'ekwe João ohai kwatia-rehe oikwaa uka hagwã enterovéa-pe. ² Opamba'e ohexa va'ekwe, ohendu va'ekwe ohaipa kwatia-rehe omombe'u-vy. Anhete teegwa ko kwatia pygwa Nhandejáry nhe'ê Hesu Cristo ohexa uka va'ekwe João-pe. Gwembixagwe katu ohai va'ekwe João kwatia-rehe.

³ Ovy'a va'erã voi ko kwatia nhe'ê omonhe'ê va'e. Ovy'a voi ave arã henduháry ogwata ramo oiko-vy hemimombe'ukwe-rupi. Ndahi'arevéi-ma oiko va'erã nhande-vy. Oiko-ma va'erã ko va'e nhe'ê nhande renonderã omombe'u va'ekwe.

João ohai kwatia nhe'ê sete tetã-my oiko va'e Hesu roroviahá kwéry pegwarã

⁴ Xe, João, ahai-ta ko va'e kwatia nhe'ê sete tetã-my oiko va'e pegwarã kwatia. Hesu roroviahá onhomboaty aty va'e Ásia yvy-rupi oiko va'e kwéry pegwarã kwatia ahai-ta.

Tapende rovasa porã pende rexakwaa rei-vy Nhandejáry. Tapene mbopy'agwapy ave. Nhandejáry ha'e voi va'e. Yma gwive voi oiko va'ekwe. Ha opa e'ÿ reheve joty oiko va'erã.

Tapende rovasa porã pende rexakwaa rei-vy. Tapene mbopy'agwapy ave upe Nhandejáry mandaha renda-py okwa va'e, sete nhe'ê marangatu Tupã Nhandejáry gwapy haty renonde-py okwa va'e. ⁵ Tapende rovasa porã pende rexakwaa-vy pene mbopy'agwapy-vy ave Hesu Cristo. Ha'e anhete teegwa va'e voi. Omano ete rire ha'e onhemóigove jevy oikove jevy-ma va'ekwe. Onhyppyrũ va'ekwe nhande-vy omano va'ekwe atýragwi opu'ã jevy va'erã oikove jevy hagwã. Ko yvy pygwa mburuvixagwasu oiko va'e kwéry ruvixave voi Hesu. Ha'e nhande rayhuha voi. Omano va'ekwe oipe'a hagwã nhandéhegwi nhane rembiapo vaikwe. Gwugwy avyte-py omano-gwi nhande py'a omopotí va'ekwe.* ⁶ Gwe'yirã voi nhande pe'a va'ekwe. "Pa'i-rami peiko va'erã xe Ru-pe. Nhandejáry ramo oiko va'erã peẽ-my xe Ru" he'i nhande-vy nhande pe'a-vy. Upéa-gwi tanhamomba'egwasu meme katu Hesu Cristo-pe. Toiko ha'e imburuvixagwasu ijapy e'ÿ reheve. Amém.*

⁷ Pema'ê katu, ou-ta Hesu. Araigwasu avyte-rupi ogwejy-tama ou-vy. Ha'e ojehexa uka-ta entéro va'e-pe ogwejy ou-vy ramo. Gwĩ ikutuhare jepe ohexa-ta ave íxupe igwejy igwahê ramo. Opa va'e ko yvy arigwa onhemboasy arã ohexa ou-ma ramo. Upe va'e aipota voi. Amém.*

⁸ Tupã Nhandejáry onhemombe'u nhande-vy:

"Mba'e pyppyrũ ramo voi aiko-ma xe va'ekwe. Ipaha rire ave xe aiko joty. Mba'e nheypyrrũha voi ko xe. Mba'e paha voi ave ko xe"*
he'i ójehe onhemombe'u-vy.

Ha'e ko Tupã tee voi. Ha'e va'e voi. Yma gwive oiko va'ekwe opa e'ÿ va'e voi ha'e. Ha'e ipu'aka tee va'e voi entéro va'e rehe.

Hesu, imba'egwasuha reheve ojehexa uka va'ekwe João-pe

⁹ Xe, João, ahexa va'ekwe Hesu ojehexa uka ramo xe-vy. Xe kéra-py rei vérami aiko jave ahexa va'ekwe íxupe. Xe, João, pende re'ÿi va'e. Hesu-rehe jajerovia-gwi nhande jaiko ojoe'ÿi kwéry ramo. Hese ha-py jahasa asy asy jaiko-vy. Upe jave nhandemokiriri katu Nhandejáry Nhande Ruvixagwasu áry-rehe ha'arõ-vy.

Hesu-rehe ha-py aime ramo va'ekwe preso ahexa va'ekwe íxupe. Hese-gwa nhe'ê amombe'u mbe'u-gwi upe anhetegwa nhe'ê amombe'u mbe'u-gwi xe moí va'ekwe preso

* 1:5 Sl 89.27 * 1:6 Êx 19.6 * 1:7 Dn 7.13; Zc 12.10 * 1:8 Êx 3.14

hikwái. Ygwasu mbyte-py oĩ va'e yvy'ajere héry va'e Patmos. Upe-py aime preso jave ojehexa uka va'ekwe xe-vy Hesu.

¹⁰Peteĩ domingo-py Nhandejáry Nhe'ẽ Marangatu tee va'e peteĩ onhe'ẽ va'e ohendu uka xe-vy. Xe rapykwe-gwi ahendu hatã onhe'ẽ va'e onheandu uka-vy xe-vy. Temimbygwasu nhe'ẽ ramigwa hatã ahendu.

¹¹He'i xe-vy:

—Ehai katu ne rembihexarã kwatia-rehe, he'i va'ekwe xe-vy. —Sete tetã-my oiko va'e pegwarã kwatia ehai katu. Hesu reroviaha onhomboaty aty va'e kwéry pegwarã emoĩ katu kwatia-rehe, he'i. —Erehai rire eraha uka Éfeso tetã mygwa-pe. Eraha uka ave Esmirna tetã mygwa-pe ave, Pérgamo tetã mygwa-pe ave, Tiatira tetã mygwa-pe ave, Sardes tetã mygwa-pe ave, Filadélfia tetã mygwa-pe ave, Laodicéia tetã mygwa-pe ave, he'i va'ekwe xe-vy ohai uka-vy. —Hesu reroviaha upe sete tetã mygwa kwéry pegwarã ne rembihexavyrã ehai katu, he'i voi va'ekwe xe-vy.

¹²⁻¹³Onhe'ẽ ramo ajere va'ekwe ama'ẽ ahexa haggwã. Ajere ama'ẽ hese-ma ramo ahexa-ma Nhande Ryke'y tee va'e ra'e. Sete tataendy'y ouro-gwi ijapopyre va'e ahexa. Ipa'ũ-my oĩ Nhande Ryke'y tee va'e. Oao puku puku reheve onhembo'y oĩ-vy. Ikupy peve ogwahẽ ijao. Ipyti'a kwaha ouro-gwi ijapopyre. ¹⁴Morotĩ hi'avu. Ovexa ragve potĩpyre morotĩ va'e-rami hi'avu. Amandáu-rami hi'avu morotĩ. Tata rendy-rami voi hesa nhande resaka. ¹⁵Ipy ave hyverapa. Bronze tata-py ombohyku jave onhembohyvera vera va'e-rami ipy. Inhe'ẽ ryapu etei. Y hyapu hatãha-rami voi hyapu atã inhe'ẽ. ¹⁶Ha opo ijakátua va'e pyte-py ogwereco sete jasytata. Ijuru-gwi ojehexa osẽ va'e. Kysepuku hãi jóvái va'e ramigwa inhe'ẽ. Overapa va'e-rami voi hova. Hembipepa voi hova. Kwarahy larose hembipe porã va'e-rami omohembipepa hova.

¹⁷Ahexa-ma íxupe-ma ramo ha'a ipy renonde-py. Omano va'e-rami voi xe ha'a ipy renonde-py. Ha'e katu oakatúa gwigwa opo omoĩ xe-rehe.

—Ani erenhemondy'i tei xéhegwi, he'i xe-vy. —Xe ko mba'e ypyrũha voi, he'i xe-vy. —Ipaha ramo voi ko xe aiko va'e voi, he'i xe-vy. ¹⁸—Xe aikove tee va'e voi, he'i. —Amano tee va'ekwe. Amano rire aikove jevy-ma. Áy katu ndapavéi-ma va'erã voi aiko-vy. Namanori norivéi-ma va'erã xe, he'i. —Xe aipota ramo omano, omano arã yvypóry, ha ndaipotáí ramo omano, nomanóí ave va'erã. Xe nhe'ẽ-py ae mate omano va'erã. Xe nhe'ẽ-py ave omano va'ekwe opyta va'erã imbohasa asy haggwã-py, he'i xe-vy onhemombe'u-vy.

¹⁹—Ehai katu kwatia nhe'ẽ. Ne rembihexavyrã ehaipa. Áy oiko va'erã ahexa ukatama nde-vy. Upe rire oiko jevy va'erã yvypóry renonderã-rehe ahexa ukatama nde-vy erehai haggwã nde kwatia-rehe. ²⁰Upéa erehexa va'e-rehe aikwaa uka-ta ave nde-vy. Sete jastata erehexa va'e xe po-py. Sete tataendy'y pa'ũ-my anhembo'y aĩ-vy. Upe va'e-rehe amombe'u-ta nde-vy. Oĩ sete tetã-my xe reroviaha kwéry onhomboaty aty meme hikwái. Upe tataendy'y he'ise upe tetã-rehe. Ha upe va'e kwéry rerekwa oĩ xe remimoĩgwe sete ave. Jasytata he'ise upe xe remimoĩgwe-rehe, he'i xe-vy. Upéixa he'i xe-vy, Hesu xe-vy anho mante ojehexa uka va'ekwe.

2

Hesu reroviaha Éfeso tetã mygwa pegwarã nhe'ẽ

¹—Ehai katu xe nhe'ẽ kwatia-rehe, he'i xe-vy. —Éfeso tetã mygwa-pe anhemonhe'ẽse, he'i. —Xe-rehe ha-py onhomboaty aty va'e kwéry rerekwa-pe xe remimoĩgwe pegwarã ehai katu xe-vy, he'i. —Ko va'e ehai íxupe gwarã, he'i va'ekwe xe-vy.

—Ko xe po akatúa-py areko va'e sete jasytata va'e voi xe, he'i ójehe. —Sete tataendy'y pa'ũ-rupi ogwata va'e voi ko xe, he'i ojehegwa ohai uka-vy. ²—Ko'áy anhemonhe'ẽse nde-vy, he'i ohai uka-vy. —Aikwaa porã-ma nde rekoha. Eremba'apo apo porã meme. Erembokepa voi teko rei-rupi oiko va'e kwéry pendéhegwi. Ndererovia reíry ave enterove va'e-pe. “Xe Tupã Nhandejáry remimondo va'e” he'i ramo peẽ-my, erejeapysaka porã ereikwaa porã haggwã ijapu va'e para'e, Nhandejáry nhe'ẽ mombe'u ã'ã ã'ãha rei para'e, Nhandejáry nhe'ẽ tee omombe'u va'e para'e, oakã-gwi rei para'e omombe'u nhe'ẽ.

Ereporandu kwaa voi nhe'ê-rehe. Ha nde katu ndererovia mo'ái voi ijapu va'e nhe'ê. Aikwaa-ma katu xe nde rekokwe. ³Xe aikwaa ave ereha'arô teeha. Ha erehasa asy asy-ma xe-rehe ha-py. Na nde kweráiry vyteri joty xe ra'arô-vy. ⁴Upéixa nde rekokwe porã jepe ndavy'apáiry vyteri nde-rehe ndaxe rayhugwasuvéi-magwi. Yma nde xe rayhu tee voi va'ekwe. Ha áy katu ndaxe rayhuvéi-ma. Ne mandu'a ku'a ku'a rei-ma xe-rehe. Nde resa yvuku rei-ma mombyry-gwi xe-rehe. Upe va'e nde rekoha-rehe xe ndavy'ái voi.

⁵—Ne mandu'a katu upe nde reko porãgwe-rehe. Áy ae katu haimete ndaxe rayhuvéi-ma. Erova jevy katu xe-rehe nde resa. Ejevy jevy katu yma ne rembiapo porã nhypyrügwe-rupi ereiko jevy hagwã. Ndererováí ramo nde resa xe rayhu porã jevy hagwã, aha va'erã nde ha-py arova va'erã ndéhegwi nde rataendy'y ererova e'ÿ-gwi nde rekoha.

⁶—Oí joty peteí mba'e erejapo xe mbovy'a va'e. Xe-rami nde ave nde jegwaru gwí Nicolaíta rembiapo-rami hembiaapo va'e-gwi, he'i. ⁷—Ne aranduse va'e, ejeapysaka porã katu ko Tupã Nhandejáry Nhe'ê Marangatu tee va'e nhe'ê-rehe. Hesu reroviaha kwéry pegwarã-rehe ejeapysaka porã katu. Onhembohekopyatã uka va'e xe-vy, ojehesa rerova e'ÿ va'e xéhegwi va'e-pe ae ha'uka-ta yváy pygwa yva aju Nhandejáry kokwegwasu mbyte-py oí va'e yva aju. Upe yva aju ho'u va'e oikove arã opa e'ÿ va'erã voi, he'i. —Upéa ha'ese nde-vy anhemonhe'ê-vy, he'i ohai uka-vy Éfeso tetã mygwa kwéry pegwarã. Upéa he'i xe-vy Hesu, xe-vy anho mante ojehexa uka ramo va'ekwe.

Hesu reroviaha Esmirna tetã mygwa kwéry pegwarã nhe'ê

⁸—Ehai jevy katu xe nhe'ê kwatia-rehe, he'i jevy xe-vy. —Esmirna tetã mygwa-pe anhemonhe'êse ave, he'i. —Xe-rehe ha-py onhombóaty aty va'e kwéry rerekwa-pe xe remimoigwe pegwarã ehai katu xe-vy, he'i. —Ko va'e ehai íxupe gwarã, he'i va'ekwe xe-vy.

—Xe ko mba'eve vyteri ndoikói ramo xe aiko-ma voi va'ekwe. Opa ramo jepe xe aikove joty va'erã. Apa e'ÿ reheve voi xe aikove joty arã. Amano-ma va'ekwe. Upéi aikove jevy va'ekwe. Áy katu namano jevyvúi-ma va'erã xe, he'i ójehe. —Anhemonhe'êse nde-vy, he'i ohai uka-vy va'ekwe.

⁹—Xe aikwaa-ma nde rekoha. Nde erehasa asy ereikovyha aikwaa-ma. Nde poriahu tee voi nde ereiko-vy. Upe jave jepe heta joty ne mba'erã yváy-py.

—Aikwaa ave heta onhe'ê vai vai rei nde-rehe. Aikwaa voi inhe'ê kwéry: Xe judeu kwéry va'e ko xe. Upéa-rehe xe Nhandejáry re'yí, he'i rei rei ójehe okwa-vy. Xe ae ha'e-ta, Ha'e kwéry anhaygwasu re'yí va'e voi, ha'e voi hese kwéry. Nde-rehe onhe'ê vai vai va'e-rehe aipo ha'e.

¹⁰—Xe aikwaa ave nde rekorã. Nde-rehe ija'e'ÿ va'e nde rereko asy-ta. Upe va'e-gwi ani erekyhyje teí. Anhaygwasu rekoha ogwereco va'e omoí va'erã preso gwí pene pa'ú mygwa. Peteí teí pende rekoha oikwaase-gwi pene moí arã preso. “Ojerovia tee para'e Hesu-rehe, ndojerovia teírý para'e?” he'i-vy pene moí arã preso. Nda aréi arã nde rereko asy. Dez áry peve mate nde rereko asy va'erã. Upéixa nde rereko ramo jepe ani joty erejere xéhegwi. Eremano peve jepe ejerovia tee katu xe-rehe. Erejere e'ÿ ramo ame'ê va'erã nde-vy nde rekoverã opa e'ÿ va'erã.

¹¹—Ne aranduse va'e, ejeapysaka porã katu ko Tupã Nhandejáry Nhe'ê Marangatu tee va'e nhe'ê-rehe. Hesu reroviaha kwéry pegwarã-rehe ejeapysaka porã katu. Onhembohekopyatã uka va'e xe-vy ogwata meme hagwã ipukukwe-vy xe ndive oikove jevy rire nomano jevyvúi-ma va'erã. Ijukaharãgwe ndaipu'akavéi-ma va'erã hese, he'i. —Upéa ha'ese nde-vy anhemonhe'ê-vy, he'i ohai uka-vy Esmirna tetã mygwa kwéry pegwarã. Upéa he'i xe-vy Hesu xe-vy anho mante ojehexa uka ramo va'ekwe.

Hesu reroviaha Pérgamo tetã mygwa kwéry pegwarã nhe'ê

¹²—Ehai jevy katu xe nhe'ê kwatia-rehe, he'i jevy xe-vy. —Pérgamo tetã mygwa-pe anhemonhe'êse ave, he'i. —Xe-rehe ha-py onhombóaty aty va'e kwéry rerekwa-pe xe remimoigwe pegwarã ehai katu xe-vy, he'i. —Ko va'e ehai íxupe gwarã, he'i va'ekwe xe-vy.

—Xe ko kysepuku hāi jovái va'e rerekoha voi ko xe. ¹³ Aikwaa voi xe nde rekoha. Anhaygwasu rekoha-rupi oiko va'e pa'ū-my voi ereiko. Íxupe ae omboete ojárý ramo ogwerokwa hikwái. Nde katu nderejehesa rerováí joty xéhegwi. “Hesu reroviaha voi” he'i joa nde-rehe upe pygwa kwéry. Nderejeréiry joty xéhegwi. Erejerovia tee voi xe-rehe. Ne retā anhaygwasu Satanás oikoha voi. Gwí xe rehegwa nhe'ē omombe'u porā va'ekwe-pe ojuka va'ekwe upe pygwa. Antipas amyri-pe ojuka va'ekwe hikwái. Upéixa xe rembigwái amyri-pe ombohasa asy ramo jepe va'ekwe nande resaráiry voi joty va'ekwe xéhegwi. Upéa nde reko porā-rehe aikwaa.

¹⁴ —Oí ae ne rembiapokwe xe mbovy'are'yha. Eremoirū meme-gwi heko vai va'e-pe. Oí gwí ne irū ne ndive oiko va'e kwéry ojohu porā Balaão amyri remimombe'ukwe. Naiporái upéa. Yma va'ekwe Balaão amyri nhe'ē ohendu-gwi myamyri pene ramoigwasu kwéry ojevavya va'ekwe. Balaão amyri ogwerova ukapa myamyri pende ramói kwéry Nhandejáry remimombe'ukwe-gwi. Hemimombe'ukwe e'y-my Balaão amyri ohekombó'e vai va'ekwe Balaque amyri-pe ombotavy hagwā Israel remiarirō kwéry-pe. Upéixa Nhandejáry remimbota e'y ojapo uka va'ekwe íxupe kwéry. Ombotavy rei voi íxupe kwéry. Heko porāgwe-gwi ogwerova ukapa íxupe kwéry ho'u uka íxupe kwéry gwí ipotí e'y va'e. “Iporā voi ko ja'u so'o. Tupā ra'anga rovagwy-py ijukapyre ro'o ja'u katu” he'i ombotavy rei hagwā íxupe kwéry omboete hagwā Tupā Nhandejáry e'y va'e kwéry-pe. Omombe'u ave íxupe otí e'y reheve oiko hagwā. Ha ko'āy katu gwí ne irū kwéry aipo va'e nhe'ē ojohu porā joty hikwái. Oiko hekombó'e vaikwe-rupi hikwái. Naiporái voi eremoirū íxupe kwéry. Upéa-rehe xe ndavy'ái, he'i.*

¹⁵ —Oí ave ne ndive oiko va'e, ne irū kwéry Nicolaíta kwéry remimombe'u ojohu porā va'e. Gwekoha oipe'a ave íxugwi kwéry. Niporái voi eremoirū ha'e kwéry.

¹⁶ —Erova katu upe nde rekoha. Eerova e'y ramo nde rekoha vai-gwi, aha-ta nde ha-py. Ndaxe arevéi-ma aha hagwā orombohasa asy. Areko asy-ta gwekoha ogwerova e'y va'e kwéry-pe. Onhorairō va'e-rami voi areko asy-ta íxupe kwéry. Kysepuku-rami voi aiporuta xe nhe'ē ipy'apy-py kwéry amoinge hagwā.

¹⁷ —Ne aranduse va'e, ejeapysaka porā katu ko Tupā Nhandejáry Nhe'ē Marangatu tee va'e nhe'ē-rehe. Hesu reroviaha kwéry pegwarā-rehe ejeapysaka porā katu. Onhembohokopyatā uka va'e xe-vy xe rape-rupi ogwata meme hagwā areko porā va'erā. Teminhomigwe ha'u uka va'erā íxupe héry va'e maná. Ame'ē va'erā ave íxupe peteí ita morotí. Hese onhemoí va'ekwe héry. Avave ndoikwaáiry upe héry hesegwa. Ha'e ae ijáry mate oikwaa va'erā heryrā. Upéa ha'ese nde-vy anhemonhe'ē-vy, he'i ohai uka-vy Pérgamo tetā mygwa kwéry pegwarā. Upéa he'i xe-vy Hesu xe-vy anho mante ojehexa uka ramo va'ekwe.

Hesu reroviaha Tiatira tetā mygwa kwéry pegwarā nhe'ē

¹⁸ —Ehai jevy katu xe nhe'ē kwatia-rehe, he'i jevy xe-vy. —Tiatira tetā mygwā-pe anhemonhe'ēse ave, he'i. —Xe-rehe ha-py onhombóaty aty va'e kwéry rerekwa-pe xe remimoigwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy, he'i.

—Xe ko Tupā Nhandejáry ra'y tee voi. Xe ko xe resa tata rendy-rami ohesape va'e voi ko xe. Bronze hyverapa va'e-rami voi xe py hyverapa, he'i.

¹⁹ —Xe aikwaa porā voi nde rekoha. Xe rayhuha voi nde. Erejerovia porā voi xe-rehe. Ereporohayhu kwaa voi nde. Ereipytygwō tygwō kwaa voi ereiko-vy. Ereha'arō arō kwaa ave Nhandejáry he'i va'ekwe oiko hagwā. Ne rembiapo nhypyrū-gwi iporāve ráve oho-vy.

²⁰ —Upéixa jepe xe-vy ereiko porā jepe oí vyteri nde rekoha xe mbovy'are'y va'e. Upéa-rehe anhe'ē pohýi-ta nde-vy. Oí pene pa'ū-my upe kunha Jezabel ramigwa hekoha vai eterei va'e. Ha, “Ani tē remombe'u nhe'ē vai rei” nderéi joty íxupe. Ha'e ombo'e mbo'e vaipa voi xe reroviaha kwéry-pe. Ha, “Anive upéixa remombe'u mbe'u rei nhe'ē rei” nderéi joty íxupe. Henduha kwéry-pe ave nderéi, “Ani erehendu tēi upe va'e nhe'ē. Ekiriri

* 2:14 Nm 25.1,2; 31.16

rei katu íxugwi. Ani ererovia teĩ íxupe. Upéa ko ijapu va'e voi" nderéi ave henduháry-pe. Upéa-rehe xe ndavy'ái voi. Ombotavy tavy voi xe roroviaha kwéry-pe. "Tupã Nhandejáry nhe'ê-py amombe'u voi" he'i rei rei ójehe. Ha nde katu, "Ani erenhe'ê rei teĩ" nderéi íxupe. Heko porãgwe-gwi ogwerova uka rei xéhegwi xe roroviaha kwéry-pe. "Ani eretĩ pejogwereco menda e'ý reheve" he'i rei upe kunha omombe'u-vy. "Iporã joty ja'u ramo so'o tupã ra'anga rovagwy-py ijukapyre va'e" he'i ave xe roroviaha kwéry-pe ombotavy rei-vy. Ha nde, ereheja rei íxupe. Niporã voi upéa. Ejoko katu íxugwi.*

²¹—Xe aha'arõ arõ va'ekwe upe kunha ogwerova hagwã mo'ã tekoha vai-gwi gwekoha. Ha ndogwerova mo'ãi voi gwekoha. ²²Anhete upéa-rehe ambohassy ete-ta íxupe gwupapy ohasa asy asy tee hagwã. Gwĩ ndive oiko teko rei-rupi va'ekwe-pe ave ambohassa asy-ta ave ndive. Ko'ánga ambohassa asy-ta íxupe kwéry. Upe kunha ndive oiko va'e ndogwerováí ramo gwekoha, ndohejáí ramo gwembiapo vaikwe ambohassa asy tee-ta voi íxupe kwéry.

²³—Ha upe kunha remimbo'e-rupi oiko va'e kwéry omanomba-ta. Xe ahundipa-ta íxupe kwéry. Upéixa ramo entéro xe roroviaha va'e opa-rupi oiko va'e oikwaa-ta ipy'a pygwa xe aikwaaaha. Ne akã mygwa nde py'apygwa ave aikwaaapa voi xe, he'i.

—Ha peẽ katu, apogwereco-ta peteĩ teĩ-pe pene rembiapokwe-rehe. Hekoha vai va'ekwe-pe areko asy va'erã íxupe. Ha hekoha porã va'ekwe-pe areko porã ave va'erã. Pene rembiapo apokwe-rami apogwereco arã. Upéa ha'ese Jezabel ramigwa va'e nhe'ê renduha kwéry-pe.*

²⁴—Ha peẽ ambue kwéry va'e napehenduséiry upe kunha nhe'ê. Kóa ha'ese peẽ-my. Tiatira tetã-my peime jepe pende rekoha porã meme va'e voi peẽ. Pene mbo'e mbo'e ramo jepe napehendúiry joty peẽ upe kunha nhe'ê. Heroviaha kwéry he'i mo'ã: "Ore, ore aranduve pendéhegwi" he'i rei va'ekwe peẽ-my ójehe kwéry. "Orohendu-ma Nhandejáry nhe'ê, ha anhaywasu arandu ave oroikwaa ave ore" he'iri iri va'ekwe ójehe kwéry. Ojohu porã joty voi upe kunha nhe'ê hikwái. Anhaywasu rekoha-rupi voi katu oiko hikwái. "Oroikwaa voi anhaywasu rekoha" he'iri iri joty ójehe. Ha peẽ katu ndapejohu porãiry inhe'ê. Peẽ katu ndapeikóiry kuri anhaywasu arandu-rupi. Upéa pende rekoha-rehe avy'a. Aý katu namombe'u heta mo'ãvei-ma peẽ-my. ²⁵Xe ra'arõ tee jave xe aju jevy hagwã áry peve eiko porã katu xe nhe'ê-py xe remimombe'ukwe-py, he'i.

²⁶⁻²⁸—Onhembohekopyatã va'e, xe nhe'ê ojapo meme va'e-pe ambotuvixa va'erã. Omano peve aju jevy ha áry peve ojapo meme ramo xe nhe'ê ambotuvixa arã íxupe. Tetã tetã mygwa kwéry xe roroviaha e'ý va'e kwéry gwive amoĩ-ta ipogwy-py. Yma va'ekwe xe Ru omoĩ va'ekwe opavave xe pogwy-py. Upéixa ave amoĩ jevy-ta xe-rehe ha-py onhembohekopyatã va'e pogwy-py. Ogwereco va'erã mburuvixagwasu tee mba'e hierrogwi ijapopyre enterove oikwaa hagwã ipogwy-py oiko-ma xe rorovia e'ýha kwéry gwive. Ha omanda asy-ta hese kwéry. Ipu'aka hagwe omongu'ipa-ta ita-rami. Mba'e ryrú tuju gwigwa-rami omongu'ipa rei va'erã íxupe kwéry ipu'aka hagwe. Omanda asy va'erã hese kwéry. Ha xe nhe'ê ojapo va'e-pe ame'ê ave ima'erã jasytata ko'ê reruha.

²⁹—Ne aranduse va'e, ejeapysaka porã katu ko Tupã Nhandejáry Nhe'ê Marangatu tee va'e nhe'ê-rehe. Hesu roroviaha kwéry pegwarã-rehe ejeapysaka porã katu. Upéa ha'ese nde-vy anhemonhe'ê-vy, he'i ohai uka-vy Tiatira tetã mygwa kwéry pegwarã. Upéa he'i xe-vy Hesu xe-vy anho mante ojehexa uka ramo va'ekwe.

3

Hesu roroviaha Sardes tetã mygwa kwéry pegwarã nhe'ê

¹—Ehai jevy katu xe nhe'ê kwatia-rehe, he'i jevy xe-vy. —Sardes tetã mygwa-pe anhemonhe'êse ave, he'i. Xe-rehe ha-py onhomboaty aty va'e kwéry rerekwa-pe xe remimoigwe pegwarã ehai katu xe-vy, he'i. —Ko va'e ehai íxupe gwarã, he'i va'ekwe xe-vy.

* 2:20 1 Rs 16.31; 2 Rs 9.22,30 * 2:23 Sl 7.9; Jr 17.10; Sl 62.12

—Xe ko Tupā Nhandejáry rovagwy-py sete nhe'ê marangatu ogwerokwa va'e rerekoha voi ko xe. Sete jasytata rerekoha voi ave ko xe. Aikwaa voi nde rekoha. “Ojerovia tee Hesu-rehe” he'i rei nde-rehe hikwái. Ne rerakwā porā rei nde. Nde rekoha tee xe aikwaa voi ave. Nderejerovia porāi-gwi xe-rehe omano-ma va'ekwe-rami voi ereiko. Ndejúpe ne rembiapo porā porā mo'ā ereiko-vy, ha Nhandejáry-pe katu naiporáiry voi. ²Erepara katu ndéjehe. Anive oke va'e-rami rei ereiko. Enhembohekopyatā uka katu xe-vy ne rembigwaa porāgwe-py ereiko hagwā. Okanhy va'erā-ramima oiko ndéhegwi nhe'ê porā. Eiko katu ha'e-rupi. Nhandejáry-pe ne rembiapo porā mo'ā. Nerembovy'áiry joty íxupe. Ndaha'êi nde py'apy gwive erejapo erejapo va'e. Nane kyre'ỹ porāi erejapo-vy. Upéa aikwaa-ma voi xe, he'i.

³—Ne mandu'a kena anhetegwa nhe'ê Nhandejáry remimombe'ukwe-rehe. Ani ermokanhy teĩ upe va'e nhe'ê. Erova katu nde rekoha Nhandejáry remimombe'ukwe erejapo porā jevy hagwā. Erepara para katu ndéjehe xe mbovy'a hagwāixa ereiko meme hagwā. Agwahê hagwā óra katu nderekwaái va'erā. Omonda va'e ogwahêha óra-rami aju arā nde ha-py. Xe ra'arō e'ỹ reheve agwahê-ma va'erā aju-vy.

⁴—Upéixa ereiko jave xe ndive oĩ joty gwí xe ndive ogwata porā va'e upe pene retā-my, Sardes tetā-my. Ijao morotí va'e-rami ipy'a ky'a e'ỹ reheve oiko joty. Naimandu'ái mba'e vai-rehe. Ha'e kwéry oao morotí reheve oiko-ta xe ndive. Tupā Nhandejáry remimboete voi ha'e kwéry. “Ipy'a potí-ma” he'i va'ekwe hese kwéry. ⁵Upéixa omonde va'erā oao morotí entéro xe-vy onhembohekopyatā va'e xe-rehe ojehesa mondo mondo va'e gwive. Hekove apyre'ỹ reheve hagwā héry pa'ũ-my onhemoi va'ekwe kwatia-rehe héry. Upe kwatia-gwí namboje'ói voi arā héry. “Ko va'e kwéry xe re'ýi tee” ha'e-ta hese xe Ru-pe. Xe Ru rembigwái kwéry yváy pygwa-pe ave upéixa ave amombe'u-ta hese kwéry. ⁶Upéa ha'ese nde-vy anhemonhe'ê-vy, he'i ohai uka-vy.

—Ne aranduse va'e, ejeapysaka porā katu ko Tupā Nhandejáry Nhe'ê Marangatu tee va'e nhe'ê-rehe. Hesu reroviaha kwéry pegwarā-rehe ejeapysaka porā katu. Upéa erehai upe Sardes tetā mygwa kwéry pegwarā, he'i xe-vy Hesu xe-vy anho mante ojehexa uka ramo va'ekwe.

Hesu reroviaha Filadélfia tetā mygwa kwéry pegwarā nhe'ê

⁷—Ehai jevy katu xe nhe'ê kwatia-rehe, he'i jevy xe-vy. —Filadélfia tetā mygwa-pe anhemonhe'êse ave, he'i. —Xe-rehe ha-py onhombotaty va'e kwéry rerekwa-pe xe remimoĩgwe pegwarā ehai xe-vy, he'i. —Ko va'e ehai íxupe gwarā, he'i va'ekwe xe-vy.*

—Xe ko xe reko marangatu tee va'e xe. Anhete tee va'e voi ko xe. Chave ogwereco va'e-rami voi aiko. Nhandejáry Nhande Ruvixa ramo renda rokê pe'aha-rami voi xe. Xe-rehe ha-py anho mate oike va'erā yváy-py. Oĩ Davi remiariróre amoinge va'e, oĩ ave hemiariróre amoinge e'ỹ va'e. Xe aipe'a ramo okê ndaikatuvéi-ma avave omboty. Ha xe amboty ramo okê ndaikatuvéi-ma ave avave oipe'a. Xe-rehe ha-py mate voi oike va'erā yváy-py. Ha ko'áy katu anhemonhe'êse nde-vy, he'i.

⁸—Aikwaa nde rekoha. Nane mbarae'téiry jepe erejapo meme xe remimbota. Nde rereko asy ramo jepe nderejehesa rorovái joty voi xéhegwi. Aipe'a-ma kuri nde-vy ne rokêrā ramigwa. Ndikatúí avave omboty jevy ndéhegwi upe va'e. ⁹Amondo-ta ne renda-py gwí anhaywasu re'ýi oikwaa hagwā orohayhu teeha. “Xe ko judeu kwéry va'e” he'i mo'ā ójehe. Onhembotavy rei voi. Judeu re'ýi jepe ndaha'êi joty Nhandejáry rembiporavo teekwe ha'e kwéry. Amogwahê-ta íxupe kwéry ne renda-py. Amonhesũ-ta ave íxupe kwéry nde rovagwy-py. Ha'e kwéry oikwaa va'erā orohayhuha. “Ko'ánga ore ave orojerovia-ma ave Hesu-rehe” he'i va'erā nde-vy hikwái. “Ko'ánga oroikwaa-ma Nhandejáry nde rayhu teeha voi” he'i va'erā nde-vy.

¹⁰—Ani erejere xéhegwi, ha'e va'ekwe nde-vy. “Erehasa asy ramo jepe ejapo joty katu xe nhe'ê. Tande py'apyhy katu xe nhe'ê” ha'e ave nde-vy va'ekwe. Upe xe nhe'ê nde py'apyhy-ma. Upéa-rehe anhangareko-ta nde-rehe. Ou va'erā áry areko asy va'erā yvy

* 3:7 Is 22.22

arigwa-pe ipy'a rekoha imbojehexa uka-vy. Upe jave anhangareko porã joty va'erã nde-rehe.

¹¹—Xe voi katu aju-ta pya'e nde ha-py. Tane rakate'y katu upe nde rekoha porã-rehe. Ani ereheja avave ne mbojere uka xéhegwi oipe'a hagwã ndéhegwi ne mba'erã upe xéhegwi ojere e'y va'e pegwarã.

¹²—Amombe'u-ta peẽ-my xéhegwi ojere e'y va'e rekoha óga jekoka rehegwa nhe'ẽ-rami. Óga jekoka óga pygwa voi. Mba'egwasu voi óga pygwa. Óga oiko gwive ndojepe'a mo'ãi óga-gwi ijekokaha. Upéixa ave xéhegwi ojere e'y va'e, onhembohekombaraete xe nhe'ẽ ojapo meme va'e oiko va'erã Nhandejáry oiko ha-py. Nosêvéi va'erã Nhandejáry renda-gwi. Mba'egwasu va'e ramo opyta pyta va'erã upe-py. Xe-vy onhembohekopyatã uka va'e-pe amoingo arã Tupã xe Járy re'yí ramo. Ogwejy ramo yváy-gwi Jerusalém héry va'e tetã pyahu, ha'e oiko va'erã upe tetã pyahu-py. Xe ave xe rekoha tee-rupi ajehexa uka porã-ma ramo íxupe, areko-ma va'erã íxupe kwéry xe re'yí tee ramo. Upéa ha'ese nde-vy.

¹³—Ne aranduse va'e, ejeapysaka porã katu ko Tupã Nhandejáry Nhe'ẽ Marangatu tee va'e nhe'ẽ-rehe. Hesu reroviaha kwéry pegwarã-rehe ejeapysaka porã katu. Upéa erehai upe Filadélfia tetã mygwa pegwarã, he'i xe-vy Hesu xe-vy anho mante ojehexa uka ramo va'ekwe.

Hesu reroviaha Laodicéia tetã mygwa pegwarã nhe'ẽ

¹⁴—Ehai jevy katu xe nhe'ẽ kwatia-rehe, he'i jevy xe-vy. —Laodicéia tetã mygwa-pe anhemonhe'ese ave, he'i. —Xe-rehe ha-py onhomboty aty va'e kwéry rerekwa-pe xe remimoigwe pegwarã ehai katu xe-vy, he'i. —Ko va'e ehai íxupe gwarã, he'i va'ekwe xe-vy.

—Xe ko, Upéixa toiko kena, ha'e va'e voi ko xe. Xe nhe'ẽ ko ipokatu meme va'e voi. Anhetegwa meme va'e voi xe remimombe'u. Aporombotavy e'y va'e voi ko xe. Xe ko xe rembiexagwe amombe'u jevy. Nhandejáry omba'e nheypyrũ ramo va'ekwe aiko-ma va'ekwe indive xe. Opamba'e Nhandejáry ojapo va'ekwe ndoikói vyteri ramo, aiko-ma voi va'ekwe xe. Xe e'y reheve mba'eve ndojapói va'ekwe Nhandejáry. Ha ko'ay katu anhemonhe'ese-ta nde-vy. Ko va'e ha'ese nde-vy.

¹⁵⁻¹⁶—Aikwaa porã nde rekoha. Y aku vai vai-rami ereiko xe-vy. Naho'ysã porãiry ha ndahaku porãiry. Upéixa ave ereiko xe-vy nde reko-rehe. Ho'ysã porã ramo, terã haku porã porã ramo, upéixa ramo iporã va'erã mo'ã xe-vy. Háke, xe jegwaru-tama ndéhegwi. Y ho'ysã porã e'y va'e-rami oronhomu-ta.

¹⁷—Amombe'u-ta nde-vy ma'erã-gwi kóixa ha'e kuri nde-vy. Nde ere ndéjehe: “Xe xe mba'e reta va'e ko xe” ere ndéjehe. “Oho porã eterei opamba'e xe-vy. Naikotevêi mba'eve-rehe” ere mo'ã kuri ndéjehe. Xe ae ha'e nde-rehe: Nde ndereikwaáiry voi nde rekoha tee-rehe. Nde poriahu teha ndereikwaái joty. Ne mba'e reta rei ndovaléi arã nde-vy. Erevy'a e'yha ave ndereikwaái voi. Ne remikotevê tee va'e-rehe yváy pygwa-rehe nane mandu'ái voi. Xe-vy ramo hesapyso e'y va'e-rami rei voi ereiko. Ijao e'y va'e-rami ave ereiko. Ha upéa ndereikwaái voi ra'e nde. ¹⁸Xe ha'e nde-vy: Ejogwa vérami katu nde reko porã. Nde ouro teerã jogwaha-rami opa e'y va'erã ojúpe ojogwaha-rami katu eiko xe-vy ne arandu porãrã erereko hagwã pono nde poriahu eterei. Ao morotí jogwaha-rami ave katu eiko xe-vy ani hagwã ojehexa nde ao e'yha nde-rehe nde py'a potíha ereikwaa uka hagwã. Tesa rasy pohã jogwaha-rami ave katu eiko xe-vy ereipohano porã va'e-rami nde resa erehexa porã hagwã xe rape. Anive ere rei ndéjehe, “Aiko porã va'e voi ko xe” anive ere rei teĩ upéixa ndéjehe.

¹⁹—Opa ahayhu va'e-pe anhemonhe'ẽ hekoha porã e'y-rehe. Ambohasa asy ave íxupe ogwerova hagwã gwekoha oiko porãve hagwã xe rape-rupi. Upéa-rehe tane kyre'y katu ererova hagwã nde rekoha.

²⁰—Ejeapysaka katu ko xe nhe'ẽ-rehe: Aime-ma peteĩ okẽ ramigwa yke-rehe. Ojúpe oipe'a ukase va'e-rami aime. Óga járy oipe'a gwokẽ omogwahẽ porã hagwã ombohupa-pe ojogwerohory hagwã va'e-rami aime. Xe nhe'ẽ ohendu va'e upéixa xe mogwahẽ porã ramo, aike arã ipy'apy-py. Ambohory-ma arã íxupe. Ha'e ave xe rerohory porã-ma ave

va'erã. Onhondivegwa-rami jaiko va'erã. ²¹Jagwapy katu onhondive xe apykagwasu ári, ha'e-ta xe-rehe ojerovia va'e-pe, xe nhe'ẽ ohendu meme va'e-pe. Xe ajapo hagwe-rami ave ha'e ojapo ave va'erã. Xe Ru remimbota mate ajapo meme hagwã amondo mondo xe resa hese. Ha ãy katu agwapy ijyke-rehe ijapykagwasu ári. Ipu'aka reheve omanda haty ári agwapy ijyke-rehe aĩ-vy. Ha xe-rehe mate omondo gwesa va'e onhembohekopyatã va'e xe remimbota ojapo hagwã ogwapy arã ave xe yke-rehe xe apykagwasu ári.

²²—Ne aranduse va'e, ejeapysaka porã katu ko Tupã Nhandejáry Nhe'ẽ Marangatu tee va'e nhe'ẽ-rehe. Hesu reroviaha kwéry pegwarã-rehe ejeapysaka porã katu. Upéa erehai upe Laodicéia tetã mygwa kwéry pegwarã, he'i xe-vy Hesu xe-vy anho mante ojehexa uka ramo va'ekwe.

4

Yváy-py oĩ va'e omboete tee Nhandejáry-pe

¹Upéa rire katu ahexa-ma yváy rokẽ ojepe'a-ma va'ekwe oĩ-vy ramo xe-vy. Ha ahexa jave ahendu jevy upe hatã onhe'ẽ va'e onheandu uka xe-vy va'ekwe temimbygwasu nhe'ẽ-rami hatã voi ahendu jevy. He'i xe-vy:

—Ejeupi katu ko'a-py, he'i xe-vy. —Ahexa uka-tama nde-vy ereikwaa hagwã ko'ã rire katu oiko-ma va'erã mba'e, he'i xe-vy.

²Upe jave Tupã Nhandejáry Nhe'ẽ Marangatu tee va'e xe mo'arandu-ma jahexa e'ỹ va'e ahexa hagwã yváy pygwa.

Ahexa peteĩ apykagwasu mburuvixagwasu gwapy haty. Hi'ári oĩ ogwapy va'e. Nhandejáry tee nipo ra'e.

³Ogwapyha ári ha'e omimbi oĩ-vy. Ita kyra jaspe endy hesakã porã tee va'e-rami voi omimbipa ogwapy oĩ-vy oapykagwasu ári. Ita kyra hesakã sardônio pytã tee opiriri va'e-rami ave ogwapyha ári omimbipa oĩ-vy. Ha ijapykagwasu jerekwe-rehe oĩ jy'y. Ita kyra endy hesakã esmeralda hovy va'e mimbip-rami opyryrypa voi jy'y ijere-rehe.

⁴Ahexa ave mburuvixagwasu gwapy haty apykagwasu jerekwe-rehe heta apyka mixĩ mixĩve va'e oĩ. Vinte e quatro apyka'i oĩ ijerekwe-rehe. Ha'e kwéry mburuvixa gwapyha voi. Vinte e quatro hembiporu igwapyha. Oao morotĩ omonde va'ekwe. Ojgwaka ouro-gwi ijapopyre omonde ave va'ekwe. Ha mburuvixa gwapyha ári ogwapy okwa-vy. Apykagwasu jere-rehe ogwapy joa ave okwa-vy apyka'i ári mburuvixa kwéry.

⁵Upe mburuvixagwasu apykagwasu ae katu overa verapa voi oĩ-vy. Hyapu apu voi oĩ-vy mburuvixagwasu apykagwasu osunu oĩ-vy. Oĩ ave íxugwi onhe'ẽ hatã va'e. Henonde-py ohesape sete tataendy nhane momandu'a hagwã Tupã Nhandejáry Nhe'ẽ Marangatu tee va'e sete okwa va'e-rehe.

⁶Oĩ ave mburuvixagwasu apykagwasu rovagwy-py peteĩ hesakãgwasu va'e. Tuvixa ete va'e. Ygwasu-rami tuvixa tee voi. Hesakã ita kyra resakã rendyngwasu-rami. Irundy Nhandejáry apyka jere-rehe oiko va'ety oĩ ave mburuvixagwasu apykagwasu jerekwe-rehe. Oĩ igwapy haty pa'ũ-my. Ha upe Nhandejáry apyka jere-rehe oiko va'ety hesa reta va'e voi. Henonde-py hapykwe-py ave hesa reta va'e voi. ⁷Peteĩ va'e jagwaxaygwasu-rami tuvixa jepe ndaipoxĩ oiko va'e. Ambue katu tóro-rami oiko va'e. Ambue katu kwimba'e rova-rami oiko va'e. Ambue katu tagwatogwasu oveve va'e-rami oiko va'e.

⁸Peteĩ teĩ ipepo va'e upe irundy Nhandejáry apyka jere-rehe oiko va'ety. Seis ipepo meme ogwerekõ. Hesa hesapa va'e meme upe irundy va'e. Ndopytu'úi va'erã voi ha'e kwéry. Áry peve pyhare peve oporahéi joa okwa-vy. He'i oporahéi-vy:

Tupã Nhandejáry imarangatu va'e.

Tuvixa vixa ete va'e Nhande Ruvixa.

Ipy'a potĩ va'e. Ipu'aka tee va'e.

He'i oporahéi okwa-vy.

Ha'e va'e voi.

Yma gwive ha'e va'ekwe.

Opa e'ÿ va'e voi Nhandejáry, Nhande Ruvixa*
he'i oporahéi joa okwa-vy.

⁹Oromomba'egwasu tee katu.

Oromboete ete katu.

Orotima tima voi nde-vy.

Orogwero'v'ase Tupā tee ore Járy-pe

he'i oporahéi joa-vy hikwái. Mburuvixagwasu apykagwasu ári ogwapy oĩ-vy va'e-pe omboete tee okwa-vy. Upe opa e'ÿ reheve oiko va'e-pe omboete joa oporahéi hikwái.

¹⁰Ha upe irundy Nhandejáry apyka jere-rehe oiko va'ety oporahéi jave upe vinte e quatro mburuvixa onhesū nhesū joa voi hikwái ogwapy va'e rovagwy-py. Mburuvixagwasu apykagwasu ári oĩ va'e-pe omboete tee voi okwa-vy. Upe opa e'ÿ reheve oiko va'e rovagwy-py onhesū nhesū joa voi hikwái imboete-vy. Peteĩ teĩ oity ojegwaka ijapykagwasu renonde-py imboete-vy. Ombotuvixave haggwā ogwapy va'e-pe ombogwey. Ha omboete haggwā íxupe oporahéi joa okwa-vy.

¹¹Tupā ore Járy, ore Ruvixa

entérove va'e remimomba'egwasuve va'erā voi nde

he'i íxupe.

Nde voi opamba'e erejapo va'ekwe.

Ne remimbota-rupi anhónte entéro oiko-ma va'ekwe.

Eremoingo paete va'ekwe.

Upéa-rehe nde-vy anho mante oromboete tee va'e.

Nde-rehe anho mante oro'e, Tuvixa mba'e, oro'e.

Nde pu'aka tee va'e voi nde.

Ore Járy, ore Ruvixa

he'i oporahéi joa imboete-vy hikwái. Upe mburuvixagwasu apykagwasu ári ogwapy oĩ va'e-pe omboete tee voi íxupe hikwái.*

5

Kwatia imbojapyre ojora va'erā Ovexa Ra'y ramigwa va'e

¹Upe rire ahexa kwatia inhapemombypyre. Mburuvixagwasu apykagwasu ári ogwapy oĩ va'e po akatúa-py ahexa oĩ upe va'e kwatia. Ijape-rehe igwy-rehe ave oĩ hese nhe'ê. He iraity ramigwa-py omondyky omboja haggwā ojóhehe va'ekwe. Sete imbojapyre oĩ hese. Ogwapy oĩ-vy va'e po-py ahexa upe kwatia.

²Ahexa ave peteĩ Nhandejáry rembigwái yváy pygwa va'e. Ipu'aka va'e. Hatā onhe'ê oporandu-vy: Kiva'e po oipe'a va'erā kwatia imbojapyre ojora va'erā hexa-vy? he'i oporandu-vy. Avave para'e ndoikóiry heko marangatu porā va'e ojora va'erā hexa-vy? he'i oporandu-vy.

³Ha avave ndoikói ipe'a kwaaharā. Yváy-py ndaipóri. Yvy-py ndaipóri ave. Yvygwypy ndaipóri ave. Avave ndoikóiry heko kwaaharā.

⁴Ahexase eterei-gwi amboasy. Upéa-gwi xe rasē. “Ndojohúí ra'e ipe'aharā” ha'e xejeúpe. “Ndikatúí opa va'e rei oipe'a. Heko marangatu va'e po pygwarā voi ra'e upe kwatia ha upeixagwa ndojohúíry ra'e ipe'aharā” ha'e xejeúpe anhemboasy-vy.

⁵Upéa ha'e-ma ramo peteĩ mburuvixa he'i xe-vy:

—Ani erejahe'o teĩ, he'i. —Oĩ voi peteĩ ipe'a kwaaharā, he'i xe-vy. —Judéu re'ÿi kwéry gwigwa upe va'e, he'i. —Davi hembypy, he'i hese. —Ha'e leão imbaraeteha-rami imbaraeete tee va'e, he'i hese. —Onhembopu'aka-ma va'ekwe opamba'e-rehe. Nonheme'êi va'ekwe ojeity ukaharāgwe-pe. Sete imbojapyre oipe'a va'erā voi ko kwatia nhe'ê ohexa haggwā, he'i hese.*

⁶Upéi katu ama'ẽ ramo ahexa Ovexa Ra'y ijukapyre ramigwa oikove jevy-ma onhembo'y oĩ-vy ramo mburuvixagwasu apykagwasu renonde ete-py. Upe irundy Nhandejáry apyka jere-rehe oiko va'ety pa'ũ-my oĩ. Gwĩ mburuvixa kwéry pa'ũ-my ahexa upe Ovexa Ra'y

* 4:8 Ez 1.18; 10.12; Is 6.2-3 * 4:11 Ap 5.9-14; 7.9-12; 11.16-18; 19.1-4 * 5:5 Gn 49.9-10; Is 11.1

ramigwa va'e oiko. Hesa jojapa va'e. Hatĩ eta va'e. Sete hesa ogwereco va'e. Sete hatĩ ave ogwereco ave upe Ovexa Ra'y ramigwa va'e. Upe sete hesa nhane momandu'a Tupã Nhandejáry Nhe'ẽ Marangatu tee va'e-rehe. Gwĩ sete opa-rupi yvy ári onhemondo mondo va'ekwe-rehe.*

⁷Ha upe jave upe Ovexa Ra'y ramigwa va'e ijukapyre oikove jevy va'ekwe ou ogwahẽ ogwapy oĩ-vy va'e ha-py. Upéi oipyhy ipo-gwi, ipo akatúa koty ogwereco va'e kwatia oipyhy oipe'a íxugwĩ. ⁸⁻⁹Oipe'a-ma ramo gwĩ ijerekwe rupigwa onhesũ joa Ovexa Ra'y ramigwa va'e rovagwy-py imboete-vy. Upe irundy Nhandejáry apyka jere-rehe oiko va'ety onhesũ hovagwy-py ave. Upe vinte e quatro mburuvixa kwéry ave hovagwy-py onhesũ ave. Petéi teĩ ogwereco opo-py hikwái gwemimbopu isã reta va'e. Mba'e ryrú ouro-gwi ijapopyre ogwereco meme ave. Ha mba'e ryrú meme-py oĩ hyakwã porã porã va'e. Hesa reroviaha kwéry ombojeupĩ upi onhe'ẽ Nhandejáry-pe hyakwã porã va'e vérami.* Ha mburuvixa kwéry onhesũ Ovexa Ra'y ramigwa va'e rovagwy-py imboete-vy. Oha'ã petéi mborahéi pyahu okwa-vy hikwái.

Enterove remimomba'egwasu arã nde.

Iporã voi ereipyhy ko kwatia nhe'ẽ

Imbojapyre ereipe'a ave.

Nde voi erejajuka va'ekwe.

Nde rugwy avyte-py eremano va'ekwe

eremopotĩ potĩ hagwã heta eta va'e Nhandejáry pegwarã.

Opa opa rupigwa yvy oho va'e-rupigwi ou va'ekwe eremopotĩ Nhandejáry pegwarã.

Ijypye pye va'e eremopotĩ Nhandejáry pegwarã.

Nhe'ẽ ambue mbue-py onhe'ẽ va'e eremopotĩ Nhandejáry pegwarã.

Kente ambue mbue opa rupigwa eremopotĩ Nhandejáry pegwarã.

Gwetã gwetã rupigwa eremopotĩ íxupe gwarã.

Ereipe'a va'ekwe íxupe kwéry

Tupã Nhandejáry pegwarã he'yirã va'ekwe.

¹⁰Eremoingo íxupe kwéry mburuvixagwasu ramo.

Eremoingo-ma íxupe kwéry Nhandejáry re'ýi kwéry ramo

pa'i-rami ha'e kwéry omboete ete hagwã Nhandejáry-pe.

Oiko va'erã mburuvixagwasu ramo yvy ári ne remimopotikwe.

Upéa-rehe iporã voi nde ereipe'a imbojapyre

erehexa hagwã kwatia nhe'ẽ,

he'i oporahéi joa okwa-vy Ovexa Ra'y ramigwa va'e-pe imboete-vy.*

¹¹Upéi ahexa, ahendu ave hetave oporahéi va'e. Avave ndoipapa kwaáry upe oporahéi va'e-pe heta eterei hikwái. Nhandejáry rembigwái yváy pygwa meme hikwái. Mburuvixagwasu apyagwasu jerekwe-rehe oporahéi.* Gwĩ Nhandejáry apyka jere-rehe oiko va'ety jerekwe-rehe ave, mburuvixa va'e kwéry jerekwe-rehe ave ¹²oporahéi okwa-vy.

Oromboetese-gwi ore oroporahéi nde jerekwe-rehe.

Ereikove jevy-gwi oromboeteseve voi nde-vy,

he'í íxupe oporahéi okwa-vy imboete-vy.

Nde Ovexa Ra'y-rami nde juka va'ekwe.

Upe rire ereikove jevy-ma va'ekwe.

Nde pu'aka tee va'e nde opaixagwa-rehe, opamba'e-rehe ave.

Entéro mba'e mba'e nde-vy gwarã voi.

Nde ne arandu tee va'e voi.

Tuvixa vixa ete va'e voi nde.

Iporã voi enterove ne mboete ete tee.

Ne mba'egwasu gwasu ete voi nde.

Iporã voi enterove omoherkwã porã nde rehegwa nhe'ẽ

* 5:6 Is 53.7; Zc 4.10 * 5:8-9 Sl 141.2 * 5:10 Êx 19.6 * 5:11 Dn 7.10

Ne rerohory hagwã.

Iporã voi oronhe'ê porã porã nde-rehe,

he'i oporahéi okwa-vy.*

¹³Upéi ahendu-ma oporahéi joa ramo okwa-vy. Yváy-py oĩ va'e, yvate okwa va'e, yvy pype ave yvygwy-py okwa va'e ave, ygwasu gwy-rupi okwa va'e ave, opamba'e ipy-py kwéry okwa va'e gwive oporahéi joa okwa-vy. He'i oporahéi ramo okwa-vy:

Tonhemomba'egwasu porã katu

Mburuvixagwasu apyka ári ogwapy oĩ-vy va'e-pe,

Ovexa Ra'y ramigwa-pe ave,

Tonhemboete tee katu pe Nhandejáry-pe.

“Entéro remimomba'egwasu voi ko nde”

te'i katu Nhandejáry-pe.

“Nde ko, nde pu'aka tee va'e voi” te'i ave íxupe.

Opa e'ỹ reheve upéixa toiko íxupe,

he'i oporahéi joa okwa-vy.

¹⁴Ha gwĩ irundy Nhandejáry apyka jere-rehe oiko va'ety he'i:

—Upéixa voi toiko, he'i.

Ha gwĩ vinte e quatro mburuvixa kwéry onhesũ ogwapy oĩ va'e rovagwy-py Ovexa Ra'y ramigwa va'e rovagwy-py ave. Ha omomba'egwasu gwasu upe Nhandejáry-pe.**

6

Ovexa Ra'y ramigwa va'e oipe'a kwatia-gwi gwĩ imbojapyre

¹Upéi ahexa Ovexa Ra'y ramigwa va'e oipe'a peteĩ vyte kwatia nhe'ê imbojapyre. Upe jave ahendu peteĩ Nhandejáry apyka jere-rehe oiko va'ety onhe'ê.

—Ejo katu, ho'e-vy hyapu inhe'ê.

²Ama'ê ramo ahexa-ma ou kavaju morotĩ ári ou va'e. Gwyrapa ave ogweru opo-py. Ha ahexa omoĩ ramo inhakã-rehe ijegwakarã mburuvixagwasu pegwarã. Upe rire osê ipu'aka reheve onhembopu'aka hagwã opaixagwa-rehe kavaju morotĩ arigwa.

³Upe-ma ramo upe Ovexa Ra'y ramigwa va'e peteĩ imbojapyre jevy oipe'a kwatia nhe'ê-gwi. Upe mokõiha oipe'a-ma ramo ambue Nhandejáry apyka jere-rehe oiko va'ety katu onhe'ê:

—Ejo katu, he'i onhe'ê-vy.

⁴He'i-ma ramo osê peteĩ kavaju pytã va'e ári ou va'e. Upéi ome'ê íxupe ipu'akarã.

—Ne nhe'ê-py kente kwéry ndaipya'ã porã mo'ávérỹ ojéhe kwéry, he'i íxupe. — Inhanha tee tee va'e onhorairõ va'erã ojójuka hagwã hikwái onhondive, he'i ave íxupe.

Ome'ê ave íxupe peteĩ kyse ipuku tee va'e.

⁵Upéi Ovexa Ra'y ramigwa va'e oipe'a jevy peteĩ imbojapyre kwatia-gwi. Upe mbohapyha oipe'a-ma ramo ahendu ambue Nhandejáry apyka jere-rehe oiko va'ety katu. He'i:

—Ejo katu, he'i.

He'i ramo, ahexa-ma peteĩ kavaju hũ va'e ári ou va'e. Opo-py ogwereco peteĩ mba'e pohỹi kwaaha. ⁶Upe irundy Nhandejáry apyka jere-rehe oiko va'ety apyte-gwi ahendu ave nhe'ê. He'i:

—Ivare'apa rei va'erã okwa-vy. Temi'urã ojogwa hagwã kente kwéry hepy voi va'erã, he'i. —Peteĩ áry repy-rehe peteĩ kilo mate ojogwa arã trigo, he'i. —Ha cevada ojogwase ramo mbohapy kilo ojogwa arã peteĩ áry repy-rehe. Upéixa hepy eterei ramo jepe hemi'urã ani joty erembohepy eterei teĩ nhandy ha vinho ave, he'i.

⁷Upe rire Ovexa Ra'y ramigwa va'e oipe'a jevy peteĩ imbojapyre. Upe irundyha oipe'a-ma ramo kwatia-gwi ahendu jevy ambue Nhandejáry apyka jere-rehe oiko va'ety nhe'ê:

—Ejo katu, he'i.

* 5:12 Is 13.10; Ez 32.7; Jl 2.31; Mt 24.29; Mc 13.24-25; Lc 21.25
19.1-4

* 5:14 Is 31.4

* 5:14 Ap 4.8-11; 7.9-12; 11.16-18;

⁸Ha ama'ê ahexa peteĩ kavaju hesa'yju va'e ári ou va'e. Upéa réry Nhemano Járy. Omano va'ekwe ogweropyta haty járy ou hapykwéri. Ha Nhandejáry omombe'u íxupe ojuka juka uka hagwã kente kwéry-pe:

—Ekwa katu opa-rupi upe yvy arigwa oĩ ha-rupi erejuka juka uka hagwã, he'i. —Irundy kente meme-gwi ejuka uka peteĩ teĩ-pe opyta hagwã mbohapy hapy. Kysepuku-py omano hagwã heta eta va'e. Ivare'a eterei-gwi heta ave omano hagwã. Mba'asy-gwi omano hagwã heta ave. Ha mymba kwéry ka'agwy-rupi oĩ va'e ojuka va'erã ave heta eta kente-pe, he'i omanda-vy Mano Járy-pe.

⁹Upe rire jevy katu Ovexa Ra'y ramigwa va'e oipe'a jevy peteĩ kwatia nhe'ê imbojapyre. Ko va'e cincoha oipe'a-ma. Oipe'a-ma ramo upe cincoha ahexa heta omano va'ekwe nhe'ê marangatukwe. Ha'e kwéry omosarambi porã porã va'ekwe Tupã Nhandejáry remimombe'ukwe. Oiko porã ave va'ekwe inhe'ê-py. Hemimombe'ukwe nohenduséi va'e kwéry ojukase jepe íxupe omombe'u joty. Nahakate'jyry gwekove-rehe. Omombe'u meme joty. Upéa-rehe nohenduséi va'e ojuka va'ekwe peteĩ teĩ-pe íxupe kwéry. Ha ko'ây ahexa inhe'ê marangatukwe. Nhandejáry-pe omboeteha renda gwy-py oime hikwái.

¹⁰Peteĩxa onhe'ê hatã hikwái:

—Ore Járy, ore Ruvixagwasu, ne marangatu tee va'e. Anhetegwa voi nde. Araka'e peve tipo nde are-ta ore repy hagwã-rehe? Araka'e tipo erereko asy-ta ore jukahare kwéry-pe? he'i oporandu randu íxupe okwa-vy.

¹¹Upe he'i-ma ramo ome'ê peteĩ teĩ-pe ijao morotĩrã. Ha he'i íxupe kwéry:

—Pepytu'u kirirĩha-py peha'arõ-vy, he'i. —Oĩ joty hetave omano va'erã pende juka hagwe-rami. Gwĩ Hesu rembigwái, ne írũra ojejuka va'erã gwive peha'arõ kirirĩ-my pene írũrã kwéry-rehe, he'i íxupe kwéry.

¹²Upéi ahexa Ovexa Ra'y ramigwa va'e oipe'a jevy peteĩ kwatia nhe'ê imbojapyre. Seisha-ma oipe'a. Peteĩ mate ndoipe'ái vyteri. Ha oipe'a-ma ramo upe seisha-ma omýimba-ma yvy. Ha kwarahy onhemohũmba-ma ave. Ao hũ ete-rami opyta kwarahy rova. Jasy rova katu pytãmba-ma ave. Tugwy-rami ipytã mbaete jasy rova. ¹³Ha jasytata ho'a joa-ma. Yvytu eterei oipeju peju ramo figo rakã-me okuipa figo hi'a e'jy va'e. Upéixa voi ho'a paete jasytata yvy-py. ¹⁴Áry jepe ojei henda-gwi onheapypevã reheve ho'a ou-vy. Gwĩ vyatyrysu kwéry ojeipa-ma voi gwendagwe kwéry-gwi. Ymbyte-py oĩ va'e yvygwasu kwéry ave ojeipa gwendagwe-gwi.

¹⁵Upéa-rehe entéro kente kwéry omondýi eterei-gwi okanhymba onhemi hagwã. Mburuvixagwasu ete yvy arigwa kwéry jepe okanhymba mo'ã ave. Coronel kwéry ave okanhymba mo'ã ave. Entéro imba'e reta va'e gwive, ipu'aka va'e gwive, hembigwái ramo oiko va'e kwéry gwive, gwembiapo mate ojapo va'e kwéry gwive okanhymba mo'ã ave hikwái. Entérove gwive okanhymbase mo'ã. Yvyatyrysu gwy-py oikepa hikwái okanhymba hagwã mo'ã. Itaty-rupi oje'ói hikwái okanhymba hagwã mo'ã. Ojepy'apy voi hikwái omanose oiko-vy ojejuka ukapase mo'ã.* ¹⁶He'i ójehe kwéry,

—Ndaipotáiry xe rexa avave, he'i. —Tondururu katu nhande ári itagwasu pehégwe hégwe. Taxe mbohay'i y'ipa itagwasu. Taxe jatypa vyatyrysu omongu'igwasu-vy pono xe rexave upe mburuvixagwasu apykagwasu ári ogwapy oĩ-vy va'e, pono ave upe Ovexa Ra'y ramigwa va'e xe rexa ave, he'i. —Ogweroma'eandu va'erã xe rekoha vaikwe, he'i okanhy kanhyse mo'ã-vy hikwái.* ¹⁷—Ogwahẽ-ma ra'e upe áry ogweroma'eandu hagwã nhande rekoha vaikwe, he'i ojóupe hikwái. —Ogwahẽ-ma hi'áry hembiaapo vaikwe-rehe gwive ogwereco asy asy hagwã, he'i. —Avave ndaipu'akái va'erã hese, he'i onhemise mo'ã okwa-vy hikwái.*

7

Nhandejáry re'yí ojekwaa hagwã omoĩ va'e isyva kwéry-rehe

* 6:15 Is 2.10 * 6:16 Os 10.8 * 6:17 Jl 2.11; Ml 3.2

¹ Upe rire ahexa irundy Nhandejáry rembigwái yváy pygwa va'e. Yvy rapy rugwa-py peteĩ teĩ onhembo'y oĩ-vy ramo. Ha'e kwéry ojoko joko gwí irundy yvytu pono oipeju mba'eve-pe. Pono oipeju vvy-pe terã ygwasu-pe terã entéro va'e vvyra-pe ojoko joko yvytu hikwái. Upe irundy oĩ va'e yvytu jokoha.*

^{2,3} Ahexa ave peteĩ jevy Nhandejáry rembigwái yváy pygwa. Kwarahy resẽ ha-gwi ou. Ojekwaa uka hagwã Tupã Nhandejáry opa e'ỹ va'e re'ýi kwéry va'e syva-rehe ohai hagwã ou. Upéa-rehe osapukái hatã gwe'ýi kwéry-pe, upe irundy va'e yvytu jokoha-pe osapukái hatã:

—Eha'arõ ranhe katu, he'i íxupe osapukái-vy.

Nhandejáry omanda íxupe kwéry ponove ojoko yvytu vvy-rehe ygwasu-rehe ojapo vai hagwã ave. Ha upe kwarahy resẽ-gwi ou va'ekwe ojerure íxupe kwéry oha'arõ hagwã.

—Eha'arõ ranhe katu erejapo vai hagwã upe vvy-rehe ygwasu-rehe vvyra kwéry-rehe ave. Eha'arõ ranhe katu. Orohai ranhe-ta oromoĩ-vy Nhandejáry roeroviaha kwéry syva-rehe ojekwaa hagwã. Oromoimba rire ae kuri ejapo vai, he'i Nhandejáry rembigwái yvytugwasu jokoha kwéry-pe.*

⁴ Upe he'i rire ae katu ahendu-ma mbovy pa oĩ upeixagwa isyva-rehe Nhandejáry re'ýi ojekwaa hagwã omoĩ va'e oĩ. Ahendu-ma cento cuarenta e quatro mil-ma oĩ. Entéro Israel ra'y re'ýi kwéry rehegwa va'e gwive omoĩ heta. ⁵ Omoĩ doze mil meme hese kwéry. Omoĩ doze mil Judá re'ýi kwéry rehegwa va'e syva-rehe omoĩ. Doze mil Rúben re'ýi kwéry rehegwa va'e syva-rehe ave omoĩ. Doze mil Gade re'ýi kwéry rehegwa va'e syva-rehe ave omoĩ. ⁶ Doze mil Aser re'ýi kwéry rehegwa va'e syva-rehe ave omoĩ. Doze mil Naftali re'ýi kwéry rehegwa va'e syva-rehe ave omoĩ. Doze mil Manassés re'ýi kwéry rehegwa va'e syva-rehe ave omoĩ. ⁷ Simeão re'ýi kwéry rehegwa va'e syva-rehe ave omoĩ doze mil. Levi re'ýi kwéry rehegwa va'e syva-rehe ave omoĩ doze mil. Issacar re'ýi kwéry rehegwa va'e syva-rehe ave omoĩ doze mil. ⁸ Doze mil Zebulom re'ýi kwéry rehegwa va'e syva-rehe ave omoĩ. Doze mil José re'ýi kwéry rehegwa va'e syva-rehe ave omoĩ. Doze mil Benjamim re'ýi kwéry rehegwa va'e syva-rehe ave omoĩ. Doze mil meme omoĩ. Heta voi Nhandejáry re'ýi ombojekwaa hagwã omoĩ va'ekwe isyva-rehe.

Opy'a potíha-rami ao morotí-my onhemonde va'e oĩ okwa-vy Nhandejáry rovagwy-py

⁹ Upe rire ae ahexa heta eta onhomboaty va'e. Onhemboheta verei okwa-vy ndikatúi hagwã avave oipapa íxupe kwéry. Opa opa rupigwa vvy oho va'e-rupigwi ou va'ekwe hikwái. Gwetã gwetã rupigwa ou va'ekwe hikwái. Gwembypye pye-gwi ou va'ekwe hikwái. Opa opa kente ambue mbue kwéry rehegwa ou va'ekwe hikwái. Nhe'ẽ ambue mbue-py onhe'ẽ va'e kwéry ave ou va'ekwe hikwái. Mburuvixagwasu gwapy haty rovagwy-py, Ovexa Ra'y ramigwa va'e rovagwy-py onhembo'y joa okwa-vy. Oao morotí reheve oĩ hikwái upe-py. Ha entérove pindo rakãgwe opo-py ogwereco joa reheve hikwái.

¹⁰ —Tupã Nhandejáry katu ogwapy oĩ-vy mburuvixagwasu gwapy haty ári.

Ha'e katu Nhane Resendeha voi.
Ovexa Ra'y ramigwa va'e Nhane Resendeha voi,
he'i oporahéi hatã okwa-vy.

¹¹ Ha entéro Nhandejáry rembigwái yváy pygwa va'e onhembo'y joa oĩ-vy hikwái Nhandejáry gwapy haty jere-rehe. Upe mburuvixa kwéry va'e gwive ojere joa ave hese hikwái. Upe irundy Nhandejáry apyka jere-rehe oiko va'ety gwive ojere joa ave hese hikwái. Ha onhesú joa okwa-vy henonde-py ojeayvy-ma Nhandejáry-pe omboete eterei-gwi.

¹² —A-rami toiko,
ho'e-vy.

—Terenhemomba'egwasu katu ore-vy ore Járy,
he'i joa omboete ete tee-vy íxupe.

—Orombotuvixa ete voi nde-vy.

* 7:1 Zc 6.5 * 7:2-3 Ez 9.4

Nde ne arandu tee va'e voi nde.
 Orotima tima meme va'erã voi nde-vy.
 Oromoherakwãgwasu va'erã nde réry.
 Nde pu'aka tee-ma va'e voi nde,
 he'i íxupe.
 —Ne mbaraete tee va'e voi nde.
 Upéixa oro'e meme va'erã ne mboete tee-vy
 erepa e'ý reheve oromboete tee-vy oro'e nde-vy.
 Nde ore Járý tee va'e.
 A-rami toiko meme,

he'i oporahéi joa imboete-vy hikwái íxupe.*

¹³Upéi peteí mburuvixa oporandu xe-vy:

—Ereikwaa tipo ki-gwi pa ou ra'e pa ko'ã va'e kwéry ijao morotí va'e? he'i xe-vy. —
 Ereikwaa tipo kiva'e kwéry ko'ã va'e? he'i xe-vy oporandu-vy.

¹⁴Ha xe katu ha'e íxupe:

—Ndaikwaái voi xe. Nde ae, ne mburuvixa va'e ereikwaa ra'e, ha'e íxupe.

Upe-ma ramo he'i jevy xe-vy:

—Ko va'e kwéry ohasa asy puku va'ekwe jepe ojerovia joty upe Ovexa Ra'y ramigwa va'e-rehe. Gwugwy apyte-py omano va'ekwe-gwi ha'e omboykepa íxugwi kwéry hembiaapo vaikwe gwive. Opy'a potíha rexa uka-vy omonde-ma hikwái oao morotí.* ¹⁵Upéixagwi onhembo'y joa hikwái Tupã Nhandejáry gwapyha rovagwy-py. Áry-rupi, pyhare peve nosê mo'ái hikwái Nhandejáry renda-gwi. Hemimbota ojapo meme hikwái íxupe omboete-vy. Upe mburuvixagwasu gwapy haty ári ogwapy va'e onhangareko porã ete hese kwéry. Indive oí-gwi ndojehu mo'ái mba'eve íxupe kwéry. ¹⁶Ndaivare'a mo'ávéi-ma va'erã. Ndaijy'uhéi mo'ávéi-ma va'erã. Nonhanduvéi-ma va'erã íxupe kwéry kwarahy haku eterei va'e terã ambue haku va'e.* ¹⁷Pe Ovexa Ra'y ramigwa va'e mburuvixagwasu gwapy haty mbyte-py oí va'e onhangareko va'erã hese kwéry. Herekwa onhangareko porãha-rami gwymba-rehe ogweraha va'erã íxupe kwéry omboy'u hagwã upe yvu nhane moingove va'e-py, nhande py'apy pygwarã. Ha Tupã Nhandejáry oikyty va'erã íxupe kwéry hesay.*

8

Ipahagwe oipe'a jevy kwatia-gwi imbojapyre

¹Upe Ovexa Ra'y ramigwa oiko va'e oipe'a jevy kwatia-gwi imbojapyre ipahagwe va'e. Oipe'a-ma ramo onhekirirĩmba yváy pygwa kwéry. Meia hora-rupi enterove va'e okirirĩmba voi okwa-vy.

²Upe rire ahexa sete yváy pygwa Nhandejáry rembigái Tupã Nhandejáry rovagwy-py onhembo'y oí-vy va'e. Ahexa jave peteí teí mimbygwasu ome'ê-ma íxupe kwéry.

³Upéi ambue va'e yváy pygwa Nhandejáry rembigwái ou ave. Onhembo'y oí-vy nhemboete haty renonde-py. Opo-py ogwereco ouro-gwi ijapopyre hyakwã porã va'e rryu. Ha ome'ê íxupe heta eta hyakwã porã va'e.

—Ko hyakwã porã va'e embojehe'a Nhandejáry re'ýi remimbojeupikwe ndive. Opa rupigwa Nhandejáry-rehe ojerovia va'e ombojeupi upi onhe'ê Nhandejáry-pe. Upe hemimbojeupikwe oí-ma mburuvixagwasu gwapy haty rovagwy-py. Nhemboete haty ári oí-ma Tupã Nhandejáry re'ýi remimbojeupikwe. Embojehe'a katu hemimbojeupikwe ko hyakwã porã va'e ndive, he'i íxupe.

⁴Ombojehe'a ojóehe rire ipo-gwi osê oho-vy hyakwã porã va'e ratatigwe ojeupi ogwahê hagwã oho-vy Nhandejáry-pe. He'ýi remimbojeupikwe ndive onhehetú uka hagwã ogwahê oho-vy íxupe.

* 7:12 Ap 4.8-11; 5.9-14; 11.16-18; 19.1-4
 Is 25.8

* 7:14 Dn 12.1; Mt 24.21; Mc 13.19

* 7:16 Is 49.10

* 7:17 Sl 23.2;

⁵ Upéi katu upe yváy pygwa Nhandejáry rembigwái omohynyhê jevy upe ouro-gwi ijapopyre hyakwã porã va'e ryrukwe. Oipe'a tata nhemboete haty-gwi ha omohynyhê hyakwã va'e ryrukwe. Upéi onhohêmba jevy vvy-py oitypa tata vvy-py. Upe-ma ramo osunu sunu hyapu ijayvu hatã joa ave. Overa vera hatã atã ave. Hatã atã ave oryrýi vvy.*

Gwemimbygwasu ombopu petei tei Nhandejáry rembigwái marány kwéry oity uka-vy

⁶ Upe-ma ramo upe Nhandejáry rembigwái yváy pygwa va'e opo-py meme ogwereco hikwái gwemimbygwasu ombopu va'erã-rami tei ogwereco hikwái opo-py. Sete meme ogwereco hikwái gwemimbygwasu ombopu va'erã hikwái.

⁷ Upéi upe ombopu ppy va'e ombopu gwemimbygwasu. Ombopu ramo ho'a-ma amandáu, tata ave tugwy reheve ojepe'a ho'a oho-vy vvy-rupi. Okái vvy. Terça parte okái. Imbohapy hapyha vvyra máta hakã reheve okái. Kapi'ipe ohapypa ave. Upéixa Nhandejáry ombou uka marány íxupe kwéry.*

⁸ Upe rire joty Nhandejáry rembigwái mokõiha ombopu jevy gwemimbygwasu. Upéi ombopu rire joty gwemimbygwasu vvyatyrsu ramigwa tata reheve onhemombo ygwasu hembey e'y va'e-py. Upéi ho'a rire upe vvyatyrsu tata reheve haimete rei y mbyte gwive ogwahê tugwy. Imbohapy hapyha ave tugwy ramo oiko. ⁹ Haimete omanomba vixo ygwasu hembey e'y va'e gwy-py okwa va'e kwéry. Terça parte omano. Omano ave ogwata va'e kanoagwasu-py. Heta omano. Imbohapy hapyha ave omano. Hyrukwe reheve onhembyaipa. Upéixa Nhandejáry ombou uka jevy marány íxupe kwéry.

¹⁰ Upéi katu Nhandejáry rembigwái mbohapyha ombopu jevy gwemimbygwasu. Ombopu-ma ramo gwemimbygwasu katu, ho'a yváy-gwi jasytata hendy va'e. Tata rendy-rami ho'a. Ysryrupi meme ho'a. Yvu-py meme ave ho'a. Imbohapy hapyha-rupi ho'a.*

¹¹ Ho'a va'e renda renda omboro. Jasytata hendy va'e ho'a ramo onhembohéry iro va'e. Ho'a ramo y-py omboropa-ma y. Ijy'uhéi va'e gwive hoy'u ramo ojuka íxupe kwéry. Heta heta voi omano oy'u va'e. Upéixa Nhandejáry ombou uka jevy marány íxupe kwéry.

¹² Upéi Nhandejáry rembigwái inhirundyha ombopu jevy gwemimbygwasu. Ombopu jevy-ma jave katu ombogwe-ma kwarahy rendy, jasy rendy, jasytata rendy ave. Terça parte ombogwe-ma íxugwi. Upéa-gwi nahendyvéi-ma imbohapyha kwarahy, jasy, jasytata ave. Upéa-gwi áry ramo imbohapyha va'e ndohesapevéi-ma kwarahy. Pyhare ramo imbohapyha ndohesapevéi-ma ave jasy, jasytata reheve. Upéixa Nhandejáry ombou uka jevy marány íxupe kwéry.*

¹³ Upéi katu ahexa oveve ramo yváy-rehe tagwatogwasu. Yváy mbyte-rehe oveve jave ahendu hatã hatã onhe'e omombe'u-vy:

—Amboasy voi, amboasy voi, amboasy voi. Omomytu e'yimba-ta vvyppóry, he'i. — Ohendu ramo upe mbohapy hemimbygwasu ne'frã vyteri ombopu va'e omomytu'e'yimba-ta vvyppóry, he'i.

9

¹ Ko cincoha Nhandejáry rembigwái yváy pygwa va'e ombopu gwemimbygwasu. Upe jave ahexa jasytata ramigwa ho'a voi nipo araka'e yváy-gwi. Vvy-py ho'a-ma araka'e. Upéa katu onheme'e íxupe petei imboty teeha chave ramigwa vvykvarusu ijapypre'y va'e onhehekoenda'o jevy hagwã. ² Ha oipe'a-ma ramo upe vvykvarusu ijapy e'y va'e rokê íxugwi osê-ma tatatirusu tatakagwasu-gwi osê va'e ramigwa tatatirusu. Upe vvykvarusu ijapy e'y va'e ratatigwe ojererovate oho-vy. Kwarahy rova-py oho-ma omopytumba hagwã. Ndohesapevéi-ma kwarahy. Aragwy opa-ma omopytumba-ma ave.

³ Tatatirusu pa'ũ-gwi osê-ma tukukaru marány. Ogwey-ma ko vvy-rehe. Ome'e ave íxupe gwí tukukaru-pe oporojopi hagwã opykõi-py japeusagwasu-rami joty. ⁴ He'i ave gwí tukukaru-pe ani hagwã ombyai gwí hogwe rovy va'e, ani hagwã ombyai vvyra máta ave, ani hagwã ombyai oime raẽ va'e temitýgwe, omoingo asy hagwã ae gwí kente kwéry

* 8:5 Lv 16.12; Ez 10.2; Ap 11.19; 16.18 * 8:7 Êx 9.23-25 * 8:10 Is 14.12 * 8:12 Is 13.10; Ez 32.7; Jl 2.10 * 9:3 Êx 10.12-15

ogwereco e'ŷ va'e Nhandejáry Tupã rembihaikwe osyva-rehe.* ⁵ Ndojuka mo'ai jepe gwí kente kwéry-pe ombohasa asy-ta ae íxupe kwéry. Cinco jasy peve upe mba'asy hasy arã japeusa nhande jopi hagwe-rami. ⁶ Upe cinco jasy jave kente kwéry he'i arã, "Amanosema voi xe" he'i rei arã ójehe. Ha nomano mo'ai va'erã voi. Oheka arã omano hagdã mo'ã. Ndojohúi arã omano hagdã. Omanose asy ramo jepe, nomanói va'erã voi. Okanhy arã íxugwi imanoharãgwe.*

⁷ Aipo ramo tukukaru katu ijehexa kavaju-rami onhorairõ hagdã-py oho va'e. Hova anheĩ-rami voi kwimba'e rova, ijegwaka katu anheĩ-rami ave ouro-gwi ijapopyre.* ⁸ Ha inhakã ragwe kwéry katu ha'ete voi kunha akã ragwe ipuku. Hãi katu ha'ete voi jagwaxaygwasu rã-rami etei.* ⁹ Ipyti'a kwéry-rehe oĩ va'e anheĩ-rami voi hatã va'e ijukaharãgwe jepe ndojukái arã voi íxupe. Ipepo kwéry hyapupa voi oje'ói-vy hikwái. Anheĩ-rami voi onhorairõ hagdã-py oho va'e-rami heta heta voi carroça reheve kavaju kwéry reheve ave ohoha-rami voi hyapupa voi ipepo kwéry.* ¹⁰ Japeusa-rami voi hugwái pykõi. Ipykõi joja-gwi kente kwéry-pe omoingo asy-vy arã cinco jasy peve. ¹¹ Nhandejáry rembigwaikwe opyta huvixa ramo íxupe kwéry. Upe va'e yvykwarusu ijapy e'ŷ va'e-rehe onhangareko va'e. Hebreu kwéry nhe'ẽ-py katu héry, "Abadom" ha grego kwéry nhe'ẽ-py katu héry, "Apoliom" ha nhane nhe'ẽ-py héry voi, "Mba'e Mbyaihaty".

¹² Peteĩ yvypóry momytu'e'ŷha ohasa-ma. Ndopái joty mba'e rasy yvypóry-pe. Oĩve joty mokõi imomytu'e'ŷha kwéry.

¹³⁻¹⁴ Ombopu-ma ramo gwemimbygwasu seisha Nhandejáry rembigwái yváy pygwa va'e, ahendu ave íxupe omombe'u va'e. Tupã Nhandejáry renonde-py oĩ nhemboete renda ouro-gwi ijapopyre. Hugwa joja va'e pa'ũ-gwi ahendu upe onhe'ẽ va'e. Omombe'u upe Nhandejáry rembigwái gwemimbygwasu seisha va'e-pe.* He'i íxupe:

—Tereho katu ysyrygwasu Eufrates héry va'e-py. Irundy ne irũgwe onhenhapytiha-py ekwa katu ejora íxugwi kwéry oho hagdã, he'i Nhandejáry rembigwái-pe.

¹⁵ Upe rire ojora íxugwi kwéry onhenhapyti hagwe-gwi. Ojepoi-ma ramo oho ojukapa ete hagdã heta kente kwéry-pe. Imbohapy hapyha-pe ojuka moko mokõi opyta hagdã. Ha'e kwéry onhembosako'i va'ekwe upe áry ramogwarã. Upe Nhandejáry omboopy hagwe óra-py onhembosako'i ojuka hagdã mbohapyha kente kwéry-pe. ¹⁶ Ahendu ave onhendu ramo kavaju heta eta reheve ou va'e. Duzentos milhões ou va'e. ¹⁷ Xe rembiexa uka ahexa ramo kavaju ári kwimba'e kwéry ogwereco hikwái ipyti'a resaupe-rehe oĩ va'e. Oĩ tata rendy ramigwa pytã va'e. Oĩ hovyhũ va'e. Oĩ ave hesa'yju va'e. Ahexa kavaju inhakã jagwarete akã-rami meme. Ijuru ryepy-gwi osẽ tata rendy, tatati ave. Hesa'yju ita rendy omboykupa va'erã osẽ ave ijuru ryepy kwéry-gwi. ¹⁸ Upe tata, tatati, hesa'yju va'e ave katu ojuka heta heta va'e-pe. Mbohapyha katu yvypóry oikove va'e gwive. Imbohapy hapyha-pe ojuka paete upe osẽ va'ekwe kavaju ramigwa juru ryepy-gwi. ¹⁹ Gwugwái-gwi, ojuru ryepy-gwi ave imbaraeete oporojuka-vy. Hugwái katu ha'ete gwí mbói oakã rehevegwa. Ha upe va'e-py gwí kavaju kwéry ombohasa asy entéro yvypóry kwéry-pe. Upéa-rehe ojuka heta eta va'e-pe. Imbohapy hapyha ojuka meme. Peteĩ teĩ ojuka. Mokõ mokõi mate ndojukái.

²⁰ Ha upe opyta va'ekwe ndogwerováĩ joty gwekoha kwéry. Hapixa kwéry ohasa asy omano hagdã jepe ha'e kwéry ndogwerováĩ joty gweko vaiha. Ojapo joty Nhandejáry remimbota e'ŷ. Omboete joty tupã ra'anga-pe. Omboete joty ave anháy kwéry-pe ha entéro gwí tupã ra'anga ojejapo va'ekwe. Ouro-gwi ojejapo va'ekwe, prata-gwi ave. Oĩ ave ojapo va'e bronze-gwi, oĩ ojapo va'e ita-gwi, vyvra-gwi ave ojapo tupã ra'anga omboete hagdã. Gwí tupã ra'anga mba'eve ndohexáiry va'e, mba'eve nohendúiry ave, ndogwatáiry ave. Upe va'e kwéry-pe omboete hikwái.* ²¹ Ndohejáiry gweko tujakwe. "Amboasy xe rembiapo vaikwe" nde'iry. Oporojuka va'e, "Ndaporojukavéi-tama äy" nde'íry joty ave ójehe. Mohãy ojapo va'ekwe ave, "Ndajapovéi-tama mohãy avave-rehe" nde'íry joty

* 9:4 Ez 9.4 * 9:6 J6 3.21 * 9:7 J1 2.4 * 9:8 J1 1.6 * 9:9 J1 2.5 * 9:13-14 Êx 30.1-3 * 9:20 Sl 115.4-7; 135.15-17; Dn 5.4

voi ójehe. Kunha ikwimba'ese va'e, kwimba'e ikunhase va'e heko vai-gwi ndogwerováí joty gwekoha. Imonda va'e, "Áy naxe mondavéi-tama" nde'íry ave ójehe. Nomboasýiry gwembiapokwe oheja hagwã.

10

Áy katu João Nhandejáry rembigwái va'e omombe'u jevy gwembiexagwe

¹Upe ramo ahexa jevy Nhandejáry rembigwái yváy pygwa imbaraeete va'e ogwejy ou-vy ramo yváy-gwi. Araigwasu pa'ũ-my ogwejy yváy-gwi. Oakã-rehe ogwereco jy'y. Gwova-rehe katu ohexa uka xe-vy ramo kwarahy rendy vérami omimbi porã. Aipo ramo hetyma katu tata rendy opu'ã va'e-rami etei. ²Upe va'e katu opo-py ogwereco petei kwatia ohapype'a hereko-vy. Omoĩ ave petei opy ygwasu hypyete va'e ári. Ipy oakatúa kotyigwa va'e omoĩ ygwasu hypyete va'e ári. Ha ipy ijasu kotyigwa katu omoĩ yvy mbyte-py. ³Upe-gwi osapukái. Osapukái hatã voi ko jagwaxaygwasu okororõha-rami voi osapukái. Upe-ma ramo osapukái hatã-ma ramo, ahendu sete hyapu va'e. Peteĩ teĩ hyapu jevy íxupe. ⁴Hyapu ramo nhe'ẽ vérami ahendu inhe'ẽ. Upe va'e ahendu ramo, "Tamoĩ kwatia-rehe" ha'e xejéupe. Amoĩ-tama ramo, yváy-gwi onhe'ẽ va'e xe-vy ahendu he'i va'e:

—Ani eremoĩ teĩ kwatia-rehe. Ehendu porã rei katu. Ani eremoĩ teĩ, he'i xe-vy.

⁵⁻⁷Upe rire katu upe kwatia ogwereco va'ekwe opo-py ha omoĩ va'ekwe petei opy ygwasu hypyete va'e ári ha petei opy ave omoĩ yvy mbyte-py he'i:*

—Nhandejáry Tupã tee va'e réry-py anhetegwa mate amombe'u-ta nde-vy, ho'e-vy opo akatúa omopu'ã yváy pyte-koty. —Nhandejáry Tupã opa e'ỹ va'e voi. Ha'e voi hembiapokwe voi va'ekwe ygwasu, áry, yvy, yvypy-pe ave ojapo ave. Yvy arigwa hembiapokwe joty ave. Áry pygwa ha'e hembiapokwe ave. Ygwasu pygwa hembiapokwe ave. Amombe'u jevy-tama xe áy anhete teegwa voi. Ndahi'arevéi-tama Nhandejáry remimombe'ukwe oiko hagwã. Ombopu vove hembigwái seteha gwemimbygwasu jahexa va'erã áy jahexa-tama. Upe-ma ramo ae Nhandejáry Tupã ojapo-ta entéro gwembiaporã gwive. Yma gwembiaporã onhongatu araka'e. Upéi gweminhongatu araka'e omombe'u oikwaa ukave kave hagwã onhe'ẽ-py omombe'u va'ety kwéry-pe. Gwembigwaa ukakwe upe gwembigwái kwéry-pe áy katu ojapo-ta Nhandejáry Tupã, he'i.

⁸Upe onhe'ẽ va'e xe-vy yváy-gwi onhe'ẽ jevy xe-vy. Áy onhe'ẽ-vy he'i:

—Ekwa katu eipe'a ipo-gwi opo-py ogwereco va'e kwatia ohapype'a hereko-vy va'e. Upe Nhandejáry rembigwái omoĩ va'e petei opy ygwasu hypyete va'e ári ha petei yvy-py upe va'e-gwi eipe'a ohapype'a ogwereco va'e kwatia, he'i.

⁹Aha upe Nhandejáry rembigwái renda-py. Ajerure íxupe kwatia-rehe ha ome'ẽ xe-vy. Ome'ẽ jave he'i xe-vy:

—Eipyhy eraha eremokõ hagwã ko kwatia nhe'ẽ. Nde rye-py iro arã ko kwatia eremokõ rire. Nde juru-py ae katu ei ryapi-rami voi arã, he'i.*

¹⁰Aipo ramo aha-ma katu aipyhy ipo-gwi upe kwatia nhe'ẽ. Aipyhy rire amoĩ xe juru-py ha amokõ. Xe juru-py ei ryapi-rami voi. Xe ryepy-py iro voi.* ¹¹Upe-ma ramo he'i xe-vy okwa-vy:

—Tekotevẽ eremombe'u hetave Tupã Nhandejáry nhe'ẽ eremotenonde hagwã heta eta oikove va'e-rehe. Ojehu va'erã rekorã eremombe'u mbe'u hagwã tenonderã. Entéro kente kwéry ambue mbue opa rupigwa-rehe gwive. Gwetã gwetã rupigwa-rehe gwive, nhe'ẽ ambue mbue-py onhe'ẽ va'e-rehe gwive ave, mburuvixagwasu kwéry-rehe ave tekotevẽ eremombe'u mba'éixa pa ogwereco-ta Nhandejáry íxupe kwéry, he'i xe-vy okwa-vy.

11

Mokõi Nhandejáry nhe'ẽ mombe'uha rehegwa nhe'ẽ

¹Upe rire katu ome'ẽ-ma xe-vy petei yvyra ramigwa. Upe yvyra jaikwaahaty óga mbovy pa ipukukwe ha mbovy pa ipekwe ave. Upéa ome'ẽ ramo he'i xe-vy:

* 10:5-7 Dn 12.7 * 10:9 Ez 2.8-9 * 10:10 Ez 3.1-3

—Ekwa katu tereipapa upe Nhandejáry-pe omboete haty pukukwe. Ha nhemboete haty ave. Upe-py kwimba'e omboete va'e ave eipapa kuri.* ² Upe Nhandejáry-pe omboete haty-py hoka ani kuri ereipapa. Oĩ ae arã opyrũ va'erã upe-py ojerovia e'ỹ va'e Nhandejáry-rehe. Opyrũ arã imoingoasy-vy tetã marangatu-rehe quarenta e dois jasy peve.* ³ Amondo-ta mokõi xe nhe'ẽ mombe'uharã yvypóry kwéry oikwa hagwã gwekojevavykwe. Xe remimondo onhemonde va'erã ovy'are'ỹ va'e ao-py, “Nhandejáry ndovy'ái voi ra'e xe-rehe, xe rembiapo vaikwe-rehe ra'e” he'i hagwã hexaháry. Xe nhe'ẽ-py onhemonhe'ẽ va'erã yvypóry kente kwéry-pe. Mbohapy ro'y seis jasy peve omombe'u va'erã xe rehegwa nhe'ẽ, he'i Nhandejáry-gwi onhe'ẽ va'e.

⁴ Upe mokõi va'e-rehe Nhandejáry he'i, “Mokõi oliveira rakã ramigwa” “Mokõi tataendy'y ramigwa ave” he'i hese. Tupã Nhandejáry yvy Járy tee va'e rovagwy-py onhembo'y-ma oĩ-vy upe mokõi inhe'ẽ mombe'uha. Ha'e kwéry omombe'u-ta inhe'ẽ mbohapy ro'y seis jasy peve.* ⁵ Ha ndaikatúiry avave ombohasa asy íxupe kwéry. Ombohasa asyse ramo jepe ha'e kwéry ojehepy va'erã. Ijuru ryepy-gwi osẽ arã tata ramigwa omohundi hagwã hese ija'e'ỹ va'e kwéry-pe. Upéixa voi omano va'erã hese ojapo vaise va'e.

⁶ Nhandejáry oipytygwõ arã íxupe kwéry, omombaraete va'erã íxupe kwéry. Omombe'u mbe'u jave Nhandejáry nhe'ẽ, ipu'aka va'erã ama-rehe. Oipota ramo, ndokýi va'erã. He'i ramo y-gwi oikopa hagwã tugwy ramo oiko ave va'erã tugwy ramo. Ombohasa asyse ramo yvypóry, ombohasa asy ave va'erã opaixagwa mba'e rasy-py.*

⁷ Nhe'ẽ mombe'uha omombe'upa-ma ramo katu peteĩ mymba vaigwasu ete rekoporuha ojeupi arã vykwarusu ijapy e'ỹ va'e-gwi. Ha onhorairõ arã upe mokõi Nhandejáry nhe'ẽ omombe'u va'ekwe ndive. Ipu'aka va'erã hese kwéry. Ojuka va'erã upe mokõi Nhandejáry nhe'ẽ mombe'uhare-pe.* ⁸ Ojuka rire hetekwe opyta rei arã tape-rehe, jegwata haty-rupi rei ho'a arã oĩ-vy. Hetekwe opyta ave arã upe tetã-my Nhandejáry Hesu Cristo rete ojehupi hagwe-py. Sodoma tetã mygwa hekoha vai va'e-rami, Egito tetã mygwa hekoha vai va'e-rami ave upe tetã mygwa ave hekoha vai okwa-vy.* ⁹ Entéro yvypóry gwive entéro ijypye pye va'e gwive, entéro nhe'ẽ ambue mbue-py onhe'ẽ va'e gwive, opa opa kente ambue mbue kwéry gwive ohexa katu arã upe mokõigwa retekwe-pe. Upe-py oĩ arã hetekwe haimete irundy áry peve. Hetekwe katu ndojatýi arã enterove ohexa hagwã. ¹⁰ Upe va'e, upe mokõi va'e omano rire entéro yvypóry ovy'apagwasu-ma va'erã hikwái. Ovy'a ete rei-gwi gwemime'ẽ me'ẽ ome'ẽ arã okwa-vy ojóupe. “Nanhane mbohasa asyvéi-ma upe mokõigwa nhe'ẽ mombe'uhatykwe. Hí'are eterei voi nhane mbohasa asy asy va'ekwe. Nanhane mbohasa asyvéi-ma va'erã” he'i-gwi hese ovy'a eterei arã hikwái. ¹¹ Tupã Nhandejáry ae omoingove jevy íxupe kwéry, mokõigwa-pe. Ohasa rire mbohapy áry larose jevy-ma ramo peteĩ yvytugwasu ou oipeju upe mokõigwa retekwe-pe. Oipeju ramo upe mokõi va'e omano ete-ma va'ekwe opu'ã jevy-ma. Enterove ohexa. Ohexa-ma ramo opu'ã jevy hexaháry onhemondýipa hexa-vy hikwái.* ¹² Upe omano va'ekwe opu'ã rire, ohendu yváy gwigwa onhe'ẽ va'e ojéupe:

—Aipo ramo pejeupi katu, he'i íxupe, mokõigwa-pe.

Upe jave oma'ẽ hese okwa-vy. Oma'ẽ jave upe mokõigwa gwete reheve voi ojeupi-ma oho-vy yváy-py. Araigwasu pa'ũ-my ojereroyvate-ma oho-vy upe mokõigwa. Hese ija'e'ỹ va'ekwe jepe ohexa-ma ave iho ramo.* ¹³ Upe jave yvy oryrýi-ma. Heta eterei óga okuipa upe tetã-my. Yvy oryrýi-gwi heta óga oity. Omopéhégwe hégwepa voi heity-vy. Décima parte oity. Heta voi omano upe pygwa. Sete mil omano yvy oryrýi eterei-gwi. Omano e'ỹ va'ekwe okyhyje paete-gwi omboete joa Nhandejáry-pe. He'i:

—Nde tuvixa Tupã yváy pygwa, he'i joa hikwái omboete-vy íxupe.*

* 11:1 Ez 40.3 * 11:2 Lc 21.24 * 11:4 Zc 4.3,11-14 * 11:6 1 Rs 17.1; Éx 7.17-19 * 11:7 Dn 7.3,21; Ap 13.5-7; 17.8 * 11:8 Is 1.9-10 * 11:11 Ez 37.10 * 11:12 2 Rs 2.11 * 11:13 Ap 16.18

¹⁴ Mokōi yvypóry momytu'e'ỹha ohasa-ma. Ndopái vyteri joty mba'e rasy yvypóry kwéry-pe. Oĩve joty peteĩ oporomomytu'e'ỹha pya'e ojehu va'erā.

Ombopu gwemimbygwasu Nhandejáry rembigwái yváy pygwa va'e seteha

¹⁵ Ombopu-ma ramo gwemimbygwasu Nhandejáry rembigwái yváy pygwa va'e seteha, oĩ yváy-py onhe'ẽ hatā atā va'e. Oiko va'erā-rehe omombe'u hikwái:

—Áy Nhandejáry Tupā oiko-ma yvypóry ruvixa ramo yvy-rehe. Ha'e oiko-ma mburuvixa ramo Cristo ndive. Ha'e oiko-ta mburuvixagwasu opa e'ỹ reheve, he'i Nhandejáry rembigwái onhe'ẽ hatā-vy oiko va'erā-rehe.*

¹⁶ Upe jave upe vinte e quatro mburuvixa Nhandejáry renonde-py ogwapy okwa-vy va'e ojesya mboja joa yvy-rehe okwa-vy omboete eterei-vy Nhandejáry-pe.

¹⁷ He'i omboete-vy íxupe:

—Nde Tupā ore Járy voi nde.

Nde pu'aka tee va'e voi nde entéro mba'e-rehe.

Orotima tima nde-vy.

Yma va'ekwe nde.

Ko'ánga ete peve nde ha'e joty.

Ko'ánga katu eremoĩ-ma opamba'e nde pogwy-py.

Eregwahẽ-ma katu áy enterová ruvixarā.

Erenhemoburuvixagwasu ete hagwe-rehe

orotima voi nde-vy,

he'i omboete joa-vy íxupe.

¹⁸ —Áy ogwahẽ-ma nde áry erereko asy hagwā

enterová-pe hekoha vaikwe-rehe.

Upéa-rehe entéro tetā tetā mygwa kwéry ima'andupa hikwái.

Áy ogwahẽ-ma nde áry ereme'ẽ hagwā hembiapokwe-rehe

gwĩ omano va'ekwe gwive hekorā.

Áy ereme'ẽ-ta hembiapokwe repy

Ne rembigwái ramo oiko va'ekwe

Ne nhe'ẽ-py omombe'u va'ety kwéry-pe

Entéro nde re'yí kwéry-pe gwive,

Nde-rehe ojerovia va'e-pe gwive,

entéro ne mboetehare-pe gwive,

gwĩ mburuvixa va'e-pe gwive,

ha gwĩ heko mirĩve va'e-pe ave

ereme'ẽ-ta hekokwe repy.

Áy katu eremomba arā katu

gwĩ yvypóry kwéry-pe gweko vai-rupi oity uka va'ekwe-pe,

he'i hikwái Nhandejáry-pe omboete-vy.**

¹⁹ Upéi ojepe'a yváy-py oĩ va'e Nhandejáry-pe omboete haty rokẽ. Ikoty tee-py ojehexa hyru. Nhandejáry nhe'ẽ mokõi ita-rehe oĩ va'e ryrú upe va'e. Ymagware nhane moingokwaa Nhandejáry irurā regegwa nhe'ẽ ryrú, “arca do acordo” héry va'e. Ojehexa jave overa vera voi osunu hatā-ma, hyapu atā atā voi oĩ-vy. Yvy katu oryrýi ha amandaugwasu ave ho'a-ma hese.*

12

Hexapyrā ojekwaa kunha, tejujagwagwasu ave regegwa nhe'ẽ

¹⁻² Upéi ojekwaa jevy áry-rehe hexapyrā. Ogwerojahe'o kunha omemby rasy aigwe etereiha-rami. Upe kunha opyrū jepe jasy-rehe. Ipy gwy-py opyta jasy. Ijegwaka ramo

* 11:15 Dn 7.14,27 * 11:18 Sl 115.13 * 11:18 Ap 4.8-11; 5.9-14; 7.9-12; 19.1-4 * 11:19 Ap 8.5; 16.18

oĩ doze jasytata. Kwarahy rendy-py onhemonde. Imemby rasy aigwe rei-ma ramo ogwerojahe'o.**

³Upéi ojekwaa jevy áry-rehe ambue hexapyrã jevy. Osẽ ave áry-rehe tejujagwagwasu pytã va'e. Inharõ va'e voi upe tejujagwagwasu. Inhakã jojapa rei va'e voi upe va'e. Sete akã ogwereco va'e. Peteĩ teĩ oakã-rehe ogwereco ojegwaka. Heta ave upe va'e hatĩ. Dez voi hatĩ.* ⁴Gwugwái-py oity yváy-gwi jasytata ko vvy-rehe. Mbohapy hapya jasytata ombotyryry heity-vy. Upe kunha hyegwasu va'e oĩ upe-py. Tejujagwagwasu katu ho'use-ma imemby-pe. Ho'use-gwi oho-ma oha'arõ kunha imemby pota va'e-pe imemby-ma ramo ho'u-ma hagwã mo'ã imemby.*

⁵Upéi oiko-ma imemby kunumi. Upe kunha memby katu oiko arã entéro va'e vvy-póry ruvixarã. Opo-py ogwereco va'erã mburuvixagwasu tee mba'e hierro-gwi ijapopyre enterove oikwaa hagwã ipogwy-py oiko arã entéro kente kwéry hemimbota e'ỹ avave ndojapói hagwã. Ha oiko hagwe-py ndopytái joty upe mitã. Nhandejáry ogwerojeupi joty íxupe heraha-vy ombogwapy hagwã imoĩ-vy íxupe ondive oapykagwasu ári oypy-py.*

⁶Nhandejáry Tupã omoĩ-ma voi upe kunha-pe kipy mapo oho hagwã opyta. Ha'e oho upe tekwaty e'ỹ-koty pono avave ohexa íxupe. Upe-py Nhandejáry onhangareko arã hese mbohapy ro'y seis jasy peve.

⁷⁻⁹Upéi katu oiko nhorairõgwasu yváy-py. Heta heta Nhandejáry rembigwaikwe onhembohuvixa va'ekwe tejujagwagwasu-rehe. Ha ha'e kwéry onhorairõ joa okwa-vy Nhandejáry rembigwái tee kwéry ndive. Nhandejáry rembigwái ruvixa, héry va'e Miguel onhorairõ ave upe tejujagwagwasu ndive. Onhemombaraeteseve mo'ã tejujagwagwasu hembigwái kwéry ndive Nhandejáry rembigwái tee kwéry-rehe. Ha ipu'akase mo'ã ramo jepe ndaipu'akáiry Nhandejáry rembigwái tee-rehe. Ndokwa porãvéi-ma hikwái Miguel-gwi. Nhandejáry rembigwái kwéry-gwi ave. Upéa-rehe Nhandejáry oity íxupe kwéry omondo-vy vvy-py. Tejujagwagwasu-pe, inhirũ kwéry ndive oitypa-ma vvy-py imondo-vy. Tejujagwagwasu he'i anhaygwasu-rehe. Satanás he'i ave hese. Hese joty mbói he'i ave. Upe mbói rekoporuha yma va'ekwe Eva amyrĩ-pe ombojejavy va'ekwe. Áy peve nhande kwéry-pe nhane mbotavyha voi nhane mbojejavy-vy upe va'e. Upéa-rehe onhorairõ onhemombaraeteseve mo'ã hagwe-rehe Nhandejáry oity íxupe kwéry. Anhaygwasu hembigwái kwéry ndive oity yváy-gwi. Oitypa-ma vvy-py imondo-vy. Ndaikatuvéi opyta yváy-py hikwái. Nhandejáry katu oitypa-ma íxupe kwéry vvy-py imondo-vy.**

¹⁰Upéi katu ahendu jevy yváy-gwi onhe'ẽ va'e. He'i:

—Áy katu Nhandejáry nhande rexakwaa rei-tama. Ou-ma Nhandejáry nhane resende-harã. Nhandejáry Tupã ohexa uka-ma ipu'akaha oiko hagwã nhande ruvixarã. Áy Hesu Cristo ta'ýry peteĩmi oiko-ma mburuvixa ramo, ogwereco-tama opamba'e opogwy-py, he'i. —Áy nhane mombe'u vai vaihaty ndoikovéi-ma yváy-py, he'i. —Nhande re'ýi kwéry omombe'u vaise va'ety Nhandejáry renonde-py oiko va'ekwe. Áy katu ndoikovéi-ma upe-py. Onhe'ẽ rei rei va'ekwe hese kwéry áry gwive pyhare peve omoĩ vaise rei va'ekwe íxupe kwéry Nhandejáry-pe. Áy katu ndoikovéi-ma yváy-py. Nhandejáry oity-ma imondo-vy anhaygwasu-pe vvy-py.*

¹¹—Upe nhande re'ýi kwéry vvy-rehe oiko ramo va'ekwe onhembopu'aka va'ekwe hese. Ojerovia tee-gwi Ovexa Ra'y ramigwa va'e-rehe ndojeréi joty íxugwi. Peteĩ teĩ omoherakwã porã ave hesegwa nhe'ẽ. Ohasa asy asy jepe peteĩ teĩ nahakate'ýi joty va'ekwe gwekove-rehe. “Hesu omano va'ekwe ovexa ra'y-rami gwugwy apyte-py nhane resende hagwã” omombe'u porã porã reheve peteĩ teĩ onhembopu'aka anhaygwasu-rehe. Ohasa asy va'ekwe jepe omano peve va'ekwe Hesu reroviaha ipu'akave joty anhaygwasu-gwi. Ndojeréi joty va'ekwe Hesu-gwi. ¹²Upéa-rehe pevy'a katu peẽ peiko va'e yváy-py. Peẽ vvy-póry kwéry ae katu pevy'are'e'ỹ va'erã. Anhaygwasu ogwejy-magwi kuri vvy-py,

* 12:1-2 Gn 37.9 * 12:1-2 Mq 4.10 * 12:3 Dn 7.7 * 12:4 Dn 8.10 * 12:5 Is 66.7; Sl 2.9 * 12:7-9 Dn 10.13,21; 12.1 * 12:7-9 Gn 3.1-6; Lc 10.18 * 12:10 Jó 1.9-11; Zc 3.1

ygwasu-py ave. Peë peime ha-py ogwejy. Áy opoxyha-rupi ogwereco-ta yvypóry kwéry-pe, ygwasu pygwa-pe ave. Ha'e oikwaa-ma voi gwenonderá. Ndoiko puku mo'ávéi-ma. Upe va'e-rehe áy ha'e ipoxy eterei-ma, he'i omombe'u-vy xe-vy.

¹³ Anhaygwasu oho-ma ramo yvy-rehe oho upe kunha imemby kunumi va'ekwe rapykwéri ombohasa asy hagwã mo'ã íxupe. Tejujagwagwasu rekoporu-vy oho hapykwéri. ¹⁴ Nhandejáry ae ohekokwaa jevy upe kunha-pe. Ombopepo íxupe oveve hagwã tagwatogwasu-rami oho-vy tekwaty e'ÿ-my. Upe-py katu onhenhangareko-ta hese mbohapy ro'y seis jasy peve pono mbói rekoporuha ohexa íxupe.* ¹⁵ Anhaygwasu katu ogwereco asyse mo'ã upe kunha-pe. Mbói ramo ojehexa uka jave ojuru ryepy-gwi jepe ogwenohê y osyry va'e ramigwa ogwerosyry hagwã mo'ã upe kunha-pe. ¹⁶ Ha ndogwerosyry ukáiry joty. Onhemboyykwa y oho hagwã ha'e-py pono ogwahê kunha-pe. ¹⁷ Nдохupitýi-ma ramo anhaygwasu kunha-pe ipoxy rei voi opyta-vy hese. Nдохupitýi-gwi íxupe oho ombohasa asy hagwã upe kunha re'ÿi kwéry-pe. Gwí ojerovia va'e Nhandejáry-rehe, hemimombe'u ukakwe ojapo gwive anhete ha-py ojerovia va'e Hesu-rehe, hemimombe'ukwe-rupi oiko meme va'e-pe ombohasa asy hagwã oho. ¹⁸ Upéa-gwi tejujagwagwasu rekoporuha onhembo'y rei oha'arõ oí-vy ygwasu rembe'y-py.

13

Ojehexa uka mymba vaigwasu ohekoporu va'e

¹ Upe jave ahexa ojehexa uka ygwasu-gwi ojeupi ou-vy peteí mymba vaigwasu ete ohekoporu ou va'e. Oakã reta reheve gwatí reta reheve ojehexa uka-ma ou-vy. Sete inhakã, dez hatí ave ogwereco. Peteí teí gwatí rakwa apy-rehe ogwereco jegwaka. Dez ogwereco jegwaka ogwereco peteí teí gwatí-rehe. Enterove rembiexarã ohai héry kwéry peteí teí syva kwéry-rehe. Héry kwéry omõ Nhandejáry-rehe he'i vaiha.* ² Ojehexa uka upe va'e ta'yrãvasu ipini va'e-rami. Ipokwe urso po-rami. Ipykwe ave urso py-rami ave. Aipo ramo ijuru katu tuvixa jagwaxaygwasu juru-rami. Tejujagwagwasu rekopuru va'e katu ome'ê íxupe opu'akakwe oiko hagwã mburuvixa ramo. Ogwapy hagwã ijapykakwe-py omanda hagwã heta va'e-rehe.*

³ Ahexa ave peteí onhakã kytí va'ekwe, “Hasy ete ramo ndokweravéi-tama” he'i mo'ã upe hasy va'e-rehe. Ijukapyrãgwe voi áy okwera jevy-ma ngatu. Entéro hexaháry katu opondera ndera hese oho-vy hupive. ⁴ Entéro omboete upe tejujagwagwasu rekoporuha-pe, ome'ê-ma kuri ipu'akakwe mburuvixagwasurã-pe. Upéa-rehe omboete íxupe hikwái. Omboete ave upe mymba vaigwasu ete rekoporuha-pe osê va'ekwe ygwasu-gwi. He'i omboete-vy:

—Ndaipóri ha'eixagwa imbaraeteve va'e, he'i rei omboete-vy íxupe. —Ndaipóri hese ipu'aka va'erã, he'i rei imboete-vy hikwái.

⁵ Aipo ramo tejujagwagwasu ome'ê mymba vaigwasu ete-pe opy'agwasu. Ombotuvixa ete íxupe onhe'ê vai vai hagwã Nhandejáry-rehe. Ombopu'aka ave íxupe oiko hagwã mburuvixagwasu ramo mbohapy ro'y seis jasy peve. ⁶ Oiko-ma kuri mburuvixagwasu ramo onhe'ê vai vai hagwã Nhandejáry-rehe, henda marangatu-rehe ave, entéro Nhandejáry-rehe ojerovia va'e gwive-rehe.*

⁷ He'i ave pe mymba vaigwasu ete-pe onhemomburuvixa hagwã entéro yvypóry kwéry-rehe. Hesu reroviaha kwéry gwive ipogwy-py jevy opyta hagwã. Ha Hesu reroviaha kwéry-pe orairõ va'erã voi ha ipu'aka ave arã hese kwéry. Enterove yvy ári oiko va'e gwive oiko arã ipogwy-py. Opa opa kente ambue mbue kwéry gwive, entéro ijyppe pye va'e gwive, nhe'ê ambue mbue-py onhe'ê va'e kwéry gwive, opa opa-rupi yvy oho va'e rupigwa kwéry gwive oiko arã ipogwy-py.* ⁸ Omomba'egwasu arã íxupe okwa-vy hikwái. Gwoko járy ramo ogwereco va'erã íxupe hikwái. Héry kwéry ndoikói joty Ovexa Ra'y ramigwa va'e kwatia nhe'ê-rehe. Ko yvy oiko e'ÿ mboyyve nonhemoïry va'ekwe kwatia-rehe héry

* 12:14 Dn 7.25; 12.7 * 13:1 Dn 7.17; Ap 17.3,7-12 * 13:2 Dn 7.4-6; Os 13.7-8 * 13:6 Dn 7.8,25; 11.36 * 13:7 Dn 7.21

kwéry. Entéro hekove tee ijapyre'ÿ reheve va'e réry oiko upe kwatia-rehe. Ha upe mymba vaigwasu ete-pe omboete va'e kwéry réry ndoikói voi upe kwatia-rehe.*

⁹ Ne aranduse va'e, ejeapysaka katu ko xe nhe'ê-rehe: ¹⁰ Oĩ preso omoĩ hagwã-py ojereraha va'erã. Nhandejáry oipotaha-rami ave ogweraha va'erã íxupe. Oĩ kyse puku-py omano va'erã. Nhandejáry oipotaha-rami ave ojuka va'erã íxupe. Upéa oikwaa-rehe Nhandejáry reroviaha ohasa asy ete jepe tekotevê ojesaupi meme gwekojáry-rehe anho mate onhembopy'agwasu hagwã ojerovia tee hagwã hese.* ¹¹ Upe rire katu ojehexa uka-ma ovexa-rami ou va'e, mokõi hatĩ va'e, yvygwy-gwi osê va'e. Tejuzagwagwasu-rami inhe'ê. ¹² Mymba vaigwasu ete rekoporuha ombopu'aka íxupe imbaraeete hagwã ave ome'ê íxupe. Hovagwy-py oiporu upe ipu'aka hagwe ombohessa rerova uka hagwã mymba vaigwasu-rehe yvypóry kwéry-pe onhembotuvixa uka hagwã enterovéa-pe. Upe mymba vaigwasu ete ojekutu va'ekwe omano-tama voi va'ekwe, upe ramo okwera jevy-ma. “Tupã Nhandejáry voi ra'e ipu'aka tee voi” he'i hagwã mo'ã hese oporombotavy-vy rei. Omomba'egwasu omomba'e tee hagwã íxupe. ¹³ Ojapo japo tembiexapyrã. Enterove rembiexarã-rupi ombogwey jepe tata yvate áry tee-gwi ho'a hagwã vvy ári he'i hagwã hese hexaha kwéry, “Ipu'akave va'e voi nipo ra'e” he'i hagwã hikwái mymba vaigwasu ete-rehe. ¹⁴ Upéixa ojapo-ma ramo ombotavy voi yvypóry kwéry-pe omboete hagwã mymba vaigwasu ete ojehexa uka ranhe va'ekwe-pe. Mymba vaigwasu ete renonde-py ojapo meme mba'e hexapyrã opondera ndera hagwã hese hexaha kwéry. Ombotavy tavy rei voi oho-vy omombe'u ave enterove yvypóry-pe ojapo hagwã hemimboete ra'anga upe ojehexa uka va'ekwe ra'anga upe kyse puku-py ojekutu va'ekwe omano-tama oĩ-vy va'ekwe ha okwera jevy va'ekwe ra'anga. Ha upéixa oipota ojapo hagwã hikwái yvypóry kwéry. ¹⁵ Ipu'akaha-rupi joty omoingo upe ta'anga. Ome'ê íxupe hekoverã ave. Omonhe'ê uka ave ta'anga-pe. He'i hagwã: “Kiva'e po naxemboetéi va'e gwive omanomba va'erã” he'i onhe'ê-vy ta'anga. Ome'ê ave íxupe ojuka uka hagwã ójehe omboete e'ÿ va'e kwéry-pe. ¹⁶ Upe rire katu he'i enterove va'e-pe omoĩ hagwã ojehexa uka hagwã, “Xe ko mymba vaigwasu ete mboete teeha voi ko xe” he'i hagwã ójehe. Omoĩ arã osyva-rehe. Nomoĩry ramo osyva-rehe, opo akatúa apyape ári omoĩ va'erã. Enterove-pe omoĩ uka. He'i heko tuvixa va'e kwéry omoĩ hagwã, heko mirĩ va'e kwéry gwive omoĩ hagwã, imba'e reta reta va'e kwéry gwive omoĩ hagwã, iporiahu va'e kwéry gwive, ojejokwái va'e kwéry gwive, ojejokwái e'ÿ va'e kwéry gwive omoĩ hagwã ójehe kwéry. ¹⁷ Upe oikwaa ukaha ndaipóri hese va'e ndaikatúu mba'eve ojogwa. Ndaikatúu ave ojogwa gwemi'urã. Ndaikatúu oheka omba'apo hagwã. Ndaikatúu ave ovende mba'eve avave-pe. Ha oikwaa ukaha onhemoĩ hese va'e katu, ojapo gwembiaporã. Upe oikwaa ukaha mymba vaigwasu ete réry omoĩ hese. Nomoĩry ramo héry, ha'e ae inúmero omoĩ hese. ¹⁸ “Inúmero rei” he'i mo'ã arã hexaháry upe mymba vaigwasu ete kwaa ukaha-rehe. Inharandu porã va'e mante oikwaa porã arã mbava'e pa he'ise upe número réry rehegwa. Upéa número he'i kwimba'e réry-rehe. Seiscentos e sessenta e seis voi inúmero, mymba vaigwasu ete rekoporuha número voi.

14

Mborahéi pyahu oha'ã joa okwa-vy Nhandejáry remiresendekwe

¹ Áy katu ojehexa uka-ma Ovexa Ra'y ramigwa tee va'e gwugwy avyte-py omano va'ekwe. Ojehexa uka onhembopy oĩ-vy ramo vvyatyrusu Sião héry va'e ári. Upe-py oĩ hendive heta heta va'e. Cento e quarenta e quatro mil oĩ hendive upe-py. Hendive oĩ va'e ogwereco joa osyva-rehe kwéry Hesu Cristo réry, Nhandejáry Tupã Hesu Cristo Ru réry ave ogwereco joa osyva-rehe hikwái.* ² Ha yváy-gwi ahendu ave anheĩ-rami voi ygwasu vérami voi hyapu apu. Hatã hatã osunu ave. Hyapu voi oporahéi joa va'e nhe'ê. Ombopu joa okwa-vy isã reta reta va'e vérami inhe'ê ryapu. ³ Upéi heta eta oporahéi va'e

* 13:8 Sl 69.28 * 13:10 Jr 15.2 * 14:1 Ez 9.4; Ap 7.4; Ez 9.4; Hb 12.22; Ap 5.6; 7.4

Nhandejáry rembiporavokwe va'e oĩ Nhandejáry mburuvixagwasu gwapy haty renonde-py. Irundy Nhandejáry apyka jere-rehe oiko va'ety renonde-py, vinte e quatro mburuvixa renonde-py ave onhembo'y oĩ-vy hikwái. Mborahéi pyahu oha'ã joa okwa-vy Nhandejáry mboete-vy. Ha'e kwéry mante oikwaa upe mborahéi pyahu. Ha outro kwéry ndoikwaáiry voi. Ha'e kwéry Nhandejáry-rehe ojerovia va'ekwe. Ogwerova va'ekwe gwekoha. Upe rire katu oiko marangatu va'ekwe Nhandejáry ndive. Nhandejáry oresende va'ekwe íxupe kwéry yvypóry pa'ũ-gwi.* ⁴Ha'e kwéry karia'y omenda e'ỹ va'e onhemongy'a rei e'ỹ va'e voi. Upéixa ete Nhandejáry-pe voi oiko tekoha-rupi. Omoirũ meme va'ekwe Ovexa Ra'y ramigwa va'e-pe. Mamo oho ha-py, hendive voi oho meme. Nhandejáry oiporavo voi va'ekwe yvypóry apyte-gwi onhypyrũ hagwã ojeúpe gwarã, ãy oho Nhandejáry re'yirã, Ovexa Ra'y ramigwa va'e re'yirã ave. ⁵Heko porã meme va'e voi ha'e kwéry. Ijapu e'ỹ va'e voi ha'e kwéry. Ojevavy e'ỹ va'e voi ha'e kwéry. Ipy'a potĩ tee va'e voi ha'e kwéry. Ha'e kwéry mante voi oporahéi okwa-vy Nhandejáry-pe imboete-vy mborahéi pyahu oha'ã joa okwa-vy.*

Nhandejáry rembigwái yváy pygwa irundy va'e remimombe'ukwe

⁶Upéi ahexa yváy mbyte-py Nhandejáry rembigwái ambue va'e. Ha'e omombe'u-ma Nhandejáry nhe'ẽ opa e'ỹ va'erã Hesu Cristo rehegwa nhe'ẽ porã. Ahexa yváy mbyte-rehe oveve jave onhe'ẽ va'e. Entéro yvypóry kwéry ohendu hagwã opa opa-rupi vvy oho va'e rupigwa gwive, opa opa kente ambue mbue kwéry rehegwa gwive, entéro nhe'ẽ ambue mbue-py onhe'ẽ va'e ramo jepe, entéro ijyppe pye va'e gwive ohendu hagwã. ⁷Hatã hatã voi onhe'ẽ he'i-vy:

—Pejerovia tee katu Nhandejáry Tupã-rehe, he'i. —Ha pemomba'egwasu tee katu íxupe. Tuvixagwasu tee va'e voi ha'e. ãy katu hi'óra ogwahẽ-ma entéro yvypóry-pe ogwereco hagwã hembiaapo apokwe-rehe. Pemboete tee katu vvy, yváy ave apohare-pe. Ojapo va'e ygwasu entéro yvu ysẽha gwive. Pemboete tee katu íxupe, he'i onhe'ẽ hatã-vy.

⁸Upe rire ou jevy mokõiha Nhandejáry rembigwái yváy pygwa omombe'u-vy:

—Tekohagwe voi Babilõnia tetãgwasukwe. Tekohagwe voi. Uva rykwere gwapixa-pe ho'u ukaha-rami ha'e omonga'u vérami va'ekwe tetã tetã rupigwa kwéry-pe heko vai-rupi ave oiko hagwã hikwái, he'i Nhandejáry rembigwái omombe'u-vy.*

⁹⁻¹⁰Upe rire ou jevy mbohapyha Nhandejáry rembigwái onhe'ẽ ngatã ngatã reheve omombe'u-vy yvypóry kwéry-pe:

—Upe mymba vaigwasu ete va'e-pe omboete va'e gwive ohasa asy eterei va'erã. Ha'anga-pe omboete va'e gwive, héry omoĩ uka va'ekwe osyva-rehe gwive, héry omoĩ uka va'ekwe opoapy ape ári va'e gwive ohasa asy eterei va'erã. Nhandejáry ogwereco asy asy va'erã íxupe kwéry hekoha vaikwe-rehe. Marány upeixagwa ne'irã vyterĩ omoingo omondo va'erã íxupe kwéry. Onhembosako'i va'ekwe oity va'erã hese kwéry ogwereco asy asy-vy. Tata ita omboykupa reheve-py ombohasa asy va'erã upe mymbagwasu ivai ete va'e mboetehare-pe. Uva rykwere naimohe'ẽ pyrériy vérami iro va'erã íxupe kwéry hekoha. Ndohexakwaa mo'ávêi íxupe kwéry Nhandejáry. Ovexa Ra'y ramigwa va'e rovagwy-py, hembigwái heko marangatu kwéry rovagwy-py ave ohasa asy ete arã voi okwa-vy.* ¹¹Upe tatati oporombosaha asy va'e-gwi meme katu ojeupi arã. Upe-py ndoikói arã py'agwapy. Áry ramo pyhare ramo ave ndopytu'úi va'erã. Entéro mymba vaigwasu ete ha'anga ave omboetehare, hesegwa héry ogwereco va'ekwe gwive ohasa asy va'erã upe-py opa e'ỹ reheve.*

¹²Upéa oikwaa-ma ramo Hesu reroviaha kwéry tonhembopy'a mbaraete uka va'erã katu Nhandejáry Hesu Cristo-pe ojehexa kwaa hagwã ojerovia teeha hese. Ojapo meme hagwã hemimombe'ukwe.

¹³—Áy rire ae katu hetave ojuka arã Hesu reroviaha kwéry-pe. Upéixa ramo jepe ovy'a joty va'erã hikwái. Ehai katu upéa nde kwatia-rehe, he'i xe-vy yváy-gwi onhe'ẽ va'e.

* 14:3 Ap 19.4-7 * 14:5 Sf 3.13 * 14:8 Is 21.9; Ap 18.2 * 14:9-10 Is 51.17; Gn 19.24 * 14:11 Is 34.10

Upéi ahendu ave Nhandejáry Nhe'ê Marangatu tee va'e he'i:

—Anhete tee voi upe va'e nhe'ê. Ha'e kwéry opytu'u arã omba'apoha-gwi. Heko porã hagwe-rehe Nhandejáry ogwereco porãve arã íxupe kwéry yváy-py, he'i Nhandejáry Nhe'ê Marangatu tee va'e omombe'u-vy xe-vy.

Ombopapa va'erãha áry rehegwa nhe'ê

¹⁴Upéi ama'ê jevy ha ojehexa uka xe-vy arai morotigwasu ári ogwapy oĩ-vy peteĩ va'e kwimba'e. Nhande Ryke'y tee va'e voi nipo ra'e. Ogwapy ramo oĩ-vy ojegwaka ouro-gwi ijapopyre reheve. Opo-py temitygwe kytihaty haimbe va'e voi ogwereco.* ¹⁵Upe rire katu peteĩ Nhandejáry rembigwái va'e osê Nhandejáry rendaty-gwi. Onhe'ê ngatã arai morotigwasu ári ogwapy oĩ-vy va'e-pe. He'i-vy:

—Áy katu ogwahẽ-ma hi'óra ereipe'a hagwã temitygwe, he'i omondo onhe'ê íxupe. —Áy ae ereiporu-tama ne mba'e kytihaty yvy-rehe temitygwe ereipe'a hagwã, he'i íxupe onhe'ê-vy.*

¹⁶Upe-ma ramo onhepyrũ-ma oipe'a temitygwe upe ogwapy oĩ-vy va'ekwe arai morotigwasu va'e ári. Onhepyrũ-ma oipo'o-vy. Ha onhenhngatu ha-py ogwerahapa-ma. Upéixa ete voi ave ombojogweroaty va'erã ojúepe Nhandejáry entéro yvypóry kwéry-pe hembiapokwe pokwe-rehe ogwereco-vy.

¹⁷Upe rire joty ojehexa uka xe-vy Nhandejáry rendaty yváy-py oĩ va'e. Íxugwi osê ramo Nhandejáry rembigwái ahexa jevy-ma. Ha'e ave ogwereco omba'e kytihaty opo-py. ¹⁸Nhemboete haty rata-rehe onhangareko va'e osê ave gwenda-gwi. Onhe'ê ngatã-vy omba'e kytihaty ogwereco va'e-pe he'i hagwã:

—Eikytĩ katu uva hi'a inhapesã va'e hi'ajupa-ma kuri, he'i. Uva rehegwa-rami he'i íxupe.

¹⁹Upe-ma ramo Nhandejáry rembigwái onhepyrũ omba'apo. Onhepyrũ oikytĩ-vy uva inhapesã-gwi. Oity-ma ngatu mba'e ryrugwasu-py ohumbiri hagwã uva inhami-vy. Upéixa ete uva rykwe ohumbiriha-rami Nhandejáry ogwereco asy va'erã hekoha vaikwe-rehe.

²⁰Ha mba'e ryrugwasu-py ohumbiri uva rykwere onhami hagwã. Upe mba'e ryrugwasu onhemoĩ va'ekwe tetã roka-py. Hykwere osê va'e-rami tugwy osê íxugwi. Heta eterei voi osyry oho-vy tugwy. Nhandejáry rerovia e'ýha va'e kwéry rugwy katu ohumbiri onhami hagwe-gwi mombyry voi osyry. Osyry heta heta-ma voi oho-vy. Tugwy rei hygwasu-ma. Hypyve pyve oho-vy. Kavaju rendyvagwy peve ogwahẽ hypyve pyve oho-vy. Trezentos quilómetro peve tugwy osyry oho-vy. Mombyry voi tugwy osyry oho-vy.*

15

Nhandejáry pu'akaha heko porãha-rehe ave omboete voi íxupe yváy-py oime va'e kwéry

¹Áy katu ojekwaa-ma hexapyrã áry-rehe. Ojehexa uka-ma oiko va'erã nhane mongyhy-jeharã voi ombou va'erã. Nhandejáry oiporavo sete gwembigwái kwéry pa'ũ-gwi ombou hagwã ko yvy-py marány kwéry ombohassa asy voi hagwã yvypóry kwéry-pe.

²Xe-vy anhei-rami ygwasu hesakã va'e espéko ramigwa ave. Ijavyte-rupi katu oĩ tata endy endy ramigwa. Upe-py oĩ ipu'aka va'ekwe pe mymba vaigwasu ete va'e-rehe. Ha'anga rei imboetepyrãgwe nomboetéi va'ekwe. Nomoĩ ukái va'ekwe ojehe inúmero. Upe número mymba vaigwasu ete réry voi. Omano peve jepe nonheme'ê ukái joty va'ekwe upe número-pe. Número omoĩ hagwã hese nome'êi va'ekwe gwete. Onhemopyatã uka Nhandejáry Hesu-pe. Ha ko'áy katu ojehexa uka-vy onhembo'y okwa-vy ygwasu hesakã va'e espéko ramigwa va'e rembe'y-rehe. Ombopu ave okwa-vy Nhandejáry Tupã ome'ê va'ekwe íxupe kwéry mba'epu isã reta va'e. Ombopu joa hikwái. ³Oporahéi joa ave okwa-vy omboete hagwã Nhandejáry-pe. Nhane ramoigwasu Moisés mborahéi oporahéi okwa-vy hembigwái. Ovexa Ra'y ramigwa va'e mborahéi oha'ã joa okwa-vy.

Nde, nde tuvixa voi va'e

* 14:14 Dn 7.13 * 14:15 Jl 3.13 * 14:20 Is 63.3; Ap 19.15

Nde ore Járy voi va'e
 he'i oporahéi joa okwa-vy.
 Nde nde pu'aka tee voi nde.
 Entéro mba'e erejapo va'e voi nde.
 Iporã porã voi avave voi
 ndojapokwaáiry nde erejapoha-rami.
 Nde erejevavy e'y va'e,
 Nde rekoha porã ete va'e voi nde.
 Anhete voi nde.
 Anhete teegwa voi ave nde.
 Entéro yvypóry opa opa-rupi
 yvy oho va'e-rupi va'e ruvixa va'e voi nde.*
 †Ndaipóri va'erã ne momba'egwasu e'y va'e, ore Járy.
 Noiry arã ombotuvixa e'y va'e nde réry.
 Ne anho ete voi ne marangatu tee va'e.
 Enterove tetã tetã mygwa kwéry gwive
 ne mboete arã nde-vy anho mante.
 Ne rembiapo porã porã
 entéro va'e-pe ojehexa uka-gwi,
 ne mboete arã.
 Nde réry ohendu ramo
 imandu'a porã arã nde-rehe ne mboete hagwã,
 he'i oporahéi joa okwa-vy.*

⁵Upe rire katu ahexa-ma onhokëndavo ramo yváy pygwa oĩ va'e rokẽ. Ikoty tee teepy voi oĩ koty imarangatu ete va'e, Nhandejáry renda tee voi va'e. ⁶Ha ahexa ramo osẽ osẽ hikwái oje'ói-vy Nhandejáry rendaty-gwi, ikoty marangatu ete-gwi sete hembigwái yvypóry-pe ombohasa asyharã. Inhemondeha katu omimbipa va'e, morotĩ porã voi va'e. Ndaipóri hese iky'a va'e. Ku'akwaha ramigwa ouro-gwi ijapopyre ogwereco opyti'a-rehe hikwái. ⁷Osẽ-tama hikwái oje'ói-vy ramo upe sete Nhandejáry rembigwái peteĩ va'e ome'ẽ íxupe kwéry imba'e ryrurã ouro-gwi ijapopyre. Peteĩ va'e osẽ upe irundy Nhandejáry apyka jere-rehe oiko va'ety pa'ũ-gwi osẽ ome'ẽ hagwã setegwa-pe imba'e ryrurã. Imba'e ryruru omohynyhẽmba marány-py ogwereco asy hagwã Nhandejáry hekoha vaikwe-rehe. Ha'e oiko opa e'y reheve. ⁸Ohexa uka gweko pu'akaha omba'egwasu porãha ave tatatĩ-rami. Upe tatatĩ ramigwa, hembipe reheve ojohupa Nhandejáry rendaty-py. Upéixagwi ndikatúiry avave oike upe-py. Are-ma ndikatúí oike. Nhandejáry rembigwái sete va'e ombohasa asyharã yvypóry kwéry-pe ojaopapa e'y mboyye gwembiaporã avave voi ndikatúí oike upe-py.*

16

Mba'e ryruru pygwa sete marány rehegwa nhe'ẽ

¹Nhandejáry rembigwái sete va'e kwéry-pe ombou hatã voi onhe'ẽ íxupe kwéry Nhandejáry rendaty-gwi. Ahendu onhe'ẽ ramo:

—Tapeho penhohẽ sete peve mba'e ryruru pygwa yvy ári. Peity marány Nhandejáry ombohasa asy hagwã hekoha vaikwe-rehe, he'i íxupe kwéry ombou-vy onhe'ẽ.

²Aipo ramo peteĩ onhypyryũ va'e osẽ oho-vy onhohẽ yvypóry kwéry-rehe teko rasy. Entéro ójehe kwéry onhemoĩ uka va'ekwe gwive mymba vaigwasu ete ikwaa ukaha gwive, entéro mboete va'ekwe gwive ha'anga-pe, mymba vaigwasu ete va'e ra'anga-pe ave ijaipa ete-ma ipire. Hasy eterei-gwi oiko asypa-ma hikwái. Upéixa peteĩ mba'e ryruru-gwi onhohẽmba uka-ma Nhandejáry omarány ombohasa asy-vy hekoha vaikwe-rehe.

* 15:3 Êx 15.1 * 15:4 Jr 10.7; Sl 86.9 * 15:8 1 Rs 8.10-11; 2 Cr 5.13-14; Is 6.4

³ Upe rire mokõihha Nhandejáry rembigwái yváy pygwa omarány onhohê ygwasu-rehe. Marány oity-ma ramo ygwasu-rehe y-gwi rei oiko-ma tugwy. Kente omano va'ekwe rugwy-rami oiko-ma voi y. Hugwy-ma ramo y, omanomba ete y gwy-rupi okwa va'e gwive. Upéixa ambue mba'e ryrü-gwi ogwereco asy uka-ma Nhandejáry marány ogweroma'eandu-vy hekoha vaikwe.

⁴ Upe rire mbohapyha Nhandejáry rembigwái yváy pygwa omarány onhohê entéro ysyry-rehe entéro y ovuvu rei va'e-rehe gwive hugwypa hagwā y. ⁵ Upe óra-py onhe'ê va'e yváy-gwi ahendu entéro y kwéry-rehe onhangareko va'e he'i ramo Nhandejáry-pe:

—Nde ae nde reko porā va'e. Nde ae nde reko marangatu tee va'e. Nde ae erereko arā anhete ha-py yvypóry hembiapokwe-rehe. Yma gwive āy ete peve nde voi. ⁶ Ha'e kwéry ojuka va'ekwe ne nhe'ê-py omombe'u va'etykwe-pe. Heta heta nde-rehe ojerovia va'e-pe ojuka ave. Āy katu upéixa-gwi erereko asy-ma íxupe kwéry hembiapokwe-rami jevy. Ijy'uhéi va'e tugwy mate ojohu va'erā ho'y'u mo'ā hagwā. Oiko asy-ma ave arā ha'e kwéry, he'i y kwéry-rehe onhangareko va'e Nhandejáry rembigwái imboete-vy.

⁷ Upéi ambue va'e nhemboete haty-gwi onheandu uka onhe'ê va'e. Upe-gwi ombou onhe'ê xe remiendu ramo he'i va'e:

—Nde ae Tupā ore Járy, nde tuvixa vixa ete va'e nde. Nde pu'aka tee va'e voi nde. Nde ae heko porā tee va'e. Nde erehekojohu kwaa voi hembiape vaikwe-rehe. Nde ae erekwaa erembohasa asy hagwā hembiape vaikwe-rehe yvypóry kwéry-pe. Anhete ha-py voi ne rembiapo, he'i imboete-vy.

Upéixa ambue mba'e ryrü-gwi onhohēmba uka-ma Nhandejáry marány ombohasa asy-vy hekoha vaikwe-rehe.

⁸⁻⁹ Upe rire irundyha Nhandejáry rembigwái yváy pygwa omarány onhohê kwarahy-rehe. Omoĩ-ma ramo marány kwarahy-rehe haku eterei-ma kwarahy. Tata piragwái-py ohapy entéro yvypóry-pe. Kwarahy rata-py enterove okáipa. Ohasa asy-ma jepe hikwái onhe'ê vai vai joty Nhandejáry-rehe hikwái. Ndogwerovái joty gwekoha omboete hagwā íxupe. Ipu'aka marány kwéry-rehe oikwaa teĩ jepe nombotuvixamba'éiry joty íxupe.

Upéixa ambue mba'e ryrü-gwi onhohēmba uka-ma Nhandejáry marány ogwereco asy hekoha vaikwe.

¹⁰ Upe rire cinchoha Nhandejáry rembigwái yváy pygwa oity omarány mymba vaigwasu ete va'e gwapy haty-rehe. Upe marány ohupity joty entéro omandaha gwive. Inhypyntumba-ma. Íxupe omboete va'e gwive ohasa asy asy upe jave hikwái. Mba'e rasy rendu-vy ojesu'u su'upa hikwái. ¹¹ Mba'e rasy rendu-vy onhe'ê vaipa-ma Nhandejáry-rehe. Ha ijai aipa va'e onhe'ê rei-ma ave hese. Ndogwerovái joty gwekoha vaikwe, noséséi joty tape vai-gwi. Tape ky'a-rupi joty oje'oise hikwái.

Upéixa ambue mba'e ryrü-gwi onhohēmba uka-ma Nhandejáry marány ogwereco asy-vy hekoha vaikwe.

¹² Upe rire katu seisha Nhandejáry rembigwái yváy pygwa oity omarány ysyrygwasu Eufrates héry va'e-rehe. Oity marány ramo y katu hypa-ma. Y hypa rire ombohape porā hagwā mburuvixagwasu kwéry ou va'erā kwarahy resê ha-gwi gwembigwái kwéry ndive. Ykwe-rupi ohasa va'erā hikwái oje'ói-vy ohovaitĩ hagwā oa'e'ýha kwéry-pe.

¹³⁻¹⁴ Upe-ma ramo ahexa ju'i ramo oho anháy mbohapy. Peteĩ osê oho-vy tejujagwagwasu juru ryepy-gwi. Peteĩ jevy osê oho-vy mymba vaigwasu ete va'e juru ryepy-gwi. Peteĩ jevy osê oho-vy hesegwa nhe'ê mombe'uhaty juru ryepy-gwi. Ju'i ramo meme osê oho-vy anháy ijuru ryepy kwéry-gwi. Hexapyrā ojapo va'e meme. Upe va'e-ma oporobotavyha rei voi-ma. Upe mbohapy va'e anháy rembiporu oho arā entéro mburuvixa oĩ va'e gwive yvy-rehe omboaty aty hagwā imonhorairō uka-vy. Nhandejáry Tupā ipu'aka tee va'e áry-py onhorairō irō va'erā.

¹⁵ —Tapejeapysaka porā katu ko xe nhe'ê-rehe, he'i Hesu nhande-vy. —Avave ndoikwaái mba'e áry-py pa aju arā. Imonda va'e-rami avave ndoikwaái aju hagwā óra, he'i. —Ovy'a

va'erã ojehe onhangareko va'e. Oao-py onhemondeha-rami voi gweko porã reheve xe ra'arõ va'e pono opi-vy oiko va'e-rami otĩ enterove va'e pa'ũ-my, he'i.*

¹⁶Upe rire katu omboaty-ma okwa-vy mburuvixa kwéry-pe onhorairõ hagwã. Hebreu nhe'ẽ-py ombohéry upe onhorairõ hagwã Armagedom.

Upéixa ambue mba'e rryu-gwi onhohẽmba uka-ma Nhandejáry marány ogwereco asy-vy hekoha vaikwe.

¹⁷Áy katu seteha-ma voi Nhandejáry rembigwái yváy pygwa ombou omarány. Onhohẽ omarány yvytu-rehe. Upe jave Nhandejáry rendaty-gwi ahendu jevy onhe'ẽ ramo. Ijapykagwasu yke-rehe oĩ va'e ombou onhe'ẽ he'i-vy:

—Tembiapo aporã gwive opa-ma. Ojejapopa-ma, he'i.

¹⁸Upe ho'e-vy oiko overa va'e ara sunu hyapu va'e, yvy katu osũsũ-ma. Nhandejáry omoingo kwimba'e gwive áy peve ndoikói koixagwa ivai vaive va'e yvy osũsũ vai ete. ¹⁹Upe tetãgwasu gwive omboja'o ja'o mbohapy tavarãxa omboja'o ja'o ipa'ũ-my. Entéro va'e yvy ári oĩ va'e gwive tetã tetã-rupi óy hapovy-ma okyta ovapy-py ho'apa-ma hóy kwéry. Tetã tetã gwive onhembyaipa-ma. Upe jave Nhandejáry ndoheja reíry Babilônia tetãgwasu. Yma nombhasa asyĩ ramo jepe, ipaha-py ombou-ma íxupe maranygwasu imbohasa asy ete-vy. ²⁰Heta heta yvy okanhy-ma yvy ryríy hatã eterei-gwi. Opa okanhy y ogweroajere va'e, yvyatygwasu gwive okanhymba. Ndojehexavéi-ma. ²¹Yváy-gwi Nhandejáry ombou amandaugwasu ho'a hagwã kwimba'e kwéry-rehe. Amandaugwasu polyikwe ogwereco va'e quarenta kilo voi. Upéa-gwi gwĩ kente kwéry onhe'ẽ vai vai voi Nhandejáry-rehe ombou-ma ramo marány amandaugwasu reheve íxupe kwéry. Maranygwasu vai eterei-gwi ombopoxy íxupe kwéry Nhandejáry-rehe.

Upéixa mba'e rryrupaha-gwi onhohẽmba uka-ma Nhandejáry marány ogwereco asy hekoha vaikwe.

17

Tetã kunha ikwimba'ese va'e-rami rehegwa nhe'ẽ

¹²Sapy'a katu arova ramo xe resa ahexa jevy sete marány rryrukwe rekoha. Ama'ẽ jave peteĩ ou onhopa'ũ-gwi he'i xe-vy:

—Eju katu xe rupive. Tahexa uka nde-vy kunha ikwimba'ese va'e ramigwa heko vai va'e, he'i xe-vy. —Nhandejáry ombohasa asy-ta upe tetã mygwa ysyry kwéry rembe'y-py okwa va'e kwéry-pe. Kunha ikwimba'ese va'e-rami upe tetã mygwa kwéry ojáry e'y rapykwéri oje'ói hikwái. Tupã tee e'y va'e-pe ogwereco gweko járy ramo hikwái. Heko vai-rupi okwa va'e teko ky'a-py oiko va'e hendive. Entéro mburuvixa kwéry yvy ári oĩ va'e gwive oipe'a íxugwi gweko vairã. Ha yvypóry kwéry-pe ogweroaka'u vai vai vérami voi hikwái. Ivai vaive voi hekoha kwéry, he'i.

³Upéi katu Nhandejáry Nhe'ẽ Marangatu tee va'e xe mo'arandu-vy tekваты kwaty e'y-rupi xe reraha hagwã hembigwái. Upe-py ahexa ogwapy oĩ-vy kunha mymba vaigwasu ete ári. Mymba pytã ári ogwapy. Oĩ nhe'ẽ vai vai ojehai va'e upe mymba rete-rehe Nhandejáry-rehe onhe'ẽ vai vai hagwã. Upe mymba vaigwasu ete va'e ogwereco sete voi inhakã, dez voi hatĩ jojapa va'e ave.

⁴Upe kunha katu onhemonde voi ao pytã-my va'e voi. Oaoa-rehe ombojegwa jegwapa voi ouro-py. Ita kyra hendy hendy va'e pérola, hepy meme va'e-py ave ombojegwa jegwapa oao onhemonde-vy. Ha opo-py ogwereco oipyhy-vy mba'e rryru ouro-gwi ijapopyre. Ipy'a-py hynyhẽ-ma voi ipy'a ky'a vaikwe. Upe mba'e vai ha'e voi oakã-gwi rei ojapose-gwi oiko gweko vai-rupi gweko tĩ e'y reheve. Ipy'a ky'aha rexa ukaha vérami omohynyhẽmba-ma hereko-vy omba'e rryru. ⁵Osyva-rehe ogwereco ojehai va'ekwe avave ndoikwaáry mba'e pa he'ise upe va'e: “Tetãgwasu Babilônia kunha ikwimba'ese va'e kwéry ruvixa oĩ va'e upe va'e. Heko tĩ e'y va'e ruvixa voi” he'i ojehai va'ekwe upe kunha syva-rehe. ⁶Upe-py ahexa upe kunha ogwerohory-vy. Gwĩ oka'u va'e ogwerohory hory eterei voi kánha-pe ho'useve seve-gwi vérami upe kunha ogwerohory Nhandejáry

*

reroviaha kwéry ojuka juka va'ekwe rexa-vy. Gwĩ Nhandejáry Hesu-rehe ojerovia tee va'ekwéry-pe ojuka juka-rehe onhemonga'useve seve vérami oho-vy upe kunha.

Ahexa ramo upe kunha oka'u va'ety voi ra'e ha xe py'a onhemondýi-ma voi. ⁷ Ha Nhandejáry rembigwái he'i xe-vy:

—Ani erenhemondýi eterei teĩ, he'i xe-vy. —Amombe'u-ta nde-vy mba'e pa he'ise upe kunha erehexa va'ekwe-rehe. Ha henda ave heta hatĩ va'e inhakã reta va'e ave he'ise va'e amombe'u-tama ave nde-vy, he'i.

⁸—Upe mymba vaigwasu ete va'e oiko va'ekwe. Ko'ánga ae ndoikovéi-ma. Upéi ae katu osê jevy va'erã vvykwarusu ijapyre'ỹ va'e-gwi oiko jevy hagwã. Upe rire ae katu omokanhy ete va'erã íxupe. Gwĩ héry oĩ e'ỹ va'e yváy pygwa kwatia-rehe onhemondyipa arã. Yma ko vvy oiko e'ỹ mbove Nhandejáry nomoĩry héry kwéry tekove ijapyre'ỹ reheve oiko hagwã réry pa'ũ-my. Ha ãy onhemondyipa hikwái mymba vaigwasu ete va'e rexa-vy. Ohexa ramo upe oiko va'e, ko'ánga ndoikovéi-ma, upéi ojekwaa jevy joty ramo, onhemondyipa voi va'erã íxugwi hikwái. ⁹Upe va'e-rehe inharandu porã voi va'e mante oikwaa porã arã. Upe sete inhakã he'ise sete vvyatyrusu kunha gwapy hatygue. He'ise ave sete mburuvixa. ¹⁰Cinco osê sê va'ekwe-ma. Áy peteĩ mante omanda va'e. Ambue va'e ne'írá vyteri oiko mburuvixa ramo. Oiko-ma ramo ndahi'are mo'ái joty opyta omanda hagwã.

¹¹—Ha upe mymba vaigwasu ete oikove va'ekwe ha ãy ndoikovéi va'e-ma, oiko va'erã mburuvixa ramo. Upe sete mburuvixakwe-gwi ha'e tuvixave voi va'erã. Ha íxupe ave omokanhy ete va'erã. ¹²Upe dez hatĩ erehexa va'ekwe katu dez mburuvixagwasurã-rehe ha'e ohexaukase. Ne'írá vyteri mburuvixa oiko ramo. Peteĩ óra oiko arã mburuvixa ramo upe mymba vaigwasu ete va'e ndive. ¹³Peteĩxa ogwerojoja va'erã onhe'ẽ. Peteĩxa ome'ẽ va'erã opu'akaha upe mymba vaigwasu ete va'e-pe ipu'akave hagwã. ¹⁴Onhorairõ arã Ovexa Ra'y ramigwa va'e ndive. Ha'e ae katu ipu'akave va'erã hese kwéry. Ha'e Nhandejáry tee-gwi ha'e mburuvixa ruvixagwasu voi ha'e. Entéro mba'e járy-gwi ha'e mba'e jaryve voi va'e ha'e. Ha'e ae ipu'aka arã voi hese kwéry. Gwembipe'akwe onhondive gwarã ojehesa rerova e'ỹ reheve ojerovia tee hese va'e kwéry ndive ha'e ipu'aka va'erã hese kwéry.

¹⁵He'i ave xe-vy Nhandejáry rembigwái:

—Erehexa kuri y tuvixa osyry va'e. Upe pygwa tetã kunha ikwimba'ese va'e ramigwa ave erehexa-ma kuri. Upe y tuvixa osyry va'e he'ise vvyppóry kwéry-rehe. Opa opa-rupí vvy oho va'e rupigwa kwéry gwive entéro ijyppe pye va'e kwéry gwive, opa opa kente ambue mbue kwéry gwive, entéro nhe'ẽ ambue mbue-py onhe'ẽ va'e kwéry gwive he'ise upe ysryrgwasu.

¹⁶—Upe dez hatĩ va'e-rami voi erehexa kuri mburuvixa kwéry, mymba vaigwasu ete ave va'e ojere arã upe kunha ikwimba'ese va'e ramigwa-gwi. Ndaija'evéi arã hese. Ha'e kwéry oipe'a paete arã íxugwi ogwereco va'e gwive. Mba'eve ndohejái arã íxupe. Ha'enho oiko arã. Opi-vy oheja arã íxupe. Ho'u arã ho'okwe ha hemybyre ohapypa va'erã. ¹⁷Nhandejáry voi omoĩ ipy'apy-py kwéry ojapo hagwã hese ojapose va'e peteĩxa oiko hagwã okwa-vy ome'ẽ hagwã ave opu'akawe upe mymba vaigwasu ete-pe mburuvixa ramo oiko va'e-pe. Nhandejáry omombe'u hagwe-rami oiko peve ojapo.

¹⁸—Upe kunha ikwimba'ese va'e erehexa kuri he'ise upe tetãgwasu-rehe. Upe tetãgwasu ipu'akave voi. Mburuvixagwasu kwéry ko vvy ári oĩ va'e gwive oiko ipogwy-py.

18

Babilônia tetãgwasukwe tekohagwe rehegwa nhe'ẽ

¹Upe mba'e oikopa rire ojehexa uka xe-vy ogwejy ramo yváy-gwi ipu'aka va'e Nhandejáry rembigwái. Hembipepa-ma voi igwejy ramo vvy-rehe. Ohesapepa voi vvy-rehe. ²Osapukái etei imombe'u-vy:

—Tekohagwe voi Babilônia tetãgwasukwe, he'i, —tekohagwe voi. Upe-py okwa va'e gwive omokanhymba-ma. Áy anhaygwasu kwéry mante okwa upe-py. Áy entéro anháy

ivaive ive va'e mba'e ovale e'y va'e mante okwa upe-py. Āy gwyrwa kwéry katu ivai vai va'e mate oī upe-py. ³Yma oiko vyteri ramo upe pygwa kwéry kente meme ogwereco kuri kente ambue kwéry, tetā tetā rupigwa kwéry-pe gweko ky'aha-rupi. Ndoikoséi ramo teī jepe omoingo joty va'ekwe gweko ky'aha-rupi íxupe kwéry. Ogweroka'u vai vai vérami voi hikwái. Ivaive ive voi hekoha kwéry. Entéro mburuvixagwasu kwéry yvy arigwa teko vai-py oiko voi hendive. Íxugwi oi'pe'a gweko vairā. Omba'e vende va'ety kwéry ovy'a paete voi araka'e upe tetā-my. Upe pygwa kwéry ojogwa jogwa voi araka'e omba'erā ojohu hagwā gwekoha vairā. Ha upe tekoha vai rexa ukaha vendeha araka'e hepykwe kwéry-rehe oganave nave voi okwa-vy, he'i.

⁴Upe nhe'ē omombe'u rire ambue va'e onhe'ē ramo ahendu-ma yváy-gwi:

—Xe re'yí kwéry, entéro xe-rehe ojerovia va'e gwive, ani kuri pepyta teī upe tetā-my. Pesēmba katu kuri upe-gwi. Ani katu peipe'a teī íxugwi kwéry heko vaiha pono peē ave pehasa asy hendive, he'i onhe'ē ombou va'e yváy-gwi.

⁵—Opaixagwa ojapo vai eterei upe pygwa kwéry. Nombohasa asy pya'ei ramo jepe Nhandejáry, ndikatuvéi-ma oheja rei teko avy hagwe-rehe. ⁶Āy hekokwe-rami joty pereko kuri íxupe kwéry. Pembohasa asy tee katu íxupe kwéry. Hembiapokwe-rami joty pejapo kuri hese. Heta ojapo vai va'ekwe pende-rehe. Āy hembiapokwe-gwi hetave pejapo kuri hese kwéry. Ombojehe'a araka'e gwekoha vaikwe y-rehe vérami ho'u va'erā-rehe ave. Ogwerova voi gwekoha vaikwe gwapixa kwéry-rehe. Upéixa pejapo ave kuri hese. Hetave pejapo ave hese. Pembojehe'a ave vérami íxupe kwéry hekoharā kwéry ohasa asy tee hagwā hekoha vaikwe-rehe, he'i.

⁷—Yma ovy'a va'ekwe oiko-vy hikwái. Ha'e oiko porā porā vérami mo'ā va'ekwe, oao porā porā omonde va'ekwe. Āy katu pembovy'are'y-ma íxupe kwéry. Pembohasa asy íxupe kwéry ipy'a vy'are'y hagwā. Yma ha'e he'i rei ójehe onhembotuvixa-vy: “Ore mburuvixagwasu-rami voi ore oroiko. Omanda va'e apyka ári orogwapy voi oroí-vy” he'i rei voi araka'e ójehe hikwái. “Tembirekokwe vérami, imytu'e'y va'e vérami ndoroikói voi ore. Ore-vy ndoikóiry voi ore remimboasy” he'i onhemboete rei-vy araka'e hikwái. ⁸Upéa-rehe voi peteí áry-py ogwahē arā íxupe marány. Heta heta mba'e rasy oiporu va'erā. Onhemboasy joa va'erā hikwái. Ivare'agwasupa voi va'erā hikwái. Ohapypa joty va'erā upe tetā. Nhandejáry ipu'aka tee va'e ae ogwereco asy arā upe tetā mygwa kwéry-pe hembiaopi vaikwe-rehe, he'i onhe'ē ombou va'e yváy-gwi.

⁹Yma va'ekwe entéro mburuvixagwasu gwive yvy arigwa omomorā morā hekoha ipy'a jerure rure hese va'e gwive teko vai-rupi oiko. Ha'e-rami joty heko vai va'e ave omboasy arā íxupe. Ogwerosapukái va'erā ogweroivy'are'y-vy ave ohexa ramo opu'ā tatatí íxugwi okái jave. ¹⁰Mombyry-gwi rei hesayvuku arā hese okyhyje-gwi mba'e rasy ha'e ohasa va'e-gwi. Upéixa-gwi he'i okwa-vy:

—Marány ho'a-ma tetágwasu Babilônia-rehe. Sapy'a ete-py ho'a ipu'aka va'ekwe-rehe. Ojehu va'ekwe rapypa-vy voi ombou kuri Nhandejáry marány ombohasa asy-vy íxupe kwéry.

¹¹Enterove mombyrygwa ogwerojahe'o voi marány ohexa-ma ho'a-ma ramo hese kwéry. Omba'e vende va'ety kwéry ave ogwerojahe'o. Omboasy rei mate okwa-vy.

—Ndojogwavéi-ma va'erā nhandéhegwi Babilônia pygwa kwéry, he'i. —Naxe pirapirevéi-ma, he'i-ma. ¹²—Avave ndojogwavéi-ma va'erā omba'e porārā onhembojegwa jegwa va'erā mo'ā mba'eve hepy va'e ouro-gwi ijapopyre, prata-gwi ijapopyre, ita rendy rendy ita kyra rendy va'e pérola-gwi ijapopyre ave ndojejogwavéi-ma va'erā xéhegwi. Āy katu nonhembojegwa porávéi-ma va'erā hikwái. Ndojejogwavéi-ma va'erā xéhegwi ao porā porā avendese eterei va'e, he'i. —Hepyye pyve va'e ooarā gwí ipo hyverapa va'e, gwí pytā porā va'e, gwí isyimba rei va'e, gwí hagwegwasu pytā va'e ave ao ndojejogwavéi-ma va'erā xéhegwi, ho'e-vy ojahe'o.

Yvyra kwéry hyakwā porā-gwi hepy va'e ave novende mo'ávéi-ma. Yvyra ajuy ave novende mo'ávéi-ma. Ha entéro mba'e porā ojejapo va'ekwe marfim-gwi, yvyra hepy va'e-gwi, bronze-gwi, hierro-gwi, ita morotí mármore-gwi iporāve ráve-gwi hepy tee va'e

novende mo'ávéei-ma Babilônia pygwakwe-pe. Ovende-ta mo'ã rire katu ndovy'avéei-ma hikwái. ¹³ He porã va'e ajuy mombyry gwigwa, opaixagwa hyakwã porã porã va'e ave novende mo'ávéei-ma hikwái upe-py.

Ndojogwavéei-ma va'erã avave íxugwi kwéry uva rykwere ijapopyre. Ndojogwavéei-ma va'erã ave nhandy íxugwi. Ndojogwavéei-ma va'erã trigo ku'i, trigo iku'i e'ý va'e ave íxugwi. Ndojogwavéei-ma va'erã íxugwi vaka, ovexa ave, kavaju kwéry ha imba'e ryrú ave. Ndojogwavéei-ma va'erã ave kente gwembigwa mbigwairã.

¹⁴ Mba'e vende va'ety kwéry he'i yvy kái rexa-vy:

—Entéro mba'e nde py'a jerure hese va'ekwe ãy katu opa-ma. Ne mba'e reta reta va'ekwe yma. ãy katu nane mba'e retavéei-ma. Ne mba'e rakate'ý hagwã ãy katu opa-ma ndéhegwi. Ndaiporivéei-ma. Ndererekovéi-ma mba'eve. Nenhembohory hagwe opa rei ndéhegwi, he'i.

¹⁵ Yma va'ekwe mba'e vende vende va'ety kwéry ojohu upe-py omba'e jogwa va'erã íxugwi kwéry. ãy okyhyje-vy hikwái. ãy katu omanha sayvuku rei okwa-vy. Ndohasa asyséi mo'ã indive hikwái. Upéixa-gwi onhemboasy joa rei hikwái. Ogwerosapukái joa hikwái ho'e-vy upe tetã-rehe:

¹⁶—Ou-ma katu maranygwasu pe tetã-my. Tetãgwasu porã va'ekwe upe va'e. Upe pygwa kwéry ijao kwéry ojegwapa va'ekwe. Onhemonde va'ekwe ao iporã va'e-py. Ojegwa va'e ijegwaha ouro-gwi ijapopyre-py. Ita kyra pérola-py imbojegwa jegwapyre. ¹⁷ Sapy'a ete-gwi ndogwerekovéi-ma omba'e reta iporã va'ekwe, he'i onhemboasy joa-vy okwa-vy.

Entéro kente y-rupi ogwata va'e mba'e ryrú pygwa onhemomombyry hikwái. Mba'e ryrú rerekwa kwéry, hembigwái kwéry gwive, hemimbogwataha kwéry gwive, mba'e ryrú moatyrôhaty kwéry gwive, ogwata rei va'e kwéry gwive onhemomombyry joa hikwái. Hesayvuku vuku rei hikwái mombyry-gwi rei. ¹⁸ Yvy kái rexa-vy ramo ohexa-ma ramo tatati opu'ã íxugwi onhemboasy-vy ogwerosapukái hikwái.

—Ne'írá vyteri oiko a-ramigwa tuvixa va'e tetã opamba'e rei jogwa jogwahaty, he'i hikwái onhemboasy joa-vy.

¹⁹ Omombo oakã-rehe onhemboasy rexa uka-vy yvy ku'i omombo ójehe ovy'are'ý-vy onhemboasy eterei-vy hikwái. Ojaha'o osapukái ohapirô-vy. He'i ndovy'ái-gwi:

—Kanoagwasu járy kwéry oiko porã va'ekwe omba'e ovende jave upe tetã-my oí va'e kwéry-pe, he'i omboasy joa-vy hikwái imandu'a ndu'a omba'e vende vendehatygwe-rehe. —Onhemomorãse rei-gwi ojogwa heta va'ekwe hikwái. Sapy'a ete-py ndojogwavéei-ma va'erã. Nhandejáry ombou-ma kuri marány ijukapaharã kwéry. Ndoikovéei-ma voi kuri upe tetã-my. Peteí óra-py ndoikovéei-ma, he'i ohexa-vy onhemboasy joa-vy hikwái.

²⁰—Peẽ ae, yváy-py peiko va'e gwive, pevy'a katu. Entéro Nhandejáry remimondo kwéry ha inhe'ẽ-py omombe'u va'etykwe ave Nhandejáry-rehe ojerovia va'e gwive pevy'a katu. Nhandejáry tee ogwereco-ma íxupe kwéry hembiapokwe-rehe. Hembiaipo vai meme va'ekwe peẽ-my. ãy katu hembiaipo vai hagwe-rami ogwereco-ma ave íxupe kwéry.

²¹ Upe rire peteí Nhandejáry rembigwái yváy pygwa imbarate va'e oipyhy peteí itagwasu avati soka ramigwa ha omombo-ma ygwasu mbyte-py. Upéi he'i:

—Upe avati soka xe amombo hagwe-rami ave Nhandejáry omombo-ta ave Babilônia tetã mygwa kwéry ndohexavéiry hagwã-py. ²² Upe-py avave nohenduvéi arã ovy'a joa va'e. Nahembýiry ombopu kwaa va'e gwí mba'e ryapu gwyrapasã reko ete. Nonhenduvéi-ma arã ípu ramo flauta, mimbygwasu ave. Avave nombopuvéi-ma va'erã upe-py. Avave nomba'apovéi-ma arã upe tetã-my. Avave nonhembiapovéi-ma va'erã upe-py. Nonhenduvéi-ma va'erã onhembiso va'e. Ndaijyvuvéi-ma va'erã avave upe tetã-my. ²³ Mba'eve nahenduvéi-ma va'erã ave. Nonhenduvéi-ma va'erã ave omenda ramo kunhataí, karia'y ave. Hembiaipo vai-gwi ombotavypa rei va'ekwe entéro tetã tetã rupigwa-pe. Mba'e reta porã hepy ramo jepe ovendepa ete joty va'ekwe íxupe kwéry. Babilônia tetã mygwa ovende kwaa ave. Ambue tetã mygwa ha'e-rami e'ý ovende. Enterovea-gwi hekoha vaive ave hikwái. Upéixa-gwi omobhasa asy-ma Nhandejáry íxupe kwéry. ²⁴ Upe-py Nhandejáry-rehe ojerovia va'e-pe ojuka meme voi va'ekwe. Inhe'ẽ-py

omombe'u va'ety-pe ojuka meme ave va'ekwe. Ha entéro yvypóry kwéry-pe ave. Opa opa tetā tetā rupigwa-pe ave ojuka uka meme voi va'ekwe upe tetā mygwa kwéry. Upéa-rehe Nhandejáry ogwereco asy-ma Babilônia tetā mygwa kwéry-pe, he'i Nhandejáry rembigwái omombe'u-vy.

19

¹Upe rire katu yváy-gwi onhe'ẽ va'e ahendu. Onhemboaty atypa va'e oporahéi joaharami iporahéi ryapu ahendu yváy pygwa kwéry porahéi:

—Tanhamboete katu Nhandejáry-pe.

Nhandejáry ae ogwereco pu'aka oipe'a hagwā kente kwéry-gwi heko vaikwe.

Nhatima katu íxupe.

Ha'e anho imba'egwasu tee va'e.

Ipu'aka ete tee va'e voi Nhandejáry,

he'i oporahéi joa-vy hikwái.

²—Ha'e heko porā tee va'e voi.

Upéixa-gwi anheteha-rupi

ojohu kwaa hembiao vaikwe hese.

Ha'e omondo-ma upe kunha ikwimba'ese va'e veramigwa oiko asy hagwā-py.

Omongy'a va'ekwe vérami yvypóry kwéry-pe gweko ky'akwe-rupi.

Hesu-rehe ojerovia va'ekwe-pe ojuka juka-ma va'ekwe.

Upéa-rehe Nhandejáry Tupā ombohasa asy íxupe kwéry,

he'i oporahéi imboete-vy Nhandejáry-pe hikwái.

³Upéi ha'e kwéry osapukái jevy he'i-vy:

—Tanhamboete katu Nhandejáry-pe. Ohapy tetāgwasukwe. Tatatigwasu opu'á ojereroyvate oho-vy. Ijapyre'ỹ arā upe tatatigwasu, he'i Nhandejáry-pe imboete-vy.

⁴Ha gwí vinte e quatro mburuvixa kwéry, ha irundy Nhandejáry apyka jere-rehe oiko va'ety onhesū Nhandejáry rovagwy-py omomba'egwasu eterei hagwā íxupe. Ogwapy oí-vy oapykagwasu ári. He'i íxupe okwa-vy:

—Ore oromboete va'e voi nde-vy. Orovy'a eterei voi nde-rehe ore, he'i omboete tee-vy íxupe.

Yváy-py oiko-ta vy'agwasu mendaha pygwa-rami

⁵Upéi, apykagwasu-gwi mburuvixagwasu renda-gwi ahendu-ma onhe'ẽ ramo:

—Tapemboete katu Tupā Nhandejáry Tupā tee-pe, he'i onhe'ẽ-vy. —Pemboete katu íxupe peẽ enterove hembigwái kwéry. Peẽ yvypóry kwéry, hese ojerovia va'e gwive pemboete joa ete katu íxupe. Peẽ, huvixa va'e kwéry, peẽ, pende reko mirive va'e kwéry ave pemboete joa ete katu Nhandejáry-pe, he'i onhe'ẽ-vy íxupe kwéry.

⁶Upe jave ahendu hyapu va'e kente heta va'e nhe'ẽ vérami, y onhehẽ va'e vérami oky-tama va'e hyapu va'e vérami voi ahendu. He'i:

—Tanhamboete katu Tupā Nhandejáry-pe. Ha'e anho voi Nhandejáry tee va'e ipu'aka tee va'e nhande-rehe kwéry. Ha'e anho nhande ruvixa. Ha'e anho mante onhemoingo-ma mburuvixagwasu-ramo enterove-rehe.*

⁷Javy'apa katu japarahéi katu imboete-vy. Nhambohory katu íxupe. Nhamomba'egwasu katu íxupe ituvixave-gwi ha'e entéro va'e-gwi. ãy ogwahẽ-ma vy'agwasu ete áry. Oikotama ãy Ovexa Ra'y ramigwa va'e ójehe ojerovia va'e omenda-ta va'e vérami oiko-ta hendive kwéry. Hembirekorā vérami onhembosako'i-ma voi va'ekwe ha'arō-vy hese ojerovia tee va'e kwéry. ⁸Onhemonde-ma ao iporā tee va'e-py omimbi etei va'e-py. Ipotĩ ete va'e-py onhemonde-ma voi katu. Hembireko vérami oiko hagwā indive omoirũ hagwā íxupe. Upe ijao Nhandejáry-rehe ojerovia va'e py'a potĩ hagwe ae upe ijao.

⁹Upe-ma ramo Nhandejáry rembigwái yváy pygwa he'i xe-vy:

* 19:6 Sl 93.1; 97.1; 99.1

—Emoĩ katu kwatia-rehe. Ovy'apagwasu menda ha-py oĩ va'e kwéry. Upéixa Ovexa Ra'ly ramigwa va'e remienioigwe kwéry ovy'apa gwasu va'erã. Hemimongaru kwéry ovy'apagwasu-ma va'erã hikwái, he'i.

Upe-ma ramo he'i jevy:

—Ko va'e Nhandejáry nhe'ẽ tee va'e voi. Anhete tee voi ko nhe'ẽ, he'i.

¹⁰Upe-ma ramo anhesũ-ma amboete hagwã íxupe. Ha'e ae he'i xe-vy:

—Ani katu erenhesũ teĩ xe-vy, he'i. —Nhandejáry-pe ae emboete katu. Xe ko ne irũ tee voi. Entéro Hesu rehegwa nhe'ẽ omombe'u va'e ave irũ voi xe. Ani erenhesũ teĩ xe-vy. Nhandejáry-pe ae katu emboete tee, he'i-ma onhe'ẽ-vy xe-vy. —Entéro Nhandejáry nhe'ẽ-py omombe'u va'ety, entéro Hesu rehegwa nhe'ẽ omombe'u va'e ave Nhandejáry Nhe'ẽ Marangatu tee va'e ae omoarandu-gwi oikwaa anhetegwa va'e omombe'u hagwã, he'i.

Kavaju morotĩ va'e arigwa rehegwa nhe'ẽ

¹¹Upéi ahexa kavaju morotĩ va'e yváy onheha'ýnha jave. Upe kavaju ári oĩ va'e héry, “Anhete Teegwa Voi” “Ha'ete Voi Jeroviaha” ave héry. Mokõi héry ogwereco gwekoha porã tee oikwaa uka hagwã. Gweko marangatu reheve ombohasa asy meme ójehe ija'e'ý va'e kwéry-pe. Gweko marangatu reheve onhorairõ ave ondive onhorairõse va'e ndive. Enterove he'i hagwã hese: “Anhete tee ha-py voi a-rami xe rereko. Gweko jejavy e'ý tee reheve a-rami xe rereko asy” he'i hagwã hese.

¹²Tata rendy-rami voi hesa. Ha okã-rehe ogwereco heta ijegwaka. Avave ndoikwái téry hese ojehai va'ekwe. Gwéry tee ha'e mante oikwaa. ¹³Ijahoja-rehe katu heta oĩ hugwy va'e. Héry voi “Tupã Nhandejáry reko kwaa ukaha”. ¹⁴Heta heta Nhandejáry rembigwái yváy pygwa ao morotĩ ipy hyverapa va'e ipotĩ va'e reheve oho hapykwéri. Kavaju morotĩ kwéry ári oje'ói hikwái. ¹⁵Ha Tupã Nhandejáry reko kwaa ukaha oikwaa uka ojuru-gwi osẽ va'e kysepuku oikyitĩha-rami, onhe'ẽ-py ohundi yvypóry kwéry-pe. Onhemomburuvixagwasu teeha oikwaa uka-vy ogwereco hierrogwasu ijapopyre opopy. Tetã tetã mygwa kwéry-pe, ójehe ojerovia e'ý va'e kwéry-pe gwive ha'e oiko va'erã mburuvixagwasu ramo. Opu'akaha-rupi voi omanda pohýi arã hese kwéry. Nhandejáry ipu'aka tee va'e ovy'a e'ý eterei-gwi ogwereco asy asy va'erã opa opa rupigwa nhande py-py nhahumbiri va'e-rami.* ¹⁶Ijahoja-rehe hetyma-rehe ojehai a-rami: “Mburuvixa Ruvixagwasu jevy ha entéro mba'e járy-gwi ha'e Mba'e Jaryve voi” he'i ojehai-vy hese.

¹⁷Upéi ojehexa uka xe-vy kwarahy rova-rehe onhembo'y oĩ-vy peteĩ Nhandejáry rembigwái yváy pygwa. Onhe'ẽ ngatã-vy entéro gwyrã kwéry-pe:

—Peju penhombovy'agwasu hagwã karugwasu Nhandejáry remimbojehe'a-py.

¹⁸To'okwe-rehe rei penhomboaty. Entéro mburuvixa va'e kwéry ro'okwe-rehe, mburuvixagwasu va'e kwéry ro'okwe-rehe, mburuvixa mirĩ va'e kwéry ro'okwe-rehe, ipu'aka va'e kwéry ro'okwe-rehe ave, kavaju ro'okwe ha ijáry kwéry ro'okwe-rehe ave penhomboaty aty pe'u hagwã. Yvypóry kwéry ro'okwe-rehe ave, heko mirĩ va'e kwéry ro'okwe-rehe ave, onhemboete va'e kwéry ro'okwe-rehe ave, ojejokwái rei va'e ro'okwe-rehe ave, ojejokwái e'ý va'e ro'okwe-rehe ave. Pe'upa mani katu to'okwe okwe, he'i gwyrã kwéry-pe.*

¹⁹Upéi xe ahexa ave onhomboaty aty va'e-pe. Upe mymba vaigwasu ete rekoporuha mburuvixagwasu kwéry yvy ári oĩ va'e gwive gwembigwái kwéry ndive onhomboaty aty onhorairõ hagwã upe kavaju ári oiko va'e ndive, hembigwái kwéry ndive ave. ²⁰Ha nonhorairõi joty hikwái. Mymba vaigwasu ete rekoporuha-pe ae oipyhy omõi-ma íxupe preso. Hesegwa nhe'ẽ mombe'u hatygwe-pe ave oipyhy-ma omõi-ma ave kuri íxupe preso. Yma ha'e hexapyrã-rupi ombotavy tavy yvypóry kwéry-pe omboete hagwã mymba vaigwasu ete rekoporuha-pe onhemonhandejáry-rami, ha'anga-pe ave omboete hagwã, héry omoĩ uka ave va'ekwe ójehe imboete-vy. ãy katu oipyhy-ma upe mokõi ivai ete va'e-pe omõi-ma katu preso kuri ha'e kwéry. Upe mokõi va'e, mymba vaigwasu ete

* 19:15 Sl 115.13 * 19:18 Ez 39.4,17-18

rekoruha, hesegwa nhe'ë momba'uhaty ave hekove reheve rei omombo tatagwasu pa'ũ-my opa e'y reheve ohasa asy hagwã. Ita omboykupa hese reheve okái va'erã ombohasyve hagwã íxupe kwéry. ²¹Ha entéro íxupe omboete va'e kwéry ave omanomba. Kavaju morotí ári oiko va'e ojukapa íxupe kwéry. Ijuru-gwi osê va'e kysepuku oikytiha-rami onhe'ë-py ojuka paete-ma íxupe kwéry. Ha entéro gwira ho'u ho'okwe. Hygwyatã atã voi ho'okwe-rehe. Ombyaju peve ho'u ho'okwe.

20

Mil ro'y rehegwa nhe'ë

¹Upéi ahexa ave peteí Nhandejáry rembigwái ogwejiy ou-vy yváy-gwi. Ogwereco ramo opo-py peteí vykwarusu hugwa e'y va'e rokê mbotyha. Peteí calenagwasu inhapytiha, ipohýi va'e ogwereco ave opo-py. ²Ha oipyhy upe tejujagwagwasu-pe, upe mbói yma va'ekwe kunha ypy Eva-pe ombojejavyhare-pe upe onhembotejujagwagwasu va'e, upe onhemombói va'e anhaygwasu voi. Satanás ave héry va'e voi. Ha ojokwa íxupe herekove vy mil ro'y peve. ³Ha upe-gwi Nhandejáry rembigwái omondo íxupe vykwarusu-py opyta hagwã hugwa e'y va'e-py. Upe rire hatã voi omboty heseve pono osê jevy ponove ombotavy tavy rei yvypóry kwéry-pe. Omboty-ma íxupe upe vykwarusu hugwa e'y va'e-py opa peve mil ro'y. Upe rire katu opa rire mil ro'y anháy osê jevy-ma arã. Upe vykwarusu hugwa e'y va'e-gwi omosê teí ndaha'ái hi'are hagwã.

⁴Pyae voi ahexa jevy apyka rysy. Ha upe apyka rysy-py ogwapy va'e ojohu-tama hekokwe-rehe kente kwéry-pe. Upe-py ahexa ave heta onhaka'õ ete-ma va'ekwe nhe'ë marangatukwe. Anhetegwa Hesu remimombe'ukwe omombe'u eterei va'ekwe. Nhandejáry nhe'ë omombe'u mbe'u ave va'ekwe. Nohenduséi va'e onhaka'õ ete-ma va'ekwe peteí teí-pe íxupe kwéry. Ha'e kwéry nombotéi voi va'ekwe mymba vaigwasu ete rekoruha-pe. Ha'anga-pe ave nombote reíry va'ekwe ha'e kwéry. Ndogwerekói voi va'ekwe ave osyva-rehe opo apyape ári ave. Oikove jevy-ma Cristo ndive oiko ave mburuvixa ramo omanda hagwã onhondive mil ro'y peve. ⁵Oí ave heta omano va'ekwe ne'írã vyteri oikove jevy va'erã, ha'arõ-vy rei oiko arã. Upe mil ro'y peve Hesu ndive nomandái arã ha'e oikove. Hesu-rehe ojekuka uka va'ekwe oikove jevy ranhe va'e kwéry onhyprũ jevy-ma va'erã nhane moingove jevyha óra-py. ⁶Ovy'a ete voi va'erã imarangatu va'e kwéry onhyprũ jevy-gwi nhane moingove haty. Nomanovéi-ma va'erã ha'e kwéry. Oiko joty arã pa'í-rami Hesu Cristo pytyvõha ramo ha Nhandejáry Tupã pytyvõha ramo ave. Ha oiko arã Hesu Cristo ndive mil ro'y peve mburuvixa ramo oiko va'e hikwái.

Anhaygwasu-pe Nhandejáry omondo tatagwasu-py ohasa asy hagwã apyre'y gwarã

⁷⁻⁸Anhaygwasu osê jevy arã mil ro'y rire ojapo vai hagwã. Osê jevy va'erã vykwarusu onhemboty hagwe-gwi ombotavy jevy hagwã entéro yvypóry kwéry opa opa rupigwa kwéry-pe. Hesu reroviaha e'y va'e-pe, hese ija'e'y va'e-pe, Gogue pygwa kwéry-pe, Magogue mygwa kwéry-pe ombotavypa jevy va'erã. Anhaygwasu omboaty arã heta heta va'e yvy ku'i-rami etei onhorairõ hagwã mo'ã. Kwarahy resê-gwi, ka'aru-gwi, arapopy popy-gwi omboaty aty arã heru-vy onhorairõ hagwã mo'ã. ⁹Gwí Nhandejáry-rehe ojerovia va'e kwéry oimeha-rupí, entéro yvypóry kwéry osarambipa hikwái ogweroajere ijoko-vy mo'ã íxupe kwéry. Tetã Nhandejáry rembihayhu va'e jere-rupí ave. Ndojapói joty gwembiaipo vairãgwe. Nhandejáry ombou yváy-gwi tata ohapypa ete íxupe kwéry. ¹⁰Upe-ma ramo yvypóry mbotavyhare, anhaygwasu-pe Nhandejáry omondo ombohassa asy hagwã-py. Tatagwasu oíha-py omondo íxupe. Ita omboykupa va'erã heseve ave tata-py ombohassa asy voi hagwã íxupe. Upe-py omondo-ma va'ekwe upe mymba vaigwasu ete va'e-pe hesegwa nhe'ë momba'uhaty-pe ave ohasa asy meme hagwã. Ndojái arã voi íxupe mba'asy. Áry, pyhare peve ohasa asy arã apyre'y gwarã.

Yvy yváy ave okanhymba rire Nhandejáry ohekojohu va'erã enterove-pe

* 20:4 Dn 7.9,22,27

¹¹ Ahexa ave apykgwasu mburuvixagwasu pegwa morotĩ va'e. Hi'ári oĩ ogwapy va'e Tupã Nhandejáry. Upe-py ogwapy jave ogwahẽ-ma hi'óra vvy opa hagwã, yváy ave opa hagwã. Avave ndohexavéi-ma va'erã áry vvy ave. Ha opaete. Ndajahexavéi-ma va'erã.

¹² Upe jave ahexa-ma ave upe-py entéro omano va'ekwe ojoparapa onhembo'y oĩ-vy Nhandejáry rovagwy-py. Oipe'a heta kwatiagwasu. Peteĩ kwatia-rehe oĩ Nhandejáry-rehe ojerovia va'e kwéry réry. Hekove ijapyre'ỹ reheve oiko hagwã upe-py omoĩ uka va'ekwe héry kwéry upe kwatia-py. Ha ambue kwatia-rehe katu héry kwéry ndive ohai hembiapokwe pokwe-rehe ojerovia va'e, ojerovia e'ỹ va'e kwéry gwive rekohagwe. Omano va'ekwe gwive Nhandejáry hembiapokwe pokwe ojohu hese kwéry. Upe kwatia-rehe ojehaipa ete voi kente kwéry ojapo va'ekwe gwive. Ohekojohu-ma voi íxupe Nhandejáry. ¹³ Ygwasu-rupi omano va'ekwe ave ogwahẽ Nhandejáry rovagwy-py. Ha entéro omano va'ekwe rendaty-gwi osẽ sẽmba okwa-vy. Nhemokanhy ngatu haty-gwi ogwahẽ hikwái Nhandejáry rovagwy-py. Ha enterovéa-pe, peteĩ teĩ-pe Nhandejáry ohekojohu hembiaipo vai vaikwe-rehe. ¹⁴ Omano va'ekwe rendaty ogwerova uka-ma omombo tatagwasu-py. Áy ae katu ndoikovéi-ma va'erã nhemano. Upe tatagwasu nhane moingove e'ỹha voi. Nhane mokanhy ngatu haty voi. ¹⁵ Ha entéro va'e réry ndoikói ramo Nhandejáry kwatia-rehe hekove ijapyre'ỹ reheve oiko hagwã, Nhandejáry omondo va'erã íxupe ohasa asy hagwã-py upe tatagwasu-py oiko hagwã.

21

Vvy ipyahu va'e, yváy ipyahu va'e ave rehegwa nhe'ẽ

¹ Upe rire ojehexa uka xe-vy vvy ipyahu va'e áry ipyahu va'e ave. Áry oiko-ma va'ekwe vvy ave, ygwasu ave ndaiporivéi-ma.* ² Ahexa-ma katu Nhandejáry ombosako'i va'ekwe tetã hese ojerovia va'e pegwarã. Tetã imarangatu ete va'e upe va'e. Héry va'e Jerusalém ipyahu va'e. Ou va'e Tupã Nhandejáry-gwi. Ojewa jegwa porã porã verei voi. Kunhataĩ onhemonde porã omenarã ha-py ogwahẽha vérami voi upe tetã.* ³ Upe jave Nhandejáry apykgwasu ppy-gwi ombou nhe'ẽ. Onhe'ẽ hatã ramo ahendu he'i:

—Áy katu Nhandejáry oiko-tama kente kwéry pa'ũ-rupi. Ha peẽ kwéry peiko-ta Nhandejáry re'ýi ramo. Nhandejáry Tupã tee va'e oiko-ta pene ndive kwéry. Oiko-ta pende Járy ramo.* ⁴ Nhandejáry oikyty-ta pendéhegwi pende resay ponove hagwã pene rasẽ. Upe-py ndoikovéi-tama omano va'e, ndoikovéi-tama onhemboasy va'e, ojahe'o va'e. Mba'asy rasy ave nohendu mo'ávéi-ma upe pygwa. Yma oiko va'ekwe gwĩ va'ekwe opa-ma, ohasapa-ma, he'i apykgwasu ppy-gwi ombou va'e onhe'ẽ.*

⁵ Upéi Nhandejáry ogwapy jave oapykgwasu ári he'i:

—Áy ajapopa-ta ipyahu va'erã, he'i onhe'ẽ-vy.

He'i ave xe-vy:

—Ehai katu ko va'e anhete teegwa voi ko ko nhe'ẽ. Iporã voi enterove ojerovia tee hese, he'i.

⁶ Upéi he'i jevy:

—Ajapo japo va'erã gwive ajapopa-ma. Xe ko mba'e ypyrũ ramo voi aiko-ma xe va'ekwe. Ipaha rire ave xe aiko joty. Mba'e nheypyruha voi ko xe. Mba'e paha voi ave ko xe. Upe ijy'uhéi va'e-pe ame'ẽ va'erã y oy'u hagwã. Ipy'apygwarã hekovertã ame'ẽ rei va'erã íxupe.* ⁷ Vvy pype oiko jave xe-rehe ha-py onhembohekopyatã xéhegwi ojehesa rerova e'ỹ va'e-pe ame'ẽ va'erã ko heko porãrã. Peteĩ teĩ-pe ame'ẽ va'erã ko heko porãrã amombe'u kuri nde-vy. Xe aiko ave arã hekojary ramo ha ha'e kwéry oiko ave arã xe re'ýi ramo. ⁸ Entéro heko vai va'e ae oho va'erã ohasa asy hagwã-py. Entéro ipy'amirĩ va'e xe rape-rupi ogwata hagwã, entéro xe rerovia e'ỹha, entéro mba'e ojapo va'e ivai va'e, oporojuka va'e, teko ky'a-py oiko va'e, mohây ojapo va'e, omboete va'e ta'anga-pe, Tupã Nhandejáry e'ỹ va'e-pe, ha entéro ijapu va'e oho arã ohasa asy hagwã-py. Oiko asy arã tatagwasu-py

* 21:1 Is 65.17; 66.22; 2 Pe 3.13

* 21:2 Is 52.1; 61.10

* 21:3 Ez 37.27

* 21:4 Is 25.8; 65.19

* 21:6 Is 55.1

ita omboykupa va'erã hese. Upe tatagwasu yvypóry ombohéry rei nhane mokanhy ngatu haty ave, he'i xe-vy Nhandejáry ahai hagwã.

Jerusalém tetã ipyahu va'e rehegwa nhe'ẽ

⁹Upe-ma ramo upe sete marány'y ogwereco va'e pa'ũ-gwi ou peteĩ va'e xe renda-py. Ou ramo he'i xe-vy:

—Eju katu ahexa uka-ta nde-vy upe Ovexa Ra'y ramigwa va'e re'yirã. Hembireko vérami oiko meme arã índive he'ýi kwéry, he'i xe-vy.

¹⁰Upéi Nhandejáry Tupã Nhe'ẽ Marangatu tee va'e xe mo'arandu-ma xe reraha hagwã yvyatyrusu ijyvate va'e ári ohexa uka hagwã xe-vy. Upe ijyvate va'e ári-gwi ohexa uka xe-vy Jerusalém tetã. Imarangatu tee va'e voi upe tetã. Ou ramo Tupã Nhandejáry-gwi yváy-gwi ou upe va'e. ¹¹Iporã eterei voi. Nhandejáry mba'egwasuha reheve omimbipa upe tetã pyahu. Ita kyra rendy ramigwa jaspe héry va'e-rami omimbi porã va'e. ¹²Onhemboty ijerekwe-rupi oipemimba tetã jerekwe okëra kêraja mate oheja. Yvate peve hatã va'e-py omboty. Doze okë oĩ. Ijyke-rehe meme oĩ inhangarekoha Nhandejáry rembigwái. Doze oĩ inhangarekoha. Dozegwa réry oĩ ave ojehai okë ári. Peteĩ teĩ Israel ra'y amyrĩ kwéry réry oĩ okëgwasu-rehe. He'ýi tee pegwarã. ¹³Mbohapy hapy hokê. Hokê jova jovaipa voi upe tetã. Kwarahy resẽ ha-koty oĩ mbohapy. Ka'aru-koty oĩ mbohapy. Arapopy-koty oĩ mbohapy ave. Áry yke-koty oĩ mbohapy ave.

¹⁴Upe tetã ogweroajere ijokoha. Igwy-py oĩ ipytahoha, doze ita va'e. Ojehai hese doze héry ave. Ovexa Ra'y ramigwa va'e remimondokwe réry.

¹⁵Upe Nhandejáry rembigwái onhe'ẽ va'e xe-vy ogwereco oyvyra ramigwa ouro-gwi ijapopyre oipapa hagwã upe tetã, hokê ave. Ijerekwe rehegwa ave oipapa hagwã upe tetã.

¹⁶Ipekwe-rami joty ipukukwe. Upe Nhandejáry rembigwái oipapa ramo oyvyra ramigwa-py otopa hese:

—Dois mil e duzentos quilômetro ipukukwe, he'i hese.

Ha ipekwe ijyvatekwe ave peteĩxante ave. Ijyvatekwe-py ave ogwereco dois mil e duzentos ave. ¹⁷Oipapa ave ijokoha ha otopa sessenta e quatro metro ipekwe Nhandejáry rembigwái yváy pygwa kwéry oipapaha-rami. ¹⁸Upe ijyke-rupi oĩ va'e ijokoha katu ojejapo ita kyra omimbi va'e-gwi, héry va'e jaspe-gwi. Ha upe tetã katu ouro tee gwigwa omimbi voi va'e. ¹⁹Ha ijere rehegwa ojoko va'e katu ojejapo heta ita kyra jegwa jegwa-gwi. Ita hepyve pyve va'e-gwi voi ojejapo va'ekwe. Ijepyta hoha iypykwe ita kyra jaspe hesakã tee va'e. Ijepyta hoha imokõiha ita kyra safira hovy ete va'e. Ijepyta hoha imbohapyha ita kyra ágata pykasu ragwe hovy endy-rami va'e. Ijepyta hoha inhirundyha ita kyra esmeralda hovy ete va'e. ²⁰Ijepyta hoha icincoha ita kyra sardônia hesa'yju pytã va'e. Ijepyta hoha iseisha ita kyra sárdio pytã ete voi va'e. Ijepyta hoha iseteha ita kyra crisólito hesa'yju endy va'e. Ijepyta hoha hi'oitoha ita kyra berilo hovy ete va'e. Ijepyta hoha inoveha ita kyra topázio hesa'yju va'e. Ijepyta hoha idezha ita kyra crisópraso hovyngy va'e. Ijepyta hoha hi'onzeha ita kyra jacinto hesa'yju pytã va'e. Ijepyta hoha idozeha ita kyra ametista pytã ete va'e. Ita hepyve pyve va'e-gwi voi ojejapo va'ekwe ipytahoha kwéry.

²¹Upe doze okë va'e ojejapo va'ekwe doze hepy eterei va'e pérola-gwi. Ita kyra morotĩ tee hendy rovy sa'yju va'e voi pérola. Peteĩ pérola oiporu va'ekwe ojapo hagwã peteĩ okë. Upéixa oiporu doze pérola ojapo hagwã doze okë. Ha ojegwata hagwã upe tetã-rupi ojapo va'ekwe ouro tee-gwi. Hesakã porã va'e-gwi ojejapo va'ekwe.

²²Ndahexái ni peteĩ Nhandejáry-pe nhamboete haty upe tetã-my. Nhandejáry ae oiko upe-py ha'e Tupã ipu'aka tee va'e, Ovexa Ra'y ramigwa va'e ave oiko upe-py. Upéa-gwi nanhaikotevẽry nhamboete haty-rehe nhane mandu'a meme hagwã hese. Indivepa-ma nhaime. ²³Upe-py avave noikotevẽi va'erã ohesape va'e-rehe. Noikotevẽi va'erã kwarahy-rehe, jasy-rehe ave. Nhandejáry Tupã voi oiko upe-py. Ha'e voi opu'akaha reheve omohembipepa va'erã gweko marangatu ete-py upe-py. Ovexa Ra'y ramigwa va'e ave oiko upe-py omohembipe ave hagwã. Upéa-rehe noikotevẽi arã gwesape hagwã-rehe.*

* 21:23 Is 60.19

²⁴Entéro yvypóry opa opa rupigwa gwive oiko arã ha'e hendy-rupi. Gwĩ mburuvixagwasu kwéry ome'ẽmba-ma va'erã íxupe omba'egwasukwe. ²⁵Upe okẽ-ma onhemboty e'ỹ va'e voi. Áry ramo jepe nonhembotyíry. Ha ndoikóiry pyhare. Ijojapa rei voi áry. Upéixa-gwi nonhembotyí okẽ. Okẽ nandi va'e voi upe va'e. ²⁶Ha opa tetã tetã gwigwa otuvixakwe reheve, opu'akakwe reheve omboete arã Nhandejáry-pe. Ome'ẽmba omba'e retakwe. Gwembihayhukwe gwemiakate'ýgwe ave opa ome'ẽmba va'erã. Ojúepe omboete va'ekwe ohesa rerova va'erã Nhandejáry-rehe.*

²⁷Upe-py ndoikéi va'erã ipotĩ tee e'ỹ va'e. Gwĩ hembiaipo vai va'e ave ndoikéi va'erã. Ijapu va'e ndoikéi va'erã. Upe-py Cristo-rehe ojerovia tee va'e mante oike arã. Héry oĩ va'e Ovexa Ra'y ramigwa va'e kwatia-rehe hekove oiko hagwã apyre'ỹ. Ha'e kwéry mante oike arã upe-py.*

22

¹Ohexa uka ave xe-vy Nhandejáry rembigwái yváy pygwa y reko ete oporomoingove va'e, hesakã porã va'e. Osẽ va'e Nhandejáry apykagwasu gwy-gwi, Ovexa Ra'y ramigwa va'e apykagwasu gwy-gwi. ²Ha ohasa osyry-vy tetã mbyte-rupi. Ha upe mokõive y rembe'y-py ojoovái oĩ-vy yvyra rakã yva'y. Upe yva ho'u va'e oikove arã opa e'ỹ reheve. Peteĩ jasy jasy meme hi'a. Doze-ma oĩ hi'a peteĩ ro'y-py. Ha hogwe katu oiko yvypóry pohãrã omohesãi hagwã íxupe kwéry.

³Ndoikói arã upe-py Nhandejáry rembihayhu e'ỹ va'e. Upe-py oĩ arã Nhandejáry, Ovexa Ra'y ramigwa va'e ave oapykagwasu ári. Ha enterove omboete va'erã íxupe. Heroviaha kwéry gwive omomba'egwasu va'erã íxupe imboete-vy. ⁴Enterove ohexa arã Tupã Nhandejáry rova-pe. Ha héry katu oĩ arã isyva kwéry-rehe. ⁵Upe-py ndoiko mo'ávái pyhare. Upéixa-gwi avave noikotevẽiry tataendy-rehe, kwarahy rendy-rehe ave. Nhandejáry Tupã omohembipe jojapa arã íxupe kwéry. Hembipe-py mante oiko va'erã gwe'ýi kwéry ndive. Nhandejáry ndive ha'e kwéry oiko meme-ma va'erã mburuvixagwasu ramo apyre'ỹ gwarã.

Hesu ou jevy-tama óra rehegwa nhe'ẽ.

⁶Upéi katu Nhandejáry rembigwái he'i jevy xe-vy:

—Anhete teegwa voi ko nhe'ẽ. Iporã jarovia tee voi hese, he'i. —Tupã tee va'e omombe'u va'ekwe onhe'ẽ-py omombe'u va'ety kwéry-pe oiko va'erã-rehe. Áy ombou-ma katu gwembigwái yváy-gwi omombe'u hagwã ko'ã va'e ojehu-tama va'e-rehe. Ndahi'arevéi-ma voi oiko hagwã, he'i.

⁷—Xe ko aju jevy-tama voi, he'i Hesu. —Ovy'a va'erã Nhandejáry remimbota ojapo va'e, inhe'ẽ-py oiko va'e. Ko kwatia nhe'ẽ ndahi'aréi oiko hagwã nhe'ẽ-py oiko va'e gwive ovy'a-ma va'erã, he'i Hesu.

⁸Xe, João, Nhandejáry rembigwái tee va'e ko ahendu ahexa ave ko'ã va'e gwive. Upéa-rehe anhesũ Nhandejáry rembigwái yváy pygwa renonde-py amboete hagwã mo'ã íxupe, ha'e ohexa ukapa-gwi xe-vy entéro mba'e. ⁹Ha'e katu he'i xe-vy:

—Ani erenhesũ teĩ xe-vy xe mboete hagwã, he'i xe-vy. —Nhandejáry Tupã-pe ae katu emboete. Xe ko ne irũ voi. Nhandejáry nhe'ẽ-py omombe'u va'ety kwéry irũ ave ko xe. Entéro va'e opy'apy gwive ogwerovia tee-ma ko Nhandejáry nhe'ẽ erehai va'e kwatia-rehe inhirũ ave ko xe. Ani xe mboete. Nhandejáry Tupã-pe ae emboete katu, he'i xe-vy. ¹⁰—Ani ereha'arõ are are teĩ eremombe'u hagwã ko ojehu va'erã. Ndahi'arevéi-ma voi oiko va'erã. ¹¹Upe ojapo va'e gwembiaipo vai meme tojapo joty oiko-vy ivai va'e. Heko ky'a va'e toiko joty kuri teko ky'a-py. Heko porã meme va'e taheko porã meme joty ave. Heko marangatu va'e taheko marangatu meme joty, he'i xe-vy.

¹²—Pehendu katu, he'i Hesu Cristo. —Xe aju jevy-tama. Aru-tama enterovéa-pe íxupe gwarã hembiaipo apo repykwe. ¹³Xe ko mba'e ppyrũ ramo voi aiko-ma va'ekwe. Ipaħa

* 21:26 Is 60.11 * 21:27 Is 52.1; 1 Co 6.9-10; Gl 5.19-21; Ef 5.5 * 22:12 Is 40.10; 62.11; Sl 28.4

rيره ave xe aiko joty. Mba'e nheypyruha voi ko xe. Mba'e paha voi ave ko xe. Xe voi mba'e nheypyru ramo aiko, ipaha ramo ave aiko xe, he'i Hesu ójehe.*

¹⁴—Heko vy'a va'erã ipy'a potĩ va'e. Oao omongy'a e'ý va'e-rami oiko. Ha'e kwéry oike va'erã Nhandejáry retã-my indive oiko hagwã, yva aju oporomoingovehaty ho'u hagwã, ha oike hagwã okẽ-rupi, he'i.

¹⁵—Oĩ va'erã oike e'ý va'erã. Jagwa reko-rami oiko va'e ndoikéi va'erã. Mohãj ojapo va'e ndoikéi ave va'erã. Teko ky'a-rupi oiko va'e ndoikéi va'erã. Oporojuka va'e, omboete va'e ta'anga-pe tupã tee e'ý va'e-pe ndoikéi ave va'erã. Heko apu va'e ndoikéi ave va'erã. Oporombotavy va'e, onhe'ẽ rei va'e ave ndoikéi ave va'erã. Oka-rupi rei okwa va'erã hikwái. Ndoikéi va'erã upe-py, he'i.

¹⁶—Xe ko Hesu Cristo voi. Amondo kuri xe rembigwái yváy-gwi omombe'u hagwã nde-vy eromombe'u jevy hagwã Nhandejáry-pe omboete haty haty-rupi okwa va'e-pe. Xe ko xe rembypy voi mburuvixagwasu Davi. Inhemonha joapyri pyrire voi ko xe. Jasytata ko'ẽ reruha hembipe porã va'e ramigwa voi ko xe. Xe aju jevy-tama, he'i Hesu.

¹⁷—Eju katu, he'i ha'arõ-vy okwa va'e gwive.

Ha Nhe'ẽ Marangatu tee va'e ave.

—Eju katu, he'i íxupe.

Kóa nhe'ẽ renduha ave:

—Eju katu, he'i ave arã íxupe.

Upe ijy'uhéi va'e gwive tou katu. Upe y oporomoingove va'e hoy'use va'e tou ave katu. Ome'ẽ rei va'erã ou va'e-pe. Upe y omboy'u rei va'erã íxupe kwéry.*

*Kwatia nhe'ẽpaha*ra õhai João

¹⁸ Xe, João, amombe'use entéro ko kwatia nhe'ẽ ohendu va'e-pe gwive. Ko kwatia nhe'ẽ nhane mo'arandu nhane renonderã-rehe. Ani teĩ remoĩ ambue va'e. Ereheja joty koxagwa voi. Oĩ ramo gwĩ omoĩve va'e, peteĩ nhe'ẽ jepe oakã-gwi rei omoĩve ramo, anhete tee voi Nhandejáry ombõhasa asy arã íxupe. Ko kwatia-rehe ojehai va'ekwe marány ombou arã íxupe. ¹⁹ Oipe'a va'e ave ko kwatia nhe'ẽ nhane renonderã rehegwa nhe'ẽ-gwi oipe'a ramo peteĩ nhe'ẽ jepe Nhandejáry ave oipe'a va'erã íxugwi ima'erãgwe yváy pygwa. Yva aju oporomoingove va'e oipe'a arã íxugwi. Ndo'úi arã voi. Ndoikéi ave va'erã tetã marangatu-py. Henonderã porãrãgwe ko kwatia-rehe ojehai va'ekwe oipe'a-ma va'erã ave íxugwi. Oima'erãgwepe'apa va'erã íxupe.

²⁰ Ko va'e oikwaa uka va'e he'i:

—Ndaxe arevéi-ma voi aju jevy hagwã, he'i.

Ha xe ave ha'e:

—Eju katu xe Járy Hesu, ha'e joty íxupe.

²¹ Nhandejáry Hesu tapende rexakwaa porã rei katu enterovéa-pe. Amém

* 22:13 Is 44.6; 48.12 * 22:17 Is 55.1